


Testament cub co' nac di's ndac che'n Tad

Jesucrist



New Testament in Zapotec, Miahuatlán (MX:zam:Zapotec,  
Miahuatlán)

Testament cub co' nac di's ndac che'n Tad Jesucrist  
New Testament in Zapotec, Miahuatlán (MX:zam:Zapotec, Miahuatlán)

copyright © 1971 Wycliffe Bible Translators, Inc.

Language: Zapotec, Miahuatlán

Translation by: Wycliffe Bible Translators, Inc.

Zapoteco, Miahuatlán [zam], Mexico

Copyright Information

© 1971, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Miahuatlán

© 1971, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 4 Mar 2019 from source files dated 1 Mar 2019  
64c75c38-fe26-5ca1-b0d8-d75cd0576d77

## Contents

SAN MATEO . . . . .	1
SAN MARCOS . . . . .	74
SAN LUCAS . . . . .	119
SAN JUAN . . . . .	194
HECHOS . . . . .	247
ROMANOS . . . . .	315
1 CORINTIOS . . . . .	349
2 CORINTIOS . . . . .	380
GÁLATAS . . . . .	401
EFESIOS . . . . .	414
FILIPENSES . . . . .	423
COLOSENSES . . . . .	430
1 TESALONICENSES . . . . .	437
2 TESALONICENSES . . . . .	443
1 TIMOTEO . . . . .	447
2 TIMOTEO . . . . .	456
TITO . . . . .	462
FILEMÓN . . . . .	466
HEBREOS . . . . .	468
SANTIAGO . . . . .	489
1 PEDRO . . . . .	497
2 PEDRO . . . . .	506
1 JUAN . . . . .	512
2 JUAN . . . . .	520
3 JUAN . . . . .	521
JUDAS . . . . .	523
APOCALIPSIS . . . . .	526

## Di's Ndac Che'n Diox Co' Mque' Mate Ye's

*Trè' ndlu' cón che'n rye bin mèn co' ngòc xudgool Jesucrist axta co'se' ngóol Tad Jesucrist.  
(Lc. 3.23-38)*

<sup>1</sup> Loo libr ndxè' nda' cuent cón che'n rye mèn co' ngòc xudgool che'n Jesucrist co' nde bin David co' ngòc rey póla. No nda' loo libr ndxè' cuent le' Jesucrist nac bin che'n tedib mbi' co' ngo ban más pólle'a. Mbi'a ngro' lèe Abraham.

<sup>2</sup> Abraham ngòc xud thib mbyòo co' ngro' lèe Isaac. Ngoloa, ngòc Isaac xud thib mbyòo co' ngro' lèe Cob. Le' Cob na, ngòc xud thib mbyòo co' ngro' lèe Judá con taamas hues Judá. <sup>3</sup> Le' Judá na, mblo xin' thib xa'got co' ngro' lèe Tamar, xa'got Judá. Mxan Tamar Far no Zar. Ngòc Judá no Tamar xud no xna' Far no Zar. Le' Far na, ngòc xud thib mbyòo co' ngro' lèe Esrom. Esrom na, ngòc xud thib mbyòo co' ngro' lèe Aram. <sup>4</sup> Aram na, ngòc xud Aminadab. Aminadab na, ngòc xud Naasón. Naasón na, ngòc xud Salmón. <sup>5</sup> Le' Salmón na, mblo xin' Rahab, xa'got Salmón. Ngóol thib mbyòo co' ngro' lèe Booz. Booz na, mblo xin' Rut, xa'got Booz. Sya, ngóol thib mbyòo co' ngro' lèe Obed. Obed na, ngòc xud thib mbyòo co' ngro' lèe Isaí. <sup>6</sup> Isaia na, ngòc xud thib mbyòo co' ngro' lèe David co' ngòc rey póla. David co' ngòc reya mque noque' thib xa'got co' ngòc sa'l thib mbi' co' ngro' lèe Uri. Ale mxan xa'gota thib xgan' David. Xgan' Davida ngro' lèe Salomón. Ale ngòc David con xa'gota xud no xna' Salomón.

<sup>7</sup> Salomón na, ngòc xud thib mbyòo co' ngro' lèe Roboam. Roboam na, ngòc xud thib mbyòo co' ngro' lèe Abi. Abi na, ngòc xud thib mbyòo co' ngro' lèe As. <sup>8</sup> As na, ngòc xud thib mbyòo co' ngro' lèe Josafat. Josafat na, ngòc xud thib mbyòo co' ngro' lèe Joram. Joram na, ngòc xud thib mbyòo co' ngro' lèe Usi. <sup>9</sup> Usi na, ngòc xud thib mbyòo co' ngro' lèe Jotam. Jotam na, ngòc xud thib mbyòo co' ngro' lèe Acaz. Acaz na, ngòc xud thib mbyòo co' ngro' lèe Ezequi. <sup>10</sup> Ezequi na, ngòc xud thib mbyòo co' ngro' lèe Manasés. Manasés na, ngòc xud thib mbyòo co' ngro' lèe Amón. Amón na, ngòc xud thib mbyòo co' ngro' lèe Josi. <sup>11</sup> Josi na, ngòc xud thib mbyòo co' ngro' lèe Jeconi, no xud taamas hues Jeconi, co'se' ngòc tiemp co'se' ngòc mèn nación Israel xal moz loo mèn nación Babiloñ.

<sup>12</sup> Ngolo nguri'th tiemp co'se' ngòc mèn nación Israel xal moz loo mèn nación Babiloñ, Jeconi ngòc xud thib mbyòo co' ngro' lèe Salatiel. Salatiel na, ngòc xud thib mbyòo co' ngro' lèe Zorobabel. <sup>13</sup> Zorobabel na, ngòc xud thib mbyòo co' ngro' lèe Abiud. Abiud na, ngòc xud thib mbyòo co' ngro' lèe Eliaquim. Eliaquim na, ngòc xud thib mbyòo co' ngro' lèe Azor. <sup>14</sup> Azor na, ngòc xud thib mbyòo co' ngro' lèe Sadoc. Sadoc na, ngòc xud thib mbyòo co' ngro' lèe Aquim. Aquim na, ngòc xud thib mbyòo co' ngro' lèe Eliud. <sup>15</sup> Eliud na, ngòc xud thib mbyòo co' ngro' lèe Eleazar. Eleazar na, ngòc xud thib mbyòo co' ngro' lèe Matán. Matán na, ngòc xud thib mbyòo co' ngro' lèe Cob. <sup>16</sup> Cob na, ngòc xud thib mbyòo co' ngro' lèe Chè. Le' Chè na, ndoole' ngòc sa'l Mari. Mari na, mxan Jesús co' ne' tedib lèe co' nac Crist.

<sup>17</sup> Loo ryete bin ndxè', tiemp co' mbri'th desde co'se' ngo ban mbi' co' ngro' lèe Abraham axta co'se' ngo ban mbi' co' ngro' lèe David co' ngòc rey póla mdyaa sida bin. Lomisque' ne, tiemp co' mbri'th co'se' ngo ban Davida ngòc taasida bin axta co'se' ngòc mèn nación Israel moz yèe loo mèn nación Babiloñ. Lomisque' ne, tiemp co' mbri'th co'se' mtlo ngòc mèn nación Israel moz yèe loo mèn nación Babiloñ ngòc taasida bin axta co'se' ngóol Crist.

*Trè' ndlu' xá mod ngóol Jesucrist.  
(Lc. 2.1-7)*

<sup>18</sup> Taandxè' mod ngòc con' co'se' ngóol Jesucrist. Thib mza' yòn co' ngro' lèe Mari ngòp trat con thib mbyòo co' ngro' lèe Chè. Ngòc mza' co' lèe Maria xna' Jesucrist. Chè mdoodi's no Mari par selya' Chè con Mari. Per ndoore' selya' Chè con Mari no tyub no

Chè Mari, ale gunèe Chè mbe' xin'le' Mari. Per ne'nda'de Chè cuent xá mod mbe' xin' Mari. Mari mquée loo xin' por con' roo no con' xèn che'n Diox co' ngòc loo Mari por cón che'n Xpii Natú'. <sup>19</sup> Chè co' ngòcque' xin' sa'l Mari, Chè ngòc thib mbi' nali no thib mbi' nambii loo Diox. Co'se' gunèe Chè mbe' xin'le' Mari, indlya'ste Chè yecloo Chè loo Mari no quexù' Chè Mari loo xnaa. Ale mbli Chè xtùuz xexte lá' Chè Mari par ne'ta'de mèn cuent le' Chè xexte mblá' Mari. <sup>20</sup> Per láth ngue li Chè xtùuz con'a, chàa, ngro' too thib angl co' mtel' Tad Diox loo Chè làth mcal'. Ndxab angl loo Chè':

—Chè, lùu co' nde bin David co' ngòc rey póla, ne'zyebtel no ne'yecloodel no ne'thyontel càaya'que' Mari par tyub nol Mari xal xin' sa'lpe'l. Tac thib mbedbi' co' tyan Mari co' yi'th yáal yíloa, mbedbi'a mquée loo loo Mari por cón che'n Xpii Natú'. <sup>21</sup> Tyan Mari thib mbed. Yíloa, lùu tub lèe mbed Jesús. Tataa ryo' lèe mbed tac mbed tí' no làa mbed mèn co' nac mèn nación mbed loo quin mèn no loo xtol mèn.

<sup>22</sup> Tataa ngòc ryete con'a par mdyaaque' no ngòcque' no ndubque' di's co' gunii Diox por cón che'n thib mbi' co' mde'th di's co' ndxab Diox. Ndxab mbi'a:

<sup>23</sup> Le' thib mza' yòn quée looque' xin'. Mza'a tyan thib xgan' mza' no ryo' lèe mbeda Emanuel.

Di's co' nac di's Emanuel nee di's: Nzole' Diox làth na'.

<sup>24</sup> Co'se' ngro' mcal' loo Chè, mbli Chè xal mnibe' angl co' mtel' Tad Diox loo Chè. Mqueltàa no Chè Mari. No mdub no Chè Mari xal xin' sa'lpe' Mari. <sup>25</sup> Per mastale' mqueltàa no Chè Mari no mdub no Chè Mari le'n rye huiz co' mdoo nac xin' Mari, ne'ngáalte Chè Mari axta ngóol ner mbed co' ngòc mbed ndlyo loo Mari. Axta syare' ngòc Mari xa'gotpe' Chè. Ngoloa, mdub lèe Chè mbeda Jesús.

## 2

*Mèn co' anze'f ndxác ngro' liz no làaz par mbi'th too naa mènà Jesucrist co'te' ngóol Jesucrist.*

<sup>1</sup> Co'se' ngolo nguri'th plá huiz ngóol Jesús le'n thib yèez co' lèe Belén, yèez co' nac thib yèezya' che'n làaz mèn jude, le'xque' le'n tiempa ngòc thib mbi' co' ngro' lèe Herod rey loo mèn le'n nación Israel. Làth xtau'a, mzin plá mèn co' anze'f ndxác le'n ciuda Jerusalén. Mènà nde par ned ndlyen huiz. <sup>2</sup> Mnibdi's mènà loo mèn ciuda Jerusalén. Ndxab mènà:

—¿Máa mbeto' co' ngóolle'a, à', mbed co' gác rey loo mèn nación Israel? Nu' gunèele' mbèelhui' co' mblu' le' mbed ngóolle'. Mbèelhui'a mbyú' loo loo nu' par ned ndlyen huiz. Cona, nde nu' axta trè' par tyub xib nu' loo mbed no par cò' nu' yéc nu' loo mbed co' gác reya.

<sup>3</sup> Co'se' mbìn Herod con ryete mèn ciuda Jerusalén le' mènà mnibdi's máa mbed, ne'ñeede rey Herod cón li rey Herod. Ale mbyàa mbye'th xtùuz rey Herod. Ne'mbe see teede lezo' rey Herod con ryete mèn che'n ciuda Jerusalén. <sup>4</sup> Sya, mbli Herod mandad. Ndye'th ryete mèn co' ngòc jef co' más mnibe' loo nguley' no mèn co' ngòc maistr co' ndlu' cón che'n ley co' mxo'f Moisés loo mèn nación Israel tiempa. Mnibdi's Herod loo mènà. Ndxab Herod:

—¿Ché' non gu' pá gác co'te' gáal Crist, à'?

<sup>5</sup> Mènà mcàb loo Herod. Ndxab mènà:

—Crist gáal le'n yèez Belén co' nac thib yèezya' che'n làaz mèn jude tac tataa ndub di's loo libr co' mque' mèn co' mde'th di's co' ndxab Diox ye's co' ndxab:

<sup>6</sup> Gu' co' nac mèn yèez Belén co' nac thib yèezya' che'n làaz mèn jude, mastale' iñaade gu' xal mèn roo no mèn xèn làth mèn co' ñibe' rye yèezya', per làth gu' gáal thib mbi' co' gác jef loo gu' co' ñibe', no co' tyoo ner, no co' quenap mèn co' nac mèn nación Israel co' nac mèn nacionpe' daa.

<sup>7</sup> Sya, xexte ngurez rey Herod mèn co' ndxáca par huen huen ñibdi's Herod loo mènà par ta' mènà cuent loo Herod pól mtlo ngòc gunèe mènà mbyú' loo mbèelhui' loo mènà.

<sup>8</sup> Ngoloa, mtel' rey Herod mènà par ya mènà par ned le'n yèez Belén. Ndxab rey loo mènà:

—Huàa que tee gu' le'n yèeza. Huen huen ñibdi's gu' cón che'n mbedá loo mèn yèeza. No co'se' yilo zyal gu' mbedá, yi'th ta' gu' cuenta loon par ga too naan mbed, par tyub xiben no cò'en yéquen loo mbed, ne.

<sup>9-10</sup> Co'se' ngolo mbìn mèná di's co' ndxab rey, mxen mèná ned, nda mèná. Láth ndoo mèná ned, nda mèná par yèez Belén, mbere mbèelhui', mbyú' loo mbèelhui' loo mèná tedib vez, leque mbèelhui' co' mbyú' loo loo mèná co'se' mdoo mèná ned ndoore', nde mèná par ned ndlyen huiz. Co'se' gunèe mèn co' ndxáca mbèelhui'a, anze'f mdyac tín' lezo' mèná axta plóthe. Le' mbèelhui'a na, xègà xègà nda nerte loo mèná tedib vez axtaque' mblu' mbèelhui' loo mèná co'te' ngo mbed. Sya, xèe ngo too mbèelhui'a gáp yéc yòo co'te' ngo mbed, xgan' Mari. <sup>11</sup> Sya, ngòo mèná loo lue' co'te' ngòc liz mèn co'te' ngo xna' mbed con mbed. Texal gunèe mèná mbed con xna' mbed co' ngro' lèe Mari, ale mdub xib mèná loo mbed no mcòo' mèná yéc mèná loo mbed no ndxab mèná loo Diox:

—¡Ay, Dio's! Mbi' roo no mbi' xèn gác mbed ndxè'.

Ngoloa, mxal' mèná caj mèná co'te' ndxosua' tesor. Angmda'la's mèná tesor càa xna' mbed, co' gác che'npe' mbed yilóa. Tesora nac or, no thib xla' co' ndlyá' xal zen yal', no thib xla' co' ndlyá' xal perfum co' lèe mirr. <sup>12</sup> Ngolo mbli mèná con'a, mda' Diox cuent loo mèn co' ndxáca làth mcal' le'n huiza ne'berede mèná leque ned nde mèná par ne'ri'thte mèná co'te' nac liz rey Herod. Sya, mxen mèná tedib ned, ndyàa mèná par làaz mèná.

*Chè no Mari mxon' no mbeto' co' ngro' lèe Jesús par ned le'n nación mèn egipt.*

<sup>13</sup> Co'se' ngolo mxen mèn co' ndxáca ned ndyàa mèná, thib angl che'n Tad Diox mxo'f loo loo Chè làth mcal'. Ndxab angl loo Chè:

—Chè, jer goo che. Leque nal yál' fxen ned. Be' mbed con xna' mbed. Huàa xon' par ned le'n nación mèn egipt. Gòo gu' tya axtaque' lin avis loo gu'. Tac rey Herod ndlyá's cua'n mbed par guthxù' Herod mbed.

<sup>14</sup> Sya, ngro' mcal' loo Chè. Ngo che Chè. Ndxab Chè loo Mari:

—Mari, jer goo che. Nda no na' mbed par ned le'n nación mèn egipt nalle'. Mbe' Chè mbed no xna' mbed yál'a. Mxon' no Chè ryop Mari par ned le'n nación mèn egipt. <sup>15</sup> Ngo ban Chè ryop Mari, co' ngòc xin' sa'l Chè, con mbed le'n nación mèn egipt axta mzin huiz nguth Herod. Ngòc con' ndxè' loo Chè no loo mbed par ngòcque', no par mdyaaque', no par mdubque' di's co' gunii Tad Diox por cón che'n mèn co' mde'th di's co' ndxab Diox xal nac di's co' ndxab Diox:

—Par ned le'n nación che'n làaz mèn egipt ngo casloo xgan'en. No co'te' ngo casloo xgan'en, mblin par mbere xgan'en, ndye'th xgan'en par ned liz no làaz xgan'en tedib vez.

*Herod mnibe' ngua yuth solndad myen'bi' bix le'n yèez Belén.*

<sup>16</sup> Co'se' mden' rey Herod ya ne'ngri'thte mèn co' ndxáca liz rey Herod tedib vez, syare' mda' rey Herod cuent cón che'n mbed no cón che'n mèná le' mèn co' ndxáca mxiiis no Herod. Sya, ngocloo tín' Herod. Ale de xyàn mnibe' Herod loo solndad par ya yuth solndad ryete myen' bix co' nac ante myen'bi' co' nzo ban le'n yèez Belén no le'n rye yèezya' co' ñibe' yèez Belén, myen' bix co' nzo chop lin' par xàn', co' nee di's, xal nda tee tiemp co' mda' mèn co' ndxáca cuent loo Herod par bel'que' yigaa mbed xin' Mari loo solndad làtha. <sup>17</sup> Axta syare' mdyaa di's no mdubque' di's co' ndxab Jeremi co' mde'th di's co' ndxab Diox, co' mque' Jeremi ye's loo libr co' nac xti's Diox co' mbez:

<sup>18</sup> Anze'f thib ruid mbyèn le'n yèez Ramá. Tant thib mèngo'r mdub yen mèn no lezo' mèn no tant mbín' mèn no ngrozèe yath mèn. Ne' tí' yéc no ne' tí' lezo' rye mèngot co' nac mèn nación Israel por mbín' mèngota por cón che'n xgan' bix mèngota. Indlyá'ste mèngota tegán mèngota lezo' mèngota no yende mod tegán taamas mèn lezo' mèngota tac ryete myen'bi' bix xgan' mèngota nguth.

<sup>19</sup> Co'se' mzin huiz nguth rey Herod, thib angl co' mtel' Tad Diox mbere mxo'f loo angl loo Chè làth mcal' le'n nación mèn egipt. Ndxab angl loo Chè:

<sup>20</sup> —Chè, Diox mtel' daa par gal lin avis lool: Fthop taa rye con' ngue nol. Tac gu' bii no mbed par ned le'n yèezya' che'n làaz mèn nación Israel. Tac mèn co' mbli purad par guth mèn mbed, mèn nguthle'.

<sup>21</sup> Sya, co'se' ngo nìi izlyo' tedib huiz co' nde nquea, mthop mtaa Chè rye con' co' ngòc che'n Chè. Sya, ndxab Chè loo Mari:

—Ndyàa no na' mbed par ned le'n yèezya' che'n làaz mèn nación Israel.

<sup>22</sup> Láth ndoo Chè ned con Mari no mbed, nda zin Chè le'n yèezya' che'n làaz mèn nación Israel, mbìn Chè le' Arquela, xgan' rey Herod, nacle' gobernador loo mèn gulàaz Jude lugar che'n Herod, xud Arquela. Sya, mzyeb Chè bii Chè par ned le'n yèezya' co' nac làaz mèn jude. Tya, mbere Diox, mdoodi's no Diox Chè làth mcal' xá mod li Chè. Ngoloa, mxen Chè ned con Mari co' nac xa'got Chè no con mbed co' nac Jesús. Ndyàa Chè le'n thib yèez chu'th co' nac yèezya' che'n làaz mèn galile. <sup>23</sup> Per ya que mzinle' Chè con Mari no mbed, ngòc ban Chè con Mari no mbed le'n thib yèez co' lèe Nazaret. Tataa ngòca loo Chè no loo Mari par ngòcque' di's, no mdyaaque' di's, no mdubque' di's co' gunii mèn co' mde'th di's co' ndxab Diox le' mbed co' hue' lèe Jesús hue' tedib lèe co' lèe Jesús nazaren.

### 3

*Juàn Bautist mblo yalbàn loo mèn co'te' nagán tiempa.*

*(Mr. 1.1-8; Lc. 3.1-9, 15-17; Jn. 1.19-28)*

<sup>1</sup> Le'n tiemp co' ngo ban Jesús le'n yèez Nazaret, le'n tiempa mblo Juàn Bautist yalbàn loo mèn co'te' nagán, co'te' nac yèezya' che'n làaz mèn jude. Mblo Juàn Bautist yalbàn loo mèn. <sup>2</sup> Mbez Juàn Bautist co'se' ngo Juàn yalbàn loo mèn:

—Blàa gu' yéc gu' no blàa gu' lezo' gu'. No fse' gu' xtùuz gu' no mod co' ndxàp gu' loo Diox. Tac tiemp co' mbly'a's Diox ñibe' Diox loo gu' loo cón che'n Diox nde zin' gaxle'.

<sup>3</sup> Cóon che'n Juàna ngòc di's co' mque' Sayi ye's, di's co' ndxab Diox loo Sayi. Taandxè' mbez di's loo ye's:

Ndxèn thib di's che'n thib mbi' co' mbez yèe cabii co'te' nagán co'se' ngo mbi' yalbàn. Mbez mbi': Bli nab gu' gu' loo cón che'n con' ndac. Fse' gu' ryethe mod ye'rsin' co' ndxàp gu' loo Diox par gác nab gu' co'se' yi'th ñibe' Tad Diox gu' loo gu'.

<sup>4</sup> Xab Juàn co' mdoc Juàn nayà' con yis yid camell. Lomisque', cinch co' ngo le'n Juàn natoxcua' con yid má'. Lua' Juàn no xít Juàn ngòc mbiistoo no mzin huan. <sup>5</sup> Co'se' mtlo Juàn mblo Juàn yalbàn, sya, ndxi'th mèn ciuda Jerusalén, no ryete mèn yèezya' co' nac làaz mèn jude, no ryete mèn co' nac mèn yèezya' co' nziri' gax ro yó'be' Jordán, loo Juàn par gòn mèn di's co' mbez Juàn no co' nde'th Juàn. <sup>6</sup> Le' sya, texal ndxelo mxo'f dol mèn no ngo ro mèn cón che'n xquin mèn no cón che'n xtol mèn loo Juàn, ndli Juàn bautizar mèn le'n yó'be' Jordán.

<sup>7</sup> Látha, ñèe Juàn nde huax mèn co' nac mèn xley' farise no co' nac mèn xley' saduce loo Juàn. Mèn nde loo Juàn par li Juàn bautizar mèn. Sya, ndxab Juàn loo mèn:

—¡Aa mèn xley' farise, no mèn xley' saduce, mèn co' nayi' co' nac xal mbel' co' lèe huid! Leque gu' ndlu' loo xtàa gu' nado' nac gu'. Per par le'n lezo' gu' nzo con' ye'rsin'. ¿Chó mbli' loo gu' par lyá' gu' loo con' ye'rsin' co' gác loo gu' co'se' gác tiemp co'se' yecloo Diox loo gu' axta plóthe, à'? <sup>8</sup> Nabe'ste fque tee ban gu' loo mèn no nabe'ste gòp gu' mod loo mèn par lu' gu' loo mèn le' gu', licque', ngulàale' yéc no ngulàale' lezo' gu' loo Diox cón che'n con' ye'rsin' co' ndli gu'. <sup>9</sup> Ne' ne' li gu' xtùuz le'n lezo' gu' no ne' ne' gab gu' loo lezo' gu' anze'f ntac naca loo Diox le' Abraham nac xudgool gu'. Tac daa ngue nii loo gu': Diox, licque', gác li par bix loo quèe ndxè' no gác quèe ndxè' mèn co' naban co' nac binpe' che'n Abraham. <sup>10</sup> Nde niin thib con' loo gu', ne: Le'i ndxàcle' loo gu' nalle' nde zin' gaxle' co' xà' Diox gu' par cobii Diox gu' le'n ye'rbii thidtene xal co'se' ncho' mèn thib xan' yaa xlè co' inda'de xlè ndac par co' mèn yaa xlèa loo quii. <sup>11</sup> Licpe' ba'i, na ndli bautizar gu' con nít par ndxàca thib mustr loo mèn co' ndlu' loo mèn le' gu' ngulàale' yéc no ngulàale' lezo' gu' no mse'le' gu' mod co' ngòp gu' loo Diox. Per nalle' ndele' thib mbi' co' yi'th loo gu' yilo lin bautizar mèn. Mbi'a li bautizar gu' co'se' lyàa



Xpii Natú' loo gu' co' gác xal thib quíi no thib bèel. Mbi'a ndxàp más con' la's nii mbi' no la's ya' mbi' leque daa. No ne' por chu'th ne'ta'den par mbi'a. No axta ne' libid co' ngue nii mbi', indxàalte daa par làan libid nii mbi'. <sup>12</sup> Li mbi' thib con' loo mèn, ne, xal co'se' nzole' pal ya' thib mbi' par toocua' mbi' nzob triu par quis mbi' nzob triu mbi'. Yíloa co' xà' mbi' nzob triu loo yix nzob triu. Yíloa na, cosua' mbi' nzob triu. Le' yix co' yende chó juisa na, tec mbi' loo quíi co' ne'yu'de thidtene. Tataa li mbi', co' yi'th loo gu' yíloa, loo mèn co' tyal yíla's loo mbi'a par ryo xà' mènna loo mèn co' ne'tyalte yíla's loo mbi'a.

*Juàn mbli bautizar Jesús.*

*(Mr. 1.9-11; Lc. 3.21-22)*

<sup>13</sup> Le'n huiz co' ngue go Juàn yalbàn, Jesús ngro' par ned le'n yèzya' che'n làaz mèn galile. Ngua Jesús par ned ro yó'be' Jordán co'te' ngo Juàn par mbli Juàn bautizar Jesús le'n yó'be' Jordán. <sup>14</sup> Ndxab Jesús loo Juàn li Juàn bautizar Jesús. Per co'se' mbìn Juàn li Juàn bautizar Jesús, ne'ndalte Juàn li Juàn bautizar Jesús. Ndxab Juàn loo Jesús:

—U' ndxàal li bautizar daa, Tad. ¿Xá mod ndlya's U' ale daa li bautizar U', yey?

<sup>15</sup> Ndxab Jesús loo Juàn:

—Lìcque' nac di's co' ngolo guneel ba'. Yende cón niin lool. Per mastale' nden'l ndxàal lin bautizar lùu, bli co' ñibe'en lool. Bli bautizar daa tac taandxè'que' ndxàal li na' par tyaaque', no gácque', no tyubque' di's xal mnibe' Diox par gaca.

Syare', mdyal Juàn. Mbli Juàn bautizar Jesús. <sup>16</sup> Per texal ngulàa Jesús le'n nít par ngòc bautizar Jesús le'n nít, no ngro' Jesús le'n nít, chàa, mxyal' loo bé'. Látha, gunèe Jesús Xpii Natú' che'n Diox co' ñaa xal thib palomxtil' hora co' nde làa loo bé' loo Jesús. Sangmbyan' Xpii Natú' loo Jesús. No ngo no Xpii Natú' Jesús thidtene. <sup>17</sup> Leque hora, mbyèn thib di's loo bé' co' ndxab:

—Mbi' ba' nac xgan' daa co' anze'f ngudloon no lezon. Por cón che'n mbi' ba' anze'f ndyac tín' lezon.

#### 4

*Mebizya mbly'a's andoo Jesús cua'n Jesús xquin Jesús no xtol Jesús.*

*(Mr. 1.12-13; Lc. 4.1-13)*

<sup>1</sup> Ngoloa, mbli Xpii Natú' che'n Diox mxen Jesús ned. Nda Jesús thib lugar co'te' nagán par coby'a' Mebizya Jesús no li Mebizya preb thib con' loo Jesús par ñee Mebizya ñeene' ché' tli Jesús co' gab Mebizya loo Jesús. Mebizya mbly'a's andoo Jesús cua'n Jesús xquin Jesús no xtol Jesús.

<sup>2</sup> Le'n rye huiza, xlat Jesús. Ne'nghuade Jesús le'n cho' huiz no le'n cho' yál'. Ngoloa, anze'f mblyan' Jesús. <sup>3</sup> Látha, ngua Mebizya loo Jesús par ñee Mebizya ñeene' ché' tli Jesús co' gab Mebizya loo Jesús tac Mebizya nanee le' Jesús ndlyan'. Ndxab Mebizya loo Jesús:

—Chele' lùu, lìcque', nac xgan'pe' Diox, bnibe' loo quèe ndxè' gác quèe ndxè' pan par hual.

<sup>4</sup> Jesús mcàb loo Mebizya. Ndxab Jesús:

—Loo libr co' nac xti's Diox ndub di's co' mbez: iante con pan cue ban mèn loo izlyo'. Ndxè'leque', mèn cue ban loo izlyo' ndxè' por cón che'n ryete di's co' gunii Diox loo mèn.

<sup>5</sup> Ngoloa, mbe' Mebizya Jesús le'n ciuda Jerusalén co' nac ciuda natú' che'n Diox. Mbli Mebizya par mquée Jesús yéc templ co'te' nac más gáp. <sup>6</sup> Tya, ndxab Mebizya loo Jesús:

—Chele' lùu nacque' xgan'pe' Diox, lyazen que'l thib brinc trè' axta loo yòo. Tac loo libr co' nac xti's Diox ndub di's co' mbez:

Yub Diox ñibe' loo angl che'n Diox par quenap angl lùu. Angl te'f ya' angl par lyàal ya' angl par ne'lyàadel loo quèe no ne'huí'de ladd loo quèe.

<sup>7</sup> Jesús mcàb loo Mebizya. Ndxab Jesús:

—Loo libr co' nac xti's Diox ndub di's co' mbez: Ne'lidel preb no ne'coby'a'del Tad co' nac Tad Diox lùu par ñeel ñeene' ché' teti Tad Diox lùu por cón che'n con' ye'rsin' co' ngue lil.



<sup>8</sup> Ngoloa, mbe' Mebizya Jesús loo thib yii roo. Mblu' Mebizya ryete nación co' nziri' dib athu loo izlyo' loo Jesús. Mblu' Mebizya ryethe con' co' nac con' roo no con' xèn che'n rye nación co' nziri' dib athu loo izlyo' loo Jesús, ne. <sup>9</sup> Ndxab Mebizya loo Jesús:

—Ryete con' ba' tan càal par gàca che'npe'l chele' lùu tyub xib loon no cò'l yécl loon.

<sup>10</sup> Le' sya, ndxab Jesús loo Mebizya:

—Biiche thib lad loon, Mebizya. Byàa. Tac ndub di's loo libr co' nac xti's Diox co' mbez: Ante loo Dioxpe' lùu tyub xibl no cò'l yécl no ante loo Dioxpe' lùu lil sirv.

<sup>11</sup> Sya, xexte mxen Mebizya ned. Ndyàa Mebizya. Mblá' Mebizya Jesús. Ngoloa, mzin angl che'n Diox loo Jesús. Mbli angl mandad loo Jesús.

*Jesús mtlo mxo'f zin' zin' co' nde xo'f zin' Jesús le'n yèezya' co' nac gulàaz mèn galile.*

*(Mr. 1.14–15; Lc. 4.14–15)*

<sup>12</sup> Leque le'n huiza, mbìn Jesús le' Juàn Bautist ngue lezi'f. Mbere Jesús, ndyàa Jesús par ned le'n yèezya' che'n làaz mèn galile. <sup>13</sup> Tya, sangnguri'th Jesús yèez Nazaret. Ne'mbedte Jesús le'n yèez Nazaret. Ndxle'leque', ngua ban Jesús le'n yèez co' lèe Capernaum co' nac thib yèez co' nziri' gax ro lagun, lagun co' nziri' loo xyòn mèn galile co'te' nazal' xyòn mèn che'n làaz mèn zabalón, no co'te' nazal' xyòn mèn che'n làaz mèn neftalí. <sup>14</sup> Tataa ngòc con'a loo Jesús par ngòcque', no mdyaaque', no mdubque' di's co' mque' Sayi ye's, Sayi co' mde'th di's che'n Diox. Sayi ndxab:

<sup>15</sup> Co'se' yi'th Crist, Crist ya que tee par ned le'n yèezya' che'n làaz mèn zabalón, no par ned le'n yèezya' che'n làaz mèn neftalí, no par ned co' nsyo ro nítto' co' nda tedib lad ro yó'be' Jordán. No ya que tee Crist par ned le'n yèezya' che'n làaz mèn galile co'te' nzo ban huax mèn co' inacte mèn nación Israel.

<sup>16</sup> Mèn co' nzo ban par neda, mènna ngure li con' co' mcàb loo mènna loo cón che'n Diox xal mèn co' ngure loo yál'cuau. Diox mbli par mdyub xnii yéc mènna no par mdyub xnii lezo' mènna por cón che'n Crist. No ryethe mèn co' alithe nzi ban loo con' co' ncàb yalguth loo mènna, Diox ntenii yéc mènna no ntenii Diox lezo' mènna por cón che'n Crist.

<sup>17</sup> Axta syare' mtlo Jesús, mblo Jesús yalbàn loo mènna tya. Mbez Jesús loo mèn par neda:

—Gulàa yéc gu' no gulàa lezo' gu'. Fse' gu' xtùuz gu' no mod co' ndxàp gu' loo Diox. Tac tiemp co' ndlyas Diox ñibe' Diox loo gu', tiempa mzinle' loo gu'.

*Jesús ndxab loo thap mbi' co' ndyen mbèel: Ftoo nque gu' xísen. Ya' gu' nda na'.*

*(Mr. 1.16–20; Lc. 5.1–11)*

<sup>18</sup> Láth nda riid Jesús ro lagun co' nziri' loo xyòn che'n mèn galile, gunèe Jesús chop mbi' co' ndxàc hues. Thib mbi' ngro' lèe Mon Pedr. Le' tedib mbi'a na, ngro' lèe Ndech. Nzi gobii ryop hues mbi' yex le'n nít loo lagun par yigaa mbèel loo ryop hues mbi' tac ryop hues mbi' ndyen mbèel. <sup>19</sup> Sya, ndxab Jesús loo Pedr no loo Ndech:

—Ya' gu' nda na'. Ftoo nque gu' xísen. Daa li le' ryop gu' gac mbi' co' lu' loo mèn cón che'n Diox par yò mèn loo cón che'n Diox xal ndxàc co'se' ndyen gu' mbèel con yex gu'.

<sup>20</sup> Co'se' mbìn ryop hues mbi' tataa ndxab Jesús, mblá' ryop hues mbi' yex. Nda nque ryop hues mbi' xís Jesús.

<sup>21</sup> Gundee Jesús taandxepete más delant, gunèe Jesús taachop mbi' co' ndxàcguè' hues. Thib mbi' ngro' lèe Cob. Tedib mbi' ngro' lèe Juàn. Ryop hues mbi'a ndxàc xgan' thib mbi' co' ngro' lèe Zebede. Nzo ryop hues mbi' le'n thib yòoyaa con xud mbi'. Ngue go bdè' ryop hues mbi' yex le'n yòoyaa con xud mbi'. Jesús ngurez ryop hues mbi'a. Ndxab Jesús:

—Ftoo nque gu' xísen. Ya' gu' nda na', ey.

<sup>22</sup> Leque hora mblá' myen' yòoyaa con xud myen'. Nda nque myen' xís Jesús.

*Jesús ngue lu' huax mèn.*

*(Lc. 6.17–19)*

<sup>23</sup> Be' taa be' taa nda tee lu' Jesús mèn le'n rye yèezya' che'n làaz mèn galile. Ngue lu' Jesús mèn le'n sinagog mèn co' nziri' rye lugar co'te' mque tee Jesús. Ngo Jesús yalbàn.

Mbez Jesús loo mèn cón che'n di's ndac cón che'n xá mod ndlya's Diox ñibe'pe' Diox loo mèn. No mteyac Jesús mèn, mèn co' mque no chol yíiz le'n rye yèezya' ned mque tee Jesús. <sup>24</sup> Láth mque tee Jesús par neda, anze'f thib mèn yèezya' che'n làaz mèn sir mbìn cón che'n Jesús. Mbi'th no mèn ryete mèn yíiz co' nzo par neda, mèn co' ndyac len chol yíiz, no mèn co' mden' chol yalnè, no rye mèn co' mque no chol mbii che'n xpíi meexù', no mèn co' mque no yíiz enferesi, no mèn co' mque no yíiz mbii co' nac yíiz bech. Mteyac Jesús ryete mèn yíiza. <sup>25</sup> Mdoo nque huax mèn yèezya' che'n làaz mèn galile, no mèn yèezya' che'n làaz mèn decápolis, no mèn che'n ciuda Jerusalén, no mèn yèezya' che'n làaz mèn jude, no mèn rye yèezya' co' nziri' par ned ndlyen huiz, ned nziri' yó'be' Jordán, xís Jesús.

## 5

*Jesús mdub loo thib yii par mblo Jesús yalbàn loo mèn.*

<sup>1</sup> Co'se' gunèe Jesús anze'f thib mènley' nziri' con Jesús, Jesús mquée loo thib yii co' ndub tya. Mdub Jesús loo yíia. Le' myen' xin' mté'th Jesús na, thidte mqueltàa, ngure myen' dib vuelt loo Jesús. <sup>2</sup> Mtlo Jesús, mblu' Jesús myen' xin' mté'th Jesús. Ndxab Jesús loo myen' taandxè':

*Jesús ngue lu' cón che'n chop ned mèn.*

*(Lc. 6.20–23)*

<sup>3</sup> —Huen nda mèn, mèn, co' nden' le'n lezo' nac mènà mèn be'the loo Diox no co' nden' le'n lezo' yende mod li mènà con' ndac co' ndxòo lezo' Diox. Tac Diox co' ñibe'pe' loo mènà ndli par ndxàc con' ndac loo mènà.

<sup>4</sup> Huen nda mèn co' nzi xi yéc no co' nzi xi lezo' tac Diox tegánque' lezo' mènà.

<sup>5</sup> Huen nda mèn nado' co' inacte mèn nate's no co' inacte mèn naxal', mèn co' ndoo xal' lezo', tac gac che'npe' mènà loo izlyo' co' ngòc con' co' mcàbgòn Diox càa mènà.

<sup>6</sup> Huen nda mèn co' ndyub yo'f lezo' no co' anze'f ndlya's que tee nalì mènà loo Diox xal mèn co' ndlyan' no co' ndxec lezo' tac Diox lyath no mènà que tee nalì mènà loo xtàa mènà no que tee nalì mènà loo Diox.

<sup>7</sup> Huen nda mèn co' ndlyat lezo' ñèe hues xtàa tac Diox lyatque' lezo' ñèe Diox mènà.

<sup>8</sup> Huen nda mèn co' ndxàp mod par li mèn sirv loo Diox thib lì yéc mèn no thib lì lezo' mèn tac mènà hui'que' loo Diox.

<sup>9</sup> Huen nda mèn co' ndli mbe nagàl lezo' hues xtàa mèn no ndli mènà ndxu' ndxàl lezo' hues xtàa mèn co' nziri' con nado' di's nado' cuent tac Diox mbez no ngòoque' Diox cuent le' mènà nacque' xin' Diox.

<sup>10</sup> Huen nda mèn co' ndyub ngu's mèn por mod co' nac mod ndac co' nzi tee ban mènà tac loo mènà tyalque' Diox no ta' Diox lugar yòo mènà loo cón che'n Diox par ñibe'pe' Diox loo mènà.

<sup>11</sup> Huen nda gu', myen', co'se' aseli mèn ta' mèn xyàn lezo' gu', no li mèn ngòc nguàal con' loo gu', no ñèe mèn chol di's ye'rsin' loo gu' por cón chenen no maste. <sup>12</sup> Fxo'f nde' fxo'f ndla' lezo' gu' no gure gu' guyith guxiis tac con' roo no con' xèn gac co' ta' Diox càa gu' loo bé' yíloa. Cona, ngue niin loo gu': Fxec gu' loo con' ndxàc loo gu' tac tatua'que' mque tee mdub ngu's mèn prob mèn co' mde'th di's co' ndxab Diox, mèn co' mque tee ban póla ndoore' co'se' gáal gu'.

*Jesús ndxab loo myen' xin' mté'th Jesús: Gu' nac xal ted. No nac gu' xal xniì loo mèn loo izlyo'.*

*(Mr. 9.50; Lc. 14.34–35)*

<sup>13</sup> Tolo ndxab Jesús loo myen' xin' mté'th Jesús: Nde niin thib con' loo gu': Neeque' gu' le' ted ndli par ne'yiza'de chol nít yèth o bé' co' ngo mèn ted loo, ¿lé'? Chele' teda alithe nzo'f di's nac ted co' inaziide par ne'yiza'de con' co' ngo mèn ted, sya, ya yende cón ntac ted. No cobii mèn ted par loo tub mèn loo ted. Tataa mod, ne, gu' nzo làth mèn co' alithe nque tee ban loo chol con' ye'rsin' par càba loo mènà le' mènà ne'tolode cua'n mod gac mènà mèn ye'rsin' axta plóthe. Per chele' gu' ne'que tee ban ndacte loo mèn

ye'rsin'a, càba le' mènà tolo li con' ye'rsin' axta plóthe no yende cón ntac gu' loo Diox. Sya, gàca loo gu' co' xà' Diox gu' loo zin' che'n Diox xal co'se' mblobii mèn teda.

<sup>14</sup> Lomisque' ne, gu' nac xal xnii loo mèn ye'rsin' loo izlyo'. Neeque' gu' no nda'que' gu' cuent le' thib ciuda co' nziri' gáp loo thib yii yende mod ga's loo mèn. Thidteneque' ndxú' ciudaa loo mèn. <sup>15</sup> Ne' ne' co mèn xnii thib lampr no yiloa tau' mèn loo lampr con thib cajón. Ndxé'leque', quetal mèn lampr gáp par tenii lampr loo mèn co' nzo le'n nyòo liz mèn. <sup>16</sup> Cona, ngue niin loo gu': Tataaque' bli gu' no fque tee ban ndac gu' loo mèn, gu' co', lìcque', nac xal xnii loo mèn ye'rsin' loo izlyo' par hui' mèn no ta' mèn cuent loo ryethe con' ndac co' ndli gu'. Co'se' ñèe mèn le' gu' ndlique' con' ndac, le' sya, mènà tolo li gác con' guryath no con' guryèn loo Diox xud gu' por cón che'n gu' làth mèn.

*Jesús ngue lu' loo mèn cón che'n ley co' mxo'f Moisés loo mèn.*

<sup>17</sup> Ne'lide gu' xtùuz no ne' ne' yila's gu' le' daa ndal par techeen no ton'en ley co' mxo'f Moisés loo mèn. Ne'ngalten par ton'en ley co' mxo'f Moisés loo mèn. Ne' ne' ngalen par techeen di's co' gunii mèn co' mde'th di's co' ndxab Diox póla. Ne'ngalten par techeen no ton'en cón che'n leya no cón che'n di'sa. Ndxé'leque', ndalen par lipe'en ryethe con' cón nee di'spe' cón che'n ley no di's co' mde'th mèn co' ndxab Diox póla. <sup>18</sup> Tac, lìcpe' ba'i, na ngue nii lo gu': Láth be' nziri' bé' co' nac loo bé' no izlyo', ne'biichede nec thib letr no nec thib yalnibe' ne'zye'de no ne' ne' bix loo co' nac cón che'n ley co' mxo'f Moisés loo mèn axtaque' gáque', no tyaaque', no tyubque' di's ryete con' co' mdoo lezo' Diox gác por cón che'n ley co' mxo'f Moisés loo mèn. <sup>19</sup> Cona, ngue niin loo gu': Le' mèn co' tè'b no ne'lide mèn cas di's co' ñibe' ley co' mxo'f Moisés ndxè', co' nac yalñibe' co' nac más be'the, no chele' mènà ndlu' loo taamas mèn leque con' ndli mènà, Diox co cuent le' mènà nac más mèn be'the loo rye mèn co' ñibe' Diox. Per mèn co' ndyubdi's loo ryethe di's co' ñibe' ley co' mxo'f Moisés loo mèn, no ndlu' mènà loo xtàa mènà li xtàa mènà xalque' ndli mènà, le' sya, co Diox cuent gác mènà mèn roo no mèn xèn loo taamas mèn loo cón che'n co'te' ñibe' Diox loo mèn. <sup>20</sup> Daa ngue nii loo gu': Chele' gu' ne'que tee ban ndacte thib yalnaban co' nac thib yalnaban más ndac leque mod co' nzi tee ban mèn co' ndlu' cón che'n ley co' mxo'f Moisés loo mèn nación Israel, no mod co' nzi tee ban mèn co' nac mèn xley' farise, le' sya, thidteneque' ne'gácte loo gu' yòo gu' co'te' ñibe' Diox par ñibe' Diox loo gu'.

*Jesús ngue lu' loo mèn cón che'n mèn co' ndxecloo ñèe xtàa.*

*(Lc. 12.57-59)*

<sup>21</sup> Gu' nanee no nonque' gu' no nda'que' gu' cuent xal ngòc di's co' mbli' mèn mod che'n mèn loo xtàa mèn làth di's co' ndub loo ley co' mxo'f Moisés loo mèn pólle'a: Ne'guthte gu' xtàa gu'. Tac chele' chol mèn guth chol hues xtàa mèn, cón che'n mènà tub rez thib juez. <sup>22</sup> Per daa ngue nii loo gu': Chol mèn co' angnziri' ndxàc nayi' no ndxòo xyàn lezo' mènà ñèe mènà hues xtàa mènà, cón che'n mènà ndxàal tub rez thib juez. Lomisque' ne, chol mèn co' nque di's con xtàa mèn, sya, cón che'n mènà ndxàal tyub rez loo mèn co' ndyoo ner, no co' ndyoo naa, no co' ñibe', loo mèn nación Israel. No chol mèn co' gab loo hues xtàa mènà le' mènà nac mèn naxèn no mèn nasan no mèn yéc brel, mènà nzo ryes yòo ye'rbìil co'te' ndxetoo bèel no quii.

<sup>23</sup> Más de cona, ngue niin con' ndxè' loo gu': Chele' chó gu' nzi yoo làth gu', no láth nzi yoo gu'a, hue' gu' gòn gu' no ofrend gu' par ta' gu'i loo cón che'n Diox no cuet gu' ofrend gu' co' nac gòn loo mes, no axta syare' te' lezo' gu' le' hues gu' no xtàa gu' ndxecloo ñèe gu', <sup>24</sup> sya, lá' gu' ofrend gu'a loo mes par ner ya gu', ya tàl gu' loo di's no loo cuent loo chol hues gu' no loo chol xtàa gu' co' ndxàc con' ye'rsin' loo. Sya, bere gu', ye'th gu' co'te' ndoo mes. No gab gu' loo Diox: Ofrend nu' ndxè', Tad Diox.

<sup>25</sup> Tolo ngue niin loo gu', ne: Chele' chol mèn co' ngyoo no gu' ya ta' part cón che'n gu' loo juez, bli gu' par tyoodi's ryop gu' mènà ned nda gu' ñeene' xá mod li gu' no xá mod gác cón che'n gu' par ne'quexù'de mènà gu' loo juez ó loo xcal. Yiloa na, ta' juez o xcal gu' loo xa' co' nac tinient o mayor. Le' tinient o mayor na, co gu' lezi'f. <sup>26</sup> Lìcpe' ba'i, daa

nii loo gu': Tya nzo gu'. Ne'ryo'de gu' lezi'f axtaque' zib gu' tmi co' nac mult gu'. Sya, co' juez o xcal gu' lezi'f.

*Jesús ngue lu' loo mèn cón che'n mèn co' ndli yalburrid.*

<sup>27</sup> Lomisque' ne, nonque' gu' no nda'que' gu' cuent xal ngòc di's no cuent co' mblu' mèn mod che'n mèn loo xtàa mèn làth di's co' ndub loo ley co' mxo'f Moisés loo mèn póla co' mbez: Ne'líde gu' yalburrid. <sup>28</sup> Per daa ngue nii loo gu': Chol mèn co' ndyub yo'f lezo' ngüi' mèn loo thib xa'got par gàal mèn xa'gota, mblile' mèn yalburrid le'n lezo' mèn con xa'gota.

<sup>29</sup> Lomisque' ne, angab na'i: Chele' gu' ndli cuent no nden' gu' le' ngudloo gu' co' nac ladli, lìcque', nac co' ndli par cua'n gu' xquin gu' no xtol gu', más huen blo' gu' ngudloo gu' thib lad loo gu'. Tac más huen gàca loo gu' yende sa ngudloo gu' leque tyactii dib lad gu' loo quì no loo bèel le'n ye'rbiil. <sup>30</sup> No chele' gu' ndli cuent le' ya' gu', lìcque', nac co' ndli par cua'n gu' xquin gu', más huen fcho' gu' ya' gu' no blobii gu' ya' gu' thib lad loo gu'. Le' sya, más huen gàca loo gu' yende sa ya' gu' co' nac thib part che'n lad gu' leque lyàa dib lad gu' le'n ye'rbiil. Por cona, thidtene ne'cua'nte gu' xquin gu' no xtol gu' par ne'yòode gu' le'n ye'rbiil.

*Jesús ngue lu' loo mèn cón che'n mèn co' ndlá' xin' sa'l.*

*(Mt. 19.9; Mr. 10.11-12; Lc. 16.18)*

<sup>31</sup> Tolo ndxab Jesús loo mèn:

—Nonque' gu' no naneeque' gu' xal nac di's co' ndub loo ley co' mxo'f Moisés loo mèn póla le' chol mèn co' mbez lá'xù' mèn xin' sa'l leque mèn, ta' mèn ye's co' lèe act co' ta' cuent no co' lu' le' mèn mblá'xù' xin' sa'l. <sup>32</sup> Per daa ngue nii loo gu': Chele' thib mbi' lá'xù' xin' sa'lpe' mbi' no ingue lide xin' sa'l mbi' yalburrid, le' sya, leque mbi' ngue li par mbez mèn le' xin' sa'l mbi' ngue li yalburrid mastale' ingue lide xa'i. No mèn co' selya' con xa'got co' mblá'xù' sa'la ndoore', xa'bi'a ngue li yalburrid con xa'gota, ne.

*Jesús ngue lu' loo mèn ne'te'thte mèn lèe Diox anxle'.*

<sup>33</sup> Más de cona, nonque' gu' no nda'que' gu' cuent xal mbez di's co' ndub loo libr co' ngòc ley co' mxo'f Moisés loo mèn póla co' mbez: Ne'lá'de gu' no ne'yathla'ste gu' li gu' co' mcàbgòn gu' li gu' co'se' mde'th gu' lèe Diox loo mèn par li gu' chol con'. <sup>34</sup> Per daa ngue nii loo gu': Nec thib mod no nec tedib mod ne'te'thte gu' lèe Diox. Nec thib mod no nec tedib mod ne'te'thte gu', co' nee di's, nac lèe bé', xal ndli taamas mèn tac loo bé' nac co'te' nzo Diox. <sup>35</sup> Ne' ne' te'th gu', co' nee di's, nac lèe izlyo' xal ndli taamas mèn. Tac izlyo' nac loo Diox xal co'se' ndli nii mèn descans loo thib banc. Ne' ne' te'th gu', co' nee di's, nac lèe ciuda Jerusalén xal ndli taamas mèn. Tac ciuda Jerusalén nac lizpe' no làazpe' che'n rey roo no che'n rey xèn co' nac yub daa co' nac Crist. <sup>36</sup> Ne' ne' te'th gu', co' nee di's, nac lèe yéc gu' xal ndli taamas mèn. Tac gu' ne'gácte toxcua' nec thib yis yéc gu', co' nac yis guch no co' nac yis nagat par yan'a thidtene tataa. <sup>37</sup> Más huen guuz gu': Neeca, o guuz gu': Tyè'. Tac ryete di's co' mbez mèn co' nac masre' di's loo con' mbezen ndxè', ale ndli mèn con'a por cón che'n Mebizya.

*Jesús ngue lu' loo mèn cón che'n mèn co' ngo xtàa cón ndli no xtàa mèn mèn.*

*(Lc. 6.29-30)*

<sup>38</sup> Más de cona, nonque' gu' no nda'que' gu' cuent xal mbez di's co' ndub loo libr co' nac ley co' mxo'f Moisés loo mèn póla: Chele' chó mèn cue yoo no teza' thib mbi' thib ngudloo xtàa mbi', mèn teza' thib ngudloo mbi' co' mteza' ngudloo xtàa mbi'a, ne. Lomisque' ne, chele' chó mèn cue yoo no co' yèe thib mbi' thib quele xtàa mbi', lomisque' mod, co' mèn thib quele mbi' co' mblo' quele xtàa mbi'a. <sup>39</sup> Per daa ngue nii loo gu': Fxec gu' loo chol con' ye'rsin' co' li no mèn hues xtàa gu' gu'. Chele' chol mèn co' lya's quis thib lad rloo gu', fte'b gu' tedib lad rloo gu' loo mèn par quis mèn tedib lad rloo gu', ne. <sup>40</sup> No chele' chol mèn ndly'a's li de mandar gu' no ale ndly'a's mèn teche mèn camis gu', fta' gu' chamar gu' hue' mèn, ne. <sup>41</sup> Lomisque' ne, chele' chol mèn ndly'a's ñibe'xù' mèn

loo gu' par hue' gu' yó' co' nac che'npe' mèn xís gu' casque' son kilometr, be' gu'i xís gu' taason kilometr. <sup>42</sup> No chol mèn co' ña'b ro chol con' loo gu', fta' gu' con' càa mènà. No chol mèn co' lya's teche gu' con' loo mèn, fteche gu'i loo mènà no ne'cà'de gu'i loo mènà.

*Jesús ngue lu' xá mod más huen que' lezo' mèn ñèe mèn xtàa mèn co' nac ngolo ngola's che'n mèn.*

*(Lc. 6.27-28, 32-36)*

<sup>43</sup> Más de cona, nonque' gu' no nda'que' gu' cuent xal ngòc di's co' mblu' mèn loo xtàa mèn xal mbez di's co' ndub loo ley co' mxo'f Moisés loo mèn póla: Fque' lezo' gu' gunèe gu' mèn co' ndxàc amiu gu'. Le' mèn co' nac ngolo ngola's che'n gu' na, gocloo gu' gunèe gu' mènà. <sup>44</sup> Per daa ngue nii loo gu': Fque' lezo' gu' gunèe gu' mèn co' nac ngolo ngola's che'n gu'. Nado' di's nado' cuent tyoodi's no gu' mèn co' ñii yèe ñii tii cón che'n gu'. Bli gu' con' ndac loo mèn co' ndxòo xyàn lezo' ñèe gu'. Gurez gu' Diox cón che'n mèn co' angnziri' ndli ngòc nguàal con' loo gu' no ndub ngu's mèn gu', ne. <sup>45</sup> Chele' gu' li tataa, licpe' ba'i, gac gu' xin' xud gu' Diox co' nzo loo bé'. Tac Diox xud gu'a ndli le' huiz ntenii loo mèn ye'rsin' no loo mèn ndac. No ndli xud gu' Diox ndlyàa yuu loo mèn co' nac mèn nalì no mèn nambii loo Diox no loo mèn ye'rsin'. <sup>46</sup> Tac chele' gu' ante nque' lezo' ñèe gu' mèn co' nque' lezo' ñèe gu', ¿ché' ndyac gu' ngue li gu' con' ndac loo Diox sya, cà'? Ingue lide gu' con' ndac loo Diox, ey. Tac axta mèn co' ndli cobrar tmi cón che'n contribución ndli tataa. Ante nque' lezo' mènà ñèe mènà mèn co' nque' lezo' ñèe leque mènà. <sup>47</sup> No chele' gu' nii Diox ante loo mèn gulàazpe' gu', ¿chó con' ndac ndli gu' loo Diox co'se' ndli gu' tataa, sya? Yende chó con' ndac ndli gu' loo Diox chele' gu' ngue li tataa, ey. Tac leque con'a ndli mèn co' inacte mèn nación Israel. ¡Aa, gu' mèn izlyo'! <sup>48</sup> Gòc gu' mèn nalì no gòc gu' mèn nambii co', licque', nque' lezo' ñèe hues xtàa xal nac xud gu' Diox co' nzo loo bé', Diox co' nac Diox nalì no Diox nambii. Tac xud gu' Diox nque'que' lezo' ñèe alux mèn.

## 6

*Jesús ndlu' loo mèn xá mod li mèn con' ndac loo xtàa mèn.*

<sup>1</sup> Tolo mblu' Jesús loo mèn. Mbez Jesús:

—Nabe'ste fque tee ban ndac gu' loo Diox. Ne'gàcte gu' arid mèn nate's par hui' chol mèn co' ndxàc hues xtàa gu' loo con' ndli gu'. Tac chele' gu' li tataa, sya, tataa mod ndye's gu'. Le' sya, xud gu' co' nzo loo bé' ne'lide par gáp gu' cón che'n gu' loo xud gu' Diox. <sup>2</sup> Ngue niin loo gu', ne: Ne'tubte gu' arid ruid loo mèn par cuez mèn trompet loo mèn xal ndli mèn co' anze'f ntembii ro no co' anze'f ntembii xti's le'n sinagog no le'n yèez par ned ndxè' par ned ba'. Ale tataa ndli mènà par gab chol mèn: Susque' huen nac mèn ba', yoo. Licpe' ba'i, daa ngue nii loo gu': Por gust co' nda' mènà lezo' mènà, ale leque mènà ndli par guneei loo mènà. No yende chó con' co' gac che'n mènà gáp mènà loo Diox. <sup>3</sup> Per co'se' ta' gu' gòn càa mèn prob, bli gu' par ne' mèn co' ndxàc amiu gu' ne'ta'de cuent pló cón nac co' nda' gu' gòn. <sup>4</sup> Más huen xexte fta' gu' gòn càa prob mènà. Le' sya, xud gu' Diox co' nzo loo bé', co' ngue hui' loo gu'a, li par tolo anggac con' ndac loo gu'.

*Jesús ngue lu' xá mod cuez mèn Diox.*

*(Lc. 11.2-4)*

<sup>5</sup> Tolo mblu' Jesús mèn. Ndxab Jesús:

—Co'se' cuez gu' Diox, ne'gàcte gu' xal mèn co' ntembii ro no xal mèn co' ntembii xti's. Mènà anze'f ndyubla's cuez Diox, ndoo ga' mèn le'n sinagog. Mènà ndyubla's ndyoo ga' pál squin ned, ne, par cuez mènà Diox par hui' no ñaa hues xtàa mènà loo mènà. Licpe' ba'i, daa ngue nii loo gu': Con mod co' ndxàp mènà, leque mènà mbli guneei loo mènà. No tataa mod yende chó con' co' gac che'n mènà gáp mènà loo Diox. <sup>6</sup> Per co'se' cuez gu' Diox, gòo gu' le'n nyòo co'te' ndxàt gu' no ftau' gu' ro ryo'. Gurez gu' Diox xud gu' co'



nzo loo gu' le'n quart co'te' ndxàt gu'. Xud gu' Diox co' ngue hui' xexte loo gu', xud gu' Diox li par gac con' ndac loo gu' loo xnaa.

<sup>7</sup> Co'se' cuez gu' Diox, ne'cuezte gu' lèe Diox goze goze con leque di's co' mbez gu' co' intacte xal ndli mèn co' inacte mèn naciòn Israel. Tac ndli mènà xtùuz por di's co' mbez mènà goze goze no maste tataa mod más ndxòn Diox ro mènà co'se' tataa mbez mènà loo Diox. Per ilìcte con'a. <sup>8</sup> Ne'gàcte gu' lalque' xal mènà, tá, tac xud gu' Diox naneeque' no nonque' cópe' nquin gu' ndoore' co'se' ña'b gu' con'a loo xud gu' Diox. <sup>9</sup> Cona, ngue niin loo gu' taandxè' mod cuez gu' Diox:

Diox xud nu', co' nzo loo bé', ndlya's nu' no ña'b nu' loo U' le' mèn ta' cuent no ten' mèn thidte U' nac Diox natú'pe'. <sup>10</sup> Nu' mbez loo U' no ña'b nu' loo U' le' U' ñibe'pe' loo mèn dib athu loo izlyo'. No gàca xal nee lezo' U' loo izlyo' ndxè' xalque' ndxàc co' nee lezo' U' loo bé'. <sup>11</sup> Fta' U' lua' nu' no xít nu' co' hua nu' nalze no taamas con' co' naquinque' nu' atate huiz. <sup>12</sup> Fton' U' xquin nu' no xtol nu' xal nteri'th ntecan' nu' xèn xyàn co' ndli hues xtàa nu' loo nu'. <sup>13</sup> Ne'lá'ya'de U' nu' par aseli nu' cua'n nu' xquin nu' no xtol nu' loo U'. Ndxè'leque', blàa U' nu' loo ryethe con' ye'rsin'. Tac U' ñibe' loo ryethe con'. No ndxàp U' ryethe con' roo no ryethe con' xèn la's nii U' no la's ya' U'. No che'npe' U' nac ryethe con' roo no con' xèn le'n lín' co' ntlo, no le'n lín' co' ndxelo, no le'n lín' co' ne'lith node thidtene. Taandxè' gàca.

<sup>14</sup> Tac chele' gu' nteri'th no ntecan' chol xen no xyàn co' ndli chol mèn hues xtàa gu' loo gu', le' sya, xud gu' Diox co' nzo loo bé' ton'que' xquin gu' no xtol gu' co' ncu'a'n gu'. <sup>15</sup> Per chele' gu' ne'teri'thte no ne'tecan'te chol xen no xyàn co' ndli hues xtàa gu' loo gu', ne' xud gu' co' nzo loo bé' ne'ton'te xtol gu' no xquin gu' co' ncu'a'n gu'.

*Jesús ngue lu' loo mèn xá mod li mèn co'se' cue xlat mèn.*

<sup>16</sup> Co'se' lya's gu' cue xlat gu' por ndxep tiemp, ne'lu'de gu' loo mèn le' gu' nzi xi lezo' xal ndli mèn co' ntembìi ro no mèn co' ntembìi xti's. Tac mènà asendli ndlu' mènà loo mèn le' mènà nxi lezo'. No nse' mènà rloo mènà par hui' taamas mèn le' mènà nzi xlat. Lìcpe' ba'i, daa ngue nii loo gu': Gust co' nda' mènà lezo' mènà, con'a ndli tyathe guneei loo mènà loo Diox. No yende chó cón co' gac che'n mènà gáp mènà loo Diox. <sup>17</sup> Per gu', co'se' cue xlat gu', blo gu' chu'th aceit yéc gu' no ftee gu' bèu yéc gu'. No ftech gu' rloo gu' par ne'lu'de gu' gu' loo mèn nzi xlat gu' xal ndli mèn co' ntembìi ro no co' ntembìi xti's <sup>18</sup> par tataa mod ne'ten'te lezo' mèn le' gu' nzi xlat. Ndxè'leque', ante xud gu' Diox co' nzo no gu' non no nanee cón che'n gu'. Sya, xud gu' Diox li anggac con' ndac loo gu'.

*Jesús ngue bez loo mèn más huen gáp mèn con' ndac loo bé'.*

*(Lc. 12.33-34)*

<sup>19</sup> Lomisque', ngue niin loo gu', ne: Ne'gath lyuxte gu' par que no gu' yalgon' gu' loo izlyo' ndxè', co'te' ndxeza' yalgon', no co'te' ndlyux yalgon', no co'te' nquée mxil yalgon', no co'te' mquée mbèd yalgon', no co'te' ndli huan' huan' yalgon'. <sup>20</sup> Más huen, fcua'n gu' mod no bli gu' par gáp gu' yalgon' loo bé' co'te' ne'quéede mxil yalgon', no ne'huade mbèd yalgon', no co'te' yende cón li par yiza' yalgon', no co'te' ne'li huan'te huan' yalgon'. <sup>21</sup> Tac chele' gu' anze'f nque' lezo' ñèe yalgon', sya, li gu' cuent yalgon'a nac lezo' gu' no ngudloo gu' por anze'f ndyac gu' ñèe gu' yalgon'a. Le' con' co' más nac cón che'n Diox na, thib lad nque' gu' con' co' nac cón che'n Diox.

*Con ngudloo mèn ngüi' mèn ned ndyee mèn par ne'yizi'fte mèn no par ne'yiga'ste mèn ned ndyee mèn.*

*(Lc. 11.34-36)*

<sup>22</sup> Con ngudloo mèn ngüi' mèn chol con', ¿lé'? Per chele' mèn indyubte yo'f lezo' loo con' ngüi' mèn, mastale' ngüi' mèn loo chol con' ngüi' mèn, no chele' mèn inda'de lugar li mèn con' ye'rsin' por cón che'n con' co' ngüi' mèn, sya, nambüique' ndoo mèn no huen nque tee mèn loo Diox. Sya, ne' ne' inac ngudloo mèn co' ncu'a'n xquin mèn loo mèn. <sup>23</sup> Per ndxe'leque', chele' mèn thib líte ndli xtùuz no nden' mèn le'n lezo' mèn ante li mèn con' ye'rsin' por ngüi' mèn loo con' con ngudloo mèn par gac che'n mènà cón che'n

yalgon' che'n izlyo' ndxè', mènà thidtene ncuau yéc no ncuau loo par ne'ñeede mènà chó ro yila's mèn co'se' tyoodi's mèn. Ne'ñeede lezo' mènà cón che'n xá mod ndxàal que tee ban ndac mènà. No thidtene nanguib mènà.

*Yende mod yòo mèn loo cón che'n Diox co'se' más ndxath ndlyux mèn ñèe mèn tmi.*

*(Lc. 16.13)*

<sup>24</sup> Cona, ngue niin loo gu' tedib vez: Yende chó moz nzo co' li zin' loo chop patrón. Tac chele' moz li preb li moz zin' loo chop patrón, sya, yòo xyàn lezo' moz ñèe moz thib patrón. Le' tedib patrón na, más huen tyac lezo' moz ñèe moz patrona. O bien, más altant tyoo moz loo thib patrón. Le' loo tedib patrón na, yecloo moz. Cona, ngue niin loo gu': Yende mod li mèn sirv loo Diox chele' mèn más ndxath ndlyux loo cón che'n yalgon' che'n izlyo' ndxè'.

*Diox nquenap mèn co' nac xin' Diox. No ndli Diox par que no mèn con' naquin mèn thib huiz tedib huiz.*

*(Lc. 12.22-31)*

<sup>25</sup> Niin loo gu', ne, ey: Ne'tyóode gu' no ne'gath lyuxte gu' par gab gu' loo lezo' gu' pá ned ya gu' zin' par que no gu' cón hua gu' no cón gu gu'. Ne' ne' tyóo gu' par gab gu' loo lezo' gu' pá ned tyee centav par tyu' xab gu' co' goc gu'. ¿Ché' ndli gu' cuent ante par hua mèn nzi ban mèn loo izlyo' ndxè', cà'? No ¿ché' ndli gu' cuent más ntac xab mèn leque ladpe' mèn, cà'? Yende xàa. <sup>26</sup> Hui' gu' loo mbin bé' co' nxobii loo mbii. No bli gu' xtùuz cón che'n mbin. Mbin ingode bin. Ne' ne' inthop mbin cosech. Ne' ne' ingosua' mbin cosech. Mastale' tataa ndxàca loo mbin, xud gu' Diox co' nzo loo bé' neeque' xá mod huua xud gu' Diox mbin. Ale'que' gu' más ntac leque mbin. ¿Pà ne' huua Diox gu' xal nguaa Diox mbin! <sup>27</sup> ¿Chó thib gu' co' nziri' trè' co' más ndxath ndlyux gác gu' zib gu' mase taarol metr loo gu' par yol' gu' taachu'tha? Yende xàa, ¿lé'?

<sup>28</sup> ¿Chonon susque' ndyóo gu' cón che'n xab gu' co' nquin gu', à'? Hui' gu' loo ye' madalen co' nzo'f yii den xal ndryoo ye' madalen. Ne' ne' indli ye' madalen zin'. Ne' ne' inzii ye' madalen dó. <sup>29</sup> Per na ngue nii loo gu': Ne' Salomón co' ngòc rey póla ne'ngoc xabte xal ye' madalen, mastale' mque no Salomón huax xab Salomón co' nabe's natoxcua'. <sup>30</sup> Chele' Diox tataa ndli mdoc xab yii den no yé' huize' tec mèn huana le'n rdii liz mèn, ale'que' loo gu' ne' li Diox más co' ndac xal huana. ¿Aa mèn izlyo' co' pente ndxela's loon! <sup>31</sup> Por cona, ngue niin loo gu': Ne'tyóode gu' no ne'gath lyuxte gu' par gab gu': ¿Pá ned tyee co' hua na'? ¿Pá ned tyee co' gu' na' yé' huize', yoo? No ¿pá ned tyee centav par tyu' xab na' yé' huize', ne? <sup>32</sup> Ne'lide gu' tataa tac mèn co' nziri' dib athu loo izlyo' co' inacte mèn nación Israel, mènà ncuau'n no ndyóo mènà cón che'n ryethe con'a. Per xud gu' Diox co' nzo loo bé' nonque' no naneeque' le' gu' naquinque' ryete con'a. <sup>33</sup> Con' co' ngue niin loo gu' ndxè' nac nerleque' con' ndxàal li gu': Fta' gu' lugar ñibe'pe' Diox loo gu'. No fcua'n gu' mod que tee ban lì gu' xal ndxòo lezo' Diox li gu'. Chele' gu' tataa li, sya, Diox li par que no gu' ryethe taamas con' co' nquin gu'. <sup>34</sup> Por cona, ngue niin loo gu', ne: Ne'tyóode gu' no ne'gath lyuxte gu' nalle' cón che'n con' co' hua gu' no con' co' gu' no con' co' nquin gu' yé' huize'. Ne'gabte gu' loo xtàa gu': Huen ngua na' nalze. Mzyal thib le' rol lua' na' par nduhua na' no xít na' co' gu' na'. Per ¿yé', à'? ¿Cón hua na' no cón gu' na'? Anxle' mbez gu' tataa. ¿Chonon anze'f ndyóo gu' cón che'n con' co' gác loo gu' yé' huize', à'? Nzoque' huax con' co' nac cón che'n con' co' ndxàc loo gu' nalle' par tyóo gu' no par gath lyux gu' nalle', ey.

## 7

*Jesús ngue lu': Ne'huide mèn no ne'ñaade mèn loo cón che'n cón ndli xtàa mèn.*

*(Lc. 6.37-38, 41-42)*

<sup>1</sup> Ne'huide gu' no ne'ñaade gu' loo con' ndli taamas mèn par quexù' gu' mènà. Tac chele' gu' tataa tolo li, le' sya, Diox tub rez cón che'n gu' par quexù' Diox gu' yé' huize', ne. <sup>2</sup> Tac Diox tub rez cón che'n gu' co'se' gác huiza par tetii Diox gu' xalque' ngüi' gu' no



ña'a gu' loo taamas mèn par quexù' gu' mènà. Xalque' nac mod co' ndxàp gu' con taamas mèn, tataaque' li no Diox gu' co'se' tub rez Diox cón che'n gu'. <sup>3</sup> ¿Xá mod más ngüi' gu' loo thib le' chu'th yix co' nzo ngudloo hues xtàa gu' leque hui' gu' loo yix co' más naroo co' nzo ngudloo gu', co' nee di's, ale más ngüi' gu' loo ndxepte con' ye'rsin' co' ndli hues xtàa gu' no ingüi'de gu' loo huax con' ye'rsin' co' ndlipe' gu', à'? <sup>4</sup> No ¿xá mod ale ndli gu' ryes mbez gu' loo hues xtàa gu': Hues, led cuante. Bla' go'en thib le' yix chu'th co' nzo ngudloo ba'. No inda'de gu' cuent cón che'n yix co' nac más naroo co' nzo ngudloo gu' ba', à'? <sup>5</sup> Aa, que ndxác gu' ntembii gu' ro gu' no ntembii gu' xti's gu', ndee gu'. Ner blo' gu' yix co' nac más naroo co' nzo ngudloo gu' ba'. Le' yiloo na, gu' nee xá mod co' gu' yix chu'th co' nzo ngudloo hues xtàa gu' ba', co' nee di's, blá' gu'. Ya ne'tolode li gu' huax con' ye'rsin' co' ndli gu'. Sya, tataa mod gáp gu' razon co'x gu' loo xtàa gu' cón che'n ndxepte con' ye'rsin' co' ngue li hues xtàa gu'.

<sup>6</sup> Ne'tolode ta' gu' cuent no te'th gu' cón che'n di's ndac che'n Diox loo mèn co' nac mèn nayi' no loo mèn ye'rsin' tac ne'stolque', chàa, gác nayi' mènà loo gu' xal mbac nayi'. No ne'stolque' xiis no mènà cón che'n di's ndaca xal ndli nguch co'se' ndla's xi nguch con' ndxuhua nguch. No ndlo ndub nguch loo con' ndxuhua nguch.

*Jesús mbez: Bna'b gu' con' loo Diox. Bli gu' xal mèn co' ngue cua'n thib con' nquin mèn. Bli gu' xal mèn co' nte's puert par xal' mèn puert par yòo mèn co'se' cuez gu' Diox no co'se' ña'b gu' con' loo Diox.*

*(Lc. 11.9-13; 6.31)*

<sup>7</sup> Cona, ngue niin loo gu': Co'se' cuez gu' Diox, gurez gu' Diox taandxè' mod xal ndli mèn co' ña'b con' loo xtàa mèn. Le' sya, Diox li par que no gu' con' co' ña'b gu'a. No co'se' cuez gu' Diox, bli gu' loo Diox xal ndli mèn co'se' mtuhuan mèn thib con' ntac. Yiloo, noo noo ncu'a'n mèn con' mdyuhuaana axta zyal con'a loo mèn. Le' sya, tataa mod li Diox par ta' Diox con' ña'b gu' loo Diox càa gu'. No co'se' cuez gu' Diox, bli gu' xal mèn co' nte's ryo' liz mèn axtaque' xal' mèn ryo' par yòo gu'. Tataa mod, li Diox que no gu' con' co' ña'b gu' loo Diox. <sup>8</sup> Tac mèn co' tolo mbez Diox, dib nzo yéc mèn no dib nzo lezo' mèn, Diox li cas mènà. Lyath no Diox mènà no xal' Diox ned no xal' Diox yó' loo mènà par que no mènà con' co' tolo ña'b mènà loo Diox.

<sup>9</sup> ¿Ché' nzo chó gu' co' nac gundan loo xin' gu', angab na'i, chele' xin' gu' ña'b con' hua xin' gu' loo gu', ché' tòo valor loo gu' no ché' tli gu' ryes ta' gu' thib le' quèe càa xin' gu' lugar de ta' gu' pan càa xin' gu' co'se' ña'b xin' gu' pan loo gu' par hua xin' gu', à'? <sup>10</sup> Lomisque' ne, ¿ché' tòo valor loo gu' no ché' tli gu' ryes ta' gu' thib mbel' càa xin' gu' co'se' ndlya's xin' gu' hua xin' gu' thib mbèel, cà'? Ne'lido gu' ryes li gu' tataa, ¿lé'?

<sup>11</sup> Mastale' nac gu' gundan más naxin no gundan ye'rsin' loo xin' gu', per gu' lyatque' lezo' ñèe gu' xin' gu'. No ta' gu' con' ndac co' ña'b xin' gu' loo gu', ¿lé'? Ale'que' xud gu' Diox co' nzo loo bé' ne' ta' con' ndac loo mèn co' ña'ba loo xud gu' Diox, co' nee di's, loo mèn co', lìcque', ndxela's loo Diox.

<sup>12</sup> Gu' ndlya's le' chol mèn gáp mod loo gu' loo ryethe con', ¿lé'? Lomisque', ngue niin loo gu': Gòp gu' mod loo chol mèn thidtene, que naca ndxàp mèn mod loo gu', que naca indxàpte mèn mod loo gu'. Con' ndxè' nac di's co' ñibe' ley co' mxo'f Moisés loo mèn póla. No naca leque di's co' mque' mèn co' mde'th cón che'n co' ndxab Diox ye's loo libr póla.

*Mèn co' ndxòo loo cón che'n Diox, mènà ndli xal co'se' ndxòo mèn ro thib puert naya.*

*(Lc. 13.24)*

<sup>13-14</sup> Non gu' no naneeque' gu' nzo puert naya no nzo ned naya. Nagàn naca yòo mèn ro puert no nagàn naca tyee mèn neda, ¿lé'? Lomisque' ne, nzo puert naxèn no nzo huax ned naxèn. Inagànte yòo mèn ro puert no inagànte tyee mèn neda, ¿lé'? Mod co' ndxàp mèn loo Diox co' ndli le' mènà ndryo xà' loo Diox thidtene co'se' gath mènà, moda nac xal co'se' ndxòo mèn ro puert naxèn no xal co'se' ndyee mèn ned naxèn. Huax mèn ndli tataa. Inagànte li mèn tataa. Per mod co' ndxàp mèn par nalite yòo mènà loo

Diox loo bé' co'se' gath mènà, moda nac xal co'se' ndxòò mèn ro puert naya no xal co'se' ndyee mèn ned naya. Añenti gác mèn li mèn con'a. Ndxepete mèn ndxàp moda par yòò mènà loo Diox loo bé'. No nagàn tín' naca par li mèn tataa.

*Mèn ndac no mèn ye'rsin', mènà ndxàc be' xal yaa xlè co' nda' xlè ndac no xal yaa xlè co' nda' xlè ye'rsin'.*

*(Lc. 6.43-44)*

<sup>15</sup> Anderhuen gu'. Leque gu' quenap gu' loo mèn co' mbez ndyoodi's mènà cón che'n Diox per yalgutyè'i. Mènà yi'th loo gu'. No gáp mènà mod nado'. Ndxàc mènà loo gu' xal mbacxil'. Per le'n lezo' mènà nzo con' ye'rsin'. No li mènà xtùuz ye'rsin. Gàc mènà mèn nayi' xal mquè'th. <sup>16</sup> Gu' ta' cuent cón che'n mènà por con' co' li mènà. Tarte gòn mèn làa mèn ngud uv loo chol yaa yis, ¿lé'? Ne' ne' tar gòn mèn làa mèn ngudyuug loo yaa yis cordonsant, ¿lé'? <sup>17</sup> Tataa nac mod co' ndxàp mèn xal yaa xlè. Ryete yaa huen nda' xlè huen. Le' yaa xlè co' nac yaa xlè ye'rsin' na, nda' xlè ye'rsin'. <sup>18</sup> Yende mod ta' yaa xlè, co' nac yaa xlè ndac, xlè ye'rsin'. Ne' ne' yen mod ta' yaa xlè, co' nac yaa xlè ye'rsin', xlè ndac. <sup>19</sup> Ryete yaa xlè co' inda'de xlè ndac, cho' mèn yaa xlèa no co mèn yaa xlè ye'rsin'a rdii. <sup>20</sup> Por cona, por mod co' ndxàp mèn, libe' gu' mèn. No ta' gu' cuent xá nac mèn.

*Iryede mèn izlyo' yòò loo cón che'n Diox par ñibe'pe' Diox loo mènà.*

*(Lc. 13.25-27)*

<sup>21</sup> Iryede mèn co' mbez: Tad, loon, tyal mènà ta' mènà lugar ñibe'pe' xuden Diox loo mènà. Ndxé'leque', mèn co' ndli xal neepe' lezo' xuden Diox co' nzo loo bé', mènà tyalque' ñibe'pe' xuden Diox loo mènà. <sup>22</sup> Huax mèn ñee loon, co'se' gác huiz co'se' tub rez Diox cón che'n mènà: Tad, ¿ché' ne'nde'thte nu' di's por cón che'n lèe U'? No ¿ché' impor lèede U' mblo' nu' meexù'? No ¿ché' impor lèede U' mbli nu' huax yalguzye', à'? Neeque' U' no nonque' U' mbli nu'i, Tad.

<sup>23</sup> Per ndxe'leque', huiza càben loo mènà: Thidteneque' ne'needen gu' no indlibeden gu'. Biiche xà' gu' loon. Huàa gu' thib lad, gu' co' más ngòò lezo' mbli gu' con' ye'rsin'.

*Trè' ndlu' cón che'n chop loo liz mèn co' mdyoxcua'.*

*(Lc. 6.47-49; Mr. 1.22)*

<sup>24</sup> Chol mèn co' ndxònque' di's co' mbezen no ndli mènà xal ñibe'en loo mènà, daa tetac cón che'n mènà xal thib mbi' co' altant ndyoo naa loo rsin'pe' mbi'. Mbi'a mxít te'f liz mbi' loo quèe co'te' maciz nac loo yòò. <sup>25</sup> Ngoloa, ngulàa yùu. Ngro' nít yòò. No mxyo'f mbii. No ngo zi'f nít yòò loo yòò cal co' nac liz mbi'a. Per ne'ngobiide yó'be' yòò cala tac ndub yòò cala loo quèe co'te' maciz loo yòò. Thiba con' ndxè'.

<sup>26</sup> Le' tediba na, chol mèn co' ndxòn di's co' ndyoodizen, no indlide mèn xal ñibe'en, mènà lalque' nac xal thib mbi' naad no thib mbi' tont co' mxít te'f yòò cal liz mbi' loo yuux. <sup>27</sup> Ngoloa, ngulàa yùu. No ngro' nít yòò. No mxyo'f mbii. No ngo zi'f nít yòò yó'be'a loo yòò cal. No mblyau yòò cala. Por lult, thidtene mblyux yòò cala.

<sup>28</sup> Co'se' ngolo mdoodi's Jesús di'sa, ryete mèn co' nzi yòn di'sa, ante mbui' mènà no ante gunaa mènà cón che'n di's co' ngue lu' Jesús loo mèn. <sup>29</sup> Tac ndlu' Jesús mènà xal thib mbi' co' ndxàp con' roo no con' xèn la's nii mbi' no la's ya' mbi'. No indlu'de Jesús loo mènà xal ndlu' mèn co' nac maistr co' ndlu' cón che'n ley co' mxo'f Moisés loo mèn nación Israel.

## 8

*Jesús mteyac thib mbi' co' mque no yíz ndxa's co' nac thib yíz co' ntega's no co' nteyèe yid lad mèn.*

*(Mr. 1.40-45; Lc. 5.12-16)*

<sup>1</sup> Co'se' nde làa tùub Jesús loo yii co'te' ngua tub Jesús, anze'f thib mèn ndoo nque xís Jesús. <sup>2</sup> Làth mènà ngo thib mbi' co' ndyac thib yíz ndxa's, yíz co' nteyèe yid lad mbi'. Mbii gax mbi' loo Jesús. Mdub xib mbi' loo Jesús. No mcòò' mbi' yéc mbi' loo Jesús. Ndxab mbi' loo Jesús:

—Tad, chele' U' lyat lezo' ñèe U' daa, nzoque' mod teyac U' daa. Fteyac U' daa. No ftebii U' laden, Tad.

<sup>3</sup> Sya, mbuàal Jesús lad mbi'. Ndxab Jesús:

—Ndlyat lezon ñèenl. Teyaquenl no tembiin ladl.

Ngolo ndxab Jesús di'sa, ale chàa, ngro xbiiz lad mbi'. No mbembii mbi' loo yíiza. <sup>4</sup> Le' sya, ndxab Jesús loo mbi'a:

—Hui' nexa. Yende chó loo gabtel cón che'n con' co' mbli nonl ba', ndee. Ante ndlyazen huàa lu'l loo nguley'. No huàa ta'l ofrend co' mnibe' Moisés ta' mèn co' mbyac loo yíiz ba' par ta' mèn cuent no non mèn le' lùu mbyacle' loo yíiz ba'.

*Jesús mteyac thib mbyòo co' ngòc xgan' thib mbi' co' ngòc capitán che'n gobiern co' ndub ciuda Rom.*

*(Lc. 7.1-10)*

<sup>5</sup> Texal ngòo Jesús yèez Capernaum, mbi'th thib capitán co' ñibe' thib ayo solndad loo Jesús. Nalyat gunii capitán di's loo Jesús. <sup>6</sup> Taandxè' ndxab capitán loo Jesús:

—Tad, moz daa nax. Ngue tequech mbii moz daa. No ya ne'xecte moz tant thib yalnè nden' moz por mbiia axta nax tindle' liz moz daa.

<sup>7</sup> Ndxab Jesús loo mbi'a:

—Neeca, nal gan par teyaquen mbíiz.

<sup>8</sup> Sya, mcàb capitán loo Jesús. Ndxab capitán:

—Tad, indxàalte daa par yòo U' le'n nyòo lizen. Más huen, ante ñibe' U' loo yíiz. Daa ndxelasque' biiche yíiz loo moz daa. <sup>9</sup> Tac leque daa nda cuent naquin tyubdizen loo tamas mèn co' ñibe' loon xal ñibe' mènna loon. No lomisque' nde nixon', ngue non solndad co' ñibe'en loo. Co'se' ñibe'en loo thib solndad par ya solndad thib mandad, solndad ya. No co'se' ñibe'en loo tedib solndad par yi'th solndad loon, solndad yi'th loon. No co'se' ñibe'en loo thib moz daa par ya li moz daa thib zin' loon, moz ya lii.

<sup>10</sup> Co'se' mbìn Jesús di'sa, ante mbui' Jesús no ante gunaa Jesús. Ndxab Jesús loo mèn co' ngure no Jesús:

—Lìca, na nii loo gu': Ne' làth rye mèn nación Israel tarte zyál' daa nec thib mèn no tarte nèn nec thib mbi' co' anze'f ndxela's loon xal mbi' ba'. <sup>11</sup> Daa ngue nii loo gu': Huax mèn co' inacte mèn nación Israel, mènna ryo' par ned ndlyen huiz no par ned mbix huiz par yi'th queltàa no mènna Abraham no Isaac no Cob loo cón che'n Diox co'te' ñibe'pe' Diox loo mèn par tyac lezo' mènna axta plóthe. <sup>12</sup> Per cón che'n mèn nación Israel co' ndxab Diox no co' gunii Diox le' mènna yòo co'te' ñibe'pe' Diox par ñibe'pe' Diox loo mèn, ale ndxe'leque', co' xà' Diox mènna thib lad loo Diox co'te' nac yál'cuau co'te' nzyalque' mènna tith cue mènna loo Diox. Tya, gón' mènna axta plóthe no hua le mènna axta plóthe.

<sup>13</sup> Sya, mbere Jesús, ndxab Jesús loo capitana:

—Byàa, ey. Texalque' nac co' ndxela'sl no co' nda'l cuent loon nacl, tataaque' gàca lool.

No ale leque hora mbyac moz capitana.

*Jesús mteyac xna'zap Pedr co' nax loo xlé'.*

*(Mr. 1.29-31; Lc. 4.38-39)*

<sup>14</sup> Ngoloa, ngua Jesús liz Pedr. Gunèe Jesús nax xna'zap Pedr loo xlé'. <sup>15</sup> Per ale ante mxo'f Jesús ya' Jesús lad xna'zap Pedr, ngro xlé' xna'zap Pedr. Sya, ngo che xna'zap Pedr. Mbli xna'zap Pedr mandad loo mènna. No mbli xna'zap Pedr cas mènna.

*Jesús mteyac huax mèn yíiz.*

*(Mr. 1.32-34; Lc. 4.40-41)*

<sup>16</sup> Co'se' mzyèle' izlyo' huiza, mbi'th no mèn huax mèn yíiz co' mque no mbii che'n xpíi ye'rsin' loo Jesús. Ante gunii Jesús loo xpíi ye'rsin'a, ngro xpíi ye'rsin'a loo rye mèn yíiza. No mteyac Jesús ryete mèn yíiz co' mque no chol yíiz. <sup>17</sup> Tataa mbli Jesús par ngòcque', no mdyaaque', no mdubque' di's co' gunii Sayi co' mde'th di's co' ndxab Diox. Sayi ndxab:

Yub xa' mteche ryethe yíiz na' co' mden' na' no co' mque no na'. No mden' xa' ryethe yalnè cón che'n na' lad xa'.

*Trè' ndlu' cón che'n mèn co' mbly'a's tyoo nque xís Jesús.  
(Lc. 9.57-62)*

<sup>18</sup> Látha, co'se' gunèe Jesús anze'f thib mènley' nziri' dib vult loo Jesús, mnibe' Jesús loo myen' xin' mté'th Jesús par ya riid no Jesús myen' xin' mté'th Jesús loo yòoyaa tedib lad ro lagun. <sup>19</sup> Láth ndoore' tyee Jesús, mzin thib mbi' co' ngòc maistr co' ndlu' cón che'n ley co' mxo'f Moisés loo mèn nación Israel loo Jesús. Ndxab mbi'a loo Jesús:

—Maistr, no daa ndlyaz ga non U' pál co'te' ya U'.

<sup>20</sup> Mcàb Jesús loo mbi'. Ndxab Jesús:

—Hui' nexa. Mbe'th ngue no quèe lyo' co'te' ndxàt mbe'th. Le' mbin bé' na, ngue no xyòn mbin co'te' ndxàt mbin, ne. Per daa, co' mbal yáal loo izlyo' xalque' ndxáal chol mèn, ingue noden thib lugar co' nac che'npe'en co'te' guixen chu'th yéquen par ryo xcuen chu'th laden, co' nee di's, tegaan chu'th xísen par lin descans.

<sup>21</sup> Látha, tedib myen' xin' mté'th Jesús ndxab loo Jesús:

—Tad, daa lyaz ner ta' U' permis loon par ga casen thebol xuden. Yiloo, sya, nda na'.

<sup>22</sup> Jesús mcàb. Ndxab Jesús loo mbi' xin' mté'th Jesús:

—Mèn co' ne'tyalte yila's loo cón chenen, mènà nac xal mèn nguth loon. La'a ca's mènà thebol xud lùu ba'. Le' lùu na, ftoò nque xísen. Ya' nda na'.

*Jesús mbli nguled mbii. No mbli Jesús xèe ngure ol nító'.  
(Mr. 4.35-41; Lc. 8.22-25)*

<sup>23</sup> Ngoloa, ngòo Jesús loo thib yòoyaa con myen' xin' mté'th Jesús. <sup>24</sup> Láth ngue tetee myen' yòoyaa loo lagun, ngro' thib mbiidó' loo lagun axta mxít too mbii nít loo lagun. No mblo mbii nít le'n yòoyaa. Per ndxe'leque', láth ndxàc con'a, ante mde mcal' Jesús. Nax yàt Jesús le'n yòoyaa. <sup>25</sup> Sya, yende izlyo' ngua myen' xin' mté'th Jesús co'te' nax Jesús. Mblo' myen' mcal' loo Jesús. Ndxab myen' loo Jesús:

—Tad, jer goo che U'. Blo' U' mcal' loo U'. Hui' U' ñeene' xá mod li U' par lyá' na' loo con' ryes. Yòoyaa na' ngue dep le'n nít.

<sup>26</sup> Mcàb Jesús. Ndxab Jesús loo myen':

—¿Aa, mèn izlyo'! Susque' nzyeb gu', yey. Ndxepete ndxela's gu'. No ndxepete ndxàp gu' yalxla's loo Diox, ¿lé'?

Sya, ngo che Jesús. Ale ante gunii Jesús loo mbiidó'a no ante gunii Jesús loo nít. Xègà nguled mxyo'f mbiidó'a. No xègà nguled ndxetoo nít che'n nító' loo lagun. <sup>27</sup> Sya, ryete mèn co' ngua no Jesús, ante mbui' no ante gunaa mènà loo con' ngòc. Ndxab mènà:

—¿Chó mbi' nac mbi' ba'? ¿Chonon tua'te ndxab mbi'? No ale xègà nguled nxyo'f mbii. No xègà nguled ndxetoo nít loo lagun.

*Trè' ndlu' cón che'n chop mbi' yíiz che'n làaz mèn gadar co' mquée mbii ye'rsin' co' ngòc mbii che'n xpíi meexù'.*

*(Mr. 5.1-20; Lc. 8.26-39)*

<sup>28</sup> Co'se' ngolo mzin Jesús tedib lad ro lagun co' nac che'n làaz mèn gadar, ngro' chop xa'bi' le'n panteón loo Jesús. Ryop xa'bi'a mque no mbii che'n xpíi ye'rsin'. No anze'f nayi' tín' ngòc ryop xa'bi'a. Axta ne' ne' yen mod riid chol mèn par neda. <sup>29</sup> Cabii ngure bez ryop xa'bi'a loo Jesús. Ndxab xa'bi'a loo Jesús:

—¿Chonon nde U' co'te' nzo nu', à', Jesús, xgan'pe' Diox? ¿Ché' nde U' par tetii U' nu' ndoore' gàc tiemp co'se' tetii Diox nu', cà'?

<sup>30</sup> Leque hora, gaxte tya nzi tee yuhua thib partid nguch. <sup>31</sup> Sya, mbii che'n xpíi ye'rsin'a mbli par nalyat ndxab ryop mbi'a loo Jesús:

—Chele' U' co' nu' trè', bla' U' yòo nu' loo partid nguch co' nzi tee go'.

<sup>32</sup> Sya, ndxab Jesús loo xpíi ye'rsin'a:

—Gro' gu'. Huàa yòo gu' loo nguch, tá.

Hora ngro xpíi ye'rsin'a loo ryop xa'bi'a. Ngua yòo xpíi ye'rsin'a loo partid nguch. Ngoloo ale ryete ngucha mquée mbii. Ale mbyùub nguch lad yíi co'te' nzi tee yuhua nguch. Ngulàa ryete ngucha axta le'n lagun. Nguap nguch nít. Ale nguth ryete nguch.

<sup>33</sup> Le' mèn co' ngue quenap ngucha na, ale mque' mènna carre. Ngua ta' mènna cuent loo mèn làth yèez ryete con' co' ngòca, tant mzyeb mènna. No mda' mènna cuent con' ngòc loo ryop xa'bi' co' mquée mbii che'n xpíi ye'rsin'a loo mèn làth yèez. <sup>34</sup> Sya, ryete mèn yèeza ngro'. Mbi'th mènna co'te' nzo Jesús. Texal gunèe mènna Jesús, ale mna'b mènna di's loo Jesús. Ndxab mènna:

—Más huen gro' trè'. Byàa ned, ndeel.

## 9

*Jesús mteyac thib mbi' co' mque no yíz bech.*

(Mr. 2.1-12; Lc. 5.17-26)

<sup>1</sup> Sya, ngòo Jesús loo thib yòoyaa. Mdoo Jesús loo nít loo lagun. Mbii Jesús tya axta ngro xo'f Jesús tedib lad ro lagun. Mzin Jesús yèez co'te' nac làazpe' Jesús. <sup>2</sup> Làth nzo Jesús tya, mzin no mèn thib mbi' co' mtequech mbii loo Jesús. Nzo'f mbi' loo thib cami nde no mèn mbi' loo Jesús. Co'se' gunèe Jesús le' mènna, lìcque', ndxela's loo Jesús no ngòp mènna yalxla's loo Jesús, ndxab Jesús loo mbi' yíiza:

—Huen blo lezo'l, ndee, xgan'. No gòp yalxla's loon. Xquin lùu no xtol lùu mdyon'le'.

<sup>3</sup> Per làth mèn co' nziri' loo Jesús, ngo ndxep mèn co' ngòc maistr co' mbli' cón che'n ley co' mxo'f Moisés loo mèn nación Israel. Mènna ndxab loo lezo' mènna: Lìcpe' ba'i, mbi' ba' ñii yèe ñii tii cón che'n Diox no ngue nii mbi' ba' ngòc nguàal con' cón che'n Diox, cara. <sup>4</sup> Per Jesús nonque' no naneeque' Jesús con' co' nzi li mènna xtùuz le'n lezo' mènna. Ndxab Jesús loo mènna:

—¿Chonon susque' nazab ngue li gu' xtùuz, à'? <sup>5</sup> ¿Xá nee gu'? ¿Cón más inagànte nac, ndyac gu', par gaben loo mbi' ba'? ¿Ché' más inagànte gaben: Xquin lùu no xtol lùu mdyon'le' o ché' más inagànte gaben: Goo che. Fxen ned. Byàa, cà'? <sup>6</sup> Per hui' gu' nexa. Daa lu' loo gu' le' daa, co' mbal yáal loo izlyo' xalque' ndxáal chol mèn, daa ndxàp con' roo no con' xèn la's niin no la's yan loo izlyo' par ton'en xquin mèn no xtol mèn loo izlyo'.

Sya, mbere Jesús ndxab Jesús loo mbi' co' mtequech mbii:

—Goo che. Fthùuz dáa co' ngo'thl. Bye' dáa. No tee càal ned. Byàa par lizl.

<sup>7</sup> Sya, ale ngo too mbi' co' mtequech mbii. Mxen mbi' ned. Ndyàa mbi' par liz mbi'. <sup>8</sup> Co'se' gunèe mèn co' nziri' no Jesús mbli Jesús con'a, mzyeb tìn' mèn. Ngurez mènna Diox. Ndxab mènna:

¡Ay, Dio's! U' ndli ndxàp mbi' ba' con' roo con' xèn la's nii mbi' no la's ya' mbi' par ndli mbi' con' roo no con' xèn loo mèn loo izlyo'.

*Jesús ndxab loo thib mbi' co' lèe Mate, co' nac daa co' ngue que' ye's ndxè': Ftoo nque xísen. Ya' nda na'.*

(Mr. 2.13-17; Lc. 5.27-32)

<sup>9</sup> Co'se' mbere Jesús, ngro' Jesús yèez co'te' nac làazpe' Jesús, láth nda riid Jesús par neda, gunèe Jesús ndub thib mbi', co' lèe Mate, loo mes co'te' ndyee thix mèn tmi cón che'n contribución. Ndxab Jesús loo mbi'a:

—Goo too. Ya' nda na'.

Mate ngo too. Nda no Mate Jesús.

<sup>10</sup> Ngòc thib con' thib vez. Ngua thuhua Jesús liz Mate. Làth ndub yuhua Jesús loo mes, mzin huax mèn co' ndli cobrar cón che'n contribución no plá mèn co' ngòc mèn ye'rsin'. Thidte mdub mèn loo mes con' Jesús no con' myen' xin' mté'th Jesús. <sup>11</sup> Co'se' ñèe mèn co' nac mèn xley' farise con'a, ndxab mènna loo myen' xin' mté'th Jesús:

—¿Chonon nzi yuhua no maistr gu' mèn co' ndli cobrar cón che'n contribución no mèn co' ncu'a'n xquin no co' ndxàp xtol ba', à'?

<sup>12</sup> Co'se' mbìn Jesús dí'sa, Jesús ndxab loo mèn xley' farise:



—Mèn co' nden' yende chó yíiz ndyac mèn no mèn co' nden' huen nzo lezo' mèn, mènà ndyac inquinte mènà doctor. Per ndxe'leque', mèn co' nden' ndyac len mènà, mènà nonque' naquinque' mènà doctor. <sup>13</sup> Byàa gu'. No huen huen té'th gu' ñeene' cón nee di's di's co' ndub loo libr co' nac xti's Diox co' ngue niin loo gu' ndxè' co' mbez:

Ndlyazen le' gu' lyat lezo' ñèe gu' hues xtàa gu'. No indlyasten guth gu' má' no xo gu' ren má' loon par teri'then no tecan'en cón che'n xquin gu' no cón che'n xtol gu'.

Tac ne'ngalten par gòn mèn ron no par yila's mèn loon, mèn co' nden' nac mènà mèn nalì par lyàa yéc mènà no lyàa lezo' mènà. Ndxè'leque', ndalen par gòn mèn ron no par yila's mèn loon, mèn co' non no mèn co' nda' cuent nac mènà mèn co' ncu'a'n xtol no mèn co' ncu'a'n xquin, par lyàa yéc mènà no lyàa lezo' mènà par zye' mod co' ndxàp mènà.

*Trè' ndlu' le' myen' xin' mté'th Juàn Bautist mnibdi's loo Jesús chonon imbe xlatte myen' xin' mté'th Jesús.*

(Mr. 2.18–22; Lc. 5.33–39)

<sup>14</sup> Látha, note myen' xin' mté'th Juàn Bautist, ngro' nixon', mbi'th myen' loo Jesús. Ndxab myen' loo Jesús:

—¿Chonon nu', no mèn xley' farise, mbe xlat huax vez per myen' xin' mté'th U' ba imbe xlatte, à', Tad?

<sup>15</sup> Ndxab Jesús loo myen'a:

—Nde niin thib con' loo gu': ¿Ché' xec mèn co' ndxàc convid, mèn co' nda lyath no thib mbyòo co' selya', par cue xi lezo' mènà par ne'huade mènà co'se' ñèe mènà nzo mbyòo co' selya' no nzo con' co' hua mèn, cà'? Yende mod cue xi lezo' mènà par cue xlat mènà tataa, ¿lé'? Hui' gu' nexa. Mènà cue xi lezo' par cue xlat mènà co'se' nguri'thle' yalhua liz mbyòo no ndyàa mbyòo co' mselya'.

<sup>16</sup> Ne' ne' yen chó mèngot nzo co' co' bdè' thib le' lar' cub loo thib lar'can' gox tac lar' cub co' yo bdè' lar'can' goxa bech. Le' sya, lar' cub, co' ngo bdè' lar'can' goxa, li par ryed yèe lar'can' goxa. No yiloo más nazab ñaa lar'can' gox chele'i naroo ryed.

<sup>17</sup> Tolo ndxab Jesús loo mènà:

Yende chó mèn nzo co' co' mezcál co' diz ngro' palenc le'n thib garrafón gox co' nalé'le', ne, ¿lé'? Tac chele' mèn co' mezcál co' diz ngro' palenc le'n thib garrafón gox co' nalé'le', le' sya, le'le' lyé' garrafón goxa no xyo mezcála. Ngòc perdid ryop con'a. Por cona, más huen co' mèn mezcál co' diz ngro' palenc le'n thib garrafón cub. Sya, tataa mod nabe'ste quenap mèn ryop con'a.

*Trè' ndlu' cón che'n thib mza', rsap thib mbi' co' lèe Jair, no cón che'n thib xa'got co' mbuàal xab Jesús.*

(Mr. 5.21–43; Lc. 8.40–56)

<sup>18</sup> Láth be' ngue toodi's no Jesús mèn, mbii gax thib mbi' co' nac jef che'n mèn nación Israel loo Jesús. Mdub xib mbi' loo Jesús. No mcòo' mbi' yéc mbi' loo Jesús. Ndxab mbi' loo Jesús:

—Tad, rsap daa ngolole' nguth. ¿Ché' tli U' favor ya U' lizen? Lyazen ante xo'f U' ya' U' lad mza'. Mza' ryo xbanque'.

<sup>19</sup> Sya, mxen Jesús ned con myen' xin' mté'th Jesús. Nda no Jesús mbi' co' nac jefa par liz mbi'. <sup>20</sup> Per láth ndoo Jesús ned, nda no Jesús mbi'a con taamas mèn, xi'th mènà ngo thib xa'got. Xa'gota ndxàcle' si' fchop lín' ndyac xa' yíiz ndlyath ren. Mbii gax xa'gota par ned xís Jesús par gàal xa'gota ro xab Jesús. <sup>21</sup> Tac xa'gota mbli xtùuz le'n lezo' xa'gota. Ndxab xa'gota loo lezo' xa'gota: Chele' daa ante gàal ro xab Jesús, yac daa. Tataa mbli xa'gota. No, chàa, mbyac xa'gota loo yíiz xa'. <sup>22</sup> Co'be'xque' ngòc con'a loo xa'gota, Jesús mbere par ned xís Jesús. Gunèe Jesús xa'gota. Ndxab Jesús loo xa'gota:

—Rsap, huen blo lezo'l no ftac lezo'l, ndee. Lùu mbyacle' tac ngola'sque'l loo cón chenen.

Leque hora, sandante mbyac xa'gota.

<sup>23</sup> Co'se' mzin Jesús liz mbi' co' nac jefa, ndxòn Jesús le' musc ndxol' bàanle' par ryo bàan mza' co' ngutha liz mza' par ya ca's mèn mza'. No ñèe Jesús ndxòo ndryo' mèn le'n nyòo par ndlas yál' mèn mza' no ndyoodi's no mèn mza'. <sup>24</sup> Ndxab Jesús loo mèn co' nzo le'n nyòoa:

—Bli gu' favor, blá' gu' mza'. No biiche gu' thib lad loo mza'. Part cón chenen, mza' ne'ngathte. Na ngüi' loo mza' xal thib mza' co' nax yát.

Le' sya, ale le'le' mxìis no rye mèn co' nzo liz mza' co' ngutha Jesús tac non mèn nguthque' mza'. <sup>25</sup> Texal ngolo ngro' ryete mèn par fuer, Jesús ngòo le'n nyòo co'te' nzo'f mza'. Mxen Jesús ya' mza'. No mbli Jesús ngo che mza'. <sup>26</sup> Syase, por derech, mxyo'f lèe mxyo'f xti's Jesús por cón che'n con' co' mbli Jesús loo mza'a le'n ryete yèezya' co' nziri' par neda.

*Jesús mdub xñi ngudloo chop mbi' co' ngòc mbi' sieu.*

<sup>27</sup> Texal ngro' Jesús liz mbi' co' ngòc jefa, mdoo nque chop xa'bi' sieu xís Jesús. Cabii mbez ryop xa'bi' sieua loo Jesús:

—Gulat lezo' U' gunèe U' nu', U' co' nde bin David co' ngòc rey póla.

Per Jesús ne'nglide cas ryop xa'bi' sieua. Xa'bi' sieua tolo mdoo nque xís Jesús.

<sup>28</sup> Co'se' ngòo Jesús liz mèn co'te' nguled Jesús yèe Capernaum, ryop xa'bi' sieua mbii gax loo Jesús. Jesús mnibdi's loo ryop xa'bi' sieua:

—¿Ché' ndxela's gu' le' daa gác li par hui' gu', cà'?

Ryop xa'bi' sieu mcàb:

—Aa, Tad. Ndxela'sque' nu'i.

<sup>29</sup> Le' sya, ante mbuàal Jesús ngudloo ryop xa'bi' sieua. No ndxab Jesús loo ryop xa'bi' sieua:

—Gàca loo gu' xalque' ndxela's gu' loon, ndee gu'.

<sup>30</sup> Sya, chàa, ndxe'sleque' mbui' ryop xa'bi' sieua. Ngoloa, negadi's mnibe' Jesús loo ryop xa'bi' sieua. Ndxab Jesús:

—Yende chó loo gabte gu' cón che'n con' mbli non gu'.

<sup>31</sup> Per ndxe'leque', pente mbii ryop xa'bi' sieua, cón che'n con' mbli Jesús loo ryop xa'bi' co' ngòc sieua loo mèn co' nac mèn ryete yèezya' co' nziri' par neda.

*Jesús mbli mdoodi's thib mbi' mud.*

<sup>32</sup> Sete ngolo mbii ryop xa'bi' sieua, mbi'th no taandxep mèn thib mbi' mud co' mque no thib xpìi ye'rsin' loo Jesús. <sup>33</sup> Texal ngolo xec mbli Jesús par ngro xpìi ye'rsin' loo mbi' muda, ndxe'sleque' mdoodi's mbi'. Le' mèn co' nziri' no Jesús na, ante mbui' mèn no ante gunaa mèn loo mbi' muda. Ndxab mèn:

—Dib tiemp co' nziri' mèn nación Israel tarte ñee mèn gác con' co' ngòc loo mbi' mud ba', cara.

<sup>34</sup> Per mèn che'n xley' farise ale mbez:

—Por cón che'n leque xa' co' nac jef che'n xpìi meexù' ngo' Jesús xpìi meexù' loo mèn.

*Jesús mblyat lezo' ñèe Jesús mèn.*

<sup>35</sup> Ngolo nguri'th con'a, mque tee Jesús le'n rye yèezya' no rye ranch par neda. Mque tee lu' Jesús mèn rye lugar co'te' nqueltàa mèn co'te' ndub sinagog mèn par neda. Mbli Jesús yalbàn no mde'th Jesús cón che'n di's ndac xá mod ndlya's Diox ñibe'pe Diox loo mèn. Làth xtau'a, mteyac Jesús mèn co' mque no chol yilíiz no ryete mèn nayíiz le'n rye yèezya'a. <sup>36</sup> Co'se' gunèe Jesús prob mèn, anze'f mblyat lezo' Jesús gunèe Jesús mèn tac anze'f nzi xi lezo' mèn. No yende chó gust nziri' mèn. No más de cona, alithe nzi ban mèn. Ngòc mèn xal mbacxil' co' ingue node pastor. <sup>37</sup> Sya, ndxab Jesús loo myen' xin' mté'th Jesús:

—Lìcpe' ba'i, anze'f huax mèn nzo co' ndxàal gòn cón che'n di's ndac par lyá' mèn loo ryethe co' nac con' ryes xal co'se' ndláp mèn cosech par ne'yiza'de cosech no par ne'tyuhuante cosech. Per yende huax mèn co' ya te'th no co' ya lo yalbàn cón che'n di's ndac loo mèn. <sup>38</sup> Cona, ngue niin loo gu': Gurez gu' Tad Diox no guuz gu' loo Tad Diox



tel' Tad Diox mèn par ya te'th mèn no par ya lo mèn yalbàn cón che'n di's ndac loo mèn xal co'se' tel' thib patrón moz par ya láp moz cosech patrón tac Tad Diox nac patrón loo mèn.

## 10

*Jesús mcui si' fchop myen' co' ya no Jesús.*

*(Mr. 3.13-19; Lc. 6.12-16)*

<sup>1</sup> Ngolo tataa mdoodi's Jesús loo mèn, ngurez Jesús ryete si' fchop myen' xin' mté'th Jesús. Ndxab Jesús loo myen' xin' mté'th Jesús:

—Nalle' lin loo gu' par gác gu' co' gu' xpíi ye'rsin' loo mèn, no par teyac gu' mèn co' ngue no chol yilíiz, no par teyac gu' ryete mèn yíiz ned ya que tee gu'.

<sup>2</sup> Taandxè' lèe ryete si' fchop myen' xin' mté'th Jesús, myen' co' mtel' Jesús co' mbe' di's che'n Jesús loo mèn no co' mde'th di's che'n Jesús loo mèn. Nerleque' myen' co' mcui Jesús ngòc Mon co' ne' tedib lèe Pedr. Mcui Jesús Ndech, ne, co' nac huespe' Pedr. Xísa nde nque Cob no Juàn, huespe' Cob. Ryop hues mbi'a ngòc xgan' thib mbi' co' ngro' lèe Zebede. <sup>3</sup> Xísa nde nque Lip. Nde nque Bartol. Nde nque Max. No nde nque Mate co' mbli cobrar cón che'n contribución, co' nac daa. Xísa nde nque tedib mbi' co' lèe Cob, ne. Mbi'a ngòc xgan' thib mbi' co' ngro' lèe Alfe. Xísa nde nque Lebe co' ne' tedib lèe Tade. <sup>4</sup> Xísa nde nque tedib mbi' co' lèe Mon. Mona nac thib mbi' co' mqueltàa no thib ned mèn, mèn co' ngro' lèe partid cananist. Xísa nde nque Jud Iscariot co' mcua'n mod mda'xù' Jesús loo mèn ye'rsin' yilóa.

*Jesús nque tel' myen' xin' mté'th Jesús par ya te'th myen' no ya lo myen' yalbàn loo mèn.*

*(Mr. 6.7-13; Lc. 9.1-6)*

<sup>5</sup> Jesús mtel' ryete si' fchop myen'a. Mnibe' Jesús loo myen'a. Ndxab Jesús:

—Ne'yade gu' làaz mèn co' inacte mèn nación Israel. Ne' ne' yòo gu' co'te' nac làaz mèn nación Samari. <sup>6</sup> Más huen huàa gu' loo mèn co' nac mèn nación Israel tac mèna nziri' xal mbacxil' co' nzi tee tuhuan. <sup>7</sup> Huàa te'th gu' no blo gu' yalbàn no gab gu' loo mèna le' tiemp co' tlo ñibe'pe' Diox loo mèn ndxàcle' loo mèna. <sup>8</sup> Fteyac gu' mèn co' ndyac yíiz ndxa's co' nteyèe yid lad no mèn co' ndyac chol yilíiz. Blo xban gu' mèn nguth. Lomisque', blo' gu' rye xpíi ye'rsin' loo rye mèn co' ngue no xpíi ye'rsin'. Ne'nguixte gu' nec thib centav loon por mdan lugar gác gu' li gu' con' co' ngue ñibe'en loo gu' ndxè'. Por cona, co'se' yilo li gu' ryete con' co' ngue ñibe'en loo gu' ndxè' loo mèn, ne'líde gu' cobrar nec thib centav loo mèna.

<sup>9</sup> Co'se' yòo gu' ned ya gu', tua'te gu' ya gu'. Ne'hue'de gu' pes or. Ne' ne' hue' gu' pes plat. Ne' ne' hue' gu' centav obr. <sup>10</sup> Ne' ne' hue' gu' morral gu' co'te' co gu' che'n gu'. Ne' ne' hue' gu' chop ned xab gu' par goc gu'. Ne' ne' hue' gu' chop ned yilid. Ne' ne' co gu' mached ya' gu' co'se' tyee gu'. Tac liz mèn co'te' zin gu' co'te' co gu' yalbàn cón che'n di's ndac loo mèn, mèna ta' con' nquin gu'. Gàc con' ndxè' loo gu' xal ndxàca loo mèn co' ndyee zin' par li mèna gan con' nquin mèna.

<sup>11</sup> Co'se' zin gu' le'n chol ciuda o le'n chol yèez bix co'te' yòo gu', ner cua'n gu' mèn co' gáp confians con gu'. Yan' gu' liz mèna axtaque' ryo' gu', bii gu' le'n yèeza no ciudaa. <sup>12</sup> Texal yòo gu' liz mèna, gunii gu' Diox loo mèn guliza. No gab gu' loo mèna: Nagàl blo gu' lezo' gu' loo alux con'. <sup>13</sup> Chele' mèn guliza nac mèn ndac co' ndli cuent ndxàalque' yòo gu' làth mèna, tolo cue rye nda mèna no rye ndye'th mèna por cón che'n gu'. Nacque'le' mèn guliza nac mèn co' ndli xtùuz indxàalte yòo gu' liz mèna, sya, gab gu' loo mèna: Huena, amiu, yan' cón che'n gu' co' ndli gu' ba' loo Diox co'se' tub rez Diox cón che'n gu'. <sup>14</sup> No chol mèn co' ne'ta'de lugar yòo gu' liz mèn no làaz mèn par cued gu' làaz mèn plá huiz no ne' ne' ta' mèn lugar gòn mèn di's co' co gu' yalbàn, gro' gu' liz mèna no làaz mèna. No bzib gu' yòoya's co' ndoo nii gu', co' nee di's, yan' cón che'n con' mbli no mèna gu' loo Diox. <sup>15</sup> No tolo tyub quíi tyub bèel lezo' mèn ciudaa no mèn yèeza axta co'se' gác huiz co'se' tub rez Diox cón che'n mèna. Lìcpe' ba'i, na nii loo gu':

Co'se' gac huiz co'se' tub rez Diox cón che'n mènà, más nè gac yaltii co' gac loo mènà huiza leque yaltii co' gac loo mèn ciuda Sodom no loo mèn ciuda Gomor.

*Jesús ngue toodi's no myen' le' mèn tub ngu's myen'. No li mèn ngòc nguàal con' loo myen'.*

<sup>16</sup> Hui' gu' nexa. Na ngue tel' gu' loo mèn nayi'. Ya gu' loo mènà xal mbacxil' co' yub mbii loo mbée loo mènà. Nalas gure gu' loo mèn yèez no loo mèn ciuda co'te' yòo gu' xal nalas mbel' co'se' ñee mbel' mèn par xyon' mbel'. No gòc nado' gu' loo mènà xal palomxtil'. <sup>17</sup> Anderhuen gu'. Chó Diox chó nee gu'. Nee gu' xá nda gu'. Tac loo mèn co'te' ya gu'a, mènà ta'xù' gu' loo mèn co' nxo'f zin' loo cón che'n sinagog mèn. No hue' mènà gu' par tin mènà gu' co'te' nac sinagog che'n mènà. <sup>18</sup> No axta hue' mènà gu' loo mèn co' nac gobernador no loo mèn co' nac rey ante por cón chenen no maste. No co'se' tataa mod gac con'a loo gu', más dibaxla's tyoodi's gu' no ta' gu' cuent cón chenen loo mènà no loo mèn dib athu loo izlyo', mèn co' inacte mèn nación Israel. <sup>19</sup> Co'se' ta'xù' mènà gu' loo mènà, ne'tyóode gu' arid cón gab gu' no cón tyoodi's gu' hora. Tac leque hora Diox li yub di's ye'th yéc gu' par gac gu' càb gu' loo mènà. <sup>20</sup> Tac inacte gu' co' ñii hora no co' tyoodi's hora. Ndxè'leque', Diox xud gu' li, por cón che'n Xpii Natú' che'n Diox, par gac gu' càb gu' loo mènà hora.

<sup>21</sup> Huiza, leque myen' co' ndxàc hues ta'xù' hues myen' loo mèn par guth mènà hues myen'. Lomisque' ne, leque mèn co' nac gundan ta'xù' xgan' loo mènà par guth mènà myen' co' nac xgan' gundana. Lomisque' ne, myen' co' nacle' xgan' gundan bixyath contra gundan co' nac gundan loo myen'. No axta guthxù' myen' gundan co' nac xud myen'. <sup>22</sup> No ale yòo xyàn lezo' ryete mèn dib athu loo izlyo' ñèe mèn gu' ante por cón chenen no maste. Per mèn co' thidteneque' mbli nèe no nxec yèe mènà axta gath mènà, mènà lyá'que' thidtene loo con' ryes. <sup>23</sup> Co'se' tlo mèn, tyoo nque mèn xís gu' par tub ngu's mèn gu' le'n thib ciuda, fxon' gu' le'n tedib ciuda. Tac, lìcpe' ba'i, na ngue nii loo gu': Le' daa, co' mbal yáal loo izlyo' ndxè' xal ndxáal chol mèn, daa gal nque xís gu' ndoore' yilo que tee gu' le'n dib nación che'n mèn nación Israel.

<sup>24</sup> Fte' lezo' gu' con' ndxè: Nec thib myen' co' nac myen' xin' mté'th thib maistr, ne'ta'de myen'a con xtùuz co' ndli maistr no xtùuz co' ndli myen'. Lomisque' ne, nec thib moz co' ndli zin' con patrón, ne'ta'de moza con xtùuz co' ndli patrón moz con xtùuz co' ndli moz. <sup>25</sup> Más huen blec lezo' gu' gac gu' mèn co' gac xin' mté'th daa. No gac gu' xal daa co' nac maistr gu' no li gu' xal ndlin. Lomisque' ne, blec lezo' gu' gac gu' xal thib moz co' lalque' nac xal patrón moz, co' nee di's, nac yub daa. Lomisque' ne, chele' mèn mbez loon le' daa co' nac xal thib gundan co' ñibe' liz gundan, le' daa lèe Beelzebú co' nac jef che'n meexù', ale'que' loo gu' co' nac xal xin' mbi'a ne' gab mèn masre' con' axta plóthe, ¿lé'?

*Jesús mnibdi's chó loo más ndxàal zyeb mèn.*

*(Lc. 12.2-9)*

<sup>26</sup> Por cona, ngue niin loo gu': Ne'zyebte gu' ñèe gu' mèn co' tataa li no gu'. Tac yende nec thib con' co' nzo casloo co' ne'ryo xo'fte. No yende nec thib con' co' xexte ndxàc loo yál'cuau co' ne'yathte no co' ne'yènte. <sup>27</sup> Ryete con' co' ngue tan cuent loo gu' xexte ndxè', guuz gu'i loo mèn alanleque' loo xnaa. No di's co' ngue niin loo gu' xexte ndxè', cabii fte'th gu' di's ndxè' no negadi's blo gu' yalbàn cón che'n di's ndxè' par gòn ryete mènà di's ndxè'. <sup>28</sup> Ne'zyebte gu' ñèe gu' mèn co' ndxuth bél'yòo lad mèn. Mènà ne'lìde gan guth alm no xpii xtàa mèn. Ndxè'leque', bzeb gu' gunèe gu' Diox co' ndxàc cobii alm mèn no xpii mèn le'n ye'rbiiil co' nac loo bèel no loo quì ngolo nguth mèn.

<sup>29</sup> ¿Ché' intho'de mèn chop mbin bix co' lèe mbyé' por si' centav, cà'? Ntho' mèn mbin tataa, ¿lé'? Mastale' ndli mèn cuent yende cón ntac mbin co' lèe mbyé' loo mèn, per ne' ne' gath mbina chele' Diox ne'lá'ya'de mbina gath mbina. <sup>30</sup> No axta yis co' ndoo yéc gu', Diox naneeque' no nonque' Diox plá yis ndoo yéc gu'. <sup>31</sup> Por cona, ngue niin loo gu', ey: Ne'zyebte gu' ñèe gu' mènà. Le' gu' masque' ntac leque ryethe mbin co' lèe mbyé'.

*Trè' ndlu' cón che'n mèn co' mda' cuent cón che'n Jesucrist loo xtàa mèn.*  
(Lc. 12.8-9)

<sup>32</sup> Chól mèn co' co ro cón chenen no co xo'f mèn cón chenen loo xtàa mèn co' nziri' loo izlyo', daa, ne, go xo'f no go ron cón che'n mèn loo xuden Diox co' nzo loo bé'. <sup>33</sup> No chol mèn co' cà di's cón chenen loo xtàa mèn co' nziri' loo izlyo', daa, ne, cà di's cón che'n mèn loo xuden Diox co' nzo loo bé'.

*Por cón che'n Jesús ndxàc chop ned mèn.*  
(Lc. 12.51-53; 14.26-27)

<sup>34</sup> Ne'lìde gu' xtùuz le' daa ndal par lin cue mèn rye nda mèn no rye ndye'th mèn làth xtàa mèn loo izlyo'. ¡Tyè'! Ndxè'leque', ndalen par lin yitoo di's làth mèn por cón chenen. <sup>35</sup> Tac daa ndal par lin yitoo di's loo mèn con xud mèn liz mèn. No lin par yitoo di's loo thib mza' con xna' mza' liz mèn. No lin par yitoo di's loo thib guxiix con xna'zap guxiix co'te' ya mza' guxiix liz mèn por cón chenen no maste. <sup>36</sup> No ale tataa mod leque mèn guliza gac ngolo ngola's loo xtàa mèn guliza.

<sup>37</sup> Más de cona, ngue niin con' ndxè' loo gu': Le' mèn co' más nque' lezo' ñèe xud no mèn co' más nque' lezo' ñèe xna' leque que' lezo' mèn ñèe mèn daa, indxàalte mèn yò mèn loo cón chenen. Lomisque', mèn co' más nque' lezo' ñèe xgan' no rsap leque que' lezo' mèn ñèe mèn daa, indxàalte mèn yò mèn loo cón chenen. <sup>38</sup> Chele' chó gu' lya's que tee noque' daa ned ngue tee'en, atate huiz bli gu' xtùuz co' huenleque' ñeene' ché' txec gu' par tyoo nque gu' xísen co'se' li mèn ngòc nguàal con' loo gu' por cón chenen. Tac mèn co' yò loo cón chenen, mèn ye'rsin' tethonque' mèn xalque' ntethon solndad che'n ciuda Rom mèn co'se' ñibe' yèe solndad loo mèn hue' mèn cruzpe' mèn ndoore' que' solndad mèn loo cruz par guth solndad mèn. <sup>39</sup> Tac mèn co' ante ndoo lezo' ndxath ndxey' no ndxath ndlyux mèn par que no mèn che'npe' mèn loo izlyo' ndxè', loo mèn ne'ta'de Diox lugar yò ban no mèn Diox thidtene. Per mèn co' lá' ryethe con' co' nac ya'ndac che'npe' mèn co' gac li mèn gan loo izlyo' ndxè' por cón chenen, loo mèn ta' Diox lugar par yò ban no mèn Diox thidtene.

*Jesús ndxab loo mèn: Mèn co' li con' ndac loo gu', ngue cón che'n mèn loo Diox.*  
(Mr. 9.41)

<sup>40</sup> Mèn co' ta' lugar yò no gu' mèn liz mèn no làaz mèn, mèn ta' lugar yò non mèn. Le' mèn co' ta' lugar no tyal mèn yò non mèn, mèn ta' lugar no tyal mèn yò no mèn xuden Diox co' mtel' daa. <sup>41</sup> Mèn co' ta' lugar yò mèn co' nde'th di's co' ndxab Diox liz mèn no làaz mèn por nac mèn mèn co' mde'th di's co' ndxab Diox, loo mèn li Diox leque con' ndac co' li Diox loo mèn co' mde'th di's co' ndxab Diox, ne. Lomisque' ne, mèn co' ta' lugar yò thib mbi' nali no thib mbi' nambii liz mèn no làaz mèn tac non mèn nac mbi' mbi' nali no mbi' nambii, loo mèn li Diox leque con' ndac co' li mèn loo mèn co' nac mèn nali no mèn nambii. <sup>42</sup> Lomisque' ne, chol mèn co' ta' thib xii nítdòp loo chol mèn prob par gu' mèn proba por nac mèn proba mèn co' nac xin' mté'th daa, no por ndyoo nque mèn proba xísen, lícpe' ba'i, na nii loo gu': Loo mèn li Diox anggac huax con' ndac xalque' ndli Diox loo mèn co' nac xin' mté'th daa.

## 11

*Juàn Bautist mtel' chop myen' xin' mté'th Juàn par mnibdi's myen' thib con' loo Jesús.*  
(Lc. 7.18-35)

<sup>1</sup> Co'se' ngolo mnibe' Jesús loo myen' no mdoodi's no Jesús ryete si' fchop myen' xin' mté'th Jesús, mxen Jesús ned. Nda Jesús par ned làaz myen' par lu' Jesús no co Jesús yalbàn cón che'n di's ndac loo mèn par ned nda myen'.

<sup>2</sup> Nde nxon', le'pe' ngue Juàn Bautist lezi'f le'n huiza, mbìn Juàn cón che'n co' ngue tee li Jesús. Sya, mtel' Juàn chop myen' xin' mté'th Juàn loo Jesús <sup>3</sup> par ya nibdi's myen' loo Jesús. Ndxab myen' loo Jesús:

—¿Ché' U' nac Crist co' ndxath yi'tha o ché' más huen cued nu' yi'th tedib xa' co' nacpe' Crist, cà'?

<sup>4</sup> Jesús mcàb. Ndxab Jesús loo myen':

—Byàa gu'. No fta' gu' cuent loo Juàn cón che'n con' co' gunèele' gu' no cón che'n con' co' mbinle' gu'. <sup>5</sup> Guuz gu' loo Juàn: Mèn sieu ngüi'. Mèn coj mdyoxcua' nii. No ndyee mèn coj. Mèn co' ndyac yíz ndxa's lad, co' ndxèe yid lad, ndxac no ndxembli mèn. Mèn cué' ndxòn di's. Mèn nguth, ale, ndryo xban. Le' loo chol mèn prob no loo mèn naxèn co' ndyac yaltii na, ndxàthle' no ndxènle' cón che'n di's ndac co' ndlu' cón che'n Diox. <sup>6</sup> Huen nda mèn co' ne'tyoo xà'de lezo' no mèn co' ne'ten'te arid ngòc nguàal con' por cón chenen.

<sup>7</sup> Co'se' mbii myen' xin' mté'th Juàn Bautist loo Jesús, mtlo Jesús, mdoodi's Jesús cón che'n Juàn Bautist loo mèn co' nziri'. Ndxab Jesús loo mèn:

—Co'se' ngua tee hui' gu' Juàn co'te' nagána, ¿ché' ngua tee hui' gu' thib xan' nixxtil' co' ngol' mbii, cà'? Yende xàa. <sup>8</sup> Lomisque' ne, niin loo gu': ¿Chó loo ngua tee hui' gu'? ¿Ché' ngua tee hui' gu' thib mbi' co' noc thib ned lar' huen, cà'? Gu' nonque' no naneeque' gu' le' mèn co' ndxoc anabte lar' huen, mèn mbe liz rey, ¿lé'? <sup>9</sup> ¿Xá nee gu'? ¿Chó loo ngua tee hui' gu', sya? ¿Ché' ngua tee hui' gu' thib mbi' co' nde'th di's co' ndxab Diox, sya, cà'? Aa, licpe' ba'i. Gu' ngua tee hui' thib mbi' co' más ñaare' loo mèn co' mde'th di's co' ndxab Diox. <sup>10</sup> Cón che'n Juàn Bautist nac di's co' ndub loo libr co' nac xti'sdiox co' ndxab:

Na tel' ner thib mbi' co' ya te'th ner di's ndac ndxè' lool. No lu' mbi' cón che'n lùu loo mèn par li mèn xtùuz no par tyoodi's no mèn lezo' mèn ndoore' co'se' galen loo mèn.

<sup>11</sup> Na nii loo gu': Làth rye mèn co' ngóol xàn' nii xna' mèn no xàn' nii xud mèn, tarte gáal thib mbi' co' nde'th di's co' ndxab Diox co' más ñaare' leque Juàn Bautist. Mastale' tataa naca, desde nalle' par delant, mèn co' nac más be'the co' ngue ta' lugar ñibe'pe' Diox loo mèn, más huen nda mèn loo Diox leque Juàn Bautist. Tac Diox co' xo'f más con' ndac cón che'n Diox loo mèn leque con' co' mblo xo'f Diox loo Juàn Bautist cón che'n Diox.

<sup>12</sup> Tac axta co'se' ngòc tiemp co'se' mtlo Juàn Bautist, mde'th Juàn Bautist no mblo Juàn Bautist yalbàn cón che'n di's ndac, no axta huiz nalze mbyath mbyèn cón che'n di's ndac co' ndlu' xá mod ndlya's Diox ñibe'pe' Diox loo mèn. No ryete mèn co' mbìn di'sa nguátbèe par mbli mèn co' nzote mod li mèn par yòo mèn loo cón che'n Diox par ñibe'pe' Diox loo mèn. <sup>13</sup> Tac ryete mèn co' mde'th di's co' ndxab Diox co' mque' ye's co' nac xti's Diox, no loo libr co' ngòc ley co' mnibe' Diox co' mxo'f Moisés loo mèn ndyoodi's no nda' cuent cón che'n xá mod ndlya's Diox ñibe'pe' Diox loo mèn ndoore' gac tiemp co'se' yi'th Juàn Bautist. <sup>14</sup> Chele' gu' yila's di's co' ngue niin loo gu' ndxè', gola's gu' le' Juàn Bautist nac Lii co' mbyath yi'th, Lii co' mde'th di's co' ndxab Diox póla. <sup>15</sup> Chele' gu' nden' cón nee di's co' ngue niin loo gu' ndxè', fta' gu' lugar yaa'd di's ndxè' le'n lezo' gu'. No gola's gu' di'sa.

<sup>16</sup> ¿Xá nee gu'? ¿Con chó con' tetaquen mèn co' nzi ban tiemp ndxè', à'? Ndyaquen le' mèn co' nzi ban tiemp ndxè' nac xal myen' bix co' mbe nguith loo xbi'. No mbez yèe myen' bixa loo xtàa myen'. Mbez myen': <sup>17</sup> Nu' mbil' dii loo flaut no ale ne'ngol' niide gu'. Mbil' ro bàn nu' no ale ne'ngón'te gu' con nu'. Tataaque' nac mèn. <sup>18</sup> Per na nii loo gu': Co'se' mbi'th Juàn Bautist, ne'ngàcte tataa loo Juàn. Tac Juàn ne'nghuade no ne'ngude Juàn axta plóthe mblya's Juàn xal nac mod co' ndxuhua chol mèn. No ale mbez gu' cón che'n Juàn: Xpii meexù' ngue tee no Juàn. <sup>19</sup> Ngoloa, ndalen, daa co' mbal yáal loo izlyo' ndxè' xal ndxáal chol mèn. Daa ndxuhua. Daa ndxu. Per co'se' ñèe gu' tataa ndxuhuan no tataa ndxun, ale mbez gu': Susque' ndxuhuacho' mbi' ba', yoo. No ale mbez gu': Susque' ndxòo lezo' mbi' ndxu mbi' vin. No ale mbez gu': Ndxàc amiu mbi' con mèn co' ndli cobrar cón che'n contribución no con mèn co' ndxàp xtol. Mastale' tataa mbez gu' nac daa, daa nii loo gu': Yende chó mport nzo lezon cón che'n con' ndli gu' xtùuz cón che'n Juàn no cón chenen tac mèn co' ndxácpe', mèn nonque' no naneeque' mèn le' con' co' ngue li Diox por cón che'n Juàn no por cón chenen nac con' ndac co' ncàb loo co' ndxác ryop nu' Juàn.

*Trè' ndlu' cón che'n mèn rye yèez co' ne'ndalte ngòn cón che'n Jesús.  
(Lc. 10.13-15)*

<sup>20</sup> Sya, mtlo Jesús, mbyoo Jesús rye mèn co' nac che'n rye yèez co'te' mblile' Jesús huax yalguzye' tac ne'nglàade yéc mènà no ne'nglàade lezo' mènà. Ndxab Jesús loo mènà:

<sup>21</sup> —Ay, prob gu' izlyo', mèn yèez Corazín. Ay, prob gu' izlyo', mèn yèez Betsaid. Tac chele' le'n yèez Tir no le'n yèez Sidón ngàc ryethe yalguzye' ndxè' xal ndxàca loo gu' nalle', mènà nglàa yéc no nglàa lezo' mènà, no ngoc mènà lar' lut por cón che'n yalnaxi co' ngòc loo mènà. <sup>22</sup> Por cona, daa ngue nii loo gu', mèn yèez Corazín no mèn yèez Betsaid: Le' loo mèn yèez Tir no loo mèn yèez Sidón más xhuite gac yaltii le'n huiz co'se' tub rez Diox cón che'n mènà leque co'se' tub rez Diox cón che'n gu'. <sup>23</sup> No gu', mèn yèez Capernaum co' nac mèn nate's no mèn naxal', ¿ché' ngue li gu' cuent no ché' nden' gu' le'n lezo' gu' le' gu' ndoo lite yòo loo bé', cà'? Yende xàa. Ndxè'leque', gu' ndoo lite lyàa loo quìi no loo bèel co'te' lyàa mèn co' ndryo xà' loo cón che'n Diox. Tac chele' loo mèn yèeza ngàc rye loothe yalguzye' co' ngòc loo gu'a, mèn yèeza ngyan'que' axta huiza no axta huiz nalze. <sup>24</sup> Por cona, daa ngue nii loo gu', mèn yèez Capernaum: Co'se' gac huiz co'se' tub rez Diox cón che'n mèn, más nè gac yaltii loo gu' leque loo mèn co' ngure ban ned nziri' yèez Sodom.

*Jesús mbez loo mèn: Gòo gu' loo cón chenen no daa li yo nagàl lezo' gu' no tí' lezo' gu'.  
(Lc. 10.21-22)*

<sup>25</sup> Le'n huiza ndxab Jesús loo Diox:

—Diox quix U', Pay, U' co' ñibe'pe' loo alux con' loo bé' no loo izlyo'. U' mtau' yéc mèn no lezo' mèn, mèn co' mbez anze'f ndxác no mèn co' mbez nden' di's par ne'ten'te mènà di's no par ne'ta'de mènà cuent cón che'n ryop na'. Ndxè'leque', U' mblo xo'f cón che'n na' loo mèn co' nau' loo nau' yéc xal loo myen' bix. <sup>26</sup> Tataaque' mbli U', Pay, tac tataa mbly'a's U' li U'i.

<sup>27</sup> Mbere Jesús, ndxab Jesús loo mènà tedib vez:

—Ngue niin con' ndxè' loo gu', ne: Mda'le' xuden ryethe con' ndxàp xuden la's nii xuden no la's ya' xuden loon thidte vez. Lìcpe' ba'i, yende chó mèn tarte libe' daa. No tarte ta' mèn cuent cón chenen, daa co' nac xgan' xuden Diox. Ante Diox co' nac xuden ndlibe'que' daa. No, lìcpe' ba'i, yende chó mèn nzo co' ndlibe'que' xuden Diox. Ante daa, co' nac xgan' xuden Diox, ndliben xuden Diox. No loo mèn co' ndlyazen go xo'fque'en cón che'n xuden Diox, mènà mté'thque' no nda'que' mènà cuent cón che'n xuden Diox.

<sup>28</sup> Ndxab Jesús loo mènà, ne:

—Gòo gu' loo cón chenen no gola's gu' loon, gu' co' anze'f nxi lezo' por chol yaltii co' ndxàc loo gu'. Daa li par cue see tee lezo' gu' no par tí' lezo' gu' loo ryethe con'. <sup>29</sup> Tac daa nac mbi' nado'. No indye'ste daa. Ne' ne' inxal' daa. Por cona, ngue niin loo gu': Ftubdi's gu' loon no bìn gu' di's co' ngue niin loo gu' ndxè'. No bli gu'i xal ngue ñibe'ena loo gu' xal ndxàca loo thib ned ngon co'se' nxo'f xuan' ngon yuug xís yen ngon. Fté'th gu' co' nac cón chenen. Chele' gu' yòo loo cón chenen no yila's gu' loon xal ngue niina loo gu' ndxè', por derech, cue see tee lezo' gu' loo ryethe con'. <sup>30</sup> Tac con' co' ñibe'en loo mèn co' ndxòo loo cón chenen par li mènà, inactive con'a arid nagàn par li mènà. Ne' ne inaca xal thib yó' co' anze'f né' par hue' mèn yó'a xís mèn. Ndxè'leque', naca thib con' par tí' lezo' mèn no yo nagàl lezo' mèn.

## 12

*Myen' xin' mté'th Jesús mcho' bacdò che'n nzob triu huiz co' ngòc huiz descans tiempa.  
(Mr. 2.23-28; Lc. 6.1-5)*

<sup>1</sup> Leque le'n huiza, thib huiz sabd co' ngòc huiz descans tiempa, Jesús nda riid con myen' xin' mté'th Jesús co'te' nax thib le' yòo co'te' nzo'f ña' triu. Le' myen' xin' mté'th Jesús na, mblyan'. Ale mtlo myen', mcho' myen' triu. No mblobya' myen' triu la's ya' myen' par ngro' nzob triu par hua myen'. <sup>2</sup> Làth mèn co' ndoo nque xís Jesús ngo ndxep



mèn xley' farise. Co'se' ñèe mèn xley' farise ndli myen' con'a, ndxab mèn xley' farisea loo Jesús:

—Hui' nexa, mbi'. Myen' xin' mté'th lùu ngue li zin' co' indxàalte li myen' huiz sabd co' nac huiz descans, cara.

<sup>3</sup> Jesús ndxab loo mèn xley' farise:

—Aa, ¿ché' tarte lab gu' loo libr no ché' tarte ta' gu' cuent cón che'n con' co' mbli David co' ngòc rey póla thib vez co'se' mblyan' David con mèn co' ngue no David tiempa, cà'?

<sup>4</sup> David ngòc le'n templ. No ale mxen David pan co' ngòc pan natú' loo Diox co' mbec mèn loo mes. Indxàalte David nghua David pana con mèn. Tac pana, ante nguley', co' ndxòo le'n templ che'n Diox, ndxàp permis ndxuhua pana tiempa. <sup>5</sup> ¿Ché' tarte lab gu' loo libr, co' ngòc ley co' mnibe' Diox mxo'f Moisés loo mèn, le' rye nguley' co' ndxòo templ indlide descans huiz descans no mxo'f zin' nguley' le'n templ huiz descans, cà'? No non gu' le' con' co' ndli nguley'a incàbte con'a xquin nguley' no xtol nguley', ¿lé'? <sup>6</sup> Ngue niin loo gu': Trè' nzo thib mbi' co' nac más mbi' roo mbi' xèn leque templ, co' nee di's, mbi'a nac yub daa. No con' ndlin inacte co' ngue cuanen xquin daa no xtol daa xal ndli gu' cuent. <sup>7</sup> Gu' tarte ten' no tarte yaa'd di's loo gu' cón nee di's co' ngue niin loo gu' ndxè':

Daa ndlyaz le' gu' lyat lezo' ñèe gu' hues xtàa gu'. No indlyasten le' gu' tolo guth má' par quix gu' cón che'n xtol gu' loo Diox por ren má' co' nxo gu' loo izlyo'.

Le' sya, chele' gu' non no ta' gu' cuent cón nee di's co' ngue niin loo gu' ndxè', axta ne' ne' quexù' gu' daa, daa co' ingue cua'nte xquin no xtol. <sup>8</sup> Daa co' mbal yáal loo izlyo' xalque' ndxáal chol mèn loo izlyo', daa ñibe' loo mèn no niin loo mèn cón li mèn huiz sabd. Tac Diox mbli ndxàpen con' la's niin no la's yan par ñibe'en loo mèn cón li mèn huiz sabd.

*Trè' ndlu' cón che'n thib mbi' co' mque no sa ya' biiz.*

*(Mr. 3.1-6; Lc. 6.6-11)*

<sup>9</sup> Ngoloa, mbii Jesús tya. Ngòc Jesús le'n thib sinagog che'n mèn. <sup>10</sup> Làth mèn ngo thib mbi' co' nayíiz sa ya'. Ya' mbi'a yende mod huin. No yende mod ga'. Sya, asembli mèn, mnibdi's mèn loo Jesús cón che'n mbi'a par cua'n mèn mod quexù' mèn Jesús. Ndxab mèn loo Jesús:

—Mbi', ¿ché' nzo mod teyac mèn thib mèn yíiz nalze co' nac huiz descans, à'?

<sup>11</sup> Mcàb Jesús loo mèn. Ndxab Jesús:

—¿Ché' nzo chó thib gu' co' nzo làth gu' ndxè', angab na'i, chele' gu' ngue no thib mbacxil' no ngob che mbacxil'a le'n thib tó' le'xque' huiz sabd co' nac huiz descans, ché' ne'co'de gu' mbacxil'a le'n tó', sya, cà'? <sup>12</sup> Ale'que' thib mbi' ne' intac más leque thib mbacxil'. Cona, ngue niin loo gu': Ndxàalque' li mèn con' ndac loo mèn huiz sabd co' nac huiz descans.

<sup>13</sup> Ngolo ndxab Jesús di'sa loo mèn, ndxab Jesús loo mbi' yíiza:

—Ftega' ya'l, ey.

Co'se' mtega' mbi' ya' mbi', mbyac ya' mbi' xalque' taasa lad ya' mbi' co' nac ya' huen mbi'. <sup>14</sup> Sya, ngro' mèn xley' farise. Mdoodi's mèn con xtàa mèn xá mod guthxù' mèn Jesús.

*Di's co' mde'th Sayi co' mde'th di's co' ndxab Diox cón che'n Jesús.*

<sup>15</sup> Co'se' mden' lezo' Jesús con' ndlya's mèn li no mèn Jesús, mbii Jesús tya. No anze'f thib mèn mdoo nque xís Jesús. Làth xtau'a, mteyac Jesús mèn yíiz co' nde làth mèn.

<sup>16</sup> Mnibe' Jesús loo mèn yende chó loo gabte mèn chó nac Jesús. <sup>17</sup> Tataa mnibe' Jesús loo mèn par ngòcque', no mdyaaque', no mdubque' di's co' mde'th Sayi co' mde'th di's co' ndxab Diox. Sayi ndxab:

<sup>18</sup> Mbi' ndxè' nac mbi' co' nxo'f zin' zin' cón chenen. Daa mcui mbi' ndxè'. Mbi' ndxè' anze'f lezon ngudloon. No cón che'n con' ndli mbi' ndxè' anze'f ndyac tín' lezon. Daa làa Xpii Natú' co' nac Xpiipe' daa loo mbi' co' nxo'f zin' zin' cón chenen. Te'th mbi' no lu' mbi' loo mèn dib athu loo izlyo' le' daa nali no nambii tub rezen cón che'n rye

mèn. <sup>19</sup> Ne'yoo di'ste mbi' con nec thib mèn. Ne' ne' te'th mbi' cón che'n mbi' ayen di's ayen cuent loo mèn. Ne' ne' yo mèn co' gòn di's co' gab mbi' ayen di's ayen cuent ned riid mbi'. <sup>20</sup> Ne' ne' qui's mbi' co' nxo'f zin' zin' cón chenen thib xan' nixxtil' co' ndoo gon' no co' ndoo rec par gas nixxtil'a. Ne' ne' teche mbi'a bxec loo mech che'n lintern co' pente ndoo yol axta co'se' gác huiz co'se' thib lite ñibe' mbi' co' nxo'f zin' zin' cón chenen loo mèn dib athu loo izlyo'. Ne'lide mbi'a con'a tant nado' mbi'a. <sup>21</sup> No loo mbi' co' nxo'f zin' zin' cón chenen cue quee lezo' mèn co' nac mèn dib athu loo izlyo', mèn co' inacte mèn nación Israel.

*Mèn xley' farise mquexù' mque' fals Jesús le' Jesús ndxàp con' la's nii Jesús no con' la's ya' Jesús co' nac che'n meexù'.*

*(Mr. 3.19-30; Lc. 11.14-23; 12.10)*

<sup>22</sup> Ngolo mdoodi's Jesús di'sa, mbi'th no mèn thib mbi' sieu co' mque no thib mbii ye'rsin' che'n meexù'. Nde nxon', mud mbi', ne. Jesús mteyac mbi'. Ngoloa, ndxe'sleque' mdoodi's mbi' no mbui' mbi'. <sup>23</sup> Co'se' ñèe mèn co' nziri' loo Jesús le' Jesús mbli con'a, ante mbui' mèn na ante gunaa mèn. Mbez mèn:

—¿Ché' mbi' ba' co' mbez mèn nac xgan' David co' ngòc rey póla, cà'?

<sup>24</sup> Co'se' mbìn mèn xley' farise tataa gunii mèn na mdoodi's mèn cón che'n Jesús, ndxab mèn xley' farise loo mèn:

—Mbi' ba' ngo' xpíi ye'rsin' ante por ryethe con' roo no con' xèn co' nzo la's nii no co' nzo la's ya' che'n xa' co' lèe Beelzebú co' nac jef che'n rye xpíi ye'rsin'.

<sup>25</sup> Per Jesús mda' cuent no mden' lezo' Jesús xal nac xtùuz mèn. Ndxab Jesús loo mèn:

—Nde niin thib con' loo gu', mèn xley' farise: Ryete mèn co' nxo'f zin' no gobiern loo cón che'n gobiern, chele' mèn ndxàc chop ned mèn no leque mèn bixyath contra xtàa mèn, leque mèn guth xtàa axta telux mèn xtàa mèn. Le' sya, tataa mod gobierna lyux. Lomisque' ne, chele' mèn che'n thib yèez o thib ned mèn guliz co' ndxàc famil ndxàc chop ned no bixyath mèn contra xtàa mèn, no bixyath mèn guliz co' ndxàc familia contra mèn guliz por mbe yoo mèn, pues mèn ne'xecte loo con'a axta lyux mèn yèeza no axta lyux mèn co' ndxàc mèn guliza, ne. <sup>26</sup> Cona, ngue niin loo gu': Lomisque' mod ndxàca loo Mebizya, ne. Tac chele' Mebizya tlo li par gác mèn mèn nado' loo izlyo', ¿xá mod ryo' loo co' ndlya's Mebizya li mèn, sya? Yende moda, ¿lé'? <sup>27</sup> Gu' mbez le' daa ngo' xpíi ye'rsin' loo mèn por cón che'n con' roo no con' xèn co' nzo la's nii no co' nzo la's ya' che'n xa' co' lèe Beelzebú, ¿lé'? Chele' daa tataa ndli, ¿chó nda' yalnibe' loo mèn co' ndxòo lad che'n gu' par ngo' mèn xpíi ye'rsin' loo mèn co' mque no xpíi ye'rsin', sya? Cona, ngue niin loo gu': Leque mèn co' ndyoo nque xís gu'a nda' cuent no ngo xo'f mèn cón che'n gu', ale nquée mbii yéc gu', no ndxos xtùuz gu', no ne' ne' inda' gu' cuent cón mbez gu' co'se' ndli gu' xtùuz cón chenen. <sup>28</sup> Ndxle'leque', daa ngo' xpíi ye'rsin' loo mèn por cón che'n Xpíi Natú' che'n Diox. No con' ndlin loo mèn ndlu' loo mèn par ta' mèn cuent no non mèn mzinle' tiemp co' ngue ñibe'pe' Diox loo mèn làth gu'.

<sup>29</sup> Gunee gu' loon: ¿Xá mod gác yòo chol mèn liz thib mbi' tín' co' anze'f nayi' par li huan' mèn con' co' nac che'n mbi'a chele' mèn ne'tyente mbi' par ner quedó' mèn mbi'? Chele' mèn ante tataa gác li loo mbi', le' sya, nzoque' mod li huan' mèn che'n mbi' co' ndxàp mbi'.

<sup>30</sup> Mèn co' inda'de lad chenen, mèn nac ngolo ngola's loon. Lomisque' ne, mèn co' inquietàa node daa par lyath no mèn daa par gon taamas mèn loo cón che'n Diox, ale ndxe'leque', le'le' ndli mèn ndryo xà' taamas mèn loo cón che'n Diox.

<sup>31</sup> Cona, ngue niin loo gu': Nzoque' mod tyon' rye xtol mèn no xquin mèn co' mcua'n mèn. No nzoque' mod tyon' rye di's co' ñii yèe ñii tii mèn cón che'n Diox. Per chele' chol mèn ñii yèe ñii tii cón che'n Xpíi Natú', mèn, por derech, thidteneque' ne'tyon'te xtol no xquin. <sup>32</sup> Chol mèn co' ñii yèe ñii tii cón chenen, daa co' mbal yáal loo izlyo' xalque' ndxáal chol mèn, nzoque' mod tyon' xtol no xquin mèn chele' mèn ña'ba loo Diox ton' Diox xtol mèn. Per chele' chol mèn ñii yèe ñii tii cón che'n Xpíi Natú', mèn,



por derech, thidteneque' ne'tyon'te xtol no xquin mèn, que naca naban mèn loo izlyo' ndxè', que naca yòo ban mèn tedib izlyo' co' cue yiloo.

*Trè' ndlu' cón che'n chop ned mèn. Mèna nac xal thib yaa xlè ndac co' nda' xlè huen no xal thib yaa xlè ye'rsin' co' nda' xlè ye'rsin'.*

*(Lc. 6.43-45)*

<sup>33</sup> Angab na'i, chele' gu' too thib xan' yaa xlè co' ta' xlè ndac, yaa xlèa ta' xlè ndac. No chele' gu' too thib xan' yaa xlè ye'rsin', yaa xlèa ta' xlè ye'rsin'. Sya, mèn libe' no ta' mèn cuent cón che'n yaa xlèa por thib loo thib loo xlè co' nda' yaa xlèa. Tataa ndxàc be' mèn, ne. <sup>34</sup> ¡Aa mèn ye'rsin' co' nac xal mbel' co' lèe huid! ¿Xá mod gác gu' tyoodi's gu' con' ndac co'se' angual nac gu' mèn ye'rsin', à'? Yende mod tyoodi's gu' con' ndac. Tac di's co' alithe ndyoodi's chol mèn, di'sa nac di's co' alithe ndye'th xtùuz mèn co' ndyro' ndlyen' lezo' mèn par tyoodi's mèn.

<sup>35</sup> Tolo ndxab Jesús loo mèna:

—Nde niin tedib con' loo gu': Mèn co' nac mèn ndac, mèna ndxòo lezo' ndyoodi's con' ndac. Tac con' ndac co' ndyoodi's mèna nac di's co' ndryo' le'n lezo' mèna. Le' mèn co' nac mèn ye'rsin' na, mèna ndxòo lezo' ndyoodi's con' ye'rsin'. Tac con' ye'rsin' co' ndyoodi's mèna, lomisque', ndryo' le'n lezo' mèna. <sup>36</sup> Más de cona, niin loo gu': Ryete di's co' alithe ndyoodi's mèn, cón che'n leque di'sa ta' mèn cuent loo Diox co'se' gác huiz co' tub rez Diox cón che'n mèn loo mèn. <sup>37</sup> Tac leque di's co' tyoodi's gu' no co' ta' gu' cuent huiza, leque di'sa co xo'f gu' par ñeene' chó mèn nac gu', ¿ché' nac gu' mèn ndac no mèn nali o ché' nac gu' mèn co' ncu'a'n xquin no xtol par thidtene quexù' Diox gu' no tetii Diox gu'?

*Mèn ye'rsin' ña'b loo Jesús li Jesús thib señ co' hui' mèn loo co' gác thib yalguzye'.*

*(Mr. 8.12; Lc. 11.29-32)*

<sup>38</sup> Sya, plá mèn xley' farise no plá mèn co' ndlu' cón che'n ley co' mxo'f Moisés loo mèn, ndxab mèna loo Jesús:

—Maistr, nu' ndlya's ñèe le' lùu li thib con' co' gác thib yalguzye' loo nu'.

<sup>39</sup> Jesús mcàb loo mèna. Ndxab Jesús:

—¿Mèn co' ngolo ngolux ñibe' loon par lin thib con' co' nac yalguzye', cà'? Yende xàa. Ya yende chó más yalguzye' gác loo mèn ba'. Ndxè'leque', thib señ co' hui' mèn ba' gác loo mèn xal señ co' ngòc loo Jonás co' mde'th di's co' ndxab Diox póla. <sup>40</sup> Tac texal ngo Jonás le'n xti' thib mbèel roo, co' mtoxcua' Diox, le'n son huiz no le'n son yál', tataa daa ne, daa co' mbal yáal loo izlyo' xalque' ndxáal chol mèn, daa go le'n bá' le'n son huiz no le'n son yál'. <sup>41</sup> Tolo niin loo gu': Mèn ciuda Nínive co' ngure ban póla ryo' too loo mèn, co'se' gác huiz co' tub rez Diox cón che'n ryethe mèn co' nzi ban tiemp ndxè', par quexù' mèn ciuda Nínive mèn co' nzi ban tiemp ndxè'. Tac mèn ciuda Nínive ngulàa yéc no ngulàa lezo' loo xtol mèn no loo xquin mèn no mzye' mod co' ngòp mèna co'se' mde'th Jonás no mblo Jonás yalbàn cón che'n di's ndac che'npe' Diox loo mèna. No nalle' na nii loo gu': Trè' nzo thib mbi' loo gu', co' nac daa, co' nac más mbi' roo mbi' xèn leque Jonás. <sup>42</sup> Lomisque' ne, thib xa'got co' ngòc rein loo nación co' ngure par ned sur tiempa, xa'gota, ne, ryo' too loo mèn co'se' gác huiz co' tub rez Diox cón che'n mèn co' nziri' tiemp ndxè' par tolo quexù' xa'gota mèn co' nziri' tiemp ndxè' loo Diox. Tac xa'gota ngro' làaz xa' co' ngureri' tedib lad ro izlyo' co'te' ngòc más tith tiempa par mbi'th yòn xa'gota di's co' ngòc di's co' ngòc Salomón co' ngòc rey tiempa. No nalle' na nii loo gu': Trè' nzo thib mbi', co' nac daa, co' nac más mbi' roo mbi' xèn leque Salomón.

*Trè' ndlu' cón che'n thib xpíi ye'rsin' co' mbere, mzin loo mbi' co'te' ngro xpíi ye'rsin'.*

*(Lc. 11.24-26)*

<sup>43</sup> Niin tedib con' loo gu', ne: Co'se' ndryo' thib xpíi ye'rsin' loo thib mèn, xpíia ngro'. No nda que tee xpíia co'te' nagán par cua'n xpíi co'te' yòo xpíi par li xpíi descans. Per co'se' ñee xpíi yende pá yòo xpíi, ndli xpíi xtùuz. <sup>44</sup> No mbez xpíi loo lezo' xpíi: ¿Cón lin? Capas daa, beren, ndyàan loo mbi' co'te' ngro'ena. Per co'se' mbere xpíia, ndye'th

xpii loo mbi', ñèè xpia mbi'a xal thib liz mèn co' nítleque' mblyo'f no co' mblyath no co' nabe'ste ñaa. <sup>45</sup> Sya, bere xpia, ya xpia, ya xi xpia taagaz xpia co' nac más xpia ye'rsin' leque xpia. Sya, yòò rye xpia loo prob mbi'a. Le' sya, por lult más nazab tyen mbii mbi'a no quéè mbii loo mbi'a leque co'se' ner vez ngòò xpia loo mbi'a. Tataa gàca loo mèn co' nac bin ye'rsin' co' nziri' tiemp ndxè'.

*Xna' Jesús, no myen' huespe' Jesús, ngua toodi's no Jesús.*

*(Mr. 3.31-35; Lc. 8.19-21)*

<sup>46</sup> Jesús tatabe' ndoo toodi's loo mèn co' nziri' loo Jesús co'se' mzin xna' Jesús no myen' huespe' Jesús gax co'te' ngo Jesús. Ne'ngòode xa'. Par fuer no maste ngure xa'. Mblyas xa' toodi's no xa' Jesús. <sup>47</sup> Sya, thib xa' co' ndoo xit'ha xexte ndxab loo Jesús:

—Xna' U' no myen' huespe' U' nzi fuer ba'. No ndlyas xa' tyoodi's no xa' U', Tad.

<sup>48</sup> Per ndxe'leque', Jesús mcàb loo xa' co' mbli avis loo Jesús. Ndxab Jesús:

—¿Ché' ndlyas'li niin lool chó mèn, lìcque', nac xal xnan no chó mèn, lìcque', nac xal huesen, cà'? Na nii lool chó nac xal xnan no chó nac xal huesen.

<sup>49</sup> Sya, mbly' Jesús myen' xin' mté'th Jesús loo xa'a no loo mèn co' nziri'a. Ndxab Jesús:

—Myen' ba' nac xal xnan no myen' ba' nac xal huespe'en, ne, ey. <sup>50</sup> Tac chol mèn co' ndli xal nee lezo' xuden Diox co' nzo loo bé' no xal ndlyas' xuden Diox, mènà nac xal huesen. Mènà nac xal ftanen. No nac mènà xal xnan.

## 13

*Jesús mtetac di's loo mèn xal ndxàca loo thib mbi' co'se' ngo mbi' bin.*

*(Mr. 4.1-9; Lc. 8.4-8)*

<sup>1</sup> Leque huiza ngro' Jesús liz thib mbi' co'te' ngo Jesús. Ngua tub Jesús ro thib lagun co' nziri' tya. <sup>2</sup> Huiza, anze'f thib mèn mqueltàa co'te' mdub Jesús. Sya, ngo too Jesús. Ngua tub Jesús le'n thib yòoyaa loo lagun. Le' mènà na, ngure loo yux ro lagun loo Jesús.

<sup>3</sup> Sya, mtlo Jesús. Alithe mtetac Jesús huax con' loo mènà. Ndxab Jesús loo mènà:

—Nde niin thib con' loo gu': Ngo thib mbi' co' ngo bin. <sup>4</sup> Mbi' ngro', ngua lo mbi' bin. Láth nge go mbi' bina, ngulàa ndxep bin ro ned. Ngoloa, mbi'th mbin bé'. Mbly' mbin biz bina loo yòò. Nduhua mbin biz bina. <sup>5</sup> Le' taandxep biz bina na, ngulàa loo yòò quéè co'te' xite yòò nzi'f loo quéè. Setilte ngulen biz bina tac inacha'de nzi'f yòò loo quéèa.

<sup>6</sup> Per co'se' mtlo mdín bée biz bina, ale mtec mso' bée biz bina tac yende arid xcop loo yòò co'te' ngulen biz bina tac yende pá ned xon' no lyàa lox biz bina. Ale mbii'z bina. <sup>7</sup> Le' taandxep biz bina na, ngulàa le'n huan. No más mbryoo mxyèn huan leque biz bina. Ale mblyus biz bina nzo biz bina le'n huan. <sup>8</sup> Le' taandxep biz bina na, ngulàa loo yòò be'f. Biz bina mda' thib cosech ndac. Chó biz bina mda' thib ayo nzob. Chó biz bina mda' ayon nzob. Chó biz bina mda' gal psi' nzob tac huenque' ngòc cosech che'n biz bina loo yòòa.

<sup>9</sup> Chele' gu' nden' cón nee di's ndxè', fta' gu' lugar yaa'd di's ndxè' le'n lezo' gu'. No fta' gu' cuent cón nee di's di's co' ngue niin loo gu' ndxè'.

*Trè' ndlu' cón mbli mtetac Jesús di's loo mèn.*

*(Mr. 4.10-12; Lc. 8.9-10)*

<sup>10</sup> Sya, mbii gax myen' xin' mté'th Jesús loo Jesús. Ndxab myen' loo Jesús:

—Tad, ¿chonon tatua' ndyoodi's U' loo mèn ba' con di's co' alithe mtetac U' ba', à'?

<sup>11</sup> Jesús mcàb loo myen' xin' mté'th Jesús. Ndxab Jesús loo myen':

—Loo mènà, tataa mdyoodizen tac mènà indxaa'dte di's. Ne' ne' gác mènà ta' mènà cuent cón che'n di's co' ndlu'en loo mèn. Per part cón che'n gu', Diox ngue li le' gu' nda' cuent cón che'n mod co' be' nacasloo xá mod ndlyas' Diox ñibe'pe' Diox loo mèn, Diox co' ndub loo bé'. <sup>12</sup> Lomisque' ne, mèn co' ngue no con', tolo que no mènà más con' axtaque' que no mènà huax con'. Per ndxe'leque', mèn co' ingue node con', ale tyuhuan mènà ndxepete con' ngue no mènà. Con'a nee di's, tolo gòn mèn no tolo ta' mènà cuent cón che'n con' co' nac cón che'n Diox. Per mèn co' indxaa'dte di's no co' inda'de cuent cón che'n Diox no mèn co' indyalte tolo gòn cón che'n Diox, loo mènà Diox li tolo yau' xtùuz mènà no tolo yau' lezo' mènà loo cón che'n Diox. <sup>13</sup> Cona, ndyoodizen loo mènà

con di's co' alithe ntetaquen tac mènà ngue li cuent ngue hui' ndac mènà no ndxòn ndac mènà loo cón chenen. No ndli mènà cuent ndxòn ndac mènà di's co' ndlu' cón chenen. Per ndxe'leque', nac mènà xal mèn co' ne'ñeede cón ngue hui' mènà loo cón chenen. Lomisque', nac mènà xal mèn co' inda' ndacte cuent cón chenen. Ndxàca tataa loo mènà tac indxaa'dte di's co' ndyoodizen yéc mèn. Ne' ne' inda' mènà cuent cón ngue lin. <sup>14</sup> No nalle' ndxàcque' con' loo mènà xal nac di's co' ndxab Sayi co' mde'th di's co' ndxab Diox. Ndxab Sayi:

Lìcpe' ba'i, mèn gòn di's co' tyoodizen. Per ne'yaa'dte mènà di'sa. Lìcpe' ba'i, mèn hui' loo con' lin. Per ne'ta'de mèn cuent cón ngue lin. <sup>15</sup> Tac lezo' mènà no xtùuz mènà ngòc naad no ngòc nguud. Anze'f nazab ndxòn mènà di's no nden' mènà di's co' ndyoodizen. Loo cón che'n Diox nac mènà xal mèn sieu. No nac mènà xal mèn co' nathath ngüii' loo cón che'n Diox. Ale ryethe con'a ndxàc loo mènà par ne'ta'de mènà cuent no par ne'gònte mènà cón che'n Diox ne' ne' yaa'd di'sa le'n xtùuz mènà no le'n lezo' mènà. Rye con'a ncàb loo mènà par ne'tyalte mènà lyàa yéc mènà no lyàa lezo' mènà. Ne' ne' tyal mènà par zye' mod co' ndxàp mènà par telá'en mènà loo con' ryes. Cona, tataa ndxàca loo mènà xal gunii Sayi cón che'n mènà póla.

<sup>16</sup> Huen nda gu', ey, tac gu' ngüii'que' no ndxònque' gu' co' huen huen cón che'n Diox. No ndxaa'dque' gu' di's co' ngue niin loo gu' le'n xtùuz gu' no le'n lezo' gu'. <sup>17</sup> Lìcpe' ba'i, na nii loo gu':

—Huax mèn co' ngo póla, mèn co' ngòc mèn co' mde'th di's co' ndxab Diox no taamas mèn co' ngòc mèn ndac, anze'f mblyas' mènà ngüii' mènà loo con' co' ngüii' gu' nalle'. Per ne'ngàcte gan ngüii' mènà con' ndxè'. Lomisque' ne, mblyas' mènà ngòn mènà cón che'n con' co' ndxòn gu' nalle'. Per ne'ngàcte gan ngòn mènà cón che'n con' co' ndxòn gu' nalle'.

*Jesús ngue go xo'f loo mèn cón nee di's co' mtetac Jesús loo mèn.*

*(Mr. 4.13–20; Lc. 8.11–15)*

<sup>18</sup> Bìn gu' di's co' tan cuent loo gu' nalle' co' alithe mtetaquen loo gu'a, co' nee di's, cón che'n thib mbi' co' mblo biz bina. <sup>19</sup> Di's co' guniin loo gu'a nac con' ndxè': Mèn co' ndxòn di's co' nac di's ndac che'n Diox co' ndlu' xá mod ndlyas' Diox ñibe'pe' Diox loo mèn, no indxaa'dte di'sa le'n lezo' mènà, ne' ne' inda' mèn cuent cón che'n di'sa, mènà nac xal biz bin co' ngulàa ro ned. Tac co'se' ndxi'th Mebizya loo mènà, ndli Mebizya loo mènà par ne'ten'te mènà no par setilte yathla's mènà cón che'n di's ndac co' mbìn mènà no co' ngulàa le'n xtùuz mènà no co' ngulàa le'n lezo' mènà. <sup>20</sup> Le' biz bin co' ngulàa loo yò quèea na, nac xal mèn co' ndxòn cón che'n di's ndaca. No co'se' ndxòn mènà cón che'n di's ndaca, ndyac tín' lezo' mèn ndxòn mèn cón che'n di'sa. <sup>21</sup> Per yiloa pláte huiz ndxàc ndxòn mènà cón che'n di's ndaca, ndxàca loo mèn xal biz bin co' ngulàa loo yò quèea. Biz bina ne'ngxecte por yende co'te' lyàa lox biz bina no yende pá xon' lox biz bina. Tac co'se' ndxàc ngòc nguàal con' loo mènà no co'se' ndyub ngu's mèn prob mènà por cón che'n di's ndac, le' sya, xexte ndlá' mènà. Ya indlyaste mènà tolo gòn mènà cón che'n di's ndac che'n Diox tac ngo tac lezo' mènà loo con'a. <sup>22</sup> Le' biz bin co' ngulàa le'n huana na, ndlu' loo na' cón che'n mèn co' ndxòn cón che'n di's ndac. Per mènà más nde yath ñèe yalgon' co' nthop mèn loo izlyo' ndxè'. Le' sya, yalgon' co' ndxàp mèn loo izlyo' ndxè', por yalgon'a leque mènà nquedii mènà par ndxau' yéc mèn no ndxau' lezo' mèn loo cón che'n Diox. Por cona, incàb ndacte nec thib con' ndac loo mènà loo cón che'n Diox. <sup>23</sup> Le' biz bin co' ngulàa loo yò be'fa na, ndlu' loo na' cón che'n mèn co' ndxaa'd cón che'n di's ndac co' ngulàa le'n xtùuz mèn no le'n lezo' mèn. Le' sya, mènà ndli par ndxòn taamas mèn cón che'n di's ndac no par yò taamas mèn loo cón che'n Diox. Tataa mod nac mènà xal biz bin co' nda' thib cosech ndac, co' nee di's, chó biz bin nda' thib ayo xlè. Chó biz bin nda' ayon xlè. Chó biz bin nda' gal psi' xlè.

*Jesús ngue tetac cón che'n ña' triu huan co' ngulen le'n ña' triu.*

<sup>24</sup> Jesús ndxab loo mènà:

—Nde tetaquen tedib con' loo gu': Con' co' ndxàc par ñibe'pe' Diox loo mèn nac xal nac di's co' nde niin loo gu' ndxè'. Thib mbi' ngro', ngua lo mbi' biz bin co' nac nzob bin triu ndac loo xyòn mbi'. <sup>25</sup> Per co'se' ryete mèn guliz mbi' co' ngòc xuan' yòoa mxe mcal', ngòc tedib mbi' co' ngòc ngolo ngola's mbi'a loo xyòn mbi'a. Ngua lobii mbi' biz nzob bin triu huan co' ñaa xalque' ñaa nzob bin triua loo xyòn mbi'. Ngoloa, ndyàa mbi' co' ngòc ngolo ngola's mbi'a. <sup>26</sup> Per co'se' ngulen nzob bin triua, no mbryoo mxyèna, no mtlo ngos bacdò ña' triua, axta syare', thidte gunaa ña' triua con biz huan co' ngua lobii mbi'a loo xyòn tedib mbi'a. <sup>27</sup> Sya, ngua nee moza loo mbi' co' ngòc patrón moz. Ndxab moz loo mbi':

—Tad, chele' U' ngua lo ante nzob bin triu ndac loo xyòn U', ¿pá ned ngro' biz huan co' ñaa xal ñaa triu le'n ña' sya, Tad? ¿Xá mod ngulen biz bina le'n ña', ne, Tad? <sup>28</sup> Patrón mcàb loo moz. Ndxab patrón:

—Nzo chó mbi' co' ndxecloo ñèe daa ngua li con'a loo xyònen.

Sya, mnibdi's moz loo patrón. Ndxab moz:

—¿Ché' ndlya's U' ya quib nu' huan co' ñaa xal ñaa ña', cà'?

<sup>29</sup> Per patrón ndxab loo moza:

—Aa'a. La' tee nzo'fa. Ne'ya quibtel huana le'n ña'. Tac chele' lùu quib huana, nzo ryes quib lùu ña', ne. <sup>30</sup> La'a thidte ryoo triu huana con ña' triu más huen axta co'se' gac timp lýáp ña'. Sya, por derech, tel'en moz co' ya li zin' par quib moz huan ye'rsin'a no, yilóa, tedó' moz huana por manoj par tec moz huana loo quíi. Le' nzob triu ndaca na, cosua' moz le'n sac co'se' yiló láp moz triu ndaca.

*Jesús ngue tetac loo mèn cón che'n xal nac biz mostaz.*

*(Mr. 4.30–32; Lc. 13.18–19)*

<sup>31</sup> Mtetac Jesús tedib di's loo mèn. Ndxab Jesús:

—Nde niin tedib con' loo gu': Mod co' tlo queltàa mèn co' tyal par tlo Diox, ñibe'pe' Diox loo mèn nac xal thib biz bin bix che'n mostaz co' mblo thib mbi' bin loo xyòn mbi'. <sup>32</sup> No, lìcpe' ba'i, biz bin mostaza nac thib biz bin más bix loo rye loothe biz bin co' nzo. Per co'se' ndlyen biz bin mostaza no ndryooi, ndxàca thib xan' huan co' más ndryoo no nxyèn le'n ña' mèn. No ndxàca casque' xal thib xan' yaa co'te' ndlyàa mbin bé' par ntoxcua' mbin xyòn mbin loo ram yaaa.

*Jesús ngue tetac loo mèn cón che'n xá mod nac dii levadur.*

*(Lr. 13.20–21)*

<sup>33</sup> Diox co' ngue tlo ñibe' loo mèn, nerleque' mtlo Diox, ñibe' Diox loo nagabte mèn no más. No xègà xègà tolo yar' mèn co' ngue ñibe' Diox loo axta nzoque' mèn dib athu loo izlyo', mèn co' ñibe' Diox loo. Cón che'n mèn nac xal ndxep dii levadur co' ndyen thib xa'got par ncos xa' diia con son kil harin. No con le' laate diia tyub bes son kil harina.

*Jesús ndyoodi's loo mèn co' nac antub di's co' mtetac Jesús loo mèn.*

*(Mr. 4.33–34)*

<sup>34</sup> Ryete con'a mdoodi's no Jesús mèn co' mqueltàa loo Jesús co' ngòc di's co' mtetac Jesús loo mèn. Asembli Jesús ante mtetac Jesús di's loo mèn. <sup>35</sup> Tataa ngòc co' mbli Jesús par ngòcque', no mdyaaque', no mdubque' di's co' gunii thib mbi' co' mde'th di's co' ndxab Diox, co'se' mque' mbi'a ye's loo thib libr, di's co' mbez:

Daa tyoodiz con mèn ante con di's co' tetaquen loo mèn. Daa tyoodiz no mèn no tan cuent loo mèn cón che'n con' co' nacasloo axta co'se' mbli Diox ngure izlyo' no mblec Diox izlyo' no axta nalle'.

*Jesús ngue go xo'f no ngue ta' Jesús cuent cón che'n triu huan co' ngulen làth nzob triu.*

<sup>36</sup> Ngolo gunii Jesús Diox loo mèn co' mqueltàa loo Jesús ro laguna, mbii Jesús tya. Ngòc Jesús liz thib mbi' co' ndub gaxte tya. Liz mbi'a mqueltàa ryete myen' xin' mté'th Jesús loo Jesús. Ndxab myen' loo Jesús:

—Tad, blo xo'f U' di's co' mtetac U' cón che'n huan ye'rsin' co' ñaa xal ñaa triu loo nu' co' ngo no co' ngulen loo xyòn mbi'a.

<sup>37</sup> Jesús mcàb loo myen' xin' mté'th Jesús. Ndxab Jesús loo myen'a:

—Xa' co' ngo nzob bin ndac co' nac triu, xa'a nac daa, daa co' mbal yáal loo izlyo' xalque' ndxáal chol mèn. <sup>38</sup> No con' co' nee di's co'te' nac xyòn mbi'a co'te' ngo bina, con'a ndlu' loo na' nac izlyo' ndxè'. Le' nzob bina na, ndlu' loo na' nac mèn co' Diox, lìcque', ñibe'pe' loo. Le' triu huan ye'rsin' co' ngulen le'n ña' triua na, ndlu' loo na' nac mèn co' nac che'npe' Mebizya. <sup>39</sup> Le' xa' co' nac ngolo ngola's co' mblo bin ye'rsin'a na, ndlu' loo na' nac yub Mebizya. Le' co'se' ngolo ngòc cosecha na, con'a ndlu' co'se' lyux no co'se' lith no izlyo' ndxè'. Le' mèn co' thop cosecha na, ndlu' loo na' nac angl co' yi'th thop mèn huen no mèn ye'rsin' co'se' lith no no lyux izlyo'. <sup>40</sup> Xalque' mthop moz triu huan ye'rsin' co' ñaa xal ñaa ña'a par tec moz huana loo quìi, tataa gàca loo mèn, ne, co'se' lith no no lyux izlyo' ndxè'. <sup>41</sup> Daa co' mbal yáal loo izlyo' ndxè' xalque' ndxáal chol mèn, daa tel' angl daa co'se' gac tiempa par yi'th thop angl rye mèn ye'rsin' co' ndli par ncu'a'n taamas mèn xtol mèn no chol mèn co' ncu'a'n xquin no xtol, ne. <sup>42</sup> Co angl rye mèn ye'rsin'a le'n ye'rbiil co'te' nzo quìi no bèel. Tya, gón' mènà no hua le mènà. <sup>43</sup> Sya, mèn co' mdyal, mèn co' mbli co' mnibe'pe' Diox loo mèn, loo mènà quèe xniil xal co'se' ndxa'x xniil huiz co'se' gac tiemp co' ñibe'pe' Diox xud gu' loo ryethe con'. Gu' co' nden' co' nee di's co' ngue niin loo gu' ndxè', fta' gu' lugar yaa'd di's ndxè' le'n lezo' gu'. No gola's gu' loo di's co' ngue niin loo gu' ndxè'.

*Jesús ngue tetac loo mèn cón che'n tmi co' nzo yòo.*

<sup>44</sup> Tolo ndxab Jesús loo mènà: Nde tetaquen tedib con' loo gu': Con' co' nden' mèn no ndyac lezo' mèn cón che'n Diox, mèn co' tlo yila's loo Diox tac Diox mdyal yòo mèn loo cón che'n Diox, nac thib con' ndac tín' xal co'se' mzyal thib mbi' tmi co' nzo casloo loo xyòn thib xtàa mbi'. Per co'se' mzyal mbi' tmi co' nzo casloo loo xyòn xtàa mbi'a, ale mbere mbi', mtau' mbi' loo tmia tya tedib vez. No de tant ndyac lezo' mbi' co'se' mzyal mbi' tmi loo xyòn tedib mbi', ale mbere mbi', ndye'th mbi', mtho' mbi' rye con' ndxàp mbi' par ti' mbi' xyòn mènà loo mèn co' nac che'n yòoa.

*Jesús ngue tetac loo mèn cón che'n perl co' anze'fntac.*

<sup>45</sup> Mèn co' ñibe'pe' Diox loo nac xal thib mbi' co' ndyee viaj co' ngue tee cua'n perl co' anze'f náp ntac. <sup>46</sup> Co'se' mzyal mbi' perl co' anze'f náp ntac, mbere mbi', ndye'th mbi' par liz mbi' par tho' mbi' rye con' ndxàp mbi' par ryo' tmi loo con' ndxàp mbi'. Sya, bere mbi', ya mbi' par ti' mbi' perl co' anze'f ntac. Tataa mod nden' mèn co' ndyal ñibe'pe' Diox loo mèn tac anze'f thib con' ndac no con' huen ndli Diox loo mènà tataa.

*Jesús ngue tetac loo mèn xal co'se' ndxegaa chop loo mbèel le'n yex.*

<sup>47</sup> Mèn nde'th no ngo mèn yalbàn cón che'n di's ndac xá mod ndlya's Diox ñibe'pe' Diox loo mèn. Huax mèn nqueltàa no mèn co' ngòo loo cón che'n Diox xal ndxàca co'se' ngobii mèn thib yex le'n níttó'. No co'se' ndlyàa yexa le'n níttó', ndxegaa huax loo mbèel le'n yex. <sup>48</sup> No co'se' ndxegaa huax loo mbèel le'n yex, le' sya, mèn co' ndyen mbèel ngo' yex par ro play. Tya, ndyub mènà par noo noo co' mènà mbèel ye'rsin'. No ngobii mèn mbèel ye'rsin'a thib lad. Le' mbèel co' nac mbèel huena na, mbèela ngòo mèn le'n thib cardor. <sup>49</sup> Tataaque' gàca co'se' zin huiz no zin ze co'se' ñibe' Diox lyux izlyo' no lith no izlyo'. Sya, ryo' angl. No co' xà' angl mèn ye'rsin' làth mèn nali no làth mèn nambii. <sup>50</sup> Co angl mèn ye'rsin'a le'n ye'rbiil co'te' ndxetoo bèel no quìi. Tya, gón' mènà no hua le mènà tant nè naca, ndyac mènà.

*Trè' ndlu' Jesús cón che'n thib mbi' co' mcai con' cub làth con' gox.*

<sup>51</sup> Sya, mnibdi's Jesús loo myen' xin' mté'th Jesús. Ndxab Jesús loo myen':

—¿Ché' ndxaa'd ryethe di's ndxè' le'n quèe yéc gu' no le'n lezo' gu', à'?

Myen' xin' mté'th Jesús ndxab:

—Aa, Tad. Ndxaa'dque' di's ba' le'n quèe yéc nu' no le'n lezo' nu'.



<sup>52</sup> Sya, ndxab Jesús loo myen' xin' mté'th Jesús:

—Co'se' huen huen mté'th thib mbi' cón che'n ley co' mxo'f Moisés loo mèn no yiloo mtlo mbi', huen huen mté'th mbi'a cón che'n xá mod ñibe'pe' Diox loo mèn nalle', ndxàc loo mbi'a xal loo thib patrón co' ngo' con' cub no con' gox le'n quart co'te' ngocsua' patrona rye con' ndac che'n patrón.

*Jesús ngòo yèez Nazaret co' nac làaz Jesús.*

*(Mr. 6.1-6; Lc. 4.16-30)*

<sup>53</sup> Co'se' ngolo mda' Jesús cuent cón nee di's di's co' angmtetac Jesús loo mèn, mbii Jesús tya. Ndyàa Jesús par làaz Jesús. <sup>54</sup> Co'se' mzin Jesús làaz Jesús, tya mtlo Jesús, mblu' Jesús mèn co'te' ndub sinagog che'n mèn gulàaz Jesús. Le' rye mèn co' mqueltàa le'n sinagoga na, ante ngüi' mènna no ante ñaa mènna loo Jesús. No mbez mènna loo xtàa mènna:

—¿Pá ngua té'th mbi' ba' rye con' co' ndxác mbi' no xá mod susque' ndxác mbi' ba' ndli mbi' yalguzye' co' ndli mbi' ba', ne? <sup>55</sup> Na' nanee le' mbi' ba' nac xgan' Chè carpinter. No nac mbi' xgan' Mari. Nanee na' le' mbi' ba' ndxác hues Cob, hues Chè, hues Mon, no hues Jud. <sup>56</sup> No myen'got co' nac fta'n mbi' ba' nzo ban làth na' trè'. ¿Xá mod susque' ndxác mbi' ba' ndli mbi' ryete yalguzye' co' ndli mbi' ba'? No sate ndlu're' mbi' taamas con' ndli mbi' loo mèn, yey. <sup>57</sup> Por xtùuz co' mbli mènna cón che'n Jesús no cón che'n mèn guliz Jesús, ale tataa mod leque mènna mbli par ngo tac lezo' mènna con Jesús. No mden' mènna ngòc nguàal di's cón che'n Jesús. Sya, ndxab Jesús loo mènna:

—Huax mèn ndli ndyu' thib mbi' co' nde'th di's co' ndxab Diox. No ndli mèn cas mbi'a. Per mèn co' nac mèn gulizpe' mbi'a no mèn co' nac mèn gulàazpe' mbi'a, ñpà li mènna cas mbi'a!

<sup>58</sup> Con'a mbli ya ne'ntolode ngli Jesús huax yalguzye' tya tac mènna ne'ndalte ngala's cón che'n con' ndli Jesús.

## 14

*Trè' ndlu' cón che'n xá mod mbeth mèn Juàn Bautist.*

*(Mr. 6.14-29; Lc. 9.7-9)*

<sup>1</sup> Leque le'n huiza mbìn thib mbi' co' ngro' lèe Herod, co' mnibe' loo mèn co' nac mèn gulàaz che'n mèn galile tiempa, cón che'n Jesús. <sup>2</sup> Sya, ndxab Herod loo mèn co' ngòc moz Herod co' ngo no Herod:

—Peser Juàn Bautist nac mbi'a. Thib descuid pá ngro xban Juàn làth mèn nguth cona ndxàp mbi'a con' la's nii mbi' no la's ya' mbi' par ndli mbi' chol yalguzye'.

<sup>3</sup> Tataa ndxab Herod loo mèn co' nqueltàa no Herod. Tac Herod neeque' le' Herod mnibe' loo solndad ya tedó' solndad nii Juàn Bautist con thib caden le'n lezi'f ante por cón che'n thib xa'got co' ngro' lèe Herodi co' ngòc sa'l Lip, hues Herod. <sup>4</sup> Tataa mnibe' Herod ngòc loo Juàn Bautist tac de yalquìite ndxab Juàn loo Herod indxàalte que no Herod xa'got Lip xal xa'gotpe' Herod.

<sup>5</sup> Leque hora ngulàa xyàn lezo' Herod. Mblya's Herod ngnibe' Herod loo solndad par ya yuth solndad Juàn. Per Herod mzyeb gunèe Herod mèn co' nziri' huiza. Tac ryete mènna mbli xtùuz cón che'n Juàn no mbez mènna loo xtàa mèn le' Juàn ante ndyoodi's cón che'n Diox. <sup>6</sup> Per huiz co'se' mbli Herod thib lni co' ngòc huiz co' ngóol lèe Herod, sya, thib mza' co' nac rsap Herodia, asembli mza'. Ngro' mza'. Mbil' nii mza' loo Herod no loo mèn co' nziri' no Herod, mèn co' mbli Herod convid. No anze'f thib gust mda' lezo' Herod gunèe Herod mod co' mbil' nii mza'. <sup>7</sup> Ale mde'th Herod Diox loo mza' no loo rye mèn co' nziri' no Herod. Ndxab Herod loo mza' le' Herod li ryethe con' ndlya's mza' o ta' Herod ryethe con' ndlya's mza' par càa mza'. <sup>8</sup> Le' xna' mza' na, ndoole' mquil' mza'. Ndxab xna' mza' loo mza':

—Guuz loo rey Herod ta' rey yéc Juàn Bautist càal loo thib plat.

Le' sya, co'se' mbere mza', ndye'th mza', ndxab mza' loo rey Herod:

—Rey, daa ndlyaz ta' U' yéc Juàn Bautist càan loo thib plat nalle'.

<sup>9</sup> Co'se' mbìn Herod tataa ndxab mza' loo Herod, anze'f mxi lezo' Herod por con' li Herod. Per com le' Herod mde'th lèe Diox, ¿lé'?, no ngro'le' di's ro Herod loo ryete mèn co' nziri' con Herod, mèn co' mbli Herod convid, le' Herod li con' ndlya's mza', ¿lé'?, mnibe' Herod ya xi solndad yéc Juàn Bautist loo thib plat par càa mza'. <sup>10</sup> Sya, que nzo ne' ñee lezo' Herod, mtel' Herod solndad par ngua cho' solndad yéc Juàn le'n lezi'f. <sup>11</sup> Ngoloa, ndye'th no solndad yéc prob Juàn loo thib plat. Mda' solndad yéc Juàn loo thib plat mcàa mza'. Le' mza' na, xexte ngro'. Ngua ta' mza' plat con yéc Juàn loo xna' mza'.

<sup>12</sup> Ngolo mbeth solndad Juàn, mzin myen' xin' mté'th thebol Juàn Bautist. Ngua lo' myen' thebol Juàn lezi'f. Ngua ca's myen' thebol Juàn. Ngoloa, ngua ta' myen' cuent loo Jesús cón ngòc loo Juàn Bautist.

*Jesús mbli par nduhua ga'y mil ante mènbi'.*

*(Mr. 6.30-44; Lc. 9.10-17; Jn. 6.1-14)*

<sup>13</sup> Co'se' mbìn Jesús con' ngòc loo Juàn, mbii Jesús tya. Ngòc thidte Jesús le'n thib yòoyaa con myen' xin' mté'th Jesús par ya Jesús xà'le' tedib lugar. Per mèn co' ngure no Jesús tya mbìn le' Jesús ndale' loo nít loo lagun. Sya, ngro' tee rye mèn co' nzo ban par neda angzo ro lagun. Nda nque mènà xís Jesús. <sup>14</sup> Texal ngro' Jesús le'n yòoyaa, ñee Jesús nziri'le' huax mèn loo Jesús. Nalyat ngòc lezo' Jesús gunèe Jesús mènà. Mblyat lezo' Jesús gunèe Jesús mènà. Mteyac Jesús rye mèn yíiz co' nde no mènà loo Jesús. <sup>15</sup> Co'se' ñee myen' xin' mté'th Jesús nde zèle' izlyo' huiza, ngua myen' loo Jesús. Ndxab myen' loo Jesús:

—Mzyèle' izlyo', Tad. Neeque' U' co'te' nziri' na' ndxè' nac thib lugar nagán. No yende chó mèn nzo co' tho' co' hua mèn trè'. Más huen gunii U' Diox loo mèn ba' par bii mèn par ya cua'n mèn con' hua mèn le'n yèez ba' no le'n ranch co' nziri' le'n yii ba'.

<sup>16</sup> Sya, mcàb Jesús loo myen'. Ndxab Jesús:

—Inquinte bii mèn, yey. ¿Máa yob yéc gu', na? Fta' gu' con' hua mèn.

<sup>17</sup> Myen' ndxab loo Jesús:

—Yende cón ngue no nu' arid trè', yey. Pente ngue no nu' ga'y pan no chop mbèel no maste.

<sup>18</sup> Jesús ndxab loo myen':

—Que de no gu' con' ngue no gu'a trè'. Ñeene'.

<sup>19</sup> Sya, gunii Jesús loo mènà. Ndxab Jesús: Nabe'ste gure tub gu' loo huan ba', ey.

Ngoloa, mxen Jesús ga'y pana no chop mbèela. Mbui' Jesús loo bé'. Ndxab Jesús: Ay, Dio's. Diox quix U', Diox, por pan ndxè' no por mbèel ndxè'. Sya, mchì'x Jesús pana no mbèela. No mbli Jesús par mbyar' pana no mbèela. Mda' Jesús pana no mbèela loo myen' xin' mté'th Jesús. Le' myen' xin' mté'th Jesús na, mbli'tha loo mènà. <sup>20</sup> Ryete mènà nduhua rsè axta plóthe mbly'a's mènà. Ngolo nduhua rsè mènà, msè myen' xin' mté'th Jesús si' fchop cardor pan no mbèel co' mbyan' xo'f. <sup>21</sup> Mèn co' nduhua rsèa ngòc ga'y mil mèn, ante mènbi'. Xà'que' mèngot no xà'que' myen' bix. Indxòde cuent mèngot no myen' bix co' nduhua.

*Jesús mdee nii loo nít loo lagun.*

*(Mr. 6.45-52; Jn. 6.16-21)*

<sup>22</sup> Ngoloa, mnibe' Jesús loo myen' xin' mté'th Jesús. Ndxab Jesús loo myen':

—Gòo gu' le'n yòoyaa ba'. Ftlo gu', ftteegu' yòoyaa. Ya ner gu' par zin gu' tedib lad ro lagun. Yiloo, ndal que'en ba'.

Láth nda myen'a, Jesús gunii Diox loo mènley' co' nziri'a. <sup>23</sup> Ngolo gunii Jesús Diox loo mènley'a, mxen Jesús ned. Nda Jesús loo thib yii co' ndub gaxte tya par cuez thidte Jesús Diox. Co'se' ngulàa yál' izlyo' huiza, thidte Jesús mbyan' loo yiaa. <sup>24</sup> Le' myen' xin' mté'th Jesús na, láth co'se' nda tetee myen' yòoyaa grolthe loo lagun, ngro' thib mbiidó' co' mtau' ned nda yòoyaa. Nde nixon', mxít too mbii nít. Ngo mbii nít le'n yòoyaa. No ngüin mbii nít cho yòoyaa. <sup>25</sup> Xtil'a, cuar ngro' too gax Jesús loo myen'. Nde tee nii Jesús



loo nít loo lagun loo myen'. <sup>26</sup> Co'se' ñèe myen' xin' mté'th Jesús nde tee Jesús loo nít loo myen', anze'f mzyeb myen' no ngo no lezo' myen'. Ngrozèe zeb myen'. Ndxab myen':

—¡Ay, con' mal nde go', cara! ¡Con' mal nde go', cara!

<sup>27</sup> Per Jesús gunii loo myen'. Ndxab Jesús loo myen':

—Ne'zyebte gu', ey. Blo gu' valor loo gu'. Daa na.

<sup>28</sup> Sya, ndxab Pedr loo Jesús:

—Tad, chele'i U', bli U' par teniin loo nít par galen loo U' axta co'te' ndoo U' ba'.

<sup>29</sup> Sya, ndxab Jesús loo Pedr:

—Neeca. Que de, tá.

Sya, ngulaa Pedr loo yòoyaa. Mtlo Pedr, mdee nii Pedr loo nít par ya Pedr co'te' ndoo Jesús. <sup>30</sup> Per co'se' mda' Pedr cuent anze'f thib mbii nzo'f loo lagun, mzyeb Pedr. No co'se' mden' Pedr mtlole' ngue dep Pedr le'n nít, mtlo Pedr, ngrozèe Pedr. Mbez Pedr:

—Tad, Tad, jer que de. Guree U' daa par lyá' daa trè'.

<sup>31</sup> Texal mzin Jesús loo Pedr, chàa, nguree Jesús ya' Pedr. No ndxab Jesús loo Pedr:

—¡Jaa, Pedr! Pente ndxela'sl, ¿lé'? ¿Chonon ne'ngàptel yalxla's loon par ne'dyeptel le'n nít, à'?

<sup>32</sup> Co'se' mquée Jesús loo yòoyaa con Pedr, xègà nguled mxyo'f mbii loo nít loo lagun.

<sup>33</sup> Le' sya, co'se' gunèe ryete myen' co' nzo le'n yòoyaa con' co' ngòca, mdub xib myen' loo Jesús. Mcòo' myen' yéc myen' loo Jesús. No ndxab myen' loo Jesús:

—Lìcpe' ba'i, Tad, U' nac xgan'pe' Diox.

*Jesús mteyac huax mèn le'n yèez Genesaret.*

*(Mr. 6.53-56)*

<sup>34</sup> Ngoloa, tolo mtetee myen' yòoyaa loo nít loo lagun axta mzin myen' tedib lad ro lagun con Jesús co'te' nac loo xyòn mèn che'n làaz mèn genesaret. <sup>35</sup> Co'se' mblibe' mèn yèezya' che'n làaz mèn genesareta Jesús na, mde'th mènà di's loo rye mèn yèez gaxa. Co'se' mbìn mènà le' Jesús nzo tya, mbi'th no mènà huax mèn yíiz loo Jesús co'te' ngo Jesús. <sup>36</sup> Nalyat mna'b mènà di's loo Jesús par ta' Jesús lugar ante gàal mènà ro xab Jesús yac mènà loo yíiz co' ndyac mènà. Tataa mod ryete mèn co' ante mbuàal ro xab Jesús mbyacque'.

## 15

*Con' co' ndli no con' co' ndxàc loo mèn par ndli mèn con' ye'rsin'.*

*(Mr. 7.1-23)*

<sup>1</sup> Sya, mbii gax plá mèn xley' farise no plá mèn co' ngòc maistr co' ndlu' cón che'n ley co' mxo'f Moisés loo mèn loo Jesús. Mènà nde par ned ciuda Jerusalén par asembli mènà mnibdi's mènà di's loo Jesús. Ndxab mènà loo Jesús:

<sup>2</sup> —¿Chonon indubdi'ste myen' xin' mté'th lùu ba' cón che'n costumbr che'n xudgool na', à'? Ale ndxe'leque', intechte myen' ya' myen' ndoore' tyub myen' par hua myen' xalque' nac costumbr co' ngue no na' no co' mbed no na'.

<sup>3</sup> Jesús mnibdi's loo mènà. Ndxab Jesús:

—Nde niin thib con' loo gu', ne, por cón che'n con' co' mnibdi's gu' loon: ¿Chonon indyubdi'ste gu' loo Diox par li gu' xal nac co' ñibe' Diox loo gu' li gu', à'? Ale más ndli gu' xal nac costumbr co' ngue no gu' no co' mbed no gu' leque li gu' xal ñibe' Diox loo gu' par li gu', ¿lé'? <sup>4</sup> ¿Ché' inda'de gu' cuent le' Diox ndxab loo di's co' mnibe' Diox co'se' ndxab Diox:

Gòp gu' mod gunèe gu' xud gu' no gòp gu' mod gunèe gu' xna' gu'. Per ndxe'leque', mèn co' ñii yèe ñii tìi cón che'n xud mèn no cón che'n xna' mèn, mèn li mandad guth mèn mènà.

<sup>5</sup> Per ndxe'leque', gu' mbez nzoque' mod gab thib mbi' loo xud mbi' no loo xna' mbi': Yende mod lyath non gu', Pay, May, con' ndxàpen tac ryete con' co' ndxàpen, na mdeth lèe Diox le' con' co' ndxàpen nac che'npe' Diox. Tataa mbez gu' mastale' inda'de gu' con'a càa Diox. <sup>6</sup> No tolo mbez gu': Le' chol mèn co' mbez tataa loo xud mèn no loo

xna' mèn, ya inquite tolo lyath no mènà xud mènà no xna' mènà. Tataa mod ndlá' gu' co' mnibe' Diox loo gu' li gu' par más li gu' con' co' nac costumbr co' mbed no gu' no mod co' ndxàp gu'. <sup>7</sup> Aa, mèn xley' farise. Aa, mèn co' nac maistr che'n ley co' mxo'f Moisés loo mèn. Aa, que ndxác gu' ntembii gu' ro gu' no ntembii gu' xti's gu' loon, ¿lé'? Bien lal ro Sayi co' mde'th di's co' ndxab Diox co'se' mque' Sayi ye's cón che'n gu'. Sayi ndxab:

<sup>8</sup> Mèn nación Israel ndxè' alithe ndyoodi's di's par li mèn con' guryath loon no par li mèn con' guryèn loon. Per mod co' ndxàp mèn nación Israel co' ndlu' mèn nación Israel cón chenen, ingue lu'de mènà loon dib nzo yéc mèn no dib nzo lezo' mèn le' mènà ndubdi's ndac loon.

<sup>9</sup> Anxle' ncòo' mèn nación Israel yéc mèn nación Israel loon, ne. No anxle' mbez mènà lèen co'se' ndlu' mènà cón che'n xley' leque mènà loo xtàa mèn. Per ndxe'leque', xley' co' ndlu' mènà nac leque xley' che'n mèn izlyo' ndxè'.

<sup>10</sup> Sya, ngurez Jesús rye mèn co' mqueltàa loo Jesús, co' nziri' loo Jesús. Ndxab Jesús loo mènà:

—Ndlyazen gòn gu' di's ndxè'. No ndlyazen ta' gu' cuent cón che'n di's ndxè'. No ndlyazen ta' gu' lugar yaa'd di's ndxè' le'n xtùuz gu' no le'n lezo' gu'. <sup>11</sup> Inacte por intechte mèn ya' mèn no inacte por con' co' ndxuhua mèn ndxác con' ye'rsin' loo mèn no ndli mèn con' ye'rsin'. Ndxle'leque', di's co' ndyoodi's mèn co' ndryo' ndlyen' le'n xtùuz mèn no le'n lezo' mèn, con'a nac co' ndli par ndxác mèn mèn zab no mèn ye'rsin' loo Diox.

<sup>12</sup> Sya, mbii gax myen' xin' mté'th Jesús loo Jesús. Ndxab myen' loo Jesús:

—Tad, ¿ché' ne'nda'de U' cuent le' mèn xley' farise no mèn co' nac maistr co' ndlu' cón che'n ley co' mxo'f Moisés loo mèn, nazab nden' mènà di's co'se' mbìn mènà di's co' ndxab U'? Mbli mènà cuent le' di'sa ngòc di's co' guñii yèe U' no co' guñii tii U' cón che'n mènà. No mbli mènà cuent le' di'sa ngòc ngòc nguàal di's co' gunii U' cón che'n mènà.

<sup>13</sup> Per Jesús ndxab loo myen' xin' mté'th Jesús:

—Nde niin thib con' loo gu': Mènà nac xal thib xan' yaa co' mxenle' lox. Per chol xan' yaa co' tarte too xuden Diox co' nzo loo bé', mèn quib alox xan' yaaa, co' nee di's, nac mènà. <sup>14</sup> Bla' gu' tee nziri' mènà, ey. Mènà nac xal mèn sieu co' ndyen ya' tedib mèn sieu par tetee mèn sieu xtàa mèn sieu. No chele' thib mèn sieu ndyen ya' tedib mèn sieu, co' nee di's, par tetee sieu xtàa sieu, ¿ché' ngue li gu' xtùuz ne'yizi'fte ryop mèn sieua le'n thib ye'r, cà? Tazi'f ryop mèn sieu le'n thib ye'r, ¿lé'? Tataa nac mènà.

<sup>15</sup> Sya, mcàb Pedr. Ndxab Pedr loo Jesús:

—Tad, fta' U' cuent loo nu' cón che'n di's co' mtetac U' loo mènà.

<sup>16</sup> Jesús ndxab loo myen' xin' mté'th Jesús:

—¿Ché' no gu' inda'de cuent cón che'n di's co' mtetaquen loo mènà, cà'? <sup>17</sup> ¿Ché' inonte gu' no ché' inda'de gu' cuent le' ryete con' ndxuhua mèn thib lì ndxòoi le'n xti' mèn no ndxeloà ndri'tha loo mènà co'se' nda mèn mandad mèn, cà'? <sup>18</sup> Per di's co' ñii mèn no co' ndyoodi's mèn na, di'sa nac co' más nabe's ndryo' ro mèn no lezo' mèn tac di'sa más ndryo' ndlyen' le'n lezo' mèn par ndyoodi's mèn. No leque di'sa ndli ntezab mèn no ndlu' mod co' nac mèn par ndxác mèn mèn ye'rsin' loo Diox. <sup>19</sup> Tac leque le'n quèe yéc mèn no le'n lezo' mèn ndryo' xtùuz ye'rsin' co' ndli mèn xtùuz. Angab na'i, xal xtùuz co' ndli mèn co' ndli chol xtùuz ye'rsin' par guth mèn xtaa mèn; xal xtùuz co' ndli mèn co' ndli xtùuz par cua'n mènà xin' huan mènà, no li mènà yalburrid; xal xtùuz co' ndli mèn co' ndli xtùuz par li huan' mèn; xal xtùuz co' ndli mèn co' ndli xtùuz par toxcua' mèn yalgutyè'; no xal xtùuz co' ndli mèn par ndxòo lezo' mèn cón che'n cuent yix. <sup>20</sup> Ryete con' co' ndli mèn xtùuza, ntezab xtùuz mèn no lezo' mèn par ndxác mèn mèn ye'rsin' loo Diox. Per mèn co' tyub par hua mèn lua' mèn no xít mèn, co'se' intechte mèn ya' mèn, xal nac costumbr co' ndxàp mèn co' mbed no mèn, intezabte con'a xtùuz mèn no lezo' mèn par gac mènà mèn ye'rsin' loo Diox.

*Thib xa'got tith ngola's loo Jesús.  
(Mr. 7.24–30)*

<sup>21</sup> Ngoloa, ngro' Jesús tya. Mxen Jesús ned. Nda Jesús par ned le'n rye yèezya' che'n làaz mèn ciuda Tir no le'n rye yèezya' che'n làaz mèn ciuda Sidón. <sup>22</sup> Láth nda zin Jesús ned nda Jesús par neda, mbi'th thib xa'got co' ngòc mèn tèe che'n thib di'stèe co' lèe canane, co' naban par neda, loo Jesús. Cabii mbez xa'gota loo Jesús:

—Tad, naneequen le' U' nac bin David co' ngòc rey póla. Por cona, gulat lezo' U' gunèe U' daa. ¿Xá nee U'? Mza' co' nac rsapen ndxè' nquée mbii che'n xpìi ye'rsin' no anze'f nè nquée mbii rsap daa, Tad.

<sup>23</sup> Per Jesús yende chó di's mcàb loo xa'gota. Sya, mbi'th myen' xin' mté'th Jesús loo Jesús. Mna'b myen' di's loo Jesús. Ndxab myen' loo Jesús:

—Tad, guuz U' loo xa'got ba' bii xa' tac anze'f nazab mbez yèe xa' ned xís na'.

<sup>24</sup> Jesús ndxab loo myen' xin' mté'th Jesús:

—Aa'a. Yende cón gaben loo xa'got ba'. Diox mtel' daa par mbalen ante loo mèn nación Israel, mèn co' nac xal mbacxil' co' nzi tee huan.

<sup>25</sup> Látha, negadi's mbii gax xa'gota loo Jesús. No mdub xib xa'gota loo Jesús. Ndxab xa'gota loo Jesús:

—Tad, bli U' favor blo' U' xpìi ye'rsin' loo rsap daa.

<sup>26</sup> Per Jesús asembli par mtetac Jesús thib di's loo xa'gota. Ndxab Jesús loo xa'gota:

—Ihuenta nac co' li mèn chele' mèn teche pan loo xin' mèn no ta' mèn pana par hua mbac, ¿lé'?

<sup>27</sup> Chàa, mcàb xa'gota loo Jesús. Ndxab xa'gota:

—Aa, Tad. Lìcque' nac co' ngolo gunee U' loon ba'. Yende cón niin loo U'. Per hui' U' nexa. Mbac nthopque' pan byòo bix co' ndxàb ro mes co'se' ndxuhua mèn par hua mbac.

<sup>28</sup> Sya, ndxab Jesús loo xa'gota:

—Ngot, nase ngolo guneen, lìcque', ndxela'sque'l loo cón chenen, ndee. Liquen con' ndlya'sl, ndee, ey.

Texal ngolo ndxab Jesús di'sa loo xa'gota, leque hora mbyac rsap xa'gota. No mbiiche mbii co' mzib yéc rsap xa'gota. No mdyub xnii yéc rsap xa'gota no mdyub xnii lezo' rsap xa'gota loo mbii co' mquée yéc rsap xa'gota.

#### *Jesús mteyac huax mèn yíiz.*

<sup>29</sup> Mbii Jesús tya. Mdee nii Jesús dib vuelt ro lagun co' ne' lèe lagun che'n làaz mèn galile axta mzin Jesús tedib lad ro laguna. Ngoloa, mquée Jesús loo thib yii par tyub Jesús tya. <sup>30</sup> Látha, mzin huax mèn loo Jesús co'te' ndub Jesús. Nde no mènà mèn coj, mèn sieu, mèn mud, mèn co' yende nii, no mèn co' yende ya', no taamas mèn nayíiz co' ndyac chol yíiz par teyac Jesús rye mènà. Mteyacque' Jesús rye mènà. <sup>31</sup> Co'se' ngolo gunèe rye mèn co' ngureri'a ngòc con'a, ante mbui' mènà no ante gunaa mènà co'se' gunèe mènà le' mèn co' ngòc muda ndyoodi's; co'se' gunèe mènà le' mèn co' yende nii no mèn co' yende sa ya' mdyoxcua', ngòc mènà xal mèn huen; co'se' gunèe mènà le' mèn renc mdee; no co'se' gunèe mènà le' mèn sieu ngüi'. Mènà mtlo ngurez Diox, Diox co' nac Dioxpe' mèn nación Israel. Mbez mèn di's roo no di's xèn no di's natú' loo Diox.

#### *Jesús mbli par nduhua thap mil mèn.*

*(Mr. 8.1-10)*

<sup>32</sup> Sya, ngurez Jesús myen' xin' mté'th Jesús. Ndxab Jesús loo myen':

—Anze'f ndlyat' lezon ñèen prob mèn ba'. Tac ndxàcle' son huiz nzo mèn ba' trè' con daa. No yende cón nde no mèn par hua mèn. Indlyasten tel'en mèn par bii mèn liz mèn no làaz mèn tac daa nanee le' mèn ba' nzi lan'. No nzo ryes guu's mèn no lyàa fuerz mèn ned bii mèn.

<sup>33</sup> Per myen' xin' mté'th Jesús ndxab loo Jesús:

—Tad, ¿xá mod li na' par que no na' con' hua ryethe mèn ba'? Tac U' nanee le' co'te' nzo na' ndxè' nac lugar nagán. No yende chó mèn nzo co' naban par nedrè' par tho' mèn co' hua rye mèn ba'.

<sup>34</sup> Sya, mnibdi's Jesús loo myen':

—¿Plá pan ngue no gu', à'?

Myen' mcàb. Ndxab myen':

—Pente ngue no nu' gaz pan no ndxepete mbèel bix no maste.

<sup>35</sup> Sya, ndxab Jesús loo mènà nabe'ste tyub mènà loo yòo co'te' nziri'te mènà. <sup>36</sup> Sya, mxen Jesús gaz pana no ndxep mbèel bixa. Ndxab Jesús loo Diox: Ay, Dio's, Diox quix U', Diox, por pan ndxè' no por mbèel ndxè'. Ngoloa, mchì'x Jesús pana no mbèela par mbyar' pana no mbèela. Ngoloa, mda' Jesús pana no mbèela loo myen' xin' mté'th Jesús. Le' myen' na, mbli'th pan no mbèel loo rye mèn co' nziri'a. <sup>37</sup> Ryete mènà nduhuaque' axta plóthe mbly'a's mènà. Ngolo nduhua mènà, mthop myen' rye le' pan no mbèel co' mbyan' xo'fa. Msè myen' gaz cardor pan no mbèel co' mbyan' xo'f co' nduhua rye mènà. <sup>38</sup> Mèn co' nduhua axta plóthea, mènà ngòc thap mil mèn co' ngòc ante mènbi'. Xà' mèngot. No xà' myen' bix. Indxòode cuent mengot no indxòode cuent myen' bix co' nduhua axta plóthe. <sup>39</sup> Ngolo nduhua mènà, gunii Jesús Diox loo mènà. Ngòo Jesús le'n thib yòoyaa co' ndub ro laguna con myen' xin' mté'th Jesús. Nguri'th Jesús par ned co'te' nzi thib yèez co' lèe Magdala.

## 16

*Mèn xley' farise no mèn xley' saduce mna'b loo Jesús li Jesús thib yalguzye' co' gac xal thib señ loo mèn.*

*(Mr. 8.11-13; Lc. 12.54-56)*

<sup>1</sup> Láth nda riid Jesús par neda, ngua sál' ndxep mèn co' ngòc mèn xley' farise no mèn co' ngòc mèn xley' saduce Jesús par mcua'n mènà mod ñeene' ché' tli mènà gan gàal di's mènà Jesús par yigaa Jesús loo mènà. Ndxab mènà loo Jesús:

—Tad, ¿xá neel? Nu' ndly'a's lil thib yalguzye'pe' loo nu' par hui' nu' chó yalguzye' lil co' yú' xal thib señ loo bé' loo nu'.

<sup>2</sup> Per Jesús mcàb. Ndxab Jesús loo mènà:

—Nde niin thib con' loo gu' co' ta' cuent xá nac gu'. Co'se' mzyèle' izlyo', xèe ngüi' gu' loo bé'. No co'se' ñèe gu' nquée xcua'u nane loo bé', mbez gu' loo xtàa gu': Nde zin'le' tiemp lyàa yì', cara. <sup>3</sup> Le' co'se' ñèe gu' blé' blé' nac xcua'u co' nquée loo bé' ndxáal xtil' na, mbez gu' loo xtàa gu': Nalle' huin xòo o lyàa yùu quèe. ¡Aa, mèn xley' farise no mèn xley' saduce! Susque' ndxác gu' ntembìi gu' ro gu' no ntembìi gu' xti's gu' loon. Ale ngo' gu' cuent cón che'n señ co' ndxú' loo bé'. Per ingo'de gu' cuent no ne' ne' indli gu' cuent cón che'n señ co' ntlele' ndxàc tiemp ndxè' co' lu' le' Diox mtel' daa par ndxàpen con' roo con' xèn la's niin no la's yan.

<sup>4</sup> Tolo ndxab Jesús loo mènà:

—¿Gu' co' nac mèn ye'rsin', gu' ñibe' loon par lin thib yalguzye' co' ndly'a's gu' hui' gu', cà'? Yende xàa. Ya yende chó más yalguzye' lin loo gu' par hui' gu'. Ndxè'leque', con' ndxè' no maste niin loo gu': Con' co' ngòc loo Jonás póla nac co' ta' cuent loo gu' cón che'n con' co' gac loon yiloo.

Ngolo mdoodi's Jesús di'sa, taate mbyan' mènà tya. Ne'ncàbte mènà loo Jesús. Le' Jesús na, mxen ned. Ndyàa Jesús.

*Jesús mtetac thib di's loo myen' xin' mté'th Jesús le' xley' mèn farise nac xal dii levadur.*

*(Mr. 8.14-21)*

<sup>5</sup> Co'se' mzin Jesús con myen' xin' mté'th Jesús tedib lad ro lagun tedib vez, ne'nte'de lezo' myen' xin' mté'th Jesús ndi' myen' pan par nque no myen' pan. <sup>6</sup> Sya, ndxab Jesús loo myen' xin' mté'th Jesús:

—Chó Diox chó nee gu' no anderhuen gu'. Leque gu' fquenap gu' loo cón che'n dii levadur co' nac cón che'n xley' mèn farise no co' nac cón che'n xley' mèn saduce.

<sup>7</sup> Per myen' xin' mté'th Jesús, mtlo myen', ndxab myen' loo xtàa myen':

—Tatua' gunee Tad loo na', cara, tac ne'nte'de lezo' na' ndi' na' pan par que no na' pan.

<sup>8</sup> Jesús mden' lezo' no mda' Jesús cuent con' co' mbli myen' xtùuz. Ndxab Jesús loo myen':

—¿Chonon mbez gu' loo xtàa gu': Tatu' mbez Tad loo na' tac ingue node na' pan? Susque' pente ndxàp gu' yalxla's loon, yey. <sup>9</sup> ¿Ché' tarte ta' gu' cuent co' huenleque' no ché' ne'tyede lezo' gu' cón che'n con' mblin con gaz pan co' mblin mandad co' mbli'th gu' loo ga'y mil mèn, cà'? ¿Plá cardor pan co' mchìxena mbyan' xo'f co' mthop gu', à'? <sup>10</sup> ¿Ché' ne'tyede lezo' gu' co' mblin con gaz pan co' mblin mandad mbli'th gu' loo thap mil mèn, ne? No ¿plá cardor pan co' mbyan' xo'f mthop gu'a, à'? ¿Ché', ndyac gu', ne'gácte daa toxcuan sa pan hua na', cà'? <sup>11</sup> ¿Chonon ne'nda'de gu' cuent no ne'nglide gu' xtùuz le' daa ne'ndoodi'ste cón che'n panpe' loo gu' co'se' guniin loo gu' anderhuen gu' no chó Diox chó nee gu', fquenap gu' gu' loo dii levadur co' nac cón che'n xley' mèn farise no loo dii levadur co' nac cón che'n xley' mèn saduce, à'?

<sup>12</sup> Ale axta syare' mda' myen' cuent le' Jesús ingue bezte loo myen' le' myen' quenap myen' loo cón che'n dii levadur co' ndli ndyoo bes pan. Ndx'e'leque', myen' mden' no mda' myen' cuent le' Jesús ngue lu' loo myen' leque myen' quenap myen' loo cón che'n xley' che'n mèn xley' farise no loo cón che'n xley' che'n mèn xley' saduce.

*Pedr ndoo lite ndxab loo Jesús le' Jesús nac merpe' Crist.*

*(Mr. 8.27-30; Lc. 9.18-21)*

<sup>13</sup> Co'se' mzin Jesús le'n yèezya' che'n làaz mèn ciuda Cesar co' mblec thib mbi' co' lèe Lip Tetrarc, Jesús mnibdi's loo myen' xin' mté'th Jesús. Ndxab Jesús:

—¿Chó mèn mbez mèn nac daa, daa co' mbal yáal loo izlyo' xalque' ndxáal chol mèn loo izlyo' ndxè', à'?

<sup>14</sup> Myen' xin' mté'th Jesús mcàb. Ndxab myen' loo Jesús:

—Ndxep mèn mbez le' U' nac Juàn Bautist. Taandxep mèn mbez le' U' nac Lii. No nzore' mèn co' mbez le' U' nac Jeremi. Mbez mèna, ne, nzo chó mèn co' nde'th di's co' ndxab Diox nac U'.

<sup>15</sup> Sya, ndxab Jesús loo myen' xin' mté'th Jesús:

—¿Gu', à'? ¿Chó mèn mbez gu' nac daa?

<sup>16</sup> Sya, ngro' nxon' Mon Pedr. Ndxab Mon Pedr loo Jesús:

—U' nac yubpe' Crist. Nac U' xgan'pe' Diox co' nabanpe'.

<sup>17</sup> Jesús mcàb loo Pedr. Ndxab Jesús:

—Anze'f huen ndal, Mon, xgan' Jonás. Tac nec thib mèn che'n izlyo' ndxè' tarte lu' cón che'n con' co' ngolo guneel loon ba' lool. Ndx'e'leque', yub xuden Diox mbli par non lùui par guneela loon. <sup>18</sup> No nalle' daa nii lool: Lùu hue' tedib lèe co' nac Pedr, co' nee di's, nac quèe. No loo di's co' ngolo guneel loon ba' co' nac xal thib quèe roo xal thib quèe rhue' no xal thib quèe co' ngóol loo izlyo', loo cón che'n di'sa daa li par dyop mèn no queltàa mèn loo cón chenen par gac mèna che'npe' daa. No ne' ne' gac Mebizya li Mebizya gan co' xà' Mebizya mèna loon no loo cón chenen co'se' gath mèna. <sup>19</sup> Pedr, daa ñibe' lool le' lùu ñibe' loo mèn co' Diox ñibe' loo. Gàcl xal mèn co' altant ndyoo ner no ndyoo naa loo mèna. Con' co' ñibe'l loo mèn yende mod li mèn, con'a gac con' co' mnibe' lezon loo bé' gac con' co' yende mod li mèn, mèn co' nzo loo cón chenen. No con' co' ñibe'l loo mèn par li mèn, con'a gac con' co' mnibe' lezon loo bé' gac loo mèn no con' co' li mèn, mèn co' nqueltàa loo cón chenen.

<sup>20</sup> Ngoloa, sya, mnibe' Jesús loo myen' xin' mté'th Jesús. Ndxab Jesús loo myen' yende chó loo gabte myen' le' Jesús nac Crist.

*Jesús ngue ta' cuent loo myen' xin' mté'th Jesús le' Jesús gath.*

*(Mr. 8.31-9.1; Lc. 9.22-27)*

<sup>21</sup> Desde huiza par delant Jesús mtlo mda' cuent loo myen' xin' mté'th Jesús le' Jesús naquinque' ya ciuda Jerusalén. Ndxab Jesús loo myen', ne, le' mèn gool, no mèn co' nac jef co' más ñibe' loo rye nguley', no mèn co' nac maistr co' ndlu' cón che'n ley co' mxo'f Moisés loo mèn nación Israel, ryete mèna yátbèe par tetii mèna Jesús axta plóthe lya's



mèna. Ndxab Jesús loo myen', ne, le' mèna li par guthxù' mèn Jesús. Per co'se' yilo son huiz nguth Jesús, Jesús ryo xban làth mèn nguth. <sup>22</sup> Sya, xexte mblo' Pedr Jesús. Mbe' Pedr Jesús thib lad loo myen' co' ndxàc xtàa Pedr. Ale mtlo Pedr, mco'x Pedr Jesús. Ndxab Pedr loo Jesús:

—Ne'ñeede Diox conax, Tad, par ale tataa gàca loo U'. Thidtene ne'ta'de U' lugar li mèn con'a loo U'.

<sup>23</sup> Per Jesús mbere loo loo Pedr. Ndxab Jesús loo Pedr:

—Biiche loon, Pedr. Te' nac Mebizya nacl loon. Susque' nda'l xyàn lezon. Lùu indye'thte xtùuz yéc xal ndli Diox xtùuz cón chenen. Lùu, ndxe'leque', ndli xtùuz cón chenen xalque' ndli mèn izlyo' xtùuz cón chenen.

<sup>24</sup> Sya, ndxab Jesús loo myen' xin' mté'th Jesús:

—Chele' chol gu' ndlya's tyoo nque xísen ned ndan, leque gu' bli par ne'líde gu' co' ndyub yo'f lezo' gu' par li gu'i. Ndxé'leque', gáp gu' lezo' gu' no ñibe' gu' loo lezo' gu' par ne'líde gu' con' co' ndyub yo'f lezo' gu' li gu'. Blec lezo' gu' par xec gu' tyactii gu' co'se' tyub ngu's mèn gu' no li mèn preb tethon mèn gu' por cón chenen ned nda na'. Le' sya, ya' gu' too nque gu' xísen. Nda na'. <sup>25</sup> Tac mèn co' ante ndoo lezo' ndxath ndxey' no ndxath ndlyux mèn par que no mèn che'npe' mèn, mèna ante ndoo lezo' que no mèn cón che'npe' izlyo' ndxè'. Loo mèna ne'ta'de Diox lugar ne' ne' tyal Diox yòo ban no mèn Diox thidtene yiloo. Per mèn co' lá' ryethe con' co' nac yalndac che'npe' mèn co' gác li mèn gan loo izlyo' ndxè' por cón chenen, loo mèna ta' Diox lugar no tyal Diox par yòo ban no mèna Diox thidtene yiloo. <sup>26</sup> Lomisque' ne, ¿cón co' thib mbi' no chó yalndac gác li mbi' gan co'se' gác che'npe' mbi' dib athu loo izlyo' tac chele' mbi' tataa mod li, gab Diox loo mbi' yende mod yòo ban no mbi' Diox thidtene yiloo? Yende cón li mbi' gan chele' mbi' li tataa, ¿lé'? ¿Xá nee gu', ne? ¿Plál quix thib mbi' loo Diox par yòo ban no mbi' Diox co'se' ngolo gunii Diox loo mbi' ne'tyalte Diox yòo ban no mbi' Diox, à'? Yende mod li thib mbi' gan li mbi' tataa, ¿lé'? <sup>27</sup> Tac co'se' gác huiz galen loo izlyo' ndxè' tedib vez, daa co' mbal yáal loo izlyo' xalque' ndxáal chol mèn loo izlyo', daa gal xalque' nac ryethe con' roo con' xèn co' nac xuden Diox. No galen con' angl co' nzo loo xuden Diox. Axta syare' quix thib thib mèn cón che'n mèn loo Diox xalque' ngòc mod co' ngòp mèn láth nziri' mèn loo izlyo' ndxè', que naca mbli mèn con' huen, que naca mbli mèn con' ye'rsin'. <sup>28</sup> Licpe' ba'i, na ngue nii loo gu': Nzo ndxep mèn co' nziri' loon trè' co' ne'gathte axta co'se' gác huiz hui' mèna loon, daa co' mbal yáal loo izlyo' ndxè' xalque' ndxáal chol mèn, co'se' gác tiemp co' gal ñibe'pe'en loo mèn.

## 17

*Jesús mzye' loo loo son myen' xin' mté'th Jesús*

*(Mr. 9.2-13; Lc. 9.28-36)*

<sup>1</sup> Ngolo xop huiz ngòc con'a, mbe' Jesús Pedr no mbe' Jesús Cob no mbe' Jesús Juàn, hues Cob. Mbe' Jesús yon myen'a loo thib yii roo. <sup>2</sup> Láth ngo no Jesús myen' loo yiia, chàa, mzye' loo loo Jesús loo myen'. Gunaa loo Jesús xal loo huiz co'se' nguín bée rol huiz. Ndé nxon', xab Jesús co' noc Jesús ante nagus bèelleque' gunaa xalque' thib con' co' nquée xnii. <sup>3</sup> Láth nzi li myen' xin' mté'th Jesús xtùuz cón ndxàc loo Jesús, chàa, ngro' too Moisés no Lii co' mde'th di's co' ndxab Diox póla. Ngure toodi's no Moisés no Lii Jesús. <sup>4</sup> Sya, ndxab Pedr loo Jesús:

—Tad, susque' huen naca nzo na' trè', cara. ¿Ché' ndlya's U' toxcu'a nu' son ramad par yòo gu'? Thiba par yòo U'. Tediba par yòo Moisés. Le' tediba na, par yòo Lii.

<sup>5</sup> Tatabe' ndoo toodi's Pedr con Jesús, chàa, ngulàa beu. Mtau' beu loo ryete xa'. Látha, chàa, mbyèn thib di's le'n beu co' ndxab:

—Mbi' ndxè' nac xgan'en. Anze'f ngudloon no lezon mbi' ndxè'. Bìn gu' di's co' ndyoodi's mbi' loo gu', ndee gu'.

<sup>6</sup> Texal mbìn myen' xin' mté'th Jesús di's co' mbyèna, ale mcauau myen'. Ale, ngulàa cotloo myen' loo yòo, tant mzyeb myen'. <sup>7</sup> Sya, mbii gax Jesús co'te' nzi myen', co'te' ngulàa cotloo myen'. Mxo'f Jesús ya' Jesús lad myen'. Ndxab Jesús loo myen':

—Goo che gu', ey. Ne'zyebte gu'.

<sup>8</sup> Co'se' ngo che myen', ngüi' ndxè' myen'. Ngüi' ba' myen'. ¿Máa Moisés ryop Lii? Per ñèe myen' yende Moisés. No yende Lii. Ante Jesús no maste ñèe myen' ndoo.

<sup>9</sup> Sya, mbii Jesús con myen' loo yiia. Láth nde làa tùub Jesús con myen' le'n yiia, Jesús mnibe' loo myen'. Ndxab Jesús loo myen':

—Yende chó loo gabte gu' le' gu' gunèe con' co' mxyo'f loo loo gu', ndee. Ne'ta'de gu' cuent cón che'n co' gunèe gu'a loo mèn axta co'se' gác huiz ryo xban daa làth mèn nguth, daa co' mbal yáal loo izlyo' ndxè' xalque' ndxáal chol mèn loo izlyo'. Axta syare', ta' gu' cuent loo mèn.

<sup>10</sup> Sya, mnibdi's myen' xin' mté'th Jesús loo Jesús cón che'n co' mbez maistr co' ndlu' cón che'n ley co' mxo'f Moisés loo mèn le' Lii yi'th. Ndxab myen' loo Jesús:

—Tad, fta' U' cuent loo nu' ¿xá mod chonon mbez maistra loo mèn le' ner Lii yi'th, à'?

<sup>11</sup> Jesús mcàb loo myen'. Ndxab Jesús loo myen':

—Lìcque' nac xal mbez mèn le' Lii yi'th. Lìca, ngole' Lii làth mèn le'n tiemp ndxè'. Lii mbli par lyàa yéc mèn no lyàa lezo' mèn no zye' mod co' ndxàp mèn par thib líte yòo mèn loo cón che'n Diox tedib vez. <sup>12</sup> Per daa ngue nii loo gu' tedib vez: Lii mbi'thle'. No ne'nda'de mèn cuent le' Lii nac mbi' co' mbi'thle'. Ndxè'leque', mbli mèn ngòc nguàal con' xal mblyas mèn con mbi' co' ngòc Lii. Lomisque' mod ne, tataa tetii mèn daa xal lya's mèn, daa co' mbal yáal loo izlyo' ndxè' xalque' ndxáal chol mèn.

<sup>13</sup> Axta syare', mda' myen' xin' mté'th Jesús cuent le' Jesús ngue ta' cuent loo myen' cón che'n Juàn Bautist.

*Jesús mbli mbyac thib mbyòo co' mque no yíiz enferesi.*

*(Mr. 9.14–29; Lc. 9.37–43)*

<sup>14</sup> Texal mzin Jesús con myen' xin' mté'th Jesús loo mèn co' mqueltàale' co' nzi bed, ngro' thib mbi' xi'th mènna. Mbii gax mbi'a loo Jesús. Mdub xib mbi' loo Jesús. Ndxab mbi' loo Jesús:

<sup>15</sup> —Tad, gulat lezo' U' gunèe U' mbyòo daa ndxè'. Nde teele' ndyac mbyòo daa ndxè' yíiz mbii. Cadque' co'se' nquée mbii che'n yíiz ndxè' loo mbyòo, anze'f nè nquée mbii mbyòo. No nde teele' ngobii mbii mbyòo loo quii. No ngobii mbii mbyòo le'n nít. <sup>16</sup> No nalle' ndal non mbyòo loo myen' xin' mté'th U' trè' par bel'que' li myen' gan teyac myen' mbyòo. Per axta nalle' tarte li myen' gan teyac myen' mbyòo.

<sup>17</sup> Sya, cabii ndxab Jesús loo mbii. Ndxab Jesús:

—¿Aa, mèn co' nziri' loo izlyo' tiemp ndxè'! ¿Susque' thidtene indxela'ste gu' loon no indxela'ste gu' con' mbezen loo gu'! ¿Susque' nala's gu' no naad gu' no nguud gu'! ¿Axta pól tolo go non gu' par lin gan gác nado' gu' loon! No ¿axta pól tolo nquin xequen con gu' tua'the nala's gu' no tua'the naad gu' no nguud gu'! Huàa xi mbyòo. Yi'th mbyòo ndxè'. Ñeene'.

<sup>18</sup> Sya, mbyoo Jesús xpíi ye'rsin'a. Ante gunii Jesús loo xpíi ye'rsin'a, ngro xpíi ye'rsin'a loo mbyòo. Ale leque hora mbyac mbyòo.

<sup>19</sup> Ngolo mbli Jesús ngòc con'a loo mbyòo, sya, xexte mdoodi's myen' xin' mté'th Jesús thib lad con Jesús. Mnibdi's myen' loo Jesús. Ndxab myen':

—Tad, ¿chonon ne'ngácte nu' ngo' nu' xpíi ye'rsin'a loo mbyòo, à'?

<sup>20</sup> Jesús ndxab loo myen':

—Ne'ngácte gu' ngo' gu' xpíia loo mbyòoa tac gu' pente ndxela's loon. Lìcpe' ba'i, na nii loo gu': Chele' gu' ndxela's ndxèpte loon xalte nac thib biz mostaz, gu' gác gab gu' loo yii co' ndub go': Biiche trè', yii. Huàa tub tedib lugar ba'. Yiia biiche. Yende chó con' ne'gácte gu' li gu' co' gác cón chenen chele' gu', lìcque', yila'spe' loon no yila'spe' gu'

loo con' lin. <sup>21</sup> Per thib loo xpil ye'rsin' xal xpil ye'rsin' co' ngòo loo mbyòoa, ne'ryo'de tua'te. Ndxè'leque', xpil ye'rsin'a ryo' ante co'se' cuez mèn Diox co'se' cue xlat mèn.

*Jesús mbere, ngue ta' cuent loo myen' xin' mté'th Jesús le' Jesús gath.*

*(Mr. 9.30-32; Lc. 9.43-45)*

<sup>22</sup> Láth thidte mque tee no Jesús myen' xin' mté'th Jesús par ned le'n yèzya' che'n làaz mèn galile, Jesús ndxab loo myen' xin' mté'th Jesús:

—Daa co' mbal yáal loo izlyo' ndxè' xalque' ndxáal chol mèn loo izlyo', thib ned mèn tyenxù' daa par ta' mèn daa loo tedib ned mèn co' teti daa. <sup>23</sup> No guth mèn daa. Per co'se' yilo son huiz nguth daa, daa ryo xbanque'.

Co'se' mbìn myen' xin' mté'th Jesús tataa mde'th Jesús di's loo myen', anze'f mxi lezo' myen'.

*Jesús mda' tmi co' nac ayud co' mdub mèn par tyoxcua' templ tiempa.*

<sup>24</sup> Co'se' mzin Jesús con myen' xin' mté'th Jesús le'n yèz Capernaum, le'pe' nzi tee mèn co' nthop tmi co' nquin mèn par tyoxcua' templ. Ngua mèn loo Pedr. Mnibdi's mèn loo Pedr:

—Pedr, ¿ché' ne'ta'de maistr gu' plá pes par ayud che'n templ, cà'?

<sup>25</sup> Pedr mcàb loo mèn. Ndxab Pedr loo mèn:

—Pesar ta' maistra.

Le' sya, texal ngòo Pedr le'n nyòo co'te' nzo Jesús, ale ner Jesús gunii loo Pedr. Ndxab Jesús loo Pedr:

—¿Xá neel, Mon? ¿Chó loo mèn ndli mèn co' ñibe' loo izlyo' ndxè' cuent ña'b mèn tmi par ta' mèn ayud che'n contribución, à'? ¿Ché' ndli mèn cuent ngue na'b mèn ayuda loo mèn gulàazpe' mèn o ché' ndli mèn cuent ña'b mèn ayud loo mèn tith co' nde làazpe' mèn co' nac trè', cà'?

<sup>26</sup> Pedr mcàb loo Jesús. Ndxab Pedr:

—Mèn ña'b ayud loo mèn tith.

Sya, ndxab Jesús loo Pedr:

—Chele'i tataa nac, le' sya, mèn gulàaz che'n mèn co' ñibe' inquinte quix tmi che'n contribución sya, xàa. <sup>27</sup> Per par ne'ta'de na' xyàn lezo' mèn ba', huàa loo lagun co' nzi go'. Huàa lobii lansuel le'n lagun. Le' sya, ner mbèel co' yigaa loo lansuel, tyenl mbèela. No xal' ro mbèela. Le'n ro mbèela ryo' thib pes fchòo plat, co' nee di's, thib pes. Con sobr thib pesa ta'l ayud loo mèn cón che'n no ta'l ayud cón chenen co' nac impuest co' ña'b mèn loo na', ndee.

## 18

*Trè' ndlu' le' myen' xin' mté'th Jesús mnibdi's loo Jesús chó myen' gac myen' co' más ñibe' loo mèn.*

*(Mr. 9.33-37; Lc. 9.46-48)*

<sup>1</sup> Leque le'n huiza myen' xin' mté'th Jesús thidte mqueltàa loo Jesús. Mnibdi's myen' loo Jesús. Ndxab myen':

—Tad, ¿chó mèn nac más mèn roo no mèn xèn co'te' ñibe'pe' Diox loo bé' nalle', à'?

<sup>2</sup> Sya, ngurez Jesús thib mbedbi' chu'th. Mdoo Jesús mbedbi' chu'tha loo myen'.

<sup>3</sup> Ndxab Jesús loo myen':

—Lìcque' nac co' nde niin loo gu' ndxè': Chele' gu' ne'tyalte lyàa yéc gu' no lyàa lezo' gu' no zye' mod co' ndxàp gu' par gáp gu' mod xal ndxàp mbedbi' chu'th ndxè' mod, chele' gu' ne'taade li, ne'tyalte Diox ta' Diox lugar loo gu' yòo gu' loo cón che'n Diox par ñibe'pe' Diox loo gu'. <sup>4</sup> Cona, ngue niin loo gu': Mèn co' gac más mèn roo no mèn xèn co' ñibe'pe' Diox loo, mèn nac mèn co' indye'ste no co' inxyal'te. No ndxàc mèn mèn nado' co' ndxàp mod xal mbedbi' chu'th ndxè'. <sup>5</sup> Le' chol mèn co' tyal ta' lugar yòo mèn

co' ndxela's loon làth mènà tac ndxela's mènà loon, mastale' nac mènà mèn nado' xal mbedbi' chu'th ndxè', ndxàca loo mènà ndyalque' mènà no nda' mènà lugar ndxòon làth mènà.

*Trè' ndlu' Jesús loo mèn cón che'n mèn co' asendli par cua'n mèn co' pente mtlo ndxela's loo cón che'n Jesús xtol mèn.*

*(Mr. 9.42-48; Lc. 17.1-2)*

<sup>6</sup>Chol gu' co' asendli par cua'n mèn co' ndxela's loon, co' nac mèn nado' co' indye'ste no co' inxyal'te, xquin mèn no xtol mèn, más huen gàca loo gu' quedó' mèn thib quèe yees yen gu' no yiloo cobii mèn gu' loo nítto' par tataa mod dyep gu' le'n nítto'. <sup>7</sup>Susque' nazab ndxàca loo mèn loo izlyo' ndxè' tac anze'f thib con' nzo co' ndli par cua'n mèn xtol mèn no xquin mèn. De tods mod nzoque' con' co' ndli ncu'a'n mèn xquin mèn no xtol mèn loo izlyo'. Per más nalyat gàca loo mèn no más nè gàca loo mèn co' ndli ncu'a'n taamas mèn xquin mèn no xtol mèn loo izlyo' ndxè'.

<sup>8</sup>Cona, ngue niin loo gu': Chele' gu' ndli cuent le' nii gu' o ya' gu', lìcque', ndli par ncu'a'n gu' xtol gu' no xquin gu' por mdyub yo'f lezo' gu' loo con' co' mque no gu' no con' co'te' ngua gu', más huen cho' gu' nii gu' no ya' gu' no tith blobii gu' nii gu' no ya' gu' loo gu'. Tac más huen gàca loo gu' yòo ban no gu' Diox thidtene, yende ya' gu' o yende nii gu', leque lyàa gu' le'n ye'rbiil co'te' nzo quì no bèel co' ne'yu'de thidtene con ryop nii gu' no con ryop ya' gu'. <sup>9</sup>No chele' gu' ndli cuent le' ngudloo gu', lìcque', nac co' ndli ncu'a'n gu' xquin gu' par tyub yo'f ye'rsin' lezo' gu' loo con' ngüii' gu', más huen blo' gu' ngudloo gu' no blobii gu' i tith loo gu'. Tac más huen gàca loo gu' chele' gu' yòo co'te' yòo ban no gu' Diox thidtene con sate ngudloo gu' leque yòo gu' ye'rbiil co'te' ndxetoo quì no bèel co' ne'yu'de thidtene con ryop ngudloo gu'. Por cona, thidtene ne'cu'a'nte gu' xquin gu' par ne'yòode gu' le'n ye'rbiil.

*Jesús ngue tetac loo mèn xal co'se' mdyuhuan thib mbacxil' no mbere pastor, mzyal pastor mbacxil' tedib vez.*

*(Lc. 15.3-7)*

<sup>10</sup>Nde niin tedib con' loo gu', ne, ey: Ne'co' toode gu' myen' bix co' nac xal myen' bix ndxè' thib lad loon, ndee gu'. Tac angl co' nac angl che'n myen' bix thidtene nzo loo xuden Diox co' nzo loo bé'. <sup>11</sup>Tac daa co' mbal yáal loo izlyo' ndxè' xalque' ndxáal chol mèn loo izlyo', daa ndal par telá'en mèn loo con' ryes, mèn co' nzi tee huan loo Diox por con' ye'rsin' co' ndli mèn.

<sup>12</sup>¿Xá nee gu'? Chele' thib mbi' ngue no thib ayo mbacxil' no mtuhuan mbi' thib mbacxil', ¿ché' ne'queltàade mbi' ryete thap gal nzo si'n thap mbacxil'a thidte lugar par ya cua'n mbi' thiz mbacxil' co' mdyuhuaana, cà'? Queltàaque' mbi' rye mbacxil' thidte lugar, ¿lé'? Tataaque' li mbi'. <sup>13</sup>No chele' mbi' mbli gan mzyal mbacxil' co' mdyuhuaana, daa ngobe' más tyac lezo' mbi' co'se' ngolo mzyal mbi' mbacxil'a leque tyóo mbi' cón che'n rye thap gal nzo si'n thap mbacxil' co' mtan' mbi'a co' ne'nduhuaanta, ¿lé'? <sup>14</sup>Cona, ngue niin loo gu': Lomisque' mod ne, xud gu' co' nzo loo bé' indlyaste tyuhuan nec thib mèn co' nac mèn prob no mèn ladyox co' ñaa xal ñaa mbedbi' chu'th ndxè'.

*Jesús ngue bez loo mèn: Fcua'n gu' mod teri'th tecan' gu' con' ye'rsin' co' ngue li hues xtàa gu' loo gu'.*

*(Lc. 17.3)*

<sup>15</sup>Chele' thib mèn co' nac hues xtàa gu' li con' ye'rsin' loo gu', xexte blo' gu' xa' thib lad par tyoodi's no gu' xa' cón che'n con' mbli no xa' gu'. Bli gu' par ta' xa'a cuent cón che'n xquin xa' no xtol xa' loo gu'. Chele' xa'a li cas loo di's co' tyoodi's gu'a, le' sya, mbli gu' gan mbyu' mbyàl loo di'sa no loo cuenta cón che'n ryop gu' xa'. <sup>16</sup>Per chele' hues xtàa gu'a ne'lìde cas xal nac di's co' ndyoodi's no gu' hues xtàa gu', sya, gurez gu' chop o son mèn par queltàa no gu' mènà par non mènà no ta' mènà cuent xá nac di's co' tyoodi's gu' con hues xtàa gu'. Le' sya, chop o son mènà nac testiu co' ta' cuent xal nac di's co' mdoodi's gu' con hues xtàa gu'. <sup>17</sup>Lomisque' ne, chele' xa'a ne'lìde cas loo chop

o son gu' co' queltàa con xa'a, guuz gu'i no fta' gu' cuent loo mèn co' nqueltàa loo cón chenen. Chele' xa'a ne'lide cas loo mèn co' nqueltàa loo cón chenen, sya, bli gu' cuent le' xa'a nac xal mèn co' indxela'ste loo Diox o nac xa'a xal thib mèn co' ndlixù' cobrar tmi co' nac che'n nación na' par ta'xù' mèn tmi loo gobiern co' ndub ciuda Rom.

<sup>18</sup> Lìcpe' ba'i, na ngue nii loo gu': Con' co' ñibe' gu' loo mèn yende mod li mèn, con'a gac con' co' mnibe' lezon loo bé' gac con' co' yende mod li mèn, mèn co' nzo loo cón chenen. No con' co' ñibe' gu' loo mèn par li mèn, con'a gac con' co' mnibe' lezon loo bé' gac loo mèn no con' co' li mèn, mèn co' nqueltàa loo cón chenen.

<sup>19</sup> Niin loo gu', ne: Chele' chop gu' thidte gac xtùuz no thidte gac lezo' gu' loo con' lya's gu' ña'b gu' loo Diox loo izlyo' ndxè' co'se' cues gu' Diox, le' sya, xuden Diox co' nzo loo bé' li par que no gu' con' ña'b gu'. No li xuden Diox gacque' con' co' ña'b gu' loo xuden Diox. <sup>20</sup> Tac co'te' nzo chop o son mèn co' nqueltàa loo cón chenen por lèen, làth mèn nzoquen.

<sup>21</sup> Sya, mbii gax Pedr loo Jesús. Mnibdi's Pedr loo Jesús. Ndxab Pedr:

—Tad, chele' thib huesen cua'n xtol no xquin huesen huax vez loon, ¿plá vez teri'th tecanen con' co' ndli huesen loon, à'? ¿Ché' teri'th tecanen con' ye'rsin' co' ndli huesen loona gaz vez, cà'?

<sup>22</sup> Jesús mcàb loo Pedr. Ndxab Jesús:

—Iniiden lool: Teri'thl no tecan'l xèn xyàn co' ndli huesla lool gazte vez, Pedr. Ndxle'leque', ngue niin lool: Fteri'th ftecan' xèn xyàn co' ndli huesl loola thap ayo nzo thap gal nzo si' vez loo huesl.

*Jesús ngue tetac loo mèn cón che'n moz co' ne'nteri'thte yalgute'f che'n xtàa moz loo moz.*

<sup>23</sup> Nde niin tedib con' loo gu', ey: Le' mod co' ñibe'pe' Diox loo mèn no mod co' ndlya's Diox gáp mèn làth xtàa mèn nac taandxè': Mèn co' ñibe'pe' Diox loo nac xal nde niin loo gu' ndxè' xal thib rey co' mbly'a's co' cuent cón che'n yalgute'f co' ndeb rye moz loo rey.

<sup>24</sup> Le'pe' mtlo rey, ngue go' rey cuent plál ndeb moz loo rey, nde no mèn thib mbi' co' ngro' te'f huax millón pes loo rey. <sup>25</sup> Per com le' moz ndyac ingue node moz tmi par quix moz tmi co' ndeb moz loo reya, ¿lé'?, rey mnibe' loo taamas moz rey ya tho' moz mbi'a nazal' rye mèn famil mbi' con rye co' ndxàp mbi' liz mbi' par tataa mod yax mase ndxep yalgute'f co' ndeb mbi' loo rey.

<sup>26</sup> Sya, yende izlyo', mdub xib mbi' loo rey co' ngòc patrón mbi'. Nalyat ndxab mbi' loo rey: Tad, ftedó' U' thib le' lar' yéc U' loo cuent ndxè'. Fcha'la's U' taandxep con daa. Sau' sau' quixen ryete yalgute'f co' ndeben loo U', ndee U'. <sup>27</sup> Le' sya, rey co' ngòc patrón moza, ale le'le' mblyat lezo' patrón gunèe patrón moza. Mton' rey co' ngòc patrón moza rye yalgute'f co' ngro' te'f moz loo rey, co' nee di's, yende cón ndeb moz loo reya. Ngoloa, mbla' rey moz, ndyàa moz par liz moz. <sup>28</sup> Per pente ngro' moza. Ndyàa moz. Mzyál' moz tedib xtàa moz ned ndyàa moz co' ndeb pláte pes loo moz. Le' sya, moz co' más ngro' te'fa mxen tedib moza. Ale mdèe moz co' más ngro' te'fa yen tedib moza. No mtlo ngòc nayi' moza loo xtàa moz. Mdi' moza yen xtàa moza. Ndxab moz: ¡Máa yob yécl, sin vergüenz! ¿Pól quixl tmi co' ndebl loon? Inthyontel. Ale nduhuaxù'l tmi daa.

<sup>29</sup> Sya, moz co' nac xtàa mbi'a mdub xib loo mbi'. No nalyat mde'f ro moz. Ndxab moz loo mbi': Amiu, Compañer, ftedó' thib le' lar' yécl loo cuent ndxè', yey. Fcha'la's taandxep con daa. Sau' sau' quixen ryethe yalgute'f co' ndeben lool, ndee. <sup>30</sup> Per mbi' co' ngòc ner moza ne'ndalte ncha'la's loo mbi' por yalgute'f chu'th che'n moz co' ngòc xtàa mbi'a. Ndxle'leque', ngua ta' mbi' co' ngòc ner moza part loo mèn nac zin'. Le' mèn nac zin' na, mbli mandad mque moza lezi'f axta quix moza no zib moza tmi co' ndeb moz loo tedib mbi' co' nac xtàa moz. <sup>31</sup> Co'se' gunèe taamas xtàa moz moz ndxàc con'a, anze'f mden' moza no mxi lezo' moz ngòc con'a. Sya, mxen taamas moza ned. Ngua nee moza loo rey co' ngòc patrón moza ryete con' ngòc loo prob tedib moza.

<sup>32</sup> Sya, mbli rey co' ngòc patrón moza mandad par ye'th mbi' co' ngòc ner moza loo rey. Sya, ndye'th no mèn mbi' co' ngòc ner moza loo rey. Rey ndxab loo moz: Susque' mèn ye'rsin'l, moz. No mozdèe lùu. Na mton' ryethe yalgute'f co' ngro' te'f lùu loon tac



nalyat mde'f rol mdoodi'sl loon, ¿lé? <sup>33</sup> Lùu, ne, ndxàal nglat lezo'l ngnèel xtàa mozl xalque' ngulat lezon gunèenl. <sup>34</sup> Sya, mbi' co' ngòc reya anze'f ngocloo tìn' gunèe mbi' co' ngòc ner moza. Mbli rey mandad ya tin mèn mbi' co' ngòc ner moza axtaque' quix mbi' ryethe yalgute'f co' ndeb mbi' loo rey.

<sup>35</sup> Co'se' ngolo mdoodi's Jesús rye di'sa, ndxab Jesús loo myen' xin' mté'th Jesús:

—Tataa li xuden Diox co' nzo loo bé' con gu' chele' gu' ne'teri'thte no ne'tecan'te, dib nzo yéc gu' no dib nzo lezo' gu', cón che'n xèn xyàn co' ndli hues xtàa gu' loo gu'.

## 19

*Jesús ngue lu' xá mod indxàalte lá' mèn sa'l mèn.*

*(Mr. 10.1-12; Lc. 16-18)*

<sup>1</sup> Ngolo mdoodi's Jesús ryete di'sa loo mèn, ngro' Jesús le'n yèezya' che'n làaz mèn galile. Mxen Jesús ned. Ndyàa Jesús par ned le'n yèezya' che'n làaz mèn jude co' nziri' par ned ndlyen huiz co' nac tedib lad ro yó'be' Jordán. <sup>2</sup> Anze'f thib mènley' mdoo nque xís Jesús. No mteyac Jesús huax mèn yíiz par ned ngua que tee Jesús.

<sup>3</sup> Sya, ngua plá mèn xley' farise loo Jesús par ñee mèn ñeene' ché' tli mèn gan gàal di's mèn Jesús par tataa mod quexù' que' fals mèn Jesús yiloa. Asembli mèn, mnibdi's mèn loo Jesús. Ndxab mèn:

—¿Ché' nzo mod lá' thib mbi' thib xa'got co' nac sa'lpe' mbi' por chol con' bix co' mbli xa'gota no maste, à'?

<sup>4</sup> Jesús mcàb loo mèn. Ndxab Jesús:

—¿Ché' tarte lab gu' di's co' ndub loo libr co' nac xti's Diox, cà'? No ¿ché' tarte ta' gu' cuent cón nee di's di'sa? Co'se' mblec Diox no mtoxcua' Diox izlyo', Diox mbli thib con'. Mblec Diox mènbi' no mèngot loo izlyo'. <sup>5</sup> Lomisque', ndub di's loo libr co' nac xti's Diox co' mbez taandxè': Mèn co' nac mènbi', lá' mèn xud mèn no lá' mèn xna' mèn par thidte queltàa mèn con xa'got co' gac xin' sa'l mèn. Co'se' tataa ndxàca loo ryop sa'l mèn, ndxàca loo ryop sa'l mèn le' ryop sa'l mèn ndxàc thidte bél' no thidte zith loo Diox. <sup>6</sup> Por cona, ngue niin loo gu': Co'se' nqueltàa thib mènbi' con thib mèngot par selya' mènbi' con mèngot, ya inacte ryop mèn chop. Ndxé'leque', ryop mèn ngòc thidte bél' no thidte zith loo Diox. Por cona, yende chó derech ngue no chol mèn par li mèn lá' thib xa'bi' thib xa'got co' nac xin' sa'l xa'bi'.

<sup>7</sup> Sya, asembli mèn xley' farise. Mnibdi's mèn xley' farise loo Jesús. Ndxab mèn:

—¿Chonon mnibe' Moisés ta' thib mènbi', co' nac sa'l thib xa'got, ye's co' lèe act loo mèngot, sya ndli mènbi' par tataa mod lá' mènbi' xa'got co' nac sa'l mènbi', sya?

<sup>8</sup> Jesús ndxab loo mèn:

—Aa, tataa mbli Moisés loo gu' tac Moisés non no nanee Moisés le' gu' anze'f naad no nguud gu'. Cona, mda' Moisés lugar ta' gu' ye's co' lèe act loo xa'got par lá' gu' xa'got co' nac xin' sa'l gu'. Per ne'nda' de Diox lugar ngàca tataa làth mèn ndoore' gac tiemp co'se' yo ban Moisés. <sup>9</sup> Na ngue nii loo gu', ne: Le' thib xa'bi' co' lá' sa'lpe' no ingue lide sa'lpe' xa'bi'a yalburrid, no selya' xa'bi'a con tedib xa'got, le' sya, xa'bi'a ngue li yalburrid con tedib xa'gota. Lomisque' ne, chele' thib xa'bi' selya' con thib xa'got co' mblá' sa'l, xa'bi'a ngue li yalburrid con xa'gota, ne.

<sup>10</sup> Sya, myen' xin' mté'th Jesús ndxab loo Jesús:

—Chele'i tataa ndxàc loo mènbi' con xa'got co' nac sa'l mènbi', indxàalte selya' mèn sya xàa, ndyac nu'.

<sup>11</sup> Jesús ndxab loo myen' xin' mté'th Jesús:

—Iryede mèn nden' cón che'n di's ndxè' par tyubdi's mèn loo di's ndxè'. Inacte di's ndxè' par ten' rye mèn cón che'n di's ndxè'. Ndxé'leque', mèn co' nden' no nda' mèn cuent nac mèn co' Diox ndli par ten' mèn di's no ta' mèn cuent cón che'n di's ndxè' par tyubdi's mèn loo di's ndxè'. <sup>12</sup> Nzo huax mènbi' co' inselya'de con mèngot. Nzo ndxep mènbi' co' ancual ngóol co' inselya'de con mèngot. No nzo taamás mènbi' co' inselya'de con mèngot tac ngo mèn co' mbli capón mèn. No nzo taamas mènbi' taate

mbyan'. Inselya'de mènna tac mènna mnibe' loo lezo' mènna ante li mènna sirv loo Diox no maste. Cona, ngue niin con' ndxè' loo gu', gu' co' nden' no co' ndxòn di's co' ngue niin loo gu' ndxè' par tyubdi's gu' loon: Bìn gu' di's no fta' gu' cuent cón nee di's ndxè'. No fta' gu' lugar yaa'd di's ndxè' le'n lezo' gu'.

*Jesús mde's mcàa myen' bix par ndyac lezo' myen' con Jesús.*

*(Mr. 10.13-16; Lc. 18.15-17)*

<sup>13</sup> Làth xtau'a, mbi'th no mèn co' nac xna' myen' bix myen' bix loo Jesús par xo'f Jesús ya' Jesús lad myen' no par cuez Jesús Diox cón che'n myen'. Per ndxe'leque', myen' xin' mté'th Jesús mtlo ngocloo. No mbyoo myen' xin' mté'th Jesús xna' myen' bix o mèn co' nde no myen' bixa. <sup>14</sup> Sya, ndxab Jesús loo myen' xin' mté'th Jesús:

—La' gu' tetee myen' bix ba' loon chele' myen' bix ba' nde loon. Ne'tau'te gu' loo mèn co' nde no myen' bix ba'. Tac mèn co' ndyal no nda' mènna lugar ñibe'pe' Diox loo mènna, ndxàca loo mènna ndxàc mènna xal myen' bix ba'.

<sup>15</sup> Ngolo mxo'f Jesús ya' Jesús lad myen' bixa, no ngolo ngurez Jesús Diox por cón che'n myen' bixa, mbii Jesús tya.

*Thìb mbyòo co' ngòc mbyòo ric mdoodi's no Jesús.*

*(Mr. 10.17-31; Lc. 18.18-30)*

<sup>16</sup> Látha, mzin thìb mbyòo loo Jesús. Ndxab mbyòo loo Jesús:

—Maistr Ndac, ¿chó con' ndac tolo lin par thìb lite yòo ban non Diox thidtene, à'?

<sup>17</sup> Jesús mcàb loo mbyòo. Ndxab Jesús loo mbyòo:

—¿Chonon mbez lùu loon le' daa nac thìb maistr ndac, à'? Yende chó mèn co', lìcque', nac mèn ndac. Angoluxte Diox nac xa' ndac. Chele' lùu indlide cuent no inden'te lezo'l nac daa Diox, axta ne' ne' ñeel loon nac daa maistr ndac. Per chele' lùu, lìcque', lya's yòo ban nol Diox thidtene, ftubdi's xal nac di's co' ñibe' ley co' mxo'f Moisés loo mèn.

<sup>18</sup> Mbyòo mcàb. Ndxab mbyòo loo Jesús:

—¿Chópe' yalñibe' nac co' más ñibe' ley co' mxo'f Moisés loo mèn par lina, à', Tad? Jesús ndxab loo mbyòo:

—Yalñibe'a nac di's ndxè': Ne'guthtel mèn; ne'que tee lidel yalburrid; ne'li huan'tel; ne'toxcua'del yalgutyè' cón che'n nec thìb mèn. <sup>19</sup> Gòp mod gunèe xudl no xna'l. Fque' lezo' gunèe huesl no xtàal xalque' ngue lezo'l ñeel leque lùu.

<sup>20</sup> Mbyòo ndxab loo Jesús:

—Aa, Tad, ryete con' co' ñibe' di'sa loo mèn par li mèn ndliquen desde ndoo roon no desde ndoo xènen. ¿Ché' nzo chóre' con' ndxàc falt ndyac U' tolo lin, à', Tad?

<sup>21</sup> Jesús ndxab loo mbyòo:

—Chele' lùu, lìcque', lya's gàc mèn nambii no mèn nalì loo Diox, huàa tho' ryethe con' ndxàpl par ryo' tmi looi. Yiloa qui'thl tmia loo mèn co' ndyac yaltii. Le' sya, tataa mod tolo gàpl yalgon' no yalndac loo bé'. Yiloa ndye'thl. Tyoo nquel xísen. Nda na'.

<sup>22</sup> Per co'se' mbìn mbyòo di's co' ndxab Jesús, nalyat mdeb ro mbyòo, ndyàa mbyòo, por tant ndxàp mbyòo che'n mbyòo no nèe la's mbyòo.

<sup>23</sup> Sya, ndxab Jesús loo myen' xin' mté'th Jesús:

—¿Lìcque' nac co' ngue niin loo gu' ndxè', cara! Axta arid nagàn naca par tyal mèn ric no ta' mèn ric lugar loo Diox par ñibe'pe' Diox loo mèn ric. <sup>24</sup> Beren, niin con' ndxè' loo gu' tedib vez: Más inagànte naca riid thìb má' co' lèe camell le'n ye'r co' nac ngudloo thìb aguj leque tyal mèn ric no ta' mèn ric lugar loo Diox ñibe'pe' Diox loo mèn ric.

<sup>25</sup> Co'se' mbìn myen' xin' mté'th Jesús di's co' ndxab Jesús loo myen', ante mbui' myen' no ante gunaa myen' loo xtàa myen'. Mnibdi's myen' loo xtàa myen'. Ndxab myen':

—Chele'i tataa nac, ¿chó mèn gác lyá' loo con' ryes, sya?

<sup>26</sup> Jesús xèe mbui' loo myen'. No ndxab Jesús loo myen':

—Yende mod li chol mèn gan li mèn con' par lyá' mèn loo con' ryes. Per Diox ndxàcque' li Diox chol con' xal ndlya's Diox li Diox loo mèn. Yende chó mèn gác cuee cà' Diox loo chol con'.

<sup>27</sup> Sya, ndxab Pedr loo Jesús:

—Tad, nu' mblá'ya' ryete con' mque no nu' no con' ngòp nu'. No ngue tee nqueque' nu' xís U' ned ngue tee U'. ¿Cón gáp nu' no cón que no nu' yilóa, sya?

<sup>28</sup> Jesús mcàb loo myen'. Ndxab Jesús:

—Lìcpe' ba'i, na ngue nii loo gu': Co'se' gác tiemp no co'se' gác cub ryethe con', no lomisque', co'se' tub ñibe'en, daa co' mbal yáal loo izlyo' xalque' ndxáal chol mèn, loo thib asient co'te' gác thib lugar co'te' ñibe'pe'en por cón che'n ryethe con' roo con' xèn co' gápèn la's niin no la's yan huiza, le' sya, gu' co' ndoo nque xísen nalle', gu' co' ne'nglá'de daa, ryete si' fchop gu' tyub loo si' fchop asient par tub rez gu' cón che'n mèn nación Israel huiza, mèn co' nac si' fchop ned co' mblec biz no bin. <sup>29</sup> No ryete mèn co' mblá'ya' liz no co' mblá'ya' hues, no fta'n, no bél, no xud, no xna', no sa'l, no xin', no xyòn ante por cón chenen no maste, mèn gác che'n no càaya' mèn masre' thib ayo tant con' loo co' nac che'n mèn co' mblá'ya' mèn. No más de cona, mèn yò ban no Diox thidtene. <sup>30</sup> Per nalle' loo izlyo' ndxè' nzo huax gu' co' nac mèn nación Israel. Gu' nzi li xtùuz anze'f ntac gu' loo Diox no anze'f mèn roo no mèn xèn nac gu' loo Diox por nac gu' mèn nación Israel. Per ndxe'leque', Diox li le' gu' gác mèn be'the loo Diox tac Diox ndxecloo ñèe gu'. Per part cón che'n Diox, mèn co' ingode gu' cuent anze'f ntac mèn loo Diox, mèn co' inactive mèn nación Israel, Diox li gác huax mèn mèn co' más ntac loo Diox leque gu'. No gác mèn mèn co' más ndyac lezo' Diox ñèe Diox por mbli mèn cas loo cón che'n Diox.

## 20

*Jesús ngue tetac loo mèn cón che'n moz co' mque zin' loo rsin' thib patrón.*

<sup>1</sup> Nde niin thib con' loo gu', myen', cón che'n xá mod ncàba loo mèn, mèn co' ndyal no mèn co' nda' lugar ñibe'pe' Diox loo mèn: Moda nee di's nac xal thib mbi' co' mque no thib ranch. Mbi'a ngo chegà thib xtil' par nda cua'n mbi' moz co' que zin' par làa moz uv loo lus uv loo xyòn mbi'. Mzyalque' mbi' moz xtil'a. <sup>2</sup> Sya, ndxab mbi' co' ngòc xuan' yò lus uva loo moz le' mbi' quix xop pes càa moz huiz par làa moz uv. Moz mdyalque' que moz zin' no yax càa moz xop pes huiz. Ngolo mbli la's mbi' con moz le' mbi' tataa quix huiz moz, mtel' mbi' moz loo xyòn mbi' par tlo moz, làa moz uv loo xyòn mbi'. <sup>3</sup> Ngoloa, ngro' mbi' como hor nquée guyè' xtil' tedib vez legue huiza. Gunèe mbi' nziri' ndxep moz co' nalath loo xbi'. <sup>4</sup> Ndxab mbi' loo moza: Daa ndlyaz ya gu' zin' loo xyònen par ya làa gu' uv loo lus uv loo xyònen. No ndoo líte gon ray gu'. Ngoloa, mxen moza ned. Nda moz zin' loo xyòn mbi'. <sup>5</sup> Casque' rol huiz mbere mbi', ngro' mbi', ngua cua'n mbi' moz tedib vez. No casque' hor mquée guyon bzyè mbere mbi', ngro' mbi' tedib vez par ngua li mbi' lomisque' con' loo taamas moz. <sup>6</sup> Co'se' ngóol hor mquée yuga'y bzyè, mbere mbi', ngro' mbi' tedib vez. Nda mbi' loo xbi'. Mzyál' mbi' taandxep moz co' nalath co' nziri' par neda. Ndxab mbi' loo moza: ¿Chonon nziri' gu' trè' dib huiz nalze no ne'nquede gu' zin', yey? <sup>7</sup> Moz ndxab loo mbi': Angngure' nu' trè' nalze tac yende chó mèn co' nac patrón ngzál' nu' par ngna'b nu' zin' nque nu' loo patrón. Sya, ndxab mbi' loo moza: Huàa gu' zin' loo xyònen, yey. Na ndoo líte go ray gu' yilo huiz. <sup>8</sup> Co'se' mzyèle' izlyo' huiza, mbi' co' ngòc patrona ngurez mandador co' ndyoo naa no co' ndyoo ner loo zin'. Ndxab mbi' loo mandador: Mandador, gurez rye moz co' ngue zin' no blo ray moz. Ftlo blo ray moz co' ngòc bluz loo zin'. No yilóa, col ray moz co' ngòc ner loo zin'. <sup>9</sup> Sya, ndye'th moz co' ngòc loo zin' co'se' ngòc hor nquée yuga'y bzyè. Mblo mandador ray moza xop pes co' ngòc ray che'n thib huiz zin'. <sup>10</sup> Ngoloa, ndye'th moz co' más ngògà loo zin'. Mbli moza xtùuz masre' yò ray moz por más ngògà moz loo zin' huiza. Per ndxe'leque', thib thib moz ngòc ray xop pes co' ngòc ray che'n thib huiz zin'. <sup>11</sup> Co'se' ngolo ngòc ray moz co' mtlogà zin'a, ngua nee moza loo patrón: ¿Chonon le laate ngo U' ray ryete moz no taamas moz ndale' huiz ngòc loo zin'? No lomisque', ngo ray moz con moz co' ngògà loo zin'. <sup>12</sup> Tolo ndxab moz loo patrón: Moz co' más bluz ngòc loo zin' ba', moz ba' pente mbli zin' thib hor no maste. No ale lalque' mblo U' ray moz ba'

con' co' mblo U' ray nu'. Nu' mque zin' dib huiz. No mxec nu' mtec mso' bée lad nu'.  
<sup>13</sup> Per mbi' co' ngòc patrona mcàb loo thib moz. Ndxab mbi' loo moza: Amiu, nec thib mod no nec tedib mod ingue tetiiden gu'. Daa ngue lique' con' co' nac nali loo gu'. ¿Ché' ne'ngyan'te ryop na' di's le' daa guix xop pes càa gu' thib huiz zin', cà'? <sup>14</sup> Bye' xop pes ba'. Byàa. Na ndlyas go ray moz co' ngòc más bluz loo zin' lomisque' xal mblon ray lùu ba'. <sup>15</sup> ¿Ché' ngue lil cuent yende mod lin xal ndlyazen con tmi daa, cà'? ¿Ché' ndxan lezo'l ñèel daa tac huen nac daa con chol mèn, cà'?

<sup>16</sup> Sya, tolo ndxab Jesús loo mèn: Na nii con' ndxè' loo gu': Gu' ndli xtùuz por nac gu' mèn nación Israel anze'f ntag gu' loo Diox, ¿lé'? Per Diox lu' loo gu' le' Diox indyacte lezo' ñèe Diox gu'. Ndxè'leque', ndxecloo Diox ñèe Diox gu'. Le' tedib cua' mèn co' inacte mèn nación Israel, mèn co' nzi li gu' xtùuz ndxecloo Diox ñèe Diox mèn, per ndxe'leque', Diox lu' loo gu' le' làth mèn nzo huax mèn co' ndyac lezo' Diox ñèe Diox. Diox mbli thib con'. Ngurez Diox huax mèn par yila's mèn loo Diox no loo cón che'n Diox. Per ndxèpte mèn nzo co' mdyal mbìn cón che'n Diox no co' mdyal mdubdi's loo Diox. Diox mcuri mèn co' ngola'sque' loo Diox par nac mèn xin' Diox nalle'.

*Jesús mbere ngue ta' cuent loo myen' xin' mté'th Jesús le' Jesús gathque'.*

*(Mr. 10.32-34; Lc. 18.31-34)*

<sup>17</sup> Làth ndoo Jesús ned nda Jesús par ciuda Jerusalén con myen' xin' mté'th Jesús no taamas mèn co' nda no Jesús, mbe' Jesús ryete si' fchop myen' xin' mté'th Jesús thib lad loo mèn. Ndxab Jesús loo myen':

<sup>18</sup> —Hui' gu' nexa. Nase ñee gu' no nda' gu' cuent le' na' ndoole' ned. Nda quée na' par ciuda Jerusalén. No gaca loon le' thib mbi' ta'xù' daa loo mèn, mèn co' nac jef co' más ñibe' loo rye nguley' no loo mèn co' nac maistr che'n ley co' mxo'f Moisés loo mèn. No axta quexù' que' fals mèn daa par guthxù' mèn daa, daa co' mbal yáal loo izlyo' ndxè' xalque' ndxáal chol mèn. <sup>19</sup> No ta'xù' mèn daa, daa co' mbal yáal loo izlyo' ndxè' xalque' ndxáal chol mèn, loo mèn tith co' inacte mèn nación Israel par xiis no mèn daa. No ta' mèn chenen axtaque' que' mèn daa loo thib cruz. Per co'se' ngolo son huiz nguth daa, daa ryo xban làth mèn nguth.

*Xna' Cob ryop Juàn mna'b loo Jesús li Jesús thib favor loo ryop myen'.*

*(Mr. 10.35-45)*

<sup>20</sup> Sya, mbii gax xa'got co' nac sa'l Zebede, xa'got co' nac xna' Cob no Juàn, loo Jesús con Cob no Juàn. Mdub xib xna' myen' loo Jesús. Mna'b xna' myen' loo Jesús. Ndxab xna' myen':

—Tad, bli U' favor loon.

<sup>21</sup> Jesús mnibdi's loo xna' myen'. Ndxab Jesús:

—¿Cón ndlya'sl li na, ey?

Xna' myen' ndxab loo Jesús:

—Co'se' ñibe'pe' U' loo nu' loo izlyo' ndxè', ta' U' lugar gac thib xgan' daa síndico no gac tedib xgan' daa juez co' lyath no U' hora. Con'ate no más ndlyazen, Tad.

<sup>22</sup> Per Jesús mcàb loo xna' myen' no loo myen'. Ndxab Jesús:

—Axta ne' ne' ñee gu' cón ngue na'b gu' loon. Nibdizen thib con' loo gu': ¿Xá nee gu'? ¿Ché' tác gu' no ché' xec gu' tyactii gu' xalque' gac yaltii co' xec daa gac loon le'n huiz ndxè' co' nac xalque' co'se' gu' mèn thib taz nít cuan' huan nalà, cà'? No ¿ché' tli gu' ryes gath gu' xalque' gaca loon yé' huize', cà'?

Myen' mcàb loo Jesús. Ndxab myen':

—Xec nu', pues.

<sup>23</sup> Jesús mcàb loo myen'. Ndxab Jesús:

—Lìcpe' ba'i, le'i gac loo gu' le' gu' tyactii tín' xalque' gac yaltii tín' loon yé' huize' axtaque' gath gu' xalque' gath daa. Per con' co' ndlya's gu' gac gu' xal thib síndico no xal thib juez par ñibe' no gu' daa, inacte con'a cón chenen par tan lugar loo gu' gaca tataa loo gu'. Ndxè'leque', mèn co' gac xal juez no xal síndico co' ñibe' no daa, mèn nac mèn

co' gunee lezo' xuden Diox, no mèn co' mdoo lezo' xuden Diox gac mènna xal síndico no xal juez co' lyath no daa co'se' ñibe'en loo mèn nación Israel.

<sup>24</sup> Co'se' mbìn taasi' myen' xin' mté'th Jesús con' ndxab Cob no Juàn no xna' Cob no Juàn loo Jesús, ngocloo tín' myen' loo ryop hues Cob Juàn. <sup>25</sup> Co'se' gunee Jesús ndxecloo myen' loo Juàn no loo Cob, ngurez Jesús ryete myen'. Ndxab Jesús loo myen':

—Com le' gu' nda'le' cuent no nonque' gu' le' mèn co' ñibe' loo chol nación loo izlyo' ndxè', mènna ñibe' yèe loo mèn co' nac che'n nación par yende chó ñii loo mèn co' ñibe'. Le' rye mèn co' nac más mèn roo mèn xèn làth rye nación loo izlyo' ndxè', lomisque', ñibe' yèe mènna loo mèn che'n nación. <sup>26</sup> Per part cón che'n gu', ne'líde gu' tataa làth gu'. Ndxè'leque', gu' co' ndlya's ñibe' loo xtàa gu' no gu' co' ndlya's gac mèn roo no mèn xèn làth xtàa gu', gu'a gac mèn co' li sirv loo xtàa gu'. <sup>27</sup> No chol gu' co' ndlya's ñibe' loo xtàa gu', no co' ndlya's tyoo ner no tyoo naa loo xtàa gu', gu'a gac xal thib moz loo xtàa gu'. <sup>28</sup> Gu'a ndxàal li xalque' ndlin. Tac daa ne'ngal yáalte loo izlyo' ndxè' par li mèn sirv loon. Ndxè'leque', daa mbal yáal loo izlyo' ndxè' par lin sirv loo mèn no par le'le' daa ta' yalnaban daa loo yalguth xal mèn co' nguix cón che'n thib con' co' anze'f ntac. Tataa lin par lyá' huax mèn loo con' ryes por cón chenen.

*Jesús mteyac chop xa'bi' co' ngòc mèn sieu.*

*(Mr. 10.46–52; Lc. 18.35–43)*

<sup>29</sup> Co'se' nda ro' Jesús con' myen' xin' mté'th Jesús ro ciuda Jericó par quée Jesús ned ciuda Jerusalén, anze'f thib mèn nda nque xís Jesús.

<sup>30</sup> Ned nda Jesús, ndub chop mèn sieu ro ned. Co'se' mbìn mènna le' Jesús nde riid, cabii ngurez mènna. Ndxab mènna:

—Tad, U' co' nde bin David co' ngòc rey póla, gulat lezo' U' gunèe U' nu'.

<sup>31</sup> Co'se' ñee mèn co' nda nque xís Jesús mbez yèe ryop mbi' sieua, mènna mbyoo ryop mbi' sieu par cued, ya ne'cozèede ryop mbi'a más. Per ndxè'leque', ryop xa'bi' sieua sate más cabii mbez yèe. Mbez ryop xa'bi' sieua:

—Tad, U' co' nde bin David co' ngòc rey póla, gulat lezo' U' gunèe U' nu'.

<sup>32</sup> Sya, nguled Jesús ned. Ngurez Jesús ryop xa'bi' sieua. Mnibdi's Jesús loo xa'. Ndxab Jesús:

—¿Cón ndlya's gu' li non gu', à', ey?

<sup>33</sup> Ryop xa'bi' sieua mcàb. Ndxab xa' loo Jesús:

—Nu' ndlya's gac nu' hui' nu', Tad.

<sup>34</sup> Sya, mblyat lezo' Jesús gunèe Jesús ryop xa'bi' sieua. Ante mbuàal Jesús ngudloo ryop xa'. Chàa, mdub xnii ngudloo ryop xa'. No ndxè'sleque' mbui' ryop xa'. Ngoloa, mxen ryop xa'bi' co' ngòc sieu ned. Nda nque xa' xís Jesús.

## 21

*Jesús nzole' ned nda par ciuda Jerusalén.*

*(Mr. 11.1–11; Lc. 19.28–40; Jn. 12.12–19)*

<sup>1</sup> Co'se' yamerle' nde zin gax Jesús con' mèn co' nda nque xís Jesús ro ciuda Jerusalén, mzin Jesús con' mènna yèez Betfagé co' nziri' gaxte co'te' ndub thib yii co' lee yii che'n yaa oliv. Tya, mtel' Jesús chop myen' xin' mté'th Jesús par ya myen' thib mandad le'n yèez Betfagé. <sup>2</sup> Ndxab Jesús loo ryop myen':

—Huàa gu' le'n yèez chu'th co' nziri' go'. Tua' zyal gu' thib burrgol con' xin' burrgol co' ndoo quedó'. Fxac gu' burrgola. No ye'th no gu' burrgol con' xin' burrgol trè'. <sup>3</sup> Chele' chol mèn ñee loo gu': ¿Chonon ngue xac gu' burrgol ba'?, gab gu' loo mènna: Tad na' nquin má'. Sya, mènna la' ye'th no gu' má' loon.

<sup>4</sup> Ngòc con'a loo Jesús par ngòcque', no mdyaaque', no mdubque' di's co' gunii thib xa' co' mde'th di's co' ndxab Diox co'se' mque' xa'a ye's loo libr co' nac xti's Diox, di's co' mbez:



<sup>5</sup> Guuz gu' loo mèn ciuda Jerusalén: Hui' gu' nexa. Mbi' co' nac rey gu' nde loo gu'. Anze'f nado' nac mbi'. No ndub mbi' thib burr yèn' co' nac xin' thib burrgol co' ndxe' yó'.

<sup>6</sup> Sya, mxen ryop myen' xin' mté'th Jesús ned. Nda li myen' xal mnibe' Jesús loo myen' li myen'. <sup>7</sup> Ndye'th no myen' burrgol con burr yèn'. No nabe'ste mtoxcua' myen' co'te' tyub Jesús con xab myen'. Ngoloa, mquée Jesús burr yèn'a. <sup>8</sup> Le' rye mèn co' nde nque xís Jesús na, msil' mènna xab mènna xtau' ned par riid Jesús loo xab mènna tant mdyac lezo' mènna ñèè mènna Jesús. Le' taamas mènna na, mcho' laa yaa yin. No mdoo mènna laa yaa yina ro ned co'te' riid Jesús tant ndyac lezo' mènna ñèè mènna Jesús. <sup>9</sup> Sya, rye mèn co' nda no Jesús, mtlo mènna, mbez yèè mènna. Le'le' mbez yèè mèn co' ndoo ner loo Jesús. No le'le' mbez yèè mèn co' ndoo nque ned xís Jesús. Mbez mènna:

—Mbi' roo mbi' xèn nac mbi' co' nac bin David co' ngòc rey póla. Toloque' gab na' di's natú' no di's roo di's xèn cón che'n mbi' co' mtel' Diox: ¡Ay, Dio's! Anze'f Diox roo no Diox xèn nac Tad Diox.

<sup>10</sup> Co'se' ngòc no Jesús rye mèn co' nda no Jesús ro ciuda Jerusalén, rye mèn ciuda Jerusalén ngro' che liz mèn. No mbyàa mbye'th lezo' mèn. Mbez mèn loo xtau' mèn:

—¿Chó mbi' nac mbi' co' nde go', yoo?

<sup>11</sup> Le' mèn co' nde no Jesús na, mcàb. Ndxab mènna loo mèn ciuda Jerusalén:

—Jesús co' nde'th di's co' ndxab Diox co' nac mbi' che'n yèèz Nazaret che'n làaz mèn galile na.

*Jesús mblo' che mèn no má' le'n templ par mbembii templ.*

*(Mr. 11.15-19; Lc. 19.45-48; Jn. 2.13-22)*

<sup>12</sup> Ngoloa, ngòc Jesús le'n templ che'n Diox. Mblo' Jesús rye mèn co' ntho' le'n templ no rye mèn co' ndi' le'n templ. No mtexyath Jesús rye mes che'n mèn co' nsil tmi. No mtexyath Jesús asient co'te' ndyub mèn co' ntho' palomxtil'. <sup>13</sup> Ndxab Jesús loo mènna: Loo libr co' nac xti's Diox ndub di's co' mbez:

Lizen o templ daa ngro' lèè co'te' cuez mèn daa.

Per gu' co' ntho' trè' no gu' co' ndi' trè', ale mbli gu' le' templ daa ngòc xal thib lyo' che'n huan'.

<sup>14</sup> Láth ndxàc con'a loo mèn le'n templ, mbii gax plá mèn sieu loo Jesús no mbii gax plá mèn renc loo Jesús par teyac Jesús mènna. Jesús mteyacque' mènna. <sup>15</sup> Co'se' gunèè mèn co' ngòc jef co' más ñibe' loo rye nguley' no mèn co' ngòc maistr co' mbli' cón che'n ley co' mxo'f Moisés loo mèn tiempa yalguzye' co' mbli Jesús, no co'se' ndxòn mènna le' myen' bix mbez yèè, mbez myen' bixa: Mbi' roo no mbi' xèn nac mbi' co' nac bin che'n David co' ngòc rey póla, anze'f ngòcloo tín' mènna gunèè mènna Jesús. <sup>16</sup> Ndxab mènna loo Jesús:

—¿Ché' ndxònl con' mbez myen' bix ba', à'?

Jesús mcàb loo mènna. Ndxab Jesús:

—Aa. Ndxònquena. ¿Ché' tarte lab gu' loo libr co' nac xti's Diox co' nda' cuent xal nac di's co' mbez myen' ba', cà? Loo libr ndub di's co' mbez taandxè':

Lùu mbli le' myen' bix no rye mbeto' co' be' ndxàaz ndxol' ro labans co' nac di's roo di's xèn co' ngue te'th myen' cón chenen.

<sup>17</sup> Ngoloa, mxen Jesús ned. Mbii Jesús ciuda Jerusalén con myen' xin' mté'th Jesús. Ndyàa Jesús le'n yèèz Betañ. Le'n yèèza mdàt Jesús yál'a.

*Jesús ndxab: Loo yaa ngudyuug co' yende xlè loo, thidtene ya ne'tolode ta' yaa ngudyuug xlè.*

*(Mr. 11.12-14, 20-26)*

<sup>18</sup> Co'se' ngòc nìi izlyo' tedib huiz co' nde nquea, mxen Jesús ned. Nda Jesús par ned ciuda Jerusalén tedib vez. Láth ndoo Jesús ned nda Jesús, mblyan' Jesús. <sup>19</sup> Le'pe' nda riid Jesús tya, gunèè Jesús thib xan' yaa ngudyuug co' ndoo gax ro ned. Sya, ngua tee hui' Jesús loo yaa ngudyuuga, bel'que' pá ndoo ngudyuug loo yaa par hua Jesús ngudyuug. Per co'se' ngua tee hui' Jesús loo yaa, ante laa ndoo loo yaaa. Sya, ndxab Jesús loo yaa ngudyuuga:

—Desde nalle' par delant ya ne'ta'del xlè thidtene, ndee.

Texal ngolo ndxab Jesús di'sa loo yaa ngudyuug, ale be' nzi hui' myen' xin' mté'th Jesús, setilte mbiiz yaa ngudyuug. <sup>20</sup> Co'se' ngolo gunèe myen' xin' mté'th Jesús tataa ngòc con' mbli Jesús, ante mbui' myen' no ante gunàa myen'. Sya, mnibdi's myen' loo Jesús. Ndxab myen':

—Tad, ¿xá mod chonon ale setilte mbiiz yaa ngudyuug ba', à'?

<sup>21</sup> Jesús mcàb loo myen'. Ndxab Jesús loo myen':

—Lìcpe' ba'i, na nii loo gu': Chele' gu' yila's loon no ne'gàc chopte lezo' gu' loo cón chenen, le' sya, iante gác gu' li gu' xal mblin loo yaa ngudyuug ba'. Ndxle'leque', gu' gab loo yii co' ndub go': Yii, biiche tua'. Huàa tyub le'n níttó'. Tataaque' gàca loo gu'. <sup>22</sup> No ryete con' co' ña'b gu' co'se' cuez gu' Diox, chele' gu', lìcque', ndxela's loon no ndxàp gu' yalxla's loon, le' sya, Diox lique' le' gu' que no ryete con' ña'b gu' loo Diox.

*Trè' ndlu' le' Jesús nac xa' co' ñibe'pe'.*

*(Mr. 11.27-33; Lc. 20.1-8)*

<sup>23</sup> Sya, ngòc Jesús le'n templ. Láth ngue lu' Jesús mèn co' nac cón che'n xti's Jesús no co' nac cón che'n xley' Jesús, ngua gax mèn co' ngòc jef co' más ñibe' loo rye nguley', no mèngool co' ñibe', no co' ndyoo ner, no co' ndyoo naa, loo mèn nación Israel loo Jesús. Mnibdi's mèn loo Jesús. Ndxab mèn:

—¿Chó mnibe' lool mblil con' mblil ná'a no pá ngua té'thl par ngóc mblil con'a, ne, à'?

<sup>24</sup> Jesús mcàb loo mèn. Ndxab Jesús:

—Daa, ne, nibdiz thib con' loo gu' ñeene' ché' tác gu' càb gu' loon. Chele' gu' gác càb gu' loon, sya, daa, ne, nii loo gu' chó mnibe' loon mblin con'a ná'a. <sup>25</sup> Co'se' mbi'th li Juàn Bautist bautizar mèn, ¿chó mnibe' loo Juàn Bautist mbi'th li Juàn Bautist bautizar mèn, à' ? ¿Ché' Diox mnibe' loo Juàn mbi'th Juàn o ché' nzo chó mèn co' nziri' loo izlyo' mnibe' loo Juàn, cà' ? ¿Xá nee gu' ? Fcàb gu' loon.

Co'se' mbìn mèn tataa mnibdi's Jesús loo mèn, mtlo mèn, mdoodi's no mèn xtàa mèn. Ndxab mèn loo xtàa mèn:

—Chele' na' gab: Diox mnibe' loo Juàn, sya, ñee Jesús loo na': Chele' Diox mnibe' loo Juàn, ¿chonon ne'ngala'ste gu' loo con' mbli Juàn, sya? Aa, que tont gu' se. <sup>26</sup> No chele' na' gab loo Jesús nzo chó mèn mtel' Juàn, sya, que nzo ne'ñee lezo' na', na' zyebye' por mèn co' nziri' ba'. Tac ryete mèn ba' ngola's le' Juàn Bautist guniique' cón che'n Diox no mde'thque' Juàn cón che'n Diox.

<sup>27</sup> Con'a, mcàb mèn loo Jesús. Ndxab mèn:

—Ne'neede nu' chó mtel' Juàn.

Sya, ndxab Jesús loo mèn:

—Ne' daa ne'niide loo gu' chó mnibe' loon mblin con' mblin ná'a, no con' ndlin loo mèn, no chol con' ndlu'en loo mèn.

*Jesús ngue tetac di's loo mèn cón che'n ryop myen' co' mnibe' xud loo.*

<sup>28</sup> Jesús ndxab loo mèn:

—Nde niin thib con' loo gu' ñeene' cón ñee gu' cón che'n di's co' nde niin loo gu' ndxè': Ngo thib mbi' co' ngòp chop xgan'. Ndxab mbi' loo thib xgan' mbi': Xgan', huàa li zin' loo lus uv na' nalze. Huàa làa uv loo lus uv. <sup>29</sup> Xgan' mbi' mcàb loo mbi'. Ndxab xgan' mbi' loo mbi': Indlyasten gan. Per ngoloa, mse' mbyòò xtùuz mbyòò. Ngua que mbyòò zin' loo lus uv.

<sup>30</sup> Ngoloa, ngua ñibe' mbi' loo tedib xgan' mbi' par ya xgan' mbi' zin'. Lomisque', mcàb xgan' mbi' loo mbi'. Ndxab xgan' mbi': Neeca, Tad, nal gan. Per mbyòò nguri'th nza di'sa. Ne'ngade mbyòò zin'.

<sup>31</sup> Látha, chàa, ndxab Jesús loo mèn:

—Gunee gu' loon. De loo ryop hues mbyòò, ¿chó mbyòò, lìcque', mbli con' mblya's xud mbyòò, à'?

Mèn mcàb loo Jesús:

—Mbyòo nera mbli con' mblya's xud mbyòo.

Sya, ndxab Jesús loo mènà:

—Aa. Licque' nac con' co' nee gu' ba'. Yende cón niin loo gu'. No, licpe' ba'i, na nii loo gu': Le' mèn co' ndli cobrar cón che'n contribución, no mèngot co' mbli yalburrid, mènà, ndxe'leque', yòo loo cón che'n Diox par ñibe'pe' Diox loo mènà ndoore' tyal gu' no ta' gu' lugar par ñibe'pe' Diox loo gu' loo cón che'n Diox. <sup>32</sup> Tac Juàn Bautist mbi'th lu'le' loo gu' xá mod ndxàal que tee ban ndac gu'. Ne'ngala'ste gu' di's co' mbli' Juàn loo gu'. Per ndxe'leque', mèn co' ndli cobrar cón che'n contribución no mèngot co' mbli yalburrid ngola's loo di's co' mbli' no co' mde'th Juàn. Per part cón che'n gu', mastale' gunèe gu' ryete con' co' ngòc le'n tiemp ndxè', ne'nglàade yéc gu' no ne'nglàade lezo' gu' loo ryethe xquin gu' no xtol gu' par nse' gu' mod co' ndxàp gu' par, bel'que', ngala's gu' loo Juàn no ngala's gu' loon.

*Jesús ngue tetac di's loo mèn cón che'n moz co' ngòc moz ye'rsin'.*

*(Mr. 12.1-12; Lc. 20.9-19)*

<sup>33</sup> Bìn gu' cón che'n tedib di's co' nde tetaquen loo gu' ndxè', ne: Ngo thib mbi' co' mque no thib ranch co'te' mxen' mbi' lus uv loo xyòn mbi'. Ngoloa, mblo mbi' yaaloo dib vuelt ro xyòn mbi'. Mtoxcua' mbi' thib tanc par yòo nít uv co'se' co' mbi' nít uv. Mtoxcua' mbi' thib yòobé' par quèe mèn par la's mèn loo xyòn mbi'.

Ngoloa, mda' mbi' xyòn mbi' cuent rol loo thib ned mèn, mèn co' ndli zin' loo lus uv. Ngoloa, mxen mbi' ned. Mdee mbi'. Nda mbi'. <sup>34</sup> Co'se' mzin tiemp co' gac rol cosech che'n uv che'n mbi', mbi'a mtel' moz mbi' par ña'b moz no càaya' moz uv co' gac cuent rol co' gac che'n mbi'a. <sup>35</sup> Per ndxe'leque', mèn co' mbli zin' loo lus uva mxen moz mbi'. No mtin mènà moz mbi'. No mbeth mènà ndxep moz mbi'. No mbuaa'd quèe mènà taandxep moz mbi'. <sup>36</sup> Mbi' co' nac xuan' lus uva mbere, mtel' taamasre' moz loo moz co' ngua nera. Per mèn co' mbli zin' loo lus uva lomisque' mbli loo mbryop ned moza.

<sup>37</sup> Por lult, mtel' mbi' co' nac che'n lus uva xgan'pe' mbi'. Mbli mbi' xtùuz: Yende cón li no mènà xgan' daa. Ndxab mbi' loo lezo' mbi': Peser gáp mènà mod ñèe mènà xgan' daa. <sup>38</sup> Per co'se' ñèe mènà nde xgan' mbi' co' nac che'n lus uva, le' sya, mèn co' ndli zin' loo lus uva, mènà ndxab loo xtàa mèn:

—Hui' gu' nexa. Mbi' ba' nac mbi' co' yan' no yòo co' nac che'n lus uv ndxè'. Ya' gu' nda yuth na' mbi' par gac che'n na' yòo lus uv ndxè'. <sup>39</sup> Por lult, mxen mèn co' mbli zin' loo lus uva mbyòo co' ngòc xgan' mbi'a. Mblo' mènà mbyòo thib lad ro yòo lus uv. No mbeth mènà mbyòo, tya.

<sup>40</sup> Ngolo mdoodi's Jesús loo mènà tataa, mnibdi's Jesús loo mèn co' ngòc jef co' más ñibe' loo rye nguley', no loo mèngool co' ñibe', no co' ndyoo ner, no co' ndyoo naa loo mèn nación Israel. Ndxab Jesús loo mènà:

—Co'se' yi'th mbi' co' nac xuan' yòo lus uva, ¿xá nee gu'? ¿Cón li no mbi' mèn co' mbli zin' loo yòo lus uva, sya, à'?

<sup>41</sup> Mènà mcàb loo Jesús. Ndxab mènà:

—Mbi' co' nac che'n lus uva guth mènà. Ne'lyatte lezo' mbi' ñèe mbi' mènà. No yilo guth mbi' mèn ye'rsin'a, ta' mbi' xyòn mbi' loo tedib ned mèn co' li zin' loo xyòn mbi'. Mènà gac mèn co', licque', li rol uv co' gac che'n mbi' co'se' gáal tiemp làa mèn uv.

<sup>42</sup> Jesús mcàb loo mènà. Ndxab Jesús:

—¿Ché' thidtene tarte lab gu' di's co' ndub loo libr co' nac xti's Diox cà? Hui' gu' nexa. Di's mbez taandxè':

Quèe co' mblobii albañil thib lad, leque quèea mbli sirv par ngòc quèea quèe scuadr co' mdub squin yòo. Yub Tad Diox mbli con'a. No por cona, ante ngüi' na' no ante ñaa na' xal mbez di's ndxè' loo con' co' ngòca.

<sup>43</sup> Cona, ngue niin loo gu: Prob gu' izlyo'. Ngòc che'npe' gu' par yòo gu' loo cón che'n Diox par ñibe'pe' Diox loo gu'. Per nalle' Diox ne'tolode tyal no ne'tolode ta' Diox lugar loo gu' yòo gu' loo cón che'n Diox par ñibe'pe' Diox loo gu'. Ndxé'leque', Diox tyal no

ta' Diox lugar loo mèn par yòo mèn loo cón che'n Diox par ñibe'pe' Diox loo mèn, mèn co' li co' ñibe'pe' Diox loo mènna xalque' mbli mèn co' mbli rolpe' uv che'n mbi' co' ngòc che'n xyòn lus uva. <sup>44</sup> Le' cón che'n quèe, co' nee di's nacpe' daa na, mèn co' yixud loo quèea, co' nee di's, nden' mènna ngòc nguàal con' cón chenen, mènna lyux xal thib yèt co' ayè'thax ndxàc co'se' ndlyé' yèt. Le' loo mèn co' lyàa quèea na, co' nee di's nac daa, daa telux mènna xal co'se' ndlé' ndoo quèe thib con'.

<sup>45</sup> Co'se' mbìn mèn co' ngòc jef co' más mnibe' loo rye nguley' no mèn co' ngòc mèn xley' farise di's co' mtetac Jesús loo mènna, nazab ngulàa di'sa le'n lezo' mènna. Mden' mènna no mda' mènna cuent le' Jesús mtetac di's cón che'n mènna. <sup>46</sup> Co'se' mbìn mènna di'sa, capas mènna tyenxù' mènna Jesús. Per nzyeb mènna ñèe mènna mèn co' nziri' no Jesús. Tac mèn co' nziri' no Jesús ante ndli xtùuz cón che'n Jesús le' Jesús ante ndyoodi's di's co' mnibe' Diox loo Jesús par tyoodi's Jesús di'sa.

## 22

### *Jesús ngue tetac di's loo mèn xal co'se' nselya' thib ned myen'.*

<sup>1</sup> Mbere Jesús, mtetac Jesús di's loo mèn tedib vez. Ndxab Jesús loo mèn co' nziri' loo Jesús:

—Nde niin thib con' loo gu': <sup>2</sup> Diox co' ñibe' loo mèn nac xal thib rey co' mbli thib fandang che'n thib xgan' rey co' mselya'. <sup>3</sup> Mtel' rey moz rey par ngua li moz convid mèn no par li moz avis loo mèn co' ngòc convid par yi'th lyath no mèn mbi' loo fandang che'n mbyòo co' mselya'a. Per mèn co' ngòc convida ne'ndalte ngui'th. <sup>4</sup> Mbere rey co' mbli nab fandanga, mtel' rey tedib cua' moz. Ndxab rey loo moz: Huàa gu' no guuz gu' loo mèn co' ngòc convida yi'th mènna fandang, le' rey ngolole' mbli nab con' hua mèn. Le' rey mbli mandad mbeth mèn ngon no taamas má' nacha'. No ryete con' hua mènna ya ngolole' ngòc nable'. Guuz gu' loo mènna li mènna purad yi'th mènna fandang co' nac yalhua. <sup>5</sup> Per mèn co' ngua li moz convida, co' ngua lile' moz avis looa, ne'ndalte mènna ngui'th mènna. Ne' ne' ngli mènna cas di's co' ndxab moz. Chó mènna nda ta' vult loo xyòn mènna. Chó mènna nda loo rsin' mènna. <sup>6</sup> Le' taamas mèn co' ne'ndalte nga fandang che'n mbyòo co' mselya'a na, mènna mxen moz rey. Ale mbli mènna ngòc nguàal con' con moz rey axta mbeth mènna moz rey. <sup>7</sup> Co'se' gunèe rey tataa ngòc con'a, anze'f ngocloo tín' rey axta mtel' rey solndad rey par ngua yuth solndad mèn co' mbeth moz rey. Mtec solndad liz mènna no làaz mènna, ne. <sup>8</sup> Ngoloa, ndxab mbi' co' nac reya loo tedib cua' moz: Ryete con' ngolo ngòc nab co' nac che'n fandang par selya' mbyòo daa ndxè'. Huenque' mbli mèn co' ngòc convida ne'ngui'thte mèn. Tac inzyalte mènna no indxàalte mènna ngui'th mènna loo fandang na' ndxè'. <sup>9</sup> Más huen huàa gu'. Huàa tau' gu' loo rye mèn co' ñèe gu' riid rye ned. No guuz gu' loo mènna yi'th mènna loo fandang na' ndxè'. <sup>10</sup> Sya, ngro' moz. Ngua thop moz ryete mèn co' mzyál' moz, mèn co' ngòc mèn ndac no mèn co' ngòc mèn ye'rsin', par yi'th mènna fandang che'n mbyòo co' mselya'a. Mbi'thque' mènna axta mzyè le'n nyòo liz mbi', tant thib mèn mbi'th.

<sup>11</sup> Sya, ngòo rey le'n nyòo. Xèe mbui' rey loo rye mèn co' mbi'th, mèn co' ngòc convida. Gunèe rey ndub thib mbi' xi'th rye mènna. Per rey gunèe inocte mbi' xab mbi' co' ndxàal goc mèn co'se' ya mèn thib fandang che'n thib ned myen' co' nselya'. <sup>12</sup> Ndxab rey loo mbi'a: Amiu, ¿xá mod mbliil ngòol trè' no inoctel xabl co' ndxàal ngoc par ngui'thl loo fandang che'n myen' co' nselya', à'? Per más quee lezo' mbi'a xèe mdub mbi'. Ne'ncàbte mbi' loo rey. <sup>13</sup> Sya, ndxab mbi' co' ngòc reya loo moz mbi' co' ngue li mandad loo mes: Quedó' gu' ya' mbi' ba' no quedó' gu' nii mbi' ba'. No càa mbi' ba'. Blo' gu' par fuer loo yál'cuau. Tya gón' mbi' no hua le mbi'. <sup>14</sup> Tataa mod ndli Diox, ne, par ndxòn huax mèn cón che'n Diox par yòo mèn loo cón che'n Diox par ñibe'pe' Diox loo mèn. Per ale ndxe'leque', ndxèpte mèn nzo co' mdyal ngòo loo cón che'n Diox. Mènna ngòc mèn co' mcuipe' Diox par ñibe'pe' Diox loo mènna.

*Mèn xley' farise mnibdi's cón che'n impuest loo Jesús.*

*(Mr. 12.13-17; Lc. 20.20-26)*

<sup>15</sup> Ngolo mbìn mèn xley' farise di's co' ndxab Jesús, mxen mènà ned. Ndyàa mènà. Sya, thidte ngòc mènà. Mdoodi's no mènà xtàa mènà par gab mènà chol di's loo Jesús par bel'que' tataa mod li mènà par gàal di's mèn Jesús no tataa mod li mènà gan par quexù' que' fals mènà Jesús. <sup>16</sup> Por lult, mtel' mènà ndxep mèn co' nqueltàa loo cón che'n xley' mènà con taandxep mèn co' ngòc thib ned mèn co' ngro' lèe partid herodist loo Jesús par tyoodi's no mènà Jesús. Sya, ndxab mènà loo Jesús:

—Maistr, nu' non no naneeque' nu' le' U', lìcque, ndyoodi's co' nac di's lìcpe'. No lìcque' nac ned co' ndlu' U' par yòo mèn loo cón che'n Diox. Más de cona, nonque' nu' no naneeque nu' yende chó mport nzo lezo' U' con' co' mbez mèn loo U'. Ne' ne' indla's U' mèn par ñèe U' xal nac mod co' ndxàp mèn. Ne' ne' indla's U' xal ñaa mèn. <sup>17</sup> Per nalle' gunee U' loo nu' ¿ché' tli huen ta' nu' tmi o quix nu' tmi cón che'n contribución loo mbi' co' nac gobiern co' ndub le'n ciuda Rom o ché' indxàalte quix nu'i? ¿Xáa nee U'?

<sup>18</sup> Per Jesús mden' lezo' no mda' Jesús cuent le' mènà asembli mcua'n mènà mod par gàal di's mènà Jesús par yigaa Jesús loo mènà. Sya, ndxab Jesús loo mènà:

—Aa mèn xley' farise, susque' ndxác gu' ntembii gu' ro gu' no ntembii gu' xti's gu' loon. ¿Chonon asendli gu' ncu'a'n gu' mod par gàal di's gu' daa par yigaa daa loo gu', à'?

<sup>19</sup> Blu' gu' thib pes co' nguix gu' cón che'n contribución loon. Neene'.

Sya, ngua xi mènà thib pes par mbli' mèn pesa loo Jesús. <sup>20</sup> Co'se' gunèe Jesús pesa, mnibdi's Jesús loo mènà. Ndxab Jesús:

—¿Chó che'n gunab co' ngue loo pes ndxè' no chó che'n lèe co' ngue loo pes ndxè', à'?

<sup>21</sup> Mènà mcàb loo Jesús. Ndxab mènà:

—Gunab ba' no lèe ba' nac che'n gobiern co' ñibe' yèe loo na'.

Jesús ndxab loo mènà:

—Aa. Pues, fta' gu' con' co' nac che'npe' gobiern co' ñibe' loo gu' par càa gobiern che'n gobiern. No fta' gu' con' co' nac che'npe' Diox par càa Diox.

<sup>22</sup> Co'se' mbìn mènà tataa ndxab Jesús loo mèn, ante mbui' mènà no ante gunaa mènà cón che'n Jesús. Xexte mxen mènà ned. Ndyàa mènà. Taate mblá' mènà Jesús tya.

*Mèn xley' saduce mnibdi's loo Jesús: ¿Ché', lìcque', ryo xban mèn?*

*(Mr. 12.18-27; Lc. 20.27-40)*

<sup>23</sup> Leque huiza ngua plá mèn co' ngòc mèn xley' saduce loo Jesús co'te' nzo Jesús par la's mèn cón ngue li Jesús. Mènà ngola's no mbez mènà: Pà ryo xban mèn. Yende chó mèn ryo xban. Tataa mod mdub nii mènà par aseli mènà ndxab mènà thib con' loo Jesús par gàal di's mènà Jesús. Ndxab mènà:

<sup>24</sup> —Maistr, Moisés mtan' di's loo nu' chele' thib mbi' co' mselya' nguth no ne'ndante xa'got mbi' xin' mbi', le' sya, hues mbi' selya' con xa'got viuda par que no xa'gota xin' mbi'. Sya, yòo cuent xin' mbi' nac mbed co' tyan xa'got viuda con hues ndlyo mbi'.

<sup>25</sup> Pues làth nu' ngo gaz mbi' co' ngòc hues. Mbi' ndlyoa mselya'. Làth xtau'a, tee yath mbi'. Per mbi' ne'ndante xin' con xa'got co' ngòc sa'l mbi', ¿lé'? Mbyan' xa'gota viud. Ndoole' hues mbi' co' nde nque xís mbi' mcàaya' xa'got viuda. <sup>26</sup> Lomisque', nguth mbi'a. Ngoloa, mbyan' xa'gota viud tedib vez. Ndoole' tedib hues mbi' co' nde nquea tee càaya' xa'gota. Lomisque', nguthguè' mbi'a, ne. Lomisque', ngòca loo taamas myen' axta nguth rye gaz hues myen'a. <sup>27</sup> Ngolo nguth rye gaz hues myen'a, tee yath xa'gota, ne. <sup>28</sup> Nalle' gunee loo nu', co'se' ryo xban rye hues myen' co' ngutha, ¿chó myen' gac sa'lpe' xa'gota por mque no xa'gota rye gaz hues myen', à'?

<sup>29</sup> Jesús mcàb loo mènà. Ndxab Jesús:

—Aa, que tont gu'se. Thidtene ncuau lezo' gu', ndee. Nazab ndli gu' xtùuz. No inalide ngue li gu' xtùuz. Tatua' ndli gu' xtùuz tac inda'de gu' cuent co' huenleque' di's co' ndub loo libr co' nac xti's Diox. Ne' ne' inda' gu' cuent co' nac con' roo no con' xèn co' ndxàp



Diox la's nii Diox no la's ya' Diox. <sup>30</sup> Tac co'se' gac huiz co' ryo xban mèn nguth, mèn co' ngòo loo cón che'n Diox, huiza ya ne'berede mènna, selya' mènna tedib vez. Huiza no tiempa gac mènna xal angl che'n Diox. <sup>31</sup> Per cón che'n xal ndli gu' xtùuz no xal mbez gu' le' mèn co' nguth ne'ryo xbante, ¿ché' tarte lab gu' di's co' ndub loo libr co' nac xti's Diox co' gunii yub Diox loo mèn póla, cà'? Diox ndxab taandxè':

<sup>32</sup> —Daa nac Diox che'n xudgool gu' Abraham, Isaac, no Cob.

Hui' gu' nexa. Yende mod gac Diox Diox che'n mèn co' ndxelo ndxelux co'se' ñeei loo mèn. Por cona, non na' le' Abraham no Isaac no Cob naban co'te' ndyàa xa' tac Diox mbez nac Diox Diox che'n xa'a.

<sup>33</sup> Co'se' ngolo mbìn mèn co' ngureri' tataa ndxab Jesús, ryete mèn ante mbui' no ante gunaa xal ngòc di's co' mblu' Jesús loo mèn.

*Mèn xley' saduce mnibdi's loo Jesús cón más ndli precis ndlya's Diox li mèn, co' nac co' mnibe' Diox loo mèn.*

(Mr. 12.28-34)

<sup>34</sup> Co'se' mbìn mèn xley' farise le' Jesús mbli gan par ya ne'tolode ndoodi's mèn xley' saduce con Jesús, mbere mèn xley' farise, mqueltàa mèn xley' farise tedib vez loo Jesús.

<sup>35</sup> Sya, thib mbi' co' ngòc mèn xley' farise co' ngòc maistr co' ndlu' cón che'n ley co' mxo'f Moisés loo mèn tiempa nzo xi'th mènna. Mbi' mblya's ngàal di's mbi' Jesús par ñee mbi' ñeene' ché' tagaa Jesús loo mbi' con di's co' càb Jesús. Mnibdi's mbi' loo Jesús. Ndxab mbi':

<sup>36</sup> —Maistr, ¿chó di's nac di's co' más ntac co' ñibe' loo ley co' mxo'f Moisés loo mèn, à'?

<sup>37</sup> Jesús ndxab loo mbi' co' ngòc maistra:

—Di'sa nac di's co' mbez: Fque' lezo' gu' Tad Diox gu' dib nzo yéc gu', no dib nzo lezo' gu', no dib nzo xtùuz gu'. <sup>38</sup> Di'sa nac ner di's co' mtan' Diox loo mèn loo ley co' mxo'f Moisés loo mèn. No nac di'sa di's co' más ntac no co' más ñibe' loo mèn. <sup>39</sup> Le' di's co' nac mbryop di's co' nde nque loo ner di'sa na, lalque' nac xal ner di'sa. No mbez di's ndxè' loo mèn: Fque' lezo' gu' gunèe gu' hues xtàa gu' xalque' co'se' leque gu' ngue lezo' ñèe gu' gu'. <sup>40</sup> Ryop di's co' taandxè' mbez no co' ndlu' loo mèn, ryop di's ndxè' nac di's co' mnibe' Diox loo Moisés par mbyan' di's ndxè' loo ley co' mxo'f Moisés loo mèn. Lomisque' nac di's ndxè' con di's co' gunii Diox loo mèn co' mde'th di's co' ndxab Diox.

*Jesús mnibdi's loo mèn xley' farise. Ndxab Jesús: ¿Chó xin nac Crist ndli gu' cuent, à'?*

(Mr. 12.35-37; Lc. 20.41-44)

<sup>41</sup> Láth be' nziri' mèn co' nac xley' farise loo Jesús, <sup>42</sup> Jesús mnibdi's loo mènna. Ndxab Jesús:

—¿Xá nee gu'? ¿Cón ndli gu' xtùuz cón che'n Crist? ¿Chó xin nac Crist, à'?

Mènna mcàb. Ndxab mènna loo Jesús:

—Crist nac xgan' David co' ngòc rey póla.

<sup>43</sup> Sya, ndxab Jesús loo mènna:

—Chele' Crist nac xgan' David, ¿chonon ndxab David por cón che'n Xpii Natú' che'n Diox le' Crist nac yub Tad che'n David, sya? Tac David ndxab:

<sup>44</sup> Tad Diox ndxab loo Tad daa: Ftub cuaten axtaque' lin le' ryete mèn co' nac mèn ngolo ngola's che'nl gac nado' lool.

<sup>45</sup> ¿Xá mod ndli gu' cuent nac Crist xgan' David co'se' leque yub David mbez: Tad daa, loo Crist, sya? ¿Máa yob yéc gu', na?

<sup>46</sup> Yende chó mènna ngác ncàb nec thib di's loo Jesús. No desde huiza par delant nec thib mènna ne'tolode ngli ryes ñibdi's mènna taamas con' loo Jesús.

## 23

*Jesús ngue zib quìi mèn xley' farise. No ngue zib quìi Jesús mèn co' ngòc maistr co' ndlu' cón che'n ley co' mxo'f Moisés loo mèn.*

(Mr. 12.38-40; Lc. 11.37-54; 20.45-47)

<sup>1</sup> Sya, ndxab Jesús loo mèn co' ngureri' loo Jesús no loo myen' xin' mté'th Jesús:

<sup>2</sup> —Le' maistr co' ndlu' cón che'n ley co' mxo'f Moisés loo mèn nación Israel no mèn xley' farise, anze'f ndli ryop ned mèn ba' cuent le' mèn na ngue no zin' co' nac zin' co' ndlu' mèn cón che'n ley co' mxo'f Moisés loo mèn. <sup>3</sup> Cona, ngue niin loo gu': Ftubdi's gu' loo di's co' mbez mèn ba'. No bli gu' co' ñibe' mèn. Per ne'que tee lide gu' xal nac mod co' ndxàp mèn ba'. Tac mèn ñibe' loo mèn li mèn thib con'. No leque mèn indlide con' xal ñibe' mèn li taamas mèn. <sup>4</sup> Nde niin tedib con' loo gu': Co'se' ndli mèn ba' tataa, ndli mèn xal co'se' ntecue mèn thib yó' xís xtàa mèn, yó' co' ne'xecte mèn hue' mèn. No ñibe' yèe mèn loo prob xtàa mèn par hue' mèn yó'. Per mèn ba', nec thib mod no nec tedib mod ne'tyalte mèn no ne' ne' li mèn xtùuz teche mèn nec thib yalnibe' bix co' indubte loo ley co' ngue no mèn loo xtàa mèn co' nac ley co' mnibe' Diox mxo'f Moisés loo mèn nación Israel. <sup>5</sup> Asendli mèn ba' ryete con' co' nac mod co' ndxàp mèn ba' par hui' mèn no ñaa mèn loo mèn ba'. Anze'f ndyubla's mèn farise ba', no mèn co' ndlu' cón che'n ley co' mxo'f Moisés loo mèn, hue' mèn di's co' nac ndxep di's che'n xti's Diox loo thib le' ye's lechuz mèn no co'te' nac bél'cha' ya' mèn. No anze'f ndyubla's mèn ba' goc mèn ba' xab mèn co' nac lar' co' ndoo flec co' nac xab mèn más nol' no flec más nol' leque co' ndli taamas mèn us. <sup>6</sup> Ale ndubla's yèe mèn ba' tyub mèn ba' co'te' más huen par tyu' mèn ba' co'te' ndxàc chol yalhua. No ndubla's yèe mèn ba' tyub mèn ba' co'te' gac gab chol mèn cón che'n mèn ba': Susque' mèn guryath no mèn guryèn nac mèn ba' le'n sinagog. <sup>7</sup> No anze'f ndubla's yèe mèn ba' ñii chol mèn Diox loo mèn ba' pál co'te' nzyál' mèn mèn ba' no por fuerz gáp mèn mod ñèe mèn mèn ba' co'se' zyál' mèn mèn ba'. No anze'f ndubla's yèe mèn ba' gab chol mèn: San, Maistr, loo mèn ba' pál co'te' nzyál' mèn ba' chol mèn.

<sup>8</sup> Per ndxe'leque', part cón che'n gu', ne'ta'de gu' lugar ñee chol mèn Maistr loo gu'. Tac thidte mbi' co' nac merpe' Maistr nzo. Mbi'a nac Crist, co' nee di's, nac yub daa. Le' rye gu' na, ndxàc hues por cón che'n Maistr gu'. <sup>9</sup> Ne' ne' gab gu': Pay, loo nec thib mèn co' nziri' loo izlyo'. Tac ante thidte Xud gu' ngue no gu'. Xud gu'a nzo loo bé'. <sup>10</sup> Ne' ne' ta' gu' lugar ñee chol mèn loo gu' le' gu' nac jef. Tac angoluxte Crist nac jef che'npe' gu'. <sup>11</sup> Le' gu' co' ndli mandad loo hues xtàa gu' na, gu'a nac más xa' roo no xà' xèn làth xtàa gu'. <sup>12</sup> Tac gu' co' ndli cuent no ndlu' gu' loo xtàa gu' le' gu' nac más mèn roo no mèn xèn làth xtàa gu', loo gu'a Diox li gac gu' mèn be'the yiloa. Le' gu' co' nac mèn nado' no mèn be'the làth xtàa gu', loo gu'a Diox li par gac gu' mèn roo no mèn xèn làth xtàa gu'.

<sup>13</sup> Mbere Jesús, ndxab Jesús loo mèn co' ndlu' cón che'n ley co' mxo'f Moisés loo mèn no loo mèn xley' farise:

—Ay, prob gu' izlyo', gu' co' nac maistr co' ndlu' cón che'n ley co' mxo'f Moisés loo mèn. Lomisque' ne, gu', mèn xley' farise. Ay, prob gu' izlyo'. Aa que ndxác gu' ntembii gu' ro gu' no ntembii gu' xti's gu' loon. Tac gu' nca no nca' gu' loo mèn par ne'yòode mèn loo cón che'n Diox par ñibe'pe' Diox loo mèn. Ne' ne' tyal gu' no ne' ne' ta' gu' lugar par ñibe'pe' Diox loo gu'. Ne' ne' ndla' gu' yòo mèn co' ndyal yòo loo cón che'n Diox par ñibe'pe' Diox loo mèn.

<sup>14</sup> Ay, prob gu' izlyo', gu' co' ndlu' cón che'n ley co' mxo'f Moisés loo mèn. Lomisque' gu' ne, mèn xley' farise. Prob gu' izlyo'. Aa que ndxác gu' ntembii gu' ro gu' no ntembii gu' xti's gu' loon. Ale ndyac gu' con' huen co' ngue li gu'. Tac por thib con' co' iñaade ndyenxù' gu' no ndxàc che'n gu' liz prob mèngot viud. No par ndli gu' xal mèn co' ne'ñeede no mèn co' inda'de cuent cón li mèn, ale asendli gu' ngol' gu' xley' gu' co'se' mbez gu' Diox. Por con' co' ndli gu'a, más nayi' tín' gac Diox loo gu' par tetii Diox gu' yiloa.

<sup>15</sup> Tedib vez niin loo gu': Ay, prob gu' izlyo', gu' co' ndlu' cón che'n ley co' mxo'f Moisés loo mèn. Lomisque' gu' ne, mèn xley' farise: Ay, prob gu' izlyo'. Aa que ndxác gu' ntembii gu' ro gu' no ntembii gu' xti's gu' loon. Ale ndyac gu' con' huen nac co' ngue li gu'. Gu' nque tee cua'n mèn loo izlyo' no loo nítto' par mbli gu' mse' mèn mod co' ngòp mèn par yila's mèn loo xley' gu' xalque' ndxela's gu' loo xley' gu' par gac mèn thidte mèn

con gu'. No co'se' ngolo mbli gu' gan par gac mèn thidte mèn con gu' no ngò mèn loo xley' gu', ndli gu' par ndxàc loo mèn chop cua' con' ye'rsin'túb leque loo gu' par thib líte yòo prob mèn le'n ye'rbìil co'te' nac loo quìi no loo bèel.

<sup>16</sup> Ay, prob gu' izlyo', gu' co' nac xal mèn sieu co' ndyoo ner loo mèn. Gu' mbez: Chele' chol mèn càbgòn thib con', lugar de te'th mèn lèe Diox mbez mèn: Por lèe templ ba' lina. Sya, mbez gu': Indlide arid precis li lùu co' ndxab lùu li lùu por mdeth lùu lèe templ ba'. Per ndxe'leque', mbez gu': Chele' mèn gab: Lina o gaca loon por mde'th mèn or co' nacsua' templ ba', sya, mbez gu': Syase, ndlique' precis li gu' con' co' ndxab gu' li gu' loo mèn. <sup>17</sup> Susque' tont gu'. No susque' nac gu' xal mèn sieu co' nau' loo no co' nau' yéc. ¿Cón ndli gu' cuent nac con' más ntac, à'? ¿Ché' ndli gu' cuent más ntac or o más ntac templ co' ndli ndxàc natú' ora, cà'? Yende xaa. Más ntac templ, ¿lé'? <sup>18</sup> Lomisque', mbez gu' loo mèn, ne: Chele' chol mèn càbgòn li mèn thib con' o gac thib con' loo mèn, chele' mèn gab: Gaca o lina xalque' nac loo còo' le'n templ ba', le' sya, gu' mbez: Inquinte arid li gu' co' mde'th gu' xal nac loo còo' le'n templ ba'. Lomisque', más mbez gu': Chele' mèn te'th li mèn thib con' o gac thib con' loo mèn, no te'th mèn por cón che'n gòn co' mbec mèn loo còo' le'n templ, sya, mbez gu': Syase, por fuerz gacque' o li gu' con' co' mcàbgòn gu' loo mèn li gu'. <sup>19</sup> Susque' tont gu'se. No susque' nac gu' xal mèn sieu co' nau' loo nau' yéc. ¿Cón ndli gu' cuent más ntac, à'? ¿Ché' ndli gu' cuent más ntac gòn co' mbec gu' loo mes co' mbez gu' nac loo còo' o ché' ndli gu' cuent más ntac con' co' nzi'f gu' loo còo' leque más natú' nac còo' co' ndli ndxàc natú' con' loo Diox, cà'? Yende xaa. Más ntac loo còo', ¿lé'? <sup>20</sup> Tac mèn co' nde'th di's co' nac cón che'n loo còo', ingue te'thte mèn di's ante co' nac cón che'n loo còo'. Ndxé'leque', mèn ngue te'th di's co' nac lèe ryethe con' co' nzi'f loo còo', ne. <sup>21</sup> Le' mèn co' nde'th di's co' nac lèe templ na, ingue te'thte mèn ante lèe templ. Ndxé'leque', ngue te'th mèn di's co' nac lèe Diox tac Diox nzo le'n templ, ne. <sup>22</sup> Lomisque', mèn co' nde'th di's co' nac lèe bé', mèn ngue te'th di's co' nac lèe co'te' nzo Diox. No ngue te'th mèn lèe merpe' Diox.

<sup>23</sup> Lomisque', ndxab Jesús loo mèn:

—Ay, gu' co' nac maistr co' ndlu' cón che'n ley co' mxo'f Moisés loo mèn no gu' co' nac mèn xley' farise. ¡Prob gu' izlyo'! Susque' ndxác gu' ntembii gu' ro gu' no ntembii gu' xti's gu'. Ale, ngo' gu' si' si' centav loo thib thib pes co' nac che'n con' nayèe co' ntho' gu' co' nac fthyoxtil, no anís, no comin. Per ale ndxe'leque', indlide gu' cas cón che'n di's co' nac di's co' ñibe' loo ley co' mxo'f Moisés loo mèn, co' nee di's, gac gu' mèn nalì no mèn nambii loo Diox no gac gu' mèn co' ndlyat lezo' ñèe xtàa no gac gu' mèn co', licque', ndxàp yalxla's no co', licque', ndxela's loo Diox. Licque, ndxàalque' ta' gu' diezm loo con' ndli gu' gan co'se' ntho' gu' con'. Per más ndxàal li gu' par gac gu' mèn nalì no mèn nambii loo Diox, no gac gu' mèn co' ndlyat lezo' ñèe xtàa, no gac gu' mèn co' ndxela's loo Diox no co' ndxàp yalxla's loo Diox. Per gu' indlide con'a, ¿lé'? <sup>24</sup> Ay, prob gu' izlyo', gu' co' ndyoo ner loo taamas mèn loo cón che'n Diox, gu', co' nee di's, nac xal mèn sieu co' ndyoo ner loo taamas mèn co' nac xal mèn sieu. Loo cón che'n Diox ndli gu' cuent anze'f mèn nambii nac gu' no mèn nalì nac gu' loo Diox. Per ale ndxe'leque', loo cón che'n Diox nac gu' xal mèn co' nzib thib taz café co'se' ndlyàa thib ngru's chu'th le'n café par gu' gu' café. Per ne'ta'de gu' cuent le' loo cón che'n Diox nac gu' xal mèn co' ngueb thib camell, co' nee di's, nzo le'n taz café co' ngue yu gu'. Per con' co' ndli gu' ba' nee di's ale más ndxòo yéc gu' ndli gu' con' co' intacte arid loo Diox. Ale ndxe'leque', indlide gu' cas no ingüinte gu' arid par li gu' con' co' más ntac loo Diox.

<sup>25</sup> Ay, prob gu' izlyo', gu' co' nac maistr co' ndlu' cón che'n ley co' mxo'f Moisés loo mèn no gu' co' nac mèn xley' farise. Susque' ndxác gu' ntembii gu' ro gu' no ntembii gu' xti's gu'. Loo cón che'n Diox, ndlu' gu' gu' loo mèn le' gu' nac mèn nambii no mèn nalì loo Diox. Per le'n lezo' gu' no le'n xtùuz gu' nzo huax con' ye'rsin'túb por mod co' ndxàp gu' tac gu' ndli huan' mèn. No nqueli'th gu' cón che'n taamas mèn. No ndxan lezo' gu' ñèe gu' cón che'n taamas mèn. Cona, ngue niin loo gu': Nac gu' xal plat no taz co' ante ntech mèn par xís. Per par le'na taate nazab ñaa. <sup>26</sup> Aa, mèn xley' farise. Susque' nau'

loo nau' yéc gu' loo cón che'n Diox. Más huen blo yéc gu' no blo lezo' gu' par tembii gu' xtùuz gu' no teche gu' ryethe mod ye'rsin' co' ndxàp gu' le'n xtùuz gu' no le'n lezo' gu' no mod ye'rsin' co' ndxàp gu' loo mèn. Le' sya, tataa mod se' gu' mod co' ndxàp gu' par, lìcque', gác gu' mèn nali no mèn nambii loo Diox xal co'se' tech mèn par le'n taz no plat par nambii gàca.

<sup>27</sup> Ay, prob gu' izlyo', gu' co' nac maistr co' ndlu' cón che'n ley loo mèn no gu' co' nac mèn xley' farise. Susque' ndxác gu' ntembii gu' ro gu' no ntembii gu' xti's gu'. Gu' lalque' nac xal bá' che'n thib mèn nguth, co' ante nabe's natoxcua', co' ante nagus bèeleque' ñaa par xís. Per par ned le'n bá' anze'f nazab ndlya' no anze'f thib zith che'n mèn nguth nzo. <sup>28</sup> Tataaque' nac gu', mèn xley' farise tac gu' ndlu' gu' loo mèn anze'f mèn ndac nac gu'. Tataa ndli gu' par ndxác gu' ntembii gu' ro gu' no ntembii gu' xti's gu' loo mèn par indlu'de gu' ndli gu' chó con' ye'rsin' co' ndli gu' loo mèn.

<sup>29</sup> Ay, prob gu' izlyo', gu' co' nac maistr loo mèn, gu' co' ndlu' di's co' nac ley co' mxo'f Moisés loo mèn. Ay, prob gu' izlyo', mèn xley' farise. Susque' ndxác gu' ntembii gu' ro gu' no ntembii gu' xti's gu'. Tac gu' mbli mandad mtoxcua' mèn armit che'n mèn co' mde'th di's co' ndxab Diox, co' nguth póla. No nabe's mtoxcua' gu' co'te' ndoo gunab co' nac monument co' nac xin no xnaa che'n mèn co' mbez gu' ngòc mèn ndac. <sup>30</sup> No nabe'ste ntoxcua' gu' yalgutyè'. Mbez gu': Chele' na' ngo ban le'n tiemp co' mban xudgool na', ne'nqueltàa node na' xudgool na' par nguth na' mèn co' mde'th di's co' ndxab Diox con xudgool na', ¿lé'? <sup>31</sup> Por di's co' mbez gu' no por di's co' ndyoodi's gu', leque gu' ngue go xo'f co' mbli gu' no nda' gu' cuent nac gu' bin mèn co' mbeth mèn co' mde'th di's co' ndxab Diox. Cona, ngue niin loo gu': Leque co'te' mdoo nii xud gu' no leque co'te' mdoo ya' xud gu', leque tya tyoo nii gu' no leque tya tyoo ya' gu', ne. ¿Cón más ndlya's gu' ñee gu' loon? <sup>32</sup> Cona, ngue niin loo gu': Ftolo bli gu' con' xal mbli xudgool gu' póla. Ftolo guth gu' taamas mèn co' nde'th di's co' ndxab Diox. Yiloa nee gu' cón che'n gu' co'se' tub rez Diox cón che'n gu'.

<sup>33</sup> Aa, mèn co' nac xal mbel' co' lèe huid. ¿Xá mod gác gu' lyá' gu' loo yaltii tìn' co' gác loo gu' co'se' tetii Diox gu' le'n ye'rbii co'te' nzo quì no bèel? ¡Pà lyá' gu'! <sup>34</sup> Por cona, na' ngue nii loo gu': Na tel' huax mèn làth gu'. Ndxep mèna gác mèn co' te'th di's co' ndxab Diox loo gu'. Taandxep mèn gác mèn co' ndxác cón che'n Diox. Taandxep mèn gác mèn co' lya's lu' loo gu' cón che'n Diox co' nac con' lìcpe' par ta' gu' cuent cón che'n Diox. Per ale ndxe'leque', guth gu' ndxep mèna. Taandxep mèna que' gu' loo thib cruz. No ta' gu' che'n taandxep mèna le'n sinagog gu'. No tyoo nque gu' xís taandxep mèna le'n thib yèez no le'n tedib yèez axtaque' li gu' con' ndlya's gu' con mèna. <sup>35</sup> Por cona, con' ye'rsin' co' nde teelee' ndli gu' con' rye mèn co' tel'en loo gu' li par yan' cón che'n gu' loo Diox por cón che'n rye mèn co' ngòc mèn ndac co' mbethxù' xudgool gu' póla no co' mbethxù' gu' le'n tiemp ndxè'. Tac anon co'se' mbethxù' thib mbi' co' ngòc xudgool gu' Abel co' ngòc thib mbi' nambii no thib mbi' nali loo Diox, mtlo mbethxù' xudgool gu' taamas mèn desde huiza no axta tiemp co'se' mbethxù' xudgool gu' Zacari, xgan' Berequi, co' mbeth xudgool gu' le'n templ co'te' ndoo mes co'te' mbec mèn gòn o ofrend loo Diox. <sup>36</sup> Lìcque' nac di's co' ngue niin loo gu' ndxè': Dol no yalnquexù' co' ngòc cón che'n rye mèn co' mbethxù' prob mèna yizi'f no yiga's loo gu' co' naban tiemp ndxè' par tetii tìn' Diox gu' axta plóthe yiloa.

*Jesús mbín' por cón che'n mèn ciuda Jerusalén.*

*(Lc. 13.34-35)*

<sup>37</sup> Ay, prob gu' izlyo', mèn ciuda Jerusalén, gu' co' mbeth mèn co' mde'th di's co' ndxab Diox, gu' co' mbuaa'd quèe mèn co' mtel' Diox co' mbi'th lo yalbàn loo gu'. Anze'f mblyazen nqueltàan gu' loon xal ndli nguiiddol colec con nguiid yèn' co'se' ngue's nguiiddol colec nguiid yèn' xan' xíl' nguiiddol colec. Per gu' ne'ndalte thidtene no ne'nda'de gu' lugar par ngàca tataa loo gu'. <sup>38</sup> Per nalle' hui' gu' nexa. Nase thidtene mblá'ya' Diox gu' liz gu' no làaz gu'. Nee gu' cón che'n gu' nalle'. <sup>39</sup> Tac daa ngue nii loo

gu': Gu' ya ne'berede hui' loon le'n tiemp ndxè'. Gu' bereque' hui' loon per axta co'se' gac tiemp co'se' ñeepe' gu' no co'se' gab gu' loo Diox: Anze'f mbi' huen no anze'f mbi' ndac nac mbi' co' nde ba' tedib vez, Tad Diox. U' mtel' mbi'. Nde mbi'. Axta syare', hui' gu' loon tedib vez.

## 24

*Jesús mda' cuent le' mèn sil templ no yende cón tan' mèn co' nac cón che'n templ.*

*(Mr. 13.1-2; Lc. 21.5-6)*

<sup>1</sup>Ngolo mdoodi's Jesús rye di'sa loo mèn ciuda Jerusalén, ngro' Jesús le'n templ. Le'pe' tyen Jesús ned bii Jesús, mbii gax myen' xin' mté'th Jesús loo Jesús. Látha, nzi tee yot myen'. Xèe ngüi' myen' loo templ. Mbez myen' loo Jesús: Tad, susque' nabe's ñaa templ ndxè' no susque' naroo templ ndxè', cara. <sup>2</sup>Per ale le'le' mcàb Jesús. Ndxab Jesús loo myen':

—¿Ché' nzi tee yot gu', ngüi' gu' loo templ ndxè' no ndli gu' xtüuz cón che'n templ ndxè', ne, cà'? Per hui' gu' nexa. Lìcque' nac di's co' nde niin loo gu' ndxè': Desde nalle' par delant, nde zin' gaxle' le' mèn sil templ ndxè'. No ya ne' hui'de gu' nec thib quèe loo ftoo ndxè'. Thidtene telux mèn templ ndxè'.

*Jesús ngue ta' cuent cón che'n con' co' tlo gac ndoore' lith no izlyo'.*

*(Mr. 13.3-23; Lc. 21.7-24; 17.22-24)*

<sup>3</sup>Ngoloa, mxen Jesús ned. Nda no Jesús myen' xin' mté'th Jesús loo thib yii co' lèe yii che'n yaa oliv. Co'se' ñee myen' ndub Jesús tya, mbii gax myen' xin' mté'th Jesús loo Jesús. Xexte ndxab myen' loo Jesús:

—Tad, nu' ndlya's ñee U' loo nu' ¿pól gac co' nee U' loo nu' gozea cón che'n templ ba' no chó señ yú' loo mèn co'se' gac huiz co'se' bere U', yi'th U' loo izlyo' ndxè' tedib vez no co'se' gac huiz lyux no lith no izlyo', à'?

<sup>4</sup>Sya, ndxab Jesús loo myen':

—Chó Diox chó nee gu'. Ne'ta'de gu' lugar quedii chol mèn gu' cón che'n con' niin loo gu' nalle', ndee gu'. <sup>5</sup>Tac anze'f huax mèn nare' gáal loo izlyo' no que tee te'th mèn cón che'n lèen. No gab mèn no que tee te'th mèn loo mèn: Daa nac Crist. Le' sya, tataa mod anze'f huax mèn quedii mèn. <sup>6</sup>Huiza gòn gu' tyoodi's mèn cón che'n xó'. No tyoodi's mèn cón che'n con' ryes co' ndxàc cón che'n xó'. Per nalle' niin loo gu': Thidtene ne'zyebte gu' co'se' gac huiz no tiemp co'se' gòn gu' di's co' tataa ta' mèn cuent loo gu'. Tac naquinque' tataa gàca. Per mastale' tataaque' gàca le'n huiza, tarte gac tiemp co'se' lyux no lith no izlyo'. <sup>7</sup>Sya, gac huiz tel' mèn che'n thib nación solndad che'n mèn nación par yoo mèn con mèn co' nac tedib nación. Lomisque' ne, li mèn thib nación xó' con mèn co' nac tedib nación. Huiza o tiempa, por derech, lyàa huin loo izlyo'. Lyàa yilíiz. Huin xòo huax lugar loo izlyo', ne. <sup>8</sup>Per pente tlo gac rye con'a par ten' mèn no ta' mèn cuent le' mèn tolo tyactii par delant co' nac más con' tín' co' nde nque co' gac loo co' ngue niin loo gu' ndxè'.

<sup>9</sup>Láth ndxàc rye con'a le'n tiempa, mèn tyenxù' gu' no ta' mèn gu' loo xtàa mèn par li no mèn gu' chol con' ye'rsin' xal ndlya's mèn axta guth mèn gu'. Tiempa, mèn dib athu loo izlyo' yòo xyàn lezo' ñèe mèn gu' ante por cón chenen no maste. <sup>10</sup>Le'n huiza no le'n tiempa, anze'f thib mèn ryo xà' loo cón chenen. Ya ne'tolode yila's mèn loon. Le' sya, leque mèn co' ngro xà' loo cón chenen, leque mèn ta'xù' mèn co' ndxela's loon loo mèn co' nac mèn ye'rsin'. <sup>11</sup>Le'n huiza anze'f huax mèn gutyè' ryo xo'f loo mèn. Ta' mèn cuent no te'th mèn loo chol mèn le' mèn ngro' tee par tyoodi's mèn cón che'n Diox loo mèn. Tataa mod anze'f huax mèn quedii mèn, ne. <sup>12</sup>Láth ndxàc con'a, anze'f huax con' ye'rsin' gac loo mèn. Anze'f huax mèn ya ne'que'de lezo' mèn ñèe mèn xtàa mèn. Ndxè'leque', yòo xyàn lezo' mèn ñèe mèn xtàa mèn. <sup>13</sup>Per mèn co' thidtene mbli nèe lezo' no mbli nèe yéc par tolo queltàa mèn loo cón chenen axta gath mèn, mèn mblyá'que' loo con' ryes. <sup>14</sup>Le' cón che'n di's ndac co' ndlu' xá mod ndlya's Diox ñibe'pe'



Diox loo mèn na, yath yèn no co mèn yalbàn cón che'n di's ndac loo mèn rye nación co' nziri' dib athu loo izlyo' par de que ryete mèn naciona gòn cón che'n di's ndac no ta' mènna cuent cón che'n di's ndaca. Yiloa, syase lyux no lith no izlyo'.

<sup>15</sup> Gu' co' ndlab ye's, bìn gu' di's co' ngue niin loo gu' ndxè' no fta' gu' cuent cón nee di's ndxè' no ften' gu' cón nee di's ndxè'. Mbi' co' ngro' lèe Daniel co' mde'th di's co' ndxab Diox, Daniel mque' ye's loo libr co' nac xti's Diox cón che'n thib mbi' zab thib mbi' cap. Mbi'a aseli teza' mbi' cón che'n chol con' co' nac cón che'n Diox. Co'se' ñee gu' ndxàc con' ndxè' le'n templ che'n Diox, non gu' no nanee gu' ndxàcla xal mque' Daniel ye's. <sup>16</sup> Sya, huen gàca loo mèn chele' mèn co' nzo le'n yèzya' co' nac làaz mèn jude xyon' par co'te' ndub yii par ne'gàcte yaltii co' gàcque' loo gu', gu' co' nac mèn nación Israel. <sup>17</sup> Huen gàc loo mèn co' nzi yéc zote liz mèn chele' mènna, texal bilàa mènna yéc zotea, sangxyon' mèn no yende chó mport nzo lezo' mèn rye che'n mèn co' ndxàp mèn le'n nyòo par ne'yigaade mènna loo yaltii co' gàcque' loo gu', mèn nación Israel. <sup>18</sup> Lomisque' ne, mèn co' ngue zin' huan huiza, huen gàca loo mènna chele' mènna ne'ye'thte liz mèn huiza par co' mèn rye che'n mèn co' ndxàp mèn par ne'yigaade mènna loo yaltii co' gàcque' loo gu', mèn nación Israel. <sup>19</sup> Ay, prob rye mèngot izlyo', mèngot co' nzi nac xin' huiza. No ay, prob rye mèngot izlyo', mèngot co' nzi xèn' xin' huiza por cón che'n yaltii co' gàc loo gu', mèn nación Israel. <sup>20</sup> Gurez gu' Diox no bna'b gu' loo Diox le' tiemp co' xyon' mèn loo con' ryes no loo yaltii co' gàc huiza par ne'gàcte tiempa tiemp xil' no ne' ne' gàc huiz co' xyon' mèn huiz descans. <sup>21</sup> Tac co'se' gàc ryethe con'a, huiza anze'f thib yaltii tín' gàc le'n huiza loo mèn nación Israel. Yaltii co' gàc loo mènna tarte gàc dib lal mblec Diox izlyo' no mxèn' Diox izlyo'. No yiloa, thidtene ya ne'berede yaltii tín'a gàc yaltii tín'a tedib vez xal gàc yaltii tín'a huiza loo mèn nación Israel. <sup>22</sup> No chele' Diox ne'tedópte huiz tiempa, yende mod lyá' nec thib mèn. Per ndxe'leque', Diox tedóp huiz tiempa por nque' lezo' Diox ñee Diox mèn, mèn co' Diox mciui, mèn co' Diox mblo xà' par ngòo mènna loo cón che'n Diox.

<sup>23</sup> Le' sya, chele' chol mèn ñee loo gu': Hui' gu' nexa. Trè' nzo Crist; o chele' mèn ñee loo gu': Tua' nzo Crist, ne'yila'ste gu'i, ndee gu'. <sup>24</sup> Tac co'se' gàc huiza, anze'f huax mèn gutyè' ryo' no ryo xo'f mènna loo mèn. Nee mènna loo mèn le' mènna nac Crist. No ñee mènna loo mèn le' mènna nde'th di's co' gunii Diox. No li mènna huax yalguyze' roo no yalguyze' xèn co' nac señ co' hui' mèn no co' ñaa mèn. Per ryethe con' co' ñee mènna no co' li mènna nac yalgutyè'túb. No axta quedii mènna mèn co' ndxela's chele' mènna gác li mènna gan quedii mènna mèn. <sup>25</sup> Hui' gu' nexa. Fte' lezo' gu' le' daa guniile' con' ndxè' loo gu' ndoore' gàca loo gu', ndee gu'. <sup>26</sup> Cona, beren, ngue niina loo gu': Chele' mènna ñee loo gu': Hui' gu' nexa. Crist nzo co'te' nagán, ne'yade gu' tya. No chele' mènna ñee loo gu': Hui' gu' nexa. Crist nzo le'n quart ndxè', ne'yila'ste gu' con' co' ñee mènna loo gu'. <sup>27</sup> Tac co'se' gàc huiz co' galen, daa co' mbal yáal loo izlyo' ndxè' xal ndxáal chol mèn, setilte gàca xal co'se' ndlyàa bèel gundi co'se' ndxú' izlyo' par ned ndlyen huiz no par ned mbix huiz. <sup>28</sup> Cón che'n mèn gutyè' co' ngue tan cuent loo gu' nalle' nac xal co'te' nax thib má' ya's co'te' ndlyàa ngool loo má' ya's par hua ngool bél' má' ya'sa.

*Jesús ngue ta' cuent cón gàc co'se' yi'th Jesús.*

*(Mr. 13.24-37; Lc. 21.25-33; 17.26-30, 34-36)*

<sup>29</sup> Co'se' yilo riid rye huiz co' gàc rye yalnaxia loo mèn, tlo cuau loo huiz. Ne'teniide huiz loo izlyo'. Lomisque' ne, ne'teniide mbe' loo izlyo'. Le' mbyáaz co' nzi'f loo bé' na, tlo huin loo bé' axta tlo gáb che mbyáaz loo bé'. No ryethe con' co' nac con' roo no con' xèn loo bé' tlo huin no xi'th loo bé'. <sup>30</sup> Yiloa, axta syare' hui' gu' no yú' thib señ co' gàc cón chenen, daa co' mbal yáal loo izlyo' xalque' ndxáal chol mèn loo izlyo'. Le' mèn co' naban dib athu loo izlyo' na, mènna gón' co'se' hui' mènna loon, daa co' mbal yáal loo izlyo' ndxè' xalque' ndxáal chol mèn loo izlyo'. Con'a gàc loo mèn co'se' galen le'n xcuau co'se' gàpen rye loothe con' roo no con' xèn la's niin no la's yan. No hui' mènna co'se' gàc con' roo con' xèn loon. <sup>31</sup> Nibe'en loo angl huiza par cabii cuz angl trompet par thop angl

rye mèn co' naban dyap lad loo izlyo', co' nee di's, nac thib lad ro izlyo' axta tedib lad ro izlyo'.

<sup>32</sup> Bli gu' xtùuz cón che'n thib di's co' nde niin loo gu' co' ndlu' cón che'n yaa ngudyuug: Hui' gu' nexa. Co'se' ngolole' ngòb laa loo yaa ngudyuug no nde xiisle' laa yen' loo yaa ngudyuug, gu' nonque' no nda'que' gu' cuent nde zin' gaxle' tiemp co' nac tiemp bée co'se' más ndxàc ney' loo izlyo'. <sup>33</sup> Lomisque' nac con' co' ngue niin loo gu': Co'se' ñee gu' ndxàc ryete con'a, gu' nonque' no naneeque' gu' nde zin' gaxle' tiemp co' lyux izlyo' no lith no izlyo'. Setilte gac con'a xal thib mbi' co' ndoo ro ryo' liz mbi' par yòo mbi' liz mbi'. <sup>34</sup> Lìcpe' ba'i, na nii loo gu': Ryete con'a gacque' ndoore' lyux mèn nación Israel. <sup>35</sup> Ryethe con' co' nac cón che'n bé' no ryethe co' nac cón che'n izlyo', le'i lyuxque' no lith noi. Ya ne'tolode cue ryethe con'a. Per di's co' ngue niin loo gu' ndxè', di's ndxè' tyaaque', no gacque', no tyubque' di's cón che'n di's co' ngue niin loo gu' ndxè'.

<sup>36</sup> Per co'se' gac huiza no co'se' gacpe' hora, yende chó mèn izlyo' non chó huiz gaca no coyor gaca. Ne' ne' yub angl co' nzo loo bé', ne' ne' yub daa co' nac xgan'pe' Diox, nanee coyor gac con'a. Angoluxte Diox co' nac xuden nanee coyor gac con'a.

<sup>37</sup> Gacque' con'a xalque' ngòca co'se' ngulaa yuuloo tiemp co'se' ngo ban thib mbi' co' ngro' lèe Noé. Tataa gaca co'se' galen, daa co' mbal yáal loo izlyo' ndxè' xalque' ndxáal chol mèn. <sup>38</sup> Le'n tiemp co' ngo ban Noea no ndoore' lyàa yuuloo co' ngulaa, le'n tiempa mèn alithe ndxuhua no alithe ndxu mèn loo izlyo'. Ngure selya' mèn. Nda' mèn rsap mèn par nselya' rsap mèn le'n rye tiempa axta ngòo Noé le'n yòoyaa. <sup>39</sup> No axta ne' ne' inon mèn no ne' ne' inda' mèn cuent le' yuuloo lyàaque'. Ante co'se' mbyà'x xnii lezo' mèn le' yuuloo mtlolè' ndoo làa. Axta syare', ne' ne' ñee mèn cón li mèn. Ale mbeth yuuloo rye mèn. <sup>40</sup> Le'pe' co'se' gac huiz co' galena na, chop xa'bi' que zin' loo rsin' xa' huan. Thib xa' li Diox par yáp xa' loo bé'. Le' tedib xa' na, taate yan'. <sup>41</sup> Lomisque' ne, co'se' gac huiza, chop xa'got cue yu' loo yees. Thib xa', chàa, li Diox yáp xa' loo bé'. Le' tedib xa' na, taate yan'.

<sup>42</sup> Nalas gure gu' no gunee gu' xal nziri' gu' loo cón che'n Diox co' ndxela's gu'. Tac gu ne'ñeede no inonte gu', ne, coyor yi'th Tad Diox gu'. <sup>43</sup> Hui' gu' nexa, ey. Nde niin thib con' loo gu': Chele' thib mbi' co' nac gundan che'n thib yòo nanee coyor yál' lyàa huan' par li huan' huan' liz mbi', mbi' ne'gàtte. Ndxè'leque', tyub naa mbi'. No tataa mod ne'la'de mbi' yòo huan' liz mbi' par li huan' huan' che'n mbi' liz mbi'. <sup>44</sup> Cona, ngue niin loo gu': Nalas gure gu' no gunee gu' xal nziri' gu'. No bli nab gu' gu' loo cón che'n Diox. Tac thib huiz co'se' ingue lide gu' xtùuz cón che'n Diox pól galen, chàa, ñee gu' no ta' gu' cuent le' daa ndale' loo mbii loo bé' loo gu', daa co' mbal yáal loo izlyo' ndxè' xalque' ndxáal chol mèn.

*Jesús ngue ta' cuent loo mèn cón che'n chop moz: Thib moz altant mdoo loo zin'. Le' tedib moz na, ngòc moz za'f, moz ye'rsin'.*

*(Lc. 12.41-48)*

<sup>45</sup> Nde niin tedib di's loo gu', ne: Cón che'n con' co' gac loo mèn co'se' galen loo izlyo' ndxè' tedib vez nac xal ndxàc loo moz co' ngue no thib patrón. <sup>46</sup> Huen nda moz co' mtan' no patrón liz patrón chele' moz huenque' ngue li zin' co' ndxàalque' li moz co'se' zin patrón liz patrón. <sup>47</sup> Lìcpe' ba'i, na nii loo gu': Le' patrón ñibe' loo moz par gac moz thib mandador par tyoo naa moz loo zin' no quenap moz ryethe con' co' ndxàp patrón liz patrón. <sup>48</sup> Per chele' moza nac thib moz ye'rsin' no gab moz le'n lezo' moz: Aa'a. Patrón daa lyen'. Ne'ye'thgaade patrón daa. <sup>49</sup> Le' sya, por ne'ye'thgaade patrón moz, tlo moza, tetii moza xtàa moz. No que tee no moz mènnguy. Que tee yuhua moz. Que tee yu moz con mènnguya. <sup>50</sup> Le' sya, láth tataa ngue tee moz, chàa, mzin patrón moz thib huiz co' indlide moz xtùuz le' patrón zin no zin patrón thib hor co' indlide moz xtùuz zin patrón no co' inonte moz. <sup>51</sup> ¿Xá nee gu'? ¿Cón li patrón con moza, sya? Tetii patrón moza axta plóthe no co' patrón moza loo rsin' patrón, ¿lé'? Por cona, thib lite tel' patrón moz par

bii moz ye'rbiiil co'te' ndxetoo bèel no ndxetoo quii par yòo no moz mèn co' ntembii ro no co' ntembii xti's tya.

## 25

*Jesús ngue ta' cuent loo mèn cón che'n si' myen'got yèn' no thib mbyòo co' selya'.*

<sup>1</sup> Cón che'n xá mod altant ndxáal cue mèn loo mod co' ndlya's Diox ñibe'pe' Diox loo mèn, mènna nac xal si' myen'got yèn' co' nde tan cuent loo gu' ndxè'. Ngòc thib con' loo rye si' myen'gota. Ngro' myen'. No mbe' myen' candil aceit myen' par ngua myen' liz thib mbyòo par lyath no myen' mbyòo co' mselya' liz mbyòo. <sup>2</sup> Ga'y myen'gota ngòc lijer. Le' taaga'y myen'gota na, ale msyen. <sup>3</sup> Co'se' ngro' myen'got co' msyena, ne'nghue'de myen'got aceit par sè myen'gota candil myen'gota co'se' nquin myen'a aceit. <sup>4</sup> Le' taaga'y myen'got co' ngòc lijera na, mte'que' lezo' myen' mbe' myen' bote che'n aceit par tolo sè myen' candil myen' co'se' gáal hor naquin myen' candil myen'. <sup>5</sup> Nde nxon', mbyòo co' mselya'a mblyen'. Ne'nzin'gàade mbyòo liz mbyòo yál'a. Le' myen'gota na, láth nzi bed myen' yál'a par zin mbyòo co' mselya'a, ale mxen mcal' myen'. Taate mblá' myen' candil myen' con xnii. Ne'ntu'de myen' candil myen'. <sup>6</sup> Per casque' co'se' nde yál' gulal yál' cabii ngrozèe thib mèn co' mbez: Ndye'thle' mbyòo co' mselya'a, ey. Gro' gu' par ya càa ned gu' mbyòo. <sup>7</sup> Sya, ngo che ryete myen'gota. No mbli nab myen' candil myen'. <sup>8</sup> Per ga'y myen'got co' ngòc myen'got nasana ndxab loo taaga'y myen'got co' ngòc más lijera: Cara, techè gu' chu'th aceit gu' loo nu' par co nu' aceit candil nu'. Tac candil nu' ngue yu'le' xnii. <sup>9</sup> Le' sya, ga'y myen'got co' ngòc lijera mcàb loo taaga'ya myen'got co' ngòc myen'got nasana. Ndxab myen'gota: Ne'techède nu' aceit nu' loo gu', cara, tac yíloa ne'gàalta par nu' no ne'gàalta par gu', ne. Más huen huàa gu' co'te' ntho' mèn aceit. Fxi' gu' aceit co' nquin gu' tya. <sup>10</sup> Per láth nda ti' myen'got co' msyena aceit myen', mzin mbyòo co' mselya'a. Le' taaga'y myen'got co' ngòc lijera na, altantleque' nziri' myen' tac mbli nabque' myen' candil myen'. Sangngòo no myen' mbyòo le'n nyòo loo yalhua co' ndxàc por mselya' mbyòo. Sya, mbli mbyòo mandad mbyau' ro ryo'. <sup>11</sup> Ngoloa, mzin taaga'y myen'got co' ngòc myen'got nasana. Ndxab myen' loo mbyòo co' mselya'a: Tad, fxal' U' puert par yòo nu'. <sup>12</sup> Mbyòo mcàb loo myen'a. Ndxab mbyòo: Lìcpe' ba'i, daa indlibede gu'.

<sup>13</sup> Ngoloa, sya, ndxab Jesús loo myen' xin' mté'th Jesús:

—Nalas gure gu', ey. Leque gu' ñee xal nziri' gu' loo cón che'n Diox. Gòc gu' xal mèn co' nzi naa tac gu' inonte. Ne' ne' inda' gu' cuent chó huiz galen no coyor galen, daa co' mbal yáal loo izlyo' ndxè' xal ndxáal chol mèn loo izlyo'.

*Jesús ntetac di's cón che'n thib loo tmi co' lèe talent loo mèn.*

<sup>14</sup> Nde niin tedib con' loo gu', ne: Cón che'n mèn co' ndyubdi's ndac no cón che'n mèn co' indyubdi's ndacte co'se' ñibe'pe' Diox loo mèn, mènna nac xal moz con thib mbi' co' nac patrón. Pues co'se' nda ro' mbi' liz mbi' no làaz mbi' par ya mbi' tedib nación co' nziri' tith, co'se' yamerle' ryo' mbi', ngurez mbi' moz mbi' par càaya' moz mbi' tmi par li moz zin' con tmi co' tan' no mbi' moz.

<sup>15</sup> Loo thib moz mbi' mda' mbi' casque' ga'y mil pes. Le' loo tedib moz mbi' na, mda' mbi' casque' chop mil pes. Le' loo tedib moz na, mda' mbi' casque' thib mil pes. Ngolo mtan' no mbi' moz tmi, xalque' nda' mbi' cuent no ñee mbi' xal ndli moz zin' no xal nzo moz, mxen mbi' ned. Nda mbi' tedib nación. <sup>16</sup> Le' sya, moz co' mbyan' no ga'y mil pes, mtlo moz, mbli moz zin' con ga'y mil pesa. Ale mbli moza gan taaga'y mil pes. <sup>17</sup> Lomisque' ne, loo tedib moz co' mtan' no mbi' taachop mil pes, moza, ne, mbli gan taachop mil pes loo chop mil pes co' mtan' no mbi' moz. <sup>18</sup> Per loo moz co' mtan' no mbi' thib mil pesa, moza quej quej mblosua' thib mil pes che'n mbi' le'n thib ye'r co' mden' moz loo yòo.

<sup>19</sup> Pues ngolo nguri'th huax tiemp. Yende mbi' co' nac patrón moza. Per mzin thib huiz mzin mbi' loo moz tedib vez. Sya, mbli mbi' cuent con moz mbi' par ñee mbi' ñeene' plá pes mbli thib thib moz gan loo tmi co' mtan' no mbi' moz. <sup>20</sup> Mzin ner moz co' mbyan'

no ga'y mil pes loo mbi'. Ndxab moz loo mbi': Tad, aa U' ga'y mil pes co' mtan' no U' daa thib cua'a co'se' mdee U'a. No aa U' taaga'y mil pes co' mblin gan con ga'y mil pes co' mda' U' loon, ne. <sup>21</sup> Ndxab mbi' loo moz: Huen zyax. Huenque' mblil, ey. Lùu nac thib moz ndac. Anze'f altant mdool loo zin' co' mblil. Pues ya que altantleque' mdool loo zin' co' mblil con ndxepete tmi co' mtan'en lool, tan lugar ñibe'l loo huax con'. Que de par yòo nol daa no tyac lezo'l con daa. <sup>22</sup> Ngoloa, mzin moz co' mtan' no mbi' taachop mil pes loo mbi'. Ndxab moza loo mbi': Tad, aa U' chop mil pes U' ndxè'. No aa U' taachop mil pes co' mblin gan loo chop mil pes co' mtan' no U' daa. <sup>23</sup> Mbi' ndxab loo moz: Huen zyax. Huenque' mblil, ey. Lùu nac thib moz ndac. No anze'f altant mdool loo zin' co' mblil. Pues ya que altantleque' mdool loo zin' co' mblil con ndxepete tmi co' mtan'en lool, tan lugar ñibe'l loo huax con'. Que de par yòo nol daa no tyac lezo'l con daa. <sup>24</sup> Per co'se' mzin moz co' mtan' no mbi' thib mil pes, moza ndxab loo mbi': Tad, daa nanee le' U' nac thib patrón nala's no nac U' thib patrón nayi'. No nthop U' cosech co'te' ingode U' bin. No ndláp U' co'te' tarte co U' nec thib quèe bin. <sup>25</sup> Por cona, mzyeb daa ñèen U'. Ale ngua teyòoen tmi U'. Aa U' tmi U' ndxè'. <sup>26</sup> Mbi' mcàb loo moza. Ndxab mbi': Aa, moz ye'rsin', moz za'f. Chele' lùu nda' cuent no naneel le' daa nthop cosech co'te' ingoden bin no ndlápén co'te' tarte gon nec thib quèe bin, <sup>27</sup> chele' lùu nanee tataa nac daa, más quee lezo'l nga la'l tmi daa loo banc. Le' sya, co'se' beren galen, nga lo'en tmi daa loo banc nazal' xin' tmi daa co' mbli tmi daa gan. <sup>28</sup> Sya, ndxab mbi' loo taamas moz co' nzi tya: Fteche gu' thib mil pes co' ngue no moz ba'. Fta' gu'i càa moz co' ngue no si' mil pes. <sup>29</sup> Mèn co' ngue no ndxep tmi no huen ndli mèn zin' con tmii par tataa mod li mèn gan más tmi, mèn que no más tmi. Per mèn co' ngue no ndxepete tmi no ihuente ndli mèn zin' con tmia, mèn tuhuan tmi co' mque no mèn. No yilóa yan' mèn nague's nii mèn no nague's ya' mèn.

Cona nee di's, mèn co huen huen nxo'f zin' cón che'n zin' co' mxo'f zin' Diox loo mèn xalque' mbli Diox par ndxác mèn, mèn nzi tee ndacque' loo cón che'n Diox. Per mèn co' inxo'f zin' ndacte loo cón che'n Diox, xal ndlyath no Diox mèn par li mèn zin' co' mxo'f zin' Diox loo mèn, Diox li par ne'gácte mèn xo'f zin' ndac mèn cón che'n Diox thidtene. No yilóa tetii Diox mèn axta plóthe.

<sup>30</sup> Le' mbi' co' nac patrona na, tolo ndxab loo moz: Fxen gu' moz co' yende chó juis ba'. Be' gu' moz za'f ba'. Càa moz ba'. Blo' gu' par fuer. Huàa tyee gu' moz ba' thib lad loon co'te' nacua' thidtene co'te' gón moz no co'te' hua le moz thidtene tac axta arid nè ten' moz gác yaltii loo moz tya.

Tolo ndxab Jesús: Tataaque' gàca loo gu', ne, co'se' galen loo izlyo' ndxè' tedib vez.

*Jesús tub rez cón che'n mèn ryethe nación co'se' gác huiza.*

<sup>31</sup> Sya, ndxab Jesús:

—Co'se' galen loo izlyo' ndxè' tedib vez, daa co' mbal yáal loo izlyo' ndxè' xalque' ndxáal chol mèn, par gal ñibe'en loo mèn, galen làth thib baan angl. Yilóa tu'ben par ñibe'en loo ryethe con' par xyo'f lèe xyo'f xti's daa no gác con' roo no con' xèn loon thidtene. <sup>32</sup> Huiza hidte queltàan mèn co' nac mèn rye nación co' nziri' dib athu loo izlyo' loon par co' xà'en thib ned mèn loo tedib ned mèn xal ndli pastor co'se' ngo' xà' pastor mbacxil' làth chiv. <sup>33</sup> Huiza cuequen mèn co' nac xal mbacxil' loon cuaten co' nac ladli. Le' mèn co' nac xal chiv loon na, cuequen mèn cuaten co' nac lad rebes. <sup>34</sup> Sya gaben, daa co' nac rey tiempa, loo mèn co' nziri' cuaten co' nac ladli: Que de gu' loon, ey, gu' co' mblolé' Diox xuden cuent nac gu' mèn ndac no cón che'n gu' Diox gunii di's ndac. Gu' tlo ñibe' no Diox loo cón che'n Diox co' mbli nab Diox par ñibe' no gu' Diox. Ndoore' cobe' Diox no toxcua' Diox loo izlyo', Diox mnibe' lezo' no mdoo lezo' Diox ñibe' no gu' Diox loo ryethe con' yilóa. <sup>35</sup> Tataa mnibe' Diox loo lezo' Diox li Diox tac co'se' mque tee lan'en, mda' gu' thib le' rol luan nduhuan. Co'se' mque tee yec lezon, mda' gu' chu'th nít gun. Co'se' mque tee'en xal mèn tith làaz gu' no loo gu', gu' mda' liz gu' nguleden. <sup>36</sup> Co'se' mque tee'en ngox mdyal xaben, gu' mda' xaben par mdoquen. Co'se' mxac lenen, gu' mbi'th too naa daa co'te' naxen. Co'se' mque'en lezi'f, mbi'th toodi's no

gu' daa ro lezi'f. <sup>37</sup> Huiza ñee mèn co' daa mdyal no co' daa mda' lugar par ngòo mèn loo cón chenen: Tad, ¿pól gunèe nu' U' le' U' mque tee lan' no mda' nu' thib le' rol yèth par nduhua U', à'? No ¿pól gunèe nu' U' le' U' mque tee yec lezo' no mda' nu' chu'th nít ngu' U', à'? <sup>38</sup> ¿Pól gunèe nu' U', mque tee U' xal mèn tith no mda' nu' liz nu' nguled U', à'? ¿Pól gunèe nu' mque tee U' ngox mdyal tab U' no mda' nu' xab U', ne, à'? <sup>39</sup> No ¿pól gunèe nu' U' mxac len U' no pól gunèe nu' U' mque U' lezi'f no ngua toodi's no nu' U' ro lezi'f, à'? <sup>40</sup> Le' sya, daa co' nac rey tiempa, daa càb loo mènà: Licpe ba'i, gu' ne'nglide rye con'a loon. Per chele' gu' mbli rye con'a loo chol mèn co' ndxàc hues xtàan por ndxela's mènà loon, daa ngo cuent loope'en mbli gu' rye con'a.

<sup>41</sup> Sya, daa co' nac rey tiempa, daa càb loo mèn co' cue cuaten lad rebes: Biiche gu' loon, gu' co' nac mènèe too ze too yál'. Gu' lyàa loo quì co'te' ne'yu'de bèel no quì co'te' ngòc nab par lyàa Mebizya no meexù' co' nac che'npe' Mebizya. <sup>42</sup> Tac co'se' mblyan' daa, ne'nda'de gu' thib le' rol yèth nghuan. Co'se' mque tee yec lezon, ne'nda'de gu' ne' chu'th nít ngun. <sup>43</sup> Ngòc daa xal mèn tith loo gu'. No ne'nda'de gu' liz gu' par mbeden. Ngòc falt xaben loon. Gu' ne'nglatte lezo' ngnèe gu' daa. Ne'nda'de gu' thib ned xab gu' par ngoquen. Mxac lenen. Ne'ngui'th too naade gu' daa. Mque'en lezi'f. Ne'ngui'thte gu' par ngtoodi's no gu' daa ro lezi'f. <sup>44</sup> Le' sya, mènà ñee loon, daa co' nac rey tiempa: Tad, ¿pól gunèe nu' le' U' mque tee lan', no mque tee yec lezo' U', no ngòc U' xal mèn tith, no mque tee U' yende xab U', no mxac len U', no mque U' lezi'f no ne'nglyath node nu' U', à'? <sup>45</sup> Le' sya, daa co' nac rey tiempa, daa càb loo mènà. Gaben: Lìcpe' ba'i, na ngue nii loo gu': Chele' gu' ne'nglide chol con' co' nac co' ngue niin loo gu' ndxè' loo mèn prob co' ndxàc hues daa no co' ndxàc xtàa daa, daa ngo cuent ne'nglide gu' con'a loon. <sup>46</sup> Mèn ye'rsin'a yò co'te' tyactii mènà thidtene. Le' mèn co' daa mdyal no co' daa mda' lugar yò mènà loo cón chenen na, mènà yò ban no daa thidtene.

## 26

*Mèn ngue toxcu'a no ngue go be' mèn no ngue li mèn xtùuz xá mod tyenxù' mèn Jesús.*

*(Mr. 14.1-2; Lc. 22.1-2; Jn. 11.45-53)*

<sup>1</sup> Co'se' ngolo mdoodi's Jesús rye di'sa loo mèn co' nziri' loo Jesús, Jesús ndxab loo myen' xin' mté'th Jesús:

<sup>2</sup> —Gu' neeque' no nonque' gu' taachopte huiz no maste ndxàc falt gàc lni pasc. Le'n huiz lnia tyenxù' mèn daa, daa co' mbal yáal loo izlyo' xal ndxáal chol mèn, par que' mènà daa loo thib cruz.

<sup>3</sup> Le' sya, mèn co' nac jef co' más mnibe' loo nguley', no mèn co' na maistr co' ndlu' ón che'n ley co' mxo'f Moisés loo mèn, no mèn gool co' ñibe', no mèn co' ndyoo ner, no co' ndyoo naa, loo mèn nación Israel, rye mènà thidte mqueltàa loo lue' che'n palas co' nac liz Caifás co' nac jef co' más ñibe' loo rye nguley' tiempa. <sup>4</sup> Liz mbi' co' lèe Caifasa, tya mdoodi's rye mènà no mblo xnee mènà xá mod yigaaxù' Jesús loo mènà con purte yalgutyè' par guth mènà Jesús. <sup>5</sup> Per mbez mènà loo xtàa mènà:

—Más huen ne'guthte na' mbi' le'n huiz lni par ne'tezebte na' mèn co' yi'th lni par ne'tyub bènte lezo' mènà no yiloo yecloo mènà loo na'.

*Trè' ndlu' cón che'n thib xa'got co' mblath aceit co' anze'f nix ndlya' yéc Jesús.*

*(Mr. 14.3-9; Jn. 12.1-8)*

<sup>6</sup> Láth ndyoodi's mènà, Jesús ngo yèez Betañ liz thib mbi' co' lèe Mon co' mxac thib yíiz co' nac yíiz ndxa's co' nteya's no co' nteyèe yid lad mèn. <sup>7</sup> Tya mbii gax thib xa'got loo Jesús. Xa'gota nde no thib frasc co' natoxcua' con thib loo quèe huen co' lèe alabastr. Le'n frasca nzo thib loo aceit co' anze'f nazi' ndlya'. No anze'f náp ntac aceita. Láth co'se' ndub Jesús loo mes, xa'gota mbii gax loo Jesús. Mblath xa'gota aceit co' nzo le'n frasca yéc Jesús. <sup>8</sup> Per co'se' ñèe myen' xin' mté'th Jesús ngue li xa'gota con'a loo Jesús, ale ngocloo myen'. No mtlo myen'. Mbez myen' loo xtàa myen':



—¿Chonon ale ngue teza'xù' xa'gota aceit ba', yoo? <sup>9</sup>Nzoque' mod ntho' xa'gota aceit ba' par ryo' tmi loo aceit. Le' sya, que no xa'got huax tmi par ta' xa' tmi loo mèn prob co' naquin tmi.

<sup>10</sup>Jesús mbìn di's co' mdoodi's myen'a. Sya, ndxab Jesús loo myen':

—¿Chonon ngue li xol gu' xa'got ndxè' no ngue tethon gu' xa', à'? Con' co' ngue li xa'got ndxè' loon nac thib con' ndac. <sup>11</sup>Por part cón che'n gu', gu' thidteneque' yo ban no mèn co' ndxàc hues gu' no mèn co' ndxàc xtàa gu' co' nac mèn prob. Per part cón chenen, gu' ya ne'tolode yo no daa nen tiemp loo izlyo' ndxè'. <sup>12</sup>Tac con' co' ngue li xa'got ndxè' loon, xa' mblath aceit co' anze'f nazi' ndlya' ba' laden. Xa' mblath aceit laden par ne'yitooode xla' laden co'se' ya ca's mèn daa. <sup>13</sup>Lìcpe' ba'i, na ngue nii loo gu', ey: Pál co'te' co' mèn yalbàn cón che'n di's ndac no te'th mèn cón che'n di's ndac par non mèn xá mod lyá' mèn loo con' ryes loo mèn co' nziri' dib athu loo izlyo', gòn mèn con' co' mbli xa'got ndxè' loon par te' lezo' mèn no ta' mèn cuent cón che'n con' mbli xa'got ndxè' loon.

*Trè' ndlu' le' Jud mcua'n mód par mda'xù' Jud Jesús loo mèn co' ngòc ngolo ngola's che'n Jesús. (Mr. 14.10-11; Lc. 22.3-6)*

<sup>14</sup>Látha, xexte ngro' thib mbi' co' ndxàc xin' mté'th Jesús co' ngro' lèe Jud Iscariot. Ngua toodi's no Jud mèn co' ngòc jef che'n nguley' tiempa. <sup>15</sup>Ndxab Jud loo mèn co' ngòc jef che'n rye nguley':

—¿Plál quix gu' càan chele' daa lu' Jesús loo gu' no cuanen mod taxù'en Jesús loo gu', à'?

Sya, mènà mdix gal psi' pes plat loo Jud par li Jud con' ye'rsin'a. <sup>16</sup>Desde hora, mcua'n Jud mod ñeene' xá mod li Jud par ta'i thib lugar loo Jud par ta'xù' Jud Jesús loo mènà.

*Trè' ndlu' le' Jesús nduhua rsè no myen' xin' mté'th Jesús. (Mr. 14.12-25; Lc. 22.7-23; Jn. 13.21-30; 1 Co. 11.23-26)*

<sup>17</sup>Co'se' ngòc ner huiz co' nac huiz lni, co' nee di's, huiz vispr co' ngòc huiz co' ndxuhua mèn nación Israel pan co' ingode mèn dii levadur, huiza mnibdi's myen' xin' mté'th Jesús loo Jesús. Ndxab myen':

—Tad, ¿pá ndlya's U' ya li nab nu' no ya toxcu' nu' con' hua rsè na' co' nac xít mèn no lua' mèn co' ndxuhua mèn co'se' ndxáal lni pasc, à'?

<sup>18</sup>Jesús ndxab loo myen':

—Huàa gu' le'n ciuda Jerusalén ba'. No yòo gu' liz thib mbi'. Gab gu' loo mbi'a: Maistr gunee loo nu' par gab nu' lool no ta' nu' cuent cón che'n di's ndxè' lool. Maistr gunee: Nde zin' gaxle' hor co'se' tyactiin. No nalle' ndlyazen ta'l lizl par gac nab xít mèn no lua' mèn par hua rsè'en co' nac cón che'n lni pasc con myen' xin' mté'th daa.

<sup>19</sup>Sya, ngua li myen' xin' mté'th Jesús xalque mnibe' Jesús loo myen' li myen'. Sya, mtocua' myen' rsè co' hua rsè no myen' Jesús co' nac cón che'n lni pasc.

<sup>20</sup>Co'se' ngulàa yál' izlyo' huiza, Jesús mdub no ryete si' fchop myen' xin' mté'th Jesús loo mes. <sup>21</sup>Láth nzi yuhua rsè no Jesús myen', ndxab Jesús loo myen':

—Lìcpe' ba'i, na ngue nii loo gu': Thib gu' co' nzo làth na' ndxè' cua'n mod xexte ta'xù' gu' daa loo mèn co' nac ngolo ngola's chenen.

<sup>22</sup>Sya, ryete myen' xin' mté'th Jesús anze'f ngure xi lezo'. Mtlo myen', mnibdi's thib thib myen' loo Jesús. Mbez myen':

—Tad, ¿ché' ne'stolque' daai, cà'? ¿Ché' ne'stolque' daai, cà'?

<sup>23</sup>Jesús mcàb. Ndxab Jesús loo myen':

—Thib gu' co' ngue yuhua no daa thidte yen', gu'a ta'xù' daa loo mènà. <sup>24</sup>Daa co' mbal yáal loo izlyo' xalque' ndxáal chol mèn, loon gacque' ryethe con' ryes xalque' mbez di's co' ndub loo libr co' nac xti's Diox. Per ay, prob mbi' izlyo'. Mandit mbi' too ze too yál', mbi' co' ta'xù' daa loo mèn co' nac ngolo ngola's chenen. Más huen ngàca loo mbi' thidtene ne'ngáalte mbi' loo izlyo' ndxè' leque ta'xù' mbi' daa loo mènà.

<sup>25</sup>Sya, Jud co' mda'xù' Jesús loo mènà ndxab loo Jesús:

—Maistr, ne'stolque' ngue lil cuent daa taxù' lùu loo mèn, cà'?

Jesús mcàb loo Jud. Ndxab Jesús:

—Aa. Lùui, pues.

<sup>26</sup> Láth nzi yuhua myen' xin' mté'th Jesús con Jesús, Jesús mxen pan. Ndxab Jesús loo Diox: Diox quix U', Diox. Ngoloa, mbli rol Jesús pan. Mda' Jesús pan loo myen'. Ndxab Jesús loo myen':

—Dhua gu' pan ndxè', ndee. Pan ndxè' nac cón che'n bél'yòo laden co' gath por cón che'n rye mèn.

<sup>27</sup> Ngoloa, mxen Jesús thib vas vin. Ndxab Jesús:

—Diox quix U', Diox, loo Diox.

Ngoloa, mteri'th Jesús vas vin loo myen' xin' mté'th Jesús. Ndxab Jesús:

—Gu ryete gu' thib ro thib ro vin co' nzo le'n vas ndxè'. <sup>28</sup> Tac vin ndxè' nac cón che'n ren laden co' xyo loo izlyo' par li nèn tedib conveñ co' gac thib conveñ cub yiloo. Xyo ren laden loo izlyo' por cón che'n huax mèn par tataa mod, mèn co' yila's cón chenen, mèn tyon' xquin no tyon' xtol mèn. <sup>29</sup> Per daa ngue nii loo gu': Desde nalle', ya ne'bereden gun nít uv co' nda' lus uv loo izlyo' ndxè'. Na bere gu nít uv co' nda' lus uv con gu' co'se' ñibe'pe' xuden Diox loo mèn co' ngòole' loo cón che'n Diox por cón chenen.

*Jesús ngue ta' cuent loo Pedr le' Pedr cà di's Jesús.*

*(Mr. 14.26-31; Lc. 22.31-34; Jn. 13.36-38)*

<sup>30</sup> Le' sya, ngolo mbil'ro myen' xin' mté'th Jesús thib himn con Jesús, nda no Jesús myen' loo thib yii co' lèe yii che'n yaa oliv. <sup>31</sup> Tya, ndxab Jesús loo myen' xin' mté'th Jesús:

—Ryete gu' anze'f xi lezo' yál' ndxè', no tyoo xà' lezo' gu' no ya ye'th lezo' gu' por cón chenen yál' ndxè'. Gàca loo gu' tataa tac loo libr co' nac xti's Diox ndub di's co' ndxab:

Daa guth pastor. Le' partid mbacxil' co' ngue tee no pastor na, rye's pál.

<sup>32</sup> Per co'se' yilo ryo xban daa, daa ga ner loo gu' le'n thib yèez co' nac yèezya' che'n làaz mèn galile par zyál' na' tya.

<sup>33</sup> Sya, mcàb Pedr loo Jesús. Ndxab Pedr:

—Mastale' ryete myen' xi lezo' no tyoo xà' lezo' myen' nal yál' por cón che'n con' ryes co' gac loo U', na ne'xide lezo' no ne' ne' tyoo xà' lezon co'se' gac cón gac loo U', Tad.

<sup>34</sup> Per Jesús ndxab loo Pedr:

—Pedr, licpe' ba'i, na ngue nii lool: Ndoore' lé' nguiidtee yál' nal yál', lùu cà di's daa son vez loo mèn.

<sup>35</sup> Pedr mcàb. Ndxab Pedr loo Jesús:

—Mastale' no daa gath con U', per par cà dizen U', daa ne'cà di'ste U' loo mèn.

No ale ryete myen' xin' mté'th Jesús, leque di'sa ndxab myen' loo Jesús.

*Trè' ndlu' le' Jesús ngurez Diox co'te' nac thib huert co' lèe Getsemaní.*

*(Mr. 14.32-42; Lc. 22.39-46)*

<sup>36</sup> Ngoloa, ngua no Jesús myen' xin' mté'th Jesús thib lugar co' lèe Getsemaní. Ndxab Jesús loo myen' xin' mté'th Jesús:

—Trè' gaate ftub gu' láth nda bezen Diox tua'.

<sup>37</sup> Ante mbe' Jesús Pedr no ryop hues myen' co' nac xgan' thib mbi' co' lèe Zebede ndxepete más delant co'te' ngurez Jesús Diox. Tya, mtlo Jesús, mxi lezo' Jesús. No naxut naxut mtlo gunaa loo Jesús. <sup>38</sup> Sya, ndxab Jesús loo Pedr no loo ryop hues myen' xgan' Zebede:

—Nase nxyon' lezon. No nden'en le' daa gath por ne'xecte daa nal yál', ndyaquen, ey. Trè' gaate byan' gu' no gure naa gu' con daa. Ne'gátte gu'.

<sup>39</sup> Ngoloa, ngua Jesús taachu'thte más delant loo myen'. Tya, mdub xib Jesús. No mcotloo Jesús loo yòo. Ngurez Jesús Diox. Ndxab Jesús:

—Diox, U' co' nac xuden, chele'i nzo mod, bli U' ne'gacte arid nè yaltii co' gac xal thib preb loon le'n huiz ndxè'. Indlyasten gaca loon xal neete lezon. Ndxle'leque', ante gaca loon xal neepe' lezo' U'.

<sup>40</sup> Co'se' mbye'th tee hui' Jesús máa Pedr con ryop hues myen' co' nac xgan' mbi' co' lèe Zebede co'te' mtan' Jesús Pedr con myen', ale le'le' nzi yàt myen'. Sya, ndxab Jesús loo Pedr:

—Pedr, ¿ché' ne'nglide gu' gan mbe naa gu' con daa nec thib hor, cà'? <sup>41</sup> Gure naa gu', yey. No gurez gu' Diox par ne'ta'de Diox lugar loo gu' ne'aselide gu' cua'n gu' xquin gu'. Lìcpe' ba'i, xtùuz gu' no lezo' gu' anze'f ndlya's le' gu' cues Diox. Per bél'yòo lad gu' ba' ndli nden' gu' ngo zan gu'. No ngulàa fuerz gu'. Por con'a, ale mbuu's gu' nzi gu'.

<sup>42</sup> Mbryop vez mbere Jesús. Nda Jesús leque tya. Ngurez Jesús Diox taandxè':

—Diox, U' co' nac xuden, chele' yaltii co' gac loon yende mod riid tua'te, gaca loon xal neepe' lezo' U'.

<sup>43</sup> Mbere Jesús. Ndye'th Jesús tedib vez co'te' mtan' Jesús Pedr con taachop myen'a. Lomisque', ñèe Jesús nzi yàt myen' tac ngudloo myen' ya ne'xecte tant thib mcal' nzo loo myen'. <sup>44</sup> Taate mblá' Jesús myen'. Mbyon vez mbere Jesús, nda Jesús par ngurez Jesús Diox tedib vez. Leque di's co' ndxab Jesús ndoore' ndxab Jesús tedib vez loo Diox.

<sup>45</sup> Ngoloa, mbere Jesús, ndye'th Jesús tedib vez loo myen' xin' mté'th Jesús. Ndxab Jesús loo myen':

—Nase bli gu' descans no bdàt gu'. Ya mzinle' hor co' ta'xù' thib mbi' daa loo mèn co' ncu'a'n xquin no xtol, daa co' mbal yáal loo izlyo' ndxè' xalque' ndxáal chol mèn. <sup>46</sup> Jer goo too gu'. Ya' gu' ndyàa na'. Mbi' co' ta'xù' daa loo mèn, mbi' nzole' ned, nde mbi'.

*Trè' ndlu' le' mèn ye'rsin' mxenxù' Jesús xal thib pres.*

*(Mr. 14.43-50; Lc. 22.47-53; Jn. 18.2-11)*

<sup>47</sup> Tatabe' ngue toodi's Jesús co'se' gunèe Jesús le' Jud co' ndxòo cuent nac si' fchop myen' xin' mté'th Jesús ngro zi'fle' nde con huax mèn. Ale nzo spad no nzo yaa ya' mèn. Nde mèn con Jud. Rye mèn nde por mnibe' mèn co' nac jef che'n nguley' no por mnibe' rye mèngool co' ñibe', no co' ndyoo ner, no co' ndyoo naa loo mèn nación Israel. <sup>48</sup> Le' Jud co' mblu'xù' Jesús no co' mda'xù' Jesús loo mèn na, Jud mbli thib con' con mèn ndoore'. Ndxab Jud loo mèn:

—Mbi' co' seron cuat, mbi'a nac Jesús. Luega tyen gu' mbi' no bli gu' segur mbi' co' huen huen.

<sup>49</sup> Sya, mbii gax Jud loo Jesús. Mde's Jud yen Jesús. No msero Jud cuat Jesús. Ndxab Jud:

—San, Maistr.

<sup>50</sup> Jesús mcàb loo Jud. Ndxab Jesús:

—Amiu, ¿chó zin' ndel, à'?

Sya, mbii gax mèn loo Jesús. Mxen mèn Jesús. Mbe' mèn Jesús xal ndxe' mèn thib pres.

<sup>51</sup> Láth ndxàc con'a, thib mbi' co' nac xin' mté'th Jesús ngua ya' rlan'. Mdo'f mbi' spad le'n cubiert. Chàa, mblàa mbi' thib ya' spad nza thib moz co' nac moz che'n nguley'. Ale mcho' mbi' nza moz. <sup>52</sup> Sya, ndxab Jesús loo mbi' co' ngòc xin' mté'th Jesús:

—Blosua' spadl le'n cubiert. Tac ryete mèn co' ndxuth xtàa con spad, leque loo spad ya mèn looi, ne. <sup>53</sup> ¿Ché' inontel no ché' tarte ta'l cuent le' daa nzoque' mod bez Diox co' nac xuden no nzoque' mod ña'ben loo Diox co' nac xuden tel' Diox masre' thap gal mil solndad co' nac angl par tí' no làa angla daa la's ya' mèn ndxè', cà'? <sup>54</sup> Per chele' daa tataa li, ¿xá mod gacque' no xá mod tyaaque' di's co' ndub loo libr co' nac xti's Diox co' mbez no co' ndlu' taandxè'que' ndxáal gaca loon, sya?

<sup>55</sup> Ngoloa, ndxab Jesús loo mèn:

—¿Ché', lìcque', co'se' ngro' gu' mxen gu' spad no mxen gu' yaa par tyen gu' daa xal thib mbi' co' nac xal thib huan', cà'? Gu' nda'que' cuent no ndlibe'que' gu' daa le' daa mdubque' làth gu' le'n templ atate huiz par mblu'en gu'. No ne'nglide gu' ryes nden gu' daa xal ndyen mèn thib huan' xal ngue ten gu' daa nalle', ¿lé'? <sup>56</sup> Per ndxàc ryete con'

ndxè' loon nalle' par gàcque' no tyaaque' xalque' mbez di's co' ndub loo libr co' nac xti's Diox co' mque' mèn co' mde'th di's co' ndxab Diox ye's cón chenen.

Látha, rye myen' xin' mté'th Jesús mxon'. Mblá' myen' thidte Jesús.

*Trè' ndlu' le' Jesús mdoo loo rye mèn co' ñibe', no co' ndyoo ner, no co' ndyoo naa loo mèn nación Israel.*

*(Mr. 14.53-65; Lc. 22.54-55, 63-71; Jn. 18.12-14, 19-24)*

<sup>57</sup> Le' sya, mèn co' mxenxù' Jesús mbe' Jesús loo Caifás co' nac jef co' más ñibe' loo rye nguley' tiempa tac liz Caifás mqueltàa ryete mèn co' nac maistr co' ndlu' cón che'n ley co' mxo'f Moisés loo mèn, no rye mèngool co' ñibe', no co' ndyoo ner, no co' ndyoo naa loo mèn nación Israel. <sup>58</sup> Le' Pedr na, tith tith mdoo mque xís Jesús axta mzin Pedr loo lue' liz mbi' co' lèe Caifás co' nac jef co' más ñibe' loo rye nguley'. Pedr ngòo. No ndub Pedr làth rye mèn co' mqueltàa tya, mèn co' nquenap con' co' nac che'n templ no co' nque zin' le'n templ par ñee Pedr ñeene' xá mod tolo quexù' que' fals mènà Jesús no tolo li la's mènà cón che'n Jesús.

<sup>59</sup> Nde nxon', mèn co' nac jef che'n rye nguley', no rye mèngool, no rye mèn co' nxo'f zin' zin' che'n templ, no mèn co' ñibe', no co' ndyoo ner, no co' ndyoo naa loo mèn nación Israel, sate más mcua'n mènà mod xá mod tolo quexù' que' fals mènà Jesús axtaque' li mènà gan gáp mènà razon guth mènà Jesús. <sup>60</sup> Per yende mod li mènà gan tolo ntec mènà Jesús mastale' huax mènà mqueltàa loo Jesús no mastale' antub yalgutyè'túb ngòc di's co' ngue zib quì mènà Jesús. Por lult, mbi'th chop mèn co' mbi'th ta' cuent cón che'n Jesús co' nac di's yalgutyè'túb. <sup>61</sup> Mènà ndxab:

—Nu' mbìn le' mbi' ba' gunii pezea, ndxab mbi' le' mbi' cobii templ che'n Diox. No bere mbi', xít te'f mbi' templ le'n son huiz no maste. ¿Xá nee gu'? ¿Ché', licque', li mbi' con'a?

<sup>62</sup> Sya, ngo too nde'f mbi' co' nac jef co' más ñibe' loo rye nguley'. Ndxab mbi' loo Jesús:

—¿Ché' yende mod càbl loo ryop mbi' ba', cà'? ¿Xá mod chonon tatua' nac rye di's co' mbez ryop mbi' cón che'nl, à'? ¿Fcàbl!

<sup>63</sup> Per Jesús yende chó di's mcàb. Sya, ndxab mbi' co' nac jef loo rye nguley' loo Jesús:

—Por lèe Diox co' naban, daa ngue te'th Diox lool: Nu' ndlya's ñeel loo nu: ¿Ché', licque', lùu nac Crist, xgan' Diox o ché' inacte lùu Crist, cà'?

<sup>64</sup> Jesús ndxab loo jef:

—Aa. Nacque' daa xgan'pe' Diox, pues, xalque' ngue bezl ba'. No thidte vez ngue niin loo ryete gu' le' gu' hui' loon, daa co' mbal yáal loo izlyo' ndxè' xalque' ndxáal chol mèn loo izlyo', co'se' tuben cuat Diox, Diox co' ndxàppe' ryethe con' la's ya' Diox no la's nii Diox. No hui' gu' loon co'se' gác huiz co' ro'en loo bé' par galen le'n xcua' loo izlyo' ndxè' tedib vez.

<sup>65</sup> Sya, jef co' más ñibe' loo nguley' ngo too nde'f. Mched jef xab jef. No ndxab jef:

—Mbi' ndxè' thidteneque' ñii yèe ñii tìi cón che'n Diox con di's co' ndyoodi's mbi'. ¿Cón li taamas mèn co' ta' cuent cón che'n mbi' ba' loo na'? Ya inquinte na' taamas mèn, ¿lé'? Gu' nde teele' ndxòn di's co' ndyoodi's mbi' co' ñii yèe ñii tìi mbi' cón che'n Diox.

<sup>66</sup> ¿Xá nee gu'? ¿Xá gác mbi'? ¿Cón li no na' mbi'?

Mènà mcàb:

—Ndxáalque' gath mbi' tac mbi' ndxàp dol.

<sup>67</sup> Sya, ale msuc mènà rloo Jesús. No mda' mènà golp Jesús. Le' taandxep mènà mdís rloo Jesús. <sup>68</sup> No mbez mènà loo Jesús:

—Com le' lùu mbez lùu nac Crist, ¿lé'?, bli divin ¿chó nu' mda' che'nl?

*Trè' ndlu' le' Pedr mcà di's Jesús loo mèn le' Pedr indlibe'de Jesús.*

*(Mr. 14.66-72; Lc. 22.56-62; Jn. 18.15-18, 25-27)*

<sup>69</sup> Láth ngue tetii mènà Jesús no nzi li mènà xal ndlya's mènà con Jesús, Pedr ndub par fuer ro ned loo lue'. Sya, mbii gax thib mozgot loo Pedr. Mozgota ndxab loo Pedr:

—Pedr, lùu, ne, mque tee noque' Jesús co' nac mèn gulàaz che'n mèn galile, ¿lé'?

<sup>70</sup> Pedr mcà di's Jesús loo mozgota loo rye mèn co' nziri' tya. Ndxab Pedr loo mozgota:  
—Aa'a. Ne'needen chó cuent ngue ta'l.

<sup>71</sup> Le'pe' nda ro Pedr ro puert co'se' gunèe tedib mozgot Pedr. Sya, ndxab mozgota loo mèn co' nziri' tya:

—Mbi' ba', ne, mque tee noque' Jesús co' nac mèn yèez Nazaret.

<sup>72</sup> Mbere Pedr, mcà di's Pedr Jesús tedib vez. Ndxab Pedr:

—¡Tyoxca lica, cara! Ne'libeden mbi'a.

<sup>73</sup> Pente ndxàc mcà di's Pedr cón che'n Jesús, mbere mèn co' nziri' tya, ngua bii gax mèn loo Pedr. Ndxab mèn loo Pedr:

—Lìcpe' ba'i, cara, lùu, ne, nac thib mbi' co' mque tee noque' Jesús tac ndxàc be'l axta por mod co' ndyoodi's lùu.

<sup>74</sup> Sya, leque Pedr, nazab gunii yèe gunii tii Pedr cón che'n Jesús. No mde'th Pedr Diox. Ndxab Pedr:

—¡Tyoxca lica, cara! Ne'libeden mbi'a.

Leque hor co'se' ndxab Pedr di'sa, chàa, ngrozèe nguiidtee mblé' nguiidtee yál'.

<sup>75</sup> Sya, chàa, mte' lezo' Pedr di's co' ndxab Jesús loo Pedr co'se' ndxab Jesús loo Pedr: Ndoore' cozèe nguiidtee lé' nguiidtee yál', lùu cà di's daa son vez. Sya, mbii Pedr tya. No ne'tí' ne' ñee lezo' Pedr, mbín' Pedr tant mxi lezo' Pedr no mthyon Pedr por mcà di's Pedr Jesús loo mèn.

## 27

*Trè' ndlu' le' mèn mbe' Jesús, natub dó' Jesús, loo thib mbi' co' lèe Pilat.*

*(Mr. 15.1; Lc. 23.1-2; Jn. 18.28-32)*

<sup>1</sup> Co'se' ngo nìi izlyo' tedib huiz co' nde nquea, ryete mèn co' nac jef loo rye nguley' co' más ñibe' loo rye nguley', no ryete mèn gool co' ñibe' loo mèn nación Israel, thidte gunii rye mèn no thidte mdoodi's rye mèn par mblo xnee mèn le' mèn guthque' Jesús.

<sup>2</sup> Sya, mbe' mèn Jesús, natub dó' ya' Jesús, loo tedib mbi' co' ngro' lèe Pons Pilat co' nac gobernador le'n ciuda Jerusalén tiempa.

*Trè' ndlu' leque Jud mbeth Jud.*

<sup>3</sup> Co'se' gunee Jud co' mda'xù' Jesús loo mèn le' mèn mquexù' mque' fals Jesús par guth mèn Jesús, axta syare' ngulàa yéc Jud no ngulàa lezo' Jud. Ale ngua sere Jud gal psi' pes plat co' mdix mèn loo Jud loo mèn co' nac jef che'n nguley' co' más ñibe' loo nguley' no loo mèn gool co' ndyoo ner no co' ndyoo naa loo mèn nación Israel. <sup>4</sup> Ndxab Jud loo mèn:

—Daa mcuan xquin daa no xtol daa loo Diox por mdaxù'len thib mbi' loo gu' co' yende chó xquin ndxàp no co' yende chó xtol ndxàp par guth gu' mbi'.

Per mèn mcàb loo Jud. Ndxab mèn:

—Yende chó mport nzo lezo' nu' con' mblil. Lùu nee cón lil. Con'a ya nacle' cón che'nl.

<sup>5</sup> Sya, ndxecleque' tmia mblobii Jud rloo mèn le'n templ. Ngoloa, ndyàa Jud. Ngua lo Jud dó' yen Jud. Ale leque Jud setilte mbeth Jud.

<sup>6</sup> Sya, mèn co' nac jef che'n nguley' co' más ñibe' loo nguley' mthop tmi co' mblobii Juda. Ndxab mèn loo xtàa mèn:

—Yende mod co' na' tmi ndxè' le'n caj co'te' ndxòo tmi co' ndyop gòn o ofrend. Tmi ndxè' nac tmi, co' nee di's, mxi na' mbi' ba' par guth na' mbi'.

<sup>7</sup> Ngoloa, luega mdoodi's mèn con xtàa mèn. Ndxab mèn:

—Más huen tyen na' tmi ba' par ti' na' thib le' yòo bte'f co' nac yòo co'te' ntoxcua' mèn plat no taz no taamas con' par gac yòoa thib lugar co'te' cuec mèn thib panteón par ca's mèn mèn co' nac mèn tedib nación co' nzo ban ciuda ndxè'.

<sup>8</sup> Por cona, axta huiza no axta huiz nalze lèe lugar co' ngòc yòo bte'fa yòo bte'f co' mdyu' con tmi co' ngòc tmi co' mxi mèn thib mbi' co' mbethxù' mèn par mxyo ren mbi' loo izlyo'. <sup>9</sup> Tataa mod ngòcque' no mdyaaque' cón che'n di's co' gunii Jeremi co' mde'th di's co' ndxab Diox co'se' ndxab Jeremi:



Mxen mèn gal psi' pes plat co' ngòc tmi co' ndxab mèn ntac mbi'a.

<sup>10</sup>No con tmia mxi mènà thib le' yòo bte'f co'te' ndli mèn zin', mèn co' ntoxcua' plat no taz no taamas con'. Mblique' mèn con'a xalque' mnibe' Tad Diox loon par mdethen di's ndxè' co' ngòc di's co' gunee Tad Diox loon.

*Trè' ndlu' le' Jesús mdooxù' loo Pilat.*

*(Mr. 15.2-5; Lc. 23.3-5; Jn. 18.33-38)*

<sup>11</sup>Ngoloa, mbe' mènà Jesús loo gobernador co' ngro' lèe Pilat. Sya, mnibdi's gobernador loo Jesús. Ndxab gobernador loo Jesús:

—¿Ché', licque', lùu nac rey che'n mèn nación Israel, cà'?

Jesús ndxab loo gobernador:

—Aa. Nac daa rey che'n mèn nación Israel, pues, xalque' ngue bezla ba'.

<sup>12</sup>Per co'se' ngue quexù' ngue que' fals mèn co' nac jef co' más ñibe' loo nguley' no mènool Jesús, nec thib di's ne'ncàbte Jesús loo mènà. <sup>13</sup>Sya, ndxab Pilat loo Jesús:

—¿Ché' indxònte lùu no ché' inden'te lùu rye di's co' mbez mèn ba' cón che'n lùu, cà'?

<sup>14</sup>Per Jesús nec thib di's ne'ncàbte loo gobernador. Ante mbui' no ante gunaa gobernador loo Jesús axta ne' ne' ñee gobernador cón li gobernador xtùuz.

*Trè' ndlu' le' Jesús nzole' la's ya' mèn par guth mèn Jesús.*

*(Mr. 15.6-20; Lc. 23.13-25; Jn. 18.38-19.16)*

<sup>15</sup>Nde nxon', mque no mèn co' ndxàc gobernador thib costumbr ngo' mèn co' ndxàc gobernador thib pres co' mbez mèn loo gobernador ryo' cad lín' co'se' ndxáal lni pasc.

<sup>16</sup>Le'pe' lín'a, ngo thib mbi' co' anze'f mxyo'f lèe no co' anze'f mxyo'f xti's co' ngòc thib mbi'guth mèn. Mbi'a ngro' lèe Barrabás. <sup>17</sup>Láth co'se' mqueltàa rye mènà loo Pilat co' nac gobernador, Pilat mnibdi's loo mènà. Ndxab Pilat:

—De loo ryop mbi', Barrabás co' ngue lezi'f no Jesús co' nda gu' cuent loon, ¿chó mbi' ndlya's gu' telá'en par bii mbi', à'? ¿Ché' ndlya's gu' telá'en Barrabás o ché' ndlya's gu' la'en bii Jesús co' ne' tedib lèe Crist, cà'?

<sup>18</sup>Tac Pilat nonque' no nda'que' Pilat cuent por ndxecloo mènà ñee mènà Jesús no por ndxàn lezo' mènà ñee mènà Jesús, por cona asembli mènà mda'xù' mènà Jesús loo Pilat.

<sup>19</sup>Láth ndub Pilat co'te' ndub rez Pilat di's cón che'n mèn, xa'got co' nac sa'l Pilat mtel' mandad par ndxab sa'l Pilat loo Pilat: Anderhuenl, Pilat. Ne'tetüidel mbi' ba'. No yende cón li nol mbi' co' nac mbi' nalì no mbi' nambii ba'. Tac daa msa' lezo' thib mcal' fier no anze'f mzeb mcal' daa por cón che'n mbi' ba' ná' xhuina.

<sup>20</sup>Per mèn co' nac jef co' más ñibe' loo rye nguley' no mènool co' ñibe' loo mèn nación Israel, thidte ngòc ryop ned mènà. Thidte ndxab rye mènà loo Pilat más huen ryo' no lyá' Barrabás. Le' Jesús ba' na, gath. <sup>21</sup>Mbere Pilat co' nac gobernador, ndxab Pilat loo mènà. No mnibdi's Pilat loo mènà tedib vez:

—De loo ryop mbi', ¿chó mbi' ndlya's gu' telá'en, à'?

Mènà ndxab:

—Blo' Barrabás lezi'f. No bla' bii Barrabás.

<sup>22</sup>Pilat mnibdi's tedib vez loo mènà. Ndxab Pilat:

—Le' loo Jesús co' mbez mèn nac Crist, ¿cón ndlya's gu' li non Jesús, à'?

Ryete mènà mcàb:

—Fcàa Jesús. Fque' loo cruz.

<sup>23</sup>Mbere Pilat, ndxab Pilat loo mènà:

—Per ¿chó con' ye'rsin' mbli mbi' ndxè', yey?

Per ale le'le' mcàb rye mènà. Ndxab rye mènà loo Pilat:

—Pues, nu' ngue bez lool: Fcàa mbi' ba'. Fque' loo cruz.

<sup>24</sup>Co'se' ñee Pilat ya yende mod li Pilat gan no, ndxe'leque', sate más ndxátbèe mènà no ndxecloo mèn ñee mènà Jesús, mbli Pilat mandad. Ngua xi mèn nít par mtech Pilat ya' Pilat loo mènà. Láth ngue tech Pilat ya' Pilat, ndxab Pilat loo mènà:

—Yende chó cón chenen par la's ron cón che'n mbi' ba' par niin guthen mbi'. Ne' ne' la's ron cón che'n mbi' ba' par niin loo gu' guth gu' mbi' ba'. Mbi' indxàpte nec thib

xquin no xtol par guthen mbi'. Con' co' ndlya's gu' li gu' ba' ya nacle' cón che'n gu'. Gu' nee cón li no gu' mbi'. Yende chó cón chenen par xon ren mbi'. Nambìi ndoon loo gu'.

<sup>25</sup> Sya, ryete mènà mcàb loo Pilat. Ndxab mènà:

—Yan' cón che'n mbi' co' gath ba' cón che'n nu' no cón che'n xin' nu', xàa. Mbi' gath. Ngolo cuent.

<sup>26</sup> Sya, mblo' Pilat Barrabás lezi'f. No mtelá' Pilat Barrabás. Le' Jesús na, mbli Pilat mandad ngua ta' mèn che'n Jesús. Ngoloa, mda' Pilat Jesús loo mènà par ya que' mènà Jesús loo cruz.

<sup>27</sup> Ngoloa, mbe' solndad co' nac solndad Pilat, co' nac gobernador, Jesús co'te' nac palas che'n Pilat. Tya mqueltàa rye solndad dib vuelt loo Jesús. <sup>28</sup> Mteche solndad xab Jesús co' noc Jesús. Ngoloa, mtegec solndad Jesús thib ned xab Jesús co' ngòc lar' nanee. <sup>29</sup> Ale mtocua' solndad thib coron yis. Ngoloa, mdub solndad coron yisa yéc Jesús. No mblo solndad thib le' yaa ya' Jesús co' nac ladli. Sya, asembli solndad, mdyub xib solndad loo Jesús. No mxìis no solndad Jesús. No ale ndxáp nxyán' solndad ñèe solndad Jesús. Mbez solndad loo Jesús:

—San, Rey, lùu co' mbez nac lùu rey che'n mèn naciòn Israel.

<sup>30</sup> Ale msuc solndad rloo Jesús. No leque yaa co' mblo solndad ya' Jesús, mxen solndad par mblàa solndad yaaa yéc Jesús. <sup>31</sup> Ngoloa tataa mxìis no solndad Jesús no mbli solndad ngòc nguàal con' con Jesús, mteche solndad cap co' noc Jesús. Mbere solndad, mtegec solndad xab Jesús. Ngoloa, mbe' solndad Jesús par ya que' solndad Jesús loo cruz.

*Trè' ndlu' le' mèn mque' Jesús loo thib cruz.*

*(Mr. 15.21-32; Lc. 23.26-43; Jn. 19.17-27)*

<sup>32</sup> Láth nda ro' solndad ro ciuda Jerusalén con Jesús, asal' too solndad con mènà thib mbi' co' nac mbi' gulàaz che'n làaz mèn siren. Mbi'a ngro' lèe Mon. Ale mtau' solndad loo mbi'. No mnibe' yèe solndad loo mbi'a par mbe' mbi' cruz Jesús.

<sup>33</sup> Co'se' ngolo mzin no solndad Jesús con mèn co'te' lèe Gólgota, co' nee di's, thib den co' ñaa xal thib calaver yéc mèn, <sup>34</sup> tya, mcos solndad vin con thib loo cuan' co' anze'f nala par ta' solndad vina gu Jesús. Per co'se' ngolo mbli Jesús preb vin co' nos cuan' nalaa, ne'càbte Jesús gu Jesús vina.

<sup>35</sup> Co'se' ngolole' mque' solndad Jesús loo cruz, mblo solndad xab Jesús rif. No mdith no solndad dad loo xab Jesús par ñee solndad ñeene' chó solndad gàc che'n xab Jesús. Tataa ngòc con'a par ngòcque', no mdyaaque', no mdubque' di's co' gunii thib mbi' co' mde'th di's co' ndxab Diox co' ndxab:

Mblo mèn xaben rif no mdith no mèn dad loo xaben par ñee mènà ñeene' chó mèn gàc che'n xaben.

<sup>36</sup> Ngolo mdith no solndad dad loo xab Jesús, tya gaate ngure solndad par mquenap solndad Jesús bzyèa. <sup>37</sup> Nde nixon', mnibe' Pilat loo solndad mque' solndad plá di's co' mbez no co' ndlu' loo thib ye's yéc cruz Jesús xá mod mquexù' mque' fals mèn Jesús. Di'sa mbez: Mbi' ndxè' nac Jesús co' nac rey che'n mèn naciòn Israel.

<sup>38</sup> Mque' solndad chop huan' ryop lad cuat Jesús loo cruz leque huiza, ne. Thib mbi' mquée cuat Jesús ladli. Tedib mbi' mquée cuat Jesús lad rebes. <sup>39</sup> Látha, asembli mèn mbri'th mèn co'te' ngue Jesús loo cruz. No be' taa mcuin mèn yéc mèn. Mbez mèn loo Jesús: Mzylaque'la, ndee. No sate más mxìis no mèn Jesús no ndxáp nxyán' mèn ñèe mèn Jesús. <sup>40</sup> No mbez mènà loo Jesús:

—Lùu co' gunee loo nu' le' lùu cobii templ loo yòo no le'n sonte huiz berel xít te'fl templ tedib vez, nalle' leque lùu bli par lyá'l. Chele' lùu, licque', nac xgan'pe' Diox, bilàa loo cruz co'te' nguel ba'.

<sup>41</sup> Lomisque' ne, mxìis no ryete mèn ndxè' Jesús, mèn co' nac jef co' más ñibe' loo rye nguley', no mèn co' nac maistr co' ndlu' cón che'n ley co' mxo'f Moisés loo mèn, no mèn co' nac mèn xley' farise, no mèn gool co' ñibe', no co' ndyoo ner, no co' ndyoo naa loo mèn naciòn Israel. Mbez mènà loo xtàa mènà, ne:

<sup>42</sup> —¿Xá ngóc mbi' ba' mtelá' mbi' chol mèn loo chol yaltii no nalle' ale ne'ngácte mbi' li mbi' par lyàa mbi' loo cruz co'te' ngue mbi' ba'? Chele' mbi' nacque' rey che'n mèn naciòn Israel, leque mbi' li par lyàa mbi' loo cruz co'te' ngue mbi' ba' par yila's na' no li la's na' licque' nac con' co' mbez mbi' nac mbi'. <sup>43</sup> Anze'f ngòp mbi' yalxla's loo Diox. Nee Diox xá mod telá' Diox mbi' loo cruz co'te' ngue mbi' ba' chele' mbi' nac anze'f ngudloo Diox no lezo' Diox. Más de cona, mbi' guneeque' loo na' le' mbi' nac xgan' Diox. Nal ñee na'i ñeene' ¿ché', lica?

<sup>44</sup> Axta ryop huan' co' mquée loo cruz con Jesús mbez ngóc nguàal con' loo Jesús, ne.

*Jesús nguth yub loo cruz.*

(Mr. 15.33-41; Lc. 23.44-49; Jn. 19.28-30)

<sup>45</sup> No dib lal ngue tetii mènna Jesús, ngóol rol huiz. Desde hora axta hor mquée guyon bzyè, dib lal hora mcuau loo izlyo'. Ale mbyau' loo huiz. Syare', mtenii huiz loo izlyo' tedib vez. <sup>46</sup> No leque hor mquée guyon bzyèa cabii ngrozèe yii ngrozèe den Jesús. Ndxab Jesús:

—Eli, Eli, ¿lama sabactani? Di'sa nee di's ndxab Jesús loo Diox: Ay, Diox, Ay, Diox, ¿chonon mblá'ya' U' daa, à'?

<sup>47</sup> Ndxep mèn co' nziri' tya mbìn di's co' ndxab Jesús. Sya, ndxab mènna loo xtàa mènna: —Mbi' ba' ngue bez Lii. Gu' neeque' no nonque' gu' le' Lii ngóc thib mbi' co' mde'th di's co' ndxab Diox póla, ¿lé'?

<sup>48</sup> Leque hora mque' thib mbi' co' nzo làth mèn carre. Ngua xi mbi' thib sponj. Mtegaz mbi' sponj con vin co' nos con cuan' nala. Mdub mbi' sponja loo thib punt bar. Ale mzi mchep mbi' sponja ro Jesús par gu Jesús vin co' nos cuan' nala. <sup>49</sup> Per taamas mènna ndxab loo mbi'a:

—Lá'a. Tee quée mbi' tua' par ñee na' ñeene' ché' ti'th Lii par telá' Lii mbi' no làa Lii mbi' co'te' ngue mbi' ba'.

<sup>50</sup> Mbere Jesús, ngrozèe yii no ngrozèe den Jesús. Ngoloa, site nguth Jesús. <sup>51</sup> Leque hor co'se' nguth Jesús, mbli Diox le' cortin co' ngue le'n templ mbryed grolthe axta gáp no axta xàn'. Ale chop le' ngóc cortin. Látha, mbuin thib xòo brut. No ngulàa bes huax quèe rhue' no ngulàa bes huax quèe co' ngóol yub loo izlyo'. <sup>52</sup> No mxyal' ro bá' co'te' mbua's huax thebol co' ngola's loo Diox. Rye mènna ngro xban hora. <sup>53</sup> Ngolo ngro xban mènna, ngro' mènna le'n panteón co'te' mbua's mènna. Ndyàa mènna par ciuda Jerusalén co' nac ciuda natú' che'n mèn naciòn Israel. Huax mèn ciuda Jerusalén gunèe mèn co' ngro xbana, ne.

<sup>54</sup> Le' sya, co'se' ñèe capitán con solndad co' nzi quenap Jesús mbuin xòo no tolo ngóc taamas con' naze'f, anze'f mzyeb capitán con taamas solndada. Ale ndxab capitán no mèn co' nziri' no capitana:

—Lìcpe' ba'i, ndee gu'. Mbi' ba', licque', ngóc xgan' Diox.

<sup>55</sup> Ngure huax mèngot tya, mèngot co' ngure hui' xal ngóc con' loo Jesús. Mèngota mdoo nque xís Jesús axta co'se' ngro' Jesús le'n yèezya' che'n làaz mèn galile. Mblyath no mèngota Jesús. <sup>56</sup> Láth rye mèngota ngo son xa'got. Thib xa'got lèe Mari. Xa'gota ngóc mèn yèez Magdala. Mbryop xa'gota ngóc Mari co' ngóc xna' ryop hues myen' co' ngro' lèe Cob no Chè. Mbyon xa'gota ngóc xin' sa'l thib mbi' co' lèe Zebede, Zebede co' ngóc xud myen' co' lèe Juàn no Cob.

*Trè' ndlu' le' thib mbi' ngua lo thebol Jesús le'n thib ye'r quèe.*

(Mr. 15.42-47; Lc. 23.50-56; Jn. 19.38-42)

<sup>57</sup> Co'se' nde làale' yál' izlyo' huiza, mbi'th thib mbi' ric co' lèe Chè. Mbi'a ngóc mbi' yèez co' lèe yèez Arimate. Ngóc mbi'a xin' mté'th Jesús, ne. <sup>58</sup> Ngua nee Chè loo Pilat ta' Pilat lugar par hue' Chè thebol Jesús. Sya, mnibe' Pilat loo mèn. Ngua ta' mèn thebol Jesús mcàa Chè. <sup>59</sup> Sya, mbe' Chè thebol Jesús. Mchì'x Chè thib sab co' ante nagus bèeleque' ñaa lad thebol Jesús. <sup>60</sup> Ngoloa, ngua lo Chè thebol Jesús le'n thib ye'r quèe co' mbli Chè mandad mden' mèn par ga's Chè yiloo. Per ndxe'leque', le'n ye'r quèe co'te' ya

lo mèn Chèa, mblo Chè thebol Jesús. Ngolo mblo Chè thebol Jesús tya, mtau' Chè ro ye'r quèea con tedib quèe roo. Ngoloa, ndyàa Chè. <sup>61</sup> Le' Mari co' nac mèn yèez Magdala no tedib Mari co' mqueltàa no Maria, nguled ryop Maria ro ye'r quèea axta ngolo mblo Chè thebol Jesús le'n ye'r quèea.

*Trè' ndlu' le' solndad mquenap ye'r quèe co'te' mblo Chè thebol Jesús.*

<sup>62</sup> Co'se' ngo nì izlyo' tedib huiz co' nde nquea, co' nee di's, ngolo nguri'th huiz co' ngòc nab mèn par huiz lni co' nac huiz yub lni, mqueltàa mèn co' ngòc jef co' más mnibe' loo rye nguley' no mèn xley' farise yòolau co'te' nzo Pilat. <sup>63</sup> Ndxab mèna loo Pilat:

—Tad, nu' nte' lezo' cón che'n mbi' gutyè'a co'se' be' naban mbi', mbi' gunee loo nu' co'se' yilo son huiz nguth mbi', mbi' ryo xban làth mèn nguth. <sup>64</sup> Cona, nde nee nu' loo U', le' U' ñibe' ya quenap solndad ro ye'r quèe axta yilo son huiz par tataa mod ne'yade myen' xin' mté'th mbi' yál' no ya lo' myen' mbi' co' ngòc thebola le'n ye'r quèe. Le' sya, gab myen' no te'th myen' loo mèn le' mbi' ngro xbanle' làth mèn nguth. Le' sya, tataa mod más ndoo líte toxcu' myen' yalgutyè' leque yalgutyè' co' ngòc di's co' gunii Jesús ndoore' láth co'se' be' naban Jesús.

<sup>65</sup> Pilat ndxab loo mèna:

—Gu' ngue no thib tant solndad la's ya' gu' co' ngue li sirv loo gu'. Más huen leque gu' nibe' par ya quenap solndad ro ye'r quèe thib mod co' más gác solndad quenap solndad ye'r quèe co' nac bá'.

<sup>66</sup> Sya, mxen mèna ned. Nda mèna ro ye'r quèe co'te' mblo Chè thebol Jesús. Mque' mèna thib le' ye's loo quèe co' ngue di'sbè' co' ñibe' yende chó mèn cuin quèe co' ndoo nau' ro ye'r quèe co'te' mblo mèn thebol Jesús. Ngoloa, mtan' mèna solndad co' mbyan' quenap ro ye'r quèea par ñee solndad ñeene' cón gác le'n yon huiza.

## 28

*Trè' ndlu' le' thebol Jesús ngro xbanle'.*

*(Mr. 16.1-8; Lc. 24.1-12; Jn. 20.1-10)*

<sup>1</sup> Co'se' ngolo nguri'th huiz sabd co' ngòc huiz descans tiempa no nde yiniile' izlyo' huiz doming co' nac ner huiz che'n sman, Mari co' nac mèn yèez Magdala no tedib Mari ngua tee hui' ryop Mari ro ye'r quèe co'te' mblo Chè thebol Jesús. <sup>2</sup> Leque hora, chàa, mbuin thib xòo brut. Láth ngüin xòoa, ngulàa thib angl che'n Tad Diox loo bé'. Co'se' mzin angl ro ye'r quèe co'te' mblo Chè thebol Jesús, mteche angl quèe co' ndoo nau' ro ye'r quèea. Ngoloa, mdub angl loo quèe co' mteche angla. <sup>3</sup> Látha, ante nquée xnii angla xal co'se' ndxà'x bèel gundi. Le' xab angla na, ante nagus béeleque' ñaa xal ñaa xil'. <sup>4</sup> Co'se' gunèe solndad angl, ale mxi'th solndad tant mzyeb solndad. Ngob solndad loo yòo. Ale mcuau solndad. Ngòca loo solndad xal mèn co' nguth. <sup>5</sup> Sya, ndxab angl loo mèngota:

—Ne'zyebte gu', ey. Na nanee no ndaquen cuent le' gu' nde cua'n Jesús co' mque' mèn loo cruz. <sup>6</sup> Ya yende Jesús le'n ye'r quèe ba'. Jesús ngro xbanle'. Ngòcle' con' loo Jesús xalque' mde'th Jesús loo gu' le' Jesús ryo xban. Que de gu' ndxè' par hui' gu' co'te' mdi'x Chè thebol Jesús par yila's gu' le' thebol Jesús yende trè'. <sup>7</sup> Lijer byàa gu'. No fta' gu' cuent ndxè' loo myen' xin' mté'th Jesús le' Jesús ngro xbanle' làth mèn nguth. Fta' gu' cuent loo myen' no guuz gu' loo myen' le' Jesús ya ner loo gu' le'n thib yèez che'n làaz mèn galile. Tya, hui'pe' gu' loo Jesús. Diox mtel' daa par tan cuent cón che'n di's ndxè' loo gu'.

<sup>8</sup> Sya, sirs sirs mxen mèngota ned. Mbii mèngota ro ye'r quèea. Thib part mzyeb mèngota. Tedib part na, más ndyac lezo' mèngota. Ale tolo mque' mèngota carre par ya ta' mèngota cuent loo myen' xin' mté'th Jesús. <sup>9</sup> Látha, chàa, ngro' too Jesús loo mèngota. No gunii Jesús Diox loo mèngota. Sya, mbii gax mèngota loo Jesús. No mdub xib mèngota loo Jesús. No thidte ngua mèngota. Mde's mèngota nii Jesús. <sup>10</sup> Sya, ndxab Jesús loo mèngota:

—Ne'zyebte gu', ey. Huàa ta' gu' cuent ndxè' loo myen' huesen. Guuz gu' loo myen' ya bed myen' daa le'n thib yèez che'n làaz mèn galile. Tya, hui' myen' loon.

*Trè' ndlu' cón che'n cuent co' mda' solndad loo mèn.*

<sup>11</sup> Láth ndoo mèngota ned, ndyàa mèngota, mxen plá solndad co' mquenap ye'r quèe co'te' mblo Chè thebol Jesús ned. Nda ta' solndad cuenta loo mèn le'n ciudad Jerusalén loo mèn co' ngòc jef co' más ñibe' loo rye nguley' cón che'n ryete con' co' ngòca. <sup>12</sup> Le' sya, mèn co' nac jef co' más ñibe'a ngua toodi's no mèngool co' ñibe' loo mèn nación Israel par thidte gac mènà no thidte tyoodi's mènà par li nèe mènà cón che'n di's co' mda' solndad cuenta. Ngoloa, mda' mènà huax tmi par mcàa solndad. <sup>13</sup> No ndxab mènà loo solndad:

—Taandxè' gab gu' loo mèn che'n ciuda Jerusalén. Gab gu': Láth nzi yàt nu' xhuina, ne'nden'te nu' no ne'nda'de nu' cuent xal mbi'th li huan' myen' xin' mté'th thebol Jesús thebol Jesús le'n ye'r quèe. <sup>14</sup> No chele' gobernador ta' nza gobernador par gòn gobernador cón che'n di's co' ngolo mdoodi's na' ndxè', nu' tolo li nèe par yila's gobernador di's ndxè'. Tataa mod li nu' par ne'gàcte con' ryes loo gu' no ne'tub rezte gobernador cón che'n gu' loo gu'.

<sup>15</sup> Le' sya, ndoo lite mxèn solndad tmia. Ngua li solndad xal ndxab mènà. Di'sa be' nac di's co' mbez mèn nación Israel axta huiza no axta huiz nalze.

*Jesús mnibe' loo myen' xin' mté'th Jesús par ta' myen' cuent cón che'n Jesús no co myen' yalbàn cón che'n di's ndac loo mèn.*

*(Mr. 16.14-18; Lc. 24.36-49; Jn. 20.19-23)*

<sup>16</sup> Le' sya, rye si' fthib myen' xin' mté'th Jesús na, myen' mxen ned. Nda myen' par le'n thib yèez che'n làaz mèn galile co'te' ndub thib yii co' ndxab Jesús loo myen' cued myen'. <sup>17</sup> Co'se' gunèe myen' Jesús, mdub xib myen' loo Jesús no mcòo' myen' yéc myen' loo Jesús mastale' be' ngan lezo' myen' no mastale' be' ndxàc chop lezo' myen' ché', lìcque', nac mbi'a Jesús. <sup>18</sup> Sya, mbii gax Jesús loo myen' xin' mté'th Jesús. Ndxab Jesús loo myen':

—Hui' gu' nexa, ey. Diox mbli par ndxàpen rye loothe con' roo con' xèn la's niin no la's yan par ñibe'en loo ryethe con', que naca con' co' nziri' loo izlyo' ndxè', que naca con' co' nzo loo bé'. <sup>19</sup> Nalle' daa ngue ñibe' loo gu': Huàa gu' loo rye mèn le'n rye nación co' nziri' dib athu loo izlyo'. Huàa lu' gu' loo mènà co' nac cón chenen no bli gu' le' mènà gac xin' mté'thpe' daa. No bli gu' bautizar mènà por lèe xuden Diox no por lèen, daa co' nac xgan' Diox, no por lèe Xpii Natú' che'n Diox. <sup>20</sup> Blu' gu' loo mènà tyubdi's mènà loo rye di's co' nac di's co' ñibe'en loo gu' lu' gu' loo mènà. No fte' lezo' gu' le' daa nzo noque' gu' thidtene no ne'lá'ya'den gu' ryethe huiz desde huiz nalze no axta co'se' gac huiz co' lith no izlyo'. Taandxè' gaca loo gu', ey.



## Di's Ndac Che'n Diox Co' Mque' Marc Ye's

*Juàn Bautist ngo yalbàn co'te' nagán.*

*(Mt. 3.1-12; Lc. 3.1-9, 15-17; Jn. 1.19-28)*

<sup>1</sup> Taandxè' mod mtlo mbyath no mbyèn cón che'n di's ndac che'n Diox co' ndlu' cón che'n Jesucrist co' nac xgan'pe' Diox.

<sup>2</sup> Thib mbi' co' ngro' lèe Sayi co' mde'th di's co' ndxab Diox, mbi'a mque' ye's loo libr co' nac xti's Diox co' mbez taandxè':

Daa tel' ner thib mbi' co' xo'f zin' zin' co' gac rsinen. Mbi' yi'th ner lool par te'th mbi' di's no co mbi' yalbàn cón che'n no par li mbi' le' mèn tlo gòn di's cón che'n, ne, par li nab mèn mèn loo cón che'n Diox ndoore' co'se' yi'th lu'l loo mèn.

<sup>3</sup> Mbyèn thib di's che'n thib mbi' co' mblo yalbàn cabii co'te' nagán. Mbez mbi': Ftub xni' yéc gu' no ftub xni' lezo' gu' loo cón che'n Tad Diox. Fxal' gu' xtùuz gu' no fxal' gu' lezo' gu' par ñee gu' no ta' gu' cuent cón che'n Tad Diox. Tataa mod gac nab gu' ndoore' yi'th Tad Diox gu' loo gu'.

<sup>4</sup> Cona, ngro xo'f Juàn Bautist no ngro' too Juàn loo mèn co'te' nagán par li Juàn bautizar mèn. Mbez Juàn loo mèn co' ndxi'th loo Juàn naquinque' gac bautizar mèn par tataa mod lu' mèn le' mèn, licque, ngulàa yéc no ngulàa lezo' no mzye' ryethe mod ye'rsin' co' ngòp mèn par càba loo mèn ton' Diox xquin mèn no xtol mèn co' ndxàp mèn no co' ncu'a'n mèn. <sup>5</sup> Látha, mbi'th mèn gulàaz che'n làaz mèn jude no mèn ciudape' Jerusalén par gòn mèn di's co' mbez Juàn. Co'se' ndxelo nxo'f do' mèn xtol mèn loo Juàn no ngo ro mèn cón che'n xtol mèn loo Juàn, ndli Juàn bautizar mèn le'n nít le'n yó'be' Jordán.

<sup>6</sup> Xab Juàn co' mdoc Juàn ngòc lar' co' mbuàb mèn con yis lad má' co' lèe camell. Cinch co' ngòc le'n Juàn ngòc cinch che'n yid má', ne. Lua' Juàn no xít Juàn ngòc mbiistoo no mzin huan. <sup>7</sup> Co'se' ngo Juàn yalbàn loo mèn cón che'n di's ndac, taandxè' mod mbez Juàn:

—Nare' yi'th thib mbi' co' más ndxàp con' roo con' xèn la's nii mbi' no la's ya' mbi' leque daa. Por con' roo con' xèn co' ndxàp mbi' la's nii mbi' no la's ya' mbi', pà tan con mbi' con co' ndxác mbi'. Axta ne' ne' lin ryes cò'en loo mbi' par xaquen bò co' natedó' yilid co' ngue nii mbi.

<sup>8</sup> Mbez Juàn, ne:

—Daa ndli bautizar gu' le'n nít. Per mbi'a li par yòo gu' loo cón che'n Diox por cón che'n Xpii Natú' xalque' ndxác bautizar mèn le'n nít.

*Juàn Bautist mbli bautizar Jesús.*

*(Mt. 3.13-17; Lc. 3.21-22)*

<sup>9</sup> Leque le'n huiza, Jesús ngro' le'n yèez Nazaret co' nac thib yèez che'n làaz mèn galile. Mbi'th Jesús co'te' ngo Juàn par li Juàn bautizar Jesús le'n yó'be' Jordán. <sup>10</sup> Texal ngolo ngro' Jesús le'n nít, ngolo ngòc bautizar Jesús, gunèe Jesús mxyal' loo bé' no gunèe Jesús nde làa Xpii Natú' loo bé' loo Jesús. Gunaa Xpii Natú'a xal ñaa thib palomxtil' hora. <sup>11</sup> No leque hora mbyèn thib di's loo bé' co' ndxab loo Jesús:

—Lùu nac xgan'pe' daa co' anze'f ngudloon no lezon. No por cón che'n, anze'f ndyac lezon.

*Mebizya mbli preb Jesús.*

*(Mt. 4.1-11; Lc. 4.1-13)*

<sup>12</sup> Ngolo ngòc con'a, Xpii Natú' mbli par mxen Jesús ned. Nda Jesús co'te' nagán. <sup>13</sup> Ngo ban Jesús co'te' nagána cho' huiz làth má' huan. Làth xtau'a, mbi'th Mebizya loo Jesús par li Mebizya preb loo Jesús no par coby'a Mebizya Jesús par ñee Mebizya ñeene' ché' tli Jesús cón ndly'a's Mebizya. Per Jesús ne'nglide cas Mebizya. Ngoloa, mzin angl che'n Diox loo Jesús par mbli angl mandad loo Jesús.

*Jesús mtlo mxo'f zin' cón che'n di's ndac le'n huax yèez no ranch par ned le'n làaz mèn galile.*  
(Mt. 4.12-17; Lc. 4.14-15)

<sup>14</sup> Per pente ndxàc plá huiz nguri'th con'a, mxen mèn Juàn Bautist. No mque' mèn Juàn Bautist lezi'f. Le' Jesús na, ngua le'n huax yèezya' che'n làaz mèn galile par ngua lo Jesús yalbàn. No ngua te'th Jesús cón che'n di's ndac co' ndlu' loo mèn xá mod ndlya's Diox yòo mèn loo cón che'n Diox par ñibe'pe' Diox loo mèn. <sup>15</sup> Mbez Jesús loo mèn par neda:

—Nase mzinle' tiemp co'se' ndlya's Diox yòo gu' loo cón che'n Diox par ñibe'pe' Diox loo gu. Blàa yéc gu' no blàa lezo' gu' no fse' gu' mod co' ndxàp gu' loo Diox. No gola's gu' di's co' mbezen loo gu' co' ndlu' xá mod lyá' mèn loo ryethe co' nac con' ryes.

*Jesús ndxab loo thap myen' co' ndyen mbèel: Ya' gu' nda na'. Ftoo nque gu' xísen.*  
(Mt. 4.18-22; Lc. 5.1-11)

<sup>16</sup> Láth co'se' nda riid Jesús ro lagun co' nziri' loo xyòn che'n làaz mèn galile, gunèe Jesús chop hues myen' co' lèe Mon no Ndech. Ryop hues Ndech Mon ngòc mèn co' ndyen mbèel. Nzi go ryop hues Ndech Mon yex le'n nít par yigaa mbèel le'n yex. <sup>17</sup> Ndxab Jesús loo ryop hues Ndech Mon:

—Ya' gu' nda na', ey. Ftoo nque gu' xísen. Na li le' gu' gác mèn co' lu' loo mèn cón che'n Diox par yòo mèn loo cón che'n Diox xal ndxòo mbèel le'n yex co'se' ndyee ten gu' mbèel.

<sup>18</sup> Leque hora, mblá' Mon ryop Ndech yex. Nda nque Mon ryop Ndech xís Jesús.

<sup>19</sup> Ngoloa, tolo mdoo Jesús ned, nda Jesús. Per ndxèpte más gundee Jesús delant, gunèe Jesús thib mbi' co' lèe Cob co' ngòc xgan' thib mbi' co' ngro' lèe Zebede. Gunèe Jesús Juàn hues Cob, ne. Nzi yon xgan' Zebede le'n yòoyaa. Nzi go bdè' Zebede yex con Cob no con Juàn. <sup>20</sup> Ngurez Jesús Cob no Juàn. Ndxab Jesús loo myen:

—Ya' gu' nda na'. Ftoo nque gu' xísen.

Sya, nda no myen' Jesús. Taate mtan' myen' xud myen', Zebede, le'n yòoyaa con moz.

*Trè' ndlu' cón che'n thib mbi' co' mque no thib xpíi ye'rsin'.*  
(Lc. 4.31-37)

<sup>21</sup> Tolo mdoo Jesús ned con dyap myen' axta mzin Jesús thib yèez co' lèe Capernaum. Co'se' ngòc huiz sabd co' ngòc huiz descans tiempa na, ngòo Jesús le'n sinagog mèn par lu' Jesús mèn cón che'n di's ndac che'n Diox. <sup>22</sup> Le' sya, ryete mèn co' ndxòn di's co' nac di's ndac che'n Diox co' ngo Jesús yalbàn, ante ngüi' mèn no ante ñaa mèn loo Jesús. Tac Jesús ngue lu' loo mèn xal thib mèn co' ndxàp con' roo no con' xèn la's nii mèn no la's ya' mèn par ñibe'pe' Jesús loo mèn. Mèn mden' no mda' mèn cuent ingue lu'de Jesús loo mèn xal nac mod co' ndlu' thib maistr co' ndlu' cón che'n ley co' mxo'f Moisés loo mèn. <sup>23</sup> Hora ngo thib mbi' co' nac mèn gulàaz che'n yèeza làth mèn le'n sinagog. Mbi'a mque no thib xpíi ye'rsin'. Xpii ye'rsin'a mbli ale ngrozèe mbi'. No mbli xpíi ye'rsin' ndxab mbi' loo Jesús:

<sup>24</sup> —¿Chonon ndxòo U' làth nu', à', Jesús, U' co' nac mèn yèez Nazaret? ¿Ché' nde U' trè' par telux U' nu', cà? Na ndlibeque' U' le' U' nac mbi' natú' che'n Diox. U' ngro' loo Diox. No mtel' Diox U' nde U' loo izlyo'.

<sup>25</sup> Sya, mbyoo Jesús xpíi ye'rsin' co' mque no mbi'. Ndxab Jesús loo xpíi ye'rsin'a:

—¿Quex! Ftau' rol. No gro' loo mbi' ndxè'.

<sup>26</sup> Per xpíi ye'rsin'a mbli mquée mbii mbi'. No mblobii mbii mbi' loo yòo. No mbli mbii cabii ngrozèe mbi'. Ngoloa, chàa, ngro xpíi ye'rsin'a loo mbi'. <sup>27</sup> Le' sya, ryete mèn co' ñèe ndxàc con'a loo mbi', anze'f mzyeb mèn no mnibdi's mèn loo xtàa mèn. Ndxab mèn:

—¿Chó con' co' ndxàc ba', yoo? ¿Chó di's cub no cón nac co' ndlu' mbi' ba'? Mbi' ba' ndxàp con' roo no con' xèn la's nii mbi' no la's ya' mbi', cona, axta xpíi ye'rsin' ndxòn ro mbi' no nden' xpíi ye'rsin' di's co' mbez mbi' loo xpíi ye'rsin'.

<sup>28</sup> No ale huizte huizte mbìn rye mèn gulàaz che'n làaz mèn galile cón che'n ryethe con' co' ndli Jesús no co' ndlu' Jesús loo mèn.

*Jesús mteyac xna'zap Mon Pedr.*

*(Mt. 8.14-15; Lc. 4.38-39)*

<sup>29</sup> Co'se' ngolo ngro' Jesús con myen' no mèn le'n sinagog, Jesús nda no Cob no Juàn. Ngua Jesús liz Mon no liz Ndech. <sup>30</sup> Le'pe' huiza nax xna'zap Mon loo xlé'. Ndxab mèn guliz Mon loo Jesús le' xna'zap Mon ndyac len. <sup>31</sup> Sya, ngòo Jesús co'te' nax xna'zap Mon. Mxít che Jesús xna'zap Mon. Mteyac Jesús xna'zap Mon. Leque hora, ngro xlé' xna'zap Mon. Sya, mtlo xna'zap Mon, mbli zna'zap Mon cas mènna con Jesús.

*Jesús mteyac huax mèn yíiz.*

*(Mt. 8.16-17; Lc. 4.40-41)*

<sup>32</sup> Co'se' mzyèle' izlyo' huiza no ngulàale' yál' izlyo' huiza, mzin no mèn huax mèn yíiz no huax mèn co mque no chol xpíi ye'rsin' loo Jesús. <sup>33</sup> Leque hora, ryete mèn yèez Capernaum mqueltàa ro ryo' liz Pedr loo Jesús. <sup>34</sup> Sya, mteyac Jesús huax mèn co' mque no chol yíiz. No mblo' Jesús xpíi ye'rsin' loo huax mèn co' mque no xpíi ye'rsin'. Ndxé'sleque' ndxàc mènna. No inda'de Jesús lugar loo xpíi ye'rsin'a par angli xpíi tyoodi's mèn co' nquée mbii yéca cón che'n Jesús tac xpíi ye'rsin'a huen huen nanee chó mbi' nac Jesús.

*Jesús ngo yalbàn le'n yèezya' che'n làaz mèn galile.*

*(Lc. 4.42-44)*

<sup>35</sup> Co'se' ndoore' yinìi izlyo' tedib huiz co' nde nquea, cuar ngo che Jesús. Ngro' Jesús thib lad ro yèez Capernaum par cues Jesús Diox tya. <sup>36</sup> Látha, ne'nda'de Mon cuent con myen' co' ndxàc xtàa Mon máa Jesús. Mon ngua cua'n Jesús con myen' co' ndxàc xtàa Mon pá ned nda Jesús. <sup>37</sup> Co'se' mzyal Mon con myen' co' naqueltàa Mon Jesús, Mon no myen'a ndxab loo Jesús:

—Ryete mèn ngue tee cua'n U', Tad.

<sup>38</sup> Per Jesús ndxab loo Mon no loo myen' co' ngue tee no Mon:

—Nda na' le'n taamas yèez co' nziri' gax loo na' ba' par tan cuent no gon yalbàn cón che'n di's ndac che'n Diox loo mèn par ned ba', ne. Tac por cona ngro'en loo Diox par ndalen loo izlyo' ndxè'.

<sup>39</sup> Sya, mxen Jesús ned. Nda lo Jesús yalbàn loo mèn le'n sinagog mèn le'n rye yèez co'te' ngue no mèn sinagog mèn. No mblo' Jesús xpíi ye'rsin' loo rye mèn co' mquée mbii che'n xpíi ye'rsin' loo mèn gulàaz che'n làaz mèn galile.

*Jesús mteyac no mtembii Jesús thib mbi' co' mque no yíiz co' nac yíiz ndxa's co' nteya's yid lad mèn no co' nteyèe yid lad mèn.*

*(Mt. 8.1-4; Lc. 5.12-16)*

<sup>40</sup> Ned nque tee Jesús, ngo thib mbi' làth mèn. Mbi'a mque no thib yíiz ndxa's co' nteya's no co' nteyèe yid lad mèn. Mbii gax mbi'a loo Jesús. No mdub xib mbi' loo Jesús. Ndxab mbi' loo Jesús:

—Tad, U' anze'f ndxác nteyac chol yíiz co' ndxàp mèn. ¡Oj li U' favor tembii U' daa no teyac U' daa loo yíiz ndxa's ndxè', huen!

<sup>41</sup> Sya, mblyat lezo' Jesús gunèe Jesús mbi'. Ante mbuàal Jesús lad mbi'. No ndxab Jesús loo mbi':

—Ndlyazen le' lùu yac, ey.

Sya, mteyac Jesús mbi'.

<sup>42</sup> No texal ngolo ndxab Jesús di's, mbembii yid lad mbi' co' mque no yíiz ndxa'sa. Ale, lueg mbyac mbi'. <sup>43</sup> Mnibe' yèe Jesús loo mbi'. Ndxab Jesús loo mbi':

<sup>44</sup> —Hui' nexa. Yende chó loo gabel co' ngolo mbli nonl ba', ndee. Ante ndlyazen yal loo nguley' par ñèe nguley' lùu. No sangya lál' ofrend co' nac gòn loo Diox por cón che'n con' co' mtembiiin ladl, ofrend co' nac gòn co' mnibe' Moisés ta' mèn par tataa mod ñèe mèn no yila's mèn le' lùu mbyacle' loo yíiz ndxa's co' mque nol ladl.

Ngolo gunii Jesús Diox loo mbi', mtel' Jesús mbi', bii mbi' par liz mbi'.

<sup>45</sup> Per co'se' ndyàa mbi' par liz mbi', ale le'le' mtlo mbi', mda' mbi' cuent loo rye mèn co' mzyál' mbi' ned xá mod mbyac mbi'. No con'a mbli ya yende mod ngòo Jesús alanleque' le'n nec thib yèez che'n làaz mèn galile. Más quee lezo' Jesús mque tee Jesús thib lad ro yèez co'te' ihuaxte mèn nzo. Per mastale' thib lad mque tee Jesús, rye mèn co' naban par neda nda nqueque' xís Jesús par hui' mèn loo Jesús no par libe' mèn Jesús no par ñèe mèn yalguzye' co' ndli Jesús.

## 2

*Jesús mteyac thib mbi' co' mque no thib mbii che'n yíiz bech.*

*(Mt. 9.1-8; Lc. 5.17-26)*

<sup>1</sup> Ngolo nguri'th plá huiz, mbere Jesús. Ngòo Jesús le'n yèez Capernaum tedib vez. Mbyath di's le' Jesús nzo liz thib mbi'. <sup>2</sup> Sya, setilte mqueltàa huax mèn liz mbi'a loo Jesús axta ne' ne' gàal ro ryo' yòo mèn, tant huax mèn mqueltàa. Le' Jesús na, mtlo ngo yalbàn cón che'n di's ndac che'n Diox loo mèn par yòo mèn loo cón che'n Diox par ñibe'pe' Diox loo mèn. <sup>3</sup> Látha, mzin thap xa'bi' co' ne' thib mbi' loo thib cami loo Jesús. Mbi'a mque no thib mbii che'n thib yíiz co' ntequech lad mèn. <sup>4</sup> Co'se' ñèe mèn yende mod yòo mèn ro ryo', tant huax mèn par yòo no mèn mbi' loo Jesús, sya, añenti mtequée mèn mbi' par yéc yòo no mblit mèn tej yéc yòo par làa mèn mbi' nazal' cami mbi' loo Jesús par le'n nyòo. <sup>5</sup> Co'se' ñèe Jesús le' mèn ndxela'spe' le' Jesús ndxác teyac mèn, ndxab Jesús loo mbi' yíiza:

—Xgan', xtol lùu no xquin lùu mdyon'le'.

<sup>6</sup> Per plá mèn co' nac maistr co' ndlu' cón che'n ley co' mxo'f Moisés loo mèn co' ndub làtha, mèn mbli xtùuz le'n lezo' mèn: <sup>7</sup> ¿Chonon tatua' ndyoodi's mbi' ba'? Mbi' ba' ñii ngòc nguàal di's cón che'n Diox. Ngue ta' mbi' xyàn lezo' Diox tac yende chó mèn gác ton' xtol mèn co' ndxàp xtol. Ante Diox ndxác nton' xtol mèn. <sup>8</sup> Per yub Jesús non no nanee Jesús cón gue li mèn xtùuz. Ndxab Jesús loo mèn:

—¿Chonon tatua' nzi li gu' xtùuz, à'? <sup>9</sup> ¿Xá nee gu'? ¿Chó di's nac co' más inagànte, ndyac gu', par gaben loo mbi' yíiz ndxè', à'? ¿Ché' más inagànte naca, ndyac gu', gaben loo mbi': Xtol lùu mton'len o ché' más inagànte gaben: Goo too. Bye' camil ba'. Byàa par lizl, cà'? <sup>10</sup> Pues daa ndxab di's loo mbi' yíiz ba' no nalle' lu'en loo gu' le' daa co' mbal yáal loo izlyo' ndxè' xalque' ndxáal chol mèn, daa ndxàp con' roo no con' xèn la's niin no la's yan par ton'en xtol chol mèn loo izlyo' ndxè'.

Sya, mbere Jesús. Ndxab Jesús loo mbi' co' mque no yíiz becha:

<sup>11</sup> —Na ñibe' lool. Goo too. Fthùuz dáa co' ngo'thl. Bye' dáa. No tee càa ned, byàa par lizl.

<sup>12</sup> Leque hora, ngo too mbi' co' mque no yíiz bech. Mxen mbi' ned. Ngro' mbi' loo ryete mèn co' nziri' tya. Ndyàa mbi' par liz mbi'. Por cona, ryete mèn ante mbui' no ante gunaa. No ngurez mèn Diox. Ndxab mèn:

—¡Ay, Dio's! Dib lal nzi nu' loo izlyo' tarte hui' nu' con' co' tatua' ndxàc ba'.

*Jesús ndxab loo thib mbi' co' ngro' lèe Leví: Ftoo nque xísen. Ya' nda na'.*

*(Mt. 9.9-13; Lc. 5.27-32)*

<sup>13</sup> Ngoloa, ngua Jesús ro lagun co' nziri' ro xyòn mèn che'n làaz mèn galile tedib vez. Tya mqueltàa huax mèn loo Jesús. Le' Jesús na, mblu' cón che'n di's ndac che'n Diox loo mèn. <sup>14</sup> Láth nda riid Jesús par neda, gunèe Jesús ndub thib mbi' co' lèe Leví co' nac xgan' thib mbi' co' lèe Alfe. Leví ndub co'te' ndyee thix mèn tmi cón che'n contribución. Jesús ndxab loo Leví:

—Leví, goo too. Ftoo nque xísen. Ya' nda na'.

Sya, ngo too Leví. Mblá' Leví zin' Leví. Nda no Leví Jesús.

<sup>15</sup> Nde nxon', ngòc thib con' loo Jesús. Láth gue yuhua Jesús sa yèth liz Leví, anze'f thib mèn co' ndli cobrar cón che'n contribución mqueltàa, no huax mèn co' ngòp xtol, loo Jesús. No thidte mdub mèn loo mèn con Jesús no con myen' xin' mté'th Jesús. Le'pe' le'n huiza, anze'f huax mèn mqueltàa loo Jesús. Mdoo nque mèn xís Jesús. <sup>16</sup> Co'se'

ñèe mèn co' nac maistr co' ndlu' cón che'n ley co' mxo'f Moisés loo mèn no mèn che'n xley' farise le' Jesús thidte ndub yuhua no rye mènà loo mes, ndxab mènà loo myen' xin' mté'th Jesús:

—¿Xá mod ale thidte ngue yuhua maistr gu' no ale thidte ngue yu no maistr gu' mèn co' ndli cobrar cón che'n contribución no con mèn ye'rsin' co' anze'f thib xtol ndxàp ba', à'?

<sup>17</sup> Co'se' mbìn Jesús tataa ndxàb mènà loo myen' xin' mté'th Jesús, yub Jesús ndxab loo mènà:

—Mèn co' ndyac huen nzo lezo' mèn no ndyac mèn yende chó yíiz nden' mèn, mènà ndyac inquinte mènà doctor par teyac doctor mènà. Ndxé'leque', mèn co' nden' yíiz, mènà nden' naquinque' mènà doctor par teyac doctor mènà. Hui' gu' nexa. Na ne'ngalte loo izlyo' ndxè' par bezen no cuin mèn co' nden' nac mèn mèn huen. Ndxé'leque', daa ndal loo izlyo' ndxè' par bezen no cuin mèn co' nden' nac mènà mèn ye'rsin' no mèn co' nden' nac mènà mèn co' ndxàp xtol loo Diox.

*Ndxep mèn mnibdi's loo Jesús chonon imbe xlatte Jesús con myen' xin' mté'th Jesús.*

*(Mt. 9.14-17; Lc. 5.33-39)*

<sup>18</sup> Thib vez ngòc thib con'. Co'se' ngure xlat myen' xin' mté'th Juàn Bautist no myen' xin' mté'th mèn xley' farise, mbi'th plá mèn loo Jesús. Mnibdi's mènà loo Jesús:

—¿Chonon mbe xlat myen' xin' mté'th Juàn Bautist no myen' xin' mté'th mèn xley' farise per myen' xin' mté'th lùu imbe xlatte, à'?

<sup>19</sup> Jesús mcàb loo mènà. Ndxab Jesús:

—¿Ché' ngue li gu' xtùuz nzo mod cue xlat mèn co' ngòc convid par ya thuhua mèn co'te' mselya' thib ned myen' co' mselya' láth nzi mènà liz myen' con myen' co' mselya'a, cà'? Yende xàa. Chele' myen' co' mselya'a nziri' con mèn co' ngòc convida, yende mod cue xlat mènà, ey. <sup>20</sup> Per co'se' zin hor bii myen' co' mselya'a, sya, cue xlat mèn co' ngòc convida.

<sup>21</sup> Nde niin thib con' loo gu': Yende chó mèngot nzo co' co bdè' thib le' lar' cub loo thib lar'can' gox. Tac chele' lar'can' goxa yo bdè' lar' cub, le' sya, co'se' yech lar'can' goxa, lar' cub co' nzo bdè' lar'can' goxa ched yèe lar'can'a. Le' sya, lar'can'a más naroo ryed. <sup>22</sup> No ne' ne' co' mèn mezcàl co' diz ngro' palenc le'n thib garrafón gox co' nalé'le'. Tac thib descuid mezcàl li par tolo lyé' garrafón gox co' nalé'. Le' sya, tataa mod gac perdid mezcàl no gac perdid garrafón, ne. Cona, ngue niin loo gu': Más huen gaca co' mèn mezcàl co' diz ngro' palenc le'n garrafón cub par ne'gàcte perdid mezcàl no par ne'lyé'de garrafón, ne.

*Myen' xin' mté'th Jesús mcho' bacdò che'n triu thib huiz sabd.*

*(Mt. 12.1-8; Lc. 6.1-5)*

<sup>23</sup> Thib huiz sabd co' ngòc huiz descans tiempa, Jesús nda riid co'te' nax thib le' yòo co'te' nzo'f ña' triu con myen' xin' mté'th Jesús. Le' myen' xin' mté'th Jesús na, mtlo mcho' bacdò triu. No ngobya' myen' bacdò triu. No mbla' myen' mbii loo nzob triu par ryo yix loo nzob triu par hua myen' nzob triu. <sup>24</sup> Le' sya, mèn xley' farise co' nzo làth mèn co' nda nque xís Jesús ndxab loo Jesús:

—Jesús, hui' nexa. ¿Chonon ndli myen' xin' mté'th lùu zin' co' indxàalte li mèn huiz descans, à'?

<sup>25</sup> Sya, mcàb Jesús. Ndxab Jesús loo mèn xley' farisea:

—Aa, ¿ché' nec thib vez tarte lab gu' loo libr co' nac xti's Diox, co'te' nda' cuent cón che'n David co' ngòc rey póla, con' co' mbli David thib vez co'se' mblyan' David con mèn co' mblyath no David ned mque tee David, cà'? David mblyan' no mquinque' hua David con mènà. <sup>26</sup> David ngòo le'n templ le'n tiemp co'se' ngòc Abiatar jef che'n nguley' co' más mnibe' loo rye nguley'. Ale mxen David pan co' ngòc pan co' mbec mèn loo mes le'n templ, co' nee di's, mbec mèn pan loo Diox. Pana ante nguley' ndxàp permis par hua nguley' pana tiempa. Mda' David pana nduhua mèn co' ngure no David, ne.

<sup>27</sup> Ndxab Jesús loo mènà, ne:



—Diox mtan' thib huiz co' nac huiz sabd par ne'lidle mèn zin' co' mbyan' tub co' ne'ngácte ntelo mèn le'n sman, no par gác con' ndac loo Diox, no par li mèn descans. Per ne'ntan'te Diox huiz sabd par ñibe' yèe mèn loo xtàa mèn loo co' nac costumbr co' nzi no mèn no co' mbed no mèn. <sup>28</sup> Por cona, daa co' mbal yáal loo izlyo' xalque' ndxáal chol mèn loo izlyo', daa ndxàp con' la's niin no la's yan par ñibe'en loo mèn cón ndxàal li mèn huiz sabd co' nac huiz descans.

### 3

*Jesús mteyac thib mbi' co' mque no sa ya' biiz.*

*(Mt. 12.9-14; Lc. 6.6-11)*

<sup>1</sup> Mbere Jesús, ngòo Jesús le'n thib sinagog co' ndub le'n thib yèez par neda. Làth mèn co' ngo le'n sinagoga, ngo thib mbi' co' nayíiz sa ya'. Ya' mbi'a yende mod huin. No yende mod ga'. <sup>2</sup> Látha, xèe nzi la's mèn loo Jesús par ñèe mèn ñeene' ché' teyac Jesús ya' mbi'a huiz sabd co' nac huiz descans par tataa mod cua'n mèn mod xá mod quexù' que' fals mèn Jesús. <sup>3</sup> Sya, Jesús ndxab loo mbi' co' nayíiz ya'a:

—Goo too co'te' ndubl ba'.

<sup>4</sup> Sya, ndxab Jesús loo mèn co' xèe nzi la's loo Jesús:

—¿Xá nee gu'? ¿Ché' nda' ley co' mxo'f Moisés loo mèn lugar li mèn con' ndac o li mèn con' ye'rsin' le'n huiz co' nac huiz descans co' nac huiz sabd no ché' nda' ley lugar loo mèn telá' mèn thib mèn loo con' ryes o ché' nda' ley lugar guth mèn thib mèn le'n huiz descans co' nac huiz sabd, cà'? Fcàb gu' loon, ey.

Per ndxe'leque', mèn ne'ngácte ncàb loo Jesús. Ale mbyau' ro rye mèn. <sup>5</sup> Sya, ngocloo Jesús mbui' Jesús loo mèn. No mxi lezo' Jesús con mèn tac ne'nglâa huente di's co' ndxab Jesús le'n lezo' mèn. No ne'ngaa'dte mèn di's co' mbez Jesús loo mèn. Sya, ndxab Jesús loo mbi' yíiza:

—Ftega' ya'l, ey.

Sya, mtega' mbi' ya' mbi'. Ngoloa, ale chàa, mbyac ya' mbi'. <sup>6</sup> Ngoloa, ngro' mèn co' nac mèn xley' farise. Mtlo mèn, mdoodi's mèn con mèn co' nac partid che'n mèn herodist par cua'n ryop ned mèn mod xá mod guth mèn Jesús.

*Trè' ndlu' cón che'n xá mod anze'f huax mèn mqzeltàa loo Jesús ro lagun.*

<sup>7</sup> Jesús nda co'te' nziri' lagun gaxte co'te' nziri' yèez co' lèe Capernaum con myen' xin' mté'th Jesús. No anze'f thib mèn gulàaz che'n làaz mèn galile nda nque xís Jesús. <sup>8</sup> Co'se' mbìn mèn le' Jesús ndli yalguzye' roo no yalguzye' xèn loo chol mèn, anze'f thib mèn gulàaz che'n làaz mèn jude, no mèn ciudadpe' Jerusalén, no mèn gulàaz che'n làaz mèn idume, no mèn yèezya' co' nziri' par ned ndlyen huiz par ned ndri'th yó'be' Jordán, no mèn gulàaz che'n làaz mèn ciuda Tir, no mèn gulàaz che'n làaz mèn ciuda Sidón, mbi'th rye mèn loo Jesús par hui' mèn no ñèe mèn cón ndli Jesús. <sup>9</sup> Por cona, co'se' mqzeltàa huax mèn loo Jesús, ndxab Jesús loo myen' xin' mté'th Jesús ya cua'n myen' thib yòoyaa par yòo thidte Jesús le'n yòoyaa par ne'tí'de mèn arid Jesús. <sup>10</sup> Tac Jesús mteyacle' huax mèn yíiz. Cona, ryete mèn co' ndyac yíiz ndxezi'f no ndxega's Jesús no nzi mchep mèn xtàa mèn par ante gàal mèn Jesús, sya, yac mèn. <sup>11</sup> Co'se' ñèe mèn co' mque no xpíi ye'rsin'a Jesús, xpíi ye'rsin' co' nzo loo mèn mbli par mdub xib mèn loo Jesús. No cabii mbez yèe mèn loo Jesús. Mbez mèn:

—U' nacpe' xgan' Diox.

<sup>12</sup> Per Jesús mnibe' yèe loo xpíi ye'rsin' co' ngo loo mèn. Ndxab Jesús loo xpíi ye'rsin'a:

—Ñibe'en loo gu' yende chó loo gabte gu' chó nac daa.

*Jesús ngue go' xà' si' fchop myen' làth mèn par hue' myen' di's cón che'n Jesús.*

*(Mt. 10.1-4; Lc. 6.12-16)*

<sup>13</sup> Ngoloa, ngua quée Jesús loo thib yii co' ndub gaxte tya. Ngurez Jesús mèn co' mblya's Jesús mcui Jesús. Sya, ngua gax mèn co'te' ndub Jesús. <sup>14</sup> Ngoloa, mblec Jesús si' fchop myen' no mblo' xà' Jesús si' fchop myen' par mque tee no myen'a Jesús no par tel' Jesús

myen'a par te'th myen'a no par co myen'a yalbàn cón che'n di's ndac che'n Diox loo mèn. <sup>15</sup> Jesús mbli par mque no myen' con' la's nii myen' no con' la's ya' myen' par ante ñii myen' loo xpíi ye'rsin', ryo xpíi ye'rsin' loo mèn. <sup>16</sup> Ryete si' fchop myen' co' ngòc nerleque' myen' co' mcai Jesús, myen'a lèe taandxè': Ner mbi' co' Jesús mcai lèe Mon. Loo Mon mda' Jesús tedib lèe co' lèe Pedr. <sup>17</sup> No ngurez Jesús Cob no Juàn co' ndxàc ryop hues xgan' thib mbi' co' lèe Zebede. Jesús mdub lèe ryop hues myen' na, Boanerg, co' nee di's, anze'f navez yéc myen' co'se' ndyoodi's myen'. <sup>18</sup> Xísa ngurez Jesús Ndech, Lip, Bartol, Mate, Max, Cob co' ngòc xgan' tedib mbi' co' lèe Alfe. No ngurez Jesús Tade, no tedib mbi' co' lèe Mon co' ngòo loo thib ned mèn co' ngro' lèe partid cananist. <sup>19</sup> No lult ngurez Jesús Jud Iscariot. Jud ngòc leque thib myen' xin' mté'th Jesús co' mda'xù' Jesús loo mèn ye'rsin' yiloa.

*Mèn ngue quexù' ngue que' fals Jesús le' Jesús ndxàp con' la's nii Jesús no la's ya' Jesús por cón che'n Beelzebú.*

(Mt. 12.22-32; Lc. 11.14-23; 12.10)

Ngoloa, ngòo Jesús liz thib mbi' con myen' xin' mté'th Jesús. <sup>20</sup> Le' mèn co' mbìn cón che'n Jesús na, mqueltàa mèn loo Jesús axta ne' ne' ngác nghua no Jesús myen' xin' mté'th Jesús tant thib mèn mqueltàa. <sup>21</sup> Co'se' mbìn mèn guliz Jesús cón ngue lí Jesús no con' co' ndxàc loo Jesús, mbi'th mèn loo Jesús par hue' yèe mèn Jesús tac mbez mèn no ndyoodi's mèn le' Jesús nquée mbii yéc.

<sup>22</sup> Lomisque' ne, mèn co' ngòc maistr co' ndlu' cón che'n ley co' mxo'f Moisés loo mèn, co' nde par ned ciuda Jerusalén no co' nac mèn co' nzo làth mèn co' nde nque xís Jesús, mbez mèn loo mèn co' mqueltàa loo Jesús:

—Beelzebú co' nac jef che'n rye xpíi ye'rsin' ngue tee no mbi' ndxè'. No por cón che'n con' roo no con' xèn co' ndxàp Beelzebú la's nii Beelzebú no la's ya' Beelzebú ngo' mbi' xpíi ye'rsin' loo mèn.

<sup>23</sup> Sya, ngurez Jesús mèn co' ndlu' cón che'n ley co' mxo'f Moisés loo mèn. Mtetac Jesús thib di's loo mèn. Ndxab Jesús:

—¿Xá mod leque Mebizya co'pe' Mebizya loo mèn, à'? ¡Máa yob yéc gu', na! <sup>24</sup> Anggab na'i, chele' mèn co' ñibe' loo thib gobiern, gác mèn chop partid no cue yoo ryop partid mèn, le' sya, gobierna yende mod tolo xec no yende mod tolo yo gobiern, ¿lé'?

<sup>25</sup> Lomisque' ne, chele' thib ned mèn guliz co' nzo ban thib yòo, tlo gác mèn guliza chop ned mèn por nzi yoo mèn guliza, yende mod tolo xec mèn guliza par yo ban mèn guliza thidte yòo par tolo gác mèn thib nedte mèn, ¿lé'? <sup>26</sup> Lomisque' ne, chele' Mebizya bix yath loo cón che'n Mebizya, yende mod tolo cue no yo Mebizya. Ale ndxe'leque', lyux Mebizya thidtene.

<sup>27</sup> Lomisque' ne, yende chó mèn gác yòo liz thib mbi' co' nac mbi' tín' par li huan' mèn cón che'n mbi' liz mbi' chele' mèn ne'quedó'de mbi' tín'a ner. Per chele' mèn ner quedó' nii mbi' no ya' mbi', le' sya, tataa mod lique' mèn gan li huan' mèn che'n mbi' liz mbi'.

<sup>28</sup> Na ngue nii tedib con' co' nac con' licpe' loo gu', ne: Nzoque' mod tyon' rye xquin mèn no xtol mèn no ryethe di's co' nac di's ye'rsin' co' ndyoodi's mèn loo xtàa mèn.

<sup>29</sup> Per mèn co' ñii ngòc nguàal con' cón che'n Xpii Natú', yende mod tyon' xtol mèn thidtene. Ndxé'leque', ndxàp mèn dol thidtene par tetii Diox mèn yiloa.

<sup>30</sup> Tataa mtetac Jesús rye di'sa loo mèn tac mèn mbez nzo thib xpíi ye'rsin' loo Jesús.

*Xna' Jesús no myen' huespe' Jesús ngua cua'n Jesús.*

(Mt. 12.46-50; Lc. 8.19-21)

<sup>31</sup> Ngoloa, mzin xna' Jesús no myen' huespe' Jesús loo Jesús co'te' nzo Jesús. Per ne'ngòode xa' par le'n nyòo. Par fuer no maste ngure xa'. Ndxab xa' loo mèn co' nziri' tya:

—Guuz gu' loo Jesús yi'th Jesús ndxè'.

<sup>32</sup> Mèn mteri'th di's par le'n nyòo. Le' sya, plá mèn co' nzi dib vult loo Jesús ndxab loo Jesús:

—Tad, xna' U' no myen' huespe' U' nziri' fuer. Ngue bez xa' U' par tyoodi's no xa' U'.

<sup>33</sup> Per Jesús ndxab loo mènà:

—¿Ché' ndlya's gu' niin loo gu' chó mèn, lìcque', nac xal xnan no myen' huesen?

<sup>34</sup> Ngoloa, mbui' Jesús loo mèn co' nziri' dib vuilt loo Jesús. Ndxab Jesús loo mènà:

—Niin loo gu' chó mèn nac xal xnan no xal myen' huespe'en. Ryete gu' co' nziri' loon ndxè' lalque' nac xal xnan no nac gu' xal huesen. <sup>35</sup> Tac chol mèn co' ndli xal nee lezo' Diox, mènà nac xal huesen. Mènà nac xal ftanen. No nac mènà xal xnan.

#### 4

*Jesús ngue tetac loo mèn xá mod ngo thib mbi' bin.*

*(Mt. 13.1-9; Lc. 8.4-8)*

<sup>1</sup> Mbere Jesús. Mtlo Jesús, mbli' Jesús mèn ro lagun co' nziri' tya. Anze'f thib mèn mqueltàa co'te' ngo Jesús. No de tant huax mèn mqueltàa, más quee lezo' Jesús ngua tub Jesús le'n thib yòoyaa co' ndub loo lagun gaxte ro lagun. Le mènà na, ngure loo yux ro lagun. <sup>2</sup> Sya, mtetac Jesús di's loo mèn par tataa mod lu' Jesús huax con' loo mèn no ta' Jesús cuent cón che'n di's co' ngue tetac Jesús loo mèn. Mbez Jesús loo mèn:

<sup>3</sup> —Bìn gu' di's co' tyoodizen loo gu' ndxè'. Thib mbi' co' ngo bin, mbi' ngro'. Nda lo mbi' bin. <sup>4</sup> Láth ngue go mbi' bin, ngulàa ndxep biz bin ro ned. Ngoloa, mbi'th mbin. Mblo' mbin biz bina. Nduhua mbin biz bina. <sup>5</sup> Le' tedib lugar na, láth ngue go mbi' biz bin, ngulàa ndxep biz bin loo yò quèe co'te' xhuite yò nzi'f loo quèe. Luega ngulen biz bina tac inacha'de nzi'f yò loo quèe. <sup>6</sup> Per co'se' mtlo mdín bée ro'tha, ale mbiiz ro'tha tac yende mod ngroo ngxèn lox ro'tha loo yò quèea. <sup>7</sup> Tedib lugar na, láth ngue go mbi' biz bin, ngulàa ndxep biz bin le'n huan. Per co'se' ngulen ro'tha, mtlo mblyu ro'th le'n huan tac mdín huan ro'th. Por lult ne'nda'de ro'th cosech tac mdín huan ro'th. <sup>8</sup> Le' tedib lugar na, mblo mbi' biz bin antub loo yò be'f. Tyase huen ngulen ro'th. No mbryoo mxyèn ro'th. No mda' biz bina thib huen cosech. Thib nzob bin mda' gal psi' quèe nzob. Tedib nzob bin mda' ayon quèe nzob. Tedib nzob bin mda' thib ayo quèe nzob.

<sup>9</sup> Tolo ndxab Jesús loo mènà:

—Gu' co' ndxác ta' gu' cuent co' huenleque' cón nee di's di's co' ngue toodizen loo gu' ndxè', no chele' gu' ten' cón nee di's di's ndxè', bìn gu' di's co' ngue niin loo gu' ndxè' no fta' gu' lugar yaa'd di's ndxè' le'n lezo' gu'.

*Trè' ndlu' cón mbli mtetac Jesús di's loo mèn.*

*(Mt. 13.10-17; Lc. 8.9-10)*

<sup>10</sup> Per co'se' ngolo mbii rye mèn, taate mbyan' Jesús con taandxep mèn co' be' mbyan' con ryete si' fchop myen' xin' mté'th Jesús. Mnibdi's mènà no myen' xin' mté'th Jesús loo Jesús cón nee di's di's co' mdoodi's Jesús co' mtetac Jesús loo mènà. <sup>11</sup> Sya, ndxab Jesús loo mènà no loo myen' xin' mté'th Jesús:

—Por part cón che'n gu', ey, Diox angndli loo gu' par ta' gu' cuent no non gu' xá mod ndlya's Diox ñibe'pe' Diox loo mèn. Cón che'n con'a be' nzo casloo loo taamas mèn. Cona, ndxe'leque', loo mèn co' tarte tyal yila's par ta' mèn lugar ñibe'pe' Diox loo mèn, na ntetac di's loo mènà par tataa mod ndyoodiz non mènà. <sup>12</sup> Tataa ndlin par gàca co'se' hui' mènà loo cón chenen, con'a ndli gác mènà xal mèn co' ingüi'de. No co'se' gòn mèn di's co' mbezen, gác mènà xal mèn co' ne'ta'de cuent cón che'n di's co' mbezen par tataa mod ne'lyàade yéc mènà no ne'lyàade lezo' mènà no ne'se'de mènà mod co' ndxàp mènà par ne'tyon'te xtol mènà.

*Jesús ngue ta' cuent cón nee di's cón che'n biz bin co' ngue go mbi'.*

*(Mt. 13.18-23; Lc. 8.11-15)*

<sup>13</sup> Tolo ndxab Jesús loo mènà no loo myen' xin' mté'th Jesús:

—¿Ché' no gu' ne'nda'de cuent cón che'n di's co' mtetaquen loo gu', cà'? Chele' gu' ne'nda'de cuent cón nee di's co' ngolo guniin loo gu'a, ¿xá mod ta' gu' cuent no ten' gu' cón che'n taamas di's co' tolo tetaquen loo mèn, sya? <sup>14</sup> Di's co' ngolo mtetaquen loo

mèna nee di's ndxè': Mbi' co' ngo biz bin nee di's nac xal mèn co' nde'th di's no co' ngo yalbàn cón che'n di's ndac che'n Diox. <sup>15</sup> Nzo ndxep mèn co' nac xal nzob bin co' ngulàa ro ned. Mèna nee di's nda' mèna lugar ndxòn mèna di's cón che'n di's ndac che'n Diox. Per co'se' ndxàcle' ndxep huiz mbìn mèna di's, no queltàa yende chó mèn tolo lu' loo mèna xal tolo nda di's no xal tolo ndyee di's, látha xaste ndli Mebizya par ndxathla's mèn cón che'n di's co' mbìn mèn co' mbli mden' mèn le'n lezo' mèn xá nac co' ndlya's Diox li mèn. <sup>16</sup> Nzo taamas mèn co' nac xal biz bin co' ngulàa loo yòo quèe, co' nee di's, co'se' mbìn mèn di's ndac che'n Diox, mbìn mèn di's ndac che'n Diox dib nzo yéc mèn no dib nzo lezo' mèn. <sup>17</sup> Mèna nac xal ro'th co' ngulengà. Yende fuers lox ro'tha no ne'nxecte ro'tha arid nen tac yende pá xon' lox ro'th. Le' sya, co'se' ndxàc ngòc nguàal con' loo mèna no ndxàc yalndyub ngu's loo mèna por cón che'n di's ndac che'n Diox, sya, ntlo mèna, ndyoo xà' lezo' mèna loo cón che'n di's ndaca. <sup>18</sup> Nzo taamas mèn co' nac xal biz bin co' ngulàa le'n huan. Mèna ndxòn di's co' nac di's ndac che'n Diox. <sup>19</sup> Per látha, más ndxath ndlyux mèn loo yalgon' che'n izlyo' ndxè'. No leque mèn ndli par leque mèn nquedi mèn loo yalgon' mèn. No sate más ndlya's mèn no ndxòo yéc mèn que no mèn chol con'. Le' sya, ryete xtùuz co' más ndli mèn cón che'n con'a ndli ndxathla's mèn cón che'n di's ndac che'n Diox par tataa mod ne'gàcte mèn xal biz bin co' ta' huax cosech. <sup>20</sup> Per nzo ndxep mèn co' ndxòn cón che'n di's ndac che'n Diox, no ndyubdi's mèn co' mbez di's ndac. Mèna nac xal biz bin co' ngulàa loo yòo be'f. Nzo ndxep mèn co' nac xal thib quèe nzob co' mda' gal psi' quèe nzob. No nzo taamas mèn co' nac xal biz bin co' mda' ayon quèe nzob. No nzo taamas mèn co' nac xal bin co' mda' thib ayo quèe nzob, co' nee di's, nac nzob bina bin co' mda' más huax cosech.

*Jesús mtetac loo mèn xal nac thib lampr co' ndxòo xnii.*

*(Lc. 8.16-18)*

<sup>21</sup> Ndxab Jesús loo mèn, ne:

—¿Ché' nzo mod tub mèn thib lampr co' nzo xnii le'n thib cajón o tub mèn lampr xàn' thib lun', cà'? Yende xàa. Ndxé'leque', mèn quetal lampr gáp par tenii lampr loo mèn.

<sup>22</sup> Na nii loo gu', ne: Yende nec thib con' co' nzo casloo co' ne'ryo xo'fte loo xnaa. No yende nec thib con' co' xexte ndxàc co' ne'yathte no co' ne'yènte loo mèn. <sup>23</sup> Gu' co' ndxaa'd di's nza par ta' gu' cuent co' huenleque' cón nee di's co' ngue niin loo gu' ndxè', bìn gu' di's co' ngue niin loo gu' ndxè' no fta' gu' lugar yaa'd di's ndxè' le'n lezo' gu'.

<sup>24</sup> Ndxab Jesús loo mèn, ne:

—Huen huen bli gu' xtùuz cón che'n di's co' nzi yòn gu' nalle'que'. Tac leque mod co' ndxàp gu' no co' ndli gu' loo hues xtàa gu', leque moda gáp Diox con gu' no li Diox loo gu'. No masre' tolo zib Diox loo gu' xalque' nac co' ndli gu' loo hues xtàa gu', gu' co' nzi yon di's ndxè', que naca li gu' con' ye'rsin', que naca li gu' con' ndac. Diox lique' gàca loo mèn xalque' nac con' mbli mèn loo xtàa mèn. <sup>25</sup> Tac loo mèn co' nda' lugar ndxòn ndac mèn cón che'n di's ndac che'n Diox, loo mèna Diox tolo li más gòn ndac mèna cón che'n di's ndac che'n Diox yiloa. Per ndxe'leque', mèn co' indyalte no mèn co' indub nzade par tolo gòn mèn cón che'n di's ndac che'n Diox, loo mèna Diox sate li par yau' xtùuz mèn no yau' lezo' mèn par gàca loo mèn, por derech, yathla's mèn cón che'n di's ndac co' mbìn mèn no co' mde'th mèn co' ngo yalbàn cón che'n Diox loo mèn.

*Jesús ngue tetac cón che'n biz bin co' ndryoo nxyèn.*

<sup>26</sup> Ndxab Jesús loo mèn, ne:

—Mod co' ndxar' mèn no mod co' nqueltàa mèn, mèn co' ndyal yòo mèn loo cón che'n Diox par ñibe'pe' Diox loo mèn, nac xal co'se' ngo thib mbi' biz bin loo yòo. <sup>27</sup> Co'se' ngolo mblo mbi' biz bin loo yòo, nda li mbi' descans no ndxàt mbi' no ndxeche mbi' xal nac mod che'n mbi'. Látha, ndrith thib huiz no ndrith tedib huiz co'se' ñee mbi' le' biz bin ngulenle', no nzi roole' bin, no nzi xènle' biz bin. Per ne'ta'de mbi' cuent xá mod nzi roo biz bin no xá mod nzi xèn biz bin. <sup>28</sup> Per yòo co' mblo mbi' biz bina, ancualque' ndxàc ña'. Ner ndlyen ña'. Ndxeloa, ndxas bacdò ña'. Yiloa, ndryo yas lad ña'. <sup>29</sup> No co'se' mzinle'

tiemp ntlo nguus ña', ntlo moz ngro' moz par ya thop moz cosech tac mzinle' huiz dyop cosech.

*Jesús ngue tetac cón che'n biz bin mostaz loo mèn.*

*(Mt. 13.31-32; Lc. 13.18-19)*

<sup>30</sup> Ndxab Jesús loo mèn, ne:

—Nde niin tedib con' loo gu': ¿Xá nee gu' no xá nden' gu' xal nac mod co' tlo queltàa mèn par tyal mèn ñibe'pe' Diox loo mèn, à'? No ¿xá nee gu'? ¿Chó tedib con' tetaquen mod co' yòo mèn loo cón che'n Diox par ñibe'pe' Diox loo mèn, à'? <sup>31</sup> Pues mod co' tlope' Diox, ñibe'pe' Diox loo mèn gac nagabte mèn co' tlo yòo loo cón che'n Diox. No con mènate no más li yila's huax mèn loo cón che'n Diox no tyal huax mèn ñibe'pe' Diox loo mèn co' nac che'npe' Diox xal thib biz bin mostaz co' iñaade naroo co' ngo mèn loo yòo. Gu' ñee le' biz mostaz nac thib biz más bix co' nzo loo rye biz bin, ¿lé'? <sup>32</sup> Tac co'se' ngo mèn biz huan mostaz loo yòo, ndlyen huan mostaz. No más ndryoo nxyèn huan mostaz leque taamas huan no loo con' nayèe co' ngo mèn bin. Le' sya, axta mbin bé' nde càl loo huan mostaza.

*Jesús mtetac cón che'n di's ndac che'n Diox loo mèn thib mod tedib mod.*

*(Mt. 13.34-35)*

<sup>33</sup> Tataa mod mblu' Jesús mèn cón che'n di's ndac che'n Diox con huax di's co' mtetac Jesús loo mèn par gòn ndac mèn di's co' nzote mod gòn mèn no co' nzote mod más ta' mèn cuent cón che'n di's ndaca. <sup>34</sup> Nec thib di's ne'ndoodi'ste Jesús loo mèn chele' Jesús intetacte di's loo mèn. Per ndxe'leque', loo myen' xin' mté'th Jesús más ndoo lite mda' Jesús cuent loo myen' no nambiite ngo xo'f Jesús cón che'n di'sa loo myen'.

*Ante gunii Jesús no mde'f Jesús ya' Jesús loo mbii no loo ol che'n nít loo lagun, xègà nguled mbii no nguled ndxetoo ol loo nít loo lagun.*

*(Mt. 8.23-27; Lc. 8.22-25)*

<sup>35</sup> Leque huiza co'se' ngulàa yál' izlyo', Jesús ndxab loo myen' xin' mté'th Jesús:

—Ya' gu' nda na' tedib lad ro lagun ba', ey.

<sup>36</sup> Sya, taate mblá' myen' xin' mté'th Jesús mèn tya. Mbe' myen' Jesús le'n thib yòoyaa co' ndub loo lagun tya. No mdoo nque taamas mèn, co' mque no yòoyaa tya, xís Jesús par thidte nda no mèn Jesús. <sup>37</sup> Per láth ngue tetee myen' yòoyaa loo lagun, mtlo mxyo'f thib mbiido' loo lagun no ale ngo too ol nít loo lagun. No ndoo yòole' nít le'n yòoyaa axta ndoo zèle' nít le'n yòoyaa. <sup>38</sup> Láth ndxàc con'a, ale le'le' mde mcal' Jesús. Nax yàt Jesús par xís barc loo thib almad. Sya, yende izlyo', mblo' myen' mcal' loo Jesús. Ndxab myen':

—Maistr, ¿ché' indyóode U' yòoyaa na' ngue dep le'n nít, cara?

<sup>39</sup> Sya, ngo che Jesús. Gunii Jesús loo mbii no loo nít co' ndxe too loo lagun. Ndxab Jesús:

—Xèe gure gu'.

Sya, por derech, xèe ngure nít loo lagun. No xèe ngure mbii. <sup>40</sup> Ngoloa, ndxab Jesús loo myen' xin' mté'th Jesús:

—¿Chonon susque' anze'f nzyeb gu', à', ey? ¿Xá mod susque' indxàpte gu' yalxla's con daa, yey?

<sup>41</sup> Per myen' xin' mté'th Jesús sate más mzyeb. No mbez myen' loo xtàa myen':

—¿Chó mbi' nac mbi' ba', cara? ¿Xá mod ale axta mbii no nít ndxòn ro mbi' ba' no ndubdi's mbii no nít ro mbi' ba'?

## 5

*Trè' ndlu' cón che'n thib mbi' che'n yèez Gadar co' mque no huax xpíi ye'rsin'.*

*(Mt. 8.28-34; Lc. 8.26-39)*

<sup>1</sup> Pues mzin Jesús tedib lad ro lagun co' nziri' loo xyòn mèn che'n làaz mèn gadar con myen' xin' mté'th Jesús. <sup>2</sup> Per texal ngro' Jesús le'n yòoyaa, ngro' thib mbi' co' nzo casloo



le'n armit panteón loo Jesús. Loo mbi'a ngo huax xpíi ye'rsin'. <sup>3</sup> Mbi'a ngo ban le'n armit panteón. No yende chó mèn ngli gan tyen mbi' par tub dó' mèn mbi'. No ne' ne' yen chó mèn ngác quedó' mèn mbi' con caden. <sup>4</sup> Huax vez mquedó' mèn ya' mbi' no nii mbi' con caden per ale ndli mbi' gan ncho' mbi' caden. Ale thib le' thib le' ndli mbi' caden. No yende chó mèn ngác li gan par gác nado' mbi'. <sup>5</sup> Nque tee bez yèe mbi' ze no yál' le'n yi'x no le'n huan no le'n armit thebol le'n panteón. No ale leque mbi' nguín quèe lad mbi' co'se' nquée mbii che'n xpíi ye'rsin'a mbi'. <sup>6</sup> Per co'se' gunèe mbi' tithre' nde Jesús, mque' mbi' carre. Mdub xib mbi' loo Jesús. No mcòo' mbi' yéc mbi' loo Jesús. <sup>7</sup> Sya, mbli xpíi ye'rsin' ngrozèe mbi' cabii. No mbli xpíi ye'rsin' ndxab mbi' loo Jesús:

—Jesús, xgan' Diox roo Diox xèn co' ñibe' loo ryethe con', ¿chonon nde U' co'te' nzo nu' ndxè', à'? Na'b nu' loo U', por lèe che'n Diox, ne'tetiide U' nu', ndee U'.

<sup>8</sup> Tataa mbli xpíi ye'rsin' ndxab mbi' loo Jesús tac Jesús ngue bezle' no ngue ñibe'le' loo xpíi ye'rsin' par ryo xpíi ye'rsin' loo mbi'.

<sup>9</sup> Sya, mnibdi's Jesús loo mbi'. Ndxab Jesús loo mbi':

—¿Chó lèel, à'?

Le' sya, xpíi ye'rsin' co' nzo loo mbi'a mbli ndxab mbi':

—Nu' lèe Legión tac anze'f huax nac nu'.

<sup>10</sup> Sya, xpíi co' nzo loo mbi'a mbli nalyat ndxab mbi' loo Jesús par ne'tel'te Jesús xpíi ye'rsin'a tedib ned tedib lad le'n yèezya' co' nac làaz mèn gadar. <sup>11</sup> Le'xque' tya ndub thib yii co'te' ngue tee yuhua thib partid nguch. <sup>12</sup> Rye xpíi ye'rsin' co' ngo loo mbi' mbli ndxab mbi' loo Jesús:

—Ftel' U' nu' loo nguch co' nzi tee go' par yòo nu' loo nguch.

<sup>13</sup> Sya, mda' Jesús lugar loo xpíi ye'rsin'a. Ngro xpíi ye'rsin'a loo mbi'. Ngòo xpíi ye'rsin'a loo partid nguch. No por loo rye nguch ne'que' chop mil nguch co' nzi tee yuhua tya. Per co'se' ngòo xpíi loo partid ngucha, ryete ngucha mbyùb lad yiia. No ale ngulaa ryete ngucha le'n lagun. Tya nguáp rye nguch nít. No nguth rye chop mil ngucha.

<sup>14</sup> Le' sya, mèn co' ngue queno ngucha mxon' tant mzyeb mèn. Ngua ta' mèn cuenta loo mèn làth yèez no loo mèn co' ngue zin' huan. Sya, mbi'th tee hui' rye mèn con' co' ngòc. <sup>15</sup> Co'se' mzin mèn co'te' nzo Jesús, gunèe mèn ndxe'sleque' ndub mbi' co' mque no mbii che'n rye xpíi ye'rsin'a. Noc xable' mbi' ndub mbi'. Sya, sate más mzyeb mèn. <sup>16</sup> Mèn co' gunèe mbi' ndoore' teyac Jesús mbi', mèn mda' cuent con' ngòc loo mbi', mbi' co' mquée mbii che'n xpíi ye'rsin'. No mda' mèn cuent xalque' ngòca loo nguch. <sup>17</sup> Le' sya, mèn mtlo ndxab loo Jesús li Jesús favor ryo' Jesús, bii Jesús làaz mèn par ned nde Jesús.

<sup>18</sup> Co'se' gunèe mbi' co' mque no xpíi ye'rsin'a ngòo Jesús le'n yòoyaa par bii Jesús tya, nalyat mna'b mbi' di's loo Jesús par ta' Jesús lugar tyoo nque mbi' xís Jesús par tyee no mbi' Jesús. <sup>19</sup> Per ndxe'leque', Jesús ne'ndalte no ne'nda'de Jesús lugar nga nque mbi' xís Jesús. Ale le'le' ndxab Jesús loo mbi':

—Byàa par lizl con mèn co' nac mèn gulizl ba'. No fta' cuent loo mèn ryete con' co' mbli nole' Tad Diox lùu. No fta' cuent xá mod mblyat lezo' Tad Diox gunèe Tad Diox lùu, ndee.

<sup>20</sup> Sya, mxen mbi' ned. Ndyàa mbi'. Mtlo mbi', mda' mbi' cuenta loo mèn co' nac che'n rye yèezya' che'n làaz mèn decápolis ryete con' xal mbli Jesús loo mbi'. Le' ryete mèn yèez co' mbìn di's co' mda' mbi' cuenta na, ante mbui' rye mèn no ante gunaa rye mèn loo mbi'.

*Trè' ndlu' cón che'n con' co' ngòc loo rsap Jair no cón che'n thib xa'got co' mbuàal xab Jesús. (Mt. 9.18-26; Lc. 8.40-56)*

<sup>21</sup> Co'se' mbere Jesús, ndye'th Jesús, ngua Jesús par ned le'n yèezya' che'n làaz mèn gadar, ndye'th Jesús loo yòoyaa tedib lad ro lagun co' ne' lèe lagun che'n mèn làaz mèn galile. Tya, mqueltàa huax mèn loo Jesús. No por mqueltàa mèn loo Jesús tya, tyate mbyan' Jesús con mèn. <sup>22</sup> Látha, mzin thib mbi' co' ngòc jef che'n thib sinagog co' ndub le'n thib yèez co' nziri' gaxte co'te' ngo Jesús. Mbi'a ngro' lèe Jair. Co'se' gunèe mbi'

Jesús, mbii gax mbi' loo Jesús. Mdub xib mbi' loo Jesús. <sup>23</sup> No anze'f nalyat mna'b mbi' di's loo Jesús. Ndxab mbi':

—Tad, rsap daa nax tin liz. Na ndal na'b thib favor loo U'. Tyee U'. Nda na' lizen. Daa ndlyaz ante xo'f U' ya' U' lad mza' daa. Yac mza' daa. No ryo xban mza' daa.

<sup>24</sup> Sya, mxen Jesús ned. Nda no Jesús Jair par liz Jair. Le' rye mèn co' nzi no Jesús na, nda nque xís Jesús axta mdí' mènà Jesús tant thib mèn nda no Jesús. <sup>25</sup> Láth rye mènà ngo thib xa'got co' mque no yíiz co' nac yíiz ndlyath ren. Le'n rye tiemp co' ndxàc mque no xa'gota yíiza ndxàcle' si' fchop lin'. <sup>26</sup> Le'n rye tiempa, anze'f thib yalnè mden' xa'gota por mbli huax doctor remed xa'. No anze'f thib tmi mbli xa' gast axta mtho' xa'gota rye con' mque no xa'. Per ne' por chu'th ne'ngyath ndacte xa' con remeda. Ndxé'leque', sate más mxyo yíiza loo xa'gota. <sup>27</sup> Co'se' mbìn xa'gota nde'th mèn le' Jesús nde par neda, ngo xa'gota làth rye mènà par ngua gax xa' co'te' nzo Jesús, par ned xís Jesús làth mènà. Látha, xexte mbuàal xa'gota xab Jesús. <sup>28</sup> Tataa mbli xa'gota tac ndoore' ndxab xa'gota loo lezo' xa': Chele' daa ante gàal xab Jesús, ngobe'en yac daa. <sup>29</sup> Texal ngolo mbuàal xa'gota xab Jesús, mbyau' loo ren co' ndoo lath xa'. No luega mden' xa' mbyac xa' loo yíiz co' mque no xa'. <sup>30</sup> Lomisque', mden' Jesús le'n lezo' Jesús le' Diox mteyac thib mèn yíiz por cón che'n con' roo con' xèn co' ndxàp Jesús la's nii Jesús no la's ya' Jesús. Sya, chàa, mbere Jesús, mbui' Jesús par ned xís Jesús. No mnibdi's Jesús loo mènà. Ndxab Jesús loo mènà:

—¿Chó gu' mbuàal xaben par ned xísen, à'?

<sup>31</sup> Sya, myen' xin' mté'th Jesús ndxab loo Jesús:

—Tad, con que U' ñee le' mèn ngue tí' U' no mbez U' ¿chó mèn mbuàal daa par xísen, à'?

<sup>32</sup> Per Jesús mbui' ndxè' mbui' ba' loo mènà par ñèe Jesús ñeene' chó mèn mbuàal xab Jesús par mbyac mènà. <sup>33</sup> Látha, xa'gota ante nxi'th ndoo tant mzyeb xa'gota. No nanee xa'gota cón ngòc loo xa'. Sya, xex xex mbii gax xa' loo Jesús. Mdub xib xa' loo Jesús. No mda' xa' cuent rye con' co', licque', ngòc loo xa' loo Jesús. <sup>34</sup> Jesús ndxab loo xa'gota:

—Rsapa, lùu mbyacle', ndee, tac ngola'sque'l loon. Byàa. Ne'tyóodel. No huen blo lezo'l. Lùu ya ne'tolode tyac len.

<sup>35</sup> Tatabe' ngue toodi's Jesús con xa'gota co'se' mzin plá mèn guliz mbi' co' nac jef che'n sinagog co' ndub gaxte tya. Ndxab mèn guliza loo mbi' co' nac xud mza':

—Lá'a. Ya ne'tolode li xol maistr. Loo rsap lùu ngolole' guneei.

<sup>36</sup> Per Jesús ne'nglide cas di's co' ndxab mèn guliz mbi'a loo mbi'. Ndxab Jesús loo mbi':

—Ne'zyebtel por rsapl, ndee. Gola's loon no maste.

<sup>37</sup> Ne'nda'de Jesús lugar loo rye mènà par ya nque mènà xís Jesús par ned liz mbi'. No maste mbe' Jesús Pedr, no Cob, no Juàn co' nac hues Cob par ya no myen'a Jesús. <sup>38</sup> Co'se' mzin Jesús con myen' liz mbi' co' ngòc jef che'n singoga, ñèe Jesús ndxàc thib con'. No ñèe Jesús ndxón' mèn no mbez yèe mèn. <sup>39</sup> Jesús ngòo liz mbi'. No asempli Jesús, ndxab Jesús loo mènà:

—¿Susque' thib ruid ndli gu' no ndxón' gu', yoo! Por part cón chenen, mza' ba' inacte mza' co' nguth. Ndxé'leque', part cón chenen, mza' nax yàt thib mcal'guth.

<sup>40</sup> Per co'se' mbìn mènà tataa ndxab Jesús loo mènà, ale mxìis no mènà Jesús.

Sya, ndxab Jesús loo mènà:

—Bli gu' favor, gro' gu' par fuer.

Sya, ngòo no Jesús xud mza', no xna' mza', no yon myen' xin' mté'th Jesús co' ngua no Jesús par le'n nyòo co'te' nzo'f mza' loo mes. <sup>41</sup> Sya, mxen Jesús ya' mza' co' nguth co' nzo'f loo mes. Ndxab Jesús loo mza':

—Talita cumi. Di's ndxè' nee di's: Mza', na ngue nii lool: Goo che. Goo too.

<sup>42</sup> No texal ngolo tataa ndxab Jesús loo mza', ngo che mza'. No luega mdee mza'. No pente nzo mza' si' fchop lin' co'se' ngòc con'a loo mza'. Le' mèn co' ngureri'a na, ante mbui' mènà no ante gunaa mènà no ante mzyeb mènà co'se' gunèe mènà le' mza' ngro

xban. <sup>43</sup> Per Jesús mnibe' yèe loo rye mèn co' ngureri'a par ne'ta'de mènà nec thib cuent loo nec thib mèn cón che'n con' co' ngòc loo mza'a. Ngoloa, mnibe' Jesús loo xna' mza' ta' xna' mza' con' hua mza'.

## 6

*Jesús ngo plá huiz le'n yèez Nazaret.*

*(Mt. 13.53-58; Lc. 4.16-30)*

<sup>1</sup> Jesús mbii liz Jair. Mbere Jesús, ndyàa Jesús co'te' nac yèez co' nac làazpe' Jesús. Ngua no myen' xin' mté'thpe' Jesús Jesús, ne. <sup>2</sup> Co'se' ngòc huiz sabd co' ngòc huiz descans tiempa, Jesús mtlo mbli' mèn le'n sinagog mèn. Le' mèn co' mbìn di's co' mbli' Jesús na, ante ngüi' mènà no ante ñaa mènà loo Jesús. No mbez mènà loo xtàa mènà:

—¿Pá ngua té'th mbi' ba' rye di's co' ndyoodi's mbi'? No ¿pá ned ngro' co' ndxác mbi' ba' no yalguzye' co' ndli mbi', cara? <sup>3</sup> Na' nanee le' mbi' ba' nac xgan' Mari. No nac mbi' carpinter. Mbi' ba' ndxác hues Cob. No ndxác hues mbi' Chè no ndxác hues mbi' Jud no Mon. No myen'got co' ndxác fta'n mbi' nzo ban làth na' trè'.

Ale leque mèn gulàaz Jesús ndlyàa xyàn lezo' ñèe Jesús. No nden' mènà ilé'de nac con' co' ndli Jesús. <sup>4</sup> Sya, ndxab Jesús loo mènà:

—Nzo huax mèn co' ndli cas no intè'bte mènà mèn co' nde'th di's co' ndxab Diox por nac mènà mèn tith. Per chele' mèn co' nde'th di's co' ndxab Diox nac mèn gulàazpe' mèn, pà li mèn cas mèn co' nde'th di's no pà li mèn guliz mèn co' nde'th di's cas mèn co' nde'th di's xal ndxàca loon con mèn co' nac mèn gulàazpe' dàa.

<sup>5</sup> No ne'ngácte Jesús ngli Jesús nec thib yalguzye' loo mèn gulàaz Jesús. Ante mxo'f Jesús ya' Jesús lad ndxep mèn yíiz par mteyac Jesús ndxep mèn no maste. <sup>6</sup> Látha, ante ngüi' Jesús no ante ñaa Jesús loo mèn gulàaz Jesús tac thidtene indly'a'ste mènà yila's mènà loo Jesús. No indxàpte mènà yalxla's loo Jesús. Ngoloa, mque tee lu' Jesús rye mèn yèezya' co' nziri' gax loo yèez co' nac làaz Jesús.

*Jesús mtel' myen' xin' mté'th Jesús par ngua lo myen' yalbàn cón che'n di's ndac che'n Diox loo mèn.*

*(Mt. 10.5-15; Lc. 9.1-6)*

<sup>7</sup> Ngoloa, ngurez Jesús ryete si' fchop myen' xin' mté'th Jesús co' mcai Jesus. Mtlo Jesús, mtel' Jesús chop chop myen' par ya lo myen' yalbàn loo mèn. No mbli Jesús par ngòp myen' con' la's nii myen' no la's ya' myen' par co' myen' xpíi ye'rsin' loo mèn. <sup>8</sup> No mnibe' Jesús loo myen' yende cón hue' myen' co'se' tyen myen' ned ya myen'. No maste co myen' thib bro yaa ya' myen'. Ne'hue'de myen' yex lua' myen'. Ne' ne' hue' myen' tmi. <sup>9</sup> No mnibe' Jesús loo myen' que' myen' yilid co' ngòcte ñaa nii myen'. No hue' myen' ante xab myen' co' nocte myen'. Ne'hue'de myen' chop ned xab myen'. <sup>10</sup> Ndxab Jesús loo myen', ne:

—Co'se' yòo gu' liz mèn co'te' zin gu', cued gu' liz mènà axtaque' bii gu' le'n rye yèezya' ned ya gu' no axtaque' ryo' gu' le'n rye yèezya' ned ya gu'. <sup>11</sup> No chele' chó làaz mèn no liz mèn ne'tyalte mèn ta' mèn lugar yòo gu' no ne'tyalte mèn gòn mèn di's co' gab gu' loo mèn, gro' gu' liz mènà no làaz mènà. Bzib gu' yòoya's co' ndoo nii gu' loo mènà. Con'a nee di's tolo tyub quíi tyub bèel lezo' mènà por con' co' mbli no mènà gu'. Yan' cón che'n mènà loo Diox. Le' Diox tub rez cón che'n mènà co'se' gác huiza, ne. No co'se' gác huiz co' tub rez Diox cón che'n mènà, lìcpe' ba'i, na nii loo gu': Más be'te teti Diox mèn ciuda Sodom no mèn ciuda Gomor leque loo mèn yèez co' ne'tyalte ta' lugar yòo gu' liz mènà no làaz mènà.

<sup>12</sup> Sya, mxen myen' ned. Ndyàa myen'. Nda lo myen' yalbàn no nda te'th myen' cón che'n di's ndac che'n Diox loo mèn le' mèn na, ndxàal lyàa yéc no ndxàal lyàa lezo' mèn no se' mèn mod co' ndxàp mèn par lyá' mèn loo con' ryes. <sup>13</sup> Mblo' myen' xin' mté'th Jesús huax xpíi ye'rsin' loo mèn, ne. No mtà myen' aceit lad huax mèn. Mteyac myen' mèn yíiz co' mden' chol yíiz, ne.

*Trè' ndlu' xá mod mbeth mèn Juàn Bautist.*

*(Mt. 14.1-12; Lc. 9.7-9)*

<sup>14</sup> Nde nxon', mbìn Herod co' ngòc rey con'a. Per máa rye mèn nonle' cón che'n co' ngue tee li Jesús. Sya, ndxab Herod loo mèn co' ndxàc xtàa Herod co' nqueltàa no Herod:

—Peser Juàn Bautist ngro xban làth mèn nguth. Cona, ndli Juàn con' roo con' xèn loo mèn xalte nac con' co' nzo la's nii Juàn no la's ya' Juàn.

<sup>15</sup> Taamas mèn mbez:

—Lii, co' mde'th di's co' ndxab Diox, na.

Taamas mèn mbez:

—Nzo chó xa'gool co' mde'th di's co' ndxab Diox póla ngro xban.

<sup>16</sup> Co'se' mbìn Herod tataa mbez mèn, Herod ndxab loo mèn:

—Mbi'a nac Juàn Bautist co' mnibe'en ngua cho' solndad yéc, ndyaquen. No nalle' ngro xban Juàn làth mèn nguth, ngobe'en.

<sup>17</sup> Tataa ndxab Herod loo mèn tac ndoore' Herod mnibe' loo solndad ngua que' solndad Juàn lezi'f. No mtedó' solndad Juàn con caden ante por cón che'n Herodi. Herodia ngòc sa'l Lip, hues Herod ndoore'. Ale mbli Herod ngòc Herodi xal xa'gotpe' Herod. Mque no Herod Herodia xal xa'gotpe' Herod. <sup>18</sup> Tac yalquìite ndxab Juàn Bautist loo Herod:

—Herod, indxàalte que no U' xa'got hues U' ne' ne' gàal U' xa' xal xa'gotpe' U'.

<sup>19</sup> Per Herodi axta ngòc loc tant ngulàa xyàn lezo' Herodi gunèe Herodi Juàn Bautist. Axta mblya's Herodi leque hora nguth Herodi Juàn por conate no más. Per yende mod ngli Herodi gan nguth Herodi Juàn. <sup>20</sup> Herod mqenap Juàn tac Herod huen huen nanee le' Juàn ngòc thib mbi' ndac no thib mbi' nali no thib mbi' natú'. Por cona, nzyeb Herod ñèe Herod Juàn. No ne'ngla'de Herod ngli Herodi yalquìi loo Juàn. Más de cona, mastale' inden'te Herod no indxaa'dte Herod di's cón che'n con' co' ngue lu' Juàn loo Herod cón che'n Diox, ndyac lezo' Herod nque nza Herod di's co' ndyoodi's Juàn loo Herod con huen di's no con huen cuent. <sup>21</sup> Per Herodi huen ngua tac le'pe' mzyal thib mod loo Herodi par guth yèe Herodi Juàn. Tac co'se' ngóol lni co' ngòc huiz co' ngóol Herod, huiza mbli Herod thib yalhua par hua mèn co' ngòc jef loo Herod, no mèn co' ngòc commandant loo Herod, no taamas mèn co' mbli Herod cuent anze'f ntac mèn loo Herod, mèn co' nac mèn co' ñibe' loo mèn gulàaz Galile. <sup>22</sup> Le'pe' láth nzi yuhua rye mèn, ngòo mza' co' nac rsap Herodi loo mèn co' nzi yuhuaa. Nde yol' nii mza'. Nde nxon', anze'f ndyac lezo' Herod con mèn co' nzi yuhua rsèa co'se' ñèe Herod no mèn nabe'ste nde yol' nii mza' ngo mza'. Ale con gust ndxab Herod loo mza':

—Mza', bna'b con' ndlya'sl loon. Na tai càal.

<sup>23</sup> No mde'th Herod Diox loo mza' no mcàbgòn Herod di's loo mza' le' Herod ta' rye con' lya's mza' càa mza'. Ndxab Herod loo mza' axta rol làaz mèn co' ñibe' Herod ta' Herod càa mza' chele' mza' lya's càai por nabe's ndxol' nii mza' loo mèn co' mqueltàa.

<sup>24</sup> Sya, yende izlyo', ngro' mza' loo rye mèn. Ngua mza' loo xna' mza'. Ndxab mza':

—May, ¿cón ndlya's U' ña'ben loo Herod, à'?

Xna' mza' ndxab loo mza':

—Bna'b yéc Juàn Bautist loo Herod càal.

<sup>25</sup> Sya, yende izlyo', ndye'th mza' loo Herod tedib vez co'te' ndub Herod. Ndxab mza' loo Herod:

—Rey Herod, daa ndlyaz ta' U' yéc Juàn Bautist càan loo thib plat nalle'que'.

<sup>26</sup> Per co'se' mbìn Herod tataa ndxab mza' loo Herod, anze'f mxi lezo' Herod. Per máa le' Herod mde'thle' Diox loo mza', ¿lé'?, no mbìn rye mèn co' nziri' no Herod di's co' ndxab Herod loo mza', ¿lé'?, que nzo ne' ñee lezo' Herod, mbli Herod co' mblya's mza', xàa. <sup>27</sup> Lueg lueg mtel' Herod thib solndad. No mnibe' Herod loo solndad ya cho' solndad yen Juàn par ye'th no solndad yéc Juàn loo Herod. <sup>28</sup> Nda solndad. Ngòo solndad le'n lezi'f. Mblo nde'f solndad yen Juàn. No nabe'ste mdub solndad yéc Juàn loo thib plat. Ndye'th no solndad yéc Juàn loo Herod. Le' Herod na, mda' yéc Juàn loo mza'. Le' mza' na, ndoole' ngua la' yéc Juàn par mcàa xna' mza'.

<sup>29</sup> Co'se' mbìn myen' xin' mté'th Juàn le' Juàn nguthle', le' Herod mnibe' loo solndad ngua yuth solndad Juàn, ngua lit myen' thebol Juàn par ngua ca's myen' thebol Juàn.

*Jesús mbuaa ga'y mil ante mènbi'.*

(Mt. 14.13-21; Lc. 9.10-17; Jn. 6.1-14)

<sup>30</sup> Ngoloa, ndye'th ryete si' fchop myen' xin' mté'th Jesús co' ngua lu' di's cón che'n Jesús loo mèn. Mqueltàa no myen' Jesús tedib vez. Látha, mda' myen' cuent ryete con' xal mque tee li myen' no mque tee lu' myen' loo mèn ned ngua myen'. <sup>31</sup> Jesús ndxab loo myen':

—Ya' gu' nda li na' chu'th descans thib lugar co'te' ne'ñeede mèn na'.

Tataa ndxab Jesús tac anze'f thib mèn, chó mèn ndyàa no chó mèn nde loo Jesús, axta ne' ne' yen mod hua Jesús con myen' xin' mté'th Jesús mase thib le' yèth. <sup>32</sup> Sya, ante myen' xin' mté'th Jesús, no Jesús, ngòo le'n thib yòoyaa. Ngua Jesús tedib lugar xà' con myen' xin' mté'th Jesús. <sup>33</sup> Per huax mèn gunèe nda Jesús par neda. Mblibe' mènna Jesús. Ale mque' mènna carre. Nda tau' mènna loo Jesús co'te' zin Jesús. No ner mènna mzin leque Jesús con myen' xin' mté'th Jesús. <sup>34</sup> Co'se' ngro' Jesús le'n yòoyaa, anze'f thib mèn gunèe Jesús nziri'. Mblyat lezo' Jesús gunèe Jesús mènna tac nziri' prob mènna xal mbacxil' co' yende pastor co' nqueno mbacxil'. Sya, mtlo Jesús, mblu' Jesús mènna huax con'. <sup>35</sup> Per co'se' mzyèle' izlyo' huiza, myen' xin' mté'th Jesús ngua nee loo Jesús. Ndxab myen' loo Jesús:

—Tad, mzyèle' izlyo' no yende chó mèn nzo ban trè' par ya ti' mèn con' hua mèn.

<sup>36</sup> Gunii U' Diox loo mèn ba'. No yiloo, guuz U' loo mèn ya ti' mèn con' hua mèn le'n rye ranch co' nzo le'n huan no le'n rye yèez co' nziri' gax tac yende cón ngue no mèn par hua mèn.

<sup>37</sup> Per Jesús, ndxe'leque, mcàb. Ndxab Jesús loo myen':

—Gu' nee, xàa. Fta' gu' con' hua mèn ba'.

Myen' mcàb loo Jesús. Ndxab myen' loo Jesús:

—Tad, ¿xá nee U'? ¿Ché' tàal thib mil chop ayo pes pan par hua mèn ba' chele' nu' ya ti' pan par hua mèn ba', à'?

<sup>38</sup> Jesús ndxab loo myen':

—¿Plá pan ngue no gu', à'? Huaa tee hui' gu', ñeene'.

Co'se' ngua tee hui' myen', ndye'th myen'. Ndxab myen' loo Jesús:

—Pente nzo ga'y pan no chop mbèel no maste.

<sup>39</sup> Sya, mnibe' Jesús loo mènna tyub thib tant thib tant mèn ndxè' ba' ndxè' ba' loo yiixii co' nzo'f tya. <sup>40</sup> No mdub thib tant mèn, co' nee di's, thib ayo mèn no tedib tant mèn, co' nee di's, cho' psi' mèn. No tataa tolo mdub mèn ndxè' ba' ndxè' ba'. <sup>41</sup> Sya, mxen Jesús rye ga'y pana no ryop mbèela. Látha, mbui' Jesús loo bé'. Ndxab Jesús loo Diox:

—Diox quix U', Diox par pan ndxè' no mbèel ndxè' co' hua nu'.

Sya, mchì'x Jesús pana. Thib le' thib le' mbli Jesús pana. Ngoloa, mbli Jesús mbyar' pana. No mda' Jesús pana loo myen' xin' mté'th Jesús par qui'th myen' pana loo mènna. No mbli'th myen' ryop mbèel co' mbli Jesús ngòc thib le' thib le' co' mbyar' loo mènna, ne. <sup>42</sup> Nduhua ryete mènna axta plóthe. <sup>43</sup> No co'se' ngolo nduhua mènna, msè myen' xin' mté'th Jesús si' fchop cardor pan no mbèel co' mbyan' xo'f co' mbli Jesús mbyar' no co' mbli Jesús ngòc thib le' thib le'. <sup>44</sup> No loo rye mèn co' nduhua pana no mbèela ngòcque' ga'y mil mèn, ante mènbi'. Xà'que' nduhua mèngot no xà'que' nduhua myen' bix.

*Jesús nde nii loo nít loo lagun.*

(Mt. 14.22-27; Jn. 6.16-21)

<sup>45</sup> Sya, láth ngue nii Jesús Diox loo mèn, Jesús mtel' ner myen' xin' mté'th Jesús loo yòoyaa par zin myen' yèez Betsaid ndoore' zin Jesús. <sup>46</sup> Co'se' ngolo gunii Jesús Diox loo mènna, mxen Jesús ned. Nda Jesús loo thib yii co' ndub gaxte tya par cuez Jesús Diox.

<sup>47</sup> Co'se' ngulàa yál' izlyo' huiza, pente nda tee myen' grolthe loo lagun. Le' Jesús na, thidte mbyan' loo yòo biiz. <sup>48</sup> Látha, ñee Jesús xá ndxàc myen'. Ya ne'ñeede myen' xá



mod li myen' par tetee myen' yòoyaa tac ngue chep mbii yòoyaa myen' rye lad. Per co'se' ngóol coyor cuar xex xex mzin Jesús loo myen'. Nde tee nii Jesús loo nít loo lagun. Mblya's Jesús sangnguri'th Jesús loo myen' co'te' ndub ca' yòoyaa myen' loo lagun. <sup>49</sup> Co'se' gunèe myen' xin' mté'th Jesús nde tee nii Jesús loo nít loo lagun, mbli myen' xtùuz con' mal ñèe myen'. Sya, mtlo myen', mbez yèe myen' <sup>50</sup> tac ryete myen' gunèe nde tee Jesús loo nít loo lagun. Per ale ne'ñeede myen' cóna. Cona, mzyeb myen'. Per Jesús gunii loo myen'. Ndxab Jesús loo myen':

—Ne'zyebte gu', ey. Blo gu' valor loo gu'. Daa na. Susque' naze'f gu', yey.

<sup>51</sup> Sya, ngòo Jesús loo yòoyaa co'te' nzo myen'. Ngoloa, xèegà nguled mxyo'f mbii. Le' myen' na, sate más mzyeb no ante mbui' myen' no ante gunaa myen' cón ngòc loo myen' xal ndee tee nii Jesús loo nít loo lagun. <sup>52</sup> Tataa ngòca loo myen' tac myen' tarte ta' cuent co' huenleque' cón che'n yalguzye' co' mbli Jesús ngòc loo pana por tatabe' naad myen' no tatabe' nguud myen'.

*Jesús ngue teyac mèn yíiz le'n yèezya' che'n làaz mèn genesaret.*

*(Mt. 14.34-36)*

<sup>53</sup> Ngoloa, tolo mtetee myen' barc. Tolo nda tee myen' axta mzin myen' tedib lad ro lagun con Jesús loo xyòn mèn co' nac làaz mèn genesaret. Ro laguna mtedó' myen' yòoyaa lad thib quèe. <sup>54</sup> Per texal ngro' no Jesús myen' le'n yòoyaa, mèn co' nzo tya lueg mblibe' Jesús. <sup>55</sup> Sya, mque' mènna carre. Ngua mènna rye yèezya' co'te' nac làaz mèn. No mtlo mènna, nde no mènna rye mèn yíiz loo cami axta co'te' non mèn nzo Jesús. <sup>56</sup> No nde no mèn mèn yíiz pál co'te' ndxòo Jesús no co'te' ndri'th Jesús, que naca ranch, que naca le'n yèez, que naca ned huan. Nguix mèn rye mèn yíiz ro ned co'te' ndri'th Jesús. No nalyat mbez mèn loo Jesús la' Jesús gàal mèn ante xab Jesús. Le' sya, ryete mèn co' ante mbuàal xab Jesús, ale mbyac mènna loo yíiz.

## 7

*Trè' ndlu' chó con' ntezab loo mèn par ndxàc mèn mèn zab loo Diox.*

*(Mt. 15 20)*

<sup>1</sup> Látha, mbii gax plá mèn co' nac mèn xley' farise no ndxep mèn co' nac maistr co' ndlu' cón che'n ley co' mxo'f Moisés loo mèn loo Jesús. Mènna nac mèn ciuda Jerusalén. Nde mènna par ned ciuda Jerusalén loo Jesús. <sup>2</sup> Mènna gunèe le' ndxep myen' xin' mté'th Jesús ne'ntechte myen' ya' myen' par tyub myen' hua myen'. Nzi yuhua myen' con ya' myen' co' ne'ntechte myen', co' nee di's, taate ya' myen' nzi yuhua myen' pan. Ne'ntechte myen' ya' myen' xal nac costumbr co' ngue no mèn xley' farise ntech mèn ya' mèn ndoore' hua mèn. No por conate mquexù' mque' fals mènna myen' loo Jesús. <sup>3</sup> Tac mèn co' nac mèn xley' farise no ryete mèn nación Israel nzi no costumbr no mbed no mènna costumbr che'n mèngool. Tac chele' mènna ne'techte ya' mèn lilleque' ndoore' tyub mènna par hua mènna, más quee lezo' mènna ne'huade mènna. <sup>4</sup> No co'se' mbere mènna, ndye'th mènna, ngua ti' mènna loo xbi', ne'huade mènna chele' mènna ne'lidle xal nac mod che'n costumbr co' ndxàp mènna co' ntech mènna ya' mènna. No nzore' más mod che'n costumbr co' mbed no mènna co' nac ntech mènna taz, plat, camplor, no taamas yèt co' ndli zin' mènna cosin. No masre' con' ndli mènna. Ale axta lun' co'te' ndxàa mènna, ntech mènna. <sup>5</sup> Sya, mèn co' nac mèn xley' farise no mèn co' nac maistr co' ndlu' cón che'n ley co' mxo'f Moisés loo mèn, mnibdi's mènna loo Jesús. Ndxab mènna loo Jesús:

—¿Chonon indlide myen' xin' mté'th lùu cas costumbr co' mtan' mèngool loo na', à'? Ale tua'te ya' myen' ndxuhua myen' xít myen' no lua' myen'. Intechte myen' ya' myen'.

<sup>6</sup> Jesús mcàb loo mènna. Ndxab Jesús:

—Aa. Yende con' niin loo gu'. Bien lal ro Sayi co'se' ndxab Sayi no ngro' di's ro Sayi co' mde'th di's co' ndxab Diox le' gu' anze'f ndxác ntembii gu' ro gu' no ntembii gu' xti's gu' loo Diox co'se' mque' Sayi ye's cón che'n gu' loo libr co' nac xti's Diox co' mbez taandxè':

Mèn ba' mbez di's guryath no di's guryèn loon con di's co' ndryo' ro mèn. Per con' co' nzo le'n lezo' mèn no con' co' ndli mèn xtùuz ndlu' loon pà li mèn con' guryath no con' guryèn loon. No pà li mèn cas loo cón chenen.

<sup>7</sup> Yende cón ntac co' ndli mèn co'se' ncòo' mèn yéc mèn loon no co'se' mbez mèn lèen, ne, tac ley co' ndlu' mèn no yalñibe' co' ndxàp mèn nac xley' no yalñibe' che'n mèn izlyo'pe' ndxè'.

<sup>8</sup> Guniin di's ndxè' loo gu' tac gu' ndlá' con' co' nac yalñibe' che'n Diox par ne'lide gu' cas co' ñibe' Diox loo gu' par li gu'. Más ndli gu' par ndli gu' costumbr che'n mèngool co' mbed no gu' co' nac co' ntech mèn camplor no taz no plat. No ndli gu' taamasre' con' co' nac leque xal con' ndli gu'.

<sup>9</sup> Tataa ndxab Jesús loo mèn:

—Cona, ngue niin loo gu': Más ndlá' gu' co' nac yalñibe' che'n Diox thib lad loo gu' par tolo ndli gu' ryethe con' co' nac costumbr co' mtan' xudgool gu' loo gu'. <sup>10</sup> Moisés mnibe' loo mèn nación Israel tiempa co'se' ndxab Moisés taandxè':

Gòp gu' mod gunèe gu' xud gu'. No gòp gu' mod gunèe gu' xna' gu'. Le' mèn co' ñii yèe ñii tii cón che'n xud no cón che'n xna' na, Moisés mnibe' loo mèn guth mèn mèn.

<sup>11</sup> Le' gu' na, ale mbez nzoque' mod gab thib mbi' loo xud mbi' no loo xna' mbi' taandxè' mod: Pay, May, yende mod lyath non gu' tac ryete con' co' nac con' ngue non co' ndxàpen nac co' mcàbgònen loo Diox, co' nee di's, naca che'n Diox. <sup>12</sup> Tataa mbez gu' loo mèn mastale' huax vez ne'nda'de mèn con'a loo Diox par ngàc con'a che'n Diox. No chele' thib mbi' gab tataa loo xud mbi' no loo xna' mbi', gu' ndoole' par gab gu' loo mbi': Ya inquinte lyath nol xudl no lyath nol xna'l, ndee. <sup>13</sup> Le' sya, con con' ndli gu'a, ndlu' gu' yende cón ntac con' co' nac yalñibe' che'n Diox loo gu' por cón che'n costumbr co' mbed no gu' co' ndli thib ned gu' no co' ndli tedib ned gu'. No anze'f thib con' ndli gu' co' lalque' nac xal con' co' ndli gu'a.

<sup>14</sup> Jesús ngurez mèn tedib vez. Ndxab Jesús loo mèn:

—Bìn gu' co' ngue toodizen loo gu' ndxè'. No ndlyazen ta' gu' lugar yaa'd di's ndxè' le'n lezo' gu' par ta' gu' cuent cón nee di's ndxè'. <sup>15</sup> Nde niin thib con' loo gu': Nec thib con' co' nac con' ndxuhua mèn indli malte no indlide con' zab loo mèn. Ndxè'leque', rye con' co' ndryo' le'n lezo' mèn no con' co' ndli mèn xtùuz, con'a ndli nte zab mèn no ndli ndxàc mèn mèn ye'rsin' no mèn zab loo Diox. <sup>16</sup> Gu' co' nzi yòn di's ndxè' no gu' co' ndxaa'd di's le'n lezo', ften' gu' di's ndxè' le'n lezo' gu' no fta' gu' cuent co' huenleque' cón nee di's di's ndxè'.

<sup>17</sup> Co'se' mblá' Jesús mèn no ngòo Jesús liz thib mbi', myen' xin' mté'th Jesús mnibdi's loo Jesús cón che'n di's co' mtetac Jesús loo mèn. <sup>18</sup> Jesús ndxab loo myen':

—¿Ché' no gu' inda'de cuent cón nee di's co' mtetaquen loo mèn, cà'? ¿Ché' iñeede gu' no ché' inda'de gu' cuent le' ryete con' co' nac xít mèn no lua' mèn co' ndxuhua mèn ndxòo le'n xti' mèn? No indlide con'a con' ye'rsin' loo mèn par li mèn con' ye'rsin' loo Diox. <sup>19</sup> Tac con' co' ndxuhua mèn indxòode le'n lezo' mèn no le'n xtùuz mèn. Ndxè'leque', le'i ndxòo le'n xti' mèn no le'n pans mèn. Ndxeloa, ndritha loo mèn co'se' nda mèn mandad mèn.

Tataa ndxab Jesús loo myen' par mblu' Jesús cón che'n di'sa loo myen' le' ryete con' ndxuhua mèn nambiique' nac. <sup>20</sup> Jesús ndxab loo myen' xin' mté'th Jesús, ne:

—Con' co' ndryo' le'n lezo' mèn no con' co' ndli mèn xtùuz, con'a ndli leque mèn ndli con' ye'rsin' loo Diox no ndxàc mèn mèn ye'rsin' loo Diox. <sup>21</sup> Tac le'n lezo' mèn ndryo' chol xtùuz ye'rsin' co' ndli mèn xtùuz, anggab na'i, xtùuz co' ndli mèn co'se' ndlya's mèn li mèn yalburrid; no xtùuz co' ndli mèn co'se' ndlya's mèn cua'n mèn xin' huan mèn; no xtùuz co' ndli mèn co'se' ndlya's mèn guthxù' mèn xtàa mèn; <sup>22</sup> no xtùuz co' ndli mèn co'se' ndlya's mèn li huan' mèn; no xtùuz co' ndli mèn co'se' ndlya's mèn nqueli'th mèn cón che'n xtàa mèn; no xtùuz co' ndli mèn co'se' ndlya's mèn li mèn chol con' ye'rsin; no xtùuz co' ndli mèn co'se' ndlya's mèn quedii mèn xtàa mèn; no xtùuz co' ndli mèn co'se' indlya'ste mèn thyon mèn loo con' ye'rsin' co' ngue li mèn; no xtùuz co' ndli mèn

co'se' ndxàn lezo' mèn ñèe mèn xtàa mèn; no xtùuz co' ndli mèn co'se' ndxòn mèn cuent yix no nteri'th mèn cuent yix loo xtàa mèn; no xtùuz co' ndli mèn co'se' ndye's mèn loo xtàa mèn no nxyal' mèn loo xtàa mèn; no xtùuz co' ndli mèn par li mèn con' co' inda'de taamas mèn cuent cón ngue li mèn. <sup>23</sup> Ryete con' ye'rsin'a ndryo' ndlyen' le'n lezo' mèn par tyub yo'f lezo' mèn par li mèn con' co' ndli mèn xtùuz. No nte zab ryete con'a xtùuz mèn no lezo' mèn par ndxàc mèn mèn zab no mèn ye'rsin' loo Diox.

*Thìb xa'got tìth ngola's loo Jesús no loo cón che'n Jesús.*  
(Mt. 15.21-28)

<sup>24</sup> Ngoloa, mbii Jesús tya. Nda Jesús le'n rye yèezya' co' nac yèezya' che'n làaz mèn ciuda Tir no co' nac yèezya' che'n làaz mèn ciuda Sidón. Jesús ngòo liz thìb mbi'. No mbly'a's Jesús yende chó mèn non nzo Jesús liz mbi'a. Per ne'ngácte Jesús ngàca tataa loo Jesús. No yende mod nga's Jesús loo mèn. <sup>25</sup> Setilte mbìn thìb xa'got co' ngòc xna' thìb mza' co' mque no mbii che'n xpìi ye'rsin' le' Jesús nzo liz mbi'a. Mbi'th xna' mza' loo Jesús. No mdub xib xna' mza' loo Jesús. <sup>26</sup> Xa'gota ngòc thìb xa'got tìth. Ngòc xa'gota mèn naciòn Sirofenis. Mbi'th xa'got loo Jesús. Nalyat mde'b ro xa'gota. Mna'b xa'got di's loo Jesús par ante nii Jesús ryo xpìi ye'rsin'a loo mza', rsap xa'got. <sup>27</sup> Per Jesús asembli, mtetac Jesús thìb di's loo xa'got. Ndxab Jesús loo xa'got:

—La'a hua myen' ner. Tac ihuente naca teche mèn pan loo myen' par ta' mèn pana hua mbac.

<sup>28</sup> Per máa xa'got lueg mcàb loo Jesús. Ndxab xa'got:

—Aa, Tad, lìcque' co' nee U' ba'. Yende cón niin loo U'. Per neeque' U', Tad, axta rye mbac co' nzi tee ned ba' nde xàn' mes par nthop mbac rye pedaz pan co' ngobii myen' xàn' mes par hua mbac. Nthop mbac. Ndxuhua mbac.

<sup>29</sup> Sya, ndxab Jesús loo guna':

—Aa, huenque' mcàbl loon xal nac di's co' mtetaquen lool. No mda'l cuent cón nee di's di'sa. Nzoque' mod biil. Ngro'le' xpìi ye'rsin' co' ngòo loo rsapl, ndee.

<sup>30</sup> Co'se' mzin xa'got liz xa'got, gunèe xa'got le' mza' naxle' loo lun'. Le' xpìi ye'rsin'a na, ngro'le' loo mza'.

*Jesús mteyac thìb mbi' mud co' mque no yíz cue'.*

<sup>31</sup> Mbere Jesús, ngro' Jesús le'n rye yèezya' co' nac yèezya' che'n làaz mèn ciuda Tir. Ngua riid Jesús le'n rye yèezya' che'n làaz mèn ciuda Sidón no le'n rye yèezya' che'n làaz mèn decápolis axta mzin Jesús ro lagun co' nziri' loo xyòn mèn co' nac che'n làaz mèn galile tedìb vez. <sup>32</sup> Tya, ngua no mèn thìb mbi' mud loo Jesús. Nde nxon', ncue' nza mbi'. Nalyat mde'b ro mèn. Mna'b mèn di's loo Jesús xo'f Jesús ya' Jesús lad mbi' par teyac Jesús ryop yíz co' ngue no mbi'. <sup>33</sup> Mbe' Jesús mbi'a thìb lad loo mèn par mdye'e Jesús cuen ya' Jesús le'n nza mbi'. Ngoloa, mxuc Jesús loo thìb cuen ya' Jesús no mbuàal Jesús looz mbi' con cuen ya' Jesús. <sup>34</sup> Ngoloa, chàa, mbui' Jesús loo bé'. Mdi' lezo' Jesús. Láth ngue hui' Jesús loo bé', ndxab Jesús:

—Efata, co' nee di's, Fxal'.

<sup>35</sup> Látha, chàa, mxyal' nza mbi' muda. No mbìn mbi' ruid. No luega, ndxe'sleque' mdoodi's mbi' tac Jesús mbli ngro xban looz mbi'. <sup>36</sup> Ngoloa, mnibe' yèe Jesús loo mèn yende chó loo mèn ta' mèn cuent con' co' mbli Jesús. Per lugar de gòn mèn di's, yende chó loo mèn nda' mèn cuent, ale sate más co' mbli mèn. Mda' mèn cuent con' mbli Jesús. <sup>37</sup> Le' rye mèn co' nziri' tya na, ante ngüi' mèn no ante ñaa mèn loo con' mbli Jesús. Mbez mèn:

—Ryete con' huenque' mbli Jesús. Ale axta ndli Jesús le' mèn co' ncue' ndxòn di's no ndli Jesús le' mèn mud ndyoodi's.

## 8

*Jesús mbli par nduhua thap mil mèn.*  
(Mt. 15.32-39)

<sup>1</sup> Le'xque' le'n huiza, anze'f thib mèn mqueltàa loo Jesús. Nde nxon', yende cón ngue no mènà par hua mènà. Sya, ngurez Jesús myen' xin' mté'th Jesús. Ndxab Jesús loo myen':

<sup>2</sup> —Anze'f ndlyat lezon ñèen prob mèn co' nziri' ba', cara. Más de cona, ndxàcle' son huiz nziri' mèn ba' con daa no yende cón ngue no mèn par hua mèn. <sup>3</sup> Chele' daa tel' mèn par bii mèn no tarte hua mèn, tguu's mèn ned bii mèn. Tac nzo ndxep mèn ba' anze'f tith ngro' par nde mèn loon.

<sup>4</sup> Myen' xin' mté'th Jesús mcàb. Ndxab myen' loo Jesús:

—¿Per xá mod ndlya's U' gac hua mèn trè' co'te' yende chó mèn nac par ti' mèn con' hua mèn, Tad?

<sup>5</sup> Jesús mnibdi's loo myen'. Ndxab Jesús:

—¿Plá pan ngue no gu', à'?

Myen' mcàb. Ndxab myen':

—Gaz pan no maste ngue no nu'.

<sup>6</sup> Sya, mnibe' Jesús loo mèn tyub mèn loo yòo. Làth xtau'a, mxen Jesús rye gaz pana. No ndxab Jesús loo Diox:

—Diox quix U', Diox, por pan ndxè'.

Ngoloa, mchì'x Jesús gaz pana. Mda' Jesús pana loo myen' xin' mté'th Jesús. Le' myen' na, mbli'th pana loo mènà. <sup>7</sup> Mque no myen' xin' mté'th Jesús plá mbèelli bix, ne. Jesús mbli léy' mbèelli bixa no mnibe' Jesús loo myen' li'th myen' mbèelli bixa loo mèn, ne. <sup>8</sup> Sya, ryete mènà nduhua pan no mbèelli bixa axta plóthe mblya's mèn. Ngolo nduhua mènà, mthop myen' gaz cardor le' pan co' mbyan' xo'f loo gaz pan no loo mbèelli bix co' mbli Jesús mbyar'. <sup>9</sup> Ryete mèn co' nduhuaa, ne'que' thap mil mèn. Ngoloa, gunii Jesús Diox loo mènà. Ndyàa Jesús con myen' xin' mté'th Jesús. <sup>10</sup> Ngòo Jesús le'n thib yòoyaa con myen' xin' mté'th Jesús. Nda Jesús par le'n rye yèezya' co' nac làaz mèn dalmanut con myen' xin' mté'th Jesús.

*Mèn xley' farise ngue na'b loo Jesús li Jesús thib señ co' nac yalguzye' loo mèn.*

*(Mt. 16.1-4; Lc. 12.54-56)*

<sup>11</sup> Látha, mzin mèn xley' farise loo Jesús. Mtlo mènà, mdoodi's no mènà Jesús. Par gàal di's mènà Jesús, mbli mènà thib con' par ñee mènà ñeene' ché' tli Jesús con' ndlya's mènà li Jesús. Mna'b mènà loo Jesús li Jesús par gac thib con' loo bé' xal thib con' co' nac yalguzye' loo mènà. <sup>12</sup> Sya, axta le'n lezo' Jesús mdi' lezo' Jesús. Ndxab Jesús loo mèn co' nziri' loo Jesús:

—¿Chonon ña'b mèn xley' farise co' nziri' go' loon par lin gac thib con' xal thib señ loo bé' co' nac thib yalguzye' loo mèn ba', yey? Lìcpe' ba'i, na nii loo gu': Nec thib señ ne'gacte loo mèn ba' thidtene.

<sup>13</sup> Ngoloa, ngòo Jesús le'n yòoyaa. Ndyàa Jesús tedib lad ro lagun tedib vez. Le' mèn co' ngure no Jesús tya na, tyate mblá' Jesús mènà. Gunee mènà cón che'n mènà.

*Trè' ndlu' cón che'n mod, co' ngòp mèn xley' farise, co' mtetac Jesús le' moda nac xal dii levadur.*

*(Mt. 16.5-12)*

<sup>14</sup> Nde nxon', ne'nte'de lezo' myen' xin' mté'th Jesús nghue' myen' pan. Ante sa pan no maste mque no myen' le'n yòoyaa. <sup>15</sup> Sya, asembli Jesús. Ndxab Jesús loo myen':

—Anderhuen gu', myen', leque gu' quenap gu' gu' loo dii levadur che'n mèn xley' farise no loo dii levadur che'n Herod co' nac rey.

<sup>16</sup> Le' myen' xin' mté'th Jesús na, mtlo myen', ndxab myen' loo thib xtàa myen' no loo tedib xtàa myen':

—¿Ché' por ne'nte'de lezo' na' ndi' na' pan, cona tataa gunee Jesús loo na', cà'? Thib descuid conai, ¿lé'?

<sup>17</sup> Per Jesús mda' cuent no mden' lezo' Jesús cón che'n di's co' gunii myen'. Ndxab Jesús loo myen':

—¿Chonon mbez gu' le' gu' ingue node pan, à'? ¿Ché' axta nalle' tarte ta' gu' cuent co' mbezen loo gu' co' huenleque', cà'? ¿Chonon susque' naad gu' no nguud gu', yoo? <sup>18</sup> Ingüi'de gu' con ngudloo gu', ndee. No ne' ne' indxòn gu' con' con nza gu'. ¿Ché' ne'tyede lezo' gu' huax con' co' nde teele' ndlin, cà'? <sup>19</sup> ¿Ché', licque', ne'tyede lezo' gu' co'se' mchì'xen ga'y pan co' nduhua ga'y mil ante mènbi' no xà'que' nduhua mèngot no myen' bix, cà'? Tiempa, ¿plá cardor le' pan co' be' mbyan' xo'f co' mblin mbyar' mthop gu', à'?

Myen' ndxab:

—Lìca, Tad, mthop nu' si' fchop cardor le' pan co' be' mbyan' xo'f.

<sup>20</sup> Tolo ndxab Jesús loo myen', ne:

—¿Ché' ne'tyede lezo' gu', ne, co'se' mchì'xen gaz pan par nduhua thap mil mèn, plá cardor le' pan co' be' mbyan' xo'f loo gaz pan co' mblin mbyar' mthop gu', à'?

Myen' mcàb loo Jesús tedib vez. Ndxab myen':

—Lìca, Tad, mthop nu' gaz cardora tiempa, ne.

<sup>21</sup> Sya, ndxab Jesús loo myen':

—Ngolo gunee gu'i, xàa. No axta nalle', ¿tarte ta' gu' cuent co' huenleque', cà'? ¿Máa job yéc gu', na?

*Jesús mteyac thib mbi' sieu le'n thib yèez co' lèe Betsaid.*

<sup>22</sup> Ngoloa, mzin no Jesús myen' xin' mté'th Jesús le'n thib yèez co' lèe Betsaid. Tya, mbi'th no mèn thib mbi' sieu loo Jesús. Nalyat mde'b ro mèna. Mna'b mèna favor loo Jesús par gàal Jesús ngudloo mbi' sieu par tyub xnii ngudloo mbi'. Hui' mbi'. <sup>23</sup> Sya, mxen Jesús ya' mbi' sieu. Mbe' Jesús mbi' thib lad ro yèez. Tya, mtà Jesús rsuc Jesús ngudloo mbi'. No mxo'f Jesús ya' Jesús lad mbi'. Ngoloa, mnibdi's Jesús loo mbi'. Ndxab Jesús:

—Mbi, ¿ché' ngue hui'l mase ndxep?

<sup>24</sup> Mbi' co' ngòc sieua mbui' ndxè' no mbui' ba'. Ndxab mbi' loo Jesús:

—Aa. Daa ngue hui' loo mèn co' nziri' go'. Per ngüi'en mèn xal yaa xcàl. No ngüi'en ndyee mèn.

<sup>25</sup> Mbere Jesús. Mbuàal Jesús ngudloo mbi' con ya' Jesús tedib vez. Sya, por derech, ndxe'sleque' mbui' mbi' loo ryete con' no ale sandante mbui' mbi'. <sup>26</sup> No ndxab Jesús loo mbi':

—Ne'yòodel le'n yèez Betsaid luega. Ne' ne' gabl loo mèn yèez con' mbli nonl. Sya, mtel' Jesús mbi'. Ndyàa mbi' par liz mbi'.

*Pedr mblo ro le' Jesús nac Cristpe'.*

*(Mt. 16.13-20; Lc. 9.18-21)*

<sup>27</sup> Ngoloa, ngua Jesús con myen' xin' mté'th Jesús le'n rye yèezya' che'n làaz mèn ciuda Cesar co' mnibe' thib mbi' co' lèe Lip. Co'se' ndoo Jesús ned nda Jesús con myen' xin' mté'th Jesús, mnibdi's Jesús loo myen' xin' mté'th Jesús. Ndxab Jesús:

—¿Xá nee gu'? ¿Chó mbez mèn nac daa, à'?

<sup>28</sup> Myen' mcàb. Ndxab myen' loo Jesús:

—Ndxep mèn mbez le' U' nac Juàn Bautist. Taandxep mèn mbez le' U' nac Lii co' mde'th di's co' ndxab Diox. No nzore' taandxep mèn co' mbez: Nzo chó mènngool co' mde'th di's co' ndxab Diox póla nac mbi' ba'.

<sup>29</sup> Sya, mnibdi's Jesús loo myen' xin' mté'th Jesús. Ndxab Jesús loo myen':

—¿Gu' à'? ¿Chó mèn mbez gu' nac daa?

Sya, chàa, ngro' nxon' Pedr loo Jesús. Ndxab Pedr:

U' nac yub Cristpe', Tad.

<sup>30</sup> Per Jesús ndxab loo myen' xin' mté'th Jesús yende chó loo gabte myen' le' Jesús nac yub Cristpe'.

*Jesús ngue ta' cuent loo myen' xin' mté'th Jesús xá mod gath Jesús.*

*(Mt. 16.21-28; Lc. 9.22-27)*

<sup>31</sup> Sya, mtlo Jesús, noo noo mda' Jesús cuent loo myen' xin' mté'th Jesús. Ndxab Jesús:



—Daa, co' mbal yáal loo izlyo' xalque' ndxáal chol mèn loo izlyo', daa tyactiique'. No tèt' b rye mèngool, no mèn co' nac jef loo rye nguley', no mèn co' nac maistr co' ndlu' cón che'n ley co' mxo'f Moisés loo mèn daa.

No ndxab Jesús loo myen' le' rye mènà guth Jesús no co'se' yilo son huiz nguth Jesús, Jesús ryo xban. <sup>32</sup> Nali mda' Jesús cuent ndxè' loo myen' xin' mté'th Jesús. Ngoloa, mbe' xà' Pedr Jesús thib lad. Ale mtlo Pedr, mbyoo Pedr no mco'x Pedr Jesús por ndxab Jesús di'sa loo myen'. <sup>33</sup> Per Jesús, chàa, mbere, xèe mbui' Jesús loo myen' xin' mté'th Jesús. Sya, ndxab Jesús loo Pedr:

—Biiche loon, Pedr. Te' nac Mebizya nacl loon. Lùu ndlu' loon ndxàpl mod xal nac mod co' ndxàp Mebizya. Tac lùu indyóode no indlidel xtùuz xal ndli Diox xtùuz. Ndxè'leque', lùu ndli xtùuz xalque' ndli chol mèn izlyo' xtùuz cón chenen.

<sup>34</sup> Sya, ngurez Jesús myen' xin' mté'th Jesús. No ngurez Jesús mèn co' nziri' no Jesús. Ndxab Jesús loo myen' no loo rye mènà:

—Chele' chó gu' ndlyà's, lìcque', tyoo nque gu' xísen, leque gu' bli par ne'lìde gu' con' co' ndyub yo'f lezo' gu' par li gu'i. Ndxè'leque', gòp gu' lezo' gu' no ñibe' gu' loo lezo' gu' par ne'lìde gu' con' co' ndyub yo'f lezo' gu'. No blec lezo' gu' par xec gu' tyactii gu' co'se' tub ngu's mèn gu' por cón che'n daa ned nda na'. Le' sya, ya' gu' too nque gu' xísen. Nda na'. <sup>35</sup> Tac mèn co' ante ndoo lezo' ndxath ndxey' no ndxath ndlyux mèn par que no mèn che'npe' mèn ante loo izlyo' ndxè', loo mènà ne'ta'de Diox lugar ban mèn thidtene loo Diox. Per mèn co' lá' ryethe con' co' nac yalndac no co' nac yalgon' che'npe' mèn co' gác li mèn gan loo izlyo' ndxè' por cón chenen no por cón che'n di's ndac co' ndlu' xá mod lyá' mèn loo con' ryes, loo mènà ta' Diox lugar par ban mènà thidtene loo Diox. <sup>36</sup> Lomisque' ne, ¿cón co' thib mbi' no chó yalndac gác li thib mbi' gan co'se' gác che'npe' mbi' dib athu loo izlyo' tac chele' mbi' tataa mod li, gab Diox loo mbi'a yende mod yòo ban no mbi' Diox thidtene yiloo? Yende cón li mbi' gan chele' mbi' li tataa, ¿lé'? <sup>37</sup> No ndlyazen ñee gu' loon. ¿Plál quix thib mbi' loo Diox par yòo ban no mbi' Diox co'se' ngolo gunii Diox loo mbi' ne'tyalte Diox yòo ban no mbi' Diox, à'? Yende mod li mbi' gan li mbi' tataa, ¿lé'? <sup>38</sup> Tac chele' chó mèn co' ndxela'sle' loon thyon loo cón chenen no thyon mènà ta' mènà cuent cón chenen loo mèn co' nac mèn co' thidtene indyubdi'ste loon, mèn co' ncuà'n xquin no xtol, daa ne, co' mbal yáal loo izlyo' ndxè' xalque' ndxáal chol mèn loo izlyo' ndxè', daa thyon loo Diox por cón che'n mènà co'se' galen loo izlyo' ndxè' con angl co' nac angl natú' no con ryethe con' roo no con' xèn co' ndxàp xuden Diox.

## 9

<sup>1</sup> Tolo ndxab Jesús loo mèn, ne:

—Lìcpe' ba'i, na nii loo gu': Le' ndxep gu' co' nziri' loon nalle', ne'gathte gu' axtaque' ñèe gu' co'se' gác huiz co' tlo ñibe'pe' Diox loo mèn loo izlyo' xal nac ryethe con' roo no con' xèn co' nzo la's nii Diox no co' nzo la's ya' Diox.

*Jesús mzye' loo loo son myen' xin' mté'th Jesús.*

*(Mt. 17.1-13; Lc. 9.28-36)*

<sup>2</sup> Pente ndxàc xop huiz ndxab Jesús tataa loo mèn, mbe' Jesús Pedr no Cob no Juàn. Nda tyonte Jesús con myen' loo thib yii roo. Tya, ale nzi huite myen', chàa, mzye' loo Jesús loo myen'. <sup>3</sup> Nde nxon', xab Jesús co' noc Jesús ante mquéé xniì no ante nagus bèelleque' gunaa. Gunaa xab Jesús xal xil', co' nee di's, nec thib xa'got co' nzo loo izlyo' ne'gácte tech lar' ante nagus xal gunaa xab Jesús. <sup>4</sup> Látha, gunèe yon myen'a Lii no Moisés. Ndyoodi's no Lii ryop Moisés Jesús. <sup>5</sup> Sya, ndxab Pedr loo Jesús:

—Maistr, anze'f huen naca nzo na' trè'. ¿Xá nee U'? ¿Ché' toxcuà' nu' son ramad? Thiba par yòo U'. Tediba par yòo Moisés. No tediba par yòo Lii.

<sup>6</sup> Per por mzyeb yon myen' xin' mté'th Jesús, con'a axta ne' ne' ñee Pedr cón tyoodi's Pedr loo Jesús. <sup>7</sup> Látha, ngulàa beu. Mtau' beu loo ryete xop xa' co'te' ngure xa'. Le'n beua mbyèn thib di's co' ndxab:

—Mbi' ndxè' nac xgan' daa. Anze'f ngudloon no lezon mbi' co' nac xgan' daa ndxè'. Bìn gu' ro mbi'.

<sup>8</sup> Per texal nguát beu, chàa, mbui' ndxè' mbui' ba' myen'. Ya yende chó nac. Ya yende chó ñèe myen' nziri' con myen'. Ante Jesús no maste nzo no myen'.

<sup>9</sup> Per co'se' ngolo mbii Jesús con myen' tya, no láth nde làa tùub Jesús con myen' le'n yíia, ndxab Jesús loo myen' yende chó loo gab myen' cón che'n con' co' gunèe myen'. Ndxè'leque', mnibe' Jesús loo myen' le' myen' ta' cuent cón che'n Jesús, Jesús co' mbi'th yáal loo izlyo' xalque' ndxáal chol mèn loo izlyo', axta co'se' yilo ryo xban Jesús làth mèn nguth. <sup>10</sup> Por cona, xexte ngòc myen'. Le'n lezo'te myen' non myen' cón gunèe myen'a. Per mnibdi'sque' myen' loo xtàa myen'. Ndxab myèn:

—¿Cón nee di's di's co' ngolo gunee Jesús loo na' le' Jesús ryo xban làth mèn nguth, à', cara?

<sup>11</sup> Sya, mnibdi's myen' loo Jesús. Ndxab myen':

—Tad, ¿chónon mbez mèn co' nac maistr co' ndlu' cón che'n ley co' mxo'f Moisés loo mèn naquinque' ner Lii yi'th loo izlyo' leque yi'th Crist loo izlyo', à'?

<sup>12</sup> Jesús mcàb. Ndxab Jesús loo myen':

—Lìcque' le' Lii yi'th ner. Per co'se' yi'th Lii, Lii li nab mèn no te'th Lii loo mèn par ta' mèn lugar no tyal mèn yila's mèn loo Crist no yila's mèn cón che'n Crist yíloa. Per ¿xá nac di's co' ndub loo libr co' nac xti's Diox cón chenen, daa co' mbal yáal loo izlyo' xalque' ndxáal chol mèn loo izlyo' ndxè'? Loo libr co' nac xti's Diox ndub di's co' ndxab le' daa tactiique', no tè'b mèn daa thib lad, no xiis no mèn daa, no yáp xyán' mèn ñèe mèn daa. <sup>13</sup> Per daa nii loo gu' le' Lii mbi'thle'. No mblile' mèn co' mblya's mèn con Lii xalque' ndub di's loo libr co' nac xti's Diox co' ndlu' cón che'n con' co' mquin ngòcque' loo Lii.

*Jesús mteyac thib mbyòo co' mque no thib xpíi ye'rsin'.*

*(Mt. 17.14-21; Lc. 9.37-43)*

<sup>14</sup> Texal mzin Jesús con Pedr no Cob no Juàn loo taamas myen' xin' mté'th Jesús, gunèe Jesús nziri' huax mèn loo myen' xin' mté'th Jesús. No nziri' mèn co' nac maistr co' ndlu' cón che'n ley co' mxo'f Moisés loo mèn. Noo noo mnibdi's maistra loo myen' cón che'n Jesús. Nen ngure toodi's maistra con myen', ne. <sup>15</sup> Per texal gunèe mènna Jesús, ryete mènna ante mbui' no ante gunaa loo Jesús. Mque' mènna carre par ngua nii mènna Diox loo Jesús. <sup>16</sup> Sya, mnibdi's Jesús loo myen' xin' mté'th Jesús. Ndxab Jesús loo myen':

—¿Cón nzi toodi's gu' con mèn ba', ey? Susque' nen ngure toodi's gu'. No susque' noo noo ndyoodi's gu'.

<sup>17</sup> Sya, mcàb thib mbi' co' nzo làtha loo Jesús. Ndxab mbi' loo Jesús:

—Maistr, daa ndal no mbyòo daa loo U' trè'. Mbyòo ngue no thib loo mbii che'n xpíi ye'rsin' no ale mbli mbii che'n xpíi ye'rsin' ngòc mud mbyòo. <sup>18</sup> No pál co'te' ngue tee mbyòo ndyen mbii che'n xpíi ye'rsin' mbyòo no ngobii mbii mbyòo. Látha, ndryo' zib fsin' ro mbyòo. No ndxuhua le mbyòo. Por cona, yende fuerz mbyòo. Daa mna'b loo myen' xin' mté'th U' ba' li myen' favor co' myen' xpíi ye'rsin' loo mbyòo. Per ne'ngácte myen' ngli myen'a.

<sup>19</sup> Jesús ndxab loo ryete mèn co' nziri' loo Jesús:

—Aa que gu' mèn izlyo', pápe' ya gu' gòn gu' di's no yila's gu'. Thidtene nac gu' mèn co' indxela'ste loon no loo con' ndlin. ¿Axta pól tolo naquin go non gu'? No ¿axta pól tolo naquinque' xec daa con gu', yey?

Ngóloa, ndxab Jesús loo mbi'a:

—Huàa xi mbyòo. Yi'th mbyòo ndxè'. Ñeene'.

<sup>20</sup> Sya, nde no mèn mbyòo. Co'se' gunèe xpíi ye'rsin' co' ngo loo mbyòoa Jesús, mquée mbii xpíia mbyòo. No mbli mbii par ngobii mbyòo loo yòo. Ale mbixyath mcotloo mbyòo nax mbyòo. No ndryo' zib fsin' ro mbyòo. <sup>21</sup> Sya, mnibdi's Jesús loo xud mbyòo. Ndxab Jesús:

—¿Pól mtlo ndxàc mxen mbii mbyòo, à'?

Xud mbyòò ndxab loo Jesús:

—Anon ndoo xèn mbyòò ngulen yíiz ba' loo mbyòò, Tad. <sup>22</sup> Huax vez co'se' ndyen mbii che'n xpíi ye'rsin' ba' mbyòò, ngobii mbii mbyòò loo quíi no le'n nít par guth mbii mbyòò. Cona, ndlyazen chele' U', licque', ndxác ngo' xpíi ye'rsin' loo mèn, bli U' favor. Blo' U' xpíi ye'rsin' co' nzo loo mbyòò daa ndxè'. Blat lezo' U' gunèe U' daa con mbyòò daa. No blyath no U' nu', Tad.

<sup>23</sup> Jesús ndxab loo mbi':

—Chele' lùu yila'spe' loon le' daa ndxác teyac mbyòò, sya, lina. Tac ryethe con' nzoque' mod gác loo mèn, mèn co' ndxela's loon no co' ndxela's loo con' ndlin.

<sup>24</sup> Sya, ngrozèe xud mbyòò. Ndxab xud mbyòò loo Jesús:

—Ndxelazquen loo U' no ndxelazquen loo con' ndli U'. Blyath no U' daa par toloque' yilazen loo U' xal ndxàala.

<sup>25</sup> Co'se' gunèe Jesús anze'f thìb mèn mqueltàa loo Jesús, Jesús mbyoo mbii che'n xpíi ye'rsin'a. Ndxab Jesús loo mbii che'n xpíi ye'rsin'a:

—Xpíi mud no xpíi cue', na ñibe' lool: Gro' loo mbyòò ndxè'. No ya ne'beredel yòol loo mbyòò ndxè' tedib vez.

<sup>26</sup> Sya, mbli xpíi ye'rsin'a par ngrozèe yíi ngrozèe den mbyòò. No mbli xpíi par mquée mbii mbyòò. Ngoloa, ngro xpíi loo mbyòò. Per co'se' mquée mbii che'n xpíi ye'rsin'a loo mbyòò, casque' nguth mbyòò. No co'se' ñèe mèn co' nziri' con' ngòc loo mbyòò, ndxab mènna loo xtàa mèn:

—Nguth mbyòò, cara.

<sup>27</sup> Per ndxe'leque', Jesús mxen ya' mbyòò. Mxít che Jesús mbyòò. No ngo too mbyòò loo rye mènna. Ale mbyac mbyòò.

<sup>28</sup> Ngoloa, ngòo Jesús liz thìb mbi' con myen' xin' mté'th Jesús. Sya, xexte mbe' myen' Jesús thìb lad par mnibdi's myen' loo Jesús. Ndxab myen':

—Tad, ¿xá nee u'? ¿Chonon ne'ngácte nu' ngo' nu' xpíi ye'rsin'a loo mbyòoa, à'?

<sup>29</sup> Jesús ndxab loo myen':

—Thìb loo xpíi ye'rsin' co' nac xal xpíi ye'rsin'a, ne'ryo'de tua'te loo mèn. Naquin cuez mèn Diox no cue xlat mèn. Sya, tataa mod ryo xpíi ye'rsin'a.

*Jesús mbere ngue ta' cuent loo myen' xin' mté'th Jesús le' Jesús gathque'.*

*(Mt. 17.22-23; Lc. 9.43-45)*

<sup>30</sup> Co'se' mbii Jesús liz mbi'a con myen' xin' mté'th Jesús, ngua riid Jesús le'n huax yèezya' che'n làaz mèn galile. No indlya'ste Jesús gòn nec thìb mèn le' Jesús ngue tee par neda. <sup>31</sup> Tac Jesús ngue lu' myen' xin' mté'th Jesús no ngue ta' Jesús cuent le' Jesús, co' mbi'th yáal loo izlyo' ndxè' xalque' ndxáal chol mèn loo izlyo' ndxè', Jesús yigaaque' ya' mèn ye'rsin'. No guth mènna Jesús. Per co'se' yilo son huiz mbeth mènna Jesús, Jesús ryo xban. <sup>32</sup> Per myen' xin' mté'th Jesús ne'nda'de cuent cón che'n di's co' ngue bez Jesús loo myen'. Ne' ne' indxòn myen' cón nee di'sa. No más de cona, ale mzyeb myen' ñibdi's myen' cón che'n di'sa loo Jesús.

*Myen' xin' mté'th Jesús mdoodi's cón che'n chó myen' gác myen' co' más ñibe' loo xtàa myen' yiloa.*

*(Mt. 18.1-5; Lc. 9.46-48)*

<sup>33</sup> Ngoloa, nda Jesús con myen' xin' mté'th Jesús par yèez Capernaum. Co'se' mzin Jesús tya, ngòo Jesús liz thìb mbi'. Tya, mnibdi's Jesús loo myen' xin' mté'th Jesús. Ndxab Jesús:

—¿Chó cón che'n con' ngue toodi's gu' ned nde na', à'? Susque' noo noo ndyoodi's gu' con xtàa gu', ne.

<sup>34</sup> Per myen' yende chó ngabte loo Jesús tac mzyeb myen' no nthyon myen' tac myen' naneeque' le' myen' nde toodi's ned nde myen' cón che'n chó myen' gác thìb myen' co' más ñibe'pe' co'se' ñibe'pe' Jesús loo mèn. <sup>35</sup> Sya, mdub Jesús loo myen' no ngurez Jesús ryete si' fchop myen' xin' mté'th Jesús. Ndxab Jesús loo myen':

—Chele' chol gu' ndlya's gac mèn co' tyoo ner loo xtàa gu', no co' tyoo naa, no co' ñibe' loo xtàa gu', nquin gac gu'a xal thib moz prob co' nque zin' loo mèn par li gu' sirv loo xtàa gu'.

<sup>36</sup> Ngoloa, mxen Jesús thib mbedbi' chu'th. Mdoo Jesús mbedbi' chu'tha loo myen' xin' mté'th Jesús. Mde's Jesús mbedbi' chu'tha. Ndxab Jesús loo myen':

<sup>37</sup> —Nde niin thib con' loo gu': Le' mèn co' tyal ta' lugar yòo thib mbedbi' chu'th xal mbedbi' ndxè' liz mèn ante por lèen, con'a ndlu' le' mèn tyal ta' lugar gòn làth mèn, ne. Le' mèn co' tyal gòn làth mèn, inacte ante loon ndyal mèn nda' mèn lugar gòn làth mèn. Ndxè'leque', con'a ndlu' le' mèn ndyal nda' mèn lugar yòo xuden Diox co' mtel' daa làth mèn, ne.

*Jesús ngue bez loo myen': Mèn co' inacte ngolo ngola's loo na', mèn nzo favor che'n na' no nda' mèn lad che'n na'.*

*(Lc. 9.49-50; Mt. 10.42)*

<sup>38</sup> Sya, ndoole' Juàn, ndxab Juàn loo Jesús:

—Maistr, nu' gunèe thib mbi'. Ante mde'th mbi' lèe U', mblo' mbi' mbii che'n xpïi ye'rsin' loo mèn. Per com le' mbi' inquietàa node na', ¿lé'?, nu' ne'nda'de lugar loo mbi' tolo li mbi' con'a.

<sup>39</sup> Per Jesús ndxab loo Juàn:

—Aa'a. Bla' gu' tolo li mbi' con'a. Ne'cà'de gu' loo mbi'. Tac yende chó mèn nzo co' li gac thib yalguzye' ante por mbez mèn lèen no yiloo nazab nii yèe nii tii mèn cón chenen.

<sup>40</sup> Tac mèn co' inacte ngolo ngola's che'n na', mèn nda' lad che'n na'. <sup>41</sup> No chol mèn co' ta' mase thib taz nít gu' gu' ante por cón che'n lèen, no por nzo gu' loo cón chenen, daa co' nac Crist, licpe' ba'i, na nii loo gu', ngue cón che'n con' mbli mèn loo gu'a loo Diox.

*Jesús ngue ta' cuent loo mèn cón che'n con' co' ndli ndxàc ryes loo mèn par cua'n mèn xquin mèn no xtol mèn.*

*(Mt. 18.6-9; Lc. 17.1-2)*

<sup>42</sup> Tolo ndxab Jesús loo mèn:

—Chol mèn co' asendli par cua'n mèn co' nau' loo nau' yéc xtol mèn, mèn co' sete ndxela's loon, más huen gaca loo mèn que' mèn thib quèe yees yen mèn no cobii mèn mèn le'n nítto' par tataa mod lyux mèn leque tolo li mèn con' ye'rsin' loo mèn co' ndxela's loon. <sup>43</sup> Cona, ngue niin loo gu': Chele' gu' ndli cuent no nden' gu' le'n lezo' gu' le' ya' gu', licque', ndli par ncu'a'n gu' xtol gu' no xquin gu' por mdyub yo'f lezo' gu' loo con' ngue no gu', más huen gaca loo gu' cho' gu' ya' gu' par cobii mèn ya' gu' thib lad tith loo gu'. Tac más huen ngaca loo gu' yòo gu' co'te' yòo ban no gu' Diox thidtene con sate ya' gu' leque lyàa gu' le'n ye'rbiil, co'te' nzo quii no bèel co' thidtene ne'yu'de, con ryop ya' gu'. <sup>44</sup> Tya, ne'gathte mbey no ne'gathte mbye'th. No ne'yu'de quii no bèel thidtene. <sup>45</sup> No chele' gu' ndli cuent no nden' gu' le'n lezo' gu', licque', ndli nii gu' par cua'n gu' xtol gu' no xquin gu' por mdyub yo'f lezo' gu' ngua gu' co'te' ngua gu', más huen gaca loo gu' cho' gu' nii gu' par cobii mèn nii gu' thib lad tith loo gu'. Tac más huen gaca loo gu' yòo gu' co'te' yòo ban no gu' Diox thidtene con sate nii gu' leque lyàa gu' le'n ye'rbiil, co'te' ne'yu'de quii no bèel thidtene, con ryop nii gu'. <sup>46</sup> Tya, ne'gathte mbey no ne'gathte mbye'th. No ne'yu'de quii no bèel thidtene. <sup>47</sup> No chele' gu' ndli cuent le' ngudloo gu', licque', ndli par ncu'a'n gu' xquin gu' no xtol gu' no par tyub yo'f co' nac con' ye'rsin' le'n lezo' gu' loo con' ngüi' gu', más huen blo' gu' ngudloo gu' no blobii gu' ngudloo gu' thib lad tith loo gu'. Tac más huen gaca loo gu' chele' gu' yòo co'te' yòo ban no gu' Diox thidtene con sate ngudloo gu' leque lyàa gu' le'n ye'rbiil co'te' ndxetoo quii no bèel no co'te' ne'yu'de quii no bèel thidtene. <sup>48</sup> Tya, ne'gathte mbey no ne'gathte mbye'th. No ne'yu'de quii no bèel thidtene.

<sup>49</sup> Tac co'se' gac huiza, ryete mèn co' lyàa le'n ye'rbiil yidin' bèel lad mèn xal co'se' nxob mèn ted yol loo bél' má' co' mbeth mèn póla par mbec mèn bél' má'a loo mes xal thib ofrend loo Diox. <sup>50</sup> Huenque' nac ted tac nazi ted, ¿lé'? Per chele' ted inazide, ¿xá mod tezi mèn con' hua mèn con' ted co' inazide, sya? Yende mod gaca tataa, ¿lé'? Gòp

gu' lezo' gu' no fquenap gu' gu' loo cón che'n Diox, par ne'yiza'de gu' loo cón che'n Diox no par ne'càbte con' ye'rsin' loo gu' loo cón che'n Diox. Tataa bli gu' xal co'se' ndli mèn co' ndxuth má' co'se' ntoxcua' mèn bél' con ted. Ntezi mèn bél' par ne'yiza'de bél'. Lomisque' ne, ngue niin loo gu': Tataa bli gu' par que tee ban gu' rye nda gu' no rye ndye'th gu' làth xtàa gu', ne, ndee gu'.

## 10

*Jesús ngue lu' loo mèn cón che'n xá mod ndlá' thib mènbi' sa'l mènbi' co' indxàalte li mèn.*

*(Mt. 19.1-12; Lc. 16.18)*

<sup>1</sup> Ngolo mblu' Jesús di'sa loo mèn no mdoodi's no Jesús mèn, ngro' Jesús le'n yèez Capernaum con myen' xin' mté'th Jesús. Nda que tee Jesús le'n rye yèezya' co' nac làaz mèn jude. No ngua que tee Jesús le'n rye yèezya' co' nac loo xyòn mèn co' naban par ned lad ndlyen huiz co' nziri' ned ro yó'be' Jordán. Tya, mbere mèn, mqueltàa mèn loo Jesús co'te' ngo Jesús. Mbere Jesús, mblu' Jesús mènna xalque' ngòc mod co' ngòp Jesús. <sup>2</sup> Sya, ngua gax ndxep mèn xley' farise loo Jesús par asembli mèn ngua gàal di's mènna Jesús par ñee mènna ñeene' ché' tagaa Jesús loo mènna con di's co' gàal di's mènna Jesús xal co'se' ndxegaa chol má' bix loo tramp. Mnibdi's mènna loo Jesús par gòn mèn no ñee mèn ñeene' ché' huen naca, ndyac Jesús, lá' thib mbi' sa'l mbi'. <sup>3</sup> Jesús mcàb loo mènna. Ndxab Jesús:

—¿Cón mnibe' Moisés loo gu' co' nac ley co' mxo'f Moisés loo gu', à'?

<sup>4</sup> Mènna ndxab loo Jesús:

—Moisés mda' lugar loo nu' toxgua' nu' thib ye's co' lèe thib act. Sya, ta' nu' acta loo xa'got nu'. Sya, tataa mod con huen di's no con huen cuent lá' nu' xa'got nu'. ¿Xá neel, Jesús? ¿Ché' huen naca o ché' ihuente nac co' mbli Moisés?

<sup>5</sup> Jesús ndxab loo mènna:

—Tataa mnibe' Moisés loo gu' li gu' tac Moisés naneeque' no mda'que' Moisés cuent le' gu' anze'f naad lezo' no anze'f nguud lezo' gu'. <sup>6</sup> Per daa nde nii thib con' loo gu': Nerleque' co'se' mtlo Diox, mblec Diox no mxèn' Diox ryethe con' loo izlyo', Diox mtocua' mènbi' no mèngot co' nac mèn. <sup>7</sup> Por cona, thib xa'bi' ryo xà' loo xud xa' no loo xna' xa' par thidte queltàa xa' con xa'got co' gac xin' sa'l xa' par tyub ban no xa' xa'gota. <sup>8</sup> No co'se' ngolo mqueltàa ryop xa', xa'bi'a no xa'gota, thidte nac ryop sa'l xa' loo Diox. Le' sya, tataa mod ya inacte xa' chop mèn loo Diox. Ndxle'leque', thidte ngòc ryop xa' loo Diox. <sup>9</sup> Por cona, indxàalte li chol mèn par lá' mèn xtàa mèn co' nac xin' sa'l mèn tac Diox mbli thidte mqueltàa mènbi' con mèngot par gac xa' xin' sa'l.

<sup>10</sup> Co'se' ngo myen' xin' mté'th Jesús con Jesús liz thib mbi', mbere myen', mnibdi's myen' loo Jesús cón che'n di's co' mdoodi's no Jesús mèn xley' farisea. <sup>11</sup> Sya, ndxab Jesús loo myen' xin' mté'th Jesús:

—Mènbi' co' lá' xa'got co' nac sa'l mènbi'a, no selya' mènbi'a con tedib xa'got, mènbi'a ngue cua'n xtol co' nac yalburrid loo ner xa'got co' nac sa'lpe' mènbi'a. <sup>12</sup> No chele' thib xa'got lá' sa'l xa'gota no selya' xa'gota con tedib xa'bi', xa'gota, ne, ngue li yalburrid.

*Tad Jesús mbez loo myen' bix: Ngue lin gac con' ndac loo gu', ey.*

*(Mt. 19.13-15; Lc. 18.15-17)*

<sup>13</sup> Látha, nde no mèn co' nac xna' myen' bix ndxep myen' bix loo Jesús par ante gàal Jesús lad myen' bixa par gac con' ndac loo myen' bixa. Per ndxe'leque', myen' xin' mté'th Jesús ale mtlo myen', mbyoo myen' mèn co' nde no myen' bix par ne'tolode yi'th no mèn myen' bix loo Jesús. <sup>14</sup> Co'se' gunèe Jesús ngue yoo myen' mènna, ngocloo Jesús loo myen'. Ndxab Jesús loo myen':

—Bla' gu' yi'th myen' bix ba' loon. Ne'càde gu' loo myen'. Tac mèn co' ndxòo loo cón che'n Diox par ñibe'pe' Diox loo mèn, mènna ndxàc xal nac myen' bix ba'. <sup>15</sup> Lìcpe' ba'i, na nii loo gu': Mèn co' ne'tyalte yòo loo cón che'n Diox par ñibe'pe' Diox loo mèn no gáp mènna yalxla's loo Diox xalque' ndxàp myen' bix yalxla's loo Diox con dib nzo yéc myen'



no con dib nzo lezo' myen', thidtene ne'yòode mènà loo cón che'n Diox par ñibe'pe' Diox loo mènà.

<sup>16</sup> Sya, mde's mcàa Jesús myen' bixa. No mxo'f Jesús ya' Jesús loo myen'. No ndxab Jesús loo myen':

—Daa ngue li gác con' ndac loo gu' no ngue lin par tyac lezo' gu', ne, ndee.

*Thìb mbyòò ric mdoodi's no Jesús.*

*(Mt. 19.16–30; Lc. 18.18–30)*

<sup>17</sup> Le'pe' tyen Jesús ned par tolo ya que tee Jesús par neda, carre mbii gax thìb mbi' loo Jesús. No sangmdub xib mbi' loo Jesús. Mnibdi's mbi' loo Jesús. Ndxab mbi':

—Maistr Ndac, ¿cón lin no xá mod lin par que non no gàpen yalnaban thidtene co'te' nzo Diox, à'?

<sup>18</sup> Jesús mcàb loo mbi'. Ndxab Jesús:

—¿Chonon mbezl loon anze'f maistr ndac nac daa, à'? Yende chó mèn co', lìcque', nac xa' ndac. Angoluxte yub Diox nac xa' ndac. Chele' lùu indlide cuent no inden'te lezo'l nac daa Diox, axta ne' ne' ñeel loon nac daa maistr ndac. <sup>19</sup> Lùu nda'que' cuent no naneequel' xal ñibe' di's co' ndub loo libr co' nac xti's Diox co' ndxab:

Ne'lidel yalburrid. Ne'guthtel mèn. Ne'li huan'tel. Ne'tyè'del loo nec thìb mèn. Ne'quediidel nec thìb mèn. Gòp mod gunèe xudl no gunèe xna'l.

<sup>20</sup> Mbi' mcàb loo Jesús. Ndxab mbi':

—Maistr, ryete con'a mbliquen anon ndoo xènen no be' ngue lin con'a axta nalle'.

<sup>21</sup> Jesús mbui' loo mbi'. No mque' lezo' Jesús gunèe Jesús mbi'. Ndxab Jesús loo mbi':

—Nzo thidte con' co' be' ndxàc falt lil, ey. Huàa tho' ryete con' ndxàpl par co'l tmi loo con' ndxàpla. Yiloo, ta'l tmia càa mèn prob. Le' sya, tataa mod que nol taamas con' ndac loo bé'. Yiloo, sya, ndel. Nda na' ned ga que tee'en. No xecl ryethe con' gác lool co' li no mèn lùu par tethon mèn lùu ante por cón chenen, ndee.

<sup>22</sup> Per co'se' mbìn mbi' tataa ndxab Jesús loo mbi', anze'f mxi lezo' mbi' no nalyat mde'b ro mbi'. Ndyàa mbi' tac anze'f thìb yalgon' ngòp mbi'.

<sup>23</sup> Sya, mbui' Jesús dib vuelt loo mèn co' nziri' loo Jesús. No ndxab Jesús loo myen' xin' mté'th Jesús:

—Myen', anze'f nagàn tín' naca, cara, par tyal mèn ric yòò mèn ric loo cón che'n Diox par ñibe'pe' Diox loo mèn ric.

<sup>24</sup> Per myen' xin' mté'th Jesús ante mbui' no ante gunaa myen' loo Jesús por cón che'n di's co' ndxab Jesús cón che'n mbi'a. Sya, mbere Jesús. Ndxab Jesús loo myen' xin' mté'th Jesús tedib vez:

—Xin'a, susque' nagàn tín' naca par yòò mèn ric loo cón che'n Diox par ñibe'pe' Diox loo mèn ric co'se' más ndxàp mèn yalxla's loo ryethe yalgon' co' ndxàp mèn ric. Tac mèn ric ndli cuent ante por yalgon' co' ndxàp mèn ric no maste gác ryethe con' ndac loo mèn ric. <sup>25</sup> Lìcpe' ba'i, na nii loo gu': Más inagànte gàca loo thìb má' co' lèe camell par riid má' co' lèe camell ye'r ngudloo thìb aguj leque yòò mèn co' ndxàp huax yalgon' loo cón che'n Diox par ñibe'pe' Diox loo mèn.

<sup>26</sup> Co'se' mbìn myen' xin' mté'th Jesús tataa ndxab Jesús, ante mbui' myen' no ante gunaa myen'. No mnibdi's myen' loo xtàa myen'. Ndxab myen':

—Chele'i tatua' nac, ¿chó mèn gác lýá' loo con' ryes, sya?

<sup>27</sup> Jesús xèe mbui' loo myen' xin' mté'th Jesús. Ndxab Jesús loo myen':

—Ne'gácte chol mèn li chol mèn par lýá' mèn co' ndxàp xtol loo con' ryes. Per Diox ndxácque'. Tac ryethe con' co' ndly'a's Diox li Diox, ndxácque' Diox li Diox con'a.

<sup>28</sup> Sya, ngro' nxon' Pedr, ndxab Pedr loo Jesús:

—Tad, nu' mblá'ya' ryete con' mque no nu'. Nu' ngue que tee noque' U' ned nque tee U'.

<sup>29</sup> Jesús mcàb loo Pedr. Ndxab Jesús:

—Lìcpe' ba'i, na nii loo gu': Chol mèn co' lá'ya' liz, no hues, no fta'n, no xud, no xna', no sa'l, no xin', no xyòn ante por cón chenen no maste, no ante por cón che'n di's ndac

co' ndlu' xá mod lyá' mèn loo con' ryes, <sup>30</sup> gac che'n mèn nalle' thib ayo tant con' loo con' co' mblá'ya' mèn loo izlyo' ndxè' xal liz mèn, no hues mèn, no fta'n mèn, no xna' mèn, no xin' mèn, no xyòn mèn. Gàca loo mèn tataa mastale' gac tub ngu's mèn mèn. Per co'se' cue tedib cua' izlyo' co' cue yilóa, que no mèn yalnaban thidtene par ban no mèn Diox thidtene. <sup>31</sup> Nalle' loo izlyo' ndxè' nzo huax gu' co' nac mèn nación Israel. Gu' nzi li xtùuz anze'f ntac gu' loo Diox. No nzi li gu' xtùuz anze'f mèn roo no mèn xèn nac gu' loo Diox por nac gu' mèn nación Israel. Per ndxe'leque', Diox li le' gu' gac mèn be'the loo Diox tac Diox ndxecloo ñèe Diox gu'. Per part cón che'n Diox, mèn co' gu' ingode cuent ntac mèn loo Diox, mèn co' inacte mèn nación Israel, Diox li par gac huax mèn mèn co' más ntac loo Diox leque gu'. No gac mèn mèn co' más ndyac lezo' Diox ñèe Diox por mbli mèn cas loo cón che'n Diox.

*Jesús mbere ngue te'th loo myen' xin' mté'th Jesús le' Jesús gathque'.*

*(Mt. 20.17-19; Lc. 18.31-34)*

<sup>32</sup> Le'pe' le'n huiza, mnibe' Jesús loo lezo' Jesús ya Jesús ciuda Jerusalén. Láth nda quée Jesús con myen' xin' mté'th Jesús, nda Jesús par ned ciuda Jerusalén no ndoo ner Jesús loo myen'. Le' myen' na, ante ngüi' no ante ñaa xá nzo Jesús ned nda Jesús par ciuda Jerusalén. No mzyeb myen' nda nque myen' xís Jesús. Le' sya, ale mbere Jesús, mbe' Jesús rye si' fchop myen' xin' mté'th Jesús thib lad. Mtlo Jesús, mda' Jesús cuent loo myen' cón che'n xá mod tyactii Jesús le'n huiza. <sup>33</sup> Ndxab Jesús loo myen' xin' mté'th Jesús:

—Gu' naneeque' no nda'que' gu' cuent le' na' ndoole' ned. Nda quée na' par ned ciuda Jerusalén co'te' tyenxù' mèn daa, daa co' mbal yáal loo izlyo' ndxè' xalque' ndxáal chol mèn loo izlyo'. Mèn co' nac jef loo rye nguley' co' más ñibe' no mèn co' nac maistr co' ndlu' cón che'n ley co' mxo'f Moisés loo mèn, mèn quexù' que' fals daa par ta'xù' mèn daa loo mèn co' inacte mèn nación Israel. <sup>34</sup> Xiis xyán' mèn co' inacte mèn nación Israel ñèe mèn daa. No ta' mèn golp daa. Suc mèn rloon. No yilóa, guth mèn daa. Per yilo son huiz co' mbeth mèn daa, daa ryo xban làth mèn nguth.

*Cob no Juàn ngue yab loo Jesús li Jesús thib favor loo myen'.*

*(Mt. 20.20-28)*

<sup>35</sup> Sya, látha ngua gax ryop hues Cob Juàn co' ngòc xgan' Zebede loo Jesús. Ndxab ryop hues myen' loo Jesús:

—Maistr, nu' ndlya's li U' thib favor co' ña'b nu' loo U'.

<sup>36</sup> Jesús mnibdi's loo myen'. Ndxab Jesús:

—¿Chó favor ndlya's gu' lin loo gu', à', ey?

<sup>37</sup> Sya, ndxab myen' loo Jesús:

—Tad, favor co' ndlya's nu' li U' nac con' ndxè': Co'se' gac hor co' ñibe' U' loo mèn nación Israel, fta' U' lugar gac thib nu' síndico che'n U' no gac tedib nu' juez che'n U' par thidte ñibe' no nu' U' loo mèn nación Israel tiempa.

<sup>38</sup> Sya, ndxab Jesús loo myen':

—Axta ne' ne' ñee gu' cón ngue na'b gu' loon. No axta ne' ne' ta' gu' cuent cón ngue na'b gu' loon, ey. Nibdizen thib con' loo gu'. ¿Xá nee gu'? ¿Ché' tác gu' no ché' xec gu' tyactii gu' xalque' gac yaltii co' xec daa gac loon le'n huiz ndxè' co' nac xalque' co'se' gu' mèn thib taz nít cuan' huan nalà, cà'? No ¿ché' tác gu' no ché' xec gu' guth yèe mèn gu' xal guthyèe mèn daa le'n huiz ndxè', cà'?

<sup>39</sup> Myen' mcàb loo Jesús. Ndxab myen':

—Xec nu'i, Tad.

Jesús mcàb loo myen'. Ndxab Jesús:

—Lìcpe' ba'i, gaca loo gu' le' gu' tyactii tín' xalque' gac yaltii tín' loon yé' huize' axtaque' gath gu' xalque' gath daa. <sup>40</sup> Per con' co' ndlya's gu' par gac thib gu' síndico che'n daa, no tedib gu' gac juez che'n daa co'se' ñibe'en loo mèn nación Israel, inacte con'a cón chenen par tan lugara loo gu' par gaca tataa loo gu', cara. Ndxé'leque', Diox

mbli nab no mbli nèe Diox lezo' Diox chó nac mèn co' gac síndico che'n daa, no chó mèn co' gac juez che'n daa co'se' gac huiz co'se' ñibe'pe'en loo mèn nación Israel yiloo.

<sup>41</sup> Co'se' mbìn taasi' myen' xin' mté'th Jesús tataa ndxab ryop hues Cob Juàn no tataa ndxab Jesús, ale ngocloo myen' gunèe myen' Cob no Juàn. <sup>42</sup> Sya, ngurez Jesús myen'. No ndxab Jesús loo myen':

—Gu' nda'que' cuent no nonque' gu' le' mèn co' nac gobiern loo chol nación dib athu loo izlyo', gobierna ñibe' yèe loo mèn rye naciona. Le' mèn co' nac mèn roo no mèn xèn co' naqueltàa loo gobierna, mèn, ne, nqueltàa con gobierna par tolo nquil' mèn a gobiern par sate más ñibe' gobiern loo mèn naciona axta ne' ne' xec prob mèn loo con'a. <sup>43</sup> Per ndxe'leque', Diox indlya'ste gaca tataa làth gu'. Le' gu' co' ndlya's gac más mèn roo no mèn xèn làth gu', gu'a li mandad loo taamas xtàa gu'. <sup>44</sup> No chol gu' co' ndlya's ñibe' loo xtàa gu', gu'a ndxàal gac xal moz loo rye gu'. <sup>45</sup> Tac daa co' mbal yáal loo izlyo' xalque' ndxàal chol mèn loo izlyo' ndxè', ne'ngalten par li mèn mandad loon. Ndxè'leque', daa mbal par lin sirv loo mèn no par tan yalnaban daa loo yalguth xal thib con' co' anze'f ntac par tataa mod gaca le' rye mèn co' yila's loon, mèn que no yalnaban thidtene no lyá' mèn loo con' ryes.

*Jesús mdub xniì ngudloo thib mbi' sieu co' lèe Bartime.*

*(Mt. 20.29–34; Lc. 18.35–43)*

<sup>46</sup> Sya, mzin Jesús ciuda Jericó. Láth co'se' nda riid Jesús le'n ciuda Jericó con myen' xin' mté'th Jesús, thib mbi' sieu co' ngro' lèe Bartime ndub na'b gòn loo mèn co' ndri'th par neda. Mbi'a ngòc xgan' thib mbi' co' ngro' lèe Tim. <sup>47</sup> Per co'se' ndxòn mbi' mbez mèn le' Jesús co' nac mèn yèez Nazaret nde riid co'te' ndub mbi', mtlo mbi' sieua, mbez yèe mbi'.

—Jesús, U' co' nde bin David co' ngòc rey póla, gulat lezo' U' gunèe U' daa, yey.

<sup>48</sup> Ale huax mèn ale mtlo mbyoo mbi' par yau' ro mbi'. Per ndxe'leque', sate más cabii mbez yèe mbi'. Mbez mbi':

—U' co' nde bin David co' ngòc rey póla, gulat lezo' U' gunèe U' daa, niin.

<sup>49</sup> Sya, nguled Jesús. Ndxab Jesús loo mèn co' nda no Jesús:

Huàa rez gu' mbi' sieu ba'.

Sya, ngua mèn co'te' ndub mbi'. Ndxab mèn loo mbi':

—Huen blo lezo'l no ftegán lezo'l. Jer, goo too. Jesús ngue bezl.

<sup>50</sup> Sya, ndxecleque' sab co' mcap mbi' mblobii mbi'. Ngoloa, thidte nguát mbi' par setilte mzin gax mbi' loo Jesús. <sup>51</sup> Sya, mnibdi's Jesús loo mbi'. Ndxab Jesús:

—¿Cón ndlya'sl li nonl, à', ey?

Mbi' sieu mcàb. Ndxab mbi':

—Maistr, daa ndlyaz tub U' xniì ngudloon par ndxe'sleque' hui'en.

<sup>52</sup> Jesús ndxab loo mbi':

—Nzole' mod biil, ey. Ngudlool mdyuble' xniì tac ngola'sque'l loon.

Leque hora ndxe'sleque' mbui' mbi' sieua. Ngoloa, mdoo nque mbi' xís Jesús. Nda no mbi' Jesús ned nda Jesús.

## 11

*Jesús nzole' ned nda par ciuda Jerusalén.*

*(Mt. 21.1–11; Lc. 19.28–40; Jn. 12.12–19)*

<sup>1</sup> Co'se' nda zin gax Jesús con myen' xin' mté'th Jesús ciuda Jerusalén, gaxte tya nziri' chop yèez bix co' lèe Betfagé no Betañ. Ryop yèeza nziri' loo thib yii co' lèe yii che'n yaa oliv. Tya, mnibe' Jesús loo chop myen' xin' mté'th Jesús. <sup>2</sup> Ndxab Jesús loo myen':

—Huàa gu' lè'n yèez co' nziri' loo na' ba'. Co'se' yamerle' zin gu' le'n yèez ba', gu' hui' ndoo quedó' thib burr. Burra nec thib mèn tarte tyub. Fxac gu' burra. No ye'th no gu' burr loon trè'. <sup>3</sup> Chele' chó mèn nibdi's loo gu' chonon ngue xac gu' burr, gab gu' loo mèn: Tad nu' naquin burr. No yiloo, luega tel' Tad nu' par yilá' nu' burr.

<sup>4</sup> Mxen myen' ned. Nda myen'. No gunèeque' myen' ndoo quedó' burr. Ndoos quedó' burr gax cuat thib puert thib lad ro ned. Mxac myen' burr. Ndye'th no myen' burr loo Jesús. <sup>5</sup> Sya, ndxab ndxep mèn co' ngure co'te' ndoo quedó' burra loo myen':

—¿Cón ngue li no gu' burr ba', ngue xac gu' burr ba', à'?

<sup>6</sup> Sya, mcàb myen' loo mènà xalque' ndxab Jesús loo myen'. Sya, mbla' mènà. Ndye'th no myen' burr loo Jesús. <sup>7</sup> Mbe' myen' burr loo Jesús. No mxo'f myen' xab myen' xís burr. Ngoloa, mdub Jesús burr taate burr. <sup>8</sup> Làth xtau'a, huax mèn msil xab mèn xtau' ned. Le' taamas mèn na, mcho' laa yin no ram yaa no yíi. Mdoo mèn rye làa ro ryop lad ro ned co'te' nda riid Jesús par ned ciuda Jerusalén.

<sup>9</sup> Sya, mèn co' nda ner loo Jesús delant, no mèn co' nde nque par ned xís Jesús, mtlo mènà, mbez yèe mènà. Mbez mènà:

—¡Ay, Dio's! Anze'f ndyac lezo' mbi' ba' no anze'f mbi' ndac nac mbi' ba'. Mbi' ba' nde por lèe Tad Diox. <sup>10</sup> Anze'f con' ndac gac loo mèn co' yòo loo cón che'n Diox par ñibe'pe' Diox loo mènà, tac Diox ñibe'pe' loo mèn por cón che'n thib mbi' co' nac bin David co' ngòc rey póla. Por cona, mbez na': —Anze'f Diox roo Diox xèn nac Diox, ne.

<sup>11</sup> Ngoloa, ngòo Jesús ciuda Jerusalén. No ngòo Jesús le'n templ. Ngolo huen huen mbui' Jesús rye lad le'n templ, mxen Jesús ned. Nda Jesús par yèez Betañ con ryete si' fchop myen' xin' mté'th Jesús tac mzyèle' izlyo' huiza.

*Ante gunii Jesús di's loo thib xan' yaa ngudyuug. Ale setilte mbiiz yaa ngudyuug.*

*(Mt. 21.18–19)*

<sup>12</sup> Ngonii izlyo' tedib huiz co' nde nquea. Co'se' ngro' Jesús le'n yèez Betañ, mtlo mblyan' Jesús. <sup>13</sup> Sya, tithre' nde Jesús gunèe Jesús ndoo thib xan' yaa ngudyuug co' ante nayèe ñaa ndoo laa. Jesús ngua tee hui' loo yaa ñeene' ché' ndoo ngud loo yaaa par hua Jesús. Per yende chó ngud ndoo loo yaaa tac inacta tiemp co' tyoo ngud loo yaa.

<sup>14</sup> Sya, gunii Jesús loo yaa ngudyuug. Ndxab Jesús:

—Nase biizl. Ya yende chó más mèn hua ngud co' ta'l.

Myen' xin' mté'th Jesús mbìn di's co' gunii Jesús.

*Jesús mblo' rye má', no mèn, no mes le'n templ.*

*(Mt. 21.12–17; Lc. 19.45–48; Jn. 2.13–22)*

<sup>15</sup> Ngoloa, mbere Jesús, mzin Jesús ciuda Jerusalén con myen' xin' mté'th Jesús. No co'se' ngòo Jesús le'n templ, mtlo Jesús, mblo' Jesús rye mèn co' ntho' no mèn co' ndi' le'n templ. Ndxecleque' rye con' mblobii Jesús par fuer. Mtexyath Jesús mes che'n mèn co' nsil' tmi. No mtexyath Jesús asient che'n mèn co' ntho' palomxtil'. Ndxec ndxec rye asient co' mdyub mènà mblobii Jesús par fuer, ne. <sup>16</sup> Ne'nda'de Jesús lugar loo nec thib mèn, mbere mèn, ngòo mèn che'n mèn le'n templ tedib vez. <sup>17</sup> Mblu' Jesús di's loo mèn le'n templ. Ndxab Jesús loo mèn:

—Loo libr co' nac xti's Diox ndub di's co' mbez: Lizen nac co'te' cues mèn rye nación lèen. Per gu', ale ndxe'leque', mbli le' lizen nac xal thib quèe lyo' co'te' ndxòo ban huan' no co'te' ndxòo casloo huan'.

<sup>18</sup> Per mèn co' nac jef co' más ñibe' loo rye nguley' no mèn co' nac maistr co' ndlu' cón che'n ley co' mxo'f Moisés loo mèn, mènà mbìn di's co' ndxab Jesús. Sya, mtlo mènà, mcua'n mènà mod guth mènà Jesús tant mzyeb mènà ñèe mènà Jesús. Más de cona, ryete mèn co' nziri' no Jesús ante ngüi' no ante ñaa loo con' ndlu' Jesús. <sup>19</sup> Per co'se' ngulàa yál' izlyo' huiza, Jesús mbii le'n ciuda Jerusalén tedib vez.

*Trè' ndlu' le' yaa ngudyuug mbiizxù'.*

*(Mt. 21.20–22)*

<sup>20</sup> Co'se' ngonii izlyo' tedib huiz co' nde nquea, xtil'leque' nguri'th Jesús con myen' xin' mté'th Jesús par ned ndoo yaa ngudyuuga. Gunèe myen' mbiizle' yaa ngudyuug axta lox yaa ngudyuug no axta loo punt yaa ngudyuug. <sup>21</sup> Sya, chàa, mte' lezo' Pedr máa yaa ngudyuuga. Ndxab Pedr loo Jesús:

—Maistr hui' U' nexa. Yaa ngudyuug co' gunii yèe U' no co' mquedèe U' loo ná'a mbiizle'.

<sup>22</sup> Jesús mcàb. Ndxab Jesús loo myen':

—Gola's gu' loo Diox. No gòp gu' yalxla's loo Diox. <sup>23</sup> Tac licpe' ba'i, na nii loo gu': Le' chol mèn co', licque', ndxela's loo Diox, ante gab mènà no ante ñii mènà loo yii ndxè' biiche yii ndxè' trè' no ya tub yii ndxè' le'n níttó', chele' mènà por derech, licque', ndxela's no inacte mènà chop loo chop la's mèn loo Diox, le' sya, Diox lique' gác con' ña'b mènà loo Diox. <sup>24</sup> Cona, ngue niin loo gu': Ryete con' co' ña'b gu' loo Diox co'se' mbez gu' Diox, chele' gu' ndxela's le' con' co' ña'b gu' loo Diox li Diox par que no gu' co' ña'b gu' loo Diox, le' sya, ryete con' co' ña'b gu' loo Diox gácque' loo gu'. <sup>25</sup> No chele' chó gu' ngocloo gunèe xtàa gu', no chele' chó gu' be' ndxecloo ñèe gu' xtàa gu' co'se' tlo cuez gu' Diox, fteri'th ftecan' gu' con' co' mbli xtàa gu' loo gu'a. Le' sya, tataa mod, ne, xud gu' co' nzo loo bé' ton' xtol gu' no xquin gu' co' mcua'n gu'. <sup>26</sup> Per chele' gu' ne'talte yéc gu' no lezo' gu' par teri'th gu' no tecan' gu' xtol chol mèn co' ndli mèn loo gu', le' sya, ne' xud gu' Diox co' nzo loo bé' ne'ton'te xtol gu' no xquin gu' co' mcua'n gu' con mèn.

*Jesús, licque', ndxàp con' la's nii Jesús no con' la's ya' Jesús par li Jesús con' roo no con' xèn.*

*(Mt. 21.23-27; Lc. 20.1-8)*

<sup>27</sup> Ngoloa, mbere Jesús con myen' xin' mté'th Jesús. Ndyé'th Jesús con myen' par ciuda Jerusalén tedib vez. Per co'se' ñèe mèn co' nac jef co' más ñibe' loo rye nguley', no mèn co' ndlu' cón che'n ley co' mxo'f Moisés loo mèn, no mèn gool co' ñibe', no co' ndyoo ner, no co' ndyoo naa loo mèn nacionpe' Israel le' Jesús ngue que tee le'n templ, ngua gax mènà loo Jesús. <sup>28</sup> Mnibdi's mènà loo Jesús. Ndxab mènà:

—Gunee loo nu', ¿chó yalñibe' ndxàpl no chó mnibe' lool mbli con' co' mbli ná'a, à'?

<sup>29</sup> Jesús mcàb loo mènà. Ndxab Jesús:

—Na, ne, nibdi's thib con' loo gu'. Chele' gu' càb loon, sya, na nii loo gu' con chó yalñibe' mbli con' mbli loo gu'a. <sup>30</sup> ¿Xá nee gu'? ¿Chó mtel' Juàn Bautist par mbi'th li Juàn bautizar mèn? ¿Ché' Diox mtel' Juàn mbi'th Juàn o ché' chol mèn mtel' Juàn mbi'th Juàn par mbli Juàn bautizar mèn, à'?' Fcàb gu' loon.

<sup>31</sup> Sya, leque mènà mtlo, noo noo mdoodi's no mènà xtàa mènà cón che'n di's co' ndxab Jesús loo mènà. Ndxab mènà loo xtàa mènà:

—Chele' na' gab: Diox mtel' Juàn, le' sya, càb mbi' ba' loo na'. Ñee mbi': ¿Chonon ne'ngala'ste gu' loo Juàn, sya? <sup>32</sup> O ¿ché' tab na' loo mbi' ba': Chol mèn izlyo' mtel' Juàn, cà'?' Axta ne' ne' ñee mènà cón gab mènà tac mènà mzyeb ñèe rye mèn co' nziri' loo Jesús.

Tataa mbez mènà tac mènà naneeque' no mda'que' mènà cuent le' rye mèn co' nziri'a ngola's loo Juàn le' Juàn mdoodi's part cón che'n Diox. <sup>33</sup> No por mzyeb mènà, mcàb mènà loo Jesús. Ndxab mènà:

—Ne'ñeede nu' chó mtel' Juàn, cara.

Sya, ndxab Jesús loo mènà:

—Ne' daa ne'niide loo gu' con chó yalñibe' mbli con' co' mbli ná'a.

## 12

*Jesús mtetac cón che'n mèn ye'rsin' co' mque zin'.*

*(Mt. 21.33-46; Lc. 20.9-19)*

<sup>1</sup> Sya, mtlo Jesús, mdoodi's Jesús loo mèn. No mtetac Jesús di's. Ndxab Jesús loo mèn:

—Nde niin thib con' loo gu', ey: Ngo thib mbi' co' mdoo ampurte lus uv loo xyòn mbi'. Ngoloa, mblo mbi' yaaloo dib vuelt ro yòo co'te' mdoo mbi' lus uv. Mtoxcua' mbi' thib tanc co'te' tí' moz uv par ryo' nít uv. No mbli mbi' mandad mdyoxcua' thib cuart co' mdub axta arid gáp par gáp'le'que' la's moz loo zin' no loo yòo co'te' nzo'f lus uva.

Ngoloa, mda' mbi' xyòn mbi' loo tedib mèn par li mèn zin' cuent rol loo xyòn mbi'. Ngoloa, mxen mbi' ned. Nda mbi' thib viaj tith. <sup>2</sup> Co'se' mzin tiemp gác rol uv, mbi'a mtel' thib moz mbi' par yi'th càaya' moz uv co' li rol mèn co' ngue li zin' cuent rol par



gàc che'n mbi' uv. <sup>3</sup> Per mèn co' mbli zin' loo yòo co'te' mxyo'f lus uv, mènà mxen moz no mdin mènà moz. No mtel' mènà moz nague's ya' moz ndyàa moz. Ne'nda'de mènà uv nghue' moz. <sup>4</sup> Sya, mbi' co' nac xuan' yòoa mbere mtel' tedib moz. Per mèn co' mbli zin' loo yòoa, mbuaa'd quèe moz. Mblé' mènà yéc moz. No mxiiis no mènà moz axta plóthe. Ngoloa, taate moz ndyàa moz. <sup>5</sup> Mbere mbi' co' nac xuan' yòoa. Mtel' mbi' tedib moz par mbi'th moz loo mènà. Per mènà mxen moz. Mbeth mènà moz. Ngoloa, mtel' mbi' co' nac xuan' yòoa huax moz loo mènà. Lomisque' mbli mèn. Chó moz mbuaa'd quèe mèn. Chó moz mbeth mèn.

<sup>6</sup> Per mbi' co' nac xuan' yòo lus uv ngue no thib xgan' co' nac angoluxte xgan' mbi'. Xgan' mbi'a anze'f ngudloo mbi' no anze'f lezo' mbi'. Por lult mtel' mbi' xgan' mbi' loo mènà. Ndxab mbi' loo lezo' mbi': Tel'en xgan' daa ndxè'. Daa ngobe' li mènà cas no gáp mènà mod ñèe mènà xgan' daa ndxè'. <sup>7</sup> Per co'se' gunèe mèn co' ndli zin' loo lus uv nde mbyòo loo mènà, ndxab mènà loo xtàa mènà:

—Mbyòo ba' yan' no yòo lus uv ndxè'. ¿Xá nee gu'? Nda yuth na' mbyòo. Sya, gàc che'n na' yòo lus uv ndxè'.

<sup>8</sup> Ale mxen mènà xgan' mbi'a. Mbeth mènà xgan' mbi'. Ngoloa, mblo' mènà thebol xgan' mbi' thib lad ro yòo co'te' nzo'f lus uv.

<sup>9</sup> Sya, mnibdi's Jesús loo mènà. Ndxab Jesús loo mènà:

—¿Xá nee gu'? ¿Cón li mbi' co' nac xuan' xyòn lus uva con mènà, à'? Na nii loo gu' cón li mbi'. Mbi' yi'th. No guth mbi' mènà. No ta' mbi' xyòn mbi' co'te' nzo'f lus uva loo tedib cua' mèn co' ndli leque zin'a, ¿lé'?

<sup>10</sup> Ché' tarte lab gu' loo libr co' nac xti's Diox par ta' gu' cuent xal mbez di'sa, cà'? Di's co' ndub loo libr co' nac xti's Diox mbez taandxè':

Le' quèe co' mbli mèn co' nac albañil cuent ne'li zin'te albañil, leque quèea ngòc quèe ngua lit Tad, Tad co' ngòc xal thib albañil par ngòc quèea ner quèe co' mbli sirv loo zin' co' mbli Tad.

<sup>11</sup> No con' co' ngòca mbli yub Tad Diox. Por cona, por part cón che'n na', ante ngüi' na' no ante ñaa na' xá mod nac con' co' mbli Tad Diox.

<sup>12</sup> Co'se' mbìn mènà tataa ndxab Jesús, capas mènà, ale ndyac mènà mxenle' mènà Jesús xal ndyen mèn thib pres tac mènà mda' cuent no mden' mènà di's co' ndxab Jesús tac por cón che'n mènà mtetac Jesús di'sa. Per com le' mènà mzyeb ñèe mèn co' nziri' loo Jesús, ¿lé'?, xexte mblá' mènà Jesús. Ndyàa mènà.

*Jesús ngue lu' loo mèn cón che'n tmi co' ndxàal quix mèn cón che'n contribución.*

*(Mt. 22.15-22; Lc. 20.20-26)*

<sup>13</sup> Ngoloa, mtel' mèn co' nac jef co' más ñibe' loo nguley', no mèn co' nac maistr co' ndlu' cón che'n ley co' mxo'f Moisés loo mèn, no mènngool co' ñibe', no co' ndyoo ner, no co' ndyoo naa loo mèn nación Israel ndxep mèn xley' farise no ndxep mèn co' nac partid che'n Herod loo Jesús par aseli mènà yecloo Jesús no gab Jesús ngòc nguàal di's loo mènà par tataa mod quexù' que' fals mènà Jesús. <sup>14</sup> Sya, ngua mènà loo Jesús. Ndxab mènà loo Jesús:

—Maistr, nu' nanee lìcque' nac co' mbez U'. No ne' ne' indli U' cas co' ndli mèn no co' mbez mèn. Tac indla'ste U' xal nac mod co' ndxàp mèn. Ndxé'leque', ndlu' U' co' nac lìcpe' xá mod yòo mèn loo cón che'n Diox. Per nalle', ndlya's nu' ñee U' loo nu': ¿Xá nee U'? ¿Ché' ndxàal quix nu' cón che'n contribución loo gobiern federal che'n mèn ciuda Rom o ché' indxàalte quix nu'i?

<sup>15</sup> Per Jesús mda'que' cuent no nonque' Jesús xá nac mod co' ndxàp mènà co'se' ntembii ro mènà no ntembii xti's mènà loo Jesús. Sya, ndxab Jesús loo mènà:

—¿Chonon ncu'a'n gu' mod asendli gu' par yigaa daa loo gu' xal co'se' ndxegaa mèn loo tramp, à'? Huàa xi gu' thib pes gu' par hui'en ñeene' xá ñaa'i.

<sup>16</sup> Sya, ngua xi mènà thib pes pchò. Co'se' gunèe Jesús pesa, mnibdi's Jesús loo mènà. Ndxab Jesús:

—¿Chó che'n gunab co' ngue loo pes ndxè'? no ¿chó che'n lèe co' ngue loo pes ndxè', ne, à'?

Sya, ncàb mènà loo Jesús. Ndxab mènà:

—Gunab ba' no lèe ba' nac che'n gobiern co' ndub ciuda Rom.

<sup>17</sup> Sya, ndxab Jesús loo mènà:

—Pues, fta' gu' co' nac che'npe' gobiern co' ndub ciuda Rom càa gobiern. No fta' gu' co' nac che'npe' Diox càa Diox.

Ngoloa, ante mbui' mènà no ante gunaa mènà loo Jesús xal nac di's co' mcàb Jesús loo mènà.

*Mèn mnibdi's loo Jesús: ¿Ché', licque', ryo xban mèn?*

*(Mt. 22.23-33; Lc. 20.27-40)*

<sup>18</sup> Ngoloa, ngua ndxep mèn xley' saduce co' mbez no co' ndxela's le' mèn nguth ne'ryo xbante thidtene loo Jesús. No por cona, asembli mènà, mnibdi's mènà thib con' loo Jesús.

<sup>19</sup> Ndxab mènà loo Jesús:

—Maistr, Moisés mtan' ye's co' ndlu' loo nu' chele' thib mbi' gath no yan' sa'l mbi', yende xin' sa'l mbi', le' sya, hues mbi' co' ngutha selya' con xa'got viud co' mbyan'a par que no hues mbi' co' ngutha xin' hues mbi' co' ngutha con xa'got viud co' mbyan' co' nac sa'l thebol par gac xin' hues thebol xin' thebol co' nguth. <sup>20</sup> Tolo ndxab mènà loo Jesús:

—Pues ngo gaz hues myen'. Mzin huiz mselya' mbyòo ndlyoa. Per pente ndxàc chop o son lín' mselya' mbyòo ndlyoa, nguth mbyòo ndlyoa. Ne'ndante xa'got co' ngòc sa'l mbyòo xin' mbyòo. <sup>21</sup> Ngoloa, mselya' mbyòo co' nde nque xís mbyòo ndlyoa con xa'got viuda. Nguth mbyòo ropa, ne. No ne'ndante xa'got viuda xin' mbyòo. Lomisque' ngòca loo tedib mbyòo co' nde nque xís mbyòo ropa, ne. <sup>22</sup> Por lult ryete gaz hues myen' mselya' con xa'got viuda. Ale ne'ndante xin' xa'got viuda con nec thib rye myen' hues thebol co' ngòc sa'lpe' xa'gota. Por lult, guneei loo xa'got viuda, ne. <sup>23</sup> Cona ngue nibdi's nu' loo U': Co'se' gac huiz co'se' ryo xban mèn co'se' cue ban mèn tedib vez, de loo rye gaz hues myen' co' mselya' con xa'gota, ¿chó myen' gac sa'lpe' xa'got viuda, à'?

<sup>24</sup> Sya, mcàb Jesús loo mènà. Ndxab Jesús:

—Susque' ndxos xtùuz gu' no susque' yéc brèl gu'. Ndxàc con' ba' loo gu' tac ne'ta'de gu' cuent cón mbez di's co' ndub loo libr co' nac xti's Diox. No ne' ne' ta' gu' cuent con' co' nac con' roo no con' xèn co' nzo la's nii Diox no co' nzo la's ya' Diox. <sup>25</sup> Tac co'se' ryo xban mèn nguth, mèn co' ngòc loo cón che'n Diox, ne'selya'de mènà. Ne' ne' ya na'b mènà xiix mènà. Ndxè'leque', mènà gac xal angl co' nzo loo bé' huiza, co' nee di's, ne'selya'de mèn huiza. <sup>26</sup> Per cón che'n mèn co' nguth co' ryo xban, ¿ché' tarte lab gu' loo libr co' nac xti's Diox co' mque' Moisés ye's xal ngòc di's co' mdoodi's Diox loo Moisés le'n yaa zars co'se' xèe ngue hui' Moisés ndxol' yaa zars? Taandxè' ndxab Diox loo Moisés:

—Daa nac Diox che'n Abraham. Nac daa Diox che'n Isaac. No nac daa Diox che'n Cob.

<sup>27</sup> Diox inacte Diox loo mèn nguth. Ndxè'leque', nac Diox Diox loo mèn co' be' naban. Por cona, ngue niin loo gu': Axta ne' ne' ñee gu' cón mbez gu' loon no cón ñibdi's gu' loon por nac gu' mèn co' ndxos xtùuz.

*Jesús ngue lu' mèn chó di's nac di's co' más ñibe' Diox loo mèn par li mèn.*

*(Mt. 22.34-40)*

<sup>28</sup> Látha, mzin thib mbi' co' nac maistr co' ndlu' cón che'n ley co' mxo'f Moisés loo mèn. Mbi'a noo noo mque' nza di's co' mdoodi's Jesús con mèn xley' saduce. Mbi' mda' cuent huenque' mcàb Jesús loo mènà. Mnibdi's mbi' loo Jesús. Ndxab mbi':

—De loo rye si' di's co' mnibe' Diox loo na', no co' mtan' Moisés loo na', ¿chó di's nzo làtha co' más ñibe' Diox loo na' par tyubdi's na' loo Diox, à'?

<sup>29</sup> Jesús mcàb loo mbi'a. Ndxab Jesús:

—Ner di's co' más ñibe' Diox loo mèn par tyubdi's mèn loo Diox cón li mèn nac di's ndxè' co' mbez taandxè': Bìn gu' di's ndxè', mèn nación Israel, le' Tad co' nac Diox na',

Tada nac thidte Diox. <sup>30</sup> Fque' lezo' gu' Tad Diox gu', tá, dib nzo yéc gu' no dib nzo lezo' gu'. Di's ndxè' nac ner di's co' mnibe' Diox loo na' par li na'. No nac di's ndxè' co' más ntac loo rye taamas yalñibe' par li na' xal ñibe' Diox. <sup>31</sup> No casque' lal nac tedib di's xal ner di's ndxè'. Mbryop di'sa ñibe' loo na' taandxè'. Mbez di'sa: Fque' lezo' gu' gunèe gu' hues xtàa gu' xalque' ngue lezo' gu' ñèe gu' gu'. Ya yende tedib di's co' más mnibe' Diox loo na' co' ndxàal li na' co' nac xal di's co' ñibe' di's ndxè' loo na' par li na'.

<sup>32</sup> Sya, ndxab maistr co' ndlu' cón che'n ley co' mxo'f Moisés loo mèn loo Jesús:

—Huenque' gunee U', Maistr. Lìcque' naca xal ngolo gunee U'i ba'. Thidte Diox nzo no yende tedib Diox co' nzo. <sup>33</sup> No que' lezo' mèn Diox dib nzo yéc mèn no dib nzo lezo' mèn, no que' lezo' mèn ñèe mèn hues xtàa mèn xalque' ngue lezo' mèn ñèe mèn mèn. Lìca, masque' ntac li mèn xal ngolo gunee U' leque li mèn xal co'se' nda' mèn che'n izlyo' ncàa izlyo', co' nee di's, co'se' ndxuth mèn ngon yèn' no mbacxil' yèn' par nxo mèn ren má'a loo izlyo'. No, lìcque', más ntac li mèn xal ngolo gunee U' ba' leque li mèn xal co'se' nda' mèn ofrend o gòn co' mbec mèn loo Diox no co' mtec mèn bél' má' co' mbeth mèn loo mes co' nac loo còo' par nquée zen che'n bél' má'a loo Diox.

<sup>34</sup> Le' sya, co'se' gunee Jesús huenque' mcàb mbi' loo Jesús, ndxab Jesús loo mbi':

—Itithte nzol loo cón che'n Diox par yòol loo cón che'n Diox, ey, par ñibe' pe' Diox lool. Ngoloa, ya yende chó mèn tolo ngli ryes ngñibdi's taamas con' loo Jesús.

*Jesús mnibdi's loo mèn: ¿Chó xin mbez mèn nac Crist?*

*(Mt. 22.41-46; Lc. 20.41-44)*

<sup>35</sup> Jesús ngue lu' mèn le'n templ thib vez. No mbez Jesús loo mèn:

—¿Xá nee gu'? ¿Xá mod chonon mbez mèn co' nac maistr co' ndlu' cón che'n ley co' mxo'f Moisés loo mèn le' Crist nac xgan' David co' ngòc rey póla, à'? <sup>36</sup> Tac Xpii Natú' mbli le' yub David gunii no mde'th David cón che'n Crist. Ndxab David:

Tad Diox ndxab loo Tad daa: Ftub cuaten axta lin le' rye mèn co' nac ngolo ngola's che'n lùu gac nado' loo lùu.

<sup>37</sup> Cona, ngue niin loo gu': ¿Xá mod gac Crist xgan' David co'se' leque David mbez loo Crist: Tad daa, à'?

Per yende cón mcàb mèn.

Rye mèn co' ngòc huax mèn co' nziri'a, axta gust mda' lezo' mèn co'se' mbìn mèn tataa ndxab Jesús loo mèn.

*Jesús mzib quii mèn co' ngòc maistr co' ndlu' cón che'n ley co' mxo'f Moisés loo mèn.*

*(Mt. 23.1-36; Lc. 11.37-54; 20.45-47)*

<sup>38</sup> Co'se' ngue lu' Jesús mèn, mbez Jesús loo mèn:

—Nee gu' nee gu' xá que tee gu' loo mèn co' nac maistr co' ndlu' cón che'n ley co' mxo'f Moisés loo mèn. Mèn ndyubla's goc xab lar' nol', no anze'f ndubla's mèn ñii chol mèn Diox loo mèn pál co'te' nzyál' mèn mèn par tyu' mèn loo mèn. <sup>39</sup> Mèn anze'f ndxòo lezo' cua'n mèn lugar co'te' tyub mèn le'n sinagog par gac con' guryath no con' guryèn loo mèn no par más tyu' mèn loo mèn le'n sinagog. No ndxòo lezo' mèn tyub mèn co'te' más tyu' mèn loo mes par hua mèn co'se' ndxàc chol yalhua.

<sup>40</sup> Ale nde yath mèn ndyenxù' mèn no ncàaxù' mèn liz prob mèn got viud por pláte pes no maste. No par ndli mèn xalque' mèn co' ne'ñeede, ale asendli mèn, nteyol' mèn di's co'se' mbez mèn Diox. Per, lìcpe' ba'i, na nii loo gu': Por con' ndli mèn gac más yaltii tín' loo mèn co'se' gac huiz tub rez Diox cón che'n mèn loo mèn.

*Thib xa'got viud ngue go ofrend le'n caj mastale' prob xa'.*

*(Lc. 21.1-4)*

<sup>41</sup> Thib vez mdub Jesús le'n templ gaxte co'te' nzo'f caj co' ngo mèn ofrend o gòn. Xèe ngue hui' Jesús xá ndxàc mèn ngo mèn gòn le'n caj no xá ndxàc rye mèn ric ngo mèn ric gòn le'n caj. <sup>42</sup> Látha, mzin thib xa'got viud. Xa'got viuda pente mblo chop centav co' ngue no xa' co' be'te ntac le'n caj co' nzo'f tya. <sup>43</sup> Sya, ngurez Jesús myen' xin' mté'th Jesús. Ndxab Jesús loo myen':

—Lìcpe' ba'i, na nii loo gu': Le' Diox más ngo cuent cón che'n gòn co' mblo prob xa'got viud ba' le'n caj leque gòn co' mblo mèn ric le'n caj. <sup>44</sup>Tac ryete mèn ba' mblo huax tmi co' nac gòn le'n caj tac mbyan' xo'f tmi loo mèn ba'. Per prob xa'got viud ba', ale tyan' hualeque' xa', mblo xa' gòn chop centav le'n caj co' nac co' be'te ngue no xa' par ti' xa' con' hua xa'.

## 13

*Jesús ngue ta' cuent loo myen' xin' mté'th Jesús le' mèn làare' templ.*

*(Mt. 24.1-2; Lc. 21.5-6)*

<sup>1</sup>Ngoloa, co'se' nda ro Jesús le'n templ, thib myen' co' nac xin' mté'th Jesús ndxab loo Jesús:

—Maistr, hui' U' nexa. Susque' nabe's ñaa quèe co' natoxcua' templ no quetal nabe's ñaa templ ba', ne, ¿lé'?

<sup>2</sup>Per ale mcàb Jesús loo myen'. Ndxab Jesús:

—Ale xèe ndoo yotl, ngüi'l loo templ ba', ¿lé'? Lùu ndli cuent anze'f nabe's ñaa ftoo co' natoxcua' templ ba', ¿lé'? Per na nii lool: Ya ne'yan'te nec thib quèe loo xtàa quèe co' nacsua' ftoo ba'. Thidtene telux mèn ryethe con' co' ngüi'l co' natoxcua' templ ba' yé' huize'.

*Jesús ngue ta' cuent loo myen' xin' mté'th Jesús cón gac' ndoore' lith no izlyo'.*

*(Mt. 24.3-28; Lc. 21.7-24; 17.22-24)*

<sup>3</sup>Sya, ngua no Jesús myen' xin' mté'th Jesús loo thib yii co' lèe yii che'n yaa oliv. Yii ndub thib lì loo templ. No co'se' mdub Jesús tya, Pedr, Cob, Juàn, no Ndech, xexte ndxab myen' loo Jesús:

<sup>4</sup>—Tad, nu' ndlya's ñee U' loo nu' pól gac' co' gunee U' loo nu' gozea cón che'n templ no chó con' tlo yú' loo mèn no co' tlo gac' co'se' tlo gac' co' gunee U' gaca, à'?

<sup>5</sup>Jesús mcàb loo myen'. Ndxab Jesús loo myen':

—Anderhuen gu'. Chó Diox chó nee gu'. Nee gu' nee gu' xá nzi tee gu'. Ne'ta'de gu' lugar quedii chol mèn gu' cón che'n con' co' tlo gac' co'se' gac' tiemp co' tlo gac' con' xal nac di's co' guniin loo gu' cón che'n templ no cón che'n xá mod lith no izlyo'. <sup>6</sup>Tac co'se' gac' tiempa, anze'f huax mèn ryo' tee no yi'th que tee mènà yèez por yèez mèn no liz por liz mèn. Mènà ñee le' daa mtel' mènà. No ñee mènà le' mènà nac Crist. Tataa mod anze'f huax mèn quedii mènà.

<sup>7</sup>Lomisque' ne, co'se' gòn gu' nde'th mèn ndxàc xó', no anze'f ryes naca par tlo xó' le'n tiempa, ne'zyebte gu' co'se' gòn gu' te'th mèn tataa tac tataaque' naquin tlo gaca. Per mastale' tataa gaca le'n tiempa, ne'gacte tiempa lult huiz co' lyux izlyo' no lith no izlyo'. <sup>8</sup>Tac le'n tiemp co' tlo gac' co' guniin loo gu'a, mèn thib nación tlo yecloo no tlo yòo xyàn lezo' mèn ñèe mèn tedib nación. No tlo mèn thib nación, por derech, cua'n xó' mènà thib xó' loo mèn tedib nación. Le'n tiempa huin xòo huax lugar. No lyàa huin huax lugar. No tlo yátbèe mèn. Tlo mèn, li mèn thib revuelt. No con' co' tlo gaca nac thib yalnaxi no thib yalnè co' pente tlo par tlo tyactii tìn' mèn loo izlyo' ndxè'.

<sup>9</sup>Anderhuen gu'. Chó Diox chó nee gu'. Leque gu' quenap gu' co'se' tlo gac' con'a le'n tiempa. Le'n tiempa, ale ta'xù' mèn gu' loo mèn nac zin' yòolau chol lugar. No ta' mèn che'n gu' co'te' nac sinagog mèn. Gu' tyooxù' loo mèn co' nac gobernador no loo mèn co' nac rey por cón chenen no maste. Tataa mod más gac' gu' no ta'i thib lugar loo gu' par ta' gu' cuent loo mèn cón chenen. <sup>10</sup>Cona, ngue niin loo gu': Ndoore' co'se' lyux izlyo' no lith no izlyo', naquinque' yath yèn cón che'n di's ndac che'n Diox co' ndlu' xá mod lyá' mèn loo con' ryes. Nò naquinque' co' mèn yalbàn cón che'n di's ndac loo mèn, mèn co' nac mèn chol nación co' nziri' dib athu loo izlyo'. <sup>11</sup>No co'se' hue' mèn gu' par ta' mèn gu' loo mèn nac zin' yòolau chol lugar, ne'tyóode gu', no ne'zyebte gu', no ne' ne' gab gu' loo lezo' gu' cón gab gu' loo mènà. Guuz gu' di's co' lu' Diox loo gu' loo mènà hora. Tac inactive ante gu' co' ñii loo mènà. Ndxle'leque', Xpii Natú' nac xa' co' ñii no co' tyoodi's por ro gu', co' nee di's, co' nac di's co' ryo' ro gu' hora. <sup>12</sup>Leque mèn co' ndxàc huespe'

cua'n mod par ta'xù' mènà hues mèn par guth mèn hues mèn. No leque mèn co' nac gundan loo mèn cua'n mod par ta'xù' gundan xin' gundan loo mèn par guth mèn xin' gundan. Le' myen' co' nac xgan' gundan na, myen' cua'n mod par bixyath myen' contra xud myen' par ta'xù' myen' xud myen' loo mèn par guth mèn xud myen'. <sup>13</sup> Ryete mèn co' nac mèn chol nación, mènà yecloo ñèe gu' por cón chenen no maste. Per chol gu' co' mbli nèeque' gu' loo cón chenen par yòo gu' loo cón chenen axta gath gu', gu'a lyá' que' loo con' ryes.

<sup>14</sup> Tolo niin loo gu', ne: Le' mbi' co' ngro' lèe Daniel co' mde'th di's co' ndxab Diox, mbi' mque' ye's loo libr co' nac xti's Diox cón che'n thib mbi' co' li par gac mèn mèn zab loo Diox no co' li par tyuhuan mèn loo Diox par lyux mèn loo cón che'n Diox. Co'se' ñèe gu' ndoo mbi' zaba co'te' indxàalte tyoo mbi' thidtene, syare' ta' mèn cuent, mèn co' ndlab ye's, chó mbi' nac mbi'a. Le' sya, mèn nación Israel co' nzo le'n yèezya' co' nac làaz mèn jude, mènà ndxàal xyon' par yii no par huan tith ya xon' mènà loo con' ryes co' gac loo mènà. <sup>15</sup> Le' mèn co' nzi tee yéc zote liz mèn huiza na, más huen ne'bilàade mènà par co' mèn mase ndxèpte che'n mèn le'n nyòo. Más huen thib lite xyon' mènà tith. <sup>16</sup> Lomisque' ne, mèn co' ngue zin' huan huiza, más huen ne'ye'thte mènà liz mènà huiza par co' mènà mase xobis mènà liz mènà. Más huen thib lite xyon' mènà más tith. <sup>17</sup> Lomisque' ne, ay, prob rye mèngot izlyo', mèngot co' nzi nac xin' le'n huiza, no rye mèngot co' nacàa mbeto' co' ndxàaz le'n huiza, tac yende mod xyon' mènà huiza. <sup>18</sup> Bna'b gu' loo Diox par ne'gàcte tiemp co' xyon' gu'a tiemp xil', ndee gu'. <sup>19</sup> Tac tiempa gac huiz co' más ten' mèn yalnè no huiz co'se' más tyac mèn yaltii. Con' co' gac tiempa nac co' tarte gac dib lal naban mèn loo izlyo'. Más de cona, ya ne'berede gaca loo mèn tedib vez xal gac con'a le'n tiempa thidtene. <sup>20</sup> No chele' Tad Diox ne'nglide par mdyóp tiemp co'se' gac yaltiaa loo mèn, yende chó mèn gac lyá' loo con' ryes. Per por mque' lezo' Diox ñèe Diox mèn, mèn co' ngòo loo cón che'n Diox, mèn co' Diox mcuri, por cona, mtedópque' Diox tiempa loo mèn.

<sup>21</sup> Le' sya, chele' chol mèn ñèe loo gu' le'n tiempa: Hui' gu' nexa. Trè' nzo Crist, o hui' gu' nexa, tua' nzo Crist, ne'yila'ste gu'i, ndee gu'. <sup>22</sup> Tac tiempa yi'th huax mèn gutyè' co' ñèe loo gu' nac mènà Crist xal daa. No ñèe mènà loo gu' nac mènà mèn co' nde'th di's co' ndxab Diox cón che'n Diox. No li mènà gac huax yalguzye' co' gac xal thib señ co' hui' mèn loo mènà. No li mènà huax yalguzye' roo no yalguzye' xèn par quedii mènà mèn. No axta li mènà preb, ¿ché' tli mènà gan quedii mènà mèn co' yub Diox mcuri par yila's mèn co' Diox mcuri loo mènà, ne? <sup>23</sup> Per ndxe'leque', nalas gure gu'. Neeque' gu' le' daa guniile' con' ndxè' loo gu' ndoore' gac con'a loo gu'.

*Jesús ngue lu' loo myen' xin' mté'th Jesús cón gac no xá mod gac con' co'se' yi'th Jesús loo izlyo' tedib vez, Jesús co' mbi'th yáal loo izlyo' xalque' ndxáal chol mèn loo izlyo' ndxè'.*

*(Mt. 24.29-35, 42-44; Lc. 21.25-36)*

<sup>24</sup> Tolo niin con' loo gu': Co'se' yilo riid tiemp co'se' ten' mèn yalnèa no yaltiaa, syare' gac tiemp co'se' cuau loo huiz no cuau loo mbe' par ne'teniide huiz no ne'teniide mbe' loo izlyo'. <sup>25</sup> Huiza lyàateri' huax mbèelhui' no huax mbyáz loo izlyo'. No ryete con' co' nac con' roo no con' xèn loo bé' tlo huin no xi'th le'n tiempa. <sup>26</sup> Axta syare' hui' mèn loon, daa co' mbal yáal loo izlyo' ndxè' xalque' ndxáal chol mèn loo izlyo' ndxè', tac tiempa galen loo izlyo' ndxè' tedib vez le'n xcua con ryethe con' co' nac con' roo no con' xèn co' ndxàpen la's niin no co' ndxàpen la's yan. No hui' mèn xal ndxàc con' roo no con' xèn loon tiempa. <sup>27</sup> Leque tiempa, tel'en angl daa par thidte queltàa angl mèn co' ngòole' loo cón chenen, mèn co' nac mèn co' mcuri par ned co'te' nac dyap lad roo izlyo' co' nac más tith roo izlyo' no co' nac más tith xàn' bé'.

<sup>28</sup> Bìn gu' di's co' ngue tetaquen loo gu' ndxè', ne: Fté'th gu' no bli gu' xtùuz xal ndxàca loo yaa ngudyuug. Co'se' ndxàb laa loo yaa ngudyuug, no mbere laa yen', xiis laa yen' loo yaa ngudyuug tedib vez, gu' nonque' no nda'que' gu' cuent co'se' nde xiisle' laa loo yaa ngudyuug nde zin' gaxle' tiemp yùu co'se' más nso' bée loo izlyo'. <sup>29</sup> Lomisque' mod ne, co'se' ñèe gu' ndxàcle' ryethe con' loo izlyo' xalque' ngue niina loo gu' ndxè', fta' gu'



cuent no ften' gu' nde zin' gaxle' lyux izlyo' no lith no izlyo'. Nac con'a xal thib mbi' co' ndoo ro ryo' liz mbi' par yòo mbi' liz mbi'. <sup>30</sup> Lìcpe' ba'i, na nii loo gu': Ryete con' co' ngue niin loo gu' ndxè' gâcque' no tyaaque' no tyubque' di'sa ndoore' lith no mèn naciòn Israel no lyux mèn naciòn Israel. <sup>31</sup> Bé' no izlyo' co' nziri' nalle' lyux. Ya ne'tolode cue bé' no izlyo' yé' huize'. Per di's co' ndyoodizen no con' co' ndlu'en ne'ri'thte tua'te. Le'i gâcque', no tyaaque', no tyubque' di'sa xalque' ngue toodizen loo gu' nalle'.

<sup>32</sup> Per huiz co'se' gâcpe' con'a no hor co'se' gâcpe' con'a, yende chó mèn nona no yende chó mèn naneei. Ne' yub angl co' nzo loo bé' inaneede pól gâc con'a. Ne' ne' daa co' nac xgan' Diox, inaneeden nalle' coyor gâc con'a. Angoluxte Diox xuden nanee pól gâc tiempa.

<sup>33</sup> Por cona, ngue niin loo gu': Nalas gure gu'. Ne'gâcte gu' xal mèn co' nzi yàt loo cón che'n Diox. Gurez gu' Diox. Tac gu' inda'de cuent pól zin tiemp co'se' gâc con' co' ngue niin loo gu' ndxè'. <sup>34</sup> Cón che'n tiemp co' nac tiemp ndoore' co'se' beren, galen loo izlyo' ndxè' tedib vez, nac xal thib mbi' co' ngro' tee nda viaj tith. Per ndoore' co'se' ryo' mbi' liz mbi', mtan' mbi' di's loo moz mbi' cón li moz. No mtan' mbi' zin' loo thib thib moz par li moz zin' láth yende mbi'. No mnibe' mbi' loo moz co' nquenap puert liz mbi' par altant tyoo moz quenap moz liz mbi'. <sup>35</sup> Cona, ngue niin loo gu': Nalas gure gu'. No gure naa gu' loo cón che'n Diox. Tac gu' ne'ta'de cuent pól zin Tad, co' nee di's nac daa, co' nac che'n liza. ¿Ché' zin daa hor co' nde làa yál' izlyo' o ché' zin daa gulal yál' o ché' zin daa hor co'se' lé' nguiidtee yál' o ché' zin daa hor co'se' nde yini izlyo'? Ne'neede na' coyor gâc con'a, ¿lé'? <sup>36</sup> Tac thib descuid, chàa, galen loo izlyo' ndxè' thib hor co' ne'ñeede gu' no thib hor co' indlide gu' xtùuz zin daa. Ale le'le' zin daa loo gu' hor co'se' le'pe' nziri' gu' loo cón che'n Diox xal mèn co' nzi yàt. <sup>37</sup> Leque di's co' ngue niin loo gu' ndxè' nac di's co' tan'en loo mèn par ta' mèn cuent cón che'n di's ndaca loo alux mèn dib athu loo izlyo' co' naban chol tiemp. Di'sa nee di's: Nalas cue mèn loo cón che'n Diox thidtene.

## 14

*Mèn co' ngòc ngolo ngola's che'n Jesús nzi li xtùuz xá mod tyenxù' mèn Jesús.*

*(Mt. 26.1-5; Lc. 22.1-2; Jn. 11.45-53)*

<sup>1</sup> Le'n huiza, chop huiz no maste ndxàc falt par tlo lni pasc no lni co'se' ndxuhua mèn naciòn Israel pan co' ingòode mèn dii levadur. Le' mèn co' nac jef che'n nguley' co' más ñibe' loo nguley', no mèn co' nac maistr co' ndlu' cón che'n ley co' mxo'f Moisés loo mèn na, mènna mcua'n mod par tyenxù' mènna Jesús con purte di's gutyè', no con mod gutyè' co' mdoodi's mèn thidte di's co' ngòc par cua'n mènna mod guthxù' mènna Jesús. <sup>2</sup> No mbez mènna loo xtàa mènna:

—Ne'lìde na' con' ndly'a's na' con Jesús le'n huiz lni par ne'xide lezo' mèn no par ne'yátbèede mèn co' yi'th lni contra na'.

*Thib xa'got mtà aceit yéc Jesús.*

*(Mt. 26.6-13; Jn. 12.1-8)*

<sup>3</sup> Le'n huiza, ngo Jesús yèez Betañ liz thib mbi' co' mdub lèe mèn Mon Lepros. Láth ndub Jesús loo mes liz mbi'a, mzin thib xa'got loo Jesús. Nde no xa' thib frasc co' natoxcua' con thib loo quèe co' lèe alabastr. Frasca zyè nzo aceit co' ndly'a' purte xla' ye' nard. Aceita anze'f náp ntac. Sya, mblé' xa'gota frasc par mblath xa'gota aceit yéc Jesús. <sup>4</sup> Per ndxep mèn co' ngo tya, mènna ale ngocloo gunèe xa'gota. Ndxab mènna loo xtàa mènna:

—¿Chonon ale ngue teza'xù' xa'got ba' aceit co' anze'f nazi' ndly'a', yoo? <sup>5</sup> Nzoque' mod tho' xa'got aceit ba' por mil xon ayo pes. No yiloa, li'th xa'gota tmi par ta'la's xa'got tmia càa mèn prob.

No ale ngòo xyàn lezo' mènna gunèe mènna xa'gota.

<sup>6</sup> Per Jesús ndxab loo mènna:

—Bla' gu' tee tub xa'got ndxè'. ¿Chonon ngue tethon gu' xa' no ngue li xol gu' xa', à'? Tac con' co' ngue li xa'got ndxè' loon anze'f huen naca. <sup>7</sup> Gu' thidteneque' nzo làth mèn

prob. No nzo mèn prob làth gu'. No nzoque' mod li gu' con' ndac loo mèn prob co'se' ndlya's gu' li gu'i. Per part cón chenen, ya ne'tolode go non gu'. <sup>8</sup> Prob xa'got ndxè' ngue li co' nzote mod li xa' loon. Xa'got ndxè' ngue go xla' aceit co' anze'f nazi' ndlya' ba' laden ndoore' co'se' ca's mèn daa par ne'yitooode xla' laden co'se' ya ca's mèn daa. <sup>9</sup> Lìcpe' ba'i, na nii loo gu': Pál co'te' co' mèn yalbàn no te'th mèn cón che'n di's ndac che'n Diox co' ndlu' xá mod telá' Diox mèn loo con' ryes dib athu loo izlyo', ta' mèn a cuent cón che'n con' mbli no xa'got ndxè' daa par te' lezo' mèn cón che'n xa'got ndxè'.

*Jud mcua'n thib mod par mda'xù' Jud Jesús loo mèn co' ngòc ngolo ngola's che'n Jesús.*

*(Mt. 26.14-16; Lc. 22.3-6)*

<sup>10</sup> Le' sya, Jud Iscariot, co' nac thib myen' xin' mté'th Jesús, ngua toodi's no mèn co' nac jef che'n nguley' co' más ñibe' loo nguley' par ñeene' xá mod li Jud par ta'xù' Jud Jesús loo mèn. <sup>11</sup> Co'se' mbìn mèn co' nac jef che'n nguley' co' más ñibe' loo nguley' di's co' ndxab Jud loo mèn, anze'f mdyac lezo' mèn. No mcàbgòn mèn loo Jud ta' mèn tmi càa Jud co'se' yilo ta'xù' Jud Jesús loo mèn. Leque hora mtlo Jud, mcua'n Jud mod xá mod ta'xù' Jud Jesús loo mèn.

*Jesús nduhua rsè no myen' xin' mté'th Jesús thib xhuin.*

*(Mt. 26.17-29; Lc. 22.7-23; Jn. 13.21-30; 1 Co. 11.23-26)*

<sup>12</sup> Co'se' ngonii izlyo' co' nac huiz yub lni co'se' ndxuhua mèn pan co' ingòode mèn dii levadur no co'se' ndxuth mèn mbacxil' co' ndxuth mèn loo Diox co'se' ndxáal lni pasc, huiza myen' xin' mté'th Jesús mnibdi's loo Jesús. Ndxab myen' loo Jesús:

—Tad, ¿pá ndlya's U' li nab nu' thib lugar par hua rsè na' rsè co' nac che'n lni pasc, à'?

<sup>13</sup> Sya, mtel' Jesús chop myen' xin' mté'th Jesús. Ndxab Jesús loo myen':

—Huàa gu' le'n ciuda Jerusalén ba'. Tua' zyál' gu' thib mbi' co' ne' thib rre nít. Ftoo nque gu' xís mbi'. <sup>14</sup> No co'se' zin mbi' co'te' yòo mbi', yòo gu' con mbi'. Sya, gab gu' loo mbi' co' nac gundan co' nac che'n liza: Maistr nu' gunee di's ndxè' loo nu' par ñee nu' di's ndxè' lool: ¿Pá ndub quart co'te' gòn par hua rsè'en co' nac rsè pasc con myen' xin' mté'th daa, à'? <sup>15</sup> Le' sya, mbi' co' nac gundan co' nac che'n yòoa lu' loo gu' pá ndub thib quart co' más naroo loo pis gáp liz mbi'. Cuarta mblyo'fle' no mdyoxcua'le'. Tya toxcua' gu' con' hua rsè na' co' nac nte' lezo' mèn pasc.

<sup>16</sup> Sya, mxen myen' xin' mté'th Jesús ned. Nda myen'. Mzin myen' le'n ciuda Jerusalén. No ngòcque' con' loo myen' xalque' ndxab Jesús loo myen'. Sya, mtoxcua' myen' nítyèth co' hua rsè no myen' Jesús par te' lezo' myen' cón che'n pasc.

<sup>17</sup> Co'se' ngulàa yál' izlyo' huiza, mzin Jesús con ryete si' fchop myen' xin' mté'th Jesús loo pis gáp co'te' nac quart liz mbi'a par hua rsè no Jesús myen' tya. <sup>18</sup> Co'se' ndub yuhua rsè no Jesús myen' xin' mté'th Jesús loo mes, ndxab Jesús loo myen':

—Lìcpe' ba'i, na nii loo gu' le' thib gu', co' ngue yuhua no daa, ta'xù' daa loo mèn co' nac ngolo ngola's che'n daa.

<sup>19</sup> Sya, mxi lezo' myen' xin' mté'th Jesús. No mtlo myen', mnibdi's myen' loo thib xtàa myen' no loo tedib xtàa myen'. Mbez myen':

—Ne'stolque' daai, yoo.

No mbez tedib myen' loo xtàa myen':

—Ne'stolque' daai, yoo.

<sup>20</sup> Jesús mcàb loo myen'. Ndxab Jesús:

—Thib gu' co' nzo làth rye si' fchop gu' co' mcuin co' ngue yuhua non thidte plat, gu'a ta'xù' daa loo mèn co' nac ngolo ngola's chenen. <sup>21</sup> Huenque' naca, ey, le' daa, co' mbal yáal loo izlyo' ndxè' xalque' ndxáal chol mèn loo izlyo', gàca loon xalque' mbez di's co' ndub loo libr co' nac xti's Diox cón chenen. Per ay, prob mbi' izlyo', mbi' co' ta'xù' daa loo mèn co' nac ngolo ngola's chenen. Más huen ngàca loo mbi'a ne'ngáalte mbi' loo izlyo' thidtene leque ta'xù' mbi'a daa loo mèn ye'rsin'a.

<sup>22</sup> Láth ngue yuhua rsè myen' xin' mté'th Jesús con Jesús, mxen Jesús pan. Ndxab Jesús:

—Diox quix U', Diox, loo Diox.

Ngoloa, mchì'x Jesús pan. Mda' Jesús pan loo myen' xin' mté'th Jesús. Ndxab Jesús loo myen':

—Dhua gu' pan ndxè', ey. Pan ndxè' nee di's nac cón che'n bél'yòo laden co' gath por cón che'n rye mèn.

<sup>23</sup> Sya, mxen Jesús thib vas vin. Ndxab Jesús:

—Diox quix U', Diox, loo Diox.

Ngoloa, mda' Jesús vas vin loo myen' xin' mté'th Jesús. Sya, ngu ryete myen' chu'th chu'th vin.

<sup>24</sup> Ngoloa, ndxab Jesús loo myen':

—Vin co' ngolo ngu gu' ba' nee di's nac cón che'n ren laden co' xyo loo izlyo' par li nèn tedib conveñ co' gac thib conveñ cub yiloa. No xyo ren laden loo izlyo' por cón che'n huax mèn par tataa mod, mèn co' yila's loo cón chenen, tyon' xtol mènà no tyon' xquin mènà. <sup>25</sup> Per, lìcpe' ba'i, na ngue nii loo gu': Desde nalle' par delant, ne'bereden gun vin xal ngue yun vin nalle' con gu' loo izlyo' ndxè'. Na gu vin con gu' tedib vez axta co'se' ñibe'pe' xuden Diox loo mèn.

*Jesús ngue ta' cuent loo Pedr le' Pedr cà di's Jesús loo mèn.*

*(Mt. 26.30-35; Lc. 22.31-34; Jn. 13.36-38)*

<sup>26</sup> Co'se' ngolo mbil' ro no Jesús myen' xin' mté'th Jesús thib himn, nda Jesús con myen' loo thib yii co' lèe yii che'n yaa oliv. <sup>27</sup> Sya, láth ndoo Jesús ned, ndxab Jesús loo myen':

—Nase, ryete gu' anze'f xi lezo' no tyoo xà' lezo' gu' por cón chenen yál' ndxè', ey. Tac loo libr co' nac xti's Diox ndub di's co' mbez:

Daa guth pastor. Le' mbacxil' pastor na, rye's pál.

<sup>28</sup> Per co'se' yilo ryo xban daa, daa ga ner loo gu' le'n thib yèezya' che'n làaz mèn galile.

<sup>29</sup> Sya, ndxab Pedr loo Jesús:

—Mastale' ryete myen' ba' xi lezo' no tyoo xà' lezo' myen' ba' loo cón che'n U', per part cón chenen daa ne'xide lezo' no ne' ne' tyoo xà' lezon ñèn cón gac loo U'.

<sup>30</sup> Per Jesús ndxab loo Pedr:

—Pedr, lìcpe ba'i, na nii lool: Nal xhuin ndoore' lé' nguiidtee yál' no cozèe nguiidtee chop vez, lùu cà di's daa son vez loo mèn.

<sup>31</sup> Per Pedr mbli nèe di's. Ndxab Pedr loo Jesús:

—Mastale' gath daa con U', Tad, na ne'cà di'ste U'.

No ale ryete myen' xin' mté'th Jesús thidte di's ndxab loo Jesús.

*Jesús ngurez Diox co'te' ngòc thib huert co' lèe Getsemaní.*

*(Mt. 26.36-46; Lc. 22.39-46)*

<sup>32</sup> Sya, nda no Jesús myen' xin' mté'th Jesús thib lugar co' lèe Getsemaní. Tya, ndxab Jesús loo myen' xin' mté'th Jesús:

—Trè'te gure tub gu' láth nda bezen Diox tachu'thte más ba'le'.

<sup>33</sup> Ante mbe' Jesús Pedr, no Cob, no Juàn. Le' Jesús na, naxut naxut gunaa loo. No mxi tín' lezo' Jesús. <sup>34</sup> No ndxab Jesús loo myen':

—Nden' lezon axta arid nalyat gaca loon co'se' tetii mèn daa axta gath daa. Trè'te byan' gu'. Gure naa gu' no ne'gàtte gu', ndee gu'.

<sup>35</sup> Sya, ngua Jesús tachu'thte más delant. Tya, mdub xib Jesús. No mcotloo Jesús loo yòo. Ndxab Jesús loo Diox:

—Tad, chele' U' nee lezo', ne'ten'ten arid yalnè co' gac loon le'n huiz ndxè'.

<sup>36</sup> Láth ngue bez Jesús Diox, ndxab Jesús loo Diox, ne:

—Pay, yey, ryete con' nzoque' mod li U'. Ftelá' U' daa loo yalnè co' gac co' ten'en co'se' tyactii daa. Per, lìcpe' ba'i, indlyasten gaca loon xal ndlyazen. Ndxè'leque', ndlyazen gac loon xal neete lezo'pe' U' no maste.

<sup>37</sup> Ngoloa, ndye'th Jesús co'te' mbyan' Pedr, no Cob, no Juàn. Per co'se' gunèe Jesús myen', ale nzi yàt myen'. Sya, mblo' Jesús mcal' loo myen'. Ndxab Jesús loo Pedr:

—Mon, ¿ché' nax yàtl, cà'? ¿Ché' ne'nxectel ndub naal mase thib hor, cà'? <sup>38</sup> Gure naa gu' mase chu'th, yey. No gurez gu' Diox par ne'aselide gu' cua'n gu' xquin gu' naba'. Lìcpe' ba'i, xtùuz gu' no lezo' gu' anze'f ndlya's le' gu' cuez Diox. Per bél'yòò lad gu' ba' ndli nden' gu' ngo zan gu'. Cona, ngulàa fuerz gu'. Ale mbuu's gu' nzi gu'.

<sup>39</sup> Ngoloa, mbere Jesús, nda bez Jesús Diox mbryop vez. Ndxab Jesús leque di'sa loo Diox. <sup>40</sup> Mbere Jesús, ndye'th Jesús co'te' mbyan' Pedr, no Cob, no Juàn. Lomisque', nzi yàt myen' tac ngudloo myen' ne'nxecte tant thib mcal' nzo ngudloo myen'. Per axta ne' ne' ñee myen' cón gab myen' loo Jesús co'se' gunèe myen' ndye'th Jesús. <sup>41</sup> Ngolo mbyon vez ndye'th Jesús co'te' mbyan' Pedr, no Cob, no Juàn par ñee Jesús máa myen'. Ndxab Jesús loo myen':

—¿Ché' ngue li gu' cuent gàt gu' nal xhuin, cà'? Pà gàt gu'. Mzinle' hor co'se' ta'xù' thib mbi' daa, daa co' mbal yáal loo izlyo' ndxè' xalque' ndxáal chol mèn loo izlyo', loo mèn ye'rsin' co' ndxàp xquin no co' ndxàp xtol. <sup>42</sup> Goo too gu'. Ya' gu' ndyàa na'. Ndele' mbi' co' ta'xù' daa loo mèn.

*Mèn co' ngòc ngolo ngola's che'n Jesús mbe' Jesús xal ndxe' mèn thib pres.*

*(Mt. 26.47-56; Lc. 22.47-53; Jn. 18.2-11)*

<sup>43</sup> Tatabe' ngue toodi's no Jesús myen' xin' mté'th Jesús co'se' ngro zi'f Jud, nde Jud, Jud co' ngòc cuent nac si' fchop myen' xin' mté'th Jesús. Nde no Jud huax mèn. Chó mèn nzo spad ya'. Chó mèn nzo thib bro' yaa ya'. Mèn co' mbi'th ngòc mèn co' mtel' jef che'n nguley' co' más ñibe' loo nguley', no mèn co' mtel' mèn co' ngòc maistr co' ndlu' cón che'n ley co' mxo'f Moisés loo mèn, no mèn co' mtel' rye mèngool co' ndyoo ner, no co' ndyoo naa, no co' ñibe' loo mèn nación Israel. <sup>44</sup> Le' Jud co' mda'xù' Jesús loo mèn ye'rsin' na, ndxab loo mèn co' nde no Jud ndoore' ryo' Jud con mèn:

—Neeque' gu' mbi' co' tan thib chit ro, mbi'a nac Jesús. Tyen gu' mbi'. No ne'lá'de gu' mbi'.

<sup>45</sup> No texal mzin Jud loo Jesús, mbii gax Jud loo Jesús. Ndxab Jud loo Jesús chop vez:

—Maistr, Maistr.

Látha, thidte de repent mda' Jud thib chit ro Jesús. <sup>46</sup> Sya, mxen mcàa mènà Jesús. Mbe' mènà Jesús xal thib pres loo rye mèn co' mtel' mèn co' mbe' Jesús.

<sup>47</sup> Per thib myen' xin' mté'th Jesús co' nzo làtha mdob spad le'n cubiert. Mblàa myen'a thib ya' spad nza thib moz che'n jef che'n nguley' co' más mnibe' loo rye nguley'. Ale mblo nde'f myen'a nza moz. <sup>48</sup> Sya, ndxab Jesús loo rye mèn:

—¿Ché', lìcque', por derech, ngro' gu' con spad no con thib bro' yaa ya' gu' par tyenxù' gu' daa no hue' gu' daa xal ndxe' mèn thib huan' chele' daa ngàc huan', cà'?

<sup>49</sup> Ndxab Jesús loo mèn, ne:

—Atate huiz ngo non gu'. No mblyu'en gu' le'n templ gu'. No le'n rye huiza ne'ndenxù'de gu' daa xal thib pres, ¿lé'? Per ndxàc con' ndxè' loon par tyaaque' no gàcque' no tyubque' di's cón che'n daa xal ndub di's loo libr co' nac xti's Diox.

<sup>50</sup> Látha, ale ryete myen' xin' mté'th Jesús mxon'. Mblá' myen' thidte Jesús.

*Trè' ndlu' cón che'n thib mbyòò co' mxon' làtha.*

<sup>51</sup> Per thib mbyòò co' mdoo nque xís Jesús, mbyòoa mcap thib sab no maste. Sya, mxen mènà mbyòò par hue' mènà mbyòò, ne. <sup>52</sup> Per mbyòò mcua'n mod ngro' thin mbyòò le'n sab. Che mbyòò, mxon' mbyòò, ndyaa mbyòò.

*Jesús mdooxù' loo rye mèn co' mnibe', no co' mdyoo ner, no co' mdyoo naa loo mèn nación Israel.*

*(Mt. 26.57-68; Lc. 22.54-55, 63-71; Jn. 18.12-14, 19-24)*

<sup>53</sup> Sya, mbe' rye mènà Jesús loo ner jef che'n nguley' co' más ñibe' loo rye nguley'. No mqueltàa ryete mèn co' nac jef che'n nguley', no mqueltàa ryete mèngool co' ndyoo ner, no co' ndyoo naa, no co' ñibe' loo mèn nación Israel, no mèn co' nac maistr co' ndlu' cón che'n ley co' mxo'f Moisés loo mèn co'te' mdoo Jesús. <sup>54</sup> Le' Pedr na, tith tith mdoo nque

xís Jesús. Mzin Pedr axta loo lue' liz ner jef co' más ñibe'a. Tya, ale note Pedr mdub biiz ro rdii làth mèn co' ngòc polesi co' ngue quenap Jesús par ne'xon'te Jesús loo mènà.

<sup>55</sup> Le' rye mèn co' nac jef che'n nguley' co' más ñibe', no rye mèn co' ndyoo ner, no co' ndyoo naa, no co' ñibe' loo mèn naciòn Israel, mènà mcua'n mod xá mod quexù' que' fals mènà Jesús par tataa mod guth yèe mènà Jesús. Per ne'nglide mènà gan mcua'n mènà mod ngli mènà con'a. <sup>56</sup> No anze'f thib mènà mbez ampurte di's gutyè' cón che'n Jesús axta ne' ne' ñee mènà chó ro gòn mènà. Ale leque mènà ngue go xo'f cón che'n yalgutyè' co' mbez mènà con xtàa mènà. <sup>57</sup> Ndxetoo ndxega' ndxep mènà. No nda' mènà cuent gutyè' par quexù' que' fals mènà Jesús. Mbez mènà loo xtàa mènà:

<sup>58</sup> —Nu' mbìn le' mbi' ba' ndxab le' mbi' telux templ che'n Diox co' mtoxcua' mèn póla. No tolo ndxab mbi' le'n son huiz no maste xít te'f mbi' tedib templ. No templ co' mbez mbi' toxcua' mbi' ne'toxcua'de chol mèn. Ne' ne' lyath no mèn mbi' toxcua' mbi' templa.

<sup>59</sup> Per mastale' tataa mda' mènà cuent, inda'de mènà cuent thidte di's cón che'n Jesús.

<sup>60</sup> Sya, ngoo too nde'f mbi' co' nac jef che'n nguley' co' más ñibe' loo rye nguley' làth rye mènà. Mnibdi's mbi' loo Jesús. Ndxab mbi':

—¿Ché' yende chó di's ndlya'sl ñeel loon, cà'? ¿Xá mod chonon tatua' mbez mèn ba' cón che'nl, cara?

<sup>61</sup> Per Jesús yende chó di's ngab. Xèe mdoo Jesús loo mènà. Mbere mbi' co' ngòc jef che'n nguley'a, mnibdi's mbi' loo Jesús tedib vez. Ndxab mbi' loo Jesús:

—¿Ché', lìcque', nac lùu Crist, xgan'pe' Diox, Diox co' thidteneque' ndyac lezo', cà'?

<sup>62</sup> Jesús ndxab loo jef che'n nguley'a:

—Aa. Nacque' daa Crist, pues. Na nii lool nalle' le' gu' hui' loon, daa co' mbal yáal loo izlyo' xalque' ndxáal chol mèn loo izlyo', co'se' tuben cuat Diox co' ndxàp rye loothe con' roo no con' xèn la's nii Diox no la's ya' Diox. No hui' gu' loon co'se' gác huiz co'se' galen loo izlyo' ndxè' tedib vez le'n xcua.

<sup>63</sup> Co'se' mbìn mbi' co' ngòc jef che'n nguley' co' más ñibe' tataa ndxab Jesús, ale mched yèe mbi' xab mbi' tac mden' mbi' le' Jesús gunii yèe gunii tii cón che'n Diox. Sya, ndxab mbi' loo mèn co' nziri' no mbi'a:

—¿Cón li no na' más mèn co' ta' cuent cón che'n mbi' ba'? Con di's co' ngolo gune mbi' ba' ngogaale' mbi' loo yalgutyè' mbi'. <sup>64</sup> Gu' mbìn no mda'que' gu' cuent xal ngolo gunii yèe gunii tii mbi' ba' cón che'n Diox, ¿lé'? ¿Xá nee gu'? ¿Cón li no na' mbi' ba'?

Sya, ryete mènà mquexù' mque' fals Jesús par guth mèn Jesús.

<sup>65</sup> Le' sya, mtlo ndxep mènà, msuc mènà rloo Jesús. No mtau' mènà loo Jesús con thib le' lar'. No ale mda' mènà che'n Jesús. Ale mbez mènà loo Jesús:

—Bli divin chó ngue ta' che'nl.

Le' mèn co' ngòc polesi che'n templ co' nquenap templ na, ale nguis mènà rloo Jesús.

*Pedr mcà di's cón che'n Jesús loo mèn.*

*(Mt. 26.69-75; Lc. 22.56-62; Jn. 18.15-18, 25-29)*

<sup>66</sup> Láth ngue li no mèn con'a loo Jesús, Pedr xexte ndoo par xàn' blé' loo lue'. Per láth ndoo Pedr tya, mzin thib mza' co' ngòc criad che'n jef che'n nguley' co'te' ndoo Pedr.

<sup>67</sup> Texal gunèe criad ndoo biiz Pedr ro òii, xèe mbui' criad loo Pedr. Sya, ndxab criad loo Pedr:

—Lùu, ne, naqueltàa no Jesús che'n yèez Nazaret, ¿lé'?

<sup>68</sup> Per Pedr ale mcà' di's Jesús. Ndxab Pedr:

—Ne'libeden chó mbi' nac mbi' ba'. No axta ne' ne' indxònen cón ndyoodi'sl.

Sya, xexte ngro' Pedr par ned ro puert. Láth nda ro' Pedr, chàa, ngrozèe thib nguiidtee mblé' nguiidtee yál'. <sup>69</sup> Mbere criad, xèe mbui' criad loo Pedr tedib vez. Mtlo criad, ndxab criad loo mèn co' nziri' tya:

—Mbi' ba', ne, nac thib mbi' co' naqueltàa no Jesús, ndyaquen.

<sup>70</sup> Mbere Pedr, mcà' di's Pedr Jesús tedib vez. Pente ndxàc nguri'th con'a, mbere mèn co' nziri' tya. Ndxab mèn loo Pedr:



—Lìcpe' ba'i, lùu, ne, nac thìb myen' co' ngue tee no Jesús. Tac lùu nac mèn gulàaz che'n làaz mèn galile. No mod co' ndyoodi's lùu ba' nac co' ndlu' xal ndyoodi's mènna.

<sup>71</sup> Sya, leque Pedr mtlo gunii ngòc nguàal di's. No mde'th Pedr Diox. Ndxab Pedr loo mènna:

—Ne'libeden mbi' co' ñibdi's gu' loon, cara.

<sup>72</sup> Leque hora, chàa, ngrozèe nguiidtee mbryop vez mblé' nguiidtee yál'. Axta syare' mte' lezo' Pedr di's co' ndxab Jesús loo Pedr: Ndoore' co'se' cozèe nguiidtee chop vez, lùu cà di's daa son vez.

Co'se' mbli Pedr xtùuz cón che'n di's co' ndxab Jesús loo Pedr, ne'tí' ne'ñee lezo' Pedr mbín' Pedr axta plóthe.

## 15

*Jesús mdooxù' loo Pilat co' ngòc gobernador tiempa.*

(Mt. 27.1-2, 11-14; Lc. 23.1-5; Jn. 18.28-38)

<sup>1</sup> Co'se' ngonii izlyo' tedib huiz co' nde nquea, mèn co' ngòc jef che'n nguley' co' más ñibe' loo nguley', no mèngool co' ndyoo ner, no co' ndyoo naa, no co' ñibe' loo mèn nación Israel, no rye mèn co' ngòc maistr co' mbli' cón che'n ley co' mxo'f Moisés loo mèn, no rye mèn co' más ñibe' loo mèn nación Israel, ryete mènna thidte mqueltàa par mdub dó' mènna ya' Jesús par mbe' mènna Jesús loo Pilat. <sup>2</sup> Sya, mnibdi's Pilat loo Jesús. Ndxab Pilat:

—¿Ché' nac lùu rey che'n mèn nación Israel, cà'?

Jesús mcàb. Ndxab Jesús loo Pilat:

—Aa. Nac daa rey, pues, xalque' ngolo guneela ba'.

<sup>3</sup> Le' mèn co' ngòc jef che'n nguley' co' más ñibe' loo nguley'a na, anze'f thib con' ngue quexù' ngue que' fals Jesús loo Pilat. <sup>4</sup> Le' sya, mbere Pilat, mnibdi's Pilat loo Jesús. Ndxab Pilat:

—¿Ché' yende chó di's lya'sl càbl loo mèn ba', cà'? Hui' no maste napló con' ngue quexù' ngue que' fals mèn ba' lùu.

<sup>5</sup> Per ndxe'leque', yende chó di's mcàb Jesús loo mènna. Le' Pilat na, axta ne' ne' ñee Pilat cón li Pilat xtùuz cón che'n Jesús.

*Por lult mnibe' Pilat loo mèn ya yuth mèn Jesús.*

(Mt. 27.15-31; Lc. 23.13-25; Jn. 18.38-19.16)

<sup>6</sup> Nde nxon', mque no mèn nación Israel costumbr làa mèn co' ndxàc gobiern thib pres cad lin' co'se' ndxáal lni che'n pasc. Pres co' gab mèn lyá', presa lyá'. <sup>7</sup> Le'xque' le'n huiza, thidte mque' thib mbi' co' ngro' lèe Barrabás lezi'f con taamas mèn co' mbeth mèn por thib huelg co' mbli mèn tiempa. <sup>8</sup> Láth ndooxù' Jesús loo Pilat, ngua mèn nación Israel loo Pilat par mna'b mèn di's loo Pilat làa Pilat thib pres co' ndlya's mèn lyá' xalque' nac costumbr co' ndxàp mèn tiempa. <sup>9</sup> Pilat mcàb loo mènna. Ndxab Pilat:

—¿Chó ndlya's gu' telá'en, à'? ¿Ché' ndlya's gu' telá'en mbi' co' mbez nac rey che'n mèn nación Israel, cà'?

<sup>10</sup> Per Pilat nonque' no nda'que' Pilat cuent por ndxàn lezo' mènna ñèe mènna Jesús, con'a mda'xù' mèn co' nac jef che'n nguley'a Jesús loo Pilat. <sup>11</sup> Per mèn co' ngòc jef che'n nguley' co' más ñibe' loo rye nguley', mbli mènna par a la fuerz gab rye mèn, co' nziri' loo Pilat, más huen co' Pilat Barrabás lezi'f lugar de lá' Pilat Jesús. <sup>12</sup> Sya, mnibdi's Pilat loo rye mènna. Ndxab Pilat:

—¿Cón ndlya's gu' li non mbi' co' mbez mèn nac rey che'n mèn nación Israel, à'?

<sup>13</sup> Sya, cabii ndxab mènna:

—Fcàa mbi' ba'. Bnibe' quée mbi' loo cruz.

<sup>14</sup> Pilat ndxab loo mènna:

—Per ¿chó con' ye'rsin' ndyac gu' mbli mbi', à'?

Sya, mbere mènna, cabii ndxab mènna:

—Nu' ngue bez lool, bnibe' quée mbi' ba' loo cruz.

<sup>15</sup> Per com le' Pilat mbly'a's yan' bien Pilat con mèn co' nziri'a, ¿lé'?, mnibe' Pilat ngua lo' mèn Barrabás lezi'f. Le' Jesús na, ngolo mbli Pilat mandad mda' mèn che'n Jesús, mda' Pilat Jesús loo mènà par ya que' mènà Jesús loo cruz.

<sup>16</sup> Ngoloa, mbe' solndad Jesús loo lue' che'n palas. Tya, mbli mènà mandad mqueltàa ryete solndad par li solndad ngòc nguàal con' loo Jesús par tataa mod xiis no solndad Jesús. <sup>17</sup> Ale asembli solndad mtegor solndad Jesús thib xab Jesús color morad. No mdub solndad thib coron yis co' mtà' solndad yéc Jesús. <sup>18</sup> Ngoloa, mtlo solndad, cabii mbez solndad loo Jesús. Ndxab solndad:

—San, rey che'n mèn nación Israel.

<sup>19</sup> No tataa mblàa solndad bar yéc Jesús. No msuc solndad rloo Jesús. No mdyub xib solndad loo Jesús. Mbli solndad loo Jesús xalque' ndli mèn co'se' ñii mèn Diox loo thib rey par tataa mod más mxiiis no solndad Jesús. <sup>20</sup> Ngolo mxiiis no solndad Jesús axta plóthe, mteche solndad xab Jesús co' ngòc lar' morada lad Jesús. Mtegor solndad Jesús xabpe' Jesús. Ngoloa, mbe' solndad Jesús par ya que' solndad Jesús loo cruz.

*Trè' ndlu' xá mod mque' mèn Jesús loo cruz.*

*(Mt. 27.32-44; Lc. 23.26-43; Jn. 19.17-27)*

<sup>21</sup> Le'pe' ndxàc con'a, ndye'th thib mbi' co' ngua zin' huan. Mbi'a ngòc mèn gulàaz che'n làaz mèn ciren. Mbi'a ngro' lèe Mon. Ngòc mbi' xud Alejandr no Ruf. Láth nde riid mbi' ro ciuda Jerusalén, ngro' no mènà Jesús. Asal' too mbi' mènà, ale mtau' solndad loo mbi' bere mbi' par xyo'f yen mbi' cruz co'te' que' solndad Jesús.

<sup>22</sup> Mbe' mènà Jesús loo thib den co' lèe Gólgota, co' nee di's, Calaver tac dena ñaa xal thib quèe yéc mèn. <sup>23</sup> Tya, mda' solndad thib loo vin co' nos con thib loo cuan' co' lee mirr par ngu Jesús. Per ne'ndalte Jesús ngu Jesús vina. <sup>24</sup> Sya, mque' solndad Jesús loo cruz. Ngoloa, mdith no solndad dad loo xab Jesús par ñee solndad ñeene' chó solndad hue' thib le' thib le' xab Jesús.

<sup>25</sup> Hor co' mque' solndad Jesús loo cruz ngòc hor nquée guyè' xtil'. <sup>26</sup> Nde nixon', mque' solndad plá di's loo thib le' ye's loo cruz yéc Jesús. Di'sa mbez taandxè':

—Rey che'n mèn nación Israel.

Tataa mdub solndad di's yéc cruz tac mèn mquexù' mque' fals Jesús le' Jesús ndxab:

—Daa nac rey che'n mèn nación Israel.

<sup>27</sup> Thidte mque' mèn Jesús loo cruz con chop mbi' co' ngòc huan'. Thib mbi' mquée loo cruz cuat Jesús ladli. Tedib mbi' mquée loo cruz cuat Jesús lad rebes. <sup>28</sup> Tataa ngòca par ngòcque' no mdubque' di's co' mde'th mèn co' ndub loo libr co' nac xti's Diox co' mbez:

—Mbli mèn cuent no Crist ngòc mèn ye'rsin' con mèn ye'rsin'.

<sup>29</sup> Le' sya, mèn co' ndri'th co'te' ngue Jesús loo cruz, asembli mènà, mbez mènà ngòc nguàal di's loo Jesús. No tataa mcin mènà yéc mènà loo Jesús. Mbez mènà loo Jesús:

—Nase, yixo. Lùu co' mbez cobii temp' no yilo son huiz ngolole' mxít te'fl temp' tedib vez, mzyalque'la nguel tua'. <sup>30</sup> Leque lùu bli par lýá'l loo con' ryes no bilàa loo cruz co'te' nguel ba'.

<sup>31</sup> Lomisque' ne, mèn co' ngòc jef che'n nguley' co' más ñibe' loo nguley', no mèn co' ngòc maistr co' ndlu' cón che'n ley co' mxo'f Moisés loo mèn, ale mxiiis no mènà Jesús. No mbez mènà loo xtàa mènà:

—Mbi' ba' mtelá' mèn loo con' ryes. Per nalle', ale, ne'gácte mbi' telá' mbi' mbi' loo con' ryes. Mzyalque' mbi'i. <sup>32</sup> Chele' na' ñèe le' mbi' co' mbez nac Crist no co' mbez nac rey loo na' bilàa loo cruz nalle', syase, yila's na' le' mbi' ba' nac Crist, ¿lé'?

No ale axta ryop mbi' co' mquée loo cruz cuat Jesús ndxab ngòc nguàal di's loo Jesús.

*Jesús nguth loo cruz.*

*(Mt. 27.45-56; Lc. 23.44-49; Jn. 19.28-30)*

<sup>33</sup> Dib lal ngue que' mènà Jesús loo cruz, ngóol hor rol huiz. Per co'se' ngóol rol huiz axta hor mquée guyon bzyè mbyau' loo huiz dib athu loo izlyo'. <sup>34</sup> Co'se' ngòc hor mquée guyon bzyè huiza, ngrozèè yii ngrozèè den Jesús. Ngro' di's ro Jesús. Ndxab Jesús:

—Eloi, Eloi, ¿lama sabactani?

Di's ndxè' nee di's: U' co' nac Diox daa, ¿chonon mblá'ya' U' daa?

<sup>35</sup> Per ndxep mèn co' ngure gax loo Jesús hora, mènà mbìn di's co' ndxab Jesús. Mènà ndxab loo xtàa mènà:

—Bìn gu' di's co' ngue bez mbi' ba'. ¿Ché' ndyac gu'i mbi' ngue bez Lii co' mde'th di's co' ndxab Diox póla, ¿lé'?

<sup>36</sup> Sya, thib mbi' co' nzo làtha mque' carre. Ngua tegaz mbi' thib sponj con thib loo vin nala co' nos con thib loo cuan' nala. Sya, mdub mbi'a sponj loo thib punt bar no mzi mchep mbi' sponja ro Jesús par gu Jesús vina. No ndxab mbi':

—Blá' gu' teeque' mbi' par ñee na' neene' ché' ti'th Lii par làa Lii mbi'.

<sup>37</sup> Leque hora, ngrozèè yii ngrozèè den Jesús. No setilte nguth Jesús. <sup>38</sup> No texal ngolo nguth Jesús, Diox mbli ngòc rol cortin co' ngue le'n templ. Desde gáp axta xàn' cortin ale mbryed grolthe cortin. <sup>39</sup> Le' capitán co' nac capitán che'n gobiern co' ndub ciuda Rom, co' ndoo naa no co' ndoo hui' xal ngòca loo Jesús loo cruz, co'se' gunèè capitán ngrozèè yii ngrozèè den Jesús no co'se' gunèè capitán xá mod nguth Jesús, ndxab capitán loo mèn co' ngure tya:

—Lìcpe' ba'i, cara, mbi' ba' ngòc xgan'pe' Diox, ndyaquen.

<sup>40</sup> Lomisque' ne, ngure ndxep mèngot, co' ngure hui' tith xal ngòca loo Jesús loo cruz. Láth rye mèngota ngo thib xa'got co' ngro' lèè Mari co' ngòc mèn yèèz Magdala. No ngo tedib xa'got co' ngro' lèè Mari co' ngòc xna' ryop hues myen' co' ngro' lèè Cob no Chè. Coba mdub lèè mèn Cob Chu'th. No ngo tedib xa'got tya co' ngro' lèè Salomé. <sup>41</sup> Ryete xa'gota mdoo nque xís Jesús. No mbli xa'gota mandad loo Jesús co'se' mque tee Jesús le'n rye yèèzya' co' nac ned làaz mèn galile. Más de cona, taamas mèngot co' mdoo nque xís Jesús, co'se' mquée Jesús par ned ciuda Jerusalén le'n huiza, ndoo hui' xal ndxàc con' loo Jesús.

*Trè' ndlu' xal ngua lo mèn thebol Jesús le'n thib bá' co' ngòc thib ye'r quèè.*

*(Mt. 27.57-61; Lc. 23.50-56; Jn. 19.38-42)*

<sup>42</sup> Huiz co'se' nguth Jesús, huiza ngòc huiz vispr che'n huiz roo co' nac huiz sabd co' ngòc huiz descans tiempa. Casque' hora nde làale' yál' izlyo'. <sup>43</sup> Ngoloa, mbi'th thib mbi' co' lèè Chè. Mbi'a ngòc mèn yèèz Arimate. Ngòc mbi' thib jef loo mèn co' nqueltàa par ndyoo ner, no ndyoo naa, no ñibe' mbi' loo mèn nación Israel, ne. Mbi'a ndub quee lezo' póll gác tiemp co'se' ñibe'pe' Diox loo mèn loo izlyo'. Pues ngòc valor loo mbi'. Negadi's ngua mbi' co'te' ndub Pilat par ña'b mbi' loo Pilat ta' Pilat permis làa mbi' thebol Jesús loo cruz. <sup>44</sup> Co'se' mbìn Pilat di's co' ngue ta' Chè cuent loo Pilat, ante mbyu' mbyàl Pilat co'se' mbìn Pilat le' Jesús nguthle'. Sya, ngurez Pilat capitán par ñibdi's Pilat loo capitán. Ndxab Pilat:

—¿Ché', lìcque', ngolole' nguth Jesús, cà'?

—Aa, ndxab capitán.

<sup>45</sup> Co'se' mcàb capitán, ndxab capitán:

—Aa, ngolole' nguth Jesús, sya, mda' Pilat permis loo Chè par yilàa Chè thebol Jesús loo cruz.

<sup>46</sup> Ngoloa, ngua ti' Chè thib sab co' anze'f náp ntac. Ndye'th Chè. Mblàa Chè thebol Jesús loo cruz. Mchi'x Chè saba lad thebol Jesús. Ngoloa, ngua lo Chè thebol Jesús le'n thib ye'r quèè co' naden' cho thib quèè. Ngoloa, mtau' Chè ro ye'r quèè con tedib quèè laj. <sup>47</sup> Le' Mari, co' ngòc mèn yèèz Magdala, no tedib xa'got co' lèè Mari co' ngòc xna' Chè na, ngua tee hui' co'te' mblo Chè, co' ngòc mèn yèèz Arimate, thebol Jesús le'n ye'r quèèa.

## 16

*Jesús ngro xban.*

*(Mt. 28.1-10; Lc. 24.1-12; Jn. 20.1-10)*

<sup>1</sup> Co'se' nguri'th huiz sabd co' ngòc huiz descans tiempa, thib xa'got co' ngro' lèe Mari co' ngòc mèn yèez Magdala, no tedib xa'got co' ngro' lèe Mari co' ngòc xna' Cob, no tedib xa'got co' ngro' lèe Salomé, yon xa'gota mxi' thib loo nít perfum par ya tà' xa' nít perfuma lad thebol Jesús. <sup>2</sup> Co'se' ngonii izlyo' huiz doming co' nac ner huiz che'n sman, tatabe' ñaa mbe'th izlyo', nda yon xa'gota ro ye'r quèe co'te' mblo mèn thebol Jesús. No mzin xa' ro ye'r quèea le'pe' nde len huiz. <sup>3</sup> Per co'se' yamerle' zin xa' ro ye'r quèea, ndxab xa' loo xtàa xa':

—Per nalle' na, ¿chó teche quèe ro ye'r quèe par yò na' le'n ye'r quèe, yey?

<sup>4</sup> Per co'se' mzinpe' xa' ro ye'r quèe, gunèe xa' le' quèe laj roo co' ndoo nau' ro ye'r quèea ya indoo nau'te ro ye'r quèe. Ale ndoo xal'le' ro ye'r quèe. <sup>5</sup> Per co'se' ngòo xa'gota le'n ye'r quèe, gunèe xa' ndub thib mbyòo ladli co'te' ndoo xa'. Noc mbyòo thib ned xab mbyòo co' dib ando mbyòo co' ante nagus bèleque' ñaa. Co'se' gunèe xa'gota ndub mbyòo, ale mzyeb xa'gota. <sup>6</sup> Per mbyòo ndxab loo xa'gota:

—Ne'zyebte gu', ey. Na neeque' le' gu' nde cua'n Jesús che'n yèez Nazaret co' mque' mèn loo cruz. Jesús ngro xbanle'. Yende Jesús trè'. Huen huen hui' gu' co'te' mdi'xsua' mèn Jesús. <sup>7</sup> Nalle', huàa li gu' avis ndxè' loo myen' xin' mté'th Jesús no loo Pedr. Guuz gu' loo myen' le' Jesús ya ner loo myen' le'n thib yèez co' nac gulàaz che'n làaz mèn galile. Tya, tolo hui' myen' loo Jesús xalque' ndxab Jesús loo myen' pezea.

<sup>8</sup> Sya, yende izlyo', mque' yon xa'gota carre. Mbii xa' ro ye'r quèea. Ale nxi'th xa' tant nzyeb xa'. No yende chó ngabte xa' loo nec thib mèn tant nzyeb xa'.

*Jesús mblu' loo loo Mari co' ngòc mèn yèez Magdala.*

*(Jn. 20.11-18)*

<sup>9</sup> Co'se' ngolo ngro xban Jesús huiz co' ngòc ner huiz che'n sman co' nac huiz doming, nerleque' loo Mari co' ngòc mèn yèez Magdala, Mari co' mque' no gaz xpìi meexu' ndoore', ngro' too Jesús no mblu' loo Jesús Jesús loo Mari. <sup>10</sup> Ngoloa, mxen Mari ned. Ngua li Mari avisa loo rye mèn co' mque' tee no Jesús ndoore'. Prob mèna nzi xi lezo' no nzi yón' mèna por cón che'n con' co' ngòc loo Jesús. <sup>11</sup> Co'se' mbìn mèna ngue ta' Mari cuent le' Jesús ngro xbanle' no gunèele' Mari Jesús, ne'ngala'ste mèna di's co' ngue ta' Mari cuent.

*Jesús ngro' too no mblu' loo Jesús Jesús loo chop myen' xin' mté'th Jesús.*

*(Lc. 24.13-35)*

<sup>12</sup> Per loo ngro' too Jesús no mblu' loo Jesús loo Mari co' ngòc mèn yèez Magdala, ngro' too Jesús no mblu' loo Jesús tedib mod loo taachop myen' xin' mté'th Jesús co'se' ndoo ryop myen'a ned ndyàa myen' ned co' nac ned huan. <sup>13</sup> Co'se' ngolo gunèe myen' Jesús, mxen myen' ned. Ngua ta' myen' cuent loo taamas myen' xin' mté'th Jesús. Lomisque' ne, ne'ngala'ste taamas myen' xin' mté'th Jesús cuent co' mda' ryop myen'a loo myen'.

*Jesús ngue xo'f zin' loo myen' xin' mté'th Jesús par hue' myen' di's cón che'n Jesús loo mèn.*

*(Mt. 28.16-20; Lc. 24.36-49; Jn. 20.19-23)*

<sup>14</sup> Per más nde tee huiz, por derech, ngro' too Jesús no mblu' loo Jesús loo ryete si' fthib myen' xin' mté'th Jesús láth co'se' ndub myen' loo mes liz thib mbi'. Sya, mbyoo Jesús myen' tac axta arid naad myen' no nguud myen' no por nayeze lezo' myen' tac indxela'ste myen' cuent co' mbìn myen' cón che'n mèn co' mda' cuent loo myen' le' mèna gunèe Jesús loo ngro xban Jesús. <sup>15</sup> Sya, ndxab Jesús loo myen':

—Nase, ndlyazen ya gu' dib athu loo izlyo'. Ya ta' gu' cuent cón che'n di's ndac ndxè' co' ndlu' xá mod lyá' mèn loo con' ryes loo rye mèn co' nzi ban dib athu loo izlyo'.

<sup>16</sup> No ndxab Jesús:

—Mèn co' tyal yila's loon no loo cón chenen no yiloo gac bautizar mèn, mèna lyá'que'. Per ndxe'leque', mèn co' ne'tyalte yila's loon no loo cón chenen, mèna thidteneque'

quexù' Diox par tetii Diox mènà yilòà. <sup>17</sup> Lu'en loo gu' xal ñaa señ no yalguzye' co' li Diox loo mèn, mèn co' tyal yila's loon. Lomisque' ne, ngue ñibe'en loo gu' por cón che'n con' roo no con' xèn co' nzo làs niin no co' nzo la's yan, co' gu' xpíi meexù' loo mèn. Lomisque' ne, lin par tyoodi's gu' tedib di'stèe co' inacte di'stèe co' ndyoodi's gu' loo mèn. <sup>18</sup> No lomisque' ne, lin co'se' tyen gu' mbel', ne'quelede mbel' gu'. Ta' mèn nít yèth co' nos cuan' hua gu' no ne'líde cuan'a yalquii loo gu' par gath gu'. Más de cona, ante gàal gu' lad mèn yíiz, yac mèn yíiz loo yíiz co' mque no mèn, ne.

*Jesús nguáp loo bé'.*

*(Lc. 24.50-53)*

<sup>19</sup> Texal ngolo mdoodi's no Jesús myen' xin' mté'th Jesús, xèe nzi hui' myen' xal nguáp Jesús loo bé'. No co'se' ngolo mzin Jesús loo bé', mdub Jesús cuat Diox loo bé'. <sup>20</sup> Ngoloa, mbii myen' co'te' ngo no myen' Jesús. Mxen myen' ned. Nda te'th myen' no ngua lo myen' yalbàn co' ndlu' xá mod lyá' mèn loo con' ryes loo mèn dib athu loo izlyo'. Yub Tad Jesús mque tee no myen' ned mque tee myen'. No yub Tad Jesús ndli par ndxàc huax señ no huax yalguzye' loo mèn por cón che'n myen', par ndlu' Tad Jesús loo mèn licque' nac di's co' ngue go myen' yalbàn no co' nde'th myen' loo mèn, no co' ndxàc loo mèn. Taandxè'que' tolo gàca, ndee gu'.



## Di's Ndac Che'n Diox Co' Mque' Luc Ye's

*Trè' ntlo ndlu' cón che'n di's ndac che'n Diox co' mque' Luc ye's.*

<sup>1</sup> Anze'f huax mèn mdoo lezo' par mque' mèn ye's cón che'n Jesucrist par mda' mèn cuent cón che'n thib thib con', con' co' ngòc làth nu', Tyofl. <sup>2</sup> Mque' mèn ye's no mda' mèn cuent xal ngòcpe'i. Mèn ngòc mèn co' gunèepe' con' co' ngòc. No mque tee lyath no mèn mèn co' mque tee go yalbàn cón che'n di's ndac cón che'n Diox. <sup>3</sup> Daa, ne, noo mbral no cón che'n thib thib con' co' ngòc, axta co'se' mtlo ngòca. No ndyaquen huen naca que'en ye's cón che'n xal ngòc ryethe con'a lool, Tyofl, lùu co' anze'f ndyu' loon no co' anze'f ndlin cas. <sup>4</sup> Por cona, ngue que'en ye's ndxè' lool par ta'l cuent no par nonl co' huen huen cón che'n con' co' nac licpe' cón che'n Jesucrist co' mbu'le' mèn lool.

*Thib angl ngue ta' cuent le' thib mbed co' ryo' lèe Juàn Bautist gáal.*

<sup>5</sup> Hui' nexa, Tyofl. Co'se' ngòc Herod rey loo mèn yèezya' co' ngòc mèn gulàaz mèn jude tiempa, le'xque' le'n tiempa ngo ban thib mbi' co' ngòc nguley'. Mbi'a ngro' lèe Zacari. Thidte mxo'f zin' mbi' yalnguley' con thib ned mèn co' mnibe' tedib mbi' co' ngòc nguley' co' ngro' lèe Abi. Le' xa'got Zacari na, ngro' lèe Elisabet. Ngòc Elisabet bin che'n thib mbi' co' ngro' lèe Aarón, ne. <sup>6</sup> Ngòc Zacari ryop Elisabet mèn nali no mèn nambii loo Diox. Mdyubdi's Zacari ryop Elisabet xal mnibe' Diox loo ley co' mxo'f Moisés loo mèn tiempa. Nec thib mod no nec tedib mod yende chó mèn ngo tiempa co' ngác ñii yèe ñii tii cón che'n Zacari ryop Elisabet loo chol con' co' nac cón che'n Diox. <sup>7</sup> Zacari ryop Elisabet ne'ndante xin' tac Elisabet ngòc xa'got rnith. Leque tiempa ngòc ryop sa'l Zacari xa'gool, ne.

<sup>8</sup> Co'se' mzin huiz co' ngòc tiemp co' xo'f zin' mèn co' thidte nxo'f zin' no Zacari yalnguley' par li mèn sirv loo Diox le'n templ, <sup>9</sup> xalque' ngòc mod co' mque no mèn co' mxo'f zin' thib thib mèn zin' cón che'n yalnguley' le'n templ, le'xque' tiempa ngro' lèe Zacari rif par xo'f zin' Zacari le'n templ che'n Diox par tec Zacari du'r zen yal' le'n templ. <sup>10</sup> Sya, láth ngue tec Zacari du'r zen yal' le'n templ, ryete mèn co' mqueltàa nziri' fuer loo lue' co'te' ndub templ. Nzi bez mèn Diox. <sup>11</sup> Làth xtau'a, mbyú' loo thib angl che'n Tad Diox loo Zacari. Ndoo angl ladli che'n còo' co'te' ntec nguley' du'r zen yal'. <sup>12</sup> Co'se' gunèe Zacari ndoo angl, ne'ñeede Zacari cón li Zacari tant nzyeb Zacari. <sup>13</sup> Sya, gunii angla. Ndxab angl loo Zacari:

—Zacari, ne'zyebtel. Diox mbìnque' di's co' ngue bezl loo Diox. Nalle' ngue niin lool: Xa'gotl co' nac Elisabet tyan thib xgan'l. No tub lèel mbed Juàn. <sup>14</sup> Anze'f xyo'f nde' xyo'f ndla' lezo'l no anze'f tyac tín' lezo'l por cón che'n mbed. Más de cona, anze'f huax mèn tyac lezo' por cón che'n mbed co' tyan xa'gotl. <sup>15</sup> Tac xgan' lùu co' gáala gác thib mbi' co' anze'f tyu' loo Diox. Ne'gude xgan'l vin. Ne' ne' gu xgan'l nítguy. Ndoore' gáal xgan'l tlo Xpii Natú', ñibe' Xpii Natú' loo xgan'l. <sup>16</sup> Xgan' lùua li le' huax mèn nación Israel lyàa yéc no lyàa lezo' par bere mèn nación Israel, yòo mèn nación Israel loo cón che'n Dioxpe' mèn tedib vez. <sup>17</sup> Xgan' lùu, co' ryo' lèe Juàn, ya lu' ner loo mèn cón che'n Crist ndoore' yi'th lu' Crist loo mèn loo izlyo'. Que tee te'th Juàn di's loo mèn cón che'n Crist xalque' mque tee te'th Lii co' mde'th di's co' ndxab Diox loo mèn póla. No gáp Juàn con' la's nii Juàn no la's ya' Juàn xalque' ngòp Lii con' la's nii Lii no la's ya' Lii póla. Tataa li Juàn loo mèn par yu' yàl lezo' mèn co' nac gundan loo xin' mèn no par tlo té'th mèn tyubdi's mèn co' nac mèn naad no mèn co' nac mèn nguud loo Diox xalque' mèn co' ndxác. Tataa li Juàn par gác nab mèn loo cón che'n Diox par tyubdi's mèn loo Crist co'se' yi'th Crist loo mèn.

<sup>18</sup> Zacari mnibdi's loo angl. Ndxab Zacari loo angl:

—¿Xá mod gác yilazen ché', licque', gác con' co' ngue nee U' loon ba', à'? Hui' U' nexa. Daa ngoxle' no xa'got daa ngoxle', ne.

<sup>19</sup> Angl mcàb. Ndxab angl loo Zacari:

—Daa nac Gabriel co' nzo loo Diox par lin co' ñibe' Diox loon. Diox mnibe' loon par mbal toodiz nonl par tan cuent cón che'n di's co' gunee Diox loon par niin di's ndxè' lool. <sup>20</sup> Per nalle' gác thib con' lool. Desde nalle' par delant lùu gác mud. Ne'gáctel tyoodi'sl le'n rye mbe' co' tyoo nac xin' xa'gotl. Con'a gác lool tac ne'ngala'stel di's co' ngue niin lool ndxè'. Gácque' con'a lool axta tyaa huiza no axta zin tiemp co'se' tyan xa'gotl xin' xa'gotl.

<sup>21</sup> Láth ndxàc con'a loo Zacari, mèn nziri' par fuer loo lue' co'te' ndub templ. Nzi bed mèn ryo' Zacari le'n templ. Per ante mbui' mèn no ante gunaa mèn cón ndxàc loo Zacari no cón mxac Zacari susque' nen ndlyen' Zacari le'n templ. <sup>22</sup> Co'se' ngro' Zacari le'n templ, ne'ngácte Zacari tyoodi's no Zacari mèn. Syare', mden' lezo' mèn no mda' mèn cuent le' Zacari mxyo'f loo con' loo le'n templ. Mbli Zacari señ loo mèn le' Zacari ngòc mud.

<sup>23</sup> Co'se' ngolo mdyaa huiz co' ngòc huiz co' mxo'f zin' Zacari zin' che'n yalnguley' le'n templ, mdyàa Zacari par liz Zacari. <sup>24</sup> Ngolo nguri'th con'a, Elisabet, xa'got Zacari, mquée loole' xin'. No ale ne'ngro'de Elisabet, ne' por chu'th, liz Elisabet le'n ga'y mbe' tac mbli Elisabet xtùuz, ndxab Elisabet le'n lezo' Elisabet: <sup>25</sup> Tad Diox mbli con' ndxè' loon nalle' par taandxè' mod ne'tolode xiis no mèn daa.

*Thib angl ngue ta' cuent thib mbeto' co' ryo' lèe Jesús gáal.*

<sup>26</sup> Ngolo ndxàc xop mbe' ndoo nac xin' Elisabet, Diox mtel' angl Gabriel par ngua angl le'n thib yèez che'n làaz mèn galile, yèezya' co' lèe Nazaret. <sup>27</sup> Ngua too naa angla thib mza' yòn co' ngro' lèe Mari. Mza'a ngòp trat con thib mbi' co' ngro' lèe Chè par selya' mza' con Chè. Chèa nde bin thib mbi' co' ngro' lèe David co' ngòc rey póla. <sup>28</sup> Sya, ngòc angl co'te' nzo mza'. Ndxab angl loo mza':

—San, Mari. ¿Máal, ey? Anze'f thib con' ndac li Diox anggàc lool le'n huiz ndxè'. Diox nzo noque' lùu. Anze'f tyac lezo'l, Mari, loo rye mèngot co'se' yilo gác con' ndxè' lool.

<sup>29</sup> Per co'se' ñèe Mari ndyoodi's no angl Mari, ante mbui' Mari no ante gunaa Mari. Ndxab Mari loo lezo' Mari: ¿Chonon tatua' ngue toodi's angl che'n Diox ba' loon, yoo? ¿Cón gác loon nalle'? <sup>30</sup> Sya, ndxab angl loo Mari:

—Mari, ne'zyebtel. Ngro' lezo' Diox li Diox anggàc thib con' ndac lool. Hui' nexa xá nac di's co' ngue niin lool ndxè': <sup>31</sup> Lùu quée loo xin'. No tyanl thib xgan'l. Tub lèel mbed Jesús. <sup>32</sup> Mbed co' tyan lùua gác thib mbi' roo no thib mbi' xèn. Hue' mbed tedib lèe co' lèe Xgan'pe' Diox, co' nee di's, gácque' mbed xgan'pe' Diox. Noo noo ta' mèn cuent le' mbed, licque', nac xgan'pe' Diox, Diox co' nac Diox roo no Diox xèn loo ryethe con'. No li Tad Diox gác mbed rey loo mèn nación Israel xal ngòc David co' ngòc xudgool lùu rey loo mèn nación Israel póla. <sup>33</sup> Ne'lyuxte no ne' ne' lith no tiemp co' ñibe' xgan'l loo mèn nación Israel thidtene yiloo.

<sup>34</sup> Sya, mnibdi's Mari loo angl. Ndxab Mari loo angl:

—¿Xá mod gác con' ndxè' loon, yey? Daa tarte que no sa'len. Más de cona, tarte neen cón mènbi'.

<sup>35</sup> Angl mcàb. Ndxab angl loo Mari:

—Diox làa Xpii Natú' lool. Por cón che'n Xpii Natú'a, Diox li anggàc con' roo con' xèn lool par ndootel hue' xin'l. Por cona, mbed co' tyanla gác xgan'pe' Diox par xo'f zin' mbed cón che'n Diox. <sup>36</sup> No nalle' nde niin tedib con' lool: Elisabet co' ndxàc mèn gulizl tyan thib xgan' Elisabet, ne. Mastale' ngoxle' Elisabet no mastale' mbez mèn le' Elisabet nac xa'got rnith, per nalle' ndxàcle' xop mbe' ndoo nac xin'le' Elisabet. <sup>37</sup> Ryethe con' co' ndlya's Diox li Diox nzoque' mod li Dioxa xal ndlya's Diox.

<sup>38</sup> Le' sya, ndxab Mari loo angl:

—Ana Diox. Daa nacle' moz che'n Diox. Li Diox con' loon xal ngue nee U'i loon. Ngolo ndxab Mari tataa loo angl, ndyàa angl.

*Mari ngua too naa Elisabet liz Elisabet.*

<sup>39</sup> Leque le'n huiza, anze'f mguen lezo' Mari. Mxen Mari ned, nda Mari le'n thib yèez co' nziri' le'n yiido' par ned làaz mèn jude. <sup>40</sup> Ngua Mari liz Zacari. Gunii Mari Diox loo Elisabet. Ndxab Mari:

—San, Elisabet. ¿Máal? ¿Cón ngue lil?

<sup>41</sup> Co'se' mbìn Elisabet gunii Mari Diox loo Elisabet, ale mbuin mbed le'n xàn' le'n Elisabet. Sya, ngulàa Xpii Natú' loo Elisabet par tlo Xpii Natú', ñibe' Xpii Natú' loo Elisabet. <sup>42</sup> Sya, cabii ndxab Elisabet loo Mari:

—Mari, angngro' lezo' Diox mbli Diox ngòc más con' ndac lool leque loo rye mèngot co' naban dib athu loo izlyo'. No angngro' lezo' Diox gác más con' ndac loo xgan'l co' gáala.

<sup>43</sup> Tolo mdoodi's Elisabet. Ndxab Elisabet loo Mari:

—¿Chó nac daa par yi'th too naa xna' Tad daa daa, yoo? Yende cón ntac daa, ndyaquen.

<sup>44</sup> Tac texal mbìn guniil Diox loon, Mari, ale chàa, mden'en mbuin mbed co' ndoo nac xin'en ndxè' le'n xàn' le'nen, tant ndyac lezo' mbed, ndyaquen. <sup>45</sup> Huen ndal, Mari, tac ngola'sl le' Tad Diox lique' co' mcàbgòn Tad Diox lool li Tad Diox lool.

<sup>46</sup> Sya, ndxab Mari loo Elisabet:

Elisabet, dib nzo yéquen no dib nzo lezon mbezen loo Tad Diox: Tad Diox roo Tad Diox xèn nac U, Tad Diox.

<sup>47</sup> Leque daa ngue xo'f nde' ngue xo'f ndla' lezon. No anze'f ndyac lezon loo Diox, Diox co' nac Diox daa co' mtelá' daa loo ryethe con' ryes.

<sup>48</sup> Tad Diox ngoque' cuent le' daa nacque' thib moz loo Diox mastale' ndyaquen yende cón ntac daa. No desde nalle' par delant, ryete mèn co' naban chol tiemp, ñee mènna loon: Huen ndal, Mari, por cón che'n con' co' ngòc loon.

<sup>49</sup> Diox, co' nac Diox roo Diox xèn mbli' ngòc con' co' hui' mèn no con' co' ñaa mèn loon. Anze'f natú' nac lèe Diox.

<sup>50</sup> Tlatque' lezo' Diox ñèe Diox mèn, mèn co' zyeb no mèn co' tyóo loo cón che'n Diox le'n rye tiemp.

<sup>51</sup> Con' roo no con' xèn nac co' nde tee' ndli Diox loo mèn. No mbli Diox ngòc nado' mèn nate's no mèn naxal'.

<sup>52</sup> Mbli Diox par ngòc mèn co' mnibe' loo izlyo' ndxè' mèn be'the loo yalnibe' co' mnibe' mèn loo xtàa mèn. Le' loo mèn prob co' inacte mèn nate's na, mbli Diox ngòc mèn proba mèn roo no mèn xèn loo xtàa mèn.

<sup>53</sup> Le' mèn co' mque tee lan', mèn co' msyon co' hua, loo mènna Diox mbli ngòp mènna che'n mèn. Loo mèn ric na, mbli Diox nague's ya' mènna no nague's nii mènna. Yende cón ngòp mènna.

<sup>54</sup> Mblyath no Diox mèn nación Israel, mèn co' mxo'f zin' cón che'n Diox. Mblyat lezo' Diox gunèe Diox mèn nación Israel.

<sup>55</sup> No ngòcque' mblyath noque' Diox mèn nación Israel xalque' ngòc di's co' mcàbgòn Diox loo mbi' co' ngro' lèe Abraham co' ngòc xudgool na' no loo mèn guliz mbi' thidtene.

<sup>56</sup> Ngolo mdoodi's Mari di'sa loo Elisabet, mbyan' Mari liz Elisabet casque' le'n son mbe'. Ngoloa, ndyàa Mari par liz Mari.

*Trè' ndlu' xá mod ngòc co'se' ngóol Juàn Bautist.*

<sup>57</sup> Nde nxon', mdyaa huiz co' mdoo nac xin' Elisabet. Ngóol xin' Elisabet. <sup>58</sup> Co'se' mbìn mèn vecin Elisabet no mèn guliz Elisabet le' Diox mbli con' ndac loo Elisabet, ngua too naa mènna Elisabet no mbed par tyac lezo' mènna con Elisabet. <sup>59</sup> Ngolo xon huiz ngóol xin' Elisabet, mbe' Zacari ryop Elisabet mbed par gác circuncidar mbed xal ngòc costumbr che'n mèn tiempa. Leque tiempa mblyas mèn tub lèe mèn mbed xal lèe Zacari, xud mbed. <sup>60</sup> Per xna' mbed ndxab loo mènna:

—¡Aa'a! Juàn ryo' lèe mbed.

<sup>61</sup> Mènna ndxab loo xna' mbed:

—¿Chonon indlya'stel ryo' lèe mbed Zacari, à'? Yende chó mèn gulizl nzo co' lèe Juàn, ¿lé'?

<sup>62</sup> Sya, mbli mènna señ loo Zacari, xud mbed, par ñee mènna chó lèe ndlya's Zacari tyub lèe mbed. <sup>63</sup> Per Zacari co' nac xud mbed mna'b thib le' ye's loo mènna. Sya, mdub xud mbed di's loo ye's. Co'se' gunèe mènna mdub Zacari lèe mbed loo ye's co' ndlya's Zacari ryo' lèe mbed co' ndxab Zacari loo mènna loo ye's: Juàn ryo' lèe mbed, ante mbui' mènna no ante gunaa mènna por tataa mdub Zacari lèe mbed loo ye's. <sup>64</sup> Leque hora, mbere Zacari, mdoodi's Zacari tedib vez. Ndxab Zacari:

—Anze'f Diox roo no Diox xèn nac Diox. No anze'f ndac tín' nac Diox.

<sup>65</sup> Co'se' ngolo nguri'th con' ngòc loo Elisabet no loo Zacari, ryete mèn xtàa no vecin Elisabet co' nzo ban no gax Zacari no Elisabet anze'f mzyeb no ante mbui' mènna no ante gunaa mènna. No mbyath mbyèn con' co' ngòc loo Elisabet no loo Zacari par ned le'n rye yèezya' co' nziri' le'n yiidyó' co' nac gulàaz che'n mèn jude. <sup>66</sup> Co'se' mbìn rye mèn par neda con' co' ngòc loo Elisabeta, mbli mènna xtùuz no mnibdi's thib thib mènna loo thib xtàa mènna no loo tedib xtàa mènna:

—¿Cón li mbeda? No ¿cón gác mbeda?

Tac, licpe' ba'i, anze'f thib con' ndac angmbli Tad Diox loo mbeda.

*Di's ndxè' ngòc di's co' gunii Zacari loo Diox.*

<sup>67</sup> Hora mbli Diox mtlo Zacari, mdoodi's Zacari tedib vez. No ngulàa Xpii Natú' che'n Diox loo Zacari. Mtlo Xpii Natú', mnibe' Xpii Natú' loo Zacari par bere Zacari, tyoodi's Zacari di's co' ndxab Diox angndoo Zacari tyoodi's Zacari. Ndxab Zacari:

<sup>68</sup> Loo Tad Diox co' nac Diox che'npe' mèn nación Israel ndyazen gab mèn le' Diox roo no Diox xèn nac Diox tac Diox mbi'th loo na', na' co' nac mèn nacionpe' che'n Diox. Mtelá'le' Diox na' loo con' ryes.

<sup>69</sup> Mbli Diox par gáal thib mbi' co' gáp con' roo no con' xèn la's nii mbi' no la's ya' mbi' par tí' no làa mbi' na' loo con' ryes. Gáal mbi'a làth mèn co' nac bin che'n David co' ngòc rey póla co' mxo'f zin' thib zin' co' nac cón che'n Diox.

<sup>70</sup> Tataa mcàbgòn Diox gàca loo mèn nación Israel xal ndxab Diox te'th mèn co' mde'th di's co' ndxab Diox cón che'n co' gác loo mèn nación Israel más póla.

<sup>71</sup> Mbi' co' gáala yi'th yáal par tí' no làa mbi' na' loo mèn co' nac ngolo ngola's na' no la's ya' rye mèn co' ndxòo xyàn lezo' ñee mènna na'.

<sup>72</sup> Ndlyatque' lezo' Tad Diox ñee Tad Diox na' xal mcàbgòn Tad Diox di's loo mèn co' ngòc xudgool na' li Tad Diox loo na'. Axta huiza no axta huiz nalze ne'ngyathla'ste Tad Diox cón che'n conveñ natú' co' mbli Diox con xudgool na'.

<sup>73</sup> Con' ndxè' nac con' co' mcàbgòn Diox loo xudgool na', Abraham, li Diox.

<sup>74</sup> Le' Diox tí' no làa Diox na' loo mèn co' nac ngolo ngola's na' par tataa mod ne'zyebte na' li na' sirv loo Diox.

<sup>75</sup> Tataa li Diox par gác na' mèn co' thidtene ngro xà' loo cón che'n xab izlyo' par gác na' che'npe' Diox no par gác na' mèn nalì no mèn nambii loo Diox le'n ryethe huiz co' naban na'.

<sup>76</sup> Ngolo gunii Zacari di's ndxè' loo Diox, mbere Zacari, mtlo Zacari, mdoodi's no Zacari Juàn xgan' Zacari co' nac mbedto' hora. Ndxab Zacari loo Juàn:

—Le' loo lùu na, xgan', lùu ryo' lèe mèn co' te'th di's co' gunii Tad Diox co' nac thidte Diox roo Diox xèn. Loo Tad Crist lùu ya ner par ya lu'l loo mèn no li nabl mèn par yòo mèn loo cón che'n Tad,

<sup>77</sup> par tataa mod mèn co' nac mèn nacionpe' Diox ta' cuent xá mod lyá' mènna loo con' ryes no par ta' mènna cuent xá mod tyon' xtol mènna, ndee.

<sup>78</sup> Tataa li Diox lool por tant ndlyat lezo' Diox ñee Diox mèn no por anze'f nque' lezo' Diox ñee Diox mèn. Lomisque', yi'th yáal thib mbi' loo izlyo' ndxè'. Mbi'a li par tyub xnii yéc mèn no li mbi' par tyub xnii lezo' mèn loo cón che'n Diox xal co'se' ndlyen huiz par tenii huiz loo izlyo'.

<sup>79</sup> Mbi'a li par tyub xnii yéc mèn no par tyub xnii lezo' mèn, mèn co' nau' yéc nau' loo loo cón che'n Diox. No li mbi'a par tyub xnii yéc mèn no par tyub xnii lezo' mèn loo cón che'n Diox, mèn co' nzi tee ban loo co' nac xin no loo co' nac xnaa che'n con' co' ncàb nquée yalguth loo mèn. No li mbi'a par que tee ban na' rye nda na' no rye ndye'th na' làth xtàa na'.

Con' ndxè' ngòc di's co' gunii Zacari no co' mde'th Zacari loo mbedto' co' ngòc Juàn, xgan' Zacari.

<sup>80</sup> Le' mbed xgan' Zacari co' nac Juàn na, mtlo mbed, ndoo roo mbed ndoo xèn mbed. No sate más ndyub xnii yéc mbed no ndyub xnii lezo' mbed loo co' nac xtùuz mbed loo cón che'n Diox. No ale ngua mbed par ngòc ban mbed co'te' nagán axta mzin huiz leque mbed mblu' too mbed loo mèn nación Israel.

## 2

*Trè' ndlu' cón che'n xá mod ngóol Tad Jesús.*

*(Mt. 1.18-25)*

<sup>1</sup> Le'xque' le'n tiemp co'se' ngóol Juàn, ngo thib mbi' co' ngòc gobiern co' mnibe' loo mèn casque' dib athu loo izlyo' tiempa. Mbi'a ngro' lèe rey Agust. Mbi'a mdub ñibe' loo mèn nación Israel, ne. Mnibe' mbi'a loo mèn yèezya' che'n rye làaz mèn nación Israel que no mèn nac zin' thib padron yòolau. <sup>2</sup> Ner ye's co' ngòc padron mtoxcua' mèn co'se' ngòc thib mbi' co' ngro' lèe Ciren gobernador loo mèn rye yèezya' co' nac mèn gulàaz siria. <sup>3</sup> Mnibe' Cesar Agust le' ryete mèn co' inzo bante co'te' nac làazpe' mèn no co'te' nac lizpe' mèn, mèn co' nzo ban chol lugar co'te' inacte làaz mèn, bii mèn par làaz mèn par gac empadronar mèn, co' nee di's, ya lo mèn lèe mèn loo ye's yòolau co'te' nac làaz mèn. <sup>4</sup> Cona, por fuerz mbli Chè ngro' Chè ryop Mari le'n yèez Nazaret. Ngua Chè ryop Mari thib yèez co' nac làaz mèn jude par ngua Chè ryop Mari yèez Belén, co'te' ngóol mbi' co' ngro' lèe David co' ngòc rey axta pólle'a, par ya lo Chè lèe Chè loo padron yòolau tya tac Chè nde bin David co' ngòc reya póla. <sup>5</sup> Sya, ngua Chè ryop Mari yèez Belén par ngua lo Chè lèe Chè ryop Mari loo padron par nacle' di's le' Mari selya' con Chè. No le'pe' ante pen ndoo Mari ndoo nac xin' Mari. <sup>6</sup> Láth nzo Chè ryop Mari le'n yèez Belén, ale mtlo mden' Mari mquée yo'f lezo' Mari par gáal xin' Mari. Ale ngóol xin' Mari. <sup>7</sup> Pues yèez Belena ngóol mbed co' ngòc ner mbed ndlyo xgan' Mari. Ngóol mbed le'n liz ngon co'te' ndoo ngon. Ngolo ngóol mbed, mchix Mari mbed lar' lad mbed. Ngoloa, ngua thix Mari mbed le'n thib bate yaa co'te' ndxuhua ngon yix tac ya yende lugar co'te' cued Chè ryop Mari le'n mesón, tant huax mèn ndoo ned ndye'th.

*Trè' ndlu' le' angl mdoodi's no mèn co' ngòc pastor tiempa.*

<sup>8</sup> Tiempa, mque no mèn co' ngòc mèn yèeza ranch mèn gaxte ro yèez Belén par huan par nqueno mèn mbacxil' tac mèn ngòc pastor co' thib loote que no mbacxil' par nquenap mèn mbacxil' ndxáal yál'. <sup>9</sup> Látha, chàa, ngro' too thib angl che'n Tad Diox loo mèn. No mbyà'x thib xnii tín' che'n Tad Diox loo mèn. Látha, anze'f mzyeb mèn axta plóthe. <sup>10</sup> Sya, ndxab angl loo mèn:

—Ne'zyebte gu', ey. Daa ndal no di's co' nac di's ndac co' tan cuent loo gu'. Di's ndac ndxè' càb le' rye mèn xyo'f nde' xyo'f ndla' lezo'. <sup>11</sup> Di's ndac co' ngue niin loo gu' ndxè' no co' ngue tan cuent loo gu' ndxè' nac: Nalle'que' ngolo ngóol thib mbed co' tí' no làa gu' loo con' ryes. Ngóolle' mbeda le'n yèez Belén co' ngòc liz no làaz che'n mbi' co' ngro' lèe David co' ngòc rey póla. Mbeda nac Crist co' nac Tad loo ryethe con'. <sup>12</sup> Di's co' ngue niin loo gu' ndxè' nac di's co' ngue tan cuent loo gu' pá ngóol mbed. Co'se' ñèe gu' nax thib mbeto' le'n thib bate yaa co'te' ndxuhua ngon no nabix mbeto'a lar', sya, ta' gu' cuent mbedai.

<sup>13</sup> Leque hora, chàa, mbyú' loo huax angl loo angla no loo mèn co' nquenap mbacxil' ndxáal yál' rancha. Mtlo angla, mbil' ro angla loo Diox. Ndxab angla:

<sup>14</sup> Li na' le' lèe Diox gac con' guryath no con' guryèn loo bé'. Le' loo izlyo' na, Diox li yu' yàl lezo' mèn loo Diox no cue ban mèn rye nda mèn no rye ndye'th mèn làth xtàa



mèn. No tyac lezo' mèn loo con' co' nac co' nee lezo' Diox, mèn co' ndxòo lezo' Diox ñèe Diox.

<sup>15</sup> Le' sya, co'se' ngolo ndyàa rye angl loo bé' tedib vez, mtlo mèn co' nquenap mbacxil' ranca, mbez mènà loo thib xtàa mènà no loo tedib xtàa mènà:

—Nda na' yèez Belén, tá. Nda tee hui' na' ñeene' cón ngòc cón che'n co' gunee Tad Diox loo na'a.

<sup>16</sup> Mxen mènà ned. Sirs sirns nda mènà par yèez Belén. Látha, chàa, ngua loo mènà. Gunèe mènà Mari no Chè. Gunèe mènà mbed, ne. Nax mbed le'n thib bate yaa co'te' ndxuhua ngon yix. <sup>17</sup> Co'se' gunèe mèn co' ngue no ranch huan co' nquenap mbacxil' ndxáal yál' mbed, mda' mènà cuent loo chol mèn xal mda' angl cuent loo mènà cón che'n mbed. <sup>18</sup> Co'se' ndxòn chol mèn cuent co' mda' mènà cuent, mèn co' nqueno mbacxil' ndxáal yál', ante ngüi' rye mènà no ante ñaa rye mènà. <sup>19</sup> Co'se' mbìn Mari cón che'n di's co' ndyoodi's mèn co' nqueno mbacxil' ndxáal yál', ante le'n lezo' Mari non Mari di'sa. Yende chó loo mèn nda' Mari cuenta. Ante mdyóo Mari cón che'n di'sa no maste. <sup>20</sup> Ngolola na, mxen mèn co' nqueno mbacxil'a ned, ndyàa mènà. No mbez mènà naroo nac Diox no con' roo con' xèn nac co' mbli Diox. No ndxab mènà: Diox quix U', Diox, loo Diox tac ngòcque' con' xalque' mda' angl cuenta loo mènà.

*Chè ryop Mari ngua no mbed le'n templ.*

<sup>21</sup> Ngolo xon huiz ngóol mbed, mbli Chè ryop Mari mandad ngòc circuncidar mbed xal ngòc costumbr che'n mèn tiempa. No sangmdub lèe Chè ryop Mari mbed Jesús co' ngòc lèe co' ndxab angl loo Mari co'se' ndoore' quée loo mbed lezo' Mari.

<sup>22</sup> Co'se' ngolo mdyaa sman mbembii Mari loo yíz ftan xal ngòc costumbr co' mnibe' ley co' mxo'f Moisés loo mèn, mbe' Chè ryop Mari mbed le'n templ co' ndub le'n ciuda Jerusalén par lu' Chè ryop Mari mbed loo nguley' par ngòcque' no mdyaaque' no mdyubque' di's co' gunii Diox no co' mnibe' Diox li mèn par lu' mènà le' mbed nac che'npe' Diox. <sup>23</sup> Tataa mbli Chè ryop Mari tac loo ley co' mxo'f Moisés loo mèn ndub di's co' mnibe' Tad Diox le' ryete mbedbi' co' nerleque' gáal, mbeda gac che'n Diox, co' nee di's, xo'f zin' mbed cón che'n Diox loo Diox. <sup>24</sup> Mbe' Chè ryop Mari chop mbin par guth nguley' mbina loo Diox xal mnibe' ley co' mxo'f Moisés loo mèn cón che'n mbed ndlyo, di's co' mbez: Chele' mèn ne'guthte chop ngoo', guth mèn chop palomxtil'.

<sup>25</sup> Le'n tiempa ngo ban thib mbi' le'n ciuda Jerusalén co' ngro' lèe Simeón. Mbi'a ngòc thib mbi' ndac. No thidtene indxàc falte mbi' le'n templ par mbez mbi' Diox no par mcòo' mbi' yéc mbi' loo Diox. Mdub quee lezo' mbi' ¿pól zin thib huiz no zin thib ze co'se' tel' Diox Crist co' mcai Diox par tí' no làa Diox mèn nación Israel loo mèn co' ngòc ngolo ngola's che'n mèn nación Israel por cón che'n Crist? No thidteneque' ñibe' Xpii Natú' che'n Diox loo mbi' co' ngro' lèe Simeón. <sup>26</sup> Xpii Natú' che'n Diox mblo xo'f di's loo Simeón le' Simeón ne'gathte ndoore' hui' Simeón loo Crist co' tel' Diox, co' yi'th yáal loo izlyo' ndxè'. <sup>27</sup> Simeón ngua le'n templ xal mnibe' Xpii Natú' loo Simeón. Co'se' ngòo no Chè ryop Mari mbed, co' lèe Jesús, le'n templ par gaca loo mbed xal ñibe' di's co' ndub loo ley co' mxo'f Moisés loo mèn, <sup>28</sup> sya, mxen mbi' co' ngro' lèe Simeón mbed. Mde's mbi' mbed. Ndxab mbi' di's co' nac di's natú' no di's roo no di's xèn loo Diox. Ndxab mbi' loo Diox, ne:

<sup>29</sup> Tad, nase gaca xal nee lezo' U' loon. La' U' gath daa tac U' mblile' no ngòcle' con' mcàbgòn U' gac loon, daa co' nac moz U', Tad.

<sup>30</sup> Nase gunèelen mbed co' tí' no làa mèn loo con' ye'rsin'.

<sup>31</sup> No ngóol mbed ndxè' làth mèn. No mdoo U' mbed ndxè' loo mèn par tí' no làa mbed ryete mèn loo con' ye'rsin'.

<sup>32</sup> Mbed ndxè' li par tyub xnii yéc mèn no par tyub xnii lezo' mèn loo cón che'n Diox, mèn co' inacte mèn nación Israel. No por cón che'n con' co' li mbed ndxè', xyo'f lèe xyo'f xti's mèn nación Israel.

<sup>33</sup> Le' Chè ryop Mari na, ante mbui' no ante gunaa co'se' mbìn Chè ryop Mari di's co' mbez Simeón cón che'n mbed loo Diox. <sup>34</sup> Ngolaa, ndxab Simeón loo Mari no loo Chè:

—Ndlyazen le' Diox li huen nda gu', ndee gu'.

Sya, ndxab Simeón loo Mari, xna' Jesús, ne:

—Mari, hui' nexa. Càba loo mèn naciòn Israel por cón che'n mbed ndxè' huax mèn lyá' loo con' ryes. No huax mèn tolo ryo xà' loo cón che'n Diox, ne, por cón che'n mbed ndxè'. No gác mbed ndxè' xal thib señ loo mèn naciòn Israel. Ale tè'b mèn naciòn Israel mbed no chobla' mèn naciòn Israel mbed. <sup>35</sup> No por cón che'n mbed, yú' no gác be' xá ñaa con' ndli thib thib mèn xtùuz le'n lezo' mèn. Le' part cón che'n na, Mari, ryete con' co' gác loo xgan'l ndxè' càb lool xi lezo'l no ten'l thib yalnè tín' le'n lezo'l xal co'se' nguiid mèn cuchí lad xtàa mèn. Thiba con' ndxè'.

<sup>36</sup> Le' tediba na, le'xque' tiempa ngo thib xa'gotgool co' ngro lèe An le'n templ. Xa'gota ngòc rsap thib mbi' co' ngro' lèe Fanuel. Mbi' co' ngro' lèe Fanuela nde bin tedib mbi' co' ngro' lèe Aser. An ngòc thib xa'gotgool tiempa, ngoxle' An. Per co'se' mselya' An, myen'got yèn'leque' An mselya' An. Pente mdub An con mbyòo co' mselya' Ana gaz lín' no maste ndoore' gath mbyòo. An be' mxec gunèe An mbed co' lèe Jesús. <sup>37</sup> Mxec An, mbyan' thib An, thap gal nzo thap lín' anon nguth mbyòo co' ngòc sa'l An. Thidteneque' ngòo An le'n templ ze no yál'. Mxo'f zin' An zin' cón che'n Tad Diox. Huax vez xlat An mbez An Diox, ne. <sup>38</sup> Le'xque' hora, mzin An le'n templ. Gunèe An mbed co' lèe Jesús. Ngurez An Diox. Ngolo ndxab An Diox quix U', Diox, loo Diox por cón che'n mbed co' lèe Jesús, mtlo An, mdoodi's An cón che'n mbed co' lèe Jesús loo mèn le'n ciuda Jerusalén, mèn naciòn Israel co' nzi quee lezo' lyá' mèn loo ryethe con' ryes la's ya' mèn co' ngòc ngolo ngola's loo mèn naciòn Israel.

*Chè ryop Mari mbere mbyàa no mbed yèez Nazaret.*

<sup>39</sup> Co'se' ngolo mdyaa ryete di's co' ndub loo ley co' mxo'f Moisés loo mèn naciòn Israel cón che'n ner myen'bi' bix co' ndxáal, ndyàa Chè ryop Mari con mbed co' lèe Jesús par ned le'n yèezya' che'n làaz mèn galile co'te' ngòc làazpe' Chè no Mari co' ngòc yèez Nazaret tedib vez. <sup>40</sup> Le' mbed na, sate más ndoo roo mbed, no sate más ndoo xèn mbed, no sate más ale yub mbed ndoo yác mbed. Làth xtau'a, Diox mbli sate más ndxàc con' ndac loo mbed, ne.

*Tad Jesús mdoodi's no mèn co' ngòc maistr le'n templ tiempa.*

<sup>41</sup> Tiempa, xud mbed no xna' mbed mque tee lni pasc atate lín' co' ndxàc ciuda Jerusalén. Co'se' ndxàc lnia, huen huen nte' lezo' mèn naciòn Israel cón che'n co'se' mtelá' Diox mèn naciòn Israel la's ya' mèn naciòn Egipt más tiemp co' nde teele' ndri'th. <sup>42</sup> Co'se' mtaa Jesús si' fchop lín', ngua Chè ryop Mari con Jesús lni pasc ciuda Jerusalén xalque' nac costumbr co' ngure no mèn tiempa no co' nguled no mènna tiempa. <sup>43</sup> Co'se' ngolo mblyuz huiz lnia, mbii Chè ryop Mari ciuda Jerusalén. Per ne'nda'de Chè ryop Mari cuent le' Jesús mbyan' le'n ciuda Jerusalén. <sup>44</sup> Mbli Chè ryop Mari xtùuz peser làth rye mèn co' ngua lnia ndye'th Jesús. Pues mdoo Chè ryop Mari ned thib huiz. Syare', mcua'n Chè ryop Mari Jesús làth rye mèn guliz Chè no Mari no làth rye mèn co' ndlibe' Chè no Mari. <sup>45</sup> Co'se' ñee Chè ryop Mari ne'yilode syal Jesús làth rye mènna, mbere Chè ryop Mari. Mquée Chè ryop Mari par ciuda Jerusalén tedib vez par cua'n Chè ryop Mari Jesús tya.

<sup>46</sup> Axta ngolo son huiz, syare' mbli Chè ryop Mari gan mzyal Jesús. Ndub Jesús làth mèn co' ngòc maistr che'n ley co' mxo'f Moisés loo mènna le'n templ. Ndub yòn Jesús di's co' ndyoodi's mènna no le'le' mnibdi's Jesús di's cón che'n di's co' ndyoodi's mèn loo mènna. <sup>47</sup> Co'se' ndxòn rye mèn co' nac maistra di's co' ndyoodi's Jesús, ante ngüi' mènna no ante ñaa mènna xá mod susque' ndxác Jesús no xá mod susque' ndxác Jesús ncàb ndac Jesús loo mènna. <sup>48</sup> Co'se' mzyal Chè ryop Mari Jesús, ndub Jesús le'n templ. Ale mbyu' mbyàl Chè ryop Mari. Ndxab Mari loo Jesús:

—Xgan', ¿chonon tatua' mbli nol nu', à'? Daa no xudl anze'f mdyóo nu' máal. No ale ngue tee cua'n nu' lùu.

<sup>49</sup> Sya, mcàb Jesús loo Chè no loo Mari. Ndxab Jesús:

—¿Chonon ngue tee cua'n gu' daa, à'? ¿Ché' inonte gu' le' daa naquinque' xo'f zin' zin' loo con' co' nac cón che'n xudpe'en, cà'?

<sup>50</sup> Per ale ndxe'leque', ne'nda'de Chè ryop Mari cuent no indxònte Chè ryop Mari cón nee di's co' ndxab Jesús.

<sup>51</sup> Ngoloa, ndye'th no Chè no Mari Jesús par yèez Nazaret. Le' Jesús na, toloque' mdubdi's loo Chè ryop Mari. Le' di's co' ndxab Jesús loo Maria na, ante le'n lezo' Mari nanee Mari cón che'n di'sa. Yende chó loo mèn nda' Mari cuent cón che'n di'sa. Ante Mari ndyóo cón che'n di'sa. <sup>52</sup> Látha, sate más ndoo roo mbed no ndoo xèn mbed. No sate más ndye'th xtùuz mbed yéc mbed. No sate más non mèn no nanee mèn le' mbed nac thib mbed ndac loo Diox no loo mèn por cón che'n con' ndac co' mtlo ndli mbed.

### 3

*Juàn Bautist mtlo mbllu' loo mèn cón che'n di's ndac co'te' nagán.*

*(Mt. 3.1-12; Mr. 1.1-8; Jn. 1.19-28)*

<sup>1</sup> Co'se' ngòc lín' lín' si'n, lín'a o tiempa mdub mnibe' thib mbi' co' ngòc rey loo mèn. Mnibe' mbi'a loo mèn casque' dib athu loo izlyo' tiempa. Mbi'a ngro' lèe Tiber. Leque lín'a ngòc Pons Pilat gobernador loo mèn co' ngòc mèn yèezya' che'n làaz mèn jude. Le' Herod na, ngòc gobernador loo mèn yèezya' che'n làaz mèn galile. Le' Lip hues Herod na, ngòc gobernador loo mèn yèezya' che'n làaz mèn iture. No ngòc Lip gobernador loo mèn yèezya' che'n làaz mèn traconit. Le' Liseni na, ngòc gobernador loo mèn yèezya' che'n làaz mèn abilini. <sup>2</sup> Leque tiempa, ngòc Anás no Caifás nguley' roo no nguley' xèn loo mèn nación Israel. Leque le'n tiempa, Diox mbllu' loo Juàn xgan' Zacari co'te' nagán xá mod que tee xo'f zin' Juàn zin' co' nac rsin' Diox loo mèn. <sup>3</sup> Ngua riid Juàn huax lugar co'te' nziri' mèn gax ro yó'be' Jordán. Mbez Juàn loo mèn:

—Gulàa yéc gu' no gulàa lezo' gu' par tataa mod se' gu' mod co' ndxàp gu' loo Diox par tataa mod gac tyon' xtol gu' no yiloa lin bautizar gu'. <sup>4</sup> Ngòcque' con'a tataa xalque' mqe' Sayi co' mde'th di's co' ndxab Diox ye's loo libr co' nac xti's Diox. Sayi ndxab:

Mbyèn thib di's che'n thib mbi' co' mbez yèe cabii co'te' nagán co'se' ngo mbi' yalbàn. Mbez mbi': Bli nab gu' gu' par tyubdi's gu' loo Tad Diox gu' tac Tad Diox gu' yi'th ñibe' loo gu'.

<sup>5</sup> Bli gu' par gac loo gu' loo ryethe mod ye'rsin' co' ndxàp gu' xal ndli mèn co'se' nsè mèn thib ftee, no xal ndli lal mèn thib yii no thib den, no xal ntelì mèn thib ned co' nac ned narec, no xal ndli mèn co'se' ndli lal mèn thib ned co' mtelau nít yòo par tataa mod gac nab gu' co'se' yi'th ñibe' Tad Diox gu' loo gu'.

<sup>6</sup> No gaca le' ryete mèn gòn cón che'n xá mod tí' no làa Diox mèn loo con' ryes.

<sup>7</sup> Co'se' ndryo' mèn liz mèn no làaz mèn par nde mèn loo Juàn par li Juàn bautizar mèn, mbez Juàn loo mèn:

—¡Aa mèn ye'rsin'túb! Susque' nayi' gu' xal mbel' co' lèe huid. ¿Chó mèn ngòc mèn co' mda' cuent loo gu' par yi'th gu' loon par lyá' gu' la's ya' Diox co'se' gac tiemp tetii Diox gu', à'? <sup>8</sup> Nabe'ste fque tee ban lì gu' no gòc gu' mèn ndac par lu' gu' gu' loo mèn le' gu', lícque', mzye' mod co' nac gu' no co' ndxàp gu' loo Diox. No ne'gabte gu' loo xtàa gu': Abraham ngòc xudgool na'. Na nii loo gu': Axta loo chol quèe co' ngüi' gu' ba', Diox ndxácque' par li Diox le' quèe ba' gac xin' Abraham. No gacque' quèe ba' xin' Abraham. <sup>9</sup> Ndxàcla loo gu' nalle'que' nde zin' gaxle' tiemp co'se' tlo gac tub rez Diox cón che'n gu' par tetii Diox gu' xal co'se' ntlo mèn, ngue cho' mèn thib xan' yaa xlè co' inda'de xlè ndac. Yaa xlèa cho'. No tec mèn yaa xlèa loo quì.

<sup>10</sup> Sya, mnibdi's mèn loo Juàn. Ndxab mèn:

—¿Cón ndxàal li nu' loo cón che'n Diox nalle', sya?

<sup>11</sup> Juàn mcàb loo mèn. Ndxab Juàn:

—Gu' co' ngue no chop camis, ndxàal ta' gu' thib camis càa mèn co' ingue node nec thib camis par goc mèn. Le' gu' co' ngue no xít gu' no lua' gu' na, ndxàal ta' gu' thib ro xít gu' no lua' gu' par hua mèn co' ingue node con' hua mèn.

<sup>12</sup> Làth xtau'a, mbi'th plá mèn co' ndli cobrar cón che'n contribución loo Juàn par li Juàn bautizar mènà. Mènà mnibdi's loo Juàn. Ndxab mènà:

—Maistr, ¿nu', à'? ¿Con ndxàal li nu'?

<sup>13</sup> Juàn ndxab loo mènà:

—Ne'lide gu' cobrar masre' loo mèn cón che'n contribución loo co' ñibe' ley loo gu'.

<sup>14</sup> Mnibdi's plá solndad loo Juàn, ne. Ndxab solndad:

—¿Nu', a'? ¿Cón ndxàal li nu'?

Juàn mcàb. Ndxab Juàn loo solndada:

—Ne'techede gu' nec thib con' loo nec thib mèn. Ne' ne' quexù' que' fals gu' mèn loo con' co' tarte li mèn. Blec lezo' gu' loo tmi co' ndli gu' gan thib huiz zin'.

<sup>15</sup> Per ryete mèn co' nzi beda, imbe see teede xtùuz mènà no lezo' mènà. Ndli mènà xtùuz cón che'n Juàn: Ne'stolque' Juàn nac Crist. <sup>16</sup> Juàn mcàb loo mènà. Ndxab Juàn:

—Lìcpe' ba'i, daa ndli bautizar gu' con nít. Per axta nare' yi'th thib mbi' co' lipe' par tlo ñibe' Xpii Natú' loo gu'. No tub rez mbi' cón che'n con' ye'rsin' co' ndli gu' par tetii mbi' gu'. Mbi'a ndxàp más con' roo no con' xèn la's nii mbi' no la's ya' mbi' leque daa. Ne' ne' indxàal daa par xaquen bò co' ndub dó' yilid nii mbi' par làan yilid nii mbi'. <sup>17</sup> Nde niin thib con' loo gu': Nde zin' gaxle' huiz no nde zin' gaxle' ze co'se' li Diox loo gu' xal ndli mèn co' nguis nzob triu. Nguis mèn nzob triu no ngo' xà' mèn nzob triu loo yix triu. Ndxeloa, ngosua' mèn nzob triu. Le' yix triu na, tec mèn. Tataa li no Diox mèn. Le' mèn co' ngòc mèn nalì no mèn nambii loo Diox na, Diox hue' mènà loo bé'. Le' mèn co' ngòc mèn naad no mèn nguud loo cón che'n Diox na, Diox ñibe' par ya mènà le'n ye'rbiil co'te' ne'yu'de quii no bèel thidtene.

<sup>18</sup> Taandxè' mod ngo Juàn yalbàn. No tolo mco'x Juàn thib mod no tedib mod co'se' mde'th Juàn no mblo Juàn yalbàn loo mèn cón che'n di's ndac. <sup>19</sup> Más de cona, ale mbyoo Juàn Herod co' ngòc gobernador co' ngòc hues Lip tac Herod mque no Herodi co' ngòc sa'l Lip xal xa'got Herod. Mbyoo Juàn Herod por mbli Herod taamas con' ye'rsin', ne. <sup>20</sup> Per lugar de gòn Herod di's no ten' Herod di's co' ndxàb Juàn cón che'n Herod, ale mbli Herod tedib con' ye'rsin'. Mbli Herod mandad ya que' solndad Juàn lezi'f.

*Juàn Bautist mbli bautizar Tad Jesús.*

*(Mt. 3.13-17; Mr. 1.9-11)*

<sup>21</sup> Ndoore' que' solndad Juàn Bautist lezi'f, ngòc thib con'. Juàn mbli bautizar huax mèn. Látha, mbli Juàn bautizar Jesús, ne. Ngolo ngòc bautizar Jesús, ngurez Jesús Diox. Látha, chàa, mxyal' loo bé'. <sup>22</sup> Ngulàa Xpii Natú' loo bé'. Hora, gunaa Xpii Natú'a xal thib palomxtil' co'se' ngulàa Xpii Natú' loo Jesús. Texal ngulàa Xpii Natú' loo Jesús, mbyèn thib di's loo bé' co' mbez:

—Lùu nac xgan' daa co' anze'f lezon no ngudloon. Anze'f ndxòo lezon ñèen cón che'nl, ey.

*Trè' ndlu' cón che'n rye mèn co' ngòc bin che'n xudgool che'n Tad Jesús.*

*(Mt. 1.1-17)*

<sup>23</sup> Co'se' mtlo Jesús, mxo'f zin' Jesús zin' co' ngòc rsin' Jesús xal mnibe' Diox loo Jesús par li Jesús, nzo Jesús gal psi' lín'. Ngòc Jesús xgan' Chè xal mxyo'f di's co' ngola's mèn cón che'n Chè tiempa. Le' Chè na, ngòc xgan' thib mbi' co' ngro' lèe Elí. <sup>24</sup> Le' Elí na, ngòc xgan' Matat. Le' Matat na, ngòc xgan' Leví. Le' Leví na, ngòc xgan' Melqui. Le' Melqui na, ngòc xgan' Jan. Le' Jan na, ngòc xgan' tedib mbi' co' ngro' lèe Chè. <sup>25</sup> Le' Chèa na, ngòc xgan' Matati. Le' Matati na, ngòc xgan' Amós. Le' Amós na, ngòc xgan' Nahum. Le' Nahum na, ngòc xgan' Esli. Le' Esli na, ngòc xgan' Nagai. <sup>26</sup> Le' Nagai na, ngòc xgan' Maat. Le' Maat na, ngòc xgan' Matati. Le' Matati na, ngòc xgan' Semei. Le' Semei na, ngòc xgan' tedib mbi' co' ngro' lèe Chè. Le' Chèa na, ngòc xgan' Judá. <sup>27</sup> Le' Judá na, ngòc xgan' Joan. Le' Joan na, ngòc xgan' Res. Le' Res na, ngòc xgan' Zorobabel. Le' Zorobabel na, ngòc xgan' Salatiel. Le' Salatiel na, ngòc xgan' Ner. <sup>28</sup> Le' Ner na, ngòc xgan' Melqui. Le' Melqui na, ngòc xgan' Adi. Le' Adi na, ngòc xgan' Cosam. Le' Cosam na, ngòc xgan' Elmodam. Le' Elmodam na, ngòc xgan' Er. <sup>29</sup> Le' Er na, ngòc xgan' Josué. Le'

Josué na, ngòc xgan' Eliezer. Le' Eliezer na, ngòc xgan' Jorim. Le' Jorim na, ngòc xgan' tedib mbi' co' ngro' lèe Matat. <sup>30</sup> Le' Matata na, ngòc xgan' tedib mbi' co' ngro' lèe Leví. Le' Levía na, ngòc xgan' Simeón. Le' Simeón na, ngòc xgan' tedib mbi' co' ngro' lèe Judá. Le' Judaa na, ngòc xgan' tedib mbi' co' ngro' lèe Chè. Le' Chèa na, ngòc xgan' Jonán. Le' Jonán na, ngòc xgan' Eliaquim. <sup>31</sup> Le' Eliaquim na, ngòc xgan' Mele. Le' Mele na, ngòc xgan' Mainán. Le' Mainán na, ngòc xgan' tedib mbi' co' ngro' lèe Matat. Le' Matata na, ngòc xgan' Natán. <sup>32</sup> Le' Natán na, ngòc xgan' David. Le' David na, ngòc xgan' Isaí. Le' Isaí na, ngòc xgan' Obed. Le' Obed na, ngòc xgan' Booz. Le' Booz na, ngòc xgan' Salmón. Le' Salmón na, ngòc xgan' Naasón. <sup>33</sup> Le' Naasón na, ngòc xgan' Aminadab. Le' Abinadab na, ngòc xgan' Aran. Le' Aran na, ngòc xgan' Esrom. Le' Esrom na, ngòc xgan' Far. Le' Far na, ngòc xgan' tedib mbi' co' ngro' lèe Judá. <sup>34</sup> Le' Judaa na, ngòc xgan' Cob. Le' Cob na, ngòc xgan' Isaac. Le' Isaac na, ngòc xgan' Abraham. Le' Abraham na, ngòc xgan' Tar. Le' Tar na, ngòc xgan' Nacor. <sup>35</sup> Le' Nacor na, ngòc xgan' Serug. Le' Serug na, ngòc xgan' Rag. Le' Rag na, ngòc xgan' Peleg. Le' Peleg na, ngòc xgan' Heber. Le' Heber na, ngòc xgan' Sal. <sup>36</sup> Le' Sal na, ngòc xgan' Cainán. Le' Cainán na, ngòc xgan' Arfax. Le' Arfax na, ngòc xgan' Sem. Le' Sem na, ngòc xgan' Noé. Le' Noé na, ngòc xgan' Lamec. <sup>37</sup> Le' Lamec na, ngòc xgan' Matusalén. Le' Matusalén na, ngòc xgan' Enoc. Le' Enoc na, ngòc xgan' Jared. Le' Jared na, ngòc xgan' Mahalaleel. Le' Mahalaleel na, ngòc xgan' tedib mbi' co' ngro' lèe Cainán. <sup>38</sup> Le' Cainana na, ngòc xgan' Enós. Le' Enós na, ngòc xgan' Set. Le' Set na, ngòc xgan' Adán. Adana ngòc ner mbi' co' nerleque' mtoxqua' Diox. Adana ngòc nerleque' mbi' co' ngòo loo izlyo' co' mblec biz no bin loo izlyo'.

## 4

*Mebizya mblobya' Tad Jesús no mbli Mebizya preb loo Tad Jesús par ñee Mebizya ñeene' ché' tòn Tad Jesús ro Mebizya.*

*(Mt. 4.1-11; Mr. 1.12-13)*

<sup>1</sup> Ngolo mbli Juàn Bautist bautizar Jesús, mbere Jesús, mbii Jesús ro yó'be' Jordán. Làth xtau'a, Xpii Natú' mnibe' loo Jesús, nda Jesús thib lugar co'te' nagán. <sup>2</sup> Ngo Jesús co'te' nagána cho' huiz. Le'n huiza, ngua Mebizya co'te' ngo Jesús par mblobya' Mebizya Jesús. No mbli Mebizya preb loo Jesús par ñee Mebizya ñeene' ché' tli Jesús con' co' gab Mebizya loo Jesús. Le'n huiza ne'nghuade Jesús thidtene. Ngolo nguri'th rye huiza, anze'f mblyan' Jesús. <sup>3</sup> Sya, ndxab Mebizya loo Jesús:

—Chele' lùu, licque', nac xgan'pe' Diox, bli le' quèe ndxè' gác pan par hual.

<sup>4</sup> Jesús mcàb loo Mebizya. Ndxab Jesús:

—Loo libr co' nac xti's Diox ndlu': Iante con xít mèn no lua' mèn ban mèn. Ndxè'leque', mèn ban por cón che'n ryete di's co' nac xti's Tad Diox co' mbez Tad Diox loo mèn.

<sup>5</sup> Ngoloa, mbe' Mebizya Jesús loo thib yii roo. No mbli Mebizya setilte mbyú' ryete nación co' nziri' dib athu loo izlyo' loo Jesús. <sup>6</sup> Sya, ndxab Mebizya loo Jesús:

—Daa ta lugar lool par ñibe'l loo rye nación ba'. No tan lugar lool gác ryethe con' roo no con' xèn che'n rye nación ba' che'npe' lùu tac che'npe'en nac rye nación ba' no ndana loo chol mèn co' ndlyazen tana. <sup>7</sup> Chele' lùu tyub xib loon no cò'l yécl loon, ryethe con' ba' gác che'nl.

<sup>8</sup> Per ale ndxe'leque', mcàb Jesús loo Mebizya. Ndxab Jesús:

—Byàa, Mebizya. Biiche loon. Loo libr co' nac xti's Diox ndlu': Diox ñibe' loo mèn. No ante loo Dioxpe' tyub xib mèn no cò' mèn yéc mèn loo Dioxpe' no maste. No ante loo Dioxpe' li mèn sirv.

<sup>9</sup> Ngoloa, mbe' Mebizya Jesús le'n ciuda Jerusalén. Mtequée Mebizya Jesús yéc templ. Ndxab Mebizya loo Jesús:

—Chele' lùu, licque', nac xgan'pe' Diox, leque lùu bla' par gác chel loo yòo. <sup>10</sup> Tac loo libr co' nac xti's Diox ndub di's co' mbez:

Diox ñibe' loo angl che'n Diox par quenap angl lùu.



<sup>11</sup> Le' angl te'f ya' angl par lyàal ya' angl par quenap angl lùu par ne'huí'de niil loo quèe co'te' gàb chel.

<sup>12</sup> Jesús mcàb loo Mebizya. Ndxab Jesús:

—Loo libr co' nac xti's Diox ndlu': Ne'aselidel par lil preb Tad Diox, co' nac Tad Diox lùu, par ñeel ñeene' ché' tli Tad Diox lùu con' ndly'a'sl.

<sup>13</sup> Co'se' ñee Mebizya ya yende mod li Mebizya gan loo Jesús par li Jesús con' ndly'a's Mebizya co'se' mblobya' Mebizya Jesús no co'se' mbli Mebizya preb loo Jesús par ñee Mebizya ché' tli Jesús con' ndly'a's Mebizya, mxen Mebizya ned. Ndyàa Mebizya. Mblá' Mebizya Jesús ndxep tiemp.

*Tad Jesús mtlo mxo'f zin' cón che'n Tad Jesús le'n yèezya' che'n làaz mèn galile.*

*(Mt. 4.12-17; Mr. 1.14-15)*

<sup>14</sup> Le' Jesús na, mbere ndyàa par ned le'n yèezya' che'n làaz mèn galile. No Xpii Natú' che'n Diox thidteneque' ngo loo Jesús par li Xpii Natú' con' roo no con' xèn por cón che'n Jesús. Por cona, mbyath no mbyèn cón che'n Jesús le'n rye yèezya' che'n làaz mèn galile.

<sup>15</sup> Mque tee lu' Jesús mèn co'te' ndub sinagog mèn ned ngua que tee Jesús. Ryete mèna sate más ndli mxyo'f lèe mxyo'f xti's Jesús. No ndxàc con' guryath no con' guryèn cón che'n Jesús làth mèna.

*Tad Jesús ngo ban le'n yèez Nazaret.*

*(Mt. 13.53-58; Mr. 6.1-6)*

<sup>16</sup> Ngoloa, ngro' Jesús par ned làaz mèn galile. Ndyàa Jesús par yèez Nazaret co'te' mbryoo mxyèn Jesús. Co'se' ngòc huiz sabd co' ndli mèn descans tiempa, Jesús ngòo le'n sinagog xalque' ngòc mod che'n Jesús par ndlab Jesús libr co' nac xti's Diox. <sup>17</sup> Le' sya, mbi' co' ndyoo ner no co' ndyoo naa loo mèn le'n sinagog, mbi'a mda' libr co' mque' Sayi co' mde'th di's co' ndxab Diox ye's par lab Jesús ye'sa. Mxen Jesús libr. Co'se' mxal' Jesús loo libra, mzyal Jesús di's co' ndub loo libr co' mbez taandxè':

<sup>18</sup> Xpii Natú' che'n Tad Diox ngue ñibe' loon. Diox mdoo daa loo mèn par gon yalbàn no tethen cón che'n di's ndac co' nac cón che'n Diox loo mèn prob. No mtel' Diox daa par tegánen lezo' mèn co' nxi tín' lezo'. No mtel' Diox daa par telá'en mèn co' nac xal pres loo cón che'n Mebizya, no par tuben xniì yéc mèn no lezo' mèn loo cón che'n Diox, mèn co' nau' yéc no mèn co' nau' loo loo cón che'n Diox. No mdoo Diox daa par telá'en mèn co' ndxezi'f no mèn co' ndxega's loo ryethe yaltii co' nac cón che'n Mebizya.

<sup>19</sup> Mdoo Diox daa loo mèn par tethen no gon yalbàn co' nac xti's Diox loo mèn le'n tiemp ndxè' co' nac tiemp ndac co' nac co' guneepe' lezo' Diox par tlo mèn, lyá' mèn loo ryethe con' ryes.

<sup>20</sup> Ngolo mblab Jesús di'sa, mtau' Jesús loo libr. Mda' Jesús libr loo thib mbi' co' nquenap sinagog. Ngoloa, mdub Jesús. Látha, xèe ngüi' mèn loo Jesús ñeene' cón gab Jesús loo mèna. <sup>21</sup> Sya, mtlo Jesús, mdoodi's Jesús. Ndxab Jesús loo mèna:

—Nalzepé' ngòcque' no mdyaaque' no mdyubque' di's co' ndub loo libr ba' co' ngolo mbìn gu'.

<sup>22</sup> Látha, rye mèna huenque' mdoodi's cón che'n Jesús. No ante ngüi' mèna no ante ñaa mèna cón che'n di's co' nabe's ndyoodi's Jesús loo mèna. No ale mnibdi's mèna loo xtàa mèna. Mbez mèna:

—¿Xá nee gu'? ¿Ché' inacte mbi' ba' xgan' Chè, cà'?

<sup>23</sup> Jesús ndxab loo mèna:

—Na tolo nii loo gu': Lìcpe' ba'i, daa ngobe' gu' ñee loon xal ndxab di's co' mbez: Doctor, leque lùu fteyacl. No ñee gu' loon: Con' co' mbìn nu' cón che'n con' co' mblil loo mèn yèez Capernaum, bli con'a loo mèn gulàazpe'l, ne.

<sup>24</sup> Tolo ndxab Jesús loo mèna:

—Lìcpe' ba'i, na nii loo gu': Nec thib mèn gulàaz che'n thib mbi' co' nde'th di's co' ndxab Diox, ne'ñèe loo ndacte mèn gulàazpe' mèna loo prob mèna. <sup>25</sup> Daa nii tedib con'

co' nac lìcpe' loo gu', ne: Huax xa'got viud ngo ban trè' làth mèn naciòn Israel le'n tiemp co'se' mde'th Lii di's co' ndxab Diox co'se' ngòc tiemp co' ne'nglàade yuu le'n son lín' narol loo mènà. Ngulàa thib huin tín' loo mènà tiempa, ne. <sup>26</sup> Per Diox ne'ntel'te Lii loo nec thib mèngot viud co' ngo ban làth mènà tiempa. Ndxè'leque', Diox mtel' Lii loo thib xa'got viud co' ngo ban le'n thib yèez tith co' ngro' lèe Sarept co' ngure gaxte ciuda Sidón. <sup>27</sup> Nonque' gu', ne, ngo huax mèn co' mque no thib yíiz co' mteya's no co' mteyèe yid lad mèn le'n naciòn Israel, co' ngòc tiemp co'se' mde'th Elise di's co' ndxab Diox. Per ne'ngyacte nec thib mènà por cón che'n Elise tiempa.

<sup>28</sup> Co'se' ngolo mbìn mèn co' ngo le'n sinagog di's co' ndxab Jesús, sya, ryete mènà anze'f ngocloo gunèe Jesús. <sup>29</sup> Ngo too nde'f mènà. No nguree mcàa mènà Jesús. Mblo' mènà Jesús thib lad ro ciuda. Ale mbe' mènà Jesús loo thib yii co'te' nziri' thib yèez. Loo yíia ngue thib quèe rhue. Tya mbe' mènà Jesús par tùub mènà Jesús par xàn'. <sup>30</sup> Per co'se' mzin no mènà Jesús ro quèe rhue'a, mbli Jesús ale xèe ngure mènà. Látha, mbli Jesús thib con' loo mènà. Xex xex nguri'th nde'f Jesús xi'th mènà, ndyàa Jesús.

*Trè' ndlu' cón che'n thib mbi'. Le' thib xpíi ye'rsin' ngòo loo mbi'a.*

*(Mr. 1.21-28)*

<sup>31</sup> Ngoloa, mxen Jesús ned. Nda Jesús par ned ciuda Capernaum co' nac thib ciuda che'n làaz mèn galile. Tya mbli' Jesús mèn atate huiz sabd co' ngòc huiz descans tiempa. <sup>32</sup> Per co'se' ndxòn mèn di's co' ndyoodi's Jesús, mènà ante mbui' no ante gunaa mènà xal ngue lu' Jesús mèn tac ndyoodi's Jesús xalque' ñibe' Diox.

<sup>33</sup> Le'xque' huiza, ngo thib mbi' le'n sinagog mènà. Mbi'a mque no thib xpíi ye'rsin'. Mbli xpíia par cabii ndxab mbi' loo Jesús:

<sup>34</sup> —Blá' U' nu', Jesús, U' co' nac mèn yèez Nazaret. ¿Chonon ndxòo U' xi'th nu', à? ¿Ché' nde U' par telux U' nu', cà? Daa ndlibe' U', Jesús. Daa naneeque' le' U' nac mbi' natú' che'npe' Diox.

<sup>35</sup> Jesús mbyoo xpíi ye'rsin'a. Ndxab Jesús loo xpíia:

—¿Quex! Ftau' ro'l. Gro' loo mbi' ba'.

Sya, mbli xpíia mquée mbii yéc mbi'. Ale ngulàa mbi' loo yòo loo ryete mèn co' ngo le'n sinagoga. Ngro xpíi ye'rsin'a loo mbi'. Ale yende chó yalquìi ngòc loo mbi'. <sup>36</sup> Ryete mènà mzyeb co'se' gunèe mènà con' co' ngòc loo mbi'a. No mbez mènà loo thib xtàa mènà no loo tedib xtàa mènà:

—Susque' ndxác mbi' ba'. Ñibe' mbi' loo chol con'. No axta xpíi ye'rsin' che'n meexù' ndxòn di's co' mbez mbi'. No ndryo xpíi ye'rsin' che'n meexù' loo mèn ante por di's co' mbez mbi' no maste.

<sup>37</sup> No ale ndyoodi's rye mèn yèezya' co' nac che'n làaz mèn ciuda Capernaum co' nziri' gax loo ciuda Capernaum cón che'n Jesús.

*Tad Jesús mteyac xna'zap Mon Pedr.*

*(Mt. 8.14-15; Mr. 1.29-31)*

<sup>38</sup> Texal ngro' Jesús le'n sinagog, ngòo Jesús liz Mon. Le'pe' nax xna'zap Mon loo xlé'. Nalyat ndxab mèn guliza loo Jesús:

—Tad, fteyac U' mbíiz ndxè'.

<sup>39</sup> Sya, mbii gax Jesús co'te' nax xna'zap Mon. Mteyac Jesús guna'. Leque hora, ngro xlé' guna'. No ngo che guna'. Mbli guna' cas mènà.

*Tad Jesús mteyac huax mèn yíiz.*

*(Mt. 8.16-17; Mr. 1.32-34)*

<sup>40</sup> Co'se' nde bix huiz huiza, nde no mèn mèn yíiz co' ndyac len chol yíiz loo Jesús par teyac Jesús mènà. Ante mxo'f Jesús ya' Jesús lad rye mèn yíiza, mteyac Jesús mèn yíiza. <sup>41</sup> Làth rye mèn yíiz co' mbi'th no mèn loo Jesús ngòo mèn co' mque no xpíi che'n meexù', ne. Co'se' mblo' Jesús xpíi che'n meexù' loo mènà, mbli xpíi meexù'a par mbez mènà cabii loo Jesús:

—U' nac xgan'pe' Diox.

Jesús mbyoo xpíi meexù'a. Ne'nda'de Jesús lugar tolo ngnii xpíia tac xpíi meexù' co' ngo loo mènà nonque' no naneeque' le' Jesús nacque' Crist.

*Tad Jesús ngo yalbàn cón che'n di's ndac loo mèn le'n rye yèezya' che'n làaz mèn galile.*  
(Mr. 1.35-39)

<sup>42</sup> Co'se' ngo nìi izlyo' tedib huiz co' nde nquea, Jesús ngro' thìb lad ro ciuda co'te' yende chó mèn nzo no co'te' ne'ñeede mèn Jesús. Per mèn co' nziri'a mcua'nque' Jesús. Ngua mènà co'te' nzo Jesús. Mcua'n mènà mod par telen' mènà Jesús par ne'biide Jesús loo mènà. <sup>43</sup> Jesús ndxab loo mènà:

—Bla' gu' biin, ey. Tac daa naquinque' ga lo yalbàn loo mèn le'n taamas yèez, ne, cón che'n xá mod ndly'a's Diox ñibe'pe' Diox loo mèn. Tac por cona mtel' Diox daa loo mèn loo izlyo' ndxè'.

<sup>44</sup> Cona, toloque' mque tee go Jesús yalbàn loo mèn le'n rye yèezya' co'te' ndub sinagog che'n mèn co' nac mèn yèezya' che'n làaz mèn galile.

## 5

*Tad Jesús mbli thìb yalguzye' par ngogaa huax mbèel le'n yex che'n Pedr.*  
(Mt. 4.18-22; Mr. 1.16-20)

<sup>1</sup> Thìb vez ngòc thìb con'. Jesús ngo gax ro thìb lagun co' lèe lagun che'n làaz mèn genesaret. Látha, anze'f thìb mènley' mqueltàa loo Jesús axta mdí' mènà Jesús. Anze'f thìb mèn mbly'a's ngòn di's ndac che'n Diox. <sup>2</sup> Jesús gunèe ndub chop yòoyaa loo laguna gaxte ro play. No gunèe Jesús yende chó mèn nzo loo yòoyaaa. Tac mènà ngro' loo yòoyaa par tech mènà yex mènà. Mènà ngòc mèn co' ndyen mbèel. <sup>3</sup> Le' sya, ngòc Jesús loo thìb yòoyaa. Yòoyaaa ngòc che'npe' Mon Pedr. Mna'b Jesús loo Mon Pedr tetee Mon Pedr yòoyaa taachu'te más par le'n lagun. Mtlo Jesús, mbli' Jesús mèn axta co'te' ndub yòoyaa loo lagun. Le' mènà na, ngure ro laguna. <sup>4</sup> Co'se' ngolo mdoodi's Jesús loo mèn co' mqueltàa, ndxab Jesús loo Mon Pedr:

—Ya' nda na', Mon. Ftetee yòoyaa. Nda na' co'te' más na's nzi nít par cobii gu' yex gu' le'n nít par yigaa mbèel le'n yex.

<sup>5</sup> Mon Pedr mcàb loo Jesús. Ndxab Mon Pedr:

—Maistr, dib xec yál' mque tee gobii nu' yex le'n nít. Per nec thìb mbèel ne'nglide nu' gan ngogaa. Per ya que ñibe'le' U' loon, nda lobiin yex le'n nít ñeene' ché' tagaa mbèel le'n yex.

<sup>6</sup> Co'se' mblobii Mon Pedr con myen' xtàa Mon Pedr yex le'n nít, axta mbryed yex tant thìb mbèel ngogaa le'n yex. <sup>7</sup> Sya, mbli Mon Pedr no xtàa Mon Pedr señ loo taamas mèn co' nac xtàa Mon Pedr co' nzo le'n tedib yòoyaa par yi'th lyath no myen' Mon Pedr. Sya, mtetee myen' yòoyaa myen' loo nít axta co'te' ndub yòoyaa Mon Pedr loo nít. Mblyath no myen' Mon Pedr con xtàa Mon Pedr. Msè myen'a ryop yòoyaa con anab mbèel axta yamerle' dyep yòoyaa le'n nít tant né' yòoyaa con anab mbèel. <sup>8</sup> Co'se' ñèe Mon Pedr ndxàc con'a, mdub xib Mon Pedr loo Jesús. Ndxab Mon Pedr loo Jesús:

—Tad, inzyalte daa ngue tee non U' tac daa nac thìb mbi' co' ndxàp xtol no co' ncu'a'n xquin. Más huen ya ne'tolode que tee non U', ndyaquen.

<sup>9</sup> Ante mbui' Mon Pedr con myen' co' ngòc xtàa Mon Pedr no ante gunaa Mon Pedr con myen' co' ngòc xtàa Mon Pedr por tant thìb mbèel co' ngogaa le'n yex. <sup>10</sup> Leque con' co' ngòc loo Pedr ngòc loo Cob no Juàn co' ngòc xgan' Zebede co' ngòc xtàa Mon Pedr. Per mden' lezo' Jesús con'a. Jesús ndxab loo Mon Pedr:

—Ne'zyebtel, Mon. Desde nalle' par delant, ñibe'en lool tatua' lil loo mèn par tyal mèn yòò mèn loo cón che'n Diox xalque' mblin ngogaa tant mbèel ba' le'n yex.

<sup>11</sup> Co'se' mzin no rye mènà yòoyaa ro yòò biz, taate mblá' Mon Pedr no Cob no Juàn yòoyaa nazál' mbèel yòoyaa. Mblá' Mon Pedr no Cob no Juàn zin'a, ne. Mdoo nque Pedr no Cob no Juàn xís Jesús.

*Tad Jesús mteyac thib mbi' co' mque no yíiz co' mteya's no co' mteyèè yid lad mbi'.*

*(Mt. 8.1-4; Mr. 1.40-45)*

<sup>12</sup> Láth ngo Jesús le'n thib yèez, mzin thib mbi' co' mque no thib yíiz co' nteya's no co' nteyèè yid lad mbi' loo Jesús. Co'se' gunèe mbi' Jesús, mdub xib mbi' loo Jesús no mcòò' mbi' yéc mbi' loo Jesús. Nalyat mde'f ro mbi' loo Jesús. Mna'b mbi' loo Jesús. Ndxab mbi':

—Tad, chele' U' ndlya's teyac U' daa, U' ndxác nteyac mèn. Fteyac U' daa, Tad.

<sup>13</sup> Sya, ante mxo'f Jesús ya' Jesús lad mbi' no ndxab Jesús loo mbi':

—Ndlyazen le' lùu yac.

Texal ngolo ndxab Jesús di'sa loo mbi', chàa, mbyac mbi'. Mbembii lad mbi'. Mbiiche yíiz co' mteya's no co' mteyèè yid lad mbi'. <sup>14</sup> Sya, mnibe' Jesús loo mbi'. Ndxab Jesús:

—Yende chó loo ta'l cuent cón che'n con' co' ngolo ngòc lool ba'. Ante huàa lu'l loo nguley' le'n templ. No sangta'l ofrend co' mnibe' Moisés loo mèn ta' mèn co'se' ndxelo ndxac mèn loo yíiz co' mxac lùu ba'. Tataa huàa li par non mèn no ta' mèn cuent le' lùu mbyacle'.

<sup>15</sup> Le' cón che'n Jesús na, sate más ndxath ndxèn no sate más mqueltàa mèn loo Jesús par gòn mèn di's ndac che'n Diox co' ndyoodi's Jesús no par teyac Jesús mèn loo chol yíiz co' mque no mèn. <sup>16</sup> Per ale ndxe'leque', ngro' Jesús thib lad làth mènà. Ngua rez Jesús Diox tya.

*Jesús mteyac thib mbi' co' mtequech mbii.*

*(Mt. 9.1-8; Mr. 2.1-12)*

<sup>17</sup> Ngòc thib con' thib huiz láth ngue lu' Jesús mèn liz thib mbi'. Xi'th mèn co' nziri'a nzi ndub ndxep mèn co' ngòc mèn xley' farise. No mdub ndxep mèn co' ngòc maistr co' ndlu' cón che'n ley co' mxo'f Moisés loo mèn nación Israel. Mèna ngro' le'n rye yèezya' che'n làaz mèn galile, no co' nac rye yèezya' che'n làaz mèn jude, no ngro' mèna ciuda Jerusalén. Látha, ndxác con' roo no con' xèn che'n Diox la's nii Jesús no la's ya' Jesús par ngue teyac Jesús mèn yíiz. <sup>18</sup> Látha, mzin ndxep mènbi'. Nde no mèna thib mbi' loo thib cami. Mbi' mque no mbii che'n yíiz co' ntequech mèn. Ale mtequech mbii mbi'. Mblya's mèna ale sangyòo no mèna mbi' le'n nyòo co'te' nzo Jesús par quix mèna mbi' loo Jesús.

<sup>19</sup> Per yende mod yòo no mèna mbi' yíiza loo Jesús le'n nyòo tant thib mènley' nziri' loo Jesús. Sya, mcua'n mèna mod. Mquéé no mèna mbi'a par yéc yòo. Ale mxal' mèna yéc yòo. No mcua'n mèna mod. Mtedó' mèna cami con dó' par làa mèna mbíiz nazál' cami mbíiz par le'n nyòo xi'th mèn loo Jesús. <sup>20</sup> Co'se' ñèe Jesús le' mèna ndxela'spe' no, licque', ndxàp mèna yalxla's loo Jesús, ante ndxab Jesús loo mbi' yíiza:

—Mbi', xtol lùu no xquin lùu mton'len.

<sup>21</sup> Sya, mèn co' ngòc maistr cón che'n ley co' mxo'f Moisés loo mèn no mèn xley' farise, mtlo mèna, mbli mèna xtùuz le'n lezo' mèna no ndxab mèna le'n lezo' mèna: ¿Chó mbi' ndli mbi' ba' cuent nac mbi'? Ale ndli mbi' ba' cuent nac mbi' Diox. Anze'f nazab nac co' ndli mbi' cuent nac mbi'. Non na' no nanee na' yende chó mèn izlyo' gác ton' xtol mèn no xquin mèn. Angoluxte Diox ndxác nton' xtol mèn no xquin mèn, ¿lé'?

<sup>22</sup> Per Jesús nonque' con' co' ngue li mèna xtùuz. Ndxab Jesús loo mèna:

—¿Chonon tatua' ndli gu' xtùuz le'n lezo' gu', à'? ¿Xá nee gu'? <sup>23</sup> Ñibdizen thib con' loo gu': ¿Cón nac co' más inagànte par daa par gaben loo mbi' ba'? ¿Ché' más inagànte gaben: Xtol lùu mton'len o ché' más inagànte gaben: Goo che no byàa lizl, cà'? Per ale yende chó mèn mcàb loo Jesús. <sup>24</sup> Tolo ndxab Jesús loo mèna:

—Daa ndxab loo mbi' ba' mton'len xtol mbi' par ñee gu' no yila's gu' le' daa, co' mbal yáal loo izlyo' ndxè' xalque' ndxáal chol mèn loo izlyo', ndxàpen con' la's niin no la's yan loo izlyo' ndxè' par ton'en xtol mèn.

Sya, alanleque' ndxab Jesús loo mbi' yíiz co' mtequech mbiia loo rye mèna, loo lùu ngue niin:

—Goo too, fthùuz dáal, byàa lizl.

<sup>25</sup> Leque hora, chàa, ngo too nde'f mbi' co' mtequech mbiia loo rye mèn'léy' co' nziri'. Ale mthùuz mbi' dáa mbi' co' ngo'th mbi'. No ale mxen mbi' ned, ndyàa mbi'. No mbez mbi':

—Ay, Dio's. Con' roo con' xèn mbli Diox loon, yey. Ale mteyac Diox daa.

<sup>26</sup> Ryete mèn co' nziri'a, ante mbui' mènà no ante gunaa mènà. Mbez mènà:

—Con' roo no con' xèn nac co' ndli Diox, cara.

No por gunèe mènà le' mbi'a mbyacle', anze'f mzyeb mènà no ndxab mènà loo xtàa mènà:

—Nalze, por derech, mbui' na' ngòc thib yalguzye' roo no thib yalguzye' xèn loo na' no loo mbi' co' mbyaca, ¿lé'?

*Tad Jesús ndxab loo thib mbi' co' lèe Leví: —Ftoo nque xísen. Ya' nda na', ey.*

*(Mt. 9.9-13; Mr. 2.13-17)*

<sup>27</sup> Ngolo ngòc con' co' ngòc loo mbi' co' mtequech mbiia, ngro' Jesús liz mbi' co'te' ngòc con'a. Láth nda riid Jesús par neda, gunèe Jesús mdub thib mbi' co' ngro' lèe Leví. Ndub li mbi' cobrar cón che'n contribución. Ndxab Jesús loo mbi':

—Ftoo nque xísen. Ya' nda na'.

<sup>28</sup> Texal mbìn mbi' di's co' ndxab Jesús, ngo too mbi'. Mblá' mbi' rye con' ngue no mbi' tya. Nda no mbi' Jesús.

<sup>29</sup> Ngolo nguri'th plá huiz, mbli Leví mandad ngòc thib yalhua liz Leví par hua no Leví Jesús. Nde nxon', mqueltàa huax mèn co' ndli cobrar cón che'n contribución no taamas mèn liz Leví par thidte hua no mènà Leví con Jesús loo mes. <sup>30</sup> Mèn co' ngòc mèn xley' farise no mèn co' ngòc maistr co' mbli' cón che'n ley co' mxo'f Moisés loo mèn, mènà nziri' loo lue' no ro ryo' liz Leví. Nzi la's mènà xal ngue yuhua no Jesús Leví no taamas mèn co' mqueltàaa. Sya, mtlo mènà, xexte ngue bez mènà loo myen' xin' mté'th Jesús. Ndxab mènà:

—¿Chonon nzi yuhua no gu' mèn co' ndli cobrar cón che'n contribución no con mèn co' ndxàp xtol, à'?

<sup>31</sup> Per lugar de càb myen' xin' mté'th Jesús loo mènà, ale yub Jesús mcàb loo mènà. Ndxab Jesús loo mènà:

—Hui' gu' nexa. Daa tetac thib di's loo gu'. Le' mèn co' huen nzo lezo' no indyac yíizte mèn, mènà ndyac inquinte teyac doctor mènà. Per mèn co' ndyac yíiz, mènà naquinque' teyac doctor. <sup>32</sup> Daa ne'ngalte par bezen mèn co' ndyac nac mèn ndac. Ndxé'leque', daa ndal par bezen mèn co' non le' mènà ndxàp xtol par lyàa yéc mènà no lyàa lezo' mènà no par zye' mod co' ndxàp mènà loo cón che'n Diox.

*Mèn xley' farise no mèn co' ngòc maistr co' ndlu' cón che'n ley co' mxo'f Moisés loo mèn tiempa, mènà mnibdi's loo Tad Jesús: ¿Chonon imbe xlatte myen' xin' mté'th lùu, à'?*

*(Mt. 9.14-17; Mr. 2.18-22)*

<sup>33</sup> Sya, mnibdi's mèn farise no mèn co' ngòc maistr co' ndlu' cón che'n ley co' mxo'f Moisés loo mèn loo Jesús. Ndxab mènà:

—¿Chonon mèn co' ngòc xin' mté'th Juàn no mèn co' ngòc xin' mté'th mèn xley' farise anze'f ngure xlat no ngòc mènà mèn co' anze'f ngurez Diox. Per ndxe'leque', myen' xin' mté'th lùu ba' ale ndxuhuaque' no ndxuque', à'?

<sup>34</sup> Jesús mcàb loo mènà. Ndxab Jesús loo mènà:

—Nde niin thib con' loo gu'. No ndlyazen càb gu' loon: ¿Ché' nzo mod li gu' thib con' co'se' mselya' thib ned myen' co' mselya' par cue xlat mèn co' nac mèn guliz mbyòo láth nzo yalhua liz mbyòo co' mselya' no láth nzi no mbyòo mènà liz mbyòo, cà'? Yende moda, ¿lé'?' <sup>35</sup> Per zin thib huiz no zin thib ze co'se' ya ne'yo node no ya ne'cue node mbyòo co' mselya' mèn co' nac mèn guliz mbyòo. Axta syare', gàc huiz co'se' cue xlatque' mèn co' nac mèn guliz mbyòo co' mselya'.

<sup>36</sup> Mtetac Jesús tedib di's loo mènà, ne. Ndxab Jesús loo mènà:

—Nde niin tedib con' loo gu': Yende chó xa'got nzo co' cho'xù' thib vestid cub par co bdè xa'gota lar' co' nac vestid cub thib vestid gox. Chele' xa'gota tataa li, ale teza'xù'



xa'gota vestid cub, ¿lé? Más de cona, indxàalte yò bdè lar' cub che'n vestid cub loo vestid gox. <sup>37</sup> Tolo ndxab Jesús loo mèn: Yende chó mèn nzo co' co mezcál co' diz ngro' palenc le'n thib garrafón gox co' nalé'le', ¿lé? Tac chele mèn co mezcál co' diz ngro' palenc le'n thib garrafón gox co' nalé'le', le' sya, tolo lyé' garrafón goxa no xyo mezcála. Ngòc perdid ryop con'a. <sup>38</sup> Por cona, más huen co mèn mezcál co' diz ngro' palenc le'n thib garrafón cub. Sya, tataa mod nabe'ste quenap mèn ryop con'a. <sup>39</sup> Más de cona, yende chó mèn co' ndxu mezcál co' ndxàcle' mbe' ngue no mèn tyubla's mèn gu mèn mezcál co' diz ngro' palenc. Tac mbez mèn loo xtàa mèn: Ale ndyac na' masque' nix nac mezcál co' ndxàcle' mbe' ngue no na' leque mezcál co' diz ngro' palenc, ¿lé?

## 6

*Myen' xin' mté'th Jesús mcho' bacdò che'n nzob triu par nduhua myen' nzob triua thib huiz sabd co' ngòc huiz descans tiempa.*

*(Mt. 12.1-8; Mr. 2.23-28)*

<sup>1</sup> Ngòc thib con' thib huiz sabd co' ngòc huiz descans tiempa. Nda riid Jesús co'te' nax thib le' yò co'te' mblo mèn bin nzob triu. Láth nda riid no Jesús myen' xin' mté'th Jesús le'n ña' triua, mtlo myen' xin' mté'th Jesús, mcho' myen' bacdò triua. No mtlo myen', mdobya' myen' bacdò triu par hua myen' nzob triua. <sup>2</sup> Sya, ndxab ndxep mèn xley' farise co' nziri' tya loo myen' xin' mté'th Jesús:

—¿Chonon indyubdi'ste gu' xal mnibe' Moisés loo na' loo ley co' mxo'f Moisés loo na' par ne'líde gu' zin' huiz descans co' nac huiz sabd, à'?

<sup>3</sup> Per ale le'le' yub Jesús mcàb loo mèn. Ndxab Jesús:

—¿Ché' tarte lab gu' di's co' ndub loo libr co' nac xti's Diox co' nda' cuent no co' ndlu' cón che'n con' co' mbli David co' ngòc rey póla thib vez co'se' mblyan' David no mblyan' mèn co' mque tee no Davida, cà'? <sup>4</sup> David ngò le'n tabernáculò che'n Diox tiempa. Negadi's mxen David pan co' nzi'f loo mes co' ngòc pan natú' loo Diox ndoore'. Nduhua David pana. Mda' David pana nduhua mèn co' ngo no David le'n tabernáculò, ne. Per gu' nonque' no naneeque' gu' le' pana indxàalte hua chol mèn. Ndxé'leque', ante nguley' ndxàp permis hua pana xalque' ngòc mod co' ngòp mèn tiempa. Per ale ne'ngode Diox cuent le' David mbli con' ye'rsin' co'se' mbli David con'a.

<sup>5</sup> Ndxab Jesús loo mèn, ne:

—Daa co' mbal yáal loo izlyo' xalque' ndxáal chol mèn loo izlyo' ndxè', daa ñibe'pe' loo mèn cón li mèn huiz sabd.

*Trè' ndlu' cón che'n thib mbi' co' mque no sa ya' biiz.*

*(Mt. 12.9-14; Mr. 3.1-6)*

<sup>6</sup> Ngòc tedib con' tedib huiz sabd co' nac huiz descans co' nde nquea. Jesús ngò le'n sinagog. Mtlo Jesús, mbli' Jesús mèn. Ngo thib mbi' yíz xi'th mèn, ne. Mbi'a mque no sa ya' mbi' co' nac ladli. Ale mbiiz cue' sa ya' mbi'a. <sup>7</sup> Làth mèn ngò ndxep mèn co' ngòc maistr co' ndlu' cón che'n ley co' mxo'f Moisés loo mèn no ndxep mèn xley' farise, ne. Mèn xè nzi la's loo Jesús par ñee mèn ñeene' ché' teyac Jesús mbi'a huiz sabd par tataa mod tyub nii mèn quexù' que' fals mèn Jesús. <sup>8</sup> Per Jesús nonque' xtùuz co' ngue li mèn xtùuz. Ndxab Jesús loo mbi' co' nayíiz ya'a:

—Goo too xi'th mèn ba'.

Sya, ngo too mbi' xi'th mèn co' nziri' tya.

<sup>9</sup> Sya, mbere Jesús. Ndxab Jesús loo mèn co' ngòc maistr no loo mèn xley' farise:

—Ñibdizen thib con' loo gu'. ¿Cón nac con' co', licque', mnibe' Diox loo mèn li mèn huiz sabd co' nac huiz descans? ¿Xá nee gu'? ¿Ché' ndxàal li mèn con' ndac o ché' ndxàal li mèn con' ye'rsin', à'? ¿Ché' más ndxàal tí' no làa mèn xtàa mèn loo con' ryes huiz sabd co' nac huiz descans o ché' más ndxàal guth mèn xtàa mèn huiz sabd co' nac huiz descans, à'?

<sup>10</sup> Sya, mbui' Jesús loo ryete mèn co' nziri' loo Jesús. No ndxab Jesús loo mbi' yíza:

—Ftega' ya'l, ey.

Mbi' mtega' ya' mbi'. Ale, chàà, mbyac ya' mbi'. Mbyan' ya' mbi' xalque' taasa ya' mbi'. <sup>11</sup> Syase, por derech, ngòc loc mèn xley' farise no mèn co' ngòc maistr che'n ley co' mxo'f Moisés loo mèn, tant ngro' nayi' mènà gunèe mènà Jesús. Mtlo mènà, mbez mènà loo thib xtàa mèn no loo tedib xtàa mèn:

—¿Cón li no na' mbi' ba' par guth na' mbi' ba' thidtene, cara?

*Tad Jesús mcui si' fchop myen' co' ngòc myen' xin' mté'thpe' Tad Jesús.*

*(Mt. 10.1-4; Mr. 3.13-19)*

<sup>12</sup> Leque le'n huiza, mxen Jesús ned. Nda Jesús loo thib yii par cuez Jesús Diox. No dib yál' ngurez Jesús Diox yál'a. <sup>13</sup> Co'se' ngo nìi izlyo' tedib huiz co' nde nquea, Jesús mtel' chez mèn co' ngòc xin' mté'th Jesús par mqueltàa no mènà Jesús. Mcui Jesús si' fchop myen'. Jesús mblo lèe myen'a mèn co' ndxe' di's che'n Jesús loo mèn dib athu loo izlyo'. <sup>14</sup> Ryete si' fchop myen'a ngòc mèn ndxè': Mon, co' mdub Jesús tedib lèe co' ngòc lèe Pedr; Ndech, hues Mon; Cob; Juàn; Lip; Bartol; <sup>15</sup> Mate; Max; Cob, co' ngòc xgan' Alfe; Mon, co' ngòc thib mbi' co' ngòc partid che'n thib ned mèn co' ngro' lèe cananist; <sup>16</sup> Jud, hues Cob; no Jud Iscariot, co' ngòc entregador co' mbly'u' Jesús loo mèn co' ngòc ngolo ngola's che'n Jesús.

*Tad Jesús ngue lu' loo huax mèn no ngue go xo'f Tad Jesús cón che'n Diox loo mèn.*

*(Mt. 4.23-25)*

<sup>17</sup> Ngoloa, ngulàa tùub no Jesús myen' xin' mté'th Jesús loo yia. Jesús mbyan' loo thib la's co' nziri' xan' yia con myen' co' ngòc xin' mté'th Jesús. Ngure huax mènlyé' tya, ne. Mènà nde le'n rye yèzeya' co' nac che'n làaz mèn jude. No nde mèn ciuda Jerusalén. No nde mèn costeñ co' nde par ned cost Tir no mèn costeñ co' nde par ned cost Sidón. Mènà mbi'th par gòn mènà di's co' ngo Jesús yalbàn no par teyac Jesús mèn co' ndyac chol yíiz. <sup>18</sup> Mblyo' Jesús xpìi meexù' loo mèn co' mxactii por cón che'n xpìi meexù'a, ne. <sup>19</sup> Ryete mèn yíiz mbly'a's ante gàal mèn yíiz Jesús tac mènà ñee mteyac Jesús mènà ante por cón che'n con' co' nzo la's ya' Jesús no co' nzo la's nii Jesús.

*Trè' ndlu' cón che'n chop ned mèn: Loo thib ned mèn gac con' ndac. Le' loo tedib ned mèn na, gac con' ye'rsin'.*

*(Mt. 5.1-12)*

<sup>20</sup> Látha, mbui' Jesús loo myen' xin' mté'th Jesús. Ndxab Jesús loo myen':

—Huen nda gu' co' nac mèn prob tac Diox ñibe'pe' loo gu' nalle'.

<sup>21</sup> Huen nda gu', gu' co' nde che con' loo no gu' co' nzi yath huin nalle' tac yiloa Diox li hua gu' axta plóthe.

Huen nda gu', gu' co' ndxón' nalle'. Per zin thib huiz no zin thib ze li Diox tyac lezo' gu' no xyo'f nde' xyo'f ndla' lezo' gu'.

<sup>22</sup> Huen nda gu' co'se' tlo yòo xyàn lezo' mèn ñèe mèn gu'; co'se' tè'b mèn gu' thib lad; co'se' aseli mèn ta' mèn xyàn lezo' gu'; no co'se' ne' ne' indlya's mèn gòn mèn cón che'n gu'. Mènà li cuent le' gu' nac mèn ye'rsin' por cón chenen, daa co' mbal yáal loo izlyo' ndxè' xalque' ndxáal chol mèn loo izlyo'. <sup>23</sup> Cona, ngue niin loo gu': Fxo'f nde' fxo'f ndla' lezo' gu' axta plóthe no cue gu' guyith guxiis le'n tiemp ndxè' tac Diox angta'la's huax con' ndac loo gu' loo bé' co' gac che'n gu' co'se' gac huiza. Gu' nonque' no naneeque' gu' tatua'que' mbli xudgool mènà ngòc nguàal con' loo prob mèn co' mde'th di's co' ndxab Diox póla, ne.

<sup>24</sup> Tolo ndxab Jesús:

—Per, ay prob gu' izlyo', mèn ric. Tac nalle' ngolole' mda' gu' gust lezo' gu' axta plóthe. Nase guneele' cón che'n gu'.

<sup>25</sup> Ay, prob gu' izlyo'. Ale ndlya's gu' que no gu' ryethe con' lya's gu' axta plóthe. Yiloa, ten' gu' huin axta plóthe, ne.

Ay, prob gu' izlyo', gu' co' alithe ndyac lezo' no co' alithe nzo'f nde' nzo'f ndla' lezo'. Zin thib huiz no zin thib ze co'se' gón' gu' no xi lezo' gu' axta plóthe.

<sup>26</sup> Ay, prob gu' izlyo'. Ryete mèn nabe'ste nda' cuent cón che'n gu' nalle'. Pues, tataaguè' mbli mèn co' ngòc mèngool tiempa con mèn gutyè' co' ndxab mde'th mènà di's co' ndxab Diox. Per ilicte mde'th mènà di's co' ndxab Diox.

*Jesús ngue ñibe' loo mèn que' lezo' mèn ñèe mèn hues xtàa mèn co' nac ngolo ngola's loo mènà.*  
(Mt. 5.38-48; 7.12)

<sup>27</sup> Gu' co' nzi yòn di's co' ngue niin loo gu', niin con' ndxè' loo gu': Fque' lezo' gu' gunèe gu' mèn co' nac ngolo ngola's che'n gu'. Bli gu' con' ndac loo mèn co' ndxòo xyàn lezo' ñèe gu'. <sup>28</sup> Nado' di's nado' cuent gunii gu' loo mèn co' ñii yèe ñii tii cón che'n gu'. Gurez gu' Diox por cón che'n mèn co' asendli ngòc nguàal con' loo gu'. <sup>29</sup> Chele' chó mèn quis thib lad cuat gu', fta' gu' tedib lad cuat gu' par quis mènà, ne. Chele' chó mèn ndlyà's a la fuerz teche mènà chamar gu', bla' gu' teche mènà camis gu', ne. <sup>30</sup> Ftechè gu' con' loo mèn co' nde techè con' loo gu'. Le' mèn co' angmbe'xù' cón che'n gu' na, yende chó gabte gu' loo mènà par bere mènà, yilá' mènà co' mteche gu' loo mènà. <sup>31</sup> Fcua'n gu' mod li gu' con' ndac loo mèn co' ndxàc hues xtàa gu' xalque' ndlyà's gu' cua'n mènà mod li mènà con' ndac loo gu'.

<sup>32</sup> Chele' gu' ante que' lezo' ñèe mèn co' nque' lezo' ñèe gu', ¿ché' ndyac gu' ngue li gu' con' ndac co'se' ngue li gu' tataa, cà'? Yende xàa. Tac chol mèn co' nac ante mèn ye'rsin', ne, ante nque' lezo' ñèe xtàa mènà, mèn co' ndli con' ndac loo mèn ye'rsin' a. Chele' gu' tataa ndli, le' sya, lalque' nac gu' con' mènà no lalque' ngue li gu' xal ndli chol mèn ye'rsin', cara. <sup>33</sup> No chele' gu' ante li con' ndac loo mèn co' ndli con' ndac loo gu', ¿ché' ndyac gu' ngue li gu' con' ndac co'se' ngue li gu' tataa, cà'? Yende xàa. Lomisque' ne, chol mèn co' nac mèn ye'rsin' ndli con' a con' xtàa mènà. <sup>34</sup> Chele' gu' ntechè con' loo mèn ante por cón che'n interes co' ta' mèn càa gu' par li gu' gan por mtechè gu' con' loo mèn, ¿ché' ndyac gu' no ché' ngue li gu' cuent ngue li gu' con' ndac loo mèn co'se' ngue li gu' tataa, cà'? Yende xàa. Lomisque' mod ne, mèn ye'rsin' ntechè con' loo xtàa mènà ante por interes co' càa mènà yilóa no maste. <sup>35</sup> Per ndxe'leque', gu' ndxàal que' lezo' ñèe gu' mèn co' nac ngolo ngola's che'n gu' no li gu' con' ndac loo chol mèn. No ftechè gu' con' loo mèn co'se' nquin mèn con'. No ne'cue queede lezo' gu' techè gu' con' por interes co' ta' mèn ndxep con' càa gu' por cón che'n con' co' mtechè gu' loo mèn. Chele' gu' tataa li, sya, Diox tolo li anggàc más con' ndac loo gu'. Sya, non mèn no ñee mèn le' gu', licque', nac xin'pe' Diox co' ñibe' loo alux con'. Tac Diox, ne, ndlique' huax con' ndac loo mèn co' indxàpte mod par gab mèn Diox quix U', Diox, loo Diox, no loo mèn co' nac mèn ye'rsin'. <sup>36</sup> Gòc gu' mèn co' ndlyat lezo' ñèe hues xtàa mèn xalque' ndlyat lezo' xud gu' Diox ñèe xud gu' Diox chol mèn.

*Jesús ngue ñibe' loo mèn ne'la'ste mèn loo xtàa mèn.*  
(Mt. 7.1-5)

<sup>37</sup> Ne'hui'de gu' no ne'ñaade gu' loo mèn par la's gu' loo mèn. Le' sya, tataa mod ne'tub rezte Diox cón che'n gu', ne, por mcua'n gu' xquin gu' tataa co'se' ndla's gu' loo mèn. Ne' ne' cua'n gu' mod quexù' gu' no que' fals gu' chol mèn. Le' sya, Diox ne'quexù'de gu' por mcua'n gu' xquin gu' no xtol gu' co'se' nquexù' gu' no nque' fals gu' mèn. Fteri'th ftecan' gu' chol con' ye'rsin' co' ndli xtàa gu' loo gu' par tataa mod ton' Diox xtol gu', ne. <sup>38</sup> Fta' gu' con' ncàa mèn co' naquin con'. Le' sya, Diox, ne, ta' con' naquin gu'. No co'se' ta' Diox con' càa gu'a, Diox ta'i loo gu' xal co'se' nchix mèn nzob, ndub ndub nzob loo xibè' no loo almud no xal co'se' ndi' mèn nzob le'n bols. No nzib mèn bols par tolo lyàa loo nzob le'n bols. Leque moda, ta' Diox con' càa gu' xalque' mda' gu' con' ncàa mènà.

<sup>39</sup> Ngoloa, mtetac Jesús thib di's loo myen' xin' mté'th Jesús. Ndxab Jesús:

—Nde niin thib con' loo gu': ¿Ché' nzo mod tyen thib mbi' co' nac mbi' sieu ya' tedib mbi' co' nac mbi' sieu par tyoo ner mbi' sieua loo xtàa sieu mbi', cà'? ¿Ché' ngobe' gu' ne'yizi'fte no ne'yiga'ste ryop mènà le'n thib ye'r, cà'? Tazi'fque' ryop mbi' sieua le'n ye'r, ¿lé'? <sup>40</sup> Nec thib myen' co' nac xin' mté'th thib maistr ne'ta'de myen'a con' xtùuz

co' ndli maistr no xtùuz co' ndli myen'. Per co'se' axta yilo li myen' stud, syare' gac myen' xal maistr myen'.

<sup>41</sup> Nde niin tedib con' loo gu', ne: ¿Xá mod más ngüi' gu' loo thib le' chu'th yix co' nzo ngudloo hues xtàa gu' leque hui' gu' loo thib le' yaa vig co' nac más naroo co' nzo ngudloope' gu', co' nee di's, ale más ngüi' gu' loo ndxep con' ye'rsin' co' ndli hues xtàa gu' no ingüi'de gu' loo gu' loo huax con' ye'rsin' co' ndlipe' gu', à'? <sup>42</sup> No ¿xá mod ale ndli gu' ryes mbez gu' loo hues xtàa gu': Hues, led cuante; bla' go'en thib le' yix chu'th co' nzo ngudlool ba', no inda'de gu' cuent cón che'n yaa vig co' nac más naroo co' nzo ngudloo gu' ba', à'? Aa que ndxác gu' ntembii gu' ro gu' no ntembii gu' xti's gu', ndee gu'. Ner blo' gu' yaa vig co' más naroo co' nzo ngudloo gu' ba'. Le' yiloo na, co' gu' yix co' nzo ngudloo hues xtàa gu' ba'.

*Jesús ngue ta' cuent loo mèn xá mod nda' mèn cuent cón che'n xtàa mèn por mod co' ndxàp mèn xal ndxác be' thib yaa xlè co'se' ngüi' mèn loo xlè co' nda' yaaa.*

*(Mt. 7.17-20; 12.34-35)*

<sup>43</sup> Nde niin tedib con' loo gu', ne: Yende thib yaa xlè ndac co' ta' thib xlè ye'rsin'. Ne' ne' yen thib yaa xlè ye'rsin' co' ta' xlè ndac. <sup>44</sup> Tac thib thib yaa xlè ndxác be' por xlè co' nda' yaa xlè. Yende mod làa mèn ngudyuug loo thib yaa yis, ¿lé'? Ne' ne' làa mèn uv loo yaa yis sars, ¿lé'? <sup>45</sup> Lomisque' ne, thib mbi' ndac ndlique' con' ndac tac mbi' ndxòoque' lezo' li con' ndac co' ndye'th xtùuz yéc mbi' li mbi'. Per mbi' co' nac mbi' ye'rsin' ndli con' ye'rsin' tac mbi' ye'rsin' ndxòoque' lezo' li con' ye'rsin' co' ndye'th xtùuz yéc mbi' li mbi'. Tac ryete di's co' ndyoodi's mèn, que naca di's ndac, que naca di's zab, di'sa nac co' ndli mèn xtùuz no di'sa nac co' más nda' gust lezo' mèn par ndyoodi's mèn di'sa.

*Jesús ngue ta' cuent cón che'n chop ned mèn co' nac xal thib liz mèn co' ndub loo thib cimient no tedib liz mèn co' ndub tua'te.*

*(Mt. 7.24-27)*

<sup>46</sup> ¿Chonon co'se' mbez gu' daa, mbez gu', Tad, loon no indlide gu' cas di's co' ñibe'en loo gu', à'? <sup>47</sup> Nde niin loo gu': ¿Chó mèn nac xal nac mèn co', lìcque', nqueltàa loon no ndxòn mèn di's co' mbezen no ndli mèn con' co' ñibe'en? <sup>48</sup> Pues mèn nac xal thib mbi' co' mxít te'f thib liz ro thib yó'be'. Nerleque' con' mbli mbi', na's mden' mbi' cimient par tub mbi' liz mbi'. Co'te' mden' mbi' cimient ngòc antub loo quèe. No ngolo mxít te'f mbi' liz mbi', ngulàa thib nít yòo yó'be'a. Ngozi'f nít yòoa cho liz mbi' con dib fuerz che'n nít. Per yende cón mxac liz mbi' tac ndub liz mbi' loo cimient co' nac antub loo quèe. <sup>49</sup> Per mèn co' nzi yòn di's co' ngue bezen no indlide mèn cas loo di's co' ngue bezen, mèn nac xal thib mbi' co' mxít te'f thib liz mbi' ro thib yó'be'. No sangmblít te'f mbi' ftooz liz mbi' loo yòo. Ne'ngen'te mbi' cimient co'te' mdub mbi' liz mbi'. Co'se' ngro' nít yòo no nguáp nít yòo yó'be'a, ngozi'f nít yòoa liz mbi'. Ale mtexyath nít yòoa liz mbi'. Por derech, mblyux liz mbi' thidtene tac antub loo yòo mdub mbi' liz mbi'.

## 7

*Jesús mteyac thib moz che'n thib capitán che'n nación co' ñibe' ciuda Rom.*

*(Mt. 8.5-13)*

<sup>1</sup> Co'se' ngolo mdoodi's Jesús loo mèn co' mqueltàa loo Jesús, mxen Jesús ned. Nda Jesús par ciuda Capernaum. <sup>2</sup> Le'n ciuda Capernaum ngo thib mbi' co' ngòc capitán. Mbi'a ngòc mèn gulàaz che'n mèn ciuda Rom. Mque no mbi' thib moz. No nde nixon', anze'f nque' lezo' mbi' gunèe mbi' moz mbi'. Mxac len moz axta yamerle' mtin liz moz. <sup>3</sup> Co'se' ndxòn capitán le' Jesús mteyac mèn yíiz, mtel' capitán plá mèn gool co' nac mèn nación Israel loo Jesús par ya na'b mèn di's loo Jesús par ya teyac Jesús moz capitán. <sup>4</sup> Mèngoola mbii gax loo Jesús. Mtlo mèngoola, nalyat mbez mèngoola loo Jesús. Ndxab mèngoola:

—Tad, ndxàalque' li U' favor ya lyath no U' capitán. <sup>5</sup> Tac capitana anze'f nque' lezo' ñèe capitán mèn nación na'. No mnibe' capitán mxít te'f mèn thib sinagog nu' cón che'n capitán.

<sup>6</sup> Sya, mxen Jesús ned. Nda no Jesús mèngoola. Co'se' nda zin' gaxle' Jesús con mèngoola liz capitán, capitán mtel' plá amiu capitán par ya sál' amiua Jesús. Ndxab mèn co' ndxàc amiu capitana loo Jesús:

—Tad, indlya'ste capitán li xol capitán U' tac nden' capitán inzyál'te capitán yòo U' liz capitán. <sup>7</sup> Cona, ne'nglide capitán ryes ngui'th yub capitán loo U' par ngui'th cua'n yub capitán U'. Cona, mtel' capitán nu', nde nu'. No gunee capitán di's loo nu' co' ta' nu' cuent loo U'. Taandxè' gunee capitán: Tad Jesús, daa ngue na'b loo U', bli U' favor, ante ñibe' U' le' moz daa yac. Ndxelazquen yac moz daa. <sup>8</sup> Tac leque yub daa nzo xan' yalñibe' co' nac yalñibe' roo no ngue non solndad co' ñibe'en loo. Chele' daa gab loo thib solndad par ya solndad thib mandad, solndad ya. No chele' daa gab loo tedib solndad par yi'th solndad loon, solndad yi'th loon. No chele' daa ñibe' loo moz daa par li moz daa thib zin', moz ya lli.

<sup>9</sup> Co'se' mbìn Jesús di's co' ndxab mèn, ante mbui' Jesús no ante gunaa Jesús cón che'n capitana. Mbui' Jesús loo mèn co' nziri' co' nda nque xís Jesús. Ndxab Jesús loo mèn:

—Lìcpe' ba'i, ne' ne' làth rye mèn nación Israel ñèeden nec thib mèn co' anze'f ndxela's no co' ndxàp yalxla's loo Diox xal capitán ba'.

<sup>10</sup> Co'se' mbere mèn co' ngòc amiu capitán co' ngua sál' Jesús con mèngoola, ndye'th mèn con mèngoola par liz capitana, ale ñee mèn mbyacle' moz capitán tac Jesús mteyac moza axta co'te' ndoo Jesús ned nda Jesús.

*Jesús mblo xban thib xgan' thib xa'got viud.*

<sup>11</sup> Ngolo ngòc con'a loo moz capitana, tedib huiz co' nde nquea, mxen Jesús ned. Nda Jesús par tedib yèez, yèez co' ngro' lèe Naín. Nda no Jesús ryete myen' xin' mté'th Jesús. No nda nque rye mèn co' mqueltàa loo Jesús xís Jesús. <sup>12</sup> Co'se' nda zin' gax Jesús ro yèez Naín, ñèe Jesús ne' mèn thib thebol. Nda ca's mèn thebola panteón. Thebola ngòc angoluxte mbyòo loo guna' co' nac xna' thebol. Ngòc guna' co' nac xna' thebola thib viud, ne. Anze'f thib mèn yèeza mqueltàa con xna' thebol par nda ca's mèn thebol. <sup>13</sup> Co'se' gunèe Tad Jesús guna'a, mblyat lezo' Tad Jesús gunèe Tad Jesús guna'. Ndxab Tad Jesús loo guna':

—Ne'gón'tel, ey.

<sup>14</sup> Sya, mbii gax Jesús. Mbuàal Jesús caj che'n thebol. Le' mèn co' ne' thebol na, ngo too. Nguled mèn cuante. Ndxab Jesús loo thebola:

—Mbyòo, na ngue nii lool: Goo che.

<sup>15</sup> Le' sya, mbyòo co' ngutha, chàa, ngro xban mbyòo no ngo che mbyòo. No mdub mbyòo. Mtlo mbyòo, mdoodi's mbyòo. Sya, mdix mèn caj loo yòo. Le' Jesús na, mxen ya' mbyòo. Mxít too Jesús mbyòo. Ndxab Jesús loo xna' mbyòo: Xgan'l ndxè', ey. <sup>16</sup> Co'se' gunèe mèn ngolo ngòc con'a, ryete mèn mzyeb. Mtlo mèn, ndxab mèn di's natú' no di's roo di's xèn loo Diox. No mbez mèn:

—¡Ay, Dio's! Thib mbi' roo no thib mbi' xèn nac mbi' co' nde làth na' co' nde'th di's co' ndxab Diox loo na'.

Mbez mèn, ne:

—Yub Diox nde lyath no na', na' co' nac mèn nacionpe' Diox, cara.

<sup>17</sup> No mbyath mbyèn cón che'n con' mbli Jesús loo mbyòoa loo ryete mèn yèezya', co' nee di's, co' nac rye yèezya' co' nac che'n làaz mèn jude no taamas yèez co' nziri' gaxte loo yèezya' che'n làaz mèn jude.

*Juàn Bautist mtel' myen' xin' mté'th Juàn loo Tad Jesús.*

*(Mt. 11.2-19)*

<sup>18</sup> Juàn Bautist mbìn con' co' mbli Jesús tac myen' co' ngòc myen' xin' mté'th Juàn Bautist mda' cuent cón che'n con' co' nde tee ndli Jesús loo mèn loo Juàn. Sya, mtel' Juàn mèn co' ngua mandad par ngua xi mèn chop myen' xin' mté'th Juàn par tyoodi's



no Juàn myen' ro lezi'f co'te' nzo Juàn. <sup>19</sup> Mtel' Juàn ryop myen'a loo Jesús par ñibdi's myen' loo Jesús ñeene' ché', lìcque', nac Jesús Crist co' ndxath no co' mxyo'f di's yi'th o ché' ndxàal cued mèn yi'th tedib mbi' co' nacpe' Crist. <sup>20</sup> Sya, ngua ryop myen' co' mtel' Juàna loo Jesús. Ndxab myen' loo Jesús:

—Juàn Bautist mtel' nu' par ñibdi's nu' loo U' ñeene' ¿ché' U' nac Crist co' ndxath yi'th o ché' ndxàal cued nu' yi'th tedib mbi' co' nacpe' Crist, cà'?

<sup>21</sup> Le'xque' hor co'se' mzin myen'a loo Jesús, Jesús ngue teyac huax mèn yíiz co' mque no chol yilíiz ye'rsin'. No ngue go' Jesús xpíi meexù' loo mèn. No mdub Jesús xñi ngudloo huax mèn sieu. <sup>22</sup> Jesús ndxab loo myen':

—Byàa gu'. No fta' gu' cuent loo Juàn ro lezi'f con' co' ngolo gunèe gu' no con' co' ngolo mbìn gu'. Fta' gu' cuent xá mod mduben xñi ngudloo mèn sieu no ngüi' mèn sieua; xá mod mtoxcuan nii mèn coj par nali ndyee mèn coj; xá mod mteyaquen mèn co' ndxa's no ndxèe yid lad; xá mod ndxòn mèn di's, mèn co' mcue' nza; xá mod ngo xbanen mèn nguth. Le' loo mèn prob na, ndethen no ngon yalbàn cón che'n di's ndac che'n Diox loo mèn. <sup>23</sup> Huen nda mèn co' ne'ten'te gác ngòc nguàal con' loo mèn por cón chenen no maste.

<sup>24</sup> Co'se' ngolo ndyàa mèn co' mtel' Juàn Bautist loo Jesús, Jesús mtlo mdoodi's loo taamas mèn cón che'n Juàn. Ndxab Jesús loo mèn:

—Co'se' ngua tee hui' gu' co'te' nagána, ¿cón ngua tee hui' gu' co'te' nagána, à'? ¿Ché' ngua tee hui' gu' thib xan' yíi co' ngol' mbii, cà'? Tyè', ¿lé'? <sup>25</sup> ¿Cón ngua tee hui' gu', sya? ¿Ché' ngua tee hui' gu' thib mbi' co' noc xab thib ned lar' huen, cà'? Tyè', ¿lé'? Gu' nonque' no naneeque' gu' le' mèn co' ndxoc thib ned lar' huen no mèn co' ante nda' gust lezo', mènà más ñèe mèn co'te' nac liz thib rey, ¿lé'? <sup>26</sup> ¿Xá nee gu'? ¿Cón ngua tee hui' gu', sya? ¿Ché' ngua tee hui' gu' thib mbi' co' nde'th di's co' ndxab Diox, cà'? Aa. Lìcpe' ba'i, gu' ngua tee hui' que' thib mbi' co' nde'th di's co' ndxab Diox. No ngua tee hui' que' gu' thib mbi' co' nac más mbi' roo no mbi' xèn leque chol mèn co' mde'th di's co' ndxab Diox. <sup>27</sup> Cón che'n Juàn co' ngua tee hui' gu'a nac di's co' ndub loo libr co' nac xti's Diox co' mbez:

Na tel' ner thib mbi' co' ya te'th ner di's ndac ndxè'. No lu' mbi' cón che'n lùu loo mèn par li nab mèn xtùuz mèn no lezo' mèn loo cón che'n lùu ndoore'. No gác con'a loo mèn xal co'se' ntoxcua' mèn thib ned no ndli lal mèn thib ned.

<sup>28</sup> Na ngue nii loo gu' nalle': Yende chó mèn co' nde teele' ndxáal xàn' nii xna' mèn no xàn' nii xud mèn tarte gáal thib mbi' co' nac más mbi' roo no mbi' xèn co' nde'th di's co' ndxab Diox leque Juàn Bautist. Mastale', axta nalle' par delant mèn co' nac más be'the co' ngue ta' lugar par ñibe'pe' Diox loo mèn, más huen nda mènà loo Diox leque Juàn Bautist tac Diox co' xo'f más con' co' nac cón che'n Diox loo mènà leque con' co' mblo xo'f Diox co' nac cón che'n Diox loo Juàn.

<sup>29</sup> Co'se' mbìn mèn di's co' ndxab Jesús cón che'n Juàn, ryete mèn co' mbli Juàn bautizar no mèn co' ndli cobrar cón che'n contribución co' mbli Juàn bautizara, axta syare' mblila's mènà no mda' mènà cuent le' Diox nac Diox nali loo ryethe con' co' ndli Diox. <sup>30</sup> Per mèn co' ngòc mèn xley' farise no mèn co' ngòc maistr co' ndlu' cón che'n ley co' mxo'f Moisés loo mèn nación Israel tiempa, mènà ne'ndalte ngli Juàn bautizar mènà. Mènà mtè'b di's no mxíis no mènà con' co' mblya's Diox angli Diox loo mènà. <sup>31</sup> Tad Jesús ndxab loo mènà:

—¿Xá nee gu'? ¿Chó con' tetaquen mèn co' nziri' tiemp ndxè', à'? ¿Chó con' nac lalque' xal mèn ndxè', à'? <sup>32</sup> Nde niin thib con' loo gu': Mèn co' nziri' tiemp ndxè' lalque' nac xal myen' bix co' nguith loo xbi' co'se' mbez yèe myen', no ndxón' myen', no ndxecloo myen' loo xtàa myen'. Mbez myen' loo xtàa myen': Daa mque dii loo flaut no ale ne'ngol' niide gu'. Lomisque', mbil' ro bàanen loo gu' no ne'ngxide lezo' gu' par ngón' gu'. <sup>33</sup> Tataa nac gu' tac co'se' mbi'th que tee Juàn Bautist làth gu', Juàn ne'nghuade pan axta plóthe xal ndxuhua chol mèn pan axta plóthe. No ne' ne' ngu Juàn vin axta plóthe xal ndxu chol mèn vin axta plóthe. Mbez gu' loo xtàa gu' cón che'n Juàn le' Juàn mque no xpíi che'n meexù'. <sup>34</sup> Ngoloa, ndalen, daa co' mbal yáal làth gu' xal ndxáal chol mèn. Na

ndxuhua. No ndxun. Per ale mbez gu' le' daa ndxuhuacho' pan no ndxucho'en vin. No ale mbez gu' ndxàc amiu daa mèn co' ndli cobrar cón che'n contribución no mqueltàan con mèn co' ndxàp xquin no xtol. <sup>35</sup> Per yende chó mport nzo lezon cón che'n con' co' ndli gu' xtùuz cón che'n Juàn no cón chenen tac mèn co', lìcque', ndxác, mèn nonque' no naneequè' mèn le' con' co' ngue li Diox por cón che'n Juàn no por cón chenen nac con' ndac.

*Tad Jesús ngua too naa Mon, Mon co' ngòc mèn xley' farise.*

<sup>36</sup> Ngolo gunii Jesús di'sa, thib mbi' co' ngòc mèn xley' farise co' ngua nee loo Jesús ya thuhua Jesús sa yèth liz mbi' con mbi', mbe' mbi' Jesús liz mbi'. No mdub no mbi' Jesús loo mes. <sup>37</sup> Látha, mzin thib xa'got ye'rsin' co' ngòp xtol co' nzo ban leque le'n yèza. Co'se' mbìn xa'gota le' Jesús nda liz mbi' xley' farise par hua no Jesús mbi', ale negadi's ngòc xa'gota liz mbi' con thib bote aceit perfum co' natoxcua' con quèe marm loo Jesús. <sup>38</sup> Ndxón' xa'gota. Mbii gax xa'gota loo Jesús co'te' mdub Jesús loo mes. Mtlo xa'gota, mtech xa'gota nii Jesús con nít loo xa'gota co' ndxón' xa'gota. Ngoloa, mtecuì's xa'gota nii Jesús con yis yéc xa'gota. Sya, msero xa'gota nii Jesús. Ngoloa, mtàa xa'gota aceit perfum co' anze'f nazi' ndlya' nii Jesús. <sup>39</sup> Co'se' ñèe mbi' xley' farise co' ngua nee loo Jesús ya thuhua Jesús liz mbi' con'a, mbli mbi' xtùuz. Ndxab mbi' loo lezo' mbi': Chele' mbi' ndxè', lìcque', nac thib mbi' co' nde'th di's co' ndxab Diox, ngnon mbi' no ngda' mbi' cuent chó nac xa'gota no chó loo xa'got nac xa'got co' ngue gàal mbi'. Pues daa naneè le' xa'got ba' nac thib xa'got ye'rsin' co' ndxàp xtol.

<sup>40</sup> Sya, ndxab Jesús loo mbi' xley' farise:

—Mon, ndlyazen niin thib con' lool, cara.

Mbi' mcàb loo Jesús. Ndxab mbi':

—Gunee U'i loon, Maistr.

<sup>41</sup> Jesús ndxab loo mbi':

—Ngo chop mbi' co' ngro' te'f loo thib mbi' co' ntechè tmi loo mèn. Thib mbi' ngro' te'f casque' thib mil pes. Le' tedib mbi' na, ngro' te'f casque' thib ayo pes loo mbi'a.

<sup>42</sup> Ryop mbi'a ne'ngácte nguix tmi loo mbi' co' ntechè tmi loo mèn. Mblyat lezo' mbi' gunèe mbi' ryop mbi' co' ngro' te'f tmia. Mton' mbi' yalgute'f co' ngro' te'f ryop mbi'a. Per nalle' lyazen ñeel loon, Mon, de loo ryop mbi' co' ngro' te'fa, ¿chó mbi'a más mque' lezo' mbi' co' mton' yalgute'f che'n ryop mbi'a, à'?

<sup>43</sup> Mon mcàb loo Jesús. Ndxab Mon:

—Ndyaquen le' mbi' co' mtechè tmia más ngulat lezo' gunèe mbi' co' más ngro' te'fa leque tedib mbi'.

Jesús ndxab loo Mon:

—Lìcque' con' neel ba'. Yende cón niin lool.

<sup>44</sup> Látha, xèe ngüi' Jesús loo xa'gota. Ndxab Jesús loo Mon:

—¿Ché' ngue hui'l con' ngue li no xa'got ndxè' daa, à'? Anon ngòon lizl, ne'nda'del nít loon par ntechen niin. Per ndxe'leque', xa'got ndxè' mtech niin con nít loo xa' co' ndxón' xa'. No mtecuì's xa'got ndxè' niin con yis yéc xa'. <sup>45</sup> Ne'nserodel cuaten. Per xa'got ndxè' anon ngòc xa', thidteneque' ngue sero xa' niin. <sup>46</sup> Ne'ntàdel aceit yéquen xal nac mod co' ndli mèn. Per xa'got ndxè' mtegad aceit perfum co' anze'f nazi' ndlya' niin. <sup>47</sup> Por cón che'n con' co' ngue li xa'got ndxè' loon, anze'f ndlu' xa'got ndxè' nque' lezo' xa'got ndxè' ñèe xa'got ndxè' daa. Por con' co' ngue li no xa'got ndxè' daa, ngue lu' xa'got ndxè' le' xa' non le' Diox mton'le' ryethe xquin xa' no xtol xa' co' ngòp xa'. Lomisque', ngue niin lool, Mon, le' mèn co' nden' le'n lezo' mèn indxàpte mèn xquin mèn no xtol mèn, no nden' mèn inquinte mèn le' Diox ton' xtol mèn, mèn indlu'de nque' lezo' mèn ñèe mèn xtàa mèn.

<sup>48</sup> Le' sya, ndxab Jesús loo xa'gota:

—Ngot, mton'len xtol lùu, ndee.

<sup>49</sup> Le' mèn co' ndxab Mon ya thuhua mèn sa lua' liz Mon na, mèn nzi ndub no Jesús loo mes, ne. Mtlo mèn, mbez mèn loo xtàa mèn:

—¿Xá nee gu'? ¿Chó mbi' ndli mbi' ba' cuent nac mbi' tac ale mbez mbi' axta xtol mèn no xquin mèn nton' mbi'?

<sup>50</sup> Per Jesús ndxab loo xa'gota:

—Lùu mblyá'le' loo ryethe con' ryes tac ngola'sque'l loon. Nabe'ste byàa. Daa mblile' le' lùu nagàl yo lezo' loo cón che'n Diox, ndee.

## 8

*Trè' ndlu' cón che'n mèngot co' mblyath no Tad Jesús no co' mbli mandad loo Tad Jesús nee mque tee Tad Jesús.*

<sup>1</sup> Ngolo ngòc plá huiz ngua thuhua Jesús liz Mon, Jesús ngua que tee huax yèez no huax ranch. Mque tee go Jesús yalbàn cón che'n di's ndac co' ndlu' xá mod ndlya's Diox ñibe'pe' Diox loo mèn. Mque tee noque' Jesús ryete si' fchop myen' xin' mté'th Jesús, ne, myen' co' ne' tedib lèe mèn co' ndxe' di's che'n Jesús. <sup>2</sup> Mque tee no ndxep xa'got Jesús, ne, xa'got co' mteyac Jesús, no taamas xa'got co' mblo' Jesús xpíi che'n meexù' loo. Làth rye xa'gota, mque tee Mari co' ne' ryop lèe Mari che'n mèn yèez Madalen. Loo Maria mblo' Jesús gaz xpíi meexù' ndoore'. <sup>3</sup> Làth xa'gota mque tee Juan, sa'l Chus co' ngòc mandador che'n rey Herod tiempa, ne. Ngo thib xa'got co' ngro' lèe Susan làth xa'gota, ne. No ngo taamas mèngot co' mblyath no Jesús con con' co' mque note xa'gota.

*Tad Jesús ngue ta' cuent cón che'n thib mbi' co' ngro' par ngua lo mbi' bin.*

*(Mt. 13.1-9; Mr. 4.1-9)*

<sup>4</sup> No anze'f thib mèn mqueltàa ned nda Jesús par hui' mènna loo Jesús. Co'se' gunèe Jesús mqueltàa huax mèn loo Jesús, Jesús mcua'n mod mtetac Jesús di's loo mènna. Ndxab Jesús loo mènna:

—Nde niin thib con' loo gu', ey: <sup>5</sup> Thib vez ngro' thib mbi' co' ngo biz bin par co mbi' bin. Per co'se' mtlo mbi', mblo mbi' biz bin, mblo mbi' ndxep biz bin gaxte ro ned. Per mèn co' mbri'th par neda, mènna mblo mdub loo bina. Làth xtau'a, mbi'th mbin bé'. Nduhua mbin biz bina. <sup>6</sup> Le' tedib lugar na, mblo mbi' biz bin loo yò quèe. Per texal ngulen bina, ale sangmbiiz biz bina tac yende xcop loo yò quèea. <sup>7</sup> Le' taandxep biz bin co' mblo mbi'a na, ngulàa le'n huan. Per más mbryoo mxyèn huan leque bina. Ale mblyus bina le'n huan. <sup>8</sup> Per taandxep biz bin co' mblo mbi'a ngulàa loo yò be'f. Co'se' ngolo mbryoo mxyèn bina, mda' bina thib cosech ndac axta plóthe ale axta thib ayo nzob mda' thib thib quèe biz bina.

Ngolo ndxab Jesús di'sa loo mèn, cabii ndxab Jesús loo mèn co' nziri'a:

—Chele' gu' nden' co' nee di's co' ngue niin loo gu' ndxè', fta' gu' lugar yaa'd di's ndxè' le'n lezo' gu'. No gola's gu' di's ndxè'.

*Myen' xin' mté'th Tad Jesús mnibdi's loo Tad Jesús cón che'n di's co' mtetac Tad Jesús loo mèn.*

*(Mt. 13.10-17; Mr. 4.10-12)*

<sup>9</sup> Myen' xin' mté'th Jesús mnibdi's loo Jesús. Ndxab myen':

—¿Cón nee di's di's co' mtetac U' loo mènna, à', Tad?

<sup>10</sup> Jesús ndxab loo myen':

—Por part cón che'n gu', leque Diox li loo gu' par ta' gu' cuent no ten' gu' cón che'n xá mod ndlya's Diox ñibe'pe' Diox loo mèn. Le'i be' nzo casloo loo alux mèn loo izlyo'. Loo taamas mèn daa ndyoodizque' con di's co' ntetaquen loo mèn. Le' sya, co'se' ndxòn mèn di's co' ngue tetaquen, gàca loo mèn xal loo mèn co', por derech, indxú'de con' loo. No co'se' ndxòn mèn di'sa, gàca loo mènna ne'yaa'dte di'sa le'n lezo' mènna.

*Tad Jesús ngue ta' cuent no ngue go xo'f Tad Jesús loo myen' xin' mté'th Tad Jesús cón che'n di's co' mtetac Tad Jesús loo mènna.*

*(Mt. 13.18-23; Mr. 4.13-20)*

<sup>11</sup> Con' ndxè' nac co' nee di's di's co' mtetaquena: Biz bin co' mblo mbi'a nee di's nac di's ndac che'n Diox co' ngo mèn yalbàn. <sup>12</sup> Le' biz bin co' ngulàa ro neda nee di's nac mèn co' ndxòn di's ndac che'n Diox. Per co'se' nde Mebizya, ngo' Mebizya di's co' mbin

mèna le'n lezo' mèna no le'n xtùuz mèna par ne'yila'ste mèna cón che'n di's ndac no par ne'lyá' de mèna loo con' ryes. <sup>13</sup> Le' biz bin co' ngulàa loo yòo quèea na, nee di's nac mèn co' ndxòn di's ndac che'n Diox. No co'se' ndxòn mèn di'sa, axta gust nda' lezo' mèn ndxòn mèn di's ndaca. Per nac mèna xal thib xan' ña' co' yende huax lox. Ndxela's mèn cón che'n di's ndac ndxepete tiemp. No co'se' ndli xtàa mèna ngòc nguàal con' loo mèna, ndryo xà' lezo' mèna loo con' co' nac di's ndac che'n Diox. <sup>14</sup> Le' biz bin co' ngulàa le'n huana na, nee di's nac mèn co' ndxòn cón che'n di's ndac che'n Diox. Per mastale' ndxòn mèn cón che'n di's ndaca, toloque' nzi tee ban mèn xal nee lezo' mèn. Más ndli mèna ndxath ndxey' lezo' mèna loo yalgon' co' ndxàp mèna. No más ndxòo yéc mèna xá mod tolo ta' mèna gust lezo' mèna. Co'se' ndli mèna con'a, sya, ndxàc mèna xal biz bin co' mblyus le'n huan. Cona nee di's thidteneque' ne'nglide mèna cas cón che'n Diox. <sup>15</sup> Le' biz bin co' ngulàa loo yòo be'fa na, nee di's nac mèn co' ndxòn cón che'n di's ndac che'n Diox dib nzo yéc mèn no dib nzo lezo' mèn. Mdyubdi's mèna xal mbez di's ndac no toloque ndli nèe mèna mèna loo cón che'n di's ndac.

*Trè' ndlu' le' Tad Jesús ngue tetac cón che'n mèn co' ngo xnii lampr.*  
(Mr. 4.21-25)

<sup>16</sup> Mtetac Jesús tedib di's loo mèn. Ndxab Jesús loo mèn:

—Nde niin tedib con' loo gu', ey: Yende chó mèn nzo co' ngo xnii thib lampr par tau' mèn loo xnii con' thib bald o too mèn lampr xàn' thib lun', ¿lé'? Ndxé'leque', mèna quetal lampr gáp par tenii lampr loo mèn co' ndxòo no mèn co' ndryo' le'n nyòo. Lomisque' ne, tataa ndxàal gác cón che'n di's ndac par yath yèna loo mèn par tyub xnii yéc mèn no par tyub xnii lezo' mèn loo cón che'n Diox. <sup>17</sup> Yende nec thib con' co' nacasloo loo mèn co' ne'ryo xo'fte. No yende nec thib con' co' xexte ndli mèn co' ne'yathte no co' ne'yú'de loo xnaa.

<sup>18</sup> Cona, ngue niin loo gu': Fta' gu' lugar yaa'd di's co' ngue niin loo gu' ndxè' le'n lezo' gu'. Tac mèn co' ndxòn ndac cón che'n di's ndac che'n Diox, mèna más tolo gòn ndac cón che'n di's yilóa. Per ndxe'leque', mèn co' indyalte par tolo gòn mèna cón che'n di's ndac che'n Diox, Diox tau' yéc mèna no tau' Diox lezo' mèna par gàca loo mèna, por derech, yathla's mèna cón che'n di's ndac co' mbìn mèna.

*Xna' Tad Jesús no myen' huespe' Tad Jesús nde nee máa Tad Jesús.*  
(Mt. 12.46-50; Mr. 3.31-35)

<sup>19</sup> Látha, mzin xna' Jesús no myen' huespe' Jesús co'te' nzo Jesús. Per yende mod bii gax xna' Jesús no myen' huespe' Jesús loo Jesús tant thib mèn nziri'. <sup>20</sup> Sya, mbli mèna avis loo Jesús. Ndxab mèn:

—Tad, xna' U' no myen' huespe' U' nzi par xís mèn ba'. Ndlya's myen' tyoodi's no myen' U'.

<sup>21</sup> Mcàb Jesús loo mèna. Ndxab Jesús:

—Mèn co' ndxaa'd di's co' nac di's ndac che'n Diox no nté'th mèn xal ndlu' di'sa, mèna nac xal xnan no nac mèna xal huespe'en.

*Ante gunii Tad Jesús loo mbii no loo nít co' ndxetoo loo lagun, xèegà nguled mbii no xèegà nguled ndxetoo nít loo lagun.*

(Mt. 8.23-27; Mr. 4.35-41)

<sup>22</sup> Ngòc thib con' le'n huiza. Thib huiz Jesús ngòo le'n thib yòoyaa con myen' xin' mté'th Jesús. Ndxab Jesús loo myen':

—Nda na' tedib lad ro lagun ba'.

Mtete myen' yòoyaa loo nít. Nda no myen' Jesús. <sup>23</sup> Per láth nda tetee myen' yòoyaa loo lagun, Jesús mxen mcal'. Ale mdàt Jesús. Leque hora ngro' thib mbiidó' loo lagun. Mtlo mbii, mxít too mbii nít loo lagun. No ngòo mbii nít le'n yòoyaa. Ale mzyè nít le'n yòoyaa. Casque' ryes ngòc ngue dep yòoyaa le'n nít. <sup>24</sup> Sya, jyende myen' izlyo'!, ngua lo' myen' mcal' loo Jesús. Ndxab myen' loo Jesús:

—Tad, blo' U' mcal' loo U'. Yòoyaa na' ngue dep le'n nít, yey.

Sya, ngo che Jesús. Gunii Jesús loo mbii no gunii Jesús loo nít co' ndxetoo loo lagun. Texal gunii Jesús di'sa, xèe ngure mbii no xèe ngure nít. <sup>25</sup> Sya, ndxab Jesús loo myen' xin' mté'th Jesús:

—¿Máa yalxla's co' ndxàp gu' loo Diox no loon, à', ey? Per myen', ale ndxe'leque', mzyeb tín'. No ale ante mbui' myen' no ante gunaa myen' loo Jesús. No mnibdi's myen' loo thib xtàa myen' no loo tedib xtàa myen'. Mbez myen':

—¿Chó mbi' nac mbi' ba', yey? Ale ante mnibe' mbi' loo mbii no loo nít, xèe ngure mbii no xèe ngure nít co' ndxetoo ba'.

*Trè' ndlu' cón che'n thib mbi' che'n làaz mèn gadar, mbi' co' ngo xpíi ye'rsin' loo.*  
(Mt. 8.28-34; Mr. 5.1-20)

<sup>26</sup> Ngoloa, mzin Jesús con myen' xin' mté'th Jesús le'n yèezya' co' nac che'n làaz mèn gadar. Yèezya'a nziri' tedib lad ro laguna. Nziri' yèezya'a loo xnaaleque' loo xyòn che'n làaz mèn galile, ne. <sup>27</sup> Texal mbilàa Jesús con myen' loo yòoyaa, mbii gax thib mbi' yèez Gadar loo Jesús. Ndxàcle' tiemp ngue no mbi' thib mbii co' nzib ndlau mbi'. Mbiia ngòc thib baan xpíi meexù' co' ngòo loo mbi'. Co'se' nquée mbii mbi'a, che mbi' nque tee mbi'. Ne' ne' indoo lezo' mbi' yo ban mbi' liz mbi'. Ndxè'leque', co'se' nquée mbii mbi', ndxòo mbi' le'n panteón. No ale ndxàt mbi' le'n armit co'te' nac panteón. Tac huax vez nquée mbii che'n xpíi meexù'a loo mbi'. Cona, ntedó' mèn ya' mbi' no nii mbi' con caden par ne'ryo'de mbi', ya mbi' pál. Per co'se' nquée mbii che'n xpíi meexù'a mbi', ale ncho' mbi' caden con fuerz co' ndxàp mbi' co' ndli xpíi meexù' loo mbi'. No ndli xpíi meexù' nque' mbi' carre par nda mbi' co'te' nagán. <sup>28</sup> Co'se' gunèe mbi' Jesús, xpíi meexù'a mbli mdub xib mbi' loo Jesús. No mbli xpíi meexù' ngrozèe yii no ngrozèe den mbi'. Ndxab mbi' loo Jesús:

—¿Chonon ngue go U' xí U' loo cuent cón chenen, Jesús, xgan' Diox, co' ñibe' loo ryethe con', à'? Ña'ben loo U', ne'tetide U' arid daa, Tad.

<sup>29</sup> Xpíi meexù' mbli tataa ndxab mbi' loo Jesús tac Jesús ngue ñibe' loo xpíi meexù' par ryo xpi meexù' loo mbi'. <sup>30</sup> Jesús mnibdi's loo mbi'. Ndxab Jesús:

—¿Chó lèel, à'?

Per xpíi meexù' co' nzo loo mbi' mbli par ndxab mbi':

—Daa lèe Legión.

Tataa mod ndxab mbi' loo Jesús tac thib baan ngòc xpíi meexù' co' ngòo loo mbi'a. <sup>31</sup> Sya, thidte ngòc rye xpíi meexù'a. Mna'b xpíi meexù'a loo Jesús par ne'cobiide Jesús xpíi meexù' le'n ye'rbii. <sup>32</sup> Gaxte tya nzi tee yuhua thib partid nguch cho thib yii. Rye xpíi meexù'a mna'b loo Jesús la' Jesús yòo xpíi meexù'a loo nguch. Jesús mda' lugar loo xpíi meexù' par ngòo xpíi meexù'a loo nguch. <sup>33</sup> Le' sya, ngro' rye xpíi meexù'a loo mbi'a. No ngòo rye xpíi meexù'a loo partid nguch co' nzi tee yuhua cho yiia. Ale angnziri' nguch, mque' nguch carre. Ale mbyùub nguch, ngulàa nguch le'n lagun. Ryete nguch nguáp nít. Nguth rye nguch.

<sup>34</sup> Co'se' gunèe mèn co' ngue queno ngucha le' nguch mbyùub le'n lagun, mquée nít yéc nguch, nguáp nguch nít loo lagun, ante mzyeb mèn. Mque' mèn carre. Ngua ta' mèn cuenta loo mèn yèez. No ngua ta' mèn cuenta loo mèn co' nzi tee par huan. <sup>35</sup> Ngro' mèn yèeza par ya tee hui' mèn con' co' ngòc loo nguch. Co'se' mzin mèn co'te' nzo Jesús, mzyal mèn mbi' co' ngòo xpíi meexù' looa. Ngro'le' xpíi meexù' loo mbi'. Mdub mbi' loo Jesús. Noc xable' mbi'. No ndxe'sleque' mbi' mdub mbi'. Ale ryete mèn mzyeb gunèe mèn mbi'. <sup>36</sup> Mèn co' gunèe xá mod ngro xpíi meexù' loo mbi', mèn mda' cuent loo rye mèn co' mbi'tha xá mod mblo' Jesús rye xpíi meexù' loo mbi'. <sup>37</sup> Sya, rye mèn yèezya' che'n làaz mèn gadar mtlo mna'b loo Jesús más huen ryo' Jesús tya tac anze'f mzyeb mèn gunèe mèn con' mbli Jesús loo mbi' co' mque no xpíi meexù'a. Sya, ngòo Jesús loo yòoyaa. Mbii Jesús tya. <sup>38</sup> Le' mbi' co' ngro xpíi meexù' looa na, nalyat mde'b ro mbi'. Mna'b mbi' loo Jesús ta' Jesús lugar loo mbi' par ya no mbi' Jesús. Per Jesús ne'ndalta. Mnibe' Jesús loo mbi' más huen yan' mbi'. No ndxab Jesús loo mbi':



<sup>39</sup> —Aa'a. Bere byàa par lizl. No fta' cuent loo mèn ryethe con' mbli no Diox lùu.

Pues mxen mbi' ned. Ndyàa mbi'. No mda' mbi' cuent loo chol mèn dib le'n yèezpe' mbi' cón che'n con' co' mbli Jesús loo mbi'.

*Trè' ndlu' cón che'n thib rsap Jair no cón che'n thib xa'got co' mbii gax loo Tad Jesús par ante mbuàal xa'gota ro xab Tad Jesús.*

(Mt. 9.18-26; Mr. 5.21-43)

<sup>40</sup> Co'se' mbere Jesús, mzin Jesús tedib lad ro leque laguna, ryete mèn mdyac lezo' mzin Jesús tedib vez tac ryete mèn nzi bed ye'th Jesús. <sup>41</sup> Látha, mzin thib mbi' co' ngro' lèe Jair co' ngòc jef che'n thib sinagog loo Jesús. Texal mzin mbi' loo Jesús, mdub xib mbi' loo Jesús. Nalyat mde'b ro mbi', mna'b mbi' loo Jesús par ya Jesús liz mbi'. <sup>42</sup> Tac mbi' ngue no thidte mza' co' nac rsap mbi'. No pente nzo mza' si' pchop lín' no maste. No nqueltàa nax tin liz mza'. No texal mxen Jesús ned, nda no Jesús mbi' par ned liz mbi', ndoo nque huax mènley' xís Jesús axta ndí' mèn Jesús tant huax mèn.

<sup>43</sup> Làth rye mèn ngo thib xa'got. Xa'gota ndxàcle' si' fchop lín' ndyac len thib yíiz co' ngòc yíiz ndlyath ren. Ya mbryele' rye con' mque no prob xa'gota. Mtho' xa'gota ryethe con' co' mque no prob xa'gota par ngro' tmi mdix xa'gota loo doctor por remed co' mbli doctor xa'. Per ne' doctor no ne' mèn co' ndli remed crioll ne'nglide gan nteyac mèn xa'gota. <sup>44</sup> Láth nda Jesús liz Jair con rye mèn, xex xex mbii gax xa'gota loo Jesús par ned xís Jesús. Tac mbli xa'gota xtùuz chele xa' ante gàal ro xab Jesús yac xa'. No tataaque' mbli xa'. Ante mbuàal xa' ro xab Jesús. Chàa, mbyau' loo yíiz ndlyath rena.

<sup>45</sup> Sya, mnibdi's Jesús loo mèn co' nda no Jesús loo ned. Ndxab Jesús:

—¿Chó gu' mbuàal daa, à', ey?

Ryete mèn mcàb. Ndxab mèn:

—Nec thib nu' ne'ngàalte U'.

Pedr mcàb. Ndxab Pedr con myen' xtàa Pedr loo Jesús:

—Maistr, ¿ché' iñeede U' mèn nzi chep U' rye lad no ndí' mèn U' rye lad? No mbez U': ¿Chó gu' mbuàal daa, à', ey?

<sup>46</sup> Jesús ndxab loo Pedr:

—Nzoque' thib mèn co' mbuàal daa, Pedr. Mèn mbuàal daa dib nzo yéc mèn no dib nzo lezo' mèn par mteyaquen mèn. Tac mden'en le'n lezon le' Diox mteyac thib mèn por cón che'n con' roo no con' xèn co' nzo la's niin no co' nzo la's yan.

<sup>47</sup> Co'se' ñee xa'gota yende mod ga's xa'gota loo Jesús le' xa'gota nac xa' co' mbuàal ro xab Jesús par yac xa', ante mxi'th xa'. Mbii gax xa' loo Jesús. Mdub xib xa' loo Jesús. Mblo ro xa'gota loo Jesús loo ryete mèn con' mbli xa'gota no xá mod, chàa, mbyac xa'gota loo yíiz ndlyath ren. <sup>48</sup> Jesús ndxab loo xa'gota:

—Rsap, yíiz co' mque nol mteyaclen tac lùu ngola'sque' loon no loo cón chenen. Nabe'ste byàa, ndee. Diox mtu'le' no mtàlle' Diox ryethe con' ye'rsin' le'n lezo'l, ndee.

<sup>49</sup> Be' ngue toodi's no Jesús xa'gota, mzin thib xa' guliz Jair co' ngòc jef che'n thib sinagog. Ndxab xa'a loo Jair:

—Lá'a. Ya ne'tolode li xol Maistr. Rsapl ngolole' mtin liz.

<sup>50</sup> Co'se' mbìn Jesús di's co' ndxab mbi' guliz Jair loo Jair, Jesús ndxab loo Jair:

—Lá'a, Jair. Ne'zyebtel. Ante gola's loon. Rsapl ryo xban no yac rsapl.

<sup>51</sup> Co'se' mzin Jesús liz Jair, Jesús ne'ngla'de ngòc nec thib mèn con Jesús le'n nyòo. Ante Pedr, no Cob, no Juàn, no xud mza', no xna' mza' ngòc le'n nyòo con Jesús co'te' nzo'f mza' loo mes. <sup>52</sup> Ryete mèn guliz co' nzo le'n nyòo co'te' nzo'f mza' loo mes, nzi yón' no nzi bez yèe yath por mza' co' nguth co' nzo'f loo mes. Per Jesús ndxab loo mèn:

—Ne'gón'te gu', ey. Part cón chenen, mza' ba' ne'ngathte thidtene. Loon nac mza' ba' xal thib mza' co' nax yàt.

<sup>53</sup> Per co'se' mbìn mèn tataa ndxab Jesús, ale mxìis no mèn Jesús tac mèn nonque' no naneeque' mèn le' mza' nguthque'. <sup>54</sup> Sya, mxen Jesús ya' mza'. Cabii ndxab Jesús loo mza':

—Mza', goo che, ey.

<sup>55</sup> Sya, ngro xban mza'. Leque hora, ngo che mza'. Jesús mnibe' loo xna' mza' no loo xud mza'. Ndxab Jesús:

—Fta' gu' con' hua mza', ey.

<sup>56</sup> Xud mza' no xna' mza' ante mbui' no ante gunaa loo con' co' mbli Jesús loo mza'.

Ngoloa, mnibe' Jesús loo xud mza' no loo xna' mza'. Ndxab Jesús:

—Yende chó gabte gu' loo mèn cón che'n con' mblin loo mza' ba'.

## 9

*Tad Jesús mtel' rye si' fchop myen' xin' mté'th Tad Jesús par nda te'th myen' cón che'n di's ndac no cón che'n Tad Jesús loo mèn.*

(Mt. 10.5-15; Mr. 6.7-13)

<sup>1</sup> Ngoloa, mbli Jesús par thidte mqueltàa ryete si' fchop myen' xin' mté'th Jesús loo Jesús. Mnibe' Jesús loo myen'. No mbli Jesús le' myen' ngòp con' roo con' xèn la's nii myen' no la's ya' myen' par tataa mod ya lo' myen' rye xpíi che'n meexù' co' nzo loo mèn no par teyac myen' chol mèn yíiz co' ndyac len chol yíiz. <sup>2</sup> Mtel' Jesús myen' par ya que tee myen' huax yèezya' par te'th myen' no par co myen' yalbàn cón che'n di's ndac che'n Diox xá mod ndlya's Diox ñibe'pe' Diox loo mèn. No mtel' Jesús myen' par teyac myen' mèn yíiz. <sup>3</sup> Ndxab Jesús loo myen':

—Yende con' hue' gu' co'se' tyoo gu' ned. Ne'hue'de gu' yaagà gu'. Ne'hue'de gu' morral gu'. Ne'hue'de gu' lua' gu'. Ne'hue'de gu' tmi. Ne'hue'de gu' tedib ned xab gu' co' goc gu'. Ante co' nocte gu' ba' be' gu'.

<sup>4</sup> Ndxab Jesús loo myen', ne: Chol liz mèn co'te' yòo gu' par cued gu' tya, cued gu' liz mèn axta zin huiz bii gu' le'n yèeza. <sup>5</sup> No chol yèez co'te' ne'tyalte mèn yòo gu' no cued gu' yèeza plá huiz, ryo' gu' yèeza no zib gu' yòoya's co' ndoo nii gu'. Le' sya, co'se' ngue zib gu' yòoya's co' ndoo nii gu'a o co' ndoo nii pantalón gu', con'a nee di's, yan' con' co' mbli mèn loo gu'a cón che'n Diox co'se' tyub rez cón che'n mèn dib athu loo izlyo' co'se' gàc huiz tub rez Diox cón che'n mèn.

<sup>6</sup> Ngro' myen'. Mxen myen' ned, nda myen'. Ngua que tee myen' huax yèezya'. Mque tee go myen' yalbàn cón che'n di's ndac che'n Diox. No mque tee teyac myen' mèn yíiz rye ned mque tee myen'.

*Trè' ndlu' no nda' cuent xá mod nguth Juàn Bautist.*

(Mt. 14.1-12; Mr. 6.14-29)

<sup>7</sup> Per mbi' co' lèe Herod co' ngòc gobernador tiempa mbìn cón che'n rye con' co' nde teele' mbli Jesús. Per ¡prob Herod izlyo'! Axta ne' ne' ñee Herod chó ro gòn Herod cón che'n Jesús. Tac ndxep mèn mbez peser Jesús nac Juàn Bautist co' ngro xban làth mèn nguth co' ngue tee li con'a. <sup>8</sup> Le' taamas mèn na, mbez: Peser Lii co' mde'th di's co' ndxab Diox nac xa' co' ngro xo'f loo mèn. Taamas mèn mbez: Peser nzo chó mèngool co' mde'th di's co' ndxab Diox póla nac mèn co' ngro xban. <sup>9</sup> Per Herod mbez loo mèn:

—¡Máa yob yéc gu', na! Con que yub daa mnibe' loo solndad par ngua teche solndad yéc Juàn con thib spad le'n lezi'f. Per mbi'a, ¿chó mbi' nac mbi' co' nda' mèn cuent loon le' mbi'a anze'f thib con' ngue tee li, sya?

Mcàb mèn:

—Ne no. Ne'neede nu' chó mbi' nac mbi'a, cara.

No anze'f mguen lezo' Herod, mblya's Herod ñèe Herod Jesús.

*Tad Jesús mteyar' ga'y pan no chop mbèel par nduhua ga'y mil mènbi' axta plóthe. Indxòde cuent cón che'n mèngot no cón che'n myen' bix co' nduhua hora.*

(Mt. 14.13-21; Mr. 6.30-44; Jn. 6.1-14)

<sup>10</sup> Ndxàc plá huiz ngòc con'a, mbere myen' xin' mté'th Jesús co' ngua te'th di's cón che'n Jesús. Ndye'th myen' ned ngua myen'. Mda' myen' cuent loo Jesús con' mbli myen' ned ngua myen'. Ngolo mda' myen' cuenta loo Jesús, mbe' Jesús myen'. Nda no myen' Jesús thib lad gaxte ro yèez co' lèe Betsaid. <sup>11</sup> Co'se' mbìn mèn le' Jesús nda par neda,

mdoo nque mèn xís Jesús. Mdyac lezo' Jesús ngure no mènna Jesús. Mdoodi's Jesús loo mènna cón che'n xá mod ndlya's Diox ñibe'pe' Diox loo mèn. No mteyacque' Jesús mèn yíiz.

<sup>12</sup> Co'se' nde zèle' izlyo' huiza, ryete si' fchop myen' xin' mté'th Jesús co' mtel' Jesús co' ndxe' di's che'n Jesús, mbii gax myen' loo Jesús. Ndxab myen' loo Jesús:

—Tad, co'se' yilo tyoodi's U' loo mèn ba', gunii U' Diox loo mèn par bii mèn, no par ya li mèn descans, no par ya cua'n mèn con' hua mèn le'n làth yèez ba', no ya cua'n mèn con' hua mèn liz mèn co'te' nac ranch gaxte. Tac co'te' nziri' na' ndxè' yende cón nac par hua mèn trè'.

<sup>13</sup> Jesús ndxab loo myen':

—Fta' gu' con' par hua mèn ba'.

Myen' mcàb. Ndxab myen' loo Jesús:

—Ingue node nu' huax pan. Pente nque no nu' ga'y pan no chop mbèel. ¡Pà gàal co' nque note nu' ndxè' par hua mèn ba'! Thuaque' mèn chele' nu' ya ti' pan par hua rye mèn.

<sup>14</sup> Per ne'que' ga'y mil ante mènbi' co' ngure tya. Xà' mengot no xà' myen' bix. Indxòode cuent mèngot no myen' bix co' nduhua. Jesús ndxab loo myen' xin' mté'th Jesús:

—Bnibe' gu' loo mèn par tyub mèn. No tyub thib thib tant mèn co' ne' cho' psi' cho' psi' mèn.

<sup>15</sup> Tataa mnibe' myen' xin' mté'th Jesús loo mèn par tyub ryete mènna. <sup>16</sup> Sya, mxen Jesús ga'y pana no chop mbèela. Mbui' Jesús loo bé'. Ndxab Jesús loo Diox:

—¡Ay, Dio's! Diox quix U', Diox, por pan ndxè' no mbèel ndxè'.

Sya, mchì'x Jesús pana no mbèela. Mda' Jesús pana no mbèela loo myen' xin' mté'th Jesús par li'th myen' pana no mbèela loo mèn co' nziri'a. <sup>17</sup> Nix nduhua ryete mènna axta plóthe. Mzyè lezo' mènna. Ngolo nduhua rye mènna axta plóthe, msè myen' xin' mté'th Jesús si' fchop cardor pan no mbèel co' mbyan' xo'f loo pan no mbèel co' mbyar'.

*Mon Pedr mblo ro loo Tad Jesús le' Tad Jesús nac leque yub Crist.*

*(Mt. 16.13–19; Mr. 8.27–29)*

<sup>18</sup> Thib vez co'se' nque bez Jesús Diox thib lad, no thidte ngure no myen' xin' mté'th Jesús con Jesús tya, ngolo ngurez Jesús Diox, mnibdi's Jesús loo myen' xin' mté'th Jesús. Ndxab Jesús:

—¿Ché' nzo cón ndxòn gu' chó mbez mèn nac daa, à'?

<sup>19</sup> Myen' mcàb. Ndxab myen' loo Jesús:

—Nu' ndxòn le' ndxep mèn mbez le' U' nac Juàn Bautist. Le' taandxep mèn na, mbez le' U' nac Lii. No nzore' taandxep mèn co' mbez le' U' nac xa'gool co' ngo póla, xa'gool co' mde'th di's co' ndxab Diox. Mbez mèn: Peser U' nac thib xa'goola co' ngro xban.

<sup>20</sup> Sya, mnibdi's Jesús loo myen'. Ndxab Jesús:

—¿Gu', à'? ¿Chó mbez gu' nac daa?

Pedr ndxab loo Jesús:

—U' nac Crist co' Diox mtel' loo izlyo' ndxè', co' nee di's, le' Diox mxo'f zin' loo U' par tí' no làa U' mèn loo con' ryes.

Ndxab Jesús loo Pedr:

—Lìcque' nac co' ngolo gunèel ba', Pedr. Yende cón niin lool.

*Tad Jesús nque ta' cuent loo myen' xin' mté'th Tad Jesús le' Tad Jesús gathque'.*

*(Mt. 16.20–28; Mr. 8.30–9.1)*

<sup>21</sup> Sya, Jesús mnibe' yèepe' loo myen' xin' mté'th Jesús yende chó loo gab myen' con'a.

<sup>22</sup> Ndxab Jesús loo myen', ne:

—Daa co' mbal yáal loo izlyo' xalque' ndxáal chol mèn, anze'f tyactii daa. Ryete mèngool, no mèn co' nac jef co' más ñibe' loo rye nguley', no mèn co' nac maistr co' ndlu' cón che'n ley co' mxo'f Moisés loo mèn nación Israel, mènna tè'b daa thib lad no cà

di's mèna cón chenen. Yilóa, ñibe' mèna le' taamas mèn guth daa. Per co'se' yilo son huiz mbeth mèna daa, daa ryo xban.

<sup>23</sup> Ngolóa, ndxab Jesús loo rye mèn tedib vez:

—Chele' chó gu' ndlya's que tee noque' gu' daa ned ngue tee'en, blá'ya' gu' rye con' ndxáp gu' no byathla's gu' con' co' ndxáp gu'. No atate huiz fteche ftexyath gu' xtúuz gu' no lezo' gu' par ñee gu' ñeene' ché' xec gu' tyoo nque gu' xísen co'se' li mèn ngòc nguàal con' loo gu' por cón chenen. <sup>24</sup> Tac mèn co' ante ndoo lezo' ndxath ndxey' no ndxath ndlyux mèn par que no mèn che'npe' mèn loo izlyo' ndxè', loo mèna ne'ta'de Diox lugar ban mèna thidtene loo Diox. Per mèn co' lá'ya' ryethe con' co' nac yalndac che'npe' mèn co' gác mèn li mèn gan loo izlyo' ndxè' por cón chenen, loo mèna ta' Diox lugar yòo ban no mèna Diox thidtene yilóa. <sup>25</sup> Nde niin thib con' loo gu': ¿Cón li thib mbi' gan no chó yalndac gác loo thib mbi' chele' mbi' li gan gác che'npe' mbi' dib athu izlyo', chele' mbi' tataa mod li par càba loo mbi' ryo xà' mbi' loo Diox thidtene yilóa? Yende cón li mbi' gan chele' mbi' li tataa, ¿lé'? <sup>26</sup> Tolo ndxab Jesús loo rye mèn: Chele' chó gu' thyon loo cón chenen no thyon gu' por cón che'n di's ndac co' ngon yalbàn, daa co' mbal yáal loo izlyo' xalque' ndxáal chol mèn, daa, ne, thyon por cón che'n gu' co'se' gal ñibe'en loo izlyo' xal thib rey yilóa. Huiza gác con' roo con' xèn che'n xuden Diox loon. No gác con' roo con' xèn loon por cón che'n angl natú'. <sup>27</sup> Lìcpe' ba'i, daa nii loo gu': Nzo ndxep gu' co' nzo làth na' ndxè'. Gu' ne'gathte ndoore' hui' gu' co'se' tlo Diox, ñibe'pe' Diox loo mèn loo izlyo' ndxè'.

*Tad Jesús mzye' loo loo Pedr, no loo Cob, no loo Juàn.*

*(Mt. 17.1-8; Mr. 9.2-8)*

<sup>28</sup> Co'se' ngolo nguri'th xon huiz mdoodi's Jesús di'sa, ngòc thib con'. Jesús mxen ned. Nda Jesús loo thib yii par cuez Jesús Diox tya. Mbe' Jesús Pedr, no Cob, no Juàn. <sup>29</sup> Láth ngue bez Jesús Diox, mzye' loo loo Jesús. No angndoo Jesús mquée xnii loo Jesús. Le' xab Jesús na, ante nagus bèelleque' gunaa. <sup>30</sup> Làth xtau'a, mbyú' loo chop xa'bi' co' ndoo toodi's no Jesús loo Jesús. Ryop xa'bi'a ngòc Moisés no Lii. <sup>31</sup> Co'se' mxyo'f loo ryop xa'a loo Jesús, angnziri' xa' mquée xnii tín' loo ryop xa'bi'a. No ndxaa'd bèel lad xa'. No mdoodi's no ryop xa'bi'a Jesús cón che'n xá mod gath Jesús le'n ciuda Jerusalén. <sup>32</sup> Nde nxon', Pedr con taachop myen' co' ngòc xtàa Pedra, ale nde mcal' loo myen' nziri' myen'. Mxen mcal' myen'. Pente mxec myen' mdub naa myen'. Láth ngue toodi's Jesús con Moisés ryop Lii, gunèe myen' mquée xnii loo Jesús no loo Moisés ryop Lii. <sup>33</sup> Co'se' mbii Moisés ryop Lii, láth nda quée ryop Moisés Lii loo bé' loo Jesús, Pedr ndxab loo Jesús: —Maistr, anze'f huen naca nzo na' trè'. ¿Xá nee U'? Nu' ndlya's toxcu'a' nu' son ramad par ta'i xcàl. Thiba par càl U'. Tediba par càl Moisés. No tediba par càl Lii.

¡Prob Pedr izlyo'! Leque Pedr ne'ñeede no ne'ta'de Pedr cuent cón ngue toodi's Pedr. <sup>34</sup> Láth be' ngue toodi's no Pedr Jesús, chàa, ngulàa thib beu loo yiaa. Mtau' beu loo myen'. Látha, anze'f mzyeb Pedr con taachop myen' xtàa Pedr co'se' gunèe myen' nzo myen' le'n beu. <sup>35</sup> Leque hora, mbyèn thib di's le'n beu co' mbez:

—Mbi' ndxè' nac xgan'pe' daa co' anze'f ngudloon no lezon. Bìn gu' ro mbi'.

<sup>36</sup> Co'se' ngolo mbyèn di'sa le'n beu, chàa, nguát beu. Gunèe myen' thidte Jesús ndoo. Per yende chó ngabte myen' loo Jesús. No ne' ne' yen cón ngab myen' cón che'n con' gunèe myen'a loo mèn.

*Tad Jesús mblo' thib xpìi ye'rsin' loo thib mbyòo.*

*(Mt. 17.14-21; Mr. 9.14-29)*

<sup>37</sup> Tedib huiz co' nde nque co'se' ngulàa tùub Jesús con yon myen' xin' mté'th Jesús loo yiaa, huax mèn ngro' le'n rye yèez co' nziri' gax par ngua sál' mèna Jesús. <sup>38</sup> Làth mèna nzo thib mbi'. Cabii ndxab mbi' loo Jesús:

—Maistr, bli U' favor hui' U' cón ndyac mbyòo daa ndxè'. Mbyòo thidte nac mbi' loon co' ngue non. <sup>39</sup> Anze'f nquée mbii che'n xpìi ye'rsin' mbyòo. Co'se' nquée mbii mbyòo, angndoo mbyòo, mbez yèe mbyòo. No ncau mbyòo. Ndryo' rsi'f fsin' ro mbyòo. Anze'f

ntetii mbiia mbyòo co'se' nquée mbii che'n xpìi ye'rsin' mbyòo. <sup>40</sup> Tolo ndxab mbi' loo Jesús:

—Daa mna'b loo myen' xin' mté'th U' par co' myen' xin' mté'th U' xpìi loo mbyòo daa ndxè'. Per ne'ngácte myen' ngo' myen' xpìi loo mbyòo.

<sup>41</sup> Jesús mbere ndxab loo myen' xin' mté'th Jesús:

—¡Aa, myen' co' thidteneque' indxela'ste! ¿Chonon susque' naad gu' no nguud gu', yey? ¿Axta pól naquinque' tolo go non gu' no axta pól naquinque' tolo xequen con gu', à'?

Le' loo xud mbyòoa na, ndxab Jesús:

—Huàa xi xgan'l. Yi'th xgan'l ndxè', tá.

<sup>42</sup> Per co'se' mbii gax mbyòo loo Jesús, xpìi ye'rsin'a mbli mquée mbii mbyòo. Ngulàa mbyòo loo yòo. No mbli xpìi ye'rsin'a mquée mbii yíiz enferesi mbyòo loo Jesús. Per ante gunii Jesús loo xpìi ye'rsin'a, ngro xpìi loo mbyòo. Mteyac Jesús mbyòo.

Sya, ndxab Jesús loo xud mbyòo:

—Mbyòo lùu ndxè'. Ngro'le' xpìi ye'rsin' loo mbyòo.

<sup>43</sup> Ryete mèn co' nziri' tya, ante mbui' mènà no ante gunaa mènà cón che'n con' roo no con' xèn co' mbli Diox loo mbyòoa.

*Tad Jesús mbere ngue ta' cuent loo myen' xin' mté'th Tad Jesús xá mod gathque' Tad Jesús.*

*(Mt. 17.22-23; Mr. 9.30-32)*

Láth ngüi' mènà no ñaa mènà cón che'n con' ngue li Jesús loo mbyòoa, Jesús ndxab loo myen' xin' mté'th Jesús:

<sup>44</sup> —Bìn gu' di's co' nde niin loo gu' ndxè' co' huenleque'. No ne'yathla'ste gu' di's ndxè'. Daa co' mbal yáal loo izlyo' xalque' ndxáal chol mèn, le' mèn ta'xù' daa loo mèn co' ndlya's guthxù' daa.

<sup>45</sup> Per myen' xin' mté'th Jesús ne'nda'de cuent cón nee di's co' ndxab Jesús loo myen'a. Ale mbyau' xtùuz myen' par ne'nda'de myen' cuent cón nee di'sa. No ne'ngòode valor loo myen' par ngna'b myen' loo Jesús nda' Jesús cuent loo myen' cón che'n di'sa tac mzyeb myen'. Thìba con' ndxè'.

*Myen' xin' mté'th Tad Jesús nzi toodi's. Mbez myen': ¿Chó na' gác co' más ñibe' loo xtàa na' yiloo, a'?*

*(Mt. 18.1-5; Mr. 9.33-37)*

<sup>46</sup> Le' tediba na, angnziri' myen' xin' mté'th Jesús, mbye'th xtùuz yéc myen'. Mdoodi's myen' loo xtàa myen' cón che'n chó myen' gác co' más ñibe' loo xtàa myen'. <sup>47</sup> Jesús nonque' no nda'que' Jesús cuent cón che'n xtùuz myen' co' nzi li myen' xtùuz. Sya, mxen Jesús thib mbedbi' chu'th. Mdub Jesús mbedbi' chu'tha loo xab Jesús loo myen' xin' mté'th Jesús.

<sup>48</sup> Jesús ndxab loo myen' xin' mté'th Jesús:

—Chol gu' co' ndli cas loo chol myen' bix xal mbedbi' chu'th ndxè' xal nac di's co' mté'thle' gu' loon, le' sya, ndxàca loo gu' le' gu' ndlique' cas daa, ne. Chele' gu' ndlique' cas daa, gu' ngue lique' cas loo xa' co' mtel' daa. Le' gu' co' gác más be'the làth gu' na, gu'a gác xa' co' más ñibe' làth gu'.

*Tad Jesús ndxab loo Juàn: Mèn co' indxecloode ñèe na', mènà nda' lad che'n na'.*

*(Mr. 9.38-40)*

<sup>49</sup> Le' sya, ndxab Juàn loo Jesús:

—Maistr, nu' gunèe le' thib mbi' ngo' xpìi ye'rsin' loo mèn. Ante mbez mbi' lèe U', ndryo xpìi ye'rsin'a loo mèn. Per nu' ne'tolode ngla' ngli mbi'i tac ingue que tee node mbi' na'.

<sup>50</sup> Jesús ndxab loo Juàn:

—La' gu' tolo li mbi'i. Tac mèn co' inacte ngolo ngola's na', mènà nda' lad che'n na'.

*Tad Jesús mbyoo Cob no Juàn.*



<sup>51</sup> Co'se' ñee Jesús nde zin' gaxle' tiemp bii Jesús loo izlyo' ndxè' no yáp Jesús loo bé' tedib vez, mbli Jesús ryes no ngo valor loo Jesús. Mxen Jesús ned. Nda Jesús par ned ciuda Jerusalén. <sup>52</sup> Jesús mtel' ner myen' par ngua myen' thib yèez chu'th che'n làaz mèn samari par ya cua'n myen' lugar co'te' cued Jesús con myen' xin' mté'th Jesús yál'a. <sup>53</sup> Per mèn samaritan ne'ndalte nda' mèn lugar par cued Jesús con myen' xin' mté'th Jesús le'n yèez Samari yál'a. Tac ñee mènna le' Jesús sangnde ri'th le'n yèezya' che'n làaz mèn samari par zin Jesús ciuda Jerusalén. <sup>54</sup> Co'se' ñee Cob no Juàn, co' nac xin' mté'th Jesús ne'tyalte mènna ta' mènna lugar par cued no Jesús myen' tya, ndxab myen' loo Jesús:

—Tad, ¿xá nee U'? ¿Ché' ndlya's U' le' nu' ñibe' par lyàa quì bèel loo bé' par lyux mèn ndxè' xal mbli Lii co' mde'th di's co' ndxab Diox loo mèn póla, cà'?

<sup>55</sup> Jesús xèe mbui' loo ryop myen'. No mbyoo Jesús myen'. Ndxab Jesús loo myen':

—¡Aa que naxèn gu'se! Gu' ne'ta'de cuent no ne'ñeede gu' chó loo xpìi nzo loo gu'.

<sup>56</sup> Daa co' mbal yáal loo izlyo' xalque' ndxáal chol mèn, daa ne'ngalte par teluxen mèn. Ndxè'leque', daa ndal par telá'en mèn loo con' ryes.

Sya, tolo mdoo myen' ned. Nda myen' con Jesús. Nda no myen' Jesús tedib yèez.

*Trè' ndlu' cón che'n mèn co' mdyal ndoo nque xís Tad Jesús.*

*(Mt. 8.19–22)*

<sup>57</sup> Láth ndoo Jesús ned nda Jesús con myen' xin' mté'th Jesús, ngro' thib mbi' liz mbi' ro ned. Ndxab mbi' loo Jesús:

—Tad, na, ne, ndlyaz ga non U' pál co'te' ya U'.

<sup>58</sup> Jesús mcàb loo mbi'. Ndxab Jesús:

—Hui' nexa. Mbe'th ngue no quèe lyo' co'te' nac liz mbe'th. Le' mbin bé' na, ngue no xyon mbin co'te' ndxàt mbin. Le' daa co' mbal yáal loo izlyo' xalque' ndxáal chol mèn, ingue noden lizen co'te' gàten par ryo xcuen chu'th laden.

<sup>59</sup> Ndxab Jesús loo tedib mbi':

—Ftoo nque xísen. Nda na'.

Per mbi' ndxab loo Jesús:

—Tad, fta' thib tiemp loon ner ga casen xuden co' ngolo nguth. Yiloa, sya, nda na'.

<sup>60</sup> Jesús mcàb loo mbi'a. Ndxab Jesús:

—Hui' nexa. Mèn co' ne'tyalte yila's loo cón chenen, mènna nac xal mèn nguth loon. La'a ya ca's mèn guliz lùu thebol xud lùu co' nguth. Per ndxe'leque', lùu ya te'th no col yalbàn cón che'n di's ndac loo mèn xá mod ndlya's Diox ñibe'pe' Diox loo mèn.

<sup>61</sup> Ndxab tedib mbi' loo Jesús, ne:

—Tad, daa too nque xís U', ne. Per fta' U' thib tiemp loon par ga niin Diox loo mèn gulizen.

<sup>62</sup> Per ale ndxab Jesús loo mbi':

—Hui' nexa. Daa nde nii thib con' lool: Le' thib mbi' ndyen yaarad no ngue gan' mbi' yòo con ngon. No láth ngue gan' mbi' yòo con ngon, chàa, mbui' mbi' par ned xís mbi' par ñee mbi' ñeene' ché' nalì nac surc co' ngue que' mbi'. Látha, chàa, mcan' yaarad thib lad le'n surc. Ya ne'ngro'de nalì surc mbi'. Lomisque' mod ne, mèn co' tlo li con' co' ñibe'en loo mèn no yiloa más li mènna cas loo cón che'n taamas mèn leque li mènna cas loo cón chenen, mènna yende chó juis par ñibe' Diox loo mènna par ya xo'f zin' mènna con' co' ñibe' Diox loo mènna.

## 10

*Tad Jesús ngue tel' ayon psi' mèn par ya te'th mèn no ya lo mèn yalbàn cón che'n di's ndac no cón che'n Tad Jesús loo mèn.*

<sup>1</sup> Ngolo mdoodi's Tad Jesús di'sa loo mènna, Tad Jesús mcui ayon psi' mèn. No mtel' Tad Jesús chop chop mèn par ya ner mènna loo Tad Jesús ryete yèez no ryete lugar co'te' naquin ya Tad Jesús. <sup>2</sup> Ndxab Tad Jesús loo mènna:

—Lìcpe' ba'i, anze'f huax mèn nzo co' ndxàal gòn cón che'n di's ndac par lyá' mènna loo ryethe con' ryes xal ndláp mèn cosech par ne'tyuhuante cosech. Per yende huax mèn

co' ya lo yalbàn loo mènà. Cona, ngue niin loo gu': Gurez gu' Tad Diox. No guuz gu' loo Tad Diox tel' Tad Diox mèn par ya te'th mèn no ya lo mèn yalbàn cón che'n di's ndac loo mènà xal co'se' ntel' thib patrón moz par ya láp moz cosech patrón. <sup>3</sup> Huàa gu' loo mènà. Hui' gu' nexa. Na ngue tel' gu' par ya gu' loo mènà co' nac mèn nayi' xal thib mbacxil' co' yub mbii loo mbée par co gu' yalbàn no te'th gu' cón che'n di's ndac loo mèn nayi'a. <sup>4</sup> Lomisque' niin loo gu', ne: Ne'hue'de gu' yex lua' gu'. Ne' ne' hue' gu' billeter gu' co' ngosua' gu' tmi. Ne'hue'de gu' chop son ned yilid. No maste be' gu' yilid co' ngue tee ni gu' ba'. Ne'lyen'te gu' ned arid par nii gu' Diox loo chol mèn co' ndoo ned. <sup>5</sup> Co'se' yòo gu' chol liz mèn, ner gunii gu' Diox loo mèn. No gab gu' loo mèn guliza: Nu' ndlya's nagàl yo lezo' gu' loo Diox. <sup>6</sup> No chele' liz mèn co'te' cued gu'a nac mèn co' nagàl nzo lezo' loo xtàa mèn no nziri' mènà rye nda mèn no rye ndye'th mèn con xtàa mèn co'se' ñii gu' Diox co' nac di's ndac loo mènà no huen yan' lezo' mènà con gu', cued gu' liz mènà sya. Nacquele' mènà, inagàlte nzo lezo' mènà con xtàa mènà no inzide rye nda no rye ndye'th mènà làth xtàa mènà co'se' ngue nii gu' Diox loo mènà, sya, ne'tyalte mènà nii mènà Diox loo gu'. Ne'cuedte gu' liz mènà. <sup>7</sup> Nacquele' mènà huen nzo lezo' ñèe mènà gu' na, cued gu' liz mènà no yan' gu' liz mènà. Hua gu' no gu' gu' con' co' cuec mènà loo gu' tac thib mèn co' ngue li zin' ndxàp derech hua mèn no gu' mèn por zin' co' ngue li mènà. Cona, ngue niin loo gu': Ne'que teede gu' liz por liz mèn yèeza. <sup>8</sup> Co'se' zin gu' chol yèez no ta' mènà lugar yòo gu' yèeza, hua gu' no gu' gu' con' cuec mènà loo gu'. <sup>9</sup> Fteyax gu' mèn yíiz co' nzo yèeza. No fta' gu' cuent loo mènà nde zin' gaxle' co'se' Diox ñibe'pe' loo mènà. <sup>10</sup> Per chele' gu' yòo le'n thib yèez co'te' ne'tyalte mèn yèeza ta' mènà lugar par yòo gu' yèeza, gro' gu' par ned no alanleque' gab gu' loo mènà loo xnaa: <sup>11</sup> Yende cón lii, cara. Axta yòoya's co' nac che'n liz gu' no co' nac che'n làaz gu' co' mquée nii nu', no co' mquée nii cazon nu', zib nu' loo gu' co' càb loo Diox cón che'n gu' ba' co'se' tub rez Diox cón che'n gu'. No ndlya's nu' le' gu' non no ta' gu' cuent co' huenleque' nde zin' gaxle' huiz co'se' gàc huiz co' ndlya's Diox ñibe'pe' Diox loo gu'. <sup>12</sup> Cona, ngue niin loo gu': Co'se' gàc huiz co'se' tub rez Diox cón che'n mèn, huiza gàc más yaltii loo mèn yèeza leque loo mèn ciuda Sodom.

*Trè' ndlu' cón che'n mèn yèez co' ne'ndalte ngòn cón che'n Tad Jesús.  
(Mt. 11.20-24)*

<sup>13</sup> Ay, prob gu' izlyo', mèn yèez Corazín. No prob gu' izlyo', mèn yèez Betsaid. Tac chele' loo mèn ciuda Tir no loo mèn ciuda Sidón ngàc yalguzye' co' ngòc loo gu'a, ne' pól mtlo ngalàa yéc mènà no ngalàa lezo' mènà par nge' mènà mod co' ngòp mènà por xquin mènà no por xtol mènà. No nglu' mènà le' mènà nxi yéc no nxi lezo' mènà. Sya, ngàca loo mènà xal mèn co' ndxoc dib ndoote lar' nagat, co' nee di's, anze'f nxi lezo' mènà. <sup>14</sup> Per nalle', hui' gu' nexa. Más yaltii gàc loo gu', mèn yèez Corazín no loo gu' mèn yèez Betsaid, co'se' gàc huiz co'se' tub rez Diox cón che'n mèn leque loo mèn ciuda Tir no loo mèn ciuda Sidón. <sup>15</sup> Le' gu' na, mèn yèez Capernaum, ¿ché' ngue li gu' cuent no ché' ndxela's gu' le' gu' yòo loo bé', cà'? Yende xàa. Ndxle'leque', gu' lyàa loo quìi no loo bèel co' nac ye'rbiil co'te' yòo mèn, mèn co' Diox co' xà' loo Diox yiloo.

<sup>16</sup> Mèn co' gòn di's co' tyoodi's gu', mènà gòn di's co' tyoodizen loo mèn. Le' mèn co' tè'b gu' no mèn co' chep di's gu', mènà tè'b daa no chep di's mènà daa, ne. Lomisque' ne, mèn co' tè'b daa no mèn co' chep di's daa, mènà tè'b xa' co' mtel' daa no chep di's mènà xa' co' mtel' daa.

*Trè' ndlu' cón che'n xá mod ngua ayon psi' mèn co' nguaa no xá mod ndye'th mènà.*

<sup>17</sup> Co'se' ndye'th ryete ayon psi' mèn co' mtel' Jesús loo Jesús, anze'f ndyac lezo' mènà co'se' mbere mènà, ndye'th mènà. Ndxab mènà loo Jesús:

—Tad, axta xpìi che'n meexù' mbìn ro nu' co'se' mbez nu' lèe U'.

<sup>18</sup> Jesús ndxab loo mènà:

—Aa. Huenque' gunèe gu' ngòc huax con' ned ngua gu'. Per daa masre' con' gunèn. Tac daa gunèe co'se' ngro' Mebizya loo bé', ngulàa Mebizya loo izlyo'. Ngulàa Mebizya

loo izlyo' xal thib bèel gundi. <sup>19</sup> Daa mnibe' loo gu' no mblin le' gu' ngòp con' roo no con' xèn la's nii gu' no la's ya' gu' par loo tub gu' loo mbel', no loo tub gu' loo mbacxub, no par li gu' gan loo Mebizya co' lya's teti gu'. No ne'gàcte nec thib yalquii loo gu' láth gac con'a loo gu'.

<sup>20</sup> Ndxab Jesús loo mènà, ne:

—Ne'tyacte lezo' gu' arid por ndxòn xpìi ye'rsin' ro gu'. Ndxè'leque', ftac lezo' gu' le' lèe gu' ndub loo libr co' ngue no Diox loo bé'.

*Tad Jesús anze'fmdyac lezo' loo Diox xal ngua myen' no xal ndye'th myen'.*

*(Mt. 11.25-27; 13.16-17)*

<sup>21</sup> Leque hora, Xpii Natú' mbli le' Jesús anze'fmdyac lezo' no mxyo'fnde' mxyo'fndla' lezo' Jesús. Ndxab Jesús loo Diox:

—Ngue bezen di's roo no di's xèn no di's natú' loo U', Pay, tac U' ñibe'pe' loo bé' no loo izlyo' no nac bé' no izlyo' che'npe' U'. Más de cona, U' mcasloo cón che'n di's ndac co' ndlu' xá mod ñibe'pe' U' loo mèn, loo mèn co' nde'f di's ndyac ndxác li huax con' no loo mèn co' nde'f di's ndyac ndxác mènà ndxòn mènà huax con'. Ndxè'leque', ndlu' U' con'a loo mèn co' nac xal myen' bix, co' nee di's, mèn co' ne'gàcte no co' nac mèn co' lya's té'th. Tataa mbli U'i, Pay, tac tataa gunee lezo' U' li U'i loo mèn.

<sup>22</sup> Ngoloa, ndxab Jesús loo mènà, ne:

—Hui' gu' nexa. Niin con' ndxè' loo gu', ne: Diox xuden thidte vez mda' ryethe con' loon par ñibe'en loo ryethe con'. Yende chó mèn nda' cuent no non mèn chó nac daa, daa co' nac xgan' Diox. Ndxè'leque', yub Diox co' nac xuden naneei no nona. Lomisque' ne, yende chó mèn non chó nac xuden. Ante daa co' nac xgan' Diox xuden non chó nac xuden. No mèn co' yub daa nda' lugar non chó nac xuden, mènà non no nanee mènà chó nac xuden, ne.

<sup>23</sup> Le' sya, mbui' Jesús loo myen' xin' mté'th Jesús. No ndxab Jesús ante loo myen' xin' mté'th Jesús:

—Huen nda mèn, mèn co' ngue hui' con ngudloope' mèn loo con' ndxác làth gu' co' ndlin. <sup>24</sup> Daa ngue nii loo gu': Huax mèn co' mde'th di's co' ndxab Diox no huax mèn co' ngòc rey póla, mènà mbly'a's ngüi' loo con' co' ngue hui' gu' nalle'. Per ne'ngüi'de mènà loo con' ndxè'. Mbly'a's mènà ngòn mènà cón che'n con' co' ndxòn gu' nalle', ne, per ne'ngàcte mèn ngòn mènà con' co' ngue yòn gu' nalle'.

*Thib mbi' che'n yèez Samari mbli' mod co' ndxàal que' lezo' mèn ñèe mèn mèn co' nac hues xtàa mèn.*

<sup>25</sup> Sya, ngo too thib mbi' co' nac maistr co' ndlu' cón che'n ley co' mxo'f Moisés loo mèn làth mènà. Mnibdi's mbi' loo Jesús par ñee mbi' ñeene' cón càb Jesús. Ndxab mbi' loo Jesús:

—Maistr, ¿cón ndxàal lin par gòo ban non Diox loo bé' thidtene, à'?

<sup>26</sup> Jesús mcàb. Ndxab Jesús loo mbi'a:

—¿Cón mbez di's co' ndub loo ley co' mxo'f Moisés loo mèn póla, à'? ¿Cón nee di's di'sa co'se' ndlabl di'sa, à'?

<sup>27</sup> Mbi' co' nac maistra mcàb loo Jesús. Ndxab mbi':

—Di's co' ndub loo ley co' mxo'f Moisés loo mèn mbez: Fque' lezo' gu' Tad Diox gu' dib nzo yéc gu' no dib nzo lezo' gu'. No fque' lezo' gu' gunèe gu' hues xtàa gu' xalque' ngue lezo' gu' ñèe gu' gu'.

<sup>28</sup> Sya, ndxab Jesús loo mbi' co' nac maistra:

—Anze'f huen mcàbl, ndee. Yende cón niin lool. Chele' lùu, lìcque', ndli con'a, yòo ban no lùu Diox thidtene.

<sup>29</sup> Per mbi' co' nac maistr co' ndlu' cón che'n ley co' mxo'f Moisés loo mèn mden' lezo' le' Jesús mbli par mden' mbi' di's. No mden' mbi' nèe ngulàa di'sa le'n lezo' mbi'. Sya, mbly'a's mbi' mdub mbi' rason che'n mbi' cón che'n di's co' mnibdi's Jesús loo mbi'. Por cona, ndxab mbi' loo Jesús:

—Tad, ¿chó mèn nac hues xtàa daa?

<sup>30</sup> Mcàb Jesús loo mbi'. Ndxab Jesús:

—Nde niin thib con' lool, mbi': Thib mbi' nde làa tùub par ned ciuda Jerusalén. Nda mbi' par ned ciuda Jericó. Per láth nde làa tùub mbi'a, ngro' plá huan' loo mbi'. Mbli huan' huan' che'n mbi' axta xab mbi' co' noc mbi' mbli huan' huan'. Mda' huan' che'n mbi'. Casque' yamerle' nguth huan' mbi'. Ngolo mbli huan' con'a, mxon' huan'. <sup>31</sup> Per le'pe' ngolo xec ngòc con'a, nde làa tùub thib mbi' co' ngòc nguley' leque par neda. Per co'se' gunèe mbi' co' ngòc nguley'a nax prob mbi'a tya, ale nguri'th mbi' co' ngòc nguley'a thib lad co'te' nax prob mbi'a. <sup>32</sup> Lomisque', nde làa tùub tedib mbi' co' nac mbi' co' nxo'f zin' le'n templ tiempa. Co'se' gunèe mbi' nax mbi'a tya, ale sangnguri'th mbi'a thib lad co'te' nax prob mbi'a. <sup>33</sup> Per ndxe'leque', thib mbi' co' nac mèn che'n thib yèezya' che'n làaz mèn samari, mbi'a ndyee viaj. Nde riid mbi'a par neda, ne. Co'se' gunèe mbi' samaritan nax prob mbi'a tya, mblyat lezo' mbi' samaritan gunèe mbi' samaritan prob mbi' co' naxa. <sup>34</sup> Sya, mbii gax mbi' samaritan loo mbi' co' naxa. Mbli mbi' samaritan remed lad mbi' co' mbuí'a con' aceit no vin. No mchi'x mbi' lar' lad mbi'a. Ngoloa, mxít che mbi' samaritan mbi'a. Mteque' mbi'a mbi' co' mbuí'a burr. Mbe' mbi'a mbi' co' mbuí' par làth yèez. Mna'b mbi' posad loo mèn yèeza par quenap mèn mbi' co' mbuí'a liz mèn yál'a. <sup>35</sup> Co'se' ngonni izlyo' tedib huiz co' nde nquea, mdix mbi' si' fchop pes loo mèn co' mda' posada. No ndxab mbi' samaritana loo mèn: Fquenap gu' mbi' ndxè'. Chele' mbi' tolo li gast, co'se' beren ndyalen, sya, tolo quixen tmi loo gu' cón che'n gast co' tolo li mbi'.

<sup>36</sup> Ngoloa, ndxab Jesús loo mbi' co' nac maistr:

—¿Xá neel, maistr? Loo yon mèn, ¿chó mèn ndyacl ngòc hues no xtàa che'n prob mbi' co' mbli huan' huan'a, à'?

<sup>37</sup> Sya, mcàb maistra. Ndxab maistr loo Jesús:

—Ndyaquen mbi' co' más mblyat lezo' gunèe prob mbi' co' mbuí'a ngòc hues no xtàa mbi'a.

Sya, ndxab Jesús loo mbi' co' nac maistr:

—Byàa. No huàa li loo mèn huesl no xtàal xal mbli mbi' samaritana loo mbi' co' mbuí'a, ndee.

*Tad Jesús ngua too naa Mart ryop Mari liz ryop bél Mart Mari.*

<sup>38</sup> Le' Jesús na, mxen ned. Nda Jesús. Mzin Jesús thib yèez chu'th. Mzyál' Jesús thib xa'got co' lèe Mart. Mart ndxab loo Jesús:

—Tad, nda na' lizen par cued U' plá huiz lizen.

Sya, ngua Jesús liz Mart ndxep tiemp. <sup>39</sup> Marta mque no thib bél Mart co' ngro' lèe Mari. Mari más mbli mdub Mari loo Jesús par ndxòn Mari di's co' ndyoodi's Jesús. <sup>40</sup> Le' Mart na, más mbix no rsin' Mart. Sya, mbii gax Mart loo Jesús. Ndxab Mart loo Jesús:

—Tad, ¿ché' indyacte U' ilé'de nac co' ngue li Mari, bél daa ba', tac mblá' Mari daa? Ale thidten ngue bix no rsin'en ndxè'. Guuz U' loo Mari lyath no Mari daa.

<sup>41</sup> Jesús mcàb loo Mart. Ndxab Jesús:

—Mart, ale más ndyóol gac loo rsin'l co' ngue lil ba'. <sup>42</sup> Per nzo thidte con' co' más naquin cui mèn. Mari mbye'th yéc li Mari co' nac más con' ndac. Le' sya, con' ndac co' ngue li Mari ndxè', yende chó mèn techei loo Mari. La' taa tub Mari loon.

## 11

*Tad Jesús ngue lu' loo myen' xin' mté'th Tad Jesús xá mod cuez myen' Diox.*

*(Mt. 6.9-15; 7.7-11)*

<sup>1</sup> Thib vez Jesús ngue bez Diox thib lugar. Co'se' ngolo ngurez Jesús Diox, thib myen' xin' mté'th Jesús ndxab loo Jesús:

—Tad, blu' U' nu' xá mod cuez nu' Diox xal mblu' Juàn Bautist myen' xin' mté'th Juàn Bautist.

<sup>2</sup> Jesús ndxab loo myen' xin' mté'th Jesús:

—Co'se' cuez gu' Diox, taandxè' gurez gu' Diox:

Diox, U' co' nac xud nu'; U' co' nzo loo bé'; nu' ndlya's le' U' li le' ryethe mèn loo izlyo' gab le' natú' nac lèe U'. Lomisque', ña'b nu' loo U', bli U' par gac yalnibe' che'n U' loo izlyo' ndxè'. No gac xal nee lezo' U' loo izlyo' ndxè' xalque' ndxàc yalñibe' che'n U' loo bé'.

<sup>3</sup> Lomisque' ne, ña'b nu' loo U': Bli U' par que no nu' con' naquin nu', que naca con' hua nu', que naca chol con' naquin nu' thib huiz no tedib huiz.

<sup>4</sup> Fton' U' xtol nu' no xquin nu' tac nu', ne, nteri'th ntecan' xquin no xtol che'n ryete mèn co' ndli con' ye'rsin' loo nu'. Ne'lá'ya'de U' nu' par cobyá' Mebizya nu' no li Mebizya preb nu' par ñeene' ché' tli nu' con' ye'rsin'. Ndxé'leque', ña'b nu' loo U' ftelá' U' nu' loo chol con' ryes no loo chol con' ye'rsin'.

<sup>5</sup> Ndxab Jesús thib di's loo myen' xin' mté'th Jesús, ne:

—Angab na'i, chele' chó gu' ngue no thib amiu gu' no yi'th amiu gu' liz gu' coyor yál' no ñee amiu gu'a loo gu': Amiu, bli favor, techè son yèth loon, cara. <sup>6</sup> Tac thib amiu daa co' nac mèn tith ngolo xec mzin lizen nalle'. No nalle' nec thib sa yèth yende le'n roob par ta' nu' sa lua' rsè amiu daa. <sup>7</sup> Más de cona, angab na'i, mbi' co' nac vecin gu'a, mbi' càb loo gu' par le'n nyòo. Ñee mbi' loo gu': Ne'li xoltel daa, cara. Ndale' yál' nalle'. Ryo' quej ndoo nau'. Más de cona, myen' bix nzo cuat nu' loo lun'. Nzi yàt myen'. Yende mod yiche nu' par ta' nu' yèth càal, cara. <sup>8</sup> Per na nii loo gu': Mastale' indlya'ste xa' co' nac vecin gu'a yiche xa' par ta' xa' con' naquin gu', per ndxe'leque', ngo cheque' xa'bi'a con sa'l xa' par mda' xa' ryethe con' naquin gu' par ne'tolode li xol gu' xa'. <sup>9</sup> Por cona, ngue niin loo gu': Co'se' cues gu' Diox, gurez gu' Diox taandxè' mod xal ndli mèn co' ña'b con' loo xtàa mèn. Le' sya, Diox lique' par que no gu' con' co' ña'b gu'a. No co'se' cues gu' Diox, bli gu' loo Diox xal mèn co' mtuhuan thib con'. Yilóa, noo noo ncu'a'n mèn con'a axta zyal con'a loo mèn. Le' sya, tataa mod Diox li par ta' Diox con' co' ngue na'b gu' loo Diox. No co'se' cues gu' Diox, bli gu' xal mèn co' nte's ryo' axtaque' xal' mèn ro ryo' par yòo gu'. Tataa mod gacque' loo gu' co' ña'b gu' loo Diox. <sup>10</sup> Tac mèn co' tolo mbez Diox dib nzo yéc mèn, no dib nzo lezo' mèn, Diox li cas loo mèn. No lyath no Diox mèn no xal' Diox ned no xal' Diox yó' par que no mèn con' co' tolo ña'b mèn loo Diox.

<sup>11</sup> Ngolóa, mnibdi's Jesús thib di's loo mèn. Ndxab Jesús:

—¿Ché' nzo chó gu' co' nac gundan loo xin' gu' co' nzo trè', angab na'i, chele' xin' gu'a ña'b sa pan hua xin' gu', ché' tli gu' ryes ta' gu' thib quèe hua xin' gu'a co'se' ña'b xin' gu' pan, cà'? o ¿ché' tli gu' ryes ta' gu' thib mbel' hua xin' gu' co'se' ndlya's xin' gu' hua xin' gu' thib le' mbèel, cà'? <sup>12</sup> No co'se' ña'b xin' gu' thib ngò par hua xin' gu', ¿ché' tli gu' ryes ta' gu' thib mbacxub hua xin' gu', cà'? Yende mod li gu' tataa loo xin' gu', ¿lé'? <sup>13</sup> Mastale' nac gu' gundan nalas no gundan ye'rsin', gu' ta'que' con' ndac co' ña'b xin' gu' loo gu', ¿lé'? Chele' gu' tataa nque' lezo' ñee gu' xin' gu', ale'que' xud gu' Diox co' nzo loo bé' ne' li par làa xud gu' Diox Xpii Natú' loo mèn no yo Xpii Natú' loo mèn no ñibe'pe' Xpii Natú' loo mèn, mèn co' ña'b loo Diox par li Diox gàca tataa loo mèn.

*Mèn ngue quexù' ngue que' fals Tad Jesús le' Tad Jesús ndxàp con' la's nii Tad Jesús no la's ya' Tad Jesús por cón che'n meexù'.*

*(Mt. 12.22-30; Mr. 3.19-27)*

<sup>14</sup> Ngo thib mbi' co' mque no thib xpii che'n meexù'. Xpiia mbli ngòc mud mbi'. Per co'se' mblo' Jesús xpii loo mbi'a, ngóc mbi' mdoodi's mbi' tedib vez. Le' mèn co' ngure loo Jesús co' gunèe mblo' Jesús xpii loo mbi'a na, ante mbui' mèn no ante gunaa mèn loo con' mbli Jesús. <sup>15</sup> Per taandxep mèn co' ngureri' tya, mèn ndxab loo xtàa mèn:

—Tyè'. Mbi' ba' ngo' xpii che'n meexù' loo mèn ante por cón che'n Beelzebú co' nac jef che'n rye xpii meexù'.

<sup>16</sup> Le' taamas mèn na, ndxab loo Jesús ale angli Jesús gac thib con' roo no thib con' xèn loo bé' co' gac xal thib señ par hui' mèn par ñee mèn ñeene' ché' tác Jesús li Jesús yalguzye' co' gac thib señ loo mèn. <sup>17</sup> Per Jesús nonque' xtùuz co' ndli mèn xtùuz le'n lezo' mèn. Ndxab Jesús loo mèn:



—Nde niin thib con' loo gu': Chele' thib nación gac rol mèn co' nzo naciona no leque mènà bixyath contra xtàa mèn, sya, leque mènà li par lyux nación mènà. Lomisque' ne, chele' chop ned mèn guliz naban thidte yòo no cua'n leque mènà xó' loo xtàa mènà, por lult lyux mèn guliza. <sup>18</sup> Chele' rye xpìi che'n meexù' co' ñibe' Beelzebú tlo gac rol, sya, leque xpìi meexù'a cue contra xtàa xpìi. ¿Xá mod tolo ñibe' Beelzebú loo xpìia, sya? Con' ndxè' nac di's co' ngue niin loo gu' tac gu' mbez loon le' daa ngo' xpìi che'n meexù' loo mèn por cón che'n Beelzebú co' nac jef che'n xpìi che'n meexù'. <sup>19</sup> Chele' daa ngo' xpìi che'n meexù' loo mèn por cón che'n Beelzebú, ¿por cón che'n chó xa' ndli mèn co' nqueltàa no gu' par co' mènà xpìi che'n meexù' loo mèn, sya? Mènà tub rez cón che'n gu' par non gu' ilé'de nac co' ngue li gu' xtùuz. <sup>20</sup> Per ndxe'leque', daa ngo' xpìi che'n meexù' loo mèn xalque' nac con' roo con' xèn che'npe' Diox co' nzo la's niin no la's yan. No con' co' ndlin loo mènà ndlu' loo mènà mzinle' tiemp co'se' tlo ñibe'pe' Diox loo mèn. Thiba con' ndxè'.

<sup>21</sup> Le' tediba na, nde niin tedib con' loo gu': Co'se' nac thib mbi' mbi' tín', mbi'a ngue no huax scopet liz mbi'. Ndyen mbi' scopet mbi' par quenap mbi' liz mbi'. Le' sya, con scopet co' nzo ya' mbi' co' nquenap mbi' liz mbi'a, segur nzo ryethe con' co' ndxàp mbi' liz mbi'. Yende chó mèn li ryes bii gax loo liz mbi'. <sup>22</sup> Per chele' tedib mbi' co' nde li huan' liz mbi'a nac más mbi' tín' leque mbi'a, le' sya, mbi' co' ndea teche rye scopet che'n ner mbi' co' ndli cuent anze'f mbi'a, co' nac leque mbi' co' ndxàp yalxla's yende chó bii gax loo liz mbi' por ryete scopet co' mque no mbi' liz mbi'. Tataa mod li mbi' co' ndea gan ryete con' co' mque no ner mbi' liz mbi' axta li'th mbi' ryete con' co' mbli huan' mbi' liz mbi'a loo xtàa mbi'.

<sup>23</sup> Tolo ndxab Jesús loo mènà:

—Mèn co' inda'de lad chenen, mènà nac ngolo ngola's loon. Le' mèn co' indlyath node daa loo zin' co' mxo'f zin' xuden loon, ndxe'leque', mènà nteza' zin' co' ngue lin.

*Trè' ndlu' cón che'n thib xpìi meexù' co' ngro'le' loo thib mbi'. No ngoloa, mbere xpìia, ngòo xpìia loo mbi' tedib vez.*

*(Mt. 12.43-45)*

<sup>24</sup> Co'se' ndryo' thib xpìi che'n meexù' loo thib mbi' por cón chenen, xpìi che'n meexù' ndryo'. Nda que tee xpìi co'te' nagán par cua'n xpìi che'n meexù' co'te' li xpìia descans. Per co'se' ne'yilode zyal xpìia co'te' li xpìi descans, sya, leque xpìi gab loo lezo' xpìi: Capas daa ale beren, ndyàan loo mbi' co'te' ngòc lizen co'te' ngro'en. <sup>25</sup> Per co'se' mbere xpìia, ndye'th xpìia loo mbi'a, ñèe xpìi ndxe'sleque' mbi' ngue tee mbi'. No ante nambii ñaa le'n lezo' mbi' xal thib le'n nyòo co' ante nítleque' ndlyo'f no xal thib liz mèn co' natoxcua' per tarte yòo Xpìi Natú' che'n Diox loo mbi'a. <sup>26</sup> Sya, nda xi xpìia taagaz xpìi co' nac más xpìi ye'rsin' leque ner xpìia par queltàa no xpìia ryete gaz xpìia par thidte ngòc rye xpìia ngòo rye xpìia loo mbi'a. Por lult más nazab ngòca loo mbi' leque ndoore' ryo' ner xpìia loo mbi'.

*Tad Jesús ndxab loo mèn: Huen nda mèn, mèn co' ndxòn di's co' mbez Diox.*

<sup>27</sup> Be' ndoo toodi's Jesús loo mènà, ngrozèe thib xa'got làth mènà. Ndxab xa'gota loo Jesús:

—Huen nda xa'got co' nac xna' U' co' mdoo nac U', U' co' nac xin' xa'gota. No huen nda xa'gota por nacque' xa' xna' U' tac mda' xa'gota xiz xa'gota ngòoz U'.

<sup>28</sup> Jesús mcàb loo xa'gota. Ndxab Jesús:

—Lìcque' nac di's co' neel ba'. Yende cón niin lool. Per más huen nda mèn co' ndxòn di's no co' ndxaa'd di's co' mbez Diox loo mèn par tyubdi's mènà di's co' ñibe' Diox loo mènà par li mènà.

*Trè' ndlu' le' mèn ye'rsin' mbez loo Tad Jesús li Tad Jesús thib yalguzye' loo mènà.*

*(Mt. 12.38-42; Mr. 8.12)*

<sup>29</sup> Látha, tolo mqueltàa mèn loo Jesús. Le' Jesús na, mtlo mdoodi's loo mènà. Ndxab Jesús loo mènà:

—Mèn co' naban le'n tiemp ndxè' axta arid nazab nac mènna. No ale ña'b mènna loon anglu'en thib con' loo mèn co' gac xal thib señ loo mènna. Per ya ne'liden nec thib con' loo mènna. Ante tan cuent loo mènna cón che'n con' co' ngóc loo thib mbi' co' ngro' lèe Jonás, mbi' co' mde'th di's co' ndxab Diox loo mèn. Con' co' ngóc loo mbi' co' ngro' lèe Jonás gac xal thib señ loo mèn co' naban tiemp ndxè'. <sup>30</sup> Texal ngóc thib con' loo mbi' co' ngro' lèe Jonás co' ngóc thib señ co' mbui' mèn no co' gunaa mèn, mèn co' ngóc mèn ciuda Nínive tiempa, tataa gaca loon, ne, daa co' mbal yáal loo izlyo' xalque' ndxáal chol mèn loo izlyo', loo mèn co' naban tiemp ndxè' xal ngóc señ loo mbi' co' ngro' lèe Jonás. <sup>31</sup> Co'se' gac huiz co' tub rez Diox cón che'n mèn co' naban tiemp ndxè', huiza thib xa'got co' ngóc rein loo thib nación par ned sur, xa'gota ryo' too loo mèn co' naban tiemp ndxè' no quexù' xa'gota mèn co' naban tiemp ndxè' loo Diox. Tac xa'gota ngro' co'te' ngóc nacionpe' xa', nación co' ngóc tedib lad ro izlyo' par ned sur, par mbi'th yòn xa'gota di's co' anze'f ngóc Salomón. Per nalle' nzo thib mbi' co' nac más mbi' roo mbi' xèn leque Salomón làth gu'. No ale indlide gu' cas mbi'. <sup>32</sup> No co'se' gac huiz tub rez Diox cón che'n mèn co' naban tiemp ndxè', mèn co' ngo ban ciuda Nínive ryo' too loo mèn co' naban tiemp ndxè'. No quexù' mèn co' ngo ban ciuda Nínive mèn co' naban tiemp ndxè' loo Diox tac mèn ciuda Nínive ngulaa yéc no ngulaa lezo' no mzye' mod co' ngòp mèn ciuda Nínive co'se' mbìn mènna xti's Diox co' mde'th Jonás co' ndxab Diox loo mènna. No nalle' nzo thib mbi' co' nac más mbi' roo mbi' xèn leque Jonás làth gu' no ale indlide gu' cas mbi'.

*Tad Jesús ngue bez loo mèn le' ngudloo mèn nac xal thib lampr loo mèn.*

*(Mt. 5.15; 6.22-23)*

<sup>33</sup> Lomisque' ne, yende chó mèn nzo co' co xniì thib lampr no yiloo casloo mèn lampra thib lugar co'te' naga's. No ne' ne' tau' mèn loo lampra con thib cajón par yau' loo xniì. Ndxè'leque', quetal mèn lampr gáp par gápique' tenii lampr loo mèn co' ndxòo no loo mèn co' ndryo' le'n nyòo. <sup>34</sup> Ngudloo mèn ndli ngüi' mèn ned ndyee mèn. Le' xtùuz mèn na, ndli par nteche ntexyath mèn lezo' mèn loo con' huen no loo con' ye'rsin'. Chele' gu' nalì no nambii ndli xtùuz, le' sya, nalique' no nambiiique' nac yalnaban gu' loo Diox. No chele' ngudloo gu' ihuente ndli, indxú' ndacte con' loo gu' ned ndyee gu'. Lomisque', ndxàca loo gu' nacquele' nac xtùuz gu' xtùuz ye'rsin' co' ngue li gu'a, sya, nac gu' mèn ye'rsin' loo Diox. <sup>35</sup> Anderhuen gu'. Nee gu' xá nzi tee gu'. Tac ne' ngue yác xniì co' mduble' yéc gu' no xniì co' mduble' lezo' gu'a loo cón che'n Diox xal yál'cuau co' ndli ncuau izlyo', co' nee di's, tlo gu' li gu' xal nac cón che'n xab izlyo'. <sup>36</sup> Chele' gu' ndli xtùuz dib nzo yéc gu' no dib nzo lezo' gu' co' nac xtùuz ndac, sya, ndxàca loo gu' ndyub xniì yéc gu' no ndyub xniì lezo' gu' loo cón che'n Diox co' nac con' ndac. Tataa mod gac loo gu' loo cón che'n Diox xal thib lampr co' ntenii loo mèn.

*Tad Jesús ngue que yèeque' mèn xley' farise no mèn co' ngóc maistr co' mblu' cón che'n ley co' mxo'f Moisés loo mèn tiempa.*

*(Mt. 23.1-36; Mr. 12.38-40; Lc. 20.45-47)*

<sup>37</sup> Co'se' ngolo tataa mdoodi's Jesús di'sa loo mènna, thib mbi' xley' farise ndxab loo Jesús:

—Nda thuhua na' lizen, ey.

Sya, nda no Jesús mbi'. Ngòo Jesús le'n nyòo. Mdub Jesús loo mes con mbi'. <sup>38</sup> Mbi' xley' farisea ante mbui' no ante gunaa co'se' gunèe mbi' ne'ntechte Jesús ya' Jesús par hua Jesús xal nac costumbr co' mque no mèn loo xley' mèn tiempa. <sup>39</sup> Per Jesús ndxab loo mbi' xley' farisea:

—Gu' co' nac mèn xley' farise, más nxyo'f ndeleque' lezo' gu' par li gu' xal nac costumbr par tech gu' taz no plat co' ndli zin' gu' leque la's gu' gu' loo cón che'n xtùuz co' ndli gu' le'n lezo' gu'. Tac gu' ndli xtùuz le'n lezo' gu' xá mod xexte li huan' gu' cón che'n xtáa gu' no xá mod xexte li gu' chol con' ye'rsin' loo chol mèn. <sup>40</sup> Susque' naad gu' no susque' nguud gu' ñeene' ¿ché' inonte gu' no ché' inda'de gu' cuent leque Diox co'

mtoxcua' le'n plat, leque Dioxa mtocxua' xís plat, ne, cà? Cona nee di's, Diox mbli ngue no gu' yéc gu' no lezo' gu' par li gu' xtúuz xalque' mbli Diox par que no gu' taamas part che'n lad gu' par gac lad gu' thib con' co' li zin' loo gu, ey. <sup>41</sup> Ndxàalque' ta' gu' gòn dib nzo yéc gu' no dib nzo lezo' gu' cón che'n ryethe con' co' ndxàppe' gu'. Le' sya, nali no nambii gac gu' loo Diox no ne'tyóode gu' cón che'n plat no taz.

<sup>42</sup> Ay, prob gu' izlyo', mèn xley' farise, tac gu' nzo yen' nzo xique' co'se' tub rez Diox cón che'n gu'. Tac axta fthyoxtil', no rud, no taamas huan nayèe co' ndxàp gu' nda' gu' diezm loo Diox. Per incua'nte gu' mod xá mod que tee ban nali gu' loo hues xtàa gu' no xá mod que' lezo' gu' Diox. Ndxàalque' ta' gu' diezm xal ndli gu' ba'. Per más naquin li mèn par cua'n mèn mod que tee nali mèn loo hues mèn no loo xtàa mèn no que' lezo' mèn Diox.

<sup>43</sup> Ay, prob gu' izlyo', mèn xley' farise, tac gu' nzo yen' nzo xique' co'se' tub rez Diox cón che'n gu'. Gu' asendli par ndyub gu' loo asient le'n sinagog loo mèn par hui' mèn no par ñaa mèn loo gu' par gab mèn anze'f mèn guryath mèn guryèn nac gu'. No a la fuerz ndlya's gu' nii mèn Diox loo gu' no gáp mèn mod ñèe mèn gu' ned co'te' zyál' mèn gu' làth taamas mèn.

<sup>44</sup> Ay, prob gu' izlyo', mèn xley' farise, tac gu' nzo yen' nzo xique' co'se' tub rez Diox cón che'n gu'. Aa que ndxác gu' ntembii ro gu' no ntembii xti's gu'. Per daa nii loo gu' le' gu' nac xal bá' mèn nguth co' indxú'de pá nax o pá nziri' bá' le'n panteón. No ale ndloo ndub mèn loo bá' tac indxú'de pá nax bá'. Pues, co' ngue niin loo gu' ndxè' nee di's le' mèn co' ndli cas gu', prob mèn inonte xá nac mod ye'rsin' co' ngue no gu' no co' ndxàp gu' le'n lezo' gu'.

<sup>45</sup> Sya, ngro' nxon' thib mbi' co' nac maistr co' ndlu' cón che'n ley co' mxo'f Moisés loo mèn. Mcàb mbi' loo Jesús. Ndxab mbi' loo Jesús:

—Maistr, di's co' ngolo ndxab U' loo mèn ba', ngue gò di's U' cón che'n nu', ne. No nazab ndlyàa di's ba' le'n lezo' nu', ndyaquen.

<sup>46</sup> Jesús mcàb loo mbi'. Ndxab Jesús loo mbi':

—Ay, prob gu' izlyo', gu' co' nac maistr co' ndlu' cón che'n ley co' mxo'f Moisés loo mèn, tac nzo yen' nzo xique' gu' co'se' tub rez Diox cón che'n gu'. Tac gu' tolo nzib con' co' ñibe' gu' loo mèn li mèn cón che'n Diox co' ne'xecte mèn tolo li mèn xal ñibe' gu'. No nec thib mod no nec tedib mod incua'nte gu' mod teche gu' yalnibe' co' mnibe' gu' loo mèn par li mèn.

<sup>47</sup> Ay, prob gu' izlyo', gu' co' nac maistr co' ndlu' cón che'n ley co' mxo'f Moisés loo mèn. Tac gu' ñibe' toxcua' mèn armit che'n prob mèn co' mde'th di's co' ndxab Diox póla. No ale leque xudgool gu' co' ngo ban póla mbethxù' prob mèn co' mde'th di's co' ndxab Dioxa. <sup>48</sup> Con' co' ndli gu'a nee di's thidte ngòc gu' con xudgool gu' no con con' co' mbli xudgool gu'. Xudgool gu' mbeth mèn. Le' gu' na, mbli mandad par mtocxua' mèn armit che'n mèn co' mde'th di's co' ndxab Diox co' mbeth xudgool gu'a.

<sup>49</sup> Por anze'f ndxác tín' Diox, cona, ndxab Diox:

Na tel' mèn co' te'th di's co' gaben loo mèn. Tel'en mèn co' ndxe' di's cón che'n di's ndac loo mèn, ne. Tub ngu's mèn mèn co' tel'en. No guth mèn mèn co' tel'en, ne.

<sup>50</sup> Co'se' tub rez Diox cón che'n rye mèn, gu', ne, nzo yen' nzo xique' gu'. Ale le'le' gu' co' naban tiemp ndxè', tyactii gu' por cón che'n mèn co' mbethxù' xudgool gu' póla, mèn co' mtlo mde'th di's axta co'se' diz mtlo mblec Diox izlyo'. <sup>51</sup> Diox li rez cón che'n ren co' mxyo axta co'se' mbeth mèn co' ngòc xudgool gu' Abel póla no axta mbeth mèn hues xtàa gu' Zacari le'n templ gaxte loo còo' le'n tiemp ndxè'. Cona, ngue niin loo gu': Le' Diox tub rezque' cón che'n gu' co' naban tiemp ndxè' par tyactii gu' por mbeth xudgool gu' mèn.

<sup>52</sup> Ay, prob gu' izlyo', gu' co' nac maistr co' ndlu' cón che'n ley co' mxo'f Moisés loo mèn, no gu' mèn xley' farise. Gu' nzo yen' nzo xique' co'se' tub rez Diox cón che'n gu'. Gu' mtau' ned mtau' yó' par ne'té'thte mèn cón che'n Diox. No ne'ngòode gu' loo cón che'n Diox. Ne' ne' indla' gu' yòo mèn co' lya's té'th cón che'n Diox loo cón che'n Diox.

<sup>53</sup> Co'se' mbìn mèn co' nac maistr co' ndlu' cón che'n ley co' mxo'f Moisés loo mèn no mèn xley' farise tataa ndxab Jesús loo mèn, anze'f ngocloo tín' mèn gunèe mèn Jesús. Mtlo mèn, mnibdi's mèn huax con' loo Jesús. Ale asembli mèn, mnibdi's mèn chol con' loo Jesús par bel'que' tataa mod yitac lezo' Jesús ñèe Jesús mèn, <sup>54</sup> par ñee mèn ñeene' ché' bel'que' tataa mod yigaa Jesús loo mèn loo di's co' gab Jesús par gac li mèn gan quexù' que' fals mèn Jesús.

## 12

*Tad Jesús ngue lu' loo mèn cón che'n mèn co' ntembii ro no mèn co' ntembii xti's.*

<sup>1</sup> Làth xtau'a, sate más mqueltàa mèn loo Jesús. Per mil mil mèn mqueltàa loo Jesús axta mblo mdub mèn loo xtàa mèn. Le' Jesús na, mtlo mdoodi's loo mèn tedib vez. Nerleque' loo myen' xin' mté'th mtlo Jesús, mdoodi's Jesús. Ndxab Jesús loo myen':

—Anderhuen gu', ey. Fquenap gu' gu' loo mod ye'rsin' co' ndxàp men xley' farise ba'. Tac mod ye'rsin' co' ndxàp mèn ntolo nteza' huax mèn loo cón che'n Diox. Mèn ba' anze'f ndxác ntembii ro no ntembii xti's. <sup>2</sup> Fté'th gu' no fte' lezo' gu' yende nec thib con' co' nau' loo co' ne'ryo xo'fte. No ne' ne' yen nec thib con' co' xexte ndxác co' ne'yathte no co' ne'yènte. <sup>3</sup> Por cona, chol con' ye'rsin' co' mbez mèn xexte co'te' yende chó mèn gòn mbez mèn di'sa, alanleque' yath yèn di'sa loo mèn loo xnaa. No di's ye'rsin' co' ndyoodi's mèn xexte le'n nyòo liz mèn, di'sa yath yèn cabii loo chol mèn.

*Trè' ndlu' chó loo ndxàal zyeb mèn.*

*(Mt. 10.28–31)*

<sup>4</sup> Myen', gu' co' ndxác amiu daa, nde niin thib con' loo gu': Ne'zyebte gu' ñèe gu' mèn co' ndxác guth bél'yòo ladpe' gu'. Tac co'se' yilo guth mèn bél'yòo ladpe' gu', ya yende cón tolo li mèn. <sup>5</sup> Niin loo gu' chó loo ndxàal zyeb gu'. Bzeb gu' gunèe gu' Diox tac co'se' ngolo nguth bél'yòo lad mèn, ante Diox ndxàp con' la's nii Diox no la's ya' Diox par tetii Diox mèn le'n ye'rbiiil, mèn co' ndxàal yòo ye'rbiiil.

<sup>6</sup> ¿Ché' tarte ñee gu' ndyo' ga'y mbin por thib pes, cà'? Mastale' yende cón ntac mbin, ndyac mèn, per Diox indxathla'ste cón che'n nec thib mbin. <sup>7</sup> Hui' gu' nexa. Axta yis yéc gu' co' ndoo yéc gu' ba' Diox naneeque' plá yis ndoo yéc gu'. Cona, ngue niin loo gu': Gu' masque' ntac leque huax mbin bé'.

*Trè' ndlu' cón che'n mèn co' nda' cuent loo xtàa mèn le' mèn ndxela'sque' loo Tad Jesús.*

*(Mt. 10.32–33; 12.32; 10.19–20)*

<sup>8</sup> Chol mèn co' ta' cuent loo xtàa mèn le' daa nac xgan' Diox co' mtel' Diox loo izlyo', daa, ne, co' mbal yáal loo izlyo' xalque' ndxàal chol mèn, daa ta cuent no gaben loo angl che'n Diox loo Diox le' mèn nac mèn che'npe'en. <sup>9</sup> Per rye mèn co' cà' di's daa loo xtàa mèn no ne'ta'de mèn cuent le' daa nac xgan' Diox loo mèn, cón che'n mèn daa ta cuent no gaben loo angl loo Diox le' mèn inacte mèn co' nzo loo cón che'npe'en.

<sup>10</sup> Lomisque' ne, chol mèn co' ñii yèe ñii tii cón chenen, daa co' mbal yáal loo izlyo' xalque' ndxàal chol mèn, mèn nzoque' mod tyon' xtol. Per mèn co' ñii yèe ñii tii cón che'n Xpii Natú', cón che'n xtol mèn co' mcua'n mèn por gunii yèe gunii tii mèn cón che'n Xpii Natú' ne'tyon'te thidtene.

<sup>11</sup> Niin tedib con' loo gu': Co'se' hue' mèn co' ndxecloo ñèe gu' gu' loo mèn co' nqueltàa sinagog, no co'se' hue' mèn gu' loo juez, no co'se' hue' mèn gu' loo mèn nac zin' yòolau, co'se' cue gu' loo mèn, ne'tyóode gu' xá mod càb gu' loo mèn o cón gab gu' loo mèn.

<sup>12</sup> Tac co'se' zin hora, Xpii Natú' lu' loo gu' xá mod ndxàal càb gu' no xá mod ndxàal tyoodi's gu' loo mèn.

*Tad Jesús ngue lu' loo mèn le' yalgon' co' ndxàp mèn ndli ndxác con' ryes loo mèn.*

<sup>13</sup> Be' ngue toodi's Jesús loo mèn. Làth mèn nzo thib mbi' co' ndxab loo Jesús:

—Maistr, guuz loo huesen ta' huesen herens co' nac chenen càan.

<sup>14</sup> Jesús ndxab loo mbi'a:

—¡Aa, mbi'! ¿Chó mdoo daa loo gu' par gac daa xal thib juez loo gu' no par gac daa xal thib mbi' co' ndli rol xyòn gu' loo gu', à'? Inacte zin'a zin' co' ndlin.

<sup>15</sup> Ndxab Jesús loo mènà, ne:

—Anderhuen gu'. Leque gu' hui' xal nziri' gu'. Fquenap gu' gu' loo ryethe con' co' ndli ndyub yo'f lezo' mèn par que no mèn con' co' ndli ndyub yo'f lezo' mèn par ne'queli'thte gu' con' co' ndli ndyub yo'f lezo' gu'. Tac mastale' ndli gu' xtùuz que no gu' huax con' co' ndryo' ndlyen' le'n lezo' gu', inacte con' co' ncàb loo yalgon'a co', licque', li le' mèn ban no Diox thidtene, ey.

<sup>16</sup> Jesús ndxab loo mènà, ne:

—Nde niin tedib con' loo gu': Ngo thib mbi' ric. Mbi'a anze'f ngòp che'n. No anze'f thib cosech mthop mbi' loo rye xyòn mbi' co' mque no mbi'. <sup>17</sup> Per thib huiz xèe mdub mbi'. Mbli mbi' xtùuz le'n lezo' mbi'. Ndxab mbi' loo lezo' mbi': ¿Cón lin con rye cosech co' mthopen ba', yoo? Ingue noden co'te' gosuan cosech daa ba'. <sup>18</sup> Mbere mbi' rica, mbli mbi' xtùuz le'n lezo' mbi' tedib vez. Ndxab mbi': Neequen xá ñaa thib con' nde lin. Na nda sil yòo co'te' ngosuan cosech daa ba'. Per leque tua' toxcuan tedib yòo co' más naroo leque co' silen. Le' sya, tya gosuan ryete cosech co' mthopen. No gosuan ryete con' ngue non. <sup>19</sup> Le' sya, gaben loo lezon: ¡Cara! Nase ngue non huax con' co' nzosua' par que no na'i huax lín'. Li na' descans, hua na', no gu na' axta plóthe. Más de cona, ndxàal ta' na' gust lezo' na' ndxep. <sup>20</sup> Per Diox ndxab loo mbi' rica: ¡Aa mbi'! Susque' naadl no susque' nguudl. Leque yál' ndxè' gathl no ryete con' ngue nol ba', ¿chó mèn gac che'na yiloo, à'? Axta ne' ne' gac ryete cosech ba' cón che'npe'l, ndee. <sup>21</sup> Tataa ndxàc loo chol mèn, mèn co' ante ndoo lezo' que no yalgon' loo izlyo' ndxè' no ndxàc ric mènà axta plóthe. No loo cón che'n con' co' angli Diox loo mèn no con' co' anggac che'n mèn loo Diox ale le'le' ndlyàa tìi mènà.

*Diox ñee rsi' ñee rso mèn, mèn co' nacque' xin' Diox.*

*(Mt. 6.25-34)*

<sup>22</sup> Ngolo mdoodi's Jesús di'sa loo mèn, ndxab Jesús loo myen' xin' mté'th Jesús:

—Nde niin thib con' loo gu', ey: Ne'gath lyuxte gu' loo cón che'n yalnaban gu' par tyóo gu' cón goc gu' yé' huize'. <sup>23</sup> Ndxè'leque', más ntac yalnaban mèn leque con' hua mèn. No más ntac yalnaban mèn leque xab mèn co' goc mèn. <sup>24</sup> Hui' gu' loo rsin' ngáa co' ndli ngáa. Ngáa ingode bin. Ne' ne' inthop ngáa cosech. Ne' ne' ingosua' ngáa nzob. Mastale' indlide ngáa con'a, Diox nguàaque' ngáa. Ale'que' gu' co' más ntac leque thib ngáa, pà ne'huàade Diox gu', ¿lé'? <sup>25</sup> ¿Chó thib gu' co' nzo làth gu' co' más ndxath ndlyux par gac gu' zib gu' loo gu' taarol metr par yol gu' taachu'th, à'? Yende chó gu' gac lii, ¿lé'? <sup>26</sup> Chele' gu' ne'gácte li thib con' co' nac más chu'th o más be'the, ¿chonon susque' más ndxath ndlyux gu' par li gu' con' co' más ñaare', sya?

<sup>27</sup> Hui' gu' no gunaa gu' xá mod ndryoo nxyèn ye' co' mbez mèn lèe ye' madalen. Ye'a indlide zin'. Ne' ne' inzii ye' madalen dó' par goc xab ye' madalen. Mastale' yende cón ndli ye' madalen, per más nabe's ñaa ye' madalen leque Salomón co' ngòc rey co'se' mdoc Salomón xab Salomón no co'se' ante nít nayèe gunaa Salomón mdoc xab Salomón. <sup>28</sup> ¡Aa mèn co' xhuite ndxela's loon no mèn co' xhuite ndxàp yalxla's loon! Chele' Diox tataa mod nxèn' huan co' nzo'f yii no den, no yé' huize' mbiizte huana, gac huana yaa biiz co' yòo le'n thib gor, ale'que' gu' ne' li Diox par que no gu' ryethe con' naquin gu'. ¡Aa mèn izlyo'! Axta ne' ne' inda' gu' cuent cón ndxàc loo gu'. <sup>29</sup> Por cona, ne'xide lezo' gu'. No ne' ne' tyóo gu' cón hua gu' no cón gu' gu' yé' huize'. <sup>30</sup> Tac chol mèn co' alithe naban dib athu loo izlyo', más ndyóo mènà xá mod gáp mènà rye con' naquin mènà. Tac con' co' ncuau'n mèn nac con' co' alithe ncuau'n mènà. Per gu' ngue no xud gu' co' nonque' no co' naneeque' co'pe' naquin gu'. <sup>31</sup> Más huen blo yéc gu' ta' gu' lugar ñibe'pe' Diox loo gu' no cua'n gu' mod li gu' con' co' ndxòo lezo' Diox. Chele' gu' tataa li, Diox lyath no gu' que no gu' ryethe con' naquin gu', ne.



*Tad Jesús ngue lu' loo mèn más huen que no mèn yalgon' loo bé'.  
(Mt. 6.19-21)*

<sup>32</sup> Ne'zyebte gu', myen', gu' co' nac xal mbacxil' daa. Mastale' nagabte gu' nzo loon, per Diox xud gu' ndyac lezo' yòo gu' loo cón che'n Diox xud gu' par ñibe'pe' Diox loo gu'.  
<sup>33</sup> Chele' gu' tho' ndxep con' co' ngue no gu' par ryo' tmi loo con'a par ta'la's gu' tmi loo mèn co' naquin tmi, sya, tataa mod gàca loo gu' yòo lezo' Diox loo cón che'n con' co' ngue li gu'. Sya, Diox tolo li par que no gu' huax con' ndac axta plóthe loo bé' co'te' ne'lyuxte con', no co'te' ne'yiza'de con', no co'te' ne'yòode huan' par li huan' huan' yalgon'a, no co'te' ne'gácte mxil yòo mxil par teza' mxil con' co' gáp gu' loo bé'. <sup>34</sup> Le' sya, co'te' ndxàple' gu' yalgon'pe' gu', tya más tyub yo'f lezo' gu' no anze'f ngue li gu' purad par yòo gu' tya par hui' gu' loo yalgon'pe' gu' co' ndxàple' gu' tya.

*Tad Jesús ngue toodi's loo mèn: Nalas gure gu' no bli nab gu' gu' ndoore' co'se' gac huiz co' galen loo izlyo' tedib vez.*

<sup>35</sup> Tolo ndxab Jesús:

—Bli nab gu' gu' loo cón chenen xal mèn co' altant nziri' loo zin'. No gòc gu' xal co'se' ngo mèn xnii thib lampr par tenii lampr loo mèn. <sup>36</sup> No bli gu' xal ndli moz co' nzi bed coyor zin patrón moz co'se' bere patrón, ye'th patrón co'te' ngua patrón co'te' mselya' thib ned myen'. Sya, co'se' mbere patrón, ndye'th patrón, texal zin patrón altant ndoo moz, xal' moz puert ro ned co'se' te's patrón puert. <sup>37</sup> Huen nda moza tac ndub naa moz co'se' mzin patrón. Lìcpe' ba'i, na nii loo gu': Yub patrón toxcua' co' hua moz. No yiloa, ñibe' patrón loo moz tyub moz loo mes. Yiloa na, cuec patrón co' hua moz loo mes. <sup>38</sup> Mastale' zin patrón gual yál', o mastale' zin patrón coyor cuar, chele' patrón ñèe altantque' ndoo moz no ndub naa moz co'se' zin patrón, anze'f huen nda moza, sya, ¿lé'? <sup>39</sup> Nde niin thib con' loo gu', myen', par ta' gu' cuent: Angab na'i, chele' thib mbi' co' ñibe' liz mbi' non mbi'a coyor yi'th huan', mbi' tyub naa no ne'gátte mbi'. Sya, tataa mod li mbi' gan ne'la'de mbi' xal' huan' liz mbi' par yòo huan' liz mbi', li huan' huan' che'n mbi'. <sup>40</sup> Cona, ngue niin loo gu': Altant gure gu' loo cón chenen tac zin thib huiz no zin thib ze co'se' yende chó mèn ta' cuent no co'se' indyóode mèn cón gac huiza. Huiza, chàa, galen loo izlyo' ndxè' tedib vez, daa co' mbal yáal loo izlyo' xalque' ndxáal chol mèn loo izlyo'.

*Trè' ndlu' cón che'n thib moz co' altant ndyoo loo zin' no cón che'n tedib moz co' ialtante ndyoo loo zin' co' ngue go xo'f zin' moz.*

*(Mt. 24.45-51)*

<sup>41</sup> Sya, mnibdi's Pedr loo Jesús. Ndxab Pedr:

—Tad, ¿ché' ante cón che'n nu' co' nac myen' xin' mté'th U' ndyoodi's U' di's co' mtetac U' di's ba' o ché' ngue toodi's U' di's ba' cón che'n ryete mèn co' nzi yòn di'sa, cà'?

<sup>42-43</sup> Ndxab Tad Jesús loo Pedr:

—¿Chó moz ñibe' patrón gac moz mandador liz patrón, no loo taamas moz liz patrón par ñibe' moza loo taamas moz, no ta' moz con' hua xtàa moz co'se' gáal hor hua moz, à'? Niin loo gu' chó gac moza. Gac moz mandador, moz co' altant ndoo loo zin' patrón no co' ndyubdi's ndac loo patrón. Huen nda moza co'se' ndye'th patrón moz, ngua patrón moz viaj, <sup>44</sup> no ñèe patrón moz ndli moz xal mtan' patrón di's loo moz. Lìcpe' ba'i, na nii loo gu': Le' patrón moz ñibe' par gac moz mandador loo ryethe con' ngue no patrón liz patrón. <sup>45</sup> Per, angab na'i, chele' moza li xtùuz no gab moz loo lezo' moz le' patrón moz lyen' huax huiz no ne'zingàade patrón moz, sya, tlo moz, tetii moz taamas xtàa moz. No tetii moza criad, ne. Más de cona, tlo moz, hua moz, no gu moz, no ale axta tyuuz moz. <sup>46</sup> Làth xtau'a, patrón moz zin thib huiz co' indub bedte moz zin patrón moz. No zin patrón moz thib hor co' indlide moz xtùuz zin patrón moz. Le' sya, patrón moz tyen mached no làa patrón moz mached rloo moz axta guth patrón moz moz. Tataa mod li patrón moz loo moz par yòo moz co'te' yòo mèn co' ne'tyalte yila's loon.

<sup>47</sup> Le' tedib moz co' nonque' no co' naneeque' xal nac co' ndlya's patrón moz li moz no ne'nglide moza no ne' ne' ndubdi's ndac moza ro patrón moz, patrón moza ta' che'n moza axta plóthe. <sup>48</sup> Per moz co' inonte no co' inda'de cuent xal ñibe' patrón moz no mbli moz con' co' indxàalte li moz, mastale' ndxàal ta' patrón che'n moz, per xhuite ta' patrón che'n moz. Tac mèn co' más mté'th mod che'n patrón par li ndac mèn co' ñibe' patrón, loo mèn más tan' patrón di's par li mèn con' lya's patrón. Le' loo mèn co' ngòp patrón más confians na, loo mèn tolo chal patrón par li mèn más con' ndac co' lya's patrón li mèn.

*Mbez Jesús loo mèn: Por cón chenen ndxàc chop ned mèn.*

*(Mt. 10.34-36)*

<sup>49</sup> Tolo ndxab Jesús loo mèn:

—Daa ndal par go xo'fen cón che'n mod co' ndxàp mèn loo izlyo'. No por con' ndal lo xo'fen cón che'n mèn, con'a li càb loo mèn tlo mèn, tyub quii tyub bèel lezo' mèn ñèe mèn xtàa mèn por cón chenen. ¡Ngaca cón gàca! Luega tlo gàca loo mèn. ¡Huen! <sup>50</sup> ¡Cara! Huen huen naneen le' mèn tetii daa axta gath daa. No naneen nzo yen' nzo xique' daa gàcque' con'a loon. No thib ndlyazen setilte riida loon. <sup>51</sup> ¿Ché' ndli gu' cuent le' daa ndal loo izlyo' par lin le' gu' cue ban rye nda gu' no rye ndye'th gu' làth xtàa gu', cà'? Yende xàa. Ndxé'leque', daa ndal par lin zyal di's zyal cuent làth gu'. No axta gac gu' chop ned mèn làth xtàa gu' por cón chenen. <sup>52</sup> Tac desde nalle' par delant ga'y mèn co' naban thib yòo co' nac liz mèn, son mèn tyoo xà' lezo' loo xtàa mèn co' naban yòoa. Mèn cue yoo con taachop mèn co' nzo leque yòoa por cón chenen. <sup>53</sup> Lomisque' mod gàca loo taamas xtàa mèn, ne. Leque gundanbi' yecloo ñèe xgan' gundanbi'. No leque xgan' gundanbi' yecloo ñèe gundanbi'. No leque gundangot yecloo ñèe rsap gundangot. No leque rsap gundangot yecloo ñèe gundangot. Le' mèn co' nac xna'zap na, yecloo ñèe xa'got co' nac xiix. Le' xa'got co' nac xiix na, yecloo ñèe xna'zap por cón chenen.

*Tad Jesús ngue lu' loo mèn xá mod ta' mèn cuent cón che'n tiemp ndxè'.*

*(Mt. 16.1-4; Mr. 8.11-13)*

<sup>54</sup> Ndxab Jesús loo mèn, ne:

—Co'se' ñèe gu' ndxetoo xcau par ned ndlyen huiz, mbez gu': Yamerle' lyàa yùu, cara. No lìcque', ndxàca tataa loo gu', ¿lé'? <sup>55</sup> No co'se' ñèe gu' ndryo' mbii par ned sur, mbez gu': Anze'f thib bée lyàa. No, lìcque', ndxàca loo gu', ¿lé'? <sup>56</sup> ¡Aa mèn izlyo'! Aa que ndxác gu' ntembii gu' ro gu' no ntembii gu' xti's gu'. Non gu' xá ñaa co' ndxàc co'se' ngo' gu' cuent cón che'n señ co' ndxú' loo bé' no señ co' ndxàc loo izlyo'. Chele gu' tataa non no nda' gu' cuent cón che'n bé' no izlyo', ¿chonon ne'gácte gu' ta' gu' cuent cón che'n con' co' ndxàc le'n tiemp ndxè' xal nda' gu' cuent cón che'n señ co' ngüii' gu' no co' ñaa gu', à'?

*Tad Jesús ngue lu' loo mèn: Fcua'n gu' mod tàl gu' loo di's no loo cuent con mèn co' nac xtàa gu'.*

*(Mt. 5.25-26)*

<sup>57</sup> ¿Chonon indlide gu' par leque gu' tub rez cón che'n gu' no par li gu' con' co' nac con' nambii no con' co' nac con' nalì, à'? <sup>58</sup> Chele' chó mèn ta' part cón che'n gu' loo xcal no ya no mèn gu' yòolau par ya be' gu' loo xcal yòolau, más huen cua'n gu' mod xá mod tàl gu' loo di's no loo cuent ned nda gu' par ne'hue'de mèn gu' loo xcal. Tac chele' cón che'n gu' tyub rez loo xcal, xcal ta' gu' loo tenient par ya que' tenient gu' lezi'f. <sup>59</sup> Na nii loo gu': Ne'ryo'de gu' lezi'f axtaque' quix gu' mult co' quib xcal lad gu'. Sya, ryo' gu' lezi'f.

*Tad Jesús ngue yab loo mèn: Naquin lyàa yéc gu' no lyàa lezo' gu' par tyon' xtol gu' no xquin gu' par tataa mod zye' mod co' ndxàp gu'.*

<sup>1</sup> Leque le'n huiza, ngua plá mèn loo Jesús par ngua ta' mèn cuent loo Jesús xá mod asembli Pilat mandad mbeth solndad ndxep mèn par ned le'n yèezya' che'n làaz mèn galile láth ngo mèn le'n templ par mcos solndad ren mèn con ren má' co' mbeth mèn par xo mèn rena loo Diox. <sup>2</sup> Jesús ndxab loo mèn:

—¿Ché' ndli gu' xtùuz no ché' ndli gu' cuent le' con' co' ngòc loo mèn par ned le'n yèezya' che'n làaz mèn galile ngòc loo mèn por ngòc mèn mèn co' ngòp más xquin no xtol leque taamas mèn co' ngòc mèn gulàaz mèn, cà'? <sup>3</sup> Yende xàa. Cona, ngue niin loo gu': Chele' gu' ne'lyàade yéc no ne'lyàade lezo' loo con' ye'rsin' co' ndli gu' no chele' gu' ne'zye'de mod co' ndxàp gu', gu', ne, lyux. <sup>4</sup> ¿Ché' ndxela's gu' co'se' nguth ryete si'n pson mèn co' nguth co'se' mbua's ftoo che'n thib yòobé' co' mdub co'te' ngure tanc che'n Siloé co' ngob che loo mèn, mèn más ngòp xquin no xtol leque taamas mèn co' nzo ban ciuda Jerusalén, cà'? Yende xàa. <sup>5</sup> Cona, ngue niin loo gu': Chele' gu' ne'lyàade yéc no ne'lyàade lezo' gu' loo con' ye'rsin' co' ndli gu' no chele' gu' ne'zye'de mod co' ndxàp gu', gu', ne, lyux.

*Trè' ndlu' cón che'n di's co' mtetac Tad Jesús cón che'n thib yaa ngudyuug.*

<sup>6</sup> Jesús ndxab loo mèn, ne:

—Nde tetaquen thib con' loo gu'. Ngo thib mbi' co' ngòc patrón. Mbi'a mque no thib xan' yaa ngudyuug loo xyón mbi'. Ndxàc plá lín' seguid nda tee hui' mbi' loo yaa ngudyuug ñeene' ché' ndoole' ngudyuug loo yaa. Per co'se' ndyee tee hui' mbi' loo yaaa, nec thib ngudyuug iñède mbi' ndoo loo yaaa. <sup>7</sup> Sya, ndxab mbi' loo moz mbi' co' ndli zin' loo yòoa: Hui' nexa, moz. Nde teele' son lín' seguid ndalen loo yaa ngudyuug ba' par ñeen ñeene' ché' ndoole' ngudyuug loo yaa ba'. No co'se' ndalen, iñèeden nec thib ngudyuug loo yaa ba'. Más huen fcho' yaa ba' tac nca'i loo xyónen. <sup>8</sup> Per moz co' ndli zin' loo yòoa mcàb loo mbi'. Ndxab moz: Tad, la'a tee tooi lín' ndxè'. Nda tele'en yòo xàn'a no gon be'f xàn'a. <sup>9</sup> Ne'stolque' lín' ndxè' ta'i xlè. Per chele'i ne'ta'de xlè, syase, li U' mandad cho'i.

Tataa ndxab Jesús loo mèn par lu' Jesús loo mèn le' Diox ncha'la's tén' loo mèn. Per chele' mèn ne'tyalte lyàa yéc mèn no chele' mèn ne'tyalte lyàa lezo' mèn loo con' ye'rsin' co' ndli mèn no se' mèn mod co' ndxàp mèn loo Diox, telux Diox mèn.

*Thib huiz sabd co' ngòc huiz descans tiempa, mteyac Tad Jesús thib xa'got co' mteleng mbii xís.*

<sup>10</sup> Ngoloa, ngòc thib con'. Thib huiz sabd co' ngòc huiz descans tiempa, Jesús ngue lu' mèn le'n thib sinagog. <sup>11</sup> Làth mèn co' ngo le'n sinagoga, ngo thib xa'got. Xa'gota ndxàcle' si'n pson lín' ngue no thib mbii ye'rsin'. Mbii ye'rsin'a mbli mblyeng xís xa'gota. Le'n rye lín'a, yende mod ndoo lì xís xa'gota thidtene. <sup>12</sup> Co'se' gunèe Jesús xa'gota, Jesús ngurez xa'gota. Ndxab Jesús loo xa'gota:

—Ngot, ya ne'tolode que nol mbii ye'rsin' ba' xís.

<sup>13</sup> Sya, ante mxo'f Jesús ya' Jesús loo xa'gota, leque hora mdoo lì xís xa'gota. Ndxab xa'gota:

—¿Ay, Dio's! Con' roo con' xèn mbli U' loon. Mteyac Tad ba' daa.

<sup>14</sup> Per mbi' co' ngòc jef che'n sinagog co' ndyoo naa loo mèn le'n sinagoga, anze'f ngocloo mbi' loo Jesús tac mteyac Jesús xa'gota huiz sabd co' ngòc huiz descans tiempa. Sya, ndxab mbi' loo rye mèn co' nziri':

—Xop huiz nac thib sman par li mèn zin'. Más huen yi'th gu' le'n huiz sman par gac remed gu'. Ne'yi'thte gu' huiz co' nac huiz descans par gac remed gu'.

<sup>15</sup> Sya, ndxab Jesús loo mbi' co' ndyoo ner no co' ndyoo naa loo mèn le'n sinagog:

—¿Aa que ndxácl ntembii rol no ntembii xti'sl con xtàal loon, cara, gu' co' thidte mod ndxàp loo cón che'n huiz descans. ¿Ché' nzo chó gu' co' nziri' trè' co' nac arid mènley' ne'xacte gu' ngon gu' no ne'xacte gu' burr gu' huiz sabd co' nac huiz descans par ya ta' gu' nít gu' ngon gu' no burr gu' huiz descans, à'? Txac gu' má' gu', ¿lé'? <sup>16</sup> Lomisque', tan cuent loo gu' cón che'n xa'got ndxè' co' nac bin Abraham co' ngolo mteyaquen.

Mebizya mtedó' xa'got ndxè' con thib yíiz mbii che'n xpíi ye'rsin' co' mbli mteleng yíiz xa'got ndxè'. No ndxàcle' si'n pson lín' thidtene mteleng mbii xís xa'got ndxè'. No nalle' ndlyazen ñee gu' loon: ¿Ché' ngue li gu' cuent indxàalte xaquen xa'got ndxè' loo yíiz mbii co' ndub xís xa'got ndxè' par yac xa' nalze co' nac huiz sabd co' nac huiz descans, cà'?

<sup>17</sup> Co'se' ngolo ndxab Jesús di'sa, ryete mèn co' ngòc ngolo ngola's che'n Jesús mthyon tín'. Per ndxe'leque', taamas mèn co' nziri', anze'f mdyac lezo' mèn co'se' gunèe mèn co' roo con' xèn co' mbli no Jesús xa'gota loo mèn. Thiba con' ndxè'.

*Trè' ndlu' cón che'n di's co' mtetac Tad Jesús cón che'n biz bin mostaz.*

*(Mt. 13.31-32; Mr. 4.30-32)*

<sup>18</sup> Le' tediba na, Jesús ndxab loo mèn:

—Nde niin thib con' loo gu' cón che'n xal nac mod co' ñibe'pe' Diox loo mèn nalle'.  
<sup>19</sup> Mod co' tlo yar' mèn co' ndyal yòo loo cón che'n Diox par ñibe'pe' Diox loo mèn, le'i nac xal biz bin mostaz co' mblo thib mbi' bin loo xyòn mbi'. No ndryoo nxyèn huan mostaza yamerle' xal thib xan' yaa xcàl. No ale axta mbin bé' ntoxcua' xyòn mbin loo huan yaa mostaza.

*Trè' ndlu' cón che'n di's co' ngue tetac Tad Jesús no co' ngue go xo'f Tad Jesús cón che'n dii levadur loo mèn.*

*(Mt. 13.33)*

<sup>20</sup> Ndxab Jesús loo mèn, ne:

—¿Xá nee gu'? ¿Chó con' tetaquen mod co' ndxàc co'se' tlo ñibe'pe' Diox loo mèn nalle'?  
<sup>21</sup> Pues mod co' tlo ngue ñibe' Diox loo mèn nac xal co'se' xègà xègà ndxos con' ye'rsin' con' ndac co' ndlu' cón che'n di's ndac loo mèn dib athu izlyo' xal co'se' ndyen thib xa'got ndxèpte dii levadur par ncos xa' son bols harin par tyoo bes co'f par toxgua' xa'gota pan.

*Tad Jesús ngue yab loo mèn le' mèn co' ndxòo loo cón che'n Diox nac xal mèn co' ndxòo ro thib puert naya.*

*(Mt. 7.13-14, 21-23)*

<sup>22</sup> Ngolo mdoodi's Jesús di'sa, mxen Jesús ned. Nda Jesús par ned ciuda Jerusalén. Co'se' nda riid Jesús, nguri'th Jesús le'n rye ciuda no le'n rye yèez co'te' mblu' Jesús cón che'n di's ndac loo mèn. <sup>23</sup> Ned nguri'th Jesús ngo thib mbi' co' mnibdi's thib con' loo Jesús. Ndxab mbi' loo Jesús:

—¿Ché' ndyac U' ndxèpte mèn nzo co' lyá' loo ryethe con' ryes, lé'?

Jesús mcàb loo mbi'. Ndxab Jesús loo mbi':

<sup>24</sup> —Bli gu' purad yòo gu' loo cón che'n Diox tac loo cón che'n Diox anze'f nagàn nac par yòo mèn. Mod co' yòo mèn loo cón che'n Diox nac xal co'se' ndly'a's mèn yòo mèn ro thib puert co' anze'f naya. Anze'f huax mèn nzo co' lya's yòo loo cón che'n Diox per ne'gácte mèn yòo mèn loo cón che'n Diox. <sup>25</sup> Tac ne'stolque' gàca loo gu' ne'tyalgàde gu' yòo gu' loo cón che'n Diox. Sya, gàca loo gu' loo cón chenen xal co'se' mtau' thib mbi' co' nac gundan puert ro ned liz mbi' ndxáal yál'. Yiloa, syare' nde mèn. Ndo mèn ro ned. No nte's mèn ryo'. Mbez mèn loo mbi': Tad, fxal' U' puert par yòo nu'. Sya, mbi' co' nac che'n liza càb loo mèn. Gab mbi': Byàa gu'. Ne'needen pá ned ngro' tee gu' no ne'needen pá ned ngro' yáal gu'. <sup>26</sup> Axta syare', tlo gab gu' loo mbi' co' nac gundana, co' nee di's, daa nac mbi'a: Nu' nduhua no U'. No ngu no nu' U'. No mblu' U' nu' co'se' mbi'th riid U' làaz nu'.

<sup>27</sup> Per mbi' càb loo mèn no ñee mbi' loo mèn: Na guniile' loo gu': Ne'needen pá ned ngro' tee ngro' yáal gu'. Biiche gu' loon, rye gu' co' nziri' ro puert ba', gu' co' ndli con' ye'rsin'. <sup>28</sup> Co'se' gath gu', bii xpíi gu' no alm gu' le'n ye'rbíil. Tya tlo gu' gón' gu' no hua le gu'. Tac axta syare' hui' gu' loo Abraham no loo Isaac no loo Cob. No hui' gu' loo ryete mèn co' mde'th di's co' ndxab Diox póla co'te' ngue ñibe' no mèn Diox co'te' ñibe'pe' Diox loo ryethe con'. No axta syare' li la's gu' cón che'n co' ngue niin loo gu' ndxè'. Per ale ndxe'leque', ne'yòode gu' làth mèn thidtene. <sup>29</sup> Co'se' gac tiempa, yi'th rye mèn co'

naban par ned ndlyen huiz, no mèn co' naban par ned mbix huiz, no mèn co' naban par ned nort, no mèn co' naban par ned sur par yòò mènà co'te' ngue ñibe'pe' Diox. Tya gàca loo mènà angta'la's Diox huax con' ndac loo mèn xal co'se' ndxòò mèn loo thib lni par tyac tín' lezo' mènà. Tataa gàca loo mènà loo Diox. <sup>30</sup> Tiemp ndxè' nzoque' mèn co' pente mxyal' ned mxyal' yó' loo par ndxòn mèn cón che'n di's ndac xá mod ndlyà's Diox ñibe'pe' Diox loo mèn. Mènà sangngola's co'se' mbìn mènà di'sa no ngòoque' mènà loo cón che'n Diox. Per lomisque', nzoque' huax mèn co' mxyal' ned mxyal' yó' loo par ndxòn mènà cón che'n di's ndac xá mod ndlyà's Diox ñibe'pe' Diox loo mèn. Per mastale' mbìn mènà cón che'n di's ndaca, ne'ndalte mènà ngòò mènà loo cón che'n Diox.

*Tad Jesús mbín' co'se' mbli Tad Jesús xtùuz cón che'n mèn ciuda Jerusalén.  
(Mt. 23.37-39)*

<sup>31</sup> Ngolo ndxab Jesús di'sa loo mèn, leque le'n huiza mzin ndxep mèn xley' farise loo Jesús. Ndxab mènà loo Jesús:

—Byàa. Gro' trè'. Tac Herod co' nac rey ndlyà's guth lùu.

<sup>32</sup> Jesús mcàb loo mènà. Ndxab Jesús:

—Byàa gu' no guuz gu' loo Herod co' nac xal mbée co' ngo to': Hui', Herod. Mbi' co' lèe Jesús guneé loo nu': Nalze no yé' be' go'en xpíi ye'rsin' loo mèn. No be' teyaquen mèn yíiz. No axta huize' telon zin' co' ngue xo'f zin'en. <sup>33</sup> Taapláte huiz no maste be' ngue tee xo'f zin'en co' nac huiz co' ngue que tee'pe'en taachu'th. Yilóa, tenen ned. Gan par ned ciuda Jerusalén tac yende mod gath thib xa' co' nde'th di's co' ndxab Diox thib lad co'te' inacte le'n ciuda Jerusalén.

<sup>34</sup> ¡Aa mèn ciuda Jerusalén, gu' co' mbeth mèn co' mbi'th te'th di's co' ndxab Diox! No mbuaa'd quèe gu' mèn co' mbi'th lo yalbàn co' nac di's ndac che'n Diox loo gu', mèn co' mtel' Diox loo gu'. Ne' pól ndxàc mblyazen thidte queltàan gu' loon xal ndli nguiiddol colec co'se' ngue's nguiiddol colec nguiid yen' xàn' xíl' nguiiddol colec per thidtene ne'ndalte gu' ngàca tataa loo gu', ey. <sup>35</sup> Per nalle', hui' gu' nexa. Na nii loo gu', mèn ciuda Jerusalén, le' Diox mblá'ya'le' gu'. Más de cona, gu' ya ne'berede hui' loon axta co'se' zin huiz no zin ze co'se' gab mèn: Anze'f ndyac tín' lezo' mbi' co' nde por lèe che'n Tad Diox.

## 14

*Jesús mteyac thib mbi' co' mque no yíiz quíi.*

<sup>1</sup> Ngòc thib con' loo Jesús thib huiz sabd co' ngòc huiz descans tiempa. Jesús ngua thuhua no thib mbi' co' ngòc jef che'n mèn xley' farise liz mbi'. Le' taamas mèn xley' farise co' nziri'a na, xèe nzi la's loo Jesús. <sup>2</sup> Ngo thib mbi' co' mxac yíiz quíi làth mènà loo Jesús, ne. <sup>3</sup> Sya, mnibdi's Jesús loo mèn co' ngòc maistr che'n ley co' mxo'f Moisés loo mèn no loo mèn xley' farise. Ndxab Jesús:

—¿Xá nee gu'? ¿Ché' ndxàal teyaquen thib mbíiz huiz co' nac huiz descans o ché' indxàalte lina, cà'?

<sup>4</sup> Per mènà xèe ngure. Yende chó ngabte mènà. Sya, mxen Jesús ya' mbi'a. Mteyac Jesús mbi'a. Ndxab Jesús loo mbi':

—Byàa par lizl, ndee.

<sup>5</sup> Ngolóa, ndxab Jesús loo mèn xley' farise:

—Yende chó gu' co' nziri' trè' co' ne'co'de thib burr gu' o thib laa ngon gu' le'n thib tó' huiz sabd chele' thib burr gu' o ngon gu' ngòb che le'n tó' huiz sabd co' nac huiz descans, ¿lé'?

<sup>6</sup> Mènà yende cón ngác ncàb loo Jesús. Thiba con' ndxè'.

*Tad Jesús ngue tetac cón che'n Tad Jesús no ngue go xo'f Tad Jesús loo mèn xal co'se' ndxàc convid mèn par ya mèn loo thib yalhua co'te' mselya' thib ned myen'.*

<sup>7</sup> Le' tediba na, xèe ngüü' Jesús xal ndxàc mèn co' nda fandang co'te' mselya' thib ned myen'. Mdub mèn loo asient co'te' más tyu' mèn no tye's mèn loo xtàa mèn loo mes. Jesús mco'x di's ndxè' loo mènà. Ndxab Jesús loo mènà:



<sup>8</sup> —Nde niin thib con' loo gu': Co'se' chol mèn yi'th nee loo gu' par ya gu' fandang co'te' selya' thib ned myen' par ya thuhua gu', ne'tyubte gu' loo asient co'te' ndyub mèn co' más ndli cuent nac mèn roo no mèn xèn tac, ne'stolque', yi'th mèn co' más nzo'f lèe nzo'f xti's leque gu'. <sup>9</sup> Le' sya, mèn co' mbli convid ryop ned mènà, ñee mènà loo gu': Fta' asient co' ndubl ba' tyub mèn ndxè' loo mes. Sya, mènà xít too gu' loo asient loo mes. Sya, que nzo ne'ñee lezo' gu', yitoo gu' loo asient loo mes par tyub mènà co'te' yitoo gu'. Le' gu' na, nalyat nde'f ro ya tub gu' loo asient co' nziri' axta squin le'n nyòo. ¿Xá lyàai le'n lezo' gu' li mènà tataa loo gu', sya? <sup>10</sup> Ndxè'leque', co'se' li mèn convid gu' par ya thuhua gu' sa lua' gu' co'te' mselya' thib ned myen', na nii loo gu': Más huen tyub gu' loo asient co' nziri' axta squin le'n nyòo par ñee mèn, co' ngua li convid gu'a loo gu', tyub gu' loo asient co'te' ndxàal más tyu' gu': Amiu, ftub co'te' más ndyu' mèn ba'. Le' sya, tataa mod más tyu' gu' loo mèn co' ndub loo mes. <sup>11</sup> Tac mèn co' asendli ndye's, thyon mènà loo Diox. Le' mèn co' ndxàp mod no indlu'de mènà ndye's mènà, Diox li loo mènà le' mènà gac mèn roo no mèn xèn loo Diox.

<sup>12</sup> Ndxab Jesús loo mbi' co' mbli convid Jesús, ne:

—Co'se' lil thib yalhua, que naca xhui, que naca rsè, ne'lidel convid mèn co' nac amiu lùu, ne' ne' lil convid mèn co' nac mèn huespe'l, ne' mèn co' nac mèn gulizl, ne' mèn ric co' nac vecinl. Tac mènà lique' convidl cadque' co'se' li mènà yalhua. Chele' lùu ante ndli tataa, sya, ante nda'l gust lezo'l no ndyacl ndxàc con' ndac lool. Per loo Diox ne'yòode cuent cón che'n con' ndlil. <sup>13</sup> Ndxè'leque', co'se' lil thib yalhua, bli convid mèn prob, no mèn yíiz, no mèn renc, no mèn sieu. <sup>14</sup> Huen ndal chele' lùu li tataa loo mènà tac mènà ne'gácte quix por con' mda'l nduhua mènà. Le' part cón che'nl na, Diox li anggac con' ndac lool co'se' gac huiz co'se' ryo xban mèn co' nac mèn nali no mèn nambii loo Diox.

*Trè' ndlu' cón che'n thib yalhua co' ndlu' xá mod ndlya's Diox yòo mèn loo cón che'n Diox par ñibe'pe' Diox loo mèn.*

<sup>15</sup> Co'se' mbìn thib mbi' co' nzo làth mèn co' mdub loo mes tataa ndxab Jesús, mbi' ndxab loo Jesús:

—Ndyac lezo' mèn co' hua no U' làth mèn co'te' ñibe'pe' Diox loo mèn.

<sup>16</sup> Jesús ndxab loo mbi'a:

—Thib mbi' mbli convid huax mèn par yi'th mènà loo thib yalhua co' li nab mbi'. <sup>17</sup> Co'se' ngóol hor hua mènà, mbi' mtel' moz mbi' par ngua li moz avis loo mènà par yi'th mènà loo yalhua. Ndxab moz loo mènà: Bli gu' purad par ya thuhua gu' loo yalhua tac con' co' hua gu' ngòc nable'. <sup>18</sup> Per ryete mèn co' ngòc convida, thidte mcàb mènà loo moz co' ngua li avis loo mèn. Ner mbi' co' ngòc avis looa, mbi'a ndxab loo moz co' ngua li avisa: Na ngolo mxi thib le' xyònen, no nalle' daa nda tee hui' xá nax xyònen. ¡Cara! Guuz loo patronl nee patronl xá mod li patronl par ba'. Na ne'gade loo yalhua. <sup>19</sup> Le' tedib mbi' na, ndxab: Na ngolo mxi ga'y ned ngon. No nalle' nda lin preb má' xàn' yaarad par ñeen ñeene' xá ryo' má'. ¡Cara! Guuz loo patronl nee patronl xá mod li patronl par ba'. Na ne'gade loo yalhua. <sup>20</sup> Le' tedib mbi' na, ndxab loo moz: ¡Cara! Na ngolo mselya' con thib mza'. No conate ndli yende mod gan loo yalhua. Guuz loo patronl nee patronl xá mod li patronl par ba'. Le' daa ne'gade loo yalhua. <sup>21</sup> Co'se' mbere moz, ndyàa moz par liz patrón, mda' moz cuent xá mod ngòca loo moz loo patrón. Co'se' mbìn patrón di's co' ndxab moz cón che'n mènà, anze'f ngocloo tín' patrón moz con mènà. Sya, ndxab patrón loo moz: Goror huàa cua'n mèn co'te' nac ned yòo no co'te' nac rye ned co' nsyo le'n yèez par ya xil mèn prob, no mèn yíiz, no mèn renc, no mèn sieu, yi'th mènà loo yalhua. <sup>22</sup> Ngoloa, co'se' ndye'th moz, ndxab moz loo patrón moz: Daa mblile' xal mnibe' U' loon. No tatabe' nalath co'te' tyubre' mèn par yi'th mèn loo yalhua. <sup>23</sup> Patrón mbere ndxab loo moz tedib vez: Bere, huàa tee hui' co'te' nac ned yòo no rye co'te' nsyo ned. Por fuerz guuz loo rye mèn co' zyál'l par yi'th mènà, hua mènà no par yi'th mènà, gu mènà. Tac ndlyazen zyè lizen con rye mènà. <sup>24</sup> Tolo ndxab patrón

loo moz: Na nii lool: Nec thib mèn co' nerleque' mblin convid ne'taden lugar loo mènà yòo mènà le'n nyòo lizen par yòo mènà loo yalhua.

*Trè' ndlu' cón che'n con' ryes co' tyactii mèn, mèn co' yòoque' loo cón che'n Crist.*

<sup>25</sup> Ngoloa, anze'f thib mèn mdoo nque xís Jesús. No mbere Jesús ned xís Jesús. Mbez Jesús loo mènà:

<sup>26</sup> —Chele' chó gu' nde nque xísen, no más ndli gu' cas xud gu', no xna' gu', no xa'got gu', no xin' gu', no hues gu', no fta'n gu', no ndxàc chop lezo' gu' chonon mblá' gu' yalgon' gu' no ryethe con' co' nda' gust lezo' loo izlyo' ndxè' leque más ngue li gu' cas cón chenen, yende mod gác gu' myen' xin' mté'th daa. <sup>27</sup> No gu' co' ne'xecte gác ngòc nguàal con' loo gu' por cón chenen, gu'a yende mod gác myen' xin' mté'th daa. <sup>28</sup> Jesús tolo ndxab loo mènà:

—Nde niin tedib con' loo gu', ne: Angab na'i, chele' chol gu' co' nziri' trè' ndlya's toxcuá' gu' thib liz gu' con vari no con ciment co' gác chop son pis, ner ndyub gu' par co xnee gu' plál li gu' gast no par ñee gu' ñeene' ché' taal tmi co' mqueltàa gu' par telo gu' zin'a, ¿lé'? <sup>29</sup> Per ndxe'leque', chele' gu' msèle' cimient co'te' tyub liz gu' no ne'líde gu' gan telo gu' liz gu'a, le' sya, ryete mèn co' hui' tataa nac zin' co' ngue li gu'a, tlo mènà xíis no mènà gu'. <sup>30</sup> No gab mènà: ¡Ay, prob mbi' ba' izlyo'! Mbi' ba' ngue xít te'f thib liz mbi' co' nac chop o son pis no ale ne'nglide mbi' gan ntelo nxít te'f mbi' liz mbi' ba'.

<sup>31</sup> Tolo ndxab Jesús loo mènà: Nde niin tedib con' loo gu', ne: Chele' thib rey nzo lezo' li rey thib xó' con tedib rey, ¿ché' ngue li gu' cuent ne'tyubte reya ner par co xnee reya ñeene' ché' tli si' mil solndad che'n reya gan loo gal mil solndad che'n tedib rey co' nac ngolo ngola's co' nde li xó' loo solndad reya, cà'? <sup>32</sup> No chele' ner reya mblo xnee ne'líde ner reya gan loo xó', no tatabe' tith nzo tedib reya, le' sya, ner reya tel' di's loo tedib rey par tál ner reya loo di's no loo cuent par tataa mod tu' tál rey ndxè' loo di's no loo cuent.

<sup>33</sup> Cona, ngue niin loo gu': Chele' chol gu' más ndli cas loo cón che'n gu' leque li gu' cas loo cón chenen, gu'a yende mod gác lícpe' xin' mté'th daa.

*Tad Jesús ngue tetac loo mèn cón che'n ted co' nguri'th xla' co' ya inteziide co' ndxuhua mèn. (Mt. 5.13; Mr. 9.50)*

<sup>34</sup> Nde niin tedib con' loo gu', ne: Anze'f huen nac ted. No axta arid nquin mèn ted. Per chele' ted nac ted nala, ¿xá mod gác nazii teda no xá mod tezii ted con' ndxuhua mèn, sya? Yende mod gáca tataa tac ted nac ted, ¿lé'? <sup>35</sup> Ne'líde sirv ted par gác ted yòo. Ne' ne' li sirv ted par gác ted be'f. Alithe cobii mèn ted. Gu' co' ndxaa'd di's ndxè', bìn gu' di's ndxè' no fta' gu' cuent co' huenleque' cón nee di's di's ndxè'.

## 15

*Tad Jesús ngue tetac cón che'n mèn co' alith nziri' loo izlyo' xal thib mbacxil' co' mdyuhuan. (Mt. 18.10–14)*

<sup>1</sup> Láth be' ngue toodi's no Jesús mènà, rye mèn co' ndli cobrar tmi cón che'n contribución no rye mèn co' ngòp xquin no co' ngòp xtol mbii gax loo Jesús par gòn mènà di's co' ndyoodi's Jesús. <sup>2</sup> No co'se' ñèe mèn xley' farise no mèn co' ngòc maistr co' ndlu' cón che'n ley co' mxo'f Moisés loo mèn tiempa xal mqueltàa mèn loo Jesús, xèe ndla's mènà loo Jesús. No xexte mbez mènà loo xtàa mènà:

—Hui' gu' nexa. Mbi' ba' nqueltàa no mèn co' ndxàp xquin no co' ndxàp xtol. No axta ndxuhua no mbi' mèn ba'. Nazab ngue li mbi' ba', ¿lé'?

<sup>3</sup> Jesús ndxab loo mènà:

<sup>4</sup> —Nde niin thib con' loo gu': De loo rye gu' co' nziri' trè', angab na'i, ¿ché' nzo thib gu' co' ngue no thib ayo mbacxil' no láth ngue tee queno gu' mbacxil'a, xexte mdyuhuan thib mbacxil' ngro' mbacxil' làth partid, ché' ne'yòode valor loo gu' par lá' gu' rye partid mbacxil', co' nac thap gal nzo si'n thap mbacxil' ante mbacxil' ned huana co'te' nac segur par ya cua'n gu' mbacxil' co' taa mdyuhuan axtaque' zyal gu' thib mbacxil'a, cà'? Lícque', lá' gu' rye mbacxil'a thib lugar, ¿lé'? <sup>5</sup> No co'se' zyal gu' mbacxil'a, xo'f gu' mbacxil'a xís

yen gu', tant ndyac lezo' gu' mzyal gu' mbacxil'a. No ndye'th no gu' mbacxil'a, ¿lé'? <sup>6</sup> No co'se' zin gu' liz gu', li gu' par queltàa mèn co' ndxàc amiu gu' no mèn co' ndxàc vecin gu' liz gu'. Sya, gab gu' loo mèna: Quede gu' par tyac lezo' gu' con daa tac daa mzyalle' mbacxil' daa co' mdyuhuan. <sup>7</sup> Na nii loo gu': Lomisque' mod más tyac lezo' angl co' nzo loo bé' por cón che'n thib mbi' co' mcua'n xtol co'se' lyàa yéc mbi' no lyàa lezo' mbi' loo Diox leque tyac lezo' angl ñèe angl thap gal nzo si'n thap mèn co' ndli cuent nac mèn mèn ndac no mèn co' ndli cuent inquinte lyàa yéc mèn no lyàa lezo' mèn loo Diox par zye' mod co' ndxàc mèn loo Diox. Thiba con' ndxè'.

*Tad Jesús ngue tetac di's cón che'n mèn xal thib billet co' mdyuhuan.*

<sup>8</sup> Le' tediba na, xá ñaa thib xa'got co' ngue no si' billet no ntac thib thib billeta thib ayo pes. No mtuhuan xa'gota thib billet co' ntac thib ayo pes. ¿Ché' ngue li gu' cuent ne'quede xa'gota xnii thib brujit par cua'n xa' billeta abix ncan' no lo'f xa'gota le'n nyòo liz xa' lilleque' axta li xa' gan zyala? Zyalque' xa'i, ¿lé'? <sup>9</sup> No co'se' ngolo mzyal xa' billet co' mdyuhuan co' ntac thib ayo pes, xa'got li par queltàa mèn co' ndxàc amiu xa'gota no mèn co' ndxàc vecin xa'gota. No gab xa'gota loo mèn gòta: Ndlyazen tyac lezo' gu' con daa tac mblin gan mzyal pes bchò co' mdyuhuan. <sup>10</sup> Na nii loo gu': Tataa tyac lezo' angl loo Diox loo bé' por cón che'n thib mbi' co' ngòp xquin no co' ngòp xtol co'se' ngulàa yéc mbi' no ngulàa lezo' mbi' loo Diox par mzye' mod ye'rsin' co' ngòp mbi' loo Diox.

*Tad Jesús ngue ta' cuent loo mèn cón che'n xtol mèn xal ngòca loo thib mbyòo co' ngro' gundee.*

<sup>11</sup> Jesús ndxab loo mèna, ne:

—Ngo thib mbi' co' mque no chop xgan'. <sup>12</sup> Per mbyòo co' ngòc mbyòo bluz loo hues mbyòo, mbyòoa ndxab loo xud mbyòo: Pay, fta' U' herens co' mbez U' nac chenen par càan. Sya, xud myen' mbli rol herens myen' par càa thib thib myen' herens myen'. <sup>13</sup> Per pláthe huiz ndxàc mcàaya' mbyòo bluza herenspe' mbyòo, mtlo mbyòo, mthop mtaa mbyòo rye con' ngòc che'n mbyòo par tho' mbyòoi. Mtho' mbyòo xyòn mbyòo, ne. Ngoloa, mxen mbyòo ned. Nda mbyòo tedib nación más tith loo làaz mbyòo. Tya, mteluxxù' mbyòo tmi mbyòo co' mque no mbyòoa. No mda' mbyòo gust lezo' mbyòo axta plóthe loo con' ye'rsin' con tmi mbyòo co' mtho' mbyòo che'n mbyòoa no co' mtho' mbyòo xyòn mbyòo. <sup>14</sup> Per co'se' ngolo mblixù' mbyòo gast tmi mbyòo, ngulàa thib huin tín' le'n naciona. Le' mbyòo na, mtlo mden' huin. <sup>15</sup> Sya, mcua'n mbyòo zin' liz mèn co' nac mèn naciona par li mbyòo zin'. Mzyalque' mbyòo zin'. Per mbi' co' mda' zin' mbli mbyòo, mbi'a mque no thib partid nguch. Mtel' mbi' mbyòo co'te' ngòc ranch mbi' par ngua queno mbyòo nguch no ta' mbyòo con' hua nguch. <sup>16</sup> Per prob mbyòo izlyo'. Axta mbly'a's mbyòo nguhua mbyòo tá' che'n yaa yis tá' co' nguaa mbyòo nguch par zyè lezo' mbyòo con tá' che'n yaa yis tá' tac patrón mbyòo anze'f tazad mda' co' ndxuhua mbyòo por huin co' ngulàa naciona. <sup>17</sup> Axta syare' mdub xnii yéc mbyòo no mdub xnii lezo' mbyòo no ngulàa yéc mbyòo no ngulàa lezo' mbyòo loo con' ye'rsin' co' mbli mbyòo. Ndxab mbyòo loo lezo' mbyòo: Napló moz ngue zin' liz xuden. No nzo cón hua moz axta plóthe axta ndxan' xo'f con' ndxuhua moz. Per daa ndxath huin trè'. <sup>18</sup> Más huen beren, ndyàan co'te' nac liz xuden. No gaben loo xuden: Pay, daa mcuan xtol daa no xquin daa loo Diox no mcuanen xtol daa no xquin daa loo U'. <sup>19</sup> Ya indliden cuent nac daa xin' U'. Más huen li U' cuent nac daa xal thib moz U', ndyaquen. <sup>20</sup> Sya, mxen mbyòo ned. Mbere mbyòo, ndye'th mbyòo par liz xud mbyòo. Tatabe' tithre' ndye'th mbyòo, gunèe xud mbyòo mbyòo. Sya, mblyat lezo' xud mbyòo gunèe xud mbyòo mbyòo. Mque' xud mbyòo carre. Ngua càa ned xud mbyòo mbyòo. Mde's mcàa xud mbyòo mbyòo. No msero xud mbyòo ro mbyòo.

<sup>21</sup> Sya, ndxab mbyòo loo xud mbyòo:

—Pay, daa mcuan xtol daa no xquin daa loo Diox. No mcuanen xtol daa no xquin daa loo U'. Ya indxàalte daa gab U' le' daa nac xgan' U'.

<sup>22</sup> Per xud mbyòo ndxab loo moz:

—Jer, huàa lo' gu' xab huen mbyòo. No ftegor gu' mbyòo xab mbyòo. No blo gu' thib ani cuen ya' mbyòo. No fque' gu' yilid nii mbyòo. <sup>23</sup> Huàa xi gu' thib laa tor co' más nacha'. Beth gu' tora par hua na'. No li na' thib lni loo mbyòo. <sup>24</sup> Tac mbyòo co' nac xgan'en ndxè' ngòc xal thib mèn co' nguth loon. No ale ndyaquen xgan'en ndxè' ngòc xal thib xa' co' ngro xban loon. Mdyuhuan xgan'en ndxè' loon per nalle' ngro xo'f xgan'en ndxè' loon.

Sya, mtlo mèn guliz xud mbyòo. Mbli mèn lni loo mbyòo.

<sup>25</sup> Láth ndxàc lnia, mbyòo ndlyoa ngue zin' huan. Co'se' mzyèle' izlyo' huiza, ndye'th mbyòo ndlyo par liz mbyòo. No co'se' nde zin gax mbyòo ndlyo liz mbyòo, ndxòn mbyòo ndlyoa ndxol' musc. No ngüi' mbyòo nzi yol' nii mèn. <sup>26</sup> Sya, ngurez mbyòo ndlyoa thib moz co' nzo làth mèn co' nziri'a. Mnibdi's mbyòo loo moza. Ndxab mbyòo loo moz: ¿Chó lni nzo lizen, cara? ¿Cón ndxàc? <sup>27</sup> Moza ndxab loo mbyòo: Huesl mzin, yey. No mbli xudl mandad mbeth nu' thib tor co' más nacha' par hua no xudl huesl. Tataa mbli xudl tac huesl huenque' mzin tedib vez. <sup>28</sup> Per mbyòo co' nac mbyòo ndlyoa mdèn. No ngocloo mbyòo. Ale indlyaste mbyòo yòo mbyòo liz mbyòo. Sya, ngro xud mbyòo ned. Ngua xi xud mbyòo mbyòo par ngòo mbyòo liz mbyòo tac mbyòo ndub tèn tya. <sup>29</sup> Ndxab mbyòo loo xud mbyòo:

—Pay, U' nda'que' cuent napló zin' mblin loo U' huax lín'. No thidteneque' ndyubdizquen loo U'. Per U' ne'nglatte lezo' ngnèe U' daa par nda' U' mase thib chiv par nglin thib lni chu'th par hua non myen' co' ndxàc amiú daa. <sup>30</sup> No nalle' mzin xgan' U' ba'. No mda' xgan' U' ba' gust lezo' xgan' U' con myen'got co' ndxòo lezo' li con' ye'rsin'. No ale mbli U' mandad mbeth moz thib laa tor co' más nacha' par mbli U' lni. ¿Ché' ndyac U' anze'f huen nac co' ngue li U' ba', cà'? Yende xàa.

<sup>31</sup> Sya, ndxab xud mbyòo loo mbyòoa:

Ryete con' co' ndxàpen, le'i nac che'nl. <sup>32</sup> Per nalle' ndxàalque' li na' thib lni par tyac lezo' na' tac huesl co' ngòc xal mèn nguth loo na', ngòc huesl xal mèn co' ngro xban loo na' nalle'. Ngòc huesl mèn co' mdyuhuan loo na' per nalle' yub huesl mzin loo na'. Ya' ndyàa na'. Ne'yecloudel.

## 16

*Tad Jesús ngue tetac di's loo mèn cón che'n thib mbi' co' ngòc mandador ye'rsin' co' mdyee ya' loo cón che'n patrón.*

<sup>1</sup> Ndxab Jesús loo myen' xin' mté'th Jesús:

—Myen', nde niin thib con' loo gu': Ngo thib mbi' ric co' mque no thib mandador. Mzin thib huiz ngòo ndxep mèn co' mda' cuent loo mbi' ric cón che'n mandador le' mandador indyoode altant loo rsin' che'n mbi' rica. <sup>2</sup> Sya, ngurez mbi' ric mandador. Ndxab mbi' rica loo mandador: Ndlyazen ta'l cuent loon. ¿Xá mod nac cuent co' mda' mèn loon cón che'nl, cara? Fta' cuent loon xal nac zin' co' ngue lil. Tac lùu ya ne'tolode gac mandador loo rsinen. <sup>3</sup> Sya, mbli mbi' co' ngòc mandadora xtùuz. Ndxab mbi' loo lezo' mbi': Per nalle' na, ¿cón lin? Patrón daa teche zin' loon. Más de cona, yende fuerz daa par que'en zin' huiz con barret no con yi'f yaa. No chele' daa ga na'b gòn, thyon daa ña'ben gòn. <sup>4</sup> Neequen xá ñaa co' lin par que non mèn co' ta' sa yèth huan no ta' mèn liz mèn par gòn plá huiz co'se' ne'ta'de patrón más zin' lin trè'. <sup>5</sup> Sya, ngurez mandador thib thib mèn co' ndeb loo mbi' rica. Mnibdi's mandador loo ner mbi' co' ndeba. Ndxab mandador: ¿Plál ndebl loo patrón daa, à'? <sup>6</sup> Mbi' co' ndeba mcàb. Ndxab mbi' loo mandador: Daa ndeb thib ayo barril aceit loo patrón. Sya, ndxab mandador loo mbi' co' ndeba: Ye's co' nac val lùu ndxè'. Ftub loo asient no xax xax toxcuá' tedib val. No ftub loo val le' lùu ndeb cho' psi' barril aceit no maste. <sup>7</sup> Ngoloa, mnibdi's mandador loo tedib mbi' co' ndeb loo patrón mandador, ne. Ndxab mandador loo mbi'a: ¿Lùu, à'? ¿Plál ndebl loo patrón daa? Mbi' co' ndeba ndxab: Daa ndeb thib ayo almud triu loo patrón. Sya, ndxab mandador loo mbi' co' ndeba: Ye's co' nac val lùu ndxè'. Nalle' ftoxcuá' tedib val. Ftub cuent loo val co' toxcuá'l ba' le' lùu ndeb thap gal almud triu no

maste loo patrón daa. <sup>8</sup> ¡Per máa mbi' ric! Lueg mden' lezo' mbi' ric no mda' mbi' rica cuent le' mandador ngòc lijerle' xal nac mod co' ndxàp mandador loo zin' co' ndyoo naa mandador. ¡Ne'yila'ste gu' con' nde niin loo gu'! Más nalas nac mèn co' alithe naban loo izlyo' ndxè' loo mod co' ndxàp mèn li mèn loo thib xtàa mèn no loo tedib xtàa mèn leque mèn co' mblá'le' ryethe cón che'n xab izlyo' no mèn co' ndyub xnii yéc no co' ndyub xnii lezo' loo cón che'n Diox loo rsin' che'n Diox.

<sup>9</sup> Por cona, ngue tan'en di's ndxè' loo gu' le' gu' co' nac xal mandador che'n Diox, nalas gure gu' loo izlyo' ndxè' loo interes co' ncàb con' ye'rsin' loo mèn par li zin' gu' che'n gu' co' ndxàp gu' par tataa mod gàc amiu gu' con huax mèn loo izlyo' ndxè'. Le' sya, lomisque' mod, gàca loo gu' co'se' gath gu' ndoo lite ta' Diox lugar loo gu' yòo gu' loo Diox co'te' ban gu' thidtene tac altant mdoo gu' loo zin' che'n Diox xal thib mandador ndac.

<sup>10</sup> Mèn co' altant ndyoo no co' ñee rsi' ñee rso par quenap mènna co' nac che'npe' mènna con' co' ngue note mènna, mènna altantleque' tyoo no ñee rsi' ñee rso mènna par quenap mènna taamas huax con' chele' Diox li par que no mènna taamas con'. Le' mèn co' nquedi xtàa loo ndxèpte con', mènna quedi xtàa loo huax con' chele' mènna li gan. <sup>11</sup> Cona, ngue niin loo gu': Chele' gu' indyoode altant no ñee rsi'de gu' no ñee rsode gu' yalgon' co' nthop gu' no co' ndxàp gu' loo izlyo' ye'rsin' ndxè', ¿chó mèn gáp yalxla's loo gu' no chó mèn yila's le' gu' tyoo altant no ñee rsi' gu' no ñee rso gu' zin' ndac co' nac cón che'n Diox, à'? Yende mod gàca tataa, ¿lé'? <sup>12</sup> No chele' gu' indyoode altant loo con' co' nac che'n taamas mèn, ¿chó ta' con' càa gu', con' co' gàc che'npe' gu', sya? Yende mod gàca tataa, ¿lé'?

<sup>13</sup> Nde niin thib con' loo gu': Yende mod li thib moz sirv loo chop patrón. Bien li moz cas loo thib patrón. Le' loo tedib patrona yecloo moz ñee moz patrona. Bien más altant tyoo moz loo thib patrón. Le' loo tedib patrón na, tyoo xà' lezo' moz ñee moz tedib patrona. Cona, ngue niin loo gu': Yende mod xo'f zin' mèn zin' co' nac cón che'n Diox chele' mèn más nde yath nde lux ñee yalgon' che'n izlyo' ndxè'.

<sup>14</sup> Per mèn xley' farise, co' más nde yath nde lux ñee yalgon', nzi yòn di's co' ndxab Jesús. Sya, ndxáp nxyán' mènna no mxiiis nxyán' mènna ñee mènna Jesús. <sup>15</sup> Jesús ndxab loo mènna:

—Anze'f thib con' ndli gu' par ndxàc gu' mèn ndac loo mèn. Per Diox non no nanee Diox xá nac con' co' ndli gu' xtùuz le'n lezo' gu'. Tac ryete con' co' ndli mèn cuent nac más con' roo con' xèn loo mènna, Diox ndxòo xyan' lezo' ñee Diox mèn co'se' ndli mèn con'a.

*Trè' ndlu' cón che'n mod co' mblu' Tad Jesús loo mèn cón che'n xá mod ndxòo mèn loo cón che'n Diox par ñibe'pe' Diox loo mèn.*

<sup>16</sup> Ndoore' gàc tiemp co' mbi'th Juàn Bautist, nzo'fle' ley che'n Diox co' mxo'f Moisés loo mèn no nzole' libr co' mque' mèn ye's, mèn co' mde'th di's co' ndxab Diox. Per axta tiemp co' mbi'th Juàn Bautist, mtlo mbyath mbyèn cón che'n di's ndac co' ndlu' xá mod ndlya's Diox ñibe'pe' Diox loo mèn. No ryete mèn co' mbìn di'sa nguátbèe par mbli mèn co' nzote mod li mèn par ñibe'pe' Diox loo mèn.

<sup>17</sup> Más inagànte naca lyux no lith no izlyo' no bé' leque ne'gàcte con' co' nac más be'the' co' mcàbgòn Diox li Diox loo ley co' mxo'f Moisés loo mèn. Aa. Gàcpe'i.

*Trè' ndlu' cón che'n mod co' mblu' Tad Jesús loo mèn cón che'n con' co' ndxàc co'se' selya' mèn tedib vez ndxelo mblá' mèn xa'got mèn tiempa.*

*(Mt. 19.1–12; Mr. 10.1–12)*

<sup>18</sup> Niin con' ndxè' loo gu', ne: Chele' thib xa'bi' negadi's tè'b no chobla' xa'bi' sa'l xa' no selya' xa'bi' con tedib xa'got, sya, xa'bi'a ngue li yalburrid. Le' thib xa'bi' co' selya' con thib xa'got co' mtè'b sa'l no co' mchobla' sa'l, xa'bi'a ngue li yalburrid, ne.

*Tad Jesús ngue ta' cuent loo mèn cón che'n thib mbi' co' ngòc ric no cón che'n thib mbi' co' ngro' lèe Lars co' ngòc thib mbi' prob.*



<sup>19</sup> Jesús ndxab loo mèn:

—Nde tan cuent cón che'n co' ngòc loo thib mbi' ric loo gu'. Mbi' rica mdoc xab mbi' co' nabe's mdyoxcua' no co' ante nít nayèe ñaa. No ryete huiz ndli mbi' lni liz mbi' axta mod co' mblya's mbi' no xal nda' gust lezo' mbi' li mbi'. <sup>20</sup> Ngo thib mbi' prob, ne. Mbi' proba ngro' lèe Lars. Mdoò thib loo yé's ya's dib lad Lars. Ndyee tub Lars ro ryo' liz mbi' rica. <sup>21</sup> Látha, ndyub bed Lars no ndyub quee lezo' Lars ña'b Lars pedaz yèth no nítyèth co' ndxan' xo'f loo mes co' ndxuhua mbi' rica par hua Lars par be'te' que' ni'i lezo' Lars. Láth ndub bed Larsa, nde ley mbac loo yé's ya's co' ndoo lad Lars. <sup>22</sup> Mzin thib huiz nguth prob Lars. Per angl che'n Diox mbi'th. Mbe' angl xpíi Lars no alm Lars par ngo no Lars Abraham co'te' ngo Abraham le'n paradis. Mzin huiz nguth mbi' rica, ne. Ngua ca's mèn thebol mbi' rica panteón. Le' alm mbi' no xpíi mbi' na, ndoo lite ngulaa le'n ye'rbíil. <sup>23</sup> Per láth nden' mbi' rica yaltíi no ndxec nzyo mbi' le'n ye'rbíil co'te' mbii xpíi no alm mèn ye'rsin' co' ndxath, gunèe mbi' rica tith nzo no Lars Abraham. <sup>24</sup> Sya, ngrozèe mbi' rica. Ndxab mbi' ric loo Abraham: Tad Abraham, gulat lezo' U' gunèe U' daa. Ftel' U' Lars ya tegaz Lars cuen ya' Lars con nít no yi'th tegaz Lars looz daa trè' tac anze'f nèe nac co' nden'en loo quíi no loo bèel co'te' nzon ndxè'. <sup>25</sup> Abraham ndxab loo mbi' ric co' nguth: Mbi', fte' lezo'l, lùu anze'f huen ngua le'n rye tiemp co' ngo banl lada. Per prob Lars ndxè', anze'f thib con' ye'rsin' no con' nalyat ngòc loo prob Lars. No nalle', ale ndxe'leque', ndyac lezo' Lars co'te' nzo Lars trè'. Le' lùu na, ale ndxe'leque', nden'l ndxec nzyol loo quíi no loo bèel co'te' nzol ba'.

<sup>26</sup> Más de cona, ndri'th thib ftee co' anze'f na's tìn' trè' co' ntau' loo nu' no co' ntau' lool. No chele' lùu lya's riid co'te' nzo nu' ndxè', yende mod riidl. No chele' nu' lya's riid co'te' nzol ba', yende mod riid nu'. <sup>27</sup> Sya, ndxab mbi' rica loo Abraham: Daa ña'b loo U', Tad Abraham, ftel' U' Lars ya Lars liz xuden <sup>28</sup> co'te' ngue non ga'y myen' huesen, par ta' Lars cuent loo myen' huesen par tataa mod ne'yi'thte myen' trè' co'te' anze'f ndxàc yaltíi loo mèn ndxè'. <sup>29</sup> Per Abraham ndxab loo mbi' rica: Myen' ngue noque' di's co' mque' Moisés ye's co' nac ley co' mxo'f Moisés loo mèn. No ngue noque' myen' di's co' mque' mèn co' mde'th di's co' ndxab Diox ye's loo libr. Loo di'sa nzoque' mod li myen' cas chele' myen' lya's tyubdi's. <sup>30</sup> Mbi' rica mcàb loo Abraham. Ndxab mbi': Lica xá nee U' ba', Tad Abraham. Yende cón niin loo U' cón che'n di's co' ngolo gunee U' ba'. Per más segur gàca chele' thib mèn nguth ryo xban par ya mèn ngutha loo myen' huesen par ta' mèn ngutha cuent loo myen' huesen, ndyaquen. Sya, lyàa yéc myen' no lyàa lezo' myen' no zye' mod co' ndxàp myen' par lyá' myen' loo ryethe con' ryes. <sup>31</sup> Abraham ndxab loo mbi' rica: Chele' myen' indlide cas no indyubdi'ste myen' loo ley co' mxo'f Moisés loo mèn no loo di's co' mde'th mèn co' mde'th di's co' ndxab Diox, ne' ne' yila's myen' loo mèn co' yaa, mèn co' ryo xban làth mèn nguth.

## 17

*Tad Jesús ngue lu' loo mèn cón che'n con' ryes co' ndxàc loo mèn co'se' ncu'a'n mèn xquin mèn no xtol mèn.*

*(Mt. 18.6-7, 21-22; Mr. 9.42)*

<sup>1</sup> Jesús ndxab loo myen' xin' mté'th Jesús:

—Thidteneque' nzoque' con' co' ndli par ncu'a'n mèn xtol mèn no xquin mèn. Per mandit mbi' too ze too yál', mbi' co' aseli par cua'n mèn xquin mèn no xtol mèn. <sup>2</sup> Más huen ngàca nquedó' mèn thib quèe yees yen mbi' ye'rsin'a. No yiloa, cobii mèn mbi'a le'n níttó' leque li mbi' ye'rsin'a le' mèn co' be' nau' loo no mèn co' be' nau' yéc ncu'a'n mèn xquin mèn no xtol mèn, mèn co' nac mèn co' pente mtlo ndxela's loo cón che'n Diox. <sup>3</sup> Anderhuen gu'. No gunee gu' xá nzi tee ban gu'.

Chele' chol hues xtàa gu' cua'n xtol cón che'n gu', gunii gu' loo hues xtàa gu'a no bco'x gu' ndxep loo hues xtàa gu'a. No chele' hues xtàa gu'a lyàa yéc no lyàa lezo' loo con' mbli hues xtàa gu'a, fteri'th ftecan' gu' xtol no xquin co' mcu'a'n hues xtàa gu' loo gu'. <sup>4</sup> Mastale' cua'n hues xtàa gu'a xtol no xquin hues xtàa gu'a loo gu' gaz vez thib

huiz, no chele' hues xtàa gu' yi'th loo gu' gaz vez no ñee hues xtàa gu' loo gu' gaz vez: Ya ne'bereden cuanen xtol daa lool, hues, le' sya, gu' co' ndxàc hues xtàa por cón che'n Crist, fteri'th ftecan' gu' xtol no xquin co' ndli hues xtàa gu' loo gu'.

*Tad Jesús ngue ta' cuent loo mèn cón che'n con' co' ndli mèn co'se', licpe', ndxela's mèn loo cón che'n Diox.*

<sup>5</sup> Myen' xin' mté'th Jesús co' ne' tedib lèe apostl, co' nee di's, mèn co' ndxe' di's cón che'n Tad Jesús, myen'a ndxab loo Tad Jesús:

—Tad, bli U' par tolo yila's nu' no tolo gáp nu' más yalxla's loo ryethe con' cón che'n U'.

<sup>6</sup> Sya, ndxab Tad Jesús loo myen':

—Chele' gu' pente ndxela's no, licque', ndxela'spe' gu', nzoque' mod gab gu' loo yaa sicomr ndxè': Na nii lool, yaa sicomr, yi'fl trè'. No leque lùu ya ro níttó' par tyool ro níttó'. Na nii loo gu' le' yaa sicomr ndxè' gòn ro gu'.

*Trè' ndlu' leque mèn ta' cuent inacte mèn arid mèn ndac loo zin' co' nxo'f zin' mèn cón che'n Diox.*

<sup>7</sup> Nde niin thìb con' loo gu': Chele' chó gu' ngue no thìb moz, no ndye'th moz ngua moz zin' huan, bien ngua gan' moz ngon, o bien ngua queno moz ngon, ¿ché' tab gu' loo moz co'se' ndye'th moz ngua moz zin': Moz, quede. Ftub loo mes par bequen con' hua rsèl, ndee? <sup>8</sup> Yende xàa. Ndxè'leque', gu' gab loo moz: Jer toxcuà' con' hua rsè'en no altant ftoo par lil mandad loon láth ngue yuhuan no láth ngue yun. Sya, co'se' ngolo nduhuan no co'se' ngolo ngun, sau' tyubl hual. <sup>9</sup> ¿Ché' ndyac gu' le' patrón gab loo moz: Diox quixl, moz, tac mtoxcua'l con' nduhua rsè'en, ndee? ¡Jaa! Pà gab patrón tataa loo moz, ¿lé'? <sup>10</sup> Cona, ngue niin loo gu', ne: Co'se' yilo li gu' ryete con' co' mnibe' Diox loo gu' par li gu'i, ndxàal gab gu' loo Diox: Nu' nac moz co' yende cón ntac no co' yende chó juis tac mbli nu' ante con' co' mnibe'te U' loo nu' par li nu'i.

*Tad Jesús mteyac si' mèn co' mxac thìb yíiz co' nteya's no co' nteyèe yid lad mèn.*

<sup>11</sup> Co'se' tolo mdoo Jesús ned, nda Jesús par ned ciuda Jerusalén, ngua riid Jesús rye yèezya' che'n làaz mèn samari no che'n làaz mèn galile. <sup>12</sup> Texal ngòo Jesús ro thìb yèez, ngua sál' si' xa'bi' co' ndyac yíiz ndxa's, yíiz co' nteya's no co' nteyèe yid lad mèn, loo Jesús. Tith ngure prob mèn loo Jesús. <sup>13</sup> Cabii ngrozèe mèn loo Jesús. Ndxab mèn loo Jesús:

—Jesús, U' co' nac maistr, gulat lezo' U' gunèe U' nu', yey.

<sup>14</sup> Co'se' gunèe Jesús mèn, ndxab Jesús loo mèn:

—Huàa gu'. Huàa lu' gu' gu' loo nguley'.

Sya láth ndoo mèn ned nda mèn, mbembii lad mèn xalque' thìb mèn huen. <sup>15</sup> Sya, thìb mbi' co' ndxòo cuent si' mèn co' mbyaca, co'se' gunèe mbi' mbyac mbi', mbere mbi', ndye'th mbi' loo Jesús. Cabii mbez mbi' di's natu' loo Diox. Ndxab mbi':

—¡Ay, Dio's! Con' roo con' xèn mbli U' loon.

Tac mteyac Jesús mbi'. <sup>16</sup> Mdub xib mbi' loo Jesús. No xex xex mcotloo mbi' xàn' nii Jesús. Ndxab mbi' loo Jesús:

—Diox quix U', Tad.

No ngòc mbi'a mèn gulàaz mèn samaritan.

<sup>17</sup> Sya, ndxab Jesús loo mèn co' nziri' loo Jesús:

—¿Ché' iryede si' mèn mbyac, cà'? ¿Máa taayè' mèn? <sup>18</sup> ¿Ché' angoluxte mbi' co' nac mèn tith ndxè' mbere ndye'th loon par ndxab mbi': Diox quix U', Diox, loo Diox, cà'? ¿Xá nee gu'? ¿Ché' huen nac co' mbli mèn, cà'? Yende xàa.

<sup>19</sup> Jesús ndxab loo mbi'a:

—Goo too, ndee. Fxen ned. Byàa. Lùu mbyacle' tac ngola'sque'l loon.

*Mèn xley' farise mnibdi's loo Tad Jesús: ¿Xá mod gàca co'se' tlo ñibe' Diox loo mèn?*

*(Mt. 24.23–28, 36–41)*

<sup>20</sup> Leque sya, mèn xley' farise mnibdi's loo Jesús. Ndxab mèn loo Jesús:

—¿Pólxe gac tiemp co'se' tlo ñibe'pe' Diox loo mèn, à'?

Jesús mcàb loo mèn. Ndxab Jesús:

—Co'se' tlo ñibe'pe' Diox loo mèn, ne'yú'da loo mèn xal co'se' ñibe'pe' chol rey loo mèn loo izlyo' ndxè'. <sup>21</sup> Ne'gabte mèn loo xtàa mèn: Trè' nac co'te' ñibe'pe' Diox loo mèn. O tua' nac co'te' ñibe'pe' Diox loo mèn. Aa. Diox ngue ñibe'pe' loo mèn co' ndyubdi'sque' loo Diox làth gu'.

<sup>22</sup> Sya, ndxab Jesús loo myen' xin' mté'th Jesús:

—Zin thib huiz no zin thib ze co' lya's gu' hui' gu' mase thib huiz láth co'se' ngue ñibe'pe'en loo izlyo' ndxè', daa co' mbal yáal loo izlyo' xalque' ndxáal chol mèn. Per ndxe'leque', ya inabante gu' axta co'se' zin huiza. <sup>23</sup> No zin thib huiz no zin thib ze co'se' ñee mèn co' nac mèn gutyè'a loo gu': Mzinle' Jesús loo izlyo' tedib vez. Trè' nzo Jesús. O ñee mèn gutyè'a loo gu': Tua' nzo Jesús. Per na ngue nii loo gu': Ne'yila'ste gu' ro mèn. Ne' ne' ta' gu' lugar tyoo nque gu' xís mèn co'se' zin huiza. <sup>24</sup> Tac texal co'se' ndlyàa bèel gundii loo izlyo', chàa, ndxà'x xnii bèel gundii thib lad ro izlyo' axta tedib lad ro izlyo'. Tataa gaca loo mèn co' nziri' dib athu loo izlyo' co'se' gac huiz co' galen loo izlyo' tedib vez, daa co' mbal yáal loo izlyo' xalque' ndxáal chol mèn. Huiza rye mèn co' nziri' dib athu loo izlyo' nonque' cón chenen. <sup>25</sup> Per ndoore' zin huiza naquinque' ner gac huax yaltii loon. Le' mèn tè'b daa thib lad. No chobla' mèn daa, mèn co' nzi ban le'n tiemp ndxè'. <sup>26</sup> Xalque' ngòca le'n huiz co' mque tee ban Noé, tataa gaca le'n huiz co' gac huiz co' galen loo izlyo' tedib vez, daa co' mbal yáal loo izlyo' xalque' ndxáal chol mèn. <sup>27</sup> Tiemp co'se' ngo ban Noé loo izlyo', alithe ngure yuhua mèn. No alithe ngure yu mèn. No alithe mbli mèn di's nselya' xin' mèn. Ndyee na'b mèn xiix mèn. Nda' mèn xgan' mèn nda buuz axta co'se' mzin huizpe' co'se' ngòca Noé con rye famil Noé le'n yòoyaa. Le' Diox na, mbli ngulàa thib yuu axta ngòc lal nít loo rye yii par tataa mod nguth rye mèn co' ne'ngala'ste loo di's co' ndxab Noé. Ale nguth mèn. <sup>28</sup> Ndxab Tad Jesús, ne:

Tataa ngòca le'n huiz co'se' ngo ban thib mbi' co' ngro' lèe Lot, ne. Alithe ngure yuhua mèn. No alithe ngure yu mèn. Alithe ngure ndi' mèn. No alithe ngure ntho' mèn. Alithe ngo mèn bin. No alithe mtoxcua' mèn liz mèn. <sup>29</sup> Per leque huiz co'se' mxon' mbi' co' ngro' lèe Lot con famil mbi', ngro' mbi' le'n ciuda Sodom. Ngoloa, mbli Diox, chàa, ngulàa quii no bèel no asufr loo bé' loo mèn ciudaa xal co'se' ndlyàa yuuxò'. No mbeth quii no bèel ryete mèn. <sup>30</sup> Tataa gaca, ne, co'se' gac huiz co'se', chàa, galen no yú' daa loo mèn, daa co' mbal yáal loo izlyo' xalque' ndxáal chol mèn.

<sup>31</sup> Huiza, chele' chó mèn ngue tee loo zote yéc yò, no ngue no mèn che'n mèn co' nzosua' le'n nyò, más huen ne'lyàade mèn loo yò par co' mèn che'n mèn le'n nyò. No chele' chó mèn ngue zin' huan, más huen ne'berede mèn par liz mèn tac ya ne'zin'te bere mèn liz mèn huiza. <sup>32</sup> Fte' lezo' gu' con' co' ngòc loo xa'got che'n mbi' co' ngro' lèe Lot par ten' gu' di's co' ngue niin loo gu' no li gu' cas loo con' ngue niin loo gu'. <sup>33</sup> Mèn co' alithe nque tee ban loo izlyo' par que no mèn ante con' co' ndryo' ndlyen' lezo' mèn, loo mèn ne'gacte con' ndac co' nac cón che'n yalnaban par ban no mèn Diox thidtene yiloa. Per mèn co' too lezo' tuhuan mèn ryethe con' ndryo' ndlyen' lezo' mèn cón che'n mèn loo izlyo' ndxè' ante por cón chenen, mèn ban noque' xuden Diox thidtene.

<sup>34</sup> Ndxab Jesús loo mèn, ne: Ngue niin loo gu': Leque hor co' galen, que naca ze, que naca yál', chop mèn nzi yàt loo thib lun'. Hora daa li, chàa, yáp thib xa' par ya sál' xa' daa loo bé'. Le' tedib xa' na, taate yan'. <sup>35</sup> Leque hora, ne, gaca chop xa'got thidte ngue yu'. Thib xa'gota, chàa, lin par yáp xa'gota loo bé' par ya sál' xa' daa. Le' tedib xa'gota na, taate yan'. <sup>36</sup> Lomisque' ne, leque hora, gaca chop xa'bi' ngue zin' huan. Thib xa', chàa, lin par ya sál' xa' daa loo bé'. Le' tedib xa'bi'a na, taate yan'.

<sup>37</sup> Co'se' mbìn mèn tataa ndxab Jesús, mnibdi's mèn loo Jesús. Ndxab mèn:

—¿Pá gac con'a, Tad?

Jesús mcàb. Mtetac Jesús thib di's loo mèn. Ndxab Jesús:

—Pues, gu' nda' cuent co'te' nax nde'f thib má' ya's, anze'f thib ngool ndlyàa loo má' ya's tya, ¿lé'?

## 18

*Tad Jesús ngue ta' cuent loo mèn cón che'n thib mbi' co' ngòc juez no cón che'n thib xa'got viud.*

<sup>1</sup> Jesús mtetac tedib di's loo mènà, ne, par mblu' Jesús loo mèn xá mod ndxàalque' thidteneque' cuez mèn Diox no par ne'yitacte lezo' mèn cuez mèn Diox. <sup>2</sup> Ndxab Jesús:

—Nde niin thib con' loo gu': Ngo thib mbi' co' ngòc juez le'n thib ciuda. Mbi'a ne'ngzebte ngnèe Diox ne' ne' indyóo mbi' ngnèe mbi' chol mèn. Ne' ne' yen chó mport nzo lezo' mbi' ñèe mbi' chol mèn. <sup>3</sup> Leque le'n ciudaa ngo ban thib xa'got viud. Xa'got viuda seguid nda li xol mbi' co' ngòc jueza par li mbi' justis no tub rez mbi' cón che'n thib yalgyoo co' mbyoo xa'got viuda con mèn co' ngòc ngolo ngola's che'n xa'got viuda. <sup>4</sup> Nguri'th huax huiz no nguri'th huax mbe', mbi' co' ngòc jueza ne'nglide cas xa'gota. Per ngoloa, mbli mbi' xtùuz cón che'n xa'got viud co' mbli xol mbi' co' ngòc jueza. Sya, ndxab mbi' loo lezo' mbi': Neequen cón lín teeca. Daa inzyebte ñèen Diox ne' ne' yen chó mport nzo lezon ñèen nec thib con'. <sup>5</sup> Per mastale', guneei xá go teei, na nda li justis cón che'n xa'got viuda par ya ne'tolode yi'th ta' xa' xyàn lezon trè'. Tac ya ngo dible' lezon ñèen xa'got viuda. No ya ne'tolode xec daa ñèen xa'gota.

<sup>6</sup> Tad Jesús ndxab loo mènà, ne:

—Bìn gu' di's co' ngòc di's co' gunii mbi' co' ngòc juez ye'rsin'a. <sup>7</sup> Cona, ngue niin di's ndxè' loo gu': ¿Ché' ngue li gu' cuent le' Diox ne'tí'de no ne'làade Diox mèn, mèn co' Diox mcui, mèn co' mbez Diox ze no yál', cà'? ¿Ché' ndli gu' cuent ndlyen' Diox par lyath no Diox mènà, cà'? Yende xàa. <sup>8</sup> Daa nii loo gu' le' Diox setilte lyath no mènà. No nibdizen thib con' loo gu': ¿Xá nee gu'? Co'se' galen loo izlyo' tedib vez, daa co' mbal yáal loo izlyo' xalque' ndxáal chol mèn, ¿ché' ndyac gu' nzoque' mèn loo izlyo' co' be' nzi yila's loon huiza, cà'? Chele' gu', licque', tolo yila's loon no tolo gáp gu' yalxla's loon thidtene, le'i gáque' le' mèn be' ndxela's loon co'se' galen loo izlyo' tedib vez.

*Tad Jesús ngue lu' loo mèn cón che'n mod co' ngòp thib mbi' co' ngòc mèn xley' farise no cón che'n mod co' ngòp tedib mbi' co' ndli cobrar cón che'n contribución.*

<sup>9</sup> Jesús mtetac tedib di's loo mènà cón che'n mèn co' nzo làth mènà, mèn co' ndyac nac mènà anze'f mèn ndac. No leque mènà indlide cas xtàa mènà. Ndxab Jesús:

<sup>10</sup> —Nde niin thib con' loo gu': Ngua chop xa'bi' le'n templ par cuez xa' Diox. Thib xa' nac xa' che'n xley' farise. Le' tedib xa' na, nac xa' co' ndli cobrar cón che'n contribución. <sup>11</sup> Mbi' co' nac mbi' xley' farise mdoo. No ngurez mbi' Diox taandxè'. Ndxab mbi': Tad Diox, na nii loo U', Diox quix U' tac inacte daa xal taamas mèn; mèn co' ndli huan'; mèn ye'rsin'; no mèn co' ndli yalburrid. Ne' ne' inac daa xal mbi' ba', mbi' co' ndli cobrar cón che'n contribución. <sup>12</sup> Chop vez ndlin ndxàc yalxlat loon le'n thib sman. No ndan centav co' nac diezm cón che'n rye yalgon' co' ndxàpen no cón che'n zin' co' ndlin.

<sup>13</sup> Per ndxe'leque', prob mbi' co' ndli cobrar cón che'n contribución, tith mdoo mbi'. Ne'ngòode valor loo mbi' mase ngüi' mbi' loo bé'. Ndxè'leque', mbez mbi':

—¡Ay, Dio's!

No taa nguin mbi' ya' mbi' pech mbi'. No tolo mbez mbi':

Gulat lezo' U' gunèe U' daa, Tad. Daa nac thib mbi' co' ndxàp xtol no co' ndxàp xquin.

<sup>14</sup> Mbere Jesús, ndxab Jesús loo mènà:

—Na nii loo gu' le' Diox mton' xtol no xquin mbi' co' ndli cobrar cón che'n contribución. No ngòo lezo' Diox mod co' ngòp mbi'. Ngoloa, ndyàa mbi' par liz mbi'. Per ndxe'leque', Diox ne'ndon'te xtol mbi' no xquin mbi' co' nac mbi' xley' farise. Tac chol mèn co' ndye's, loo mènà Diox li gác mènà mèn be'the. Le' loo mèn co' nac mèn nado' na, loo mènà Diox li gác con' guryath no con' guryèn loo mènà.

*Trè' ndlu' le' Tad Jesús ngue bez loo myen' bix: Ngue lin gác con' ndac loo gu', ey.  
(Mt. 19.13–15; Mr. 10.13–16)*

<sup>15</sup> Le'n huiza, mbi'th no mèn myen' bix loo Jesús par que's càa Jesús myen' bixa. Per co'se' ñèe myen' xin' mté'th Jesús con' co' ndxàc, mbyoo myen' xin' mté'th Jesús mènà.

<sup>16</sup> Jesús ngurez myen' xin' mté'th Jesús. Ndxab Jesús loo myen':

—Bla' gu' tetee myen' bix ba' loon con xna' myen'. Ne'tau'te gu' loo myen' no loo mèn co' nde no myen' loon. Tac mèn co' ndyal par ñibe'pe' Diox loo mèn, mènà ndxàp mod no nac mènà xal myen' bix ba'. <sup>17</sup> Lìcpe' ba'i, na nii loo gu': Mèn co' ne'tyalte gáp mod xal thib myen' bix ndxè' par ñibe'pe' Diox loo mèn loo cón che'n Diox, mènà yende mod yòo loo cón che'n Diox par ñibe'pe' Diox loo mènà.

*Trè' ndlu' le' thib mbyòo ric mdoodi's no Tad Jesús.*

*(Mt. 19.16-30; Mr. 10.17-31)*

<sup>18</sup> Làth mèn co' nziri' ngo thib mbi' co' ngòc jef co' ndyoo ner, no co' ndyoo naa, no co' ñibe' loo mèn nación Israel. Mnibdi's mbi' loo Jesús. Ndxab mbi':

—Maistr Ndac, ¿cón ndxàal lin par gápèn yalnaban thidtene, à'?

<sup>19</sup> Jesús ndxab loo mbi':

—¿Chonon mbezl Maistr Ndac nac daa, à'?' Yende chó mèn nac xa' ndac. Ante thib xa' co' nac Diox nac xa' ndac. Chele' lùu indlide cuent no inden'te lùu le'n lezo lùu nac daa Diox, ne' ne' ñeel loon Maistr Ndac. <sup>20</sup> Lùu ndxác di's co' ndlu' loo mèn cón ndxàal li mèn, ¿lé'?, di's co' ndxab: Ne'lìde gu' yalburrid; ne'guthte gu' xtàa gu'; ne'li huan'te gu'; ne'tyè'de gu' loo nec thib mèn; gòp gu' mod loo xud gu' no loo xna' gu'.

<sup>21</sup> Mbi' ndxab loo Jesús:

—Ryete con'a ndyubdizquen no ndliquena axta co'se' ngòc daa myen' bix no axta mtlon mdoo xènen.

<sup>22</sup> Co'se' mbìn Jesús tataa ndxab mbi' loo Jesús, ndxab Jesús loo mbi':

—Tatabe' ndxàc falt lil thib con', cara. Huàa tho' rye con' ndxàpl par ryo' tmi loo con' ndxàpla. Sya, qui'thl tmia par càa mèn prob co' nquin tmi. Tataa mod gápìl más yalgon' loo bé'. Yiloo, yi'thl, tyoo nquel xísen. Nda na', ndee.

<sup>23</sup> Co'se' mbìn mbi' tataa ndxab Jesús loo mbi', anze'f mxi lezo' mbi' tac mbi' ngòc thib mbi' co' anze'f ngòp che'n. <sup>24</sup> Per co'se' ñèe Jesús nalyat nde'f ro mbi', Jesús ndxab loo taamas mèn co' nziri' loo Jesús:

—Anze'f nagàn naca par yòo thib mèn ric loo cón che'n Diox par ñibe'pe' Diox loo mèn ric. <sup>25</sup> Más inagànte naca riid thib má' co' lèe camell le'n ye'r co' nac ngudloo thib aguj leque yòo mèn ric loo cón che'n Diox par ñibe'pe' Diox loo mèn ric.

<sup>26</sup> Co'se' mbìn mèn co' nziri' di'sa, ndxab mènà loo xtàa mènà:

—Chele'i tataa nac, ¿chó mèn gác lyá' loo con' ryes, sya?

<sup>27</sup> Jesús ndxab loo mèn co' nzi yòn di'sa:

—Con' co' ne'gácte li mèn, Diox ndxácque' li Diox con'a.

<sup>28</sup> Pedr ndxab loo Jesús:

—Tad, nu' mblá'ya' ryete con' co' ngòp nu' par ndoo nque nu' xís U'.

<sup>29</sup> Sya, mcàb Jesús. Ndxab Jesús loo myen' xin' mté'th Jesús:

—Lìcpe' ba'i, le' chol mèn co' lá'ya' liz; no co' lá'ya' xud; no co' lá'ya' hues; no co' lá'ya' sa'l; no co' lá'ya' xin' par tyal mènà yòo mènà loo cón che'n Diox par ñibe'pe' Diox loo mènà loo cón che'n Diox, <sup>30</sup> Diox li par gáp mènà masre' con' ndac loo izlyo' ndxè'. No más de cona, gáp mènà yalnaban thidtene co'se' cue tedib cua' izlyo' le'n tiemp co' nde nque.

*Tad Jesús mbere ngue ta' cuent loo myen' xin' mté'th Tad Jesús le' Tad Jesús gathque'.*

*(Mt. 20.17-19; Mr. 10.32-34)*

<sup>31</sup> Ngoloa, xà' ngurez Jesús ryete si' fchop myen' xin' mté'th Jesús. Ndxab Jesús loo myen':

—Nase nda na' ciuda Jerusalén, cara, co'te' tyaa ryete con' xal ndub di's loo libr co' mque' mèn co' mde'th di's co' ndxab Diox ye's cón chenen, daa co' mbal yáal loo izlyo' xalque' ndxáal chol mèn loo izlyo'. <sup>32</sup> Lìca, mèn ta'xù' daa loo mèn co' nac mèn tith. No xìis no mènà daa. No yáp xyán' mènà ñèe mèn daa. No aseli mènà ta' mènà xyàn lezon.



No ale suc mèna rloon. <sup>33</sup> Ta' mèna chenen. No yiloa, guth mèna daa. No co'se' yilo son huiz mbeth mèna daa, daa ryo xban làth mèn nguth.

<sup>34</sup> Per myen' xin' mté'th Jesús ne'nda'de cuent cón nee di's co' ndxab Jesús. Axta ne' ne' ñee myen' no axta ne' ne' nden' myen' cón ndxab Jesús loo myen'. Di'sa ngòc di's co' ne'gácte myen' nda' myen' cuent.

*Trè' ndlu' le' Tad Jesús mteyac thib mbi' sieu co' ngòc mèn yèez Jericó.  
(Mt. 20.29-34; Mr. 10.46-52)*

<sup>35</sup> Co'se' yamerle' yòo Jesús ro ciuda Jericó, gunèe Jesús ndub thib mbi' sieu ro ned. Ndub na'b mbi' sieu gòn loo mèn. <sup>36</sup> Co'se' ndub yòn prob mbi' sieua ndoo riid mèn ned, mnibdi's mbi' loo mèn. Ndxab mbi':

—¿Cón ndxàc? ¿Susque' thib mèn ndoo riid!

<sup>37</sup> Mèn ndxab loo mbi' sieua:

—Jesús che'n yèez Nazaret nde riid par nedrè'.

<sup>38</sup> Sya, cabii ngurez mbi' Jesús. Ndxab mbi':

—¿Jesús, U' co' nde bin che'n David co' ngòc rey póla, gultat lezo' U' gunèe U' daa, yey!

<sup>39</sup> Per mèn co' nda ner delant loo Jesús, mèna mbyoo mbi' sieua par cued, ya ne'tolode li mbi' ruid.

Per ale ndxe'leque', sate más cabii mbez mbi' Jesús. Ndxab mbi':

—¿Jesús, co' nde bin che'n David, gultat lezo' U' gunèe U' daa, yey!

<sup>40</sup> Sya, nguled Jesús ned. Mnibe' Jesús loo mèn ya xi mèn mbi' sieua. Co'se' mzin gax mbi' loo Jesús, mnibdi's Jesús loo mbi'. Ndxab Jesús loo mbi':

<sup>41</sup> —¿Cón ndlya'sl li nonl, à', ey?

Mbi' sieua ndxab loo Jesús:

—Tad, ndlyazen ftub U' xnii ngudloon par hui'en, yey.

<sup>42</sup> Ante ndxab Jesús loo mbi' sieua:

—Ngudlool ngo niile'. Mdublen xnii ngudlool tac lùu ngola'sque' loon.

<sup>43</sup> Leque hora, mbi' sieua mbui'. No mdoo nque mbi' xís Jesús. Nda no mbi' Jesús. No mbez mbi':

—¿Ay, Dio's! Con' roo con' xèn mbli U' loon.

Lomisque', ryete mèn co' gunèe ngòc con'a loo mbi', mbez mèna:

—¿Ay, Dio's! Con' roo con' xèn mbli U' loo mbi' ba'.

## 19

*Jesús mdoodi's no thib mbi' co' ngro' lèe Zaque.*

<sup>1</sup> Láth ndoo Jesús ned con taamas mèn, nda Jesús par ciuda Jerusalén. Thib lì nguri'th Jesús le'n ciuda Jericó. Co'se' yamerle' riid Jesús tedib lad ro ciuda Jericó, <sup>2</sup> tya ngro' thib mbi' ric co' ngro' lèe Zaque par ngua sál' mbi' Jesús. Le'xque' le'n tiempa ngòc mbi' jef loo mèn co' ndli cobrar cón che'n contribución. <sup>3</sup> Anze'f mblya's Zaque hui' Zaque loo Jesús par libe' Zaque Jesús. Per yende mod bii gax Zaque loo Jesús par hui' Zaque loo Jesús. Nde nixon', anze'f chu'th Zaque. Nde nxon', anze'f thib mèn mtau' loo Jesús, ne. <sup>4</sup> Sya, mque' Zaque carre. Mner Zaque loo mèn. Ngua quée Zaque loo thib yaa co' lèe yaa sicomr par gác hui' Zaque loo Jesús láth nde riid Jesús. <sup>5</sup> Co'se' nda riid Jesús xàn' yaa co'te' mquée Zaque loo yaa, Jesús mbui' ndub Zaque loo yaa. Ndxab Jesús loo Zaque:

—Zaque, jer bilàa loo yaa ba' tac nalze ta'l posad loon par yan' daa lizl, ey.

<sup>6</sup> Sya, yende izlyo', mbilàa Zaque loo yaa sicomr. No axta gust mbyan' lezo' Zaque mbe' Zaque Jesús liz Zaque. <sup>7</sup> Co'se' gunèe rye mèna ngòc Jesús liz Zaque, ryete mèn co' nde no Jesús, xexte mbez mèna loo xtàa mèn co'te' nziri' mèn:

—Hui' gu' nexa xal ngòc Jesús liz mbi' co' ndxàp xtól ba' par yan' Jesús liz mbi'. Nazab nac con' ngue li Jesús, ¿lé'?

<sup>8</sup> Sya, xi'tha mdoo Zaque, nague's ya' Zaque loo Jesús. Ndxab Zaque loo Jesús:

—Hui' U' nexa, Tad. Na ta rol yalgon' co' ngue non loo mèn co' ndyac yaltì no loo mèn prob. No chele' daa mbli huan' tmi loo ndxep mèn por yalgutyè' co' mtoxquan, chele' mènà ñeei loon, seren thap tant co' mblin gan loo mènà.

<sup>9</sup> Jesús ndxab loo Zaque:

—Nalze mzin huiz lyá'l con rye xin'l loo con' ryes. Ngoloa, ndxab Jesús loo rye mèn co' ngure no Jesús: Taandxè' ndxaben loo Zaque tac Zaque, ne, nac bin che'n Abraham co' mbløj msi' bin co' ngòc mèn naciòn Israel.

<sup>10</sup> Tolo ndxab Jesús loo mènà:

—Daa co' mbal yáal loo izlyo' xalque' ndxáal chol mèn, daa ndal cuanque' mèn co' ndxàp xtol no mèn co' ndxàp xquin, no par telá'en mèn co' nzi tee huan loo xquin mèn no loo xtol mèn loo Diox loo con' ryes par yòo mèn loo cón che'n Diox.

*Tad Jesús mtetac di's loo mèn cón che'n thib mbi' co' mtan' no si' billet co' ntac huax mil pes loo si' moz.*

<sup>11</sup> Ngoloa, láth nda no Jesús mènà par ned ciuda Jerusalén, Jesús mtetac thib di's loo mèn co' nzi yòn di's co' ndyoodi's Jesús. Co'se' nde zin' gaxle' Jesús ciuda Jerusalén, mènà mbli xtúuz le' tiemp co' tlo ñibe'pe' Diox loo mèn mzinle' leque hora. <sup>12</sup> Sya, ndxab Jesús loo mènà:

—Nde niin thib con' loo gu': Ngo thib mbi' co' ngòc bin che'n thib famil ndac co' ngòc mèn roo no mèn xèn. Mbi'a ngro' tee. Nda mbi' tedib naciòn co' nziri' tith par li mèn naciona le' mbi' gac rey loo mèn làazpe' mbi'. No yiloo bere mbi', ye'th mbi' tedib vez par làaz mbi'. <sup>13</sup> Ndoore' ryo' mbi' par ya mbi' le'n tedib naciona, ngurez mbi' si' moz mbi'. Mda' mbi' gal bga'y mil pes loo thib thib moz. No ndxab mbi' loo thib thib moz: Aa. Bli zin' loo tmi ndxè' axta co'se' galen ñeene' máai. ¿Ché' ngue lii gan xin'a ó ché' ingue lida gan xin'a? <sup>14</sup> Per mèn co' nac mèn gulàaz mbi' anze'f ngòo xyàn lezo' gunèe mènà mbi'. Mtel' mèn gulàaz mbi' mèn co' nda nque xís mbi' par gab mènà loo mèn naciòn co'te' nda mbi': Le' nu' indlya'ste gac mbi' ba' rey par ñibe' mbi' ba' loo nu'. <sup>15</sup> Per te' ñeel tataa mbli mèn gulàaz mbi', ngòcque' mbi' rey. No mbereque' mbi', ndye'th mbi' par làaz mbi'. Co'se' mzin mbi' làaz mbi', mtel' mbi' mandad, ngua càa moz co' mtan' no mbi' tmia par ñee mbi' pló xin' tmi nde teele' ndli thib thib moz gan. <sup>16</sup> Mbi'th ner moz loo mbi' co' ngòc reya. Ndxab moz loo mbi' co' ngòc rey: Tad, tmi U' co' mtan' U' loona, le'i mbli gan taasi' tant tmi loo tmi co' mtan' U' loon. <sup>17</sup> Mbi' co' ngòc reya mcàb loo moz: ¡Huen zyax! Lùu nac thib moz ndac. Lùu altantque' mdoo no gunee rsi'que'l no gunee resoque'l loo ndxep te con' ngòpl. Cona, daa li le' lùu gac gobernador loo si' yèez. <sup>18</sup> Ngoloa, ndye'th tedib moz loo mbi' co' ngòc reya. Ndxab moz loo mbi': Tad, tmi U' co' mtan' U' loona, le'i mbli gan taaga'y tant tmi loo tmi co' mtan' U' loon. <sup>19</sup> Mbi' co' ngòc reya mcàb loo moz. Ndxab mbi': Lùu, ne, gac gobernador loo ga'y ciuda. <sup>20</sup> Ngua tedib moz loo mbi' co' ngòc reya. Ndxab moz loo mbi' co' ngòc reya: Tad, tmi U' co' mtan' no U' daaa, le'i ndxè'. Na mblosua'i loo thib panid. <sup>21</sup> Tac daa nzyeb ñèen U' tac U' nac thib mbi' co' anze'f nanguib. No anze'f nde yath U'. Más de cona, ale nthop U' cosech co'te' ne'nglide U' zin'. No nthop U' cosech co'te' ne'ngode U' bin.

<sup>22</sup> Sya, ndxab mbi' co' ngòc reya loo moz: ¡Aa moz zab! ¡Moz ye'rsin'! Co'se' tubl razon cón che'nl, con leque di's co' ndyoodi'spe'l ba' quexù'enl. Chele' lùu nanee le' daa, licque', nac thib mbi' nanguib no thib mbi' co' nde yath, no chele' lùu non le' daa nac thib mbi' co' nthop cosech co'te' indliden zin' no nac daa mbi' co' nthop cosech co'te' ingoden bin, <sup>23</sup> chele' lùu ñee tataa nac daa no tataa ndlin, ¿chonon ne'nga lodel tmi daa loo banc, le' sya, par co'se' ngyalen par lizen ya ri'then no nga lo'en tmi daa loo banc con tod xin'a co' ngue lii gan?

Per moza yende cón ngab.

<sup>24</sup> Sya, ndxab mbi' co' ngòc reya loo mèn co' ngureri'a: Fteche gu' tmi loo mbi' ba'. No fta' gu' tmi ba' loo mbi' co' mbli gan taasi' tant tmi. <sup>25</sup> Mènà ndxab loo mbi' co' ngòc reya: Tad, per mbi' ba' ngue nole' si' tant tmi. ¿Còpe' li no mbi' tant tmi, à'? <sup>26</sup> Mbi' co' ngòc reya ndxab: Na nii loo gu' le' mèn co' ndxàp con' no nalas mèn, mènà gàpre' mas.

Per mèn co' indxàpta, loo mènna biiche rye con' ndxàp mènna. <sup>27</sup> Le' cón che'n rye mèn co' nac ngolo ngola's chenen, mèn co' ne'ndalte gác daa rey par ñibe'pe'en loo mènna, huàa xi gu' mènna, yi'th mènna ndxè'. Beth gu' mènna loon.

*Trè' ndlu' le' Tad Jesús nda le'n ciuda Jerusalén.*

*(Mt. 21.1-11; Mr. 11.1-11; Jn. 12.12-19)*

<sup>28</sup> Ngolo mdoodi's no Jesús mènna, mbere Jesús, mxen Jesús ned. Nda Jesús con taamas mèn par ciuda Jerusalén. <sup>29</sup> Co'se' yamerle' zin no Jesús mènna yèez Betfagé no yèez Betani gaxte co'te' ndub thib yii co' ngro' lèe yii che'n yaa oliv, mtel' Jesús chop myen' xin' mté'th Jesús par ngua myen' le'n yèeza. <sup>30</sup> Ndxab Jesús loo myen' xin' mté'th Jesús:

—Huàa gu' le'n yèez ba'. Texal zin gu' ro yèez ba' ñèe gu' thib burr co' ndoo quedó' ro yèez ba'. Yende chó mèn tar tyub burra. Fxac gu' burra no ye'th no gu' burra trè'. <sup>31</sup> No chele' chó mèn ñibdi's loo gu', ñee mèn loo gu': ¿Chonon ngue xac gu' burr? guuz gu' loo mènna: Tad Jesús naquin burr.

<sup>32</sup> Sya, mxen myen' xin' mté'th Jesús ned, nda myen'. Co'se' nde zin gax myen' ro yèeza, gunèe myen' ndoo burr xalque' ndxab Jesús loo myen'. <sup>33</sup> Sya, ngua xac myen' burr. Per co'se' gunèe mbi' co' ngòc xuan' burra ngue xac myen' burr, mbi'th nibdi's mbi' loo myen'. Ndxab mbi' loo myen':

—¿Chonon ngue xac gu' burr daa ba', à'?

<sup>34</sup> Myen' xin' mté'th Jesús mcàb loo mbi' co' ngòc xuan' burr. Ndxab myen' loo mbi':

—Nu' ngue xac burr tac Tad Jesús naquin burr.

Sya, mblá' mbi' burr ndye'th no myen' burr.

<sup>35</sup> Sya, mbe' myen' burr loo Jesús. No par ne'tyubte Jesús burr taate burr, mxo'f myen' xab myen' xís burr. Ngoloa, mquée Jesús burr. Mdub Jesús burr. <sup>36</sup> No texal nda tee Jesús ned, tataa nda sil myen' xin' mté'th Jesús xab myen' ned nda Jesús par riid Jesús loo xab myen' tant ndyac lezo' myen' ñèe myen' Jesús. <sup>37</sup> Co'se' nda zin gax Jesús con mèn co' ndxela's loo Jesús con myen' xin' mté'th Jesús loo yii co' ngro' lèe yii che'n yaa oliv, mèn co' ndxela'sa mtlo, mbez yèe mènna de gust. Mbez mènna: Diox roo Diox xèn nac Diox, por gunèe mènna rye yalguzye' no con' roo con' xèn co' mbli Jesús loo chol mèn. <sup>38</sup> Mbez mènna, ne:

—Anze'f ndyac lezo' rey no huen nzo lezo' rey, rey co' nde por lèe Tad Diox, rey co' mtel' Tad Diox loo na'. Por cón che'n rey ba' mbyu' mbyàlle' lezo' Tad Diox no ngo nagàlle' lezo' Tad Diox gunèe Tad Diox mèn. Por cona, ndxàc con' roo no con' xèn loo Diox co' nac thidte Diox por cón che'n rey ndxè'.

<sup>39</sup> Láth mbez mènna tataa, ndxep mèn xley' farise co' nzo làth mènna ndxab loo Jesús:

—Maistr, byoo ndxep mèn co' ndxela's lool ba' par ne'gabte mènna arid di's ba'.

<sup>40</sup> Jesús mcàb loo mènna. Ndxab Jesús loo mènna:

—Na nii loo gu': Chele' mèn ba' yau' ro, quèe co' nziri' ned ndan ndxè' cozèe no ñee quèe leque di's ba'.

<sup>41</sup> Co'se' mzin gax Jesús ro ciuda Jerusalén no gunèe Jesús ciuda Jerusalén, mbín' Jesús gunèe Jesús ciuda Jerusalén por cón che'n mèn ciuda Jerusalén. <sup>42</sup> Cabii ndxab Jesús loo mbii loo mèn ciuda Jerusalén:

—Huen ngàca loo gu', mèn ciuda Jerusalén, oj ché' co' ta' gu' cuent mase le'n lult huiz co' nac huiz nalze, co' nac con' ndac co' ndlya's Diox li Diox anggàc loo gu'. Per nalle', ndxe'leque', yende mod gác con' ndac loo gu'. Nac con' ndaca xal thib con' co' ngo casloo loo gu' nalle'. No yende mod ta' gu' cuent no non gu' cón che'n con'a nalle'. <sup>43</sup> Per zin thib huiz no zin thib ze co'se' gác con' ye'rsin' loo gu'. Le' mèn co' nac ngolo ngola's che'n gu'a na, mènna toxcu'a thib ftoo dib vuelt ro ciuda gu' rye lad xal co'se' ngo mèn thib yaaloo quèe dib vuelt xís yòo liz mèn par tataa mod yende mod ryo' gu' par tataa mod cua'n mènna xó' loo gu'. <sup>44</sup> Tùub mèn co' nac ngolo ngola's gu' ciuda gu'. Guth mènna rye gu' co' naban ciuda gu'. No ne'tan'te mènna nec thib quèe loo xtàa quèe loo ftoo ciuda gu'. Tataa gàca loo gu' tac gu' ne'nda'de cuent cón che'n tiemp co' mbi'th que tee Diox làth gu' no mbi'th too naa Diox gu'.

*Trè' ndlu' le' Jesús ngue go' che mèn co' ntho' no mèn co' ndi' le'n templ.*

*(Mt. 21.12-17; Mr. 11.15-19; Jn. 2.13-22)*

<sup>45</sup> Ngolo ndxab Jesús di'sa, tolo nda Jesús axta mzin Jesús co'te' mdub templ tiempa. Sya, ngòo Jesús le'n templ. Mtlo Jesús, mblo' Jesús mèn par fuer, mèn co' ntho' no mèn co' ndi' le'n templ. <sup>46</sup> Ndxab Jesús loo mènà:

—;Aa mèn izlyo'! Loo libr co' nac xti's Diox ndub di's co' mbez: Lizen nac co'te' cuez mèn lèen no ña'b mèn con' loon. Per gu' le'le' ndli ndxàc liz xuden co'te' ndli huan' mèn xtàa mèn.

<sup>47</sup> Ryete huiz ndlu' Jesús le'n templ. Per mèn co' ngòc jef che'n nguley' tiempa, no mèn co' nac maistr co' ndlu' cón che'n ley co' mxo'f Moisés loo mèn tiempa, no mèn co' ngòc mèn nac zin' che'n ciuda Jerusalén, ryete mènà mqueltàa par mcua'n mènà mod guth mènà Jesús. <sup>48</sup> Per ne'ñeede mènà xá mod li mèn con'a tac ryete mèn co' nziri' no Jesús, xèe nziri' mènà. Ndxòn mènà di's co' mbez Jesús.

## 20

*Tad Jesús ngue lu' loo mèn le' Tad Jesús ndxàp con' la's nii Tad Jesús no con' la's ya' Tad Jesús par ñibe' Tad Jesús loo mèn.*

*(Mt. 21.23-27; Mr. 11.27-33)*

<sup>1</sup> Thìb huiz Jesús nzo le'n templ. Ngue lu' Jesús mèn, no ngue te'th Jesús, no ngue go Jesús yalbàn cón che'n di's ndac loo mèn xá mod lyá' mèn loo con' ryes. Látha, mzin mèn co' ngòc jef co' más ñibe' loo nguley' no mèn co' nac maistr co' ndlu' cón che'n ley co' mxo'f Moisés loo mèn. Thidte mqueltàa rye mènà con rye mènngool co' ndyoo ner no co' ndyoo naa loo mèn nación Israel loo Jesús. <sup>2</sup> Ndxab mènà loo Jesús:

—Gunee loo nu' ¿chó mnibe' lool ndlil rye con' ndlil? No ¿xá mod ndxàpl con' la's niil no con' la's ya'l par ndlil tatua', à'?

<sup>3</sup> Sya, mcàb Jesús loo mènà. Ndxab Jesús:

—Na, ne, ñibdz thìb con' loo gu'. No ndlyazen fcàb gu' loon: <sup>4</sup> ¿Chó mnibe' loo Juàn Bautist par mbli Juàn bautizar mèn, à'? ¿Ché' Diox mnibe' loo Juàn mbli Juàn bautizar mèn o ché' chol mèn mnibe' loo Juàn mbli Juàn bautizar mèn, cà'?

<sup>5</sup> Lugar de càb mènà loo Jesús, ale mtlo mènà, mdoodi's mènà con xtàa mènà. Ndxab mènà:

—¿Xá nee gu'? ¿Cón gab na' loo mbi' ba'? Chele na' gab: Diox mnibe' loo Juàn, sya, ñee mbi' loo na': ¿Chonon ne'ngala'ste gu' con' mbli Juàn, sya? <sup>6</sup> No chele' na' gab: Juàn mbli bautizar mèn tac ngo chol mèn co' mnibe' loo Juàn li Juàn con'a, sya, ryete mèn co' nziri' no Jesús, tlo mènà, gàa'd quèe mènà na' no guth mènà na' con quèe.

Tac ryete mèn nación Israel nonque' no naneepe' mènà le' Juàn Bautist ngòc thìb mbi' co' mbi'th lo yalbàn xal mnibe' Diox loo Juàn.

<sup>7</sup> Sya, mènà mcàb loo Jesús. Ndxab mènà:

—Ne'ñeede nu' chó mnibe' loo Juàn par mbli Juàn bautizar mèn. <sup>8</sup> Sya, mcàb Jesús loo mènà. Ndxab Jesús:

—Ne' ne' daa nii loo gu' chó mnibe' loon mblin con'a no chó mnibe' loon ngue lin con' ndxè'.

*Trè' ndlu' cón che'n mèn co' ngòc moz ye'rsin'.*

*(Mt. 21.33-44; Mr. 12.1-11)*

<sup>9</sup> Mtlo Jesús, mdoodi's Jesús loo mèn. Ndxab Jesús:

—Tetaquen thìb con' loo gu': Ngo thìb mbi' co' mque no thìb le' xyòn mbi'. Mdoo mbi' lus uv loo xyòn mbi'. Ngoloa, mda' mbi' xyòn mbi' cuent rol loo ndxep mèn co' ndli zin' loo lus uv. Ngoloa, ngro' mbi' liz mbi'. Mblá' mbi' xyòn mbi' huax lín' loo mènà. <sup>10</sup> Per co'se' mzin tiemp co' tlo làa mèn uv, mtel' mbi'a thìb moz mbi' par gab moz loo mèn co' ngue li zin' cuent rol gac rol xlè uv co' gac che'n mbi'. Per mèn co' ngue li zin' cuent rol loo yòoa, ale le'le' mxen mènà prob moza. Mbuaa'd ya' mènà prob moz. No mtel' mènà prob moz, ndyàa moz, nague's ya' moz. <sup>11</sup> Ngoloa, mbere mbi' co' nac che'n yòoa. Mtel'

mbi' tedib moz loo mènà. Mtetii mènà moza no mda' mènà xyàn lezo' moz, no mbuaa'd ya' mènà moz. No mtel' mènà moz, ndyàa moz, nague's ya' moz. <sup>12</sup> Mbere mbi' co' nac che'n yòo lus uva, mtel' mbi'a tedib moz. Per mèn co' ndli zin' cuent rol loo lus uva, mènà mda' che'n moz. Mtehuí' mènà moz no mchobla' mènà prob moz.

<sup>13</sup> Por lult, ndxab mbi' co' nac che'n yòoa loo lezo' mbi': ¿Per nal na? ¿Cón lin? Neequen xá ñaa thib con' lin. Tel'en xgan' daa co' anze'f nque' lezon ñèen loo mènà. Ne'stolque', co'se' ñèe mènà zin' xgan'en loo mènà, gáp mènà mod ñèe mènà xgan'en.

<sup>14</sup> Co'se' gunèe mèn co' ndli zin' cuent rol loo yòoa nde xgan' mbi'a, ndxab mènà loo thib xtàa mènà no loo tedib xtàa mènà: Mbyòo co' nde go' nac mbyòo co' yan' no xyòn mbi' co' nac che'n yòo ndxè'. ¿Xá nee gu'? Nda yuth na' mbyòo par gác che'n na' yòo lus uv ndxè'. <sup>15</sup> Sya, mxen mènà mbyòo. Mblo' mènà mbyòo thib lad ro yòo lus uva. Mbeth mènà mbyòo.

Sya, mnibdi's Jesús loo mèn co' nzi yòn di'sa:

—¿Xá nee gu'? ¿Cón li mbi' co' nac che'n yòo lus uva loo mèn ye'rsin'a, à'? <sup>16</sup> Na nii loo gu' cón li mbi'. Mbi' ya no moz mbi'. No ñibe' mbi' loo moz guth moz rye mèn ye'rsin' co' mbli zin' cuent rol loo xyòn mbi'. No yilóa ta' mbi' xyòn mbi' loo tedib ned mèn co' li más zin' ndac.

Co'se' mbìn mèn di's co' mdoodi's Jesús, ryete mènà ndxab:

—¡Ay, Dio's! ¡Ne'neede Diox conax!

<sup>17</sup> Per Jesús xèe mbui' loo rye mènà. Sya, ndxab Jesús loo mènà:

—¿Cón nee di's di's co' ndub loo libr co' nac xti's Diox, à'? Di'sa nac di's ndxè':

Quèe co' mblobii mèn co' nac albañil, co' mbli mèn albañil cuent yende chó juis quèea, leque quèea ngòc quèe scaudr co' más ntac. Quèea ngòc quèe co' ndub squin yòo.

<sup>18</sup> Leque sya, ndxab Jesús di's ndxè' loo mènà, ne:

—Chol mèn co' yixud loo quèea, lyé' zith lad mènà no huí' lad mènà. No loo mèn co' lyàa quèea, quèea lé' mènà no to' quèea mèn thidtene.

*Mèn mnibdi's loo Tad Jesús: ¿Ché' huen naca quix na' cón che'n contribución?*

*(Mt. 21.45-46; 22.15-22; Mr. 12.12-17)*

<sup>19</sup> Mèn co' ngòc jef che'n nguley' tiempa no mèn co' ngòc maistr co' mbli' cón che'n ley co' mxo'f Moisés loo mèn nación Israel tiempa, mènà mblya's leque hora nden mènà Jesús. Tac mènà mda' cuent cón che'n mènà ngòc di's co' mtetac Jesús loo mèn. Per mzyeb mènà ngli mènà con'a por nziri' mèn co' nziri' no Jesús. <sup>20</sup> Sya, mtel' mèn co' ngòc jef che'n nguley' no mèn co' nac maistr che'n ley mèn ye'rsin' co' asembli par ngòc mènà mèn guryath no mèn guryèn loo Jesús par mbi'th la's mènà loo Jesús. Látha, mque di's mènà con Jesús par bel'que' tataa mod gol' Jesús di's con mènà par tataa mod li mènà gan yigaa Jesús loo mènà. Yilóa, ta' mènà Jesús loo gobernador. <sup>21</sup> Por cona, mnibdi's mènà taandxè' loo Jesús. Ndxab mènà loo Jesús:

—Maistr, nu' nanee no non nu' le' U' ndyoodi's no ndlu' U' ante con' co' nac con' licpe'. No indyu'de thib mèn más loo U' leque tedib mèn. Ndxé'leque', non nu' no nanee nu' le' U' ndlu' loo mèn xá mod ndlya's Diox cue ban mèn no xá mod ndlya's Diox que tee ban ndac mèn loo Diox. <sup>22</sup> Gunee U' loo nu': ¿Ché' ndxàal quix nu' tmi co' nac cón che'n contribución co' ña'b gobiern co' ndub ciuda Rom o ché' indxàalte quix nu'i, à'?

<sup>23</sup> Per Jesús nonque' no naneeque' Jesús xá nac xtùuz ye'rsin' co' ngue li mènà xtùuz. Jesús ndxab loo mènà:

—¿Chonon ngue gàal di's gu' daa par tyenxù' gu' daa por di's co' càben loo gu', à'?

<sup>24</sup> Blu' gu' thib pes plat loon par huí'en ñeene' ¿chó che'n gunab co' ngue loo pes ndxè' no chó lèe mbi' co' nac che'n gunab co' ndub loo pes ndxè', à'?

Sya, mbli' mènà thib pes plat loo Jesús. Jesús ndxab loo mènà:

—¿Chó che'n gunab ngue loo pes ndxè', à'?

Mènà ndxab:

—Gunab che'n Ces co' nac gobiern na.



<sup>25</sup> Jesús ndxab loo mènà:

—Aa. Pues, fta' gu' con' co' nac che'npe' Ces co' nac gobiern loo Ces. No fta' gu' con' co' nac che'npe' Diox loo Diox.

<sup>26</sup> Mènà ne'nglide gan par mtec mènà Jesús xal ngòc di's co' mnibdi's mènà loo Jesús loo rye mèn co' nziri' loo Jesús. Ndxé'leque', más mbui' mènà no más gunaa mènà loo Jesús co'se' mbìn mènà tataa mdoodi's Jesús no co'se' gunee mèn xal nac di's co' mcàb Jesús loo mènà. No yende chó ngabte mènà loo Jesús.

*Mèn mnibdi's loo Tad Jesús: ¿Cón gac loo mèn co'se' gac huiz co'se' ryo xban mèn, à'?*

*(Mt. 22.23-33; Mr. 12.18-27)*

<sup>27</sup> Ngoloa, mbii gax ndxep mèn xley' saduce loo Jesús. Mèn xley' saduce indxela'ste le' mèn nguth ryo xban. Ale ndxab mènà loo Jesús:

<sup>28</sup> —Maistr, Moisés mtan' di's loo na' loo ley co' mxo'f Moisés loo mèn póla chele' thib xabi' nguth no mbyan' xa'got xabi'a no ne'ndante xa'gota xin' xa'gota, hues thebola selya' con xa'got viuda par bel'que' tyan xa'gota xin' xa'gota par gac myen' bix co' gáala xin' thebol. <sup>29</sup> Pues, ngòc thib con'. Ngo ban gaz hues myen'. Mselya' mbyòo co' ngòc mbyòo ndlyo con sa'l mbyòo. Per pente mdub no mbyòo sa'l mbyòo pláte lín' no maste. Làth xtau'a, mzin huiz nguth mbyòo ndlyo. Le' xa'got mbyòo ndlyoa na, ne'ndante xin' mbyòo. <sup>30</sup> Sya, mdoole' mbyòo ropa tee selya' con xa'got co' mbyan' viud. Lomisque', ale nguth mbyòo ropa. Ne'ndante xa'got viuda xin' mbyòo ropa. <sup>31</sup> Látha, ndoole' mbyòo yona tee selya' con xa'gota. Lomisque', ale nguth mbyòo yona, ne. Por lult, ale ryete gaz myen' mselya' con xa'gota. No nguth ryete gaz myen'. Nec thib myen' ne'ndante xin' con xa'gota. <sup>32</sup> Por lult, nguth xa'gota. <sup>33</sup> Cona, ngue nibdi's nu' loo U', co'se' gac huiz co' ryo xban mèn nguth, ¿chó myen' gac sa'lpe' xa'gota tac ryete gaz hues myen' mselya' con xa'gota, à'?

<sup>34</sup> Sya, mcàb Jesús. Ndxab Jesús loo mènà:

—Loo izlyo' ndxè' nselya' mènbi' no nselya' mèngot. <sup>35</sup> Mèn co' ngòc Diox cuent yòo tedib izlyo' co' nac yòoba' co'te' ban no mèn Diox thidtene co' nde nque, mènà ngòc Diox cuent ryo xban làth mèn nguth. Mènà ne'selya'de ne' ne' ta' mènà xgan' mènà no rsap mènà par selya' myen'a tya. <sup>36</sup> Mènà ya ne'gathte tya tac mènà gac xal angl. No gacpe' mènà xin'pe' Diox por ngro xban mènà làth mèn nguth huiza. <sup>37</sup> Axta Moisés mblu' le' mèn, licque', ryo xban làth mèn nguth xal ndub di's co' nda' cuent loo libr co' nac xti's Diox co'se' gunee Moisés ndoo yol yaa yis sars. Leque loo libra ndlu' loo na', ne, le' Diox nac Diox che'n Abraham, no nac Diox Diox che'n Isaac, no nac Diox Diox che'n Cob. <sup>38</sup> Diox inacte Diox che'n mèn co' mbez gu' nguth no mblyux co' mbez gu' ne'ryo xbante. Tac co'se' ndxath mèn, inacta mblyux mènà thidtene. Ndxé'leque', Diox non le' mèn nabanque' co'te' ndyàa mèn co'te' ñibe' Diox ndyàa mèn co' nguth. Tac Diox ndli indxelode no indxeluxte mèn thidtene xal ndli gu' cuent nguth mèn no mblyux mèn.

<sup>39</sup> Sya, ngro nxon', ndxep mèn co' ngòc maistr co' mblu' cón che'n ley co' mxo'f Moisés loo mèn ndxab mènà loo Jesús:

—Huenque' gunee U', Maistr. Ndxàp U' razon. Yende chó ñeede nu' loo U'.

<sup>40</sup> Mènà ya ne'tolode ngli ryes ngnibdi's taamas con' loo Jesús.

*Tad Jesús mnibdi's loo mèn: ¿Chó che'n xgan' nac Crist, à'?*

*(Mt. 22.41-46; Mr. 12.35-37)*

<sup>41</sup> Jesús ndxab loo mènà:

—¿Xá mod mbez mèn le' Crist nac xgan' David co' ngòc rey póla, sya? <sup>42</sup> Con que yub David co' ngòc rey ndxab xalque' mbez di's co' ndub loo libr co' nac xti's Diox co' nac libr che'n Salmos:

Yub Tad Diox ndxab loo Tad daa: Ftub cuaten co' nac ladli

<sup>43</sup> axtaque' lin le' ryete mèn co' ngòc ngolo ngola's lùu gac mèn nado' lool.

<sup>44</sup> ¿Xá mod ndlya's gu' ale gac Crist xgan' David co' ngòc rey co'se' leque yub David mbez le' Crist nac Tad David, sya? Yende yob yéc gu' co' taate mbeza, ¿lé'?

*Tad Jesús mqueyèpe' mèn co' nac maistr co' ndlu' cón che'n ley co' mxo'f Moisés loo mèn tiempa.*

*(Mt. 23.1-36; Mr. 12.38-40; Lc. 11.37-54)*

<sup>45</sup> Ryete mèn co' nziri' loo Jesús nzi yòn di's co'se' ndxab Jesús loo myen' xin' mté'th Jesús:

<sup>46</sup> —Anderhuen gu'. Chó Diox chó nee gu'. Nee gu' xal nzi tee gu' loo mèn co' nac maistr co' ndlu' cón che'n ley co' mxo'f Moisés loo mèn tac mèn anze'f ndyubla's que tee noc lar' nol' co' nac xab mèn. No ndlya's mèn le' gu' gáp mod ñii gu' Diox loo mèn co'se' nzyál' gu' mèn loo xbi'. No ndxò lezo' mèn tyub mèn loo ner asient co'te' más ndyu' mèn le'n sinagog. No lomisque', ndxò lezo' mèn ndyub mèn loo mèn co'te' más ndyu' mèn par hua mèn co'se' ndli mèn convid mèn ya mèn loo thib yalhua.

<sup>47</sup> Lomisque' ne, ale nde yath mèn ndyenxù' mèn no ncàaxù' mèn liz prob mèngot viud por pláte pes no maste. No par ndli mèn xalque' mèn co' ne'ñeede, ale asendli mèn nteyol' mèn di's co'se' mbez mèn Diox. Per, licpe' ba'i, na nii loo gu': Por con' ndli mèn, gác más yalquì tìn' loo mèn co'se' gác huiz tub rez Diox cón che'n mèn loo mèn.

## 21

*Trè' ndlu' cón che'n thib xa'got viud co' mda' ofrend ò gòn.*

*(Mr. 12.41-44)*

<sup>1</sup> Láth ngue lu' Jesús mèn le'n templ, ñèe Jesús ngo mèn, co' ngòc mèn ric, tmi le'n alcansi co'te' ngo mèn ofrend tiempa. <sup>2</sup> Látha, gunèe Jesús thib xa'got viud prob co' mblo chop co' ga'y charud le'n alcansi, ne. <sup>3</sup> Sya, ndxab Jesús loo mèn co' nziri':

—Part cón che'n Diox, Diox ngòc cuent más huax tmi mblo prob xa'got viud ba' le'n alcansi leque tmi co' mblo taamas mèn ric ba'. <sup>4</sup> Tac ryete mèn ric ba' co' mblo tmi le'n alcansi ba', mèn ric mblo tmi co' mbyan' xo'f loo con' mxi mèn co' nac co' naquin mèn le'n alcansi. Per prob xa'got viud ba' mblo tmi co' be'te' ngue no xa' par ti' xa' gast xa' le'n alcansi.

*Tad Jesús ngue ta' cuent loo mèn le' mèn telux templ co' ndub le'n ciuda Jerusalén.*

*(Mt. 24.1-2; Mr. 13.1-2)*

<sup>5</sup> Látha, ngure ndxep mèn co' nda ndye'th, nzi tee yot mèn rye lad le'n templ. No ndyoodi's mèn cón che'n templ. Mbez mèn:

—Susque' nabe's ñaa templ con rye loo quèe co' natoxcua' templ ba' no con rye loo con' huen co' natoxcua' le'n templ por cón che'n ofrend co' mda' mèn loo Diox, yoo.

Látha, ndxab Jesús loo mèn co' nzi tee yot le'n templa:

<sup>6</sup> —Nde niin thib con' loo gu': Zin thib huiz no zin thib ze co'se' ryete con' nzi hui' gu' ba' lyux. Yé' huize' yi'th mèn, sil mèn ftoo ba' no làare' mèn ftoo ba'. Ya ne'tan'te mèn nec thib quèe loo xtàa quèe co' nac ftoo ba'. Yende chó ftoo yan' co' ne'silte mèn.

*Trè' ndlu' cón che'n co' tlo gác ndoore' lyux izlyo' ndxè'.*

*(Mt. 24.3-28; Mr. 13.3-23)*

<sup>7</sup> Sya, mnibdi's mèn loo Jesús. Ndxab mèn loo Jesús:

—Maistr, ¿pól gác con'a, sya? No ¿cón tlo yú' loo mèn co'se' tlo gác con'a?

<sup>8</sup> Jesús ndxab loo mèn:

—Anderhuen gu'. Nee gu' xá nzi tee gu'. Ne'la'de gu' quedii chol mèn gu'. Tac anze'f huax mèn yi'th. No ñee mèn loo gu': Daa nac merpe' Crist. No ñee mèn loo gu': Nalle' mzin huiz co' yi'th Crist. Per mastale' tataa ñee mèn loo gu', ne'tyoo nquede gu' xís mèn. <sup>9</sup> No co'se' gòn gu' tyoodi's mèn cón che'n xó' no cón che'n revuelt, ne'zyebte gu'. Tac naquin ner gác con'a. Per mastale' tlo gác con'a, tarte gác huiz co'se' lith no izlyo' tiempa.

<sup>10</sup> Jesús tolo mdoodi's loo mèn. Ndxab Jesús loo mèn:

—Tiempa tlo mèn thib nación cue yoo mèn con mèn co' nac che'n tedib nación. Cue yoo mèn thib nación contra mèn tedib nación. <sup>11</sup> Le'n tiempa huin xò brut huax lugar

no lyàa yilíiz huax lugar. Huiza tlo gàc no tlo yú' con' roo con' xèn loo bé' co' tarte hui' mèn. Co'se' hui' mèn gàc señ co' tarte hui' mèn gàc loo bé', tlo mèn zyeb mèn, por derech.

<sup>12</sup> Per ndoore' co'se' tlo gàc ryete con'a, mèn ye'rsin' tlo tyenxù' gu' no tub ngu's mènà gu'. Hue' mènà gu' co'te' nac sinagog mènà par tub rez mènà cón che'n gu'. Yíloa, que' mènà gu' lezi'f. Hue' mènà gu' loo mèn co' nac rey mèn co' ñibe' no hue' mènà gu' loo mèn co' nac gobernador no loo mèn nac zin' yoolau. Ryethe con'a li no mèn gu' por cón chenen. <sup>13</sup> Gàc con'a loo gu', ey, par tataa mod negadi's ta' gu' cuent cón chenen loo mènà. <sup>14</sup> Bli yéc gu' no bli lezo' gu' par ne'tyóode gu' no par ne'líde gu' xtùuz cón gab gu' no cón tyoodi's gu' loo mènà, par tub gu' razon cón che'n leque gu' loo mènà huiza. <sup>15</sup> Tac daa ne'lá'ya'de gu' hora. Na li par tyoodi's gu'. No lin par gáppe' gu' hora par nec thib mèn co' nac ngolo ngola's gu' ne'gácte mènà ñii mènà ngòc nguàal con' loo gu' huiza.

<sup>16</sup> Le'n huiza, ne, axta xud gu', no huespe' gu', no mèn guliz gu', no mèn co' ndxàc amiu gu' bixyath contra gu'. Ta'xù' mènà gu' loo mèn co' nac ngolo ngola's che'n gu' axta guth mènà ndxep gu'. <sup>17</sup> Ale rye mèn chol lugar yòo xyàn lezo' ñèe mènà gu' ante por cón chenen no maste. <sup>18</sup> Per mastale' tataa li no mèn gu', gàca loo gu' axta ne' ne' thib yis yéc gu' ne'tyuhuate. <sup>19</sup> Chele' gu' thidteneque' cue nèe loo cón chenen no xec yèe gu' loo cón chenen, le' sya, tataa mod gu' que noque' yalnaban, co' nee di's, ban no gu' Diox thidtene.

<sup>20</sup> Niin con' ndxè' loo gu', ne: Co'se' ñèe gu' le' solndad mtau'le' dib vüelt ro ciuda Jerusalén, sya, ta' gu' cuent no li la's gu' yamerle' tlo solndad par setilte telux solndad mèn ciuda Jerusalén no túb solndad ciuda Jerusalén. <sup>21</sup> Co'se' gàc huiza, mèn co' naban rye yèezya' co' nac yèezya' che'n làaz mèn jude, más huen xyon' mènà par yii den par casloo mènà le'n yix no le'n huan. Le' mèn co' nac mèn ciudape' Jerusalén na, más huen xyon' mènà, ryo' mènà le'n ciuda Jerusalén. Lomisque' ne, mèn co' ngue quenap ranch huan, más huen ne'berede mènà par ye'th mènà le'n ciuda Jerusalén. <sup>22</sup> Tac huiza gàc huiz co'se' tub rezpe' Diox loo mèn ciuda Jerusalén cón che'n con' ye'rsin' co' mbli mènà par gàcque' ryete con' loo mènà xal ndub di's loo libr co' nac xti's Diox. <sup>23</sup> Ay, prob rye xa'got co' nzi nac xin' le'n huiza no rye xa'got co' diz ngóol xin' le'n huiza. Tac le'n huiza cue xi lezo' mèn no gàc yalquii loo mèn dib anax le'n nación Israel. No nzyalque' mènà tataa tetii Diox mènà axta plóthe. <sup>24</sup> Mèn co' nac ngolo ngola's che'n mèn ciuda Jerusalén guth huax mèn ciuda Jerusalén loo xó'. Chó mèn gath loo xó'. Chó mènà hue' mèn co' ngòc ngolo ngola's mèn co' ngogaaa axta le'n taamas nación co' nziri' loo izlyo'. No gàca le' mèn co' nac mèn chol nación gàc che'npe' mènà ciuda Jerusalén. No ñibe'pe' mènà loo ciuda Jerusalén axta tyaa huiz co'se' ta' Diox lugar gàc ciuda Jerusalén che'npe' mèn nación Israel tedib vez. No ñibe'pe' mèn nación Israel loo ciuda Jerusalén tedib vez.

*Tad Jesús ngue ta' cuent loo mèn xá mod yi'th mbi' co' ne' tedib lèe Xgan' Mbi' co' nac leque yub Tad Jesús.*

*(Mt. 24.29-35, 42-44; Mr. 13.24-37)*

<sup>25</sup> Sya, ndxab Jesús:

—Nde niin con' ndxè' loo gu', ne: Huiza tlo yú' yalguzye' co' li Diox co' gàc loo huiz no loo mbe' no loo mbyáaz. Le' loo izlyo' ndxè' na, anze'f huax mèn ya ye'th lezo'. No zyeb mèn co'se' gòn mèn ruid che'n ol níttó' co' yitoo loo níttó'. <sup>26</sup> Huiza, alux mèn yo no lezo' no ne' ne' ñee mènà pá ndoo mèn no pá nziri' mèn tant nzyeb mèn co'se' li mèn xtùuz cón gàc loo izlyo' tiempa. Huiza no zea huin huiz co'te' ndub huiz. No huin mbe' co'te' ndub mbe'. No huin mbyáaz co'te' nzi'f mbyáaz. <sup>27</sup> Axta syare' hui' mèn dib athu loo izlyo' loon, daa co' mbal yáal loo izlyo' xalque' ndxáal chol mèn. No co'se' galen le'n tiempa, galen le'n thib le' xcuau. No ndxàpen rye loothe con' la's niin no la's yan co' yú' loo mèn co'se' galen. Tiempa mèn ta' cuent no non mèn cón che'n con' roo no con' xèn co' nac cón che'npe'en. <sup>28</sup> Co'se' tlo gàc con'a, bli gu' par ye'th lezo' gu'. Bdi'x xnií yéc

gu' no bdi'x xnii lezo' gu' tac huiza non gu' no ta' gu' cuent ya nde zin' gaxle' lyá' gu' thidtene loo con' ryes.

<sup>29</sup> Mtetac Jesús thib di's loo mènna. Ndxab Jesús:

—Nde niin thib con' loo gu': Hui' gu' loo yaa ngudyuug no loo chol taamas yaa nayèe.

<sup>30</sup> Co'se' ñèe gu' ngòble' laa loo yaaa no nde xiis tedib cua' laa yèn' loo yaaa, leque gu' non no nda' gu' cuent nde zinle' tiemp co'se' más nguín bée loo izlyo'. <sup>31</sup> Lomisque' ne, co'se' ñèe gu' ndxàcle' con'a, leque gu' nda' cuent no non gu' nde zin' gaxle' tiempa co'se' tlo Diox, ñibe'pe' Diox loo mèn xal ndlyá's Diox.

<sup>32</sup> Lìcpe' ba'i, na nii loo gu': Ryete con'a gàcque' ndoore' lyux no lith no mèn nación Israel. <sup>33</sup> Con' co' nac cón che'n bé' no con' co' nac che'n izlyo' lyuxque' no lith noque'. Per di's co' ndyoodizen inacte di's co' angndyoodizen. Gàcque' no tyubque' di's co' ndyoodizen ndxè' xal ngue toodizena loo gu'.

<sup>34</sup> Anderhuen gu'. Leque gu' hui' xá nzi tee gu'. Ne'ta'de gu' lugar tyub yo'f lezo' gu' par lyàa gu' loo chol con' ye'rsin' par tataa mod yitac lezo' gu' loo cón chenen. Tac látha, chàa, lyàa gu' loo yalguy no tlo gath lyux gu' loo yalgon' che'n izlyo' ndxè'. Nalas gure gu' loo cón chenen par ne'gàcta loo gu' huiza xal co'se' mzin thib amiu gu' thib hor co' ne'ta'de gu' cuent no co' inonte gu'. <sup>35</sup> Huiza gàca loo mèn co' naban dib athu loo izlyo' xal thib tramp co', chàa, ndlyàa par yigaa má' loo tramp. Tataa gàca loo mèn huiza. <sup>36</sup> Nalas gure gu'. Ne'cuedte gu' no ne'yathla'ste gu' thidteneque' gure rez gu' Diox par gàca loo gu' tataa mod li gu' par lyá' gu' loo ryethe con' ryes co' gàcque' huiza. No par tataa mod li gu' gan par yòo gu' loo cón chenen, daa co' mbal yáal loo izlyo' ndxè' xalque' ndxáal chol mèn.

<sup>37</sup> Ndxáal ze ndlu' Jesús mèn le'n templ. Le' ndxáal yál' na, ndyee Jesús co'te' ndub thib yii co' lèe yii che'n yaa oliv par li Jesús descans tya. <sup>38</sup> Le' ryete mèn co' ndyee yòn di's co' ndlu' Jesús le'n templ na, mènna ndxehegà par zingà mènna le'n templ par gòn mènna di's co' ndlu' Jesús loo mènna.

## 22

*Trè' ndlu' cón che'n mèn co' mqueltàa par mxenxù' mènna Tad Jesús.*

*(Mt. 26.1-5, 14-16; Mr. 14.1-2, 10-11; Jn. 11.45-53)*

<sup>1</sup> Nde nixon', nde zin gax huiz co' ngòc huiz lni co' ndli mèn nación Israel co'se' ndxuhua mènna pan co' indxòode dii levadur. Mbez mèn nación Israel lni pasc loo lnia.

<sup>2</sup> Le' mèn co' nac jef che'n nguley' no mèn co' nac maistr co' ndlu' cón che'n ley co' mxo'f Moisés loo mèn nación Israel na, mènna mcua'n mod xá mod guth mènna Jesús. Per mzyeb mènna guth mènna Jesús por cón che'n mèn co' ngureri', mèn co' mbi'th lni co' nziri'.

<sup>3</sup> Látha, ndoole' Mebizya. Ngulàa Mebizya le'n lezo' Jud co' ne' tedib lèe Iscariot. Juda ngòc thib myen' xin' mté'th Jesús, ne, co' ndxòo cuent nac si' fchop myen' xin' mté'th Jesús. <sup>4</sup> Ngua nee Jud loo mèn co' ngòc jef co' más ñibe' loo nguley' tiempa no loo mèn co' mxo'f zin' cón che'n templ tiempa. Mdoodi's no Jud mènna. Ndxab Jud neeque' Jud xá mod li Jud par ta'xù' Jud Jesús la's ya' rye mènna. <sup>5</sup> Co'se' mbin mènna tataa ndxab Jud loo mènna, axta con gust ndxab mènna loo Jud ta' mènna ndxep tmi càa Jud cuent li Jud con'a. <sup>6</sup> Jud mda' lugar. No mblec lezo' Jud li Jud con'a tataa. Sya, mtlo Jud, mcua'n Jud mod par ta'xù' Jud Jesús loo mènna thib tiemp co'se' ñee Jud yende chó mèn nziri' no Jesús.

*Trè' ndlu' xá mod nduhua rsè no Tad Jesús myen' xin' mté'th Tad Jesús.*

*(Mt. 26.17-29; Mr. 14.12-25; Jn. 13.21-30; 1 Co. 1.23-26)*

<sup>7</sup> Le'xque' le'n huiza mzin huiz lni co'se' ndxuhua mèn nación Israel pan co' indxòode dii levadur. Huiza ndxuth mènna mbacxil' co' mbez mèn nac lni pasc. <sup>8</sup> Le' Jesús na, mtel' Pedr ryop Juàn. Ndxab Jesús loo Pedr ryop Juàn:

—Huàa li nab gu' con' hua rsè na' par li na' lni pasc.

<sup>9</sup> Myen' mnibdi's. Ndxab myen' loo Jesús:

—Tad, ¿pá ndlyá's U' ya toxcua' nu' con' hua rsè na', à'?

<sup>10</sup> Jesús mcàb. Ndxab Jesús loo myen':

—Co'se' yòo gu' ro ciuda Jerusalén, tya zyál' gu' thib mbi' co' ne' thib rre nít. Ftooo nque gu' xís mbi' axta zin mbi' liz mbi'. <sup>11</sup> Co'se' zin gu' co'te' zin mbi'a, gab gu' loo mbi' co' nac gundan che'n yòoa: Maistr mtel' nu' par ñee nu' loo U': ¿Pá ndub cuart co'te' hua rsè'en, par lin lni co' nac pasc con myen' xin' mté'th daa, à'? <sup>12</sup> Sya, lu' mbi' thib cuart roo co' nac chop pis loo yòo loo gu'. Cuarta natoxcua'le'. Tya toxgua' gu' con' par hua rsè na' par li na' lni pasc.

<sup>13</sup> Mxen Pedr ryop Juàn ned. Nda Pedr ryop Juàn. No mzyál' myen' mbi' xalque' ndxab Jesús. Mtlo Pedr ryop Juàn, mtocua' Pedr ryop Juàn con' hua rsè no myen' Jesús par li myen' lni pasc con Jesús.

<sup>14</sup> Co'se' ngóol hor hua rsè Jesús con myen', mdub Jesús con myen' xin' mté'th Jesús co' ndxe' di's che'n Jesús loo mèn loo mes. <sup>15</sup> Jesús ndxab loo myen':

—Ne' pól ndxàc anze'f ndryo' ndlyen' lezon hua rsè na' sa pan par li na' lni pasc ndoore' zin huiz gath daa. <sup>16</sup> Daa nii loo gu': Ya ne'bereden lin tedib yalhua ndxè' xal ngue li na' nalle'. Lin yalhua ndxè' tedib vez axta co'se' gac tiemp co'se' tlo ñibe'pe' Diox loo mèn.

<sup>17</sup> Sya, mxen Jesús thib vas nít uv. Ndxab Jesús: Diox quix U', Diox, loo Diox. Ngoloa, ndxab Jesús loo myen' xin' mté'th Jesús:

—Fteri'th gu' vas ndxè' loo thib thib xtàa gu' par gu' gu' thib ro chu'th nít uv ndxè'. <sup>18</sup> Na nii loo gu': Ya ne'bereden gun nít uv ndxè' xalque' ngue lina nalle'. Na gu' nít uv ndxè' tedib vez axta co'se' gac huiz tlo ñibe'pe' Diox loo mèn.

<sup>19</sup> Ngoloa, mxen Jesús pan. Ndxab Jesús:

—Diox quix U', Diox, loo Diox.

Sya, mchì'x Jesús pana thib le' chu'th, thib le' chu'th. Ngoloa, mda' Jesús pana loo myen' xin' mté'th Jesús. Ndxab Jesús loo myen' xin' mté'th Jesús:

—Pan ndxè' nee di's nac cón che'n bél'yòo ladpe'en co' tyenxù' mèn par tetii mèn bél'yòo laden por cón che'n gu'. Taandxè' ñibe'en loo gu' hua gu' pan ndxè'. No taandxè' ñibe'en loo gu' gu' gu' nít uv ndxè' par te' lezo' gu' cón chenen.

<sup>20</sup> Tataa mbli Jesús, ne, co'se' mxen Jesús thib vas nít uv, no co'se' ngolo nduhua rsè no Jesús myen'. Ndxab Jesús loo myen':

—Nít uv co' nzo le'n vas ndxè' nee di's cón che'n conveñ cub co' li nèn thidtene por cón che'n ren laden co' xyo co'se' gath daa por cón che'n xquin mèn no xtol mèn.

<sup>21</sup> Per nalle' mbi' co' ta'xù' daa loo mèn, mbi' ndub loo mes ndxè' con na'. <sup>22</sup> Cona, ngue niin loo gu': Daa mbal yáal loo izlyo' xalque' ndxáal chol mèn par gathxù' daa xal ndlu' xti's Diox cón chenen. Per part cón che'n prob mbi' co' ta'xù' daa loo mèn, jay, prob mbi' izlyo'!, tac mbi' thidtene nac thib mbi'dèe loo Diox too ze too yál'.

<sup>23</sup> Sya, mtlo myen' xin' mté'th Jesús, mnibdi's myen' loo xtàa myen'. Mbez myen:

—¿Chó nac na' co' ta'xù' Jesús loo mèn, cara?

*Myen' xin' mté'th Tad Jesús noo noo mdoodi's chó myen' gac myen' co' más ñibe' loo xtàa myen' yiloo.*

<sup>24</sup> Leque xhuina mque di's myen' làth xtàa myen'. Mbez myen':

—¿Chó na' gac co' más ñibe' loo xtàa na' yiloo, à'?

<sup>25</sup> Jesús ndxab loo myen':

—Hui' gu' nexa. Mèn co' ndxàc rey co' ñibe', mèn ñibe' loo mèn nación xal loo moz. Le' mèn co' ndxàc jef na, mbez anze'f mbi' mèn por con' co' ndli mèn loo mèn co' nac mèn nación mèn. <sup>26</sup> Per part cón che'n gu', indxàalte li gu' tatua' no xal nzi li gu' xtùuz làth gu' nalle'. Ne' ne' indxàal gab gu' tatua'. Ndxè'leque', chol gu' co' nzo làth gu' co' mbez nac más mbi' roo no más mbi' xèn, leque gu'a li par gac gu' xal thib mbyòo yen' co' más be'the làth gu'. Le' gu' co' lya's ñibe'a na, gu'a ndxàal gac xal thib moz co' li mandad loo gu' làth gu'. <sup>27</sup> Nde niin thib con' loo gu' xal ndli mèn loo xtàa mèn co' más ñaare' taachu'th loo xtàa mèn loo izlyo' ndxè': ¿Xá nee gu'? ¿Chó mèn ndli gu' cuent más ntac loo xtàa mèn co'se' ñibe' mèn loo xtàa mèn? ¿Ché' más ntac mèn co' ndyub loo mes par cuec mèn con' hua mèn co' ndub loo mes o ché' más ntac mèn co' mbec con' hua mèn



co' ndub loo mes, cà'? ¿Xá nee gu'? ¿Ché' ngue li gu' cuent ilìcte masque' ntac mèn co' ndyub loo mes co' mbed huua, cà'? Masque' ntac mèn, ¿lé'? Per daa, ale ndxe'leque', ndal xi'th gu' par lin sirv loo gu'.

<sup>28</sup> Gu' nda'que' cuent no ngo noque' gu' daa. No gunèe gu' ryethe con' nde teele' ndli no mèn daa. <sup>29</sup> Por cona, tan lugar no lin le' gu', ne, ñibe' loo thib baan mèn xal mnibe' xuden Diox loon par ñibe'en loo ryethe con'. <sup>30</sup> No tan lugar par hua no gu' daa no par gu' no gu' daa loo mes daa co'se' gac huiz co' ñibe'pe'en loo ryethe con' no tyub ñibe' gu' par tub rez gu' loo si' fchop ned mèn co' ngòc bin thib mbi' co' ngro' lèe Israel co' mbloj msi' bin co' nac mèn co' lèe mèn nación Israel nalle'.

*Trè' ndlu' le' Tad Jesús ngue ta' cuent loo Pedr le' Pedr cà di's Tad Jesús loo mèn.*

*(Mt. 26.31-35; Mr. 14.27-31; Jn. 13.36-38)*

<sup>31</sup> Ndxab Jesús loo Mon Pedr, ne:

—Mon, gunee xá ngue teel tac Mebizya ndlya's li preb loo gu'. No ngue li Mebizya par ñee Mebizya ñeene' ché' ta' gu' lugar cuee ca' Mebizya gu' no co' xà' Mebizya gu' loo cón chenen xal nzib mèn nzob triu par co' mèn yix loo nzob triu. <sup>32</sup> Per daa mna'ble' loo Diox no ngurezen Diox por lùu le' lùu toloque' yila's loon. No co'se' berel, lyàa yécl no lyàa lezo'l loo con' lil loo cón chenen, lyazen le' lùu tegán lezo' myen' co' ndxàc huesl no xtàal loo cón chenen par tolo ye'th lezo' myen' loo cón chenen huiza.

<sup>33</sup> Mon mcàb loo Jesús. Ndxab Mon:

—Tad, na ne'lá'de U'. No daa ga lezi'f con U'. Co'te' gath U', tya gath daa, ne. Daa inzyebte.

<sup>34</sup> Jesús ndxab loo Mon Pedr:

—Pedr, na nii lool: Leque nalxhuin ndoore' cozèe nguiidtee lé' nguiidtee yál', lùu cà di's daa son vez loo mèn. Gabl loo mèn ne'libe'del daa.

*Trè' ndlu' co'se' ngòc tiemp co'se' mzin gax ngòc ryethe con' ye'rsin' loo Tad Jesús.*

<sup>35</sup> Sya, mnibdi's Jesús loo myen' xin' mté'th Jesús. Ndxab Jesús loo myen':

—Co'se' mtel'en gu', ngua gu' le'n nación che'n mèn Israel, daa mnibe' loo gu' ne'hue'de gu' yex lua' gu'; ne'hue'de gu' billeter co'te' ngosua' gu' tmi gu'; no ne'hue'de gu' tedib ned yilid gu'. Co'se' mnibe'en loo gu' mbli gu' tataa, ¿ché' ngotub con' mquin gu' ned ngua gu' sya, cà'?

Myen' mcàb. Ndxab myen' loo Jesús:

—Yende xàa, Tad.

<sup>36</sup> Jesús ndxab loo myen':

—Pesea, mnibe'en loo gu' ne'hue'de gu' con'. Per nase, lyazen le' gu' co' ngue no yex lua' gu', be' gu' yex lua' gu'. Le' gu' co' ngue no billeter gu' na, be' gu' billeter gu'. Le' gu' co' ingue node spad gu' na, ftho' gu' chamar gu' par ti' gu' thib spad par que no gu' thib spad. <sup>37</sup> Tac daa nii loo gu': Nase mzinle' hor gacque' con' loon xal mbez di's co' ndxab cón chenen, di's co' ndub loo libr co' nac xti's Diox co' mbez:

Thidte mde'th mèn di's no mbli mèn cuent nac daa mbi' ye'rsin' làth mèn ye'rsin'. Cona, ngue niin loo gu': Le' di's co' ndub loo libr co' nac xti's Diox ndlu' cón chenen le'i naquinque' tataa gaca loon le'n huiz ndxè'.

<sup>38</sup> Sya, ndxab myen' loo Jesús:

—Tad, trè' ngue no nu' chop spad.

Jesús mcàb. Ndxab Jesús:

—Con sobr chop spad ba'. ¿Cón más?

*Làth xtau'a, Tad Jesús ngua rez Diox thib lugar co' ngro' lèe Getsemaní.*

*(Mt. 26.36-46; Mr. 14.32-42)*

<sup>39</sup> Ngoloa, ngro' Jesús, nda Jesús co'te' ndub yii co' lèe yii che'n yaa oliv xalque' nac mod co' ndxàp Jesús. Per myen' xin' mté'th Jesús ne'nglá'de Jesús. Mdoo nque myen' xís Jesús. <sup>40</sup> Co'se' mzin Jesús co'te' ndub yiia, ndxab Jesús loo myen':

—Gurez gu' Diox, ndee gu', par ne'ta'de gu' lugar leque gu' li chol con' ye'rsin' co'se' coby'a' Mebizya gu' naba'.

<sup>41</sup> Tya mtan' Jesús myen' xin' mté'th Jesús. Le' Jesús na, ngua taachu'te más tith loo myen' xal thib distans co' ndlyàa thib quèe co' ngobii mèn con ya' mèn. Tya mdub xib Jesús par ngurez Jesús Diox. <sup>42</sup> Ndxab Jesús loo Diox:

—Pay, yey, chele' U' ndly'a's telá' U' daa co'se' gac hor ye'rsin' loon, nzoque' mod li U' par ne'gacte yaltii co' gac loon co'se' le'le' daa quix loo U' cón che'n xquin no xtol ryethe mèn. Per Pay, indlyasten gaca xal neete lezon. Ndx'e'leque', ndlyazen gaca xal neepe' lezo' U'.

<sup>43</sup> Látha, chàa, ngro' too thib angl co' ngulàa loo bé' loo Jesús. Angla mbli par ngòp Jesús fuerz no ngo valor loo Jesús. <sup>44</sup> Láth co'se' mden' Jesús mxi lezo' Jesús axta plóthe, látha sate más nalyat ngurez Jesús Diox. No nen mdub xib Jesús. Ngurez Jesús Diox. No cabii ngurez Jesús Diox axta ante bel'yòo Jesús nít tant ndyoo nít Jesús mbez Jesús Diox. No axta ren nos nít co' ndyoo nít Jesús. No axta gos gos ngòb nít co' mdoo nít Jesús loo yòo.

<sup>45</sup> Co'se' ngolo ngurez Jesús Diox, mdyàa Jesús co'te' nziri' myen' xin' mté'th Jesús. Per co'se' mzin Jesús co'te' nziri' myen', ale mxen mcal'guth myen' tant mdyóo myen' no tant mxi lezo' myen' cón che'n con' co' gac loo Jesús. <sup>46</sup> Sya, mblo' Jesús mcal' loo myen'. Ndxab Jesús loo myen':

—Blo' gu' mcal' loo gu', yey. ¿Chonon susque' ndxàt gu'? Goo che gu'. Gurez gu' Diox par ne'ta'de gu' lugar li gu' chol con' ye'rsin' co'se' coby'a' Mebizya gu' naba'.

*Trè' ndlu' le' mèn mxenxù' le' Tad Jesús xal ndyen mèn thib huan' co' nda pres.*

*(Mt. 26.47-56; Mr. 14.43-50; Jn. 18.2-11)*

<sup>47</sup> Jesús tatabe' ndoo toodi's co'se' mzin huax mènley' loo Jesús. Le' mbi' co' ngro' lèe Jud co' ngòc xin' mté'th Jesús co' ndxòo cuent ngòc si' fchop myen' xin' mté'th Jesús na, ndoo ner loo mènà. Mbii gax Jud loo Jesús par sero Jud loo Jesús. <sup>48</sup> Sya, ndxab Jesús loo Jud:

—Jud, ¿ché' con thib besit co' nda'l loon taandxè' mod mda'xù'l daa, daa co' mbal yáal loo izlyo' xalque' ndxáal chol mèn, cà'? ¿Ché' tatua' mod mblila, cà', Jud?

<sup>49</sup> Per co'se' ñèe myen' xin' mté'th co' nziri' con Jesús ndxàc con'a, ndxab myen' loo Jesús:

—Tad, ¿xá nee U'? ¿Ché' tlàa nu' spad rloo mèn ba', à'?

<sup>50</sup> Láth ndxàc con'a, thib myen' xin' mté'th Jesús co' nzo làth taamas myen' con Jesús mblàa thib ya' spad nza thib mbi' co' ngòc moz che'n jef co' más ñibe' loo nguley'. Mblo nde'f myen'a nza moz co' nac ladli. <sup>51</sup> Per Jesús ndxab loo myen'a:

—Bla' gu' tee nziri' mèn ba'. Con sobr con' mbli no gu' mèn ba'. Con con' ba'te ya guneela.

Sya, mblít Jesús nza mbi' co' ngo nde'ba loo yòo. Nzi huite mèn, mdub Jesús nza mbi' lad quèe yéc mbi' tedib vez. Chàa, mbyac nza mbi' xalque' thib nza mèn co' yende con' mxac. <sup>52</sup> Ngoloa, ndxab Jesús loo mèn co' ngòc jef co' más ñibe' loo nguley', no loo mèn co' ngòc mèn nac zin' co' nquenap templ tiempa, no loo mènool, mèn co' mbi'th par hue' mènà Jesús:

—¿Ché', por derech, ngro' gu' con spad no con yaa par tyen gu' daa xal ndyen mèn thib huan', cà'? <sup>53</sup> Co'se' ngo non gu' le'n templ huax vez, ne'nglide gu' ryes ngàal gu' daa. Per nase mzinle' hor che'npe' gu' co' nac tiemp co'se' Mebizya ngue ñibe' loo gu' par li no gu' daa cón ndly'a's gu'.

*Mon Pedr mcà di'sle' Tad Jesús loo mèn.*

*(Mt. 26.57-58, 69-75; Mr. 14.53-54, 66-72; Jn. 18.12-18, 25-27)*

<sup>54</sup> Sya, mdub dó' mènà ya' Jesús. Mbe' mènà Jesús liz mbi' co' nac jef co' más ñibe' loo nguley'. Le' Pedr na, tith tith ndoo nque xís Jesús. <sup>55</sup> Ngoloa, mtol' mènà quìi xtau'the loo lue' liz mbi' co' nac jefa. No mdub mènà dib vult ro dii. Nzi biiz mènà tant nàl. Ale

note Pedr mdub biiz ro dii xi'th mènà. <sup>56</sup> Co'se' gunèe thib criadgot che'n jefa no Pedr ndub ro dii làth mènà, xèe mbui' criadgota loo Pedr. Ndxab criadgot loo taamas mèn co' nziri' ro dii:

—Mbi' ba', ne, mque tee noque' Jesús, ndyaquen.

<sup>57</sup> Per prob Pedr mcà di's. Ndxab Pedr:

—Criad, indlibeden mbi'a.

<sup>58</sup> Pente ndxàc gunii criadgot loo Pedr, gunèe tedib mbi' Pedr. Ndxab mbi' loo Pedr:

—Lùu, ne, nac thib mbi' co' naqueltàa no mènà, ¿lé'?

Per prob Pedr ndxab:

—Yende xàa. Ne'ngòoden làth mènà.

<sup>59</sup> Pente ndxàc thib hor nguri'th con'a, tedib mbi' mbli nèe loo mèn co' nziri' ro diia. Ndxab mbi' loo mènà:

—Lìcpe' ba'i, mbi' ba' ngo no Jesús, ne, tac mbi' ba' nac mbi' che'n làaz mèn galile.

<sup>60</sup> Per Pedr ndxab loo mbi'a:

—Mbi', ne'needen cón ngue bezl.

Leque hor co' be' ngue toodi's Pedr loo mbi'a, chàa, ngrozèe nguiidtee mblé' nguiidtee yál'. <sup>61</sup> Leque hora, Tad Jesús mbere loo, mbui' Tad Jesús loo Pedr. Chàa, mbui' Pedr loo Tad Jesús, ne. Sya, mte' lezo' Pedr di's co' ndxab Tad Jesús loo Pedr: Lùu cà di's daa son vez nalyál' ndoore' co'se' tlo cozèe nguiidtee lé' nguiidtee yál'. <sup>62</sup> Sya, ngro' Pedr làth mènà. Ne'tí' ne'ñee lezo' Pedr, mbìn' Pedr axta plóthe tant mxi yéc Pedr no mxi lezo' Pedr por mcà di's Pedr Jesús.

*Mèn ye'rsin'a asembli ngòc nguàal con' loo Tad Jesús.*

*(Mt. 26.67–68; Mr. 14.65)*

<sup>63</sup> Le' mèn co' ngue no Jesús na, ngue li ngòc nguàal con' loo Jesús. No nzi tin mènà Jesús xal mbly'a's mènà. <sup>64</sup> Mtau' mènà ngudloo Jesús con thib panid. No be' taa nguis mènà thib lad tedib lad rloo Jesús par nda' mènà xyàn lezo' Jesús. No ale mbez mènà loo Jesús:

—Bli divin chó mda' che'nl.

<sup>65</sup> No asembli mènà mbez mènà huax con' co' nac ngòc nguàal con' loo Jesús par mda' mènà xyàn lezo' Jesús.

*Trè' ndlu' le' Tad Jesús mdoo loo mèn co' mdyoo ner, no co' mdyoo naa, no co' mnibe' loo mèn loo ley co' nac xley' che'n mèn nación Israel.*

*(Mt. 26.59–66; Mr. 14.55–64; Jn. 18.19–24)*

<sup>66</sup> Co'se' ngo nii izlyo' tedib huiz co' nde nquea, ryete mèngool co' ñibe' loo mèn nación Israel, no ryete mèn co' nac jef co' más ñibe' loo nguley', no mèn co' nac maistr co' ndlu' cón che'n ley co' mxo'f Moisés loo mèn mqueltàa par mbe' mènà Jesús loo rye mèn co' mqueltàa no mènà. Tya mnibdi's mènà loo Jesús. Ndxab mènà loo Jesús:

<sup>67</sup> —Gunee loo nu' ¿ché', lìcque', lùu nac Crist, à'?

Jesús mcàb loo mènà. Ndxab Jesús:

—Chele' daa nii loo gu' daa nacque' Crist, ¿pà yila's gu' co' ngue niin loo gu'! <sup>68</sup> Más de cona, chele' daa ñibdi's thib con' loo gu', ne'càbte gu' loon, ndyaquen. No ne' ne' lá' gu' daa par biin. <sup>69</sup> Per desde nalle' par delant, daa co' mbal yál' làth gu' xalque' ndxáal chol mèn, daa nduble' cuat Diox co' nac ladli che'n Diox, Diox co' ndxàp ryethe con' roo no con' xèn la's nii Diox no la's ya' Diox.

<sup>70</sup> Co'se' mbìn mènà tataa ndxab Jesús, mnibdi's mènà loo Jesús. Ndxab mènà:

—¿Ché' nacque' lùu xgan'pe' Diox, sya, cà'?

Jesús mcàb loo mènà. Ndxab Jesús:

—Nacque' daa xgan'pe' Diox, pues. Yub gu' ngolo guneei loon. ¿Cón más ndly'a's gu' niin loo gu'?

<sup>71</sup> Sya, thidte ndxab mènà no thidte gunii mènà loo xtàa mènà:

—¿Cón li más mèn co' ta' cuent loo na' cón che'n mbi' ba'? Ya mbìnle' na' cón che'n mbi' xal nac di's co' ngro' rope' mbi' co' ngolo gunee mbi' loo na' nalle'.

## 23

*Tad Jesús mdooxù' loo Pilat co' nac gobernador le'n ciuda Jerusalén tiempa.*

(Mt. 27.1-2, 11-14; Mr. 15.1-5; Jn. 18.28-38)

<sup>1</sup> Sya, ryete mènà nguátbèe. Mbe' mènà Jesús loo Pilat co' ngòc gobernador loo ciuda Jerusalén tiempa. <sup>2</sup> Mtlo rye mènà, mquexù' mque' fals mènà Jesús loo Pilat. Mbez mènà loo Pilat:

—Mbi' ndxè' ngogaa loo nu'. Ngue lu' mbi' xley' mbi' loo mèn gulàaz nu' par se' mèn mod co' ndxàp mèn. No ale mbez mbi' loo nu' indxàalte quix nu' cón che'n contribución loo mbi' co' lèe Ces co' nac gobiern co' ndyub ciuda Rom. No ale yende cón ndxòn mbi'. Mbez mbi' le' mbi' nac Crist, co' nee di's, nac mbi' rey.

<sup>3</sup> Sya, mnibdi's Pilat loo Jesús. Ndxab Pilat:

—¿Ché', lìcque', lùu nac rey co' ñibe' loo mèn nación Israel, cà'?

Jesús mcàb. Ndxab Jesús loo Pilat:

—Aa. Lùu yub gue beza loon nalle'.

<sup>4</sup> Ngoloa, sya, ndxab Pilat loo mèn co' ngòc jef co' más ñibe' loo nguley' no loo rye mèn co' ngureri':

—Indxegaade nec thib xquin mbi' ndxè' loon, cara.

<sup>5</sup> Per mènà sate más mbli par ngola's Pilat di's co' mbez mèn. Mbez mènà loo Pilat:

—Mbi' ndxè' gue lu' xley' mbi' loo mèn par mtlo mèn, mbos xtùuz mèn no mse' mèn mod co' ndxàp mèn, mèn co' nac mèn rye yèezya' che'n làaz mèn jude, por cón che'n con' co' gue lu' mbi' loo mènà. No nalle' mtlole' mbi', ndlu' mbi' mèn par ned le'n yèezya' co' nac ned yèezya' che'n làaz mèn galile. Más de cona, mtlole' mbi', gue lu' mbi' xley' mbi' loo mèn par nedrè', ne.

*Tad Jesús mdooxù' loo thib mbi' co' ngro' lèe Herod.*

<sup>6</sup> Co'se' mbìn Pilat di'sa, mnibdi's Pilat loo mènà:

—¿Ché' nac mbi' ba' mèn che'n làaz mèn galile, cà'?

<sup>7</sup> Co'se' ndxab mèn loo Pilat: Aa, nacque' mbi' mèn che'n làaz mèn galile, mtel' Pilat mèn par mbe' mèn Jesús loo Herod tac Herod ngòc gobernador co' mnibe' loo mèn yèezya' che'n làaz mèn galile. No le'xque' le'n huiza ngo Herod le'n ciuda Jerusalén.

<sup>8</sup> Co'se' gunèe Herod Jesús, anze'f mdyac lezo' Herod. Tac ndxàcle' tiemp anze'f mblya's Herod hui' Herod loo Jesús. Ante ndxòn Herod cón che'n Jesús no maste. No mbez Herod ndoore': ¿Pól zin thib huiz no zin thib ze hui'en loo Jesús no li Jesús thib yalguzye' loon?

<sup>9</sup> Herod mnibdi's huax con' loo Jesús. Per Jesús yende cón mcàb. <sup>10</sup> Ngure mèn co' ngòc jef co' más ñibe' loo nguley' no mèn co' ngòc maistr co' mblu' cón che'n ley co' mxo'f Moisés loo mèn tiempa loo Herod. Mènà sate más mquexù' mque' fals Jesús thib mod tedib mod loo Herod. <sup>11</sup> Sya, mtlo Herod, no mtlo solndad co' mque no Herod, mbli Herod ngòc nguàal con' con Jesús con solndad co' ngure no Herod. Ale asembli Herod, mnibe' Herod loo solndad par mtegor solndad Jesús thib ned lar' co' nabe's natoxcua' xal xab rey. Ngoloa, mbere Herod, mtel' Herod solndad, mbe' solndad Jesús loo Pilat tedib vez con mènà. <sup>12</sup> Leque huiza mbere Herod, ngòc amiu Herod con Pilat tedib vez tac ndoore' gac con'a yende mod ñèe Herod loo Pilat tac ngòc Pilat ngolo ngola's che'n Herod.

*Mèn mquexù' mque' fals Tad Jesús par guth mèn Tad Jesús.*

(Mt. 27.15-26; Mr. 15.6-15; Jn. 18.39-19.16)

<sup>13</sup> Sya, mbli Pilat mandad mqueltàa rye jef co' más ñibe' loo nguley', no mèn nac zin', no taamas mèn co' nziri' loo Pilat. <sup>14</sup> Ndxab Pilat loo rye mènà:

—Gu' mbi'th no mbi' ba' loon. Mbez gu' le' mbi' gue li le' mèn ndxos xtùuz no ndli mbi' nzi yátbèe mèn par nzi li mèn ngòc nguàal con'. Per gu' nonque' no nda'que' gu' cuent le' daa mbral nole' cón che'n mbi' ba' loo gu'. Gu' ñee yende chó xquin mbi' no yende chó xtol mbi' co' ndli par yigaa mbi' loon xalque' nac con' co' mbez gu' ndli mbi'.

<sup>15</sup> No ne' ne' loo Herod ngagaa mbi' loo xquin mbi' no xtol mbi'. Ndxle'leque', mtel' Herod mbi' loon tedib vez. Ngolo gunee gu' yende cón tar li mbi' par naquingue' gath mbi' no

zyál'que' gath mbi'. <sup>16</sup> Per nalle', daa ñibe' loo solndad ya ta' solndad che'n mbi'. Yiloo, la'en bii mbi'.

<sup>17</sup> Cad lin' co'se' ndli mèn nación Israel lni pasc, mque no mènna thib costumbr. Le'n huiz lnia ntelá' gobiern thib pres. Cona, le'n huiz lnia mnibe' mènna loo Pilat telá' Pilat thib pres co' ngue lezi'f co' ndlya's mènna lyá'. Pilat mblya's ntelá' Pilat Jesús loo mènna.

<sup>18</sup> Per ryete mènna thidte mcàb, ngrozèe mènna. Ndxab mènna loo Pilat:

—Fcàa mbi' ba'. Beth thidtene. Más huen bla' ryo' Barrabás par bii Barrabás.

<sup>19</sup> Mèn nac zin' mque' Barrabás lezi'f por thib revuelt co' mbli Barrabás le'n ciuda Jerusalén no por thib mèn co' mbeth Barrabás.

<sup>20</sup> Pilat mbere ndxab loo mènna:

—Na ndlyazque' làan Jesús.

<sup>21</sup> Per mènna sate más cabii mbez yèe loo Pilat. Mbez mènna:

—Fque' U' mbi' ba' loo cruz. Fque' U' mbi' ba' loo cruz.

<sup>22</sup> Sya, mbyon vez ndxab Pilat loo mènna:

—¿Chonon ndlya's gu' ñibe'en loo mèn par que' mèn Jesús loo cruz? ¿Chó con' ye'rsin' mbli Jesús, à'? Yende chó xquin no xtol Jesús ndxegaa loon par, con provech, ñibe'en loo mèn guth mèn Jesús. Xalque' niin loo gu'a, na ñibe' loo solndad ya ta' solndad che'n Jesús. Yiloo, ñibe'en loo gu': La' gu' bii Jesús.

<sup>23</sup> Per mènna thidte ngòc. Tolo mbli nèe mènna mna'b mènna di's loo Pilat par ñibe' Pilat loo mèn que' mèn Jesús loo cruz. No axta con gust ngrozèe mènna, no mèn co' ngòc jef co' más ñibe' loo nguley', tac mblique' Pilat con' co' mblya's mènna. <sup>24</sup> Ale mnibe' Pilat lezo' Pilat li Pilat co' lya's mènna li Pilat. <sup>25</sup> Sya, mnibe' Pilat loo mèn par ngua lo' mèn Barrabás lezi'f, Barrabás co' ndxab mèn ryo' lezi'f. Barrabás mque' lezi'f por revuelt co' mbli Barrabás no por mèn co' mbeth Barrabás. Ngoloa, mda' Pilat Jesús loo mènna. Nee mènna cón li no mènna Jesús.

*Trè' ndlu' le' mènnda que'le' Tad Jesús loo thib cruz.*

*(Mt. 27.32-44; Mr. 15.21-32; Jn. 19.17-27)*

<sup>26</sup> Co'se' nda no mènna Jesús par que' mènna Jesús loo cruz, ale mbree mcà mènna thib mbi' co' ngòc mèn che'n làaz mèn ciren. Mbi'a ngro' lèe Mon. Le'pe' ndxàc con'a ndye'th mbi', ngua mbi' huan. Ale asal too mbi' mèn co' nda nque Jesús loo cruz, mnibe' yèe mènna loo mbi' par hue' mbi' cruz che'n Jesús no tyoo nque mbi' xís Jesús ned nda Jesús.

<sup>27</sup> Anze'f thib mènbi' nda nque xís Jesús. No anze'f huax mèngot nda nque xís Jesús. Mèngota mbín' no mbez yèe yath mèngota gunèe mèngota Jesús tant nxi lezo' mèngota ñèe mèngota cón gac loo Jesús. <sup>28</sup> Per Jesús mbui' loo mèngota. Ndxab Jesús:

—Mèngot che'n ciuda Jerusalén, ne'gón'te gu' no ne'tyóode gu' por cón chenen, ey. Más huen ften' gu' no bín' gu' por cón che'n con' co' gac loo gu' no por cón che'n con' co' gac loo xin' gu' yiloo. <sup>29</sup> Tac zin thib huiz no zin thib ze co'se' gab mèn: Huen nda mèn co' ne'gácte tyan xin'. No huen nda mèn co' thidteneque' ne'nquée loode xin'. No huen nda mèn co' thidteneque' ne'ngàazte xin'. <sup>30</sup> Huiza tlo mèn, gab mèn loo yii no loo den: ¿Cón ngac yii no den ba'? ¿Cón gac huan ba'? Ale huen gac lyàa yii ba' no den ba' loo na' par guth yii ba' no den ba' na' leque yigaa na' loo mèn ye'rsin' co' yi'th yé' huize'. <sup>31</sup> Tac chele' mèn guthxù' daa, daa co' nac xal thib xan' yaa nayèe, ale'que' gu', mèn ciuda Jerusalén, masre' con' ye'rsin' ne' gac li mèn loo gu', gu' co' nac xal thib xan' yaa biiz.

<sup>32</sup> Nda no mènna chop mbi'guth mèn con Jesús par thidte junt guth mènna ryop mbi'a con Jesús. <sup>33</sup> Co'se' mzin mènna con Jesús loo thib dèn co' mbez mèn tiempa lèe quèe yéc mèn, tya mque' mènna Jesús loo thib cruz. Mque' mènna ryop mbi'guth mènna loo cruz cuat Jesús, ne. Thib mbi' mquée loo cruz ladli cuat Jesús. Tedib mbi' mquée loo cruz ladrebes cuat Jesús. <sup>34</sup> Láth ngue que' mènna Jesús loo cruz, ndxab Jesús loo Diox:

—Pay, fton' U' xquin mèn ndxè' no xtol mèn ndxè' tac prob mèn ndxè' ne'ñeede no ne'ta'de mèn cuent cón ngue li no mèn ndxè' daa.



Le' solndad na, mdith no dad loo xab Jesús par ñee solndad ñeene' chó solndad li gan gac che'n solndad xab Jesús. <sup>35</sup> Huax mèn ngure tya. Nzi hui' mèn xal ndxàc mènà ngue que' mènà Jesús loo cruz. No axta mèn nac zin' che'n ciuda Jerusalén mxìis no Jesús hora. No ngòdo xyàn lezo' mènà ñèe mènà Jesús. Mbez mènà loo xtàa mènà:

—Mbi' ba' mtelá' chol mèn loo yaltii no loo con' ryes. Per nase ndlya's na' hui' na' leque mbi' li par lyàa mbi' co'te' ngue mbi' ba'. No leque mbi' li par lyá' mbi' loo con' ryes chele' mbi', lìcque', nac Crist co' Diox mcai par xo'f zin' mbi' thib zin' co' ñibe' Diox loo mbi'.

<sup>36</sup> Ale note solndad co' nziri' tya, mxìis no Jesús. Ale mbii gax solndad loo Jesús. No mda' solndad thib loo vin co' nac vin nala par ngu yèe Jesús. <sup>37</sup> No mbez solndad loo Jesús:

—Chele' lùu nac rey co' ñibe' loo mèn nación Israel, leque lùu bli par lyàal co'te' nguel ba'.

<sup>38</sup> No mbli Pilat mandad par mque' mèn plá di's loo thib le' ye's loo cruz gáp loo yéc Jesús co' ngòc di'stèe grieg no di'stèe latin no di'stèe hebre co' mbez: Mbi' ndxè' nac rey co' mnibe' loo mèn nación Israel.

<sup>39</sup> Làth xtau'a, thib mbi'guth mèn co' mque' loo cruz cuat Jesús, asembli mbi', mbez mbi' ngòc nguàal di's loo Jesús. Ndxab mbi':

—Chele' lùu, lìcque', nacpe' Crist, leque lùu bli par lyá'l no bli par lyá' nu', ne. <sup>40</sup> Per tedib mbi' co' ngue tedib lad cuat Jesús mbyoo xtàa mbi'. Ndxab mbi' loo xtàa mbi':

—Tua'le' nguel co'te' nguel ba'. No ¿be' ncàb rol loo Jesús, cà'? Inzyebtel ñèel Diox, ndee. <sup>41</sup> Part cón che'n na', mzyalque' na'i, ngue na' trè'. Ngue guix na' xquin na' por cón che'n con' ye'rsin' co' mbli na'. Per prob mbi' ba' yende chó con' ye'rsin' mbli mbi'. No ngue mbi' co'te' indxàalte quée mbi'.

<sup>42</sup> Sya, ndxab mbi' ropa loo Jesús:

—Tad Jesús, fte' lezo' U' cón chenen co'se' gac tiemp co' ñibe' U' loo mèn loo izlyo' ndxè', ndee U'.

<sup>43</sup> Jesús ndxab loo mbi'a:

—Lìcpe' ba'i, na ngue nii lool: Leque nalze yòo nol daa co'te' nac parais.

*Tad Jesús nguthle' loo cruz.*

(Mt. 27.45–56; Mr. 15.33–41; Jn. 19.28–30)

<sup>44</sup> Hora casque' nde yáal rol huiz. Leque hora, dib athu loo izlyo' mcauau tac mcauau loo huiz. No axta hor mquée guyon bzyè mbembii loo huiz. Mtenii huiz loo izlyo' tedib vez.

<sup>45</sup> Leque hor co' mcauau loo huiza, Diox mbli ale mbryed grolthe vel co' ngue le'n templ tiempa. <sup>46</sup> Sya, ngrozèe yath Jesús. Ndxab Jesús loo Diox:

—Pay, yey, nase fcàaya' U' alm daa no xpìi daa.

Ngolo ndxab Jesús di'sa, chàa, nguth Jesús.

<sup>47</sup> Co'se' gunèe capitán che'n ciuda Rom ngòc con' ryes tín'a, ndxab capitana:

—¿Ay, Dio's! Lìcpe' ba'i, mbi' ba' ngòc mbi' nalì no mbi' nambii loo U', Diox.

<sup>48</sup> Ryete mèn co' ngure tya, mènà gunèe rye con' ngòc. Mxen mènà ned, ndyàa mènà. No taa nguìn mènà ya' mènà pech mènà. Mbez mènà: ¿Ay, Dio's! ¿Xá ñaa con' ngòcle'? tant nzyeb mènà. <sup>49</sup> Per ryete mèn co' mblibe' Jesús, no mèn co' huen huen mda' cuent cón che'n Jesús, no ryete mènngot co' mdoo nque xís Jesús axta co'se' ngro' Jesús le'n yèezya' che'n làaz mèn galile, mènà ngure tith loo Jesús par mbui' mènà con' co' ngòc loo Jesús.

*Trè' ndlu' le' mèn ngua ca's thebol Tad Jesús.*

(Mt. 27.57–61; Mr. 15.42–47; Jn. 19.38–42)

<sup>50</sup> Ngolo ngòc ryethe con'a, mbi'th thib mbi' co' ngro' lèe Chè. Mbi'a ngòc mbi' yèez Arimate co' nac thib yèez che'n làaz mèn jude. Ngòc mbi'a thib jef loo mèn nación Israel. Ngòc mbi' mbi' ndac no mbi' nalì no mbi' nambii loo Diox, ne. <sup>51</sup> Chèa ndub quee lezo' pól gac tiemp co'se' ñibe'pe' Diox loo mèn. Por cona, ne'ngòde lezo' Chè thidte ngac Chè con mèn co' mqueltàa co' thidte ngòc par mbli mèn con' ye'rsin' loo Jesús. <sup>52</sup> Ngolo

nguth Jesús, negadi's ngua Chè loo Pilat par mna'b Chè loo Pilat ta' Pilat lugar teche Chè thebol Jesús loo cruz. Mda'que' Pilat lugar loo Chè. <sup>53</sup> Ngolo mteche Chè thebol Jesús loo cruz, mchi'x Chè thib sab lad thebol Jesús. Ngoloa, ngua lo Chè thebol Jesús le'n thib ye'r quèe co' mden' mèn ndoore'. Le'n ye'r quèea yende chó thebol tarte ca's mèn. <sup>54</sup> Huiz co'se' ngòc ryethe con' tín'a loo Jesús, huiza ngòc huiz vispr co' ngòc huiz yub lni che'n pasc. Hora, casque' ndub bix huiz no nde zèle' izlyo'.

<sup>55</sup> Ryete mèngot co' ngro' no Jesús le'n rye yèezya' che'n làaz mèn galile, ryete mèngota ngua tee hui' ro ye'r quèe. No mbui' mèngota xá mod mchi'x Chè sab lad thebol Jesús no xá mod mblo Chè thebol Jesús le'n ye'r quèea. <sup>56</sup> Co'se' mbere mèngota, ndye'th mèngota par liz mèngota, mbli nab mèngota perfum no te perfum. Ngoloa, mbli mèngota descans huiz sabda tac huiza ngòc huiz co' ndli mèn descans xal mnibe' ley co' mxo'f Moisés loo mèn nación Israel tiempa.

## 24

*Trè' ndlu' cón che'n con' co' ngòc co'se' ngro xban Tad Jesús.  
(Mt. 28.1-10; Mr. 16.1-8; Jn. 20.1-10)*

<sup>1</sup> Co'se' nde yini izlyo' huiz doming co' nac ner huiz che'n sman, tatabe' ñaa mbe'th izlyo' ngua rye xa'gota ro ye'r quèe lyo' co'te' mca's mèn thebol Jesús. <sup>2</sup> Mbe' mèngota te perfum co' mtoxcua' mèngota ro ye'r quèe lyo'a par tà mèngota tea lad thebol Jesús. Co'se' mzin mèngota ro ye'r quèe lyo', ale ndoo xal' ro ye'r quèe lyo'. <sup>3</sup> Mèngota ngò le'n ye'r quèe lyo' par hui' mèngota máa thebol Tad Jesús. Per co'se' ngò mèngota le'n ye'r quèe lyo'a, ya yende thebol Jesús le'n ye'r quèe lyo'. <sup>4</sup> Ale mzyeb mèngota no mbos xtùuz mèngota axta ne' ne' ñee mèngota cón li mèngota co'se' gunèe mèngota ndoo chop xa'bi' loo mèngota. Noc xab xa'bi'a thib xab co' ante nquée xnii. <sup>5</sup> No de tant mzyeb mèngota co'se' gunèe mèngota xa'bi'a, mblàa quèe mèngota yéc mèngota par loo yò. Sya, ndxab xa'bi'a loo mèngota:

—¿Chonon nde cua'n gu' Tad Jesús co' ngue tee banle', à', yey? <sup>6</sup> Yende Tad Jesús trè', ey. Tad Jesús ngro xbanle'. Fte' lezo' gu' xal ngòc di's co' mda' Tad Jesús cuent loo gu' co'se' ngo no Tad Jesús gu' le'n yèezya' che'n làaz mèn galile thib cua'a, <sup>7</sup> co'te' mda' Tad Jesús cuent loo gu' le' Tad Jesús co' mbi'th yáal loo izlyo' xalque' ndxáal chol mèn, Tad Jesús yigaaque' ya' mèn ye'rsin'. No que'que' mènà Tad Jesús loo cruz. No yilo son huiz ryo xban Tad Jesús làth mèn nguth.

<sup>8</sup> Axta syare' mte' lezo' mèngota di's co' mdoodi's Jesús loo mèn le'n yèezya' co' nac yèezya' che'n làaz mèn galile. <sup>9</sup> Co'se' mbere mèngota, ndye'th mèngota, ngua mèngota ro ye'r quèe co'te' ngua ca's Chè thebol Tad Jesús, mda' mèngota cuent con' ngòc loo mèngota loo rye si' fthib myen' xin' mté'th Jesús co' hue' di's no co' te'th di's cón che'n Tad Jesús loo mèn loo izlyo' no loo taamas mèn co' ne'nqueltàa node myen' xin' mté'th Jesús hora. <sup>10</sup> Mèngot co' ngua ta' cuent no co' ngua te'th loo ryete si' fthib myen' xin' mté'th Jesús, mèngota ngòc Mari che'n yèez Magdala, no tedib xa'got co' ngro' lèe Juan, no tedib Mari co' ngòc xna' Cob, no taamas mèngot co' mqueltàa no mèngota. <sup>11</sup> Per ndxe'leque', myen' xin' mté'th Jesús mxac ale mquée mbii yéc mèngota, cona, tataa mbez mèngota. No ale ne'ngala'ste myen' di's co' mda' mèngota cuent loo myen'.

<sup>12</sup> Mastale' ne'ngala'ste rye myen' di's co' ndxab mèngota loo myen', per Pedr ngro', mxen Pedr ned. Ngua tee hui' Pedr ro ye'r quèe lyo'. Co'se' mzin Pedr ro ye'r quèe lyo', huen huen mbui' Pedr. Gunèe Pedr ante sab co' mchi'x Chè thebol Jesús nax thib lad le'n ye'r quèea. Ndye'th Pedr par liz Pedr. No ante mbui' no ante gunaa Pedr. No anze'f ndyóo Pedr cón che'n con' co' ngòc.

*Chop mbi' nda toodi's cón che'n xá mod nguth Tad Jesús co'se' mdoo ryop mbi' ned, ndyàa ryop mbi' par ned yèez Emaús.  
(Mr. 16.12-13)*

<sup>13</sup> Leque huiza mdoo chop myen' xin' mté'th Jesús ned. Ndyàa myen' par thib yèez co' ngro' lèe Emaús. Yèeza nziri' thib distans co' ne' si' fchop kilometr par co'te' nziri' ciuda Jerusalén. <sup>14</sup> Nda toodi's ryop myen' cón che'n con' co' ngòc loo Jesús. <sup>15</sup> Láth ndyoodi's ryop myen'a thib con' no tedib con' cón che'n con' mbli no mèn Jesús, chàa, ngro' too yub Jesús loo ryop myen'a. Nda no Jesús ryop myen'. <sup>16</sup> Mastale' ngüi' ryop myen' loo Jesús, ale ngòc tont myen'. Ne'nglibe'de myen' no ne'nda'de myen' cuent le' Jesús nac mbi' co' nda no myen'. <sup>17</sup> Láth nda tee no Jesús myen', mnibdi's Jesús loo myen'. Ndxab Jesús:

—¿Chó cuent ndyoodi's gu' láth ndoo gu' ned, ndye'th gu', yey? ¿Chonon nalyat nde'b ro gu', à'?

<sup>18</sup> De loo ryop myen'a, thib myen' co' ngro' lèe Cleof mcàb loo Jesús. Ndxab Cleof loo Jesús:

—Ryete mèn non cón che'n con' co' ngòc le'n ciuda Jerusalén le'n huiz ndxè' no maste. ¿Ché' angoluxte lùu nac mbi' co' ngo tya co' inonte cón che'n con' co' ngòc, cà'?

<sup>19</sup> Sya, ndxab Jesús loo ryop myen':

—¿Cón ngòc, yey?

Cleof ndxab loo Jesús:

—Cón che'n con' ngòc loo Jesús co' ngòc mbi' yèez Nazaret, yey. Jesús ngòc thib mbi' co' mde'th di's co' ndxab Diox. No ngòc Jesús thib mbi' roo mbi' xèn loo Diox no loo mèn loo ryethe con' mbli Jesús no ryete di's co' mdoodi's Jesús. <sup>20</sup> No ale mbli rye mèn co' nac nguley' no mèn co' nac gobiern loo nación na' par mcua'n mènna mod mda'xù' mènna Jesús leque loo xtàa mènna. No mquexù' mque' fals mènna Jesús. Ngoloa, ngua que'xù' mènna Jesús loo cruz axta nguth yub Jesús loo cruz. <sup>21</sup> Nu' ngure quee lezo' le' Jesús li par co' Jesús no teche Jesús mèn nación Israel la's ya' mèn co' nac ngolo ngola's che'n mèn nación Israel. Per más de cona, nalze ngolo son huiz ngòc con'a. No mca's mèn Jesús. <sup>22</sup> Nalxtil', tatabe' ñaa mbe'th izlyo', ndxep mèngot co' mqueltàa no nu' ngua ro ye'r quèe lyo' co'te' mca's Chè thebol Jesús. Mèngota mzeb nu' goze xtil'a. No mbli mèngota ante mbui' nu' no ante gunaa nu'. <sup>23</sup> Mda' mèngota cuent loo nu' le' mèngota ne'ngnèede thebol Jesús le'n ye'r quèe lyo'. Más de cona, mda' mèngota cuent loo nu' mxyo'f loo chop angl loo mèngota. No ndxab angl loo mèngota le' Jesús naban. <sup>24</sup> Ngoloa, lueg lueg mxen plá myen' co' ndxàc xtàa nu' ned. Ngua tee hui' myen' ro ye'r quèe lyo'a. No gunèe myen', lìcque', naca xal mda' mèngota cuent loo nu'. Per ne' myen' ne'ñèede máa Jesús.

<sup>25</sup> Sya, ndxab Jesús loo ryop myen'a:

—Aa que naad gu'se. Inda'de gu' cuent cón che'n di's co' mbìn gu'. Tarte ya'x xnii yéc gu' no tarte ya'x xnii lezo' gu'. Tatabe' naad gu' no nguud gu' par yila's gu' rye di's co' mde'th mèn co' ndxab Diox póla cón che'n Jesús. <sup>26</sup> ¿Ché' ndli gu' cuent inaquinte tataa ndactii Crist ryethe con'a ndoore' yòo Crist loo bé' par gac con' roo con' xèn loo Crist, cà'?

<sup>27</sup> Sya, mtlo Jesús, mda' Jesús cuent cón che'n di's co' ndub loo rye libr co' nac xti's Diox co' nda' cuent cón che'n Jesús. Mtlo Jesús con libr che'n Moisés. Be' taa be' taa tolo mda' Jesús cuent loo ryop myen' xal mda' rye libr co' mque' mèn ye's, mèn co' mde'th di's co' ndxab Diox cuent cón che'n Jesús.

<sup>28</sup> Co'se' nda zin gax myen' ro yèez co'te' zin myen', Jesús mbli xal mèn co' be' tyoo ned nda. <sup>29</sup> Per ryop myen'a mbli fuerz mbyan' Jesús. Ndxab myen' loo Jesús:

—Byan' no nu', mbi'. Izlyo' mzyèle'. No ndele' yál' izlyo', yey.

Sya, mbyan' no Jesús myen' liz myen'. <sup>30</sup> Láth ndub no Jesús ryop myen' loo mes par hua rsè no Jesús myen' sa yèth, mxen Jesús yèth. Ndxab Jesús loo Diox:

Diox quix U', Diox, nu' hua rsè sa yèth.

Sya, mbli rol Jesús yètha. Mda' Jesús rolgà yètha loo ryop myen'a. <sup>31</sup> Leque hora, ale chàa, mdyub xnii yéc myen' no, chàa, mdyub xnii lezo' myen'. Syare', mda' myen' cuent le' mbi'a nac Jesús. Texal mda' myen' cuent le' mbi'a nac yub Jesús, chàa, mdyon' Jesús loo ryop myen'. <sup>32</sup> Sya, ndxab thib myen' loo xtàa myen':

—¿Ché' ndyacl ne'ngda'de gust lezo' na' no ne'ngye'thte lezo' na' co'se' mbìn na' mda' mbi' cuent loo na' no ngue go xo'f mbi' cón che'n di's co' ndub loo libr co' nac xti's Diox loo na' co'se' mdoodi's no mbi' na' ned ndye'th na', cà'? Lìcque', axta gust mbyan' lezo' na' co'se' mbìn na' di'sa, ¿lé'?

<sup>33</sup> Le' sya, leque hora, yende izlyo', mxen ryop myen' ned. Mbere ryop myen' nda myen' par ciuda Jerusalén par ngua sál' myen' taamas myen' xin' mté'th Jesús tya. No ngua ta' myen' cuent loo ryete si' fthìb myen' xin' mté'th Jesús no taamas mèn co' mqueltàa no myen' xin' mté'th Jesús le'n ciuda Jerusalén. <sup>34</sup> Sya, pente ngòo ryop myen' le'n nyòo co'te' nzo si' fthìb myen' xin' mté'th Jesús. Sangmtlo myen' xin' mté'th Jesús, mda' myen' xin' mté'th Jesús cuent loo ryop myen'a:

—Lìcpe' ba'i, Tad Jesús ngro xbanle'. No más de cona, Mon gunèele' Tad, cara.

<sup>35</sup> Syare', noo noo mtlo ryop myen', mda' myen'a cuent loo myen' xin' mté'th Jesús xal ngòca loo myen' co'se' mdoo ryop myen' ned ndyàa myen' par yèez Emaús no xá mod mbli' myen' Jesús. No mda' myen' cuent le' Jesús ngòc mbi'a co'se' mbli rol mbi'a yèth.

*Ngoloa, Tad Jesús mbli' loo loo myen' xin' mté'th Tad Jesús.*

*(Mt. 28.16–20; Mr. 16.14–18; Jn. 20.19–23)*

<sup>36</sup> Tatabe' ngue ta' ryop myen'a cuent con' co' ngòc loo myen'a loo myen' xin' mté'th Jesús co'se', chàa, ngro' too Jesús loo rye myen'a. No gunii Jesús Diox loo myen'. Ndxab Jesús loo myen':

—Ftac lezo' gu' axta plóthe no blec see tee lezo' gu', ndee gu', ey.

<sup>37</sup> Per myen' xin' mté'th Jesús no mèn co' nziri' no myen'a anze'f mzyeb axta ne' ne' ñee myen' no axta ne' ne' ñee mènà cón li myen' no cón li mènà. Tac mbli ryete mèn xtùuz le' thìb xpìi mbyu' loo loo mènà co'se' gunèe mènà ngro' too Jesús loo mènà. <sup>38</sup> Per Jesús ndxab loo ryete mènà:

—¿Chonon nzyeb gu', ey? ¿Chonon nzi gàn lezo' gu' no ndxàc chop lezo' gu', à'? <sup>39</sup> Hui' gu' la's yan no hui' gu' niin. Yub daa ndoo loo gu'. Buàal gu' daa. No huen huen hui' gu' loon. Thìb xpìi ingue node bél'yòo. No ne' ne' ingue no xpìi zith xal ngüi' gu' loon ndoon trè'.

<sup>40</sup> Ngolo ndxab Jesús di'sa loo mènà, mbli' Jesús la's ya' Jesús. No mbli' Jesús nii Jesús loo mènà.

<sup>41</sup> Per co'se' ñèe Jesús le' myen' xin' mté'th Jesús no mènà tarte yila's di's co' ngue bez Jesús loo myen' no loo mènà tant ndyac lezo' myen', no tant ndyac lezo' mènà, no tant ngüi' no ñaa myen' no mènà cón che'n Jesús, Jesús ndxab loo myen' xin' mté'th Jesús no loo mènà:

—¿Ché' nzo chó con' ngue no gu' co' mbyan' xo'f par huana trè', ey?

—Aa. Nzoca, ndxab myen' xin' mté'th Jesús loo Jesús.

<sup>42</sup> Sya, mda' myen' thìb le' bél' mbèel mbye'x loo Jesús no mda' myen' thìb le' mdu' co' nzo mzin loo Jesús par nduhua Jesús. <sup>43</sup> Mxen Jesús mbèela no mdu'sa. Nduhua Jesús con'a loo myen'. <sup>44</sup> Ngoloa, ndxab Jesús loo mènà:

—Con' co' mxaclen ndxè' co' gunèele' gu', le'i ngòc loon xal mdoodizlen loo gu' co'se' be' ngo non gu' ndoore' gàca loon. Ngòc con'a loon par ngòcque' no mdyaaque' no mdyubque' di's ryete di's co' ndub loo libr co' nac ley co' mxo'f Moisés loo mèn cón chenen. No mdyaaque' ryete di's co' mque' ryete mèn co' mde'th di's co' ndxab Diox ye's cón chenen, no xal nac di's co' ndub loo libr che'n Salmos cón chenen. Le'i ngòcque' loon.

<sup>45</sup> Axta syare' mbli Jesús gan nguàa'd myen' xin' mté'th Jesús di's no mda' myen' cuent cón che'n di's co' ndub loo libr co' nac xti's Diox. <sup>46</sup> Ndxab Jesús loo myen', ne:

—Tataa ndub di's loo libr co' nac xti's Diox le' Crist mquinque' gath. No yilo son huiz co' nguth Crist, naquinque' ngro xban Crist làth mèn nguth.

<sup>47</sup> Tolo ndxab Jesús loo myen':

—No nalle', por derech, naquinque' te'th mèn no co' mèn yalbàn cón chenen loo mèn rye nación co' nziri' dib athu loo izlyo'. Tlo mèn te'th mèn cón chenen par ned ciuda

Jerusalén. Gab mèn no te'th mèn cón chenen loo mèn co' ndxàp xquin no co' ndxàp xtol loo Diox par lyàa yéc mèn no lyàa lezo' mèn par tataa mod zye' mod co' ndxàp mèn loo Diox par ton' Diox xtol mèn loo mèn. <sup>48</sup> Gu' nac mèn co' ya te'th no co' ya ta' cuent cón chenen tac gu' nonque' no nda'que' gu' cuent ryethe con' cón chenen desde co'se' mtlo mque tee'en axta co'se' nguth daa no ngro xban daa. <sup>49</sup> Hui' gu' nexa. Daa ñibe' lyàa Xpii Natú' loo gu' co' mcàbgòn xuden Diox lyàa loo gu'. Per ndlyazen cued gu' le'n ciuda Jerusalén ndxè' axta zin huiz no zin ze co'se' gác huiz co' lyàa Xpii Natú' loo gu'. Xpiia ryo' loo bé'. Xpii Natú'a lyath no gu' par gác li gu' con' roo no con' xèn loo mèn ned ya que tee gu' por cón che'n con' roo no con' xèn co' nzo la's nii Diox no co' nzo la's ya' Diox.

*Tad Jesús nda quée loo bé' loo myen' xin' mté'th Tad Jesús.*

*(Mr. 16.19-20)*

<sup>50</sup> Ngolo mdoodi's Jesús ryete di'sa loo myen', mbe' Jesús myen' xin' mté'th Jesús thib lad ro ciuda Jerusalén gaxte co'te' nziri' yèez Betañ. Tya, mblit Jesús ya' Jesús loo myen'. Mde'f Jesús ya' Jesús loo myen'. Tataa mbli Jesús par mblu' Jesús loo myen' le' Jesús lique' huen ya myen' ned ya myen' yiloa. <sup>51</sup> Láth mde'f Jesús ya' Jesús loo myen', xègà xègà mquée Jesús gáp loo bé'. Mquée Jesús loo bé' loo myen'. <sup>52</sup> Le' myen' xin' mté'th Jesús na, mcòò' yéc no mdub xib myen' xin' mté'th Jesús loo Jesús láth nda quée Jesús loo bé'. No ngurez myen' Diox. Ngolo ngurez myen' Diox, ndyac tín' lezo' myen'. Ngoloa, mbere myen', ndye'th myen' par ned le'n ciuda Jerusalén tedib vez. <sup>53</sup> No toloque' nque tee myen' ndxòò ndryo' myen' le'n templ atate huiz par mbez myen' loo Diox: ¡Ay, Dio's! Susque' con' roo con' xèn ndlu' U' no ngue li U' loo mèn dib athu loo izlyo'. Taandxè'que' gàca.



## Di's Ndac Che'n Diox Co' Mque' Juàn Ye's

*Crist co' mblo xo'f loo mèn cón che'n con' co' ndli Diox xtùuz, Crist ngòc xal mèn che'n izlyo' loo izlyo'.*

<sup>1</sup>Ndoore' cuec Diox no toxcua' Diox chol con' loo bé' no loo izlyo' nzole' Crist co' mblo xo'f loo mèn cón che'n con' co' ndli Diox xtùuz. Thidte ngo no Crist Diox. No nac Crist co' mblo xo'f loo mèn cón che'n con' co' ndli Diox xtùuz Diox. <sup>2</sup>Crist thidte ngo no Diox ndoore' gacsua' con' no cuec Diox con' loo bé' no loo izlyo'. <sup>3</sup>Mbli Crist par ngure no mbyan' ryethe con' co' nziri', que naca con' co' nzo loo bé', que naca con' co' nziri' loo izlyo'. No yende chó con' co' nziri' no co' mbyan' ne'mbede no ne'ngyan'te chele' Crist ne'nglide par ngurei no par mbyan'a. <sup>4</sup>Crist nabanque' thidtene. No ndxàp Crist con' roo con' xèn la's nii Crist no la's ya' Crist par li Crist le' mèn ban no Diox thidtene yiloa. Yalnaban co' nda' Crist loo mèn, yalnabana ndli ntenii yéc mèn no ntenii lezo' mèn loo cón che'n Diox. <sup>5</sup>Yalnaban co' ndli ndyub xniì yéc mèn no ndyub xniì lezo' mèn loo cón che'n Diox, yalnabana ndli par non mèn le' cón che'n xab izlyo' ndli par ndxezi'f no ndxega's mèn loo con' ye'rsin' xal mèn co' ndyee yál' co'se' nacua' yál'. Per mastale' anze'f thib con' nzo co' mbez mèn nac con' che'n xab izlyo', ne'ngácte con' co' nac cón che'n xab izlyo' par tau' con' co' nac cón che'n xab izlyo' loo di's co' ndlu' loo mèn xá mod yòo ban no mèn Diox thidtene yiloa. Thiba con' ndxè'.

<sup>6</sup>Le' tediba na, loo ngòc con' ndxè' ngo thib mbi' co' mtel' Diox. Mbi'a ngro' lèe Juàn. <sup>7</sup>Juàn ngòc thib mbi' co' mbi'th ta' cuent loo mèn nación Israel cón che'n Crist, Crist co' mbli par mdyub xniì yéc mèn no par mdyub xniì lezo' mèn par yila's mèn nación Israel cón che'n di's co' mbi'th ta' Juàn cuent cón che'n Crist co' mblo xo'f loo mèn cón che'n con' ndli Diox xtùuz. <sup>8</sup>Inacte Juàn Crist co' mbi'th li par mdyub xniì yéc mèn no par mdyub xniì lezo' mèn loo cón che'n Diox. Ndxé'leque', mbi'th Juàn par mbi'th ta' Juàn cuent cón che'n Crist co' mbi'th li par mdyub xniì yéc mèn no mdyub xniì lezo' mèn loo cón che'n Diox. <sup>9</sup>Crist co', licque', angoluxte nac thidte mbi' co' mbi'th li par tyub xniì yéc mèn no par tyub xniì lezo' mèn loo cón che'n Diox, Crist mbi'th yáal loo izlyo' ndxè' xalque' ndxáal chol mèn.

<sup>10</sup>Loo izlyo' ndxè' mbi'th yáal Crist co' mblo xo'f loo mèn cón che'n con' ndli Diox xtùuz. Crist mbli par ngure no mbyan' alux con' co' nziri' loo izlyo'. Per ryethe mèn co' nziri' loo izlyo', ne'nglibe'de mènà chó mbi' nac Crist. <sup>11</sup>Loo izlyo' co' nac che'npe' Crist mbi'th Crist. Per mèn co' ngòc mèn gulàazpe' Crist, mènà mcà di's Crist. No mtè'f mènà Crist thib lad. <sup>12</sup>Per ryete mèn co' mdyalque' ngola's loo Crist no loo cón che'n Crist, Diox mblo ro le' mènà ndxàp con' la's nii mènà no la's ya' mènà par gac mènà xin'pe' Diox. <sup>13</sup>Mènà gac xin'pe' Diox tac tataa mnibe' Diox no tataa gunee lezo' Diox. Inacta xal mèn co' ndxáal por xud mèn no xna' mèn. Ne' ne' inaca xal nee lezo' thib mbi' li thib mbi' con' thib xa'got bin par gac mènà xin' Diox.

<sup>14</sup>Per Crist co' mblo xo'f loo mèn cón che'n con' co' ndli Diox xtùuz, Crist mbi'th yáal xalque' ndxáal chol mèn loo izlyo' par ngòc Crist xalque' chol mèn loo izlyo'. No mque tee ban Crist làth nu' ndxep tiemp. Látha, gunèe nu' con' roo con' xèn co' mbli Crist co' mblu' loo nu' nacpe' Crist angoluxte xgan'pe' Diox. No gunèe nu', licque', anze'f nque' lezo' Crist ñèe Crist mèn. No gunèe nu', licque', inquediide Crist mèn. Ndxé'leque', ndlique' Crist con' co' mcàbgòn Crist li Crist loo mèn. No gunèe nu' le' Crist angndli huax con' ndac loo mèn.

<sup>15</sup>Juàn Bautist mda' cuent cón che'n Crist loo mèn. Cabii ndxab Juàn loo mèn:  
—Cón che'n Crist nac co' mdalen cuent loo gu' le' Crist co' nare' yi'th nque xísen, Crist nac más xa' roo xa' xèn leque daa tac Crist nzole' ndoore' gal yáal daa loo izlyo'.

<sup>16</sup>Licque', anze'f thib con' ndac angmbli Crist loo na' par gac con' ndac loo na' thib mod tedib mod por cón che'n Crist. <sup>17</sup>Diox mnibe' loo Moisés par mxo'f Moisés ley loo

na'. Per Jesucrist mbi'th par mblu' Jesucrist loo mèn le' Diox, lìcque', nque' lezo' ñèe Diox mèn. No mblu' Jesucrist le' Diox ndlya's li Diox anggàc con' ndac loo mèn. No mblu' Jesucrist loo mèn le' cón che'n Jesucrist nac con' lìcpe'. <sup>18</sup> Yende chó mèn tarte ñèe xá ñaa loo Diox thidtene. Angoluxte xgan'pe' Diox co' thidte nac con Diox no co' nzoque' loo Diox, xgan' Dioxa mda' cuent no mblo ro xgan' Diox cón che'n Diox loo mèn.

*Juàn Bautist mda' cuent cón che'n Jesús no mblo xo'f Juàn Bautist cón che'n Jesús loo mèn.*

*(Mt. 3.11–12; Mr. 1.7–8; Lc. 3.15–17)*

<sup>19</sup> Mèn co' ñibe', no co' ndyoo ner, no co' ndyoo naa loo mèn nación Israel, co' nac leque mèn co' ngo ban ciuda Jerusalén, mèn mtel' mèn co' ngòc nguley' no mèn co' ndlyath no nguley' le'n templ par ngua nibdi's mèn loo Juàn ché' nac Juàn Crist. <sup>20</sup> Juàn mda' cuent loo mèn no mblo ro Juàn. Ndxab Juàn:

—Tyè'. Inacte daa Crist, yey.

<sup>21</sup> Sya, tolo mnibdi's mèn loo Juàn. Ndxab mèn:

—¿Chó nac lùu, sya? ¿Ché' lùu nac Lii co' mbi'th te'th di's co' ndxab Diox póla, cà'?

Juàn mcàb. Ndxab Juàn loo mèn:

—Tyè'. Inacte daa Lii.

Sya, mbere mèn, mnibdi's mèn tedib vez loo Juàn:

—¿Xá neel, sya? ¿Ché' lùu nac mbi' co' te'th di's co' ndxab Diox co' ndxath yi'th, cà'?

Juàn mcàb. Ndxab Juàn:

—Yende xaa. Inacte daa mbi'a.

<sup>22</sup> Mbere mèn, ndxab mèn loo Juàn:

—¿Chó mèn nac lùu, sya? Gunee loo nu'. Sya, tataa ta' nu' cuent loo mèn co' mtel' nu'. ¿Xá neel cón che'nl, yey?

<sup>23</sup> Sya, ndxab Juàn loo mèn:

—Daa nac xal thib mbi' co' ngue bez cabii co'te' nagán co' mbez loo mèn: Bli le' mèn gac nab loo cón che'n Tad Diox xal nteli mèn thib ned xalque' nac di's co' ndxab Sayi' co' mde'th di's co' ndxab Diox póla.

<sup>24</sup> Mèn co' ndyoo ner, no co' ndyoo naa, no co' ñibe' loo mèn nación Israel, mèn co' ngòc mèn xley' farise, mèn nac mèn co' mtel' ndxep mèn co' ngua toodi's no Juàn.

<sup>25</sup> Mèn tolo mnibdi's loo Juàn. Ndxab mèn:

—Chele' lùu inacte Crist, ne' ne' inacl Lii, no ne' ne' inacl xa' co' te'th di's co' ndxab Diox co' ndxath yi'th, ¿chonon ndlil bautizar mèn, sya?

<sup>26</sup> Sya, mcàb Juàn loo mèn. Ndxab Juàn:

—Lìcque', daa ndli bautizar mèn con nít. Per làth gu' nzoque' thib mbi' co' tarte ta' gu' cuent co' huenleque' chó nac mbi'a. <sup>27</sup> Mbi'a nac xa' co' nare' yi'th nque xisen. No mbi'a nac más xa' roo xa' xèn leque daa. Mastale' ndli gu' cuent nac daa xa' roo xa' xèn, nden' daa no ndyaquen thidtene inzyál'te daa que tee non mbi'a.

<sup>28</sup> Ryete con'a ngòc thib lugar co' ngro' lèe Betábara co' nziri' ned ndlyen huiz gaxte ro yó'be' Jordán co'te' ngue li Juàn bautizar mèn tiempa.

*Juàn Bautist mda' tedib lèe loo Jesús par ngro' lèe Jesús Mbacxil' che'n Diox.*

<sup>29</sup> Tedib huiz co' nde nquea, gunèe Juàn le' Jesús nde loo Juàn. Ndxab Juàn loo mèn co' nziri' loo Juàn:

—Hui' gu' nexa. Mbi' co' nde go' ne' tedib lèe co' nac lèe Mbacxil' che'n Diox, co' nee di's, tyactii mbi' ba' par tyon' xtol che'n mèn loo izlyo', mèn co' tyal gòn ro mbi'. <sup>30</sup> Cón che'n mbi' ba' nac co' mdalen cuent loo gu' le' xisen yi'th nque tedib mbi' co' nac más mbi' roo mbi' xèn leque daa. Tac ndoore' gal yáal daa loo izlyo' nzoque' mbi' ba' con Diox. <sup>31</sup> Yub daa ne'nglibe'de chó mbi' nac mbi' ba'. Ne' ne' tan cuent chó nac mbi' ba'. Ndxé'leque', mbalen par ndlin bautizar mèn con nít par tataa mod lu'en mbi' ba' loo gu' co' nac mèn nación Israel no par tan cuent cón che'n mbi' no chó nac mbi' ba' loo gu'.

<sup>32</sup> Ndxab Juàn loo mèn, ne:

—Daa gunèe ngulaa Xpii Natú' che'n Diox loo bé' loo mbi' ba'. Gunaa Xpii Natú'a xal ñaa thib palomxtil' hora. No sangngòo Xpii Natú' loo mbi' ba' par mbyan' no Xpii Natú'

mbi' ba' par ñibe'pe' Xpii Natú' loo mbi' ba'. <sup>33</sup> Per leque hora ne' daa tarte libe' mbi'. Ne' ne' tar tan cuent chó mbi' nac mbi'. Per xa' co' mtel' daa par ndlin bautizar mèn con nít, xa'a gunee loon:

—Co'se' ñèel lyàa Xpii Natú' loo mbi' no sangyòo Xpii Natú' loo mbi' par yan' no Xpii Natú' mbi' par ñibe'pe' Xpii Natú' loo mbi', axta syare' ta'l cuent le' mbi'a nac mbi' co' li bautizar mèn por cón che'n Xpii Natú'.

<sup>34</sup> Tolo ndxab Juàn:

—Daa gunèeque' xal ngulàa Xpii Natú' loo mbi' co' nac Jesús. Cona, ndan cuent no ndethen le' Jesús ba' nacque' xgan'pe' Diox.

*Trè' ndlu' cón che'n myen' co' ngòc nerleque' myen' xin' mté'th Jesús.*

<sup>35</sup> Tedib huiz co' nde nquea, ngue tee Juàn Bautist leque par neda con chop myen' xin' mté'th Juàn. <sup>36</sup> Láth co'se' nde riid Jesús par neda, gunèe Juàn Jesús. Ndxab Juàn loo ryop myen' xin' mté'th Juàn:

—Hui' gu' nexa. Mbi' ba' nac xa' co' mbezen loo mèn nac mbi' co' ne' tedib lèe co' nac lèe Mbacxil' che'n Diox. Tac mbi' ba' tyactii no gath mbi' ba' por cón che'n xtol mèn xal ndxuth mèn mbacxil' loo Diox nalle' par teri'th tecan' Diox cón che'n xtol mèn nalle'.

<sup>37</sup> Co'se' mbìn ryop myen' xin' mté'th Juàn tataa ndxab Juàn loo myen', mxen myen' ned. Mdoo nque myen' xís Jesús. <sup>38</sup> Sya, ndxepete mdee myen', mbere Jesús par ned xís Jesús. Gunèe Jesús le' ryop myen' nde nque xís Jesús. Ndxab Jesús loo myen':

—¿Cón ncu'a'n gu', à', ey?

Myen' mcàb loo Jesús. Ndxab myen':

—Maistr, ¿pá mèn U', à'? No ¿chó mèn yèez nac U', ne, à'?

<sup>39</sup> Jesús mcàb loo myen'. Ndxab Jesús:

—Ya' gu' nda na'. Sya, hui' gu' pá nzon.

Sya, mdoo nque myen' xís Jesús par gunèe myen' co'te' nzo ban Jesús. Tya, mbyan' no myen' Jesús yál'a tac hora casque' ngòc hor nquée guthap bzyè.

<sup>40</sup> Thìb mbi' co' ngola's di's co' ndxab Juàn no nda nque mbi' xís Jesús, mbi'a ngro' lèe Ndech, hues Mon Pedr. <sup>41</sup> Sya, yende izlyo', ngua cua'n Ndech Mon, hues Ndech. No ndxab Ndech loo Mon:

—Hues, mzyál'le' nu' mbi' co' nac Mesías, xa' co' nee di's nacpe' Crist, ndyaquen.

<sup>42</sup> Sya, mbe' Ndech Mon loo Jesús co'te' ngo Jesús. No co'se' gunèe Jesús Mon, ndxab Jesús loo Mon:

—Mon, lùu nac xgan' thìb mbi' co' lèe Jonás, ¿lé'? Per nalle' lùu ryo' lèe Cef, co' nee di's, hue'l tedib lèe co' lèe Pedr.

*Trè' ndlu' le' Jesús mbrez Lip no Natanael par que tee no myen' Jesús.*

<sup>43</sup> Tedib huiz co' nde nque, Jesús mbly'a's ya par ned le'n yèezya' co' nac làaz mèn galile. Láth ndoo Jesús ned, mzyál' Jesús thìb mbi' co' lèe Lip. Ndxab Jesús loo Lip:

—Ya' nda na', Lip.

<sup>44</sup> Lipa ngòc mèn yèez Betsaid co' nac leque yèez che'n Ndech no Pedr. <sup>45</sup> Sya, ngua cua'n Lip Natanael. Ndxab Lip loo Natanael:

—Mzyál'le' nu' mbi' co' lèe Jesús. Cón che'n mbi'a nac di's co' mque' Moisés ye's loo libr co' nac ley. No cón che'n mbi'a mque' mèn co' mde'th di's co' ndxab Diox ye's loo libr. Mbi'a nac Jesús, xgan' Chè, co' nac mèn yèez Nazaret.

<sup>46</sup> Sya, ndxab Natanael loo Lip:

—¿Ché' tác li mèn yèez Nazaret ndxep con' ndac, sya, cà', Lip?

Lip mcàb. Ndxab Lip:

—Ya' nda tee hui' na', nexa. Sya, ñeela no yila'sla.

<sup>47</sup> Co'se' gunèe Jesús nde zin gax Natanael loo Jesús, ndxab Jesús loo mèn co' nziri' loo Jesús cón che'n Natanael:

—Hui' gu' nexa. Mbi' co' nde go' nac mèn che'n nación Israel. No nac mbi' ba' thib mbi' ndac. Tac mbi' ba' nac thib mbi' co' thidtene inquediide xtàa. No ne' ne' indyè' mbi'.

<sup>48</sup> Sya, ndxab Natanael loo Jesús:

—¿Pá mblibe' U' daa, à', Tad?

Jesús mcàb loo Natanael. Ndxab Jesús:

—Daa gunèe lùu co'se' ndubl xàn' yaa ngudyuug co'se' ndoore' cuez Lip lùu.

<sup>49</sup> Mcàb Natanael loo Jesús. Ndxab Natanael:

—Maistr, U' nac xgan'pe' Diox. No nac U' rey che'n mèn nación Israel, ndyaquen.

<sup>50</sup> Sya, mcàb Jesús loo Natanael. Ndxab Jesús:

—¿Ché' tac guniilen lool gunèenl xàn' yaa ngudyuuga ndxela'sl, cà', Natanael? Lùu ñèe gác más con' roo con' xèn loon leque con' ndxè' yiloa, ey.

<sup>51</sup> Tolo ndxab Jesús loo Natanael:

—Lìca, na nii lool, no ngue niina loo ryete mèn co' nziri' loon: Desde nalle' par delant, gu' hui' ndoo xal' loo bé'. No hui' gu' xá mod quée no lyàa angl che'n Diox loon, daa co' mbal yáal loo izlyo' xalque' ndxáal chol mèn loo izlyo'.

## 2

### *Thib ned myen' mselya' yèez Caná.*

<sup>1</sup> Ngolo nguri'th son huiz co'se' mdoodi's Jesús di'sa, mselya' thib ned myen' le'n yèez Caná co' nac yèezya' che'n làaz mèn galile. Nde nixon', ngo xna' Jesús tya, ne. <sup>2</sup> Mbli mèn guliza convid Jesús con myen' xin' mté'th Jesús par cue no Jesús myen' co' mselya'a liz myen'. <sup>3</sup> Per co'se' gunèe xna' Jesús mbiiz vin co' ngue gui'th mèn loo mèn làtha, xna' Jesús ndxab loo Jesús:

—Mbiizle' vin mèn guliz ndxè', cara.

<sup>4</sup> Sya, ndxab Jesús loo xna' Jesús:

—Ngot, ¿chonon le'le' lùu más ndyac no ndyóol cón che'n mèn ba', à'? Yende chó cón chenen con lùu con mèn ba'. Tarte gáal hor co'se' tlo lu'en con' roo con' xèn co' nac cón chenen loo mèn.

<sup>5</sup> Per ndxe'leque', ndxab xna' Jesús loo mèn co' nzi li mandad loo mes:

—Bli gu' rye con' ñee Jesús loo gu', ndee gu'.

<sup>6</sup> Nde nixon', nziri' xop yèt nít tya co' ngòo mèn guliza nít xal nac costumbr co' ndxàp mèn nación Israel par ntech mèn ya' mèn, no par ntech mèn trast co' ndli zin' mèn cusin, no taamas con' co' nac co' ndli zin' mèn. No thib thib yèta ndxàalque' ndxòo chop o son rre nít. <sup>7</sup> Sya, ndxab Jesús loo mèn co' nzi li mandada:

—Fsè gu' ryete yèt ndxè' con nít.

No mès myen' rye yèta con nít axta mxyo'f lal nít loo rye yèta. <sup>8</sup> Ngoloa, ndxab Jesús loo myen':

—Nalle', blo' gu' ndxep nít le'n yèt ba'. No huàa lá' gu'i loo mbi' co' ndyoo naa loo mèn loo mes.

Sya, mbe' myen' níta loo mbi'a. <sup>9</sup> Per texal mbli mbi' co' ndyoo naa loo mèn loo yalhua preb nít co' ngòc vina, ngurez mbi' myen' co' mselya'. Tac ne'ñeede mbi' co' ndyoo naa loo mèn pá ned nde nít co' ngòc vina. Per myen' co' nzi li mandad co' mblo' nít, myen'a nanee xá mod ngòcsua' níta vin. <sup>10</sup> Sya, ndxab mbi' co' ndyoo naa loo mèn loo mbi' co' mselya'a:

—¿Cón ndxàc, yey? Ryete mèn co' ndli thib yalhua, ner ngui'th mèn thib ya' vin co' nac vin más huen loo mèn loo mes. No co'se' nde teelee' ndxu mèn co' ngòc convid vin axta plóthe ndlya's mèn, sya, ntlo mèn, ngui'th mèn vin co' nac vin más corient. Per lùu, ale ndxe'leque', nare' ngue gui'thl vin co' nac vin más huen. ¿Chonon tatua' ndlila, ey?

<sup>11</sup> Yalguzye' co' mbli Jesús le'n yèez Caná co' nac yèezya' che'n làaz mèn galile ngòc nerleque' yalguzye' co' mbli Jesús. No por yalguzye' co' mbli Jesús, mtlo Jesús, mbli'

Jesús con' roo con' xèn co' ndxàp Jesús la's nii Jesús no la's ya' Jesús. Le' myen' xin' mté'th Jesús na, mtlo ngola's loo Jesús hora.

<sup>12</sup> Ngolo ngòc con'a, nda Jesús par yèez Capernaum con xna' Jesús, no con myen' huespe' Jesús, no con myen' xin' mté'th Jesús. Ngo ban no Jesús xna' Jesús, no myen' huespe' Jesús, no myen' xin' mté'th Jesús pláte huiz le'n yèez Capernaum.

*Jesús mblo' che ryete con' co' indxàalte ngo le'n templ le'n templ.*

(Mt. 21.12-13; Mr. 11.15-18; Lc. 19.45-46)

<sup>13</sup> Le'n huiza, nde zin' gaxle' huiz lnii pasc co' ndli mèn nación Israel. Sya, mxen Jesús ned. Mbii Jesús yèez Capernaum. Nda Jesús par ciuda Jerusalén. <sup>14</sup> Co'se' ngòc Jesús le'n templ, gunèe Jesús nziri' mèn co' ntho' ngon, co' ntho' mbacxil', no co' ntho' palomxtil'. Gunèe Jesús nziri' mèn co' nzi sil' tmi che'n mèn, ne. <sup>15</sup> Co'se' gunèe Jesús con'a, mqui's Jesús thib' dó' par mda' Jesús che'n mèn con dó'. Tataa mbli Jesús par mblo' Jesús mèn na no má'a par fuer. Le' tmi che'n mèn co' nzi sil' mèn co' nsil' tmia na, ndxecleque' tmia mblonii Jesús. No mtexyath Jesús rye mes mèn na loo yòo. <sup>16</sup> Le' loo mèn co' nzi tho' palom na, ndxab Jesús:

—Fcaà rye má' ba. Blo' gu' par fuer. Ne'cue tho'de gu' trè' co'te' nac co'te' mbez mèn lèe xuden Diox xal mèn co' ntho' loo thib' xbi'.

<sup>17</sup> Axta syare' mte' lezo' myen' xin' mté'th Jesús di's co' ndub loo libr co' nac xti's Diox co' nac testamentgool co' mbez:

Con' co' ndli más ndyóon no ngue xyàn daa nac ndlyazen le' templ co'te' mbez mèn lèe xuden Diox yumbii no gàca thib' lugar natú' par cuez mèn lèe xuden Diox.

<sup>18</sup> Sya, mnibdi's mèngool co' ñibe', no co' ndyoo ner, no co' ndyoo naa loo mèn nación Israel loo Jesús. Ndxab mèn na loo Jesús:

—¿Chó yalguzye' roo lil loo nu' co' gac thib' señ par ñee nu' le' lùu, lìcque', ndxàp derech mblil con' mblil ba', à'?

<sup>19</sup> Sya, mcàb Jesús loo mèn na. Ndxab Jesús:

—Gu' telux templ ndxè' no yiloo le'n son huiz leque daa bere xít te'f templ ndxè' tedib vez.

<sup>20</sup> Sya, chàa, ngro' di's ro rye mèngoola. Ndxab mèn na loo Jesús:

—Jaaa. Le'n cho' fxop lín' mblyen' mèn par mxít te'f mèn templ ndxè'. ¿No lùu mbez: Le'n son huiz no maste xít te'fl templ, cà'? Aa, mbi'. ¿Máa yob yéc lùu, na?

<sup>21</sup> Per ndxe'leque', cón che'n templ co' ngue ta' Jesús cuent loo mèn na nac bél'yòo ladpe' Jesús. <sup>22</sup> Cona, co'se' ngro xban Jesús làth mèn nguth, axta syare' mte' lezo' myen' xin' mté'th Jesús le' Jesús guniique' di'sa. No tolo ngola's myen' di's co' ndub loo libr co' nac xti's Diox. No tolo ngola's myen' di's co' guniile' Jesús loo myen' le' Jesús guniique' di'sa cón che'npe' Jesús.

*Jesús nonque' no naneeque' Jesús xal nac xtùuz ryete mèn.*

<sup>23</sup> Làth ngo Jesús le'n ciuda Jerusalén le'n huiz lni che'n pasc, huiza huax mèn ngola's loo Jesús no loo cón che'n Jesús por gunèe mèn mbli Jesús rye yalguzye' co' mbli Jesús loo mèn. <sup>24</sup> Per leque yub Jesús ne'ngàpte yalxla's loo mèn na xal nac mod co' ngòp mèn na. Tac Jesús naneeque' no nonque' Jesús xal nac xtùuz rye mèn no xal nac co' nzo le'n lezo' rye mèn. <sup>25</sup> Ne' ne' inquin Jesús ta' chol mèn cuent cón che'n xtàa mèn loo Jesús tac Jesús naneeque' no nonque' Jesús xal nac xtùuz rye mèn no xal nac co' nzo le'n lezo' rye mèn.

### 3

*Jesús ryop Nicodem mdoodi's.*

<sup>1</sup> Ngo thib' mbi' co' ngòc mèn che'n xley' farise. Mbi'a ngro' lèe Nicodem. Ngòc mbi' thib' mbi' co' mnibe', no co' mdyoo ner, no co' mdyoo naa loo mèn nación Israel, ne.

<sup>2</sup> Nicodema ngua too naa Jesús thib' yál'. Látha, ndxab Nicodem loo Jesús:

—Maistr, nu' nda' cuent no nanee nu' le' Diox mtel' U' par gac U' thib' maistr co' lu' nu'. Tac yende chó mèn tar gac lu' no co' li yalguzye' roo no yalguzye' xèn xal ndli U' chele' Diox indlyath node mèn na par li mèn na con'a.



<sup>3</sup> Sya, ndxab Jesús loo Nicodem:

—Lìcpe' ba'i, na nii thib con' lool, Nicodem: Le' mèn co' ne'tyalte yòo loo cón che'n Diox xal thib mbetoo' co' diz ngóol, yende mod yòo mènna loo cón che'n Diox par ñibe'pe' Diox loo mènna.

<sup>4</sup> Ndxab Nicodem loo Jesús:

—¿Xá mod gáal thib mbi' tedib vez co'se' ngoxle' mbi'? ¿Ché' tác yòo mbi' le'n lezo' xna' mbi' par gáal mbi' tedib vez, cà'? Yende xàa.

<sup>5</sup> Jesús mcàb loo Nicodem. Ndxab Jesús:

—Lìca, na nii lool, Nicodem: Le' mèn co' ne'tyalte gác mèn men cub loo cón che'n Diox por cón che'n nít no por cón che'n Xpii Natú', mènna yende mod yòo loo cón che'n Diox par ñibe'pe' Diox loo mènna. <sup>6</sup> Mèn co' ante ngóol xal nac bin che'n bé' lad xud mèn no xna' mèn, mènna alithe nziri' loo cón che'n xab izlyo' ndxè'. Per ndxe'leque', mèn co' mbli Xpii Natú' le' mènna nac mèn cub loo cón che'n Diox, mènna ndoo lite nzi que tee ban par li mènna xal nac co' ñibe'pe' Xpii Natú' loo mènna par li mènna. <sup>7</sup> Ne'hui'del, no ne'ñaadel, no ne'tyóodel arid cón che'n con' ngue niin lool nalle'. Naquinque' gáal gu' tedib vez xal ngolo guniina lool. <sup>8</sup> Hui' nexa. Mbii nxyo'f pál co'te' nxyo'f mbii. No ndxònl co'se' ndxa'x nxyo'f mbii, ¿lé'? Per ne'ñeedel pá ned ndryo' mbii. No ne' ne' ñeel pá ned ndyàa mbii. Tataa naca, ne, con' ryete mèn co' mbli Xpii Natú' par ngòc mènna mèn cub loo cón che'n Diox.

<sup>9</sup> Sya, mbere Nicodem, ndxab Nicodem loo Jesús tedib vez:

—¿Xá mod gác con'a, yoo?

<sup>10</sup> Jesús mcàb loo Nicodem. Ndxab Jesús:

—¿Ché' ndyaquen lùu nac ner maistr che'n mèn nación Israel no inontel cón che'n con' ndxè', cà'? <sup>11</sup> Lìca, na ngue nii lool: Le' cón che'n con' co' non nu', ndyoodi's nu'. No cón che'n con' co' gunèele' nu', nda' nu' cuent. No ndxe'leque', indxònte gu' di's no indxela'ste gu' di's co' nda' nu' cuent loo gu' no co' ndyoodi's nu' loo gu'. <sup>12</sup> Chele' daa tyoodiz no tan cuent cón che'n izlyo' ndxè' loo gu' no ne'yila'ste gu'i, ¿xá mod yila's gu' chele' daa ta cuent cón che'n bé' loo gu', sya?

<sup>13</sup> Axta nalle' yende chó mèn tar quée loo bé' par té'th mènna cón che'n con' co' ngue niin lool trè', Nicodem. Ndxè'leque', angolux daa co' mbal yáal loo izlyo' ndxè' xalque' ndxáal chol mèn loo izlyo', thidte daa non cón che'n bé', daa co' ngro' le'n bé'. Tac le'n bé' loo bé' nac lizpe' daa, no nac làazpe' daa, no nac loo bé' xnedpe' daa. <sup>14</sup> Hui' nexa, Nicodem. Nde niin thib con' lool: Texal mquetal Moisés thib mbel' loo thib bro yaa nol' no mdoo Moisés yaaa, ngue tal mbel' loo yaa co'te' nagán, tataaque' naquin que' mèn daa, daa co' mbal yáal loo izlyo' ndxè' xalque' ndxáal chol mèn loo izlyo', loo thib cruz <sup>15</sup> par gàca le' ryete mèn co' tyal yila's loon, Diox ne'quexù'de mènna par co' xà' Diox mènna loo Diox yiloo. Ndxè'leque', mèn co' tyal yila's loon, mènna yòo ban no Diox thidtene.

*Trè' ndlu' Jesús le' Diox anze'f nque' lezo' ñèe Diox mèn loo izlyo'.*

<sup>16</sup> Tac Diox axta arid nazin' mèn no nque' lezo' Diox ñèe Diox mèn loo izlyo'. Por cona, mtel' Diox angoluxte xgan' Diox loo izlyo' par gàca le' ryete mèn co' yila's loo xgan' Diox, ne'quexù'de Diox mènna par co' xà' Diox mènna loo Diox yiloo. Ndxè'leque', yòo ban no mènna Diox thidtene yiloo. <sup>17</sup> Diox ne'ntel'te xgan' Diox loo izlyo' par quexù' xgan' Diox mèn loo izlyo'. Ndxè'leque', mtel' Diox xgan' Diox loo mèn loo izlyo' par lyá' mèn loo con' ryes por cón che'n xgan' Diox.

<sup>18</sup> Mèn co' ndxela's loo xgan' Diox, Diox ne'quexù'de mènna thidtene. Per mèn co' ne'tyalte yila's loo xgan' Diox, Diox ngue quexù'que' mènna por ne'ngala'ste mènna loo mbi' co' nac angoluxte xgan' Diox. <sup>19</sup> Co'se' mbi'th xa' co' ndli par ndyub xnii yéc mèn no ndyub xnii lezo' mèn loo cón che'n Diox, más mda' gust loo lezo' mèn no más mdubla's mèn cón che'n xab izlyo' leque' li mèn cas loo mbi' co' ndli par ndyub xnii yéc mèn no ndyub xnii lezo' mèn loo cón che'n Diox. Tac ryethe con' ndli mèn nac con' ye'rsin'. No con' co' nda' gust lezo' mèn ndli ngue quexù' Diox mèn loo izlyo'. <sup>20</sup> Tac ryete mèn co' ndli con' ye'rsin', mènna ndxòo xyàn lezo' ñèe mènna mbi' co' mbi'th li par ndyub xnii yéc

mèn no ndyub xnii lezo' mèn loo cón che'n Diox. No thidtene ne'ndalte mènà yòò mènà loo cón che'n mbi' co' ndli par ndyub xnii yéc mèn no ndyub xnii lezo' mèn cón che'n Diox tac indlya'ste mèn ye'rsin'a ryo xo'f con' ye'rsin' co' ndli mènà loo xnaa. <sup>21</sup> Per ndxe'leque', mèn co' nzi tee ban xal nac con' lìcpe', mènà ndyal yòò loo cón che'n mbi' co' ndli ndyub xnii yéc mèn no ndyub xnii lezo' mèn loo cón che'n Diox par ndxàc be' mènà le' Diox ndlyath no mènà loo con' ndac co' ngue li mènà.

*Juàn Bautist mbere ngue ta' cuent cón che'n Jesús loo mèn.*

<sup>22</sup> Ngolo nguri'th con'a, ngua Jesús con myen' xin' mté'th Jesús par ned yèezya' che'n làaz mèn jude. Ngo no Jesús myen' tya pláte huiz. Látha, mbli myen' xin' mté'th Jesús bautizar mèn tya. <sup>23</sup> Juàn Bautist, ne, ngue li bautizar mèn co'te' ndub len nít thib lugar co' lèe Enón co' nziri' gaxte co'te' nziri' thib yèez co' lèe Salim tac tya anze'f nal' nít nzo. No huax mèn nde loo Juàn par ndli Juàn bautizar mèn. <sup>24</sup> Be' ndli Juàn bautizar mèn tiempa tac tarte que' mèn Juàn lezi'f.

<sup>25</sup> Leque le'n huiza, mque di's myen' xin' mté'th Juàn con plá mèngool co' ñibe', no co' ndyoo ner, no co' ndyoo naa loo mèn nación Israel cón che'n mod co' mbez mèn ndxàc mèn nambiila's loo xley' mènà. <sup>26</sup> Sya, ngua myen' xin' mté'th Juàn loo Juàn. Ngua ta' myen' cuent loo Juàn. Ndxab myen':

—Maistr, hui' U' nexa. Mbi' co' ngo no U' tedib lad ro yó'be' Jordán par ned ndlyen huiz, mbi' co' mda' U' cuent cón che'n loo nu'a, mbi' ngue li bautizar mèn. No anze'f thib mèn ndoo nque xís mbi'.

<sup>27</sup> Mcàb Juàn loo myen'. Ndxab Juàn:

—La' gu'. Tac yende cón gác li mèn chele' Diox ne'nxo'f zin'te thib zin' loo mèn par li mèn zin'a. <sup>28</sup> Leque gu' nda' cuent cón chenen co'se' nambiite ndxaben loo mèn le' daa inacte Crist. Ndxé'leque', Diox mtel' daa par ndal neren loo Crist.

<sup>29</sup> Tolo ndxab Juàn loo myen':

—Nde niin thib con' loo gu': Xa'bi' co' nac sa'l thib xa'got, xa'bi'aque' nac sa'l xa'gota. Per thib xa'bi' co' ndxàc amiu che'n mbi' co' nac sa'l xa'gota, xa'a ndoo tya. No ndoo yòn xa' di's co' ndyoodi's mbi' co' nac sa'l xa'gota. No co'se' ndoo yòn mbi' di's co' ndyoodi's xa'bi'a, anze'f ndyac lezo' mbi' ndxòn mbi' di's co' ndyoodi's mbi' co' nac sa'l xa'gota. Cona, daa, ne, anze'f ndyac lezo' ndxònen cuent co' ngue ta' gu' loon ba' cón che'n mbi'a. <sup>30</sup> Por part cón che'n mbi'a, sate más ndoo yàc mbi' mbi' roo mbi' xèn. No thidteneque' naquinque' gác mbi'a thib mbi' roo thib mbi' xèn. Per part cón chenen, ale ndxe'leque', ale xègà xègà ya yende cón tolo lin. Ndxé'leque', gác daa mèn co' iñaade ntac loo mèn.

*Trè' ndlu' le' Crist ngro' loo bé' loo Diox.*

<sup>31</sup> Ngue niin loo gu': Le' Crist co' ngro' loo bé', Crist ñibe'pe' loo ryethe con'. Per mèn co' ndxáal loo izlyo', che'n izlyo' nac mènà. No cón che'n izlyo' ndyoodi's mènà. Per Crist co' ngro' le'n bé' loo bé', Crist ngüii' ñaa loo ryethe con'. No ñibe'pe' Crist loo ryethe con'.

<sup>32</sup> Ndyoodi's Crist cón che'n con' co' gunèe Crist no cón che'n con' co' mbìn Crist. Per casque yende chó mèn nzo' co' ndxela's cón che'n di's co' mbez Crist no co' nda' Crist cuent loo mèn. <sup>33</sup> Per chele' chó mèn yila's di's co' mbez Crist no di's co' nda' Crist cuent loo mèn, leque mènà li nèe xtùuz mèn no li nèe mèn lezo' mèn le' Diox ndyoodi's no nda' Diox cuent ante cón che'n con' co' nac con' lìcpe'. <sup>34</sup> Tac Diox co' mtel' Crist, Diox mtel' Crist par tyoodi's Crist ante di's co' mnibe' Diox tyoodi's Crist no co' ta' Crist cuent loo mèn. Lomisque' ne, Diox ne'nglàade Xpii Natú' loo Crist xal thib con' co' nchi'x mèn.

<sup>35</sup> Diox co' nac xud Crist Jesús, Diox anze'f nque' lezo' ñèe Diox Crist Jesús co' nac xgan'pe' Diox. Por cona, mblec Diox ryethe con' no mtan' Diox ryethe con' la's nii Crist Jesús no la's ya' Crist Jesús. <sup>36</sup> Cona, ngue niin: Le' mèn co' ndxela's loo xgan' Diox no loo cón che'n xgan' Diox, mènà yòò ban no Diox thidtene. Per mèn co' ne'tyalte yila's loo xgan' Diox no loo cón che'n xgan' Diox, mènà ne'yòò ban node Diox thidtene. Ndxé'leque', Diox ndxecloo ñèe mènà nalle' par tetii Diox mènà thidtene yiloa.

## 4

*Jesús ngue toodi's no thib xa'got co' nac mèn yèezya' che'n làaz mèn samari.*

<sup>1</sup> Nde nxon', mbìn mèn xley' farise más ndli Jesús bautizar mèn leque Juàn Bautist, <sup>2</sup> mastale indli yubte Jesús bautizar mèn. Ndxé'leque', myen' xin' mté'th Jesús mbli bautizar mèn. <sup>3</sup> Per co'se' mbìn Jesús le' mèn xley' farise nonle' cón che'n Jesús, ngro' Jesús le'n yèezya' che'n làaz mèn jude par bere Jesús, ya Jesús par ned le'n yèezya' che'n làaz mèn galile tedib vez.

<sup>4</sup> Láth ndoo Jesús ned, nda Jesús par ned làaz mèn galile, thib lì nguri'th Jesús par ned le'n yèezya' co' nac làaz mèn samari, <sup>5</sup> axta mzin Jesús thib yèez co' lèe Sicar co' nac thib yèezya' che'n làaz mèn samari. Yèez Sicar nziri' gaxte co'te' nax thib le' xyòn Cob co' mtan' Cob loo Chè co' nac xgan' Cob póla. <sup>6</sup> Loo xyòn Coba ndub thib tó' co' mbez mèn nac tó' che'n Cob. Per com le' Jesús ndoo ned, ¿lé'?, mdub Jesús ro tó'a tac ngo zan Jesús. Hora casque' ngòc rol huiz. <sup>7</sup> Láth ndub li Jesús descans ro tó', nde xi thib xa'got co' nac thib xa'got che'n làaz mèn samari nít ro tó'. Ndxab Jesús loo xa'gota:

—Ngot, fta' chu'th nít gun, ey.

<sup>8</sup> Látha ne, myen' xin' mté'th Jesús yende. Myen' nda le'n yèez par nda ti' myen' co' hua no myen' Jesús. <sup>9</sup> Sya, ndxab xa'got co' nac xa'got gulàaz mèn samari loo Jesús:

—¿Xá mod ale ña'b U' nít loon par gu U', U' co' nac mèn gulàaz che'n mèn nación Israel, no daa co' nac xa'got che'n làaz mèn samaritan, à'?

Gu' nda'que' cuent no naneeque' gu' le' mèn nación Israel inzyál' di'ste no inzyál' be'de co' huenleque' con mèn co' nac mèn gulàaz che'n làaz mèn samari.

<sup>10</sup> Sya, mcàb Jesús loo xa'gota. Ndxab Jesús:

—Chele' lùu naneele' no nda'lel cuent cón che'n con' ndac co' angli Diox loo mèn, no chele'l nda' cuent no nonl chó mbi' nac mbi' co' ngue ña'b nít lool nalle', licpe' ba'i, lùu ngna'b nít loon par gul, nít co' li par yòo ban nol Diox thidtene.

<sup>11</sup> Sya, ndxab xa'gota loo Jesús:

—Tad, per ne' ne' ingue no U' con' par co' U' nít le'n tó'. Más de cona, anze'f na's tó'. ¿Pá yixi U' nít co' ta' U' gun, nít co' mbez U' gun par gòo ban non Diox thidtene, sya?

<sup>12</sup> Cob co' ngòc xudgool na' póla mtan' tó' ndxè' co'te' mblo' Cob nít par ngu Cob con myen' xin' Cob no par ngu má' co' mxèn' Cob. ¿A poc ñee U' más xa' roo xa' xèn nac U' leque xudgool na' Cob sya, cà'?

<sup>13</sup> Jesús mcàb. Ndxab Jesús loo xa'gota:

—Ryete mèn co' toloque' gu nít ndxè', mènà toloque' yec lezo'. <sup>14</sup> Per ndxe'leque', mèn co' tyal no co' ta' lugar yòo cón chenen loo mènà xal co'se' gu mèn nít, mènà thidteneque' yo nagàl lezo' loo cón che'n Diox xal mèn co' ne'yecte lezo' par nquin mèn gu mèn nít tedib vez. Tac con' co' lin loo mènà co' gac con' co' yòo le'n lezo' mènà, con'a li loo mènà gac con' ndac tín' loo mènà xal gac con' ndac loo mèn co'se' ndub zib ndub len nít par li níta con' ndac loo mènà. Con' co' lin loo mènà càb loo mènà yòo ban no mènà Diox thidtene.

<sup>15</sup> Sya, ndxab xa'gota loo Jesús:

—Tad, fta' U' níta gun, tá, par ya ne'tolode yec lezon no par ya ne'tolode gal lo'en nít le'n tó' ndxè'.

<sup>16</sup> Sya, mcàb Jesús loo xa'gota. Ndxab Jesús:

—Huàa xi xa'bi' co' nac sa'll. Yi'th ryop gu' ndxè'.

<sup>17</sup> Xa'gota mcàb. Ndxab xa'gota loo Jesús:

—Ingue noden sa'len.

Sya, ndxab Jesús loo xa'gota:

—Aa. Lìcque' nac co' guneel ba': Ingue nodel sa'l. Yende con' niin lool. <sup>18</sup> Lùu nde teele' mque no ga'y sa'l. No lomisque', xa'bi' co' ndub nol nalle' inacte xa' sa'll. Lìcque' nac di's co' ngolo guneel ba'.

<sup>19</sup> Co'se' mbìn xa'gota tataa ndxab Jesús, ndxab xa'gota loo Jesús:

—Tad, ndyaquen le' U' nac thib xa' co' nde'th di's co' ndxab Diox. <sup>20</sup> Xudgool nu', co' ngòc mèn che'n yèezya' che'n làaz mèn samari, ndyee chez Diox loo yii co' ndub go'. No gu', co' nac mèn che'n yèezya' che'n làaz mèn jude, ale mbez le'n templ co' ndub le'n ciuda Jerusalén nac co'te' nquin cuez mèn Diox.

<sup>21</sup> Jesús mcàb. Ndxab Jesús loo xa'gota:

—Gola's loon, ngot, nde zin' gaxle' tiemp no nde zin' gaxle' huiz co'se' ne' loo yii ndxè' no ne' ne' le'n ciuda Jerusalén gac co'te' cuez gu' Diox. <sup>22</sup> Gu' co' nac mèn yèezya' che'n làaz mèn samari, axta ne' ne' ñee gu' chó loo con' mbez gu' nac Diox. Per nu' non no naneeque' nu' chó mbez nu' nac Diox. Tac por cón che'n nu' co' nac mèn nación Israel Diox mbli par non mèn xá mod lyá' mèn loo con' ryes. <sup>23</sup> Per nase mzinle' huiz no mzinle' tiemp no nalle'que' ndxàc co'se', licque', nalique' no nambìque' que tee ban mèn loo Diox xal ñibe'pe' Xpii Natú' loo mèn no xal ndlu' xti's Diox loo mèn cón che'n con' licpe'. Tac Diox xud na' ncu'a'n mèn co' cuezpe' Diox xud na' tataa mod, Diox co', licque', nac thidte Diox. <sup>24</sup> Diox nac thib xpii. No mèn co' lya's cuez Diox mod co' li par yò lezo' Diox ñee Diox mèn, mèn naquinque' nalique' no nambìque' que tee ban loo Diox xalque' ñibe'pe' Xpii Natú' loo mèn, no xalque' ndlu' xti's Diox loo mèn cón che'n con' licpe'.

<sup>25</sup> Sya, ndxab xa'gota loo Jesús:

—Daa nanee le' thib xa' co' lèe Mesías yi'th, xa' co' ne' tedib lèe Crist. Co'se' yi'th xa', xa' ta' cuent no co ro xa' ryete con' cón che'n Diox loo na'.

<sup>26</sup> Jesús mcàb loo xa'gota. Ndxab Jesús:

—Xa' co' nac Crist nac daa co' ngue toodi's nol, ey.

<sup>27</sup> Látha, ndye'th myen' xin' mté'th Jesús loo Jesús. Ante mbui' myen' no ante gunaa myen' le' Jesús ngue toodi's no xa'gota. Per nec thib myen' ne'nglide ryes ngnibdi's myen' loo Jesús par ngab myen':

—¿Cón ndlya's xa'got ba' o chó di's ngue toodi's U' con xa'got ba'?

<sup>28</sup> Sya, taate mblá' xa'gota rre xa'. Ndyàa xa' làth yèez par ngua ta' xa' cuenta loo mèn yèez. Ndxab xa' loo mèn yèeza:

<sup>29</sup> —Ya' gu' nda tee hui' na' thib mbi'. Mbi'a guneele' cón che'n ryethe con' nde teele' mblin. Ne'stolque' mbi'a nac Crist, cara.

<sup>30</sup> Sya, ryete mèn yèeza ngro'. Ngua no mèn xa'got co'te' ndub Jesús.

<sup>31</sup> Láth nda xa'gota làth yèez, myen' xin' mté'th Jesús nalyat ndxab loo Jesús:

—Maistr, que de U'. Hua na' mase sa pan, yey.

<sup>32</sup> Per ndxe'leque', Jesús ndxab loo myen':

—Yende xàa, ey. Ne'huaden. Daa ngue no ndxep con' huan. No nít yèth co' huana, gu' inonte chó nít yèth nac nít yèth co' huana.

<sup>33</sup> Sya, mtlo myen' xin' mté'th Jesús, mnibdi's myen' loo xtàa myen':

—¿Xá nee gu'? ¿Ché' ndyac gu' nzo chó mèn mbi'th lá'le' con' nduhua maistr, lé'?

<sup>34</sup> Ale le'le' mcàb Jesús loo myen':

—Yende xàa. Zin' co' ndlin ndxè' nac rsin' che'n xa' co' mtel' daa par lin co' nee lezo' xa'. Ndlin cuent le' zin'a nac xal xíten no xal luan. Le' zin' co' nac rsin' xa'a na, na teloque' zin'a. <sup>35</sup> Gu' ngue no thib di's co' mbez gu': Tatabe' ndxàc falt thap mbe' par zin tiemp co'se' lyáp, ¿lé'? Per nalle' nde tetaquen thib di's loo gu' par ta' gu' cuent: Lyazen hui' ndxè' hui' ba' gu' loo xyòn mèn co' ngue lad yii ba'. Lìcque', huax cosech nzo co' yamerle' dyop. Tatura' nzo mèn loo izlyo' co' nzi bed gòn no co' ndlya's gòn cón chenen par yò mèn loo cón che'n Diox, co' nee di's, nac mèn xal cosech ba'. <sup>36</sup> Naneeque' gu' le' mèn co' ndli zin' loo cosech, mèn thib lite ndxòo ray. Niin tedib di's loo di's ndxè' loo gu', ne: Mèn co' gac xal cosech loo cón che'n Diox, mèn yò ban noque' Diox thidtene. Tataa ndxàca par gaca le' mèn co' nde'th no co' ngo yalbàn cón che'n Diox, no mèn co' ndxòo loo cón che'n Diox xal ndláp mèn, thidte tyac lezo' mèn loo cón che'n Diox no loo Diox. <sup>37</sup> Tac licque' nac con' ndxè' xal ndxab di's co' mbez mèn: Xà'que' nac mèn co' ngo bin. No xà'que' nac mèn co' nthop cosech.

<sup>38</sup> Daa mtel' gu' liz mèn no làaz mèn par ngua ta' gu' cuent no par ngua lo gu' yalbàn cón chenen loo mèn ned ngua gu' par ngola's mèn loon no ngòo mèn loo cón chenen xal co'se' nthop mèn cosech. Ne'ngode gu' yalbàn cón chenen arid xal mèn co' ngo bin. Taamas mèn mde'th cón chenen no mblo mèn yalbàn cón chenen xal mèn co' mque' zin' loo ña'. No gu' pente mbli ndxep zin' loo mènna par ngòo mèn loo cón chenen xal mèn co' inque'de zin' loo ña' no alithe mthop mèn cosecha par hua mèn cosech co'te' ne'nque'de mèn zin'.

<sup>39</sup> Huax mèn yèez che'n yèezya' che'n làaz mèn samari ngola's loo Jesús por di's co' mda' xa'got samaritan cuent loo mènna co'se' ndxab xa'gota: Jesús mda' cuent cón che'n ryete con' co' nde teele' ndlin loon, cara.

<sup>40</sup> Por cona, co'se' ngua mèn che'n yèezya' che'n làaz mèn samari loo Jesús, nalyat mde'b ro mènna. Mna'b mènna di's loo Jesús par yan' no Jesús mènna tya. No mbyan' no Jesús mènna tya chop huiz. <sup>41</sup> No ale sate más tolo ngola's huax mènna loo Jesús por di's co' mda' yub Jesús cuent loo mènna. <sup>42</sup> Sya, ndxab mèn che'n yèezya' che'n làaz mèn samari loo xa'gota:

—Nase ngola'sque' nu' cón che'n Jesús. Ne'ngala'ste nu' cón che'n Jesús ante por di's co' mda'l cuent loo nu'. Ndxle'leque', nu' ngola's loo Jesús por mda' yub Jesús cuenta loo nu'. No, licpe' ba'i, naneeque' nu' le' mbi' ba' nac yubpe' Crist co' mxo'f zin' Diox loo par ntelá' Crist mèn che'n izlyo' ndxè' loo con' ye'rsin'.

*Jesús mteyac xgan' thib mbi' co' mxo'f zin' zin' loo gobiern.*

<sup>43</sup> Co'se' ngolo nguri'th chop huiz, mbii Jesús le'n yèezya' che'n làaz mèn samari. Nda Jesús par ned le'n yèezya' co' nac che'n làaz mèn galile. <sup>44</sup> Tac yub Jesús ndxab loo mèn nación Israel:

—Thib mbi' co' nde'th di's co' ndxab Diox, co' nac mbi' yèezpe' no mbi' gulàazpe' che'n thib yèez, mèn gulàaz mbi' no mèn yèez mbi' ne'lide par gac con' guryath no con' guryèn loo mbi'a. Ndxle'leque', tè'b mènna mbi'a. <sup>45</sup> Co'se' mzin Jesús le'n yèezya' che'n làaz mèn galile, nabe'ste ngo no mènna Jesús. No nabe'ste mdoodi's no mènna Jesús tac rye mènna ngua lni Jerusalén. No gunèe mènna rye con' co' mbli Jesús le'n huiz lni le'n templ ciuda Jerusalén.

<sup>46</sup> Làth xtau'a, ngua riid Jesús le'n yèez Caná, co' nac thib yèezya' che'n làaz mèn galile, co'te' mbli Jesús ngòc nít vin. Nde nixon', ngo thib mbi' che'n yèez Capernaum co' ngòc thib jef che'n gobiern co' ñibe' rey. Mque no mbi' thib xgan' mbi' co' ndyac len. <sup>47</sup> Co'se' mbìn mbi'a le' Jesús ngro' le'n yèezya' che'n làaz mèn jude no mzin Jesús par ned le'n yèezya' che'n làaz mèn galile, mbi'th nee mbi' loo Jesús. Nalyat mde'b ro mbi'. Mna'b mbi' favor loo Jesús par ya teyac Jesús xgan' mbi' liz mbi' tac xgan' mbi' nax tinle' liz.

<sup>48</sup> Sya, ndxab Jesús loo mbi':

—Gu' ne'yila'ste loon chele' gu' ne'ñèede señ no yalguzye' co' ndlin, ¿lé'?

<sup>49</sup> Per mbi' co' mxo'f zin' zin' loo gobiern ndxab loo Jesús:

—Lìca, Tad, inacte nu' mèn co' ndxela's arid. Per jer ya' U', nda na' lizen ndoore' gath mbyòo daa, yey.

<sup>50</sup> Sya, ndxab Jesús loo mbi':

—Byàa par lizl. Mbyòo lùu mbyacle'. No nabanque' mbyòo.

Mbi'a ngola's di's co' ndxab Jesús loo mbi'. Mxen mbi' ned, ndyàa mbi' par liz mbi'.

<sup>51</sup> Co'se' yamerle' zin mbi' liz mbi', mtel' mèn guliz mbi' moz par ngua càa ned moz mbi'. Sya, ndxab moz loo mbi':

—Ne'tyóode U'. Mbyòo U' mbyacle'. No nabanque' mbyòo.

<sup>52</sup> Sya, mnibdi's mbi' loo moz. Ndxab mbi':

—¿Coyor mtlo mbyath ndac mbyòo, à'?

Moz ndxab loo mbi':

—Ná'a com hor mquée guthib bzyè ngro xlé' mbyòo.

<sup>53</sup> Lueg mda' xud mbyòo cuent le' hora ngòc leque hor co'se' ndxab Jesús loo mbi':

—Mbyòo lùu mbyacle'. No nabanque' mbyòo lùu.



Syase ngola's mbi' loo Jesús no loo con' ndli Jesús con rye mèn guliz mbi'.

<sup>54</sup> Con yalguzye' co' mbli Jesús loo mbyòò xgan' mbi'a, ngòc mbryop yalguzye' co' mbli Jesús loo ngro' Jesús le'n yèezya' che'n làaz mèn jude co'se' mbere Jesús, ngòc Jesús le'n yèezya' che'n làaz mèn galile.

## 5

*Jesús mteyac thib mbi' che'n yèez Betesda, mbi' co' mque no thib yíz co' nac yíz bech.*

<sup>1</sup> Ngolo nguri'th con'a, mzin huiz lni co' nac huiz lni che'n mèn nación Israel. Làth xtau'a, Jesús mbere ngua par ned le'n ciuda Jerusalén. <sup>2</sup> Le'n ciuda Jerusalén, ndoo thib puert co' ngro' lèe Puert che'n Mbackxil'. Ngo'th thib tanc nít tya. No tanca ngro' lèe di'stèe hebre Betesda. Ro tanca nziri' thib corredor co' mque no ga'y portal co' ngòc ga'y arc. <sup>3</sup> Ro portal che'n corredora ngureri' huax mèn yíz, mèn sieu, mèn renc, no mèn co' mque no yíz bech. Mèna nzi bed par huin nít. <sup>4</sup> Tac thib angl ndryo' le'n bé' no ndlyàa angl loo bé' cad pól no ncuin angl nít. No mèn yíz co' nerleque' ndlyàa le'n níta láth ngüin nít, ndxac mèna loo chol yíz co' mque no mèna. <sup>5</sup> Ngo thib mbi' làth rye mèn yíza tya. Mbi'a ndxàcle' gal psi' pxon lín' ndyac len. <sup>6</sup> Co'se' gunèe Jesús nax mbi'a no non Jesús ndxàcle' lín' ndyac len mbi'a, ndxab Jesús loo mbi':

—¿Ché' ndlyà'sl yacl, cà', ey?

<sup>7</sup> Mbi' mcàb loo Jesús. Ndxab mbi':

—Aa, Tad, per yende chó mèn lyath no daa par làa mèn daa le'n tanc co'se' ngüin nít. Tac co'se' ndlyazen làan le'n tanc, no ndoore' zin daa ro tanc, tedib mèn ngulàale' le'n tanc. Cona, ngue niin loo U': Ne'lide thidten gan par làan le'n tanc, Tad.

<sup>8</sup> Jesús ndxab loo mbi':

—Goo che. No fthùuz dáal co' ndxàa'l. No fxe ned. Byàa par lizl.

<sup>9</sup> Leque hora, chàa, mbyac mbi'. Mthùuz mbi' dáa mbi'. Mxen mbi' ned. Ndyàa mbi' par liz mbi'. No le'xque' huiz co' mbyac mbi'a ngòc huiz sabd co' ngòc huiz descans tiempa. <sup>10</sup> Sya, ndxab mèn co' ñibe', no co' ndyoo ner, no co' ndyoo naa loo mèn nación Israel loo mbi' co' mbyaca:

—Mbi', nalze nac huiz sabd co' nac huiz descans. Indxàalte hue'l dáa ba'.

<sup>11</sup> Per mbi' co' mbyaca mcàb loo mèna. Ndxab mbi':

—Xa' co' mteyac daa, yub xa' gunee loon: Fthùuz dáa. No bye' dáa. Byàa par lizl.

<sup>12</sup> Sya, mnibdi's mèna loo mbi'. Ndxab mèna:

—¿Chó mbi' nac mbi' co' gunee lool: Fthùuz dáal no bye' dáa no byàa, à'?

<sup>13</sup> Per mbi' co' mbyaca ne'nda'de cuent no inonte mbi' chó nac mbi' co' mteyac mbi'a tac anze'f thib mèn ngureri' tya. Nde nxon', mbiile' Jesús làth mèna, ne. <sup>14</sup> Ngoloa, mzyál' Jesús mbi' le'n templ. Ndxab Jesús loo mbi':

—Hui' nexa. Lùu mbyacle' nalle'. Chó Diox chó neel. Ya ne'tolode cua'nl xquinl. Tac yiloa más nazab gàca lool.

<sup>15</sup> Sya, mxen mbi' ned. Ndyàa mbi'. Ngua ta' mbi' cuent loo mèn co' ñibe', no co' ndyoo ner, no co' ndyoo naa loo mèn nación Israel le' Jesús nac xa' co' mteyac mbi'.

<sup>16</sup> Ante por mbli Jesús con'a huiz sabd co' ngòc huiz descans tiempa, mèn co' ñibe', no co' ndyoo ner, no co' ndyoo naa loo mèn nación Israel mtlo mdub ngu's Jesús. Anze'f mblyà's mèna guth mèna Jesús. <sup>17</sup> Per com le' Jesús nonque' xal nac xtùuz mèna, ¿lé'?, co'se' ngòc nayi' mèna loo Jesús, sya, mcàb Jesús loo mèna. Ndxab Jesús:

—Axta nare' ngue li xuden Diox thib zin'. Daa, ne, ngue li zin'.

<sup>18</sup> Le' sya, por cona sate más mbli mèn co' ñibe', no co' ndyoo ner, no co' ndyoo naa loo mèn nación Israel fuerz par guthxù' mèna Jesús. Tac iante de indlide Jesús cas huiz sabd xal nac costumbr co' mque no mèn nación Israel huiz sabd co' ngòc huiz descans tiempa, mblyà's mèna guth mèna Jesús. Ndxle'leque', por mbez Jesús le' xudpe' Jesús nac Diox no por lalque' ndxàc Jesús con Diox, cona, mblyà's mèna co' ñibe', no co' ndyoo ner, no co' ndyoo naa loo mèn nación Israel guth mèna Jesús.

*Jesús co' nac xgan' Diox ngue lu' le' Jesús ndxàp con' la's nii Jesús no la's ya' Jesús par ñibe'pe' Jesús loo mèn loo izlyo' ndxè'.*

<sup>19</sup> Le' sya, ndxab Jesús loo mèn:

—Lìcpe' ba'i, na nii loo gu': Le' daa, co' nac xgan' Diox, ne'gácte lin nec thib con' ante xal nee lezon. Ndxè'leque', daa co' nac xgan' Diox, ndlin con' co' ñèn ndli xuden Diox. Tac ryete con' co' ndli xuden Diox, daa co' nac xgan'pe' Diox ndlii, ne. <sup>20</sup> Tac Diox co' nac xuden nque' lezo' xgan'pe' Diox co' nac daa. No ndlu' Diox ryete con' co' ndli Diox loon, daa co' nac xgan' Diox. Rsin' Diox co' nac más con' roo con' xèn leque con' ndxè', Diox lu're'i loon, daa co' nac xgan'pe' Diox. No por cón che'n con' co' hui' gu' co' li xuden Diox yiloa, con'a li par ante hui' gu' no ante ñaa gu' loon yiloa, ne. <sup>21</sup> Tac texal ngo xban Diox xuden mèn co' nguthle', no nda' xuden Diox yalnaban loo mèn co' nguthle'a, lomisque', daa co' nac xgan' Diox ta yalnaban co' nac yalnaban thidtene loo mèn co' ndlyazen que no mèn yalnaban thidtene. <sup>22</sup> Xuden Diox indub rezte cón che'n nec thib mèn. Ndxè'leque', mda' xuden Diox ryete con' roo no ryete con' xèn co' nzo la's nii xuden Diox no co' nzo la's ya' xuden Diox loon, daa co' nac xgan' xuden Diox par tub rezen cón che'n ryete mèn loo izlyo', <sup>23</sup> par tataa mod gàca le' ryete mèn li con' guryath no con' guryèn loon, daa co' nac xgan' Diox, xalque' ndli mèn con' guryath no con' guryèn loo xuden Diox. Tac mèn co' indlide con' guryath no con' guryèn loon, mèn indlide con' guryath no con' guryèn loo Diox xuden co' mtel' daa loo izlyo' ndxè'.

<sup>24</sup> Lìcpe' ba'i, na ngue nii loo gu': Le' mèn co' ndyub nza no mèn co' ndxàa'd di's co' ngue bezen loo mèn no mèn co' ndxela's loo xuden Diox co' mtel' daa, mèn yò ban noque' Diox thidtene yiloa. Loo mèn ne'zib quide Diox xtol mèn no xquin mèn loo mèn. Ndxè'leque', ngòc mèn mèn co' ne'co' xà' de Diox loo Diox ngolo nguth mèn. No thib lite yò ban noque' mèn Diox thidtene yiloa. <sup>25</sup> Lìcpe' ba'i, na ngue nii loo gu': Nde zin' gaxle' huiz no nde zin' gaxle' tiemp no nalle'que' ndxàca co'se' mèn co' be' naban co' nac xal mèn nguth loo cón che'n Tad Diox, gòn mèn ron, daa co' nac xgan' Diox. No mèn co' ndxòn di's no co' ndxàa'd di's co' mbezen, yò ban noque' mèn Diox thidtene. <sup>26</sup> Tac yub xuden Diox ndxàp con' la's nii xuden Diox no la's ya' xuden Diox par li xuden Diox par yò ban no mèn xuden Diox thidtene. No lomisque', niin: Mda'le' xuden Diox ryethe con' roo no con' xèn co' nzo la's nii xuden Diox no co' nzo la's ya' xuden Diox loon par lin yò ban no mèn xuden Diox thidtene. <sup>27</sup> No mda'le' xuden Diox ryethe con' roo con' xèn co' nzo la's nii xuden Diox no co' nzo la's ya' xuden Diox loon par tub rezen cón che'n mèn loo izlyo' tac daa mbal yáal loo izlyo' ndxè' xalque' ndxáal chol mèn loo izlyo' ndxè'. <sup>28</sup> Ne' hui' de gu' no ne'ñaade gu' loo con' ndxè'. Tac zin thib huiz no zin thib ze co'se' ryete mèn nguth co' mbua'sle' gòn di's co' tyoodizen co'se' gac huiza, daa co' mbal yáal loo izlyo' ndxè' xalque' ndxáal chol mèn loo izlyo' ndxè'. <sup>29</sup> Lomisque' niin, ne: Huiza, ryo xban mèn nguth le'n bá' mèn nguth. Mèn co' mbli con' ndac, mèn ryo xban par yò ban no mèn Diox thidtene. Per ndxe'leque', mèn co' mbli con' ye'rsin', mèn ryo xban par zib quì Diox mèn par co' xà' Diox mèn loo Diox thidtene yiloa.

*Jesús ngue lu' loo mèn thib mod no tedib mod cón che'n con' roo con' xèn co' nzo la's nii Jesús no co' nzo la's ya' Jesús.*

<sup>30</sup> Toloque' ndxab Jesús loo mèn:

—Yende mod lin nec thib con' xal nee lezon no xal ndlyazen. Ndxè'leque', daa ndub rez cón che'n mèn xalque' ñibe' xuden Diox loon. No nalì no nambii nac mod co' ndub rezen cón che'n mèn. Indoode lezon lin co' neete lezon. Ndxè'leque', ndlin ante xal ndlyas' xuden Diox no xal nee lezo' xuden Diox co' mtel' daa par lina. <sup>31</sup> Tac chele' daa ngue ta cuent ante cón che'npe'en, le' sya, nzoque' mod gab mèn le' cuent co' ngue tan cuent cón che'npe'en, inacte con' lìcpe'. <sup>32</sup> Per daa ngue nii loo gu': Nzoque' thib xa' co' nda' cuent cón che'npe' daa. No daa nanee le' cuent co' nda' xa' cón che'npe'ena, le'i lìcpe' nac. <sup>33</sup> Gu' mtel' mèn co' ngua loo Juàn Bautist par ñibdi's mèn cón chenen loo Juàn. No cuent co' mda' Juàn loo gu' cón chenen ngòc lìcque'. <sup>34</sup> Per part cón

chenen, indxòode lezon no yende chó mport nzo lezon co'se' ndxònen nda' mèn cuent cón chenen. Ndxè'leque', niin di's ndxè' loo gu' par lyá' gu' loo con' ryes. <sup>35</sup> Juàn ngòc xal thib manoj ye'rbèel co' mbyol no co' mtenii loo mèn, co' nee di's, par mda' gu' cuent co' nac cón che'n Diox. Per part cón che'n gu', gu' mbli xal mèn co' ngòc lezo' no co' mdyac lezo' ndxep tiemp loo cón che'n di's co' mda' Juàn cuent loo gu', Juàn co' mbli par mdyub xnii yéc mèn no co' mbli par mdyub xnii lezo' mèn loo cón che'n Diox. <sup>36</sup> Per part cón chenen, nzoque' thib xa' co' más nali no más nambii nda' cuent cón chenen leque di's co' mdyoodi's Juàn cón chenen. Tac con' co' ndlin nac lomisque' con' co' gunee xuden Diox loon par lin. No con' co' ndlina, le'i ndlu' le' xuden Diox, licque', mtel' daa. <sup>37</sup> Xuden Diox co' mtel' daa, leque yub xuden Diox ndlu' no nda' xuden Diox cuent cón chenen. Per part cón che'n gu', axta nalle' tarte gòn gu' xal ndyoodi's xuden. Ne' ne' tar ñee gu' xal ñaa xuden Diox no xal nacpe' xuden Diox. <sup>38</sup> Ne' ne' tar yaa'd di's co' mbez xuden Diox loo gu' le'n lezo' gu' no le'n xtùuz gu' thidtene. Tac tarte yila's gu' loon, daa co' yub xuden Diox mtel' loo izlyo' ndxè'. <sup>39</sup> Gu' nteche ntexyath ye's co' nac che'n libr co' nac xti's Diox. Noo noo ndlab gu' libr. Tac gu' nden' no ndyac gu' le' loo libra ndlu' le' gu' nzi quee lezo' yòo ban no gu' Diox thidtene. Per mastale' ndlab gu' libr co' nac xti's Diox, ne' ne' inda' gu' cuent le' cón chenen nac co' nda' libr cuent no co' ndlu' libr loo gu'. <sup>40</sup> No ale indlya'ste gu' ta' gu' lugar par thidte queltàa no gu' daa no yòo gu' loo cón chenen par yòo ban no gu' Diox thidtene yiloo.

<sup>41</sup> Yende chó mport nzo lezon no ne' ne' indlin cas mèn co' asendli ndxàc daa mèn guryath no mèn guryèn loo mèn. <sup>42</sup> Más de cona, huen huen ndan cuent cón che'n gu'. No ndlibe'quen gu' le' gu' inque'de lezo' Diox. <sup>43</sup> Daa ndal por cón che'n xuden Diox. No indlide gu' cas daa. Per chele' tedib mèn yi'th por part cón che'n leque mèn, mèn se lique' gu' cas, ¿lé'? <sup>44</sup> ¿Xá mod gác gu' yila's gu' loon no loo Diox chele' gu' más ndli cas loo con' co' nac con' guryath no con' guryèn cón che'n xtàa gu' no indxòode lezo' gu' li gu' con' guryath no con' guryèn loo xa' co' nde no co' ngro' loo thidte Diox, sya? ¿Pà gác gu' li gu'! <sup>45</sup> Ne'tyóode gu' no ne'yila'ste gu' par gab gu' le'n lezo' gu' le' daa queyèe gu' loo xuden Diox yé' huize'. Xa' co' nqueyèe gu'a nac yub Moisés, mastale' nzi quee lezo' gu' gác con' ndac loo gu' por mdoo nque gu' loo ley co' nac di's co' mxo'f Moisés loo gu'. <sup>46</sup> Tac chele' gu', licque', ngala's loo di's co' mbez Moisés, ngala's gu' loon, ne. Tac ye's co' mque' Moisés co' mtan' Moisés di's loo gu', di'sa nda' cuent cón chenen no ndlu' di's cón chenen, ne. <sup>47</sup> Chele' gu' ne'ngala'ste loo di's co' mque' Moisés ye's co' mtan' Moisés loo gu', ¿xá mod yila's gu' loo di's co' ndyoodizen loo gu', sya? Yende mod yila's gu' di's, ¿lé'?

## 6

*Jesús mbli par nduhua ga'y mil mènbi'.*

*(Mt. 14.13-21; Mr. 6.30-44; Lc. 9.10-17)*

<sup>1</sup> Ngolo nguri'th ryete con'a, mxen Jesús ned. Nda Jesús tedib lad ro lagun co' nziri' loo xyòn mèn yèezya' che'n làaz mèn galile co' nac leque lagun co' ne' tedib lèe lagun che'n mèn ciuda Tiberias. <sup>2</sup> No anze'f thib mèn nda nque xís Jesús tac gunèe mènna yalguzye' co' mbli Jesús co'se' mteyac Jesús huax mèn yíiz. <sup>3</sup> Sya, mquée Jesús loo thib yii. Ngua tub Jesús tya con myen' xin' mté'th Jesús. <sup>4</sup> Nde nxon', leque le'n huiza nde zin' gaxlé' huiz lni che'n pasc co' ndli mèn nación Israel. <sup>5</sup> Co'se' gunèe Jesús nde nque huax mènley' xís Jesús, Jesús ndxab loo Lip:

—¿Pá ya ti' gu' pan par hua rye mèn ba', Lip?

<sup>6</sup> Per Jesús asembli tataa ndxab Jesús loo Lip par ñee Jesús ñeene' cón càb Lip loo Jesús. Tac yub Jesús naneeque' xá mod li Jesús par hua rye mèn. <sup>7</sup> Sya, mcàb Lip loo Jesús. Ndxab Lip:

—Tad, chele' na' ti' thib mil chop ayo pes pan par hua rye mèn ba', pà gàala par hua rye mèn ba' sa sai.

<sup>8</sup> Le' sya, ndxab thib myen' xin' mté'th Jesús co' lèe Ndech, co' ndxàc hues Mon Pedr, loo Jesús:

<sup>9</sup> —Tad, làth na' ndxè' nzo thib mbyòo co' ngue no ga'y pan nagus no chop mbèel bix. Per pà gàal pana no mbèela par hua ryethe mèn ba' thib le'i thib le'i.

<sup>10</sup> Sya, ndxab Jesús loo myen' xin' mté'th Jesús:

—Guuz gu' loo rye mèn ba' tyub mèn loo yixii co' nzo'f ba'.

Tataa ndxab Jesús tac anze'f thib yixii mxyo'f tya. Sya, mdub mènà. Mèn co' nduhua, casque' ngòc ga'y mil mèn, ante mènbi'. Xà' mèngot. No xà' myen' bix. Indxòode cuent mèngot no myen' bix co' nduhua, ne. <sup>11</sup> Sya, mxen Jesús ga'y pana. No ndxab Jesús:

—Diox quix U', Diox, loo Diox. Ngolo ndxab Jesús: Diox quix U', Diox, loo Diox, mbli Jesús par mbyar' pana. Ngoloa, mda' Jesús pana loo myen' xin' mté'th Jesús. Le' myen' na, mbli'th pana loo mèn co' nzi nduba. Lomisque' mbli Jesús con mbèela. No nduhua mènà pana no mbèela axta plóthe mbly'a's mènà.

<sup>12</sup> Co'se' ngolo nduhua mènà axta plóthe mbly'a's mènà pan no mbèel co' mteyar' Jesús, Jesús ndxab loo myen' xin' mté'th Jesús:

—Fthop gu' rye le' pan co' mbyan' xo'f ba' par ne'yiza'de nec thib le'i.

<sup>13</sup> Sya, mthop myen' si' fchop cardor le' pan co' mbyan' xo'f loo ga'y pan co' nduhua mènà.

<sup>14</sup> Per co'se' gunèe mènà yalguzye' co' mbli Jesús, syare', ndxab mènà loo xtàa mènà:

—Lìcpe' ba'i, mbi' ba' nac mbi' co' nde'th di's co' ndxab Diox co' ndxath yi'th loo izlyo', cara.

<sup>15</sup> Per com le' Jesús nonque' no nda'que' Jesús cuent le' mènà mbli nèele' lezo' mbi'th mènà par hue' yèe mènà Jesús par sanggàc Jesús reype' mènà, sya, ngro' thidte Jesús thib lad loo mènà. Mbere Jesús, nda Jesús loo yiia tedib vez.

*Trè' ndlu' le' Jesús mdee nii loo nít loo lagun.*

*(Mt. 14.22-27; Mr. 6.45-52)*

<sup>16</sup> Co'se' mzyèle' izlyo' huiza, mxen myen' xin' mté'th Jesús ned. Ngulàa tùub myen'. Nda myen' anzo anzo ro lagun. <sup>17</sup> Sya, ngòo myen' loo thib yòoyaa par tlo tetee myen' yòoyaa loo lagun par zin myen' tedib lad ro lagun co'te' nziri' yèez Capernaum. Hora, nde làale' yál' izlyo'. Le' Jesús na, yende pá ñaa bere par thidte ya no Jesús myen'. <sup>18</sup> Per le'pe' tlo tetee myen' yòoyaa loo lagun, mtlo ngro' thib mbiidó'. No mxít too mbii nít loo lagun. <sup>19</sup> Co'se' nde tee' ndyee myen' loo lagun thib distans co' ne' ga'y mil metr, gunèe myen' nde tee nii Jesús loo nít loo lagun. Per ne'ñeede myen' ché' Jesús na. Co'se' gunèe myen' nde zin gax Jesús loo myen', ale mzyeb myen'. <sup>20</sup> Jesús ndxab loo myen':

—Ne'zyebte gu', ey. Daa na.

<sup>21</sup> Le' sya, mdyac lezo' myen' ngo no myen' Jesús loo yòoyaa. No ale setilte mzin myen' con Jesús yèez Capernaum co'te' nda myen'.

*Rye mèn par neda nda cua'n Jesús.*

<sup>22</sup> Per tedib huiz co' nde nquea, rye mèn co' be' mbyan' tedib lad ro leque laguna, mènà gunèe le' myen' xin' mté'th Jesús ngòo loo thidte yòoyaa co' ndub tya. No yende pá gunèe mènà ngòo no Jesús myen' loo yòoyaa. <sup>23</sup> Per láth nzi li mènà xtùuz no mbez mènà loo xtàa mènà: ¿Pá ned nda Jesús, yey?, sya, mzin ndxep yòoyaa co' ndye'th par ned yèez Tiber, yèez co' nziri' gaxte co'te' nduhua mèn pan co'se' ngolo ndxab Tad Jesús: Diox quix U', Diox, loo Diox. <sup>24</sup> Co'se' gunèe mènà yende pá ndye'th Jesús làtha, ne' myen' xin' mté'th Jesús, ngòo mènà loo leque yòoyaa co' mzin tya par nda cua'n mènà Jesús par ned le'n yèez Capernaum.

*Trè' ndlu' le' Jesús mbez li Jesús par yòo ban no mèn Diox thidtene yiloo xal co'se' ndxuhua mèn lua' mèn par nzi ban mèn.*

<sup>25</sup> Co'se' mzin mènà co'te' nzo Jesús tedib lad ro lagun, ndxab mènà loo Jesús:

—Maistr, ¿pól mzin U' par nedrè', yey?

<sup>26</sup> Mcàb Jesús loo mènà. Ndxab Jesús:

—Lìcpe' ba'i, na ngue nii loo gu': Le' gu' mcua'n daa por nduhua gu' pan axta plóthe mbly'a's gu'. Per incua'nte gu' daa por ndxòn gu', no por mden' gu', no por mda' gu' cuent cón che'n yalguzye' co' gunèe gu' mblin. <sup>27</sup> Ne'gath lyuxte gu' por xít gu' no lua' gu' co' nde che loo gu' thib thib huiz. Ndxè'leque', guth blux gu' loo xít gu' no lua' gu' co' ne'lyuxte no co' ne'ryede loo gu', co' nee di's, con' co' ndlin par yòo ban no gu' Diox thidtene. Tac daa co' mbal yáal loo izlyo' ndxè' xalque' ndxáal chol mèn loo izlyo' ndxè', daa ndli par yòo ban no mèn Diox thidtene xal nac xít mèn no lua' mèn co' ngàal mèn co'se' ndxuhua mèn xít mèn no lua' mèn. Tac Diox co' nac xuden mbly' loon no mnibe' Diox loon par lin ryethe con' co' ngue lin loo izlyo' ndxè' no par xo'f zin'en ryethe con' co' mnibe' xuden Diox loon par lina.

<sup>28</sup> Sya, ndxab mèn loo Jesús:

—¿Cón li nu' par tolo li nu' ryethe con' co' ñibe' Diox no co' nee lezo' Diox, sya?

<sup>29</sup> Jesús mcàb loo mèn. Ndxab Jesús:

—Con' co' ndly'a's Diox li gu' nac ante yila's gu' no gáp gu' yalxla's loo xa' co' mtel' Diox loo gu', co' nac yub daa.

<sup>30</sup> Le' sya, ndxab mèn loo Jesús:

—Neeca. Ndxònque' nu' di's co' mbezl ba'. Per nu' ndly'a's ñèe chó yalguzye' lil loo nu' par ñèe nu' lil yalguzye' no yila's nu' lool. ¿Chó con' lil loo nu' co' gác xal thib señ par ñèe nu'i, à'? <sup>31</sup> Xudgool nu' co' ngo ban póla nduhua thib loo pan co' ngro' lèe maná co'te' nagán, xalque' nac di's co' ndub loo libr co' nac xti's Diox co' mbez le' Diox mblàa thib loo pan loo bé' par nduhua mèn tiempa. ¿Chó señ lil par ñèe nu' lila, à'?

<sup>32</sup> Mcàb Jesús loo mèn. Ndxab Jesús:

—Lìcpe' ba'i, na ngue nii loo gu': Ne'ngàcte Moisés xa' co' mda' pan che'n bé' par nduhua mèn co' ngòc xudgool gu'. Ndxè'leque', xuden Diox nac xa' co' nda' pan co' nac lìcpe' pan che'n bé' par hua gu' nalle', co' nee di's, nac yub daa. <sup>33</sup> Tac pan co' nda' Diox par hua mèn nalle', pana nac xa' co' ngulàale' loo bé', co' nee di's, nac daa. No daa li le' mèn co' tyal yòo loo cón chenen, mèn yòo ban noque' Diox thidtene.

<sup>34</sup> Sya, ndxab mèn loo Jesús:

—Tad, fta' U' pana par hua nu', tá.

<sup>35</sup> Jesús ndxab loo mèn:

—Daa nac xa' co' ndli par yòo ban no mèn Diox thidtene xal ndli xít mèn no lua' mèn par ban mèn loo izlyo'. Mèn co' tyal yòo loo cón chenen no yila's mèn loon, mèn gác xal mèn co' ne'gath huinte no co' ne'lyan'te thidtene. No mèn co' tyal yòo loo cón chenen no co' yila's loon, mèn gác xal mèn co' ne'yecte lezo' thidtene. <sup>36</sup> Per daa guniile' loo gu': Mastale' gunèele' gu' daa, indxela'ste gu' loon no indxela'ste gu' loo con' ndlin. <sup>37</sup> Per ryete mèn co' ndli Diox xuden tyal par yòo mèn loo cón chenen par yila's mèn loon, ne'tèbten mèn no ne'co' tooden mèn par biiche mèn thib lad loon thidtene. <sup>38</sup> Tac daa ne'ngro'de loo bé' par ngal lin con' co' neete lezon. Ndxè'leque', ngro'en loo bé' par ndlin con' co' nee lezo' xuden Diox co' mtel' daa. <sup>39</sup> No con' co' nee lezo' xuden Diox co' mtel' daa par lina nac le' ryete mèn co' mbli Diox mdyal par ngòo mèn loo cón chenen, nec thib mèn ne'ryo' xà'de loo Diox thidtene yiloa. Ndxè'leque', go xbanen mèn le'n huiz co' gác lult tiemp loo izlyo' ndxè'. <sup>40</sup> Tac con' ndxè' nac co' nee lezo' xuden Diox co' mtel' daa le' ryete mèn co' huen huen tyóo loo cón chenen no yila's mèn loon, daa co' nac xgan' Diox, mèn yòo ban noque' Diox thidtene. No na go xban mèn le'n huiz co' gác lult tiemp loo izlyo' ndxè'.

<sup>41</sup> Co'se' mbìn mèn co' ñibe', no co' ndyoo ner, no co' ndyoo naa loo mèn nación Israel tataa ndxab Jesús, sya, xexte gunii mèn cón che'n Jesús tac ndxab Jesús loo mèn: Daa nac pan co' ngulàale' loo bé'. <sup>42</sup> Tolo mdoodi's mèn. Ndxab mèn:

—¿Ché' inacte Jesús ba' xgan' Chè, cà'? Na' ndlibe'que' xud Jesús no xna' Jesús. ¿Xá mod ale mbez Jesús le' Jesús ngro'le' loo bé' no nde Jesús loo izlyo' ndxè', sya?

<sup>43</sup> Sya, mcàb Jesús loo mèn. Ndxab Jesús:



—Cabii ftoodi's gu'. Ne'tyoodi'ste gu' xexte cón chenen. <sup>44</sup> Yende chó mèn gác yòo loo cón chenen chele' xuden Diox co' mtel' daa ne'líde par yòo mèn loo cón chenen. No daa go xban mènà le'n huiz co' gác lult tiemp loo izlyo' ndxè'. <sup>45</sup> Loo libr co' mque' mèn co' mde'th di's co' ndxab Diox ye's co' nac xti's Diox mbez taandxè':

Diox lu' loo ryete mèn.

Por cona, ryete mèn co' gòn no co' té'th cón che'n xuden Diox, mènà yòo loo cón chenen.

<sup>46</sup> Tarte yo nec thib mèn loo izlyo' co' gunèele' xá ñaa xuden Diox. Angoluxte daa co' ngro' loo Diox, daa gunèele' xá ñaa xuden Diox. <sup>47</sup> Lìcpe' ba'i, na ngue nii loo gu': Mèn co' ndxela's loon no ndxela's mèn loo cón chenen, mènà yòo ban noque' xuden Diox thidtene. <sup>48</sup> Daa nac xa' co' ndli par yòo ban noque' mèn Diox thidtene xal ndli xít mèn no lua' mèn co' ndxuhua mèn par tolo cue ban mèn loo izlyo' ndxè'.

<sup>49</sup> Jesús tolo ndxab loo mènà:

—Nde niin thib con' loo gu', ne, ey: Mèn co' ngòc xudgool gu' nduhua thib loo pan co' ngro' lèe maná co'te' nagán. Per mastale' nduhua mènà pana, nguthque' mènà. <sup>50</sup> Per daa ngue ta cuent loo gu' co' nac cón chenen, daa co' nac xal nac pan co' ngulàa loo bé' par gàca le' mèn co' yòo loo cón chenen, xal co'se' ndxuhua mèn pan, mènà ne'co' xà'de Diox loo Diox thidtene co'se' ngolo nguth mèn. <sup>51</sup> Yub daa nac xa' co' ngro' loo bé' co' ndli par yòo ban no mèn Diox thidtene xal pan co' ndxuhua mèn co' ndli par ban mèn loo izlyo' ndxè'. Chele' chol mèn hua pana, co' nee di's, yòo mèn loo cón chenen, mènà ban noque' Diox thidtene. No pan co' angtan par hua mènà, pana nac bél'yòo ladpe'en co' leque daa li gath par gàca le' chol mèn izlyo' co' tyal yòo loo cón chenen, mènà ban noque' Diox thidtene.

<sup>52</sup> Sya, mèngool co' ñibe', no co' ndyoo ner, no co' ndyoo naa loo mèn nación Israel noo noo ndyoodi's cón che'n Jesús làth xtàa mèn. Mbez mènà loo xtàa mèn:

—¿Xá mod li mbi' ba' par ta' mbi' bél' lad mbi' par hua mèn, cara?

<sup>53</sup> Jesús tolo mtetac di's loo mènà. Ndxab Jesús:

—Lìcpe' ba'i, na nde nii tedib con' loo gu', ne: Chele' gu' ne'huade bél'yòo laden no ne'gude gu' ren laden, daa co' mbal yáal loo izlyo' ndxè' xalque' ndxáal chol mèn loo izlyo' ndxè', ne'yòo ban node gu' Diox thidtene yiloo. <sup>54</sup> Mèn co' hua bél'yòo laden no gu' mèn ren laden, mènà yòo ban noque' Diox thidtene. No daa go xban mènà co'se' gác huiz co' gác lult tiemp loo izlyo' ndxè'. <sup>55</sup> Tac, lìcpe' ba'i, por cón che'n bél'yòo laden no por cón che'n ren laden li yòo ban no mèn Diox thidtene xal ndxàca loo mèn co'se' ndxuhua mèn xít mèn no lua' mèn par ban mèn loo izlyo' ndxè'. <sup>56</sup> Chol mèn co' yòo loo cón chenen, co' nee di's, nac cón che'n bél'yòo laden no cón che'npe' ren laden, mènà thidte ndxàc con daa thidtene. No go noquen mènà thidtene. <sup>57</sup> Tac xuden Diox co' mtel' daa naban thidtene no ndli xuden Diox naban taamas con' co' naban. No naban daa por cón che'n xuden Diox. Lomisque' mod ne, mèn co' tyal yaa'd di's no ten' mèn di's co' ndyoodizen loo mèn, gàca loo mènà xal co'se' nguè' xít mèn no lua' mèn mèn, co' nee di's, nac daa, mènà yòo ban noque' Diox thidtene por cón chenen. <sup>58</sup> Cóon che'n pan co' ngulàale' loo bé' co' ngue niin loo gu' ndxè', nac daa. Cóon che'n pan ndxè' inacta xal maná co' nduhua xudgool gu' póla. Per mastale' nduhua xudgool gu' manaa, nguthque' xudgool gu'. Per mèn co' tyal hua pan co' ngue tan cuent loo gu' ndxè' co' nac cón che'n daa, mènà yòo ban noque' Diox thidtene.

<sup>59</sup> Jesús ndxab di's ndxè' loo mèn co'se' mblu' Jesús mèn le'n sinagog co' ndub le'n yèez Capernaum.

*Jesús ngue ta' cuent no ngue lu' Jesús mèn xá mod yòo ban no mèn Diox thidtene.*

<sup>60</sup> Co'se' mbìn mèn di's co' ngue lu' Jesús loo mèn, huax mèn co' mdoo nque xís Jesús ndxab loo xtàa mèn:

—Anze'f nagán naca par ta' na' cuent cón nee di's no par yaa'd di's le'n lezo' na' par li na' xal mbez mbi'. ¿Chó mèn gác gòn di's co' mbez mbi', cara? Yende chó mèn gác, ¿lé'?

<sup>61</sup> Sya, mden' lezo' Jesús le' mènà xexte nzi toodi's cón che'n di's co' mblu' Jesús loo mèn. Ndxab Jesús loo mènà:

—¿Ché' nazab ngulàa di's co' ngue niin loo gu' ndxè' le'n lezo' gu', cà'? ¿Ché' nden' gu' ngue niin ngòc nguàal di's loo gu', ne, cà'? Yende xàa. <sup>62</sup> Chele' gu' tataa ngue li xtùuz no nden' gu' le'n lezo' gu' nè nac di's ndxè', ¿cón li gu' no cón gab gu' loo lezo' gu' co'se' ñèe gu' gápen loo bé' tedib vez co'te' ngon ndoore' galen loo izlyo' ndxè', daa co' mbal yáal loo izlyo' ndxè' xalque' ndxáal chol mèn loo izlyo' ndxè', sya? <sup>63</sup> Mèn yòo ban no Diox thidtene por cón che'n con' co' ndli Xpii Natú' che'n Diox loo xpíi mèn. Yende cón ntac bé'l'yòo ladpe' mèn loo cón che'n Diox par yòo ban no mèn Diox thidtene. Cona, di's co' ngue niin loo gu' ndxè', di'sa ndlu' loo gu' xá mod li gu' par yòo ban no gu' Diox thidtene. Chele' gu' li xal ngue niin loo gu' ndxè', gu' yòo ban noque' Diox thidtene. <sup>64</sup> Per daa nanee no ndan cuent co' huenleque' tatabe' nzo ndxep gu' co' indxela'ste di's co' mbezen loo gu'.

Tataa ndxab Jesús loo mènna tac anon mtlo Jesús, mque tee lu' Jesús mèn, Jesús naneel' chó mèn nac mèn co' ne'yila'ste loo Jesús no loo cón che'n Jesús. No naneel' Jesús chó mèn nac mèn co' ta'xù' Jesús loo mèn co' guth Jesús.

<sup>65</sup> Sya, ndxab Jesús loo mènna:

—Por cona, guniilen loo gu' nec thib mèn ne'gácte yòo loo cón chenen chele' xuden Diox ne'líde par yòo mènna loo cón chenen.

<sup>66</sup> Desde huiza par delant, huax mèn co' mdoo nque xís Jesús mblá' Jesús. Ya ne'tolode nque tee no mènna Jesús. <sup>67</sup> Sya, mnibdi's Jesús loo rye si' fchop myen' xin' mté'th Jesús:

—¿Ché' no gu' ndlya's lá' gu' daa no ya ne'tolode que tee no gu' daa, cà'?

<sup>68</sup> Per Mon Pedr ndoole' mcàb loo Jesús. Ndxab Mon Pedr:

—Tad, chele' nu' lá' U', ¿chó loo ya nu'? Thidte U' ndlu' di's co' nac lìcque' no co' nac di's co' ndlu' xá mod li mèn par yòo ban no mèn Diox thidtene. <sup>69</sup> Nu' ndxela'sque' no nonque' nu' le' U' nac Crist co' nac xgan'pe' Diox, Diox co' naban thidtene.

<sup>70</sup> Mcàb Jesús loo Pedr. Ndxab Jesús:

—Aa. Huenque' nac co' ngue neel ba', Pedr. Yende cón niin lool. Per hui' nexa. Yub daa mcai si' fchop gu'. No thib gu' co' nzo làth gu' nac xal Mebizya.

<sup>71</sup> Jesús ngue ta' cuent loo myen' cón che'n Jud Iscariot, xgan' thib mbi' co' ngro' lèe Mon. Tac Jud mdoo lezo' ta'xù' Jud Jesús loo mèn mastale' ngòc Jud thib myen' xin' mté'th Jesús co' ndxòo cuent nac si' fchop myen'.

## 7

### *Myen' co' ngòc huespe' Jesús ne'ngala'ste loo Jesús.*

<sup>1</sup> Ngolo mdoodi's Jesús ryete di's co' mdoodi's Jesús, Jesús ngua que tee par ned le'n yèezya' che'n làaz mèn galile tac ya indlya'ste Jesús ya que tee Jesús par ned le'n yèezya' che'n làaz mèn jude. Non Jesús le' mèn co' nac mèn gulàaz che'n làaz mèn jude mblya's nguthxù' Jesús. <sup>2</sup> Le'pe' le'n huiza nde zin gax lni co' ngòc thib lni co' ndli mèn nación Israel. Lnia ngro' lèe lni che'n ramad. <sup>3</sup> Sya, ndxab myen' huespe' Jesús loo Jesús:

—Gro' trè'. Más huen huàa par ned le'n rye yèezya' che'n làaz mèn jude par hui' mèn co' nqueltàa con lùu tya loo con' co' ndlil. <sup>4</sup> Tac nec thib mèn co' ndli thib con', ne'líde mèn con'a xexte. Tac co'se' ndlya's mèn libe' taamas mèn mènna, ndxàal li mèn con' co' ndli mènna loo xnaa. Ya que ndlil chol yalguzye' co' nac yalguzye' roo yalguzye' xèn, huàa li yalguzye' co' ndlil loo xnaa par neda, ne, par ñèe mènna ñeene' ché' tala's mèn tya loo con' ndlil.

<sup>5</sup> Tataa ndxab myen' huespe' Jesús loo Jesús tac axta ne' myen'a indxela'ste loo Jesús no loo con' ndli Jesús. <sup>6</sup> Sya, ndxab Jesús loo myen' huespe' Jesús:

—Tarte zin huiz no tarte zin tiemp co'se' lu'pe'en daa chó nac daa loo mèn. Per part cón che'n gu', aa guneei coyora huenque' naca par gu' co'se' lu' gu' mod co' ndxàp gu' loo mèn. <sup>7</sup> Part cón che'n gu', yende mod yòo xyàn lezo' mèn izlyo' ñèe mèn izlyo' gu'. Per ndxe'leque', part cón chenen, mèn izlyo' ndxòoque' xyàn lezo' ñèe mèn izlyo' daa tac daa nda cuent loo mèn izlyo' le' ryete con' ndli mènna nac con' ye'rsin'. <sup>8</sup> Huàa gu' lni.

Per daa ne'gade lni nalle' tac tarte tyaa huiz no tiemp co'se' lu'pe'en daa loo mèn chó nac daa.

<sup>9</sup> Ngolo tataa ndxab Jesús di'sa loo myen' huespe' Jesús, mbyan' Jesús le'n yèezya' che'n làaz mèn galile.

*Jesús ngua lni co' ngòc lni che'n ramad, ne.*

<sup>10</sup> Per co'se' ndale' myen' huespe' Jesús lnia, mxen Jesús ned. Nda Jesús lnia, ne. Per ne'nglu' loode Jesús loo mèn loo xnaa. Ndxle'leque', xexte mque tee Jesús làth mèn huiz lnia. <sup>11</sup> Le' mèngool co' ñibe', no co' ndyoo ner, no co' ndyoo naa loo mèn nación Israel na, mènna mque tee cua'n Jesús làth mèn huiz lnia. No mbez mènna loo xtàa mènna:

—¿Pá ned ngue tee mbi'a, yey? ¿Chonon ñèede na' mbi'?

<sup>12</sup> No làth rye mèn co' ngua lnia, anze'f thib mèn mdoodi's cón che'n Jesús. Ndxep mèn mbez:

—Mbi'a nac mbi' ndac.

Per taandxep mèn mbez:

—Pà gac mbi'a mbi' ndac. Ndxle'leque', nquedi mbi'a mèn.

<sup>13</sup> Per yende chó mèn ngli ryes ndoodi's cón che'n Jesús loo xnaaleque' tac nzyeb mènna ñèe mènna mèngool co' ñibe', no co' ndyoo ner, no co' ndyoo naa loo mèn nación Israel.

<sup>14</sup> Co'se' ngrolthe ndxàc lnia, syare' ngòc Jesús le'n templ. Mtlo Jesús, mblu' Jesús mèn le'n templ. <sup>15</sup> Sya, rye mèngool co' ñibe', no co' ndyoo ner, no co' ndyoo naa loo mèn nación Israel ante mbui' no ante gunaa cón che'n di's co' mblu' Jesús loo mèn le'n templ. No mbez mènna loo xtàa mèn:

—¿Xá mod ndxác mbi' ba' huax con' co' ndlu' mbi' ba' loo mèn? Non na' le' mbi' ba' thidtene ne'nglide stud. ¿Cón tub yác mbi' ba'?

<sup>16</sup> Jesús mcàb loo mènna. Ndxab Jesús:

—Cón che'n con' co' ngue lu'en loo gu' ndxè', inacte con' ndxè' cón chenen. Ndxle'leque', nac con' ngue lu'en loo gu' ndxè' cón che'n xa' co' mtel' daa loo izlyo' ndxè'.

<sup>17</sup> Chele' chó mèn ndlya's li xal ndlya's Diox no xal nee lezo' Diox, leque mèn ta' cuent no ten' mèn le'n lezo' mèn ché' nac di's co' ngue lu'en ndxè' cón che'n Diox o ché' naca di's co' ndyoodizen co' alithe ndlin xtùuz xalque' ndye'th xtùuz yéquen. <sup>18</sup> Le' mèn co' ndyoodi's xal ndye'th xtùuz yéc mèn, mènna tataa ndli par leque xtàa mèn li con' guryath no con' guryèn loo mènna. Per mbi' co' más ndxòo yéc gac con' guryath no con' guryèn loo Diox co' mtel' mbi', mbi'a ndlu' di's co' nac licpe' no yende chó yalgutyè' gac mbi' li mbi'.

<sup>19</sup> ¿Ché' ilìcte naca le' Moisés mtan' di's co' nac ley loo gu', cà'? Mastale' mtan' Moisés di's co' nac ley loo gu', per nec thib gu' indyubdi'ste xal mbez di's co' nac ley. Chele' di's co' ngue bezen loo gu' ndxè' ilìcte nac, ¿chonon ncua'n gu' mod guthxù' gu' daa, sya?

<sup>20</sup> Sya, mcàb mènna loo Jesús. Ndxab mènna:

—Aa. Nquée mbii yécl, ndee. ¿Chó mèn ncua'n mod guthxù' mèn lùu, à'?

<sup>21</sup> Jesús ndxab loo mènna:

—Por mblin thib con' huiz sabd co' nac huiz descans, con'a ndli ante ngüi' gu' no ante ñaa gu' loon, ¿lé'? <sup>22</sup> Licpe' ba'i, Moisés mda' yalnibe' che'n circuncisión loo gu' mastale' ne'ngacte yub Moisés co' mtlo mbli circuncidar mèn. Ndxle'leque', xudgool Moisés nerleque' ngòc mèn co' mbli circuncidar mèn. Por cona, gu', ne, ndli circuncidar myen'bi' bix. No yende chó mport nzo lezo' gu' mastale' huiz sabd co' nac huiz descans ndli gu'i. <sup>23</sup> Cona, ngue niin loo gu': Chele' xtàa gu' ndxàc circuncidar huiz sabd co' nac huiz descans par tyubdi's gu' loo ley co' mxo'f Moisés loo gu', ¿chonon ndxecloo gu' ñèe gu' daa tac mteyaquen thib mbi' huiz sabd co' nac huiz descans, sya? <sup>24</sup> Ne'tub rezte gu' cón chenen por cón che'n mbi' co' gunèe gu' mteyaquen huiz sabd co' nac huiz descans xal ndub rez gu' cón che'n thib mèn co' ndli con' ye'rsin' huiz sabd. Más huen, nali no nambii li gu' xtùuz no bla's gu' loo ley co' mxo'f Moisés loo mèn par ñee gu' ñeene' ché' lé' nac co' mblin loo mbi' co' mteyaquen par ta' gu' cuent co' huenleque', huenque' mblin loo mbi'.

*Jesús ngue ta' cuent pá ned ngro' tee ngro' yáal Jesús.*

<sup>25</sup> Látha ngo ndxep mèn co'te' ngo Jesús, mèn co' ngo ban le'n ciuda Jerusalén. Mtlo mènna, mnibdi's mènna loo xtàa mèn:

—¿Ché' inacte mbi' ba' mbi' co' ngue tee cua'n mèn par guth mèn mbi', cà'? <sup>26</sup> Hui' gu' nexa. Mbi' ba' alanleque' ndyoodi's loo xnaa. No yende chó mbezte mèn loo mbi'. Ne'stolque', licque', no mèn co' ñibe' loo na', no co' ndyoo ner, no co' ndyoo naa loo na' ndxela's, ne, le' mbi' ba' nac Crist. <sup>27</sup> Per na' nonque' no nanee na' pá mèn mbi' ba'. Per ndxe'leque', co'se' yi'th Crist, yende chó mèn ñee pá ned ryo' tee ryo' yáal Crist, ndyac na', ¿lé'?

<sup>28</sup> Per co'se' mbìn Jesús tataa nzi nii mènna làth ngue lu' Jesús mèn le'n templ, cabii ndxab Jesús loo mènna:

—Aa. Licque', ndlibe' gu' daa. No ndyac gu' naneeque' gu' pá mèn daa. Daa ne'ngalte xal nee lezon. Ndxé'leque', daa ndal loo izlyo' ndxè' xalque' mtel' thib xa' daa, xa' co' naban thidtene co' nac yub Diox. Per ¿pà libe' gu' xa'a! <sup>29</sup> Per daa ndlibe'pe' xa' co' mtel' daa tac loo xa' ngro'en. No mtel' xa' daa.

<sup>30</sup> Sya, mbly'a's mènna nghue' mènna Jesús xal ndxe' mèn thib pres par guth mèn Jesús. Per nec thib mènna ne'nglide ryes nden mènna Jesús tac tarte zin tiemp co'se' ta' Diox lugar tetii mèn Jesús. <sup>31</sup> Per mastale' tataa mbly'a's mèn li no mèn Jesús, huax mèn ngola's loo Jesús. Mènna ndxab loo xtàa mèn:

—¿Xá nee gu'? Co'se' yi'th Crist, ¿ché' tli Crist más yalguzye' leque co' ndli mbi' ba', cà'?

*Mèn xley' farise mtel' myen' nac zin' che'n yoolau par tyenxù' myen' Jesús xal ndyen mèn thib xa' ye'rsin'.*

<sup>32</sup> Mèn xley' farise mbìn xal nac di's co' nzi toodi's mèn xexte cón che'n Jesús. Sya, mqueltàa mènna con mèn co' nac jef che'n nguley' co' más ñibe' loo nguley' tiempa par mtel' mènna myen' nac zin' par ya myen' nac zin' le'n templ par ya tenxù' myen' Jesús par hue' myen' Jesús loo mènna. <sup>33</sup> Sya, ndxab Jesús loo myen' nac zin' co' nde tenxù' Jesús:

—Be' go non gu' taapláte huiz. No yiloa beren, biin loo xa' co' mtel' daa. <sup>34</sup> Gu' cua'n daa yiloa. Per ya ne'zyál'te gu' daa tac gu' ne'gácte yòo co'te' gòon.

<sup>35</sup> Le' sya, mèn co' ñibe', no co' ndyoo ner, no co' ndyoo naa loo mèn nación Israel, mènna mnibdi's loo xtàa mènna:

—¿Pá ned ya mbi' ba'? ¿Chonon mbez mbi' ne'gácte na' zyál' na' mbi'? ¿Ché' ta mbi' loo mèn nación Israel co' nzi tee re's làth mèn nación Grieg par ya lu' mbi' mèn nación Israela tya no sanglu' mbi' mèn nación Grieg, ne, cà'? Pà yila's na'i. <sup>36</sup> Lomisque' ne, ¿cón nee di's co' ngolo gunee mbi' loo na' ba' co' nee mbi': Gu' cua'n daa. Per ne'zyál'te gu' daa tac gu' ne'gácte yòo co'te' gòon?

*Jesús ngue ta' cuent le' Xpii Natú' li loo mèn le' mèn li con' ndac loo xtàa mèn xal co'se' ndli nít co' nzo'f thib yó'be' con' ndac loo mèn.*

<sup>37</sup> Per huiz co' ngòc huiz merpe' huiz lni, huiza Jesús ngo too loo mèn. No mtetac Jesús thib di's loo mèn. Cabii ndxab Jesús:

—Chele' chol gu' ndryo' ndlyen' lezo' yòo gu' loo cón chenen xal mèn co' ndxec lezo' par gu' mèn nít, yi'th gu' loon no daa li yo nagàl lezo' gu' loo cón che'n Diox xal mèn co' mbyec tìn' lezo' no ngu' mèn nít par nagàl yo lezo' mèn. <sup>38</sup> Mèn co' ndxela's loon xalque' mbez di's co' ndub loo libr co' nac xti's Diox, loo mènna li Xpii Natú' le' mènna li huax con' ndac loo xtàa mènna xal ndxàc con' ndac loo mèn co'se' ndli zin' mèn nít co' nzo'f thib yó'be' par gàca le' xtàa mènna yòo ban noque' Diox thidtene, ne.

<sup>39</sup> Tataa ndxab Jesús loo mènna par mda' Jesús cuent cón che'n Xpii Natú' co' yòo loo mèn co' yila's loo Jesús. Le'n huiza tarte lyàa Xpii Natú' loo mèn tac Jesús tarte yáp loo bé' par gàc con' roo no con' xèn loo Jesús loo bé'.

*Ngòc chop ned mèn ante por cón che'n Jesús.*

<sup>40</sup> Le' sya, ndxep mèn co' ngo làth mèn co' ngure yòn di'sa ndxab:

—Lìcpe' ba'i, mbi' ba' nac thìb mbi' co' nde'th di's co' ndxab Diox co' ndxath yi'th.

<sup>41</sup> Taandxep mèn mbez:

—Mbi' ba' nac Crist.

Per taandxep mèn mbez:

—¿Xá mod ndlya's gu' le' Crist nac mèn che'n thìb yèezya' che'n làaz mèn galile, yey?

<sup>42</sup> Loo libr co' nac xti's Diox mbez le' Crist gác bin che'n David co' ngòc rey póla. No gác Crist xa' yèezpe' Belén co' nac leque yèez co' ngòc liz no làaz David.

<sup>43</sup> No ale por conate ngòc chop ned mèn. <sup>44</sup> Látha, ngo ndxep mèn co' mblya's ndenxù' Jesús. Per yende chó mèn co' nzo tya ngli ryes nden Jesús.

*Mèn co' ñibe', no co' ndyoo ner, no co' ndyoo naa loo mèn nación Israel ne'ndalte ngala's loo Jesús.*

<sup>45</sup> Co'se' mbere myen' nac zin' co' nquenap templ, ndye'th myen' ngua myen' loo Jesús, loo mèn xley' farise, no loo jef che'n nguley' co' más ñibe' loo nguley' tiempa, ndxab mèn xley' farise no mèn co' ngòc jef che'n nguley' co' más ñibe' loo nguley' loo myen':

—¿Chonon ne'ngye'th node gu' mbi'a, à'?

<sup>46</sup> Myen' nac zin' mcàb loo mèn. Ndxab myen':

—Nu' ndyac thidteneque' yende chó mèn nzo co' ndyoodi's xal ndyoodi's mbi'a, cara.

<sup>47</sup> Sya, mcàb mèn co' ngòc mèn xley' farise loo myen' nac zin'a:

—¿Ché' no gu' mbla' mquedi mbi'a gu', ne, cà'? <sup>48</sup> ¿Ché' yende pá ñee gu' ne'stolque' ngo ndxep mèn co' nac jef che'n nguley' no chol mèn co' nac mèn xley' farise co' ngola's di's co' ndyoodi's mbi'a, à'? <sup>49</sup> Per mèn co' nziri' go co' inda'de cuent no co' ne'ñeede co' ndxab di's co' ndub loo ley co' mxo'f Moisés loo mèn, mandit mèn ba' too ze no too yál' tac ndxela's mèn ba' di's co' ndyoodi's mbi'.

<sup>50</sup> Ndoole' Nicodem co' ngua loo Jesús thìb yál', co' ngòc mèn xley' farise, ndxab loo mèn:

<sup>51</sup> —Hui' gu' nexa. Loo ley na' ndlu' indxàalte teti na' thìb mbi' co'se' tarte ñee na' no non na' xá nac xquin mbi' co' mbli mbi'.

<sup>52</sup> Sya, mcàb mèn loo Nicodem. Ndxab mèn:

—¿Ché' no luu nac mèn yèezya' che'n làaz mèn galile, ne, cà'? Bral no bla's co' huen huen loo libr co' nac xti's Diox. Sya, ñeel no ta'l cuent le' le'n yèezya' co' nac ned làaz mèn galile, yende pá mbez loo libr ryo' tee ryo' yáal thìb mbi' co' nde'th di's co' ndxab Diox.

*Mèn mbe' thìb xa'got co' ngogaa loo yalburrid loo Jesús par quexù' mèn xa'gota loo Jesús.*

<sup>53</sup> Ngoloa, thìb thìb mèn mxen ned, ndyàa mèn par liz mèn.

## 8

<sup>1</sup> Le' Jesús na, mxen ned, nda Jesús loo thìb yii co' lèe yii che'n yaa oliv co' ndub gaxte tya. <sup>2</sup> Co'se' ngo nì izlyo' tedib huiz co' nde nquea, mbere Jesús, ngòc Jesús le'n templ tedib vez. No ryete mèn ciuda Jerusalén mqueltàa loo Jesús. Mdub Jesús le'n templ. Mtlo Jesús, mblu' Jesús mèn. <sup>3</sup> Látha, nde no mèn co' nac maistr co' ndlu' cón che'n ley co' mxo'f Moisés loo mèn thìb xa'got co' ngogaa loo yalburrid loo mèn. Ale mdoo mèn xa'gota xtau'the rye mèn co' nziri' loo Jesús le'n templ. <sup>4</sup> Sya, ndxab mèn loo Jesús:

—Maistr, le'pe' ngue li xa'got ndxè' yalburrid con thìb mbi' ngogaa xa' loo nu'. <sup>5</sup> ¿Xá nee U', Maistr? Ley co' mxo'f Moisés loo nu' ñibe' loo nu' guth nu' thìb mèn got, co' ndli yalburrid xal xa'got ndxè', con quèe. Gunee U' loo nu' cón ndxàal li nu'.

<sup>6</sup> Ale asembli mèn tataa ndxab mèn loo Jesús par ñee mèn ñeene' ché' tli Jesús con' ndlya's mèn par tataa mod quexù' que' fals mèn Jesús. Per látha, chàa, mdub còc Jesús loo yòo. Mque' Jesús plá di's loo yòo con cuen ya' Jesús. <sup>7</sup> Látha, tolo nzi ñibdi's mèn loo Jesús. Sya, ngo too ndé'f Jesús. Ndxab Jesús loo mèn:

—Chol gu' co' nziri' trè' co' indxàpte xquin no co' indxàpte xtol, ner gu'a fxen quèe no bga'th quèe gu' xa'got ba' no beth gu' xa' thidtene.



<sup>8</sup> Mbere Jesús, mdub cò' Jesús loo yòo tedib vez. Tolo mque' Jesús taaplá di's loo yòo con cuen ya' Jesús. <sup>9</sup> Per co'se' mbìn mèn co' mquexù' xa'gota di's co' ndxab Jesús loo mèn, ale le'le' mthyon mèn tac leque mèn mden' lezo' ihuente nac con' co' ngue li mèn con xa'gota. Sya, más quee lezo' mèn thib thib mèn ngro', ndyàa mèn. Ner, mèn gox mtlo ngro' mbii. Xísa mdoo nque rye myen'bi' co' mqueltàa no mèn. Rye mèn co' ngro'a ngòc mèn co' mquexù' xa'gota loo Jesús. Ngoloa, thidte Jesús mbyan' no xa'gota con mèn co' ngue lu' Jesús le'n templ. <sup>10</sup> Sya, ngo too ndé'f Jesús. Mbui' ndxè', mbui' ba' Jesús par ñèe Jesús máa mèn. Ya yende chó mèn ñèe Jesús nziri'. Ante xa'gota no maste ngòc xa'got co' mbyan'. Sya, ndxab Jesús loo xa'gota:

—Ngot, ¿máa mèn co' mquexù' mque' fals lùu, à'? ¿Ché' nec thib mèn ne'nquexù'de no ne'nque' falste lùu, cà'?

<sup>11</sup> Sya, mcàb xa'gota. Ndxab xa'gota loo Jesús:

—Yende chó mèn nzo trè' co' mquexù' mque' fals daa, Tad.

Sya, ndxab Jesús loo xa'gota:

—Ne' daa ingue quexù'del. Fxen ned. Byàa par lizl nalle'. Ya ne'tolode cua'nl xquinl, ndee.

*Jesús ngue li par ndyub xniì yéc mèn no par ndyub xniì lezo' mèn izlyo' loo cón che'n Diox.*

<sup>12</sup> Mbere Jesús, ndxab Jesús loo mèn co' be' mbyan'a:

—Nde niin tedib con' loo gu', ey: Daa nac xa' co' ndli par ndyub xniì yéc mèn no par ndyub xniì lezo' mèn loo izlyo' ndxè' loo cón che'n Diox. Mèn co' tyal yòo loo cón chenen, mèn ne'que tee bante loo con' co' nac xab izlyo' no loo con' co' nac costumbr. Ndxè'leque', con' co' ndlin par tyub xniì yéc mèn no par tyub xniì lezo' mèn loo cón che'n Diox, con'a ndli par ncàb loo mèn yòo ban no mèn Diox thidtene.

<sup>13</sup> Sya, ngro' nxon' ndxep mèn xley' farise co' ndxab loo Jesús:

—Leque lùu ngue ta' cuent cón che'n lùu. Per cuent co' nda'l cón che'nl ba' yende cón ntac par nu'.

<sup>14</sup> Jesús mcàb loo mèn. Ndxab Jesús:

—¿Xá mod? Con' co' niin cón chenen ntacque'. Mastale' leque daa nda cuent cón chenen, daa nanee pá ned ngro'en no naneen pá ned biin yiloa. Per ndxe'leque', gu' ne'ñeede no inda'de gu' cuent pá ned ngro'en. No ne' ne' ñee gu' no ne' ne' inda' gu' cuent pá ned biin yiloa. <sup>15</sup> Gu' más ndla's loo mèn xal nac mod co' nzi tee ban mèn loo izlyo' par quexù' gu' mèn. Per part cón chenen, yende chó loo mèn ndlasen loo izlyo' ndxè' par quexù'en mèn. <sup>16</sup> Per chele' daa ndlas loo mèn loo izlyo' ndxè', nali no nambii ndlasen. Tac inacte daa thidte xa' co' ndla's loo mèn par tub rezen loo mèn. Ndxè'leque', xuden Diox co' mtel' daa, thidte ndxàc ryop xud nu' par ndla's nu' loo mèn no tub rez nu' loo mèn. <sup>17</sup> Loo ley co' mxo'f Moisés loo gu' ndub di's co' mbez: Co'se' chop mèn co' nac testiu nda' cuent leque cón che'n thib con', ndxàal yila's mèn cuent co' nda' ryop mèn cuent. <sup>18</sup> Cona, ngue niin loo gu': Leque daa nac mèn co' nda' cuent cón chenen. Xuden Diox co' mtel' daa nac tedib xa' co' nda'guè' cuent cón chenen, ne.

<sup>19</sup> Sya, mnibdi's mèn loo Jesús. Ndxab mèn:

—¿Máa xudl, na? ¿Pá nzo xudl?

Jesús mcàb loo mèn:

—Gu' indlibe'de daa no ne' ne' ndlibe' gu' xuden. Tac chele' gu' ndlibe'que' daa, ndlibe'que' gu' xuden, ne.

<sup>20</sup> Di's ndxè' ndxab Jesús láth ngue lu' Jesús mèn co'te' ndxòosua' caj gòn le'n templ. Yende chó mèn ngli ryes ndenxù' Jesús xal thib pres tac tarte zin hor co'se' tyactiipe' Jesús par guthxù' mèn Jesús.

*Jesús ngue ta' cuent loo mèn. Ndxab Jesús: Co'te' biin, gu' ne'gácte yòo gu' tya.*

<sup>21</sup> Mbere Jesús, ndxab Jesús loo mèn tedib vez:

—Daa biique' co'te' ngro'en. Gu' cua'nque' daa no gath noque' gu' xtol gu'. Cona, ngue niin loo gu': Co'te' biin, gu' ne'gácte yòo tya.

<sup>22</sup> Sya, ndxab mèn co' ñibe', no co' ndyoo ner, no co' ndyoo naa loo mèn nación Israel loo xtàa mèn:

—¿Ché' leque mbi' ba' guth mbi', cona mbez mbi': Co'te' biin, gu' ne'gácte yòo tya, cà'?

<sup>23</sup> Sya, ndxab Jesús loo mèn tedib vez:

—Lizpe' gu' no làazpe' gu' no che'npe' gu' nac izlyo' ndxè'. Per part cón chenen, lizpe'en no làazpe'en no che'npe'en nac loo bé'. Gu' nac mèn che'npe' izlyo' ndxè'. Per daa inacte che'npe' izlyo' ndxè'. <sup>24</sup> Por cona, ngue niin loo gu': Le' gu' gath noque' xtol gu' tac chele' gu' ne'yila'ste le' daa nacpe' Crist co' mbez mèn Crist, gu' gath noque' xtol gu'.

<sup>25</sup> Sya, mnibdi's mèn co' ñibe', no co' ndyoo ner, no co' ndyoo naa loo mèn nación Israel loo Jesús. Ndxab mèn loo Jesús:

—¿Chóxe' nac lùu, à'?

Sya, ndxab Jesús loo mèn:

—Daa ya guniile' loo gu' chó nac daa axta co'se' mtlon, mblon yalbàn cón che'n Diox loo gu'. <sup>26</sup> Anze'f huax con' ndlyazen niin loo gu'. No anze'f huax con' nzo par tub rezen loo gu'. Lomisque', xa' co' mtel' daa, xa' nda' cuent co' nac lìcpe' loon. Indyè'de xa'a. Di's co' mbìnlen co' nda' xa' cuent loon, cona ndyoodizen loo mèn loo izlyo' ndxè'.

<sup>27</sup> Per ndxe'leque', mèn ne'ta'de cuent no ne'neede mèn le' Jesús ngue toodi's cón che'n Diox co' nac xudpe' Jesús loo mèn. <sup>28</sup> Cona, tolo ndxab Jesús loo mèn:

—Co'se' que' gu' daa loo cruz no xít che gu' daa, daa co' mbal yáal loo izlyo' ndxè' xalque' ndxáal chol mèn loo izlyo', loo thib cruz no too gu' cruz, axta syare' li la's gu' le' daa nac Cristpe'. No syare' ta' gu' cuent yende cón ndlin co' ante guneete lezon. Ndxé'leque', ante ndyoodizen loo gu' xal nac di's co' mblu' xuden Diox loon. <sup>29</sup> Tac Diox co' nac xuden co' mtel' daa, Diox thidteneque' nzo no daa. Indlá'ya'de xuden Diox daa. Xuden Diox tarte lá' daa thidten tac daa thidteneque' ndli con' co' ndxòo lezo' xuden Diox.

<sup>30</sup> Co'se' ngolo ndxab Jesús di'sa, huax mèn ngola's loo Jesús.

*Trè' ndlu' cón che'n chop ned mèn. Thib ned mèn nac xin' Diox. Le' tedib ned mèn na, nac xal moz loo xtol mèn no loo xquin mèn.*

<sup>31</sup> Sya, ndxab Jesús loo mèn co' ñibe', no co' ndyoo ner, no co' ndyoo naa loo mèn nación Israel co' ngola's loo Jesús:

—Chele' gu' thidteneque' li nèe gu' gu' loo con' guniin loo gu', lìcpe' ba'i, le' sya, gáque' gu' myen' xin' mté'thpe' daa, <sup>32</sup> par tyub xnii yéc gu' no par tyub xnii lezo' gu' loo cón che'n Diox par ta' gu' cuent cón che'n con' co' nac lìcpe'. Le' sya, di's co' ndyoodizen co' nac lìcpe' li par ta' gu' cuent inquinte li gu' chol costumbr co' ñibe' yèe loo mèn, no li di's co' ndyoodizen co' nac lìcpe' par lá' gu' ryethe con' co' nac cón che'n xab izlyo'. Tac ryethe con'a ndli mbee ncà gu' loo cón che'n Diox.

<sup>33</sup> Le' sya, mcàb mèn loo Jesús. Ndxab mèn:

—Nu' nac bin che'n Abraham. No, thidteneque' tarte gac nu' xal thib moz co' ndli yèe zin' ze no yál' loo nec thib mèn. ¿Chonon mbezl: Nzo con' mbee ncà nu' loo cón che'n Diox, sya?

<sup>34</sup> Jesús mcàb loo mèn:

—Lìca, na ngue nii loo gu': Ryete mèn co' ncu'a'n xquin no xtol, mèn nac xal moz yèe loo xquin mèn no loo xtol mèn co' ñibe' loo mèn. <sup>35</sup> Nde niin tedib con' loo gu': Hui' gu' nexa. Mèn co' nac moz loo thib patrón, mèn thidtene yende mod gac mèn mèn guliz patrón. Per ndxe'leque', thib mbyòo co' nac xgan' thib mbi', mbyòoa thidteneque' ndxòo cuent nac mèn guliz xud mbyòo. <sup>36</sup> Por cona, ngue niin loo gu': Chele' daa co' nac xgan' Diox ngue li par ryo xà' gu' loo chol costumbr no loo cón che'n xab izlyo', lìcpe' ba'i, yende chó cón co' nac xab izlyo' co' nac costumbr co' mbed no gu' cuee cà gu' loo cón che'n Diox. <sup>37</sup> Daa naneeque' no ndaquen cuent le' gu' nac bin che'n Abraham co' ngo ban póla. Per ale ndxe'leque', ndly'a's gu' guthxù' gu' daa tac indlé'de ndlyàa di's co'

ngue niin loo gu' ndxè' le'n lezo' gu'. <sup>38</sup> Daa ndyoodiz cón che'n con' co' mblu' xuden Diox loon. Le' gu' na, más ndxòo lezo' gu' li gu' con' co' gunee xud gu' loo gu' par li gu' cón mbez xud gu' li gu'.

<sup>39</sup> Mcàb mènna loo Jesús. Ndxab mènna:

—Abraham nac xudgool nu'.

Jesús ndxab loo mènna:

—Chele' gu', licque', ngàc bin che'n Abraham, ngàp gu' mod co' ngòp Abraham, no ngli gu' xal mbli Abraham, sya, xàa. <sup>40</sup> Per mastale' mbez gu' nac gu' mèn co' nac bin che'n Abraham, ale ndxe'leque', ndlya's gu' guthxù' gu' daa. No, ndxòn gu' le' daa ngue ta' cuent co' nac licpe' co' mblu' Diox loon loo gu'. Fta' gu' cuent co' huenleque' le' Abraham thidteneque' ne'nglide xal ndlya's gu' li no gu' daa nalle'. Por cona, inacte gu' binpe' Abraham. <sup>41</sup> Gu' ndlique' cón ndli xud gu'.

Sya, mcàb mènna loo Jesús. Ndxab mènna:

—Nu' inacte xin' chop son mbi', co' nee di's, inacte nu' xin' thib xna' nu'. Thidte xud nu' ngue no nu', co' nac Diox.

<sup>42</sup> Sya, mcàb Jesús loo mènna. Ndxab Jesús:

—Chele' xud gu', licque', ngàc Diox, gu' huen ngàc con daa no que'que' lezo' gu' ñèe gu' daa tac daa ngro' loo Diox. Cona, ndalen loo izlyo' ndxè' no nzon trè'. Ne'ngàlten por gunee lezon. Ndxè'leque', Diox mtel' daa. Cona, ndalen loo izlyo' ndxè'. <sup>43</sup> ¿Chonon inda'de gu' cuent no indxaa'dte gu' di's co' nde teele' ndan cuent loo gu', à'? Neequen chonon indlya'ste gu' tyal gu' gòn gu' di's co' ngue tan cuent loo gu'. Tac gu' indlya'ste gòn di's cón che'n Diox co' ngue tan cuent loo gu'. Con'ai. <sup>44</sup> Na nii loo gu': Xa' co' nac xud gu'a nac Mebizya. Le' gu' na, nac mèn co' ndli ryethe con' co' ndryo' ndlyen' lezo' xud gu' co' nac Mebizya. Mebizya ngòcle' thib xa' co' ndli par ndxuthxù' mèn xtàa mèn loo izlyo' anon ngure izlyo'. No thidteneque' indxòode lezo' Mebizya gòn Mebizya con' co' nac licpe'. Ne' ne' indxòo lezo' Mebizya tyoodi's Mebizya con' co' nac licpe'. Co'se' ndyoodi's Mebizya di's co' nac yalgutyè'túb, ngue lu' Mebizya xal nac Mebizya no xal nac mod co' ndxàp Mebizya. Tac Mebizya nacpe' thib xa' gutyè'. No nac Mebizya thib xa' co' ndli par ndxàc taamas mèn che'n izlyo' mèn gutyè'. <sup>45</sup> Per com le' daa ndyoodi's di's co' nac licpe' cón che'n Diox, cona, ne'tyalte gu' yila's gu' di's co' ndyoodizen. <sup>46</sup> Per nalle' ndlyazen ñeen chó thib gu' ñee loon le' daa ndxàp xtol. Chele' daa ndyoodi's di's co' nac licpe' cón che'n Diox, ¿chonon indxela'ste gu' loo di's co' ndyoodizen loo gu', sya? <sup>47</sup> Mèn co' ngòo loo cón che'n Diox par nac mènna che'n Diox, mènna ndyal par ndxòn mènna di's co' nac xti's Diox. Per com le' gu' inacte mèn co' nzo loo cón che'n Diox, por cona, indlya'ste gu' tyal gu' par ta' gu' nza gu' par gòn gu' di's co' ndyoodizen.

*Trè' ndlu' le' Crist nzole' ndoore' gáal thib mbi' co' ngro' lèe Abraham co' ngo ban póla.*

<sup>48</sup> Sya, mcàb mèn co' ñibe', no co' ndyoo ner, no co' ndyoo naa loo mèn nación Israel loo Jesús. Ndxab mènna:

—Nu' ndyac huenque' nac di's co' ngue bez nu' lool le' lùu nac thib mbi' yèezya' che'n làaz mèn samari no nzo thib xpìi ye'rsin' lool.

<sup>49</sup> Mcàb Jesús loo mènna. Ndxab Jesús:

—Inzode nec thib xpìi ye'rsin' loon. Ndxè'leque', con' co' ndlin ndli le' loo xuden gàc con' guryath no con' guryèn. Per gu', ale ndxe'leque', indlide par gàc con' guryath no con' guryèn loon. <sup>50</sup> Daa incua'nte mèn co' li par gàc con' guryath no con' guryèn loon. Daa nanee nzoque' thib xa' co' ncu'a'n mod par li xa' gàc con' guryath no con' guryèn loon. Xa'a ndub rez loo mèn co' ne'tyalte li con' guryath no con' guryèn loon. <sup>51</sup> Licpe' ba'i, na ngue nii loo gu': Le' mèn co' ndyub nza no nda' mèn lugar par ndxòn mèn di's co' ndyoodizen, mènna yòo ban noque' Diox thidtene. No ne'co' xà'de Diox mènna. No ne'co' toode Diox mènna loo Diox co'se' ngolo nguth mènna.

<sup>52</sup> Le' sya, mcàb mèn co' ñibe', no co' ndyoo ner, no co' ndyoo naa loo mèn nación Israel loo Jesús. Ndxab mènna:

—Nase mbli la's nu' nzoque' thib xpil ye'rsin' lool. Abraham nguth. Ryete mèn co' mde'th di's co' ndxab Diox nguth, ne. No lùu ale mbez: Mèn co' tyub nza no gòn mèn di's co' mbezen, mèn thidteneque' ne'gathte. <sup>53</sup> Tlate ñeel nacl más xa' roo xa' xèn no más mèngool leque xudgool na' Abraham co' nguth. Abraham nguthque'. No ryete mèn co' mde'th di's co' ndxab Diox nguthque'. ¿Chóxe' mèn mbezl nacl, sya?

<sup>54</sup> Jesús mcàb loo mèn. Ndxab Jesús:

—Chele' daa yub ndli par ndxàc con' guryath no con' guryèn loon, le' sya, con' guryath no con' guryèn co' nglin ngàc loona yende cón ntaca loo Diox co' mtel' daa. Per xa' co' ndli par ndxàc con' guryath no con' guryèn loon, xa'a nac Diox co' nac xudpe'en. No nac xa' merpe' xa' co' mbez gu' nac Dioxpe' gu'. <sup>55</sup> Gu' indlibe'de xa' co' nac Diox xudpe'en. Per daa ndlibe'que' xuden Diox. No chele' daa nii loo gu' indlibeden xuden Diox, sya, lalque' ndyè' daa xal ndyè' gu'. Per ndxe'leque', daa ndlibeque' Diox co' nac xuden. No ndlin cas xalque' nac di's co' ndyoodi's Diox co' nac xudpe'en loon. <sup>56</sup> Abraham co' ngòc xudgool gu' póla, axta gust mbyan' lezo' Abraham láth ndub quee lezo' Abraham huiz co' gac huiz galen loo izlyo' ndxè'. Gunèeque' Abraham co'se' ngòc huiz co' mbalen loo izlyo' ndxè'. No mdyac lezo' Abraham axta plóthe cón che'n huiza.

<sup>57</sup> Le' sya, ndxab mèn co' ñibe', no co' ndyoo ner, no co' ndyoo naa loo mèn nación Israel loo Jesús:

—Ne' ne' tar taal cho' psi' lin' no ¿mbezl gunèelel Abraham co' ngòc xudgool na', cà'?

<sup>58</sup> Jesús mcàb loo mèn. Ndxab Jesús:

—Lìca, na nii loo gu': Ndoore' co'se' tarte gáal Abraham, nzolen.

<sup>59</sup> Per co'se' mbìn mèn tataa ndxab Jesús, mxen mèn quèe par gathquèe mèn Jesús. Per ale, chàa, mdyon' Jesús loo mèn. Ale ne'nda'de mèn cuent ngro' Jesús loo mèn le'n templ. Mxen Jesús ned, ndyaa Jesús.

## 9

*Jesús mteyac thib mbi' co' ngóol sieu.*

<sup>1</sup> Láth nda riid Jesús par ned nda Jesús, gunèe Jesús thib mbi' sieu co' ngóol sieu co' ndub par neda. <sup>2</sup> Myen' xin' mté'th Jesús mnibdi's loo Jesús. Ndxab myen':

—Maistr, ¿chonon texal ngóol mbi' ba' sieu mbi', à'? ¿Ché' tac ngòp xud mbi' xtol xud mbi' no ngòp xna' mbi' xtol xna' mbi' cona ngóol mbi' sieu o ché' naca por xtolpe' mbi', cona ngóol mbi' sieu, cà'?

<sup>3</sup> Jesús ndxab loo myen':

—Aa que tont gu' se. Ne'ngáalte mbi' ba' sieu por xtolpe' mbi'. Ne' ne' ngáal mbi' sieu por xtol xud mbi' no por xtol xna' mbi'. Ndxé'leque', mbi' ba' ngóol sieu par ryo xo'f con' ndxác Diox li Diox loo mèn loo xnaa loo mbi'. <sup>4</sup> Ndxàalque' lin zin' co' nac rsin' xa' co' mtel' daa láth be' ngue tee'en loo izlyo' ndxè' xal ndli mèn zin' ndxáal ze co'se' ntenì xnì huiz. Tac yé' huize' gaca loon xal co'se' nde yál' loo izlyo' no yende chó mèn gac li zin' hora. <sup>5</sup> Cona, niin loo gu': Láth be' nzon loo izlyo' ndxè' nac daa xa' co' ndli par ndyub xnì yéc mèn no par ndyub xnì lezo' mèn co' nziri' loo izlyo' ndxè' loo cón che'n Diox.

<sup>6</sup> Ngolo gunii Jesús di'sa loo myen' xin' mté'th Jesús, msuc Jesús loo yòo. No mcos Jesús chu'th ben loo yòo con rsuc Jesús. Ngoloa, mtà Jesús bena ngudloo mbi' sieua. <sup>7</sup> Ngoloa, ndxab Jesús loo mbi'a:

—Huàa tech ngudlòol ro tanc co' lèe Siloé ba'. Di's Siloé nee di's ntel' mèn mèn.

Sya, xex xex nda mbi' sieua ro tanc. Ngua tech mbi' ngudloo mbi'. Co'se' mbere mbi', ndye'th mbi' loo Jesús, ndxe'sleque' ngüi' mbi'. <sup>8</sup> Sya, rye mèn co' nzi'f liz gax co'te' ndub liz xud mbi' no rye mèn co' gunèe mbi' ndoore' xyal' ngudloo mbi', mèn ndxab loo xtàa mèn:

—¿Ché' inacte mbi' ba' mbi' sieu co' ndyub ña'b gòn, cà'?

<sup>9</sup> Sya, mbez ndxep mèn loo xtàa mèn:

—Aa. Mbi' ba'i.

Per taandxep mèn mbez:

—Tyè'. Inacte mbi' ba' mbi'a, yey. ¿Ché' indyacte gu' te' ñaa mbi'a ñaa mbi' ba', ¿lé'?  
Per yub mbi' sieu mbez loo mènà:

—Daaai. ¿Ché' ngue li gu' cuent inacte daa mbi'a, cà'?

<sup>10</sup> Sya, mnibdi's mènà loo mbi' sieua. Ndxab mènà loo mbi':

—¿Xá mod ngòca lool? ¿Chonon ngüi'lel nalle', sya?

<sup>11</sup> Mbi' mcàb loo mènà. Ndxab mbi':

—Mbi' co' lèe Jesús mcos chu'th ben loo yòo. Ngoloa, mtà mbi' ben ngudloon. No gunee mbi' loon: Huàa tech ngudlool ro tanc che'n Siloé ba'. Ngua techen ngudloon. No co'se' ngolo mtechen ngudloon, chàa, ndxe'sleque' mbui'en.

<sup>12</sup> Sya, mnibdi's mènà loo mbi'. Ndxab mènà:

—¿Pá nzo mbi' co' lèe Jesús nalle', à'?

Mbi' sieua mcàb:

—Ne no. Ne'needen pá nzo mbi'.

*Mèn xley' farise noo noo mnibdi's cón che'n Jesús loo mbi' co' ngóol sieu.*

<sup>13</sup> Sya, mbe' mènà mbi' co' ngóol sieua loo mèn xley' farise. <sup>14</sup> Huiz co'se' mcos Jesús ben no mxal' Jesús ngudloo mbi' sieua, huiza ngòc huiz sabd co' ngòc huiz descans tiempa. <sup>15</sup> Sya, mbere mèn xley' farise, mnibdi's mènà loo mbi'a tedib vez:

—¿Xá mod ngòc mxyal' ngudlool par ngüi'l nalle', à'?

Ndxab mbi' loo mènà:

—Mbi' co' lèe Jesús mtà chu'th ben ngudloon. Ngoloa, ngua techen ngudloon. Cona, ndxe'selque' ngüi'en nalle'.

<sup>16</sup> Sya, ndxab ndxep mèn xley' farisea loo mbi' co' ngóol sieu:

—Mbi' co' mbli con'a con lùu, mbi'a inacte mèn che'n Diox tac indlide mbi' cas huiz sabd co' nac huiz descans.

Per taamas mèn mbez:

—Per ¿xá ngobe' gu' xá mod gác thib mbi' co' ndxàp xtol li mbi' yalguzye' co' ngòc loo mbi' ba', yey?

No ale leque mèn xley' farise ngro yoo di's làth xtàa mèn. <sup>17</sup> Per indryo'de lezo' mèn xley' farise ngòc con'a loo mbi'a. Mbere mèn, mnibdi's mèn loo mbi' co' ngóol sieu tedib vez:

—Lùua, ¿cón tolo ñeel loo nu' cón che'n mbi' co' mbli mdyub xnii ngudlool, à'?

Mbi' co' ngòc sieu ndxab:

—Pues part cón chenen, ndyaquen mbi' nac xa' co' nde'th di's co' ndxab Diox, xàa.

<sup>18</sup> Nde nxon', thidteneque' ne'ndalte mèn co' ñibe', no co' ndyoo ner, no co' ndyoo naa loo mèn nación Israel ngala's mènà le' mbi'a ngòc sieu no hora ngüi'le' mbi'. Ne'ngro'de lezo' mèn con'a. Mbli mènà par ngua rez mèn xud mbi' no xna' mbi' co' ngüi'le'. <sup>19</sup> Sya, mnibdi's mènà loo xud mbi' no loo xna' mbi'. Ndxab mènà:

—¿Ché', lìcque', nac mbi' ndxè' xgan' gu' co' mbez gu' ngóol sieu, cà'? Chele'i tataa nac, ¿xá mod ngòca loo mbi' ngüi' mbi nalle', sya?

<sup>20</sup> Mcàb xud mbi' no xna' mbi' loo mènà. Ndxab ryop xa':

—Nu' nanee le' mbyòo ba' nac xgan' nu'. No, lìca, anon ngóol mbyòo sieu mbyòo.

<sup>21</sup> Per nalle' nu' ne'ñeede no ne'ta'de nu' cuent xá mod mdyub xnii ngudloo mbyòo par ngüi' mbyòo. Ne' ne' ñee nu' no ne' ne' ta' nu' cuent chó mbli par mdyub xnii ngudloo mbyòo par ngüi' mbyòo. Mbyòo ngoxle'. Bnibdi's gu' loo mbyòo. Leque mbyòo ta' cuent cón che'n mbyòo loo gu'.

<sup>22</sup> Ale tataa ndxab xud mbi' no xna' mbi' loo mèn co' ñibe', no co' ndyoo ner, no co' ndyoo naa loo mèn nación Israel tac nzyeb ryop sa'l xa' ñee xa' mèn co' ñibe', no co' ndyoo ner, no co' ndyoo naa loo mèn nación Israel. Tac mènà mbli mandad no mdoodi'sle' mènà chele' chol mèn co ro le' Jesús nacque' Crist, ale co' chug mèn co' ñibe', no co' ndyoo ner, no co' ndyoo naa loo mèn nación Israel mènà le'n sinagog. <sup>23</sup> Por cona, ndxab xud mbyòo no xna' mbyòo loo mènà: Bnibdi's gu' loo mbyòo cón che'n mbyòo. Mbyòo ngoxle'.



<sup>24</sup> Sya, ale mbere mèn co' ñibe', no co' ndyoo ner, no co' ndyoo naa loo mèn nación Israel, ngurez mèn mbi' co' ngòc sieu tedib vez. Ndxab mèn loo mbi' co' ngòc sieu:

—Fte'th Diox loo nu', ¿ché', lìcque', mbi' co' lèe Jesús mbli par mdyub xniì ngudlòol, cà'? Nu' indxela'sta. Tac nu' nanee le' mbi' co' lèe Jesús nac thib mbi' co' ndxàp xtol.

<sup>25</sup> Mcàb mbi' loo mèn. Ndxab mbi':

—Tyoxca, lica; ba'se ne'needen ché' nac mbi' thib mbi' co' ndxàp xtol, o ché' inacte mbi'i. Thidte con' naneen. No ndan cuent cón chenen anon co'se' ngóol daa, daa sieu. No nalle' ale ngüi'len.

<sup>26</sup> Mbere mèn, mnibdi's mèn loo mbi' tedib vez. Ndxab mèn loo mbi':

—¿Cón mbli no mbi'a lùu? ¿Xá mod mbli mbi' par mdub mbi' xniì ngudlòol par ngüi'l nalle', à'?

<sup>27</sup> Mbi' co' ngòc sieua mcàb loo mèn. Ndxab mbi':

—Na ya guniila loo gu' no indyub nzade gu' ne' ne' indli gu' cas co' guniin loo gu'. ¿Chonon lya's gu' beren tan cuent loo gu' tedib vez? ¿Ché' ndlya's gu' gac gu' xin' mté'th mbi', ne, cà'?

<sup>28</sup> Per co'se' mbìn mèn tataa ndxab mbi' co' ngòc sieu loo mèn, ngocloo mèn no ndxab mèn ngòc nguàal di's loo mbi':

—Lùu nac xin' mté'th mbi'a. Per part cón che'n nu', nu' nac xin' mté'th Moisés. <sup>29</sup> Nu' nanee le' Diox mdoodi's no Moisés. Per mbi'a, ne'neede nu' pá ned ngro' tee ngro' yáal mbi'a.

<sup>30</sup> Mcàb mbi'a loo mèn co' ñibe', no co' ndyoo ner, no co' ndyoo naa loo mèn nación Israel. Ndxab mbi'a:

—Lìcpe' ba'i, ale xèe ngüi'en no xèe ñaan loo gu' tatua' mbez gu' loon no ne'ta'de gu' cuent pá ned ngro' tee ngro' yáal mbi'a. Per mbi'a mbli par mdyub xniì ngudlòol par ngüi'en. Ngolo cuent. <sup>31</sup> Na' nda' cuent co' huenleque' le' Diox indyub nzade no indxònte Diox ro mèn co' ndxàp xtol. Ante ndyub nza Diox no ndxònte Diox ro mèn co' mbez Diox no mèn co' ndli co' nee lezo' Diox. <sup>32</sup> Axta huiz co'se' mtlo ngure izlyo' no axta huiz nalze tarte yath no yèn loo izlyo' ngo thib mbi' co' ndli ndyub xniì ngudlòol thib mèn co' ngóol sieu. <sup>33</sup> Chele' mbi'a ne'ngro'de loo Diox nec thib con' ne'gácte mbi' li mbi', ngobe'en.

<sup>34</sup> Per co'se' mbìn mèn co' ñibe', no co' ndyoo ner, no co' ndyoo naa loo mèn nación Israel tataa ndxab mbi' co' ngóol sieua loo mèn, sya, ndxàb mèn loo mbi' co' ngóol sieu:

—¿Lùu co' anon ngóol no huax xtol lùu ndlya's lu' nu', cà'? Xexte tee càa ned, byàa. Gro' trè'.

No ale mzii mchep mèn mbi'. Mblo' mèn mbi' le'n sinagog.

*Trè' ndlu' cón che'n mèn co' ncuau yéc no co' ncuau lezo' loo cón che'n Diox.*

<sup>35</sup> Co'se' mbìn Jesús le' mèn co' ñibe', no co' ndyoo ner, no co' ndyoo naa loo mèn nación Israel mblo' mèn mbi' no mzii mchep mèn mbi' le'n sinagog, ngua cua'n Jesús mbi'. Co'se' mzyál' Jesús mbi', ndxab Jesús loo mbi':

—¿Ché' ndxela's lùu loo mbi' co' nac xgan' Diox, à'?

<sup>36</sup> Mcàb mbi' loo Jesús. Ndxab mbi':

—Tad, gune U' loon chó xa' nac xgan' Diox par yilazen loo xa'.

<sup>37</sup> Mcàb Jesús loo mbi'. Ndxab Jesús:

—Lùu gunèele' xa'a. Daa co' ngue toodi's nol, leque yub daa nac xa'a.

<sup>38</sup> Sya, yende izlyo' mdub xib mbi' co' ngòc sieua loo Jesús. No mcò' mbi' yéc mbi'. Ndxab mbi' loo Jesús:

—Ndxelazen le' U' nac xgan' Diox, Tad.

<sup>39</sup> Ngoloa, chàa, ngro' di's ro Jesús. Ndxab Jesús loo mbi'a:

—Daa ndal loo izlyo' ndxè' par tub rezen cón che'n mèn no par ta' mèn cuent xal nac mèn loo izlyo'. No ndalen par lin le' loo ryete mèn co' nac xal mèn sieu loo cón che'n Diox, daa li par tolo tyub xniì yéc mèn no par tolo tyub xniì lezo' mèn loo cón che'n Diox. No lin le' mèn co' nde'f di's co' ndli cuent anze'f ndxác mèn cón che'n Diox, mèn gac xal mèn sieu loo cón che'n Diox.

<sup>40</sup> Per ndxep mèn farise co' be' mbyan' con Jesús mbìn di's co' ndxab Jesús. Co'se' mbìn mèn di's co' ndxab Jesús, ndxab mèn loo Jesús:

—Tlate ñeel no nu' nac xal mèn sieu, ¿lé'?

<sup>41</sup> Sya, mcàb Jesús loo mèn. Ndxab Jesús:

—Chele' gu' ngàc xal mèn sieu loo cón che'n Diox, ne'ngàpte gu' xtol gu' loo Diox. Per com le' gu' mbez huen huen nda' gu' cuent cón che'n Diox, ¿lé'?, cona, ngue bezen loo gu', por derech, ndxàp gu' xtol gu' loo Diox.

## 10

*Jesús mtetac loo mèn cón che'n Diox, no cón che'n Jesús, xal thib corral co'te' ndxòo no ndryo' mbacxil'.*

<sup>1</sup> Jesús ndxab loo mèn:

—Nde tetaquen thib di's loo gu' co' nac cón chenen xal thib pastor co' ndyoo ner loo mèn co' ndyal ndxòo loo cón che'n Diox. Gu' nonque' no nda'que' gu' cuent le' mèn co' indxòode thib lite ro corral mbacxil' xal thib pastor, per ndxe'leque', ndxòo mèn thib lad xís corral, mèn nac huan' no xexte ndli huan' mèn. <sup>2</sup> Per mbi' co' ndxòo thib lite co'te' ndxòo no co'te' ndryo' mbacxil' corral, mbi'a nac pastor co' nquenap no co' nqueno mbacxil'. <sup>3</sup> Nde nxon', mbi' co' nquenap ro puert corral na, mbi'a nخال' ro puert corral par yòo no ryo' pastor. Le' mbacxil' co' nzo corral na, luego ndxòn ro pastor no ndxòn xti's pastor no ndlibe' mbacxil' pastor. No ndub lèe pastor lèe thib thib mbacxil'. No ngo' pastor mbacxil' le'n corral. <sup>4</sup> Co'se' ndxelo ngo' pastor ryete mbacxil' le'n corral, ndyoo ner pastor loo mbacxil'. Le' mbacxil' na, thidte nqueltàa. Ndyoo nque mbacxil' xís pastor tac ndxòn mbacxil' ro pastor. <sup>5</sup> Per chele' thib mbi' co' nac mèn co' indlibe'de mbacxil' tyoo ner loo mbacxil', mbacxil' ne'tyoo nquede xís mbi'. Ndx'e'leque', xyon' mbacxil' loo mbi' tac indxònte mbacxil' ro mbi'.

<sup>6</sup> Taandxè' mtetac Jesús di's loo mèn. Per mèn ne'nda'de cuent no axta ne' ne' ñee mèn cón nee di's co' ndxab Jesús loo mèn.

*Trè ndlu' le' Jesús nac xal thib pastor ndac.*

<sup>7</sup> Le' sya, mbere Jesús, ndxab Jesús loo mèn tedib vez:

—Lìcpe' ba'i, na bere tetac tedib di's loo gu' co' nac cón chenen no co' nac cón che'n Diox: Daa nac xal thib puert che'n thib corral co'te' ndxòo no ndryo' mbacxil'. <sup>8</sup> Ryete mèn co' mbi'th lu' tedib xley' co' nac che'n Diox ndoore' galen, mèn ngòc xal huan' loo cón che'n Diox. Mbli mèn loo hues xtàa mèn loo cón che'n Diox xal ndli huan' huan'. Per mèn co' nac xal mbacxil'pe' daa, mèn ne'ngònte di's ro mèn co' mbi'th nerla par ngli mèn cas loo mèn. <sup>9</sup> Daa nac xal thib puert che'n thib corral. Chol mèn co' ndyal yòo loo cón chenen xal ndxòo no ndryo' mbacxil' corral, mèn lyá' loo con' ryes. Loon nac mèn xal mbacxil' co' ndxòo no ndryo' corral. Quenapen mèn xal co'se' nqueno no nquenap thib pastor mbacxil' ned nzi tee yuhua mbacxil'.

<sup>10</sup> Mèn co' nac xal huan' loo cón che'n Diox, ante ndxi'th mèn par co' xà' mèn mèn loo cón che'n Diox xal co'se' ndli huan' huan' che'n mèn no xal co'se' ndxuthxù' mèn xtàa mèn no xal co'se' ntelux mèn xtàa mèn tant nayi' mèn. Per ndxe'leque', daa ndal par lin que no mèn thib yalnaban ndac axta plóthe loo cón che'n Diox. <sup>11</sup> Por cona, ngue niin loo gu': Daa nac xal thib pastor ndac. Por nac daa xal thib pastor ndac, ale gath daa por cón che'n mèn co' ndyal yòo loo cón chenen, mèn, co' nee di's, nac xal mbacxil' che'n pastor. <sup>12</sup> Lomisque' ne, thib xa' co' ndxax ncàa co' nqueno no co' nquenap mbacxil', xa'a ndxax ncàa por inacte xa' pastorpe' che'n mbacxil'. No inacte mbacxil' mbacxil'pe' xa'. Tac co'se' ñee xa' nde mbée, ndxe'leque', nxyon' xa' no ndlá' xa' mbacxil'. Le' sya, ndyac lezo' mbée, ndyen mbée mbacxil'. No ndli mbée par ndrye's mbacxil' pál. <sup>13</sup> Per xa' co' ndoo lite ndxax ncàa co'se' ñee xa' nde mbée loo mbacxil', xa'a nxyon' tac nac xa' thib xa' co' alithe ndxax ncàa. Indyóode xa' no ne' ne' indlyat lezo' xa' ñee xa' mbacxil' co' mblá' xa' loo mbée.

<sup>14-15</sup> Per ndxe'leque', daa nac xal thib pastor ndac. Xalque' ndlibe' xuden daa no nda' xuden cuent cón chenen, daa, ne, ndlibe' xuden no ndan cuent xal nac xuden. Lomisque'

mod ne, ndliben no ndan cuent cón che'n mèn co' ndyal ndxòo loo cón chenen, mèn co' nac xal mbacxil'pe' daa. Por cona, tan yalnaban daa loo yalguth por cón che'n mèn co' nac xal mbacxil'pe' daa.

<sup>16</sup> Tolo mtetac Jesús di's loo mèn. Ndxab Jesús:

—Ngue non taamas mèn co' nac xal mbacxil', mèn co' inacte mèn nación Israel, co' nee di's, nac tedib corral mbacxil'. No naquingue' lin par thidte queltàa mèna loo cón chenen par yò mèna loo cón chenen. Le' sya, mèn co' nac xal mbacxil' co' inacte che'n corral ndxè', mèna gòn ron no tyubdi's mèna con' gaben loo mèna. Le' sya, thidte gac mèn co' nac xal mbacxil' che'n tedib corrala con mèn co' nac xal mbacxil' che'n corral ndxè' con thidte xa' co' nac pastor co' nquenap no co' nqueno mbacxil'a.

<sup>17</sup> Anze'f nque' lezo' xuden ñèe xuden daa tac daa ta lugar quée yalguth loon. No yiloo beren, ryo xban daa tedib vez. <sup>18</sup> Yende chó mèn gac guth daa. Ndxè'leque', leque daa li par quée yalguth loon xal nee lezon. Na ndxàp con' la's niin no ndxàpen con' la's yan par leque daa ñibe' par gath daa. No ndxàpen con' la's niin no la's yan par leque daa ñibe' par beren, ryo xban daa tedib vez. Con'a nac co' mnibe' xuden Diox loon par lin.

<sup>19</sup> Co'se' mbìn mèn co' ñibe', no co' ndyoo ner, no co' ndyoo naa loo mèn nación Israel tataa ndxab Jesús loo mèn, mbere mèna, ngure yoo di's mèna tedib vez. No ale por cona'te mbli ngòc mèna chop ned mèn. <sup>20</sup> No ale huax mèn mbez loo xtàa mèn:

—Chele' gu' ndli cuent thib xpìi ye'rsin' nzo loo mbi' no nquée mbii yéc mbi', ¿chonon nda' gu' lugar ndxòn gu' di's co' mbez mbi' loo gu', sya?

<sup>21</sup> Per taandxep mèn mbez:

—Yende chó mèn nzo co' nzo xpìi ye'rsin' loo co' gac tyoodi's tatua'. ¿Ché' ndli gu' cuent le' thib mèn co' nzo xpìi ye'rsin' loo li par hui' thib mèn sieu, cà'? Yende xàa.

*Mèn co' ñibe', no co' ndyoo ner, no co' ndyoo naa loo mèn nación Israel mcà di's cón che'n Jesús no mtè'b mèna Jesús.*

<sup>22</sup> Co'se' mbli mèn ciuda Jerusalén thib lni, lni co' mbli mèn par mte' lezo' mèn co'se' mbli mèna stren templ, le'xque' tiempa ngòc tiemp xil'. <sup>23</sup> Le' Jesús na, nda ndye'th, ngue tee ta' vult le'n templ co'te' ndub portal co' mbez mèn portal Salomón. <sup>24</sup> Láth nda ndye'th Jesús ngue tee go Jesús vult le'n templ, mtau' mèn co' ñibe', no co' ndyoo ner, no co' ndyoo naa loo mèn nación Israel loo Jesús. Ndxab mèna loo Jesús:

—¿Axta pól yilo lil par ya ne'gànte lezo' nu' cón che'nl no par ta' nu' cuent no ñee nu' ché', lìcque', nac lùu Crist o ché' ilicta? Per nalle' ndlya's nu' ñeel loo nu' ¿ché', lìcque', nac lùu Crist o ché' antaa nzo'f di's, à'? Guneei loo nu' loo xnaa thidtene par yila's nu' cón che'nl.

<sup>25</sup> Jesús mcàb loo mèna. Ndxab Jesús:

—Na guniila loo gu'. Ne'ngala'ste gu' con' guniin loo gu'. Ryethe con' co' mblin xal mnibe' xuden Diox par lina, leque con'a ndlu' cón chenen par ñee gu' no ta' gu' cuent chó nac daa. <sup>26</sup> Per ndxe'leque', gu' indxela'ste loo con' ndlin tac inacte gu' mèn, co' nee di's, nac mbacxil'pe' daa xal guniilena loo gu' pezea. <sup>27</sup> Le' mèn co' ndyal yò loo cón che'n mèn co' nac xal mbacxil'pe' daa, mèna ndxòn di's ron. Daa ndlibe mèna. No huen huen ndan cuent cón che'n mèna. Mèna ndlique' co' ñibe'en loo mèna. <sup>28</sup> Le' sya, daa lique' par yò ban no mèna Diox thidtene yiloo. No thidteneque' ne'co' xà'de Diox mèna no ne'co' toode Diox mèna loo Diox yiloo. Yende chó mèn co' mèna loo cón chenen. <sup>29</sup> Xuden Diox co' mbli par mdyal mèn yò mèn co' nac xal mbacxil'pe' daa loo cón chenen, xuden Diox nac más xa' roo xa' xèn loo alux con'. Nec thib mèn ne'gácte co' mèn co' nac xal mbacxil'pe' daa loo cón che'n xuden Diox. <sup>30</sup> Daa ngue nii loo gu': Ryop nu' xuden Diox thidte nac nu'.

<sup>31</sup> Le' sya, mbere mèn co' ñibe', no co' ndyoo ner, no co' ndyoo naa loo mèn nación Israel, mxen mèna quée par gath quée mèna Jesús tedib vez. <sup>32</sup> Láth mblya's mèna nden mèna quée par gath quée mèna Jesús, ndxab Jesús loo mèna:

—Nde teele' ndlin huax con' ndac loo gu' co' nac con' co' mbli xuden Diox par ndxàpen con' la's niin no la's yan par lina. ¿Por chó cón che'n con' ndac co' mblin loo gu'a ndlya's gu' gath quèe gu' daa, sya?

<sup>33</sup> Sya, mcàb mèn co' ñibe', no co' ndyoo ner, no co' ndyoo naa loo mèn nación Israel loo Jesús. Ndxab mèn:

—Ne'gath quèede nu' lùu por cón che'n huax con' ndac co' ndlil. Ndxé'leque', nu' gath quèe lùu tac nazab nac co' ndlil. Ale ñii yèel ñii tiil cón che'n Diox. Nu' ngüi' nacl thib mbi' xalque' nu'. No ale, ndxàcl xal Diox loo nu'.

<sup>34</sup> Sya, ndxab Jesús loo mèn:

—Loo libr co' nac ley co' ngue no gu' ndub di's co' mbez mèn ndxab Diox. Mbez di'sa: Ryete gu' nac mèn co' ndxàal li chol mèn cas loo xal li mèn cas loo Diox. <sup>35</sup> Cona, daa ngue nii loo gu': Na' nanee le' di's co' ndub loo libr co' nac xti's Diox yende mod quith no mèn. No yende mod cà di's mèn di'sa. Yub Diox mblo lèe ndxè' loo mèn co' ndxòn di's co' ndxab Diox le' mèn nac xalque' Diox. <sup>36</sup> Chele' Diox mblo' xà' daa par mtel' Diox daa ndalen loo izlyo', ¿xá mod gac ñee gu' loon le' daa nazab ñii yèe ñii tìi cón che'n Diox tac guniilen loo gu' le' daa nac xgan' Diox, sya? <sup>37</sup> Chele' daa indlide xal ndli xuden Diox, ne'yila'ste gu' loon. <sup>38</sup> Per chele' daa ngue lique' xal ndli xuden Diox, mastale' indxela'ste gu' loon, gola's gu' loo zin' co' ndlin par ñee gu' no yila's gu' le' xuden Diox nzo loon no nzoquen loo xuden Diox.

<sup>39</sup> Le' sya, mbere mèn, mblya's mèn ndenxù' mèn Jesús tedib vez. Per ale, chàa, mdyon' Jesús loo mèn.

<sup>40</sup> Sya, mxen Jesús ned. Mbere Jesús, nda Jesús par ned ro yó'be' Jordán co' nac ned ndlyen huiz. Ngo Jesús pláte huiz co'te' mbli Juàn bautizar mèn ndoore' yi'th Jesús.

<sup>41</sup> Huax mèn nda nque xís Jesús par neda. Mbez mèn no ndyoodi's mèn:

—Lìcpe' ba'i, cara, mastale' ne'nglu'de Juàn Bautist no ne'nglide Juàn Bautist nec thib yalguzye' loo mèn, per ryete di's co' gunee Juàn cón che'n mbi' ba' lìcque' ngòc di's co' gunii Juàn loo mèn.

<sup>42</sup> Por cona, huax mèn ngola's loo Jesús co'te' ngo Jesús.

## 11

*Trè' ndlu' xá mod nguth thib mbi' co' ngro' lèe Lars.*

<sup>1</sup> Le'n huiza, mxac len thib mbi' co' ngro' lèe Lars. Mbi' ngòc mbi' yèez Betañ. Mbi'a mque no chop fta'n co' ngro' lèe Mari no Mart co' ngòc leque mèn yèeza. <sup>2</sup> Pues Mari co' ngòc fta'n Lars co' mxac lena, Maria ngòc xa'got co' mblath thib loo aceit co' anze'f nazi' ndlya' nii Tad Jesús. No ngoloa mtecui's Mari nii Jesús con yis yéc Mari. <sup>3</sup> Por mxac len Lars, mtel' ryop bél myen' fta'n Lars mèn co' ngua loo Jesús. Ndxab mèn co' ngua mandada loo Jesús:

—Tad, nu' nde li avis loo U' le' amiu U', Lars, ndyac len, cara.

<sup>4</sup> Co'se' mbìn Jesús di'sa, ndxab Jesús loo mèn co' ngua mandada:

—Yilíiz co' ndyac Larsa, inacte yilíiza co' li par gathpe' Lars. Ndxé'leque', le'i nac par yath yèn cón che'n con' roo con' xèn che'n Diox loo mèn no par ryo xo'f loo mèn cón che'n con' roo con' xèn co' nac cón chenen loo mèn, daa co' nac xgan' Diox.

<sup>5</sup> Mastale' nque' lezo' Jesús ñèe Jesús Mart no Mari, bél Mart, no Lars, <sup>6</sup> co'se' mbìn Jesús di's co' ndxab mèn co' ngua mandad le' Lars ndyac len, asembli Jesús, ne'ngade Jesús luega xal mblya's ryop bél myen' ftan' Lars. Mbyan' Jesús co'te' ngo Jesús taachop huiz. <sup>7</sup> Ngolo nguri'th chop huiza, ndxab Jesús loo myen' xin' mté'th Jesús:

—Nda na' par ned le'n yèez co' nac yèezya' che'n làaz mèn jude tedib vez, cara.

<sup>8</sup> Per myen' xin' mté'th Jesús ndxab loo Jesús:

—Maistr, pente ndxàc plá huiz mblya's mèn co' ñibe', no co' ndyoo ner, no co' ndyoo naa loo mèn nación Israel mcua'n mèn mod nguth mèn U' con quèe. No ale ¿ndlya's U' ya U' par neda tedib vez, cà'?

<sup>9</sup> Mtetac Jesús thib di's loo myen' xin' mté'th Jesús. Ndxab Jesús:

—Nde niin thib con' loo gu': ¿Ché' ilicte si' fchop hor nac thib huiz, cà'? Hui' gu' nexa. Chele' thib mèn ndyee ndxáal ze, mènna indxezi'fte no indxega'ste mènna ned nda mènna tac xnii huiz ntenii loo mènna ned nda mènna. <sup>10</sup> Per mèn co' tyee nii nacuaau, mènna ndxezi'fque' no ndxega'sque' mèn loo con' tac yende xnii co' ntenii loo mènna ned nda mènna.

<sup>11</sup> Ngolo tataa ndxab Jesús di's loo myen', ndxab Jesús loo myen':

—Lars co' ndxàc amiu na' naxyàt. Per nalle' daa ga lo' mcal' loo Lars.

<sup>12</sup> Sya, ndxab myen' xin' mté'th Jesús loo Jesús:

—Tad, chele' Lars naxyàt, peser más ndoo yath ndac Lars, ¿lé'?

<sup>13</sup> Di's co' ndxab Jesús loo myen' nee di's le' Lars nguthle'. Per myen' xin' mté'th Jesús mbli xtùuz le' Jesús ngue yab loo myen' le' Lars naxyàt tac ndoo yath ndac Lars. <sup>14</sup> Le' sya, clar mda' Jesús cuent loo myen'. Ndxab Jesús:

—Lars nguthle'. <sup>15</sup> Per con' co' más ndyac lezon tac yende daa tya. Más huen tataa ngòca loo Lars por cón che'n gu' par hui' gu' con' lin loo Lars par tataa mod más yila's gu' loon. Ya' gu' nda na' par ñèe na' máa thebol Lars.

<sup>16</sup> Sya, ndxab Max, co' mbez mèn Cuach, loo myen' xtàa xin' mté'th Max:

—Nda no na' Jesús, yey, par gath no na' Jesús tya.

*Trè' ndlu' le' Jesús ngo xban mèn. No ndli Jesús par yòo ban no mèn Diox thidtene.*

<sup>17</sup> Co'se' mzin Jesús con myen' liz thebol Lars, ndxàcle' thap huiz ngua ca's mèn thebol Lars. <sup>18</sup> Nde nxon', gaxte tya nziri' yèez Betañ' par ciuda Jerusalén. Nziri'que' yèez Betañ' com chop mil narol metr, peser, loo ciuda Jerusalén. <sup>19</sup> Le'pe' sya, huax mèn yèezya' che'n làaz mèn jude mbi'th too naa no mbi'th tegán mèn lezo' Mart no Mari por cón che'n thebol Lars. <sup>20</sup> Co'se' mbìn Mart le' Jesús ndele', ngro' Mart, ngua càa ned Mart Jesús. Le' Mari na, mbyan' no rye mènna yòo. <sup>21</sup> Lueg ndxab Mart loo Jesús:

—Tad, chele' U' ngo no nu' trè', ngobe'en ne'ngathte ftanen. <sup>22</sup> Per nalle' naneequen le' Diox li ryete con' co' ña'b U' loo Diox.

<sup>23</sup> Ndxab Jesús loo Mart:

—Fta'nl ryo xban, ey.

<sup>24</sup> Mart ndxab loo Jesús:

—Aa, Tad, daa naneeque' le' ftanen ryo xban. Per axta co'se' gac lult tiemp loo izlyo' co'se' ryo xban mèn nguth axta syare' ryo xban ftanen, ndyaquen.

<sup>25</sup> Jesús ndxab loo Mart:

—Daa nac xa' co' ngo xban mèn. No nac daa xa' co' ndli par yòo ban no mèn Diox thidtene. Le' mèn co' ndxela's loon, mastale' gath mèn, daa li le' mènna yòo ban no Diox thidtene yiloo. <sup>26</sup> Ryete mèn co' naban nalle' no ndxela's mèn loon, co'se' gath mènna, mènna yòo ban no Diox. Ne'ryo xà'de mènna loo Diox thidtene. ¿Ché' ndxela'sl di's co' ngue niin lool ndxè', Mart?

<sup>27</sup> Mart ndxab loo Jesús:

—Aa, Tad, ndxelasquen di's co' mbez U'. No ndxelasquen le' U' nac Crist co' nac xgan'pe' Diox co' ndxath yi'th loo izlyo'.

*Trè' ndlu' le' Jesús mbín' ro bá' che'n thebol Lars.*

<sup>28</sup> Ngolo ndxab Mart di'sa, nda chez Mart Mari, bél Mart. Xexte ndxab Mart loo Mari: —Maistr mzinle' trè'. No mte' Maistr daa par ndal xinl. Ya neel cón ndlya's Maistr.

<sup>29</sup> Texal mbìn Mari di's co' ndxab Mart, yende izlyo', ngo too nde'f Mari. Ngua Mari co'te' nzo Jesús. <sup>30</sup> Co'se' ngua Mari co'te' nzo Jesús, tarte yòo Jesús le'n yèez Betañ'. Tatabe' nzo Jesús co'te' ngua toodi's no Mart Jesús. <sup>31</sup> Co'se' gunèe mèn yèezya' che'n làaz mèn jude co' ngo no Mari no co' nzi tegán lezo' Mari liz Mari yende izlyo' ngo too nde'f Mari no ngro' Mari nda Mari, mdoo nque mènna xís Mari. Tac mbli mènna xtùuz peser nda yón' Mari ro ye'r co'te' mblo mèn thebol Lars.

<sup>32</sup> Per texal mzin Mari co'te' nzo Jesús, mdub xib Mari no mcotloo Mari xan' nii Jesús. Ndxab Mari loo Jesús:



—Tad, chele' U' ngo trè', ne'ngathte ftanen, ngobe'en.

<sup>33</sup> Co'se' gunèe Jesús ndxón' Mari no ndxón' rye mèn yèezya' che'n làaz mèn jude co' mzin no Mari loo Jesús, anze'f mxi yéc no mxi lezo' Jesús. No mbyàa mbye'th lezo' Jesús.

<sup>34</sup> Látha, ndxab Jesús loo mèn:

—¿Pá mer mblo gu' thebol, à'?

Sya, ndxab ryop bél myen' loo Jesús:

—Tad, ya' U' nda na'. Sya, hui' U' pá mblo nu' thebol.

<sup>35</sup> Sya, ale no Jesús mbín'. <sup>36</sup> Co'se' gunèe mèn gulàaz che'n làaz mèn jude mbín' Jesús, ndxab mèn loo xtàa mèn: Hui' gu' nexa. Susque' mque' lezo' Jesús ñèe Jesús Lars. Ale no Jesús ndxón'.

<sup>37</sup> Sya, ndxab plá mèn loo xtàa mèn:

—Mbi' ba' mbli par ngüi' mbi' sieua. ¿Xá nee gu'? ¿Ché' ne'ngácte mbi' ba' ngli mbi' par ne'ngathte Lars chele' mbi' ngo trè', cà'?

*Jesús mblo xban thebol Lars loo mèn.*

<sup>38</sup> Mbere Jesús, mbyàa mbye'th lezo' Jesús. No mxi yéc no mxi lezo' Jesús tedib vez. Mbii gax Jesús ro ye'ra. Ye'ra ngòc thib quèe lyo'. Mtau' mèn ro ye'ra con thib quèe laj.

<sup>39</sup> Sya, ndxab Jesús loo mèn co' nziri'a:

—Fteche gu' quèe ro ye'r ba'.

Per Mart co' ngòc fta'n thebol Lars ndoole' ndxab loo Jesús:

—Tad, ya ndlya'le' thebol, ngobe'en, tac ndxàcle' thap huiz nguth thebol.

<sup>40</sup> Jesús ndxab loo Mart:

—¿Ché' ne'ngniiden lool gozea chele' lùu yila's loon no loo con' lin, ñèel con' roo no con' xèn che'n Diox co' lin loo Lars, cà'?

<sup>41</sup> Sya, mteche mèn quèe co' ndoo nau' ro ye'r co'te' mblo mèn thebol Lars. Ngoloa, mbui' Jesús loo bé'. Ndxab Jesús:

—Pay, Diox quix U' tac U' mbinque' di's co' guniin loo U'. <sup>42</sup> Daa naneeque' le' U' ndxònque' co' mbezen loo U'. Per por cón che'n rye mènley' co' nziri' dib vuilt loon nalle', taandxè' ngue niin loo U' par yila's mèn le' U' mtel' daa.

<sup>43</sup> Ngolo tataa ndxab Jesús loo Diox xud Jesús, cabii ndxab Jesús:

—Lars, gro' co'te' nzol ba', ey.

<sup>44</sup> Sya, Lars co' nguth ngro' too ro ye'ra. Ale nabix lar' ya' Lars no nii Lars. Nzo thib panid loo Lars, ne. Jesús ndxab loo mèn:

—Fteche gu' lar' co' nabix ya' Lars no nii Lars no loo Lars. No bla' gu' bii Lars.

*Mèn co' ñibe', no co' ndyoo ner, no co' ndyoo naa loo mèn nación Israel thidte ngòc. No mbli nèe mèn loo xtàa mèn par guth mèn Jesús.*

*(Mt. 26.1-5; Mr. 14.1-2; Lc. 22.1-2)*

<sup>45</sup> Por cón che'n yalguzye' co' mbli Jesús loo thebol Lars, anze'f thib mèn yèezya' che'n làaz mèn jude co' mbi'th too naa Mari ngola's loo Jesús co'se' gunèe mèn con' mbli Jesús loo thebol Lars. <sup>46</sup> Per plá mèn co' nac leque mèn co' ngua too naa Maria ngua ta' cuent loo mèn xley' farise cón che'n con' mbli Jesús loo thebol Lars. <sup>47</sup> Sya, mèn xley' farise no mèn co' ngòc jef che'n nguley' co' más ñibe' loo nguley', mèn mqueltàa con rye mèn co' ñibe', no co' ndyoo ner, no co' ndyoo naa loo xley' che'n mèn nación Israel. Ndxab mèn loo xtàa mèn:

—¿Cón li na', cara? Na' nanee le' mbi'a anze'f thib yalguzye' ngue li. <sup>48</sup> Chele' na' la' tolo li mbi' yalguzye' co' ngue li mbi', sya, ryete mèn nación na' yila's loo mbi' no yò mèn loo cón che'n mbi'. Ne' yiloo mèn co' nac gobiern co' ndub ciuda Rom tel' solndad le'n nación na' par telux solndad templ na' no nación na'.

<sup>49</sup> Per làth rye mèn ngo thib mbi' co' ngro' lèe Caifás. Caifasa ngòc jef che'n nguley' co' más mnibe' loo nguley' lín'a. Ndxab Caifás loo mèn co' mqueltàaa:

—Yende con' nanee gu' no yende con' non gu', yey. <sup>50</sup> Ne' ne' ta' gu' cuent cón nac con' más huen par na'. Más huen gaca gath thidte mbi' lugar de lyux ryete mèn nación na'. No por gath thidte mbi'a ne'lyuxte mèn le'n dib nación na'.

<sup>51</sup> Per di's co' gunii Caifasa ne'ngàcte di's co' angmbye'th yéc Caifás par gunii Caifás di'sa. Ndxé'leque', por ngòc Caifás jef che'n nguley' co' más mnibe' loo nguley' lín'a, con'a mbli Diox tataa mde'th Caifás le' Jesús gath lugar de lyux mèn le'n dib nación Israel. <sup>52</sup> No iante por mèn nación Israel gath Jesús. Ndxé'leque', Jesús gath por cón che'n rye mèn co' nac xin' Diox co' nzi tee re's le'n chol nación loo izlyo' par thidte queltàa mèna loo cón che'n Jesús. <sup>53</sup> Por cona, desde huiza ryete mèn co' ñibe', no co' ndyoo ner, no coo' ndyoo naa loo mèn nación Israel thidte ngòc par mblobe' no mtoxcua' mèna par guthxù' mèna Jesús.

<sup>54</sup> Por cona, ya ne'ntolode nque tee Jesús loo xnaa làth mèn yèezya' che'n làaz mèn jude. Ndxé'leque', mbii Jesús tya. Nda Jesús thib lugar co'te' nagán co' nziri' gax par ya Jesús thib yèez co' ngro' lèe Efraín. Tya ngo Jesús con myen' xin' mté'th Jesús ndxep tiemp.

<sup>55</sup> Le'xque' le'n huiza, pláte huiz ndoo gáal lni pasc che'n mèn nación Israel. Nde nixon', huax mèn che'n dib nación Israel nde lni le'n ciuda Jerusalén par tlo li mèna costumbr co' ndxàp mèna par yòo cuent yumbii mèna loo xley' mèna ndoore' gáal lni pasca. <sup>56</sup> Làth xtau'a, mtlo chol mèn, mcua'n mèn Jesús. No làth nzo mèn le'n templ, mnibdi's mèn loo xtàa mèn:

—¿Ché' ndyac gu' chop di's yi'th Jesús lni, lé'?

<sup>57</sup> Per mèn xley' farise no mèn co' ngòc jef che'n nguley' co' más ñibe' loo rye nguley', mèna mnibe' loo rye mèn co' nde lni chele' chó mèn non no nanee mèn pá nzo Jesús, ta' mèna cuent loo mèn xley' farise no loo mèn co' nac jef che'n nguley' co' más ñibe' loo rye nguley' par ya tenxù' mèna Jesús xal thib pres.

## 12

*Trè' ndlu' le' thib xa'got ngua tà aceit perfum nii Jesús.*

*(Mt. 26.6-13; Mr. 14.3-9)*

<sup>1</sup> Taaxop huiz ndoore' gáal lni che'n pasc, Jesús ngua yèez Betañ co'te' ngòc làaz Lars, Lars co' nguth no co' mblo xban Jesús làth mèn nguth. <sup>2</sup> Mèn guliz Lars mbli nab thib rsè par hua Jesús, co' nee di's, ngue li mèn con' guryath no con' guryèn loo Jesús. Le' Mart fta'n Lars na, mtlo mbli mandad loo mes. Nde nixon', note Lars ngòc làth mèn co' ngure loo mes par nduhua rsè no Jesús mèna. <sup>3</sup> Látha, Mari, bél Mart, ngua xi thib med litr aceit perfum che'n ye' nard co' anze'f náp ntac. Mtlo Mari, mtà Mari aceita nii Jesús. Ngoloa, mtecu'i's Mari nii Jesús con yis yéc Mari. Nde nixon', ante mzyè xla' aceit che'n perfum ye' nard le'n nyòo. <sup>4</sup> Sya, ndoole' Jud Iscariot, xgan' Mon, co' ngòc thib myen' xin' mté'th Jesús co' mda'xù' Jesús loo mèn yiloo, ndxab Jud:

<sup>5</sup> —¿Chonon ne'ntho'de xa'gota perfum ba' por thib mil chop ayo pes par ta' gòn xa'got tmi loo mèn prob co' ndyac yaltii, à'?

<sup>6</sup> Per ne'ngabte Jud di'sa por mdyóo Jud cón che'n mèn co' ndyac yaltii. Ndxé'leque', ndxab Jud di'sa tac Jud ngo ya' bols co'te' ndxòosua' tmi. No ngòc Jud thib huan' tac xexte ndyen Jud tmi co' ngòc mèn le'n bols. <sup>7</sup> Sya, ndxab Jesús loo Jud:

—La'a. Nee Mari cón ngue li Mari. Mari ngue tà aceit ba' laden ndoore' zin huiz ya ca's mèn daa xal nac mod co' ndxàp mèn. <sup>8</sup> Part cón che'n gu', gu' thidteneque' nzo làth mèn prob. Per part cón chenen, daa ya ne'tolode go no gu' thidtene.

*Trè' ndlu' le' mèn co' ñibe', no co' ndyoo ner, no co' ndyoo naa loo mèn nación Israel thidte ngòc. Mbli nèe mèna lezo' mèna par guthxù' mèna Lars, ne.*

<sup>9</sup> Sya, anze'f thib mèn che'n yèezya' che'n làaz mèn jude mbìn le' Jesús nzo le'n yèez Betañ. Ngua mèna Betañ. Per ne'ngade mèna ante par ya tee hui' mèna Jesús. Ndxé'leque', ngua mèna par hui' mèna máa Lars, ne, Lars co' mbli Jesús ngro xban làth mèn nguth. <sup>10</sup> Le' sya, mèn co' ngòc jef che'n nguley' co' más ñibe' loo rye nguley', thidte ngòc làth mèna par guthxù' mèna Lars, ne. <sup>11</sup> Tataa mbli mèna tac por cón che'n Lars anze'f thib mèn co' nac mèn che'n yèezya' che'n làaz mèn jude ngro xà' loo xley' co' ndxàp mèn nación Israel tac ngola's mèna loo Jesús no ngòc mèna loo cón che'n Jesús.

*Jesús ngòo le'n ciuda Jerusalén.*

(Mt. 21.1-11; Mr. 11.1-11; Lc. 19.28-40)

<sup>12</sup> Le'pe' sya, mdoo huax mèn ned. Nda mèn lni che'n pasc ciuda Jerusalén. Tedib huiz co' nde nquea, mbìn mènna le' Jesús nde zinle' ciuda Jerusalén. <sup>13</sup> Sya, mtlo mènna, mcho' mèn yin. No ngro' mèn par ya càa ned mèn Jesús. No mbez yèe mèn cabii xal co'se' ndxol ro mèn thib himn. Mbez mènna:

—Anze'f Diox roo Diox xèn nac Diox. No mbi' ndac nac mbi' co' nde por cón che'n Tad Diox. Mbi' nacque' rey che'n mèn nación Israel.

<sup>14</sup> Látha, gunèe Jesús mdoo thib burr gaxte par neda. Mdub Jesús burr par ngòcque' no mdyaaque' no mdyubque' di's co' ndub loo libr co' nac xti's Diox co' mbez taandxè':

<sup>15</sup> Ne'zyebte gu', mèn co' nac mèn ciuda Jerusalén. Hui' gu' nexa. Rey gu' ndele' ba'. No ndub rey gu' thib burr.

<sup>16</sup> Per anon mtlo mqueltàa no myen' xin' mté'th Jesús Jesús, ne'nda'de myen' cuent cón nee di's con' co' mbli Jesús hora. Co'se' gunèe myen' ngro xban Jesús no mquée Jesús loo bé' par ngòc con' roo con' xèn loo Jesús, axta syare' mte' lezo' myen' no mda' myen' cuent le' ryete con' co' ngòc loo Jesús, mdyubque' di'sa cón che'n Jesús loo libr co' nac xti's Diox. No tataaque' ngòca loo Jesús xalque' ndub di's loo libr co' nac xti's Diox.

<sup>17</sup> Mèn co' ngure no Jesús co'se' ngurez Jesús Lars ro ye'r co'te' ngua càa s mèn thebol Lars no mblo xban Jesús thebol Lars làth mèn nguth, mènna mda' cuent cón che'n con' gunèe mèn mbli Jesús. <sup>18</sup> Por cona, ngro' rye mènna par ngua càa ned mènna Jesús tac mènna huen huen mda' cuent no gunèe mènna xal mbli Jesús yalguzye' roo yalguzye' xèn loo Lars. <sup>19</sup> Sya, mèn co' ngòc mèn xley' farise, ndxab mènna loo xtàa mèn:

—Ngolo gunèe gu'i, na. Yende cón gác na' li no na' mbi' ba'. Hui' gu' nexa. ¡Napló mèn ndoo nque xís mbi' ba'!

*Ndxep mèn grieg ngue cua'n Jesús.*

<sup>20</sup> Làth rye mèn co' ngua ciuda Jerusalén par cuez mèn Diox le'n huiz lnia, ngo ndxep mèn nación Grieg le'n ciuda Jerusalén. <sup>21</sup> Sya, mbii gax mèn nación Griega loo Lip co' nac mèn yèez Betsaid co' nac thib yèezya' che'n làaz mèn galile. Nalyat mdè'f ro mènna. Ndxab mènna loo Lip:

—Tad Lip, nu' ndlya's blu' U' Jesús loo nu', yey.

<sup>22</sup> Sya, ngua ta' Lip cuenta loo Ndech. Le' sya, Lip ryop Ndech ngua neei loo Jesús. <sup>23</sup> Sya, ndxab Jesús loo ryop myen'a:

—Mzinle' hor co'se' gác con' roo con' xèn loon, daa co' mbal yáal loo izlyo' ndxè' xalque' ndxáal chol mèn loo izlyo' ndxè'. <sup>24</sup> Nde niin tedib con' loo gu' co' nac thib con' licpe': Chele' mèn ne'teyòode thib quèe nzob triu loo yòo par gà'ba no lyena, taate yan' quèe nzoba. No ne'gà'bta par lyena. Per chele'i gà'b no lyena, huax nzob bin ta'i yiloo.

<sup>25</sup> Tac mèn co' ante ñee loon loo cón che'npe' mèn loo izlyo' ndxè' par ante ban mèn loo izlyo' ndxè', mènna yende mod yòo ban no Diox thidtene. Per mèn co' ndoo lezo' lá' rye con' ñee loon mèn loo izlyo' ndxè', co' nac con' co' nzo mod li mèn gan loo izlyo' ndxè' par ban mèn loo izlyo' ndxè', mènna yòo ban noque' Diox thidtene yiloo. <sup>26</sup> Chele' chol mèn lya's tyubdi's loon xal ñibe'en loo mènna, mènna ndxàal tyoo nque xisen par li mènna xal ndlin. No co'te' gon, tya go non mèn co' tyubdi's loon xal ñibe'en loo mènna. Chele' chol mèn tyubdi's xal ñibe'en loo mènna, le' sya, xuden Diox li par gác con' guryath no con' guryèn loo mènna.

*Jesús ngue ta' cuent loo mèn xá mod gath Jesús.*

<sup>27</sup> Tolo ndxab Jesús:

—Per nalle' ne'needen co'the con' lin. Imbe see teede lezon. No axta ne' ne'neen cón gaben. ¿Ché' taben loo xuden Diox: Pay, ftelá' U' daa loo con' gác loon nalle', cà'? Yende xàa. ¿Cón li gaben tataa? Por cona, ndalen loo izlyo' ndxè'.

<sup>28</sup> Más huen mna'b Jesús loo Diox xud Jesús. Ndxab Jesús:

—Pay, bli U' par gác con' roo con' xèn loo yub U' por cón chenén.

Sya, le'le' mbyèn thib di's loo bé' co' ndxab:

—Na mblile' par ngòc con' roo con' xèn loon por cón che'n lùu. No beren lin par gac con' roo con' xèn loon por cón che'n lùu tedib vez.

<sup>29</sup> Le' sya, mèn co' nziri' no Jesús mxac ngòc thib con'. Ndxep mèn ndxab:

—Gundii ngulaa.

Taandxep mèn ndxab:

—Tyè'. Peser thib angl gunii loo Jesús.

<sup>30</sup> Sya, ndxab Jesús loo mèn:

—Ne'mbyènte di's co' mbin gu' ba' por cón chenen. Ndxé'leque', mbyèn di's ba' por cón che'n gu' par yila's gu' loon no loo cón chenen. <sup>31</sup> Tac nalle'que' mzin tiemp co'se' tyub rez cón che'n mèn co' naban loo izlyo' ndxè'. No nalle'que' mzin tiemp co'se' tyè'b jefpe' no ryo' xà' jefpe' che'n izlyo' ndxè' thib lad loo mèn. <sup>32</sup> No co'se' yilo que' mèn daa loo thib cruz, no xít too mèn cruz nasal' daa, yiloo daa li le' huax mèn tyal yila's loon par yòo mèn loo cón chenen.

<sup>33</sup> Tataa ndxab Jesús loo mèn par non mèn no ta' mèn cuent xá mod gath Jesús.

<sup>34</sup> Per ale le'le' mcàb mèn co' nziri' loo Jesús. Ndxab mèn:

—Co'se' ndlab nu' loo libr co' nac ley co' mxo'f Moisés loo nu', libr ndlu' loo nu' le' Crist banque' thidtene. ¿Xá mod mbezl le' lùu co' mbez leque lùu nac mbi' co' mbi'th yáal loo izlyo' ndxè' xal ndxáal chol mèn, lùu yiche loo thib cruz, sya? ¿Chóxe' mbezl nac lùu, lùu co' mbez nac mbi' co' mbi'th yáal loo izlyo' xalque' ndxáal chol mèn loo izlyo', sya?

<sup>35</sup> Sya, ndxab Jesús loo mèn:

—Láth be' nzon láth gu', ngue lin par tyub xnii yéc gu' no par tyub xnii lezo' gu' loo cón che'n Diox. Per taandxep te tiemp be' nzon láth gu'. Láth xtau'a, fque tee ban ndac gu' loo cón chenen xal ngue niin loo gu' ndxè, daa co' ndli par ndyub xnii yéc gu' no par ndyub xnii lezo' gu' loo cón che'n Diox. Tac ne'stre'fque' tlo que tee ban gu' loo cón che'n xab izlyo' co' nac xal yál'cuau loo gu'. Tac mèn co' nque tee ban loo cón che'n xab izlyo' nac xal mèn co' ndyee loo yál'cuau. No ne'ñeede mèn pá ned nda mèn. <sup>36</sup> Cona, ngue niin loo gu': Láth be' nzon láth gu', gola's gu' loon, daa co' ndli par tyub xnii yéc gu' no par tyub xnii lezo' gu' loo cón che'n Diox.

Ngolo tataa ndxab Jesús di's loo mèn, xexte mdyon' Jesús loo mèn. Ndyàa Jesús.

*Trè' ndlu' chonon thidtene ne'ngala'ste mèn nación Israel cón che'n di's co' ndyoodi's Jesús loo mèn.*

<sup>37</sup> Per mastale' mblile' Jesús huax yalguzye' loo mèn, ne'ngala'ste mèn loo Jesús no loo con' co' mbli Jesús. <sup>38</sup> Thib mod no tedib mod mquinque' mdyaa di's, no ngòcque' di's, no mdyubque' di's xal mbez di's co' gunii Sayi co' mde'th di's co' ndxab Diox, di's co' mbez:

Tad, ¿chó mèn nac mèn co' ngola'sle' di's co' gunee U' loo nu' co' ndxable' nu' loo mèn, à'? No ¿chó loo mèn mblu'le' Tad rye loothe con' co' nzo la's nii Tad no con' co' nzo la's ya' Tad, à'?

<sup>39</sup> Por cona, ne'ngácte mèn ngala's mèn loo Jesús no loo cón che'n Jesús xal mde'th Sayi di's co' ndxab Diox co' mdub loo libr co' nac xti's Diox co' mbez:

<sup>40</sup> Diox mbli ngòc mèn xal mèn sieu loo cón che'n Diox. No mbli Diox ngòc mèn mèn naad no mèn nguud par ne'hui'de mèn con ngudloo mèn no ne'ten'te mèn di's, ne' ne' yaa'd di'sa le'n lezo' mèn. Ne' ne' yòo mèn loo cón chenen tedib vez par teyaquen mèn xal thib mèn yíz.

<sup>41</sup> Di'sa gunii Sayi tac gunèe Sayi con' roo con' xèn cón che'n Jesús. Con'a, gunii Sayi cón che'n Jesús, ne.

<sup>42</sup> Per mastale' tataa mde'th Sayi cón che'n mèn, anze'f thib mèn co' ñibe', no co' ndyoo ner, no co' ndyoo naa loo mèn nación Israel ngola's loo Jesús no loo cón che'n Jesús. Per inda'de mèn cuent loo xnaa loo xtàa mèn tac nzyeb mèn co' chug mèn xley' farise mèn le'n sinagog. <sup>43</sup> Más nda' gust lezo' mèn ndxàc con' guryath no con' guryèn

loo mènà por cón che'n xtàa mènà leque yò lezo' mènà mod co' li Diox par gác con' guryath no con' guryèn loo mènà.

*Trè' ndlu' le' di's co' ndyoodi's Jesús li par tyub rez cón che'n mèn loo mèn loo izlyo' ndxè' yiloo.*

<sup>44</sup> Ngoloa, cabii gunii Jesús loo mèn tedib vez. Ndxab Jesús:

—Mèn co' tyal yila's loon, iante loon yila's mènà. Ndxè'leque', mènà yila's loo Diox xuden co' mtel' daa loo izlyo' ndxè'. <sup>45</sup> Mèn co' ngue hui' loon nalle', mènà ngue hui' loo xa' co' mtel' daa, ne, nalle'que'. <sup>46</sup> Daa co' nac xa' co' ndli par ndyub xnii yéc mèn no par ndyub xnii lezo' mèn loo cón che'n Diox, daa mbal yáal loo izlyo' ndxè' par gaca loo mèn le' mèn co' tyal yila's loon, ne'que tee bante mènà loo co' nac xab izlyo' co' nac xal yál'cuautúb. <sup>47</sup> Per chele' chol mèn ndyal gòn di's co' ndyoodizen, no ale ndrith nza mèn di's co' mbezen, ne'gàcte daa mèn co' quexù' mènà. Tac daa ne'ngalte loo izlyo' ndxè' par quexù'en mèn. Ndxè'leque', ndalen no nzolen loo izlyo' ndxè' par telá'en mèn loo con' ryes. <sup>48</sup> Le' mèn co' mblo' too daa thib lad no nterith nza mèn di's co' ndyoodizen, nzoque' thib xa' co' tub rez cón che'n mènà. Leque di's co' mdoodizlen loo mèn, leque di'sa li par tyub rez cón che'n mènà loo mènà co'se' gác huiz co' gác lult tiemp loo izlyo' ndxè'. <sup>49</sup> Daa indyoodi'ste xal neete lezon. Ndxè'leque', xuden co' mtel' daa, xuden mnibe' loon cón che'n co' ndxàal gaben loo mèn no cón che'n co' ndxàal lu'en loo mèn. <sup>50</sup> Naneen no ndan cuent le' mèn co' li xal ñibe' xuden Diox loo mèn, mènà yò ban noque' xuden Diox thidtene. Cona, ngue niin loo gu': Le' ryete con' co' ndyoodizen loo mèn, ndyoodizena xal ñibe' xuden loon par tyoodizena loo mèn.

## 13

*Jesús mtech nii myen' xin' mté'th Jesús.*

<sup>1</sup> Co'se' ngòc huiz co' ngòc huiz vispr che'n lni pasc, Jesús nonle' mzinle' tiemp ryo' Jesús loo izlyo' ndxè' par bii Jesús loo Diox xud Jesús. Jesús mque'que' lezo' ñèe Jesús myen' xin' mté'th Jesús co' nziri' loo izlyo'. Huiza mblu' Jesús loo myen', licque', mque' lezo' Jesús myen' axta plóthe.

<sup>2-4</sup> Látha, Mebizya ndoole' par mbli Mebizya ngulàa xtùuz ye'rsin' le'n lezo' Jud, xgan' Mon Iscariot, par cua'n Jud mod par ta'xù' Jud Jesús loo mèn. Per Jesús naneequè' le' Jesús ngro' loo Diox. No nonque' Jesús le' Jesús bere bii loo Diox tedib vez. No nonque' Jesús le' Diox xud Jesús mnibe' loo Jesús gáp Jesús rye loothe con' la's nii Jesús no la's ya' Jesús yiloo. Con'a, láth co'se' ngue yuhua rsè Jesús con myen' xin' mté'th Jesús, chàa, ngo too Jesús loo mes. Mteche Jesús thib cua' xab Jesús co' noc Jesús. No mtedó' Jesús thib tuay rlan' Jesús. <sup>5</sup> Ngoloa, mblo Jesús nít le'n thib bandej. Mtlo Jesús, mtech Jesús nii myen' xin' mté'th Jesús. No mtecuí's Jesús nii myen' con tuay co' mtedó' Jesús rlan' Jesús.

<sup>6</sup> Per co'se' nde tech Jesús nii Mon Pedr, Mon Pedr ndxab loo Jesús:

—Tad, ¿U' tech niin, à? ¡Pà tan niin tech U'!

<sup>7</sup> Jesús mcàb loo Mon Pedr. Ndxab Jesús:

—Aa, na tech niil pues. Lùu ne'ta'de cuent no ne'ñeedel cón ngue li nonl nalle'. Per axta yiloo syare' ta'l cuent cón ndli ngue techen niil nalle'.

<sup>8</sup> Pedr ndxab loo Jesús:

—Tad, ne'taden lugar tech U' niin thidtene.

Jesús mcàb loo Pedr. Ndxab Jesús:

—Chele' daa ne'techte niil, Pedr, ne'gàcte con' co' nac chenen che'nl.

<sup>9</sup> Sya, ndxab Mon Pedr loo Jesús:

—Tad, chele'i tataa nac, ne'techte U' ante niin sya, xàa. Ndxè'leque', thidtene ftech U' yan no yéquen más huen.

<sup>10</sup> Jesús ndxab loo Pedr:

—Le' xa' co' diz ngod, xa'a inquinte gad tedib vez. Ante nii xa' no maste na, nquin yech tac dipte lad xa' nambiique'. Gu' nambiique' mastale' iryede gu' nambii.



<sup>11</sup> Tataa ndxab Jesús loo myen' le' myen' inambiide rye tac Jesús naneque' chó myen' nac co' ta'xù' Jesús loo mèn.

<sup>12</sup> Ngolo mtech Jesús nii rye myen', mdoc Jesús xab Jesús tedib vez. Mbere Jesús, mdub Jesús loo mes. Ndxab Jesús loo myen':

—¿Ché' inda'de gu' cuent cón ndli mtechen nii gu', à', ey? Indxòn ndacte gu'i, ¿lé'?  
<sup>13</sup> Gu' mbez loon: Nac daa maistr gu' no nac daa Tad gu'. No yende cón niin loo gu' nacque' daa maistr gu' tac nac daa maistr. <sup>14</sup> Per chele' daa co' nac Tad no maistr gu' mtechen nii gu', gu' ne, ndxàal tech nii thib xtàa gu' no nii tedib xtàa gu'. <sup>15</sup> Tac con' co' mblin par mtechen nii gu' nac co' mblu'en loo gu' par li gu' leque con' loo xtàa gu' xal mblin mtechen nii gu'. <sup>16</sup> Lìca, na ngue nii thib con' loo gu': Yende mod más ñibe' thib moz loo patrón moz. Lomisique' ne, yende mod más ñibe' thib xa' co' ndli mandad loo xa' co' ñibe' loo xa' co' ndli mandad. <sup>17</sup> Chele' gu' ta' cuent no nonque' gu' con' mblin loo gu' no li gu' loo xtàa gu' xal mblin loo gu', huen nda gu'.

<sup>18</sup> Ingue toodisten cón che'n ryete gu'. Na naneque' no ndan cuent xá ñaa gu' co' mcuin. Per ndxàc con' ndxè' loon par ngòcque' no mdyubque' di's co' ndub loo libr co' nac xti's Diox co' mbez: Le' thib gu' co' ngue yuhua non thidte yen', no co' ngue yu non thidte yen', gu'a nac thib ngolo ngola's chenen. <sup>19</sup> Thidtene ngue niin con' ndxè' loo gu' nalle' par co'se' zin hor gàca loon, gu' li la's le' daa nac merpe' Tad gu'. <sup>20</sup> Lìca, na ngue nii loo gu': Le' mèn co' tyal yila's loo myen' co' tel'en par yò mèn loo cón chenen, mèn yila's loon. No mèn co' tyal yila's loon, mèn yila's loo xa' co' mtel' daa.

*Jesús ngue ta' cuent loo mèn le' Jud ta'xu' Jesús loo mèn.*

*(Mt. 26.20-25; Mr. 14.17-21; Lc. 22.21-23)*

<sup>21</sup> Ngolo tataa mdoodi's Jesús di'sa loo myen' xin' mté'th Jesús, ne'ñeede Jesús cón li Jesús. Tac mxon' lezo' Jesús. No nda ndye'th lezo' Jesús. Sya, más nalì mda' Jesús cuent loo myen' xin' mté'th Jesús. Ndxab Jesús:

—Lìcpe' ba'i, na nii loo gu': Le' thib gu' co' nzo làth gu' ndxè' nalle' ta'xù' daa loo mèn.

<sup>22</sup> Sya, mbui' myen' xin' mté'th Jesús loo thib xtàa myen' no loo tedib xtàa myen' tac ne'nda'de myen' cuent chó myen' nac co' ta'xù' Jesús loo mèn. <sup>23</sup> Per thib myen' xin' mté'th Jesús co' más mque' lezo' ñèe Jesús, myen'a nzo bda' lad Jesús co'se' ngue yuhua rsè Jesús con myen'. <sup>24</sup> Sya, mbli Mon Pedr señ loo myen'a par ñibdi's myen'a loo Jesús chó myen' nac myen' co' ndxab Jesús le' myen' ta'xù' Jesús loo mèn. <sup>25</sup> Sya, sate más mxyo'f bda' gax myen'a loo Jesús par ñibdi's myen' loo Jesús. Ndxab myen':

—Tad, ¿chó nu'i, à'?

<sup>26</sup> Jesús mcàb loo myen'a. Ndxab Jesús:

—Hui' nexa. Daa tegaz thib le' pan le'n cald. No loo xa' co' tan thib le' pana, xa'ai.

Tataaque' mbli Jesús. Mtegaz Jesús thib le' pan le'n cald. No mda' Jesús pana loo Jud Iscariot, xgan' Mon. <sup>27</sup> Le' sya, texal nduhua Jud thib ro pana, ndoole' Mebizya ngulàa Mebizya le'n lezo' Jud. Sya, ndxab Jesús loo Jud:

—Con' co' nzo lezo'l par lil, lueg lueg blii. <sup>28</sup> Per nec thib myen' co' nzi yuhua no Jesús loo mes, ne'ñeede myen' no ne'ta'de myen' cuent chonon ale tataa ndxab Jesús loo Jud. <sup>29</sup> Ndxep myen' mbli xtùuz por nzo ya' Jud bols co' ndxòosua' tmi, por cona mbli myen' xtùuz tataa ndxab Jesús loo Jud: Fxi con' naquin na' co'se' gáal lni, o: Fta' ndxep centav càa mèn prob.

<sup>30</sup> Texal ngolo nduhua Jud thib ro pana, xexte ngro' Jud par fuer. Hor co'se' ngro' Jud par fuer, hora nde làale' yál' izlyo' huiza.

*Jesús ngue ta' cuent loo myen' xin' mté'th Jesús cón che'n yalñibe' cub.*

<sup>31</sup> Texal ngolo ngro' Jud, Jesús ndxab loo myen' xin' mté'th Jesús:

—Nalle' nac tiemp co'se' lu'en con' roo con' xèn co' nac cón chenen, daa co' mbal yáal loo izlyo' ndxè' xalque' ndxáal chol mèn loo izlyo' ndxè'. No li Diox gac con' roo con' xèn cón che'n Diox loon. <sup>32</sup> No chele' daa, co' mbal yáal loo izlyo' ndxè' xalque' ndxáal chol mèn loo izlyo' ndxè', lu' con' roo no con' xèn cón che'n Diox loo mèn nalle', le' sya,

Diox, ne, lu' loo mèn con' co' nac con' roo no con' xèn co' nac cón che'npe' daa co' nac xgan'pe' Diox. Naba'leque' lu' Diox loo mèn con' co' nac con' roo no con' xèn co' nac cón chenen. <sup>33</sup> Gu' co' nac xal xin' bix daa, thidtene niin loo gu' nalle': Ya ne'tolode go non gu'. Gu' cua'n daa. Per xalque' nac dí's co' ndxaben loo mèn co' ñibe', no co' ndyoo ner, no co' ndyoo naa loo mèn nación Israel, leque di'sa ngue niin loo gu' nalle': Co'te' biin, gu' ne'gácte yòo nalle'que'. <sup>34</sup> Daa ngue tan' tedib di's co' ngue ñibe'en loo gu' co' nac yañibe' cub co' ngue ñibe'en loo gu' par li gu'i: Fque' lezo' gu' gunèe gu' thib xtàa gu' no tedib xtàa gu' xalque' mque'que' lezon ñèen gu', ndee. Tataaque' ndlyazen fque' lezo' gu' ñèe gu' thib xtàa gu' no tedib xtàa gu' xalque' ngue lezo' gu' ñèe gu' gu', ndee. <sup>35</sup> Chele' gu' nque'que' lezo' ñèe gu' thib xtàa gu' no tedib xtàa gu', sya, ryete mèn izlyo' ta'que' cuent le' gu' nac xin' mté'th daa.

*Jesús ngue te'th le' Pedr cà di's cón che'n Jesús loo mèn.*

*(Mt. 26.31-35; Mr. 14.27-31; Lc. 22.31-34)*

<sup>36</sup> Sya, mnibdi's Mon Pedr loo Jesús. Ndxab Mon:

—Tad, ¿páxe' ya U'? ¿Chonon tatua' mbez U', à'?

Jesús mcàb loo Pedr. Ndxab Jesús:

—Co'te' biin, lùu yende mod tyoo nque xísen nalle'. Per yiloa lùu tyoo nqueque' xísen.

<sup>37</sup> Sya, ndxab Pedr loo Jesús:

—Tad, ¿chonon ngue li U' xtùuz ne'gácte daa too nque'en xís U' nalle', à'? Daa ngòc nable' par gath daa por cón che'n U' chele'i naquin, Tad.

<sup>38</sup> Per Jesús le'le' mcàb loo Mon Pedr. Ndxab Jesús:

—¿Ché', lìcque', mnibe'l loo lezo'l gathl por daa, cà', Pedr? Lìcpe' ba'i, na ngue nii lool: Ndoore' cuezèe nguudtee lé' nguudtee yál' nal yál', lùu cà di's daa son vez loo mèn nal yál'.

## 14

*Jesús ngue lu' loo mèn nac Jesús xal thib ned par yòo ban no mèn Diox.*

<sup>1</sup> Ne'xon'te lezo' gu'. Blec see tee lezo' gu'. Ne' ne' ya ye'th lezo' gu'. Chele' gu' ndxela's loo Diox, gola's gu' loon, ne. <sup>2</sup> Tac liz xuden co' ndub loo bé' anze'f thib lugar nzo co'te' yòo ban mèn. Chele'i intataade nac, axta ne' ne' ngniin loo gu' xá naca. Cona, ngue niin loo gu': Daa biique' par ga li na'ben co'te' yo gu'. <sup>3</sup> No co'se' yilo biin no yilo li na'ben co'te' yo gu', beren, galen tedib vez par gal xin gu' par gàca le' co'te' gon, gu', ne, yo no daa. <sup>4</sup> Gu' nonque' co'te' biin no non gu' ned biin.

<sup>5</sup> Ndxab Max loo Jesús:

—Tad, nu' ne'ñeede ned co'te' bii U'. ¿Xá mod ndlya's U' ta' nu' cuent no ñee nu' neda, sya?

<sup>6</sup> Jesús mcàb. Ndxab Jesús loo Max:

—Daa nac xal thib ned nalipe' co' ndxòo loo bé' co'te' nzo Diox. No daa nac xa' co' ndyoodi's di's co' nac lìcpe'. No nac daa xa' co' ndli par yòo ban no mèn Diox thidtene. Tac ante por cón chenen gác mèn yòo mèn co'te' nzo xuden Diox. <sup>7</sup> Chele' gu' ndlibe'que' daa co' huen huen no nda' gu' cuent cón chenen, gu' ndlibe'que' xuden Diox, ne. Nalle'que' ngue libe' gu' xuden Diox. No ngue hui' gu' xal ñaa loo xuden Diox.

<sup>8</sup> Sya, ndoole' Lip mcàb. Ndxab Lip loo Jesús:

—Tad, blu' U' xud U' loo nu' no fta' U' lugar hui' nu' loo xud U' no con cona'te ne'tolode ñee nu' loo U' blu' U' xud U' loo nu'.

<sup>9</sup> Jesús mcàb loo Lip. Ndxab Jesús:

—Lip, ne' pól ndxàc ngue tee non gu'. No ¿axta nalle' tarte libe'l daa co' huenleque', cà'? Mèn co' ngue hui' loon, mènna ngue hui' loo xuden, ne. ¿Chonon mbezl loon: Blu' U' xud U' loo nu', sya? <sup>10</sup> ¿Ché' axta nalle' indxela'stel le' ryop nu' xuden thidte nac no nzon loo xuden no xuden nzo loon, cà'? Le' di's co' ndyoodizen loo gu' na, indyoodistena loo gu' xal nee lezon. Per xuden co' nzo ban no daa no co' nzo loon, xuden ndli par ndlin zin' co' neepe' lezo' xuden par lin. <sup>11</sup> Gola's gu' loon le' ryop nu' xuden thidte nac. Nzon loo

xuden no xuden nzo loon. Chele' gu' ne'gácte yila's cón ngue niin loo gu' ndxè', gola's gu' loon por cón che'n leque zin' co' ndlin no por mod co' ndxàpen. <sup>12</sup> Lìcpe' ba'i, na ngue nii loo gu': Mèn co' ndyal ndxela's loon, mènna li con' ndlin. No li mènna más con' roo con' xèn leque con' ngue lin tac daa biique' co'te' nzo xuden par lin le' gu' li con'a. <sup>13</sup> Ryete con' ña'b gu' loo xuden Diox ante por lèen, na lique' con'a par gàca loo gu' no par lu'en loo mèn con' roo con' xèn co' ndlin por cón che'n xuden Diox, daa co' nac xgan' Diox. <sup>14</sup> Daa lique' chol con' co' ña'b gu' por cón che'n lèen par gàca loo gu'.

*Jesús mcàbòn loo mèn le' Jesús tel' Xpii Natú' loo mèn loo izlyo'.*

<sup>15</sup> Chele' gu', lìcque', nque' lezo' ñèe gu' daa, ftubdi's gu' no bli gu' con' ñibe'en loo gu'. <sup>16</sup> Le' sya, daa ña'b loo xuden Diox tel' xuden Diox tedib xa' co' lyath no gu' no co' tegán lezo' gu'. Xa' co' xuden tel' nac Xpii Natú' co' inquediide. Xuden tel' Xpii Natú' par yo no Xpii Natú' gu' thidtene. <sup>17</sup> Per loo mèn co' más ndli par nzi tee ban mèn loo cón che'n xab izlyo', loo mènna yende mod yò Xpii Natú'. Tac yende mod hui' mènna no yende mod libe' mènna Xpii Natú'. Per gu' nda'le' cuent no ndlibe'que' gu' Xpii Natú' tac nzo nole' Xpii Natú' gu'. No toloque' yo no Xpii Natú' gu' thidtene. <sup>18</sup> Ne'lá'ya'den gu' no ne'tan'ten gu' xal thib ftyà'f, ey. Daa bere gal loo gu' tedib vez. <sup>19</sup> Taapláte huiz be' ngue hui' mèn co' ne'ndalte ngala's loon loon. Yiloa ya ne'huide mènna loon. Per gu' bereque' hui' loon tac nabanque' daa. No por cona, gu' banque', ne. <sup>20</sup> Co'se' gac huiza, gu' yila's no li la's gu' le' daa nzoque' loo xuden no le' gu' na, nzoque' loon no nzoquen loo gu', ne. <sup>21</sup> Le' mèn co' non no nda' mèn cuent cón nac co' ñibe'en loo mènna, no ndyubdi's mènna co' ñibe'en loo mènna, mènna nac mèn co' nque' lezo' ñèe daa. Mèn co' nque' lezo' ñèe mèn daa, xuden Diox nque' lezo' ñèe Diox mènna, ne. No daa nque' lezo' ñèen mènna. Por cón che'n Xpii Natú', lu'en cón chenen loo mèn co' nque' lezo' ñèe daa.

<sup>22</sup> Sya, ndoole' Jud co' inacte Iscariot. Ndxab Jud loo Jesús:

—Tad, ¿cón gac? ¿Chonon ante loo nu' lu' U' cón che'n U' por cón che'n Xpii Natú' no ne'lu'de U' cón che'n U' loo mèn co' alithe nzi tee ban loo cón che'n xab izlyo', à'?

<sup>23</sup> Jesús mcàb loo Jud. Ndxab Jesús:

—Mèn co' nque' lezo' ñèe daa, mènna ndyub nza di's co' mbezen loo mènna, no ndyubdi's mènna di's co' mbezen loo mèn. Lomisque', que' lezo' xuden ñèe xuden mènna, ne. Le' sya, ryop xud nu' yò ban no mènna. <sup>24</sup> Per mèn co' inque'de lezo' ñèe daa, mènna nteri'th di's no nteri'th nza mènna di's co' ndyoodizen loo mènna no indyubdi'ste mènna di's co' mbezen loo mènna. Hui' gu' nexa. Di's co' ndyoodizen loo gu', le'i inacte co' ñibe'pe'en loo gu' cón che'npe'en. Ndxè'leque', di'sa nac co' mnibe' xuden Diox co' mtel' daa par tyoodizena loo gu'.

<sup>25</sup> Ngue niin ryete di's ndxè' loo gu' láth be' nzo non gu' nalle', ey. <sup>26</sup> Per Xpii Natú' co' tel' xuden loo gu' por cón che'n daa, Xpii Natú'a lyath no gu'. No tegán Xpii Natú' lezo' gu'. No lu' Xpii Natú' ryethe cón chenen loo gu'. No li Xpii Natú' par te' lezo' gu' ryete con' co' guniilen loo gu' láth mque tee non gu'.

<sup>27</sup> Nase ndyàan no ngue niin Diox loo gu'. Per mastale' ndyàan, ndlyazen le' gu' cue ban rye nda gu' no rye ndye'th gu' làth xtàa gu'. Lomisque', lin par que tee ban gu' rye nda gu' no rye ndye'th gu' làth xtàa gu'. Per ne'lidena loo gu' xal ndxàca loo mèn co' alithe nque tee ban loo izlyo' co' pente nxec ñèe xtàa mèn. Ne'xon'te lezo' gu'. Blec see tee lezo' gu'. Ne' ne' ya ye'th lezo' gu'. Ne' ne' zye'b gu'. <sup>28</sup> Gu' mbìnle' le' daa guniile' loo gu' le' daa biique' loo xuden Diox. No yiloa beren, galen tedib vez par go non gu'. Chele' gu', lìcque', nque'que' lezo' ñèe gu' daa, le' sya, huen ngyan' lezo' gu' no ndac lezo' gu' co'se' mbin gu' le' daa biique' loo xuden Diox tac xuden más ñibe' leque daa. <sup>29</sup> Thidtene ngue niin con' ndxè' loo gu' ndoore' tyactii daa no gath daa no ryo xban daa par co'se' gàca loon, yila's gu'i no tolo gáp gu' yalxla's loon yiloa.

<sup>30</sup> Per nalle' ya ne'tolode toodi's non gu' arid tac ndele' xa' co' ñibe' loo mèn co' alithe nzi tee ban loo izlyo' ndxè'. No yende chó derech ndxàp xa' co' ñibe' loo mèn loo izlyo' par ñibe' xa' loon. <sup>31</sup> Per mastale' yende chó derech ndxàp xa' par ñibe' xa' loon,

ndxàalque' tataa gàca loon par ñee mèn izlyo' no ta' mèn izlyo' cuent le' daa nque' que' lezo' xuden Diox no ñee mèn izlyo' le' daa ndyubdizque' no ndliquen xal ñibe' xuden loon. Goo too gu'. Ya' gu' ndyàa na' trè', ey.

## 15

*Jesús mtetac loo mèn cón che'n Jesús xal thib xan' lus uv.*

<sup>1</sup> Nde niin thib con' loo gu', ey: Daa nac xal thib xan'pe' lus uv. Le' xuden na, nac xal mèn co' ndli zin' loo lus uv no xal mèn co' nquenap lus uv. <sup>2</sup> Ryete mèn co' nzo loo cón chenen co' indyubdi'ste loon no co' indlide con' co' ñibe'en, mènna nac xal lus uv co' nxyòod loo co' inda'de xlè. Xuden Diox co' xà' mènna loon no co' too xuden Diox mènna loon xal co'se' ncho' mèn xòod lus uv co' inda'de xlè. Per ryete mèn co' nac xal lus uv co' nxyòod loo co' nda' xlè, xuden Diox tolo li par gac mènna mèn co' li xal ñibe' Diox no xal ndlyas Diox li mènna xal co'se' ndli lan' mèn xòod lus uv no ntembii mèn xòod lus uv par ta' lus uv más xlè. <sup>3</sup> Per ndxe'leque', part cón che'n gu', gu' ngro xà'le' loo cón che'n xab izlyo' no loo cón che'n co' nac chol costumbr no loo chol con' ye'rsin' tac di's co' mdoodizlen loo gu'a nguaa'd nza gu' no le'n lezo' gu' par mden' gu' no li gu' co' mnibe'en loo gu' li gu'. <sup>4</sup> Thidteneque' fque tee ban gu' loo cón chenen. Le' daa na, thidteneque' que tee ban no gu', ne. Tac thib xòod lus uv yende mod ta' xlè chele' xòod ne'xyòodte loo lus uv. Lomisque' mod, yende mod li gu' con' ñibe'en loo gu' no co' ndlyazen li gu' chele' gu' thidteneque' ne'tolode que tee ban ante loo cón chenen.

<sup>5</sup> Daa nac xal thib xan' lus uv. Le' gu' na, nac xal ram lus uv. Mèn co' thidteneque' tyal par que tee ban mènna ante loo cón chenen no thidte que tee ban non mènna, mènna lique' co' ñibe'en loo mènna. No li mènna con' ndlyazen li mènna xal thib xòod lus uv co' nda' huax xlè. Cona, ngue niin loo gu': Yende mod gac gu' li gu' xal ñibe'en loo gu' no con' ndlyazen li gu' chele' gu' ne'que tee bante ante loo cón chenen. <sup>6</sup> Mèn co' ne'tyalte par thidteneque' que tee ban mènna loo cón chenen, mènna co' xà' Diox no co' too Diox mènna loon no loo cón chenen. No que tee lux mènna loo cón chenen xal thib xòod lus uv co' mcho' par biiz xòod lus uva. Yiloa, tecua' mèn xòod lus uva loo quii par yol xòod loo quii.

<sup>7</sup> Chele' gu' thidteneque' que tee ban loo cón chenen no ne'yathla'ste gu' con' co' mblu'en loo gu' par li gu'i, bna'b gu' ryete con' ndlyas gu' loo xuden Diox. Sya, xuden Diox li par que no gu' con' co' ña'b gu'. <sup>8</sup> Loo xuden Diox ndxàc con' guryath no con' guryèn co'se' huen huen ndli gu' ryethe con' co' ñibe' xuden Diox loo gu' par li gu'i no con' co' ndlyas xuden Diox li gu'. Le' sya, tataa mod ndlu' gu' le' gu', licque', nac xin' mté'thpe' daa. <sup>9</sup> Daa anze'f nque' lezo' ñèen gu' xalque' nque' lezo' xuden Diox ñèe xuden Diox daa. Texal nque' lezon ñèen gu', tataa ftubdi's gu' loon no bli gu' con' ñibe'en loo gu', ey. <sup>10</sup> Chele' gu' tyubdi's loo di's co' ñibe'en loo gu', tataaque' thidtene que' lezon ñèen gu'. Tac xalque' ndyubdizen loo di's co' ñibe' xuden loon, tataaque' xuden thidteneque' nque'que' lezo' ñèe xuden daa.

<sup>11</sup> Taandxè' ngue toodiz non gu' par tyac lezo' gu' con daa no loo cón chenen. No tataa mod thidtene xyo'f nde' xyo'f ndla' lezo' gu' no yan' gust lezo' gu' por cón chenen axta plóthe. <sup>12</sup> Di's co' ngue ñibe'en loo gu' par li gu' nac con' ndxè': Ndlyazen le' gu' que' lezo' ñèe gu' thib xtàa gu' no tedib xtàa gu' xalque' nque' lezon ñèen gu'. <sup>13</sup> Yende thib mbi' loo izlyo' co' nque' tín' lezo' ñèe xtàa axta gath mbi' por xtàa mbi'. Con'a nee di's, licque', anze'f nque' lezo' mbi' ñèe mbi' xtàa mbi' chele' mbi' li tataa. <sup>14</sup> Gu' ndxàc amiu daa co' nazin' daa chele' gu', licque', li co' ñibe'en loo gu'. <sup>15</sup> Ya ne'tolode bezen loo gu' xal mbez mèn loo thib moz tac moz ne'ñeeede cón li patrón moz. Per nalle' más huen bezen loo gu' nac gu' amiu daa co' anze'f nazin' daa tac daa mda'le' cuent loo gu' cón che'n ryete con' xal gunee xuden Diox loon par niina loo gu'. <sup>16</sup> Inacta le' gu' mcai daa. Ndxè'leque', daa mcai gu'. No mtan'en di's loo gu' par ya li gu' ryethe con' co' mnibe'en loo gu'. Loo con' co' mnibe'en loo gu'a, gac gu' loon xal thib yaa xlè co' nda' xlè ndac. Por cona, mcaulen gu' par thidteneque' li gu' con' ndac co' mnibe'en loo gu' li gu'. Chele'

gu' tataa li, le' sya, xuden li par que no gu' ryethe con' co' ña'b gu' loo xuden por lèen.  
<sup>17</sup> Con' ndxè' nac co' ñibe'en loo gu', ey: Ndiyazen le' gu' que' lezo' ñèe gu' thib xtàa gu'  
 no tedib xtàa gu'.

*Jesús nque ta' cuent loo myen' xin' mté'th Jesús le' mèn izlyo' ndxòo xyàn lezo' ñèe mèn Jesús  
 no ndxòo xyàn lezo' mèn ñèe mèn myen' xin' mté'th Jesús.*

<sup>18</sup> Chele' mèn co' alithe nque tee ban loo izlyo' ndxòo xyàn lezo' ñèe mèn gu', gu' naneeque' no nda' gu' cuent le' mènà ner ngòo xyàn lezo' gunèe mènà daa ndoore' yòo xyàn lezo' mènà ñèe mèn gu'. <sup>19</sup> Chele' gu' be' nac mèn co' nzi tee ban loo cón che'n xab izlyo', le' sya, mèn co' nzi tee ban loo cón che'n xab izlyo', que' lezo' ñèe mènà gu' xalque' nque' lezo' mènà ñèe mènà xtàa mènà. Per com le' daa mcui gu' làth mèn co' nzi tee ban loo cón che'n xab izlyo', ¿lé'?, cona, mèn co' alithe nzi tee ban loo cón che'n xab izlyo' ndxòo xyàn lezo' mènà ñèe mènà gu' tac gu' ya inzi tee bante loo cón che'n xab izlyo' xal mènà. <sup>20</sup> Fte' lezo' gu' xal nac di's co' guniilen loo gu': Yende nec thib moz co' más ñibe' loo patrón. Cona, nque niin loo gu': Chele' mèn mdub ngu's daa no ndoo nque mèn xísen par guth mèn daa, tub ngu's mèn gu' no tyoo nque mèn xís gu' par guth mèn gu', ne. Lomisque' ne, chele' mènà mdyubdi's di's co' mblu'en loo mènà, tyubdi's mènà di's co' lu' gu' loo mènà. <sup>21</sup> Ryete con'a li no mèn gu' ante por cón chenen no maste tac indlibe'de mènà xuden co' mtel' daa loo izlyo' ndxè'.

<sup>22</sup> Yende chó dol ngàp mènà loo Diox chele' daa ne'ngalte loo izlyo' par mdoodiz non mènà. Per nalle' yende mod gol' mènà di's loon no quedii mèn daa le' mènà indxàpte dol. <sup>23</sup> Lomisque' ne, mèn co' ndxòo xyàn lezo' ñèe mènà daa, mènà ndxòo xyàn lezo' ñèe mènà xuden Diox. <sup>24</sup> Yende chó dol ngàp mènà chele' mènà nda' cuent no mden' mènà cón mblin. Tac con' co' mblin loo mèn tarte li nec thib mèn co' naban loo izlyo' ndxè'. Per mènà gunèeque' con' co' mblin. Per mastale' gunèe mènà con' co' mblin, ale le'le' ndxòo xyàn lezo' mènà ñèe mènà daa no ndxòo xyàn lezo' mènà ñèe mènà xuden Diox. <sup>25</sup> Per ndxàc con' ndxè' loon par gàcque' no tyaaque' no tyubque' di's xal ndxab di's co' ndub loo libr co' nac ley co' mxo'f Moisés loo mèn. Di'sa mbez:

Ale ngòo xyàn lezo' mèn gunèe mèn daa. No ale yende con' nque lin loo mèn par yòo xyàn lezo' mèn ñèe mèn daa.

<sup>26</sup> Daa tel' Xpii Natú' loo gu' xal ñibe' xuden Diox loon. Xpii Natú'a indyè'de. Lyath no Xpii Natú' gu' no tegán Xpii Natú' lezo' gu'. Co'se' yi'th Xpii Natú' co' tel'en loo gu', Xpii Natú' tolo tyoodi's no gu' cón chenen. No ta' Xpii Natú' cuent loo gu' cón chenen. <sup>27</sup> Le' sya, gu' ta' cuent loo mèn no tyoodi's no gu' mèn cón chenen tac gu' ngo noque' daa axta co'se' nerleque' mtlon mque tee tan cuent loo mèn loo izlyo' ndxè' no mdoodizen cón chenen loo mèn loo izlyo' ndxè'.

## 16

<sup>1</sup> Nque niin con' ndxè' loo gu' par ne'gàc chopte lezo' gu' no par ne'tyoo xà'de lezo' gu' por cón chenen. <sup>2</sup> Gàca loo gu' le' mèn co' chug gu' no tè'b mèn gu' no co' too mèn gu' le'n sinagog mèn. No axta zin thib huiz no zin thib ze gab chol mèn le' mènà nque li thib zin' ndac loo Diox por guth mèn gu'. <sup>3</sup> No li mènà con' ndlya's mènà con gu' tac mènà thidteneque' indlibe'de xuden Diox. Ne' ne' inda' mènà cuent cón che'n xuden Diox. No ne' ne' indlibe' mènà daa. <sup>4</sup> Nque niin con' ndxè' loo gu' par co'se' zin hora no zin huiz co'se' co' chug mèn gu' le'n sinagog, te' lezo' gu' le' daa guniile' cón che'n co' gac loo gu'.

*Trè' ndlu' cón che'n zin' co' nque li Xpii Natú' loo mèn loo izlyo'.*

Ne'ngniiden con' ndxè' loo gu' co'se' nerleque' mtlon mdoodizen loo gu' tac daa nzo noque' gu'. <sup>5</sup> Per nalle' daa bii par go non xa' co' mtel' daa. No nec thib gu' indyóode chonon niin biin, ndyaquen. No nec thib gu' ne'nibdi'ste loon: ¿Pá ya U', à', Tad? <sup>6</sup> Per nalle' ndyaquen tac guniin loo gu' le' daa bii loo xa' co' mtel' daa, nden'en le'n lezon nxi lezo' gu'. <sup>7</sup> Lìcque' nac co' nque niin loo gu' ndxè', ey. Por part cón che'n gu', más huen gaca loo gu' ndyàan. Tac chele' daa ne'biide, ne'yi'thte Xpii Natú' loo gu' par lyath no



Xpii Natú' gu' no par tegán Xpii Natú' lezo' gu', sya. Per chele' daa biique', le' sya, na tel' Xpii Natú' yi'th Xpii Natú' loo gu'. <sup>8</sup> Co'se' yi'th Xpii Natú' loo mèn loo izlyo', Xpii Natú' li par yila's mèn le' mèn ndxàp xtol. No li Xpii Natú' thib con' loo mèn par ta' mèn cuent nzo thib mod co' ndli par que tee ban lì mèn loo Diox. No li Xpii Natú' par non mèn le' Diox tub rez cón che'n mèn loo mèn yilóa. <sup>9</sup> Na ngue nii loo gu' le' mèn nac mèn co' ndxàp xtol tac ne'ndalte mèn na ngala's mèn na loon no loo cón chenen. <sup>10</sup> Por cón che'n Xpii Natú' ta' mèn cuent no non mèn nzoque' thib mod que tee ban lì mèn loo Diox. Xpii Natú' lu' con'a loo mèn tac daa biique' loo xuden Diox. Le' gu' na, ya ne'tolode hui' loon. <sup>11</sup> Por cón che'n Xpii Natú' ta' mèn cuent no non mèn le' Diox tub rez cón che'n mèn loo mèn tac mquexù'le' Diox Mebizya co' ñibe'pe' loo izlyo' ndxè' nalle'.

<sup>12</sup> Tatabe' nzo huax con' co' ndlyazen toodiz non gu'. Per nden'en axta ne' ne' xec yéc gu' par yòo yéc gu' di's co' lyazen niin loo gu'. <sup>13</sup> Per co'se' yi'th Xpii Natú' co' indyè'de loo gu' loo izlyo' ndxè', Xpii Natú' lu' loo gu' ryete con' co' nac lìcpe'. Tac Xpii Natú' ne'tyoodi'ste ante cón che'n Xpii Natú'. Ndxè'leque', Xpii Natú' lu' loo gu' ryete con' co' gòn Xpii Natú' co' gab xuden Diox. No ta' Xpii Natú' cuent loo gu' cón che'n con' co' gác yilóa. <sup>14</sup> Xpii Natú' li par gác con' guryath no con' guryèn loon tac Diox ñibe' loo Xpii Natú' lu' Xpii Natú' ryete con' co' nac cón che'n daa loo gu'. <sup>15</sup> Ryete con' co' ngue no xuden Diox nac chenen, ne. Cona, guniilen loo gu' le' Diox ñibe' loo Xpii Natú' par lu' Xpii Natú' no co xo'f Xpii Natú' ryethe cón chenen loo gu'.

*Jesús ngue yab loo myen': Yalnaxi co' ndxàc loo gu', le'i càb loo gu' le' gu' tyac tín' lezo' yilóa.*

<sup>16</sup> Le'n taapláte huiz gu' ya ne'hui'de loon. Per yilóa le'n taaplá huiz gu' bere hui' loon tedib vez tac daa bii co'te' nzo xuden.

<sup>17</sup> Le' sya, plá myen' xin' mté'th Jesús mnibdi's loo thib xtàa myen' no loo tedib xtàa myen'. Ndxab myen':

—¿Cón nee di's di's co' ngolo gunee Tad loo na' ba', yey? Tad gunee loo na' le' le'n taapláte huiz ya ne'hui'de na' loo Tad no yilóa le'n taaplá huiz bere na' hui' na' loo Tad. No ¿cón nee di's co' gunee Tad loo na' le' Tad bii loo Diox xud Tad, yey? <sup>18</sup> ¿Cón nee di's di's co' gunee Tad loo na' le'n taapláte huiza, cara? Ne'ta'de na' cuent cón nee di's co' gunee Tad loo na', ¿lé'?

<sup>19</sup> Per Jesús mden' lezo' le' myen' mbly'a's ñibdi's loo Jesús. Por cona, ndxab Jesús loo myen':

—Na ngue nii loo gu' le' le'n taandxepte huiz gu' ya ne'hui'de loon. Per yilóa le'n taandxepte huiz gu' bere hui' loon tedib vez. ¿Ché' cón che'n di's ndxè' nzi nibdi's gu' loo xtàa gu', cà'? <sup>20</sup> Lìca, na nii loo gu' le' gu' gón' no cue xi lezo' gu' por cón chenen. No co'se' ñèe mèn izlyo' ndxàca tataa loo gu', tyac lezo' mèn ñèe mèn gu'. Mastale' nzi xi lezo' gu', per co'se' yilo xi lezo' gu', ale ndxe'leque', tyac lezo' gu' tedib vez axta plóthe. <sup>21</sup> Nde niin thib con' loo gu': Co'se' yamerle' gáal xin' thib xa'got, anze'f ndyóo xa' tac yamerle' gáal hor co'se' ten' xa' yalnè no ten' xa' yo'f co' quée loo xa'. Per co'se' ngolole' mxan xa' thib mbed, ya ne'tyede lezo' xa' máa yalnè co' mden' xa'a tac anze'f ndyac lezo' xa' le' mbed co' ngóola nac thib mbedbi'. <sup>22</sup> Tataa nzi xi lezo' gu' nalle'. Per ne'tyóode gu'. Daa bere hui' loo gu'. Sya, anze'f tyac lezo' gu'. No co'se' tyac lezo' gu'a, con'a gác thib gust co' yende chó mèn teche loo gu'.

<sup>23</sup> No co'se' gác hora no huiza, nec thib con' ne'ñibdi'ste gu' loon, ndee gu'. Lìca, na nii loo gu' le' ryete con' co' ña'b gu' loo xuden por lèen, xuden li par que no gu'i. <sup>24</sup> Anon mtlon mque tee non gu' no axta nalle' tarte ña'b gu' nec thib con' loo xuden por lèen. Bnab gu'i no daa li par que no gu'i par yan' gust lezo' gu' no tyac lezo' gu'.

*Trè' ndlu' le' Jesús ngue yab loo mèn: Daa mbilile' gan loo mèn ye'rsin' loo izlyo' ndxè'.*

<sup>25</sup> Daa mdoodizle' con' ndxè' loo gu' xal ntetac mèn cón che'n thib con' loo mèn. Per zin thib hor co'se' ya ne'tetacten di's co' tyoodizen loo gu'. Ndxè'leque', nalite no nambiite tyoodizen loo gu' cón che'n xuden Diox. <sup>26</sup> Huiza no hora ña'b gu' con' loo xuden Diox por lèen. No thidtene niin loo gu' le' daa ne'ña'bte con' loo xuden Diox por

cón che'n gu' <sup>27</sup> tac yub xuden Diox nque' lezo' ñèe Diox gu' tac gu' nque' lezo' gunèe gu' daa. No ngola'sque' gu' le' daa ngro' loo xuden Diox. <sup>28</sup> Daa ngro'le' loo xuden Diox no ndalen loo izlyo' ndxè'. Per nalle' na ro' loo izlyo' ndxè'. Beren, ndyàan loo xuden Diox tedib vez.

<sup>29</sup> Sya, ndxab myen' xin' mté'th Jesús loo Jesús:

—Nase clarleque' ngue toodi's U' loo nu'. No indyoodi'ste U' di's co' ntetac U' thib con' con' tedib con' loo nu'. <sup>30</sup> Nase non nu' le' U' nanee ryethe con', Tad. No ya inaquinte ñibdi's mèn nec thib con' loo U'. No por cona, ndxela's nu' le' U' ngro'le' loo Diox.

<sup>31</sup> Jesús mcàb loo myen'. Ndxab Jesús:

—¿Ché' nare', por derech, ngola's gu' loon, cà'? <sup>32</sup> Hui' gu' nexa. Le' hor mzinle' no leque hor ndxè' nac hor co'se' gac con' ryes loo gu'. No xà' xà' tyen thib thib gu' ned. No thidten lá' gu'. Per ne'yan'te thidten tac xuden Diox nzo noque' daa. No ne'lá'de xuden daa thidten. <sup>33</sup> Ngue niin ryete con' ndxè' loo gu' par cue see tee lezo' gu' por ndxela's gu' loon no ndxàp gu' yalxla's loo cón chenen. Láth be' nziri' gu' loo izlyo' ndxè', anze'f tyactii gu' no cue xi lezo' gu'. Per gòp gu' yalxla's loon no ne'tyoo xà' de lezo' gu' loo cón chenen. Tac nase daa mblile' gan loo rye loothe con' co' nac ngolo ngola's co' nac xab izlyo' loo izlyo' ndxè' co' ncàb con' ye'rsin' loo mèn.

## 17

*Jesús ngue bez Diox por myen' xin' mté'th Jesús.*

<sup>1</sup> Ngolo mdoodi's no Jesús myen' xin' mté'th Jesús, Jesús mbui' loo bé'. No ndxab Jesús:

—Pay, nase mzinle' hor co' gac yaltii loon. Bli U' par gac con' roo con' xèn loon, daa co' nac xgan' U', par gaca le' daa co' nac xgan' U' li par tolo gac con' roo con' xèn loo U', ne. <sup>2</sup> U' mnibe' loon, daa co' nac xgan' U', par ñibe'en loo ryete mèn co' nzi ban dib athu loo izlyo' par tataa mod lin par yòo ban no mèn U' thidtene, ryete mèn co' mbli U' par mdyal mènà yòo mènà loo cón chenen. <sup>3</sup> Yalnaban co' nda' U' loo mèn, co' nee di's, yòo ban no mèn U' thidtene ndxàc loo mèn por ndlibe' mèn U', U' co' nac thidte Diox licpe', no por mblibe' mèn daa co' nac Jesucrist co' mtel' U' mbi'th loo mèn loo izlyo' ndxè'.

<sup>4</sup> Daa mblile' ngòc con' roo con' xèn loo U' loo izlyo' ndxè'. No nalle' mtelolen ryethe con' co' mnibe' U' loon par mblina. <sup>5</sup> Per nase, Pay, ña'ben loo U': Bli U' par gac leque con' roo con' xèn loon co' ngòc loon ndoore' co'se' mblec U' izlyo' ndxè'.

<sup>6</sup> Ryete mèn co' mcui' U' no co' mblo' xà' U' làth mèn co' ndli cón che'n xab izlyo' co' mbli U' ngòo loo cón chenen, daa mda cuent loo mènà no mblu'en loo mènà chó nac U' no cón nac cón che'n U'. Rye mèn co' mcui U' no co' mblo' xà' U' loo cón che'n xab izlyo', mènà ngòc che'npe' U'. Ngoloa, mblo U' mènà loo cón chenen. No mdubdi'sque' mènà no mdub nza mènà loo con' mnibe' U' loo mènà. <sup>7</sup> Per nase ryete mènà mbli la'sle' le' ryete con' co' mblin no co' mblu'en loo mèn, yub U' mbli loon par mblina. <sup>8</sup> Daa mdoodizle' di's co' mnibe' U' loon toodizen loo mènà. Mda'que' mènà lugar mbìn mènà di's. No mden' mènà no mda' mènà cuent le' daa, licque', ngro' loo U'. No ngola'sque' mènà le' U' mtel' daa loo izlyo' ndxè'.

<sup>9</sup> Pay, daa ña'b loo U' por cón che'n mèn co' ngòo loo cón chenen. Ña'bten loo U' por cón che'n mèn co' más ndli cón che'n co' nac xab izlyo'. Ndxè'leque', ña'ben loo U' por cón che'n mèn co' U' mbli mdyal par ngòo mèn loo cón chenen tac mènà nac che'npe' U'. <sup>10</sup> Ryete mèn co' mbli U' mdyal par ngòo mènà loo cón chenen no rye loothe con' co' nziri' loo izlyo' co' nac che'npe' daa nac che'n U'. Rye loothe con' co' nac che'n U' nac chenen, ne. No por cón che'n mèn co' mbli U' mdyal par ngòo mènà loo cón chenen ndxàcque' con' roo con' xèn loon.

<sup>11</sup> Daa ya ne'tolode go loo izlyo' ndxè'. Per mèn co' ngòo loo cón chenen, mènà toloque' cue ban loo izlyo' ndxè'. Le' daa na, biique' par go non U'. Pay, U' co' nac thib xa' natú', fquenap U' mèn co' mbli U' ngòo loo cón chenen con ryethe con' roo con' xèn co' nzo la's ya' U' no la's nii U' par thidteneque' thidte gac mènà xalque' thidte nac ryop na'.

<sup>12</sup> Co'se' ngo non mènà loo izlyo' ndxè', daa mquenap mèn co' mbli U' ngòo loo cón

chenen xalque' nac con' roo con' xèn co' nzo la's nii U' no co' nzo la's ya' U'. Daa mquenap mèn co' mbli U' ngòo loo cón chenen. No yende cón mxac nec thib mènà loo cón chenen, ante thib myen' co' mbyan'le' di's ryo xà' loo cón chenen, myen'a ngro xà' loo cón chenen par ngòcque' no mdyaaque' no mdyubque' di's co' ndub loo libr co' nac xti's U'.

<sup>13</sup> Per nalle' daa bii co'te' nzo U', Pay. Daa ngue nii con' ndxè' loo U' láth be' nzon loo izlyo' ndxè' par gàca xyo'f nde' xyo'f ndla' lezo' myen' no yan' gust lezo' myen' xal nxyo'f nde' nxyo'f ndla' lezon axta plóthe. <sup>14</sup> Daa mbli'le' cón che'n U' loo mèn co' mbli U' ngòo loo cón chenen xalque' mnibe' U' loon. Per mèn che'n izlyo', ale' le'le' ngòo xyàn lezo' mèn izlyo' gunèe mèn izlyo' mèn co' ngòo loo cón chenen. Tac inacte mèn co' ngòo loo cón chenen mèn co' be' ndli cón che'n xab izlyo' xalque' inacte daa mèn co' ndli cón che'n xab izlyo'. <sup>15</sup> Ingue na'bten di's loo U' par teche U' mèn co' ngòo loo cón chenen loo izlyo'. Ndxè'leque', daa ngue na'b di's loo U' le' U' tí' no làa U' mènà la's ya' Mebizya. <sup>16</sup> Com le' daa inacte mèn che'npe' izlyo' ndxè', ¿lé'?, ne' mèn co' mbli U' ngòo loo cón chenen inacte mèn che'npe' izlyo' ndxè'. <sup>17</sup> Tolo blo' xà' U' mèn co' ngòo loo cón chenen loo con' ye'rsin' co' nac cón che'n xab izlyo' por cón che'n xti's U' co' ndlu' co' nac lìcpe'. <sup>18</sup> Texal mtel' U' daa loo mèn loo izlyo' ndxè', tataaque' tel'en myen' co' nac myen'pe' daa loo mèn loo izlyo' ndxè' par lu' myen' cón chenen loo mèn izlyo'. <sup>19</sup> No por cón che'n myen'pe' daa, leque daa mnibe' loo lezon lin ante co' neete lezo' U' par gàca le' myen'pe' daa tolo ryo xà' loo con' ye'rsin' loo cón che'n co' nac xab izlyo' por cón che'n xti's U' co' ndlu' co' nac lìcpe'.

<sup>20</sup> Per ña'bten loo U' ante cón che'n myen' co' nac myen'pe' daa. Ndxè'leque', ña'ben loo U' por cón che'n mèn co' yila's loon yiloo por di's co' tyoodi's myen' no por di's co' co myen' yalbàn cón chenen loo mèn. <sup>21</sup> Ña'ben loo U', Pay, le' ryete mèn co' nac myen'pe' daa thidte gac myen' thidtene. No ña'ben loo U' thidte queltàa myen' con na' xalque' nzon loo U' no xalque' nzo U' loon xalque' thidte nac ryop na'. No ña'ben loo U', Pay, bli U' par thidte gac myen' loo cón che'n na' thidtene par tataa mod yila's mèn che'n izlyo' no non mèn che'n izlyo' le' U' mtel' daa loo izlyo' ndxè'. <sup>22</sup> Pay, daa mbli'le' loo mèn no mbli par mden' mèn cón che'n con' roo con' xèn co' ndxàc loo mèn par thidte gac mènà loo cón che'n na' xalque' ndxàc con' roo con' xèn loon por thidte nac na'. <sup>23</sup> Daa nzo noque' mèn co' ngòo loo cón chenen. No U' nzo noque' daa par tataa mod nambìite no nalite gac mènà thidte loo cón che'n na' par gàca ta' mèn izlyo' cuent le' U' mtel' daa loo izlyo' ndxè'. No par ta' mèn izlyo' cuent le' U' nque'que' lezo' ñèe mèn dib athu loo izlyo' ndxè' xalque' nque' lezo' U' ñèe U' daa.

<sup>24</sup> Pay, U' mbli par ngòo mèn loo cón chenen. Daa ndlya's le' mènà yòo co'te' gon par ñèe mènà con' roo con' xèn co' nac ryethe con' mbli U' ngòo loon. Tac U' nque'que' lezo' ñèe U' daa axta ndoore' co'se' mblec U' izlyo' no mxen' U' izlyo'. <sup>25</sup> Pay, U' co' nac thidte xa' nali no xa' nambìi, tarte libe' mèn izlyo' U'. Per daa ndlibeque' U'. No mèn co' mbli U' par ngòo mènà loo cón chenen, mènà naneeque' le' U' que' mtel' daa par mbalen loo izlyo' ndxè'. <sup>26</sup> Daa mbli'que' no mblo xo'fquen loo mèn chó nac U'. No toloque' lu'en loo mèn no go xo'fen loo mèn chó nac U' par gàca texalque' nque' lezo' U' ñèe U' daa, tataaque' que' lezo' mèn ñèe mèn hues xtàa mèn. No tataaque' lin par thidteneque' go non mènà, ne.

## 18

*Mèn co' ñibe', no co' ndyoo ner, no co' ndyoo naa loo mèn nación Israel mxenxù' Jesús xal thib pres.*

*(Mt. 26.47-56; Mr. 14.43-50; Lc. 22.47-53)*

<sup>1</sup> Texal ngolo mdoodi's no Jesús Diox xud Jesús no ngurez Jesús Diox, ngro' no Jesús myen' xin' mté'th Jesús par ya no Jesús myen' tedib lad ro thib ftee co' mbez mèn lèe Cedrón. Tya ngure thib huert. No co'te' ngure huerta ngòo no Jesús myen' xin' mté'th Jesús huax vez. <sup>2</sup> Nde nxon', no Jud co' mda'xù' Jesús loo mèn nanee lugara. Tac huax vez ndyee Jesús con myen' xin' mté'th Jesús par nqueltàa Jesús con myen' tya. <sup>3</sup> Látha, mzin

no Jud thib partid solndad, no ndxep mèn co' nxo'f zin' zin' le'n templ co' mtel' jef che'n nguley' co' más ñibe' loo rye nguley', no mèn che'n xley' farise. Nde no Jud mèn. Nzo spad ya' mèn no nzo mached no cuchi ya' mèn. No nde no mèn lintern no ye'rbèl par mtenii mèn ned nde mèn. <sup>4</sup> Per com le' Jesús nonque' no naneeque' Jesús ryethe con' tyactii Jesús, ¿lé'?, ngro' Jesús par ngua sál' Jesús mèn. Ndxab Jesús loo mèn:

—¿Chó nde cua'n gu', à'?

<sup>5</sup> Mcàb mèn loo Jesús. Ndxab mèn:

—Nu' nde cua'n mbi' co' lèe Jesús co' nac mèn yèez Nazaret.

Jesús mcàb. Ndxab Jesús loo mèn:

—Daa nac Jesús.

Làth mèn nde Jud co' ta'xù' Jesús loo mèn, ne.

<sup>6</sup> Texal ndxab Jesús loo mèn:

—Daa nac Jesús,

ale yub mèn ngulàateri' loo yòo par ned xís mèn. <sup>7</sup> Ngoloa, mbere Jesús, mnibdi's Jesús loo mèn tedib vez:

—¿Chó nde cua'n gu', à'?

Mèn mcàb. Ndxab mèn loo Jesús:

—Nu' nde cua'n mbi' co' lèe Jesús co' nac mèn yèez Nazaret.

<sup>8</sup> Jesús mcàb loo mèn. Ndxab Jesús:

—Na guniile' loo gu'. Daa nac Jesús. Chele' gu' nde cua'n daa, bla' gu' bii myen' ndxè'.

<sup>9</sup> Tataa ngòca loo Jesús par ngòcque' no mdyaaque' no mdyubque' di's co' ndxab Jesús loo Diox xud Jesús co'se' ndxab Jesús:

—Myen' co' mciui U', co' ngòo loo cón chenen, yende cón ngòo loo myen'.

<sup>10</sup> Látha nzo Mon Pedr. Nde nxon', ngue spad cho Mon Pedr. Thidte ngua ya' Mon Pedr rlan' Mon Pedr. Mdob Mon Pedr spad le'n vayin. Mblàa Mon thib ya' spad nza thib moz co' nac ladli che'n moz. Moza ngro' lèe Malc. Ngòo moza moz che'n jef che'n nguley' co' más mnibe' loo rye nguley' tiempa. <sup>11</sup> Sya, ndxab Jesús loo Pedr:

—Pedr, blosua' spad le'n vayin. ¿Ché' ndxela'sl no ndlil cuent indxàalte tyactii daa loo thib preb co' mbli nee lezo' xuden Diox tyactii daa, cà'? Yende xàa. Preb ndxè' gàcque' loon.

*Jesús mdooxù' loo mbi' co' ngòc jef che'n nguley' co' más mnibe' loo rye nguley' tiempa.*

*(Mt. 26.57-58; Mr. 14.53-54; Lc. 22.54)*

<sup>12</sup> Le' sya, rye mèn co' ngòc solndad, no xa' co' ngòc capitán, no mèn co' ngòc myen' nac zin' che'n mèn co' ñibe', no co' ndyoo ner, no co' ndyoo naa loo mèn nación Israel, rye mèn mxenxù' Jesús. Mdub dó' mèn ya' Jesús. Mbe' mèn Jesús xal thib pres.

<sup>13</sup> Mbe' mèn Jesús nerleque' loo Anás tac Anás ngòc xudzap Caifás. Caifasa ngòc jef che'n nguley' co' más mnibe' loo rye nguley' lín'a. <sup>14</sup> Leque Caifasa ngòc Caifás co' mde'th no co' ndxab loo mèn co' ñibe', no co' ndyoo ner, no co' ndyoo naa loo mèn nación Israel ndxàalque' gath thib mbi' lugar de lyux rye mèn nación Israel.

*Pedr mcà di's cón che'n Jesús loo mèn.*

*(Mt. 26.69-70; Mr. 14.66-68; Lc. 22.55-57)*

<sup>15</sup> Per látha, mdoo nque Mon Pedr con tedib myen' co' ndxàc xtàa Mon Pedr co' nac leque xin' mté'th Jesús xís Jesús. Mbi' co' nac jef che'n nguley' co' más ñibe' loo rye nguley' mblibe' mbi' co' ndxàc xtàa Mon Pedr. Sya, mdoo nque leque thib myen' co' ndxàc xtàa Mon Pedr xís Jesús axta loo lue' co'te' ngòc liz jef che'n nguley' co' más mnibe' loo rye nguley' lín'a. <sup>16</sup> Le' Pedr na, mbyan' par ro ned ro puert. Cona mbli ngro' mbi' co' ngòc myen' xin' mté'th Jesús co' nac xtàa Pedr co' mblibe' jef che'n nguley'a par mdoodi's no mbi' mozgot co' ngue quenap puert par mblo mozgota Pedr par le'n loo lue' liz nguley'a. <sup>17</sup> Sya, mnibdi's mozgota loo Pedr. Ndxab mozgota:

—¿Ché' inode lùu nac thib myen' xin' mté'th mbi' ba', ne, cà'?

Pedr mcàb. Ndxab Pedr:

—Yende xàa. Inacte daa xin' mté'th mbi' ba'.

<sup>18</sup> Le'pe' yál'a anze'f ngòc nàl. Le' sya, ryete moz che'n nguley' no myen' co' nac myen' nac zin' co' nquenap templ, mtlo myen', mtol' myen' quìi. No mtoocua' myen' yaa loo quìi par ngure biiz myen' ro rdii. Nde nixon', note Pedr ngo làth myen' par mdoo biiz Pedr ro dii.

*Anás noo noo ngue nibdi's loo Jesús cón che'n Jesús.*

(Mt. 26.59–66; Mr. 14.55–64; Lc. 22.66–71)

<sup>19</sup> Látha, jef che'n nguley' co' más ñibe' loo rye nguley' mtlo mnibdi's loo Jesús chópe' myen' nac myen' xin' mté'th Jesús no cón nac co' ngue lu' Jesús loo mèn. <sup>20</sup> Jesús mcàb loo mbi' co' nac jef che'n nguley'a. Ndxab Jesús:

—Na mdoodizque' loo mèn loo xnaa. No mblu'quen cón chenen loo mèn le'n sinagog no le'n templ co'te' nqueltàa ryete mèn co' nac mèn nación Israel. Cona, ngue niin lool: Yende cón tarte toodizen xexte loo mèn. <sup>21</sup> ¿Chonon ngue ñibdi'sl loon, à'? Bnibdi's loo mèn co' mbìnle' di's co' mdoodizlen. Mèna ta' cuent cón chenen lool xal nac di's co' mdoodizlen loo mèn.

<sup>22</sup> Co'se' ngolo tataa ndxab Jesús di'sa, thib mbi' co' ngòc myen' nac zin' co' nquenap templ co' ngo tya, thidte ngua mbi' mdi's mbi' rloo Jesús. No ndxab mbi' loo Jesús:

—¿Ché' tatua' mod ncàbl loo jefpe' che'n rye nguley', cà'?

<sup>23</sup> Jesús mcàb loo mbi'. Ndxab Jesús:

—Chele' daa mdoodiz chol di's ye'rsin', gune ñeene' xá mod nac di'sa. Per chele' daa mdoodiz di's co' nac di's ndac, ¿chonon mdi'sl rloon, sya?

<sup>24</sup> Ngoloa, mtel' Anás Jesús natedó' ya' Jesús loo tedib mbi' co' lèe Caifás co' ngòc jef che'n nguley' co' más ñibe' loo rye nguley' lín'a.

*Pedr mbere mcà di's cón che'n Jesús loo mèn tedib vez.*

(Mt. 26.71–75; Mr. 14.69–72; Lc. 22.58–62)

<sup>25</sup> Látha, Pedr ndoo biizque' ro rdii làth mèna. Sya, ndxab mèna loo Pedr:

—¿Ché' inode lùu nac thib myen' xin' mté'th mbi' ba', cà'?

Sya, mcà di's Pedr. Ndxab Pedr:

—Inacte daa xin' mté'th mbi' ba', cara.

<sup>26</sup> Sya, ndxab thib mbi' co' ngòc moz jef che'n nguley' co' más ñibe' loo rye nguley' no co' ndxàcguè' mèn guliz mbi' co' mcho' Pedr nzaa loo Pedr:

—Ale mbezl: Inacte daa xin' mté'th mbi' ba'. ¿Ché' ndlil cuent ne'ngnèeden lùu con mbi' ba' le'n huert, ne, cà'?

<sup>27</sup> Mbere Pedr, mcà di's Pedr Jesús tedib vez. Leque hora, chàa, ngrozèe nguiidtee. Mblé' nguiidtee yál'.

*Jesús mdooxù' loo thib mbi' co' ngro' lèe Pilat.*

(Mt. 27.1–2, 11–14; Mr. 15.1–5; Lc. 23.1–5)

<sup>28</sup> Sya, xtil'leque' mblo' mèna Jesús liz Caifás. Mbe' mèna Jesús loo Pilat co'te' nac palas che'n Pilat. Mèn co' mbe' Jesús loo Pilat ngòc mèn co' ñibe', no co' ndyoo ner, no co' ndyoo naa loo mèn nación Israel. Mèna ne'ngòode le'n palas che'n Pilat par ne'gàc zabte mèna loo costumbr co' ndxàp mèna cón che'n xley' mèna. Tac chele' mèn gàc mèn zab loo por thib con' co' iñaade, le' sya, cona'te li ne'yòode mèna loo mes par hua mèna co' nac yalhua che'n lni pasc. <sup>29</sup> Sya, ngro' Pilat par fuer. Ngua toodi's no Pilat mèna. Ndxab Pilat:

—¿Cón ndli nqueyèe gu' mbi' ndxè' loon, à'?

<sup>30</sup> Mcàb mèna loo Pilat. Ndxab mèna:

—Chele' mbi' ba' ne'ngàcte thib mbi' ye'rsin', ne'ngui'th node nu' mbi' lool.

<sup>31</sup> Sya, ndxab Pilat loo mèna:

—Be' gu' mbi'. No ftub rez gu' cón che'n mbi' xal ñibe' ley gu' loo gu' par li gu' con' con mbi'.

Per mèn co' ñibe', no co' ndyoo ner, no co' ndyoo naa loo mèn nación Israel mcàb loo Pilat. Ndxab mèna:



—Per nu' co' nac mèn naciòn Israel, ley co' ngue no nu' inda'de lugar loo nu' par guth nu' nec thib mèn.

<sup>32</sup> Tataa mod ngòca par mdyaaque' no ngòcque' no mdyubque' di's co' gunii Jesús cón che'n xá mod gath Jesús. <sup>33</sup> Le' sya, mbere Pilat, ngò Pilat le'n palas tedib vez. Ngurez Pilat Jesús. No mnibdi's Pilat loo Jesús. Ndxab Pilat:

—¿Ché', lìcque', lùu nac rey che'n mèn naciòn Israel, cà'?

<sup>34</sup> Jesús mcàb loo Pilat. Ndxab Jesús:

—¿Ché' ngue ñibdi'sl cón chenen ante por iñeedel cón chenen o ché' alithe ngue ñibdi'sl cón chenen tac mda'le' tedib mèn cuent cón chenen lool, cà'?

<sup>35</sup> Pilat mcàb loo Jesús. Ndxab Pilat:

—¿A poc ñeel no daa nac mèn naciòn Israel, cà'? Yende xàa. Mèn co' nac mèn naciòn lùu no mèn co' nac jef che'n nguley' co' más ñibe' loo rye nguley' che'n naciòn lùu nac mèn co' nde no lùu loon trè'. ¿Cóxe' ngue tee lil, à'?

<sup>36</sup> Jesús mcàb. Ndxab Jesús loo Pilat:

—Co'te' nac nacionpe' daa no co'te' ñibe'en inacte loo izlyo' ndxè', ey. Chele' co'te' ñibe'en ngàc che'n izlyo' ndxè', le' sya, mèn co' mque tee no daa ne'ngla'de par nden mèn naciòn Israel daa. Per izlyo' ndxè' inacte co'te' ñibe'en nalle'. Por cona, ngue li mèn con' ndlya's mèn con daa.

<sup>37</sup> Sya, ndxab Pilat loo Jesús:

—¿Lìcque' nacl rey, sya, cà'?

Mcàb Jesús. Ndxab Jesús loo Pilat:

—Aa. Lìcque' nac daa rey, pues, xalque' ngolo guneela ba'. Daa ngóol loo izlyo' ndxè' no mbalen loo izlyo' ndxè' par mdan cuent no mdoodizen cón chenen co' nac lìcpe'. Ryete mèn co' ndub nza no co' ndyubdi's loo cón chenen co' nac lìcpe', mèna ndxòn no nque' nza mèna di's co' ndyoodizen.

<sup>38</sup> Pilat ndxab loo Jesús:

—¿Cón nac co' mbezl nac lìcpe', à'?

*Trè' ndlu' le' mèn ngolole' mdub rez cón che'n Jesús par guth mèn Jesús.*

*(Mt. 27.15-31; Mr. 15.6-20; Lc. 23.13-25)*

Ngolo mnibdi's Pilat di'sa loo Jesús, ngro' Pilat par fuer par mdoodi's no Pilat mèn co' ñibe', no co' ndyoo ner, no co' ndyoo naa loo mèn naciòn Israel tedib vez. Ndxab Pilat loo mèna:

—Yende chó xquin mbi' no xtol mbi' ndryo xo'f loon, cara. <sup>39</sup> ¿Xá nee gu'? Gu' ngue no costumbr le' daa ngo' thib mbi' co' ngue lezi'f loo gu' co'se' ndli gu' lni pasc. ¿Ché' ndlya's gu' la'en bii mbi' co' mbez men nac rey che'n mèn naciòn Israel loo gu' o ché' ne'la'den bii mbi' loo gu'?

<sup>40</sup> Sya, ryete mèna cabii mcàb tedib vez. Ndxab mèna:

—Ne'telá'de U' mbi' ba'. Más huen blo' U' Barabás lezi'f loo nu'.

Per mbi' co' lèe Barabás ngòc thib huan' tiempa.

## 19

<sup>1</sup> Ngolo tataa ndxab ryete mèna loo Pilat, mnibe' Pilat loo solndad par ya ta' solndad che'n Jesús. <sup>2</sup> Látha, mdub solndad thib coron yis co' nayà' yéc Jesús. No mtegor solndad Jesús thib cap co' ngòc lar' morad. <sup>3</sup> Ngoloa, mbez solndad loo Jesús:

—San, Rey che'n mèn naciòn Israel.

No be' taa nguis solndad rloo Jesús.

<sup>4</sup> Le' sya, mbere Pilat. Ngro' Pilat par fuer tedib vez. Ndxab Pilat loo mèna:

—Hui' gu' nexa. Trè' ndal non mbi' loo gu' par ta' gu' cuent no ñee gu' yende chó xquin mbi' co' ndxàp mbi' ndryo xo'f loon.

<sup>5</sup> Sya, ngro' no Pilat Jesús par fuer. Ndub coron yis yéc Jesús. No noc Jesús thib cap co' nac lar' color morad. Ndxab Pilat loo mèna:

—Aa gu' mbi' ndxè'.

<sup>6</sup> Per co'se' gunèe jef che'n nguley' co' más ñibe' loo rye nguley' no mèn nac zin' co' nquenap templ nde no Pilat Jesús, mtlo mènà, ngrozèe mènà cabii. Ndxab mènà loo Pilat:

—Fque' mbi' ba' loo cruz. Fque' mbi' ba' loo cruz.

Per Pilat ndxab loo mènà:

—Be' gu' mbi'. Fque' yub gu' mbi' loo cruz tac part cón chenen yende chó xquin mbi' ngro xo'f loon.

<sup>7</sup> Sya, mcàb mèn co' ñibe', no co' ndyoo ner, no co' ndyoo naa loo mèn nación Israel loo Pilat. Ndxab mènà:

—Nu' ngue no thib ley. No texal ñibe' ley nu', ndxàalque' gath mbi' ba'. Tac ale leque mbi' mbez nac mbi' xgan'pe' Diox.

<sup>8</sup> Per co'se' mbìn Pilat di'sa, sate más mzyeb Pilat. <sup>9</sup> Mbere Pilat, ngòo Pilat le'n palas con Jesús tedib vez. Mnibdi's Pilat loo Jesús. Ndxab Pilat:

—¿Páxe' mèn lùu, à'?

Per Jesús yende cón mcàb loo Pilat.

<sup>10</sup> Le' sya, ndxab Pilat loo Jesús:

—¿Chonon indlya'stel càbl loon, à'? ¿Ché' iñeedel le' daa ndxàp con' la's niin no la's yan par ñibe'en loo mèn que' mèn lùu loo cruz? No ndxàpen con' la's niin no la's yan par ñibe'en la' mèn biil. Ne'que'de mèn lùu loo cruz.

<sup>11</sup> Jesús mcàb loo Pilat. Ndxab Jesús:

—Nec thib mod no nec tedib mod ne'ñibe'del cón chenen chele' Diox ne'nda'de lugar lool ñibe'l loon. Por cona, mbi' co' mda'xù' daa lool másque' thib xquin mbi' ndxàp mbi' no másque' thib xtol mbi' ndxàp mbi' leque lùu.

<sup>12</sup> No leque hora mcua'n Pilat mod xá mod la' Pilat bii Jesús. Per mèn co' ñibe', no co' ndyoo ner, no co' ndyoo naa loo mèn nación Israel, sate más cabii mbez yèe mènà loo Pilat. Mbez mènà:

—Chele' lùu lá' mbi' ba', indxàcte amiu lùu gobiern co' ñibe' loo mèn gulàaz mèn ciuda Rom. Tac chol mèn co' ndxàc xal thib rey xal mbi' ba', mènà ndxàc ngolo ngola's loo gobiern co' ñibe' loo mèn gulàaz mèn ciuda Rom.

<sup>13</sup> Co'se' mbìn Pilat tataa ndxab mènà loo Pilat, mnibe' Pilat loo Jesús ryo' Jesús par fuer. Le' Pilat na, mdub loo asi Pilat thib lugar le'n palas co'te' natoxcua' pis con thib loo quèe huen, co' nee di's, di'stèe che'n mèn ciuda Rom. No di'stèe che'n mèn nación Israel lèe quèea Gabata. <sup>14</sup> Huiza ngòc huiz vispr che'n huiz lni pasc. No co'se' ndxab Pilat loo mèn nación Israel:

—Hui' gu' nexa, Rey gu' ndxè',  
hora casque' ngòc rol huiz.

<sup>15</sup> Per mènà tolo ngrozèe. Cabii mbez mènà loo Pilat:

—Fcàa mbi' ba'. Beth. Fque' mbi' loo cruz.

Per Pilat ndxab loo mènà:

—¿Cóna! ¿Rey gu' que'en loo thib cruz, à'? Yende xàa.

Per mèn co' ngòc jef che'n nguley' co' más ñibe' loo rye nguley' mcàb. Ndxab mènà loo Pilat:

—Ingue node nu' más rey, ey. Angoluxte jef co' ñibe' loo mèn gulàaz mèn ciuda Rom nac rey nu'. Ngolo cuent.

<sup>16</sup> Ngoloa, mnibe' Pilat loo solndad par mbe' solndad Jesús par ya que' solndad Jesús loo cruz. Le' rye mènà na, mdoo nque xís solndad par la's mènà xal que' solndad Jesús loo cruz.

*Trè' ndlu' mque' mèn Jesús loo cruz.*

*(Mt. 27.32-44; Mr. 15.21-32; Lc. 23.26-43)*

<sup>17</sup> Sya, ngro' no mènà Jesús. No ale mnibe' mènà loo Jesús par leque Jesús mxo'f yen cruz Jesús par mbe' Jesús cruz Jesús axta loo den co' mbez mèn lèe Den Calaver tiempa. Le' di'stèe mèn nación Israel na, mbez mèn loo dena Golgot tiempa. <sup>18</sup> Loo dena mque' mèn Jesús loo cruzpe' Jesús. Lomisque' ne, mque' mèn taachop mbi' loo cruz co' ngòc cruzpe' mbi', thib thib mbi' mquée loo cruz thibgà' lad cuat Jesús. Le' cruz Jesús na,

mdoo xtau' ryop mbi'a. <sup>19</sup> Látha, mbli Pilat mandad mque' mèn plá di's loo yéc cruz co' ndxab: Jesús, mèn yèez Nazaret, rey che'n mèn nación Israel. <sup>20</sup> Huax mèn nación Israel mblab di'sa tac co'te' mque' mèn Jesús loo cruz nzi gax ro ciuda Jerusalén. Di'sa nac son loo di'stèe co' nac xti's mèn hebre, no di's co' nac xti's mèn grieg, no di's co' nac xti's mèn italia. <sup>21</sup> Ndxab jef che'n nguley' co' más ñibe' loo rye nguley' che'n mèn nación Israel loo Pilat. Ndxab jef:

—Más huen ne'ndubtel di's ba' tatua' co' ndxab: Rey che'n mèn nación Israel. Más huen ndubl di's le' mbi' ba' ndxab: Daa nac rey che'n mèn nación Israel.

<sup>22</sup> Mcàb Pilat loo mèn. Ndxab Pilat:

—Yende cóna. Di's co' mblin mandad mdub loo cruz ba', yende chó techei. Le'i nduble'. Ngolo cuent.

<sup>23</sup> Co'se' ngolo mque' solndad Jesús loo cruz, mxen solndad xab Jesús. Mblec xà' solndad thib thib xab Jesús par ngòc che'n thib thib solndad xab Jesús. No mxen solndad cap co' ngòc xab dib andoo Jesús co' ngòc thib lar' dib nol' no dib naxèn. <sup>24</sup> Ndxab solndada loo xtàa solndad:

—Ne'li rolte na' cap ndxè'. Más huen quith no na' dad loo cap ndxè' par ñee na' ñeene' chó na' gac che'na.

No tataa ngòca par mdyaa di's co' ndub loo libr co' nac xti's Diox co' mbez:

Mcàa mèn thib ned xaben par ngòc xaben che'n mèn. No loo xaben co' ngòc cap daa mdi'th no mèn dad par ñee mèn ñeene' chó gac che'na.

No tataaque' mbli solndad con'a.

<sup>25</sup> Gaxte co'te' ndoo cruz Jesús ngure no xna' Jesús bél xna' Jesús, no Mari sa'l Cleof, no Mari co' nac mèn yèez Magdala. <sup>26</sup> Co'se' gunèe Jesús ndoo xna' Jesús loo Jesús con thib myen' xin' mté'th Jesús co' más mque' lezo' Jesús ñèe Jesús, Jesús ndxab loo xna' Jesús:

—Ngot, hui' loo mbi' co' ndoo lool ba'. Mbi' ba' lil cuent nac xgan'l, ndee.

<sup>27</sup> Ngoloa, ndxab Jesús loo mbi' xin' mté'th Jesús co' más mque' lezo' Jesús ñèe Jesús:

—Mbi', xa'got ba' gac xal xna'l, ndee.

Leque hora, mbye' mbi' co' nac xin' mté'th Jesús xna' Jesús par liz mbi' xal xna'pe' mbi' xin' mté'th Jesús.

*Trè' ndlu' nguth Jesús.*

*(Mt. 27.45-56; Mr. 15.33-41; Lc. 23.44-49)*

<sup>28</sup> Ngolo ngòc rye con'a, no com le' Jesús nanee le' ryete con' co' naquin gac loo Jesús ngòcle' no mdyaaale' no par tolo gacque' no tyaaque' di's co' ndub loo libr co' nac xti's Diox, Jesús ndxab láth ngue Jesús loo cruz:

—Ndxec lezon, yey.

<sup>29</sup> No le'pe' ndoo thib bote vin co' nac nítguy. Yende izlyo', ngua tegaz thib xa' thib sponj con vina. No mdub xa'a sponja loo thib bar che'n thib loo yaa co' lèe hisop par mda'i mod mzii xa' sponja ro Jesús loo cruz. <sup>30</sup> Ngolo ngu Jesús vina, ndxab Jesús:

—Nase ngolole' mdyaa no ngòcque' no mdubque' di's ryethe con' naquin gac loon.

No ngoloa, site mbi's yen Jesús. Nguth Jesús.

*Thib solndad che'n gobiern co' ndub ciuda Rom mdid lans cho Jesús.*

<sup>31</sup> Huiz co' mque' mèn Jesús loo cruz ngòc huiz vispr che'n lni pasc. Indlya'ste mèn co' ñibe', no co' ndyoo ner, no co' ndyoo naa loo mèn nación Israel yan' yon xa' loo cruz huiz sabd co' nde nquea tac huiza nac huiz co' nac más huiz roo huiz xèn che'n lnia. Por cona, ngua na'b mèn co' ñibe', no co' ndyoo ner, no co' ndyoo naa loo mèn nación Israel di's loo Pilat par ñibe' Pilat ya lé' solndad zith cor nii yon xa' co' ngue loo cruz par gath xa'. No yiloo làa mèn yon theboola loo cruz. <sup>32</sup> Sya, ngua thi's solndad zith cor nii thib xa'. Ngoloa, ngua thi's solndad zith cor nii tedib xa' co' mquée no Jesús loo cruz. <sup>33</sup> Per co'se' mbii gax solndad loo Jesús par qui's solndad zith cor nii Jesús, gunèe solndad le' Jesús nguthle'. Ne'ngui'ste solndad zith cor nii Jesús.

<sup>34</sup> Per mastale' nguthle' Jesús, thib solndad co' nzo làtha ngua thid lans ro costi Jesús. Co'se' mblo' solndad lans ro costi Jesús, ante nde bèe nde yax loo ren no loo nít co' ngro' ro costi Jesús. <sup>35</sup> Mbi' co' nda' cuent con' ngòc loo Jesús ngòc thib mbi' co' gunèepe' ngòc con'a loo Jesús. No nda' mbi' cuent co' nac lìcpe'. Mbi'a nanee le' mbi' ngue ta' cuent co' nac lìcpe' par yila's gu' cuenta. <sup>36</sup> Tac ngòc con'a loo Jesús par ngòcque' no par mdyubque' di's co' ndub loo libr co' nac xti's Diox co' mbez:

Ne'le'de mèn no ne'qui'ste mèn nec thib zith co' nac zith lad mbi'.

<sup>37</sup> Lomisque', ndub di's loo libr co' nac xti's Diox tedib lugar co' mbez:

Le' mèn hui' loo mbi', mbi' co' mdid mèn lans no clav lad yiloa.

*Chop mbi' ngua ca's thebol Jesús le'n thib ye'r quèe.*

*(Mt. 27.57-61; Mr. 15.42-47; Lc. 23.50-56)*

<sup>38</sup> Ngolo ngòc ryethe con'a loo Jesús, ngo thib mbi' co' lèe Chè. Chèa ngòc mèn thib yèez co' lèe yèez Arimate. Chèa, ne, mque tee no Jesús. Per xexte mque tee no Chè Jesús tac mzyeb Chè gunèe Chè mèn co' ñibe', no co' ndyoo ner, no co' ndyoo naa loo mèn nación Israel. Ngua nee Chè loo Pilat ta' Pilat lugar làa Chè thebol Jesús loo cruz. Pilat mdyalque' par làa Chè thebol Jesús loo cruz. Sya, nda Chè. Ngua làa Chè thebol Jesús loo cruz. Mbye' Chè thebol Jesús. <sup>39</sup> Làth xtau'a, mzin Nicodem, ne, co' ngua toodi's no Jesús thib yál' ndoore'. Nde no Nicodem gal psi' kil dii co' nos thib loo dii co' lèe mirr no tedib loo dii co' lèe áloes co'te' nzo no Chè thebol Jesús. <sup>40</sup> Sya, mxen Chè ryop Nicodem thebol Jesús. No mxob Chè ryop Nicodem dii perfuma loo thib le' sab. No mchì'x Chè ryop Nicodem saba lad thebol Jesús xal nac costumbr che'n mèn nación Israel co'se' nca's mèna xtàa mèn. <sup>41</sup> No gaxte co'te' mque' solndad Jesús loo cruz nziri' thib huert. No le'n huerta ndub thib quèe rhue'. Lad quèe rhue'a ndub thib ye'r co'te' tarte yòo ga's nec thib thebol. <sup>42</sup> Ale tyate mca's Chè ryop Nicodem thebol Jesús tac gaxte co'te' mque' solndad Jesús loo cruz mdub ye'r quèea. No nde nixon', mdub bixle' huiz huiza no ngulàale' yál' huiza no mtlole' huiz co' ngòc huiz descans che'n mèn nación Israel tiempa.

## 20

*Trè' ndlu' ngro xban Jesús làth mèn nguth.*

*(Mt. 28.1-10; Mr. 16.1-8; Lc. 24.1-12)*

<sup>1</sup> Co'se' nde yiniì izlyo' doming co' nac ner huiz sman co' nde nquea, tatabe' cuar ngua Mari co' ngòc mèn yèez Magdala ro ye'r quèe co'te' ngua lo mèn thebol Jesús. Gunèe Mari mbiichele' quèe ro ye'r quèe. <sup>2</sup> Sya, mque' Mari carre axta co'te' nzo Mon Pedr no tedib myen' xin' mté'th Jesús co' más mque' lezo' Jesús ñèe Jesús. Ndxab Mari loo myen':

—Mblo'le' mèn Tad na' le'n ye'r quèe, cara. No nalle' ne'ñeede nu' pá ngua lá' mèn Tad.

<sup>3</sup> Sya, ngro' Pedr con tedib myen' xin' mté'th Jesús. Ngua tee hui' myen' ro ye'r quèe. No mdoo nque Mari co' ngòc mèn yèez Magdala xís myen' tedib vez. <sup>4</sup> Thidte junt mque' ryop myen' carre. Per tedib myen' co' ngòc xtàa Pedr más mque' carre leque Pedr. No ner myen'a mzin ro ye'r quèe. <sup>5</sup> Mcòo' mbi' yéc mbi'. Mbui' mbi' le'n ye'r quèe per ne'ngòode mbi' le'n ye'r quèe. Ante gunèe mbi' nax sab co' mbix thebol Jesús le'n ye'r quèe. <sup>6</sup> Làtha, mzin Mon Pedr ro ye'r quèe. Per Mon Pedr se ngòo le'n ye'r quèe. Gunèe Mon Pedr ante sab nax le'n ye'r quèe. <sup>7</sup> Más de cona, gunèe Mon Pedr panid co' mblo mèn loo thebol Jesús, inaxte panid con sab. Nadùuz panid. Nax panid thib lad. <sup>8</sup> Le' sya, ngòo mbi' co' ndxàc xtàa xin' mté'th Pedr, co' mzin ner ro ye'r quèe, le'n ye'r quèe, ne. Gunèe mbi' ante sab nax no nadùuz panid nzo'f panid tya. No gunèe mbi' tataa ngòca. <sup>9</sup> Tac hora tarte ta' myen'a cuent no tarte li la's ryop myen'a cón nee di's co' ndub loo libr co' nac xti's Diox co' mbez le' Jesús naquinque' ryo xban làth mèn nguth. <sup>10</sup> Sya, mbere ryop myen', ndyàa myen' par liz myen'.

*Jesús ngro' too loo Mari co' ngòc mèn yèez Magdala.*

*(Mr. 16.9-11)*

<sup>11</sup> Per láth ndyàa ryop myen' par liz myen', Mari mbyan' ro ye'r quèe. Ndoò yón' Mari. No láth ndoo yón' Mari, mcòò' Mari yéc Mari. Mbui' Mari le'n ye'r quèe. <sup>12</sup> Láth mdoò hui' Mari ro ye'r quèe, gunèe Mari chop angl co' noc lar' nagus. Ndub angl le'n ye'r quèe. Thìb angl ndub co'te' ngo'th yéc thebol Jesús. Tedib angl na, ndub co'te' ngo'th nii thebol Jesús. <sup>13</sup> Angla mnibdi's loo Mari. Ndxab angl:

—Ngot, ¿chonon ndxón'l, à'?

Mari ndxab loo angl:

—Daa ndxón tac mèn xexte mbe' thebol Tad daa. No ne'ñeeden pá ned ngua lá' mèn thebol Tad daa.

<sup>14</sup> Ngolo xec ndxab Mari di'sa loo angl, mxac Mari ale thìb xa' ndxab loo Mari: Mari, hui' ned xísl. Co'se' mbere Mari mbui' Mari ned xís Mari, gunèe Mari le' Jesús ngue tee tya. Per ne'ta'de Mari cuent ché' Jesús na. <sup>15</sup> Sya, mnibdi's Jesús loo Mari. Ndxab Jesús:

—Ngot, ¿chonon ndxón'l, à', ey? ¿Chó ngue cua'nl, à', ey?

Per Mari mbli xtùuz. Ndxab Mari loo lezo' Mari peser mbi' co' nquenap huert na. Sya ndxab Mari loo mbi'a:

—Tad, chele' lùu mbe' Tad daa, gunee loon pá ned ngua lá'l Tad daa par ga xin Tad daa.

<sup>16</sup> Sya, ndxab Jesús loo Mari: Mari.

Chàa, mbere Mari par xís Mari. Gunii Mari di's co' ndyoodi's mèn hebre loo Jesús. Ndxab Mari:

—Raboni, co' nee di's di's co' ndyoodi's mèn hebre, Maistr.

<sup>17</sup> Jesús ndxab loo Mari:

—Mari, ne'gàaltel daa tac daa tarte bii loo bé' co'te' nzo xuden Diox. Ndlyazen ya neel loo myen' co' ndxàc huesen. No gabl loo myen' le' daa bii loo bé' co'te' nzo xuden Diox co' nac xud myen' no co' nac Diox myen', ne.

<sup>18</sup> Sya, ngua ta' Mari, co' ngòc mèn yèez Magdala, cuenta loo myen' xin' mté'th Jesús le' Mari gunèe Tad Jesús no ndxab Tad Jesús di'sa loo Mari par tataa ta' Mari cuent loo myen'.

*Ngoloa mblu' loo Jesús loo myen' xin' mté'th Jesús.*

*(Mt. 28.16-20; Mr. 16.14-18; Lc. 24.36-49)*

<sup>19</sup> No co'se' mzyèle' izlyo' leque huiz co' ngòc ner huiz smana no ngulàale' yál' izlyo' huiza, leque hora thidte mqueltàa myen' xin' mté'th Jesús xhuina liz thìb mèn. No quej nau' puert nzo gòò myen' le'n nyòò tac nzyeb myen' ñèe myen' mèn co' ñibe', no co' ndyoo ner, no co' ndyoo naa loo mèn naciòn Israel. Látha, chàa, ngro' too Jesús loo myen'. Mblu' loo Jesús Jesús loo myen'. Gunii Jesús Diox loo myen'. Ndxab Jesús loo myen':

—Nabe'ste blo gu' lezo' gu' con xtàa gu' no blo nagàl lezo' gu' loo Diox.

<sup>20</sup> Ngolo ndxab Jesús di'sa, mblu' Jesús ya' Jesús co'te' mdid solndad clav. No mblu' Jesús ro costi Jesús co'te' mdid solndad lans loo myen' xin' mté'th Jesús. Le' myen' na, ante mdyac tín' lezo' co'se' gunèe myen' Jesús. <sup>21</sup> Mbere Jesús, ndxab Jesús loo myen' tedib vez:

—Nabe'ste blo gu' lezo' gu' con xtàa gu'. No blo nagàl lezo' gu' loo Diox. Texal mtel' xuden Diox daa par mbalen loo izlyo' ndxè', tataaque' tel'en gu' ya gu' loo mèn loo izlyo' ndxè'.

<sup>22</sup> Ngolo ndxab Jesús di'sa loo myen', mblá' Jesús mbii ro Jesús loo myen'. No ndxab Jesús loo myen':

—Na tel' Xpii Natú' loo gu' par yo no Xpii Natú' gu' thidtene, ndee gu', ey. <sup>23</sup> Ndxab Jesús loo myen', ne:

—Loo mèn co' mbli gu' cuent mdyon' xtol, mton'que' Diox xtol mènà. Le' mèn co' indlide gu' cuent mdyon' xtol, mènà nzi banque' con xtol mèn tac ne'nton'te Diox xtol mènà.



*Max gunèe Tad Jesús le' Tad Jesús ngro xbanque'.*

<sup>24</sup> Per Max co' mdub lèe mèn Cuach co' ngòc xin' mté'th Jesús, co' ndxòo cuent nac si' fchop myen', yende Max làth myen' co'se' ngro' too Jesús no mblu' loo Jesús Jesús loo myen' yál'a. <sup>25</sup> Le' sya, myen' xin' mté'th Jesús mda' cuent loo Max. Ndxab myen':

—Nu' gunèele' Tad, cara.

Per Max mcàb loo myen'. Ndxab Max:

—Chele' daa ne'hui'de la's ya' Tad Jesús co'te' nguaa'd clav no tyeen cuen yan co'te' nguaa'd clav no tyeen cuen yan co'te' nguaa'd lans ro costi lad Tad Jesús, ne'yila'sten cuent co' nda' gu' ba'.

<sup>26</sup> Ngoloo xon huiz ryete myen' xin' mté'th Jesús mqueltàa tedib vez le'n nyòo liz thib mèn. No le'pe' ngo no Max myen' sya. Lomisque', quej nau' ro puert. Per Jesús, chàa, ngro' too loo myen'. No mblu' loo Jesús Jesús tedib vez. Gunii Jesús Diox loo myen'. No ndxab Jesús loo myen':

—Nabe'ste blo gu' lezo' gu' con xtàa gu', ndee gu'. No blo nagàl lezo' gu' loo Diox.

<sup>27</sup> Ngoloo, ndxab Jesús loo Max:

—Max, ftyee cuen ya'l trè' no hui' la's yan. No ftega' ya'l. Ftyee ya'l le'n costi daa. No ne'gànte lezo'l. Gola's cón chenen, Max.

<sup>28</sup> Le' sya, mcàb Max loo Jesús. Ndxab Max:

—Lìcque', U' nac Tad daa no nac U' Diox daa, Tad.

<sup>29</sup> Ndxab Jesús loo Max:

—Max, ¿ché' ngola'sl loo cón chenen nalle' tac gunèel daa, cà'? Más huen nda mèn co' tarte ñèe daa per ndxela's mèn loo cón chenen, ey.

*Trè' ndlu' chó cón che'n mbi' nac co' ndlu' libr ndxè'.*

<sup>30</sup> Jesús tolo mbli no mblu' Jesús huax yalguzye' roo yalguzye' xèn loo myen' xin' mté'th Jesús. Per inda'de loo libr ndxè' cuent cón che'n rye yalguzye' co' mbli Jesús. <sup>31</sup> Per di's co' ndub loo libr ndxè', di's ndxè' ndlu' par yila's gu' le' Jesús nac Cristpe' co' nac xgan'pe' Diox. No chele' gu' yila's loo Jesús no loo cón che'n Jesús, Jesús li par yòo ban no gu' Diox thidtene.

## 21

*Jesús mbere ngro' too no mblu' loo Jesús loo gaz myen' xin' mté'th Jesús.*

<sup>1</sup> Ngolo nguri'th plá huiz co'se' ngro' too Jesús no mblu' loo Jesús Jesús loo rye si' fthib myen', Jesús ngro' too no mblu' loo Jesús Jesús loo myen' xin' mté'th Jesús tedib vez ro nítto' co' lèe nítto' che'n Tiberias. No mblu' loo Jesús Jesús mod ndxè'. <sup>2</sup> Thidte ngure no Mon Pedr Max co' mdub lèe mèn Cuach, no Natanael co' ngòc mèn yèez Caná co' nac yèezya' che'n làaz mèn galile, no ryop hues myen' xgan' mbi' co' lèe Zebede, no taachop myen' xin' mté'th Jesús. <sup>3</sup> Ndxab Mon Pedr loo myen':

—Daa nda ten mbèel, cara.

Myen' ndxab loo Mon Pedr:

—Nu' ne tye. Nda na'.

Sya, thidte mqueltàa Mon Pedr con myen'. Ngòo myen' loo thib yòoyaa. Nda ten myen' mbèel. Per nec thib mbèel ne'ngagaade loo myen' dib xec yál'a. <sup>4</sup> Co'se' nde tub xnii izlyo' xàn' bé' tedib huiz co' nde nquea, chàa, mblu' too Jesús no mblu' loo Jesús loo myen' ro nítto'a. Per myen' xin' mté'th Jesús ne'nglide cuent Jesús na. <sup>5</sup> Sya, ndxab Jesús loo myen':

—Myen', ¿ché' tarte yigaa nec thib mbèel loo gu' nalle', cà'?

Myen' mcàb loo Jesús. Ndxab myen':

—Aa. Tarte yigaa nec thib má', cara.

<sup>6</sup> Jesús ndxab loo myen':

—Blobii gu' yex gu' le'n nít ladli che'n yòoyaa ba'. Sya, yigaa mbèel loo gu', ey.

Le' sya, tataaque' mbli myen'. Ngoloa, axta ne' ne' ngác myen' no axta ne' ne' ngyèe myen' ngo' myen' yex le'n nít tant thib mbèelléy' ngogaa le'n yex. <sup>7</sup> Sya, myen' xin' mté'th Jesús co' más mque' lezo' ñèe Jesús ndxab loo Pedr:

—Tad na, cara.

Per texal mbin Mon Pedr ndxab myen': Tad na, mdoc Pedr xab Pedr tac Pedr mblo' xab Pedr por ngue li Pedr zin'.

Ngoloa, thidte ngulaa Pedr le'n nít. Mxyo'f Pedr loo nít axta ngro' Pedr loo yòo biiz. <sup>8</sup> Le' taamas myen' xin' mté'th Jesús na, nzoque' loo yòoyaa. Ndyé'th gop xax myen' yex par ro nítto' tant thib mbèelléy' ngogaa. No distans co'te' ngo myen' loo nítto' par ro nít loo yòo biiz neeque' thib ayo metr peser. <sup>9</sup> Co'se' mbilaa myen' loo yòoyaa loo yòo biiz, gunèe myen' nzi cua'le' yaa loo quii. No nzo'f thib mbèel loo quii. No gunèe myen' nzo'f sa pan thib lad loo quii. <sup>10</sup> Jesús ndxab loo myen':

—Que de no gu' taaplá mbèel co' ngolo mxen gu' ba' par hua ndren na', ey.

<sup>11</sup> Sya, ngua quée Mon Pedr loo yòoyaa. Ngua thop xax Mon Pedr yex co' nzo mbèela loo yòo biiz tant mzyè yexa con antub mbèel nambii. Mastale' nzo thib ayo nzo cho' psi' pson mbèel le'n yexa, ne'ngredte yexa. <sup>12</sup> Jesús ndxab loo myen':

—Que de hua ndren gu', ey.

No nec thib myen' xin' mté'th Jesús ne'nglide ryes par ngribdi's myen' loo Jesús chó nac Jesús tac naneeque' myen' Tad Jesús nac mbi'a. <sup>13</sup> Ngoloa, mbii gax Jesús loo myen'. Mxen Jesús pan. Mda' Jesús pan loo myen'. Lomisque' ne, mxen Jesús mbèel. Mda' Jesús mbèel loo myen' par hua myen', ne.

<sup>14</sup> Con cona, mbyon vez mblu' loo Jesús Jesús loo myen' xin' mté'th Jesús loo ngro xban Jesús làth mèn nguth.

*Jesús mdoodi's no Mon Pedr.*

<sup>15</sup> Co'se' ngolo nduhua ndren Jesús con myen', Jesús mnibdi's loo Mon Pedr. Ndxab Jesús:

—Mon, xgan' Jonás, ¿ché' más nque' lezo'l ñèel daa leque nque' lezo' myen' ba' ñèe myen' daa, cà'?

Pedr ndxab loo Jesús:

—Aa, Tad, U' naneeque' le' daa nque'que' lezo' ñèen U'.

Sya, ndxab Jesús loo Mon:

—Chele' lùu, lìcque', nque' lezo' ñèel daa, gòc xal thib pastor loo mèn co' yòo loo cón chenen co' nac xal mbacxil' yen' daa, ndee.

<sup>16</sup> Mbryop vez mbere Jesús, ndxab Jesús loo Mon Pedr:

—Mon, xgan' Jonás, ¿ché', lìcque', nque' lezo'l ñèel daa, cà'?

Pedr mcàb loo Jesús. Ndxab Pedr:

—Aa, Tad, U' nanee le' daa nque' lezo' ñèen U'.

Ndxab Jesús loo Mon:

—Chele' lùu, lìcque', nque' lezo' ñèel daa, beren niin lool: Fquenap mèn co' yòo loo cón chenen co' nac xal mbacxil' daa, ndee.

<sup>17</sup> Mbyon vez ndxab Jesús loo Mon Pedr:

—Mon, xgan' Jonás, ¿ché', lìcque', nque' lezo'l ñèel daa, cà', yey?

Sya, mxi yéc no mxi lezo' Pedr tac mbyon vez mnibdi's Jesús loo Pedr. Ndxab Jesús:

—¿Ché', lìcque', nque' lezo'l ñèel daa, cà', ey?

Ndxab Mon Pedr loo Jesús:

—Tad, U' naneeque' ryethe con'. No nonque' U' ryethe con'. U' nanee le' daa nque' lezo' ñèen U'.

Ndxab Jesús loo Mon:

—Chele'i, lìcque' tataa nac, fquenap mèn co' nac xal mbacxil' daa, tá, ndee. <sup>18</sup> Lìcpe' ba'i, na nii lool, Pedr, co'se' ngòcl myen' bix no co'se' ngòcl myen'bi' yen', mdoc xabl no mque teel pál co'te' mblya'sl. Per co'se' gàcl más mèn gox, lùu sil ya'l. No tedib mèn làa xabl yenl. No hue' mèn lùu co'te' indlya'stel yal no co'te' ne'yòode lezo'l yal.

<sup>19</sup> Per di's co' ndxab Jesús loo Pedr, di'sa nee di's xá mod gath Pedr par tataa mod li Pedr gac con' roo con' xèn loo Diox por cón che'n Pedr.

Ngoloa, ndxab Jesús loo Pedr:

—Ftoo nque xísen. Ya' nda na', Pedr.

*Trè' ndlu' cón che'n thib myen' xin' mté'th Jesús co' más mque' lezo' Jesús gunèe Jesús.*

<sup>20</sup> Co'se' mbere Pedr par ned xís Pedr, gunèe Pedr nde nque thib myen' xin' mté'th Jesús co' más mque' lezo' Jesús gunèe Jesús. Mbi' co' nac xin' mté'th Jesús nac mbi' co' mxo'f bda' loo Jesús co'se' nduhua rsè no Jesús myen'. Mbi'a ngòc myen' co' mnibdi's loo Jesús co' ndxab loo Jesús:

—Tad, ¿chó nu' ta'xù' U' loo mèn, à'?

<sup>21</sup> Co'se' mbui' Pedr loo myen' xin' mté'th Jesús, Pedr ndxab loo Jesús:

—Tad, ¿mbi' ba', à'? ¿Cón gac loo mbi'?

<sup>22</sup> Jesús mcàb loo Pedr. Ndxab Jesús:

—Chele' daa ndlyaz le' mbi' ba' ban axta co'se' beren galen loo izlyo' ndxè' tedib vez, ¿chó mport nzo lezo'l cón che'n mbi' ba', à'? Inacta cón che'nl, ndee. Conse' ftoo nque xísen. Ya' nda na'.

<sup>23</sup> Le' sya, ngro' di'sa no mbyath mbyèn di'sa làth mèn co' ngòc loo cón che'n Jesús le' mbi' xin' mté'th Jesús ne'gathte. Per Jesús ne'ngabte: Ne'gathte mbi'. Ndxè'leque', Jesús ndxab: Chele' daa lyaz le' mbi' ba' ban axta co'se' beren galen loo izlyo' ndxè' tedib vez, ¿chó mport nzo lezo'l cón che'n mbi' ba'? Inacta cón che'nl, ndee.

<sup>24</sup> Leque yub daa nac xin' mté'th Jesús co' mbli nèe con' ngòc co' nac di's co' mque'en loo libr ndxè'. No naneequen co' huenleque' le' di's co' mdan cuent loo libr ndxè', di's ndxè' nac di's licpe'.

<sup>25</sup> No taate huax con' co' mbli Jesús inda'de loo libr ndxè' cuent co' ngòc co' ne'nque'den ye's loo libr ndxè'. Tac chele' mèn noo noo nque' ye's cón che'n thib thib con' co' mbli Jesús xal ngòca, daa ngobe' no ndxelazen axta ne' ne' ngàal loo izlyo' ngòc libr co' nda' cuent ryethe con' mbli Jesús chele' mèn nque' ye's cón che'n ryethe con' mbli Jesús. Taandxè' gàca.

## Libr Co' Ndlu' Cón Che'n Con Co' Mbli Myen' Xin' Mté'th Jesús Co' Ndxé' Di's Che'n Jesús

*Jesús mcàbgòn làa Jesús Xpii Natú' loo mèn par yòo Xpii Natú' loo mèn par ñibe' Xpii Natú' loo mèn.*

<sup>1</sup> Teofl, libr ndxè' nac thib libr co' mque'en ye's lool. Ngue tan cuent lool loo libr ndxè' cón che'n ryethe con' mbli Jesús no con' co' mblu' Jesús loo myen' xin' mté'th Jesús desde co'se' mtlo Jesús, mblu' Jesús cón che'n Jesús loo myen' xin' mté'th Jesús. Jesús mblo yalbàn no mde'th Jesús cón che'n Diox loo mèn. <sup>2</sup> Mbli Jesús rye con'a axta mzin huiz mquée Jesús gáp loo bé'. Per ndoore' zin huiz yáp Jesús loo bé', mcui Jesús myen' co' ya te'th no co' ya lo yalbàn cón che'n di's ndac co' ndlu' cón che'n Jesús. No mblu' Jesús myen' por cón che'n Xpii Natú' xá mod li myen' ryethe con' co' mque tee li myen' cón che'n Jesús. <sup>3</sup> No mblu' loo Jesús Jesús loo myen' xin' mté'th Jesús le'n cho' huiz. Le'n huiza, tolo mbli Jesús huax yalguzye' no taamas con' loo xnaa loo myen' par, licque', yila's myen' le' Jesús ngro xbanque'. Más de cona, mdoodi's Jesús loo myen' le'n huiza cón che'n xá mod ndlya's Diox ñibe'pe' Diox loo mèn loo izlyo'.

<sup>4</sup> Co'se' tatabe' ngo no Jesús myen', mnibe' Jesús loo myen'. Ndxab Jesús loo myen':  
—Ne'ryo'de gu' le'n ciuda Jerusalén. Guled gu' le'n ciuda Jerusalén axta tyaaque' no gácque' con' co' mcàbgòn xuden Diox li xuden Diox loo gu' xalque' nac di's co' guniilen loo gu' ndoore'. <sup>5</sup> Aa. Licque', Juàn Bautist mbi'th que tee li bautizar mèn con nít. Per le'n taaplá huiz lin par lyàa no yòo Xpii Natú' che'n Diox loo ryete gu' co' ngola'sle' loo cón chenen no loon, co' nee di's, thidte gác gu' loo cón chenen por cón che'n Xpii Natú' co' lyàa loo gu' no co' yòo loo gu' xal co'se' ndxòo mèn le'n nít no ntau' nít loo mèn par ndxác bautizar mèn.

*Jesús mquée loo bé'.*

<sup>6</sup> Co'se' be' thidte mqueltàa no myen' Jesús ndoore' yáp Jesús loo bé', ngo no Jesús myen' loo thib yii co' lèe yii che'n yaa oliv. Tya mnibdi's myen' loo Jesús. Ndxab myen':

—Tad, ¿ché' nalle' nac tiemp co' li U' par ñibe'pe' mèn nación Israel loo nacionpe' mèn nación Israel tedib vez, cà'?

<sup>7</sup> Jesús mcàb loo myen'. Ndxab Jesús:

—Yende chó cón che'n gu' par ñee gu' no ta' gu' cuent chó huiz no chó tiemp li xud na' Diox par ñibe' mèn nación Israel loo nacionpe' mèn. Ante xud na' Diox ñibe' no ndxáp xud na' Diox con' roo no con' xèn la's nii xud na' Diox no la's ya' xud na' Diox par li xud na' Diox ñibe' mèn nación Israel loo nacionpe' mèn nación Israel tedib vez. <sup>8</sup> Per co'se' yilo lyàa no yòo Xpii Natú' loo ryete gu' co' ngola'sle' loon no loo cón chenen, Diox li par gáp gu' con' la's nii gu' no la's ya' gu'. No li Diox par yòo valor loo gu' par ryo' tee gu' ya lo gu' yalbàn no tyoodi's gu' cón chenen loo mèn, mèn co' nac mèn ciuda Jerusalén. No texal ya gu' loo mèn ciuda Jerusalén par tyoodi's no gu' mèn cón chenen, tataaguè' ya gu' loo mèn gulàaz che'n làaz mèn jude no loo mèn gulàaz che'n làaz mèn samari. No yiloo, ya lo gu' yalbàn no tyoodi's no gu' mèn dib athu loo izlyo' cón chenen.

<sup>9</sup> Ngolo gunii Jesús di'sa loo myen', no láth be' nzi hui' myen' loo Jesús, xègà xègà nguáp Jesús loo bé'. Láth nda quée Jesús loo bé', mquée thib xcuau. Xcuaua mtau' loo Jesús. Ya ne'tolode nghui' myen' loo Jesús. <sup>10</sup> Per láth nzi hui' myen' loo Jesús xal nda quée Jesús loo bé', látha, ngro' too chop xa'bi' co' noc xab lar' nagus loo myen'. <sup>11</sup> Ndxab ryop xa'bi'a loo myen':

—Mèn yèezya' che'n làaz mèn galile, ¿chonon xèe nzi hui' gu' loo bé', à'? Anxle' nzi hui' gu' loo bé', ey. Licque', leque yub Jesús co' ngolo mquée loo bé' nalle' loo gu', leque yub Jesús bere yi'th loo izlyo' tedib vez xal ngolo gunèe gu' mquée Jesús loo bé' nalle'.

*Myen' mcui thib mbi' co' lèe Mati par yan' Mati lugar che'n Jud.*

<sup>12</sup> Ngoloa, sya, mbii myen' loo yii co' lèe yii che'n yaa oliv. Mbere myen', ndyàa myen' le'n ciuda Jerusalén. Ndub yii yaa oliva par co'te' nziri' ciuda Jerusalén thib distans co' ne' chop mil metr. Distansa nac distans co' no maste ñibe' ley co' mxo'f Moisés loo mèn tyee nii mèn huiz descans tiempa. <sup>13</sup> Co'se' mzin myen' le'n ciuda Jerusalén, mzin myen' liz thib mbi' co'te' nguled myen' plá huiz co'te' thidte mqueltàa myen'. Liz mbi' co'te' ngo myen'a nac thib pis gáp. Làth rye mèn co' mqueltàa no myen' tya ngo Pedr, ngo Cob, ngo Juàn, ngo Ndech, ngo Lip, ngo Max, ngo Bartol, ngo Mate, ngo Cob co' ngòc xgan' thib mbi' co' lèe Alfe, ngo Mon co' ngòc che'n partid mèn co' ngòc partid cananist, no ngo Jud co' ngòc hues Cob. <sup>14</sup> Ryete mènà mqueltàa no myen' par thidte ngurez myen' Diox con mènà, no con myen' huespe' Jesús, no con Mari co' ngòc xna' Jesús, no con taamas mèn got co' mqueltàa no myen' hora.

<sup>15</sup> Leque le'n huiza Pedr ngo too thib vez làth rye mèn co' ndxàc hues por cón che'n Crist. Mènà ngòc thib ayo nzo gal mèn. Pedr ndxab loo mènà:

<sup>16</sup> —Gu' co' nac mèn huesen por cón che'n Crist, naquinque' gàcque', no tyaaque', no tyubque' di's nalle' xalque' nac di's co' gunii Xpii Natú' loo libr co' nac xti's Diox por di's co' ngro' ro David co' gunii David, David co' ngòc rey póla. David mde'th di's cón che'n Jud co' mdoo ner loo mèn co' mxen Jesús xal ndyen mèn thib pres. <sup>17</sup> Juda ngòc thib xtàa nu' co' thidte mque tee no Jesús. No ngòc cuent Jud par xo'f zin' Jud co' nac cón che'n Jesús. <sup>18</sup> Per ngolo nguth Jud, mbli mèn thib con'. Mxi' mèn thib le' yòo fte'b con tmi co' mdix mèn mcàa Jud por cón che'n con' ye'rsin' co' mbli Jud. Le' Jud na, ale leque Jud mblo dó' yen Jud. Mquetal Jud loo thib yaa. Ngòb Jud ned yéc Jud loo yòo. Ale ngos xti' Jud. Ryete xti' Jud ngro' par fuer. <sup>19</sup> Co'se' mbìn mèn co' nac mèn ciuda Jerusalén le' yòo fte'b mdyu' con tmia, ale mdub lèe mèn ciuda yòo fte'ba Acéldama. Di'stèe mènà nee di's yòo fte'b co' mdyu' con tmi co' mdix mèn cón che'n ren lad thib mbi' co' mxyo. <sup>20</sup> Ngòc con'a loo Jud xalque' ndub di's co' mbez loo libr che'n Salmos co' mbez taandxè':

Gàc liz xa' yende chó mèn ban liz xa'. Yende chó mèn guliz xa' yòo ban liz xa'. Lomisque', mbez loo libr co' nac xti's Diox tedib lugar:

Yan' tedib mèn lugar che'n xa' par xo'f zin' mènà zin' co' ngòc di's xo'f zin' xa'.

<sup>21</sup> Nalle' nzo mèn làth na' co' mque tee no na' le'n rye tiemp desde co'se' mtlo mque tee Jesús con na'. <sup>22</sup> Mènà thidte mque tee no na' anon co'se' mbli Juàn bautizar Jesús no ngo no mènà na' axta mzin huiz co' mquée Jesús loo bé'. Cona, ngue niin: Naquinque' yo thib mbi' co' nac mènà par yo no mbi' na' par thidte ta' no mbi' na' cuent cón che'n xá mod ngo xban Jesús làth mèn nguth.

<sup>23</sup> Sya, mèn co' nziri'a mda' lèe thib mbi' co' lèe Chè Barsabás co' ne' tedib lèe Just. No mda' mèn lèe tedib mbi' co' lèe Mati. <sup>24</sup> Ngoloa, ngurez mènà Diox. Ndxab mènà taandxè':

—Tad Diox, U' co' nanee ryethe con' co' ndli mèn xtùuz no co' nden' mèn le'n lezo' mèn, bli U' no blu' U' loo nu' de loo ryop mbi' ndxè' xá ñaa mbi' co' co' xà' U' no co' cui U' <sup>25</sup> par xo'f zin' mbi' zin' co' ngòc di's xo'f zin' Jud par hue' mbi' di's che'n U', Tad, loo mèn loo izlyo'. Tac leque Jud mbli par nguth Jud por cón che'n xquin Jud co' mcua'n Jud par mbii Jud lugar co'te' ndxàal bii Jud.

<sup>26</sup> Sya, mblo mènà Chè no Mati rif. Per le'xque' Mati ngro' rif. Desde hora, mqueltàa no Mati ryete si' fthib myen' xin' mté'th Jesús co' ndxe' di's che'n Jesús loo mèn.

## 2

*Jesús mtel' Xpii Natú' par ngulàa Xpii Natú' loo mèn no ngòc Xpii Natú' loo mèn par tlo Xpii Natú' ñibe' Xpii Natú' loo mèn.*

<sup>1</sup> Co'se' ngòc huiz co' ngòc huiz lni Pentecostés tiempa, le'pe' huiza thidte mqueltàa myen' co' ndxe' di's che'n Tad Jesús le'n ciuda Jerusalén con taamas mèn co' ngola'sle' loo Tad Jesús no loo cón che'n Tad Jesús. <sup>2</sup> Làth thidte nziri' mènà liz thib mèn, chàa, mbyèn thib ruid brut co' mbyèn loo bé'. Mbyèn ruída xal co'se' nxyo'f thib mbiidó'. No mbyèn biia le'n nyòo co'te' nzi ndub rye mènà. <sup>3</sup> Látha, mxyo'f loo loo mènà no mxac



mèna ngulàa thib con' loo thib thib mèna co' ñaa xal looz bèel. Pues con' co' gunaa xal loz bèela ngòc Xpii Natú' co' ngulàa loo mèn. Mbyan' con'a loo mèna dib lal ngo mèna le'n nyòo. <sup>4</sup> Ryete loo mèna ngulàa Xpii Natú' no ngòo Xpii Natú' loo mèna. No mbyan' Xpii Natú' loo mèna par ñibe' Xpii Natú' loo mèna. Le' sya, hora mtlo mèna, mdoodi's thib thib mèna tedib di'stèe xalque' mbli Xpii Natú' par mdoodi's mèna di'stèe. Di'stèea ngòc di'stèe co' mdoodi's chol mèn co' nzo le'n ciuda Jerusalén le'n huiza.

<sup>5</sup> Tataa ngòca tac le'n huiza huax mèn tith, co' ngòc mèn che'n nación Israel, ngo ban le'n ciuda Jerusalén. Mèna ne'nglá' de mod co' nac che'n xley' mèn. Mbi'th mèna ciuda Jerusalén par li mèna xalque' mnibe' xley' mèna loo mèna. Mèna ngòc mèn co' naban dib athu loo izlyo'. Mbi'th li mèna xal ñibe' xley' mèna loo mèn ciuda Jerusalén. <sup>6</sup> Co'se' mbìn mèna ngòc ruid co' mbyèn loo bé'a, huax mènley' mqueltàa co'te' mbyèn ruida. No axta ne' ne' ñee mèna cón li mèn xtùuz tac thib thib mèna ndxòn di'stèepe' mèn co' ndyoodi's mèn co'se' ngulàa Xpii Natú' loo mèn. <sup>7</sup> Ante ngüi' no ante ñaa mènley' co' mqueltàaa. Mbez thib mèna no tedib mèna loo xtàa mèna. Ndxab mèna:

—¿Ché' inacte mèn ba' mèn gulàaz che'n làaz mèn galile co' ndyoodi's xalque' ndyoodi's na' nalle', cà'? Licque', nac mèn ba' mèn gulàaz che'n làaz mèn galile, cara. <sup>8</sup> ¿Xá mod mbli mèn ba' par ndyoodi's mèn ba' xti's na' co' ngóol no thib thib na', sya? <sup>9</sup> Hui' gu' nexa. Trè' nzo mèn gulàaz che'n làaz mèn part; mèn gulàaz che'n làaz mèn med; mèn gulàaz che'n làaz mèn elam; mèn gulàaz che'n làaz mèn mesopotam; mèn gulàaz che'n làaz mèn jude; mèn gulàaz che'n làaz mèn capados; mèn gulàaz che'n làaz mèn pont; mèn gulàaz che'n làaz mèn asia; <sup>10</sup> mèn gulàaz che'n làaz mèn frig; mèn gulàaz che'n làaz mèn panfil; mèn gulàaz che'n làaz mèn egipt; mèn gulàaz che'n làaz mèn africa; mèn co' nde chol lugar co' más tith loo làaz mèn ciren. No nzo ndxep mèn co' nac mèn gulàaz che'n làaz mèn ciuda Rom, ne, co' naban ciuda Jerusalén làth na'. Ndxep mèn gulàaz che'n làaz mèn ciuda Rom nac mèn nación Israel por ngóol mèn le'n nación Israel. Le' taandxep mèn ciuda Rom na, ngòc mèn nación Israel por ngòc mèna mèn xley' mèn nación Israel. <sup>11</sup> Lomisque' ne, nzo ndxep mèn co' nac mèn gulàaz che'n làaz mèn cret co' nac thib yòo biiz co' nziri' le'n nítto'. No nzo ndxep mèn gulàaz che'n làaz mèn arab. Ale ndxòn na' xti's ryete mèn ba' co' nac con' roo no con' xèn co' mbli Diox loo xti's na' co' nac di'stèepe' na'.

<sup>12</sup> Ryete mèna ante ngüi' no ante ñaa loo cón ndxàca. Axta ne' ne' ñee mèna cón li mèna xtùuz. No mnibdi's mèna loo xtàa mèna. Ndxab mèna:

—¿Cón con' ndxè'? ¿Chonon tatua' ngue li Diox loo na', yoo?

<sup>13</sup> Per taamas mèn mxìis co'se' mbui' mèn ndxàc cón ndxàca. Mbez mèna loo xtàa mèna:

—Tatua' ndxàca loo mèn ba' tac ndyuuz mèn ba'.

*Pedr mda' cuent loo mèn cón che'n cón ndxàc.*

<sup>14</sup> Sya, ngo too Pedr con taamas myen' xtàa Pedr co' ndxe' di's che'n Jesús loo mèn co' mqueltàaa. Cabii ndxab Pedr loo mèna:

—Gu' co' nac mèn nación Israel no gu' co' nac mèn taamas nación co' naban le'n ciuda Jerusalén, na ndlyaz gòn gu' no ta' gu' cuent cón che'n cón ndxàc ba'. No huen huen tub nza gu' loo con' co' nde niin loo gu' nalle'. <sup>15</sup> Cón che'n mèn co' mbez ndxep gu' ndyuuz, mèn ba' indyuuzte xal ndli ndxep gu' xtùuz. ¡Máa yob yéc gu'! Hor ndxè' inacte hor co' tyuuz mèn. Pente nzo na' hor nquée guyè' xtil'. <sup>16</sup> Ndxè'leque', con' co' ndxàc co' ngüi' gu' ba' nac con' co' ndxàc no con' co' mdyaale' xalque' ngòc di's co' gunii Joel co' mde'th di's co' ndxab Diox co'se' ndxab Joel taandxè':

<sup>17</sup> Diox ndxab cón che'n con' co' gac le'n lult huiz co' nde nque. Ndxab Diox: Na làa Xpii che'n daa loo mèn dib athu loo izlyo'. Myen'bi' co' nac xgan' mèn no myen'got co' nac rsap mèn, te'th myen'a di's loo mèn co' ñibe'en loo myen'. Lomisque' ne, myen'bi' xyo'f loo con' loo co' lu'en loo myen'. Lomisque' ne, loo mèn gox xyo'f loo con' loo co' lu'en loo mèn gox làth mcal'.

<sup>18</sup> Lomisque' ne, ndxab Diox: Daa làa Xpii daa loo mènbi' no loo mèngot co' xo'f zin' zin' cón chenen co'se' gàca huiza. No te'th mènna con' co' ñibe'en loo mèn par te'th mènna loo mèn.

<sup>19</sup> Lin par gàc con' roo no con' xèn loo bé' par hui' mèn no ñaa mèn con' lin. Le' loo izlyo' na, lin huax con' co' gàc thib señ loo mèn. Lin par gath huax mèn. Lin par lyàa quii loo mèn huax lugar. Lin par yitoo zen loo mèn xal co'se' ndxetoo xcauu.

<sup>20</sup> Huiza ne'teniide huiz. Dyau' loo huiz huiza. Lomisque' ne, ñaa loo mbe' xal ñaa ren. Gàc con'a ndoore' co'se' gàc tiemp telux Tad Diox izlyo'. Huiza gàc huiz co'se' lu' Diox cón che'n con' roo no con' xèn che'npe' Diox. No lu' Diox rye loothe con' roo con' xèn co' ndxàp Diox la's nii Diox no la's ya' Diox loo mèn.

<sup>21</sup> Per ryete mèn co' mbez lèe Tad, mènna lyá' loo con' ryes.

<sup>22</sup> Mèn nación Israel, bìn gu' di's co' nde toodizen loo gu'. Jesús che'n yèez Nazaret ngòc thib mbi' co' mtel' Diox loo gu'. No huen huen nda' gu' cuent le' Diox mtel' Jesús làth gu' tac Diox mbli loo Jesús par mbli Jesús huax yalguzye' roo yalguzye' xèn loo gu'. No huen huen nda' que' gu' cuent cón che'n yalguzye' co' mbli Jesús làth gu', ¿lé? <sup>23</sup> Per mastale' mbli Jesús huax yalguzye' loo gu', ngo thib mbi' co' mda'xù' Jesús loo gu'. Sya, ryete gu' mqueltàa. Mbe' gu' Jesús xal thib pres par mbeth gu' Jesús co'se' mnibe' gu' loo mèn ye'rsin' que' mènna Jesús loo thib cruz. Mbli gu' con'a loo Jesús xalque' mnibe' Diox no xalque' mblobe' Diox lezo' Diox póla par gàca tataa. <sup>24</sup> Per mbli Diox ngro xban Jesús. No mtelá' Diox Jesús loo yalguth par ne'ntin lizte Jesús thidtene tac yalguth co' mtin liz Jesús yende mod ngli gan loo Jesús thidtene. <sup>25</sup> Co'se' gunii David co' ngòc rey póla cón che'n Jesús, ndxab David taandxè':

Daa gunèpe' loo Tad daa. Ndoo Tad daa loon thidtene. No thidteneque' nzo Tad daa cuaten par yende cón li par zyebe daa no xi'th daa.

<sup>26</sup> Por con'a, anze'f mdyac lezon. No ale angmdoon mdoodizen di's por ndyac lezon. No por cona, mastale' gath bél'yòo laden, ndxàpen yalxla's loo Tad daa le' Tad daa li par yo ban daa tedib vez.

<sup>27</sup> Tac U', Tad, ne'lá'ya'de alm daa par quée yalguth no tin yalguth alm daa thidtene. Ne' ne' ta' U' lugar yiza' no ga's bél'yòo laden, daa co' mxo'f zin' zin' che'n U', daa co' anze'f que' lezo' U' ñèe U'.

<sup>28</sup> Tad, U' mbli' loon cón lin par ban no daa U' thidtene. No yiloo, anze'f tyac tìn' lezon co'se' hui'en loo U'.

<sup>29</sup> Gu' co' nac mèn nación Israel co' nac hues xtàa daa, lìcque', gu' nda'que' cuent le' David co' ngòc xudgool na' nguthque'. No mca's mèn thebol David. No axta nalle' be' nax bá' che'n thebol David co' ngüi' na' no co' ñaa na' loo. <sup>30</sup> Per gu' nda'que' cuent le' David ngòc thib mbi' co' mde'th di's co' ndxab Diox. No huen huen nanee David le' Diox mcàbgòn no mbli nèe Diox di's co' ngro' ro Diox co' ndxab Diox loo David le' thib xa' co' gàc bìn David, xa'a gàc Crist co' yan' lugar che'n David co' tyub ñibe' loo mèn nación Israel. <sup>31</sup> Por cona, mda' David cuent cón che'n Crist xal mèn co' gunèe ngòc con' loo Crist ndoore' gàca le' Crist ryo xban làth mèn nguth. No lomisque' ne, ndxab David le' alm Crist no xpüi Crist ne'yan'te le'n ye'rbiil. Ne' ne' yiza' bél'yòo lad Crist. No ne' ne' ga's bél'yòo lad Crist. <sup>32</sup> Cona, ngue niin loo gu': Diox mblo xban leque yub Jesús co' nac Crist. Ryete nu', xal nziri' nu' trè', nanee nu' no nda'que' nu' cuent xal ngòca loo Jesús co'se' mblo xban Diox Jesús làth mèn nguth. <sup>33</sup> Co'se' ngolo mbli Diox ngro xban Jesús, Diox mnibe' loo Jesús làa Jesús Xpii Natú' loo mèn, Xpii Natú' co' mcàbgòn Diox li Diox lyàa loo mèn. No yòo Xpii Natú' loo mèn par ñibe' Xpii Natú' loo mèn. No nalle' ryete con' co' mbui' gu' no co' mbìn gu'a, ngòc con'a por Jesús. <sup>34</sup> Inacte yub David co' ngro xban no co' mquée loo bé'. Tac yub David ndxab taandxè':

Tad Diox ndxab loo Tad daa: Ftub cuaten, ey, <sup>35</sup> axtaque' lin le' rye mèn co' nac ngolo ngola's che'nl tyubdi's lool no gàc mènna mèn nado' lool.

<sup>36</sup> Por cona, daa Pedr ngue nii loo gu' co' nac mèn nación Israel: Ne'gànte lezo' gu' no ne'gàc chopte lezo' gu'. Fta' gu' cuent co' huenleque' leque yub Jesús co' mbli gu'

mandad mquée loo cruz, Diox mbli par ngòc Jesús Tad no jef loo ryethe con'. Mbli Diox ngòc Jesús Crist, ne.

<sup>37</sup> Co'se' mbìn mèna tataa ndxab Pedr, mxi yéc mèna no mxi lezo' mèna. Mnibdi's mèna loo Pedr no loo taamas myen' xtàa Pedr co' nziri' loo Pedr:

—Gu' co' nac mèn gulàaz nu' no co' nac xtàa nu', gunee gu' loo nu' cón ndxàal li nu' por mbli nu' con' ye'rsin' con Jesús, sya, cara.

<sup>38</sup> Sya, mcàb Pedr. Ndxab Pedr loo mèna:

—Blàa yéc gu' no blàa lezo' gu' no fse' gu' ryethe mod ye'rsin' co' ndxàp gu' loo Diox. No yilò, gòc bautizar thib thib gu' por lèe che'n Jesucrist par tataa mod lu' gu' loo mèn le' Diox mton' xquin gu' no xtol gu'. Le' sya, Diox li par lyàa Xpii Natú' loo gu' no yòo Xpii Natú' loo gu' par ñibe' Xpii Natú' loo gu'. <sup>39</sup> Co'se' mcàbgòn Diox làa Diox Xpii Natú' loo mèn, con'a nee di's, li Diox par lyàa no yòo Xpii Natú' loo gu' no loo xin' gu' par ñibe' Xpii Natú' loo gu' no loo xin' gu'. No mcàbgòn Diox par lyàa no yòo Xpii Natú' loo mèn tith par ñibe' Xpii Natú' loo rye mèn co' nzo ban tith. Con' co' mcàbgòn Tad Diox loo na'a par li Tad Diox loo na'a nee di's le' Diox co' xà' mèn no cui Diox mèn loo con' ye'rsin' par yòo mèna loo cón che'n Diox.

<sup>40</sup> Con di's ndxè' co' mdoodi's Pedr no con taamas di's co' mdoodi's Pedr, mco'x Pedr mèn no ndxab Pedr loo mèn nación Israel:

—Leque gu' blàa yéc gu' no blàa gu' lezo' gu' no fta' gu' lugar tí' no làa Diox gu' loo con' ryes làth mèn nación Israel co' nac mèn nala's, mèn co' ne'ndalte ngala's no co' ne'ndalte ndubdi's loo con' mnibe' Diox loo mèna par li mèna.

<sup>41</sup> Ngolò, ryete mèn co' mdub nza no co' mda' lugar mbìn di's co' ndxab Pedr, mèn co' ngulàa yéc no co' ngulàa lezo' par mse' mèna mod co' ngòp mèna loo Diox, mèna ngòc bautizar leque hora. Leque huiza, mqueltàa mèna con mèn co' ngola's loo Jesús. Mèn co' ngòc bautizar huiza ngòc son mil mèn. <sup>42</sup> No ryete mèna mbli nèe leque mèna loo con' co' mblu' myen' co' ngòc xin' mté'th Jesús co' ndxe' di's che'n Jesús loo mèn. Thidte di's thidte cuent ngure ban rye mèna. No ngurez mèna Diox. No thidte mqueltàa rye mèna par hua mèna xít mèn no lua' mèn atate huiz.

*Trè' ndlu' cón che'n xá mod ngure ban mèn tiempa, mèn co' ngòo loo cón che'n Diox por cón che'n Jesús.*

<sup>43</sup> Le'n huiza ryete mèn co' ne'ndalte ngala's xal nac di's co' ndxab Pedr, ryete mèna mzyeb no ngo no lezo' mèna por con' co' ndxàc le'n huiza. Nde nxon', mbli myen' xin' mté'th Jesús co' ndxe' di's che'n Jesús huax yalguzye' roo no yalguzye' xèn. No mbli myen' huax con' co' nac seña loo mèn. <sup>44</sup> Le' ryete mèn co' ngola's na, ryete mèna thidte di's thidte cuent ngure. No ryete con' co' ngòc che'n thib thib mèn ndli zin' ryete mèna xal che'npe' mèna, <sup>45</sup> axta mtho' rye mèn co' ndxàp che'n mèn, con' co' nac che'npe' mèn; angab na'i, xyòn mèn, no má' mèn, no taamas con' co' ngòc che'n mèn par ngro' tmi par mda' mèn tmi mcàa thib thib mèn co' ngola's co' ndyac yaltii nesida. <sup>46</sup> Más de cona, atate huiz mqueltàa mèna le'n templ che'n Diox par cuez mèn Diox. Ndxeloa, thidte nqueltàa mèn. Nda mèn liz hues xtàa mèn co' ndli nab con' hua mèn; chó mèn ta'i yé'; chó mèn ta'i huize' co' ngòc mod che'n mèna tiempa. Látha, nziri' mèn guyith guxiis. No yende chó mèn ndye's no nxyal' làth xtàa mèna. <sup>47</sup> No atate huiz mbez mèna di's roo di's xèn no di's natú' cón che'n Diox loo mèn. No mbez mèna loo Diox Diox roo Diox xèn nac Diox. Látha, rye mèn ciuda Jerusalén co' tarte lyàa yéc no co' tarte lyàa lezo', ryete mèna ngòp mod. No mbli mèna par mdyu' mèn co' ngola's loo Diox por cón che'n Jesucrist loo mèn ciuda Jerusalén. Más de cona, Tad Diox tolo gue li par tolo ndlyàa yéc mèn no ndlyàa lezo' mèn par lyá' mèn loo con' ryes no thidte queltàa no mèna mèn co' ndxela's loo Jesucrist no loo cón che'n Jesucrist.

<sup>1</sup> Thib huiz ngòc thib con'. Láth nda quée Pedr ryop Juàn co'te' ndub templ, hora ngòc hor mquée guyon bzyè. Hora nqueltàa mèn le'n templ par mbez mèn Diox. <sup>2</sup> Ryete huiz ndyub thib mbi' coj co' anon ngóol coj ro puert che'n templ. Atate huiz ndxe' mèn guliz mbi' coja mbi' coja. Nda lá' mèn mbi' coj ro puert che'n templ, puert co' ne' lèe Puert Co' Nabe's Ñaa, par ña'b mbi' gòn loo mèn co' ndxòo no co' ndryo' le'n templ. <sup>3</sup> Co'se' gunèe mbi' coj Pedr no Juàn láth nde yòo Pedr no Juàn le'n templ, mna'b mbi' gòn loo Pedr no loo Juàn. <sup>4</sup> Sya, xèe mbui' Pedr no Juàn loo mbi'. Ndxab Pedr loo mbi':

—Mbi', hui' loo nu', xàa.

<sup>5</sup> Sya, más mbli mbi' mbui' mbi' loo Pedr no loo Juàn. Mblya's mbi' peser ta' Pedr ryop Juàn ndxep gòn càa mbi'. <sup>6</sup> Per ndxe'leque', ndxab Pedr loo mbi':

—Hui' nexa. Indxàpten nec thib loo tmi, cara. Per thib con' co' ndxác daa ndlin, na li par gàca lool. Por lèe che'n Tad Jesucrist, co' ngòc mèn yèez Nazaret, goo too. Fteyez niil no nali ftee.

<sup>7</sup> Sya, mxen Pedr ya' mbi' coja co' nac ladli. Mxít too Pedr mbi'. Leque hora, mbyez nii mbi' no mbyez yen nii mbi' no mdyoxcua' nii mbi' xal nii thib mèn huen.

<sup>8</sup> Ngoloa, thidte nguát mbi'. No, chàa, ngo too mbi'. Mtlo mbi', mdee nii mbi'. Mque tee nii mbi' par ndxè' par ba'. Ale sangngòo no mbi' Pedr no Juàn le'n templ. Mdee nii mbi'. No asembli mbi' ndxát mbi'. No cabii mbez mbi':

—Susque' Diox roo Diox xèn nac Diox, yoo.

<sup>9</sup> No ryete mèn co' nzo le'n templ gunèe xal gundee nii mbi' no xal mbez mbi' Diox roo Diox xèn nac Diox. <sup>10</sup> No ryete mènà ngua no lezo'. No mzyeb mènà co'se' gunèe mèn con' co' ngòc loo mbi'. Tac mènà huen huen ndlibe' mbi' no nanee mènà le' mbi'a nac leque yub mbi' co' ndyub ro puert che'n templ co' ña'b gòn, ro puert co' ne' lèe Puert Co' Nabe's Ñaa.

*Pedr ngo yalbàn loo mèn ro portal che'n templ co' ne' lèe Portal che'n Salomón.*

<sup>11</sup> Per mbi' coj co' mdee là thidtene ngue tee nque xís Pedr ryop Juàn. Indlya'ste mbi' lá' mbi' Pedr ryop Juàn. Le' rye mèn co' nzo le'n templ hora na, ngo too par ngua tee hui' mènà xal ndxác mbi'a. Thidte mqueltàa rye mènà leque ro portal che'n templ co' ne' lèe Portal che'n Salomón co'te' nzo Pedr ryop Juàn no mbi' coja. Ante ngüi' mènà no ante ñaa mènà xal ñaa con' co' ngòc loo mbi' coja. <sup>12</sup> Co'se' gunèe Pedr ryete mèn mqueltàa loo Pedr, ndxab Pedr loo mènà:

—Aa, mèn nación Israel. ¿Chonon ndxo no lezo' gu' no nzyeb gu', à'? ¿Chonon ale xèe ngüi' gu' loo nu' no ndli gu' cuent ale yub nu' mbli par mdee nali mbi' coj ndxè' no ndli gu' cuent peser ndxàp nu' ndxep con' roo con' xèn la's nii nu' no la's ya' nu' o ndli gu' cuent por nac nu' mèn co' arid mbez Diox no arid ncòo' nu' yéc nu' loo Diox, con'a mbli nu' par mdee nali mbi' coj ba', cà'? Yende xàa. <sup>13</sup> Ndxè'leque', con' co' ngòc loo mbi' ba', le'i ngòc xal nde niin loo gu' ndxè'. Ndlyazen gòn gu' di's co' gon yalbàn loo gu' nalle': Diox co' nac Diox che'n xudgool na' Abraham, no che'n xudgool na' Isaac, no che'n xudgool na' Cob, Diox mbli par ngòc más con' guryath no con' guryèn loo mbi' co' mxo'f zin' zin' che'n Diox, mbi' co' nac Jesús co' ngòc leque Jesús co' mda'xù' gu' loo mèn che'n ciuda Rom co' ñibe' loo na'. No co'se' mblya's Pilat co' nac gobiern loo nación na' nglá' Pilat Jesús, gu' ne'ndalte nglá' Pilat Jesús. <sup>14</sup> Lugar de gna'b gu' loo Pilat nglá' Pilat Jesús co' nac mbi' natú' no co' nac mbi' nali no mbi' nambii, ale ndxe'leque', mna'b gu' loo Pilat par mblo' Pilat thib mbi'guth mèn lezi'f loo gu'. <sup>15</sup> Ale tataa mbli gu' par mbethxù' gu' mbi' co' nac thidte mbi' co' mbli par ngòc yaltixù' loo mbi' par yoo ban no mèn Diox thidtene. Per mastale' mbeth gu' mbi', Diox mbli par ngro xban mbi' làth mèn nguth. No nalle' nu' nda'que' cuent cón che'n xá mod ngro xban mbi' làth mèn nguth. <sup>16</sup> No nalle' por lèe che'n leque yub Jesús, co' ngola's mbi' coj ba' loo no ndxàp mbi' yalxla's loo Jesús, por cona, mbli Jesús mbyez nii mbi' no mbyez yen nii mbi' par ngo too li mbi'. Gu' huen huen ndlibe' mbi' no ngue hui' gu' loo mbi' ba' nalle'. No por ngola's mbi' loo Jesús, con'a mbli mdee li mbi' thidtene xalque' ngüi' gu' no xalque' ñaa gu' loo mbi' nalle'.

<sup>17</sup> Per nalle', gu' co' nac mèn nación Israel co' ndxàc hues xtàa daa, daa nanee no non daa co'se' thidte mqueltàa gu' con mèn co' ñibe', no co' ndyoo ner, no co' ndyoo naa loo mèn nación Israel par mbeth gu' Jesús, licpe' ba'i, ne'ñeede gu' no ne'nda'de gu' cuent cón ngue li gu' hora. <sup>18</sup> Per Diox tataa mbli par tataa mbli no gu' Jesús par mdyaa no ngòcque' xal mde'th mèn co' mde'th di's co' ndxab Diox póla le' Crist co' nac xgan'pe' Diox naquinque' tyactiixù'. <sup>19</sup> Cona, ngue niin loo gu': Más huen blàa yéc gu' no blàa lezo' gu' par zye' mod co' ndxàp gu' loo Diox par tataa mod lyá' gu' loo con' ryes no bere gu' yòope' gu' loo cón che'n Diox tedib vez par tataa mod ton' Diox xquin gu' no xtol gu'. Le' sya, Tad Diox li par gàc thib tiemp loo gu' par yo nagàl lezo' gu' loo Diox no yende chó mèn co' xà' gu' loo cón che'n Diox. <sup>20</sup> No tel' Diox Jesús loo gu' co'se' gàc tiemp, Jesús co' nac Crist co' mcai Diox par xo'f zin' Crist thib zin' loo gu' co'se' gàcpe' tiempa. <sup>21</sup> Tataa li Diox loo gu', mastale' nquin yo Jesús loo bé' axta gàc huiz no gàc tiemp co'se' li nab Diox ryethe con' co' nquin gàc ndoore' yi'th Jesús loo izlyo' tedib vez. Gàca xalque' ndxab Diox por ro mèn co' mde'th di's co' ndxab Diox póla. <sup>22</sup> Tataague' ndxab Moisés loo xudgool na' póla, ne, co'se' ndxab Moisés:

Diox co' nac Tad Diox na' tel' thib mbi' co' te'th di's co' ndxab Diox làth na' co' nac mèn nación Israel xalque' mtel' Diox daa làth gu'. Ndlyazen tyub nza gu' loo di's co' ñee xa'a loo gu' no gòn gu' ro xa'.

<sup>23</sup> Tac ryete mèn co' ne'tyub nzade no co' ne'gònte ro xa' co' te'th di's che'n Diox, ryete mèn lyux no ryo xà' mèn làth mèn nación Israel thidtene.

<sup>24</sup> Por cona, daa co' lèe Pedr, tolo ngue niin loo gu': Ryete mèn co' mde'th di's co' ndxab Diox co' nac con che'n Diox ngòc Samuel co' mde'th di's co' ndxab Diox no taamas mèn co' nde nque. Mde'th mèn cón che'n cón ndxàc le'n huiz ndxè'. <sup>25</sup> Con' co' mcàbgòn Diox por cón che'n mèn co' mde'th di's co' ndxab Diox, Diox mcàbgòna par ndxàca loo gu'. No par gàc con' ndac loo gu', Diox mbli par mbyan' thib conveñ con mèn co' ngòc xudgool na' póla co'se' ndxab Diox loo Abraham:

Ryete mèn co' naban dib athu loo izlyo', gàc con' ndac loo mèn por cón che'n thib mbi' co' nac bin lùu.

<sup>26</sup> Co'se' mblo xban Diox mbi' co' mxo'f zin' zin' che'n Diox, co' nac Jesús, mnibe' Diox loo Jesús tel' Jesús nu' ner loo gu' par li Jesús par gàc con' ndac loo gu' no par tataa mod lá' thib thib gu' con' ye'rsin' co' ndli gu' loo Diox.

#### 4

*Pedr no Juàn mdooxù' loo mèn co' ñibe', no co' ndyoo ner, no co' ndyoo naa loo mèn xley' mèn nación Israel.*

<sup>1</sup> Tatabe' ngue toodi's no Pedr ryop Juàn mèn co'se' mzin mèn co' nac nguley' con mbi' co' ñibe' loo solndad co' nquenap templ no con mèn co' nac mèn xley' saduse co'te' mqueltàa Pedr ryop Juàn con mèn. <sup>2</sup> Ryete mèn ngòc nayi' loo Pedr no loo Juàn tac Pedr ryop Juàn ngue lu' mèn. No mbez Pedr ryop Juàn le' mèn co' nguth ryo xbanque'. Tataa mbez Pedr ryop Juàn loo mèn tac, ngolo nguth Jesús, ngro xbanque' Jesús. <sup>3</sup> Sya, mxen mèn Pedr ryop Juàn xal thib pres par mblo mèn Pedr ryop Juàn lezi'f par tub rez mèn cón che'n Pedr ryop Juàn tedib huiz tac huiza mzyèle' izlyo'. <sup>4</sup> Per mastale' tataa mbli mèn con Pedr ryop Juàn, huax mèn ngola's co'se' mbìn mèn di's co' ndxab Pedr hora. Anon mtlo ngola's mèn loo Jesús, por loo rye mèn co' ngola's co' ndxòo cuent ngòc ante mènbi' ngòcque' ga'y mil mèn. Indxòode cuent mèngot ne' myen' bix.

<sup>5</sup> Co'se' ngo nìi izlyo' tedib huiz co' nde nquea, ryete mèn co' ndyoo ner, no co' ndyoo naa, no co' ñibe' loo mèn nación Israel, no mèngool che'n mèn nación Israel, no mèn co' nac maistr co' ndlu' cón che'n ley co' mxo'f Moisés loo mèn, ryete mèn mqueltàa le'n ciuda Jerusalén. <sup>6</sup> Nde nxon', mqueltàa no mèn Anás co' más ñibe' loo rye nguley' tiempa. No mqueltàa no mèn Caifás, no thib mbi' co' lèe Juàn, no tedib mbi' co' lèe Alejandr. Mqueltàa ryete mèn co' ngòc mèn guliz che'n taamas mbi' co' más ñibe' loo rye nguley', ne. <sup>7</sup> Ngolo mqueltàa rye mèn, mbli mèn mandad ngua lo' mèn Pedr ryop



Juàn lezi'f. Ngoloa, mdoo mèn Pedr ryop Juàn xtau' loo rye mènà. Mnibdi's mènà loo Pedr no loo Juàn. Ndxab mènà:

—¿Chó mnibe' loo gu' o por chó lèe mèn ndli gu' con' co' nzi li gu' ba, à'?

<sup>8</sup> Sya, mnibe'pe' Xpii Natú' loo Pedr. Ndxab Pedr loo mènà:

—Gu' co' nac mèn co' ñibe'pe' loo mèn nación Israel, no gu', mèngool co' ñibe', no gu' co' ndyoo ner, no co' ndyoo naa loo mèn nación Israel, <sup>9</sup> ya que ngue ñibdi's gu' loo nu' cón che'n con' ndac co' ngòc loo thìb mbi' yíiz par lya's gu' gòn gu' no ta' gu' cuent xá mod ngòc mbyac mbi' yíiz ndxè', <sup>10</sup> nu' ta' cuent loo ryete gu' par non ryete mèn nación Israel le' mbi' yíiz co' mbyac, co' ndoo loo gu' ndxè', mbyac mbi'a por cón che'n con' roo no con' xèn co' ndxàp Jesucrist la's nii Jesucrist no la's ya' Jesucrist, Jesucrist co' nac mèn yèez Nazaret. Jesucrist ngòc leque yub Jesucrist co' mque' gu' loo cruz par nguth Jesucrist loo cruz. Per yub Diox mblo xban Jesucrist làth mèn nguth. <sup>11</sup> Gu' mtè'b cón che'n Jesucrist no ne'nglide gu' cas cón che'n Jesucrist. Ne' ne' ngli gu' cas Jesucrist co'se' mbi'th lu' Jesucrist loo gu' cón che'n xá mod ndlya's Diox ñibe'pe' Diox loo gu' no loo taamas mèn. Per Diox mbli par ngòc Jesucrist xa' co' ndli le' mèn tyal par ñibe'pe' Diox loo mèn. Loo cón che'n Diox, gu' ngòc xal thìb albañil co' mblobii thìb quèe co' naye co'se' mbez albañil ne'lìde sirv quèe par tyub quèe squin yò. Per ngo tedib albañil, co' nac yub Diox, co' mblít quèea par gác quèea quèe co' tyub squin yò. <sup>12</sup> No loo xgan' Diox co' nac Jesucrist, co' nee di's nac xal quèea, yende nec thìb mèn co' gác tí' no làa mèn loo con' ryes. Más de cona, tarte too Diox tedib mèn xà' loo Jesucrist par gác mènà telá' mènà na' loo con' ryes.

<sup>13</sup> Co'se' ñèe ryete mèn co' ñibe', no co' ndyoo ner, no co' ndyoo naa loo mèn nación Israela le' Pedr ryop Juàn con dibaxla's ndyoodi's, no mda' mènà cuent le' Pedr ryop Juàn nac mèn co' ne'nque'de arid scuel, no nac Pedr ryop Juàn xalque' chol mèn, sya, ante ngüi' mènà no ante ñaa mènà. Syare' mda' mènà cuent le' Pedr ryop Juàn, lìcque', mque tee no Jesús. <sup>14</sup> Más de cona, ñèe mènà ndoo mbi' co' mbyaca con Pedr no Juàn. No por cona, yende chó di's ngab mènà por ndxecloo mènà ñèe mènà Pedr ryop Juàn. <sup>15</sup> Sya, mbli mènà mandad. Mblo' mèn Pedr ryop Juàn làth rye mèn co' ngureri', <sup>16</sup> par noo noo tyoodi's mènà con xtàa mèn cón che'n Pedr ryop Juàn. Ndxab mènà:

—¿Xá nee gu', cara? ¿Cón li na' con ryop mbi' ba'? Tac ryete mèn co' naban ciuda Jerusalén huen huen nda' cuent le' ryop mbi' ba' mbli ngòc thìb yalguzye' roo yalguzye' xèn loo mbi' coj. No nalle' yende mod gab na' ilicte mbli ryop mbi'i. <sup>17</sup> Per nalle', par ne'tolode yath yèn co' mbli ryop mbi' loo mèn, cua'n na' mod tezeb na' ryop mbi' par gàca desde nalle' par delant, ya ne'tolode tyoodi's ryop mbi' loo nec thìb mèn cón che'n mbi' co' mbez ryop mbi' ngro' lèe Jesús co' ñibe' loo ryop mbi'.

<sup>18</sup> Ngoloa, ngurez mènà Pedr ryop Juàn. Mnibe' yèe mènà. Ndxab mènà:

—Desde nalle' par delant, ya indlya'ste nu' tolo tyoodi's gu' no tolo lu' gu' loo mèn por cón che'n mbi' co' mbez gu' ngro' lèe Jesús, mbi' co' mbez gu' ñibe' loo gu' par li gu' con' ndlya's gu'.

<sup>19</sup> Per Pedr ryop Juàn mcàb loo mènà. Ndxab Pedr ryop Juàn:

—Leque gu' bli xtùuz co' huenleque' ñeene' ché' huen naca no ché' nalì naca loo Diox más tyubdi's nu' loo gu' leque tyubdi's nu' loo Diox. <sup>20</sup> Yende mod lá' nu' par ne'tyoodi'ste nu' cón che'n con' gunèe nu' no cón che'n con' mbìn nu' cón che'n Jesús.

<sup>21</sup> Sya, mèn co' ñibe' loo mèn nación Israela tataa mbli preb par mtezeb mènà Pedr con Juàn. Per yende cón mbli no mènà Pedr ryop Juàn. Mbla' mènà ndyàa Pedr ryop Juàn. Ne'ngácte mènà ncu'a'n mènà mod par tetii mènà Pedr ryop Juàn tac ryete mèn co' naban le'n ciuda Jerusalén mbez con' roo con' xèn mbli Diox por cón che'n con' co' ngòc loo mbi' coj. <sup>22</sup> Mbi' co' mbyac por yalguzye' co' ngòca, mbi' nzole' masre' cho' lín'.

*Mèn co' ndxela's loo Jesucrist mbez Diox par li Diox par gàpre' mèn yalxla's loo Diox no yò valor loo mèn loo cón che'n Jesucrist.*

<sup>23</sup> Co'se' mblá' mèn co' ñibe' loo mèn nación Israel ndyàa Pedr ryop Juàn co'te' nzo taamas myen' co' ndxàc xtàa Pedr ryop Juàn por cón che'n Jesucrist, mda' ryop myen' cuent ryete con' mbli mèn co' nac jef co' más ñibe' loo nguley' no rye mèngool co' ñibe', no co' ndyoo ner, no co' ndyoo naa loo mèn nación Israel xal nac di's co' mnibe' mèn loo ryop myen'. <sup>24</sup> Co'se' mbìn myen' xtàa Pedr ryop Juàn di'sa, thidte mqueltàa rye myen'a par ngurez myen' Diox. Ndxab myen' loo Diox:

—Tad Diox, U' co' nac Tad Diox nu', U' nac Diox co' mblec no co' mxen' bé' no izlyo' no níttó' no ryethe taamás con' co' nziri'. <sup>25</sup> Por cón che'n Xpii Natú' mde'th David di's co' ndxab U' loo David gunii David, David co' mxo'f zin' cón che'n U'. Taandxè' gunii David di's co' ndxab U' loo David:

¿Chonon susque' ndxátbèe mèn chol nación no chol mèn ndli xtùuz con' anxle', yoo?

<sup>26</sup> Le' mèn co' ñibe' loo xtàa loo izlyo' na, nguátbèe, ne. Lomisque', ryete mèn co' ñibe' loo chol nación no loo chol yèez, thidte ngòc ngolo ngola's loo Diox no loo Crist co' mnibe' Diox mbi'th loo izlyo'.

<sup>27</sup> Tolo ndxab mèn loo Diox láth mbez mèn Diox:

—Lìcque', Tad, Herod no Pons Pilat thidte ngòc le'n ciuda Jerusalén ndxè' con mèn tith no con mèn nación Israel par ngòc mèn ngolo ngola's che'n Jesús co' ngòc thib mbi' natú' co' mxo'f zin' cón che'n U', no co' mcui U', no co' mtel' U' par xo'f zin' Jesús cón che'n U'. <sup>28</sup> Co'se' mtetii mèn Jesús co' nac xgan' U', mbli mèn con'a xalque' mblobe' lezo' U' no xalque' mnibe' U' lezo' U' par gàca tataa loo Jesús no ngòca. <sup>29</sup> No nalle', Tad, hui' U' loo mèn le' mèn ngue li preb par tezeb mèn nu'. Nalle' ña'b nu' loo U' le' U' li par tolo gáp nu' yalxla's loo U', no ne'zyebte nu' par co nu' yalbàn no te'th nu' cón che'n U', nu' co' ngue xo'f zin' cón che'n U'. <sup>30</sup> No ña'b nu' loo U' li U' par teyac nu' mèn no li nu' señ co' nac yalguzye' por cón che'n con' roo con' xèn co' nzo la's nii xgan' U' Jesús no co' nzo la's ya' xgan' U' Jesús, Jesús co' nac mbi' natú'.

<sup>31</sup> Co'se' ngolo ngurez myen' Diox, chàa, mbuin xòo co'te' nziri' myen'. No leque hora mtlo mnibe'pe' Xpii Natú' loo myen'. No dibaxla's ngo myen' yalbàn no nde'th myen' cón che'n di's ndac che'n Diox loo mèn.

*Ryethe con' co' ngòc che'npe' thib thib mèn co' ngola's loo Jesús mbli zin' rye mèn co' ndxela's.*

<sup>32</sup> Ryethe mèn co' ngola's loo cón che'n Jesús thidte mbli mèn xtùuz no thidte mden' lezo' mèn cón che'n Diox no cón che'n hues xtàa mèn por cón che'n Jesús. Nec thib mèn ne'ngabte le' con' co' nac che'npe' thib thib mèn nac ante che'n mèn. Ndxle'leque', ryethe con' co' ngòc che'npe' thib thib mèn mbli mèn cuent ngòc che'npe' ryethe mèn.

<sup>33</sup> Le' rye myen' xin' mté'th Jesús co' ndxe' di's che'n Jesús na, myen' tolo mda' cuent no ngo myen' yalbàn loo mèn le' Tad Jesús ngro xbanque' por cón che'n con' roo con' xèn co' nzo la's nii Diox no co' nzo la's ya' Diox. Le' Diox na, toloque' angndli huax con' ndac loo rye mèn co' ngola's. <sup>34</sup> Yende chó mèn ngòc mèn co' nde che con' loo làth mèn tac ryete mèn co' ngòp xyòn no co' ngòp liz, mtho' mèn xyòn mèn no liz mèn. No mque no mèn tmi. <sup>35</sup> Mda' mèn tmi loo myen' xin' mté'th Jesús co' ndxe' di's che'n Jesús par qui'th myen' tmi loo thib thib mèn, mèn co' naquin que no con'. <sup>36</sup> Ngo thib mbi' co' ngue tan cuent lool trè', Teofl. Mbi'a lèe Chè. Ngòc mbi' nguley'. Mxo'f zin' mbi' zin' co' ndli nguley' le'n templ ndoore' co'se' yila's mbi' loo Jesús. Mbi'a ngóol le'n thib yòo biiz le'n níttó' co' nac làaz che'n làaz mèn chipre. Mbi'a mdub lèe myen' xin' mté'th Jesús co' ndxe' di's tedib lèe co' lèe Mbèl'. Di's co' nac lèe mbi'a nee di's Mbi' Co' Ntegán Lezo' Mèn. <sup>37</sup> Mbi'a mtho' thib le' yòo bte'f co' mque no mbi'. No mque no mbi' tmi. Ngoloa, mda' mbi' tmia loo myen' xin' mté'th Jesús co' ndxe' di's che'n Jesús par qui'thguè' myen' tmia, ne.

<sup>1</sup> Làth mènà ngo thib mbi' co' ngro' lèe Anani no ngo sa'l mbi' co' ngro' lèe Safir. Mtho' ryop sa'l Anani thib le' yòo bte'f co' ngòc che'n ryop sa'l Anani par ryo' tmi loo yòo bte'fa càa mèn prob. <sup>2</sup> Per mbli ryop sa'l Anani thib con'. Ale xexte mxen ryop sa'l Anani ndxep tmi co' mtho' Anani yòo bte'fa. Le' taamas tmi na, mda' Anani loo myen' xin' mté'th Jesús co' ndxe' di's che'n Jesús. Ndxab Anani loo myen':

—Fcàaya' gu' rye tmi ndxè'. Tmi ndxè' mthon xyònen.

Per máa Safir naneeque' por plál mtho' Anani xyòn Anani. No más de cona, naneeque' Safir le' Anani xexte mcasloo ndxep tmia. <sup>3</sup> Per Xpii Natú' mbli par non Pedr con' mbli ryop sa'l Anani. Sya, ndxab Pedr loo Anani:

—Anani, ¿chonon mbla'l mbli Mebizya par toxqua'l yalgutyè' loo Xpii Natú' co'se' naneel le' lùu xexte mxen ndxep tmi co' mtho'l xyònlà, à'? <sup>4</sup> ¿Ché' inacte yòo bte'f xyònl par ñibe'l xyònl ndoore' tho'l xyònl, cà'? No ¿ché' ne'ngàcte che'nl tmi co' mtho'l xyònl par ñibe'l tmia, cà'? Yende chó ñibe' yèe loo ryop sa'l gu' par ta' gu' rye tmi co' mtho' gu' xyòn gu' loon. ¿Chonon mbliil xtùuz par xexte mcaslòol ndxep tmia, à'? Lùu mblya's nquediil mèn por mtoxcual yalgutyè'a. Per ndxe'leque', loo Diox mtoxcual yalgutyè'.

<sup>5</sup> Co'se' mbìn Anani tataa ndxab Pedr loo Anani, ale, chàa, ngulàa Anani loo yòo. Nguth Anani. Le' ryete mèn co' gunèe no co' mbìn cón che'n con' co' ngòc loo Anani, ryete mènà anze'f mzyeb. <sup>6</sup> Ngolòla, ngòo plá myen'bi' co'te' nax thebol Anani. Mchi'x myen' thib sab lad thebol Anani. No mbe' myen' thebol Anani. Ngua ca's myen' thebol Anani panteón.

<sup>7</sup> Casque' ndxàc son hor ngòc con'a loo Anani, co'se' guneei loo Anani, ngòo xa'got co' ngòc sa'l Anani co'te' nzo Pedr. No ne'nda'de xa' cuent cón ngòc loo Anani. <sup>8</sup> Pedr mnibdi's loo sa'l Anani. Ndxab Pedr:

—Gunee loon. ¿Ché' tmi co' mcàayan nac ryete tmi co' mtho' gu' xyòn gu', cà'?

Sa'l Anani ndxab:

—Aa. Ryete tmia nac tmi co' ngòc tmi co' mtho' nu' xyòn nu', pues.

<sup>9</sup> Le' sya, ndxab Pedr loo sa'l thebol Anani:

—¿Chonon thidte lal ngòc ryop sa'l gu' par mbli gu' preb Xpii Natú' par ñee gu' ñeene' ¿ché' tli gu' gan li gu' con' ye'rsin' no yende cón li no Xpii Natú' gu' por con' ye'rsin' co' mbli gu', cà'? Hui' nexa. Myen' co' ngua ca's thebol sa'l lùu panteón ndye'th bè ba'. No nalle' ñeei lool. Hue' myen' lùu par ya ca's myen' lùu, ne.

<sup>10</sup> Leque hora, chàa, ngulàa Safir sa'l thebol Anani loo yòo loo Pedr. Nguth Safir. Le'pe' ngòo myen' co' ngua ca's thebol Anani. Ale gunèe myen' ngolole' nguth Safir sa'l thebol Anani, ne. Que nzo ne'ñee lezo' myen' mblo' myen' thebol Safir sa'l thebol Anani. Ngua ca's myen' thebol Safir sa'l thebol Anani leque cuat thebol Anani. <sup>11</sup> Sya, ryete mèn co' nqueltàa loo cón che'n Diox anze'f mzyeb. No ryete taamas mèn co' mbìn cón che'n con' ngòca, anze'f mzyeb.

*Anze'f thib yalguzye' roo no yalguzye' xèn no señ mbli myen' tiempa.*

<sup>12</sup> Myen' xin' mté'th Jesús co' ndxe' di's che'n Jesús mbli huax señ no huax yalguzye' loo mèn co' naban ciuda Jerusalén. No ryete mèn co' ngola's loo Jesús thidte nqueltàa atate huiz ro corredor che'n templ co' mbez mèn lèe Portal che'n Salomón. <sup>13</sup> Nec thib mèn co' tarte tyal yila's loo Jesús indlide ryes par queltàa mènà con mèn co' ngola's loo Jesús. Per mastale' tataa ndli mènà, ndxàc amiu mènà con mèn co' ndxela's no ndli mènà cas loo mèn co' ndxela's loo Jesús. <sup>14</sup> Per le'n huiza anze'f thib mèn ngola's loo Jesús. Le'le' ngola's mènbi' no le'le' ngola's mèngot loo Jesús. <sup>15</sup> Ale axta ngo' mènà mèn yíiz ro ned. No nguix mènà mèn yíiz loo lún' no loo cami par ante co'se' riid Pedr par neda nzi quee lezo' mèn yíiza, ante riid xin Pedr loo mèn yíiza yac mèn yíiza. <sup>16</sup> Lomisque' ne, mèn che'n ryete yèez co' nziri' gax loo ciuda Jerusalén nde no mèn yíiz no mèn co' nquèe mbii che'n xpíi ye'rsin' loo myen' xin' mté'th Jesús co' ndxe' di's che'n Jesús. Ryete mènà mbyac no ngro xpíi ye'rsin' loo mènà.

*Mèn mque tee mdub ngu's Pedr ryop Juàn.*

<sup>17</sup> Le' sya, mèn co' nac jef co' más ñibe' loo rye nguley' no mèn co' nzo lad che'n mèn xley' saduce co' ngo no jef, ryete mènà ngòò xyàn lezo' gunèe myen' xin' mté'th Jesús co' ndxe' di's che'n Jesús. Ngocloo mènà gunèe mènà myen'. <sup>18</sup> Mxen mènà myen'. Mque' mènà myen' lezi'f. <sup>19</sup> Per Tad Diox mbli le' thib angl che'n Tad mbi'th xhuina par mxal' angl ro lezi'f par ngro' myen' lezi'f. Ndxab angl loo myen':

<sup>20</sup> —Huàa gu' le'n templ. No blo gu' valor loo gu'. Fta' gu' cuent cón che'n di's ndac co' ndlu' xá mod que no mèn tedib yalnaban cub.

<sup>21</sup> Co'se' mbìn myen' tataa ndxab angl loo myen' no co'se' ngo nìi izlyo' tedib huiz co' nde nquea, taate ñaa mbe'th izlyo' ngo myen' le'n templ. Mtlo myen', mblu' myen' no mdoodi's myen' cón che'n di's ndac che'n Jesús loo mèn.

Láth ngue lu' myen' mèn le'n templ, jef co' más ñibe' loo rye nguley' no rye mèn co' nzo no jef, thidte mqueltàa mènà con mèngool co' ñibe', no co' ndyoo naa, no co' ndyoo ner loo mèn nación Israel. Sya, mnibe' rye mènà ya lo' solndad myen' xin' mté'th Jesús, co' ndxe' di's loo mèn, lezi'f. <sup>22</sup> Per co'se' mzin solndad co' nquenap templ ro lezi'f, ya yende chó myen' nzo le'n lezi'f. Sya, mbere solndad, ndye'th solndad loo rye mènà. Mda' solndad cuent loo mènà le' myen' xin' mté'th Jesús ya yende lezi'f. <sup>23</sup> Ndxab solndad loo mènà:

—Co'se' mzin nu' ro lezi'f, quej ndoo nau' lezi'f. Ngueque' lyab lezi'f. Le' solndad na, nziri'que'. Nzi quenap solndad ro lezi'f. Per co'se' mxal' nu' lezi'f par ngòò nu' le'n lezi'f, gunèe nu' yende chó mèn nac le'n lezi'f, cara.

<sup>24</sup> Co'se' mbìn mbi' co' nac jef co' más ñibe' loo rye nguley', no mbi' co' nac jef loo mèn co' nquenap templ, no rye jef co' más ñibe' loo rye nguley' ya yende ryop myen' lezi'f, mnibdi's mènà loo xtàa mènà no ndxab mènà loo xtàa mènà:

—¿Xá mod li na' par ya ne'tolode li myen' xal ndli myen' loo mèn? No nalle' ¿xá mod ngro' ryop myen' lezi'f? ¿Pá ned nda ryop myen'?

<sup>25</sup> Le'pe' ndyub rez cón che'n myen' xin' mté'th Jesús co' ndxe' di's, mzin thib mbi' loo rye mèn co' ñibe'. Ndxab mbi' loo mènà:

—Ryop myen' co' mque' gu' lezi'f ná'a, myen' nzo le'n templ nalle'que'. Ngue lu' myen' mèn no ngue go myen' yalbàn loo mèn le'n templ.

<sup>26</sup> Sya, mbi' co' nac jef co' ñibe' loo solndad co' nquenap templ, ngua no mbi' solndad co' nquenap templ le'n templ par ngua xi mbi' con solndad ryop myen' le'n templ. Nado' di's nado' cuent gunii mbi' loo ryop myen' tac mbi' mzyeb ne' yiloa ngue yátbèe mèn co' nzo no myen' le'n templ no gaa'd quèe mènà mbi' con solndad. <sup>27</sup> Co'se' ndye'th no mbi' co' nac jef no solndad ryop myen' xin' mté'th Jesús co' ndxe' di's che'n Jesús, mbe' mbi' con solndad ryop myen' loo mèn co' ñibe', no co' ndyoo ner, no co' ndyoo naa loo mèn nación Israel. Le' mbi' co' nac jef co' más ñibe' loo nguley' na, ndxab loo ryop myen':

<sup>28</sup> —Nu' mnibe' yèe loo gu' par ya ne'tolode te'th gu' no lu' gu' loo mèn por cón che'n mbi' co' mbez gu' lèe Jesús. No nalle' hui' gu' xá ñaa co' ngue li gu'. Ya ngolole' mque tee lu' gu' loo mèn le'n ciuda Jerusalén cón che'n mbi'a. No ale ndlya's gu' quexù' gu' no que' fals gu' nu' loo ryete mèn ciuda Jerusalén le' nu' ndxàp dol por cón che'n mèn co' mbeth mbi'a.

<sup>29</sup> Sya, mcàb Pedr con taamas myen' co' ndxàc xtàa Pedr loo mènà. Ndxab myen':

—Yende xàa. Ndxàalque' más tyubdi's nu' loo Diox leque tyubdi's nu' loo mèn co' lya's ñibe' yèe loo nu'. <sup>30</sup> Diox co' ngòc Diox xudgool na' póla, Diox mbli par ngro xban Jesús co' nac leque yub Jesús co' mbli gu' nguth loo thib cruz. <sup>31</sup> Co'se' ngolo ngro xban Jesús, Diox mbli por cón che'n con' roo con' xèn co' nzo la's nii Diox no co' nzo la's ya' Diox par ngo Jesús co'te' nzo Diox. No mbli Diox par gàc Jesús xa' roo xa' xèn co' ñibe' loo ryethe con'. No mbli Diox par nac Jesús thib mbi' co' telá' mèn loo con' ryes. No li Jesús par xyal' ned xyal' yó' par lyàa yéc mèn nación Israel no lyàa lezo' mèn nación Israel par zye' mod co' ndxàp mènà loo Diox no par tataa mod tyon' xtol mènà no lyá' mènà loo con' ryes. <sup>32</sup> Ryethe con' co' ngòc loo Jesús, nu' nda' cuenta no nanee nu' xá mod ngòca.

Xpii Natú' che'n Diox, ne, nda' cuent cón che'n con' ngòc loo Jesús. Xpii Natú'a nac leque Xpii Natú' co' mblàa Diox loo mèn, mèn co' ndyubdi's loo Diox.

<sup>33</sup> Co'se' mbìn rye mèn co' nac mèn co' ndyoo ner no co' ndyoo naa, no mèn co' nac jef co' más ñibe' loo rye nguley', di's co' ndxab Pedr, anze'f ngocloo mèn no capas mblya's mèn leque hora nguth mèn Pedr con myen' xtàa Pedr. <sup>34</sup> Per làth rye mèn co' ñibe'a ngo thib mbi' co' ngro' lèe Gamaliel. Mbi'a ngòc maistr co' ndlu' cón che'n ley co' mxo'f Moisés loo mèn. No ryete mèn ndxàp mod ñèe mèn mbi'a. Thidte ngo too nde'f mbi' làth mèn. Mnibe' mbi' loo mèn ryo' myen' xin' mté'th Jesús co' ndxe' di's che'n Jesús par fuer setilte. <sup>35</sup> Ndxab mbi' loo mèn co' ñibe' co' mqueltàa:

—Gu' co' nac mèn nación Israel, bli gu' xtùuz co' huenleque' cón ngue li gu' con myen' ba', yey. <sup>36</sup> Fte' lezo' gu' co' huenleque' ndxàc pláte lín' no maste ngo thib mbi' co' ngro' lèe Teud co' mque tee làth mèn. Co'se' mque tee Teud làth mèn, mbez Teud le' Teud nac thib mbi' co' anze'f ntac. No nda'que' gu' cuent mque tee no Teud casque' thap ayo mèn. Per ngoloa, mbeth mèn Teud. Le' rye mèn co' mque tee no Teuda na, mxon' no mbrye's mèn. No tataa mod mblith no cón che'n Teud. <sup>37</sup> Lomisque' ne, más nde tee huiz co'se' ngòc tiemp co' mbli mèn mdyoxcua' ye's co' lèe padron, mque tee tedib mbi' co' ngro' lèe Jud co' ngòc mèn gulàaz che'n làaz mèn galile. Lomisque', anze'f thib mèn mque tee no Jud. Ngoloa, mbeth mèn Jud, ne. No ryete mèn co' mdoo nque xís Jud mbrye's no mque tee xon' mèn. Tataa mod mblith no cón che'n Jud, ne. <sup>38</sup> Cona, ngue niin loo gu': Más huen blá' gu' myen' ba' no ne'la's rode gu' cón che'n myen' ba'. Tac chele' con' co' nac cón che'n myen' ba' nac xal cón che'n chol mèn loo izlyo', le'i lyuxque', yey. <sup>39</sup> Per chele' con' co' nac cón che'n myen' ba' nac cón che'n Diox, pà li gu' gan loo myen' ne'que tee lide myen'a. Chó Diox chó nee gu' ne' ne' ngue cua'n xó' gu' co' nac cón che'n Diox.

<sup>40</sup> Co'se' ngolo mbìn mèn tataa ndxab Gamaliel, ryete mèn mblec lezo' no mden' mèn licque' nac di's co' mbez Gamaliel. Ngoloa, ngurez mèn myen' xin' mté'th Jesús co' ndxe' di's che'n Jesús. Mnibe' mèn mda' mèn che'n myen'. Ngolo mda' men che'n myen', mnibe' yèe mèn loo myen' ya ne'tolode tyoodi's myen' loo mèn por cón che'n Jesús. Ngoloa, mbla' mèn ndyàa myen'. <sup>41</sup> Sya, ngro' myen' xin' mté'th Jesús co' ndxe' di's che'n Jesús. Ndyac lezo' myen' ngro' myen' làth rye mèn co' ñibe'a tac yub Diox mda' lugar ndxàalque' tyactii myen' por cón che'n Jesús. <sup>42</sup> Per mastale' tataa ngòca loo myen' xin' mté'th Jesús co' ndxe' di's che'n Jesús, ne'nglá'de myen' par tolo mdoodi's myen' no par tolo mblu' myen' cón che'n Jesús ryete huiz, que naca le'n templ, que naca liz por liz mèn.

## 6

*Myen' xin' mté'th Jesús co' ndxe' di's che'n Jesús mbli par mcui mèn gaz mèn co' ndxela'spe' par tyoo mèn altant loo mèn co' ngola's loo Jesús no loo cón che'n Jesús.*

<sup>1</sup> Le'n huiza sate más ndoo queltàa mèn co' ngola's loo Jesús no loo cón che'n Jesús. Sya, mtlo mèn grieg co' ngola's co' nzo làtha, mco ñee mèn grieg loo myen' xin' mté'th Jesús co' ndxe' di's che'n Jesús cón che'n mèn co' ndyoodi's di'stèe che'n mèn nación Israel. Mbez mèn loo myen' xin' mté'th Jesús co' ndxe' di's che'n Jesús le' mèn got co' nac mèn got viud co' nac mèn gulàaz mèn grieg mbez indlide mèn nación Israel cas loo mèn gota co'se' nda' mèn con' ndxuhua mèn atate huiz. <sup>2</sup> Sya, ryete si' fchop myen' xin' mté'th Jesús co' ndxe' di's che'n Jesús mbli par thidte mqueltàa ryete mèn co' ngola's loo Jesús co' nac Crist. Ndxab myen' loo mèn:

—Ilé'de naca loo nu' par ne'code nu' yalbàn cón che'n di's ndac che'n Diox par tyoo naa nu' no li nu' sirv loo mes co'se' ndxuhua mèn. <sup>3</sup> Por cona, más huen gàca cua'n gu' no cui gu' gaz mèn co' ndli gu' cuent nac mèn co' más ndxàp gu' yalxla's ñèe gu' làth gu' no mèn co' huen huen ndxòn ndac co' nac cón che'n Diox, mèn co' ñibe'pe' Xpii Natú' loo par xo'f zin' mèn zin' co' mbez gu' ba'. <sup>4</sup> Le' nu' na, toloque' cuez Diox no toloque' co nu' yalbàn cón che'n di's ndac che'n Diox.



<sup>5</sup> Ryete mènà thidte mblo lezo' no thidte ngòc xtùuz mènà cón che'n co' ndxab myen' xin' mté'th Jesús co' ndxe' di's che'n Jesús. Sya, mcuri mèn co' ndxela'sa thib mbi' co' lèe Steb co' axta arid ngòp yalxla's loo Diox no co' mnibe'pe' Xpii Natú' loo. No mcuri mènà taamas mèn co' lèe Lip, no Procor, no Nicanor, no Timón, no Parmen, no tedib mbi' co' lèe Lax co' ngòc thib mbi' gulàaz che'n làaz mèn antioqui. Laxa ngòo loo xley' mèn nación Israel thib cua'a. <sup>6</sup> Ngoloa, ngua no mèn rye gaz mènà loo myen' xin' mté'th Jesús co' ndxe' di's che'n Jesús. Le' myen' na, ngurez Diox por cón che'n mènà no por cón che'n zin' co' xo'f zin' mènà. No mxo'f myen' ya' myen' loo mènà par mblu' myen' le' myen' ndxòo lezo' le' gaz mènà xo'f zin' zin'a.

<sup>7</sup> Le' di's ndac co' nac di's ndac che'n Diox na, sate más ndoo yath no ndoo yèn no sate más ndoo queltàa mèn co' ndxela's loo Jesús le'n ciuda Jerusalén. No axta huax nguley' co' ngòc nguley' loo mèn nación Israel mdyal ngola's no ngòo nguley'a loo cón che'n Jesús co' nac Crist.

*Mèn mxen Steb xal thib pres.*

<sup>8</sup> Ngo thib mbi' co' ngola's loo Jesús co' ngro' lèe Steb. Loo Steba anze'f thib con' ndac ngro' lezo' Diox angmbli Diox. No mbli Diox ngòp Steb huax con' roo no huax con' xèn la's nii Steb no la's ya' Steb par mbli Steb huax yalguzye'. No mbli Steb huax con' co' ngòc xal señ loo mèn. <sup>9</sup> Le'n tiempa ngo huax mèn co' mqueltàa loo cón che'n Diox por cón che'n Jesús. Ryete mènà thidte mqueltàa le'n huax sinagog le'n ciuda Jerusalén. Làth rye mènà ngo thib ned mèn co' nqueltàa le'n thib sinagog che'n mèn co' ngòc moz yèe ndoore'. Per co'se mque tee Steb tiempa yende chó mèn mbee ncà mènà. Mqueltàa ndxep mèn sinagoga con ndxep mèn gulàaz che'n làaz mèn ciren, no con ndxep mèn gulàaz che'n làaz mèn ciuda Alejandri, no con ndxep mèn gulàaz che'n làaz mèn cilis, no ndxep mèn gulàaz che'n làaz mèn asia. Ryete mènà mqueltàa par noo noo mdoodi's mènà con Steb, no par gol' di's mèn di's con Steb, no par cà di's mèn di's loo Steb. <sup>10</sup> Per thidtene ne'ngácte rye mènà ntau' mènà loo di's co' ndyoodi's Steb. No ne' ne' ngác mènà ncàb mènà loo di's Steb tac Xpii Natú' mblu' loo Steb xá mod tyoodi's Steb por cón che'n con' co' anze'f ndxác Xpii Natú'. <sup>11</sup> Sya, asempli mènà par mdix mènà ndxep tmi mcàa plá mèn par toxcua' mènà yalgutyè' cón che'n Steb par gab mènà le' Steb ndyoodi's ngòc nguàal di's cón che'n Moisés no cón che'n Diox. <sup>12</sup> Tataa mod mbli mènà par nguátbèe mèn ciuda Jerusalén, no mèngool co' ndyoo ner no co' ndyoo naa loo mèn nación Israel, no mèn co' ngòc maistr co' ndlu' cón che'n ley co' mxo'f Moisés loo mèn. Rye mènà mtau' loo Steb no mxen mcàa mènà Steb. Mbe' mènà Steb loo mèn co' más ñibe' loo mèn nación Israel. <sup>13</sup> No mcua'n mènà mod, ne, par mcua'n mènà mèn co' mquexù' mque' fals Steb. Ndxab mènà:

—Mbi' ndxè' thidteneque' ñii yèe ñii tii cón che'n templ no cón che'n ley co' mxo'f Moisés loo mèn. <sup>14</sup> Nu' ndxòn le' mbi' mbez loo mèn le' Jesús co' ngòc mèn yèez Nazaret telux templ. No li Jesús par zye' mod no costumbr co' mtan' Moisés loo na'.

<sup>15</sup> Sya, ryete mèn co' ñibe' co' mqueltàaa no taamas mèn co' nzi ndub no mènà tya, co'se' mbui' mènà loo Steb, mxac mènà le' loo Steb ñaa xal ñaa loo thib angl.

7

*Steb mdub razon Steb loo mèn hora.*

<sup>1</sup> Sya mnibdi's mbi' co' nac jef co' más ñibe' loo nguley' loo Steb. Ndxab mbi' loo Steb: —¿Ché', licque', ryete di's ba' mdoodi'sl loo mèn, cà', Steb?

<sup>2</sup> Steb mcàb. Ndxab Steb loo mènà:

—Gu' co' nac mèn gulàaz daa no gu' co' nac xud yii no xud yèez co' nac làaz daa, daa ngue li cas loo gu'. Bìn gu' di's co' nde toodizen loo gu': Diox na' co' nac thib Diox co' nquée xnii no co' ndxaa'd bèel, Diox mblu' loo loo xudgool na' Abraham co'se' ngo Abraham làaz che'n làaz mèn mesopotam ndoore' ya ban Abraham par ned làaz mèn harán. <sup>3</sup> Ndxab Diox loo Abraham:

Gro' lizl no gro' làazl no blá' ryete mèn co' nac mèn gulizl. Fxen ned, huàa par ned làaz mèn co' lu'en lool.

<sup>4</sup> Sya, ngro' Abraham làaz mèn calde co' ngòc liz no làaz Abraham ndoore' par ngua ban Abraham làaz mèn harán. Ngoloa, nguth xud Abraham. Sya, mbli Diox mbye'th Abraham trè' co'te' nac làaz na' nalle'. <sup>5</sup> Per ne'nglide Diox ngàp Abraham nec thib che'n Abraham trè' co'te' nac làaz na' nalle'. Ne' ne' ngli Diox par ngàp Abraham nec thib le' yòo bte'f co'te' ndub Abraham liz Abraham. Per mastale' tataa mbli Diox loo Abraham, Diox mcàbgòn loo Abraham ta' Diox con' co' gac che'n Abraham yiloo. No co'se' yilo gath Abraham, gac che'n xin' Abraham con' co' gac che'n Abraham mastale' co'se' ndxab Diox gaca tataa loo Abraham tarte que no Abraham xin' Abraham. <sup>6</sup> Más de cona, Diox ndxab loo Abraham le' rye mèn co' gac bin Abraham, mènna que tee ban xal mèn tith co'te' nac liz no làaz mèn tith co' nac thib nación che'n tedib mèn tith. No gac mèn bin Abraham moz yèe loo mèn nación titha. No tetiixù' mèn nación mèn titha mèn bin Abraham le'n thap ayo lín'. <sup>7</sup> Ndxab Diox loo Abraham, ne:

Na tub rez cón che'n mèn nación tith co' li gac bin lùu moz yèe loo mènna. Yiloo, lin par ryo' bin lùua tya. No li mèn bin lùu sirv loon trè'.

<sup>8</sup> Diox mbli ngòc thib conveñ con Abraham. No mnibe' Diox loo Abraham leque Abraham mbli ngòc circuncidar Abraham par mque no Abraham thib señ, co' nee di's, cón che'n conveñ co' mbli Diox con Abraham. Por cona, co'se' ngóol xgan' Abraham co' ngro' lèe Isaac, co'se' ngolo xon huiz ngóol Isaac, leque Abraham mbli circuncidar Isaac. No lomisque', mbli Isaac circuncidar Cob, xgan' Isaac. No lomisque' ne, mbli Cob circuncidar myen' xgan' Cob, myen' co' ngòc si' fchop xgan' Cob co' mbloj msi' bin co' mblec bin co' nac si' fchop ned mèn co' nac mèn nación Israel nalle'.

<sup>9</sup> Per loo rye si' fchop xgan' Cob co' nac xudgool na' nalle', si' fthib myen' mbyàn lezo' gunèe Chè, hues myen'. No ale ngòo xyàn lezo' myen'. Mtho' myen' Chè co' nac hues myen' par mblo' myen' Chè. No mbe' mèn Chè par ned làaz mèn egipt. Per mastale' tataa mbli no myen' Chè, Diox ne'nglá'ya'de Chè. Mque tee no Diox Chè. <sup>10</sup> Mbli Diox par mblyá' Chè loo ryethe con' mxactii Chè no con' co' mbli par mxi lezo' Chè. Mbli Diox par mdyub xnii yéc Chè no par mdyub xnii lezo' Chè par ngóc Chè. No mbli Diox par ngòo lezo' mbi' co' ngro' lèe Faraón, co' ngòc rey loo mèn nación Egipt tiempa, ñèe Faraón Chè. Faraona mda' lugar ngòc Chè gobernador loo mèn nación Egipt. No mda' Faraón lugar loo Chè par ngòc Chè mandador loo mèn guliz Faraón.

<sup>11</sup> Le'pe' le'n tiempa ngulàa huin. No anze'f thib yaltii ngòc loo mèn co' nac mèn gulàaz che'n làaz mèn egipt no par ned che'n làaz mèn canaán. Le'n tiempa, ngulàa huin loo xudgool na', ne. Yende con' hua xudgool na'. <sup>12</sup> Per co'se' mbìn Cob co' ngòc xudgool na' le' par ned làaz mèn egipt ntho' mèn nzob triu, mtel' Cob xgan' Cob co' ngòc xudgool na' par ngua xi myen' nzob triu par ned làaz mèn egipt. Co'se' ngua myen'a, ngòc nerleque' viaj co' ngua myen' par ned làaz mèn egipt. <sup>13</sup> Co'se' mbryop vez ngua myen' làaz mèn egipt, mbli Chè par mblibe' myen', hues Chè, Chè. Syare', mda' rey che'n mèn egipt cuent chó bin mèn nac Chè. <sup>14</sup> Sya, mbii myen' hues Chè. Ndyàa myen' par làaz myen' tedib vez. Le' Chè na, mnibe' loo myen' hues Chè par yi'th no myen' Cob, xud Chè, thidte junt con myen'. No yi'th rye mèn guliz Cob co' ngòc ayon psi' bga'y mèn co'se' yi'th myen' par ned Egipt tedib vez. <sup>15</sup> Tataa mod ngòca loo Cob par sangngòo ban Cob làaz mèn egipt. Ngoloa, nguth Cob tya. No nguth rye mèn co' ngòc xudgool na' tya. <sup>16</sup> Co'se' ngolo nguth Cob, mbe' mèn thebol Cob par yèez Siquem co' nac thib yèezya' che'n làaz mèn canaán par ya ca's mèn thebol Cob liz no làaz Cob leque le'n bá' co'te' mbua's thebol tee Cob, Abraham, panteón. Ngoloa, más nde tee lín' nguth mèn co' nac xudgool na'. Lomisque', mblo' mèn zith rye mènna par ngua ca's mèn zitha le'n panteón co' ngòc thib yòo bte'f co' mxi Abraham, co'se' be' naban Abraham, con plá pes loo xgan' thib mbi' co' ngro' lèe Hamor co' ngòc mèn gulàaz che'n làaz mèn siquem.

<sup>17</sup> Co'se' yamerle' zin tiemp co' gac tiemp co' li Diox con' mcàbgòn Diox loo Abraham li Diox loo thebol Abraham co'se' mcàbgòn Diox dí's co' ngòc dí's co' ngro' ro Diox loo

Abraham, nde nixon', leque tiempa anze'f mbyar' mèn co' ngòc bin xudgool na' co' mbloj msi' bin ndoore'. Ngòc mènà mènley' loo mèn gulàaz mèn egipt. <sup>18</sup> Le'n tiempa, ne, ngo thib mbi' co' ngòc thib rey loo mèn nación egipt. Mbi'a thidteneque' ne'nglibe'de chó nac Chè no pá ned ngro' tee ngro yáal Chè. <sup>19</sup> Reya mquedii mèn bin na' co' ngòc mèn xudgool na'. No mtetixù' reya mèn bin na'. Ale mbli yèe reya mblá'ya' mèn co' ngòc xudgool na' rye mbeto' co' diz ndxáal co' ngòc xin' xudgool na' par tataa mod gath rye myen' bixa. <sup>20</sup> Le'pe' le'n tiempa ngóol thib mbed co' ngro' lèe Moisés. Moisesa ngòc thib mbi' co' anze'f ngòc lezo' Diox gunèe Diox. Per pente mxèn' xud Moisés no xna' Moisés Moisés son mbe' no maste liz xud Moisés. <sup>21</sup> Co'se' mdyaa mbe' co' mnibe' yèe rey lá'ya' xud Moisés no xna' Moisés Moisés thib lad, ndoole' mza' co' nac leque rsap reya. Ne'nglá'de mza' mbed co' lèe Moisés. Mque no mza' mbed xal xgan' mza'. <sup>22</sup> Por cona, anze'f mté'th Moisés ryethe con' co' ndxác mèn egipt. No ngòc Moisés thib mbi' co' anze'f ngòc par tyoodi's Moisés no li Moisés rye con' xal mbli mèn nación Egipt.

<sup>23</sup> Co'se' nzole' Moisés cho' lín', Moisés mblya's nga too naa mèn guliz no mèn gulàaz Moisés co' nac mèn nación Israel. <sup>24</sup> Per co'se' ngòc Moisés làaz mèn nación Israel, gunèe Moisés le' thib mbi' egipt ngue tetii thib mbi' co' nac mèn gulàaz Moisés. Per ale le'le' Moisés ngro yoo con mbi' egipta par mblo xtàa Moisés con' ngue li no mbi' tedib mbi' co' nac mbi' gulàaz Moisés. Ale mbeth Moisés mbi' egipta. <sup>25</sup> Tataa mbli Moisés tac mbli Moisés xtùuz le' ryete mèn nación Israel co' nac mèn gulàaz Moisés ta' cuent no ñee mènà le' Diox li loo Moisés par co' Moisés mèn nación Israel no par teche Moisés mèn nación Israel co' mbyar' làaz mèn egipt. Per mèn nación Israel ne'nda'de cuent xal nac xtùuz Moisés. <sup>26</sup> Tedib huiz co' nde nquea, gunèe Moisés nzi yoo chop mèn nación Israel. Per Moisés mblya's ntu' ntàl Moisés loo di's no loo cuent che'n ryop mbi'a. Ndxab Moisés loo ryop mbi'a:

—¿Cón ndyac gu', yey? Gu' ndxác hues xtàa. ¿Chonon nzi guin gu' xtàa gu', à'?

<sup>27</sup> Sya, mbi' co' ngue guin xtàa mzi mchep Moisés. No ndxab mbi' loo Moisés:

—¿Chó mnibe' lool par yi'th ñibe'l loo nu', no gácl juez, no la's rol cón che'n nu', à'?

<sup>28</sup> ¿Ché' ndlya'sl guthl daa xal mbethl mbi' egipt co' mbethl ná'a, cà'? Xexte fxen ned. Byàa.

<sup>29</sup> Co'se' mbìn Moisés tataa ndxab mbi'a loo Moisés, ale mzyeb Moisés. Mxon' Moisés, mblá' Moisés liz rey. Nda Moisés par ned làaz mèn madián. Tya ngo ban Moisés xal mèn tith. No mselya' Moisés con thib xa'got tya. No mque no xa'got Moisés chop xgan' Moisés tya.

<sup>30</sup> Ngolo cho' lín' nzo Moisés làaz mèn madián, thib vez ngua Moisés co'te' nagán gaxte co'te' ndub thib yii co' lèe yii Sinaí. Tya mxyo'f loo loo Moisés. Mxac Moisés ndxetoo bèel le'n yaa sars co' nzo'f loo yiia. Le'n bèela mxac Moisés mdoo thib angl. <sup>31</sup> Co'se' gunèe Moisés mxyo'f loo bèel co' ndxetoo loo Moisés, mzyeb Moisés. No co'se' nda bii gax Moisés par más hui' Moisés ndxetoo bèel, mbìn Moisés gunii Tad Diox loo mbii loo Moisés. Ndxab Tad Diox:

<sup>32</sup> Daa nac Diox che'n xudgool lùu co' ngòc Abraham, no xudgool lùu co' ngòc Isaac, no xudgool lùu co' ngòc Cob.

Sya, mtlo Moisés, mxi'th Moisés tant mzyeb Moisés. No ne' ne' indli Moisés ryes hui' Moisés loo bèel co' ndxetooa. <sup>33</sup> Ndxab Tad Diox loo Moisés:

Blàa yilid niil tac co'te' ndool ba' nac lugar natú'.

<sup>34</sup> Daa ngüi' xal nden' mèn yalnè no xal ndxác yaltii loo mèn, mèn co' nac nacionpe' daa co' nzo ban làaz mèn egipt. Ndxònen xal mbez yèe yath mènà. No nalle', daa ngulàale' loo bé' par telá'en mèn nacionpe' daa la's ya' mèn nación Egipt. Que de ndxè' nexa, Moisés. Na tel' lùu par yal mandad co' ñibe'en lool loo mèn gulàaz egipt.

<sup>35</sup> Mastale' mèn nación Israel mxìis no Moisés, no mtè'b mèn Moisés, no ndxab mèn loo Moisés: ¿Chó mdool no chó mtel'l par ñibe'l loo nu' xal thib jef no xal thib juez, à'?

Per ndxe'leque', Diox mblo lèe Moisés xal thib jef no juez no xal thib mèn co' telá' mèn nación Israel la's ya' mèn nación Egipt por cón che'n con' roo con' xèn co' mbli angl

co' mblyath no Moisés, angl co' mxyo'f loo loo Moisés co'te' ndxetoo bèel le'n yaa sars. <sup>36</sup> Pues, Moisesa ngòc mbi' co' mblo' mèn co' ngòc xudgool na' la's ya' mèn nación Egipt. No mbli Moisés huax yalguzye' no con' co' ngòc xal señ loo mèn par ned làaz mèn egipt. No mbli Moisés yalguzye' no huax con' co' ngòc xal señ loo mèn làth ndye'th no Moisés mèn nación Israel co'se' nguri'th mèn con Moisés le'n nítto' co' lèe Nítto' Nane Ren. No mbli Moisés huax yalguzye' no señ loo mèn co'se' nguri'th no Moisés mèn nación Israel co'te' nagán le'n cho' lín'. <sup>37</sup> Leque yub Moisesa ndxab loo mèn nación Israel:

Diox tel' thib mbi' co' te'th di's co' gab Diox loo gu'. Mbi'a yi'th yáal làth gu' co' nac mèn nación Israel no que tee mbi' làth gu' yiloo. Tel' Diox mbi'a xalque' mtel' Diox daa loo gu'. Bli gu' cas mbi'a, no bìn gu' ro mbi'a.

<sup>38</sup> Tolo ndxab Steb loo mèn:

—Leque Moisesa ngòc mbi' co' ngo làth mèn nación Israel co'te' nagán. No ngo no Moisés angl co' mdoodi's no Moisés loo yii co' lèe yii Sinaí. No ngoloa, mdoodi's no Moisés mèn co' ngòc xudgool na' cón che'n ley co' mxo'f Moisés loo xudgool na'. Leya mxyo'f loo na' desde huiza. No axta huiz nalze be' nzo'f leya loo na'. No leque loo Moisesa gunii Diox. No mda' Diox cuent loo Moisés par mblu' Moisés loo mèn nación Israel, mèn co' ngòc xudgool na', no loo na', ne, xá mod que tee ban na' loo izlyo' ndxè' par yòo ban no na' Diox thidtene yiloo.

<sup>39</sup> Per mèn co' ngòc xudgool na'a ne'ndalte ndubdi's loo Moisés. Ndxè'leque', mxiis no mèn Moisés no mtè'b mèn Moisés. Ale mbly'a's mèn bere mèn, bii mèn par làaz mèn egipt tedib vez. <sup>40</sup> Sya, ndxab xudgool na' loo Aarón:

Nu' ndly'a's toxcu'a'l con' co' gac diox na' par tyoo ner diox na'a loo na'. Tac nu' ne'neede cón ngòc loo Moisés. Moisés ale ngua lo' nu' làaz mèn nación Egipt no maste.

Nu' ndli cuent tya nac lizpe' nu' no laazpe' nu'.

<sup>41</sup> Sya, mtocxua' xudgool na'a thib tatol co' ñaa xal ñaa thib ngon yèn'. Ngoloa, mtlo xudgool na', mbeth xudgool na' má' loo gunab co' ñaa xal ngon yèn' co' ngòc dioxpe' mèn no tatolpe' mèn. No ale mdyac lezo' mèn ngüi' mèn loo con' mtocxua' ya' mèn.

<sup>42</sup> Por cón che'n ryethe con' ye'rsin' co' mtlo mbli xudgool na' tiempa, por lult thidtene mblá'ya' Diox xudgool na' par tyub xib xudgool na' no sál' xudgool na' ya' xudgool na' loo mbèelhui' co' nzi'f loo bé'.

Mastale' indly'a'ste gu' gòn gu' di's co' ngue niin loo gu' ndxè', tataa ndub di's loo libr co' nac libr che'n mèn co' mque' ye's che'n di's co' mde'th mèn co' ndxab Diox loo mèn. Di'sa mbez taandxè':

¿Ché', licque', loon ndli gu' cuent mbeth gu' má' par mxyo ren má' loo izlyo' loon par mdyon' xtol gu' le'n cho' lín' co'te' nagán, cà'? Yende xaa.

<sup>43</sup> Ndxè'leque', gu' mque tee no nich co'te' ngòc diox gu' co' lèe Moloc. No mque tee no gu' nich che'n mbèelhui' che'n diox gu' co' lèe Renfán. Ryop gunaba ngòc tatol co' mtocxua' ya' gu' par mdyub xib gu' no par mcòo' gu' loo gunaba. Por cona, daa go' gu' liz gu' no làaz gu'. No tel'en gu' ya gu' más tith loo làaz mèn babiloñ par gac gu' xal moz yèe loo mèn tya.

<sup>44</sup> Ryete mèn xudgool na' mque no thib lugar más natú' le'n tabernáculo co'te' ngosua' quèe laj co'te' ndub di's co' ñibe' ley co' mxo'f Moisés loo na'. Nicha ngocsua' xalque' mnibe' Diox loo Moisés par mtocxua' Moisés nicha co'se' ndxab Diox loo Moisés toxcu'a' Moisés nicha xal nac nich co' gunèe Moisés co' mblu' Diox loo Moisés loo yii Sinaí.

<sup>45</sup> Ryete mèn co' ngòc xudgool na' mcàaya' tabernaculoa xal thib con' natú' co' que no mèn thidtene. Co'se' mbye'th no mèn co' ngòc xudgool na' Josué, leque sya mbye'th no mèn tabernáculo co' ngòc yòo mantyad co' ntoxcua' mèn par ndxòo mèn ned nda mèn o ned ndyee mèn. Con'a ngòc co'se' mbli xudgool na' gan mblo' xudgool na' mèn le'n nacionpe' na' ndxè'. Naciona mblo' xà' Diox par ta' Diox naciona gac naciona che'npe' xudgool na' co'te' naban na' nalle'. Tataaque' ngòca loo xudgool na' axta mzin tiemp co'se' ngo David co' ngòc rey no mnibe' David loo mèn nacionpe' na' póla. <sup>46</sup> Diox ngòc lezo' cón che'n David tiempa. No mbly'a's David toxcu'a' David thib liz Diox co'te'

queltàa mèn loo Diox, Diox co' ngòc Diox che'n Cob tiempa. <sup>47</sup> Per ne'nglide David con'a. Ndxé'leque', Salomón mtoxcua' liz Diox co'te' nqueltàa mèn loo xley' che'n Diox. <sup>48</sup> Tataa mbli Salomón mastale' inzo bante Diox co' nac Diox roo Diox xèn co' ñibe' loo ryethe con' le'n thib templ co' nac liz Diox co' mtoxcua' ya' mèn co' nac mèn che'n izlyo' xal nac di's co' ndxab mèn co' mde'th di's co' ndxab Diox cón che'n Diox. Di'sa mbez taandxè':

<sup>49</sup> Diox ndxab: Loo bé' nac co'te' ndu'ben. Le' loo izlyo' na, nac co'te' ndloo niin xal co'se' ndli nii thib mèn descans.

Ngoloa, ndxab Tad Diox:

¿Xá ñaa thib lizen co' toxcua' gu', à'? No ¿xá ñaa co'te' ndxab gu' lin descans, à'? Yende mod toxcua' gu' thib lizen co'te' gòon tataa, ey.

<sup>50</sup> ¿Ché' inacte daa Diox co' mxèn' no co' mblec ryethe con' co' nziri', cà'? Yub daa mxèn' izlyo' no yub daa mblec izlyo'. ¿Cón ndyac gu', à'?

<sup>51</sup> Tolo ndxab Steb loo mènà:

—Per gu', ale ndxe'leque', ndxàc gu' mèn naad no mèn nguud. Nac gu' xal mèn co' indxela'ste co' indxaa'dte di's no xal mèn co' ne'ta'de cuent cón che'n Diox. Thidteneque' nac gu' ngolo ngola's loo Xpii Natú'. No lalque' nac gu' xal mèn co' ngòc xudgool gu'. Co'te' mdoo nii xudgool gu', tya ndoo nii gu', ne. <sup>52</sup> ¿Xá ñaa thib mèn co' mde'th di's co' ndxab Diox co' ne'ntetiide xudgool gu' póla, à'? Xudgool gu' mtetique' rye mènà. No mbeth xudgool gu' rye mèn co' mde'th di's póla cón che'n xá mod yì'th thib mbi' co' ngòc mbi' nali no mbi' nambii loo Diox. No co'se' mbi'th yáal mbi'a loo izlyo' ndxè', no mque tee mbi' làth gu', ale mxenxù' gu' mbi' no mda'xù' gu' mbi' loo mèn ciuda Rom co' ñibe' loo na'. No axta huen mbyan' lezo' gu' tac mbeth mènà mbi'. <sup>53</sup> Gu' co' mbyan' no ley co' mxo'f Moisés loo gu' por cón che'n angl, gu' thidtene indyubdi'ste loo leya.

*Ngro' nayi' mènà axta mbeth mènà Steb.*

<sup>54</sup> Co'se' mbìn rye mènà co' ndxab Steb, ngulàa xyàn lezo' mèn axta nduhua le mèn tant nda' xyàn mèn ñèe mèn Steb. <sup>55</sup> Per Xpii Natú' ne'nglá'de Steb. Mnibe'que' Xpii Natú' loo Steb. Sya, mbui' Steb loo bé'. No gunèe Steb xal nquée xnii Diox no ndxaa'd bèel Diox. No gunèe Steb ndoo Jesús cuat Diox loo bé'. <sup>56</sup> Sya, ndxab Steb loo mènà:

—Hui' gu' nexa. Daa ñèe ndoo xal' loo bé'. No ñèen Jesús co' nac mbi' co' mbi'th yáal loo izlyo' ndxè' xal ndxáal chol mèn loo izlyo'. Ndoos Jesús cuat Diox.

<sup>57</sup> Per ndxe'leque', mènà mtau' nza mèn par ne'gònte mèn di's co' mbez Steb. No cabii mbez yèe mèn. No mtau' mèn dib vuelt loo Steb no apápe' ngro' nayi' mèn loo Steb axta ngòc loc mèn gunèe mèn Steb. <sup>58</sup> Mbe' mènà Steb thib lad ro ciuda Jerusalén. Tya mbuaa'd quèe mèn Steb. Le' mèn co' gunèe ngòc con'a loo Steb na, mènà mblo' xab mèn no mda' mènà xab mènà loo thib mbyòo co' lèe Saul par quenap mbyòo xab mènà. <sup>59</sup> Láth ngue gaa'd quèe mènà Steb, Steb ngurez Diox. Ndxab Steb loo Diox:

—Tad Diox, nase guneei loon. Fcàaya' U' alm daa no xpìi daa.

<sup>60</sup> Ngoloa, chàa, mdub xib Steb. Cabii ndxab Steb loo Diox:

—Tad, ne'zi'f dolte U' no ne'zib quide U' xquin che'n mèn ba' no xtol che'n mèn ba' la's nii mèn ba' no la's ya' mèn ba' por con' ye'rsin' co' ngue li no mèn ba' daa.

Ngolo tataa ndxab Steb, setilte mtin liz Steb. Nguth Steb.

## 8

*Mbyòo co' lèe Saul mque tee mdub ngu's mèn co' ngola's loo cón che'n Diox por cón che'n Jesús pál co'te' ngo mènà.*

<sup>1</sup> Thidte ngòc Saul con mènà co'se' ngue yuth mènà Steb no ale mdyac lezo' Saul por mbeth mèn Steb.

Leque huiza, mtlo ngòc thib yalndyub ngu's tín' loo rye mèn co' nqueltàa loo cón che'n Diox por cón che'n Jesús le'n ciuda Jerusalén. Mxon' rye mèn par ned làaz mèn jude. No mxon' mèn par ned làaz mèn samari. Ante myen' xin' mté'th Jesús co' ndxe' di's che'n Jesús ne'ngxon'te. Mbyan' myen' ciuda Jerusalén. <sup>2</sup> Le' ndxep mèn co' ndli cas loo Diox



na, ngua líf mènà thebol Steb. No ngua ca's mènà thebol Steb. No anze'f mbín' mènà gunèe mènà thebol Steb. <sup>3</sup> Láth mque tee mdub ngu's mèn mèn co' ngòo loo cón che'n Diox por cón che'n Jesús, Saul, ne, mque tee mdub ngu's mèn. Ale ndxòo Saul liz por liz mèn par mbee ncà Saul mèn liz mèn, que naca mènbi', que naca mènqot. Ndli Saul mandad hue' mèn mènà lezi'f.

*Mèn co' mbrye's mque tee go yalbàn loo mèn par ned làaz mèn samari.*

<sup>4</sup> Per mèn co' ngòo loo cón che'n Diox, co' ngro' le'n ciuda Jerusalén por mdub ngu's mèn mènà por cón che'n Crist, mènà mque tee go yalbàn cón che'n di's ndac co' ndlu' xá mod lyá' mèn loo con' ryes pál co'te' mque tee xon' mènà. <sup>5</sup> Thìb mbi' co' lèe Lip, co' thidte mxon' con mènà, mzin le'n thìb yèezya' par ned làaz mèn samari. Lueg, mtlo Lip, mdoodi's Lip cón che'n Crist loo mènà. <sup>6</sup> Le' mèn yèezya'a na, ryete mèn thidte mqueltàa. Xèe mque' nza mènà di's co' mbez Lip loo mèn. No mbui' mènà xal mbli Lip señ no yalguzye' loo mènà. <sup>7</sup> Tataa mdub nza mènà di's co' mbez Lip tac ñee mènà le' Lip mteyac huax mèn co' mquée mbii che'n xpìi ye'rsin' loo. No ñee mèn no ndxòn mèn xal mbez yèe mèn co'se' ndryo xpìi ye'rsin' loo mènà. No ñèe mèn mbyac huax mèn co' mque no mbii che'n yíiz bech, no mèn coj. <sup>8</sup> No co'se' ñee mèn ndxàc con'a loo rye mèn yíiza, ryete mèn ndyac lezo' ñèe Lip.

<sup>9</sup> Le'n tiempa ngo thìb mbi' co' ngro' lèe Mon. Mbi'a ngòc thìb hue's ndoore'. No anze'f ndxòo lezo' mbi' li mbi' yalbruj loo mèn. No anze'f ndxòo lezo' mbi' quedii mbi' mèn, mèn co' nac mèn gulàaz che'n làaz mèn samari. Leque mbi' mbez loo mèn nac mbi' thìb mbi' roo no thìb mbi' xèn. <sup>10</sup> Ryete mèn co' nac mèn gulàaz mèn samari xèe mbe mèn par ndyub nza mèn no ndxòn mèn di's co' mbez mbi' co' lèe Mon, que naca myen' bix, que naca mèn gox. Mbez mènà:

—Mbi' ba' ndxàp con' roo con' xèn che'n Diox la's nii mbi' no la's ya' mbi', Diox co' nac Diox roo no Diox xèn co' ñibe' loo ryethe con'.

<sup>11</sup> Ryete mèn ndli cas mbi' tac con con' ye'rsin' co' ndxác mbi'a, nquedii mbi' mèn le'n huax lín'. <sup>12</sup> Per co'se' ngola's mèn co' nac mèn yèezya' ned làaz mèn samari di's ndac che'n Diox co' ngo Lip yalbàn cón che'n xá mod ñibe'pe' Diox loo mèn, no cón che'n Jesucrist, le'le' ngola's mènbi' no le'le' ngola's mènqot. No ngòc bautizar rye mènà. <sup>13</sup> No leque Mon, co' ndli con' ye'rsin'a, ngola's loo cón che'n Jesucrist. Ngòc bautizar Mon, ne. No mtlo Mon, mque tee no Mon Lip. Látha, ante ngüi' Mon no ante ñaa Mon xal ndli Lip yalguzye' no señ co' ndli Lip loo mèn.

<sup>14</sup> Co'se' mbìn myen' xin' mté'th Jesús co' ndxe' di's che'n Jesús, myen' co' nzo le'n ciuda Jerusalén, le' mèn gulàaz che'n làaz mèn samari ndyal mbìn di's ndac che'n Diox no ngola's mènà loo Jesús, mtel' myen' Pedr ryop Juàn par ngua Pedr ryop Juàn par ned làaz mèn samari par lyath no Pedr ryop Juàn Lip loo zin'a. <sup>15</sup> Co'se' mzin Pedr ryop Juàn par ned làaz mèn samari, ngurez Pedr ryop Juàn Diox por mèn gulàaz samari co' ngola's par tlo ñibe'pe' Xpìi Natú' loo mènà, ne. <sup>16</sup> Tiempa tarte tlo ñibe'pe' Xpìi Natú' loo nec thìb mèn. Tac co'se' ngola's mènà, ante ngòc bautizar mènà por cón che'n Tad Jesús. <sup>17</sup> Sya, mxo'f Pedr ryop Juàn ya' Pedr ryop Juàn loo mènà. No leque hora, mtlo Xpìi Natú', mnibe'pe' Xpìi Natú' loo mènà.

<sup>18</sup> Co'se' mden' Mon no gunèe Mon láth ngue xo'f myen' ya' myen' loo mèn no ntlo Xpìi Natú', ñibe' Xpìi Natú' loo mèn, ndxab Mon loo Pedr ryop Juàn:

—¿Plál tan càa gu' <sup>19</sup> par ta' gu' lugar loon par que non con' la's niin no la's yan par xo'fen yan loo mèn par co'se' xo'fen yan loo mèn, tlo Xpìi Natú', ñibe' Xpìi Natú' loo mèn xal ndli gu' ba'?

<sup>20</sup> Sya, ndxab Pedr loo Mon:

—Thidte lyux tmil con lùu tac lùu ngue li xtùuz le' con' co' angndli Diox loo nu' par li nu'i loo mèn, nu' mxi'i con tmi, ¿lé'? Yende xàa. Pà gàca tataa. <sup>21</sup> Yende chó cón che'nl par lil con' ndli nu'. No ne' ne' yen chó derech ndxàpl par yòol loo con' ndli nu'. Tac lezo'l no xtùuzl inalìde nac no inambìide nac loo Diox. <sup>22</sup> Per nalle' na nii lool: Blá' ryethe mod ye'rsin' co' ndxàpl no gurez Diox no bna'b loo Diox bel'que' ton' Diox xtoll

co' ndlil no co' ncu'a'nl co' ndlil xtùuz le'n lezo'l, no co' yende mod lá'l par ne'tolode lil con' ye'rsin'a. <sup>23</sup> Tac daa nanee lùu nac xal thib xoblà má' co' anze'f nalà por ndxàpl ryethe mod ye'rsin' no por ndlil xtùuz ye'rsin'. No natedó' niil no natedó' ya'l loo ryethe con' ye'rsin' co' ndlil. Yende mod cue see tee lezo'l par ne'lidel con' ye'rsin'a.

<sup>24</sup> Sya, mcàb Mon. Ndxab Mon loo Pedr no loo Juàn:

—Gurez gu' Diox por daa, cara, par yende cón gac loon xal ngolo gunee gu' loon nalle'.

<sup>25</sup> Co'se' ngolo mque tee ta' Pedr ryop Juàn cuent, no mque tee lu' Pedr ryop Juàn cón che'n di's ndac che'n Diox loo mènà, Pedr ryop Juàn co' ndxe' di's, ngua lo Pedr ryop Juàn yalbàn no ngua te'th myen' cón che'n di's ndac co' ndlu' xá mod lyá' mèn loo con' ryes le'n rye yèzzya' par ned làaz mèn samari. Ngolo mque tee myen' par neda, ndye'th ryop myen' par ned le'n ciuda Jerusalén tedib vez.

*Lip mdoodi's no thib mbi' co' ngòc mèn gulàaz che'n làaz mèn etiopi.*

<sup>26</sup> Ngolo ngòc rye con'a, thib angl che'n Tad Diox mxyo'f loo loo Lip. Ndxab angl loo Lip:

—Lip, jer huàa par ned sur co'te' ndlyàa tùub ned co'te' nsyo ned par ciuda Jerusalén con ned co' nda par ned làaz mèn gaz.

Neda nac ned co' ndri'th co'te' nagán. <sup>27</sup> Lip mxen ned, nda Lip. Per láth ndoo Lip ned nda Lip, mzyál' Lip thib mbi' co' nac mèn gulàaz mèn etiopi. Mbi'a ngòc thib mbi' eunuc. No ngòc mbi' thib xa' co' mxo'f zin' thib zin', co' nee di's, ngòc mbi' tesorer loo thib xa'got co' lèe Candans. Xa'gota ngòc rein loo mèn gulàaz che'n làaz mèn etiopi. Mbi'a ngua ciuda Jerusalén par ngua rez mbi' Diox le'n templ le'n ciuda Jerusalén. <sup>28</sup> Co'se' mzyál' Lip mbi'a ned, ndye'th mbi' par làaz mbi', ndub mbi' loo carret mbi'. No ndub lab mbi' libr co' ngòc libr co' mque' Sayi ye's, Sayi co' mde'th di's co' ndxab Diox loo Sayi te'th Sayi. Mberele' mbi', ndye'th mbi', ngua mbi' ciuda Jerusalén. <sup>29</sup> Sya, mnibe' Xpii Natú' loo Lip. Ndxab Xpii Natú' loo Lip:

—Lip, huàa co'te' nda riid mbi' ba' no thidte gòo ryop gu' mbi' loo carret no ftub cuat mbi' loo carret.

<sup>30</sup> Co'se' mbii gax Lip loo carret mbi', mbìn Lip le' mbi' ngue lab libr co' mque' Sayi ye's co' ngòc di's co' mde'th Sayi co' ndxab Diox. Sya, mnibdi's Lip loo mbi'. Ndxab Lip:

—¿Ché' nda'l cuent cón che'n di's co' ngue labl ba', mbi'?

<sup>31</sup> Mbi' mcàb loo Lip. Ndxab mbi':

—¿Xá mod ndlyà'sl tan cuent cón che'n di's co' ngue laben ndxè', yey, co'se' yende chó mèn ta' cuent loon xal ndyee di's ndxè' no cón nee di's ndxè', cara?

Sya, ndxab mbi' loo Lip:

—Fquée loo carret. Ftub cuaten, yey, par lu'l loon cón nee di's co' ndub loo libr ndxè'.

<sup>32</sup> Loo libr co' nac xti's Diox co' ngue lab mbi' ngòc di's co' mque' Sayi ye's. Loo libr co'te' ngue lab mbi'a mbez:

Mbe' mèn mbi' co'te' gath mbi' par guth mèn mbi' xalque' ndxuth mèn thib mbacxil' yèn'. No texal co'se' imbez yèede mbacxil' yèn' co'se' ncho' mèn yis lad mbacxil' yèn', tataaguè' nec thib di's ne'ncàb rode mbi'. No ne' ne' ngurez huí' mbi'.

<sup>33</sup> Mastale' ngòc mbi' mbi' nado' per yende chó mèn ngna'b mbi' co'se' ngòc con' loo mbi'. Lomisque' ne, ¿chó mèn ngac ta' cuent cón che'n bin mbi' no tyoodi's mèn cón che'n bin mbi'? Yende moda tac mbi'a ne'ngsi'de bin mbi' loo izlyo' tac mbeth mèn mbi' loo izlyo'.

<sup>34</sup> Per mbi' eunuc co' ndxàp yalñibe'a mnibdi's loo Lip. Ndxab mbi' loo Lip:

—Lip, bli favor, gunee loon chó cón che'n xa' ñii loo libr co' mque' Sayi ye's co' ndxab Diox. ¿Ché' ngue ta' libr cuent cón che'n yub Sayi o ché' ngue ta' libr cuent cón che'n tedib mbi', cà'?

<sup>35</sup> Sya, mtlo Lip, mda' Lip cuent cón che'n di's co' mbez loo libr co' ngue lab mbi' loo mbi'. No mda' Lip cuent cón che'n taamas di's co' nac xti's Diox. No ndxab Lip loo mbi':

—Ryete di's co' ngue labl ba' no taamas di's co' ngue lu'en lool ba' nda' cuent cón che'n Jesús. <sup>36</sup> Ngolo huen huen mda' mbi' cuent cón che'n Jesús xal mda' Lip cuent loo

mbi', tolo mdoo ryop mbi' Lip ned ndyàa mbi'. Co'se' nda riid ryop mbi' Lip thib lugar co'te' ndri'th thib yó'be', ndxab mbi' loo Lip:

—Trè' nzo'f nít, cara. ¿Xá neel? ¿Ché' nzo mod gac bautizar daa?

<sup>37</sup> Sya, ndxab Lip loo mbi':

—Chele'l, licque', ndxela'sl dib nzo yécl no dib nzo lezo'l, nzoque' mod gac bautizarl. Mbi' mcàb loo Lip. Ndxab mbi':

—Ndxelazquen, Lip, le' Jesucrist nac xgan' Diox.

<sup>38</sup> Sya, mnibe' mbi' loo moz mbi' par ngo too carret. Le' mbi' ryop Lip na, mbilàa. Nda ryop mbi' Lip le'n yó'be' par mbli Lip bautizar mbi'. <sup>39</sup> Co'se' ngolo ngro' mbi' le'n nít, co' nee di's, ngolo ngòc bautizar mbi', Diox mbli par, chàa, mbe' Xpii Natú' Lip tedib lugar. Le' mbi' eunuc na, ya ne'nda'de cuent máa Lip, pá ned nda Lip. Sya, mxen mbi' ned. Ndyàa mbi'. Ndyac lezo' mbi' loo ryethe con' co' ngòc loo mbi'. <sup>40</sup> Ngolo mbli Lip bautizar mbi', mbe' Xpii Natú' Lip le'n thib yèez co' nac làaz mèn Azot. Ngoloa, nguri'th Lip thib yèez tedib yèez. No be taa be taa ngo Lip yalbàn cón che'n di's ndac co' ndlu' cón che'n xá mod ndlyá' mèn loo con' ryes ned nda Lip axta mzin Lip le'n yèez co' nac yèezya' che'n làaz mèn ciuda Cesar.

## 9

*Saul ngulàa yéc no ngulàa lezo' no mse' Saul mod co' ngòp Saul loo Diox par mblyá' Saul loo con' ryes.*

*(Hch. 22.6–16; 26.12–18)*

<sup>1</sup> Láth ndxàc rye con'a, Saul toloque' ngue tee tezeb mèn, mèn co' ngola'sque' loo cón che'n Tad Jesucrist. Mbez Saul le' Saul guth mèn. Por cona, ale ngua Saul loo mbi' co' más mnibe' loo nguley' tiempa. <sup>2</sup> Mna'b Saul ord loo mbi'a par ya Saul co'te' ndub sinagog mèn le'n ciuda Damasc par cua'n Saul mèn co' nzole' loo cón che'n di's ndac che'n Diox par ye'th no Saul mèn pres par ciuda Jerusalén, que naca mènbi', que naca mèngot, Saul ye'th no mèn. Ngolo cuent. <sup>3</sup> Per co'se' ndoo Saul ned nda Saul, no co'se' nde zin' gaxle' Saul ro ciuda Damasc, thidte de repent mbya'x thib xnii tín' co' nde làa loo bé' loo Saul. <sup>4</sup> Sya, chàa, mbixyath Saul xís huay. Ngulàa Saul loo yòo. Láth nax Saul loo yòo, mbìn Saul thib di's co' mbez loo Saul:

—Saul, Saul, ¿chonon nde tub ngu'sl daa, à', ey?

<sup>5</sup> Sya, mnibdi's Saul loo Tad loo mbii. Ndxab Saul:

—Tad, ¿chó nac U', à'?

Mbere Saul, mbìn Saul di's co' ndxab loo Saul tedib vez:

—Daa nac leque yub Jesús co' nde tub ngu'sl. Co'se' nde tub ngu'sl mèn co' ndxòo loo cón chenen, lùu ne'ta'de cuent no ne'needel yub daa nda tub ngu'sl. Per nalle' leque lùu ngue tee hui' ladl con con' ye'rsin' co' ngue lil loo mèn. Ndlila xal ndli ngon co'se' nque' ngon patad loo punt yaaroch co' nguid mèn lad ngon co'se' ntezeb mèn ngon. Tataa mod leque lùu ngue teza'l loo cón chenen por nacl mèn co' nac ngolo ngola's loo cón chenen.

<sup>6</sup> Sya, ante mxi'th Saul tant mzyeb Saul. Ndxab Saul loo Jesús:

—Tad, ne'needen cón ngue lin. Nase naneen loo U' ngue lin con' ye'rsin'. Fton' U' xquin daa no xtol daa co' ngue lin loo U'. Nalle' cón ndly'a's U' lin, à', Tad?

Tad Jesús ndxab loo Saul:

—Saul, mton'len xquin lùu no xtol lùu. Goo che. Fxen ned. Huàa le'n ciuda Damasc ba'. Tya ñee mèn lool no ta' mèn cuent lool cón ndxàal lil.

<sup>7</sup> Le' mèn co' nda no Saula na, anze'f mzyeb tac no mèn mbìn di's. Per yende chó mèn ñèe mèn ndyoodi's no Saul. <sup>8</sup> Leque hora ngo che Saul. Per co'se' ngüi' ndxè' ngüi' ba' Saul, yende mod hui' Saul nec thib con'. Ale mquin mxen mèn ya' Saul, mbe' mèn Saul ciuda Damasc. <sup>9</sup> Ngo Saul ciuda Damasc son huiz. Per ne'ngácte Saul hui' Saul. No ne' ne' nghua Saul. No ne' ne' ngu Saul xít Saul no lua' Saul.

<sup>10</sup> Le'xque' tiempa ngo ban thib mbi' co' ngola's le'n ciuda Damasc. Mbi'a ngro' lèe Anani. Loo mbi'a ngro' too Tad Jesús. Mxyo'f loo Tad Jesús loo mbi'a. No ndxab Tad Jesús loo mbi':

—Anani.

Mbi' mcàb. Ndxab mbi' loo Jesús:

—¿Cóna, Tad? Daa ndxè'.

<sup>11</sup> Sya, ndxab Tad Jesús loo Anani:

—Anani, jer huàa co'te' nac call co' lèe Call Nali axta zinl liz thib mbi' co' lèe Jud. Tya, nibdi'sl loo Jud máa thib mbi' yèez Tars co' lèe Saul co' nzo liz Jud. Ndlyazen ya tyoodi's nol mbi' tac mbi' ngue bez Diox. <sup>12</sup> No mxyo'f loole' loo Saul le' thib mbi' co' lèe Anani co' nac lùu ngòo co'te' nzo Saul. No mxo'f mbi' co' lèe Anani ya' mbi' loo Saul par gac Saul hui' Saul tedib vez.

<sup>13</sup> Co'se' mbìn Anani tataa ndxab Tad Jesús loo Anani, ndxab Anani loo Tad Jesús:

—Tad, huax mèn nde teele' nda' cuent cón che'n mbi'a loon no cón che'n ryethe con' ye'rsin' co' ndli mbi' loo mèn co' ndxela's loo U', mèn co' naban le'n ciuda Jerusalén.

<sup>14</sup> No nalle' nde mbi' ciuda Damasc ndxè' con ord che'n mbi' co' más ñibe' loo nguley' par hue' mbi' mèn co' ndxela's loo U', mèn co' mbez Diox por cón che'n lèe U', par que' mbi' mèn lezi'f.

<sup>15</sup> Per Tad Jesús ndxab loo Anani:

—Huàa co'te' nzo mbi' xal niin lool. Tac daa mcai mbi' no mblo' xà'en mbi' par tyoodi's mbi' loo mèn tedib nación, no co mbi' yalbàn loo mèn co' ñibe' loo chol nación, no ya lo mbi' yalbàn loo mèn no te'th mbi' loo mèn cón chenen, loo mèn co' nac mèn nación Israel. <sup>16</sup> No lu'en loo mbi' le' mbi' anze'f tyactii por cón chenen loo zin' co' xo'f zin' mbi' cón chenen.

<sup>17</sup> Sya, mxen Anani ned. Nda Anani liz Jud co'te' nzo Saul. Ngòo Anani le'n nyòo. No mxo'f Anani ya' Anani loo Saul. Ndxab Anani loo Saul:

—Saul, lùu co' ndxàc huesen nalle' por cón che'n Tad Jesús, Tad Jesús co' mxyo'f loo lool ned ndel le'n huiz ndxè', Tad Jesús mtel' daa par bezen Diox por lùu par hui'l tedib vez no par tlo Xpii Natú', ñibe'pe' Xpii Natú' lool.

<sup>18</sup> Leque hora mbiiche con' co' ñaa xal ñaa mbàx ngudloo Saul. No ngoloa, mbere Saul, ndxe'sleque' mbui' Saul tedib vez. Sya, ngo too Saul no ngòc bautizar Saul. <sup>19</sup> Ngolo ngòc bautizar Saul, mda' mèn con' nduhua Saul no co' ngu Saul. No ngòo fuerz Saul tedib vez. Mbyan' Saul ciuda Damasc plá huiz con mèn co' ngola's loo Tad Jesús.

*Saul mtlo mblo yalbàn loo mèn le'n ciuda Damasc.*

<sup>20</sup> Leque le'n huiza, mtlo Saul, mblo Saul yalbàn cón che'n di's ndac loo mèn le'n sinagog co' ndub le'n ciuda Damasc. Mda' Saul cuent loo mèn le' Jesús nacpe' xgan' Diox. <sup>21</sup> Ryete mèn co' ndxòn xal ndyoodi's Saul loo mèn, ante ngüi' mèn no ante ñaa mèn. No mbez mèn loo xtàa mèn:

—¿Ché' inacte mbi' ba' mbi' co' ngue tee ndub ngu's mèn, mèn co' mbez Diox por cón che'n lèe Tad Jesús, mèn co' naban le'n ciuda Jerusalén, cà'? No ¿ché' inacte mbi' ba' leque mbi' co' nde trè' par hue' mbi' mèn co' ndxela's loo Diox por cón che'n Jesús xal pres par ta' mbi' mèn loo jef co' más ñibe' loo rye nguley', ne, cà'? Leque mbi'i, ¿lè'?

<sup>22</sup> Per sate más ndxòo valor loo Saul. No ndlu' Saul loo mèn le' Jesús nacpe' Crist co' mxo'f zin' zin' che'n Diox. Ale axta mbli Saul gan ndxos xtùuz mèn axta ne' ne' ñee mèn cón nac con' licpe', mèn co' ngòc mèn nación Israel co' naban le'n ciuda Damasc.

*Saul mblyá' la's ya' mèn nación Israel co' mblyá's guth Saul.*

<sup>23</sup> Per co'se' ndxàcle' plá mbe' ñee mèn Saul, ngo Saul yalbàn, thidte mdoodi's mèn nación Israel co' naban le'n ciuda Damasc. No thidte ngòc mèn par guth mèn Saul.

<sup>24</sup> Per Saul mbìn le' mèn thidte ndxàc par guth mèn Saul. Le' mèn mtau' loo Saul ro puert ro ciudaa ze no yál' par co'se' ryo' Saul le'n ciuda, guth mèn Saul. <sup>25</sup> Per mèn co' ndxela's loo Diox por cón che'n Jesús co' nzo le'n ciuda Damasc, mèn mblo Saul le'n thib cardor ryal. No xex xex mblàa mèn Saul par loo yòo ro ventan co' ndub xís ftoo thib lad

ro ciuda co'se' ngulàa yál' izlyo'. Tataa mod mblyá' Saul loo mèn co' mbly'a's nguth Saul le'n ciuda Damasc.

*Saul ngo le'n ciuda Jerusalén.*

<sup>26</sup> Co'se' mzin Saul le'n ciuda Jerusalén, mbly'a's Saul thidte nqueltàa Saul con mèn co' ndxela's loo Crist. Per ryete mèna mzyeb tac indxela'ste mèna le' Saul, lìcque', ngola'sle' loo cón che'n Crist, ne. <sup>27</sup> Per mastale' mzyeb mèna ñèe mèna Saul, thib mbi' co' lèe Mbèl' mbe' Saul loo myen' xin' mté'th Jesús co' ndxe' di's che'n Jesús. Mblu' Mbèl' Saul loo myen'. No leque hora mda' Mbèl' cuent loo myen' xá mod mxyo'f loo Tad Jesús loo Saul ned nde Saul par ciuda Damasc no xá mod mdyoodi's no Tad Jesús Saul. No mda' mbi' co' lèe Mbèl' cuent loo myen' co' ndxàc xtàa Mbèl' co' ndxe' di's che'n Tad Jesús loo mèn xá mod ngòc con' loo Saul le' Saul, con dibaxla's, mdoodi's loo mèn ciuda Damasc por cón che'n Tad Jesús. Syare', mdyal myen'a thidte mqueltàa myen' con Saul. <sup>28</sup> Mbyan' no Saul myen' ciuda Jerusalén no mque tee no Saul myen' ndxep tiemp. <sup>29</sup> Con dibaxla's mdoodi's Saul no mda' Saul cuent loo mèn por cón che'n con' roo no con' xèn che'n Tad Jesús. Noo noo ndyoodi's no Saul mèn no noo noo ngol' Saul di's loo mèn nación Israel, mèn co' ndyoodi's di'stèe grieg. Per mèna axta arid mbli purad par nguth mèna Saul. <sup>30</sup> Co'se' mda' mèn co' ndxàc hues por cón che'n Jesucrist cuent le' mèna ngue li purad par guth mèn Saul, mbe' mèn co' ndxela'sa Saul par ned làaz mèn ciuda Cesar. Ngoloa, mtel' mèn co' ndxela'sa Saul par ya Saul par ciuda Tars co'te' nac liz no làaz Saul.

<sup>31</sup> Le'n tiempa ryete mèn co' nqueltàa, co' ndxela's loo Jesucrist par ned làaz mèn jude, no par ned làaz mèn galile, no par ned làaz mèn samari, ryete mèna ngure nagàl lezo' loo cón che'n Diox. No nqueltàa yende chó mèn mdub ngu's mèna. No sate más nzi té'th mèn no sate más nda' mèn cuent cón che'n Diox par tolo ndyubdi's ndac mèn xal ñibe'pe' Diox loo mèn. Mzyeb mèn loo cón che'n Diox no mque tee li mèn cas loo cón che'n Diox. No sate más nqueltàa mèn no ndoo yar' mèn xalque' ndli Xpii Natú' par tolo tyal mèn yila's mèn loo Diox.

*Tad Jesucrist mteyac thib mbi' co' ngro' lèe Ene.*

<sup>32</sup> Co'se' mque tee too naa Pedr mèn co' ndxàc hues por cón che'n Jesucrist huax lugar, sangngua Pedr ned nziri' thib yèez co' lèe Lid par ngua too naa Pedr mèn co' ngola's par neda, ne. <sup>33</sup> Le'n yèeza mzyál' Pedr thib mbi' co' lèe Ene. Mbi'a ndxàcle' xon lín' nax loo thib yíiz mbii co' lèe yíiz bech. <sup>34</sup> Pedr ndxab loo Ene:

—Ene, Tad Jesucrist mteyacl. Goo che no fqui's camil.

Leque hora ngo too lì Ene xal thib mèn huen. Ale ndxe'sleque' ngo too Ene. <sup>35</sup> Ryete mèn co' naban, mèn co' nac mèn yèez Lid no mèn co' nac mèn yèez Sarón gunèe xal gundee Ene. Ryete mèna mblá' costumbr gox co' mque no mèn. No luega ngòo mèna loo cón che'n Tad Jesús.

*Tad Jesús mblo xban thib xa'got co' ngro' lèe Dorc xalque' mna'b Pedr loo Tad par li Tad con'a.*

<sup>36</sup> Leque le'n tiempa ngo thib xa'got co' ngola's loo Jesucrist le'n ciuda Jop. Xa'gota ngro' lèe Tabit. Le' di'stèe mèn grieg na, mbez mèn lèe xa'gota Dorc. Dib lal naban xa'gota mque tee ban li xa'gota con' ndac. No ndlyath no xa'gota mèn co' ndyac yaltii co' nde che con' loo, co' nee di's, mèn co' naquin con'. <sup>37</sup> No le'xque' le'n huiz co'se' mque tee Pedr par ned le'n yèez Lid, mxac len Dorc no nguth Dorc. Co'se' ngolo mtegad mèn thebol Dorc, mxo'f mèn thebol Dorc loo mes le'n thib quart co' nac chop pis liz thebol Dorc. <sup>38</sup> Ciuda Jop nziri' gax con yèez Lid co'te' mque tee Pedr. Per com le' mèn Jop co' ndxela's non le' Pedr ngue tee le'n yèez Lid, ¿lé'?, mtel' mèna chop xa'bi' co' ngua nee loo Pedr li Pedr favor lueg tyee Pedr par ya Pedr ciuda Jop.

<sup>39</sup> Sya, lueg mxen Pedr ned con ryop mèna. Co'se' mzin Pedr liz thebol Dorc, sangmbe' mèna Pedr loo pis gáp co'te' ndub quart co'te' nzo'f thebol Dorc. Le' rye mèngot viud co' ngòc amista con thebol Dorc na, nziri' dib vuelt loo thebol Dorc. Nzi yón' mèna. No mblu' mèngota vestid no camis co' mtoxcua' thebol Dorc no co' mblo yóo' thebol Dorc co'se' naban thebol Dorc loo Pedr. <sup>40</sup> Sya, luega mnibe' Pedr loo rye mèn co' nziri' par



ngro' mèn par fuer. Ngoloa, mdub xib Pedr. No ngurez Pedr Diox le' Diox li par ryo xban thebol Dorc. No ngolo ngurez Pedr Diox, xèe ngüi' Pedr loo thebol Dorc co' nzo'f loo mes. Sya, ndxab Pedr loo thebol Dorc:

—Tabit, goo che co'te' naxl ba', ey.

Sya, mxal' Dorc ngudloo Dorc. No co'se' gunèe Dorc Pedr, mdub Dorc. <sup>41</sup> Sya, mxen Pedr ya' Dorc. Mxít too Pedr Dorc. No luega mbrez Pedr mèn co' ndxàc hues por cón che'n Jesucrist no rye mèn got viud co' mnibe' Pedr ngro' fuer. Co'se' ngòo rye mèn le'n nyòo, mblu' Pedr Dorc loo mèn. Ngro xbanle' Dorc. No ngo chele' Dorc. <sup>42</sup> Mbyath mbyèn con' co' ngòc loo Dorca dib le'n ciuda Jop. Cona mbli sate más huax mèn ngola's loo Tad Jesús. <sup>43</sup> Le' Pedr na, sangmbyan' le'n ciuda Jop le'n plá huiz liz thib mbi' co' ntecuu's yid má'. Mbi'a lèe Mon.

## 10

### *Pedr ngua liz thib mbi' co' ngro' lèe Cornel.*

<sup>1</sup> Tiempa ngo ban thib mbi' co' ngro' lèe Cornel le'n ciuda Cesar. Cornel ngòc capitán loo thib ayo solndad co' ngro' lèe partid Italian. <sup>2</sup> Ngòc Cornel thib mbi' co' thidte mqueltàa con famil Cornel par mdyub xib mènà no mcòo' mènà yéc mènà loo Diox liz Cornel. No anze'f mzyeb Cornel loo cón che'n Diox. Mda' Cornel tmi par ndlyath no Cornel mèn nación Israel co' ngo ban ciuda Cesar, mèn co' ndyac yaltii. No thidteneque' mbez Cornel Diox. <sup>3</sup> Thib vez ngòc thib con' loo Cornel. Com hor nquée guyon bzyè, clarleque' mxyo'f loo thib con' loo Cornel. Mxac Cornel le' thib angl che'n Diox ngòo co'te' nzo Cornel. Ndxab angl loo Cornel:

—Cornel.

<sup>4</sup> Per Cornel xèe ngüi' loo angl. No anze'f mzyeb Cornel. Por lult mnibdi's Cornel loo angl. Ndxab Cornel:

—¿Cóna, Tad?

Angl ndxab loo Cornel:

—Diox ncaaque' cuent di's co' mbez gu' co'se' mbez gu' Diox. No ndxòo lezo' Diox con' ndli gu' co'se' ndlyath no gu' mèn co' ndyac yaltii co' nquin con'. <sup>5</sup> Na ñibe' lool, Cornel, ftel' mèn par ciuda Jop par ya chez mènà thib mbi' co' lèe Mon co' ne' tedib lèe co' lèe Pedr. <sup>6</sup> Mon nzo ban liz tedibguè' mbi' co' lèe Mon co' nac thib mbi' co' ntecuu's yid má'. Liz Mona ndub gaxte ro níttó'. Co'se' yi'th mbi' co' lèe Mon Pedr lool, Mon Pedr ta' cuent lool cón naquin lil.

<sup>7</sup> Co'se' ndyàa angl co' mdoodi's no Cornel, Cornel mbli mandad ndye'th chop moz Cornel no ndye'th thib solndad co' nac mbi'ley'. Mbi' co' nac solndada, anze'f ndxàp Cornel yalxla's ñèe Cornel mbi'. <sup>8</sup> Mda' Cornel cuent loo moz no loo solndad ryete con' co' ngòc loo Cornel. Ngoloa, mtel' Cornel moz con solndad. Nda moz con solndad ciuda Jop.

<sup>9</sup> Tedib huiz co' nde nquea, láth ndoo moz con solndad ned no co'se' yamerle' nde zin gax moz con solndad ciuda Jop, Pedr nguáp loo zote yéc yòo par cues Pedr Diox. Hora ngòc casque' rol huiz. <sup>10</sup> Hora anze'f ndlyan' Pedr. Ndlya's Pedr hua Pedr. Per láth ngue toxcu'a' mèn con' hua Pedr, no láth ngue bez Pedr Diox, mxyo'f loo thib con' loo Pedr. <sup>11</sup> Per con' co' mxyo'f loo loo Pedr, mxac Pedr mxyal' loo bé'. No mxac Pedr nde làa thib le' lar' co' anze'f naroo loo bé' loo Pedr. Natedó' lar'a dyap squin. <sup>12</sup> Loo lar'a nzo huax loo má' co' nzi'f nii, no mbel', no mbin co' ñaade hua mèn. <sup>13</sup> Sya, hora mbìn Pedr thib di's co' mbyèn loo bé'. Ndxab di'sa loo Pedr:

—Goo too, Pedr. Lùu ñee xá ñaa má' co' ndyubla'sl hual. Beth má' par hual.

<sup>14</sup> Pedr mcàb loo Tad. Ndxab Pedr:

—Aa'a, Tad. Ne'guthten nec thib má' ba' par huan má' tac daa thidteneque' tarte hua nítyèth bél' má' zab co' ñaade hua mèn.

<sup>15</sup> Mbere Tad Jesús, mdoodi's Tad Jesús tedib vez loo Pedr. Ndxab Tad Jesús:

—Rye loothe má' co' mtebii Diox par hua mèn, ne'gabtel inambiide má', Pedr.

<sup>16</sup> Ngolo mbyon vez ngòca tataa loo Pedr, mbere lar'a. Nguáp lar'a loo bé' nazal' má' lar'. <sup>17</sup> Per láth ngue li Pedr xtùuz cóthe li Pedr cón che'n con' co' mxyo'f loo loo Pedr no cón nee di's con' co' mxyo'f loo loo Pedr, no mbli Pedr xtùuz cón nee di's di's co' gunii Tad loo Pedr, mzin gax moz con solndad co' mtel' Cornel ro puert liz Mon. Gunii moz loo mèn guliz mbi' co' lèe Mon. Ndxab moz:

—¿Ché' trè' nac liz Mon co' ntecuu's yid má', cà'?

<sup>18</sup> Texal mzin moz liz Mon, gáple' que' mnibdi's moz loo mèn guliz Mon. Ndxab moz:

—¿Ché' nzo thib mbi' co' lèe Mon co' ne' tedib lèe Pedr co' nzo ban trè' nalle', à'?

<sup>19</sup> Per láth be' ngue li Pedr xtùuz cón che'n con' co' mxyo'f loo loo Pedr, Xpii Natú' ndxab loo Pedr:

—Pedr, hui' nexa. Son xa'bi' nde cua'n lùu.

<sup>20</sup> Ndxab Xpii Natú' loo Pedr, ne:

—Goo too no bilàa. Fxen ned no huàa no mèn ba'. No ne'gàcte chop loo chop la'sl tac daa mtel' mèn ba'. Mbi'th mèn ba' lool.

<sup>21</sup> Sya, mbilàa Pedr. Nguá Pedr co'te' nziri' yon mèn co' mtel' Cornel. Ndxab Pedr loo mèn:

—Daa nac xa' co' nde cua'n gu'. ¿Chó zin' nde gu', à'? ¿Cón ndlya's gu' lin?

<sup>22</sup> Mèna mcàb. Ndxab mèna loo Pedr:

—Nu' nde mandad che'n thib mbi' co' lèe Cornel co' nac thib capitán co' nacguè' thib mbi' guryath no thib mbi' guryèn. Nzyeb Cornel loo cón che'n Diox no ndli Cornel cas loo cón che'n Diox. No ryete mèn nación Israel co' nzo ban ciuda Jop anze'f ndli par ndyu' Cornel. No anze'f nque' lezo' mèna ñèe mèna Cornel. No mtel' Diox thib angl che'n Diox co' ngua loo Cornel. Angl ndxab loo Cornel ndxàalque' tel' chez Cornel lùu par yal liz Cornel par gòn Cornel cuent co' ta'l loo Cornel cón che'n Jesucrist.

<sup>23</sup> Sya, mnibe' Pedr loo yon xa'bi'a ngòo xa' par le'n nyòo. No mbyan' no xa'bi'a Pedr yál'a. Co'se' ngo nii izlyo' tedib huiz co' nde nquea, mxen Pedr ned, nda no Pedr yon xa'bi'a. No ndoo nque plá mèn co' ndxàc hues por cón che'n Jesucrist co' nac mèn ciuda Jop xís Pedr par ngua no mèna Pedr ciuda Cesar co'te' nac liz Cornel.

<sup>24</sup> Mzin Pedr con mèna ciuda Cesar tedib huiz co' nde nquea co'te' ngue bed Cornel con ndxep mèn guliz Cornel no con ndxep amiu co' nac huen amiu Cornel co' ndxab Cornel yi'th par gòn mèna di's co' tyoodi's Pedr loo mèna. <sup>25</sup> Co'se' mzin Pedr liz Cornel, Cornel ngro' par ngua càa ned Cornel Pedr. No mdub xib Cornel loo Pedr par mcòo' Cornel yéc Cornel loo Pedr. <sup>26</sup> Per Pedr mxít too Cornel. Ndxab Pedr loo Cornel:

—Mbi', goo too, yey. Ne'tub xibtel loon. ¿Ché' ingüi'del daa, ne, nac lomisque' mbi' xal lùu, Cornel? Lalque' ryop na', ey.

<sup>27</sup> No láth ngue toodi's no Pedr Cornel, ngòo no Cornel Pedr par le'n nyòo. Gunèe Pedr huax mèn mqeltàa liz Cornel. <sup>28</sup> Sya, ndxab Pedr loo rye mèna:

—Gu' non no nanee gu' xal nac mèn nación Israel loo xley' mèn nación Israel. Xley' mèna inda'de lugar par queltàa no mèna mèn tith o yòo mèna liz mèn co' nac mèn tith. Per Diox mbli' loon indxàalte gaben yende chó con' nac con' zab no con' co' inambiide loo Diox. <sup>29</sup> Por cona, texal ngurez gu' daa, luega ndalen loo gu' no ne'ngolten nec thib di's loo mèn co' mtel' gu' loon. Ndlyazen ñee gu' loon chonon mtel' chez gu' daa.

<sup>30</sup> Sya, mcàb Cornel loo Pedr. Ndxab Cornel:

—Ndxàc thap huiz xal hor nalthe, daa nzo le'n nyòo lizen ndxè'. Xlat daa. No ngue bezen Diox co' nac hor co' mbezen Diox ndxàal bzyè. Hora mxyo'f loo thib mbi' co' noc xab co' anze'f nquee xnii loon. <sup>31</sup> Gunee mbi' loon: Cornel, Diox mcàaque' cuent di's co' mbezl loo Diox co'se' mbezl Diox. No nte'que' lezo' Diox cón che'n con' co' ndlyath nol mèn prob co' naquin con'. <sup>32</sup> Gunee angl loon, ne: Ftel' mèn ya xi mèn Mon co' ne' tedib lèe co' lèe Pedr co' nzo ban ciuda Jop. Mona nzo ban liz thib mbi' co' lèeguè' Mon co' ntecuu's yid má'. Liz Mona ndub gax ro níttó'. Co'se' yi'th Mon Pedr lool, Mon Pedr yòo tyoodi's no lùu cón ndxàal lil. <sup>33</sup> Por cona, luega mtel'en mèn par ngua cua'n mèn lùu. Per nalle' huenque' mblil ndel. No nalle' ñèel ryete nu' nziri' loo Diox trè' no ndlya's nu' gòn nu' di's co' ñibe' Diox lool par tyoodi'sl loo nu'.

*Pedr mblo yalbàn liz Cornel.*

<sup>34</sup> Sya, mtlo Pedr, mdoodi's Pedr loo mènà. Ndxab Pedr:

—Nase naneen no ndan cuent yende chó mèn más ndyu' loo xtàa mèn loo Diox. <sup>35</sup> Ndxé'leque', Diox ndyal no ngòo Diox cuent cón che'n mèn chol nación, mèn co' nzyeb loo cón che'n Diox no co' nque tee ban nalì no nambii loo Diox par yòo mènà loo cón che'n Diox. <sup>36</sup> Diox gunii loo bin mèn nación Israel. Mde'th Diox di's loo mènà xá mod yo nagàl lezo' mèn loo Diox por cón che'n Jesucrist. Jesucrist nac Tad no jef loo ryethe mèn. <sup>37</sup> Gu' huen huen nda' cuent cón che'n con' co' ngòc par ned làaz mèn nación Israel co'se' ner mtlo Juàn Bautist, mblo Juàn yalbàn no mde'th Juàn di's cón che'n Tad Jesús. No mbli Juàn bautizar mèn par neda. Ngoloa, mque tee go Tad Jesús yalbàn loo mèn yèezya' che'n làaz mèn galile. <sup>38</sup> Gu' naneen no non gu' xá mod mbli Diox par ngòp Jesús con' la's nii Jesús no la's ya' Jesús por cón che'n Xpii Natú' che'n Diox. Naneen gu', ne, xá mod mque tee li Jesús con' ndac. No mteyac Jesús rye loothe yíiz co' ngòc xquíz che'n Mebizya co' mxac mèn. Jesús mbli con'a tac Diox nzo noque' Jesús. <sup>39</sup> Nu' nac mèn co' nda' cuent cón che'n ryethe con' mbli Jesús. Mbli Jesús con'a par ned le'n yèezya' che'n làaz mèn jude no le'n ciuda Jerusalén, ne. Ngoloa, mbeth mèn Jesús. Mque' mèn Jesús loo thib cruz. <sup>40</sup> Per mastale' nguth Jesús loo thib cruz, mbli Diox par ngro xban Jesús co'se' ngolo son huiz nguth Jesús. Ngoloa, mbli Diox, ne, par gunèe nu' Jesús tedib vez. <sup>41</sup> Ne'nglu' loode Diox Jesús loo ryete mèn tiempa. Ndxé'leque', Diox mbli' Jesús loo nu', nu' co' ngòc mèn co' Diox mcai ndoore', par gac nu' mèn co' ta' cuent no te'th nu' cón che'n Jesús. Co'se' ngolo ngro xban Jesús làth mèn nguth, nu' nduhua no Jesús no ngu no nu' Jesús co' ngòc xít nu' no lua' nu'. <sup>42</sup> Le'n huiz co' mque tee no Jesús nu' loo ngro xban Jesús, Jesús mnibe' loo nu' ya lo nu' yalbàn no ta' nu' cuent loo mèn le' Diox mdoo leque yub Jesús xal thib juez par tub rez Jesús cón che'n mèn naban, no cón che'n mèn nguth, co'se' gac tiempa. <sup>43</sup> Lomisque' ne, gunii rye mèn co' mde'th di's co' ndxab Diox loo mèn, mènà gunii póla cón che'n Jesús. Ndxab mènà le' ryete mèn co' yila's loo Jesús no loo cón che'n Jesús, mènà tyon' xtol por cón che'n Jesús.

*Ngulàale' Xpii Natú' no ngòo Xpii Natú' loo mèn co' inacte mèn nación Israel par tlo ñibe' Xpii Natú' loo mènà, ne.*

<sup>44</sup> Tatabe' ngue toodi's no Pedr mèn liz Cornel co'se' ngulàa Xpii Natú' loo rye mèn no ngòo Xpii Natú' le'n lezo' mèn co' nzi yòn di's co' ngo Pedr yalbàn. No mtlo Xpii Natú', mnibe' Xpii Natú' loo mènà. <sup>45</sup> Mèn nación Israel co' ndxela's loo Jesús co' mbi'th no Pedr liz Cornel, mènà ante mbui' no ante gunaa mènà le' Xpii Natú' ngulàa loo mèn co' inacte mèn nación Israel, ne. <sup>46</sup> Tataa mbui' no gunaa mèn nación Israel tac mbìn mènà le' mèn co' inacte mèn nación Israel mdoodi's tedib di'stèe no mbez mènà di's roo di's xèn no di's natú' loo taamas mèn cón che'n Diox, ne. <sup>47</sup> Sya, ndxab Pedr loo myen' xtàa Pedr co' ngua no Pedr liz Cornel:

—¿Xá nee gu'? ¿Ché' nzo chó gu' cà di's par gac bautizar mèn ndxè'? Gu' naneenque' le' mèn ndxè' ngulàa Xpii Natú' loo xalque' ngulàa Xpii Natú' loo na', ¿lé'? Cóna, ña'ben di's ndxè' loo gu'.

Sya, ndxab myen' loo Pedr:

—Yende cón li gac bautizar mèn ba', yey.

<sup>48</sup> Sya, mnibe' Pedr gac bautizar mènà por lèe Tad Jesucrist. Ngolo ngòc bautizar mènà, mna'b mènà loo Pedr. Ndxab mènà:

—Pedr, byan' con nu' mase pláte huiz, yey.

## 11

*Pedr ngua ta' cuent cón che'n con' ngòc loo Pedr liz Cornel loo mèn co' nqueltàa loo cón che'n Diox ciuda Jerusalén.*

<sup>1</sup> Ryete myen' xin' mté'th Jesús co' ndxe' di's, no mèn co' ndxàc hues por cón che'n Jesús, co' nqueltàa le'n yèezya' co' nac làaz mèn jude, mènà mbìn le' mèn co' inacte mèn nación Israel mdyal mbìn di's ndac co' nac di's ndac che'n Diox. Ngola's mènà no ngòo

mèna loo cón che'n Diox, ne. <sup>2</sup> Co'se' mbere Pedr, mdyàa Pedr par ciuda Jerusalén, mèn co' ndxela's co' nac mèn nación Israel anze'f mteyol' di's con Pedr cón che'n cón mbli Pedr liz Cornel. <sup>3</sup> Ndxab mèna loo Pedr:

—¿Chonon ngua too naal mèn co' inacte mèn nación Israel no axte ndxuhua nol mèna, à'?

<sup>4</sup> Sya, mtlo Pedr, mda' Pedr cuent loo mèn con' co' ngòc loo Pedr ndoore' ya Pedr liz Cornel no axta xal ngòc bautizar mèn liz Cornel. Ndxab Pedr:

<sup>5</sup> —Daa ngo le'n ciuda Jop. No láth ngue bezen Diox thib bzyè, mxyo'f loo thib con' loon. Gunèen nde làa thib con' co' ñaa xal thib le' mant loo bé' loon. No natedó' mant dyap punt. <sup>6</sup> Co'se' mbui'en co' huenleque' le'n mant cón nzo le'n mant, gunèen nzo má' co' nzi'f thap nii le'n mant co' nac má' huan. Nzo mbel'. No nzo mbin le'n mant. <sup>7</sup> No mbìnèn thib di's co' gunee loon: Goo too, Pedr. Lùu nee xá ñaa má' co' hual. Beth má' par hual. <sup>8</sup> Per daa ndxab loo Tad: Aa'a, Tad. Ne'lidena tataa tac daa tarte hua nec thib nítyèth má' co' nac má' nazab no co' nac má' co' inambiide. <sup>9</sup> Sya, mbere di's che'n Tad. Mbyèn di'sa tedib vez loo bé'. Gunee di'sa loon: Rye má' co' mtembii Diox, ne'gabtél má' zab má'a. <sup>10</sup> Mbyon vez tataa gunee Tad loon. Ngoloa, mbere mant. Nguáp mant loo bé' tedib vez. <sup>11</sup> Leque hora, mzin son xa'bi' liz Mon co'te' nzon. Yon xa'bi'a nde axta ciuda Cesar par mbi'th cua'n xa' daa. <sup>12</sup> Sya, mtel' Xpii Natú' daa, nda non yon mèna. No mnibe' Xpii Natú' loon ne'gàcte chop loo chop la's daa par ga non mèna liz Cornel. Ngua no xop mèn ciuda Jop, co' ndxàc hues na' por cón che'n Jesucrist, daa liz mbi' co' lèe Cornel ciuda Cesar, ne. <sup>13</sup> Mbi' co' lèe Cornela mda'guè' cuent loo nu' xá mod gunèe mbi' ngua thib angl loo mbi' liz mbi'. Ndxab angl loo mbi': Ftel' mèn par ya mèn ciuda Jop par ya xi mèn thib mbi' co' lèe Mon co' ne' tedib lèe co' lèe Pedr. <sup>14</sup> Mon ñee lool xá mod lil par gác lyá'l loo con' ryes con ryete mèn gulizl. <sup>15</sup> Co'se' mtlon, ngue toodiz non mèn guliz Cornel liz Cornel, Xpii Natú' ngulàa loo mèna no ngòc Xpii Natú' loo mèna par tlo ñibe' Xpii Natú' loo mèna xalque' ngulàa Xpii Natú' loo na' co'se' ngòc huiz co'se' nerleque' ngulàa Xpii Natú' loo na' no ngòc Xpii Natú' loo na' par tlo ñibe' Xpii Natú' loo na', ne. <sup>16</sup> Axta syare' mte' lezon xal gunii Tad Jesús loo na': Lìcque', Juàn Bautist mbli bautizar mèn con nít per le'n taaplá huiz lin par lyàa Xpii Natú' che'n Diox loo ryete gu' co' ngola'sle' loo cón chenen no loon, co' nee di's, thidte ngòc gu' loo cón chenen por cón che'n Xpii Natú' co' lyàa loo gu' xal co'se' ndxòc mèn le'n nít par ndxàc bautizar mèn. <sup>17</sup> Pues, chele' Diox mbli ngulàa Xpii natú' no ngòc Xpii Natú' loo mèn co' inacte mèn nación Israel par mtlo ñibe' Xpii Natú' loo mèna, ne, xalque' ngulàa Xpii Natú' loo na' no ngòc Xpii Natú' loo na' par mtlo ñibe' Xpii Natú' loo na' co' ngola'sle' loo Jesucrist, ¿chó nac daa hora par gác daa thib xa' co' cà' di's, no thib xa' co' nac ngolo ngola's loo con' ngue li Diox par yila's taamas mèn, sya, à'? Yende mod gác lin tataa, ¿lé'?

<sup>18</sup> Le' sya, co'se' mbìn mèn co' ndxàc hues por cón che'n Jesucrist co' nac mèn ciuda Jerusalén tataa ndxab Pedr, xèegà mbyau' ro mèna. Más quee lezo' mèna ndxab mèna di's roo di's xèn no di's natú' loo xtàa mèn cón che'n Diox no loo Diox. Ndxab mèna:

—¿Ay, Dio's! Nase non na' no nanee na' axta loo mèn co' inacte mèn nación Israel mbli Diox par mxyal' ned mxyal' yó' par ngulàa yéc mèna no ngulàa lezo' mèna par mse' mèna mod co' ngòp mèna loo Diox. No tataa mod tyon' xtol mèna par gác loo mèna yòc ban no mèna Diox thidtene yiloa.

*Mèn co' ngola'sle' loo cón che'n Jesucrist mtlo mqueltàa loo cón che'n Diox le'n ciuda Antioqui.*

<sup>19</sup> Anon mbeth mèn thebol Steb mtlo mèn, ndub ngu's mèn mèn co' ngola'sle' loo cón che'n Jesucrist. Ngo ndxep mèn co' nzo ne'ñee lezo' mxon' axta par le'n yèezya' co' nac làaz mèn fenis, no axta par le'n yèezya' co' nac làaz mèn chipr co' nac thib yòc biiz co' nziri' le'n níttó'. No axta le'n ciuda Antioqui mxon' rye mèna. Mbli mèna yalbàn rye ned mxon' mèna cón che'n di's ndac che'n Diox. Per ante loo mèn nación Israel mbli mèna yalbàn. Ne'ngode mèna yalbàn loo mèn co' inacte mèn nación Israel. <sup>20</sup> Làth xtau'a, ndxep mèn co' ngola's co' ngòc mèn gulàaz che'n làaz mèn chipr, no mèn gulàaz che'n làaz mèn ciren, ngro' mèna. Ngua que tee mèna. Mzin mèna axta ciuda Antioqui.

Mdoodi's mènà loo mèn co' inacte mèn nación Israel par neda, ne. Mda' mènà cuent cón che'n di's ndac co' nac cón che'n Tad Jesús co' ndlu' xá mod lyá' mèn loo con' ryes. <sup>21</sup> Diox mbli ngòp mènà con' roo con' xèn la's nii mènà no la's ya' mènà par ngo mènà yalbàn no te'th mènà cón che'n Tad Jesús. No por cón che'n co' mxo'f zin' mèn cón che'n Tad Jesús huax mèn co' inacte mèn nación Israel mblá' costumbr gox co' mbed no mèn no ngola's mènà loo Tad Jesús.

<sup>22</sup> Co'se' mbìn mèn co' nac mèn ciuda Jerusalén co' nqueltàa loo cón che'n Jesucrist le' mèn co' inacte mèn nación Israel ngola's, mtel' mènà Mbèl' par ngua Mbèl' axta Antioqui par lyath no Mbèl' mèn co' nque tee go yalbàn cón che'n di's ndac che'n Diox le'n ciuda Antioqui. <sup>23</sup> Co'se' mzin Mbèl' ciuda Antioqui, ñèe Mbèl' anze'f thib con' ndac angngue li Diox loo mèn ciuda Antioqui co' ngola'sle' loo Jesucrist. No anze'f mdyac lezo' Mbèl' gunèe Mbèl' cón ngue li Diox loo mènà. Sya, mco'x Mbèl' loo ryete mènà. Ndxab Mbèl' loo mèn:

—Dib nzo yéc gu' no dib nzo lezo' gu' bli nèe gu' gu' no altantque' gure gu' loo cón che'n Tad Jesucrist.

<sup>24</sup> Tataa mque tee li Mbèl' tac Mbèl' ngòc thib mbi' ndac loo Diox. No ñibe'pe' Xpii Natú' loo Mbèl'. No anze'f ngòp Mbèl' yalxla's loo Diox. Por cona, anze'f thib mèn ngola'sle' loo cón che'n Jesucrist por cón che'n Mbèl'.

<sup>25</sup> Ngolo mque tee Mbèl' le'n ciuda Antioqui ndxep tiemp, mxen Mbèl' ned. Nda Mbèl' par ciuda Tars par cua'n Mbèl' Saul le'n ciuda Tars. No co'se' mzyál' Mbèl' Saul, mbe' Mbèl' Saul par ciuda Antioqui tedib vez. <sup>26</sup> No ngo no Mbèl' Saul con rye mèn co' nqueltàa loo cón che'n Diox ciuda Antioqui le'n thib lín' complet. Mblu' Mbèl' ryop Saul loo huax mèn cón che'n Diox. Mèn ciuda Antioqui nerleque' ngòc mèn co' mdub lèe mèn co' ndxela's loo cón che'n Jesucrist mèn co' ngòo loo cón che'n Jesucrist.

<sup>27</sup> Leque le'n huiza ngo ndxep mèn co' ndxela's loo Diox por cón che'n Jesús co' ngòc mèn co' mde'th di's co' ndxab Diox le'n ciuda Jerusalén. Ngro' mènà le'n ciuda Jerusalén par ngua mènà axta ciuda Antioqui. <sup>28</sup> Láth nzo mènà làth mèn co' ndxela's le'n ciuda Antioqui, thib mbi' co' lèe Agab co' ngòc mèn co' mde'th di's co' ndxab Diox co' ngua Antioqui, ngo too mbi' làth mèn co' ndxàc hues por ndxela's mènà loo cón che'n Jesucrist. Mnibe' Xpii Natú' loo mbi'. Ndxab mbi' loo mèn co' nqueltàaa lyàa thib huin tín' loo mèn dib athu loo izlyo'. No ngòcque' con'a le'n tiemp co'se' mdub ñibe' thib mbi' co' ngro' lèe Claud loo mèn ciuda Rom co' nac làaz mèn ital. <sup>29</sup> Sya, mèn co' ndxela's loo Diox por cón che'n Jesús co' nqueltàa loo cón che'n Diox le'n ciuda Antioqui, ndxab mènà loo xtàa mènà no mdoo lezo' mènà tel' mèn ndxep tmi loo mèn co' ndxàc hues por cón che'n Jesús, mèn co' naban par ned le'n yèezya' che'n làaz mèn jude. Tub mènà tmi xal nzote mènà. <sup>30</sup> Tataa mbli mèn co' ndxela's le'n ciuda Antioqui. Mtel' mènà tmi loo mèn gool co' ndyoo ner no co' ndyoo naa loo mèn co' nqueltàa loo cón che'n Diox le'n yèezya' co' nac làaz mèn jude. Sya, mbe' Mbèl' ryop Saul tmi co' mtel' mènà loo mèn goola.

## 12

### *Mbeth mèn Cob, hues Juàn. Le' Pedr na, mque' mèn lezi'f.*

<sup>1</sup> Le'n tiemp co' mnibe' rey Herod, co' ngòc Herod Chu'th xot Herod Gox, loo mèn nación Israel, mtlo Herod, mnibe' Herod loo mèn par tub ngu's mènà mèn co' ndxela's loo cón che'n Jesucrist le'n chol yèezya' che'n làaz mèn nación Israel. <sup>2</sup> Mbli Herod mandad mbeth mèn Cob, hues Juàn, con spad. <sup>3</sup> Co'se' ñèe Herod le' mèn nación Israel ndxòo lezo' no mbyan' gust lezo' mèn mbeth mèn Cob, mnibe' Herod par mxen mèn Pedr par que' mèn Pedr lezi'f. Mbli mèn con'a con Pedr le'n huiz lni co'se' ndxuhua mènà pan co' indxòode dii levadur. <sup>4</sup> Co'se' ngolo mxen mèn Pedr, mnibe' Herod que' mèn Pedr lezi'f. Le'n lezi'f mquenap si'n fthib solndad Pedr. Mbli Herod xtùuz co' Herod Pedr loo mèn nación Israel par guth Herod Pedr loo mèn nación Israel co'se' yilo riid lni pasc. <sup>5</sup> Cona, huen huen mquenap solndad Pedr le'n lezi'f. Per mastale' huen huen nquenap solndad



Pedr le'n lezi'f, rye mèn co' nqueltàa loo cón che'n Diox por cón che'n Jesús le'n ciuda Jerusalén nalyat ngurez mèn Diox ze no yál' par lyá' Pedr la's ya' mèn con Herod.

*Diox mbli par mblyá' Pedr lezi'f.*

<sup>6</sup>Per leque yál' par yinìi izlyo' tedib huiz co' nac huiz co' ñibe' Herod co' mèn Pedr lezi'f par guth mèn Pedr loo mèn nación Israel, yál'a nax yàt Pedr cuat chop solndad axta le'n lult cuart le'n lezi'f. Natedó' Pedr con chop caden. Le' taamas solndad na, huen huen nzi quenap lezi'f par fuer. <sup>7</sup>Láth ndxàc con' ryes loo Pedr yál'a, thìb angl che'n Tad Diox ngro' too le'n lezi'f. No ante mbya'x xnìi le'n lezi'f. Mbli angl mcauau yéc rye solndad no mcauau lezo' rye solndad co' ngue quenap Pedr le'n lezi'f yál' no co' ngue quenap lezi'f par fuer. Yende cón mden' solndad. Sya, mcuin angl Pedr par ryo' mcal' loo Pedr. Ndxab angl loo Pedr:

—Pedr, jer goo che, yey.

Le' caden co' natedó' ya' Pedra na, ale yub mxyac. <sup>8</sup>Ndxab angl loo Pedr:

—Quej tí' bay le'nl. No fque' yilid niil.

Co'se' ngolo mbli nab Pedr Pedr, ndxab angl loo Pedr:

—Fcap capl. Ftoo nque xísen. Ndyàa na'.

<sup>9</sup>Pedr mdoo nque xís angl. Per axta ne' ne' inon Pedr ¿ché', licque', ndxàc con'a loo Pedr o ché' ilicte ndxàc con' co' ngue li angl loo Pedr? Ale ndyac Pedr mxyo'f loo con' loo Pedr. <sup>10</sup>Per nguri'th angl con Pedr loo solndad co' nzi quenap le'n taamas cua' le'n lezi'f. Co'se' mzin angl con Pedr ro puert zaguan co' ndoo ro ned co' nac puert yi'f, ale yub puert mxyal'. Ngro' angl ryop Pedr par ro ned par fuer. Co'se' ngolo mdee no angl Pedr casque' thìb cuadr, mblá' angl Pedr. Xexte mdyon' angl loo Pedr. <sup>11</sup>Axta syare' mda' Pedr cuent con' co' ndxàc loo Pedr. Ndxab Pedr loo lezo' Pedr:

—Nase, licque', naneen le' Tad Diox mtel' thìb angl che'n Tad Diox par mtelá' angl daa la's ya' Herod no la's ya' ryete mèn nación Israel. No mblyá' daa loo ryethe con' mblyas mèn li no mèn daa.

<sup>12</sup>Láth ngue li Pedr xtùuz cón ngòc loo Pedr, nda Pedr liz thìb xa'got co' lèe Mari co' nac xna' Juàn, Juàn co' ne' tedib lèe Marc. Liz Maria, huax mèn mqueltàa yál'a par nzi bez mèn Diox cón che'n Pedr. <sup>13</sup>Co'se' mte's Pedr puert co' ndoo ro ned co'te' ndxòo mèn loo lue' liz Mari, ngro' thìb mza' co' lèe Rod par nda nee mza' chó ngue te's puert. <sup>14</sup>Per co'se' mda' mza' cuent Pedr na, por ndlibe' mza' xal ndyoodi's Pedr, ne'nxal'te mza' puert. Ndxé'leque', yende izlyo', mque' mza' carre tant ndyac lezo' mza'. Ngua mza' axta le'n nyòo par ngua li mza' avis loo mèn le' Pedr ngue te's puert. <sup>15</sup>Sya, mcàb mèn co' nzo le'n nyòo loo mza'. Ndxab mèn loo mza':

—Mbíizl, ndee. ¡Pà gàca, Pedr!

Per mza' sate más mbez:

—Lìca, Pedr na.

Per mastale' tataa mbez mza', mèn co' nzo le'n nyòo mbez:

—Inacta Pedr, hombre. Peser angl che'n Pedr na.

<sup>16</sup>Látha, sate más ndoo Pedr. Mte's Pedr puert. Per por lult co'se' mxal' mèn puert, gunèe mèn Pedr na. No ale mzyeb mèn no ngo no lezo' mèn. <sup>17</sup>Per Pedr mbli seño loo mèn con ya' Pedr par ne'lìde mèn ruid. No tau' mèn ro mèn. Sya, mda' Pedr cuent loo mèn xá mod mbli Tad Diox loo Pedr par ngro' Pedr lezi'f. Ndxab Pedr loo mèn, ne:

—Bli gu' favor, fta' gu' cuent ndxè' loo Cob no loo mèn co' ndxàc hues na' por cón che'n Tad Jesús.

Sya, ngro' Pedr tedib vez par nda Pedr tedib lugar.

<sup>18</sup>Co'se' ngo nìi izlyo' tedib huiz co' nde nquea, ngo too huax di's làth rye solndad co' mquenap Pedr tac ne'nda'de solndad cuent xá mod ngro' Pedr lezi'f no pá ned nda Pedr. <sup>19</sup>Sya, mnibe' Herod ya cua'n solndad Pedr. Ngua cua'nque' solndad Pedr. Per ya ne'ngagaade Pedr loo solndad. Sya, mnibdi's Herod loo solndad. Ndxab Herod:

—¿Cón mbli gu'? ¿Chonon mbla' gu' mxon' Pedr? Per nalle', gu' ya looi por Pedr.

Sya, mbli Herod mandad ngua yuth taamas solndad solndada. Ngolo ngòc con'a, mxen Herod ned. Ngro' Herod làaz mèn jude. Nda ban Herod ciuda Cesar.

*Mzin huiz nguth Herod.*

<sup>20</sup> Leque le'n huiza anze'f ngocloo tín' Herod con mèn co' ngo ban le'n yèezya' che'n làaz mèn ciuda Tir no che'n làaz mèn ciuda Sidón. Per ryete mèn yèezya'a thidte mdoodi's no thidte ngòc mènna par ya mènna loo Herod con thib mbi' co' lèe Blast. Blast ngòc thib mbi' co' thidte ñibe' con Herod. Mdix mènna huax tmi mcàa Blast par teri'th Blast di's che'n mènna loo Herod par li Blast yu' yàl lezo' Herod por cón che'n mènna. Tataa mbli prob mèn yèezya'a tac ned làaz Herod ndryo' co' ndxuhua mènna xal ndlya's Herod no xal ndyal Herod par tho' mèn gulàaz Herod con' loo mènna. <sup>21</sup> Sya, nguaque' Blast. Ngua toodi's no Blast Herod. Per Herod ndxab loo Blast:

—Neeca, por lùu lina. Ndxè' huiz yi'th nol mèn ba'.

Le' sya, huiz co' ngòc di's ya mèn làaz ciuda Tir no mèn làaz ciuda Sidón loo Herod tedib vez, huiza mdoc xab Herod lar' co' ndxoc rey. No mdub Herod loo asient co'te' ndyub ñibe' Herod loo mèn. Le' sya, co'se' mqueltàa rye mènna loo Herod, nen mdoodi's Herod loo mènna cón che'n Herod. <sup>22</sup> Sya, láth ngue toodi's Herod ryete mèn co' mqueltàa loo Herod, mtlo mènna, cabii mbez yèe mènna. Mbez mèn loo xtàa mèn cón che'n Herod:

—Mbi' co' ndyoodi's ba' inacte thib mbi' che'n izlyo' ndxè'. Ndxè'leque', nac mbi' ba' thib diox, ndyac na'.

<sup>23</sup> Leque hora Diox mtel' thib angl che'n Diox par mbli angl ngulen thib yíiz loo Herod. Tataa mbli Diox loo Herod tac ne'nglide Herod par gac con' guryath no con' guryèn loo Diox. Setilte mbli angl ngos mblya'b mbey le'n lezo' Herod par nduhua mbey bél' lad Herod. Pente mxec Herod taaplá huiz no maste. Guneei loo Herod. Nguth Herod.

<sup>24</sup> Per di's co' nac di's ndac che'n Diox sate más ndxath ndxèn no sate más ngo mèn yalbàn cón che'n di's ndac le'n rye nación tiempa.

<sup>25</sup> Co'se' ngolo mque tee go Mbèl' ryop Saul yalbàn loo mèn ciuda Antioqui, mbere Mbèl' ryop Saul, ndye'th Mbèl' ryop Saul par ciuda Jerusalén tedib vez. Ndyè'th no Mbèl' ryop Saul Juàn co' ne' tedib lèe Marc par yo no Juàn Mbèl' ryop Saul le'n ciuda Jerusalén pláte huiz. Ngoloa, mbere Mbèl', no Saul, no Juàn Marc, ngua myen' Antioqui tedib vez.

## 13

*Mbèl' ryop Saul mtlole' mxo'f zin' par co Mbèl' ryop Saul yalbàn loo mèn huax lugar.*

<sup>1</sup> Be taa be taa nde tee huiz axtaque' ngo ndxep mèn làth mèn co' ngòc loo cón che'n Diox, mèn co' mde'th di's co' ndxab Diox loo mèn no mèn co' ngòc maistr co' ndlu' cón che'n Jesucrist loo mèn. Mènna ngòc leque Mbèl', no tedib mbi' co' lèe Mon co' ne' tedib lèe Yàt, no tedib mbi' co' ngro' lèe Lus co' ngòc mèn gulàaz che'n làaz mèn ciren, no tedib mbi' co' ngro' lèe Manaén. Mbi'a thidte mxyèn con Herod liz Herod, Herod co' ngòc gobernador loo mèn yèezya' che'n làaz mèn galile yilóa, no leque Saul co' mque tee no Mbèl'. <sup>2</sup> Thib huiz co'se' ryete mènna mqueltàa, ngue li mènna servis loo Diox no nzi xlat mènna, hora ngòc thib con' loo mènna. Xpii Natú' thib lite mnibe' loo mènna. Ndxab Xpii Natú' loo mènna:

—Blo' xà' gu' Mbèl' ryop Saul làth gu' par xo'f zin' Mbèl' ryop Saul thib zin' co' lyazen li Mbèl' ryop Saul.

<sup>3</sup> Mènna tolo ngurez Diox. No dib lal ngurez mènna Diox ngure xlat mèn. Látha, mxo'f mènna ya' mènna loo Mbèl' no loo Saul. Ngoloa, gunii mènna Diox loo Mbèl' no loo Saul. Ndxab mènna loo ryop myen':

—Diox huen nda gu', ndee gu'.

Sya, mxen Mbèl' ryop Saul ned. Nda Mbèl' ryop Saul xal mnibe' Xpii Natú' loo Mbèl' ryop Saul.

*Mbèl' ryop Saul ngue go yalbàn cón che'n di's ndac che'n Diox loo mèn yèezya' che'n làaz mèn chipr.*

<sup>4</sup> Co'se' ngolo mtel' Xpii Natú' Mbèl' ryop Saul, mxen Mbèl' ryop Saul ned axta mzin Mbèl' ryop Saul thib puert co' lèe Seleus co' nziri' ro nítto'. Tya, ngòo myen' le'n thib yòoyaa par mxyo'f myen' loo nít par nda myen' loo thib yòo biiz le'n nítto' co' lèe Chipr. <sup>5</sup> Co'se' mzin Mbèl' ryop Saul Chipr co'te' nziri' puert co' lèe Salamin, sangmtlo Mbèl' ryop Saul, mblo myen' yalbàn cón che'n di's ndac che'n Diox loo mèn le'n sinagog che'n mèn nación Israel. Ngua nque Juàn Marc par mblyath no Juàn Marc Mbèl' ryop Saul, ne. <sup>6</sup> Mque tee Mbèl' ryop Saul ryete le'n yèezya' co' nac yòo biiz co' nzo le'n nítto' axta mzin Mbèl' ryop Saul tedib yèez co' lèe Paf co' nziri' par neda. Le'n yèeza mzyál' ryop Mbèl' Saul thib mbi' co' nac mèn nación Israel. Mbi'a ngro' lèe Barjesús. Ngòc mbi' thib hue's. Mqueltàa ngòc mbi' thib mbi' gutyè', ne. Mbez mbi' le' mbi' nde'th cón che'n Diox co' ndxab Diox loo mbi'. <sup>7</sup> Mbi' co' ngòc hue'sa ngo no tedib mbi' co' lèe Serg Pab co' ngòc gobernador loo mèn làaz mèn chipr. Mbi' co' ngro' lèe Serg Paba ngòc thib mbi' co' anze'f ndxác. Sya, mtel' Serg co' ngòc gobernador mèn par ngua càa mèn Mbèl' ryop Saul. Tac Serg mbly'a's gòn di's ndac che'n Diox co' ngo myen' yalbàn. <sup>8</sup> Per leque mbi' co' nac hue's, co' lèe Barjesús, co' ne' tedib lèe Elim, mcà' di's loo Mbèl' no loo Saul par ne'yila'ste mbi' co' nac gobernador di's cón che'n di's ndac co' ngo myen' yalbàn. <sup>9</sup> Sya, ndoole' Saul co' ne' tedib lèe Pab, Xpii Natú' mnibe' loo Pab par xèe mbui' Pab loo Elim. <sup>10</sup> No ndxab Pab loo Elim:

—Aa, mbi' gutyè' no mbi' ye'rsin'. Lùu nac xgan' Mebizya. No nacl ngolo ngola's che'n ryethe con' co' nac con' ndac. ¿Axta pól lál' ya ne'tolode gàcl ngolo ngola's loo mod nali co' ndli Diox par yòo mèn loo cón che'n Diox, à'? <sup>11</sup> Per nalle' Diox li par gac thib yaltii lool. Lùu yan' sieu le'n ndxep tiemp. No ya ne'yiniide ned tyeel.

Leque hora luega mcuau loo Elim. No ya ne'ngácte nde nii Elim. No mcua'n Elim thib mèn par tyen mèn ya' Elim tac ya ne'ngácte Elim nghui' Elim. <sup>12</sup> Co'se' gunèe mbi' co' ngòc gobernador ngòc con'a loo Elim, ngola's gobernador loo Jesús no loo cón che'n Jesús. Tac ante mbui' mbi' no ante gunaa mbi' xal nac di's co' ngue tee lu' Pab ryop Mbèl' co' nac xley' che'n Jesús.

*Pab ryop Mbèl' ngue tee go yalbàn cón che'n di's ndac che'n Diox le'n yèez Antioqui co' nac yèezya' che'n làaz mèn pisid.*

<sup>13</sup> Pab ngòo loo thib yòoyaa con taamas myen' co' mque tee no Pab axta co'te' nac puert co' lèe Paf par nda Pab con myen' xtàa Pab par ned le'n yèezya' co' lèe Perg co' nac yèezya' che'n làaz mèn pamfil. Per Juàn Marc ne'nga node Pab con taamas myen'a. Ndx'e'leque', mbere Juàn, ndyàa Juàn par ciuda Jerusalén tedib vez. <sup>14</sup> Ngolo mblá' Juàn Pab con xtàa Pab, mbii Pab con myen' yèez Perg. Ngua riid Pab con myen' xtàa Pab axta mzin myen' le'n thib ciuda co' lèe Antioqui co' nac thib ciuda che'n làaz mèn pisid. Co'se' ngòc huiz descans, ngòo Pab le'n sinagog mèn nación Israel co' nzo ban ciuda Antioqui tiempa. Xèe mdub yòn Pab, con myen', di's co' mblab mèn cón che'n xti's Diox le'n sinagog. <sup>15</sup> Le' sya, co'se' ngolo mblab thib mbi' libr co' nac libr che'n ley co' mxo'f Moisés loo mèn, no co' nac libr co' mque' mèn co' nde'th co' ndxab Diox ye's, mèn co' ndyoo ner no co' ndyoo naa loo mèn le'n sinagoga, mèn mbli mandad par ngua yab mèn loo Pab con myen' co' mque tee no Pab. Ndxab mèn:

—Gu' co' nac mèn gulàaz nu', chele' gu' ngue no ndxep di's co' ndly'a's gu' co'x gu' loo nu' co' nziri' trè', nzoque' mod tyoodi's gu' loo nu' nalle'. Ne'tyóode gu', no ne'zyebte gu', no ne'thyonte gu'.

<sup>16</sup> Sya, ngo too Pab. No mbli Pab thib señ loo mènà par xèe cue mènà no par ne'lìde mènà arid ruid. Ndxab Pab loo mènà:

—Bìn gu' di's co' nde toodizen loo gu', gu' co' nac mèn che'n nación Israel, no gu' co' nzyeb loo cón che'n Diox no co' ndli cas loo cón che'n Diox. <sup>17</sup> Gu' nanee no nda'que' gu' cuent co' huenleque' le' Diox co' nac Dioxpe' na' co' nac mèn nación Israel, Diox mciui mèn co' ngòc xudgool na'. No mbli Diox par ngòc mènà thib nación roo no thib nación xèn co'se' tatabe' ngo ban mènà xal mèn tith làaz mèn nación Egipt. Ngoloa, mbli Diox par ngro' mèn co' nac mèn nación na' làaz mèn egipt por cón che'n con' roo con' xèn co'

ndxàp Diox la's nii Diox no la's ya' Diox. <sup>18</sup> Mxec Diox no mcha'la's Diox xalque' ngòc mod co' ngòp mèn gulàaz na' co'te' nagán le'n cho' lín'. <sup>19</sup> Ngoloa, mbli Diox par mblyux gaz nación mèn co' ngòc mèn gulàaz mèn che'n làaz mèn canaán par mda' Diox co'te' ngure naciona loo mèn co' ngòc xudgool na' póla par mban mèn co' ngòc xudgool na' tya. <sup>20</sup> No ngoloa, mnibe' Diox loo mèn co' ngòc juez par ñibe' mènna loo mèn co' ngòc xudgool na' le'n thap ayo nzo cho' psi' lín'. Mnibe' jueza axta co'se' ngòc huiz co'se' ngo thib mbi' co' mde'th di's co' ndxab Diox loo mèn. Mbi'a ngro' lèe Samuel. Mbi'a mnibe'guè' loo mèn co' ngòc xudgool na' tiempa, ne. <sup>21</sup> Per le'n tiemp co' mnibe' Samuel loo mèn co' ngòc xudgool na', mènna mna'b loo Samuel. Ndxab mènna yo thib rey co' ñibe' loo mènna. Sya, mbli Diox ngòc thib mbi' co' ngro' lèe Saul rey par ñibe' Saul loo mènna le'n cho' lín'. Saula ngòc xgan' thib mbi' co' ngro' lèe Cis. Cis ngòc bin che'n mèn co' ngòc bin che'n thib mbi' co' ngro' lèe Ming. <sup>22</sup> Ngoloa, mbli Diox par ngro' Saul. Ya ne'tolode gac Saul rey loo mèn xudgool na'. Sya, mbli Diox ngòc David rey loo mèn co' ngòc xudgool na'. Cón che'n Davida ndxab Diox: Daa ñee le' David co' nac xgan' Isaí, Davida nac thib mbi' co' anze'f ndxòo lezon ñèen. No li David ryete con' ndlyazen. <sup>23</sup> Per nalle', ngue tan cuent loo gu' cón che'n thib mbi' co' lèe Jesús co' nac bin che'n leque yub David. Jesús mbli Diox par mbi'th yáal Jesús loo izlyo' làth mèn nacionpe' na' par mbi'th tí' no mbi'th telàa Jesús mèn nación Israel loo con' ryes xalque' ngòc di's co' mcàbgòn Diox li Diox loo mèn nación Israel. <sup>24</sup> Per co'se' ndoore' yi'th que tee Jesús loo mèn nación Israel, Juàn Bautist mblolé' yalbàn cón che'n di's ndac che'n Diox loo mèn nación Israel. Mbez Juàn loo mèn ndxàal gac bautizar mèn no ndxàal lyàa yéc mèn no lyàa lezo' mèn par zye' mod co' ndxàp mèn loo Diox. <sup>25</sup> Per co'se' yamerle' zin huiz gath Juàn, mbez Juàn loo mèn: Inacte daa mbi' co' ndli gu' cuent nac daa. Per co'se' yilo taan huiz co' ndalen loo izlyo' ndxè' yi'th thib mbi' loo gu'. No por part cón chenen, ndyaquen ne'ta'den par mbi'a, no ne' ne' par làan yilid nii mbi' ne'liden ryes, ndyaquen.

<sup>26</sup> Gu' co' nac mèn gulàaz daa no co' nacguè' bin Abraham, no gu' co' nzyeb loo cón che'n Diox, co' ndli cas loo Diox, loo gu' mbli Diox par gòn gu' di's ndac co' ngue tan cuent loo gu' ndxè' par lyá' gu' loo con' ryes. <sup>27</sup> No nalle' niin loo gu': Le' mèn co' naban le'n ciuda Jerusalén, no mèn co' ñibe', no co' ndyoo ner, no co' ndyoo naa loo mèn ciuda Jerusalén, mènna ne'nda'de cuent chó ngòc Jesús. Ne' ne' nda' mènna cuent cón nee di's co' ngòc cón che'n di's ndac co' mde'th mèn co' mde'th di's co' ndxab Diox co'se' ndlab mèn libr le'n sinagog mèn atate huiz co' nac huiz descans. Por cona, co'se' mquexù' mque' fals mènna Jesús, leque mènna mbli par ngòcque' no mdyaaque' di's co' ndlab mèn loo libr co' mque' mèn co' mde'th di's co' ndxab Diox ye's loo mènna. <sup>28</sup> No mastale' nec thib mod no nec tedib mod ne'ngácte gan ngagaa Jesús loo chol yalgutyè' co' mquexù' mque' fals mèn Jesús par guth mènna Jesús, mna'b mèn di's loo Pilat par ñibe' Pilat loo solndad ya yuth solndad Jesús. <sup>29</sup> Le' sya, co'se' ya ngolole' mbli no mèn Jesús xalque' ndub di's co' mbez cón che'n Jesús loo libr co' nac xti's Diox cón che'n xá mod gath Jesús, mblàa mèn thebol Jesús loo cruz. No ngua lo mèn thebol Jesús le'n thib ye'r quèe co'te' mca's mèn thebol Jesús. <sup>30</sup> Per mastale' nguth Jesús, Diox mbli par ngro' xban Jesús làth mèn nguth. <sup>31</sup> No le'n huax huiz co' mque tee Jesús loo izlyo' tedib vez loo ngro' xban Jesús làth mèn nguth, Jesús ngro' too no mblu' loo Jesús Jesús loo mèn co' mque tee no Jesús anon mtlo Jesús, mque tee go Jesús yalbàn le'n rye yèezya' che'n làaz mèn galile. Mènna ngo no Jesús Jerusalén co'te' mbeth mèn Jesús. No nalle', mènna nac mèn co' nda' cuent no co' ngo yalbàn loo chol mèn cón che'n Jesús.

<sup>32</sup> Por cona, nu', ne, ngue ta' cuent cón che'n di's ndac ndxè' loo gu', co' ngòc di's co' mcàbgòn Diox li Diox loo xudgool na' más póla. <sup>33</sup> No nalle' loo na' co' nac bin che'n xudgool na', Diox mblilé' par ngòcque' no mdyaaque' di's xalque' mcàbgòn Diox le' Diox li par ryo xban Jesús làth mèn nguth xal ndub di's loo capitl chop che'n libr che'n Salmos co'te' ndub di's co' mbez taandxè': Lùu nac xgan' daa. No nalle' daa mbli par ñibe'l dib nabanl co' nac thib zin' co' ñibe'en lool par lil. <sup>34</sup> Tataa ngòc di's co' gunii Diox cón che'n Jesús le' Diox li par ryo xban Jesús làth mèn nguth par ne'yiza'de bél'yòo lad Jesús co'se'

gunii Diox di's co' ndub loo libr co' nac xti's Diox co' mbez taandxè': Na li anggàc con' ndac loo gu' co' mcàbgònen lin loo David no loo bin David. <sup>35</sup> Conaguè' mbez loo libr che'n Salmos tedib lugar, ne: U', Diox, ne'la'de yiza' bél'yòo lad mbi' co' anze'f nque' lezo' U' ñèe U'. No ne'la'de U' ga's bél'yòo lad mbi', mbi' co' nxo'f zin' cón che'n U'.

<sup>36</sup> Lìcpe' ba'i, David huenque' mdubdi's no mbli David con' co' ndxab Diox, no co' mnibe' Diox loo David, dib lal naban David. No ngu'b bél'yòo lad thebol David no zith lad thebol David. <sup>37</sup> Per bél'yòo che'n lad mbi' co' mbli Diox ngro xban, ne'nga'ste no ne'ngaza'de, ne' por chu'th. <sup>38</sup> Gu' co' nac mèn gulàaz daa, ndxàal ta' gu' cuent co' huenleque' le' nu' ngue te'th cón che'n xá mod ton' Diox xtol mèn. Ton' Diox xtol mèn por cón che'n Jesús. <sup>39</sup> Pues por cón che'n Jesús, ryete mèn co' ndxela's loo Diox por cón che'n Jesús, mdyon' xtol mèn co' mcua'n mèn co' ne'ndon'te làth mbli mèn preb ngli mèn con' xal ndub di's loo ley co' mxo'f Moisés loo mèn par li mèn. <sup>40</sup> Cona, ngue niin loo gu': Anderhuen gu'. Chó Diox chó nee gu'. Ne' ne' ngue yizi'f ngue yiga's loo gu' co' nac co' ndlu' cón che'n di's co' mque' mèn co' mde'th di's co' ndxab Diox ye's co'se' ndxab mèn taandxè' xal ndub di's loo libr co' mque' mèn ye's:

<sup>41</sup> Hui' gu' nexa, gu' co' nac mèn ye'rsin' co' nxiis no cón che'n Diox. Hui' gu' no gunaa gu' loo con' co' tarte ñèe gu' cón nac. No yiloa gath gu' no lyux gu' tac daa co' nac Diox, daa li gac huax con' roo con' xèn le'n huiz co' naban gu' co' ne'yila'ste gu' lin, mastale' nzo ndxep mèn co' ta' cuent cón che'n con' lin loo gu'. Ne'yila'ste gu'i, ndyaquen.

<sup>42</sup> Co'se' ngolo mdoodi's no Pab mèn, no ngro' no Pab myen' co' nque tee lyath no Pab le'n sinagog che'n mèn nación Israel co' naban ciuda Antioqui, ndxab ryete mèn loo Pab tolo tyoodi's no Pab mèn cón che'n di's ndac tedib vez al sabd, taaxon huiz co' nde nque co' nac huiz descans. <sup>43</sup> Co'se' ngolo mblyus servis le'n sinagog hora, huax mèn co' nac mèn nación Israel co' naban le'n ciuda Antioqui, no huax mèn co' ngòo loo xley' che'n mèn nación Israel, mèn co' huen huen ndyubdi's loo xley' che'n mèn nación Israel, rye mèn mdoo nque xís Pab no xís Mbèl' par mqueltàa mèn con Pab no con Mbèl' loo di's ndac che'n Diox. Sya, mco'x Pab ryop Mbèl' loo mèn ndxàal leque mèn li nèe mèn loo con' ndac co' angngro' lezo' Diox li Diox loo mèn.

<sup>44</sup> Co'se' mzin huiz sabd che'n tedib sman co' nde nquea co' ngòc huiz descans tiempa, casque' ryete mèn ciuda Antioqui mqueltàa par gòn mèn di's ndac che'n Diox co' ngo Pab yalbàn. <sup>45</sup> Per co'se' gunèe mèn nación Israel co' nzo ban ciuda Antioqui anze'f thib mèn mqueltàale' par gòn mèn di's co' ngue go Pab yalbàn, ale ngulàa xyàn lezo' mèn nación Israel. No mbyàn lezo' mèn gunèe mèn Pab. Sya, mtlo mèn, ngol' di's mèn di's loo Pab no asembli mèn mda' mèn xyàn lezo' Pab. No gunii mèn ngòc nguàal di's loo Pab. <sup>46</sup> Sya, ngòo valor loo Pab no loo Mbèl'. Ndxab Pab no Mbèl' loo mèn:

—Naquinque' ner ta' mèn cuent cón che'n di's ndac che'n Diox loo gu', gu' co' nac mèn nación Israel. Per chele' gu' indlya'ste gòna no indlide gu' cuent le' gu' ndxàalque' yòo ban no Diox thidtene, más quee lezo' nu' nda nu' loo mèn co' inacte mèn nación Israel par co nu' yalbàn cón che'n di's ndac che'n Diox loo mèn. <sup>47</sup> Tataa li nu' tac tataaque' mnibe' Tad Jesús loo nu' co'se' gunee Tad Jesús loo nu': Na tel' gu' ya gu' loo mèn co' inacte mèn nación Israel par gac gu' xal thib xni loo mèn par li gu' tyub xni yéc mèn no par tyub xni lezo' mèn loo cón chenen. No tel'en gu' par gac gu' mèn co' li par lyá' mèn co' naban axta lult ro izlyo' loo con' ryes por cón che'n di's ndac che'n Diox co' co gu' yalbàn loo mèn.

<sup>48</sup> Co'se' ngolo mbìn mèn co' inacte mèn nación Israel tataa ndxab Pab ryop Mbèl', mdyac tín' lezo' mèn. No mtlo mèn, mbez mèn loo xtàa mèn:

—¿Cón ndyac mèn nación Israel ba', yey? Huenque' nac di's ndac che'n Tad Jesús, ndyac na'.

Sya, ngola's ryete mèn co' mdoo lezo' Diox no co' mnibe' lezo' Diox par yòo ban no mèn Diox thidtene yiloa. <sup>49</sup> No tataa sate más ndxath no ndxèn cón che'n di's ndac che'n Diox le'n rye yèezya' co' nac làaz mèn par neda. <sup>50</sup> Per rye mèn nación Israel co'



nzo ban le'n ciuda Antioqui thidte mqueltàa par mdoodi's no mèn ndxep mèn got co' ngòc mèn co' ndli cas loo cón che'n Diox tiempa no co' ngòcguè' mèn got guryath no mèn got guryèn. No mdoodi's no mèn nación Israel ndxep mèn co' más mnibe' le'n ciuda Antioqui. No mbli mèn nación Israel par mbye'th yéc mèn no mbye'th lezo' mèn par tlo tub ngu's mèn ciuda Antioqui Pab no Mbèl', chele'i nzo mod, axta co' mèn Pab no Mbèl' loo mèn par neda. <sup>51</sup> Le' sya, co'se' mtlo mèn, mdub ngu's mèn Pab ryop Mbèl', mzib Pab ryop Mbèl' yòoya's co' ndoo nii cason Pab ryop Mbèl' xal thib se'n, co' nee di's, tolo tyub quì tyub bèel lezo' mèn no yan' cón che'n mèn loo Diox co'se' tub rez Diox cón che'n mèn. Ngoloa, mxen Pab ryop Mbèl' ned. Nda Pab ryop Mbèl' ciuda Icon. <sup>52</sup> Per mèn co' ngola's loo cón che'n Diox le'n ciuda Antioqui, anze'f ndyac lezo' mèn. No toloque' ñibe' Xpii Natú' loo mèn loo cón che'n Diox.

## 14

### *Pab ryop Mbèl' nda lo yalbàn loo mèn par ned le'n ciuda Icon.*

<sup>1</sup> Co'se' mzin Pab ryop Mbèl' ciuda Icon, ngòo Pab ryop Mbèl' le'n sinagog che'n mèn nación Israel co' nzo ban ciuda thib huiz sabd co' ngòc huiz descans tiempa. Mdoodi's Pab cón che'n di's ndac che'n Diox loo mèn axta mbli Pab par ngola's huax mèn loo cón che'n Jesucrist, le'le' ngola's huax mèn nación Israel no le'le' ngola's huax mèn co' inacte mèn nación Israel. <sup>2</sup> Per mèn nación Israel co' ne'ndalte ngala's loo cón che'n Jesucrist, mèn mbli par mbye'th yéc mèn no mbye'th lezo' mèn co' inacte mèn nación Israel par li mèn xtùuz con' ye'rsin' cón che'n mèn co' ndxàc hues por cón che'n Jesucrist. <sup>3</sup> No por ñee Pab ryop Mbèl' ngola's huax mèn loo cón che'n Jesucrist, mbyan' Pab ryop Mbèl' ciuda Icon le'n huax huiz. No sate más ndxòo valor loo Pab ryop Mbèl'. No sate más ndxàp Pab ryop Mbèl' yalxla's loo Tad Diox. No mbli' Diox loo mèn le' di's co' ngo Pab ryop Mbèl' yalbàn, co' nac di's co' ndlu' loo mèn con' co' angngro' lezo' Diox li Diox loo mèn, nac con' licpe'. Tac Diox mbli par ngòo Pab ryop Mbèl' con' la's nii Pab ryop Mbèl' no con' la's ya' Pab ryop Mbèl' par li Pab ryop Mbèl' huax se'n no huax yalguzye' loo mèn. <sup>4</sup> Per mèn ciuda Icon ngòc chop ned. Thib ned mèn nzo lad che'n mèn nación Israel. Le' tedib ned mèn na, nzo lad che'n myen' xin' mté'th Jesús co' ndxe' di's che'n Jesús. <sup>5</sup> Sya, mèn co' nac mèn nación Israel no mèn co' inacte mèn nación Israel thidte ngòc mèn no thidte mdoodi's mèn con mèn nac zin' yòolau par yecloo mèn no gab mèn ngòc nguàal di's loo Pab ryop Mbèl' no axta gaa'd quèe mèn Pab ryop Mbèl'. <sup>6</sup> Per co'se' mbìn Pab ryop Mbèl' tataa lya's mèn li no mèn Pab ryop Mbèl', ngua xon' Pab ryop Mbèl' par ned yèez Listr no par ned yèez Derb, co' nac yèezya' che'n làaz mèn licaon, no le'n taamas yèezya' co' nziri' par neda. <sup>7</sup> Le'n rye yèezya'a mque tee go Pab ryop Mbèl' yalbàn cón che'n di's ndac che'n Diox co' ndlu' xá mod lyá' mèn loo con' ryes.

### *Mèn yèez Listr mbuaa'd quèe Pab le'n huiza.*

<sup>8</sup> Le'n huiz co'se' ngo Pab le'n yèez Listr, mzyál' Pab thib mbi' co' yende mod ndee nii. Mdub mbi' par neda tac coj mbi' anon ngóol mbi'. No thidteneque' ne'ngácte mbi' ndee nii mbi'. <sup>9</sup> Mbi'a xèe mdub yòn xal nac di's co' mdoodi's Pab loo mèn. Le' Pab na, xèeguè' ngue hui' loo mbi'. No ñee Pab no mden' Pab le' mbi' ndxela's loo Diox le' Diox gác li par yac mbi'. <sup>10</sup> Sya, cabii ndxab Pab loo mbi':

—Goo too, ey. Fteyez niil.

Sya, chàa, nguát mbi'. Ngo too mbi'. No mtlo mbi', mdee nii mbi'. <sup>11</sup> Co'se' gunèe mèn yèez Listr con' mbli Pab loo mbi', mtlo mèn, cabii mbez mèn loo xtàa mèn di'stèe co' ndoodi's mèn che'n làaz mèn licaon. Ndxab mèn:

—Ryop mbi' ba' nac chop diox co' ñaa xal mèn co' ngulàa loo na'.

<sup>12</sup> Mbez mèn le' Mbèl' nac diox co' lèe Júpiter. Le' Pab na, mbez mèn nac diox co' lèe Mercur tac Pab nac mbi' co' más ndyoodi's. <sup>13</sup> Le' nguley' co' nzo le'n gudo' che'n dioxpe' mèn co' lèe Júpiter, co' nac gudo' co' ndub ro yèez Listr co'te' ndxòo mèn le'n yèeza, mbi'th loo Pab leque hora. Nde no nguley' ngon. No nde no nguley' girnald co'

natoxcua' con ye'. No nde no nguley' huax mèn co' mblya's tyub xib no co' mblya's còo' yéc loo Pab no loo Mbèl', no mblya's mèn guth mèn ngon par xo mèn ren loo izlyo' loo Pab no loo Mbèl'. <sup>14</sup> Per co'se' gunèe myen' co' ndxe' di's che'n Jesús, co' nac Pab no Mbèl', tataa ngue li nguley' no mènà, mbli Pab thib con' nalyat. Mched Pab xab Pab. No mched Mbèl' xab Mbèl' tac Pab ryop Mbèl' mda' cuent ilé'de nac co' ngue li mènà. Negadi's ngòo Pab ryop Mbèl' làth mènà. Cabii mbez Pab ryop Mbèl' loo mènà:

<sup>15</sup> —Ryete gu' co' nziri' trè', ¿chonon tatua' ngue li gu', yey? ¿Ché' iñeede gu' nu' nac mèn xalque' gu'? Ihuenta ngue li gu' tatua' loo nu', cara. Ndxé'leque', por cón che'n con' co' nac xal ndli gu' ba' nde nu' loo gu' par lu' nu' loo gu' ndxàal lá' gu' costumbr co' yende cón ndli no co' yende cón ntac loo Diox. Nde lu' nu' loo gu' más huen thib lite yòo gu' loo cón che'n thidte Diox co' naban, Diox co' mblec be', no co' ngue tèn' bé', no izlyo', no nítto', no rye loothe taamas con' co' nzo loo bé', no co' nzo loo izlyo', no co' nzo le'n nítto'. <sup>16</sup> Más póla, Diox mbla' mque tee ban mèn xal ngòc mod co' ngòp mèn cad nación mèn <sup>17</sup> mastale' mbli' Diox con' ndac co' ndli Diox loo mèn no ndlu' Diox loo mèn xal nac Diox por con' ndac co' ndli Diox loo mèn. Diox ndli ndlyàa yuu loo na' loo izlyo'. No ndli Diox nthop na' cosech loo izlyo'. No ndli Diox ndxàp na' con' ndxuhua na' axta plóthe. No ndli Diox par nda' na' gust lezo' na' loo izlyo'.

<sup>18</sup> Per mastale' tataa ndxab Pab ryop Mbèl' loo mènà che'n con' co' ngue li mènà loo Pab no loo Mbèl', añenti mbli Pab ryop Mbèl' par ne'ngla'de Pab ryop Mbèl' nguth mèn ngon par ngxo mèn ren ngon loo izlyo'. No par ne'ncòo'de mèn yéc mèn loo Pab ryop Mbèl' no par ne'tyub xibte mèn loo Pab ryop Mbèl'.

<sup>19</sup> Per leque le'n huiza mzin ndxep mèn nación Israel co' nzo ban le'n ciuda Antioqui co' nac ciuda che'n làaz mèn pisid, no mèn nación Israel co' nzo ban le'n ciuda Icon co' nac ciuda che'n làaz mèn galas. Rye mènà mquil' mèn yèez Listr par nguátbèe mèn yèez Listr par gaa'd quèe mènà Pab. Co'se' ngolo mbuaa'd quèe mènà Pab, mbli mènà cuent nguth Pab. Sya, mdo'f xax mèn Pab thib lad ro yèez Listr. <sup>20</sup> Per co'se' mqueltàa mèn co' ndxela's loo Pab co'te' ngua lobii mèn Pab ro yèez Listr, ngo che Pab. Ngòo Pab le'n yèez con mèn co' ndxela'sa co' nac mèn yèez Listr tedib vez. Co'se' ngo nii izlyo' tedib huiz co' nde nquea, ngro' Pab con Mbèl' le'n yèez Listr par nda Pab con Mbèl' tedib yèez co' lèe Derb.

<sup>21</sup> Co'se' ngolo mblo Pab ryop Mbèl' yalbàn che'n di's ndac che'n Diox co' ndlu' xá mod lyá' mèn loo con' ryes le'n yèez Derb, le'n yèeza anze'f thib mèn ngola's loo cón che'n Jesucrist. Ngoloa, mbere Pab, ndye'th Pab tedib vez par yèez Listr, no par ciuda Icon, no par ciuda Antioqui. <sup>22</sup> Par ned le'n yèeza no le'n ciudaa mbli Pab ryop Mbèl' par mbye'th lezo' mèn co' ndxela's loo Diox por cón che'n Jesús. No mco'x Pab ryop Mbèl' loo mènà leque mènà tolo li nèe mènà loo cón che'n Jesucrist co' ndxela's mèn. Mbez Pab ryop Mbèl' loo mèn par yòo mèn loo cón che'n Diox por cón che'n Jesús par ñibe' Diox loo mèn naquin tyactii mèn huax con' co' gac tub ngu's mèn ye'rsin' loo mènà por cón che'n Jesucrist. <sup>23</sup> No mbli Pab ryop Mbèl' par ngure thib ned mènngool co' tyoo ner no co' tyoo naa loo mèn co' nqueltàa loo cón che'n Diox chol lugar par le'n rye yèeza. No co'se' ngolo ngurez Pab Diox con Mbèl' no be' xlat Pab con Mbèl', mna'b Pab ryop Mbèl' loo Diox quenap Diox mènà tac mènà ngola's loo Diox por cón che'n Jesucrist.

*Pab con Mbèl' mbere ngòo ciuda Antioqui co' nac ciuda che'n làaz mèn sir.*

<sup>24</sup> Ngolo mblec Pab ryop Mbèl' mènngool loo mèn co' ndxela's par neda, mxen Pab ryop Mbèl' ned. Ngua riid Pab ryop Mbèl' par ned làaz mèn pisid. Mdoo Pab ryop Mbèl' ned axta mzin Pab ryop Mbèl' le'n yèezya' co' nac làaz mèn pamfil. <sup>25</sup> Ngua Pab ryop Mbèl' le'n thib ciuda co' lèe Perg. Mblo Pab ryop Mbèl' yalbàn cón che'n di's ndac che'n Diox loo mèn tya. Ngoloa, mbii Pab ryop Mbèl' ciuda Perg. Mxen ryop Pab Mbèl' ned. Ngua Pab ryop Mbèl' yèez Atal co' nac thib puert co' nziri' ro nítto' co' nac yèezya' che'n làaz mèn pamfil. <sup>26</sup> Tya ngòo Pab ryop Mbèl' le'n thib yòoyaa par mdoo Pab ryop Mbèl' loo nítto'. Ngua Pab ryop Mbèl' axta ciuda Antioqui co' nac làaz mèn sir co'te' ngurez mèn Diox, mèn co' ndyoo ner no co' ndyoo naa loo mèn co' nqueltàa loo cón che'n Diox ciuda

Antioqui. No mna'b mènà loo Diox quenap Diox Pab ryop Mbèl' ned ya Pab ryop Mbèl' loo zin' co' xo'f zin' Pab ryop Mbèl' cón che'n Diox. No nalle' mtelole' Pab ryop Mbèl' zin' co' mxo'f zin' Pab ryop Mbèl'. <sup>27</sup> Co'se' mzin Pab ryop Mbèl' ciuda Antioqui co'te' mqueltàa mèn co' ndxela's loo Jesucrist, mbli Pab ryop Mbèl' par mqueltàa ryete mènà. No mda' Pab ryop Mbèl' cuent loo mènà cón che'n ryethe con' mbli Diox loo mèn par ned ngua lo Pab ryop Mbèl' yalbàn. No mda' Pab ryop Mbèl' cuent xá mod mbli Diox par mxyal' ned mxyal' yó' loo mèn co' inacte mèn nación Israel par mdyal mènà ngola's mènà loo Jesucrist no loo cón che'n Jesucrist. <sup>28</sup> Ngoloa, mbyan' Pab ryop Mbèl' con mèn co' ndxela's le'n ciuda Antioqui le'n plá mbe'.

## 15

*Pab ryop Mbèl' mqueltàa no mènngool co' ndyoo ner no co' ndyoo naa loo mèn co' ndxela's le'n ciuda Jerusalén.*

<sup>1</sup> Le'n huiza ngro' ndxep mèn par ned le'n yèezya' che'n làaz mèn jude par ngua mènà ciuda Antioqui co'te' ngo Pab ryop Mbèl'. Mtlo mènà, mbli' mènà mèn co' ndxela's loo Diox por cón che'n Jesús, mèn co' nzo ban le'n ciuda Antioqui. Mbez mènà loo mèn: Par lyá' mèn loo con' ryes, naquin gác circuncidar mèn xalque' nac di's co' ndub loo ley co' mxo'f Moisés loo mèn axta pólle'a. <sup>2</sup> Láth tataaguè' ngue ñibe' mènà loo mèn co' ndxela's loo Jesucrist, mbli mènà par mcua'n mènà di's cón che'n Pab ryop Mbèl'. Por lult, leque mèn co' ndxela's ndxab naquin ya Pab ryop Mbèl' no ya plá mèn co' ndxela's làth mènà con Pab ryop Mbèl' axta ciuda Jerusalén par tyoodi's Pab ryop Mbèl' con mènà, no con myen' xin' mté'th Jesús co' ndxe' di's che'n Jesús, no con mènngool co' ndyoo ner no co' ndyoo naa loo mèn co' nqueltàa loo cón che'n Diox le'n ciuda Jerusalén cón che'n cón ndxác loo mèn co' ndxela's loo Diox por cón che'n Jesús.

<sup>3</sup> Sya, mtel' mèn co' ndxela's co' nzo le'n ciuda Antioqui mènà. No ned nda mènà nguri'th mènà par ned le'n yèezya' che'n làaz mèn fenis, no nguri'th mèn yèezya' che'n làaz mèn samari. Ndyoodi's mènà loo mèn par neda xá mod ngòca loo mèn co' inacte mèn nación Israel par mblá' mènà rye costumbr gox co' mque no mènà par ngòdo mènà loo cón che'n Diox. Le' sya, ryete mèn co' ndxác hues par neda anze'f ndyac lezo' co'se' mbìn mènà tataa mda' mèn co' mtel' mènà cuent, co' ngòc Pab ryop Mbèl' no mèn co' ngua no Pab ryop Mbèl'.

<sup>4</sup> Co'se' mzin Pab ryop Mbèl' no mèn co' nguaa ciuda Jerusalén, ryete mèn co' nqueltàa loo cón che'n Diox le'n ciuda Jerusalén, huen ngo lezo' mènà gunèe mènà Pab ryop Mbèl' con mèn co' ngua no Pab ryop Mbèl'. No huen ngo lezo' mèn co' ndxe' di's che'n Jesús no mènngool co' ndyoo ner no co' ndyoo naa loo mèn co' nqueltàa loo cón che'n Diox le'n ciuda Jerusalén. Sya, mda' Pab ryop Mbèl' cuent loo rye mènà cón che'n ryethe con' nde teele' mbli Diox loo mèn, por cón che'n Pab ryop Mbèl', ned ngua que tee Pab ryop Mbèl'. <sup>5</sup> Per làth mènà ngo ndxep mèn xley' farise co' ngola's loo Jesucrist no loo cón che'n Jesucrist. Mènà ngo too no gápleque' ndxab mènà:

—¿Xá mod ndlya's gu' yila's mèn di's co' mbez mèn ba'? Naquinque' gác circuncidar mèn co' ndxela's, mèn co' inacte mèn nación Israel, par gác mènà mèn co' ndxela'spe' loo cón che'n Diox. No nquin ñibe' na' loo mènà par toloque' li mèn xal ñibe' di's co' nac ley co' mxo'f Moisés loo na'.

<sup>6</sup> Sya, thidte mqueltàa rye myen' xin' mté'th Jesús co' ndxe' di's che'n Jesús con rye mènngool co' ndyoo ner no co' ndyoo naa loo mèn co' nqueltàa loo cón che'n Diox ciuda Jerusalén par li mènà xtùuz cón che'n cón ndxác. <sup>7</sup> Per co'se' ngolo nen ngure toodi's mènà cón che'n con'a, ngo too Pedr loo mènà. No ndxab Pedr:

—Gu' co' ndxác huesen por cón che'n Jesucrist, gu' non no nda'que' gu' cuent ndxàcle' tiemp Diox mcai daa no mblo' xà' Diox daa làth gu' par tan cuent cón che'n di's ndac che'n Diox co' ndlu' xá mod lyá' mèn loo con' ryes, mèn co' inacte mèn nación Israel par yila's mènà loo Crist xal ndxela's na'. <sup>8</sup> No Diox co' nanee xá nac lezo' rye mèn, Diox mbli' loo na' mdyalque' Diox no mda' Diox lugar yòdo mènà loo cón che'n Diox por mbli

Diox ngulaa Xpii Natú' loo na'. No ngòo Xpii Natú' loo na' par ñibe'pe' Xpii Natú' loo na'.<sup>9</sup> Diox ne'nnglide par más mdyu' na' loo Diox, na' co' nac mèn nación Israel, leque mèn co' inacte mèn nación Israel. No mtembii Diox xtùuz mèn no lezo' mèn por ngola's mèn loo Jesús no loo cón che'n Jesús.<sup>10</sup> Per nalle' ¿chonon ndxàc chop lezo' gu' loo con' co' mblile' Diox loo gu', à'? No ¿chonon ndlya's gu' ale ñibe' yèe gu' loo mèn co' ndxela'sa par li mèn preb li mèn con' ndlya's gu' co' nac xal thib yó' co' anze'f né' co' ne' xudgool gu' ne'nnglide gan ngli tataa? Yende xàa, cara. ¿Pà li gu'i xal ñibe' gu'!<sup>11</sup> Ndxé'leque', na' co' nac mèn nación Israel, na' ndxelà's le' na' mblyá'le' loo con' ryes ante por con' ndac co' angngro' lezo' Tad Jesús mbli Tad Jesús loo na'. Lomisque' mod ne, lyá' mèn loo con' ryes ante por con' ndac co' angngro' lezo' Tad Jesús mbli Tad Jesús loo mèn.

<sup>12</sup> Sya, ryete mèn xèe ngure. No mbyau' ro mèn. Ya yende chó di's tolo ngnii mèn. No xèe ngure mèn lath ngue ta' Mbèl' ryop Pab cuent cón che'n señ no yalguzye' co' mbli Diox por cón che'n Mbèl' ryop Pab loo mèn co' inacte mèn nación Israel ned ngua que tee Mbèl' ryop Pab.<sup>13</sup> Co'se' ngolo mdoodi's Mbèl' ryop Pab, Cob ndxab loo mèn:

—Gu' co' nac mèn huesen por cón che'n Jesucrist, bli gu' favor bin gu' di's co' tyoodizen loo gu':<sup>14</sup> Mon Pedr mda' cuent loo na' xá mod angngro' lezo' Diox par mtlo Diox, mcui Diox mèn co' inacte mèn nación Israel lath xtàa mèn par ngòc mèn mèn co' gac che'npe' Diox xal na'.<sup>15</sup> Con' co' mbli Dioxa thidte nac no thidte mbez con di's co' ndub loo libr co' gunii mèn co' mde'th di's co' ndxab Diox co' nac libr co' mque'guè' mèn ya's. Di'sa mbez taandxè':

<sup>16</sup> Co'se' yilo riid yaltii co' gac loo mèn nación Israel, beren, bequen mèn co' nac bin David tedib vez, mèn co' casque' ndoo lux. No lin le' ndxep mèn, co' be' mbyan' co' nac bin David, bere yar' tedib vez. No lin par gac mèn co' mbyan'a tedib nación co' gac thib nación roo no thib nación xèn.

<sup>17</sup> No lin con'a loo mèn nación Israel par gaca le' por cón che'n mèn nación Israel huax mèn co' inacte mèn nación Israel tyal gòn cuent cón chenen par yòo mèn loo cón chenen. No lin par gacguè' loo mèn rye nación dib athu loo izlyo', loo mèn co' cuez lèen, mèn co' daa ndxab nac mèn che'npe' daa.

<sup>18</sup> Aa, tataa ndxab Tad Diox, Diox co' mbli par mda' mèn cuent no par non mèn cón che'n con' co' angngro' lezo' Diox desde póla, co' ngue li Diox nalle'.

<sup>19</sup> Cona, ngue niin loo gu': Indxàalte li xol na' mèn co' inacte mèn nación Israel co' ngola's loo cón che'n Jesucrist no co' mblá'le' costumbr gox par yòo mèn loo cón che'n Diox.<sup>20</sup> Más huen que' na' thib cart loo mèn co' inacte mèn nación Israel co' ngola's par gab na' loo mèn ya yende chó mport nzo lezo' mèn par tolo tyoo mèn loo cón che'n con' zab co' nac cón che'n chol gunab no chol mdo'. No ta' na' cuent loo mèn ya ne'tolode li mèn yalburrid. Ne' ne' cua'n mèn xin' huan mèn. Ne' ne' hua mèn bél' má' co' ndxath co' ndryal dó' o má' co' mdí' dó' yen. Ne' ne' hua mèn ren má'.<sup>21</sup> Tac desde más pólle'a ngoque' mèn co' ngo yalbàn cón che'n di's ndac co' ndub loo ley co' mxo'f Moisés loo mèn. Leya ndlab mèn le'n sinagog cad huiz sabd co' nac huiz descans.

<sup>22</sup> Sya, myen' xin' mté'th Jesús co' ndxe' di's che'n Jesús, no mængool co' ndyoo ner no co' ndyoo naa loo mèn co' nqueltàa loo cón che'n Diox, thidte mnibe' lezo' con rye mèn co' nqueltàa loo cón che'n Diox par cui mèn plá mèn co' ndxela's lath mèn par ya no mèn Pab ryop Mbèl' axta ciuda Antioqui.

Sya, mda' mèn lèe Jud co' ne' tedib lèe Barsabás no mda' mèn lèe tedib mbi' co' lèe Sil co' ngòc thib mbi' roo mbi' xèn lath mèn co' ndxàc hues por cón che'n Jesucrist par ya no mèn Pab ryop Mbèl'.<sup>23</sup> Sya, mtocua' mèn cart. Mtel' mèn cart con Pab ryop Mbèl'. Loo carta mtel' mèn di's co' mbez taandxè':

—Nu' co' nac myen' xin' mté'th Jesús co' ndxe' di's che'n Jesús, no nu' co' nac mængool co' ndyoo ner no co' ndyoo naa loo mèn co' nqueltàa loo cón che'n Diox par nedrè', no nu' co' ndxàc hues gu' por cón che'n Jesucrist, ryete nu' ngue nii Diox loo gu' co' inacte mèn nación Israel, gu' co' nac hues nu' por cón che'n Jesucrist, gu' co' naban le'n ciuda Antioqui no gu' co' naban par ned le'n chol yèezya' che'n làaz mèn sir no làaz mèn cilis.

<sup>24</sup> Nu' mbìn ngro' ndxep mèn par nedrè'. Mèna mbi'th loo gu' co'te' nzo gu' trè'. Nu' ne'ntel'te mèna par mbi'th mèn loo gu'. Mèna ngue li xol gu' nalle' con di's co' nco'x mèna loo gu'. No ndlya's mèna gac gu' chop loo chop la's loo cón che'n Diox. Mbez mèna loo gu' gac circuncidar gu'. No mbez mèna naquinque' tolo tyubdi's gu' xal ñibe' ley co' mxo'f Moisés loo nu' póla. <sup>25</sup> Cona, thidte gunii nu' no thidte ngòc nu' par mdoodi's nu' más huen cui nu' plá mèn no ta' nu' lèe ndxep mèn co' nzo làth nu' par yi'th nee mèn gu' par ned nzo gu' ndxè'. Mèna thidte ya no Mbèl' no Pab, co' ndxàc hues nu', co' anze'f nque' lezo' nu'. <sup>26</sup> Gu' nda'que' cuent no naneeque' gu' le' loo Pab ryop Mbèl' ndxàcque' con' ryes loo par ned ngue tee Pab ryop Mbèl' por cón che'n Tad Jesucrist na'. <sup>27</sup> Por cona, ngue ta' nu' cuent loo gu' le' nu' tel' Jud no Sil con taamas mèn par yi'th toodi's no Jud ryop Sil gu' par ta' Jud ryop Sil cuent loo gu' cón che'n ryethe con' ndxàc loo nu', no con' co' mdoo lezo' nu', no con' co' mnibe' nu' loo lezo' nu' par ryo looi loo na'. <sup>28</sup> Tac por part che'n Xpii Natú' no por part che'n nu', indlya'ste nu' ñibe' yèe nu' loo gu' nec thib con' co' inquinte li yèe gu' xal nac co' ngue bez nu' loo gu' ndxè': <sup>29</sup> Con' co' ngue bez nu' loo gu' loo cart ndxè' nac: Ne'huade gu' bél' má' co' ndxuth mèn par nxo mèn ren má' loo izlyo' loo chol mdo'. Lomisque' ne, ne'huade gu' ren chol má'. Ne' ne' hua gu' bél' má' co' ndxath co' ndryal dó'. Ne' ne' cua'n gu' xin' huan gu'. Ne' ne' li gu' yalburrid. Chele' gu' ndyubdi's par ne'lide gu' ryete con' ndxè', huenque' nac co' ngue li gu'. Con' ndxè'te nac di's co' ngue tel' nu' loo gu'. Diox li gac con' ndac loo gu' par ned nzo gu' ndxè'.

<sup>30</sup> Sya, mxen Pab ryop Mbèl' ned con Jud no Sil no con taamas mèn. Nda ryete xa' axta ciuda Antioqui. Tya, mbli Pab ryop Mbèl' par mqueltàa rye mèn co' nqueltàa loo cón che'n Diox. Mda' Pab ryop Mbèl' cart loo mèna. <sup>31</sup> Co'se' mblab mèn co' ndxàc hues por cón che'n Jesucrist carta, anze'f mdyac lezo' mèna. No axta gust mbyan' lezo' mèna por di's co' mdub loo cart co' mtegan lezo' mèna. <sup>32</sup> No com le' Jud no Sil nac mèn co' nde'th di's co' ndxab Diox, ¿lé?, mbli Jud ryop Sil par mtegan Jud ryop Sil lezo' mèna. No mbli Jud ryop Sil par ndye'th lezo' mèna con di's co' mdoodi's Jud ryop Sil loo mèna. <sup>33</sup> Per co'se' ngolo nguri'th plá huiz ngo Jud no Sil no taamas mèn ciuda Antioqui, mbii Jud con taamas mèn co'te' nqueltàa mèn co' ngòo loo cón che'n Diox. Gunii mèna Diox loo Jud no loo taamas mèn co' mbii no Jud. Ndxab mèna loo Jud no loo taamas mèn:

—Ndlya's nu' yo nagàl lezo' gu' axta zin gu' loo mèn hues na' co' mtel' gu', ndee gu'.

<sup>34</sup> Per Sil mnibe' lezo' yan' no Sil Pab no Mbèl' le'n ciuda Antioqui. <sup>35</sup> Sangmbyan' Pab ryop Mbèl' Antioqui, ne. No huax mèn mqueltàa no Pab ryop Mbèl' par ya lo mèn yalbàn cón che'n di's ndac che'n Tad Diox.

*Pab mtlo, tedib vez nda lo Pab yalbàn loo mèn huax lugar.*

<sup>36</sup> Co'se' ngolo nguri'th plá huiz, ndxab Pab loo Mbèl':

—Nda na' tedib vez par ya tee hui' na' máa mèn co' ndxàc hues na' por cón che'n Jesucrist le'n rye ciuda co'te' ngua lole' na' yalbàn cón che'n di's ndac che'n Tad Diox par ñee na' xal nziri' mèn co' ndxàc hues na' por cón che'n Jesucrist par neda.

<sup>37</sup> Mbèl' mblya's nghue' Juàn co' ne' tedib lèe Marc. <sup>38</sup> Per Pab ne'ndalte nga Juàn Marc con Mbèl' ryop Pab tac Juàn Marc mblá' Pab ryop Mbèl' par ned yèezya' che'n làaz mèn pamfil no ne'ngade Juàn Marc par nxo'f zin' Juàn Marc zin' cón che'n di's ndac con Pab no Mbèl'. <sup>39</sup> Anze'f mbyol' di's Pab con Mbèl' par xà' ya Pab no xà' ya Mbèl'. Sya, mnibe' lezo' Mbèl' mbe' Mbèl' Juàn Marc. Ngòo Mbèl' loo yòoyaa. Nda Mbèl' loo yòo biiz co' lèe Chipr co' nzo le'n nítto'. <sup>40</sup> Látha, mdoo lezo' Pab. Mnibe' Pab lezo' Pab mcui Pab Sil. Co'se' ngolo mxo'f mèn ya' mèn yéc Pab no yéc Sil no ngurez mèn Diox cón che'n Pab ryop Sil par angryo' lezo' Diox gac con' ndac loo Pab ryop Sil ned ya Pab ryop Sil, sya, mxen Pab ned, nda Pab con Sil. <sup>41</sup> Ned nda Pab, nguri'th Pab ryop Sil par ned le'n yèezya' che'n làaz mèn sir no par ned le'n yèezya' che'n làaz mèn cilis. Mbli Pab ryop Sil par ndye'th lezo' mèn co' ndxàc hues por cón che'n Jesucrist co'te' nqueltàa mèn loo cón che'n Diox le'n rye yèezya'a.



## 16

*Ngo thib mbyòo co' lèe Timote co' mque tee lyath no Pab ryop Sil.*

<sup>1</sup> Pab ryop Sil mzin le'n yèez co' lèe Derb no le'n yèez co' lèe Listr. Tya mzyál' Pab ryop Sil thib mbyòo co' ndxela's loo Crist no loo cón che'n Crist. Mbyòoa lèe Timote. Nac mbyòo xgan' thib xa'got che'n mèn nación Israel co' ndxela's loo Crist, ne. Per mbi' co' nac xud mbyòo ngòc mèn nación Grieg. <sup>2</sup> Mèn hues co' ndxela's loo cón che'n Jesucrist co' naban yèez Listr no co' naban le'n ciuda Icon huenque' nda' cuent cón che'n mbyòo co' lèe Timote. <sup>3</sup> Pab mblya's le' Timote que tee lyath no Pab ned ya Pab. Sya, mbli Pab ngòc circuncidar Timote par ne'yecloodè mèn nación Israel co' nzo ban par neda ñèe mèn Timote con Pab. Tac ryete mèn nanee le' xud Timote ngòc mèn nación Grieg. <sup>4</sup> No co'se' ndrith Pab le'n yèez no le'n ciuda par neda, mda' Pab cuent loo mèn hues co' ndxela's loo Diox por cón che'n Jesús par neda cón che'n con' co' mnibe' myen' xin' mté'th Jesús co' ndxe' di's che'n Jesús, no mèngool co' ndyoo ner no co' ndyoo naa loo mèn co' ndxela's co' nzo ban le'n ciuda Jerusalén. <sup>5</sup> No tataa mod sate más ndxela's ryete mèn co' ndxela's par neda leque mèn ndli nèe mèn par más ndxela's mèn loo Crist. No sate más huiz con huiz nzi queltàa mèn no nzi yar' mèn loo cón che'n Jesucrist.

*Loo Pab mxyo'f loo cón che'n thib mbi' co' ngòc mbi' gulàaz che'n làaz mèn macedon.*

<sup>6</sup> Láth mque tee no Pab Sil no Timote par neda, Xpii Natú' che'n Diox ne'nda'de lugar par ngo Pab yalbàn loo mèn gulàaz che'n làaz mèn asia. Por cona, mxen Pab ned con Sil no Timote. Sangnguri'th Pab no Sil con Timote par ned le'n yèezya' co' nac yèezya' che'n làaz mèn frig no co' nac yèezya' che'n làaz mèn galas. <sup>7</sup> Ndoò Pab no Sil no Timote ned axta mzin yon myen' loo ray che'n mèn co' nac che'n làaz mèn mis. Tya mbli yon myen' xtùuz yòo myen' le'n yèezya' che'n làaz mèn bitañ. Per Xpii Natú' che'n Tad Jesús ne'ngla'de ngli myen' tataa. <sup>8</sup> Sya, sangnguri'th yon myen' thib lad ro xyòn mèn co' nac che'n làaz mèn mis axta mzin myen' thib puert co' lèe Tro. <sup>9</sup> Tya mxyo'f loo thib con' loo Pab làth mcal' thib yál' le'n huiza. Láth con' co' mxyo'f loo Paba, mxac Pab le' thib mbi' co' nac mèn yèezya' che'n làaz mèn macedon ndoo loo Pab. Nalyat mna'b mbi' loo Pab. Mbez mbi': Pab, de par ndxè' co' nac ned làaz mèn macedon ndxè' par lyath no gu' nu', yey.

<sup>10</sup> Texal mxyo'f loo mbi' che'n làaz mèn macedon loo Pab, luega tedib huiz co' nde nquea, mbli nab nu' che'n nu' par tyen nu' ned, ya nu' par ned làaz mèn macedon tac, lìcque', ngòca le' Diox mbli loo nu' par ya lo nu' yalbàn cón che'n di's ndac co' ndlu' xá mod lyá' mèn loo con' ryes loo mèn par neda, ne.

*Pab ryop Sil ngua lo yalbàn loo mèn le'n ciuda Filip.*

<sup>11</sup> Luega ngòo nu' loo yòoyaa co'te' nac puert Tro. Tya thib lite mxyo'f nu' loo nít par mzin nu' loo yòo biiz co' lèe Samotras co' nziri' le'n níttó'. Tedib huiz co' nde nquea, mzin nu' puert co' lèe Neapol. <sup>12</sup> Tya mxen nu' ned. Mzin nu' ciuda Filip. Ciuda Filipa nac thib ciuda che'n mèn nación Ital. No nac ciudaa más ciuda roo ciuda xèn co' nziri' loo rye yèezya' co' nac che'n làaz mèn macedon par neda. Ngo nu' tya pláte huiz. <sup>13</sup> Co'se' ngòc thib huiz sabd co' nac huiz descans, ngro' nu' thib lad ro ciuda gaxte co'te' ndrith thib yó'be' co'te' ngòc thib lugar co'te' nqueltàa mèn nación Israel co' ngo ban ciuda Filip par mbez mèn Diox. Tya, ngure ndub nu' par mblo nu' yalbàn che'n di's ndac che'n Diox loo mèngot co' mqueltàa tya. <sup>14</sup> Thib xa'got co' ngo làtha ngro' lèe Lid. Ngòc xa'gota mèn ciuda Tiatir. Ntho' xa'gota lar' fin co' nac color morad. Xa'gota nac xa'got co' ndyub xib no co' ncòo' yéc loo Diox. Xa'gota más mdub yòn di's co' ngue go Pab yalbàn. Látha, Diox mbli par tolo nguaa'd di's le'n lezo' xa'gota. No mdyub xnii yéc xa'gota no mdyub xnii lezo' xa'gota par huen huen mdub nza xa'gota di's co' ngue go Pab yalbàn. <sup>15</sup> Xa'gota luega ngola's di's ndac che'n Diox co' mblo Pab yalbàn. No luega mbli xa' par ngòc bautizar xa' con mèn guliz xa' co' ngola's. Ngoloa, nalyat gunee xa' loo nu':

—Chele' gu' nda' cuent co' huenleque', lìcque', nac daa thìb xa'got co' ndxela's loo Tad Jesús, ya' gu' nda na' lizen par yan' gu' lizen.

No negadi's mnibe' xa' loo nu' par mbyan' nu' liz xa'.

<sup>16</sup> Ngòc thìb con' loo nu' thìb vez co'se' nda nu' leque ro yó'be' co'te' nqueltàa mèn naciòn Israel par mbez mènà Diox. Mzyál' nu' thìb mza' co' nquée mbii yéc, co' nac mbii che'n xpìi ye'rsin' co' ndli ndxác mza' ndli mza' divin. Mza'a ngòc thìb moz che'n thìb patròn co' ñibe' yèe loo mza'. No anze'f thìb tmi ndli mza' gan por ndli mza' divin. Per tmi co' ndli mza' gana ndxác che'n patròn mza'. <sup>17</sup> Mza'a sangmdoo nque xís nu' no xís Pab. No mtlo mza', mbez yèe mza'. Mbez mza':

—Mènbi' ndxè' nxo'f zin' cón che'n Diox co' nac thidte Diox roo Diox xèn no ngue te'th mènbi' ndxè' loo gu' xá mod lyá' gu' loo con' ryes.

<sup>18</sup> Mbli mza' con'a le'n huax huiz axta, por lult, mbli mza' ngo tac lezo' Pab por con' ndli mza' loo nu'. Sya, mbere Pab par ned xís Pab. Ndxab Pab loo xpìi ye'rsin' co' nzo loo mza'a:

—Por cón che'n con' roo con' xèn co' nzo la's nii Jesucrist no co' nzo la's ya' Jesucrist, na ñibe' lool, xpìi ye'rsin' co' nzo loo mza', gro' loo mza' ba'.

Leque hora, ngro xpìi ye'rsin'a loo mza'.

<sup>19</sup> Per co'se' ñèe patròn mza' le' mza' ya inclide divin, no no pá ngua tub lezo' patròn mza' tac ya yende mod li mza' gan tmi par gác che'n patròn tmi. Sya, mnibe' patròn mza' mxen mèn Pab ryop Sil. Mbe' patròn Pab ryop Sil loo mèn nac zin' yòlòu co'te' nac merpe' oficin che'n mèn nac zin' co' ñibe' loo ciuda Filip. <sup>20</sup> Mbe' patròn mza' no mènà Pab ryop Sil loo mèn co' nac juez. Ndxab patròn mza' loo juez:

—Mènbi' co' nac mèn naciòn Israel ndxè' anze'f thìb di's ngue xít too ciuda na' no ngue cua'n mèn ndxè' di's làth mèn ciuda na' ndxè'. <sup>21</sup> No ngue lu' mèn ndxè' thìb mod no thìb costumbr cub co' yende mod té'th na' li na'. Gu' naneeque' le' mèn ciuda Rom ñibe' loo na' no ¿xá mod té'th na' li na' costumbr cub ba'?

<sup>22</sup> Sya, nguátbèe mèn par tyen mèn Pab ryop Sil. Sya, mnibe' juez loo mènà teche mèn Pab ryop Sil par ta' mèn che'n Pab ryop Sil con var. <sup>23</sup> Ngolo mda' mèn che'n Pab ryop Sil axta plóthe ngro xyàn lezo' mèn, mque' mèn Pab ryop Sil lezi'f. No mnibe' mèn loo mbi' co' nquenap ro lezi'f huen huen nquenap mbi' Pab ryop Sil le'n lezi'f. <sup>24</sup> Co'se' mbìn mbi' co' nquenap ro lezi'f di's co' mnibe' mèn loo mbi', mxen mbi' Pab ryop Sil. Mblo mbi' Pab ryop Sil axta lult le'n co' nac le'n lezi'f no mblo mbi' nii Pab ryop Sil le'n thìb ye'r co' nzi'f lad yaa co' lèe cep.

<sup>25</sup> Per co'se' nde zinle' gáal hor ngulal yál' yál'a, hora ngue bez Pab ryop Sil Diox no mbil' ro Pab ryop Sil himn loo Diox. Le' taamas pres co' nzo lezi'f na, xèe nque' nza pres xal ngue bez Pab ryop Sil Diox no xal ndxol' ro Pab ryop Sil himn, ne. <sup>26</sup> Leque hora, chàa, mbuin thìb xòo brut co' mbli axta mblyé' cimient che'n ftoo lezi'f. No leque hora mxyal' puert lezi'f no mxyac caden co' natedó' ya' no nii rye pres le'n lezi'f. <sup>27</sup> Látha, ngro' mcal' loo mbi' co' nquenap ro lezi'f. Co'se' gunèe mbi' ndoo xal' ro puert lezi'f, mblo' mbi' spad co' ngue rlan' mbi' par leque mbi' guth mbi' tac mbli mbi' xtùuz le' ryete pres mxon'le' le'n lezi'f. <sup>28</sup> Per Pab ngrozèe. Ndxab Pab loo mbi':

—Mbi', ne'guthte lùu leque lùu. Ne'tyóodel. Ryete nu' nzoque' trè'.

<sup>29</sup> Sya, mna'b mbi' ye'rbèel loo taamas mèn co' ndlyath no mbi'. Mque' mbi' carre. Ngòo mbi' le'n lezi'f. No ante nxi'th mbi' tant mzyeb mbi'. Sya, mdub xib mbi' loo Pab no loo Sil. <sup>30</sup> Leque hora mblo' mbi' Pab no Sil le'n lezi'f. No mnibdi's mbi'. Ndxab mbi' loo Pab no loo Sil:

—Tad Pab no Tad Sil, ¿cón ndxàal lin par lyá' daa loo con' ryes, yey?

<sup>31</sup> Pab ryop Sil mcàb. Ndxab Pab ryop Sil loo mbi':

—Pues, con' ndxàal li ryete gu' nac: Gola's gu' loo Tad Jesucrist no loo cón che'n Tad Jesucrist. Sya, tataa mod lyá'l loo con' ryes con mèn gulizl.

<sup>32</sup> Sya, mblo Pab yalbàn loo mèn guliz mbi' co' mqueltàa ro lezi'f yál'a. No mda' Pab ryop Sil cuent cón che'n di's ndac che'n Diox loo mèn guliz mbi' leque hora. <sup>33</sup> No leque

hora leque mbi' mtech lad Pab ryop Sil co'te' mtehuí' mèn con var co'se' mda' mèn che'n Pab ryop Sil. Ngoloa, ngòc bautizar mbi' con rye mèn guliz mbi'. <sup>34</sup> Ngolo ngòc bautizar mbi' con rye mèn guliz mbi', mbye' mbi' Pab ryop Sil par liz mbi' par mda' mbi' co' nduhua Pab ryop Sil. Le' mbi' con mèn guliz mbi' na, anze'f mdyac lezo' tac ngola's ryete mèn guliz mbi' loo Jesucrist no loo cón che'n Jesucrist.

<sup>35</sup> Per xtil'a, tatabe' ñaa mbe'th izlyo', ngua lo mbi' Pab ryop Sil lezi'f tedib vez. Mbli mbi' xal mèn co' ne'ñeede. No más nde quée huiz xtil'a, mtel' juez polesi, co' nac myen' nac zin', loo leque mbi' co' nquenap ro lezi'f par gab myen' nac zin' loo mbi' co' mbi' Pab ryop Sil le'n lezi'f. <sup>36</sup> Sya, ndxab mbi' loo Pab:

—Juez mnibe' loon par go'en gu' le'n lezi'f. Nase yende chó xtùuz li gu'. Nzoque' mod bii gu'. No yende chó li xol loo gu'.

<sup>37</sup> Per Pab ndxab loo polesi co' nac myen' nac zin':

—Ne'biide nu'. Nu' nac mèn che'n ciuda Rom che'n nación Ital. No ná'a mnibe' juez loo mèn mtin mèn nu' loo xnaa axta mbyan' gust lezo' mèn. Ngoloa, sangmbli juez mandad mque' mèn nu' lezi'f. Ne' ne' tar tub rez juez cón che'n nu'. No tataa mnibe' juez mbli no mèn nu'. No ¿nalle' ndlya's juez xexte bii nu', cà'? Yende xaa. ¿Pà bii nu' xexte! Nalle' guuz gu' loo juez yi'th lo' yub juez nu' lezi'f.

<sup>38</sup> Sya, ndyàa myen' nac zin'. Ngua ta' myen' cuenta loo mèn co' nac juez. Per ryete mèn co' nac juez mzyeb co'se' mbìn mènà ndxab polesi le' Pab ryop Sil nac mèn ciuda Rom che'n nación Ital. <sup>39</sup> Sya, que nzo ne'ñee lezo' mèn co' nac juez, nado' di's nado' cuent ngua na'b mènà loo Pab teri'th tecan' Pab con' ye'rsin' co' mbli no mèn Pab ryop Sil. Ngoloa, mblo' mènà Pab ryop Sil le'n lezi'f. No nalyat ndxab mèn loo Pab no loo Sil li Pab ryop Sil favor bii Pab ryop Sil le'n ciuda Filip. <sup>40</sup> Texal ngolo ngro' Pab ryop Sil lezi'f, ngua Pab ryop Sil liz Lid. Le'pe' nzo mèn co' ndxela's co' ndxàc hues por cón che'n Jesucrist. Mzyál' Pab ryop Sil mènà liz Lid. Ngolo mdoodi's no Pab ryop Sil ryete mèn co' ndxàc hues por cón che'n Jesucrist no mbli Pab ryop Sil par tolo ndye'th lezo' mènà loo cón che'n Jesucrist, mxen Pab ryop Sil ned. Mbii ryop Pab Sil ciuda Filip.

## 17

### *Mèn ciuda Tesalónica nguátbèe contra Pab.*

<sup>1</sup> Co'se' mdoo Pab ned nda Pab ryop Sil, ngua riid Pab ryop Sil le'n thib yèezya' co' lèe Amfip, no nguri'th Pab ryop Sil le'n thib yèezya' co' lèe Ampoloñ. Ngoloa, mzin Pab ryop Sil ciuda Tesalónica. Le'n ciuda Tesalónica ndub thib sinagog che'n mèn nación Israel co' naban le'n ciuda Tesalónica. <sup>2</sup> Sya, cad xon huiz co' nac huiz descans, ndyee Pab ryop Sil co'te' ndub sinagog mèn nación Israel xalque' nac mod co' ngue no Pab ryop Sil. Mdoodi's no Pab mèn le'n sinagog le'n son sman. <sup>3</sup> Nambii mda' Pab cuent loo mèn xal ndub di's co' ndub loo libr co' nac xti's Diox le' Crist mquinque' mxactii. No co'se' ngolo nguth Crist, mquinque' ngro xban Crist. Mbez Pab loo mèn, ne:

—Leque cón che'n yub Jesús, co' ngue tan cuent loo gu' nalle' nac cón che'n Crist tac Jesús nac Crist.

<sup>4</sup> Co'se' mbìn mèn nación Israel di's co' mblo Pab yalbàn, ngola's mèn loo cón che'n Crist. No thidte mqueltàa mèn con Pab ryop Sil. Ngola's huax mèn grieg co' ndyub xib no co' ncòo' yéc loo Diox. Ngola's huax mèngot co' más nxyo'f lèe no nxyo'f xti's làth mènà no co' más ndyu' làth mènà, ne, loo cón che'n Crist. <sup>5</sup> Co'se' ñèe taamas mèn co' nac mèn nación Israel ndxela's huax mèn loo cón che'n Jesucrist, ngòo xyàn lezo' mènà no mbyan lezo' mènà. Mbli mènà mandad par mdyop ndxep mènbi' ye'rsin' co' angnzi teexù' le'n ciuda. Mbli ryete mènà par ngo too di's làth mèn le'n ciuda. Mbli mènà ngòc nguàal con' liz Jasón tac mbli mènà xtùuz liz Jasón nzo casloo Pab ryop Sil. Mblya's mèn ngo' mèn Pab ryop Sil tya par ta'xù' mènà Pab ryop Sil loo xtàa mèn par guth mèn Pab ryop Sil. <sup>6</sup> Per mastale' ngua cua'n mèn Pab ryop Sil liz Jasón, ne'ngzalte mènà Pab ryop Sil liz Jasón. Ale le'le' Jasón mdo'fxax mènà. Mbe' mènà Jasón loo mèn nac zin' co' nac

mèn nac zin' che'n ciuda Tesalónica. Mbe' mènà ndxep mèn co' ndxàc hues por cón che'n Jesucrist loo mèn nac zin', ne. No mbez yèe mènà. Mbez mènà:

—Mèn ndxè' nac mèn co' ngue li ngòc nguàal con' dib athu loo izlyo'. Nalle' nde mèn ndxè' axta par nedrè', ne. <sup>7</sup> No nde nxon', mda' Jasón liz Jasón par nguled mèn. Ryete mèn co' ndxela's xal ndxela's mèn ba' mbixyath. Ya indlide mèn ba' cas xal nac di's co' ndub loo ley che'n gobiern co' ñibe' mèn ciuda Rom che'n nación Ital. No más de cona, mbez mèn ba' nzo tedib rey co' más ñibe' loo mèn. Reya mbez mèn ba' lèe Jesús.

<sup>8</sup> Texal mbìn mèn nac zin' di'sa, no mèn co' mqueltàaa, nguátbèe mènà contra mèn co' ndxela's loo cón che'n Crist. <sup>9</sup> Per Jasón no taamas mèn co' ndxàc hues por cón che'n Jesucrist mdoo thìb mbi' par gunii mbi'a por cón che'n Jasón, no cón che'n mèn co' ndxàc hues por cón che'n Jesús, par mblá' mènà Jasón no mèn co' ndxàc hues. Sya, mbla' mèn nac zin' ndyàa Jasón con mèn co' ndxàc hues por cón che'n Jesucrist.

*Pab ryop Sil ngo le'n thìb yèez co' lèe Berea.*

<sup>10</sup> Luega hora, mèn co' ndxàc hues por cón che'n Crist mbli par mbii Pab ryop Sil le'n ciuda Tesalónica leque yál'a. Nda Pab ryop Sil par thìb yèez co' lèe Berea. Luega tedib huiza ngua Pab ryop Sil sinagog che'n mèn nación Israel co' nzo ban le'n yèeza. <sup>11</sup> Mèn nación Israel co' nzo ban le'n yèez Berea ngòc más mèn nado' leque mèn nación Israel co' nzo ban le'n ciuda Tesalónica. Mèn nación Israela dib nzo yéc no dib nzo lezo' mdyal mènà mbìn mènà di's cón che'n di's ndac co' mblo Pab yalbàn. No atate huiz mcua'n mènà di's loo libr co' nac xti's Diox par li la's mènà ñeene' ché', lïcque', nac di's co' ngo Pab yalbàn loo mènà. <sup>12</sup> Pues, huax mèn ngola's loo cón che'n Jesucrist por mbli la's mèn lïcque' nac di's co' ngo Pab yalbàn. No leque tiempa, ngola's huax mèn nación Grieg co' nac mèn yèez Berea no ngola's mèngot co' ndyu' loo mèn no ngola's mènbi' co' ndyu' loo mèn, ne. <sup>13</sup> Per co'se' mbìn mèn nación Israel co' nzo ban ciuda Tesalónica le' Pab ngue go yalbàn co' nac di's ndac che'n Diox loo mèn yèez Berea, ngua li mèn nación Israel par ngòc ngòc nguàal di's loo mèn yèez Berea par nguátbèe mèn yèez Berea contra Pab ryop Sil. <sup>14</sup> Per mèn co' ndxàc hues por cón che'n Crist lueg lueg mtel' Pab par ya Pab par cost, co' nee di's, par ned ro nítto'. Le' Sil ryop Timote na, mbyan' yèez Berea. <sup>15</sup> Mèn co' ndxàc hues por cón che'n Jesús co' mblyath no Pab par nda Pab par cost, mènà mbe' Pab axta ciuda Aten. Lueg mbere mènà, ndye'th no mènà di's co' ndxab Pab loo mènà par ta' mènà cuent loo Sil no loo Timote par ya sál' Sil ryop Timote Pab le'n ciuda Aten. No luega tyee Sil ryop Timote xal ta'i lugar loo Sil ryop Timote.

*Pab nzo le'n ciuda Aten.*

<sup>16</sup> Láth ngue bed Pab zin' Sil no Timote le'n ciuda Aten, anze'f nxi lezo' Pab no imbe see teede lezo' Pab por ñèe Pab anze'f thìb mdo' no gunab ngue no mèn ciuda Aten. <sup>17</sup> Por cona, mdoodi's no Pab mèn co' nac mèn nación Israel le'n sinagog mènà. No ndyoodi's no Pab mèn co' ndyub xib no co' ncòo' yéc loo Diox. No atate huiz ndryo' Pab par ndyoodi's no Pab mèn loo xbi', mèn co' nzyál' Pab par neda. <sup>18</sup> Ngo ndxep mèn co' mbli stud cón che'n thìb xley' co' ngòc xley' che'n thìb mbi' co' ngro' lèe Epicur no taandxep mèn co' mbli stud cón che'n thìb xley' co' ngòc xley' che'n thìb mbi' co' ngro' lèe Stoic. Mènà mtlo mdoodi's no xtàa mènà cón che'n Pab. Ndxab ndxep mènà loo xtàa mènà cón che'n Pab:

—Nda toodi's no na' mbi' ba' ñeene' cón ñee mbi' loo na'. Mbi' ba' axta arid ndyoodi's. Taandxep mènà mbez:

—Ndyac na' mbi' ba' ndyoodi's cón che'n tedib Diox co' tarte libe' na'.

Tataa mbez mènà tac Pab ngo yalbàn cón che'n di's ndac co' nac co' ndlu' cón che'n Jesús. No ngo Pab yalbàn le' mèn co' nguth ryo xban. <sup>19</sup> Sya, mbe' mènà Pab thìb lugar co' lèe Areopag co'te' mque no mènà costumbr par queltàa mèn par co'x mènà loo xtàa mènà no tub rez mèn cón che'n con' roo con' xèn co' ndxàc loo xtàa mèn no làth xtàa mèn. Tya, mnibdi's mènà loo Pab. Ndxab mènà:

—Mbi', ¿ché' nzo mod gòn nu' cón che'n di's cub co' ndyoodi'sl loo mèn ba' par ta' nu' cuent xá naca, à'? <sup>20</sup> Tac di's co' ndyoodi'sl loo mèn tarte gòn nu' di's ba' thidtene. Cona, ndlya's nu' ta' nu' cuent cón nee ryethe di's co' ndyoodi'sl ba'.

<sup>21</sup> Tataa ndxab mènna loo Pab tac mèn co' nac mèn ciuda Aten no taamas mèn tith co' nzo ban le'n ciuda Aten, mènna yende chó zin' ndli. Ante nzi mènna par gòn mènna chol di's co' ndxòn mèn ndyoodi's tedib mèn no par gòn mènna cón che'n chol con' cub co' ndxàc.

<sup>22</sup> Sya, mdoo Pab loo mèn lugar co'te' lèe Areopag. Ndxab Pab loo mènna:

—Mèn ciuda Aten, ngüi'en no ndan cuent axta arid mènley' nac gu' loo chol con' co' mbez gu' nac Diox. <sup>23</sup> Tac co'se' mque tee'en le'n ciuda gu', huax con' gunèelen xá ndxác gu' ndli gu' cas loo huax con' co' mbez gu' no ndli gu' cuent nac Diox gu'. No gunèn thib còo' co'te' ndub di's co' mbez: Con' ndxè' nac còo' che'n thib Diox co' tarte libe' mèn. Hui' gu' nexa. Yende cón niin loo gu' cón che'n di'sa. Huenque' mbez di'sa. Pues Diox co' tarte libe' gu', lèepe' Diox nac di's co' ndub loo còo' co'te' ndub Diox gu'. No cón che'n Diox nac co' tan cuent loo gu' tac, licpe' ba'i, gu' tarte libe' Diox.

<sup>24</sup> Diox co' mxèn' izlyo' no co' mblec izlyo', Diox co' ngue xèn' rye loothe con' co' nziri' loo izlyo', Diox ñibe'pe' loo bé' no loo izlyo'. Diox inzo bante le'n gudo' co' ntoxcua' ya' mèn. <sup>25</sup> Inquinte lyath no mèn Diox loo chol con' co' ndli mèn cuent nde che loo Diox. Yende chó con' ndxàc falt loo Diox thidtene. Ndxè'leque', yub Diox ndli par nzi ban na' loo izlyo' ndxè'. No ndli Diox par ngue xèn' Diox na' loo izlyo' ndxè'. No mbli Diox par ngure taamas con' co' nziri' loo izlyo'.

<sup>26</sup> No thidte ren, no thidte bél', no thidte zith mbli Diox par mxèn' Diox mèn par cue ban mèn rye nación dib athu loo izlyo'. No mbli Diox ngure thib thib nación dib athu loo izlyo' co'se' ngòc lín' no tiemp co'se' ngure thib thib nación co'te' ngòc lugar co' nziri' thib thib nación nalle'. <sup>27</sup> Tataa mbli Diox loo mèn dib athu loo izlyo' par bel'que' ngác ncu'a'n mèn Diox thib mod tedib mod axta ngzal Diox loo mènna. Tac, licpe' ba'i, itithte nzo Diox loo thib thib na'. <sup>28</sup> Loo Diox nzi ban na'. No ndli Diox nquée ndlyaa na' loo izlyo'. No ngue xèn' Diox na' loo izlyo' ndxè' xal mbez di's co' ndxab ndxep mèn co' nzo làth gu' co' ntoxcua' di's che'n thib discurs co'se' ndlab mènna ye's che'n discurs. Mbez mènna: Nac na' mèn guliz Diox. <sup>29</sup> Le' sya, chele' na' nacque' mèn guliz Diox, indxàalte li na' xtùuz le' Diox nac thib gunab co' natoxcua' con or, co' natoxcua' con plat, co' natoxcua' con quèe, co' nac con' co' ntoxcua' mèn xal alithe ndye'th xtùuz yéc mèn. <sup>30</sup> Diox mbli xal mèn co' ne'ñeede co'se' ngòc tiemp co'se' ngure mèn nau' yéc nau' loo mèn. Per nalle' Diox ñibe' loo mèn dib athu loo izlyo' le'n tiemp ndxè' par lyàa yéc mèn no lyàa lezo' mèn no se' mèn mod co' ndxàp mèn loo Diox par lyá' mèn loo con' ryes. <sup>31</sup> Tac Diox mcuri thib huiz co' gác thib huiz co'se' nalite no nambiite tub rez Diox cón che'n ryete mèn, que naca naban mèn, que naca nguth mèn. Gác con'a loo mèn por cón che'n thib mbi' co' mcuri Diox no co' mblo' xà' Diox par tub rez mbi'a cón che'n ryethe mèn. No mbli' Diox loo na', licque', tub rez Diox cón che'n mèn por cón che'n mbi'a, tac mbli Diox ngro xban mbi'a làth mèn nguth.

<sup>32</sup> Co'se' mbìn mènna le' Pab ndxab le' mèn nguth ryo xban, ale mxìis mxyán' ndxep mèn. Le' taamas mènna ndxab:

—Más huen gòn nu' di's co' ngue toodi'sl ba' tedib huiz tac ya ngo tacle' lezo' nu' nzi yòn nu' tant di's co' ndyoodi'sl ba'. Ngo zanle' nu', ne.

<sup>33</sup> Sya, mbla' Pab, ndyàa mènna. <sup>34</sup> Per làtha ngo ndxep mèn co' mqueltàa no Pab. No ngola's mènna di's co' mdoodi's Pab cón che'n Jesucrist. Làth mènna ngo thib mbi' co' ngro' lèe Nich. Mbi'a ngòc thib sos co' nqueltàa no mèn co' nqueltàa co'te' lèe Areopag. No ngo thib xa'gota làth mènna, ne, co' ngro' lèe Damars. Ngo taamas mèn làtha, ne, co' ne'needen chó lèe.



<sup>1</sup> Ngolo nguri'th con'a, Pab ngro' le'n ciuda Aten. Nda Pab par ciuda Corint. <sup>2</sup> Le'n ciuda Corint mzyál' Pab thib mbi' co' nac mèn nación Israel. Mbi'a ngòc mbi' thib yèez co' nac yèezya' che'n làaz mèn pont. Mbi'a ngro' lèe Aquil. Pente ndxàc plá huiz mzin Aquil con sa'l Aquil, co' lèe Priscil, ciuda Corint. Ndye'th xon' xa' co'te' ngo ban xa' ciuda Rom co' ñibe' loo mèn nación Ital. Que nzo ne'ñee lezo' ryop sa'l Aquil, mxon' ryop sa'l Aquil ciuda Rom co'te' ngo ban ryop sa'l Aquil. Tac thib mbi' co' lèe Claud co' nac gobiern che'n nación Ital mnibe' le' ryete mèn co' nac mèn nación Israel co' nzo ban ciuda Rom ryo' mèn ciuda Rom. Mzin Aquil ryop Priscil Corint. Le'pe' le'n huiza, ngua nee Pab máa ryop sa'l Aquil. <sup>3</sup> Per com le' Pab ndli zin' co' nac leque zin' co' ndli Aquil ryop Priscil co' nac thib zin' co' ntoxcua' xa' yòo mantiad, mbyan' Pab liz ryop sa'l Aquil par thidte li Pab zin' con Aquil. <sup>4</sup> No cad huiz sabd co' nac huiz descans tiempa ndyee Pab co'te' ndub sinagog le'n ciuda Corint co'te' ndyoodi's no Pab mèn co' nac mèn nación Israel no co'te' nqueltàa mèn co' inacte mèn nación Israel. No ndli Pab gan xèegà xèegà ndxàc nado' mèn no ndlyàa yéc mèn no ndlyàa lezo' mèn loo cón che'n Tad Jesucrist.

<sup>5</sup> Co'se' mzin Sil no Timote, ndye'th myen', ngua que tee myen' par ned le'n yèezya' co' nac làaz mèn macedon, mzin myen' Corint co'te' nzo Pab. Sya, leque Pab mtlo mxo'f zin' par co Pab yalbàn thidtene cón che'n di's ndac che'n Diox. No nambìite ta' Pab cuent loo mèn nación Israel co' nzo ban ciuda Corint le' Jesús ngòc Crist co' ngure quee lezo' mèn yi'th que tee loo mèn loo izlyo'. <sup>6</sup> Per ndxe'leque', mtlo mèn nación Israela, nazab ñii mèn ngòc nguàal di's contra Pab par mda' mèn xyàn lezo' Pab. Sya, mzib Pab xab Pab loo mèn, co' nee di's, nac thib señ ryo' Pab loo mèn. Sya, ngro' Pab. Mbi' Pab loo mèn nación Israel le'n sinagog. Ndxab Pab loo mèn nación Israela:

—Yan' con' co' ndli gu' ba' cón che'n Diox co'se' gàc huiz tub rez Diox cón che'n gu' par leque con' ndli gu' ba' li par co' xà' Diox gu' loo Diox thidtene. Per por part cón chenen, nambii ndoon loo Diox loo cón che'n co' ndli gu'. Nee gu' cón che'n gu'. Desde nalle' par delant, ya ne'tolode gon yalbàn cón che'n di's ndac che'n Diox loo gu' co' nac mèn nación Israel. Más huen nda lon yalbàn loo mèn co' inacte mèn nación Israel.

<sup>7</sup> Sya, ngro' Pab sinagog. Nda Pab liz thib mbi' co' lèe Just. Mbi'a ndli cas loo Diox. No anze'f mbez mbi' Diox. No ñia'b mbi' loo Diox. No ndyub xib mbi' no ncòo' mbi' yéc mbi' loo Diox. Mdub liz mbi' cuat sinagog.

<sup>8</sup> Ngo thib mbi' co' lèe Crisp co' ngòc jef che'n leque sinagog. Mbi'a ngola's loo Tad Jesús no loo cón che'n Tad Jesús con rye mèn guliz mbi'. No huax mèn co' nac mèn ciudadape' Corint, texal ngolo mbìn mèn di's co' nac di's ndac co' mblo Pab yalbàn, ngola's mèn loo Jesús no loo cón che'n Jesús. Sangngòc bautizar mèn, ne.

<sup>9</sup> Le' sya, Tad Jesús mxo'f loo loo Pab thib yál'. Ndxab Tad Jesús loo Pab:

—Ne'zyebtel, Pab. Ftolo blo yalbàn loo mèn Corint. No tolo ftoodi's loo mèn. <sup>10</sup> Daa nzo noque'l. No yende chó mèn gàal lùu par li mèn yalquìi lool. Tac daa nanee nzo huax mèn ciuda ndxè' co' yòo loo cón chenen yiloo.

<sup>11</sup> No por cona, mbyan' Pab thib lín' narol le'n ciuda Corint. Ndlu' Pab mèn. No mblo Pab yalbàn cón che'n di's ndac che'n Diox loo mèn.

<sup>12</sup> Per le'n huiz co'se' ngòc thib mbi' co' lèe Galión gobernador loo mèn yèezya' che'n làaz mèn acay, le'n huiza huax mèn nación Israel co' nzo ban Corint, mqueltàa mèn contra Pab par gàc mèn ngolo ngola's loo Pab. Mxexù' mèn Pab. Mbe' mèn Pab loo Galión co'te' ndub ñibe' Galión. <sup>13</sup> Ndxab mèn loo Galión:

—Mbi' ndxè' ngue tee li par ndlyàa yéc mèn no ndlyàa lezo' mèn loo mod co' ngòp mèn loo Diox par tlo gáp mèn tedib mod co' nac mod cub par tyub xib mèn loo Diox no còo' mèn yéc mèn loo Diox. Moda ndli par ya ne'ntolode li mèn cas loo ley che'n mèn ciuda Rom co' ñibe' loo nación na'.

<sup>14</sup> Per le'pe' ndly'a's Pab tub Pab razon Pab loo Galión co'se', chàa, mcàb Galión loo mèn nación Israel. Ndxab Galión:

—Chele' gu' ndli cuent le' mbi' ba' mbli thib falt co' ilé'de nac o mbeth mbi' thib mèn, thib mod tedib mod na tub rez cón che'n mbi' xalque' ta' gu' cuent cón che'n mbi' loon,

gu' co' nac mèn nación Israel. <sup>15</sup> Per com le' mbi' ba' ante ndyoodi's no gu' cón che'n di's, no cón che'n lèe mèn, no cón che'n ley co' nac xley' gu', gu' nee cón li no gu' mbi' ba'. Tac por part cón chenen, indlyasten tub rezen cón che'n gu' ba'. Ngolo cuent.

<sup>16</sup> Sya, mbli Galión mandad yi'th polesi co' nac mèn nac zin' par co' polesi mèn co'te' ndub ñibe' Galión. <sup>17</sup> Sya, ryete mèn ciuda Corint co' nac mèn nación Grieg mxen mbi' co' lèe Sost co' nac tedib jef che'n sinagog co' mbyan' lugar che'n Crisp tant thib xyàn ndyac mèn. No delant loo Galión co' nac gobernador mda' mèn golp Sost axta mbyan' gust lezo' mèn. Per por part che'n Galión, yende chó mport nzo lezo' Galión con'a mastale' mbeth yèe mèn Sost.

*Pab ngua ciuda Antioqui co' nac ciuda che'n làaz mèn sir. Ngolo nguri'th ndxep tiemp, mbere Pab, ngua Pab tedib vez co' ngòc mbyon viaj. Ngua too naa Pab mèn co' ndxela's par ned làaz mèn galas no par ned làaz mèn frig.*

<sup>18</sup> Be' mbyan' Pab le'n ciuda Corint taahuax huiz. Ngoloa, gunii Pab Diox loo mèn co' ndxàc hues por cón che'n Jesucrist. Sya, mbii Pab. Ngòo Pab loo thib yòoyaa par ndoo Pab loo níttó'. Nda Pab par ned le'n yèezya' che'n làaz mèn sir. Thidte mqueltàa Pab con Priscil no Aquil par ya no Aquil ryop Priscil Pab. Láth nzo Pab yèe Cencr, ale ngua Pab loo thib mbi' co' ncho' yis yéc mèn par ndxab Pab chub mbi' yéc Pab ndoore' yòo Pab loo yòoyaa. Ale tataa mchub Pab yéc Pab par mdyaa thib con' co' ngòc co' mcàbgòn Pab loo Diox li Pab. Ngoloa, ngòo Pab loo yòoyaaa. Nda Pab par neda. <sup>19</sup> Co'se' mzin Pab con Priscil no Aquil le'n ciuda Efes, Priscil no Aquil ndxab loo Pab tyate yan' Priscil ryop Aquil. Le' Pab na, ngua riid co'te' ndub sinagog le'n ciuda Efes par ngua toodi's no Pab mèn nación Israel co' nqueltàa sinagog tya. <sup>20</sup> Le' mèn nación Israel na, nalyat ndxab loo Pab bel'que' tyal Pab yan' Pab con mèn tya mase pláte huiz. Per Pab ne'ndalte. <sup>21</sup> Sya, gunii Pab Diox loo mèn. Ndxab Pab loo mèn:

—Naquinque' gan ciuda Jerusalén par gan lni co' gac ciuda Jerusalén le'n huiz ndxè. Per yende chó xgab li gu', yey. Yiloa, beren, gal neen máa gu' par nedrè' tedib vez chele' Diox nee lezo' gaca tataa loon.

Sya, ngòo Pab loo yòoyaa. Nda Pab par ned le'n yèezya' che'n làaz mèn cesar. <sup>22</sup> Co'se' mzin Pab ciuda Cesar, sangnguri'th Pab. Nda Pab par ciuda Jerusalén. Ngua nii Pab Diox loo mèn co' nqueltàa loo cón che'n Diox. Ngoloa, mbere Pab, sangngulàa tùub Pab par ciuda Antioqui co' nac ciuda che'n làaz mèn sir. <sup>23</sup> Co'se' ngolo ngòc plá mbe' mque tee Pab par neda, mbii Pab par neda tedib vez par ngua que tee Pab thib yèe tedib yèe co' nac yèezya' che'n làaz mèn galas, no co' nac yèezya' che'n làaz mèn frig. Mbli Pab par ndye'th lezo' mèn co' ndxela's loo cón che'n Diox par neda.

*Ngo thib mbi' co' lèe Apol. Mbi'a ngue go yalbàn loo mèn le'n ciuda Efes.*

<sup>24</sup> Leque le'n huiza mzin thib mbi' le'n ciuda Efes. Mbi'a nac thib mbi' nación Israel. Mbi'a lèe Apol. Ngòc mbi'a mèn gulàaz che'n ciuda Alejandri. Nde nxon', ngòc mbi' thib mbi' co' ndxácpe' ngo yalbàn. No ndxác mbi' nda' mbi' cuent co' huenleque' cón che'n di's co' ndub loo libr co' nac xti's Diox. <sup>25</sup> Huen huen mté'th mbi' cón che'n xá mod yòo mèn loo cón che'n Diox por cón che'n Tad Jesucrist. No anze'f ndye'th lezo' mbi' no nda' gust lezo' mbi' ndyoodi's mbi' cón che'n Tad Jesús. No nambiite ndyoodi's mbi' cón che'n Tad Jesús mastale' ante nda' mbi' cuent cón che'n xá mod mbli Juàn Bautist bautizar mèn. <sup>26</sup> Con dibaxla's mdoodi's no Apol mèn le'n sinagog mèn. Per co'se' mbìn Priscil no Aquil mod co' nda' Apol cuent cón che'n Tad Jesús, mbe' Priscil ryop Aquil Apol thib lugar xà'. Sya, más nambiite mda' ryop Priscil Aquil cuent xá mod yòo mèn loo cón che'n Diox loo Apol. <sup>27</sup> Co'se' mblya's Apol ya riid Apol par ned le'n yèezya' co' nac làaz che'n mèn acay, mèn hues por cón che'n Jesucrist co' nqueltàa le'n ciuda Efes, ndxab mèn loo Apol:

—Huenque' lil yal viaj le'n yèezya' co' nac che'n làaz mèn acay.

Sya, mtoxcua' mèn thib cart par hue' Apol cart loo mèn yèezya' che'n làaz mèn acay, mèn co' ndxela's loo cón che'n Diox par neda, par nabe'ste gac mèn co'se' zin Apol par

neda. Co'se' mzin Apol le'n yèezya' che'n làaz mèn acay, anze'f thib con' ndac mbli Diox loo mènà por cón che'n con' ndac co' mbli Apol loo mèn co' mbli Diox ngola's par ngòo mènà loo cón che'n Diox. <sup>28</sup> Láth nzo Apol làth mèn par ned ngua que tee Apol, huen huen mbli' Apol cón che'n mod ye'rsin' co' ndxàp mèn nación Israel loo cón che'n Diox loo mèn par neda. Co'se' ndyoodi's Apol loo mèn nación Israela, Apol ndyoodi's loo mènà xalque' nac di's co' ndub loo libr co' nac xti's Diox le' Jesús nac Crist co' nzi quee lezo' mènà. Mod co' mdoodi's Apol loo mènà, yende mod ncà di's mènà loo Apol.

## 19

*Pab ngue que tee par ned le'n ciuda Efes.*

<sup>1</sup> Láth nzo Apol le'n ciuda Corint, Pab mxen ned, nda Pab. Nguri'th Pab par ned làaz mèn yidyòo axta mzin Pab ciuda Efes. Tya mzyál' Pab ndxep mèn co' ndxela's loo cón che'n Diox por cón che'n Jesucrist. <sup>2</sup> Mnibdi's Pab loo mènà. Ndxab Pab:

—¿Ché' ngulàa Xpii Natú' loo gu' no ngòo Xpii Natú' loo gu' par tlo ñibe' Xpii Natú' loo gu' co'se' ngola's gu' loo Crist no loo cón che'n Crist, à'?

Mènà mcàb. Ndxab mènà loo Pab:

—Axta ne' ne' ñee nu' ché' nzo Xpii co' mbez U' nac Xpii Natú', Tad.

<sup>3</sup> Mbere Pab, mnibdi's Pab loo mènà tedib vez. Ndxab Pab:

—¿Chó cón che'n con' no por chó con' ngòc bautizar gu', sya?

Mènà mcàb loo Pab. Ndxab mènà:

—Nu' ngòc bautizar por cón che'n di's ndac co' ngócte mbli' Juàn Bautist loo nu'.

<sup>4</sup> Pab ndxab loo mènà:

—Juàn mbli bautizar mèn par ngòca thib con' co' ndlu' loo mèn le' mèn mzye'que' mod co' ngòp mèn loo Diox. Lomisque', mda' Juàn cuent loo mèn ndxàalque' yila's mèn loo mbi' co' yi'th nque yilo riid cón che'n Juàn, co' nee di's, mbi'a nac Jesús co' nac leque yub Crist.

<sup>5</sup> Co'se' mbìn mènà tataa ndxab Pab loo mènà, ngòc bautizar mènà por lèe che'n Tad Jesús. <sup>6</sup> Co'se' mxo'f Pab ya' Pab loo mènà, ngulàa Xpii Natú' loo mènà no ngòo Xpii Natú' le'n lezo' mènà par tlo Xpii Natú', ñibe'pe' Xpii Natú' loo mènà. Mtlo mènà, mdoodi's mènà tedib di'stèe co' nac xà' di's. No ngòc mènà mèn co' mde'th di's co' ndxab Diox hora. <sup>7</sup> Por loo rye mèn co' ngòc bautizara ne'que' si' fchop mènà.

<sup>8</sup> Mque tee lu' Pab no mque tee go Pab yalbàn con dibaxla's le'n son mbe' le'n sinagog che'n mèn nación Israel co' nzo ban le'n ciuda Efes. No mbli Pab ndxàc nado' mèn par ndlyàa yéc mèn no ndlyàa lezo' mèn par tataa mod yòo mèn loo cón che'n Diox par ñibe'pe' Diox loo mèn. <sup>9</sup> Per ngo ndxep mèn nación Israel co' ngòc mèn naad no mèn nguud co' thidteneque' ne'ndalte ngala's loo Crist no loo cón che'n Crist. Ndxle'leque', gunii yèe gunii tii mènà cón che'n di's ndac che'n Diox loo xnaa loo mèn co' mqueltàa sinagog. Leque hora mblá' Pab mènà. Mbe' Pab ante mèn co' ndxela's loo Crist co'te' nac scuel che'n thib maistr co' lèe Tiran. Le'n nyòo scuela ndyoodi's no Pab chol mèn co' nqueltàa no Pab ryete huiz. <sup>10</sup> Tataaque' tolo mbli Pab le'n chop lín' le'n ciuda Efes axtaque' mbìn rye mèn yèezya' che'n làaz mèn asia di's co' nac cón che'n di's ndac che'n Tad Jesús. Le'le' mbli Pab par mbìn mèn co' nac mèn nación Israel di's. Le'le' mbli Pab par mbìn mèn co' inacte mèn nación Israel di's, ne. <sup>11</sup> Làth xtau'a, Diox ngue li ndxàc yalguzye' roo yalguzye' xèn loo mèn por Pab. <sup>12</sup> No por tant ndxàc yalguzye' roo yalguzye' xèn co' ndli Diox ndxàc, huax mèn ndxi'th loo Pab par teyac Pab mèn. Ale nde no mènà panid no xab mèn yíiz par ante li mènà gàal lar'a lad Pab. Yilóa bere mèn, ye' mèn lar'a loo mèn yíiz. No tataa mod ndxac mèn yíiza. No ndryo xpii ye'rsin' loo mèn co' mque no xpii ye'rsin'.

<sup>13</sup> Ngo ndxep mèn nación Israel par neda co' ngòc mèn hue's co' nque tee thib yèez tedib yèez. Mènà ngo' xpii ye'rsin' loo mèn co' nquée mbii che'n xpiia. Mènà mbui' xal ngue li Pab no xal mbez Pab lèe Tad Jesús par ngo' Pab xpii ye'rsin' loo mèn. Mbly'a's mènà tataaguè' li mènà loo mèn co' mque no xpii ye'rsin' par co' mènà xpii ye'rsin' co'

ndyen mbii che'n xpïi ye'rsin'a por lèe Jesús, ne. Sya, mtlo mèna, mbez mèna loo mèn co' mquée mbii che'n xpïi ye'rsin' looa.

—Daa ñibe' por cón che'n lèe Tad Jesús co' ngo Pab yalbàn ryo'l, xpïi ye'rsin', loo mèn ndxè'.

<sup>14</sup> Tataaguè' mbli gaz hues myen' co' ngòc xgan' thib mbi' co' ngòc mèn nación Israel, mbi' co' lèe Scev. Mbi'a ngòc thib jef co' más ñibe' loo rye nguley' par neda le'n tiempa.

<sup>15</sup> Per co'se' mblya's myen' li myen' tataa loo thib mbi' co' mque no xpïi ye'rsin', xpïia mbli mcàb mbi' loo myen'. Ndxab mbi' co' mque no xpïia:

—Na ndlibe' Jesús. No naneen chó nac Pab. Per ¿gu', à'? ¿Cón gu'? ¿Chó mèn nac gu'?

<sup>16</sup> Ngolo tataa ndxab mbi'a loo myen' xgan' Scev, ale le'le' nguát mbi' rloo myen'. Mtlo mbi', mque' mbi' punyed nza myen'. Ale mched mxád mbi' xab myen'. Mtehuí' mbi' myen'. Mbli mbi' gan loo myen' axta che myen' mxon' myen'. Mbii myen' liz mbi'.

<sup>17</sup> Ryete mèn co' naban ciuda Efes, que nac mèna mèn nación Israel, que nac mèna mèn co' inacte mèn nación Israel, ryete mèn mbìn con' mxac myen' xgan' Scev con mbi'a. Por cona, anze'f mzyeb mèna. No mbez mèna: Con' roo con' xèn nac cón che'n Tad Jesús, ndyac na', tac ante Tad Jesús ndxác ndli yalguzye' roo yalguzye' xèn loo mèn.

<sup>18</sup> Lomisque' ne, huax mèn co' ngola'sle' loo Tad Jesús no loo cón che'n Tad Jesús mbi'th xop dol loo Pab ryethe con' ye'rsin' co' mbli mèna ndoore' yila's mèna loo Tad Jesús. <sup>19</sup> Lomisque' ne, huax mèn co' ngòc mèn bruj, leque mèn mbi'th no libr mèn co' lèe orac par mtec mèn libr mèn loo ryete mèn co' nqueltàa loo cón che'n Diox le'n ciuda Efes. Co'se' mblo' mèn co' nzi hui' cuent plál ntac libr co' ngue tec mèna, mblo' mèna cuent peser ntac ryete libr thib ayo mil pes. <sup>20</sup> Tataa mod, sate más mbyath mbyèn di's co' nac di's ndac cón che'n Tad Jesús le'n rye yèzya' par neda. No ndli Diox ndxác con' roo con' xèn che'n Diox loo mèn par neda par tataa mod ndlu' Diox cón che'n con' roo con' xèn che'n Diox loo mèn.

<sup>21</sup> Ngolo ngòc ryethe con' ngòca, mnibe' Pab lezo' Pab ya que tee Pab par ya too naa Pab mèn co' ndxela's loo Diox por cón che'n Jesucrist par ned le'n rye yèzya' che'n làaz mèn macedon no par ned làaz mèn acay. No yiloo tolo tyoo Pab ned, que tee Pab axta zin Pab ciuda Jerusalén. Más de cona, mbez Pab loo lezo' Pab co'se' yilo riid Pab ciuda Jerusalén naquin ya Pab ciuda Rom, ne. <sup>22</sup> Per lách be' nzo Pab le'n yèzya' che'n làaz mèn asia, mtel' Pab chop myen' co' ndlyath no Pab par ya myen' le'n yèzya' che'n làaz mèn macedon. Myen'a ngòc Timote no Erast. Le' Pab na, be' mbyan' taandxep huiz par ned le'n yèzya' co' nac che'n làaz mèn asia.

#### *Mèn ciuda Efes ndxátbèe contra Pab.*

<sup>23</sup> Le'n huiz co'se' mque tee Pab par ned le'n yèzya' che'n làaz mèn asia, anze'f thib mèn co' nac mèn ciuda Efes nguátbèe por indyubla'ste mèn gòn mèn con che'n di's ndac.

<sup>24</sup> Làth mèna, ngo thib mbi' co' ngro' lèe Met. Mbi'a mbli par nguátbèe mèn. Mbi'a ndli zin' con plat. Ntoxcua' mbi' gunab bix con plat co' ñaa xal thib gudo' co' nac che'n dioxpe' mèna, diox co' lèe Dian. Más de cona, ryete mèn co' ndli zin' con Met loo zin'a, mèna ndli gan huax tmi. <sup>25</sup> Met mbli par mqueltàa mèn co' ndli zin' con Met con taamas mèn co' ndli leque zin'a. Ndxab Met loo rye mèna:

—Cara, gu' nanee le' zin' co' ndli na' nac thib zin' co' inacte arid nèe no ndryo' cuent loo zin' co' ndli na', ne, ¿lé'? <sup>26</sup> Per com le' gu' nonle' no ndxòn gu' le' mbi' co' lèe Pab nque tee nda' cuent le' rye diox co' ntoxcua' ya' mèn inacte merpe' Diox. No tataa mod ndli Pab gan par ndxela's huax mèn di's co' mbez Pab. No gu' nda'que' cuent iante loo mèn co' naban ciuda Efes ndxè' mbez Pab tataa. Ndxè'leque', ngue tee ta' Pab cuent loo mèn co' nac mèn rye yèzya' che'n làaz mèn asia, ne. <sup>27</sup> Axta arid ryes nac con' ndxè' loo na' tac axta zin' co' ndli na' nzo ryes ya ne'tolode li na' zin'. No lomisque' ne, axta gudo' co' nac che'n diox na' co' lèe Dian nzo ryes gác gudo' na' thib con' co' ya yende cón ntac loo mèn. No ya ne'tolode xyo'f lèe xyo'f xti's cón che'n diox na' co' lèe Dian. No axta ya ne'lide mèn cas lni co' gác loo diox na' co' ndli na' cuent nac diox roo diox xèn loo na'. Nanee na' le' ryete mèn co' nac mèn gulàaz che'n làaz mèn asia no ryethe mèn co' naban

dib athu loo izlyo' nde too naa, no nde cò' mèn yéc mèn, no nde tub xib mèn loo diox na'. ¿Xá nee gu'? ¿Cón li na'?

<sup>28</sup> Co'se' mbìn mènà tataa ndxab Met, anze'f ngocloo mènà no cabii ndxab mènà:

—¿Pà lá' na' diox na' co' lèe Dian! Con' roo con' xèn nac diox na', yey.

<sup>29</sup> Tataa mod anze'f thib mèn nguátbèe no ngoo too di's làth mèn dib le'n ciuda Efes. Mxen mènà thib mbi' co' lèe Gay no tedib mbi' co' lèe Aristarc. Ryop myen'a mque tee lyath no Pab. Ngòc myen'a mèn gulàaz asia. Mdo'fxax mèn ryop myen'a. No mbe' mèn ryop myen'a axta co'te' ndub oficin co' nac yòolau che'n ciuda Efes no co'te' nqueltàa mèn par ngo mèn chol junt tya. <sup>30</sup> Pab mblyas ngòc xi'th mènà par ndoodi's Pab loo mèn. Per mèn co' ndxela's loo cón che'n Jesucrist ne'ngla'de nga Pab. <sup>31</sup> Lomisque' ne, ndxep mèn co' nxo'f zin' zin' che'n gobiern co' ndub ciuda Rom co' ñibe' loo mèn asia, mèn co' ngòc amiu Pab co' naban le'n ciuda Efes, mènà mtel' di's loo Pab. Ndxab mènà indxàalte yòo Pab xi'th mèn co'te' mqueltàa mèn. <sup>32</sup> No por tant mèn co' nqueltàaa, xà' mbez thib mèn; xà' mbez tedib mèn tac, por derech, nguátbèe mèn. Per ngo masre' mèn co' axta ne' ne' ñee xá mod anze'f thib mèn mqueltàa no axta ne' ne' ñee mèn chonon mqueltàa mèn. <sup>33</sup> No ngo ndxep mèn làth mènà co' mda' cuent loo tedib mbi', co' lèe Alejandr, cón che'n cón ndxàc. Mèn nación Israel co' naban ciuda Efes co' ngòc xi'th mènà mnibe' loo Alejandr ya too Alejandr loo rye mènà par tyoodi's Alejandr ndxep par cued li mèn ruid no par cued ya ne'tolode yecloo mèn. Sya, ngua too Alejandr loo mèn. Mbli Alejandr señ loo mèn, co' nee di's, ndxab Alejandr:

—Ya ne'tolode li gu' ruid. Xèe gure gu'.

Tataa mbli Alejandr tac Alejandr mblyas tyoodi's cón che'n myen' no Pab no ya Alejandr favor cón che'n Pab con myen'a loo ryete mèn. <sup>34</sup> Per co'se' mda' mèn cuent le' Alejandr nac mèn nación Israel, ale casque' le'n chop hor ngrozèe mènà:

—¿Pà lá' na' diox na' co' lèe Dian! Diox na' nac diox roo diox xèn loo na' co' nac mèn ciuda Efes.

<sup>35</sup> Sya, mbi' co' nac secretar loo mèn nac zin' che'n ciuda Efes, co'se' mbli mbi' gan mbyàl yéc mèn no mbyàl lezo' rye mèn co' mqueltàaa, ndxab mbi' loo mèn:

—Mèn ciuda Efes, mèn co' naban dib athu loo izlyo', non mènà no nanee mènà le' na' co' nac mèn ciuda Efes nquenap gudo' co' nac che'n diox na', diox na' co' nac thib mdo' co' ngulàa loo bé' loo na' par que no na' mdo' na' loo izlyo'. <sup>36</sup> Gu' nonque' yende chó mèn nzo co' gác cà di's xal ngue niin loo gu' ndxè'. Ftàl gu' yéc gu' no ftàl gu' lezo' gu'. Indlyasten li gu' nec thib con' ye'rsin' xal ngue li gu' xtùuz ba'. <sup>37</sup> Tac mènbi' co' nde no gu' ndxè', mènà tarte li par tethon mèn gu' cón che'n diox gu'. No ne' ne' tar nii mèn ngòc nguàal di's cón che'n diox gu'. <sup>38</sup> Chele' Met no mèn co' ndli zin' con Met ndlyas co' ñee loo nu' cón che'n chol mèn, por cona nzo juez no nzo yòolau. Nzoque' mod co' ñee Met con mènà loo mèn nac zin' par tataa mod thib thib mèn tub razon che'n mèn loo juez no loo agent. <sup>39</sup> Per chele'i nac cón che'n tedib con' co' ndlyas gu' ña'b gu' loo juez no loo agent, nabe'ste queltàa gu' par co' gu' thib junt par tyoodi's gu' co' li gu' xal ñibe' ley na' loo na'. <sup>40</sup> Tac ndxàc con' ryes loo na'. Nzo mèn co' ta' cuent loo gobiern co' ndub Rom cón che'n xà mod nguátbèe mèn nalze le'n ciuda na' ndxè'. Gab mèn le' na' nac thib partid co' nguátbèe contra gobiern co' ndub ciuda Rom. Pues, nec thib mod no nec tedib mod yende mod tub na' razon che'n na' loo mènà chele' mènà ñibdi's loo na' cón che'n xá mod nguátbèe mèn nalze le'n ciuda na' ndxè'. Más huen blá' gu' con' ba'.

<sup>41</sup> Co'se' ngolo gunii mbi' co' ngòc secretar loo rye mènà, mtau' mbi' loo di's no loo cuent. Mxen thib thib mènà ned, ndyàa mèn.

## 20

*Pab mxen ned, nda Pab par ned le'n yèzya' che'n làaz mèn macedon no par ned le'n yèzya' che'n làaz mèn grieg.*

<sup>1</sup> Co'se' ngolo nguri'th huiz co' nguátbèe mènà no mbyàl yéc mèn no mbyàl lezo' mèn le'n ciuda Efes, Pab mbli par mqueltàa rye mèn co' ndxela's le'n ciuda Efes par mco'x Pab



ndxep loo mèn. Ngoloa, gunii Pab Diox loo thib thib mèn. No mde's mcàa Pab yen thib thib mèn. Ngoloa, mxen Pab ned, nda Pab par ned le'n yèezya' che'n làaz mèn macedon. <sup>2</sup> Ngua que tee Pab no ngua too naa Pab ryete yèezya' co'te' nqueltàa mèn loo cón che'n Diox par neda par tolo li Pab ye'th lezo' mèn xal nac mod co' ndyoodi's Pab loo mèn. Por lult mzin Pab le'n yèezya' co' nac che'n làaz mèn grieg. <sup>3</sup> Sya, mbyan' Pab le'n yèezya' che'n làaz mèn grieg le'n son mbe'. Látha, mblya's Pab nga Pab loo yòoyaa par ya Pab par ned le'n yèezya' che'n làaz mèn sir. Per le'pe' yòo Pab loo yòoyaa, mda' mèn cuent loo Pab le' mèn nación Israel co' nzo ban par neda ngue gobe'le' no ngue toxcuale' par yátbèe mènà contra Pab. Por cona, mbli Pab xtùuz. Más huen bere Pab, tyen Pab ned, ya riid Pab par ned le'n yèezya' che'n làaz mèn macedon. Ya ne'ngade Pab par ned le'n yèezya' che'n làaz mèn sir. <sup>4</sup> Ngua no Pab thib mbi' co' lèe Sópater co' nac mèn gulàaz berea no Gay co' nac mèn gulàaz mèn derb, no Timote, no Tiquich, no Trofim. Yon mèn ndxè' ngòc mèn che'n làaz mèn asia. Ryete mèn ndxè' mque tee no Pab par neda. <sup>5</sup> Ryete mèn co' ndxàc hues por cón che'n Jesucrist mner loo nu' par mzingà mènà loo nu'. Nguled mènà nu' ciuda Tro. <sup>6</sup> Le' sya, ryete nu' co' mque tee no Pab, mbyan' nu' le'n ciuda Filip co'te' ngue que'en ye's ndxè' lool, Tyofl, daa co' nac Luc, par nguled nu' nguri'th lni co' nac lni co' ndli mèn nación Israel co'se' ndxuhua mènà pan co' indxòde dii lebadur. Ngoloa, ngòo nu' loo yòoyaa. Mbii nu' ciuda Filip. Mxyo'f nu' loo nítto'. Axta ngolo ga'y huiz mbli nu' gan mzin nu' ciuda Tro. Tya nguled nu' gaz huiz.

*Pab ngua too naa rye mèn co' ndxela's co' nzo ban le'n ciuda Tro.*

<sup>7</sup> Co'se' ngòc ner huiz che'n sman, ryete nu' co' ndxela's loo cón che'n Diox co' nqueltàa le'n ciuda Tro, thidte mqueltàa nu' par hua nu' pan co' nac Cena Santa. Látha, mblo Pab yalbàn no mblu' Pab loo mèn co' mqueltàa cón che'n di's ndac. No com le' Pab mquin bii tedib huiz co' nde nquea, ¿lé'?, tolo mblo Pab yalbàn loo mènà axta gulal yál'. <sup>8</sup> No co'te' nqueltàa mènà ngòc thib cuart co' nac son pis. No nde nxon', anze'f thib xnii ntenii le'n cuarta. <sup>9</sup> Làth mènà nzo thib mbyòo co' lèe Eutic. Mbyòo mdub ro thib ventan che'n cuarta. Per com le' Pab tolo mdoodi's axta ngulal yál'a, ¿lé'?, látha mxen mcal'guth mbyòoa ro ventan co'te' mdub mbyòo. Ne'nden'te mbyòo xal ngoxud mbyòo loo cuart co' nac son pis axta loo yòo. Tya ngua xít che mèn mbyòo. Nguthle' mbyòo. <sup>10</sup> Per co'se' gune Pab ngulàa mbyòo loo yòo, mbilàa Pab, ne. Sya, mdub xib Pab cuat mbyòo co'te' nax mbyòo. No thidte ngua Pab, mblo Pab ya' Pab yen mbyòo. Mde's Pab mbyòo. Ndxab Pab loo rye mèn hues co' mqueltàaa:

—Ne'zyebte gu', ey. Mbyòo ngro xban.

<sup>11</sup> Ngoloa, mquée Pab gáp. Ngòo Pab le'n cuart co' nac son pis. Thidte mqueltàa rye mènà con Pab par nduhua rye mènà sa yèth hora. Co'se' ngolo nduhua rye mènà, tolo mdoodi's Pab axta ngo nìi izlyo' co' nac tedib huiz co' nde nque. Sya, mxen Pab ned. Mbii Pab ciuda Tro. <sup>12</sup> Le' mbyòo co' ngulàa loo yòo, co' ngutha no co' ngro xban na, ndyac lezo' ryete mènà por cón che'n mbyòoa. Ndyàa mbyòo con mèn guliz mbyòo par liz mbyòo.

*Pab mbii ciuda Tro. Mxen Pab ned, nda Pab par ciuda Milet.*

<sup>13</sup> Mblá' nu' Pab ciuda Tro. Mdee ner nu' loo Pab. Ngòo nu' loo thib yòoyaa par mzin nu' axta yèez Asón tac tya mtan' nu' di's con Pab zyál' nu' Pab par hue' nu' Pab loo yòoyaa tac Pab más mblya's mdee nii par zin Pab yèez Asón. <sup>14</sup> Co'se' mzyál' nu' Pab yèez Asón, tya ngòo Pab loo yòoyaa con nu' par ngua nu' axta tedib ciuda co' lèe Mitilen. <sup>15</sup> Mzin nu' Mitilen. Tya nguled nu' chu'th. Ngoloa, mtetee nu' yòoyaa. Mdoo nu' loo nít dib yál'. Co'se' ngo nìi izlyo' tedib huiz co' nde nquea, sangnguri'th nu' thib yèez co' lèe Qui. Tya tolo mdoo nu' loo nít axta tedib huiz co' nde nquea, axta mzin nu' thib puert co' lèe puert Sam co' nac thib yòo biiz le'n nítto'. Co'se' mbii nu' puert che'n Sam, mzin nu' Trogil. Tya mbli nu' chu'th descans. Ngoloa, mbere nu', mdoo nu' loo nít dib yál'. Axta tedib huiz co' nde nquea, mzin nu' ciuda Milet. <sup>16</sup> Tataa mbli Pab sangnguri'th Pab ciuda Efes tac indlya'ste Pab lyen' Pab le'n yèezya' che'n làaz mèn asia. Tac Pab mblya's zingà

Pab ciuda Jerusalén par yo Pab ciuda Jerusalén ndoore' gáal lni che'n Pentecostés chele'i ta' lugar loo Pab.

*Pab mdoodi's no mêngool le'n yèez Milet, mêngool co' ndyoo ner no co' ndyoo naa loo mèn co' nqueltàa loo cón che'n Diox ciuda Efes.*

<sup>17</sup> Láth nzo Pab le'n yèez Milet, mtel' Pab mèn par ngua xi mèn mêngool co' ndyoo ner no co' ndyoo naa loo mèn co' nqueltàa loo cón che'n Diox le'n ciuda Efes. <sup>18</sup> No co'se' mzin mêngoola loo Pab le'n yèez Milet, ndxab Pab loo mêngoola:

—Gu' non no nda'que' gu' cuent xal nac mod co' mque tee ban daa co'se' anon ngòc ner huiz co' mbal lon yalbàn loo gu' par ned le'n yèezya' che'n làaz mèn asia. <sup>19</sup> Le'n rye huiz co' ngon làth gu', na mblique' sirv loo Diox. Mblina xal mèn co' indye'ste no xal mèn co' inxyal'te. Axta mbínen co'se' ngòon làth gu'. Más de cona, anze'f thib yalndyub ngu's ngòc loon co' mbli no mèn nación Israel daa. <sup>20</sup> Per mastale' ngòc ryethe con'a loon, na toloque' mblo yalbàn loo gu' par mcàba con' ndac loo gu'. Ne'nglá'den gu' taate. Mblu'en gu' loo xnaa no mblu'en gu' liz gu' xal mda'i lugar loon. <sup>21</sup> Mbezen loo mèn, que naca loo mèn co' nac mèn nación Israel, que naca loo mèn co' inacte mèn nación Israel, lyàa yéc mèn no lyàa lezo' mèn par se' mèn mod co' ndxàp mèn loo Diox no yila's mèn loo Tad Jesucrist na' no loo cón che'n Tad Jesucrist na'. <sup>22</sup> Per nalle' que nzo ne'ñee lezon gan ciuda Jerusalén tac Xpii Natú', por derech, ñibe' loon. No axta ne' ne' neen cón gac loon ciuda Jerusalén co'se' gòon loo mèn ciuda Jerusalén. <sup>23</sup> Thidte con' naneen, par ned le'n rye yèez co'te' nde teele' ndyee'en, Xpii Natú' mbez loon le' mèn nzi bed co' mèn daa lezi'f no tetii mèn daa axta plóthe ndlya's mèn. <sup>24</sup> Per yende cón ndyóon cón che'n co' li mèn loon. Ne' ne' yen chó mport nzo lezon cón che'n co' li no mèn daa. Ne' ne' yende cón ntac yalnaban co' ngue non ndxè' loon. Conse' ndoo lezon no ndyac lezon lin purad axtaque' telon no taan ryethe con' co' ñibe' Tad Jesús loon par tan cuent no gon yalbàn cón che'n xá mod nque' lezo' Diox ñee Diox mèn.

<sup>25</sup> No nalle' ngobe'en nec thib gu' co' nzo làth gu' ndxè' co' mbìnle' yalbàn co' mblon loo gu' cón che'n xá mod ndlya's Diox ñibe' Diox loo mèn, ya ne'berede hui' gu' loon, cara. <sup>26</sup> Por cona, ndlyazen niin loo gu' nalze yende chó dol co' nac cón chenen ndxan' loo Diox por cón che'n nec thib gu'. <sup>27</sup> Tac daa mblu'que' no mdethquen cón che'n ryethe con' co' mblo xnee Diox li Diox loo mèn. Nec thib con'a ne'nca'sten loo gu' loo Diox. <sup>28</sup> Por cona, ngue niin loo gu': Anderhuen gu'. Leque' gu' hui' xal nziri' gu' no hui' gu' xal nziri' rye mèn co' nqueltàa loo cón che'n Diox par nedrè'. Tac Xpii Natú' mbli par ngure gu' par hui' gu' no tyoo ner gu' loo mèn co' nqueltàa loo cón che'n Tad Jesús. Tac le'le' Tad Jesús mdix cón che'n ryethe xtol mèn loo Diox co'se' nguth Tad Jesús loo cruz. <sup>29</sup> Tac daa nanee le' daa bii. No ro'en loo gu' nalle' thidtene. No yiloa yi'th tedib ned mèn co' lya's teza' gu' loo cón chenen no co' lya's co' xà' gu' loo cón chenen thidtene. Gàca loo gu' xal co'se' ntelux má' co' lèe mbée mbacxil'. <sup>30</sup> No leque làth gu' nzo mèn co' tlo lu'. Lugar de lu' mèn co' nac con' lìcpe' loo gu', le'le' lu' mèn con' co' nac con' gutyè'túb loo gu' par queltàa mèn co' ndxela's con mèn. <sup>31</sup> Cona, ngue niin loo gu': Nee gu' xal nzi que tee gu'. No hui' gu' xal nziri' mèn co' nqueltàa loo cón che'n Diox. Fte' lezo' gu', le'n son lín', ze no yál' ne'nglá'den gu'. Thidtene mco'xen loo thib thib gu' con nít loon co' mbínen tant ndyóon no tant mblyat lezon cón che'n gu'.

<sup>32</sup> Per nalle', mèn huesen por cón che'n Jesucrist, ña'ben loo Diox lyath no Diox gu' par tolo xo'f zin' gu' zin' cón che'n Diox. No ña'ben loo Diox par lyath no Diox gu' par co' gu' yalbàn cón che'n xá mod nque' lezo' Diox ñee Diox mèn. Tac ante Diox ndxàp con' la's nii Diox no la's ya' Diox par li Diox yòo valor loo gu' no par xal' Diox ned yó' loo gu' par tolo tyal mèn, mèn co' lya's ryo xà' loo cón che'n xab izlyo', par gac mèn che'npe' Diox. <sup>33</sup> Leque daa inda' de lugar loon par quel'i'then tmi co' ndxàp mèn no par quel'i'then xab mèn co' ndxàp mèn. <sup>34</sup> Ndxè'leque', gu' huen huen nda' cuent le' daa mbli zin' con yape'en par mque non con' mquin daa no par mque no mèn co' mquin mèn, mèn co' mque tee no daa. <sup>35</sup> Gu' neeque' le' daa mblu'que' gu' tataaque' ndxàal li mèn zin' par

tataa mod lyath no mèn xtàa mèn co' nde che con' loo. No fxo'f ndeleque' lezo' gu', fte' lezo' gu' xal nac di's co' ndxab Tad Jesús: Más huen nda mèn co' angnda' con' ncàa xtàa mèn leque mèn co' ncàa con' co' nda' mèn càa mènà.

<sup>36</sup> Ngolo ndxab Pab di'sa loo mèn gool che'n ciuda Efes, mdub xib Pab con mènà no ngurez Pab Diox con ryete mènà. <sup>37</sup> Ryete mènà ne'tí' ne'ñee lezo' mbín'. No mde's mcàa mènà Pab. No mda' mèn chit cuat Pab. <sup>38</sup> No anze'f ngure xi lezo' mèn goola tac ndxab Pab loo mèn goola le' Pab ya ne'berede hui' loo mèn goola tedib vez. Ngoloa thidte mqueltàa rye mèn goola. Ngua tee ned mèn goola Pab axta co'te' mdub yòoyaa ro nítto'. Ngòo Pab loo yòoyaaa, ndyàa Pab.

## 21

### *Pab mdoo loo nítto'. Nda Pab par ciuda Jerusalén.*

<sup>1</sup> Co'se' mblá' nu' mèn co' ndxàc hues por cón che'n Jesucrist, ngòo nu' loo thib yòoyaa. Thib lite mdoo nu' loo nítto' par mzin nu' loo thib yòo biiz le'n nítto' co' lèe Cos. Co'se' ngo nìi izlyo' tedib huiz co' nde nquea, mzin nu' loo tedib yòo biiz le'n nítto' co' lèe Rod. Be taa be taa mdoo nu' loo nítto' axta mzin nu' thib puert co' lèe Patar. <sup>2</sup> Puerta mzyál' nu' mèn co' nde no tedib yòoyaa. Mènà ndoo loo nítto'. Nda mènà làaz mèn fenis. Tya ngòo nu' loo yòoyaa che'n mènà. Nda nu' par làaz mèn fenis. <sup>3</sup> Láth nda riid nu' loo nítto', gunèe nu' nziri' tedib yòo biiz le'n nítto' co' lèe Chipr. Thib lì nguri'th nu'. Le' Chipr co' nac yòo biiza na, mbyan' lad rebes. Sangtolo ndoo nu' loo nítto' par zin nu' axta làaz mèn sir. Per com le' yòoyaa nquin ya lá' yó' puert Tir, ¿lé'?, ngro' nu' loo yòoyaa puerta par ngua nu' le'n ciuda Tir. <sup>4</sup> Tya, mzyál' nu' taamas mèn co' ndxela's loo Jesucrist no loo cón che'n Jesucrist. Mbyan' nu' con mènà gaz huiz le'n ciuda Tir. Látha, mnibe' Xpii Natú' loo mènà. Ndxab Xpii Natú' loo mènà gab mènà loo Pab más huen ne'yade Pab ciuda Jerusalén. <sup>5</sup> Co'se' ngolo mdyaa gaz huiza, ngro' nu' le'n ciuda Tir. Le' ryete mèn co' ndxela's loo Jesucrist no loo cón che'n Jesucrist ngro' con xa'got mèn co' nac sa'l mèn no con myen' bix. Ngua tee ned mènà nu' axta fuer ro ciuda co'te' nziri' play nítto'. Ro playa mdub xib nu' no ngurez nu' Diox. <sup>6</sup> Ngolo ngurez nu' Diox, gunii nu' Diox loo rye mènà. No le'le' mde's mcàa mèn yen nu' no le'le' mde's mcàa nu' yen mènà. Mquée nu' loo yòoyaa. Le' mènà na, mxen ned. Ndyàa mènà par liz mènà.

<sup>7</sup> Tataa mod mbli nu' gan mque tee nu' loo nítto' par neda desde ngro' nu' Tir axta mzin nu' tedib puert chu'th co' lèe Tolemaid. Tya gunii nu' Diox loo mèn co' ndxela's loo Jesucrist no loo cón che'n Jesucrist. No mbyan' nu' con mènà thib huiz no maste. <sup>8</sup> Tedib huiz co' nde nquea, Pab no taamas nu' co' mque tee no Pab, thidte junt ngro' nu' par ngua nu' axta ciuda Cesar leque huiza. Tya ngua nu' liz thib mbi' co' lèe Lip co' mdub lèe mèn Lip Evangelist. Lipa ndxòo cuent nac gaz mèn co' thidte mqueltàa co' ndlyath no, no co' ndli mandad loo mèn co' nqueltàa loo cón che'n Diox ciuda Cesar. No mbyan' nu' con Lip liz Lip ndxep huiz. <sup>9</sup> Lip mque no thap rsap Lip. No tarte selya' nec thib rsap Lip. Myen'got rsap Lip mde'th di's co' ndxab Diox loo myen' loo mèn. <sup>10</sup> Láth be' nzo nu' liz Lip ndxep huiz, mzin thib mbi' co' nde'th di's co' ndxab Diox. Mbi'a lèe Agab co' nde par ned le'n yèezya' che'n làaz mèn jude. <sup>11</sup> Mbi'th too naa mbi' nu'. No ale láth ndyoodi's no mbi' nu', mblo' mbi' cinch co' nzo le'n Pab. No leque mbi' mtedó' nii mbi' no ya' mbi' con cinch. Gunee mbi' loo nu':

—Xpii Natú' gunee loon le' mèn nación Israel co' naban ciuda Jerusalén taandxè' tedó' mbi' co' nac che'n cinch ndxè' no ta'xù' mènà mbi' loo mèn tith.

<sup>12</sup> Co'se' mbìn nu' tataa gunee mbi' loo nu', nu' no mèn ciuda Cesar co' ndxela's loo Jesucrist no loo cón che'n Jesucrist, nalyat ndxab nu' loo Pab más huen ne'yade Pab ciuda Jerusalén. <sup>13</sup> Per ndxe'leque', mcàb Pab loo nu'. Gunee Pab:

—¿Chonon ndxón' gu' no ntexi gu' lezon, yey? Na mbli nable' daa par gan ciuda Jerusalén. Ne'gaden par ante tedó' mèn niin no yan. Ndxè'leque', gan ciuda Jerusalén par gath daa por cón che'n Tad Jesús chele'i tataa naquin gac loon. Gàca loon, xàa.

<sup>14</sup> Per como le' nu' ne'nglide gan ngòn Pab ro nu' par nglàa yéc Pab no nglàa lezo' Pab más huen ne'ngade Pab, ¿lé'?, mblá' nu' tolo gunee Pab cón lí Pab. Ante ndxab nu' loo Pab:

—Ante gàca lool, Pab, xal nee lezo' Tad. No ya yende cón tolo ngab nu' lool, Pab.

<sup>15</sup> Ngolo tataa mdoodi's no nu' Pab no mdoodi's no Pab nu', nu' mtoxcua' che'n nu'. Mxen nu' ned. Nda nu' par ciuda Jerusalén. <sup>16</sup> Ngua no nu' ndxep mèn ciuda Cesar co' ndxela's loo Jesucrist no loo cón che'n Jesucrist axta ciuda Jerusalén. Ngua lá' mèn nu' liz thib mbi' co' lèe Mnasón par cued nu' liz mbi' ndxep huiz. Mbi'a ndxàcle' lín' ndxela's loo Tad Jesucrist no loo cón che'n Tad Jesucrist.

*Pab ngua tee hui' máa Cob no ngua too naa Pab Cob.*

<sup>17</sup> Co'se' mzin nu' ciuda Jerusalén, ryete mèn co' ndxàc hues por cón che'n Jesucrist huen mbyan' lezo' mèn gunèe mèn nu'. <sup>18</sup> Co'se' ngo nii izlyo' tedib huiz co' nde nque, ngua no nu' Pab par ngua too naa nu' Cob. Le'pe' nziri' rye mèn gool co' ndyoo ner no co' ndyoo naa loo mèn co' ngòo loo cón che'n Diox liz Cob ngua nu'. <sup>19</sup> Gunii nu' Diox loo mèn no gunii mèn Diox loo nu', ne. Ngoloa, mtlo Pab, mda' Pab cuent cón che'n thib thib con' co' mbli Diox por cón che'n Pab làth mèn ned ngua que tee Pab làth mèn co' inacte mèn nación Israel. <sup>20</sup> Co'se' mbìn mèn cuent co' mda' Pab loo mèn, ngurez mèn Diox. No ndxab mèn di's roo di's xèn no di's natu' loo Diox. Sya, ndxab mèn loo Pab:

—Huenque' nac di's co' nda'l cuent loo nu' cópe' ngòc lool ned ngua que teel làth mèn co' inacte mèn nación Israel. Yende cón ñee nu' lool cón che'n con'a. Per hui' nexa, hues. Lùu nonque' no naneque'l napló mil mèn co' nac mèn nación Israel co' nqueltàale' trè' con nu' co' nac mèn co' ngola'sle' loo Jesucrist no loo cón che'n Jesucrist. No ryete mèn thidte mbez naquingue' toloque' tyubdi's mèn xal mbez ley co' mxo'f Moisés loo na'. <sup>21</sup> Per ndxep mèn làaz na', co' nzo ban par ned ngua que tee lu'l mèn, mbi'th ta' cuent loo mèn làaz na' trè' le' lùu ngue tee lu' loo rye mèn nación Israel co' nac mèn làaz na' co' nzo ban par ned làaz mèn titha. Ndlu'l ne'lìde mèn cas cón che'n xal ñibe' ley co' mxo'f Moisés loo na'. No ndlu'l ya indxàalte li mèn circuncidar myen'bi' bix co' nac xin' mèn. No ndlu'l ne'tolode li mèn chol costumbr co' mbed no mèn no co' nzi no mèn làaz mèn. <sup>22</sup> ¿Xá neel? ¿Ché', licque', nac cuent co' nda' mèn loo nu' cón che'n co' mque tee lu'l? Tac nu' ngobe' setilte queltàa mèn naba' co'se' gòn mèn le' lùu mzinle' trè'. <sup>23</sup> Pab, más huen lil xal nee nu' lool: Nzo thap mènbi' làth nu'. Mènbi' ndxè' nquin tolo li con' co' mcàbgòn mèn ndxè' li mèn ndxè' loo Diox. <sup>24</sup> Huàa no dyap mènbi' ndxè'. Thidte junt huàa no mèn ndxè' le'n templ par yembii gu' loo xley' che'n mèn nación Israel. No bdi'x cón che'n gast co' li dyap mèn ndxè' par telo mèn ndxè' con' co' mcàbgòn mèn li mèn loo Diox. Yiloa nzoque' mod cho' mèn yis yéc mèn co'se' ngolo mbli mèn ryethe con' nquin li mèn. No tataa mod ñèe ryete mèn no ta' ryete mèn cuent ilìcte nac co' mda' mèn cuent cón che'n. Ndxè'leque', ñee mèn no ta' mèn cuent le' lùu, licque', ndyubdi's xal mbez di's co' ndub loo ley co' mxo'f Moisés loo na'. <sup>25</sup> Per por part che'n mèn co' inacte mèn nación Israel co' ngola'sle' loo Tad Jesucrist no loo cón che'n Tad Jesucrist, nu' mque'le' ye's loo mèn ya ne'tyóode mèn arid cón che'n co' ndlu' ley co' mxo'f Moisés loo na' co' nac mèn nación Israel. Ndxè'leque', ndxab nu' loo mèn ne'huade mèn bél' má' co' mbec mèn loo mdo'. Ne' ne' hua mèn ren má'. Ne' ne' hua mèn ren má' nguth co' ndryal dó'. Ndxab nu', ne, yende chó mèn li yalburrid. Ne' ne' cua'n mèn xin' huan mèn.

*Mèn ciuda Jerusalén mxenxù' Pab le'n templ.*

<sup>26</sup> Sya, thidte mbe' Pab dyap mèn. Co'se' ngo nii izlyo' tedib huiz co' nde nquea, mbembii'le' Pab con dyap mèn loo xley' mèn. Ngoloa, thidte ngua no Pab dyap mèn le'n templ par ngua nee mèn loo nguley' pól tyaa huiz co' mtelole' mèn ryete con' co' mcàbgòn mèn loo Diox li mèn, co' nee di's, mzinle' tiemp hue' mèn gòn co' ta'la's mèn loo Diox le'n templ.

<sup>27</sup> Per co'se' yamerle' yilo gaz huiz, co' nee di's, ngolole' mbembii' rye ga'y mèn, gunèe ndxep mèn nación Israel co' nzo ban par ned le'n yèezya' co' nac làaz mèn asia, mèn co'

nde lni Pentecostés ciuda Jerusalén, ngue tee Pab le'n templ. Mbli mènà par nguátbèe mèn le'n templ par mxen mèn Pab. <sup>28</sup> No cabii ndxab mènà:

—Mèn nación Israel, blyath no gu' nu' tyen na' mbi' ndxè'. Mbi' ndxè' nac mbi' co' ngue tee lu' loo mèn rye nación. Ale mbixyath mbi' contra nacionpe' na'. No mbixyath mbi' contra ley co' mxo'f Moisés loo na'. No nac mbi' ngolo ngola's che'n templ ndxè'. No más de cona, ale negadi's ngòo no mbi' plá mèn grieg le'n templ na' par ngòc zab le'n templ na' co' nac lugar natú' loo na'.

<sup>29</sup> Tataa ndxab mènà tac ndoore' gunèe mènà ngue tee no Pab thib mbi' co' lèe Trof, co' nac mbi' ciuda Efes, le'n ciuda Jerusalén. No mbli mènà xtùuz ne'stolque' ngòo no Pab mbi'a le'n templ mastale' ne'ngòo node Pab mbi' le'n templ.

<sup>30</sup> Sya, por derech, ryete mèn ciuda Jerusalén nguátbèe. No mque' mènà carre. Mqueltàa mèn co'te' ndub templ. Mxen mèn Pab. No mdo'fxax mèn Pab. Mblo' mèn Pab thib lad co'te' ndub templ. No luega luega, mtau' mèn puert che'n templ. <sup>31</sup> Le'pe' ndlya's mènà guth mènà Pab co'se' mbìn mbi' co' nac comandant, co' ñibe' loo thib ayo solndad le'n ciuda Jerusalén, le' ryete mèn ciuda Jerusalén nguátbèe. <sup>32</sup> Sya, mbli comandant setilte mqueltàa solndad, no taamas solndad co' más ñibe' taachu'th. Ryete solndada mque' carre. Nda solndad co'te' nziri' mèn co' nguátbèea. Co'se' gunèe mènà nde comandant no nde solndada, mblá' mènà Pab. Ya ne'tolode mtin mènà Pab. <sup>33</sup> Sya, mbii gax comandant co'te' nax Pab. Mblít comandant Pab. Mnibe' comandant loo solndad tedó' solndad nii Pab no ya' Pab con chop caden. Ngoloa, mnibdi's comandant loo Pab. Ndxab comandant:

—¿Chó nac lùu? No ¿cón ngue tee lil, à'?

<sup>34</sup> Per mèn co' nguátbèea cabii mbez. Xà' mbez thib mèn. Xà' mbez tedib mèn. Axta ne' ne' ñee comandant chó ro mènà gòn comandant por tant ayen di's ayen cuent ndxác hora làth mènà. Por lult, mnibe' comandant loo solndad mbe' solndad Pab co'te' nac cuartel. <sup>35</sup> Co'se' mzin no solndad Pab loo escaler co'te' ndxòo mèn ro puert che'n cuartel, gápleque' mblít solndad Pab par mbe' solndad Pab loo mbii par le'n cuartel tant nayi' mèn co' nguátbèea ñèe mènà Pab. <sup>36</sup> Tataa mbli solndad tac taamas mèn co' nde nque, co' nac leque mèn co' nguátbèea, mbez yèe mènà. Mbez mènà:

—Solndad, fcàa gu' mbi' ba'. Beth gu'.

*Pab mdub razon che'n Pab loo rye mèn co' nguátbèea.*

<sup>37</sup> Co'se' nda lo solndad Pab le'n cuartel, Pab ndxab loo comandant co' ñibe' thib ayo solndad:

—Tad comandant, ¿ché' ta' U' lugar loon tyoodiz non U' ndxep?

Comandant mcàb loo Pab. Ndxab comandant:

—¿Ché' ndxácl ndoodi'sl di'stèe grieg, cà'?

Pab mcàb:

—Ndxác daa, pues.

<sup>38</sup> Sya, ndxab comandant loo Pab:

—¿Ché' inacte lùu mbi' nación Egipt co' mbli thib huelg ndxàcle' ndxep tiemp no mbe' mbi'a thap mil mènguth mèn par mqueltàa mènà con mbi' co'te' nagán, sya, cà'?

<sup>39</sup> Sya, ndxab Pab loo comandant:

—Yende xàa. Daa nac mèn nación Israel. Ngóol daa le'n ciuda Tars co' nac thib ciuda más naroo loo rye yèezya' che'n làaz mèn cilis. Per ña'ben thib favor loo U'. Fta' U' lugar loon toodizen ndxep loo mèn ba'.

<sup>40</sup> Mda' comandant lugar loo Pab par tyoodi's Pab loo mènà. Sya, alanleque mdoo Pab loo mènà loo escaler co'te' ndxòo mèn ro puert che'n cuartel. Sya, mbli Pab señ con ya' Pab par cued li mèn ruid. Co'se' xègà nguled ruid, mtlo Pab, mxal' Pab loo di's loo mènà. Mdoodi's no Pab mènà di'stèe co' nac di'stèe che'n mèn nación Israel. Ndxab Pab:

## 22

<sup>1</sup> —Gu' co' nac mèn gulàaz daa no gu' co' ñibe', no co' ndyoo ner, no co' ndyoo naa loo mèn nacionpe' na', bìn gu' di's co' nac di's co' tuben razon cón chenen loo gu'.



<sup>2</sup> Co'se' mbìn mèn co' nguátbèea le' Pab ndyoodi's no mènna xti'spe' mèn nación Israel, tolo más xèe ngure mèn. Sya, ndxab Pab loo mèn:

<sup>3</sup> —Daa nac mèn nación Israel. Ngóol daa le'n ciuda Tars co' nac thib ciuda che'n làaz mèn cilis. Per mbryoo mxyèn daa le'n ciuda Jerusalén ndxè'. No mque'en scuel loo thib maistr co' ngro' lèe Gamaliel co' mblu' daa. Láth mque'en scuel, mxo'f ndeleque' lezon mbeen cuent xal nac di's co' ñibe' loo ley co' mxo'f Moisés loo xudgool na' póla. Más de cona, mxo'f ndeleque' lezon par lin sirv loo Diox, dib nzo yéquen dib nzo lezon xalque' nac mod co' ndli ryete gu' sirv loo Diox nalle'. <sup>4</sup> No ngòc daa mèn co' mque tee mdub ngu's mèn co' ngola's di's ndac che'n Jesucrist thib cua'a, axta mdoo lezon guthen mènna. No mbeen mènbi' no mèngot co' ndxela's cón che'n di's ndac che'n Jesucrist co'te' nzo mènna par que'en mènna lezi'f. <sup>5</sup> Mastale' indlyasten niin con' ndxè' loo gu', per leque jef co' más ñibe' loo rye nguley', no rye mènngool co' ñibe', no co' ndyoo ner, no co' ndyoo naa loo mèn nacionpe' na' nanee no nda' mènna cuent cón chenen chele' mènna ndlya's ta' cuent cón chenen. Tac yub mènna mda' ye's co' nac ord loon par huen ye's ciuda Damasc loo mèn co' ndxàc mèn gulàaz na' co' nzo ban le'n ciuda Damasc. Sya, mxenen ned. Ndan par ciuda Damasc par ga tee hui'en ñeene' ché' nzo mèn co' ndxela's di's ndac che'n Jesús par gal non mènna ciuda Jerusalén ndxè' par tetii nu' mènna xal ndlya's nu'.

*Pab ngue ta' cuent loo mènna xá mod ngulàa yéc Pab no ngulàa lezo' Pab par ngòc Pab loo cón che'n Tad Jesucrist.*

*(Hch. 9.1-19; 26.12-18)*

<sup>6</sup> Nde tan cuent loo gu' xá ñaa co' ngòc loon láth ndoon ned, ndan ciuda Damasc. Co'se' yamerle' zin daa ciuda Damasc no casque' com rol huiz, chàa, mbya'x thib xnii tín' co' ngulàa loo bé' co' ne'nxecte ngudloon par ngüi'en. <sup>7</sup> No ale ngulàan loo yòo. Leque hora, mbìnen mbyèn thib di's loo mbii co' gunee loon:

—Saul, Saul, ¿chonon nde tub ngu'sl daa, à'?

<sup>8</sup> Sya, mnibdizen loo Tad co' gunii loon loo mbii:

—¿Chó nac U', Tad?

Mcàb Tad. Gunee Tad loon:

—Daa nac yub Jesús che'n yèez Nazaret. Co'se' ndub ngu'sl mèn co' ndxòo loo cón chenen, lùu ne'ta'de cuent yub daa nde tub ngu'sl.

<sup>9</sup> Ryete mèn co' nda non ciuda Damasc gunèe mbya'x xnii. No mzyeb mènna. Per ne'ngònte mènna di's co' mbyèn loo mbii co' gunii loon. <sup>10</sup> Sya, mcàben loo Tad Jesús:

—¿Cón ndxàal lin, Tad?

Sya, gunee Tad loon: Goo che no tolo fxen ned. Huàa axta zinl ciuda Damasc. Tya ñee mèn co' ndxela's loo cón chenen cón ndxàal lil.

<sup>11</sup> Per com le' xnii co' mbya'x loona mbli par mbyan' sieu daa, ¿lé'?, mèn co' nda nona mxen yan par mbe' mèn daa axta mzin daa ciuda Damasc.

<sup>12</sup> Le'n ciuda Damasc ngo thib mbi' co' ngro' lèe Anani. Mbi'a thidtene indlá'ya'de no altant ndyoo mbi' par ndyubdi's mbi' loo di's co' ñibe' ley co' mxo'f Moisés loo xudgool na' más póla. No ryete mèn nación Israel co' nzo ban ciuda Damasc huenque' nda' cuent cón che'n mbi' co' lèe Anani. <sup>13</sup> Anani mbi'th co'te' nzon. Texal mzin Anani co'te' ngon, gunee Anani loon:

—Saul, co' ndxàc huesen por cón che'n Tad Jesucrist, lùu ndxe'sleque' hui' tedib vez. No leque hora ndxe'sleque' mbui'en tedib vez. <sup>14</sup> No gunee Anani loon:

—Diox co' nac Diox xudgool na' mblo' xà'l no mcui Diox lùu ndoore' gáal lùu loo izlyo' par nonl no par ta'l cuent cón nac co' nee lezo' Diox no par hui'l loo mbi' co' nac mbi' nalì no co' nac mbi' nambii, no par gòn di's co' ryo' rope' mbi' co' nac mbi' nalì no mbi' nambii. <sup>15</sup> Pues, lùu ya toodi's cón che'n mbi' nalì no mbi' nambii loo mèn dib athu loo izlyo'. No ta'l cuent co' gunèel no co' mbìnl loo mèn. <sup>16</sup> No nalle', ¿chonon be' ndoo len'l? Goo too no gòc bautizar. No gòp yalxla's loo Tad Jesucrist no loo cón che'n Tad Jesucrist par tyon' xquin lùu no xtol lùu co' mcua'n lùu.

*Pab ngue ta' cuent loo mèn co' nguátbèe xá mod mtel' Tad Jesucrist Pab loo mèn co' inacte mèn nación Israel.*

<sup>17</sup> Tolo tan cuent loo gu', ne: Co'se' mberen, ndyalen par ciuda Jerusalén tedib vez, nguan le'n templ par ngua rezen Diox. Láth ngue bezen Diox, mxyo'f loo thib con' loon. <sup>18</sup> Ale mxaquen gunee Tad Jesús loon: Sirs, sir, bli purad. Gro' le'n ciuda Jerusalén, Saul. Tac mèn ciuda Jerusalén ndxè' ne'lide cas lùu loo co' gabl loo mèn cón chenen. <sup>19</sup> Sya, ndxaben loo Tad: Tad, mèn ciuda Jerusalén nanee le' daa ndyee ryete lugar co'te' ndub sinagog mèn. No ndxen mèn co' ndxela's loo di's ndac che'n U' par nque'en mèn lezi'f co'te' nac làaz mèn. No mduben yan, mtinen mèn, ne. <sup>20</sup> No co'se' mbeth mèn Esteb co' ngòc mbi' co' mblo yalbàn cón che'n U', daa, ne, mqueltàa no mènna tya. No thidte ngòc daa con mèn co' mbeth Esteb. No axta mquenapen xab mèn co' mbeth Steb tya. <sup>21</sup> Per Tad Jesús gunee loon: Huàa. Tac daa ñibe' lool par yal tith loo mèn co' inacte mèn nación Israel.

*Comandant mquenap Pab ndxep huiz.*

<sup>22</sup> Axta co'se' gunii Pab di'sa, be' xèe ngure mèn. Per ngoloa, mtlo mènna, ngrozèe mènna. Ndxab mènna loo comandant:

—Fcàa mbi' ba'. Beth. Ya indlya'ste nu' tolo hui' nu' loo mbi'.

<sup>23</sup> No texal mbez yèe mènna cabii, tataa ndyen mèn xab mèn. Ngobii mèn xab mèn loo mbii. No ndyen mèn yòo ya's. Ngobii mèn yòo ya's loo mbii tant nda' xyàn lezo' mèn ñèe mèn Pab. <sup>24</sup> Le' comandant na, mnibe' loo solndad par mbe' solndad Pab le'n cuartel. No mnibe' comandant tin solndad Pab par ta' Pab cuent chonon susque' nazab mbez yèe mèn cón che'n Pab. <sup>25</sup> Per co'se' ngolole' mtedó' solndad Pab par ta' solndad che'n Pab no tin solndad Pab, Pab ndxab loo mbi' co' nac capitán co' ñibe' loo solndad hora:

—¿Ché' ndxàp gu' derech tin gu' daa, daa co' nac thib mbi' che'n làaz mèn ciuda Rom? No más de cona, ne' ne' tar tub rez gu' cón chenen no ¿ale sangzi'f ndlya's gu' tin gu' daa, cà'?

<sup>26</sup> Co'se' mbìn capitán tataa ndxab Pab, yende izlyo', ngua ta' capitán cuenta loo comandant. Ndxab capitán loo comandant:

—Comandant, anderhuen U'. Hui' cón ngue li U'. Mbi' co' mnibe' U' loo nu' tin nu', mbi'a nac mbi' gulàaz mèn ciuda Rom.

<sup>27</sup> Sya, ngua comandant co'te' nzo Pab. Mnibdi's comandant loo Pab. Ndxab comandant:

—¿Ché', lìcque', nac lùu mbi' gulàaz mèn ciuda Rom, cà'?

Pab mcàb. Ndxab Pab loo comandant:

—Aa. Nac daa mèn gulàaz mèn ciuda Rom, pues.

<sup>28</sup> Sya, ndxab comandant loo Pab.

—Daa, ne, nac mèn gulàaz mèn ciuda Rom. Per anze'f thib tmi mdixen par ngòc daa mèn gulàaz mèn ciuda Rom.

Pab ndxab loo comandant:

—Per daa nac mèn gulàazpe' mèn ciuda Rom tac xuden nac mèn gulàaz mèn ciuda Rom.

<sup>29</sup> Co'se' mbìn rye mènna di's co' mda' Pab cuent, mblá' mènna Pab. No axta yub comandant mblá' Pab co'se' non comandant le' Pab nac mbi' gulàaz mèn ciuda Rom. No más de cona, anze'f mzyeb comandant por mbli comandant mandad mtedó' solndad Pab par tin solndad Pab.

*Pab mdoo loo mènngool co' ñibe', no co' ndyoo ner, no co' ndyoo naa loo mèn nación Israel.*

<sup>30</sup> Co'se' ngo nìi izlyo' tedib huiz co' nde nque, anze'f mquin comandant gòn comandant chonon susque' ngue quexù' ngue que' fals mèn nación Israel Pab. Mnibe' comandant xac solndad caden co' natedó' Pab. No mnibe' comandant queltàa rye nguley' co' más ñibe' loo rye nguley', no queltàa rye mènngool co' ñibe', no co' ndyoo ner, no co' ndyoo naa loo mèn nación Israel. Sya, mnibe' comandant loo solndad co' solndad Pab lezi'f par ye'th Pab loo mènna par tyub rez cón che'n Pab loo mènna.

## 23

<sup>1</sup> Pab xèe mbui' loo ryete mènngool co' ñibe', no co' ndyoo ner, no co' ndyoo naa loo mèn nación Israel. Ndxab Pab loo mènà:

—Gu' co' nac mèn huesen no co' nac mèn xtàan co' nac mèn gulàaz daa, tan cuent loo gu' anon ndoo xènen huenque' mden'en le'n lezon no huenque' ngo lezon loo cón che'n Diox.

<sup>2</sup> Sya, mbi' co' lèe Anani, co' más ñibe' loo rye nguley' tiempa, mnibe' loo mèn co' nziri' gax loo Pab par quis mèn ro Pab. No ale mdi's mèn ro Pab. <sup>3</sup> Per Pab mcàb. Ndxab Pab loo Anani:

—Diox li par tetii Diox lùu, ne, lùu co' ntembii ro no co' ntembii xti's loo mèn. ¿Ché', licque', ngue tub rezl cón chenen xalque' ñibe' di's co' ndub loo ley co' mxo'f Moisés loo xudgool na', cà'? Yende xàa. Chele' lùu ingue lide xal ñibe' di's co' ndub loo ley, ¿chonon mnibe'l loo mèn mdi's mèn ron, sya?

<sup>4</sup> Per mèn co' nziri' tya ndxab loo Pab:

—¿Ché' tatua' mod nazab ñii yèel no ñii tiil jef co' más ñibe' loo nguley' co' nxo'f zin' cón che'n Diox, cà'?

<sup>5</sup> Pab ndxab loo mènà:

—Gu', co' nac mèn gulàazen, bli gu' dispensar co' ndxaben loo mbi' ba' tac ne'needen ché' nac mbi' ba' jef co' más ñibe' loo rye nguley'. Licque' xal nee gu' ba' le' loo libr co' nac xti's Diox mbez: Ne'ñii yèedel no ne'ñii tiidel cón che'n thib mbi' co' ñibe' loo mèn nacionpe' lùu.

<sup>6</sup> Syare' mda' Pab cuent le' mèn co' ñibe', no co' ndyoo ner, no co' ndyoo naa loo mèn nación Israel nac chop ned. Thib ned mènà nqueltàa no mèn co' nac mèn xley' saduce. Le' tedib ned mènà na, nac mèn co' nqueltàa no mèn xley' farise. Syare', cabii ndxab Pab loo mènà:

—Gu', co' nac mèn gulàazen no mèn xtàan, daa, ne, nac mèn xley' farise. Niin con' ndxè' loo gu' tac nac daa mèn co' nde liz mèn xley' farise. No ndub rez gu' cón chenen tac daa ndxela'sque' no ndub quee lezon le' mèn nguth ryo xban.

<sup>7</sup> Co'se' ndxab Pab di'sa loo mèn co' mqueltàaa, mèn xley' farise no mèn xley' saduce mtlo mdoodi's, no leque mènà mbyoo di's. Ale ngòc chop ned mènà loo Pab. <sup>8</sup> Tataa mod mbli Pab tac mèn xley' saduce ndxela's no mbez mèn xley' saduce ne'ryo xbante mèn nguth ne' ne' yen chol angl. No ne' ne' yen chol xpìi. Per mèn xley' farise ndxela'sque' le' mèn nguth ryo xban, no nzoque' chol xpìi, no nzoque' chol angl. <sup>9</sup> Ryete mènà ngrozèe nayi'. Látha, ngo too ndxep mèn co' ngòc maistr co' ndlu' cón che'n ley co' mxo'f Moisés loo mèn làth mènà. Maistra nzo lad che'n mèn xley' farise. Ndxab maistr loo mèn co' mqueltàaa:

—Mbi' ba' tarte li nec thib con' ye'rsin', yey. Peser thib xpìi gunii loo mbi' o gunii thib angl loo mbi'. Ne'gàcte na' ngolo ngola's loo Diox por cón che'n co' ngue li na' loo mbi' ba'.

<sup>10</sup> No por tant ndxetoo di's làth mènà, axta comandant mzyeb. Tac ndli comandant xtùuz le' mènà tyen Pab no ched xà' mèn Pab tant nzi que di's mèn no tant nayi' mèn ñèe mèn Pab. Por cona, mtel' comandant mandad par ye'th solndad par co' solndad Pab làth mènà par bere solndad, hue' solndad Pab par le'n cuartel tedib vez.

<sup>11</sup> Per leque yál' co' nac che'n tedib huiz co' nde nquea, Tad Jesús mxo'f loo loo Pab co'te' mdàt Pab. Ndxab Tad Jesús loo Pab:

—Ne'zyebtel, Pab. Blo valor lool. Tac texal ngòo valor lool guniil loo mèn ciuda Jerusalén trè' cón chenen, tatua'guè' ñiil cón chenen loo mèn ciuda Rom, ne.

*Ndxep mèn ciuda Jerusalén mblo xnee no mcua'n mod par guth mènà Pab.*

<sup>12</sup> Co'se' ngo nìi izlyo' tedib huiz co' nde nquea, mqueltàa ndxep mèn ciuda Jerusalén. Thidte ngòc mènà. No thidte mdoodi's mènà par guth mènà Pab. No axta mdoo lezo' mènà mde'th mènà lèe Diox por con' ye'rsin' co' li mènà. No ndxab mènà loo xtàa mènà ne' ne' yen cón hua mènà no ne' ne' yen cón gu mènà axtaque' ne' guth mènà Pab. <sup>13</sup> No masre' cho' mèn ngòc mèn co' mcàbgòn loo mèn co' ngòc xtàa mènà par guth mèn Pab.

<sup>14</sup> Sya, mxen mènà ned. Ngua ta' mènà cuent loo jef co' más ñibe' loo nguley' no loo mèngool co' ñibe', no co' ndyoo naa, no co' ndyoo ner loo mèn naciòn Israel. Ndxab mènà loo jef no loo mèngool:

—Nu' mde'th lèe Diox por con' co' li nu' ne'huade nu' nec thib con' no ne'gude nu' nec thib con' axtaque' ngolo guneè mbeth nu' Pab. <sup>15</sup> Per nalle', lya's nu' li gu' con' ndxè'. Thidte queltàa gu' con taamas mèngool co' ñibe', no co' ndyoo ner, no co' ndyoo naa loo mèn naciòn Israel. Fcua'n gu' mod toodi's no gu' comandant par tyal comandant tel' comandant Pab loo gu' yé'. No bli gu' xal mèn co' ne'ñeede. No bli gu' xalque' mèn co' bere ndlya's noo noo tub rez par ryal no gu' cón che'n Pab. Le' nu' na, gac nab par tau' nu' ned nde Pab par ya Pab looi ndoore' zin Pab loo gu'.

<sup>16</sup> Per le'pe' ndoo thib mbyòo co' nac xgan' fta'n Pab co'te' mdoodi's mènà. Mbyòoa mbìn xal nac di's co' ngue toodi's mènà. Ngua mbyòo cuartel par ngua ta' mbyòo cuenta loo Pab. <sup>17</sup> Sya, ngurez Pab thib mbi' co' nac capitán co' ngue tee ta' vuelt le'n cuartel co'te' nzo Pab. Ndxab Pab loo capitán:

—Daa lyaz hue'l mbyòo ndxè' loo comandant tac mbyòo lya's ta' cuent ndxep di's loo comandant.

<sup>18</sup> Mbe' capitán mbyòo loo comandant. Ndxab capitán loo comandant:

—Pab co' ngue lezi'f ngurez daa. Mna'b Pab loon le' daa gal no mbyòo chu'th ndxè' lool tac mbyòo ngue no ndxep di's co' lya's mbyòo ta' mbyòo cuent lool.

<sup>19</sup> Mxen comandant ya' mbyòo chu'tha. Mbe' comandant mbyòo thib lad. Mnibdi's comandant loo mbyòo:

—¿Cón ndlya'sl tyoodi's nol daa, ey?

<sup>20</sup> Ndxab mbyòo loo comandant:

—Lìca, mèn ciuda Jerusalén thidte ngòc no thidte mdoodi's par tyoodi's no mèn U' yé' par ta' U' lugar ya lá' solndad Pab loo mèngool co' ñibe', no co' ndyoo ner, no co' ndyoo naa loo mèn naciòn Israel. Mcua'n mènà mod xal mèn co' ne'ñeede par gac mènà xal mèn co' noo noo ndlya's tub rez cón che'n Pab par ryal no mèn cón che'n Pab tedib vez. <sup>21</sup> Per ne'yila'ste U' cuent co' yi'th ta' mènà loo U'. Tac masre' cho' mèn co' nqueltàa no mènà nac mèn co' yo casloo loo ned par guth mènà Pab. No axta mde'th mènà lèe Diox por con' ye'rsin' co' li mènà ne' ne' hua mènà nec thib con' no ne' ne' gu' mènà nec thib con' axtaque' ñee mènà ngolo mbeth mènà Pab. No nalle' ante nzi bed mènà gòn mènà ñeene' cón gab U'.

<sup>22</sup> Ngolo mda' mbyòo cuent loo comandant, gunii comandant Diox loo mbyòo. No mnibe' comandant loo mbyòo yende chó loo ta' mbyòo cuent cón che'n cuent co' mda' mbyòo loo comandant.

*Comandant mtel' Pab loo thib gobernador co' lèe Fels.*

<sup>23</sup> Comandant mbli mandad par ngua càa mèn chop capitán. No mnibe' comandant loo capitán par li capitán gac nab chop ayo solndad co' ndyee nii, no gac nab ayon psi' solndad co' nac caballer co' ndyub huay, no gac nab chop ayo solndad co' ndxòo ampurte lans ya' par ya rye solndada hor nquée guyè' yál' par yilá' rye solndada Pab axta ciuda Cesar yál'a. <sup>24</sup> Más de cona, mbli comandant mandad par gac nab plá huay par tyub Pab huay. No mnibe' comandant loo capitán quenap capitán Pab par yende chó con' ryes gac loo Pab ned nda no solndad Pab axta zin no solndad Pab ciuda Cesar loo Fels co' nac gobernador. <sup>25</sup> Mtel' comandant cart loo capitán par ta' capitán carta loo Fels co' nac gobernador. Loo carta mbez di's taandxè':

<sup>26</sup> —Daa, Claud Lis co' nac comandant co' ñibe' loo solndad ciuda Jerusalén, daa ngue nii Diox loo U', Tad Fels, U' co' nac gobernador. No leque tiemp ngue tan cuent loo U' cón ngòc ciuda Jerusalén ndxè' par ta' U' cuent cón ngòc. <sup>27</sup> Mèn naciòn Israel co' nzo ban ciuda Jerusalén ndxè' mxen mbi' co' ngue tel'en loo U' ndxè' xal thib pres. No mblya's mènà nguth mènà mbi'. Per com le' daa mbìn no mdan cuent le' mbi' nac thib mbi' gulàaz che'n làaz mèn ciuda Rom, ¿lé'?, ngua non solndad daa par mblàan mbi' ndxè' la's ya'

mèna. <sup>28</sup> No com le' daa ndlyaz ñeen no tan cuent chonon susque' mquexù' mque' fals mèn mbi', mbeen mbi' loo rye mèngool co' ñibe', no co' ndyoo ner, no co' ndyoo naa loo mèn nación Israel par ta' mèna cuent loon chonon susque' mquexù' mque' fals mèna mbi'. <sup>29</sup> No ale ante por indlide mbi' cas cón che'n ley co' nac xley' mèna mcàb mquexù' mque' fals mèn mbi'. Per mxaquen no mdan cuent yende chó cón che'n mèna par guth mèna mbi'. No ne' ne' que' mèna mbi' lezi'f. <sup>30</sup> Ngoloa, mbìnen le' mèn nación Israel thidte ngòc. No thidte gunii mèna par guth mèna mbi'. No mblo xnee mèna par guth mèna mbi'. Por cona, ngue tel'en mbi' loo U' nalle'. No leque tiemp, ndxaben loo mèna yi'th mèna loo U' par tub rez yub U' cón che'n mbi' ndxè' no cón che'n mèna. Con' ndxè'te nac di's co' ngue tel'en loo U' loo cart ndxè', Tad Fels. Zyál' na' yé' huize'.

<sup>31</sup> Sya, mxen solndad ned. Nda no solndad Pab xalque' mnibe' comandant loo capitán leque yál'a axta mzin solndad con Pab ciuda Antípatris. <sup>32</sup> Co'se' ngo nì izlyo' tedib huiz co' nde nquea, mbere solndad co' ndyee nii ciuda Antípatris, ndye'th solndada par ciuda Jerusalén co'te' ndub cuartel. Le' solndad co' nac caballer co' ndyub huay na, tolo mdoo ned con Pab. <sup>33</sup> Texal mzin solndad con Pab ciuda Cesar co'te' nac palas che'n gobiern, ngua ta' capitán cart loo Fels co' nac gobernador. No mtan' capitán Pab loo Fels, ne. <sup>34</sup> Co'se' ngolo mblab Fels co' nac gobernador cart, mnibdi's Fels loo Pab. Ndxab Fels loo Pab:

—Pá mèn lùu, Pab?

Co'se' mbìn gobernador le' Pab nac mèn gulàaz cilis, <sup>35</sup> ndxab gobernador loo Pab:

—Co'se' yi'th mèn co' ngue quexù' ngue que' fals lùu, gònen cón che'nl.

Ngoloa, mnibe' gobernador loo capitán co' nquenap gobernador quenap solndad Pab le'n thib cuart co'te' ngòc palas che'n Herod.

## 24

### *Pab mdub razon che'n Pab loo Fels co' ngòc gobernador.*

<sup>1</sup> Co'se' ngolo nguri'th ga'y huiz mzin Pab loo gobernador Fels ciuda Cesar, mzin leque Anani co' nac jef co' más ñibe' loo rye nguley' ciuda Cesar con ndxep mèngool co' ñibe', no co' ndyoo ner, no co' ndyoo naa loo mèn nación Israel no con thib mbi' co' lèe Tert co' nteri'th di's che'n mèn. Rye mèna ngòo loo gobernador par quexù' que' fals mèna Pab.

<sup>2</sup> Co'se' ndye'th no solndad Pab loo Fels co' nac gobernador, mtlo Tert, mquexù' mque' fals Tert Pab loo gobernador. Ndxab Tert loo gobernador:

—Diox quix U', Tad gobernador, nase huen nzo lezo' mèn. Yende di's yende cuent. No ryete con' huenque' ndxàc loo nu' le'n huiz ndxè' por anze'f ndxác U' ñibe' U' loo nu'.

<sup>3</sup> Ryete con' xal ñibe' U' loo nu' par li nu'i, ndyac lezo' nu' ndli nu' co' ñibe' U' dib anax le'n nación nu', Tad Fels, U' co' nac gobernador ndac tín' loo nu'. No Diox quix non U', Tad Fels, tac ndli U' ryethe con' ndac co' ndli U' loo nu'. <sup>4</sup> Per nalle', par ne'tolode teche nu' tiemp loo U', ña'ben loo U' ñeene' ché' ta' U' lugar gòn U' ndxep cuent co' tyoodizen loo U' setilte. <sup>5</sup> Nu' ndxòn no nda' nu' cuent le' mbi' ba' nac xal thib yíiz co' nde be tee rye lugar. No ndli mbi' ba' ndxàc chop ned mèn co' nac mèn nación Israel rye lugar. No nac mbi' thib jef che'n xley' mèn co' mbez mèn nac xley' nazaren. <sup>6</sup> No axtaque' mbli mbi' par mte zab mbi' le'n templ nu'. Por cona, mbli mxen nu' mbi' par mblya's nu' ndub rez nu' cón che'n mbi' xalque' ñibe' ley che'n xley' nu' loo nu'. <sup>7</sup> Per ndoole' comandant co' lèe Lis tee yò x'i'tha. No ale mteche yèe comandant mbi' ba' loo nu'. <sup>8</sup> No gunee comandant loo nu' le' mèn co' lya's tub rez cón che'n mbi' más huen ndxàalque' yi'th mèna loo U' par tub rez yub U' cón che'n mbi'. No nalle' nzoque' mod nibdi's yub U' loo mbi' par ta' U' cuent ñeene' ché', lïcque', nac co' mquexù' mque' fals nu' mbi'.

<sup>9</sup> Ndoole' rye mèn nación Israel co' ngure no Tert no co' mqueltàa con Tert ndxab loo gobernador:

—Lïcque' nac rye di's co' ngue ta' Tert cuent loo gobernador. <sup>10</sup> Sya, mbli gobernador thib señ loo Pab par tlo Pab, tub Pab razon che'n Pab loo gobernador. Ndxab Pab loo gobernador:



—Axta gust nda' lezon tuben razon cón chenen loo U', Tad gobernador, tac daa nanee le' U' nac thib justis loo nación nu' co' ndxàcle' lín' ndub par ndub rez U' cón che'n mèn nación nu'. <sup>11</sup> Com le' daa nanee nzoque' mod li la's U', nalze pente ngolo si' fchop huiz mzin daa ciuda Jerusalén par nguan templ par ngua tub xiben no ngua cò'en yéquen loo Diox xalque' nac mod che'n mèn nación Israel. <sup>12</sup> Per yende chó mèn mqueltàa no daa par ndoodizen con mènà par nglin ngátbèe mènà. Ne' ne' yen chó mèn ngnèe daa le' daa mbli par nguátbèe mèn le'n templ o mbli par ngo too ngòc nguàal di's le'n templ. Ne' ne' ngnèe mèn daa le' daa ngua le'n sinagog mènà par mbli par ngo too ngòc nguàal di's tya, ne. Ne' ne' ngnèe mèn daa le' daa ngua par nguátbèe mèn co' nzi tee call le'n ciuda Jerusalén. <sup>13</sup> Mèn co' nziri' loo U' ba' yende mod ta' cuent co' licque' loo U' cón che'n con' co' ngue quexù' ngue que' fals mèn daa. <sup>14</sup> Per part cón chenen con' co', licque', ndlin, daa gol roi loo U' le' daa ndli sirv loo Diox co' nac Diox xudgool daa. No ndlina xalque' ñibe' thib mod cub co' mbez mèn ba' nac thib ley' cub. Tac ndxelazquen xal nac di's co' mque' mèn co' mde'th di's co' ndxab Diox ye's. <sup>15</sup> No ndub queeque' lezon loo Diox xalque' ndub quee lezo' mènà loo diox, co' nee di's, ndub quee lezo' mèn le' mèn co' nguth ryo xban, que nac mènà mèn ndac, no que nac mènà mèn ye'rsin'. <sup>16</sup> Cona, leque daa ndli purad par yende cón tolo ten'en le'n lezon co' nac cón che'n xtol daa loo Diox no loo mèn hues xtàa daa.

<sup>17</sup> Co'se' ngolo nguri'th ndxep lín' co' ngolo mque tee'en chol liz mèn no làaz mèn, mberen, ndyalen par ned làazpe'en tedib vez par tan gòn no par tan ofrend co' ngue tan loo Diox. <sup>18</sup> Con'a ngue lin le'n templ che'n Diox co'se' gunèe ndxep mèn nación Israel, co' nzo ban par ned làaz mèn asia, daa le'n templ. Tac le'pe' mzin huiz co' mdyaa huiz par ngua lin ryethe con' co' mcàbgònen loo Diox lin. Per co'se' mbli con'a, ne'nga noden huax mèn le'n templ no ne' ne' nglin par ngátbèe ndxep mèn con daa le'n templ. Pues, mèn co' mquexù' mque' fals daa nac mèn nación Israel co' nzo ban làaz mèn asia. <sup>19</sup> Mènà ndxàal yi'th loo U' trè' par quexù' que' fals mènà daa chele' mènà ndxàp razon par quexù' que' fals mènà daa. <sup>20</sup> No chele' mènà ne'yi'thte, ñee mèn co' nziri' loo U' ba' ñeene' ché' nzo chó xquin no xtol daa mcuanen co'se' mdoon loo mèn co' ñibe', no co' ndyoo ner, no co' ndyoo naa loo mèn nación Israel pezea. <sup>21</sup> O ¿ne'stolque' ngue quexù' ngue que' fals mèn ba' daa por cabii ndxaben loo mèn co'se' ngòon làth mèn: Gu' ngue tub rez cón chenen nalze por ndxelazen le' mèn co' nguth ryo xban, cà'?

<sup>22</sup> Co'se' mbín Fels co' nac gobernador di's co' ndxab Pab, no com le' Fels huen huen nda' cuent cón che'n mèn co' ndxela's loo xley' che'n Crist, ne'nda'de Fels lugar ndub rez Fels cón che'n mènà. Ndxab Fels loo mènà:

—Cued gu' ndxep huiz. Co'se' yi'th comandant Lis loon, sya, tolo li lazen cón che'n gu' ba'.

<sup>23</sup> Sya, mnibe' Fels loo capitán par quenap solndad Pab xal thib pres. No ta' solndad lugar que tee Pab le'n palas che'n Herod. No ta' solndad lugar loo chol mèn co' nac amiu Pab par yi'th too naa mèn Pab. No ta' solndad lugar loo mèn par li mèn mandad loo Pab.

<sup>24</sup> Co'se' más nda tee huiz, mzin Fels co' nac gobernador con Drusil co' nac sa'l Fels ciuda Cesar. Drusil, sa'l Fels, nac thib xa'got che'n mèn nación Israel. Mbli Fels co' nac gobernador mandad par ye'th Pab loo Fels par tyoodi's no Pab Fels cón che'n yalndxela's che'n Jesucrist. <sup>25</sup> Per co'se' mtlo Pab, mdoodi's Pab cón che'n xá mod ndxàal que tee ban li mèn, no xá mod ndxàal leque mèn li par gáp lezo' mèn par ne'telode cua'n mèn xquin mèn, no cón che'n xá mod gàca loo mèn co'se' tub rez Diox cón che'n mèn, anze'f mzyeb Fels. Sya, ndxab Fels loo Pab:

—Pab, fxen ned. Byàa. Co'se' nalath daa, beren, tel' chezenl par tyoodi's na' tedib vez.

<sup>26</sup> Lomisque' ne, mdub quee lezo' Fels ta' Pab mase plálte tmi par la' Fels bii Pab. Por cona, seguid seguid mbez Fels Pab par ndyoodi's no Fels Pab. <sup>27</sup> Chop lín' ngòca tataa loo Pab. Co'se' ngolo chop lín'a, ngro' Fels, mtelo Fels lín' co' ngòc Fels gobernador. Sya, ngòc tedib mbi' co' lèe Pors Fest co' mcàaya' gobernador lugar che'n Fels. Per com le'

Fels mbly'a's ngyan' bien Fels con mèn nación Israel, ¿lé'?, mtan' Fels Pab xal thib pres loo Pors Fest co' ngòc gobernador cub lugar che'n Fels.

## 25

*Pab mdoo loo thib mbi' co' lèe Fest co' ngòc gobernador cub.*

<sup>1</sup> Mzin Fest ciuda Cesar par mdub Fest lugar che'n Fels par gac Fest gobernador cub. Pente ndxàc son huiz co' mtlo tyub ñibe' Fest, mxen Fest ned, nda Fest par ciuda Jerusalén. <sup>2</sup> Per lath nzo Fest ciuda Jerusalén, ryete mèn co' nac jef co' más ñibe' loo rye nguley', no ryete mèngool co' ñibe', no co' ndyoo ner, no co' ndyoo naa loo mèn nación Israel ngua toodi's no Fest. No mda' mènà cuent loo Fest cón che'n Pab par mna'b mènà loo Fest li Fest justis cón che'n Pab. <sup>3</sup> Mna'b mènà loo Fest li Fest thib favor roo loo mènà par tel' Fest Pab ya Pab par ciuda Jerusalén. Per mod co' mdoodi's mènà no co' thidte ngòc mènà no mod co' mblo xnee mènà ngòc le' mènà mbli par ndxab mènà loo xtàa mènà li mènà mandad guth mèn Pab ned nde Pab ciuda Jerusalén. <sup>4</sup> Per Fest mcàb. Ndxab Fest loo mènà le' Pab nzo cuartel che'n solndad ciuda Cesar xal thib pres. No ndxab Fest le' Fest ngue li xtùuz ya Fest par ciuda Cesar le'n taaplá huiz, no tya tub rez Fest cón che'n Pab. <sup>5</sup> Ndxab Fest loo mènà, ne:

—Cona, ngue niin loo gu': Naquin ya gu' co' más ñibe' ciuda Cesar con daa. No chele' mbi' chó xtol no chó xquin mbi' mcua'n mbi', tya ndxàal tolo quexù' que' fals gu' mbi' loon. Le' sya, daa tub rez cón che'n mbi'.

<sup>6</sup> Pente ngo Fest ciuda Jerusalén xon huiz o si' huiz no maste. Ngoloa, mbere Fest, ndyàa Fest par ciuda Cesar. Co'se' ngo nii izlyo' tedib huiz co' nde nque, ngòo Fest oficin. Mdub Fest par tlo ñibe' Fest. Sya, mbli Fest mandad, ngua xi solndad Pab cuartel. <sup>7</sup> Co'se' ndye'th Pab, sangngòo Pab loo Fest. Le' mèn nación Israel co' nac mèn ciuda Jerusalén co' thidte mzin no Fest ciuda Cesar na, ngòo, ne, co'se' ngòo Pab loo Fest. Mtlo mènà, mqexù' mque' fals mènà Pab cón che'n huax con' co' nac con' ryes loo Fest. Per mastale' tataa mbli mènà, nec thib mod no nec tedib mod ne'ngro xo'fte nec thib con' co' nac licpe' co' mbez mènà par ngagaa Pab. <sup>8</sup> Sya, mtlo Pab, mdub Pab razon cón che'n Pab. Mbez Pab loo Fest:

—Yende chó con' ye'rsin' tarte lin. Ne' ne' tar lin par lin thib con' ye'rsin' loo ley co' nac xley' che'n mèn nación Israel. No ne' ne' tar lin nec thib con' ye'rsin' loo templ che'n Diox co' ndub le'n ciuda Jerusalén. Ne' ne' tar lin con' ye'rsin' loo mbi' co' nac gobiern loo mèn ciuda Rom.

<sup>9</sup> Per com le' Fest mbly'a's ngyan' bien con mèn nación Israel, ¿lé'?, mnibdi's Fest loo Pab. Ndxab Fest:

—Pab, ¿ché' ndly'a'sl ya na' ciuda Jerusalén par tub rezen cón che'nl tya, cà'?

<sup>10</sup> Pab mcàb. Ndxab Pab loo Fest:

—Chele'i tatua' nac, más huen gan loo gobiern co' ndub ñibe' ciuda Rom. Tya, más huen ndxàal tyub rez cón chenen com le' lùu nda'que' cuent no nonque'l tarte lin nec thib con' ye'rsin' loo mèn co' nac mèn nación Israel ne' ne' tar guthen nec thib mèn.

<sup>11</sup> Chele' daa nguan thib xquin daa co' ndli par ndxàalque' gath daa, ingue cà di'sten lool par gath daa. No yende chó mport nzo lezon par gath daa. Per chele' mènà ingue go xo'fte con' co' nac licpe' con' ye'rsin' co' ngue lin lool, yende chó derech ndxàp nec thib mèn no yende chó cón che'n mèn par ta'xù' mèn daa loo mèn nación Israel co' nzo ciuda Jerusalén. Cona, ña'ben di's lool, Fest, más huen tel' lùu daa loo gobiern co' ndub ciuda Rom par tub rez yub gobiern cón chenen.

<sup>12</sup> Per co'se' ngolo mdoodi's no Fest mèn co' thidte ñibe' con Fest, ndxab Fest loo Pab:

—Lùu mna'b di's loon más huen tub rez gobiern co' ndub ciuda Rom cón che'nl. Pues, yal loo gobiern tya, xàa. Ngolo cuent.

*Pab mdoo loo rey Agrip par mdub Pab razon che'n Pab loo rey Agrip.*

<sup>13</sup> Ndxàc plá huiz tataa ndxab Fest loo Pab, ngua rey Agrip con Bernis co' nac sa'l Agrip par ciuda Cesar par ngua nii Agrip Diox loo Fest liz Fest. <sup>14</sup> Láth ngo Agrip plá huiz le'n ciuda Cesar, mda' Fest cuent loo rey Agrip cón che'n Pab. Ndxab Fest loo rey Agrip:

—¿Xá neel, cara? Trè' nzo thib mbi' co' taate mtan' Fels. Ne'ntelode ndub rez Fels cón che'n mbi'. Mtan' Fels mbi' loo solndad xal thib pres. <sup>15</sup> No co'se' ngon plá huiz ciuda Jerusalén pezea, rye jef co' más ñibe' loo rye nguley', no mêngool co' ñibe', no co' ndyoo naa, no co' ndyoo ner loo mèn nación Israel mqueltàa loon. Mda' mèn part loon le' daa li justis cón che'n mbi'. Mna'b mèn di's loon quexù'en que' falsen mbi'. <sup>16</sup> Per daa mcàb loo mèn le' ley che'n gobiern ciuda Rom inda'de lugar par guthxù' mèn nec thib mèn chele' cón che'n mèn tarte tyub rez loo thib no loo tedib mèn par càb mèn no par tub mèn razon loo mèn co' ngue quexù' ngue que' fals mèn. <sup>17</sup> Cona, co'se' mbi'th rye mèn loon trè', luega tedib huiza ngòon oficin daa par mduben co'te' ñibe'en. Mblin mandad ngua xi solndad mbi' par ndye'th mbi' loon. <sup>18</sup> Per rye mèn co' ngo loon par quexù' que' fals mèn mbi' loon, ne'ngol'te mèn arid di's loon xal mblin xtùuz li mèn par tub rezen cón che'n mbi'. <sup>19</sup> Angoluxte nac di's co' nda' mèn cuent loon cón che'n mbi' le' con' co' mbli mbi' nac cón che'n xley' mèn nación Israel. No naca cón che'n thib mbi' co' lèe Jesús co' nguth. No nde'th mbi' loo mèn le' mbi' co' lèe Jesús nabanque'. <sup>20</sup> Per com le' daa ne'neede cón lin con mbi' co' nac cón che'n mbi' co' lèe Pab, ¿lé'?, mnibdizen loo mbi' ché' ndlya's mbi' ya mbi' ciuda Jerusalén par tyub rez cón che'n co' ndxàc loo mbi' ciuda Jerusalén. <sup>21</sup> Per ale ndxe'leque', mcàb mbi' loon más huen ya mbi' loo rey Agust co' nac gobiern co' ndub ciuda Rom. Sya, mnibe'en loo solndad tolo quenap solndad Pab le'n cuartel xal pres axta ta'i lugar loon par tel'en Pab loo rey Agust xal ndlya's Pab.

<sup>22</sup> Sya, ndxab rey Agrip loo Fest:

—Daa, ne, ndlyaz gòn cón che'n mbi', cara, ñeene' xal nac cuent co' ta' mbi' loon.

Sya, mcàb Fest. Ndxab Fest loo rey Agrip:

—Neeca. Chele' lùu ndlya's gòn cón che'n mbi', lueg yé' lin mandad ryo' mbi' cuartel. No gaben loo mbi' ta' mbi' cuent lool.

—Neeca, ndxab rey Agrip.

<sup>23</sup> Co'se' ngo nìi izlyo' tedib huiz co' nde nquea, no co'se' mzin rey Agrip ryop Bernis co' nac sa'l rey, anze'f ndye's rey Agrip con Bernis mzin xa' no ngòo xa' le'n sal liz Fest con mèn co' nac general no con mèn roo no mèn xèn che'n ciuda Cesar. Le Fest na, mtel' solndad par ngua xi solndad Pab. <sup>24</sup> Sya, ndxab Fest loo rey Agrip:

—Tad rey Agrip, no rye gu' mèn ciuda Cesar co' nziri' trè' con nu', trè' lu'en mbi' ndxè' loo gu'. Cón che'n mbi' ndxè' nac co' mdan cuent loo gu' pezea le' huax mèn nación Israel mda' cuent contra mbi' ndxè' loon. Le'le' mda' mèn nación Israel co' nzo ban le'n ciuda Jerusalén cuent loon. No le'le' mda' mèn nación Israel co' nzo ban ciuda Cesar ndxè' cuent loon, ne. No imbe see teede lezo' mèn. Mbez mèn loon ndxàalque' gath mbi'. <sup>25</sup> Per part cón chenen, ndyaquen yende cón tar li mbi' par ndxàalque' gath mbi'. No com le' mbi' yub mna'b di's loon par más huen ya mbi' loo Agust co' nac gobiern co' ndub ñibe' ciuda Rom par tub rez yub Agust cón che'n mbi', nquin tel'en mbi', ndyaquen. <sup>26</sup> Per yende chó con' ndli precis loon par ndoo líte que'en thib cart cón che'n mbi' loo Tad daa, Agust. Cona, más huen mblin mandad ndye'th mbi' loo gu' no más nquin ndlyazen, rey Agrip, gòn U' cón che'n mbi' par ñibdi's U' co' huenleque' loo mbi' par tataa mod más ndoo líte que'en ye's cón che'n mbi' loo Tad Agust daa co' nac gobiern co' ndub ciuda Rom. <sup>27</sup> Ndyaquen ihuente nac co' lin par tel'en thib mbi' co' nac thib pres chele' daa ne'tel'te di's loo Tad daa, Agust, cón che'n xá mod ngue quexù' ngue que' fals mèn cón che'n mbi' co' nac thib pres. Cona, ndlyazen más ndoo líte tel'en ye's cón che'n mbi' ndxè' loo Tad daa, Agust.

## 26

*Pab ngue tub razon che'n Pab loo rey Agrip.*

<sup>1</sup> Sya, ndxab rey Agrip loo Pab:

—Pab, fta' cuent cón che'nl loon.

Sya, ngòo Pab loo rey Agrip. Gunii Pab Diox loo rey Agrip no loo taamas mèn co' ngo no rey Agrip. Mtlo Pab, mdoodi's Pab taandxè':

<sup>2</sup>—Anze'f huen nzo lezon no axta gust nda' lezon por mda' U' lugar loon toodizen loo U', rey Agrip, par tuben razon cón chenen cón che'n ryethe con' co' mquexù' mque' fals mèn naciòn Israel daa le'n tiemp co' nde teele' ndri'th. <sup>3</sup>Más de cona, ndyac lezon tac U' nda'que' cuent no nonque' U' xal nac costumbr co' mbed no nu', nu' co' nac mèn naciòn Israel, no cón che'n di's co' ndxetoo làth nu'. Con'a, ndlyazen no ña'ben loo U' ta' U' nza U' par gòn U' di's co' toodizen loo U' nalle'.

*Pab ngue ta' cuent loo rey Agrip xá mod ngòc Pab ndoore' yila's Pab loo Tad Jesucrist no loo cón che'n Tad Jesucrist.*

<sup>4</sup>Ryete mèn naciòn Israel naneeque' no nda' mèn cuent xá mod ngòc daa no xá mod mque tee banen làth mèn làaz daa no le'n ciuda Jerusalén anon mtlo mdoo xènen. <sup>5</sup>Rye mèn co' nziri' loo U' ba' non no nda' mèn cuent cón chenen. No nzoque' mod co' xo'f mèn no ta' mèn cuent cón chenen chele' mèn ba' ndlya's le' daa ndaque' cuent anon ndoo roo'en no ndoo xènen nac daa thib mèn xley' farise co' nac thib ley' co' más ñibe' yèe loo mèn li mèn xalque' ñibe' xley' nu' loo nu' par li nu'. <sup>6</sup>No nalle' mqueltàa mèn ba' loo U' par tub rez U' cón chenen por ante thib con' no maste co' nac co' ndub quee lezon le' Diox co' xban mèn nguth xalque' gunii Diox no mcàbgòn Diox loo mèn gool co' ngòc xudgool nu' póla. <sup>7</sup>Ryete si' fchop ned mèn co' mche's bin co' nac mèn naciòn Israel nalle' nzi bed par tyaa no gàcque' con' co' mcàbgòn Diox. Por cona, ze no yál' ndyub xib mèn no ncò' mèn yéc mèn loo Diox. No ndli mèn sirv loo Diox ze no yál'. No ante por cón che'n leque con'a ngue quexù' ngue que' fals mèn naciòn Israel daa nalle', Tad rey Agrip. ¿Xá nee U'? ¿Ché' lé' nac co' ngue li no mèn naciòn Israel daa, cà'? <sup>8</sup>No ¿ché', licque', por derech, indxela'ste U' le' Diox co' xban mèn nguth, cà'? Pà ne'yila'ste U'i, ¿lé'? Ndxela'sque' U'i.

*Pab ngue ta' cuent loo rey Agrip xá mod mque tee ndub ngu's Pab mèn co' ngola's loo Crist thib cua'a.*

<sup>9</sup>Per ndoore' yilazen loo Jesucrist no loo cón che'n Jesucrist mxaquen mblin con' huen co'se' mblin con' ye'rsin' loo mèn co' ngola's no co' mqueltàa loo cón che'n Jesucrist co' ngòc mbi' che'n yèez Nazaret. <sup>10</sup>No tataaguè' mblin con' mèn co' ndxela's loo Jesucrist le'n ciuda Jerusalén. Ale axta mna'ben ord loo mèn co' nac jef co' más ñibe' loo rye nguley' par mblon huax mèn co' ngola's loo Jesús lezi'f. No co'se' mdoo lezo' mèn guth mèn mèn co' ndxela'sa, daa, ne, thidte ngòc con' mèn. No ale mdyac lezon mbeth mèn mèn. <sup>11</sup>Huax vez mtetiin mèn axta mod co' mbyazen par ñeen ñeene' ché' tlin gan par ncà di's mèn cón che'n mod xal ndxela's mèn cón che'n Jesús. Mblin con'a rye lugar co'te' ngue no mèn sinagog mèn. No anze'f ngocloo tín'en con' mèn axtaque' mque tee mdub ngu'sen mèn le'n huax ciuda co' nac làaz mèn tith.

*Pab ngue ta' cuent loo rey Agrip cón che'n xá mod ngulàa yéc no ngulàa lezo' Pab par ngòc Pab mèn co' ngòo loo cón che'n Tad Jesús.*

*(Hch. 9.1–19; 22.6–16)*

<sup>12</sup>No par tolo lin leque con' ye'rsin'a, nguan axta ciuda Damasc con' ye's co' nac ord co' mda' no co' mnibe' mèn co' nac jef co' más ñibe' loo rye nguley' loon. <sup>13</sup>Per co'se' mdoon ned ndan par ciuda Damasc, com hor rol huiz, Tad rey, gunèen mbya'x thib xni co' ngulàa loo bé' co' mtenii más leque huiz loon no loo mèn co' ngua non. <sup>14</sup>Leque hora, ryete nu' ngulàa loo yòo. No mbinen thib di's co' mbyèn loo mbii loon co' gunii loon xal nac di'stèe co' ndyoodi's mèn naciòn Israel. Gunee di'sa loon: Saul, Saul, ¿chonon ngue tee ndub ngu'sl daa, à', ey? Leque lùu ngue tehuí' ladl con' con' ye'rsin' co' ngue lil loo mèn. Ndlila xal ndli ngon co'se' nque' ngon patad loo punt yaarach co' nguid mèn ladl ngon co'se' ntezeb mèn ngon. <sup>15</sup>Sya, ndxaben: ¿Chó nac lùu, Tad? Tad gunee loon: Daa nac leque yub Jesús co' ngue tee ndub ngu'sl. <sup>16</sup>Per nalle', goo che no goo too. Daa

mxyo'f loo lool taandxè' mod par xo'f zin'l zin' cón chenen no par ta'l cuent loo mèn cón che'n con' co' gunèel no cón che'n con' co' ndxàc lool nalle' no con' co' lu'en lool yiloo. <sup>17</sup> Na li par lyá'l la's ya' mèn nación Israel. No lin par lyá'l la's ya' mèn tith co' inacte mèn nación Israel. No nalle' na ñibe' lool par ya lol yalbàn loo mèn. <sup>18</sup> Ñibe'en yal loo mèn, Saul, par lil tyub xnii yéc mèn no tyub xnii lezo' mèn loo cón che'n Diox par ya ne'tolode que tee ban mèn loo con' ye'rsin' co' nac xal co'se' nzi tee mèn loo ya'cuau. Per ndxe'leque', que tee ban li mèn loo con' ndac xal co'se' ndyee mèn loo xnii huiz. No lomisque' ne, lin par ya lu'l loo mèn par ne'tolode que tee li mèn con' co' nac co' ñibe' Mebizya loo mèn no par, ndxe'leque', más huen que tee li mèn con' ndac no yòo mèn loo cón che'n Diox. No lil par yila's mèn loon, daa co' nac Jesús. No lil par lyàa yéc mèn no lyàa lezo' mèn par tataa mod tyon' xtol mèn no xquin mèn. No lil par que no mèn no par yan' no mèn con' co' ngro' lezo' Diox ta'la's Diox càa mèn, mèn co' mbli Diox par ngro xà' mèn loo cón che'n xab izlyo' par ngòc mèn che'npe' Diox.

*Pab ngue ta' cuent loo rey Agrip le' Pab ndubdi's di's co' mbìn Pab co'se' mxyo'f loo Tad Jesús loo Pab.*

<sup>19</sup> Cona, ngue niin loo U', Tad rey Agrip: Ne'ngàcte daa mèn co' ne'ndubdi'ste di's co' gunii Tad Jesús loon, di's co' mbyèn loo bé' loo mbii loon. <sup>20</sup> Ndxè'leque', ngua tethen no ngua lon yalbàn cón che'n di's ndac che'n Diox nerleque' loo mèn ciuda Damasc. Ngoloa, nguan loo mèn ciuda Jerusalén. Ngoloa, nguan loo mèn par ned le'n rye yèzya' co' nac làaz che'n mèn jude par ngua lon yalbàn cón che'n di's ndac loo mèn par neda, ne. No nguan loo mèn co' inacte mèn nación Israel chol lugar. Mbezen loo rye mèn ndxàal lyàa yéc mèn no lyàa lezo' mèn no zye' mod co' ndxàp mèn loo Diox par yòo mèn loo cón che'n Diox. No mnibe'en loo mèn lu' mèn thib mod ndac loo taamas mèn le' mèn, lìcque', ngulàa yéc no ngulàa lezo' mèn no mzye' mod co' ndxàp mèn loo Diox. <sup>21</sup> Ale con'ate mbli mxen mèn nación Israel daa le'n templ no mblya's mèn guth mèn daa, Tad rey Agrip. <sup>22</sup> Per Tad Diox ndlyath noque' daa. Ne'nglá'ya' de Tad Diox daa. Thidteneque' mbli nèn daa axta huiza no axta huiz nalze loo cón che'n Diox. Ngon yalbàn cón che'n di's ndac che'n Diox loo chol mèn, que naca loo mèn be'the, que naca loo mèn co' nde'f di's nac mèn de razon. Thidtene tarte tan cuent co' nac tedib cuent xà' loo di's co' nac di's co' mde'th mèn, mèn co' mde'th di's co' ndxab Diox no co' nac di's co' mde'th Moisés cón che'n con' co' gac yiloo, co' nee di's, con' co' ndxàc nalle'. <sup>23</sup> Con' co' ndxàc nalle' nee di's le' Crist mquinque' mxactii. No co'se' ngolo nguth Crist, Crist ngòc nerleque' xa' co' ngro xban làth mèn nguth. Tataa ngòca loo Crist par ndli Crist ndxòn mèn cón che'n di's ndac co' ndli ndyub xnii yéc mèn no ndyub xnii lezo' mèn, que naca loo mèn nación Israel co' nac mèn gulàaz daa, que naca loo mèn co' inacte mèn nación Israel.

*Pab mdoo lezo' li Pab gan gac nado' rey Agrip par tyal rey Agrip yila's rey Agrip loo Jesucrist no loo cón che'n Jesucrist.*

<sup>24</sup> Co'se' ngolo tataa ndxab Pab no mdub Pab razon che'n Pab loo rey Agrip, cabii ngrozèe Fest. Ndxab Fest loo Pab:

—Por tant mblil stud, Pab, axta nquée mbii yécl, ndyaquen.

<sup>25</sup> Pab mcàb loo Fest. Ndxab Pab:

—Tyè', Tad Fest. Inquéede mbii yéquen. Ndxè'leque', mbezen con' co' nac razon loo gu'. No mbezen con' co' nac lìcpe' loo gu'. <sup>26</sup> Rey Agrip ndub go'. Rey Agrip nda' cuent no nanee rey Agrip ryete con' co' ndxàc cón che'n Tad Jesucrist nalle'. Por cona, dibaxla's ndyoodizen no ngue tan cuent ndxè' loo rey Agrip tac nanepe'en le' rey Agrip non cón che'n ryethe con' co' ndxàc nalle' cón che'n Jesucrist. Con' co' ndxàc nalle' co' nac cón che'n Jesucrist inacte con' co' nzo casloo thib lugar co'te' ne'yú'da loo mèn. Ndxè'leque', loo xnaa ndxàc ryethe con'a loo mèn. <sup>27</sup> Sya, mbere Pab. Mnibdi's Pab loo rey Agrip. Ndxab Pab:

—¿Ché' ndxela's U', Tad rey Agrip, di's co' mde'th mèn, mèn co' mde'th di's co' ndxab Diox, à'? Aa. Neequen le' U' ndxela'sque' xal ndxab mèn.

<sup>28</sup> Sya, ndxab rey Agrip loo Pab:



—¡Jaa! ¿Máa yob yécl, Pab? ¿Ché' ndlya'sl setilte lil gan yilazen xalte mbezl ba' par yilazen loo Jesucrist no loo cón che'n Jesucrist, cà'? Yende xàa.

<sup>29</sup> Pab mcàb. Ndxab Pab loo rey Agrip:

—Yende cón lii, Tad rey Agrip, que naca yila's U' xalte ndyoodizen nalle' o que naca yila's U' más yé' huize', conse' yila's U'. No, oj, li Diox iante U' yila's loo Jesucrist no loo cón che'n Jesucrist. Ndxé'leque', li Diox le' ryete mèn co' nzi yòn cuent co' ngue tan loo gu' nalle' gác mèn xal daa, co' nee di's, yila's mèn loo cón che'n Jesucrist. Per ne'gàcte mènà mèn co' tyub dó' caden nii no co' tyub dó' caden ya' xal ndxàca loon trè'.

<sup>30</sup> Ngolo tataa ndxab Pab loo rye mènà, ngro' rey Agrip con Bernis co' nac sa'l rey Agrip. No ngro' gobernador Fest, ne, con ryete mèn co' nzi ndub. <sup>31</sup> Ryete mènà ngro' thìb lad par tolo mdoodi's mènà cón che'n Pab. No mbez mènà loo xtàa mènà:

—Yende cón tar li mbi' co' ndli par naquinque' gath mbi'. No axta ne' ne' indxàal tolo que' mbi' lezi'f.

<sup>32</sup> Sya, ndxab Agrip loo Fest:

—Ngàcque' ngtelá'l mbi' pezea, Fest, chele' mbi' ne'ngna'bte di's lool par nga mbi' loo gobiern co' ndub ciuda Rom par tyub rez cón che'n mbi'.

## 27

### *Fest mnibe' loo capitán par ngua lá' solndad Pab loo gobiern co' ndub ciuda Rom.*

<sup>1</sup> Co'se' mnibe' lezo' Fest con Agrip par tel' Fest ryop Agrip nu' ya nu' ciuda Rom co' nac làaz mèn ital, leque hora mnibe' Fest loo solndad ryo' Pab con taaplá pres par ta' solndad Pab con presa loo thìb capitán co' lèe Jul. Capitana ñibe' loo thìb ayo solndad co' lèe partid che'n rey Agust. <sup>2</sup> Ngro' nu' ciuda Cesar. Ngòo nu' loo thìb yòoyaa co' nac thìb yòoyaa che'n mèn co' nzo ban thìb puert co' nziri' ro nítto' co' lèe Adramit. Yòoyaa le'pe' ryo' par xyo'f yòoyaa loo nítto' axta co'te' nziri' puert co' nac loo xyòn mèn asia. Le'xque' huiza ngo no nu' thìb mbi' co' lèe Aristarc co' nac mbi' gulàaz mèn ciuda Tesalónica. Tesalónica nac thìb ciuda co' ñibe' mèn yèezya' co' nac che'n làaz mèn macedon. <sup>3</sup> Tya mdoo nu' loo nít dib yál' axta ngo nì izlyo' tedib huiz co' nde nque. Mzin nu' puert co' lèe Sidón. Tya mblyat lezo' Jul co' nac capitán gunèe Jul Pab. Mbla' Jul ngro' Pab chu'th loo yòoyaa par ngua nee Pab máa mèn co' ndxàc amiu Pab no par li mènà cas Pab, ne. <sup>4</sup> Co'se' ngro' nu' puert che'n Sidón, mbri'th nu' thìb lad co'te' nziri' yòo biiz Chipr. Mbyan' yòo biiz Chipr lad rebes co'te' nguri'th nu'. Tataa mbli nu' tac mbii mtau' loo nu' loo nít. Anze'f mdin mbii yòoyaa par ne'ngri'thte yòoyaa nu' thìb lì. <sup>5</sup> Tya mcho' nu' nít par nguri'th nu' loo xyòn mèn che'n gulàaz mèn cilis no loo xyòn che'n gulàaz mèn pamfil axta mzin nu' thìb ciuda co' lèe Mir co' nac thìb ciuda co' ñibe' loo yèezya' che'n làaz mèn lis.

<sup>6</sup> Ciuda Mira, tya mzyál' nu' thìb yòoyaa co' nac che'n mèn ciuda Alejandri co' nda par nación Ital co'te' nac ciuda Rom. Mbli solndad par ngòo nu' loo yòoyaaa par tolo xyo'f nu' loo nítto' axta zin nu' co'te' nda nu'. <sup>7</sup> Huax huiz sau' sau' mxyo'f nu' loo nítto'. No añenti mzin nu' ro nítto' co'te' nziri' thìb puert co' lèe Gnid. No com le' mbii be' mtau' loo nu' no be' mdin mbii yòoyaa nu', ¿lé'?, sangnguri'th nu' par ned sur co'te' nziri' tedib puert ro nítto' co' lèe Salmón. Tya mcho' nu' nít par mblo nu' vult loo nítto'. Angnzo ro yòo biiz co' nziri' le'n nítto' par ned sur co' lèe Cret. <sup>8</sup> Tya añenti mbere nu' tolo mxyo'f nu' loo nítto', nda nu' nzo ro yòo biiz co' lèe Cret, axta mzin nu' tedib puert co' nziri' ro nítto' co' lèe Buenos Puertos co' nziri' gaxte tee nziri' tedib yèez co' lèe Lase.

<sup>9</sup> No por mtau' mbii loo yòoyaa loo nítto', ndoo ri'thle' huax huiz nzo'f nu' loo nítto'. No nde nixon', ndxàc con' ryes loo nu' par tolo xyo'f nu' loo nítto' tac casque' nde zin' gaxle' tiemp xìl'. Tiempa anze'f thìb mbii nxyo'f loo nítto'. No por con'a, ryes naca par xyo'f mèn loo nítto'. Por cona, ndxab Pab no mco'x Pab loo mèn co' ntetee yòoyaa loo nítto'. <sup>10</sup> Ndxab Pab loo mènà:

—Amiu, ñeen no nonen anze'f thìb con' ryes gác loo na' loo nítto' ned nda na' chele' na' tolo xyo'f loo nítto' nda na'. No nonen no naneen nzo ryes dyep yòoyaa le'n nítto'

no tataa mod lyux rye yó' co' nzo loo yòoyaa ndxè'. No axta na', ne, nzo ryes lyux loo yòoyaa. Chele' gu' ne'gònte ron, gàca loo na' chele' na' tolo xyo'f loo níttó' nda na'.

<sup>11</sup> Per capitán co' nda no solndada, más mbìn capitán ro mbi' co' nac xuan' yòoyaa no ro mbi' co' ñibe' loo mèn co' ntetee yòoyaa leque ngòn capitán ro Pab. Ale mbli xa' co' ndlya's xa'. <sup>12</sup> No com le' puerta ne'ñeede par yan' mèn no riid mèn tiemp xil' tya, ¿lé'?, ryete mèn mbli xtùuz más huen sangriid mèn par ñee mèn ñeene' ché' tli mèn gan zin mèn tedib puert co' nziri' ro níttó' co' lèe Fenis co' nac tedib puert che'n leque yò biiz co' lèe Cret. Puerta nziri' gax cuat yí co' ntau' loo mbii. Yíia ntau' loo mbii no loo ol che'n níttó'. Ndxan' puerta par ned sur. No ro puert níttó'a ndxòo mèn con yòoyaa loo nít che'n puerta par ned sur no par ned ndlyen huiz. Puerta nziri' le'n nít co' nac yò biiz par ned nort con ned ndlyen huiz.

*Luc nda' cuent xá mod ngulàa thib yuuloo loo níttó'.*

<sup>13</sup> Ngoloa, mtlo xègà xègà mxyo'f mbii co' nde par ned sur. Mèn co' nzo le'n yòoyaaa mbli xtùuz nzoque' mod tolo xyo'f mèn loo níttó' par tolo tyee mèn ned nda mèn. Sya, mtetee mèn yòoyaa. Ngro' mèn loo yò biiz Cret. Mxyo'f mèn loo níttó' xal nda ro yò biiz Cret par ned mbix huiz. <sup>14</sup> Per ndxepete ndxàc ngro' nu' puert Buenos Puertos, ngro' thib mbiidó'. Mtlo mbii, mdin mbii yòoyaa. Mbiia mbez mèn lèe Mbii Noreste. <sup>15</sup> Ale mbe' mbii yòoyaa'. Com le' nu' ya ne'ntolode ngác nxyo'f loo níttó' por mtau' mbii loo yòoyaa, ale mblá' nu' mbe' mbii yòoyaa ned nda mbii. <sup>16</sup> Mtetee mbii yòoyaa nu'. Mzin nu' axta co'te' nziri' tedib yò biiz chu'th le'n níttó' co' lèe Claud. Tyare' ngued ya ne'ntolode arid nguin mbii yòoyaa ndxep. Tya añenti mbli nu' gan mteche nu' yòoyaa chu'th co' ngue par xís yòoyaa par mblo nu' yòoyaa chu'tha le'n yòoyaa. <sup>17</sup> Ngolo mblo nu' yòoyaa chu'tha le'n yòoyaa, mchì'x mèn cabl lad yòoyaa par msál' mèn yòoyaa par tataa mod ne'silte ol nít yòoyaa. Leque hora, co'se' gunèe mèn yamerle' riid yòoyaa co'te' ina'ste arid loo nít thib lugar co' lèe Sirt, co'te' anze'f thib yux nziri' le'n nít, anze'f mzyeb mèn yicà' yòoyaa loo nít. Ale mblá' mèn mbe' mbii yòoyaa ned nda mbii. <sup>18</sup> Co'se' ngo nii izlyo' tedib huiz co' nde nquea, tatabe' fuert ndoo yuu. No nzo'f mbii loo nít. Mtlo mèn, mblobii mèn yó' co' nzo le'n yòoyaa loo níttó' par xya'x yòoyaa ndxep par ne'dyepete yòoyaa le'n níttó'. <sup>19</sup> Co'se' ngo nii izlyo' tedib huiz co' ngòc mbyon huiz mdoo nu' loo níttó' desde co'se' mtlo mxyo'f mbii, mtlo nu', mblo' nu' ryethe con' co' nzo le'n yòoyaa. Mblobii nu' rye con' loo níttó'. <sup>20</sup> No mqueltàa thidtene mcuau izlyo' le'n huax huiz tant ndoo yuu. Ne'ngácte nghui' nu' loo huiz. No ne'ngácte nghui' nu' loo mbyáaz loo bé'. Más de cona, anze'f nguin ol níttó' lad yòoyaa por tant thib mbii co' nxyo'f loo níttó'. Por lult, mbli nu' cuent ya ne'lyá'de nu' loo níttó'. Ya nu' looi loo níttó'.

<sup>21</sup> No com le' nu' ne'nghuade dib lal ndxàc con' ryesa loo nu' loo níttó' loo yòoyaa, ¿lé'?, ngo too Pab loo mèn. Ndxab Pab:

—Amiu, más huen ngàca loo na' chele' gu' ngòn ron ne'nga riidte na' ned nziri' yò biiz Cret par ne'ngácte yalquii ndxè' no yaltii ndxè' loo na', ndyaquen. <sup>22</sup> Per nalle' na nii loo gu': Ne'zyebte gu'. No ne'tyoo xà'de lezo' gu'. Ndxè'leque', bli gu' par ye'th lezo' gu'. Tac mastale' ndxàc con' ndxè' loo na', nec thib na' ne'gathte. Aa guneei, mastale' lyux yòoyaa. <sup>23</sup> Tac ná' xhuina mxyo'f loo thib angl che'n Diox, co' mtel' Diox mbi'th loon, daa co' nzo loo Diox, loo Diox co' ndlin sirv. <sup>24</sup> Angl gunee loon:

—Ne'zyebetel, Pab. Lùu naquinque' ya too loo mbi' co' nac gobiern co' ndub ñibe' ciuda Rom. No por cón che'nl, Diox telá'que' ryete gu' co' nzo loo yòoyaa par ne'gathte gu' loo níttó'.

<sup>25</sup> Por cona, ngue niin loo gu': Amiu, bli gu' par ye'th lezo' gu' tac daa ndxelaz loo Diox no ndxàpen yalxla's loo Diox le' Diox li gàcque' con'a loo na' xalque' gunee angl di'sa loon. <sup>26</sup> No que nzo ne'ñee lezo' na', ryo' na' loo yòoyaa gaxte co'te' nziri' thib yò biiz par xyo'f na' loo níttó' par ryo' na' loo yò biiz.

<sup>27</sup> Co'se' ngolo chop sman mxyo'f nu' loo nít, ngro' zi'f nu' thib lugar loo níttó' co' lèe Adr tac mbe' mbii yòoyaa thib lad tedib lad. Co'se' nde yáal gulal yál', mda' mèn co'

ntetee yòoyaa cuent le' yòoyaa nda yizi'fle' gax ro yòo biiz le'n nítto'. <sup>28</sup> Tya mchì'x mèn, co' ntetee yòoyaa loo nítto' par ñee mènna pló na's nzi nít par xàn' loo yòo. No co'se' mblo' xa' dó' co' mblàa xa' le'n nítto', pente nzi nít par xàn' loo yòo gal psi' pson metr no maste. Mdee nu' taandxep más delant. Tya mbere mèn co' ntetee yòoyaa, mblàa mènna dó' le'n nítto' tedib vez. Mchì'x mènna nít par ñee mènna pló na's nzi nít par xàn' loo yòo. Co'se' mblo' mènna dó' le'n nít, pente nzi nít loo yòo gal bgaz metr, no maste. <sup>29</sup> No por mzyeb nu' yizi'f yòoyaa loo quèe, mblàa mèn co' ntetee yòoyaa thap ancl co' ngue par ned xís yòoyaa par ngo too yòoyaa loo nít. No nzi bed nu' no nxi lezo' nu' coyor yinìi izlyo' no cón gác loo nu'. <sup>30</sup> Látha, mèn co' ntetee yòoyaa mbli xtùuz lyá' mènna loo yòoyaa, co' nee di's, xyon' mènna loo yòoyaa loo nítto'. No por cona, mblàa mènna yòoyaa chu'th co' nzo le'n yòoyaa loo nítto' par yòo mènna loo yòoyaa chu'tha par xyon' mènna. Mbli mènna tataa xal mèn co' ne'ñeede xal mèn co' nda làa ancl co' ngue ned xís loo yòoyaa le'n nítto'. <sup>31</sup> Per Pab mbli avis loo capitán che'n solndad. No mbli Pab avis loo solndad che'n capitán. Ndxab Pab loo capitán no loo solndad:

—Chele' mèn co' ntetee yòoyaa ne'tolode yan' loo yòoyaa, yende mod lyá' gu' loo con' ryes co' ndxác loo na' ndxè'.

<sup>32</sup> Sya, mcho' solndad cabl co' natedó yòoyaa chu'th. Mblobii solndad yòoyaa chu'tha le'n nítto'.

<sup>33</sup> Ngóol coyor cuar, ndxab Pab loo ryete mèn co' nzo loo yòoyaa naquinque' hua mèn mase sa pan. No ndxab Pab:

—Ndxàcle' chop sman tarte gát gu' no tarte hua gu', cara. Fta' gu' fuerz dhua gu' mase sa pan par xec gu'. <sup>34</sup> Cona, ngue bezen loo gu': Fta' gu' fuerz. Dhua gu'. Anze'f naquin hua na', ndyaquen, par xec na' lyá' na' loo con' ryes naba'. Tac de loo rye na' co' nzo loo yòoyaa ndxè', nec thib na' ne'gathte no ne'lyuxte.

<sup>35</sup> Co'se' ngolo ndxab Pab tataa loo rye mèn co' nzo loo yòoyaa, mxen Pab sa pan. No ndxab Pab: Diox quix U', Tad Diox, loo ryete mènna. Ngoloa, mtlo Pab, nduhua Pab. <sup>36</sup> Látha, ale rye mènna mbye'th lezo'. No ndyac lezo' mènna nduhua mènna, ne. <sup>37</sup> Ryete nu' co' ngo le'n yòoyaa tiempa ngòc chop ayo nzo ayon psi' fxop nu' por loo rye nu'. <sup>38</sup> Co'se' ngolo nduhua mènna axta plóthe mblya's mènna, mxen mèn sac triu. Mblobii mèn sac triu le'n nítto' par tolo xya'x loo yòoyaa.

*Luc ngue ta' cuent le' yòoyaa mdyep le'n nít.*

<sup>39</sup> Co'se' ngo nìi izlyo' huiza, mèn co' ntetee yòoyaa ne'ta'de cuent chó lèe yòo biiz co'te' mzin nu'. Per gunèe mènna nziri' thib puert chu'th tya co'te' nac thib play más nabe's. Mdoo lezo' mènna ñeene' ché' nzo mod zii mènna yòoyaa ro playa. <sup>40</sup> Mcho'guth mènna cabl co' nden ancl. Mblá' mènna mbyan' ancl le'n nítto'. Sya, mtele' mènna dó' che'n timón co' mbli mènna us par ntetee mènna yòoyaa. Sya, mque' mènna lar' lad yòoyaa ned nac loo yòoyaa. Sya, xègà xègà mbli mènna gan mtetee mènna yòoyaa ro play. <sup>41</sup> Per nde nxon', ale ngozi'f yòoyaa co'te' ndxác chop loo nítto'. Le' yòoyaa na, ngo tub cà' le'n yux ro playa. Ale ngo tub cà' ned loo yòoyaa le'n yux ro play. ¿Chó mèn gác cuin mase chu'th yòoyaa? Thidtene ngo tub cà' yòoyaa. Le' par ned xís yòoyaa na, mtlo ngro' bil con golp co' nguin ol nítto'. <sup>42</sup> Láth ndxác con'a loo yòoyaa, ale mblya's solndad nguth solndad rye pres par ne'lyá' de pres no par ne'xon'te nec thib pres co'se' xyo'f pres loo nít. <sup>43</sup> Per capitán co' ñibe' loo solndad mblya's lyá' Pab no yende cón tolo gác loo Pab. Ne'ngla'de capitán ngli solndad tataa loo pres. Ndxé'leque', mnibe' capitán loo rye mèn co' nzo loo yòoyaa le' ryete mèn co' ndxác nxyo'f loo nít, xyo'f mènna loo nít par ryo' ner mènna loo yòo biiz. <sup>44</sup> Le' mèn co' ne'ngácte nxyo'f loo nít na, mènna más huen xyo'f loo nít loo pedas tabl che'n yòoyaa co' ngro' bil par tataa mod lyá' ryete mèn, ryo' mènna loo yòo biiz. Por lult, tataa mbli ryete mènna par ngro' mènna loo yòo yiiz. Ne'ngathte no ne'ngluxte nec thib mènna.

<sup>1</sup> Co'se' gunee nu' ngolole' mblyá' ryete nu' loo con' ryes loo níttó', mda' nu' cuent le' loo yòo biiz co' nziri' le'n nít co'te' ngro' nu'a lèe Malt. <sup>2</sup> Mèn co' nac mèn yòo biiz Malt anze'f mbli cas nu'. Mtol' prob mèna quii. Mtoocua' mèna yaa loo quii par ngo too bèel par biiz nu' no par tecui's nu' xab nu' tant ngoz nu' no tant ndxàl nu' por tant ndoo làa yuu. Sya, ngurez mèna nu' par ngua biiz nu' ro dii. <sup>3</sup> Látha, no tee Pab ngua cua'n ndxep yaa co' más nabiiz taachu'th. Ndye'th no Pab yaaa. No láth ngue tecua' Pab yaaa loo quii, chàa, ngro xon' thib mbel' co' lèe huid xi'th yaaa por mden' huid rso' che'n quii. Co'se' mden' Pab le' huid mquele ya' Pab, ale ngue tal huid ya' Pab tant fuert mquele huid ya' Pab. <sup>4</sup> Co'se' gunèe mèn yòo biiz Malt ngue tal huid ya' Pab, ndxab mèna loo thib xtàa mèn no loo tedib xtàa mèn:

—¿Ché' ndyac gu' le' mbi' ba' nac thib mbi'guth mèn, lé'? Mastale' mblyá' mbi' loo níttó', per Diox ne'la'de tolo ban mbi' con'a mquele huid mbi'. Nase gath mbi', como quer.

<sup>5</sup> Le' Pab na, ale, mzib Pab ya' Pab loo quii par ngulaa huid loo quii. No ale yende cón mxac Pab. <sup>6</sup> Le' ryete mèn co' nzi hui'a na, nzi bed mèna ñeene' coyor lyàa quii ya' Pab. No nzi bed mèn ñeene' coyor gath Pab. Per dib lal nzi bed mèn, ñèe mèn yende cón ndyac Pab. Sya, mse' mèn xtùuz mèn. Ndxab mèn loo xtàa mèn:

—Pab nac thib diox, cara.

<sup>7</sup> Gaxte tya nziri' ranch che'n thib mbi' co' nac jef loo mèn yòo biiza. Mbi'a lèe Publ. Mbi'a mda' lugar ngòo nu' liz mbi'. No mda' mbi' con' nduhua nu' no con' ngu nu' le'n son huiz co' nguled nu' liz mbi'. <sup>8</sup> Nde nxon', nax yíiz xud mbi', co' lèe Publ, con xlé' no con yíizbren. Pab ngua too naa xud mbi' liz xud mbi'. Ngurez Pab Diox por cón che'n xud mbi'. Ngoloa, mxo'f Pab ya' Pab lad xud mbi'. Ale mteyac Diox mbi'. <sup>9</sup> Co'se' ñèe mèn no co'se' mbin mèn yòo biiza tataa mbli Diox por cón che'n Pab, ngua taamas mèn co' ndyac yíiz loo Pab. Mteyac Diox mèna por cón che'n Pab, ne. <sup>10</sup> No ale anze'f mbli mèna con' guryath no con' guryèn loo nu' le'n huiz co' ngo nu' loo yòo biiza. No anze'f mbli mèna cas nu'. No co'se' gunèe mèna ngòo nu' le'n tedib yòoyaa par xyo'f nu' loo níttó' tedib vez, mda' mèna gast co' naquin nu' par tolo xyo'f nu' loo níttó' axta zin nu' co'te' nda nu'.

*Trè' ndlu' le' Pab mzinle' ciuda Rom.*

<sup>11</sup> Mbyan' nu' son mbe' yòo biiz Malt. Ngoloa, ngòo nu' loo thib yòoyaa che'n mèn co' ngua riid tiemp xil loo níttó' ro play che'n yòo biiz Malt. Yòoyaaa ngòc che'n mèn ciuda Alejandri. Lad yòoyaaa ngue gunab che'n chop dioxpe' mèn, diox co' lèe Cástor no tedib diox co' lèe Pólux. Mxyo'f nu' loo níttó'. Nda nu' axta mzin nu' co'te' nda nu'. <sup>12</sup> Be taa be taa nda xo'f nu' loo níttó' axta mzin nu' tedib puert co' nziri' ro nít. Puerta lèe Siracus. Puerta mbyan' nu' son huiz. <sup>13</sup> Ngro' nu' tya. Tolo mxyo'f nu' loo níttó' tedib vez. Nguri'th nu' gax ro xyòn mèn che'n làaz mèn silis axta mzin nu' tedib puert co' nziri' ro nít. Puerta lèe Reg. Tya mbyan' nu' thib yál'. Co'se' ngo nì izlyo' tedib huiz co' nde nque, mchep mbii co' nde ned sur nu'. Be taa nda xo'f nu' loo níttó'. No be taa mchep mbii nu' dib yál' axta mzin nu' tedib puert co' nziri' ro níttó' tedib huiz co' nde nquea. Puerta lèe Puteol. <sup>14</sup> Tya mzyál' nu' ndxèp mèn co' ndxàc hues nu' por cón che'n Jesucrist. Mèna mna'b loo nu' par yan' nu' con mèna thib sman. Ngolo nguri'th thib sman, axta syare', por derech, mdoo nu' ned loo yòo biiz par nda nu' ciuda Rom. <sup>15</sup> Mèn co' ndxàc hues nu' por cón che'n Jesucrist co' nqueltàa ciuda Rom nonle' le' nu' zin. Ngro' mèna par mbi'th càa ned mèna nu'. Ndxep mèn mbi'th càa ned nu' axta thib yèez co' lèe Son Cantin. Le' taamas mèn na, mbi'th càa ned nu' axta co'te' nziri' thib yèez co' ne' lèe Xbi' Che'n Rey Api. Co'se' gunèe Pab nde mèna, ndxab Pab: Ay, Dio's. Diox quix U', Diox, loo Diox. No anze'f mbye'th lezo' Pab tac mzin Pab ciuda Rom no yende cón ngòc loo Pab ned nde Pab. <sup>16</sup> Co'se' mzin nu' ciuda Rom, capitán co' ñibe' loo solndad co' nda no nu'a mda' rye pres loo jef co' ñibe' loo solndad co' nquenap palas. Le' loo Pab na, mda' jef thib lugar xà' par ngo ban Pab. Ante mnibe' jef loo thib solndad par mqnenap solndad Pab.

*Pab mblo yalbàn loo mèn ciuda Rom.*

<sup>17</sup> Co'se' ngolo nguri'th son huiz mzin Pab Rom, mbli Pab mandad par mqueltàa rye mèngool co' ñibe', no co' ndyoo ner, no co' ndyoo naa loo mèn nación Israel co' nzo ban ciuda Rom loo Pab. Co'se' mqueltàa rye mènà, ndxab Pab loo mènà:

—Gu' co' nac mèn gulàaz daa co' nac mèn nación daa, nde tan cuent loo gu': Mastale' yende cón mbli loo mèn nacionpe' na' no ne' ne' ngacloon gunèen mènà por costumbr co' mbed no xudgool na' más póla, mastale' ne'ngliden tataa, mda'xù' mèn nación Israel daa loo mèn ciuda Rom ndxè' xal thib pres láth nzon ciuda Jerusalén. <sup>18</sup> Co'se' ngolo noo mnibdi's mènà loon cópe' ngue tee lin, mblya's mènà nglá' mènà daa tac yende cón mbli par ncàb nguth mènà daa. <sup>19</sup> Per mèn nación Israel sate más ngocloo gunèe daa no ne'ndalte mènà nglá' gobernador, co' lèe Fest, daa. Por lult, ndxaben loo Fest co' nac gobernador: Más huen tub rez gobiern co' ndub ciuda Rom ndxè' cón chenen mastale' yende por cón ndli quexù'en que' falsen mèn co' nac mèn nación daa. <sup>20</sup> Por cona, mbli mandad ndye'th gu' loon par hui'en loo gu' no par tan cuent loo gu' cón chenen. Tac ante por ndub quee lezo' ryete na' co' nac mèn nación Israel le' mèn nguth ryo xban, por conate mbli ndub dó' mèn yan con caden co' natedó' yan xal ngue hui' gu' loon nalle'.

<sup>21</sup> Sya, ndxab mènà loo Pab:

—Pab, axta nalle' tarte càaya' nu' nec thib cart co' nac cart che'n mèn gulàaz mèn jude co' nda' cuent no co' ndlu' cón che'nl. Ne' ne' tar yi'th nec thib mèn nación Israel co' ndxàc xtàa na' trè' par ta' mènà cuent cón che'nl loo nu' trè'. <sup>22</sup> Per nalle' nu' ndlya's gòn cuent co' ndlya'sl ñeel loo nu' tac nu' nanee rye ned nazab ñii yèe ñii tii mèn cón che'n xley' che'n di's ndac co' nac tedib ley' cub.

<sup>23</sup> Sya, ndxab mèn loo Pab: Ndxè' huiz queltàa nu' trè', tá.

Huiza, mqueltàa huax mèn loo Pab co'te' nzo Pab. Sya, xtil'leque' mtlo Pab, mdoodi's Pab loo mènà axta mzyèle' izlyo' cón che'n xá mod ndlya's Diox ñibe' Diox loo mèn. Tataa mbli Pab tac Pab ndxab loo lezo' Pab tataa mod li Pab gan gac nado' mènà par tyal mèn gòn mèn no yila's mèn loo Jesús no yòo mèn loo cón che'n Jesús. Mdoodi's no Pab mènà xalque' nac di's co' ndub loo libr co' mque' Moisés ye's no xalque' nac di's co' ndub loo libr co' mque' mèn co' mde'th di's co' ndxab Diox ye's. <sup>24</sup> Làth xtau'a, ngo ndxep mèn co' mdyal mbìn di's no ngola's mènà co' ndxab Pab. No ngo taamas mèn co' ne'ndalte ngala's di's co' ndxab Pab. <sup>25</sup> Per com le' mènà ne'ngàcte thidte par ngòn mèn di's no ngala's mèn di's co' ndxab Pab, mtlo mènà, mbii mènà. Sya, ndxab Pab loo mènà:

—Aa, mèn nación Israel. Huenque' nac di's co' mdoodi's no Xpii Natú' mèn co' ngòc xudgool na' por ro Sayi co' mde'th di's co' ndxab Diox co'se' ndxab Diox gab Sayi taandxè' loo xudgool na':

<sup>26</sup> Huàa no guuz loo mèn nación Israel: Mastale' nzi yòn gu' di's co' mda' Diox cuent loon par tan cuent cón che'n di'sa loo gu', per thidtene ne'ta'de gu' cuent cón ngue nii Diox loo gu'. No mastale' ngue hui' gu' ryethe yalguzye' roo yalguzye' xèn co' nde teele' ndli Diox loo gu' no con' ndac co' nde teele' ndli Diox loo gu', inda'de gu' cuent Diox nac xa' co' ngue li con'a loo gu'.

<sup>27</sup> Mèn nación Israel thidteneque' ne'nda'de cuent no ne' ne' indxòn mènà cón nac co' mbez Diox loo mèn tac mènà thidtene nzi cuau yéc no nzi cuau lezo' mènà loo cón che'n Diox. No ngòc naad no ngòc nguud xtùuz no lezo' mènà loo cón che'n Diox. Cona, co'se' ndxòn mènà cón che'n Diox, ale nazab nden' mènà le'n lezo' mènà cón che'n Diox. No nac mènà xal mèn co' nau' ngudloo par ne'ta'de mènà cuent le' mènà ngue hui' loo con' nde teele' ngue li Diox loo mènà. Mbli Diox loo mènà xal thib mèn co' ncuau ngudloo no xal thib mèn co' ncue' nza. No tataaguè' mbli Diox loo mèn nación Israel ngòc naad no ngòc nguud xtùuz no lezo' mèn nación Israel. Mbliuguè' Diox loo mèn nación Israel, ne, par ya ne'berede mèn nación Israel yòo mènà loo cón che'n Diox par li Diox tyub xniì yéc mènà no par tyub xniì lezo' mènà loo cón che'n Diox.



<sup>28</sup> Cona, ngue niin loo gu', cara: Desde nalle' par delant, daa ga loo mèn co' inacte mèn naciòn Israel par tan cuent loo mènà cón che'n xá mod lyá' mènà loo con' ryes. No ngobe'en peser tyal mènà gòn mènà di's co' tan cuent loo mènà.

<sup>29</sup> Co'se' ngolo ndxab Pab di'sa loo mèn naciòn Israel co' mqueltàa loo Pab, mxen mènà ned, ndyàa mènà. No be taa noo noo ndyoodi's mènà cón che'n Pab no cón che'n di's co' ndxab Pab ned ndyàa mènà.

<sup>30</sup> Le' Pab na, sangmbyan' chop lín' complet liz mèn co'te' ngòc liz Pab co' mteche Pab loo mèn par ngo ban Pab. Làth xtau'a, ndyac lezo' Pab con rye mèn co' ndyee too naa Pab liz Pab. <sup>31</sup> Con dibaxla's mdoodi's Pab no nde'th Pab cón che'n xá mod ndlya's Diox ñibe'pe' Diox loo mèn. No ndlu' Pab cón che'n Tad Jesucrist loo mèn. No yende chó mèn nca' no ntau' mèn loo Pab co'se' ndyoodi's Pab no nda' Pab cuent cón che'n Tad Diox loo mèn. Le'n tiemp co' ngo Pab ciuda Rom, yende chó mèn mbee nca' Pab no yende chó mèn ncà' loo Pab dib lal ngo Pab ciuda Rom.

## Cart Co' Mque' Pab Loo Mèn Gulàaz Che'n Ciuda Rom

*Pab ngue que' ye's co' nac cart ndxè' loo mèn co' ndxela's loo Diox por cón che'n Jesucrist, mèn co' nac mèn gulàaz che'n ciuda Rom.*

<sup>1</sup> Daa, Pab, nac thib mbi' co' nxo'f zin' cón che'n Tad Jesucrist. Yub Diox mda' lèe ndxè' loon co' nac lèe mèn co' ndxe' di's ndac che'n Diox loo mèn. Con'a nee di's yub Diox mtel' daa no yub Diox mcuri daa no yub Diox mblo xà' daa par ga tethen di's con che'n di's ndac che'n Diox loo mèn no par ga tan cuent cón che'n di's ndac che'n Diox par lyá' mèn loo con' ryes.

<sup>2</sup> Diox mtan' di's no mcàbgòn Diox di's loo mèn, loo mèn co' mde'th di's co' ndxab Diox ndoore' axta pólle'a, co' nac leque di's co' mque' mèn ye's loo libr co' nac xti's Diox. <sup>3</sup> Di's ndac ndxè' ngòc di's co' nda' cuent cón che'n Tad Jesucrist na', Tad Jesucrist co' nac xgan' Diox. Diox mbli' le' xgan' Diox nac xal chol mèn co' ndxáal loo izlyo' tac Tad Jesucrist, xgan' Diox, mbi'th yáal loo izlyo' ndxè' xalque' ndxáal chol mèn loo izlyo' ndxè'. Ngóol Tad Jesucrist por cón che'n bin che'n thib mbi' co' ngro' lèe David co' ngòc rey póla. <sup>4</sup> Yub Diox mblo ro no mbli' too Diox Jesucrist le' Jesucrist nac xgan'pe' Diox no ndxàp Jesucrist rye loothe con' roo con' xèn la's nii Jesucrist no la's ya' Jesucrist. Tataa mbli Diox loo Jesucrist por ngòc Jesucrist thib mbi' natú'pe' loo Diox thidtene láth mque tee ban Jesucrist loo izlyo'. Por cona, yub Diox mblo ro cón che'n Jesucrist co'se' mblo xban Diox Jesucrist làth mèn nguth. <sup>5</sup> Por cón che'n Jesucrist, Diox mbli angngòc con' ndac loo nu'. Diox mtel' nu' no mxo'f zin' Diox zin' loo nu' por cón che'n Jesucrist par hue' nu' di's cón che'n Jesucrist no par co nu' yalbàn loo mèn co' nac mèn rye nación co' nziri' dib athu loo izlyo' par bel'que' nzo ndxep mèn par neda co' yila's loo cón che'n Jesucrist no co' tyubdi's loo cón che'n Jesucrist. <sup>6</sup> Làth rye mèn naciona nzo gu'. Diox ngurez gu' no mblec Diox gu' par ngòo gu' loo cón che'n Jesucrist.

<sup>7</sup> Daa, Pab, ngue que' ye's co' nac cart ndxè' loo ryete gu', gu' co' nzo ban le'n ciuda Rom ndxè', gu' co' anze'f nque' lezo' Diox ñèe Diox, gu' co' Diox ngurez par cue ban gu' loo Diox. Nac gu' mèn co' ngro xà'pe' loo cón che'n xab izlyo' par ngòc gu' che'npe' Diox. Ndlyazen le' Diox xud na' no Tad Jesucrist na' tolo li anggàc con' ndac loo gu'. No ndlyazen le' Diox xud na' no Tad Jesucrist na' angli nagàl yo lezo' gu' loo Diox no cue ban gu' rye nda gu' no rye ndye'th gu' làth xtàa gu'.

*Pab ndlya's ya too naa mèn co' nqueltàa loo cón che'n Diox por cón che'n Jesucrist, mèn co' naban ciuda Rom.*

<sup>8</sup> Nerleque' con' co' ngue niin loo gu' loo cart ndxè' nac con' ndxè': Co'se' mbezen Diox por lèe Jesucrist, mbezen loo Diox daa: Diox quix U', Diox, por cón che'n ryete gu' co' nzo ban ciuda Rom tac ndxathque' no ndxènque' dib athu loo izlyo' cón che'n xá mod ndxela's ndac gu' loo Jesucrist. <sup>9</sup> Loo Diox co' ngue xo'f zin'en ndlin sirv dib nzo yéquen no dib nzo lezon co'se' ndethen cón che'n di's ndac co' nac cón che'n xgan'pe' Diox. Diox mda' cuent cón chenen no nanee Diox cón chenen xá mod indxathlasten cón che'n gu' co'se' mbezen Diox. <sup>10</sup> Ña'ben loo Diox co'se' mbezen Diox zin thib huiz no zin thib ze xyal' ned xyal' yó' loon par gal neen máa gu' par nedrè' chele' Diox nee lezo' tataa gàca loon. <sup>11</sup> Tac anze'f ndryo' ndlyen' lezon, ndlyazen ñeen máa gu' par lyath non gu'. No lu'en loo gu' ndxep con' co' nac cón che'n Xpii Natú' co' lya's Xpii Natú' li gu' cón che'n Crist par tataa mod toloque' cue nèe gu' no toloque' xo'f zin' gu' cón che'n Crist. <sup>12</sup> Con' co' ngue niin loo gu' ndxè' nee di's le' gu' lyath no daa par tolo ye'th lezon. No lin par tolo yé'th lezo' gu' loo co' nac cón che'n leque yalndxela's co' ndxàp thib na' no tedib na' loo Crist.

<sup>13</sup> Ndlyazen le' gu' non no ta' gu' cuent, mèn huesen por cón che'n Crist, huax vez mblyazen gal neen máa gu' par tolo yila's mèn làth gu' xal nde tee ndlin loo mèn taamas lugar co'te' nde tee ndyee'en loo mèn loo izlyo' par gàca le' gu' tolo ta' cuent cón che'n

Diox par tolo li gu' co' nee lezo' Diox. Per axta nalle' tarte lin gan gal neen máa gu' tac nzo ndxep con' co' nca' loon. <sup>14</sup> Part cón chenen, ndyaquen, por fuers nquin ga lon yalbàn loo rye mèn, que naca loo mèn co' nda' lau cuent, que naca loo chol mèn tèe, que naca loo mèn co' ndxác, que naca loo mèn co' indxácte, mèn co', por derech, nau' loo nau' yéc. <sup>15</sup> Por cona, altant ndoon no mbli naben daa par gal lon yalbàn cón che'n di's ndac che'n Diox co' ndlu' xá mod lyá' mèn loo con' ryes loo ryete gu' co' nac mèn che'n ciuda Rom, ne.

*Diox ndlu' loo di's ndac che'n Diox: Con' roo no con' xèn nac co' ndli Diox loo mèn par ndlyá' mèn loo con' ryes.*

<sup>16</sup> Nec thib mod no nec tedib mod inthyonte daa ngon yalbàn cón che'n di's ndac ndxè' loo mèn tac con' co' nac cón che'n di's ndac ndxè', le'i nac co' ndxàp Diox la's nii Diox no la's ya' Diox par lá' Diox mèn loo con' ryes, loo ryete mèn co' tyal yila's loo Crist por cón che'n di's ndac. Mnibe' Diox loo lezo' Diox nerleque' co mèn yalbàn loo mèn nación Israel no yiloo co mèn yalbàn loo mèn taamas nación co' inacte mèn nación Israel. <sup>17</sup> Tac por cón che'n di's ndac ndxè' Diox ndlu' loo na' le' Diox ndyal yòo na' loo cón che'n Diox ante por yila's na' loo cón che'n Diox por cón che'n Jesucrist. No ndlu' di's ndac ndxè' loo na' le' Diox mbez nac mèn mèn nalì no mèn nambii loo Diox ante por ndxela's mèn loo di's ndac che'n Diox por cón che'n leque Jesucrist. Tataa ndxab Diox xal ndub di's loo libr co' nac xti's Diox co' mbez: Mèn co' ngo Diox cuent no mèn co' mdyal Diox yòo mèn loo cón che'n Diox, ante loo Diox yila's mèn no gáp mèn yalxla's láth nzi tee ban mèn loo izlyo' ndxè'.

*Trè' ndlu' cón che'n ryete mèn co' ndxàp xquin no co' ndxàp xtol loo Diox dib athu loo izlyo'.*

<sup>18</sup> Na' nanee no nda' na' cuent le' Diox co' nzo loo bé' ngue go xo'f loo mèn, por cón che'n yaltii co' ndxác loo mèn, le' Diox ndxecloo ñèe Diox mèn ye'rsin' co' indlide con' nalì no con' nambii loo Diox. Por ryethe con' zab co' ndli mèn, nca' mèn loo taamas mèn co' ndlya's ta' cuent no co' ndlya's té'th cón che'n Diox co' nac con' lìcpe'. <sup>19</sup> Ryete mèn ye'rsin' non no nanee mèn con' co' nzoque' mod ta' mèn cuent cón che'n Diox no con' co' nzote mod non mèn cón che'n Diox. Con'a ndryo xo'f loo mèn tac yub Diox mblo xo'fa loo mèn. <sup>20</sup> Huax con' co' nac cón che'n Diox indxú'de loo mèn. Mastale' indxú'da loo mèn, per non mèn no nanee mèn le' Diox ndxàp rye loothe con' la's nii Diox no la's ya' Diox thidtene. No non mèn le' Diox nac thidte Dioxpe'. No non mèn con' ndxè' axta co'se' mblec Diox izlyo' no mxèn' Diox izlyo' tac ndxòn mèn no nanee mèn le' Diox mxèn' ryethe con' co' nacsua'le'. Di's ndxè' nac di's co' ndxòn mèn no nda' mèn cuent cón che'n Diox. Por cona, yende mod gab mèn loo Diox le' mèn inonte no inaneede mèn mase ndxep con' co' nac cón che'n Diox par ne'gàpte mèn xquin mèn no xtol mèn. <sup>21</sup> Mastale' tataa mod mbli Diox par nda' mèn cuent cón che'n Diox, no ndlibe' mèn Diox por cón che'n con' roo con' xèn co' mbli Diox loo izlyo', ne'nglide mèn con' guryath no con' guryèn loo Diox xal ndxàal li mèn loo Diox. Ne' ne' ngab mèn: Diox quix U', Diox, loo Diox. Ndxé'leque', lugar de ngli mèn con' guryath no con' guryèn loo Diox, ale le'le' mcauau yéc mèn no mcauau lezo' mèn loo cón che'n Diox. Yende mod càb con' ndac loo xtùuz co' ndli mèn xtùuz cón che'n Diox. <sup>22</sup> Mastale' mbez mèn loo xtàa mèn: Anze'f ndxác na', ¿lé'?, per ale ndxe'leque', ngòc tont mèn. <sup>23</sup> Ale ndxe'leque', mblá'ya' mèn cón che'n Diox, Diox co' ne'lyuxte no co' ne'lith node. Ne'tolode ngli mèn cas loo thidte Diox. Mtlo mèn, mtocua' mèn gunab co' nac mdo' co' ñaa xal mèn co' ndlyux no co' ndlith no. No mtocua' mèn gunab che'n mbin co' ñaa xal mbin. Mtocua' mèn gunab che'n mbel' co' ñaa xal mbel'. No mtocua' mèn gunab che'n chol má' co' nzi'f chop nii chop ya'. Ngòc con'a diox che'npe' mèn.

<sup>24</sup> Por cona, Diox mblá'ya' mèn par tolo mbli mèn con' ye'rsin' no con' zab no chol xtùuz zab co' ndryo' ndlyen' lezo' mèn par li mèn. Con' co' ndli mèn con' thib xtàa mèn no con' tedib xtàa mèn nac con' nathon no con' ye'rsin' loo mèn co' indxàalte li mèn. <sup>25</sup> Mèn mse' mod che'n mèn tac ne'nglide mèn cas loo con' lìcpe' co' nac cón che'npe' Diox. Ndxé'leque', asembli mèn par más mbli mèn cas no ngola's mèn loo

con' co' nac yalgutyè'. Mtlo mènà, mbli mènà con' guryath no con' guryèn loo chol con' co' mblec Diox no co' mxèn' Diox co' ndxab mèn nac mdo' mèn. No mtlo mènà, mbli mènà sirv loo chol con' co' naban, que naca mèn, que naca má'. Ne'nglide mènà con' guryath no con' guryèn loo yub Diox. Ne' ne' ngli mènà sirv loo Dioxpe' co' mxèn' izlyo'. Loo Dioxà ndxàal ngab mèn di's ndac no di's natú'. No ndxàal ngab mèn thidte Diox nac Diox roo Diox xèn loo lín' co' ntlo, no loo lín' co' ndxelo, no loo lín' co' ne'lith node. Tataaque' gàca.

<sup>26</sup> Por con' co' ndli mènà, co' nee di's, nac con' co' ngue niin loo gu' ndxè', Diox mblá'ya' mènà loo rye con' co' ncàb nthyon mèn, co' nee di's, axta xa'gota mse' mod xal ndli mèngot yalmbi' no yalngot par li xa'gota yalmbi' no yalngot con' chol mènbi' no con' xtàagot xa', co' indxàalte li xa'got. <sup>27</sup> Lomisque' mod ne, rye mèn co' nac mènbi'a mblá'. Ya ne'nglide mènbi' yalmbi' co' ndli mèn yalmbi' con' sa'lpe' mènbi'. Ale le'le', mzyo mènbi'a con' xtàambi' mènbi' par li mènbi' yalmbi' con' xtàambi' mènbi'a axta mbyac lezo' mènbi'. Per thidtene inthyonte mènà co'se' li mènà con'a mastale' naca co' ndli nthyon mèn. Per nzyalque' mènà tataa mod ndxàc yalquì loo mènà por con' ndli no mènà lad mènà tac inacte con'a con' co' ndxàal li mènà.

<sup>28</sup> Texalque' ne'ngòode lezo' mènà par tolo li mènà cas loo Diox par tolo libe' mènà Diox, ¿lé'?, Diox mblá'ya' mènà par mbli mènà thib xtùuz xin no thib xtùuz cap par li mènà con' co' indxàalte li mènà. <sup>29</sup> Más de cona, ndxàp mènà thib mod xin no thib mod cap par li mènà ryethe con' co' inacte con' nali no con' co' nac con' ye'rsin'. Nac mènà mèn nguud no mèn naad loo cón che'n Diox. Nqueli'th mènà con' co' nac che'n xtàa mènà. Ncuà'n mènà mod li mènà con' ye'rsin' loo xtàa mènà. Ndxan tìn' lezo' mènà ñèe mènà xtàa mènà. Ncuà'n mènà mod guthxù' mènà xtàa mènà. Ncuà'n mènà mod yoo tìn' mènà con' xtàa mènà. Nquedii mènà xtàa mènà. Anze'f ndxòo lezo' mènà ta' mènà cuent yix no nteri'th mènà cuent yix. No ncuà'n mènà mod li mènà chol con' ye'rsin' loo xtàa mèn. <sup>30</sup> Nac mènà mèn co' ñii yèe ñii tii cón che'n thib xtàa mèn no cón che'n tedib xtàa mèn. Ndxòo xyàn lezo' mènà co'se' ndxòn mènà cón che'n Diox. Nac mènà mèn co' ndxáp nxyan' ñèe xtàa mèn. Nac mènà mèn co' ndye's no co' nxyal'. Nac mènà mèn co' nzi'f no ntoxcua' con' ye'rsin' co' ndli mèn. Nac mènà mèn co' indyubdi'ste loo xud no loo xna'. <sup>31</sup> Nac mènà mèn naxèn. Illicte ndli mènà con' co' mbez mènà li mènà. Nac mènà mèn co' inque'de lezo' ñèe xtàa. Nac mènà mèn co' indlyatte lezo' ñèe xtàa. <sup>32</sup> Mastale' huen huen non mènà no nanee mènà le' Diox tub rez ryethe con' co' ndli mèn, no ndxàalque' ryo xà' mènà loo Diox thidtene yiloo por cón che'n con' ye'rsin' co' ngue li mènà, per ale ndxe'leque', sate más tolo ndli mènà con'a. No iante con'ade ndli mènà. Ale ndyac lezo' mènà ñèe mènà taamas mèn co' ndli con'a.

## 2

### *Diox ndub rez cón che'n mèn xal nac con' licpe'.*

<sup>1</sup> Hui' gu' nexa. Gu' co' ngüi' no co' ñaa loo xtàa gu', no ndyac gu' le' xtàa gu' ngue tee cua'n xquin xtàa gu' no xtol xtàa gu', na nii loo gu': Yende mod gab gu' indxàpte gu' xquin gu' no xtol gu'. Tac co'se' ngüi' gu' no ñaa gu' loo con' co' ngue tee li xtàa gu' par quexù' gu' xtàa gu', ne'ta'de gu' cuent ale leque gu' ngue tub rez cón che'n gu', ne. Tac leque gu' co' ngüi' no co' ñaa loo xtàa gu'a, leque gu' ndli con' ndli xtàa gu'a. <sup>2</sup> Nanee na' le' Diox nalique' ngüi' no nalique' ndub rez Diox cón che'n mèn xalque' nac mod co', licque', ndli mèn co'se' nquexù' Diox mèn, mèn co' ndli rye loothe con' ye'rsin'a. <sup>3</sup> Gu' co' ngüi' no ñaa loo xtàa gu' loo ryethe con' ndli xtàa gu', no nquexù' gu' xtàa gu' loo con' ndli xtàa gu', no ndli gu' leque con' ndli xtàa gu', ¿ché' ndyac gu' no ché' ndli gu' cuent lyá' gu' co'se' tub rez Diox cón che'n gu', cà'? ¡Pà gàca tataa, ey! <sup>4</sup> ¿Ché' ndyac gu' yende cón gac loo gu' por nxìis no gu' cón che'n Diox, no ndlá' gu' ryethe con' ndac co' ndli Diox loo gu', no mod co' ncha'la's Diox ñèe Diox gu' thib lad, cà'? No ¿ché' tarte ñèe gu' no ché' tarte ta' gu' cuent le' ryethe con' ndac co' ndli Diox loo gu' ndlu' loo gu' xá mod li gu' par lyàa yéc gu' no par lyàa lezo' gu' loo Diox par zye' mod ye'rsin' co' ndxàp

gu', cà'? ¡Máa yob yéc gu', yey! <sup>5</sup> Anze'f naad gu' no anze'f nguud gu'. Indlya'ste gu' lá' gu' rye con' co' nac xquin gu' no co' nac xtol gu' co' ndxàp gu'. Cona, leque gu' sate más ngue li par tolo zi'f gu' xquin gu' no xtol gu' loo gu' par tolo yecloo tín' Diox ñèe Diox gu' co'se' zin huiz no zin ze nali tub rez Diox cón che'n xtol mèn loo mèn. <sup>6</sup> Co'se' gàc leque huiz co' yecloo Diox loo mèn co'se' yilo tub rez Diox cón che'n con' co' mbli thib thib mèn, sya, càba loo thib thib mèn xalque' mbli mèn láth naban mèn loo izlyo'. <sup>7</sup> Mèn co' thidteneque' mbli nèe mèn par li mèn con' huen, loo mèn li Diox par yò ban no mèn Diox thidtene tac mèn ncuau'n mod gàc con' roo con' xèn che'npe' Diox loo mèn. No ncuau'n mèn mod gàc con' guryath no con' guryèn che'npe' Diox loo mèn. No ncuau'n mèn mod par yò mèn co'te' ne'gathte mèn thidtene. <sup>8</sup> Per mèn co' ndye's no mèn co' nxyal' no mèn co' ñee loon cón che'npe' mèn, no inacte mèn co' yoo lezo' tyubdi's mèn loo co' nac co' licpe', ndxe'leque', más ndxò lezo' mèn li mèn chol con' ye'rsin', loo leque mèn co' nac mèn naad no mèn nguud Diox yecloo ñèe Diox mèn. No tetii Diox mèn axta plóthe. <sup>9</sup> Gàc yalquii tín' no yalnaxi tín' loo ryete mèn co' ndli chol con' ye'rsin'. Nerleque' gàca loo mèn nación Israel. No yiloa, gàca loo taamas mèn co' inacte mèn nación Israel. <sup>10</sup> Per mastale' tataa li Diox loo mèn ye'rsin', loo chol mèn co' thidtene mbli nèe loo con' ndac, loo mèn gàc con' roo con' xèn, no con' guryath no con' guryèn. No li Diox loo mèn rye nda rye ndye'th mèn cue ban mèn. Nerleque' gàca loo mèn nación Israel no yiloa gàca loo mèn co' inacte mèn nación Israel.

<sup>11</sup> Tac Diox inacte xal mèn co' ndli más ndyu' thib mèn leque tedib mèn. <sup>12</sup> Ryete mèn co' ne'nque node ley co' mxo'f Moisés loo mèn, chele' mèn cua'n xquin mèn no xtol mèn, mèn lyux mastale' ne'nque node mèn leya. Lomisque' ne, ryete mèn co' ncuau'n xquin mèn no xtol mèn, mastale' ñibe' ley co' mxo'f Moisés loo mèn, por cón che'n leque ley co' mque no mèn, Diox tub rez loo mèn no quexù' Diox mèn. <sup>13</sup> Mèn co' ante ndxòn cón che'n ley co' mxo'f Moisés loo mèn, ne'ta' de Diox lugar no ne'tyalte Diox yò mèn loo cón che'n Diox par gàc mèn mèn nali no mèn nambii loo Diox. Ndxè'leque', mèn co' ndyubdi's cón che'n xal ñibe' ley co' mxo'f Moisés loo mèn, Diox tyal no ta' Diox lugar yò mèn loo cón che'n Diox par gàc mèn mèn nali no mèn nambii loo Diox. <sup>14</sup> Tac mèn tith co' inacte mèn nación Israel, co' ne'nque node ley co' mxo'f Moisés loo mèn, mastale' ne'nque node mèn leya, mèn ngure ban lique' xalque' ñibe' ley co' mxo'f Moisés loo mèn nación Israel. Mèn ndlii tataa tac ndxàp mèn thib mod co' nac mod che'npe' mèn. Mastale' ne'ngàpte mèn ley co' mxo'f Moisés loo mèn, leque mèn ndli xal ñibe'pe' mod co' ndxàp mèn làth mèn loo mèn. Mod co' ndxàp mèn nac leype' mèn. <sup>15</sup> Mèn tith co' inacte mèn nación Israel, co' indxàpte ley co' mxo'f Moisés loo mèn nación Israel, mèn ndxàp thib mod co' ndlu' le' mèn, licque', ndxàp thib ley le'n xtùuz mèn no le'n lezo' mèn co' ñibe' loo mèn co' nac mod che'n mèn. No con' co' nden' mèn le'n lezo' mèn co'se' mbli mèn chol con', ¿ché' con' ndac mbli mèn o ché' con' ye'rsin' mbli mèn? con'a ndlu' loo mèn nzo thib ley le'n xtùuz mèn no le'n lezo' mèn. Lomisque' ne, xtùuz co' ndxàp mèn ndlu' cón che'n ley co' nzo le'n lezo' mèn tac ndxep vez xtùuz mèn nquexù' mèn loo con' mbli mèn. No ndxep vez xtùuz mèn ndli ndyub razon cón che'n mèn. <sup>16</sup> Tataaque' gàca co'se' zin thib huiz no zin thib ze co'se' ñibe' Diox loo Tad Jesucrist par tub rez Tad Jesucrist cón che'n ryete con' co' xexte mbli mèn xal ndlu' di's ndac ndxè' co' ngon yalbàn.

*Trè' ndlu' le' mèn nación Israel más mdubdi's loo ley co' mxo'f Moisés loo mèn.*

<sup>17</sup> Hui' gu' nexa, mèn nación Israel, gu' co' ngue no lèepe' co' nac lèe mèn nación Israel, susque' anze'f nquenap gu' gu' loo ley co' mxo'f Moisés loo gu'. No ndye's gu' no nxyal' gu' loo con' co' nac cón che'n Diox. Anze'f ndxác gu', ndli gu' cuent, ¿lé'? <sup>18</sup> Mbez gu' nanee gu' no non gu' cón che'n ryethe con' co' nee lezo' Diox. No mbez gu' ndxò lezo' gu' cui gu' con' ndac tac ley co' mxo'f Moisés loo gu' ndlu'i loo gu', ¿lé'? <sup>19</sup> No ndyac gu' anze'f ndxác gu' par tyoo ner gu' loo mèn co' ndxàc xal mèn sieu loo cón che'n Diox. No ndyac gu' ndxác gu' tenii gu' yéc mèn no tenii gu' lezo' mèn, mèn co' ncuau loo no



mèn co' ncuau yéc loo cón che'n Diox, ¿lé'? <sup>20</sup> Ale ndyac gu' anze'f ndxác gu' par lu' gu' loo mèn co' nac mèn naxèn co' nau' loo nau' yéc loo cón che'n Diox. No mbez gu' nac gu' xal thib maistr che'n mèn co' nac xal myen' bix loo cón che'n Diox. No ndyac gu' le' loo ley co' mxo'f Moisés loo mèn ndub ryete di's co' nquin ta' mèn cuent no non mèn par li mèn ante con' co' nac licpe'. <sup>21</sup> Per hui' gu' nexa. Gu' co' ndlu' loo taamas mèn, ¿chonon indlu'de leque gu' gu'? No gu' co' ngo yalbàn no co' nde'th loo taamas mèn, mbez gu' loo mèn indxàalte li huan' mèn, ¿chonon leque gu' ndli huan', sya? <sup>22</sup> Gu' co' mbez indxàalte li mèn yalburrid, ¿chonon ndli gu' yalburrid, sya? Gu' co' ndxecloo ñée chol mdo', ¿chonon ndli huan' gu' con' co' ndxàp mdo' gudo' mdo', sya? <sup>23</sup> Gu' co' anze'f ndye's por ngue no gu' ley co' mxo'f Moisés loo gu', indlide gu' con' guryath no con' guryèn loo Diox tac indlide gu' xal ñibe' ley co' mxo'f Moisés loo gu'. <sup>24</sup> Tac loo libr co' nac xti's Diox ndub di's co' mbez: Le' mèn co' naban dib athu loo izlyo', mèn co' inacte mèn nación Israel, mèn ñii yèe ñii tii cón che'n Diox por ndxàp gu' dol loo Diox.

<sup>25</sup> Lìca, ntac yalndxela's co' ndxàp gu' co' nac circuncisión chele' gu', licque', ndyubdi'sque' loo ley co' mxo'f Moisés loo gu'. Per chele' gu' indyubdi'ste xal mnibe' ley co' mxo'f Moisés loo gu', le' sya, ndxàca loo gu' xal mèn co' indxàcte circuncidar loo. Per por part che'n Diox, yende cón ntac ngàc circuncidar gu'. <sup>26</sup> Per ndxe'leque', chele' thib mèn co' indxela'ste loo yalndxela'sa no ndyubdi's mènna xal ñibe' ley co' mxo'f Moisés loo gu', nac mènna xal mèn co' ndxàp yalndxela's che'n circuncisión, mastale' indlide mènna cas loo yalndxela's che'n circuncisión. <sup>27</sup> Per hui' gu' nexa. Ndxé'leque', mèn co' indxàpte yalndxela's che'n circuncisión no nzi tee li mènna xal ñibe' ley co' mxo'f Moisés loo mèn, mènna hui' no ñaa mènna loo gu' le' gu' indyubdi'ste xal ndub di's loo ley mastale' nzo'f di's ngòc circuncidar gu'. Por cona, mèn co' indxàpte yalndxela's che'n circuncisión, mènna tub rez cón che'n gu' no quexù' mènna gu' loo Diox. <sup>28</sup> Inacte mèn mèn nación Israel, mèn co' ndlu' loo mèn ngue li mèn xal ñibe' ley co' mxo'f Moisés loo mèn nación Israel. Ne' ne' inac mèn mèn nación Israel, mèn co' ante ngue no yalndxela's che'n circuncisión, mèn co' ndxàc circuncidar lad. <sup>29</sup> Ndxé'leque', mèn co', licque', nac mèn nación Israel, mènna nac mèn co' ndxòn xti's Diox no mèn co' ndyubdi's loo ryete con' ñibe' Diox loo mèn. Le' yalndxela's co' nac circuncisión co' nac co' licpe' na, nac thib mod co' ndxàp mèn le'n lezo' mèn no le'n xtùuz mèn par nteche ntexyath mèn le'n lezo' mèn no le'n xtùuz mèn, co' nee di's, thidtene tyubdi's mènna loo Diox. Inacte con'a con' co' ndli mèn xtùuz no co' nteche ntexyath mèn xtùuz mèn xal nac di's co' ndub loo ley co' mxo'f Moisés loo mèn. Ndxé'leque', con' co' ndli mèn xtùuz no con' co' nteche no co' ntexyath le'n lezo' mèn nac co' ndlu' mèn loo xtàa mèn thidteneque' ndoo lezo' mèn ndyubdi's mèn loo Diox. Mèn co', licque', nac mèn nación Israelpe' no mèn co', licque', ngòc circuncidar lad, ndxe'leque', mènna ndyu' loo Diox. No indyu'de mènna loo mèn co' nac xtàa mèn.

### 3

<sup>1</sup> Daa, Pab, nibdiz tedib con' loo gu' loo cart ndxè' co' ngue que'en ye's loo gu', gu' co' nac mèn gulàaz mèn ciuda Rom: ¿Ché' más ndyu' mèn nación Israel por nac mènna mèn nación Israel, cà'? ¿Ché' por ndxàc circuncidar mèn nación Israel cona más ntac mèn nación Israel loo Diox, cà'? <sup>2</sup> Yende xàa. Con' co' ndli más ndyu' mèn nación Israel nac: Anze'f thib con' ndac ngòc loo mèn nación Israel huax mod. Nerleque' con' ndac co' ngòc loo mèn nación Israel ngòc le' Diox ngòp yalxla's loo mènna par mda' Diox lugar loo mènna quenap mènna libr co' nac xti's Diox. <sup>3</sup> Pues, ¿cón ndli? Chele' ndxep mèn nación Israel ne'ndalte ngala's loo Diox le' Diox li con' co' mcàbgòn Diox li Diox loo mèn, ¿ché' por cona ne'lide Diox con' co' mcàbgòn Diox li Diox, sya, cà'? Yende xàa. <sup>4</sup> Nec thib mod no nec tedib mod, ¿lé'? Ndxé'leque', Diox ndlique' co' mcàbgòn Diox li Diox loo mèn. Diox ndli ante con' co' nac licpe' mastale' chol mèn co' nziri' ndyè' xal ndub di's loo libr co' nac xti's Diox co' mbez:

Mèn yila's no co ro mèn le' di's co' ñii U', Diox, nac lìcpe'. No co'se' hui' mèn no la's mèn loo con' ndli U', gàca le' mèn gab: Lìcque' nac mod co' ndli Diox con' no nali ndli Diox con'.

<sup>5</sup> ¿Cón gab na', sya? Niin con' ndxè' loo gu' xal ndyoodi's chol mèn co' alithe ndyoodi's: Chele' con' ye'rsin' co' ndli mèn ndlu' loo mèn le' Diox, lìcque', nac thib Diox nali no thib Diox nambii loo con' ndli Diox, ¿ché' nzo mod gab na' le' Diox inacte Diox nali no Diox nambii co'se' tetii Diox mèn por con' ye'rsin' co' ndli mèn, cà'? <sup>6</sup> Nec thib mod no nec tedib mod ne'gabte na' le' Diox inacte Diox nali no Diox nambii, ¿lé'? Tac chele' Diox, lìcque', inacte Diox nali no Diox nambii, ¿xá mod nali no nambii tub rez Diox cón che'n mèn loo izlyo', sya?

<sup>7</sup> Lomisque' mod ne, chele' daa ngue tyè' par tataa mod tolo gac más con' roo con' xèn loo Diox por ndyè'en, sya, ¿chonon ndub rez Diox cón chenen le' daa nac thib mbi' co' ndxàp xtol, sya? Yende xàa. Nali no nambii nac Diox. <sup>8</sup> Niin tedib con' loo gu', ne: Chele' Diox, lìcque', tataa nac, ¿chonon ne'tolode li na' con' ye'rsin' par tolo li Diox con' ndac loo na', sya? Di's ndxè' nac di's co' asendli mèn taandxè' mbez mèn le' nu' tataa mod ndlu' loo mèn. Per rye mèn co' tataa mbeza, nali que' no nambii que' tub rez Diox cón che'n ryethe con' ye'rsin' co' ngue li mènna par tyactii mènna yiloo xal ndxàal gàca loo mènna.

*Pab ndlu' le' ryete mèn ndxàp xtol.*

<sup>9</sup> ¿Cón, sya? ¿Ché' ndli gu' cuent más mèn ndac nac na' co' nac mèn nación Israel leque chol mèn co' inacte mèn nación Israel, cà'? Yende xàa. Nec thib mod no nec tedib mod gàca tataa, ¿lé'? Tac nu' mquexù'le' loo mèn nación Israel xal loo taamas mèn co' nziri' loo izlyo' co' inacte mèn nación Israel le' ryete mèn dib athu loo izlyo' mcua'n xquin mèn par ndxàp mèn xtol mèn loo Diox. <sup>10</sup> Cón che'n con' ndxè' nac di's co' ndub loo libr co' nac xti's Diox co' mbez:

Nec thib mèn co' nzi tee ban loo izlyo' ndxè', inzi tee ban lide mèn loo Diox thidtene.

<sup>11</sup> Yende chó mèn nda' cuent cón nac más con' ndac. Ne' ne' yen thib mèn co' tyal cua'n thidte Diox co' nac merpe' Diox.

<sup>12</sup> Ryete mèn ngro xà' loo cón che'n Diox. Ndlá'ya' mèn cón che'n Diox. Nzi tee huan mènna loo cón che'n Diox. Por derech, yende cón ntac mènna loo Diox. Yende chó mèn ndli con' ndac. Per nec thib mèn ndli par li mèn con' ndac loo Diox.

<sup>13</sup> Más ndli mènna ndyoodi's mènna di's zab no di's cap. Nac looz mènna no ro mènna co'se' ndyoodi's mèn di's xal thib bá' thebol co' ndyen' co'te' ca's mèn tedib thebol. Con di's co' ndyoodi's mèn nquedii mèn xtàa mèn. No nac di's co' ndyoodi's mènna xal thib cuan' che'n mbel' co' lèe huid co' ndli nden' mèn xal ndxàca loo mèn co'se' nquele thib huid mèn.

<sup>14</sup> Mèn co' tataa nac ngueè no nsuc. No ante ndoo lezo' mènna ndyoodi's mènna antub di's zab no di's cap co' ndli ndxetoo xyàn lezo' mèn.

<sup>15</sup> Ndyub quii ndyub bèel lezo' mènna par cua'n mènna mod guth mènna xtàa mènna.

<sup>16</sup> Rye ned ngue tee mènna, ngue telux mènna mèn no ngue telux mènna con' co' nac che'n mèn.

<sup>17</sup> Ne' ne' incua'n mènna mod que tee ban mènna rye nda mènna no rye ndye'th mènna làth xtàa mènna par cue see tee lezo' mènna.

<sup>18</sup> Ne' ne' indli mènna xtùuz cón che'n Diox par zyeb mènna loo cón che'n Diox.

<sup>19</sup> Per na' naneele' le' ryete di's co' ndub loo ley co' mxo'f Moisés loo mèn nac di's co' ñibe' loo mèn co' ndoo nque loo leya par yende chó mèn càb ro loo Diox. No mbezque' di's loo leya le' Diox nali tub rez cón che'n ryete mèn co'se' tub rez Diox cón che'n mèn.

<sup>20</sup> Tac mastale' nden' mènna huax con' nac co' ndli mèn co' ndyoo nque loo ley co' mxo'f Moisés loo mèn, nec thib mènna ne'gacte mèn nali no mèn nambii loo Diox por cón che'n leya. Tac por cón che'n ley co' mxo'f Moisés loo mèn co' ndlu' loo mèn, non mèn no nanee mèn le' mèn ndxàp xtol loo Diox.

*Pab mbez: Ante por yila's mèn loo Diox por cón che'n Jesucrist lyá' mèn loo con' ryes.*

<sup>21</sup> Per nalle' Diox mblile' tedib con' loo na' co' nac thib con' xà' loo ley co' mxo'f Moisés loo mèn. Nda'le' na' cuent no nonle' na' xá mod mdyal Diox yò mèn loo Diox no loo cón che'n Diox. Per cón che'n mod no con' co' mbli Diox par mdyal Diox par yò mèn loo cón che'n Diox nac di's co' ndub loo ley co' mxo'f Moisés loo mèn no nac di's co' ndub loo libr co' mque' mèn ye's, mèn co' mde'th di's co' ndxab Diox. <sup>22</sup> Per mod co' mbli Diox par mdyal Diox ngò mèn co' ndxela's loo cón che'n Diox, le'i nac por ndxela's mèn loo Tad Jesucrist. Por cona, thidte ndyu' ryete mèn co' ndxela's loo Diox por cón che'n Tad Jesucrist, que nac mènà mèn nación Israel, que nac mènà mèn co' inacte mèn nación Israel. <sup>23</sup> Ryete mèn mcua'n xquin mèn no mcua'n mèn xtol mèn loo Diox. Yende chó mèn nzo co' ndli con' ndlya's Diox no con' co' ndxò lezo' Diox. <sup>24</sup> Per com le' Diox nac Diox ndac, ¿lé'?, angmbli Diox par mdyal Diox ngò mèn loo cón che'n Diox por mtelá' Diox mèn loo con' ryes por cón che'n Crist Jesus. <sup>25</sup> Por cona, Diox mbli le'le' Crist nguth par leque yub Crist mdix cón che'n xtol mèn co'se' mque' mèn Crist loo cruz. Nguth Crist loo cruz por cón che'n mèn co' ndxàp xtol. No mèn co' ndxela's loo Crist, mènà ne'tyactide por cón che'n xquin mènà por ndxela's mènà loo Crist. Ngòc con'a loo Crist par non mèn no par nanee mèn le' Diox nac Diox nalì loo ryete con' ndli Diox, no thidteneque' mcha'la's Diox co'se' mteri'th no mtecan' Diox xquin mèn no xtol mèn co' mcua'n mèn ndoore' tel' Diox Crist loo izlyo'. <sup>26</sup> Ngòca, ne, le' Diox mcha'la's loo mèn póla par lu' Diox loo mèn tiemp ndxè' le' Diox nac Diox nalì no Diox nambii no toloque' nac Diox Diox nalì no Diox nambii co'se' ndyal Diox yò mèn loo cón che'n Diox, mèn co' ndxela's loo Jesús.

<sup>27</sup> ¿Xá mod, sya? ¿Máa mod co' mdye's gu' co'se' mdye's gu' loo cón che'n ley co' mxo'f Moisés loo gu'a, à'? Ya yende mod tolo tye's gu', nalle', ndyaquen. Peser nibdi's gu' loon: ¿Chonon yende mod tye's nu', à'? Pues nguleda loo gu' tac gu' ya ne'tolode ngli ryete con' xal mnibe' ley loo gu'. Ndxè'leque', ya indye'ste gu' nalle' por ngola's ryete na' loo Diox por cón che'n Jesucrist. <sup>28</sup> Por cona, non na' no nanee na' le' Diox ndyal yò mèn loo cón che'n Diox ante por ngola's mèn loo Tad Jesucrist. No yende chó mport nzo lezo' Diox gunee mèn ché' mbli mèn o ché' ne'nglide mèn xal mnibe' ley co' mxo'f Moisés loo mèn.

<sup>29</sup> ¿Ché' ngue li gu' cuent le' Diox ante nac Diox che'n mèn nación Israel, cà'? ¿Ché' indlide gu' cuent le' Diox nac Diox che'n taamas mèn co' inacte mèn nación Israel, ne, cà'? ¿Xálte mod ne' li gu' cuent le' Diox nac Diox che'n ryethe mèn dib athu loo izlyo', mèn co' inacte mèn nación Israel? Nacpe' Diox Diox che'n mènà, ne. <sup>30</sup> Com le' na' nanee ya yende tedib Diox. Thidte Diox nac Diox co' nzo, ¿lé'? No por ndxela's chol mèn loo Jesucrist, Diox ndyal yò mènà loo cón che'n Diox, que naca mèn co' ngòc circuncidar, que naca mèn co' indxàcte circuncidar. <sup>31</sup> Per nalle', ndlyazen ñibdizen thib con' loo gu': ¿Xá nee gu'? Ché' ntac ley co' mxo'f Moisés loo mèn o ché' intacte leya loo mèn tac ndxela's na' loo Crist, cà'? Yende xàa. Nec thib mod no nec tedib mod. Yende mod gab na' intacte ley co' mxo'f Moisés loo mèn, ¿lé'? Ndxè'leque', ndli nèque' na' le' ley ntacque'.

#### 4

*Trè' ndlu' le' con' co' mbli mbi' co' ngro' lèe Abraham nac thib con' co' ante hui' mèn no thib con' co' ante ñaa mèn loo.*

<sup>1</sup> ¿Cón gab na' cón che'n Abraham co' ngòc xudgool na' co' mbloj si' bin póla por mbli Diox ngòc con' ndac loo Abraham, à'? <sup>2</sup> Chele' Abraham ngòc mbi' nalì no mbi' nambii loo Diox por cón che'n ndxep con' ndac co' mbli Abraham loo Diox, nzoque' mod nde's Abraham. Per loo Diox yende mod ngác Abraham nde's Abraham. <sup>3</sup> ¿Ché' inda'de gu' cuent xal mbez di's co' ndub loo libr co' nac xti's Diox, cà'? Di'sa mbez: Abraham ngola's le' Diox lique' con' co' mcàbgòn Diox li Diox loo Abraham. No mbli Diox cuent le' Abraham nac mbi' nalì no mbi' nambii loo Diox por ngola's Abraham loo Diox no

maste. <sup>4</sup> Angab na'i, chele' thib mèn nque' zin' huiz, mèn ne'code ray co' yax càa mènà xal thib con' co' angta'la's mèn càa xtàa mèn xal thib ayud loo mèn co' mque' zin' huiza. Ndxè'leque', tmi co' ndxòo ray mènà nac tmi co' ndeb mèn loo mènà. <sup>5</sup> Per chele' ndxep mèn co' ne'nglide con' ndac loo Diox ndxela's loo Diox, mastale' ngòc mènà mèn co' mcua'n xquin no xtol, Diox ngòo cuent nac mènà mèn nali no mèn nambii loo Diox. Ngo Diox cuent nac mènà mèn nali no mèn nambii loo Diox ante por ngola's mènà loo Diox por cón che'n Jesucrist. <sup>6</sup> Tataaguè' ndxab David co' ngòc rey póla co'se' ndxab David:

Huen nda mèn co' ngo Diox cuent nac mèn nali no mèn nambii loo Diox mastale' yende chó con' ndac ngli mèn par ngàc nglá' mèn loo con' ryes.

<sup>7</sup> Lomisque' ndxab David, ne:

Huen nda ryete mèn, mèn co' mton'le' Diox ryete con' zab co' mbli mèn no mèn co' mteri'th mtecan' Diox ryete xquin no xtol co' mcua'n mèn.

<sup>8</sup> Huen nda mèn co' ingode Diox cuent ndxàp mèn xtol mèn.

<sup>9</sup> ¿Ché' ngue li gu' cuent ante loo mèn co' ngòc circuncidar mdyal Diox ngòo mènà loo cón che'n Diox no ngo Diox cuent nac mènà mèn nali no mèn nambii loo Diox por huen ndxàca loo mèn, o ché' ngue li gu' cuent ihuente ndxàca loo mèn co' indxàcte circuncidar, ne, cà'? Huenque' nda no huen ndxàca loo ryop ned mènà, ey. Tac daa mdale' cuent loo gu' le' Diox mdyal ngòo mèn loo cón che'n Diox no mblolé' Diox cuent le' Abraham ngòc mbi' nali no mbi' nambii loo Diox ante por ngola's Abraham le' Diox lique' co' mcàbgòn Diox li Diox loo Abraham. <sup>10</sup> Ndlyazen ñee gu' loon: ¿Pól mblo Diox cuent le' Abraham ngòc mbi' nali no mbi' nambii loo Diox, à'? ¿Ché' mblo Diox cuent ngòc Abraham mbi' nali no mbi' nambii loo ngòc circuncidar Abraham o ché' mblo Diox cuenta ndoore' gac circuncidar Abraham, cà'? Tyè'. Ne'ngode Diox cuent nac Abraham mbi' nali no mbi' nambii loo ngòc circuncidar Abraham. Ndxè'leque', huen huen mblo Diox cuent ngòc Abraham mbi' nali no mbi' nambii loo Diox ndoore' gac circuncidar Abraham. <sup>11</sup> Cona, ngue niin loo gu': Diox mblo cuent nac Abraham mbi' nali no mbi' nambii loo Diox ndoore' tlo Abraham li Abraham costumbr che'n circuncisión. Con'a ngòc thib con' co' mblu' loo taamas mèn le' por cón che'n circuncisión co' ngòc loo Abraham, Diox mblo ro loo taamas mèn le' Diox mblo cuent ngòc Abraham thib mbi' nali no thib mbi' nambii loo Diox ante por ngola's Abraham le' Diox lique' con' mcàbgòn Diox li Diox loo Abraham. Ngòc con'a loo Abraham par mblo Diox cuent nac Abraham xudgool ryete mèn co' ndxela's le' Diox lique' co' mcàbgòn Diox li Diox mastale' ne'gàcte circuncidar mènà. Leque moda, ne, Diox ngo cuent cón che'n mènà nac mènà mèn nali no mèn nambii loo Diox no mdyal Diox ngòo mèn loo cón che'n Diox ante por ngola's mènà le' Diox lique' co' mcàbgòn Diox li Diox loo mènà. <sup>12</sup> Lìca, Abraham nac xudgool mèn co' ngòc circuncidar por nerleque' ngòc circuncidar Abraham. Per di's co' ngue niin loo gu' ndxè' nee di's iante nac Abraham xudgool mèn co' ngòc circuncidar lad. Ndxè'leque', di's ndxè' nee di's nac Abraham xudgool mèn, ne, mèn co' ante ndxela's loo Diox le' Diox li co' mcàbgòn Diox li Diox xalque' ngola's Abraham loo Diox le' Diox lique' con' mcàbgòn Diox li Diox loo Abraham ndoore' gac circuncidar Abraham.

*Trè' ndlu' ngòcque' no mdyaaque' no mdubque' di's co' mcàbgòn Diox li Diox loo mèn ante por ngola's mèn loo Diox por cón che'n Jesucrist.*

<sup>13</sup> Diox mcàbgòn loo Abraham no loo bin Abraham yan' no mènà no gac che'npe' mènà dib athu loo izlyo' xal xyònpe' mènà. Per cón che'n con' co' mcàbgòn Diox ta' Diox loo Abraham, ne'ncàbgònnte Diox con'a loo Abraham por mdubdi's Abraham no por mbìn Abraham di's co' mnibe' ley co' mxo'f Moisés loo mèn. Ndxè'leque', Diox mcàbgòn di'sa loo Abraham ante por ngola's Abraham loo Diox le' Diox lique' con' mcàbgòn Diox li Diox loo Abraham. <sup>14</sup> Tac chele'i ngàc ante loo mèn co' ndyubdi's loo di's co' ñibe' ley co' mxo'f Moisés loo mèn ngàc mèn co' yan' no no co' gac che'npe' dib athu loo izlyo' xal mcàbgòn Diox, le' sya, anxle' ngala's mèn loo Diox por cón che'n Jesucrist. No lomisque', yende cón ntac di's co' mcàbgòn Diox li Diox loo Abraham no loo bin Abraham. <sup>15</sup> Mèn nación

Israel co' indyubdi'ste loo ley co' mxo'f Moisés loo mènà, naquin tetii Diox mènà. Per loo mèn co' inacte mèn naciòn Israel co' ne'nque node ley co' nac ley co' mxo'f Moisés loo mèn naciòn Israel, ne'nquexù'de ley mènà. Ne' ne' ngàp mènà dol loo Diox por cón che'n leya tac yende leya loo mènà.

<sup>16</sup> Por cona, ngue niin con' ndxè' loo gu': Diox mcàbgòn con'a loo Abraham no loo bin Abraham por ngola'sque' mènà le' Diox lique' con' mcàbgòn Diox li Diox loo mènà. Tataa mbli Diox loo Abraham no loo bin Abraham par ngòc con' mcàbgòn Diox thib con' anxle' loo Abraham no loo bin Abraham no par ngòc nèe con' mcàbgòn Diox loo mènà. Con'a nee di's, ne'ncàbgònte Diox con'a ante loo mèn co' mdubdi's loo ley co' mxo'f Moisés loo mèn. Ndxè'leque', mcàbgòn Diox con'a loo mèn co' ante ngola's le' Diox li con' co' mcàbgòn Diox li Diox loo mèn xal ngola's Abraham le' Diox li con' co' mcàbgòn Diox li Diox loo Abraham. Por cona, Diox mblo cuent nac Abraham xudgool ryete na' co' ndxela's loo Diox por cón che'n Jesucrist xalque' ngola's Abraham loo Diox. <sup>17</sup> Ngòca loo Abraham xalque' ndub di's loo libr co' nac xti's Diox co' ndxab Diox co' mbez taandxè':

Daa mbli le' lùu gac ner xudgool che'n huax mèn.

Loo yub Diox co' ngola's Abraham, yub Diox nac xa' co' nda' yalnaban loo mèn nguth. No li Diox cue chol con' co' tarte cuec Diox.

<sup>18</sup> Abraham nonque' no nanee Abraham le' Diox ndxác li co' nee lezo' Diox li Diox loo Abraham. Por cona, ngola'sque' Abraham que no Abraham xin' Abraham mastale' ngoxle' Abraham. Axta syare', ngòc Abraham xudgool huax mèn xalque' ndxab Diox loo Abraham gaca loo Abraham xal mbez di's co' ndub:

Gac mèn co' gac bin lùua mènléy' loo izlyo', Abraham.

<sup>19</sup> Co'se' yamerle' taa Abraham thib ayo lín', be' ndxela's Abraham co' gunii Diox loo Abraham li Diox loo Abraham. Làth xtau'a, nonque' Abraham le' Abraham ryop Sar tyan xin' mastale' ngoxle' Abraham ryop Sar, co' nee di's, mbri'thle' tiemp que no ryop sa' l' xa' xin' xa'. <sup>20</sup> Ne'ngàcte chop loo chop la's Abraham. Ne' ne' ndoo xà' lezo' Abraham loo di's co' mcàbgòn Diox li Diox loo Abraham. Ndxè'leque', sate más ngola's Abraham no ngòp Abraham yalxla's cón che'n di's co' mcàbgòn Diox li Diox loo Abraham. Toloque' ndxab Abraham di's ndac no di's natú' cón che'n Diox loo mèn le' Diox nac Diox roo no Diox xèn. <sup>21</sup> Thidteneque' mbli nèe Abraham lezo' Abraham no ngobe'que' Abraham lezo' Abraham le' Diox ndxàp con' la's nii Diox no la's ya' Diox par lique' Diox ryete con' mcàbgòn Diox li Diox loo Abraham. <sup>22</sup> Por cona, Diox mblo cuent nac Abraham mbi' nali no mbi' nambii loo Diox tac ngola's Abraham le' Diox li con' mcàbgòn Diox li Diox loo Abraham. No mdyal Diox ngòc Abraham loo cón che'n Diox.

<sup>23</sup> No por cón che'n Abraham co' mblo Diox cuent nac Abraham mèn nali no mèn nambii, no mdyal Diox ngòc Abraham loo cón che'n Diox tac ngola's Abraham loo Diox, inacte ante cón che'n Abraham ndub di'sa loo xti's Diox. <sup>24</sup> Ndxè'leque', ndub di'sa loo libr co' nac xti's Diox por cón che'n na', ne. Diox mdyal ngòc na' loo cón che'n Diox no mblolè' Diox cuent no na' nac mèn nali no mèn nambii, na' co' ndxela's loo Diox co' nac yub Diox co' mblo xban Tad Jesucrist na' làth mèn nguth. <sup>25</sup> Nguth Tad Jesús loo cruz por cón che'n xquin na' no xtol na'. Mblo xban Diox Tad Jesús par tataa mod, por cón che'n Tad Jesús, ndyal Diox ndxòc mèn loo cón che'n Diox. No por cón che'n Tad Jesús ndxác mèn mèn nali no mèn nambii loo Diox.

## 5

*Trè' ndlu' cón che'n con' ndac co' ndxác loo mèn co' indxàpte xtol loo Diox.*

<sup>1</sup> Por cona, ngue niin loo gu': Yub Diox mblolè' cuent nac na' mèn nali no mèn nambii loo Diox por ngola's na' loo Tad Jesucrist. No mtu' mtàlle' Diox lezo' Diox ñèe Diox na' por cón che'n Tad Jesucrist na'. <sup>2</sup> Por cón che'n Tad Jesucrist, mxyal' ned mxyal' yó' loo na' par ngòc na' loo cón che'n Diox par, lìcque', li Diox anggac con' ndac loo na' tac ngola's na' loo Diox por cón che'n Jesucrist. Mbli nèe na' na' loo con' ndac co' ndli Diox angndxác loo na'. No ndyac lezo' na' loo con' nzi quee lezo' na' co' gac che'npe' na' co'se'



yòo na' co'te' gac con' roo con' xèn loo na' xal ndxàc con' roo con' xèn loo Diox. <sup>3</sup> No iante ndyac lezo' na' loo co' nzi quee lezo' na'a. Ndxè'leque', ndyac lezo' na' co'se' ndxàc chol yaltii loo na' no co'se' ndxàc chol yalquii loo na' tac nanee na' no non na' le' co'se' ndxàc chol yaltii o yalquii loo na', con'a ndli tolo cha'la's na' loo chol con' co' ndxàc loo na'. <sup>4</sup> No co'se' nxec na' no ncha'la's na' ndxàc yaltii no yalquii loo na', ndxàca loo na' par tolo ndli nèe na' na' loo cón che'n Crist. No co'se' nxec na' ndxàc con'a loo na', ndlu' na' loo mèn le' na', licque', ndxela'sque' loo Crist. Le' sya, tataa mod huen huen nzi quee lezo' na' loo con' ndac co' gac loo na' co' li Diox loo na' yiloo. <sup>5</sup> Co'se', licque', nzi quee lezo' na' loo con' ndac co' gac loo na' yiloo, indxàcte chop loo chop la's na' loo cón che'n Diox par tyoo xà' lezo' na' loo Diox. Tac Diox mblàa Xpii Natú' che'n Diox loo na' co' ndli nden' na' le' Diox axta arid nque' lezo' ñèe Diox na'. No tataa mod más nque' lezo' na' Diox.

<sup>6</sup> Per co'se' be' ngòc na' mèn co' ne'ngácte ngli par ntelá' na' na' loo con' ryes nec thib mod no nec tedib mod, le'xque' sya, ngòc tiemp par gath Crist. No ale, yi'f yèe Crist nguth Crist por cón che'n mèn ye'rsin'. <sup>7</sup> Imbiizte thib mbi' par anggath mbi' por cón che'n tedib mèn. Ne' ne' gath mbi'a por cón che'n thib mèn co' nac mbi' ndac. Mastale' más mèn ndac nac thib mbi', ne'gathte thib mbi' por cón che'n mèn. <sup>8</sup> Per Diox mblu' loo na' xá mod anze'f nque' lezo' Diox ñèe Diox na' por yi'f yèe Crist nguth Crist por cón che'n na' mastale' be' nac na' mèn co' ncu'a'n xquin na' no be' nac na' mèn co' ncu'a'n xtol na' tiempa. <sup>9</sup> Per nalle' Diox mdyallo' ngòc na' loo cón che'n Diox par gac na' mèn nalì no mèn nambii loo Diox por cón che'n ren Crist co' mxyo. Por cona, ndlii más ndxàp na' yalxla's le' Diox telá' na' loo yaltii no yalquii huiz co'se' gac lult huiz co'se' gac yalquii no yaltii loo mèn. Tataa li Diox loo na' por cón che'n Crist. <sup>10</sup> Tac co'se' be' ngòc na' mèn co' ngòc ngolo ngola's loo Diox thib cua'a, Diox mbli le' na' mbyu' mbyàl lezo' loo Diox por cón che'n yalguth co' mquée loo xgan' Diox. No por cona, más ndxàp na' yalxla's nalle' par gaca loo na' lyá' na' loo con' ryes por yalnaban co' ndxàp Tad Jesús tac mbyu' mbyàlle' lezo' na' loo Diox nalle'. <sup>11</sup> Iante mbli Diox par mbyu' mbyàlle' lezo' na' no ndyac lezo' na' loo Diox. Ndxè'leque', nden' na' le'n lezo' na' Diox roo Diox xèn nac Diox por cón che'n Tad Jesucrist na' tac por cón che'n Tad Jesucrist ngòc na' mèn co' mbyu' mbyàlle' lezo' loo Diox.

*Trè' ndlu' cón che'n Adán no cón che'n Crist.*

<sup>12</sup> Cona, ngue niin loo gu': Texal mcua'n thidte mbi', co' ngòc ner mbi' loo izlyo', xquin mbi' no xtol mbi', por cón che'n mbi'a mtlo chol mèn, mcua'n chol mèn xquin mèn no xtol mèn. Por cona, nquée yalguth loo mèn por xquin che'n yalxtol co' mcua'n ner mbi'a. No por cona, ncàba yalguth loo ryete mèn tac ryete mèn mcua'n xquin mèn no xtol mèn. <sup>13</sup> Ndoore' co'se' xo'f Moisés ley co' mnibe' Diox loo Moisés xo'f Moisés loo mèn cón che'n Diox, mcua'nle' mèn xquin mèn no xtol mèn loo izlyo'. Per mastale' mcua'n mèn xquin mèn no xtol mèn loo izlyo', Diox ne'ngode cuent cón che'n xtol mèn no xquin mèn co' mcua'n mèn ndoore' co'se' tarte xo'f Moisés ley loo mèn. <sup>14</sup> Cona, ngue niin loo gu': Mastale' ne'ngode Diox cuent cón che'n xtol mèn tiempa, mquée yalguth loo mèn anon ngòc tiemp co' ngo ban Adán axta ngòc tiemp co'se' ngo ban Moisés, mèn co' mcua'n xtol. Mquée yalguth loo ryete mèn, mastale' ne'ncua'nte mèn xtol mèn xal mcua'n Adán xtol Adán co'se' ne'ndubdi'ste Adán loo con' co' mnibe' Diox loo Adán li Adán. Adán mblu' ndxep con' loo na' co' nac xal xin no xnaa cón che'n thib mbi' co' nac di's yi'th yiloo, co' nee di's, nac Crist.

<sup>15</sup> Mastale' naroo ngòc xquin no xtol Adán co' ngòp Adán, per pà ta' xquin no xtol Adán co' ngòp Adán con con' ndac co' nac con' roo con' xèn co' mbli Diox angndxàc loo na'. Tac por xquin no xtol co' ngòp thidte mbi' co' ngòc Adán, mcàba loo mèn mquée yalguth loo huax mèn. Per co'se' mbli Diox par mblyá' mèn loo con' ryes, anxle' mbli Diox con' ndaca loo mèn por cón che'n thidte mbi' co' nac Jesucrist. Con' ndac co' mbli Diox angndxàc loo mèn, más con' roo con' xèn nac con' ndaca leque xquin Adán. No ndxe'leque', ncàba más con' ndac loo huax mèn por cón che'n Jesucrist. <sup>16</sup> Mastale' xquin

no xtol co' mcua'n thidte mbi' co' ngòc Adán ngòc con' xin no con' cap loo Diox, per pà ta' xquin no xtol co' mcua'n Adán con con' ndac co' nac con' roo con' xèn co' mbli Diox par ndlyá' mèn loo con' ryes. Tac por cón che'n xquin no xtol co' mcua'n thidte mbi' co' ngòc Adán, con'a ndli mquexù' Diox ryete mèn. Per cón che'n con' ndac co' mbli Diox par ndlyá' mèn loo con' ryes por cón che'n Jesucrist co'se' ngolo mque tee cua'n mèn xquin mèn no xtol mèn, ale le'le' mcàba loo mèn yub Diox mdyal ngòc mèn loo cón che'n Diox par gác mèn mèn nali no mèn nambii loo Diox, mèn co' ngola's loo Jesucrist. <sup>17</sup> Por xquin no xtol che'n thidte mbi' co' mcua'n xquin no co' ngòc xtol mtlo mquée yalguth loo mèn. Con'a ndli sate más gác con' ndac loo mèn, mèn co' Diox mdyal ngòc mèn loo cón che'n Diox par gác mèn mèn nali no mèn nambii loo Diox. Ban no mèn Diox thidtene par ñibe' no mèn Diox co'se' gác huiz co' ñibe' Diox loo izlyo'. Li Diox tataa gaca loo mèn por cón che'n thidte mbi' co' nac Jesucrist.

<sup>18</sup> Cona, ngue niin loo gu': Por cón che'n xquin no xtol co' mcua'n thidte mbi' co' ngòc Adán, mquexù' Diox ryete mèn. Tataaguè' ne, por cón che'n thidte mbi' co' nac Jesucrist, Diox mdyal ngòc mèn loo cón che'n Diox par ngòc mèn mèn nali no mèn nambii, mèn co' ndxela'spe' loo Jesucrist no loo cón che'n Jesucrist. <sup>19</sup> Con' ndxè' nee di's: Por cón che'n de ne'ndubdi'ste thib mbi' loo con' mnibe' Diox loo mbi' li mbi', con'a mcàb huax mèn mcua'n xquin mèn no mcua'n mèn xtol mèn. Lomisque' mod ne, por cón che'n de mdubdi'sque' thib mbi' co' nac Jesucrist loo Diox, mdyal Diox anze'f huax mèn gác mèn nali no mèn nambii loo Diox.

<sup>20</sup> Co'se' mxo'f Moisés ley loo mèn nación Israel xalque' mnibe' Diox loo Moisés, di's co' ndub loo leya mblu' loo mèn le' mèn anze'f ncu'a'n xtol mèn no anze'f ncu'a'n mèn xquin mèn loo Diox. Per ndxe'leque', láth más ncu'a'n mèn xquin mèn no xtol mèn, sate más con' roo con' xèn ngòc con' ndac co' angmbli Diox loo mèn. <sup>21</sup> Ngòc con'a loo mèn par de que texal mcua'n mèn xquin mèn no xtol mèn par tataaguè' mquée yalguth loo mèn, tataaque' mod, ne, con' ndac co' angmbli Diox loo mèn sate más mbli par mcàba loo mèn le' yub Diox mdyal ngòc mèn loo cón che'n Diox par tataa mod gác mèn nali no mèn nambii loo Diox no par tataa mod li Diox ban no mèn Diox thidtene por cón che'n Tad Jesucrist na'.

## 6

*Ndxáca loo mèn co' nzo loo cón che'n Crist xal thib mèn nguth co' yende con' nden'.*

<sup>1</sup> ¿Xá nee gu', ey? ¿Ché' tolo cua'n na' xquin na' no xtol na' par de que tataa mod sate más li Diox gác con' ndac che'n Diox loo na', cà'? <sup>2</sup> Nec thib mod no nec tedib mod ne'lide na' tataa, ¿lé'? Tac na' co' nac xal mèn nguth loo xquin na' no loo xtol na', co' nee di's, incua'nte na' xquin na', ¿xá mod ale ndlyá's gu' bere na', que tee cua'n na' xquin na' no xtol na' tedib vez, sya? <sup>3</sup> ¿Ché' iñeede gu' co'se' ngòc bautizar ryete na' loo ngola's na' no ngòc na' loo cón che'n Crist Jesús, thidte ngòc no na' Crist Jesús par de que texal mquée yalguth loo Crist Jesús par guneei loo Crist Jesús loo cón che'n yalnaban che'n izlyo' ndxè', tataaguè' na', ne, ya incua'nte na' xquin na' no xtol na' más. Tataaque' ngòca loo na', ¿lé'? <sup>4</sup> Cona, ngue niin loo gu': Por cón che'n ngulàa yéc na' no ngulàa lezo' na', ngòc bautizar na' loo ngola's na' no ngòc na' loo cón che'n Diox, co' nee di's, thidte mbua's na' con Crist co'se' ngòc na' xal mèn nguth loo cón che'n xquin na' no xtol na' par nque tee ban ndac na' loo Diox. No más ndoo lezo' na' li na' con' ndac loo Diox co' nac thib yalnaban cub. Cona nee di's, nguth no na' Crist no ngro xban no na' Crist por cón che'n con' roo con' xèn co' nzo la's nii xud na' Diox no co' nzo la's ya' xud na' Diox co' mbli xud na' Diox loo Crist.

<sup>5</sup> Tac chele' Diox ngo cuent thidte ngòc no na' Crist co'se' nguth Crist por ngòc na' loo cón che'n Crist, tataaguè' gaca loo na' ryo xban na' xalque' ngro xban Crist làth mèn nguth co'se' gácpe' huiza. <sup>6</sup> Non na' no nanee na' no nda' na' cuent le' ryete mod ye'rsin' co' mque tee lí na' co' mque no na' ndoore' yila's na' loo Crist mblyuxle' loo na' tac Diox ngo cuent mblyuxa loo na' por mquée Crist loo cruz por cón che'n na'. Tataa ngòca loo

na' par nguled mbli na' ryethe con' ye'rsin' co' mque tee li na' xal nduhua nee lezo' na' li na'i. Le'i mblyuxle' loo na' par ya ne'tolode gac na' xal thib moz par li na' rye con' ye'rsin' co' ndlya's na' li na' co' nac xtol na' no xquin na' xal co'se' ndli thib moz sirv loo thib patrón moz par li yèe moz co' ndlya's patrón li moz. <sup>7</sup> Hui' gu' nexa. Thib mèn co' nguth ya inden'te chol con' xal mden' mèn ndoore' gath mèn. Tataaguè' ndxàca, ne, le' chol mèn co' nac xal thib thebol loo cón che'n xquin mèn no loo cón che'n xtol mèn co' ncu'a'n mèn, mèn ya inquinte tolo cua'n xquin mèn no xtol mèn par tolo li mèn con' ye'rsin'. <sup>8</sup> Chele' na', licque', ngo cuent nguth nole' na' Crist, thidteneque' ndxàp na' yalxla's nalle' yo ban no na' Crist thidtene yiloa. <sup>9</sup> Naneeque' na' no nonque' na' co'se' ngro xban Crist làth mèn nguth, ya ne'berede Crist gath Crist tedib vez. Ya yende chó cón che'n yalguth par quée yalguth loo Crist tedib vez. <sup>10</sup> Co'se' nguth Crist loo cruz, thidte vez nguth Crist por cón che'n xquin mèn no xtol mèn. Co'se' ngro xban Crist, ngro xban Crist par thidte yòo ban no Crist Diox. <sup>11</sup> Cona, ngue niin loo gu': Bli gu' xtùuz no bli gu' cuent, licque', nac gu' xal mèn co' nguth loo cón che'n xquin gu' no loo cón che'n xtol gu'. Lomisque' ne, bli gu' cuent ante naban gu' par thidte ban no gu' Tad Crist Jesús na' loo Diox tac gu' nac che'npe' Crist.

<sup>12</sup> Ngue niin loo gu', ne: Por nac gu' che'n Crist, ¿lé?, ya ne'ta'de gu' lugar ñibe' xtùuz gu' no lezo' gu' loo gu' par ndryo' ndlyen' lezo' gu' li gu' co' tyub yo'f lezo' gu' par cua'n gu' xquin gu' par ten' gu' nquin li yèe gu' con' co' ndyub yo'f lezo' gu' par li gu'i. <sup>13</sup> Ne'ta'de gu' lugar ñibe' xtùuz gu' no lezo' gu' loo gu' par tyub yo'f lezo' gu' cua'n gu' xquin gu' no xtol gu' par li gu' con' ye'rsin'. Ndxè'leque', thib lite fta' gu' lugar ñibe'pe' Diox loo gu' par thidteneque' li gu' sirv ante loo Diox xal mèn co' nguthle', no mbere mèn ngro xban mèn, co' nee di's, ne'tolode li gu' con' ye'rsin' par cua'n gu' xquin gu' no xtol gu'. Ndxè'leque', ante ban gu' loo cón che'n Diox thib yalnaban cub, co' nee di's, li gu' con' huen xalque' nee lezo' Diox par li gu' con' ndac loo Diox xalque' nee lezo' Diox. <sup>14</sup> Tac nalle' ya inquinte tolo ta' gu' lugar ñibe' xtùuz ye'rsin' co' ndli gu' loo gu' par cua'n gu' xquin gu' no xtol gu'. Tac nase ya iñibe'de ley co' mxo'f Moisés loo na' más. Ndxè'leque', nque tee ban na' loo con' ndac co' ndli Diox angndxàc loo na'.

*Pab ngue tetac di's loo mèn cón che'n xtol mèn le' mèn nac xal thib moz loo xtol mèn no loo xquin mèn.*

<sup>15</sup> Nde niin tedib con' loo gu', ne: ¿Ché' tbera na', tolo cua'n na' xquin na' no xtol na' por ya indlide na' xal ñibe' ley co' mxo'f Moisés loo na', o ché' tolo cua'n na' xquin na' tac nque tee ban na' loo con' ndac co' angmbli Diox loo na', cà'? Nec thib mod no nec tedib mod ne'cua'nte na' xquin na' no xtol na', ¿lé'? <sup>16</sup> Hui' gu' nexa. Gu' huen huen nanee no nda' gu' cuent xal co'se' ndlya's thib mbi' nque' mbi' zin' con' thib patrón. No tyubdi's yèe mbi' loo patrón. Sya, nac mbi'a móz yèe loo patrona. Látha, que nzo ne'ñee lezo' mbi', tyubdi's yèe mbi' loo patrón. Tataaguè' ndxàca loo gu' co'se' nda' gu' lugar ndli gu' co' ndryo' ndlyen' lezo' gu' no ndli gu' con' ye'rsin' co' nac xtol gu' no xquin gu'. Per cón che'n xquin gu' no xtol gu' co' ncu'a'n gu'a, con'a ncàb nquin co' xà' Diox gu' loo Diox thidtene yiloa. Nacquele' gu' tyubdi's loo Diox na, Diox li le' gu' que tee ban lì loo Diox no que tee ban ndac gu' loo Diox. <sup>17</sup> Per Diox quix Diox por cón che'n gu' le' gu' ya inacte xal thib moz loo xquin gu' no loo xtol gu' par li gu' con' co' ndryo' ndlyen' lezo' gu' xal ngòc gu' thib cua'a. Per nase, dib nzo yéc gu' no dib nzo lezo' gu' nzi té'th gu' xal nac loo co' nzo gu' co' nac cón che'n Jesucrist co' mté'th gu' co'se' ngola's gu'. <sup>18</sup> Per nalle', gu' mblyá'le' no ya yende cón mbee nca' gu' loo co' nac xtol gu' no xquin gu'. Gu' nzi xo'f zin' loo Diox por mbli Diox nzi tee ban lì gu' no nzi tee ban ndac gu' loo Diox. <sup>19</sup> Con' ndxè' ngue niin loo gu' xal ndyoodi's chol mèn co' alithe ndyoodi's par ta' gu' cuent no par non gu' no nanee gu' co' ngue niin loo gu' tac gu' indxònte di's no ne' ne' indxà'd gu' di's co' ngue niin loo gu' co' huenleque': Texal ngòca loo gu' co'se' mque tee ban gu' par mda' gu' lugar mnibe' con' ye'rsin' no vis loo gu' par xo'f zin' gu' con' zab no chol con' ye'rsin' na, tataaguè' mod gòc gu' mèn co' tyoo lezo' ante ta' gu' lugar

ñibe' Diox loo gu' par xo'f zin' gu' thib zin' ndac loo Diox par tataa mod thidte vez ryo xà' gu' loo cón che'n xab izlyo' par que tee ban li gu' loo Diox nalle'.

<sup>20</sup> Co'se' be' ngòc gu' xal thib moz loo rye con' co' nac con' ye'rsin' co' ngòc xquin gu' no xtol gu', ne'nque tee ban lide gu' no ne'nque tee ban ndacte gu' loo Diox. <sup>21</sup> Per nalle' ndlyazen ñee gu' loon: ¿Chó con' ndac mbli gu' gan co'se' mque tee li gu' con' co' ndli nthyon gu' nalle', à'? Yende chó con' ndac mcàb con'a loo gu', ¿lé'? Tac con' co' mbli gu'a, ale le'le' mcàba le' Diox co' xà' gu' loo Diox thidtene yiloa, ¿lé'? <sup>22</sup> Per nase ya yende chó con' cuee cà' gu' par tolo gac gu' xal moz loo con' ye'rsin' co' ndyub yo'f lezo' gu' par tolo cua'n gu' xquin gu' no xtol gu'. Nalle' gu' ndoo lite nzi xo'f zin' thib zin' co' nac cón che'n Diox loo Diox. Con'a ndli ncàb con' ndac loo gu' tac nzi ro xà' gu' loo cón che'n xab izlyo' por ngòc gu' che'npe' Diox. Más de cona, li Diox le' gu' ban no Diox thidtene yiloa, ne. <sup>23</sup> Tac rye mèn co' thidtene mdoo lezo' tolo cua'n mèn xquin mèn no xtol mèn, loo mèn na ncàb thib con': ryo xà' mèn na loo Diox thidtene co'se' yilo gath bél'yòo lad mèn. Per cón che'n con' ndac co' angli Diox loo mèn co' ndxela's loo Tad Jesucrist na' nac yòo ban no mèn Diox thidtene tac thidte nac mèn na con Tad Crist Jesús na'.

## 7

*Pab ngue tetac di's xal nac cón che'n thib ned mèn co' nselya'.*

<sup>1</sup> Gu' co' nac mèn huesen por cón che'n Jesucrist, gu' nda'le' cuent co' huenleque' cón che'n ley co' mxo'f Moisés loo mèn. Leya ante ñibe' loo mèn láth be' naban mèn, ¿lé'?

<sup>2</sup> Angab na'i, thib xa'got co' mselya' con thib xa'bi', xa'gota thidteneque' natedó' con sa'l xa'gota láth naban xa'bi' co' nac sa'l xa'gota, co' nee di's, thidteneque' naban no xa'gota sa'lbi' xa'gota le'n huiz co' naban sa'lbi'pe' xa'gota. Per chele' xa'bi' co' nac sa'lbi'pe' xa'gota nguth, xa'gota mbyan' thib. Ya yende chó cuee no ca' xa'gota xal ñibe' ley loo ryop sa'l xa' láth naban sa'lbi' xa'gota. <sup>3</sup> Per chele' xa'gota queltàa con tedib xa'bi' láth naban sa'lbi'pe' xa'gota, xa'gota mbix yéc no ngue li xa'gota yalburrid loo sa'lbi'pe' xa'. Per chele' sa'lbi' xa'gota nguth, xa'gota mbyan' thib no yende chó cuee no cà' xa'gota xal mnibe' ley co' mxo'f Moisés loo mèn. Sya, nzoque' mod selya' xa'gota con tedib mbi'. Sya, tataa mod ne'lide xa'gota yalburrid loo ner xa'bi' co' ngòc sa'lbi' xa'got, mbi' co' nguth.

<sup>4</sup> Por cona, ngue niin loo gu', mèn huesen: Gu' co' ya ngòole' loo cón che'n Crist, nac gu' xal thib cuen ya' Crist no xal thib cuen nii Crist. Gu' ngro' loo cón che'n ley co' mxo'f Moisés loo gu' xal thib xa' co' nguthle' par tataa mod ngòc gu' che'npe' Crist xal ndxàca loo thib xa'got co'se' mselya' thib xa'got con sa'l xa'. Nalle' nac gu' mèn co' nac che'npe' Crist, Crist co' mbli Diox ngro xban làth mèn nguth, par tataa mod li gu' con' ndac co' ndxòo lezo' Diox. <sup>5</sup> Tac láth be' mque tee ban na' loo cón che'n co' nac xab izlyo', ndoore' yila's na' loo Crist, mbli na' xal nduhua nee lezo' na' loo cón che'n co' nac xab izlyo'. Látha, ley co' mxo'f Moisés loo na'a mbli par mdyub xnii yéc na' no mdyub xnii lezo' na' par mdub yo'f lezo' na' mbli na' con' ye'rsin'. Con' ye'rsin' co' mbli na'a, con' ye'rsin'a mcàb loo na' co' xà' Diox na' loo Diox thidtene yiloa. <sup>6</sup> Per nalle', ngro'le' na' loo cón che'n co' ñibe' ley co' mxo'f Moisés loo na' par inquinte tolo li yèe na' xal mnibe' ley co' mxo'f Moisés loo na'. Tac loo cón che'n ley co' mxo'f Moisés loo mèn, nac na' xal mèn co' nguthle' par xo'f zin' na' thib zin' co' nac cón che'n Diox xal ñibe'pe' Xpii Natú' loo na' co' nac thib mod cub. Inacte mod cub co' ndxàp na'a nalle' xal nac di'sgool co' ndub loo ley co' mxo'f Moisés loo mèn.

*Pab ngue ta' cuent cón che'n xquin Pab no xtol Pab co' ngòp Pab.*

<sup>7</sup> Per nalle' ndlyazen ñee gu' loon: ¿Xá mod gab na'? ¿Ché' tab na' le' ley co' mxo'f Moisés loo mèn nac thib con' co' ncàb ncu'a'n mèn xtol mèn no xquin mèn, cà'? Yende xàa. Nec thib mod no nec tedib mod ne'gabte na' tataa, ¿lé'? Per, lìca, daa inonte le' daa ndxàp xquin daa no xtol daa chele' ley co' mxo'f Moisés loo na' ne'nglu'de le' daa nac mèn co' ndxàp xtol. Angab na'i, chele' di's co' ndub loo ley co' mxo'f Moisés loo

mèn ne'taade nglu' loon, daa ne'ndade cuent cón nac nqueli'th mèn cón che'n xtàa mèn.  
<sup>8</sup> Per mastale' mbli' ley loon indxàalte queli'then cón che'n xtàan, ale ndxe'leque', más mcuanen xquinen no xtolen. Tataa mblin mastale' más mdyub xnii yéquen no mdyub xnii lezon cón che'n xquin daa no xtol daa. Ale le'le' mdyub yo'f lezon sate más tolo lin ryethe con' ye'rsin'. Tac co'te' yende ley co' mxo'f Moisés loo na', ne' ne' ta' mèn cuent cón nac xquin mèn no xtol mèn. Alithe nzi cua'n mèn xquin mèn no xtol mèn.  
<sup>9</sup> Ngo thib tiemp co'se' tarte tan cuent no tarte ten'en cón nac co' ñibe' ley co' mxo'f Moisés loo mèn. Làth xtau'a, mden'en axta arid mbi' ndac ngòc daa no huen ngo lezon loo Diox, mdyaquen. Per co'se' mtlon mdan cuent no mden'en xá mod, lìcque', nquin tyubdi's mèn loo co' ñibe' ley co' mxo'f Moisés loo mèn, axta syare' mdan cuent ngòpen xquinen no ngòpen xtolen. Syare', mden'en ngòc daa thib mèn co' mquexù' Diox par co' xà' Diox daa loo Diox thidtene yiloo. <sup>10</sup> Syare', mdan cuent le' ley co' mxo'f Moisés loo mèn ngue lu' xá mod gáp mèn, co' nee di's, càb loo na' yòo ban no na' Diox yiloo. Per ndxe'leque', le'le' mbli leya par mquexù' Diox daa, co' nee di's, co' xà' Diox daa loo Diox yiloo. <sup>11</sup> Tac axta co'se' mdape'en cuent cón che'n con' co' mñibe' ley co' mxo'f Moisés loo mèn no mblyazen ndyubdizen loo leya, per ale sate más mdub xnii yéquen no mdub xnii lezon loo cón che'n Diox por cón che'n leya, per ndxe'leque', con' ye'rsin' no vis co' nde teele' mblin mcàb loon par tolo tyub yo'f lezon par lin con' ye'rsin'. No por cona, mzyalque' daai tac por mod co' mque tee ban daa loo con' ye'rsin' leque ley mbli mcàb loon mquexù' Diox daa par co' xà' Diox daa loo Diox thidtene yiloo.

<sup>12</sup> Cona, ngue niin loo gu': Thib mod no tedib mod, natú' nac di's co' ndub loo ley co' mxo'f Moisés loo mèn. Nali nac di'sa no ndac nac di'sa. Tac di'sa nac di's co' ñibe' Diox loo mèn par li mèn. <sup>13</sup> ¿Xá nee gu'? ¿Ché' tác li co' mbez na' nac con' ndac par càba ryo xà'en loo Diox thidtene yiloo, cà'? Yende xàa. Nec thib mod no nec tedib mod ne'gàcta tataa, ¿lé'? Ndxé'leque', xquin daa no xtol daa co' mque tee cuanen mbli le' daa ngro xà' loo Diox thib cua'a. Por cón che'n ley co' mxo'f Moisés loo na', ndan cuent le' mod co' mque tee banen ngòc mod ye'rsin'túb co' nac xtol daa. Por cona, por cón che'n leya nonen no naneen mcuanen xquin daa no xtol daa loo Diox co'se' mblin con' ye'rsin'.

<sup>14</sup> Na' naneen no non na' le' ley co' mxo'f Moisés loo na' nac thib mod ndac co' ndlya'spe' Diox li na'. Per ndxe'leque', part cón che'npe' daa, daa nac thib mbi' co' ndli yèe con' ye'rsin' co' nac xquin daa no xtol daa xal ndyub yo'f lezon lin con' ye'rsin'. <sup>15</sup> Tac ndxep vez axta ne' ne' indan cuent xal nac co' ngue lin no co' ndlyàa yéquen co'se' ndlin con' ye'rsin'. Axta ne' ne' ñeen cón mdub yéquen cón mdub lezon mblin con' ye'rsin'. Ndyaquen, ale indliden con' ndlyazen lin. Ndxé'leque', con' co' indlyasten lin, con'a nac co' ndli yèen. <sup>16</sup> Per chele' daa más ndli con' ye'rsin' co' indlyasten lin, syase, más ndan cuent le' di's co' ndub loo ley co' mxo'f Moisés loo mèn ndlu' con' ndac loo mèn. <sup>17</sup> Por cona, inacta daa co' ngue li con'a. Ndxé'leque', ryete con' co' nzo le'n lezon nac co' ndli ndyub yo'f lezon par ndli yèen con' ye'rsin'. No ale que nzo ne'ñee lezon, tataa ndli yèen par ndlin con' ye'rsin'. <sup>18</sup> Tac daa naneen, part cón che'npe'en, yende chó con' ndac ndlin. Anze'f ndlyazen lin con' ndac. Per indaden lugar par lin con' ndac. <sup>19</sup> Indliden con' ndac xal ndlyazen. Ndxé'leque', ale más ndlin con' ye'rsin' co' ndyub yo'f lezon ndlin mastale' indlyasten lina. <sup>20</sup> Le' sya, chele' daa ndli con' co' indlyasten lin, inacta ante daa co' ngue lii. Ndxé'leque', ryethe con' co' ndyub yo'f lezon co' nac xquin daa no xtol daa, con'a ñibe' yèe loon par ndli yèen con' ye'rsin' co' indlyasten lin.

<sup>21</sup> Cona, ngue niin loo gu': Ndxàc con' ndxè' loon: Co'se' ndlyazen lin thib loote con' ndac, ale le'le' más ndlin con' ye'rsin'. <sup>22</sup> Per nalle' ndxàplen thib mod cub par más ndlin xal ñibe' Diox loon por cón che'n Tad Jesucrist. <sup>23</sup> Per naneen no nonen le' le'n lezon no le'n xtùuzen nzo thib con' co' ntau' no co' nca' no co' ncà loon par ne'liden co' nac co' nee lezon. Con'a nac mod co' mbli mdyub yo'f lezon lin con' ye'rsin' ndoore' yilazen loo Tad Jesucrist. Con'a ndlya's ñibe'pe' loon par tolo lin con' ye'rsin' nalle', ne.

<sup>24</sup> ¡Ay! Prob daa izlyo'. Nalyat ñaa daa. ¿Chó mèn nac mèn co' lyat lezo' ñèe daa nalle' par telá' mèn daa loo mod ye'rsin' co' ndxàpen co' ñibe' yèe le'n lezon no co' ndli par



ryo xà'en loo Diox, à'? <sup>25</sup> Diox quix Diox mbezen loo Diox tac nonen no naneen ante Diox telá' daa loo con'a por cón che'n Tad Jesucrist na'. Por cona, dib nzo yéquen no dib nzo lezon ndyubdizen loo con' co' ñibe' Diox loon par lin. Per làth xtau'a, be' ndyub yo'f lezon par li yèen con' co' nac con' ye'rsin' co' nac xquin daa no xtol daa.

## 8

*Pab ndlu' xá mod yòo ban no mèn Diox thidtene yiloo por cón che'n Xpii Natú' che'n Diox.*

<sup>1</sup> Nalle' nde niin tedib con' loo gu': Nase ya yende chó con' nquexù' mèn loo Diox, mèn co' thidte mqueltàa loo cón che'n Crist Jesús. Mèna nac mèn co' ya inzi tee bante xal ngòc mod co' ngro' mblyen' le'n lezo' mèn co' nac cón che'n xab izlyo'. Ndxé'leque', mèna nzi tee ban nalle' xal nac co' ñibe' Xpii Natú' che'n Diox loo mèna. <sup>2</sup> Xpii Natú' ndli le' mèn ndxàp yalnaban thidtene, mèn co' ngòo loo cón che'n Crist Jesús. Por cón che'n con' co' ñibe' Xpii Natú' loo mèn, con'a ndli ngue tee ban ndac mèn loo Diox, ne. Más de cona, mbli Xpii Natú' ngro'en loo ryethe con' ye'rsin' co' ndyub yo'f lezon par mcuanen xtol daa co' ndli par ryo xà'en loo Diox thidtene yiloo. <sup>3</sup> Yende mod gác li mèn con' co' mnibe' ley co' mxo'f Moisés loo mèn, mèn co' mbly'a's li preb par ndubdi's mèn xal ñibe' ley. Mastale' mnibe' ley loo mèn par li mèn con' par que no mèn yalnaban cub, per ne'ngácte mèn no ne'ngàpte lezo' mèn ndubdi's mèn xal mnibe' ley loo mèn por cón che'n xtúuz ye'rsin' co' ndli mèn par mdyub yo'f lezo' mèn li mèn con' ye'rsin'. Làth xtau'a, mbli Diox thib con'. Mtel' Diox xgan' Diox co' nac thidte xgan'pe' Diox loo izlyo'. Ngòc xgan' Diox xal thib mbi' co' ngóol loo izlyo' xal ndxáal chol mèn loo izlyo', mèn co' ncu'a'n xquin. Mbi'th xgan' Diox loo izlyo' ndxè' par mbli Diox nguth xgan' Diox par tyactii xgan' Diox por cón che'n xquin mèn no par ton' xgan' Diox xtol mèn loo mèn. Co'se' tataa ngòca loo xgan' Diox loo cruz, ngòca loo mèn co' ndxela's loo xgan' Diox inquinte tolo li mèna chol con' ye'rsin' co' ndyub yo'f lezo' mèn par li mèn con' ye'rsin' co' nac cón che'n xab izlyo' ndxè'. <sup>4</sup> Tataa mbli Diox ngòc con'a loo xgan' Diox par gác mèn no gáp lezo' mèn co' ndxela's loo xgan' Diox li mèn con' xal ñibe' ley co' mxo'f Moisés loo mèn. Tac nalle' inzi tee bante na' xal nac ryethe con' co' mbli mdyub yo'f lezo' na' ndoore' yila's na' loo Crist. Ndxé'leque', nzi tee ban li na' xal ñibe'pe' Xpii Natú' loo na'.

<sup>5</sup> Na' nanee no nonle' na' le' mèn co' ante nzi tee ban li xalque' nac con' ye'rsin' co' ndli ndyub yo'f lezo' mèn ndli mèn, con'a nacpe' co' ndli mèn xal ndryo' ndlyen' lezo' mèn. Per mèn co' ndoo lezo' nzi tee ban xal ñibe' Xpii Natú' loo mèn, mèna ndlipe' ante con' co' ñibe' Xpii Natú' loo mèn li mèn. <sup>6</sup> Tac chele' mèn más ye'th lezo' li mèn con' ndyub yo'f lezo' mèn co' nac cón che'n xab izlyo', con'a càb loo mèn par tith co' xà' Diox mèn loo Diox co'se' yilo gath mèn. Per chele' mèn más ye'th lezo' li mèn xal ñibe' Xpii Natú' loo mèn par li mèn, le' sya, con'a li càb loo mèn le' mèn yòo ban no Diox thidtene co'se' gath mèn no càba loo mèn, ne, cue ban mèn rye nda mèn no rye ndye'th mèn làth xtàa mèn no càba loo mèn yu' yàl lezo' mèn loo Diox. <sup>7</sup> Mèn co' ante ndoo lezo' li mèn con' co' ndyub yo'f lezo' mèn li mèn co' nac cón che'n xab izlyo', mèna nac ngolo ngola's che'n Diox. No ndxòo xyàn lezo' mèna ñèe mèna cón che'n Diox co'se' ndxòn mèna cón che'n Diox. Tac ne' ne' indly'a's mèna tyal mèna tyubdi's mèna loo Diox. No ne' ne' gác mèna ta' mèna lugar ñibe' Diox loo mèna. <sup>8</sup> Cona, ngue niin loo gu': Mèn co' más nda' gust lezo' co'se' ndli mèn con' co' ndyub yo'f lezo' mèn co' nac cón che'n xab izlyo', mèna ne'gácte li con' ndac co' li par yòo lezo' Diox ñèe Diox mèn.

<sup>9</sup> Per nalle', gu' ya inzi tee ban lide xal nac con' co' nac cón che'n xab izlyo' co' ndli par ndyub yo'f lezo' gu' par li gu' chol con' ye'rsin'. Ndxé'leque', nzi tee ban gu' xalque' nac co' ñibe' Xpii Natú' loo gu' por mda' gu' lugar no mdyal gu' nzo Xpii Natú' che'n Diox loo gu' nalle'. Na nii loo gu': Loo mèn co' inzode Xpii Natú' che'n Crist, mèna inacte che'npe' Crist. <sup>10</sup> Chele' Crist nzoque' loo gu' por cón che'n Xpii Natú', lìcpe' ba'i, mastale' nquin gath bél'yòo ladpe' gu' por cón che'n xquin no xtol co' ngòo loo ryete mèn, thidteneque' yòo ban xpii gu' no alm gu' loo Diox tac Diox mdyal no mda' Diox lugar ngòo gu' loo cón

che'n Diox. No nac gu' mèn nali no mèn nambii loo Diox. <sup>11</sup> Chele' Xpii Natú' che'n Diox co' mblo xban Jesús làth mèn nguth nzo loo gu' par ñibe' Xpii Natú' loo gu', le' sya, yub Diox co' mblo xban Crist Jesús làth mèn nguth, Diox li par ryo xban bél'yòo ladpe' gu' co' non gu' gathque'. Li Diox gac con'a loo gu' por cón che'n Xpii Natú' che'n Diox co' naban le'n lezo' gu'.

<sup>12</sup> Per nalle', ngue niin loo gu', mèn huesen por cón che'n Jesucrist: Nzo thib con' co' anze'f nquin li na'. Con'a nee di's: Ne'tolode que tee ban na' par tyub yo'f lezo' na' loo cón che'n co' nac xab izlyo'. <sup>13</sup> Tac chele' gu' be' nzi tee ban li xalque' nac cón che'n co' nac xab izlyo' co' ndyub yo'f lezo' gu', sya, tith co' xà' Diox gu' loo Diox co'se' gath gu'. Per ndxe'leque', chele' gu' li ante co' ñibe' Xpii Natú' loo gu' par ne'tyubte yo'f lezo' gu' loo cón che'n co' nac xab izlyo', sya, yòo ban noque' gu' Diox thidtene.

<sup>14</sup> Ryete mèn co' nzi tee ban lique' xal ñibe'pe' Xpii Natú' che'n Diox loo mèn par li mèn, mènà nac xin'pe' Diox. <sup>15</sup> Xpii Natú' co' ngulàale' loo gu'a, ne'nglide Xpii Natú' par tolo zye' gu' le' Diox tetii gu' yiloo xal mbli chol xpii ye'rsin' loo gu' par mzyeb gu' ndoore' yila's gu' loo cón che'n Diox. Ndxé'leque', Xpii Natú' co' ngulàale' loo gu'a mbli le' gu' nac xin'pe' Diox. No por cón che'n Xpii Natú'a, mbez na' loo Diox: Pay, co'se' mbez na' Diox. <sup>16</sup> Leque yub Xpii Natú' ndlu' loo na' no nda' Xpii Natú' cuent loo na' cón che'n leque con' co' nden' na' le'n lezo' na' le' na' nac xin'pe' Diox. <sup>17</sup> Por nac na' xin'pe' Diox, gac che'npe' na' ryethe con' co' mxèn' Diox no ryethe con' co' nac che'npe' Diox, con' co' mcàbgòn Diox gac che'npe' na'. Thidte gac che'npe' na' con yub Tad Crist ryethe con' co' mxèn' Diox no co' nac che'npe' Diox. Chele' loo na' gac ngòc nguàal con' por cón che'n Crist nalle' xal mbli mèn ngòc nguàal con' loo Crist, loo na', ne, gac con' roo con' xèn yiloo xal ndxàc con' roo con' xèn loo Crist nalle'.

<sup>18</sup> Per nalle', ndyaquen le' cón che'n con' co' ndyactii na' le'n tiemp ndxè' ne' por chu'th ne'ta'de co' ndyactii na' por con' roo con' xèn co' yú' loo na' yiloo no co' gac loo na' yiloo. <sup>19</sup> Ryete con' co' mxèn' Diox loo izlyo' nzi bed no nzi quee lezo' axta co'se' zin huiz no zin ze lu' Diox mèn co' nac xin' Diox loo taamas mèn, licque', nac mènà xin'pe' Diox. <sup>20</sup> Tac ryete con' co' mxèn' Diox mquedèe Diox no ngoza' con' mblec Diox no ngòc con' co' mblec Diox thib con' co' yende cón ntac. Per ne'ngàcte con'a loo con' co' mxèn' Diox xal con' co' angngòc. Ndxé'leque', ngòc con'a loo con' co' mxèn' Diox xal mnibe'pe' lezo' Diox. Per mastale' tataa mbli Diox ngòc con'a loo con' mblec Diox, Diox mbli le' mèn ngure quee lezo' bere gac con' ndac loo ryethe con' co' mxèn' Diox yiloo. <sup>21</sup> Diox mxèn' ryethe con' no mblec Diox ryethe con'. Per zin thib huiz no zin thib ze li Diox par lyá' ryethe con' mblec Diox loo con' co' nac con' xin no con' co' nac con' cap no con' co' nac con' ye'rsin' co' ndli xol no co' nteza' loo con' co' mxèn' Diox no co' mblec Diox loo izlyo'. Syare', gac con' roo no con' xèn loo con' mxèn' Diox tac tiempa ya ne'tolode gac más con' ye'rsin' no ya ne'tolode tyactii con' co' mxèn' Diox. Gac con'a loo con' mxèn' Diox no loo con' mblec Diox xalque' gac con' roo no con' xèn loo mèn co'se' yende chó con' ye'rsin' nzo co' li par cua'n mèn xquin mèn no xtol mèn, mèn co' nac xin'pe' Diox, co'se' gac huiza no tiempa. <sup>22</sup> Na' nanee no non na' axta nalle' be' ndyactii rye loothe con' co' mblec Diox no co' mxèn' Diox xal ndxàca loo thib xa'got co' nden' yalnè co'se' ndub tan xin' xa'got. <sup>23</sup> Iante ndxàca ndyactii rye loothe con' co' mxèn' Diox xal ndxàc loo thib xa'got co' ndub tan xin'. Ndxé'leque', nden' na' ndxàca tataa loo na', ne, ¿lé'?, mastale' nzo Xpii Natú' loo na'. Mastale' nac Xpii Natú' nerleque' thib con' co' làa Diox loo na', yiloo tolo ta' Diox más con' ndac loo na' por cón che'n Xpii Natú'. Per nalle', nden' na' thib yalnè axta le'n lezo' na' cón che'n yaltii co' ndxàc loo na'. Per mastale' ndxàc con'a loo na', nzi quee lezo' na' axta co'se' gac hor hui' ñaa mèn loo na', licque', nac na' xin'pe' Diox. Axta syare', gac tiemp co'se' zye' loo loo bél'yòo ladpe' na' par ya ne'tolode tyactii na' no ya ne'tolode gac yalnè loo na' no ya ne'tolode gac yalquii loo na'. <sup>24</sup> Tac co'se' ngolo ngola's na' loo Crist no loo cón che'n Crist, mcàba loo na' ngure quee lezo' na' le' na' lyá' loo rye yaltii no yalquii no yalnè co' ndxàc loo na' nalle'. Per chele' mèn ngüi'pe' loo con' co' nzi quee lezo' mèn, le' sya, ya inzi queede lezo' mèn más loo

con' co' nzi quee lezo' mèn. Tac co'se' ngüi' mèn loo con' co' mbez mèn nzi quee lezo' mèn, ya ne'tolode cue quee lezo' mèn loo con'a, ¿lé'? <sup>25</sup> Per chele' na' nzi quee lezo' loo con' co' tarte yú' loo na', nquin tolo cha'la's na' par tolo cue quee lezo' na' loo con' co' gác loo na' yilóa.

<sup>26</sup> Lomisque' mod ne, leque yub Xpii Natú' ndlyath no na' loo con' co' nzi quee lezo' na' par ne'tolode gác na' xal mbíiz co' mbuu's lezo' loo cón che'n Diox. Más de con'a, axta ne' ne' gác na' cuez na' Diox xal ndxàala. Per ndxe'leque', yub Xpii Natú' mbez Diox cón che'n na'. Anze'f nden' Xpii Natú' cón che'n mèn co'se' mbez Xpii Natú' Diox cón che'n mèn. Tac huax vez yende mod gab na' loo Diox con' co' nden' na' tant nden' na' con'. Por cona, Xpii Natú' nteri'th con' co' nden' na' no con' co' nquin na' loo Diox xalque' non Xpii Natú' nquin na' con'. Di's co' nteri'th Xpii Natú' loo Diox por cón che'n mèn, yende chó mèn gác ta' cuenta no tyoodi's mèn cón che'n di'sa. <sup>27</sup> Diox nteche ntexyath lezo' mèn no xtùuz mèn. Diox nanee no non Diox cón che'n con' co' ngue li Xpii Natú' xtùuz co'se' mbez Xpii Natú' Diox cón che'n mèn co' ngro xà' loo cón che'n xab izlyo', mèn co' ngòc che'npe' Diox, tac Xpii Natú' mbez Diox ante xal nee lezo' Diox.

*Mèn co' ngòc loo cón che'n Crist, mèn mbli gan ngro xà' mèn loo cón che'n xab izlyo'.*

<sup>28</sup> Nanee na' no non na' le' Diox ndli nab ryethe con' par càba con' ndac loo mèn co' nque' lezo' Diox, mèn co' Diox mcuri xal mblo xnee Diox mcuri Diox mèn par yòc mèn loo cón che'n Diox. <sup>29</sup> Ndoore' xèn' Diox no cuec Diox izlyo', non Diox no nanee Diox cón che'n mèn co' yòope' loo cón che'n Diox. Mèn ngòc mèn co' mcuri Diox par yòc mèn loo cón che'n Diox. Diox mnibe' lezo' Diox cui Diox mèn par gác mèn xalque' nac Jesucrist co' nac xgan'pe' Diox. Tataa mbli Diox loo mèn par leque Jesucrist gác xal hues ndlyo mèn loo rye mèn co' gác xal huespe' xgan' Diox. <sup>30</sup> No loo mèn co' mnibe' lezo' Diox mcuri Diox mèn ndoore' xèn' Diox izlyo' par gác mèn xalque' nac xgan'pe' Diox, Diox mblec mèn par nac mèn xalque' nac xgan'pe' Diox. No mèn co' mblec Diox, mbli Diox par nac mèn mèn nali no mèn nambii loo Diox. No leque mèn co' mbli Diox nac mèn nali no mèn nambii loo Diox, loo mèn ndli Diox ndxàc con' roo no con' xèn.

<sup>31</sup> ¿Cón más nquin gab na' cón che'n con' ndli Diox, sya? Chele' Diox thidteneque' indlá'ya' de na', ¿chó mèn co' nac ngolo ngola's che'n na' gác li gan par ne'ryo loode gác con' ndac loo na' por nzo na' loo cón che'n Diox por cón che'n Crist? Yende chó mèn gác li gan gaca tataa loo na', ¿lé'? <sup>32</sup> Hui' gu' nexa. Ne' ne' mcà Diox mquée yalguth loo xgan'pe' Diox por cón che'n na'. Ndxé'leque', Diox mda' lugar mquée yalguth loo xgan' Diox por cón che'n xquin ryete na' no xtol ryete na'. Chele'i tataa ngòc, ¿xalte mod ne'li Diox par que no na' ryete con' co' naquin na' nalle' por cón che'n Crist, à'? Lique' Diox par gaca loo na', yey. <sup>33</sup> ¿Chó mèn, lìcque', gác tec mèn co' Diox mcuri loo Diox, à'? Yende chó cón che'n mèn li mèn con'a, ¿lé'? Ndxé'leque', Diox nac xa' co' mdyal par ngòc mèn loo cón che'n Diox par gác mèn mèn nali no mèn nambii loo Diox. <sup>34</sup> ¿Chó cón che'n mèn quexù' que' fals mèn mèn co' Diox mcuri, à'? Yende chó cón che'n mèn, ¿lé'? Tac Crist nac xa' co' nguth por cón che'n rye mèn. Más de cona, ngro xban Crist. No ndub Crist cuat Diox nalle'. Ngue bez Crist Diox no ngue na'b Crist loo Diox cón che'n na'. <sup>35</sup> ¿Ché' nzo chó mèn gác li par ne'tolode que' lezo' Crist na' par ryo xà' na' loo cón che'n Crist, à'? Yende chó gác lii, ¿lé'? Lomisque' ne, co'se' ndxàc chol yaltii loo na' no co'se' ndxàc ngòc nguàal con' loo na' par nxi lezo' na' no co'se' ndub ngu's mèn na' no co'se' nsyon hua na' no nsyon gu na' co'se' yende con' hua na'; no co'se' nzi tee che na', yende xab na' par goc na'; no co'se' ndxàc chol con' ryes loo na'; no co'se' ndlyá' ndlyá' guth mèn na', ¿ché' ndyac gu' le' rye co' ndxàc loo na'a ndlu' ya ne'tolode que' lezo' Crist ñèe Crist na', cà'? Yende xàa. <sup>36</sup> Ndxàc ryete con'a loo na' xal ndub di's loo libr co' nac xti's Diox co' mbez:

Por cón che'n U, Tad, ndlyá' ndlyá' guth mèn nu' atate huiz. Ndoe lezo' mèn guth mèn nu' xal ndxuth mèn mbacxil'.

<sup>37</sup> Mastale' tataa ndxàc loo na', loo ryete con' ndxè' ndli na' gan par ne'ryo xà' de na' loo cón che'n Crist. Tac non na' no naneeque' na' le' Crist nque'que' lezo' ñèe Crist na'. No

ndlyath no Crist na' loo ryethe con' co' ndxàc loo na' ned nque tee na'. <sup>38</sup> Cona, ngue niin loo gu': nonquen no ngobe'en yende nec thib con' co' nzo co' gác li par ne'tolode que' lezo' Diox ñèe Diox na' par ryo xà' na' loo Diox yiloa. Tac thidte ngòc na' con Tad Jesucrist. Que naca gath na', que naca ban na', toloque' que' lezo' Diox ñèe Diox na'. Ne' angl; ne' mèn co' ñibe' loo xtàa mèn loo izlyo' ndxè'; ne' chol xpìi co' ndxàp con' roo no con' xèn, xpìi co' nac xpìi roo no xpìi xèn, gác li par ne'tolode que' lezo' Diox ñèe Diox na' par ryo xà' na' loo Diox yiloa. Ne' con' co' ndxàc loo mèn tiemppe' ndxè'; ne' con' co' gác loo mèn le'n tiemp co' yi'th nque; yende chó con'a gác li par ne'tolode que' lezo' Diox ñèe Diox na' par ryo xà' na' loo Diox thidtene yiloa. <sup>39</sup> Ne' con' co' nzo gáp loo bé'; ne' con' co' nzo ga's xan' le'n izlyo'; ne' ne' chol taamas con' co' mxèn' Diox no co' mblec Diox loo izlyo' gác li par ne'tolode que' lezo' Diox ñèe Diox na' xal nac mod co' mblu' Diox loo na' nque'que' lezo' Diox ñèe Diox na' por thidte ngòc na' loo cón che'n Crist Jesús co' nac Tad na'.

## 9

*Diox mçui mèn che'n nación Israel par yòo mènà loo cón che'n Diox, ne.*

<sup>1</sup> Com le' daa ndxela'sque' loo Crist, ¿lé'?, ngue tan cuent co' nac lìcpe' loo gu'. Ingue quediden gu'. Tac Xpìi Natú' co' nzo loon no co' nzo le'n lezon, Xpìi Natú' ndli par nden'en le'n lezon lìcque' nac di's co' ngue toodizen loo gu' nalle'. <sup>2</sup> Anze'f nxi lezon. No ndxetub thib yalnè tìn' le'n lezon por cón che'n mèn nación Israel. <sup>3</sup> Por tant nque' lezon ñèen mèn co' nac mèn nacionpe' daa, co' nac mèn nación Israel, mèn co' nac mèn gulàaz daa, más quee lezon ngàc daa mènèe loo Diox, co' nee di's, mèn ye'rsin' loo Diox par ryo xà'en loo cón che'n Crist par tetii Diox daa thidtene par bel'que' tataa mod lyá' mèn nacionpe' daa loo con' ryes. <sup>4</sup> Mènà nac bin che'n thib mbi' co' ngro' lèe Israel co' ngòc mbi' co' mbloj msi' biz no bin co' nac mèn nación Israel nalle'. Mèn co' ngòc bin mbi'a, Diox mblo cuent ngòc mènà xal xin'pe' Diox. Ngòd Diox làth mènà. Gunèe mènà con' roo no con' xèn co' nac Diox. Mbli Diox par mbyan' no mènà thib conveñ. Mnibe' Diox loo Moisés xo'f Moisés thib ley loo mènà. Mnibe' Diox loo mènà xá mod li mènà sirv loo Diox le'n templ mèn. No mtan' Diox di's co' mcàbgòn Diox li Diox co' nac con' ndac loo mènà. <sup>5</sup> Nac mèn nación Israel nalle' bin che'n mbi' co' ngro' lèe Israel co' mbloj msi' bin co' nac xudgool na', bin co' ngòc mèn nación Israel yiloa. Làth bin mènà ngóol Crist xal ndxáal chol mèn. Crista nac yubpe' Diox loo ryethe con'. Por cona, gab na' di's roo no di's xèn no di's natú' cón che'n Crist loo mèn le'n lín' co' ntlo, no le'n lín' co' ndxelo, no le'n lín' co' ne'lith node. Taandxè' gàca.

<sup>6</sup> Inacta le' con' co' mcàbgòn Diox li Diox loo mbi' co' ngro' lèe Israel ne'gàcte. Ndxè'leque', más huen gab na' iryede mèn co' nac bin mbi' co' ngro' lèe Israel, lìcque', nacpe' mèn nación Israel. <sup>7</sup> Lomisque' ne, iryede bin Abraham ngo Diox cuent nac binpe' Abraham. Ndxè'leque', Diox ndxab loo Abraham: Por cón che'n bin Isaac daa go cuent le' lùu mbli bin. <sup>8</sup> Con'a nee di's le' mèn co' nac chol bin mbi' co' lèe Israel ndxè', inpor con'ade ngo Diox cuent nac mèn co' nac bin che'n mbi' co' ngro' lèe Israel xin' Diox. Ndxè'leque', Diox ngo cuent nac mèn nación Israel xin'pe' Diox, mèn co' ngóol xalque' mcàbgòn Diox loo Abraham li Diox loo Abraham par que no Abraham bin. <sup>9</sup> Tac di's co' mcàbgòn Diox loo Abraham li Diox loo Abraham taandxè' mbez:

Co'se' gác huiz co' mnibe'en loo lezon, axta syare', zin huiz gal neen máa gu'. Huiza, lin par hue' xin' Sar par tyan Sar thib xgan' Sar.

<sup>10</sup> Iante xal ngòca loo Abraham no loo Sar ngue tan cuenta loo gu'. Ndxè'leque', ryop xgan' Rebec co' ngòc cuach, thidte Isaac ngòc xud myen'. Ngòc Isaac xudgool na', ne. <sup>11-13</sup> Per co'se' ne' ne' tar gáal ryop hues myen' xgan' Isaac, ne' ne' tar li myen' con' ndac no ne' ne' tar li myen' con' ye'rsin', Diox ndxab loo Rebec:

Yé' huize', mbed ndlyo gác moz co' li sirv loo mbed co' nac mbed bluz.

Thidte nac di's co' ngue niin loo gu' ndxè' xalque' mbez di's co' ndub loo libr co' nac xti's Diox tedib lugar co'te' ndub di's co' ndxab Diox:

Anze'f nque' lezon Cob. Ngudloon no lezon Cob. Per por part cón che'n Esaú, nzo xyàn lezon ñèen Esaú.

Por cona, non na' le' Diox ndxàp derech cui Diox mèn xal neete lezo' Diox par yòo mèn loo cón che'n Diox. Yende chó mport nzo lezo' Diox con' ndli mèn, aa guneei ¿ché' nac mèn mèn huen o ché' nac mèn mèn ye'rsin'? co'se' cui Diox mèn par yòo mèn loo cón che'n Diox.

<sup>14</sup> ¿Cón gab na' cón che'n con' mbli Diox, sya? ¿Ché' tab na' no ché' ndli na' cuent nac Diox thib Diox co' indlide con' nalì no con' nambli co'se' mbli Diox con'a, cà'? Yende xàa. Nec thib mod no nec tedib mod ne'gabte na' tataa, ¿lé'? <sup>15</sup> Tac Diox ndxab loo Moisés tedib vez:

Lyat lezon ñèen mèn co' lyazen lyat lezon ñèen. No anze'f nazín' gac mèn co' lyazen gac nazín' mènna loon.

<sup>16</sup> Por cona, yende mod gab mèn le' Diox ndlyat lezo' ñèe Diox mèn ante xal neete lezo' mèn. Ne' ne' gab mèn ante ndlyat lezo' Diox ñèe Diox mèn por con' ndac co' ndli mèn. Ndxé'leque', Diox ndlyat lezo' ñèe Diox mèn ante xalte ñibe' lezo' Diox lyat lezo' Diox ñèe Diox mèn. <sup>17</sup> Ndub di's loo libr co' nac xti's Diox co' mbez le' Diox ndxab loo Faraón co' ngòc rey loo mèn nación Egipt:

Na mbli ngòc lùu rey par lu'en loo mèn cón che'n ryethe con' roo no con' xèn co' nzo la's niin no con' co' nzo la's yan por cón che'n con' co' mblin lool. No mblin ngòc con'a lool par tataa mod mxyo'f lèe mxyo'f xti's daa loo mèn dib athu loo izlyo' par cón che'n con' mblin lool.

<sup>18</sup> Por cona, non na' no nanee na' le' loo mèn co' ndlya's Diox lyat lezo' Diox ñèe Diox, loo mènna ndlyatque' lezo' Diox ñèe Diox. No loo mèn co' ndlya's Diox teyez Diox lezo' mèn, loo mènna nteyezque' Diox lezo' mènna par ndxàc mènna mèn naad no mèn nguud.

<sup>19</sup> Per thib descuid ñee gu' loon: Chele'i tataa nac loo cón che'n Diox, ¿chonon nque dol Diox mèn cón che'n xtol mèn, sya? Mastale' lya's gu' ñèe gu' con' loon: per ¿chó gac cà di's cón che'n co' nee lezo' Diox li Diox, à'? Yende xàa, ey. Bìn gu' di's co' ngue niin loo gu' ndxè': <sup>20</sup> ¿Aa mèn izlyo'! ¿Máa yob yéc gu', na? ¿Chó nac gu' par gol' di's gu' con Diox, à'? ¿Ché' tab thib yàat yòo loo thib mbi' co' ntoxcua' yàat yòo: ¿Chonon taandxè' mtoxcua' lùu daa, à'? Yende xàa. <sup>21</sup> ¿Chó ñibe' loo Diox par li Diox con' ndlya's mèn, à'? Bli gu' xtùuz cón che'n thib mbi' co' ntoxcua' yàat con ben. ¿Ché' yende mod toxcua' mbi' thib yàat co' li zin' mbi' cusin xal nee lezo' mbi'? No ¿ché' yende mod toxcua' mbi' thib yàat co' li sirv loo mbi' xal thib vacin? Nzoque' mod toxcua' mbi'i xal lya's mbi'i, ¿lé'? Ale'que' Diox con mèn, ¿lé'? ¿Chó ñibe' loo Diox?

<sup>22</sup> ¿Ché' tác na' ñii yèe ñii tii na' cón che'n Diox co'se' leque yub Diox mcha'la's gunèe Diox mèn, mèn co' ndlya's Diox tyactii no gac yalquii loo mèn? Mastale' mblya's Diox ngli Diox ngac con'a loo mèn par nglu' Diox cón che'n con' roo con' xèn co' nzo la's ya' Diox no co' nzo la's nii Diox, per ndxe'leque', lugar de ngli Diox con'a, le'le' mxec yèe Diox gunèe Diox mèn. Ne'ngàcte yalquii loo mènna par ntelux Diox mèn nalle'. Thiba con'a.

Le' tediba na, lìcque', teluxque' Diox mènna yiloo. Por cona, yende mod ñii yèe ñii tii na' cón che'n con' ngue li Diox, ¿lé'? <sup>23</sup> Mbli Diox ne'ngàcte yalquii loo mèn. Ndxé'leque', mblyat lezo' Diox gunèe Diox taamas mèn, co' nee di's nac na', par lu' Diox loo na' cón che'n con' roo con' xèn co' nzo la's nii Diox no con' co' nzo la's ya' Diox. Más de cona, Diox mblo' xà' na' loo cón che'n xab izlyo' par mbli nable' Diox na' par gaca loo na' yòo ban no na' Diox par gac con' roo con' xèn loo na' co'te' nzo Diox loo bé'. <sup>24</sup> Gu' nonque' no nda'que' gu' cuent le' Diox mculi ndxep na' no mblo' xà' Diox ndxep na', co' nee di's, ndxep mèn co' nac mèn nación Israel, no ndxep mèn co' inacte mèn nación Israel, par ngòo na' loo cón che'n Diox por cón che'n Crist. <sup>25</sup> Ndxàca loo mèn nalle' xal ndub di's loo libr co' mque' Ose ye's co' nac xti's Diox. Di'sa mbez taandxè':

Mèn co' inacte mèn nacionpe' daa, mènna mculi no mblo' xà'en mènna par gac mènna mèn nacionpe' daa. No mèn co' yende chó nque' lezo' ñèe xal thib xa'got co' yende



chó nque' lezo' ñèe, mènà nque' lezon ñèen.

<sup>26</sup> Leque loo libr co' nac libr che'n Ose co' mque' Ose ye's, libr co' nac xti's Diox, loo libra ndub di's co' guniique' Diox cón che'n mèn co' inacte mèn nación Israel. Ndxab Diox: Gu' co' inacte mèn nacionpe' daa, per mastale' inacte gu' mèn nacionpe' daa, yilóa gác gu' xin'pe' daa, daa co' nac Diox co' naban thidtene.

<sup>27</sup> Per cón che'n mèn nación Israel, Sayi co' mde'th di's co' ndxab Diox, Sayi mde'th di's cón che'n mènà taandxè':

Mastale' mèn co' nac bin mbi' co' ngro' lèe Israel yas yàl xal yux co' nziri' ro níttó', ante ndxep bin mbi'a gác mèn co' lyá' loo con' ryes.

<sup>28</sup> Tad Diox lique' ryethe con' mcàbgòn Tad Diox li Tad Diox loo mèn loo izlyo' no, chàa, li Tad Diox con'a loo mèn. <sup>29</sup> Ngòca loo mèn nación Israel xal mde'th Sayi di's co' ndxab Diox ndoore'. Ndxab Sayi:

Chele' Tad co' nac Tad che'n angl co' nzo loo bé' co' nac solndad che'n Tad ne'nda'de lugar li na' bin, ngác na' xal mèn ciuda Sodom no ngác na' xal mèn ciuda Gomor co' mtelux Diox póla.

*Mèn nación Israel ne'ndalte ngola's cón che'n di's ndac che'n Diox.*

<sup>30</sup> Lomisque' ne, ndlyazen niin thib con' loo gu': ¿Xá nee gu'? ¿Cón gab na' cón che'n con' co' mbli Diox loo mèn co' inacte mèn nación Israel, mèn co' nac mèn co' ne'ñeede no mèn co' ne'gònte xá mod ndyal Diox par yòo mèn loo cón che'n Diox par gác mèn mèn nali no mèn nambii loo Diox? Per ndxe'leque', mènà ngòc mèn nali no mèn nambii loo Diox ante por ngola's mènà loo Diox por cón che'n Tad Jesucrist. <sup>31</sup> Per ndxe'leque', cón che'n mèn nación Israel co' mdoo lezo' tolo li preb ndubdi's xal ñibe' ley co' mxo'f Moisés loo mèn, mènà ne'ngácte ndubdi's con' co' mnibe' ley co' mxo'f Moisés loo mènà par gác mènà mèn nali no mèn nambii loo Diox. <sup>32</sup> ¿Chonon tataa ngòca loo mèn nación Israel, à'? Ngòca tataa loo mèn nación Israel tac ne'ncua'nte mènà mod gác mènà mèn nali no mèn nambii loo Diox por cón che'n Tad Jesucrist. Ndxé'leque', mblya's mèn nación Israel gác mènà mèn nali no mèn nambii loo Diox ante por mbli mènà preb ndubdi's mènà loo ley co' mxo'f Moisés loo mènà. Por ne'nglide mèn nación Israel cas loo Tad Jesucrist, por cona, ngòca loo mèn nación Israel xal mèn co' ndxezi'f ndxega's loo thib quèe co' nca' no co' ncà loo mèn ned nda mèn por ngòc mèn nación Israel mèn naxèn loo cón che'n Diox. <sup>33</sup> Peser nibdi's gu' loon ¿Chonon tataa ngòca loo mèn nación Israel? Tataa ngòca loo mèn nación Israel xal ndub di's loo libr co' nac xti's Diox co' mbez taandxè':

Huí' gu' nexa. Daa tel' thib mbi' loo mèn ciuda Jerusalén co' gác loo mènà xal thib quèe co' nca' ned ndyee mèn loo mèn ciuda Jerusalén. Mèn co' ante yila's loo mbi' co' ngòc xal quèea, mènà ne'yitacte lezo' loo cón che'n Diox. Ne' ne' xi lezo' mèn cón che'n mbi'a yilóa.

## 10

<sup>1</sup> Gu' co' ndxác mèn huesen por cón che'n Jesucrist, con' ndxè' nac co' ndryo' ndlyen' lezon no co' nac di's co' mbezen Diox cón che'n mèn nación Israel, ndlyazen le' mènà lyá' loo con' ryes. <sup>2</sup> Ndan cuent loo gu' cón che'n con' ndac co' nac cón che'n mèn nación Israel le' mènà anze'f mènley' nac loo Diox. Per ndxe'leque', indxác ndacte mènà cón che'n Diox xal ñibe' Diox. <sup>3</sup> ¡Prob mèn nación Israel! Inda'de mènà cuent xá mod ndyal Diox par yòo chol mèn loo cón che'n Diox par gác mènà mèn nali no mèn nambii loo Diox. Ndxé'leque', más ndxòo lezo' mèn nación Israel li mènà mod che'n mènà par tataa mod li mèn nación Israel cuent nac mènà mèn nali no mèn nambii loo Diox por mod co' mbli mènà cuent nzi tee ban nali no nambii mènà loo Diox. Ndxé'leque', nac mènà mèn naad no mèn nguud loo Diox, co' nee di's, ne'ndalte mènà gác mènà mèn nali no mèn nambii loo Diox xal nac mod co' mbli Diox par mdyal Diox yòo mèn loo cón che'n Diox par gác mènà mèn nali no mèn nambii loo Diox. <sup>4</sup> Tac co'se' mbi'th Crist, Crist mbli ya inquinte tolo li mèn cas loo ley no tolo tyubdi's mèn loo ley co' mxo'f Moisés loo mèn

nación Israel. No mbliguè' Crist le' mèn co' ante yila's loo Crist, Diox mdyal yòo mènà loo cón che'n Diox par gac mènà mèn nalì no mèn nambii loo Diox.

<sup>5</sup> Moisés mblu' loo mèn nación Israel cón che'n xá mod gac mènà mèn nalì no mèn nambii loo Diox por cón che'n ley co' mxo'f Moisés loo mèn. Ndxab Moisés: Chele' mèn que tee ban xalque' ñibe' ley loo mèn, mènà toloque' gac mèn nalì no mèn nambii loo Diox chele' mènà, licque', tyubdi'sque' loo con' ñibe' ley loo mènà. <sup>6</sup> Per cón che'n xá mod tyal Diox gac chol mèn mèn nalì no mèn nambii loo Diox ante por ndxela's mèn loo Diox por cón che'n Jesucrist, di's co' ndub loo libr co' nac xti's Diox mbez taandxè':

Ne'gabte gu' loo lezo' gu': Ché' nzo chó mbi' co' quée loo bé', co' nee di's, par ya xi thib mbi' Crist loo bé'? Con'a nee di's nden' mèn ya xi thib mèn Crist loo bé' tac tarte yi'th Crist loo izlyo', ndyac mèn. Thiba con'a.

<sup>7</sup> Le' tediba na, ne' ne' gab gu' loo lezo' gu': ¿Chó mèn nzo co' lyàa co'te' nac lugar co'te' nzo alm mèn no xpìi mèn co' nguth loo izlyo' ndxè', co' nee di's, co' mènà Crist làth mèn nguth tya tac nden' mèn le' Crist tarte ryo xban làth mèn nguth? <sup>8</sup> Per hui' gu' nexa. ¿Ché' inda'de gu' cuent xal mbez di's co' ndub loo libr co' nac xti's Diox? Di'sa mbez: Di's co' nac xti's Diox mzinle' xàn' nza gu' no tlate tyoodi's gu' cón nee di'sa. Mté'th gu' cón che'n di'sa no ndxan' cón che'n di'sa le'n lezo' gu'. Di's ndxè' nac cón che'n di's ndac co' ndlu' loo mèn xá mod tyal Diox yòo mèn loo cón che'n Diox por cón che'n Crist. Cón che'n di's ndaca ngo nu' yalbàn nalle'. <sup>9</sup> Tac chele' thib thib gu' ta' cuent no co ro gu' le' Jesús nac Tad loo ryethe con', no chele' gu' yila's dib nzo yéc gu' no dib nzo lezo' gu' le' Diox mblo xban Tad Jesús làth mèn nguth, lyá' gu' loo con' ryes. <sup>10</sup> Mèn co' dib nzo yéc no mèn co' dib nzo lezo' ndxela's loo Tad Jesús, ndyal Diox yòo mènà loo cón che'n Crist par gac mènà mèn nalì no mèn nambii loo Diox. Lomisque' ne, mèn co' nda' cuent no ngo ro mèn le' Jesús nac Tad loo ryethe con', mènà nac mèn co' mblyá'le' loo con' ryes.

<sup>11</sup> Loo libr co' nac xti's Diox ndub di's co' mbez:

Ryete mèn co' ndxela's loo mbi'a, mènà ne'tyóode yiloa par ya ye'th lezo' mènà no par tyoo xà' lezo' mènà. Ne' ne' xi lezo' mènà yiloa por cón che'n mbi'a.

<sup>12</sup> Cona, ngue niin loo gu': Indyu'de mèn nación Israel más loo Diox leque taamas mèn co' inacte mèn nación Israel. Leque yub Diox nac Diox co' ñibe' loo rye mèn. No nda' Diox rye loothe con' ndac loo mèn co' mbez lèe Tad Diox. <sup>13</sup> Por cona, ryete mèn co' cues lèe Tad Jesús, mènà lyá' loo con' ryes. <sup>14</sup> Hui' gu' nexa. ¿Xá mod cues mèn lèe Tad Jesús co'se' tarte yila's mèn loo Tad Jesús, à'? No ¿xá mod yila's mèn loo Tad Jesús co'se' tarte gòn mèn cón che'n Tad Jesús, à'? No ¿xá mod gòn mènà cón che'n Tad Jesús co'se' yende chó mèn tarte co yalbàn cón che'n Tad Jesús loo mèn, à'? Yende moda, ¿lé'? <sup>15</sup> No ¿xá mod co mèn yalbàn loo xtàa mèn co'se' yende chó mèn nzo co' tel' xtàa mèn par ya lo mènà yalbàn loo mèn? Yende moda, ¿lé'? Ndxàca loo mèn co' nda lo yalbàn xal ndub di's loo libr co' nac xti's Diox co' mbez taandxè':

Susque' mèn ndac nac mèn loo Diox, mèn co' ngo yalbàn cón che'n di's ndac. No anze'f huen nda mènà.

<sup>16</sup> Per fte' lezo' gu' iryede mèn nación Israel ndyubdi's loo di's ndac co' ndlu' cón che'n Crist. Ndxàca loo mèn nación Israel xal ndub di's loo libr co' nac xti's Diox co'te' mque' Sayi ye's. Sayi ndxab:

Yende chó mèn ngola's di's co' mde'th nu' loo mèn, Tad.

<sup>17</sup> Per nase nzoque' mod yila's mèn no gáp mèn yalxla's cón che'n Crist co'se' gòn mèn cón che'n di's ndac co' co mèn yalbàn cón che'n Crist.

<sup>18</sup> Ñibdizen thib con' loo gu': ¿Ché' ndli gu' cuent tarte gòn mèn nación Israel cón che'n di's ndac ndxè', cà'? ¿Xá mod ne' tar gòn mèn nación Israel cón che'n di's ndac ndxè', à'? Loo libr co' nac xti's Diox ndub di's co' mbez:

Dib athu loo izlyo' ndxathle' no ndxènle' cón che'n di's ndac che'n Diox co' mde'thle' mèn no co' mblolé' mèn yalbàn. Axta dib vult ro izlyo' mbyath mbyèn di's co' mde'th mènà, ne.

Aa. Nonque' mèn nación Israel cón che'n di'sa, ¿lé? <sup>19</sup> Beren, ñibdizen loo gu' tedib vez: ¿Ché' ndyac gu' tarte ta' mèn nación Israel cuent cón che'n di's ndac ndxè', cà'? Yende xàa. Nonque' mèn nación Israel cón che'n di's ndac ndxè'. Con que nerleque' cón che'n di's ndac ndxè' nac di's co' mda' Moisés cuent loo mèn nación Israel co'se' mde'th Moisés di's co' ndxab Diox co' mbez taandxè':

Daa li gac con' ndac loo mèn che'n tedib nación co' inacte mèn nación Israel co' ndyac gu' yende cón ntac loo Diox. Le' gu' na, angnziri' gu', yan lezo' gu' ñèe gu' mèn naciona por cón che'n con' ndac co' lin loo mèn. No lin con' ndac loo mèn thib nación co' ndyac gu' nac mèn nguud no mèn naad. Con' ndac co' lin loo mèn naciona, le'i càb le' gu' yecloo tín' ñèe gu' mèn naciona.

<sup>20</sup> Nde nxon', mbli Sayi ryes. Ndxab Sayi cón che'n di's co' ndxab Diox loo mèn nación Israel. Ndxab Sayi:

Mèn co' alithe mque tee ban no ne'ncua'nte mèn daa tac mèn tarte ñee no tarte gòn mèn le' con' co' nac cón chenen ngro xo'f loo mèn. Mblin par ngòca loo mèn, ne, xal mèn co' mblu' loo loo mèn, loo mèn co' iñibdi'ste cón chenen.

<sup>21</sup> Lomisque' ndxab Sayi cón che'n mèn nación Israel xal ndxab Diox:

Ryete huiz msilen yan no nalyat mbezen loo mèn co' nac mèn nacionpe' daa, mèn co' ngòc mèn co' indyubdi'ste no mèn co' ngòc mèn naad no mèn nguud par ngòc mèn loo cón chenen tedib vez. Per ne'nglide mèn cas con' ndxaben. Thiba con' ndxè'.

## 11

*Trè' ndlu' cón che'n mèn nación Israel co' mblyá' loo con' ryes.*

<sup>1</sup> Le' tediba na, beren, nibdizen loo gu' tedib vez: ¿Ché' ngue li gu' cuent le' Diox mtè'b no mblo' too Diox mèn nación Israel thib lad thidtene, cà'? Yende xàa. Nec thib mod no nec tedib mod ne'nglide Diox tataa tac leque daa ngue ta' cuent nac daa thib mbi' nación Israel, ne. Nac daa bin che'n thib mbi' co' ngro' lèe Abraham co' mbloj msi' bin co' ngòc mèn nación Israel yiloa. No nacguè' daa mbi' che'n tedib ned mèn co' mblec thib mbi' co' ngro' lèe Ming. <sup>2</sup> Axta pólle'a Diox mbli cuent le' mèn nación Israel ngòc che'npe' Diox. No desde huiza no axta huiz nalze tarte chobla' Diox no co' too Diox mèn no tarte tè'b Diox mèn thib lad loo Diox. ¿Ché' tarte ta' gu' cuent xal ndub di's loo libr co' nac xti's Diox co' mque' Lii, co' mde'th di's co' ndxab Diox, ye's cón che'n mèn nación Israel xal ngòca co'se' mzi'f quìi Lii mèn nación Israel loo Diox láth ngue bez Lii Diox, cà'? Ndxab Lii loo Diox:

<sup>3</sup> Tad, mbeth mèn mèn co' mde'th di's cón che'n U'. No mtelux mèn còo' U'. Angoluxte daa mbyan'. No nzi quil' mèn xtàa mèn par guth mèn daa, ndyaquen.

<sup>4</sup> Per hui' gu' nexa. Diox mcàb loo Lii. Ndxab Diox loo Lii:

Daa mblo' xà'le' gaz mil mèn antub mènbi' làth mèn nación Israel co' tarte tyub xib no co' tarte còo' yéc loo tatool co' nac diox mèn, tatool co' lèe Baal.

<sup>5</sup> Tataaguè' mod ne, be' mbyan' ndxep mèn nación Israel nalle' co' be' ndli cas loo Diox, mèn co' mcui Diox xal nac mod co' mbli Diox angndxàc con' ndac loo mèn par lyá' mèn loo con' ryes. <sup>6</sup> Per chele' Diox angndli ndxàc con' ndac loo mèn par lyá' mèn loo con' ryes, le' sya, ya inacte con' co' ndlipe' mèn co' li par lyá' mèn loo con' ryes. Tac chele' con' co' ndli mèn ngli par nglá' mèn loo con' ryes, le' sya, anxle' ngòc con' ndac co' mbli Diox angndxàc loo mèn par lyá' mèn loo con' ryes, sya, xàa.

<sup>7</sup> ¿Xá nee gu' cón che'n con' co' ngòc loo mèn nación Israel, à'? Pues loo thib ned mèn nación Israel co' Diox mcuaia, Diox mbli ngòc mèn mèn nali no mèn nambii loo Diox tac mèn ngola's loo Jesucrist. Per ngòca loo tedib ned mèn nación Israel, mèn ne'ngácte ngli par ngac mèn mèn nali no mèn nambii loo Diox tac mèn ne'ndalte ngala's loo Jesucrist. Ale ndxe'leque', ngòc mèn mèn naad no mèn nguud. <sup>8</sup> Ngòca loo mèn nación Israela xal ndub di's loo libr co' nac xti's Diox co' mbez:

Diox mbli ngòc mèn mèn naad no mèn nguud. Mcuau yéc mèn no mcuau lezo' mèn par ne'yaa'dte cón che'n Diox yéc mèn no lezo' mèn. Diox mbli ngòc mèn

loo cón che'n Diox xal mèn co' ingüi'de con' no xal mèn co' indxònte con' co' mbez tedib mèn loo mènna. Tataa ndxàca loo huax mèn nación Israel axta huiza no axta huiz nalze.

<sup>9</sup> Lomisque', ndxabguè' David co' ngòc rey póla cón che'n mèn nación Israel:

Le' mod co' ngòp mèn nación Israel loo cón che'n Diox co'se' mbli mènna sirv loo Diox póla, leque moda mbli par ngogàa mèn. Ngue li mèn con' ye'rsin' loo Diox. Ale mcàb con' mbli mènna par ngro xà' mènna loo Diox no par teti Diox mènna yiloa.

<sup>10</sup> Mde'th David, co' ngòc rey póla, tedib lugar, ne:

Diox li ne'tyubte xnii yéc mènna no ne'tyubte xnii lezo' mènna loo cón che'n Diox par gàc mènna mèn co' ncuau loo no mèn co' ncuau yéc. No li Diox, por derech, ne'xecte mènna loo con' ye'rsin' co' ngòc mod co' mque tee ban mènna xal thib mbi' co' ndxe' yó' axta mblyeng xís mbi'.

*Pab ngue lu' le' mèn co' inacte mèn nación Israel lyá' loo con' ryes, ne.*

<sup>11</sup> Nalle' nde niin tedib con' loo gu', mèn ciuda Rom: ¿Xá nee gu'? ¿Ché' ndyac gu' por ne'ndubdi'ste mèn nación Israel no por asembli mèn nación Israel con' ye'rsin' co' mcàb par mtè'b Diox mènna no mblo' too Diox mènna loo cón che'n Diox, ché' por cona thidtene ya ingode Diox cuent nac mèn nación Israel mèn che'npe' Diox, cà'? Yende xàa. Nec thib mod no nec tedib mod ngàca tataa. Diox ta' lugar yòo mènna loo cón che'n Diox tedib vez yiloa. Ndxé'leque', por ne'ndubdi'ste mèn nación Israel loo Diox, con'a mbli le'le' mèn co' inacte mèn nación Israel mblyá' loo con' ryes, co' nee di's, mèn co' ngola's loo Jesucrist. Tataa mbli Diox loo mèn co' inacte mèn nación Israel par, bel'que', tataa mod yé'th lezo' mèn nación Israel par yòo mèn nación Israel loo cón che'n Diox tedib vez.

<sup>12</sup> Cona, ngue niin loo gu', ne: Chele' xquin mèn nación Israel no xtol mèn nación Israel co' mcua'n mènna mbli mcàb más con' ndac loo mèn dib athu loo izlyo', mèn co' inacte mèn nación Israel, ale'que' ne' càb más con' ndac loo mèn dib athu loo izlyo' co'se' bere mèn nación Israel yòo mèn nación Israel loo cón che'n Diox tedib vez. Thiba con' ndxé'.

<sup>13</sup> Le' tediba na, tolo que'en taaplá di's loo cart ndxé' co' tolo lyazen tyoodiz non gu', gu' co' inacte mèn nación Israel, par nonque' gu' no ta' gu' cuent le' Diox mbli ngòc daa thib mbi' co' mtel' Diox co' ndxe' di's loo mèn co' inacte mèn nación Israel. No por cona, axta arid naquin lin zin' co' mxo'f zin' Diox loon, ndyaquen, par lu'en loo gu' cón che'n di's ndac che'n Diox. <sup>14</sup> Taandxè' ngue lin tac ndlyazen bel'que' taandxè' mod tyal mèn co' nac mèn nacionpe' daa li mèn par gàc con' ndac loo mènna xal ndxàca loo gu' par, bel'que', lyá' mènna loo con' ryes. <sup>15</sup> Chele'i ngòc por mtè'b Diox mèn nación Israel ngòca le' taamas mèn izlyo' mbyu' mbyàl lezo' loo Diox por cón che'n Jesucrist, ¿cón gàc co'se' tyal Diox yòo mèn nación Israel loo cón che'n Diox por cón che'n Jesucrist tedib vez par gàc mèn nación Israel mèn nalì no mèn nambii loo Diox, à'? Ndxé'leque', le'i gàc más con' ndac loo taamas mèn dib athu loo izlyo' par gàp mènna tedib yalnaban cub co' gàc tedib yalnaban más ndac. Thiba con' ndxé'.

<sup>16</sup> Le' tediba na, nde tetaquen thib di's loo gu'. Gu' nda'que' cuent xal nac costumbr che'n mèn nación Israel: Angab na'i, chele' ner pan co' mtoxcua' mèn loo thib tant co'f harin nac pan natú' loo Diox, xalte mod ne' gàc natú' taamas co'f co' tolo toxcua' mèn pan loo Diox, ne, ¿lé'? Lomisque' mod ne, xal nac costumbr che'n mèn nación Israel, chele' lox che'n thib xan' yaa oliv natú' nac loo Diox, xalte mod ne' gàc natú' dibte xan' yaaa loo Diox, ne, ¿lé'? Con'a nee di's, chele' mèn co' mbloj msi' bin co' ngòc mèn nación Israel ngòc mèn che'npe' Diox, le' sya, rye mèn co' nac mèn nación Israel nac che'npe' Diox, ne.

<sup>17</sup> Tolo tetaquen di's cón che'n mèn nación Israel loo gu': Chele' ndxep ram yaaa ngòc lan', co' nee di's, mblyux ndxep mèn nación Israel loo Diox thidtene, no chele' gu' co' inacte mèn nación Israel, gu' co' nac xal thib yaa oliv huan co' yende cón ntac, ngòc thidte con mèn nación Israel loo Diox xal co'se' nque' mèn thib xòod yaa lad tedib yaa par gàcpe' rama che'n yaa ndaca, no gàc che'npe' rama con' ndac che'n yaa ndaca, ne.

<sup>18</sup> Per ne'tye'ste gu' cón che'n gu' par xiis no gu' mèn nación Israel co' nac xal rampe'

yaa oliva co' ngue niin loo gu' ndxè' tac por mèn nación Israel ndxàc con' ndac ndxè' loo gu'. Chele' gu' tye's cón che'n gu' par xiis no gu' mèn nación Israel, fte' lezo' gu' xalque' ndxàc con' ndac loo thib ram yaa por cón che'n lox yaaa, co' nee di's, lox yaaa ngue xèn' yaaa. No inacte le' ram yaaa ngue xèn' lox yaaa. Con'a nee di's, ndxàc con' ndac loo gu' por cón che'n mèn nación Israel.

<sup>19</sup> Thib descuid gab gu' loo lezo' gu': Tataa mbli Diox ngòca loo mèn nación Israel loo cón che'n Diox xal thib ram yaa co' mblyaad par ngòc loo nu' co' inacte mèn nación Israel loo cón che'n Diox xal thib xòod co' mque' mèn lad yaaa co'te' mblyaad rama. <sup>20</sup> Huenque' ngòca tataa. Per mastale' ngòca tataa loo mèn nación Israel, fte' lezo' gu' le' Diox mtè'b mèn nación Israel no mblo' too Diox mèn nación Israel xal ram yaa co' mblyaad tac mèn nación Israel ne'ndalte ngala's loo cón che'n Jesucrist. No gu' mbyan' lugar che'n mèn nación Israel loo Diox ante por ndxela's gu' loo Diox por cón che'n Tad Jesucrist. Cona, ngue niin loo gu': Chó Diox chó nee gu'. Ne'tye'ste gu'. Ndxè'leque', nee gu' xal nzi tee ban gu'. Ne'stre'fque', tataa gàca loo gu', ne, chele' gu' ne'lide cas xá mod nzi tee ban ndac gu' loo Diox. <sup>21</sup> Tac chele' Diox ne'ndalte nton' Diox xtol mèn nación Israel no xquin mèn nación Israel co'se' mbyecloo Diox loo mèn nación Israel co' nac xal ram yaape', lomisque' ne, ne' cón che'n xtol gu' no xquin gu' ne'ton'te Diox chele' gu' ne'lide cas xá mod ndxàal que tee ban ndac gu' loo Diox. <sup>22</sup> Huen huen bli gu' xtùuz xal nac Diox. Diox nac xal thib gundan yin' gundan ted. Tac co'se' huen huen ndyubdi's myen' loo gundana, sya, sa lad ya' gundan nda' gundan pan no bé' loo myen'. Per co'se' indyubdi'ste myen', sya, taasa lad ya' gundan nxo'f gundan yid lad myen'. Tataa mod ngòc nayi' Diox loo mèn nación Israel co' ne'ndalte ndubdi's loo con' mnibe' Diox loo mèn na li mèn. Ndxè'leque', loo gu' anze'f thib con' ndac tolo li Diox chele' gu' tolo li con' ndac xal ñibe' Diox loo gu' par li gu'i. Per chele' gu' ne'tyalte tyubdi's ndac loo con' ñibe' Diox loo gu' na, gàca loo gu', ne, xal loo thib ram yaa co' ngòc lan', co' nee di's, tè'b Diox gu' no co' too Diox gu' loo cón che'n Diox, ne. Thiba con' ndxè'.

<sup>23</sup> Nde niin tedib con' loo gu': Le' tediba na, gàc loo mèn nación Israel xal thib xòod co' bere quée lad yaa co'te' mblyaad ram chele' mèn nación Israel tlo yila's loo Jesucrist. Tac susque' con' roo con' xèn nzo la's nii Diox no la's ya' Diox par bere Diox li Diox yòo mèn nación Israel loo cón che'n Diox tedib vez xal thib xòod ram co' mblyaadle' no bere mèn que' mèn xòod rama lad yaa tedib vez par tyen xòod lad ram co'te' mblyaad rama. <sup>24</sup> Tac chele' gu' co' inacte mèn nación Israel ngòc loo cón che'n Diox xal co'se' ncho' mèn thib xòod ram yaa oliv huan par que' mèn xòod lad yaa oliv gulàaz, mastale' ngue niina loo gu' taandxè', per indlide mèn xalque' ngue niipe'en loo gu', ale'que' más con' ndac ne' gàc loo mèn nación Israel chele' mèn gàc xal thib xòod co' mcho' mèn loo thib ram yaa oliv gulàaz par bere mèn, que' mèn leque xòoda lad leque yaape' oliv gulàaz co'te' mcho' mèn xòoda ndoore', co' nee di's, bere mèn nación Israel yòo mèn nación Israel loo cón che'n Diox tedib vez.

*Trè' ndlu' cón che'n co'se' gàc tiemp co'se' yòope' mèn nación Israel loo cón che'n Diox tedib vez par lyá' mèn nación Israel loo con' ryes thidtene.*

<sup>25</sup> Nde niin tedib con' loo gu', mèn huesen por cón che'n Jesucrist: Ndlyazen le' gu' ta' cuent no non gu' co' huenleque' cón che'n con' ndxè' co' be' nacasloo loo mèn izlyo' par ne'ten'te gu' le' gu' nac mèn co' anze'f ndxàc loo cón che'n Diox. Por cona, ngue niin loo gu': Le' mèn nación Israel ngòc mèn naad no mèn nguud loo cón che'n Diox le'n tiemp ndxè'. Ngòc mèn nación Israel mèn naad no mèn nguud axtaque' yila's taamas mèn dib athu loo izlyo' co' inacte mèn nación Israel loo Diox, rye mèn co', licque', tyal yila's loo cón che'n Diox por cón che'n Jesucrist. Axta syare' tlo mèn nación Israel, bere mèn nación Israel, yila's mèn nación Israel loo Jesucrist, ne. <sup>26</sup> Co'se' tataa gàca, axta syare' lyá' ryete mèn nación Israel loo con' ryes. Tac loo libr co' nac xti's Diox ndub di's co' mbez:

Xa' co' yi'th tí' yi'th làa mèn loo con' ryes, xa'a yi'th yáal par ned le'n nación Israel. No li xa' ne'tolode gàc mèn bin thib mbi' co' ngro' lèe Cob mèn ye'rsin'.



<sup>27</sup> Tolo mbez loo libr co' nac xti's Diox xal nac di's ndxè':

Con' co' lin gác loo mèn nación Israel gác li nèn conveñ co' mblin con mèn nación Israel, póla, co'se' lin tyon' xtol mèn.

<sup>28</sup> Le' loo cón che'n di's ndac co' ndlu' xá mod lyá' mèn loo con' ryes na, nac mèn nación Israel ngolo ngola's loo Diox par mcàba thib con' ndac loo gu' par xyal' ned xyal' yó' loo gu' par yòo gu' loo cón che'n Diox por cón che'n Jesucrist. Per mastale' nac mèn nación Israel ngolo ngola's loo Diox, be' nque'que' lezo' Diox ñèe Diox mèn nación Israel por cón che'n xudgool mèn nación Israel co' mcuri Diox póla. <sup>29</sup> Co'se' ngolo mcàbgòn Diox li Diox chol con' ndac loo xudgool mèn nación Israel, thidtene mblo' yéc Diox no lezo' Diox con'a loo mèn. No co'se' mcuri Diox mèn par gác con' ndac loo mèn, ne'lá'ya'de Diox mèn thidtene. <sup>30</sup> Gu' ngòc mèn co' ne'ndubdi'ste loo Diox thib cua'a. Per nalle', Diox ndlyat lezo' ñèe Diox gu' tac mèn nación Israel ne'ndalte ndubdi's loo Diox le'n tiemp ndxè'. <sup>31</sup> Lomisque' mod ne, mèn nación Israel ne'ndalte ndubdi's loo Diox tiemp ndxè' xalque' ngòca loo gu' co'se' ne'ndalte gu' ndubdi's gu' loo Diox thib cua'a. Mastale' mbli gu' tataa póla, Diox mblyat lezo' gunèe Diox gu' por cón che'n Crist láth ngòc gu' mèn co' ne'ndubdi'ste loo Diox tiempa. Lomisque' mod ne, Diox lyat lezo' ñèe Diox mèn nación Israel yiloa mastale' axta nalle' tarte tyal mèn nación Israel tyubdi's mèn nación Israel loo Diox. <sup>32</sup> Tac co'se' mnibe' mèn loo lezo' mèn no mdoo lezo' mèn dib athu loo izlyo' más li mèn con' ye'rsin' leque tyubdi's mèn loo Diox, sya, Dioxque' mbli par thidte ngòc mèn, mèn dib athu loo izlyo', mèn naad no mèn nguud par tolo li mèn con' ye'rsin'. Tataa mod mbli Diox par lalque' lyat lezo' Diox ñèe Diox ryete mèn dib athu loo izlyo' yiloa.

<sup>33</sup> Susque' ndxác Diox no susque' nanee Diox ryethe con'. Por cona, mbli Diox ngòcque' no ndyaaque' no ndubque' di's cón che'n di's ndac che'n Diox loo rye mèn dib athu loo izlyo'. Axta ne' ne' gác mèn tyoodi's mèn cón che'n con' co' ñibe' Diox lezo' Diox li Diox láth mèn. No axta ne' ne' ñèe mèn xá mod ndli Diox con'. <sup>34</sup> Cona, ngue niin loo gu': ¿Xá ñaa thib mèn co' non xal nac con' co' ndli Tad Diox xtùuz? Lomisque' ne, ¿chó mèn mbli' Tad Diox par mbli Tad Diox mbi'th Crist par tataaque' mod nzo di's ndac che'n Diox loo mèn dib athu loo izlyo', à? Yende chó mèn mbli tataa, ¿lé'? <sup>35</sup> Lomisque' ne, ngue niin tedib con' loo gu': ¿Xá ñaa thib mèn co' nzo loo izlyo' co' ngóc mda' chol con' loo Diox par tataa mod li mèn cuent nquin li Diox con' ndac loo mèn par tataa mod quix Diox cón che'n con' co' mbli mèn co' mquin Diox, à? Yende chó mèn gác li tataa loo Diox, ¿lé'? <sup>36</sup> Ryethe con' co' mblec Diox no mxèn' Diox nac che'n Diox. No ryete con'a mblec Diox no mxèn' Diox par li zin' Dioxa. Por cona, lyazen gab mèn Diox roo Diox xèn nac Diox no con' roo con' xèn ndli Diox le'n lín' co' ntlo, no le'n lín' co' ndxelo, no le'n lín' co' ne'lith node. Taandxè' gàca.

## 12

*Trè' ndlu' cón che'n mèn co' mdyal mbembii loo Diox no co' ngro xà' loo cón che'n xab izlyo' par ngòc mèn che'npe' Diox.*

<sup>1</sup> Por cona, ngue niin loo gu', mèn huesen por cón che'n Crist: Xalque' ndlyat lezo' Diox ñèe Diox gu', ndlyazen taandxè' mod li gu' sirv no li gu' con' ndac loo Diox. Con' ndxè' nac con' co' ndyaquen ndxàal li gu'. Ndlyazen le' gu' ante que tee ban loo Diox no maste par li gu' ante con' co' ñibe' Diox li gu'. No ndlyazen le' gu' thidteneque' ryo xà'que' loo cón che'n xab izlyo' par, licque', gác gu' che'npe' Diox. Chele' gu' tataa li, naneeque' gu' no nonque' gu' ndxòo lezo' Diox con' ndli gu'. <sup>2</sup> Ndlyazen ne'tolode tyoo lezo' gu' no gab gu' loo lezo' gu' li gu' cón che'n co' nac xab izlyo'. Ndxè'leque', fse' gu' xtùuz gu' par que tee ban gu' tedib mod co' nac co' neete lezo' Diox. Tataa mod ta' gu' cuent cón nac co' nee lezo' Diox li gu', co' nee di's, nac con' ndac, no con' co' ndxòo lezo' Diox, no con' co' nac con' nali no con' nambii loo Diox.

<sup>3</sup> Por cón che'n zin' co' nac thib con' ndac co' mxo'f zin' Diox loon, ngue niin loo ryete gu': Indlyasten le' nec thib gu' li masre' xtùuz cón che'n gu' leque co' ndxàal li gu' xtùuz cón che'n gu' par ne'tye'ste gu'. Ndxè'leque', bli thib thib gu' xtùuz cón che'n leque gu'

no cón che'n hues xtàa gu' par ñèe gu' ñeene' ¿ché' nac gu' mèn roo mèn xèn loo Diox o ché' nac gu' mèn be'the loo Diox? xal nac mod co' ndxàp gu' no co' ndxela's gu' loo Diox xalte nac mod co' mblyath no Diox gu' par ndxàp gu' yalxla's loo Diox. <sup>4</sup>Gu' naneeque' no nonque' gu' xal nac lad chol na'. Xà' nac ya' na'. Xà' nac nii na'. No xà' nac taamas con'. Nii na' no ya' na' no taamas con' indlide sirv loo na' par lii thib loote con'. <sup>5</sup>Tataaque' nac na', ne, na' co' ndxela's loo Crist. Mastale' huax mèn nac na', nac na' xal thidte lad Crist. Tataaque' mod nac ryete na', na' co' thidte ngòc loo Crist, thidte nac thib na' no tedib na' loo cón che'n Crist xal nac ladpe' mèn.

<sup>6</sup>Diox ndli loo na' co' ndxela's loo Diox por cón che'n Crist xà' xà' nac co' ndxác na' li na' loo cón che'n Diox xal ndlya's Diox li thib thib na'. Ndxàal xo'f zin' na' zin' co' ndlu' Diox loo thib thib na' xal ndlya's Diox li thib thib na' zin'. Chele' Diox mbli ndxác ndxep na' co' na' yalbàn cón che'n Diox, ndxàal co' na' yalbàn cón che'n Diox xalque' nac mod co' ndxàp na' yalxla's loo Diox. <sup>7</sup>Lomisque', ngue niin loo gu', ne: Chele' Diox mbli nac na' mèn co' xo'f zin' ndac thib zin' co' nac par lyath no na' xtàa na', ndxàal lyath no ndac na' xtàa na'. Lomisque' ne, chele' Diox mblec ndxep na' par lu' na' loo hues xtàa na', ndxàal lu' ndac na' loo hues xtàa na' cón che'n Tad Diox. <sup>8</sup>Lomisque', ngue niin loo gu', ne: Na' co' mblec Diox no mbli Diox par ndxác na' li na' par ye'th lezo' mèn, no tegán na' lezo' mèn loo cón che'n Diox, ndxàal li na' i xal ndxàala. Le' mèn co' ndryo' lezo' angta' mèn con' co' ndryo' lezo' mèn ta' mèn càa mèn co' nde che con' loo, ta' mèn con gust no con dib nzo yéc mèn no con dib nzo lezo' mèn. Ne'cuez nguixte mèn cón che'na yiloo. Le' mèn co' ndyoo ner no co' ndyoo naa loo xtàa na, leque mèn hui' loo mèn xá mod ndyoo ner mèn no xá mod ndyoo naa mèn loo xtàa mèn par ryo' loo con' ndac cón che'n Diox por con' ndli mèn. Le' mèn co' ndryo' lezo' lyath no mèn co' naquin con' no mèn co' ndyac yaltii, lyath no mèn mèn con gust no con guyith guxiis.

*Pab ngue lu' xá mod ndxàal que tee ban ndac mèn, mèn co' ndxela's loo Crist no co' nzo loo cón che'n Crist, làth hues xtàa mèn.*

<sup>9</sup>Thib li yéc gu' no thib li lezo' gu' fque' lezo' gu' gunèe gu' thib xtàa gu' no tedib xtàa gu'. Blá' gu'. Ne'tolode li gu' chol con' ye'rsin'. Más huen, ftoo lezo' gu' li gu' con' ndac. <sup>10</sup>Fque' lezo' gu' gunèe gu' thib xtàa gu' no tedib xtàa gu' xalque' nque' lezo' gu' ñèe gu' huespe' gu'. Bli gu' con' guryath no con' guryèn no bli gu' cas thib xtàa gu' no tedib xtàa gu' xal ndxàala.

<sup>11</sup>Bli gu' purad loo zin' co' nac chol zin' co' ngue li gu'. Ne'gàcte gu' mèn za'f loo zin'. Gòc gu' mèn nayan loo zin' co' mxo'f zin' Tad Diox loo gu' par li gu'.

<sup>12</sup>Gure gu' guyith guxiis loo cón che'n con' co' nzi quee lezo' gu' co' gac loo gu' yiloo. Gòc gu' mèn co' ncha'la's no co' xec yèe co'se' ndxác ngòc nguàal con' ye'rsin' loo gu'. No ndlyazen ne'yathla'ste gu' toloque' gurez gu' Diox.

<sup>13</sup>Blyath no gu' mèn co' ngro' xà' loo cón che'n xab izlyo', mèn co' ngòc che'npe' Diox, co' nee di's, blyath no gu' mèn co' ndxela's loo Crist loo con' nde che loo mèn. Con gust fta' gu' liz gu' cued mèn co'se' ña'b mèn loo gu' cued mèn liz gu'.

<sup>14</sup>Con huen di's con huen cuent ffoodi's gu' cón che'n mèn co' ndli ngòc nguàal con' loo gu'. Gurez gu' no bna'b gu' loo Diox par li Diox anggac con' ndac loo mèn co' ndli ngòc nguàal con' loo gu'. No ne'nii yède gu' no ne'nii tiide gu' cón che'n mèn.

<sup>15</sup>Thidte gòc gu' con hues xtàa gu' co' nziri' con guyith guxiis par tolo tyac lezo' gu' con hues xtàa gu'. No lomisque' ne, thidte gòc gu' con mèn co' nzi xi lezo'.

<sup>16</sup>Ndlyazen thidte gac xtùuz gu' no lezo' gu' co'se' li gu' chol con' nde li gu'. Ne'gàcte gu' mèn nate's no mèn naxal'. Ndxé'leque', gòc gu' mèn nado'. Ne'gabte gu' loo lezo' gu' le' gu' anze'f ndxác.

<sup>17</sup>Ne'co xtàade gu' con' loo xtàa gu' xal nac leque con' ye'rsin' co' ndli no xtàa gu' gu'. Más huen, fcua'n gu' mod li gu' con' ndac loo ryete mèn. <sup>18</sup>Bli gu' con' ndac co' nzote mod li gu' par tataa mod nabe'ste cue ban gu' rye nda gu' no rye ndye'th gu' làth hues xtàa gu'. <sup>19</sup>Mèn huesen por cón che'n Crist, gu' co' nque' lezon ñèen, ne'co xtàade gu' leque con' ye'rsin' co' ndli xtàa gu' loo gu' loo xtàa gu'. Ndxé'leque', ftan' gu' i part che'n

Diox par yub Diox co' xtàa cón che'n gu' loo mèn. Tac loo libr co' nac xti's Diox ndub di's co' mbez:

Cón chenen nac co' tetiin mèn co' nac co' go xtàan loo mèn. ¡Lá'a! Tazanque' daa no yigaa mèn loon, ndxab Tad Diox.

<sup>20</sup> Lomisque' ndxab Tad Diox:

Chele' mèn co' nac ngolo ngola's che'n gu', co' ndxecloo ñèe gu', ngue tee lan', fta' gu' con' hua mèn. Chele' mèn ngue tee yec lezo', fta' gu' xít gu' gu' mèn. Tac co'se' ngue li gu' con'a loo mèn, ten' mèn le' gu' ngue li con' ndac loo mèn. No tataa mod nthyon tìn' mèn por ngue li gu' con' ndac loo mèn.

<sup>21</sup> Ne'ta'de gu' lugar lyàa xyàn lezo' gu' par setilte zyo' yéc gu' co'se' li mèn ngòc nguàal con' loo gu'. Ndxè'leque', más huen ftoo lezo' gu' bli gu' con' ndac par ne'líde gu' con' ye'rsin' loo mèn co' mbli ngòc nguàal con' loo gu'.

## 13

<sup>1</sup> Ndlyazen niin tedib con' loo gu', ne: Ryete gu' ndxàal tyubdi's loo mèn nac zin', loo mèn co' nxo'f zin' gobiern thib zin'. Tac ryete mèn co' ndxàc mèn nac zin' che'n gobiern, Diox mbli ngure mèn no nziri' mèn par tyubdi's mèn loo mèn nac zin'a, que nac mèn gobiernpe', que nac mèn mèn nac zin' bix. <sup>2</sup> Por cona, ngue niin loo gu': Mèn co' ncà di's loo mèn nac zin', mèn nac ngolo ngola's loo con' co' mnibe' Diox. Le' sya, mèn co' tataa ncà di's loo mèn nac zin', leque mèn ncu'a'n xquin mèn loo Diox. Diox li tetii mèn nac zin' mèn por cón che'n con' ye'rsin' co' mbli mèn. <sup>3</sup> Tac mèn co' nac mèn nac zin', inziri'de mèn par li mèn zyeb mèn co' ndli con' ndac. Ndxè'leque', nziri' mèn nac zin'a par li mèn nac zin' zyeb mèn co' ndli con' ye'rsin'. ¿Ché' ndly'a's gu' que tee ban li gu' xal ndly'a's gu' par ne'líde mèn nac zin' par zyeb gu', cà? Yende xàa. Nacquele' gu' indly'a'ste gàca tataa loo gu', nabe'ste fque tee ban gu', sya, par tataa mod hui' ñaa mèn nac zin' loo gu' le' gu' nac mèn ndac. No ne'líde mèn nac zin' par zyeb gu'. <sup>4</sup> Tac mèn nac zin' nac mèn co' Diox mblec no mbli Diox nziri' mèn nac zin' par xo'f zin' mèn nac zin' thib zin' loo Diox par li mèn nac zin' gac con' ndac loo gu'. Per chele' gu' nzi tee ban li con' ye'rsin', le' sya, ndxàal zyeb gu' ñèe gu' mèn nac zin'. Tac ianxle'de ndxàp mèn nac zin' con' la's nii mèn nac zin' no la's ya' mèn nac zin' par tetii mèn nac zin' gu'. Tac por cona mblec Diox mèn nac zin' par xo'f zin' mèn nac zin' thib zin' loo Diox par tetii mèn nac zin' mèn co' nzi tee ban li con' ye'rsin'. <sup>5</sup> Por cona, naquinque' tyubdi's gu' loo mèn nac zin'. Iante tyubdi's gu' loo mèn nac zin' par ne'tetiide mèn nac zin' gu'. Ndxè'leque', tyubdi's gu' loo mèn nac zin' tac nden' gu' le'n lezo' gu' le' Diox ngue ñibe' loo gu' co'se' ñibe' mèn nac zin' loo gu' li gu' chol con' ndac. <sup>6</sup> Por cón che'n cona, gu' nguixque' cón che'n contribución no nda' gu' chol ayud co' nquin mèn nac zin' tac Diox mblec mèn nac zin' par thop mèn nac zin' tmi co' nquin gobiern no co' nquin mèn nac zin'.

<sup>7</sup> Lomisque', ngue niin loo gu', ne: Bdix gu' loo rye mèn co' ndeb gu'. Chele' chol gu' ndeb cón che'n contribución, bdix gu' cón che'n contribución. Lomisque' ne, chele' chol gu' ndeb cón che'n tmi co' mbli mèn nac zin' mandad tub mèn, ftub gu' tmi co' ña'b mèn nac zin'. Lomisque' ne, loo mèn co' ndli gu' cuent gáp gu' mod, gòp gu' mod loo mèn. Mèn co' ndli gu' cuent ndxàal tyu' mèn, bli gu' par tyu' mèn. <sup>8</sup> Ne'ryo' te'bte gu' loo nec thib mèn. Ndxè'leque', fcua'n gu' mod fque' lezo' gu' gunèe gu' thib xtàa gu' no tedib xtàa gu' tac mèn co' nque' lezo' ñèe xtàa mèn, mèn ngue lique' xal ñibe' Diox loo mèn par li mèn. <sup>9</sup> ¿Ché' inonte gu' xal mbez di's co' mnibe' Diox loo Moisés co' ngòc ley co' mxo'f Moisés loo mèn nación Israel co' mbez:

Ne'líde gu' yalburrid. Ne'guthte gu' mèn. Ne'li huan'te gu'. Ne'toxcua'de gu' yalgutyè' cón che'n nec thib mèn. Ne'queli'thte gu' cón che'n hues xtàa gu'.

Di's ndxè', no taamas di's co' ñibe' ley co' mxo'f Moisés loo mèn, thidte nac no thidte mbez no ndlu' di'sa loo gu' par que' lezo' gu' ñèe gu' hues xtàa gu' xalque' ngue lezo' gu' ñèe gu' gu' no xalque' nquenap leque gu' gu'. <sup>10</sup> Co'se' nque' lezo' mèn ñèe mèn hues xtàa mèn, incua'nte mèn mod li mèn con' ye'rsin' loo hues xtàa mèn. Cona, ngue niin

loo gu': Co'se' nque' lezo' mèn ñèe mèn hues xtàa mèn, mènà ndlique' xal ñibe' Diox loo mèn li mèn.

<sup>11</sup> Por cón che'n con' co' ngolo mdoodizen loo gu' ndxè', cón che'n tiemp co'se' gac lyá' na' loo con' ryes thidtene, ndoo ri'th tiempa xal co'se' ndoo ri'th yál' no ndxeniiile' izlyo' tedib huiz. Por cona, gòc gu' mèn co' tolo tyub xnii yéc no co' tolo tyub xnii lezo' loo tiemp co' nzi ban na' nalle'. Nalas gure gu' loo cón che'n Diox xal mèn co' inzi yàtte. Tac tiemp co'se' yi'th xi Jesucrist na', tiempa más nde zin' gaxle' loo na' nalle' leque co'se' nerleque' ngola's na' cón che'n di's ndac che'n Diox. <sup>12</sup> Lomisque', ngue niin loo gu', ne: Ndoe ri'th tiemp thib lín' tedib lín' co'se' toloque' ñibe' con' ye'rsin' loo mèn loo izlyo' ndxè' co' ndli ncuau yéc mèn no ncuau lezo' mèn xal co'se' nzi tee mèn loo yál'cuau. Per làth xtau'a, nde zin'le' tiemp, ne, co'se' yi'th xi Tad Jesucrist mèn par bii no mèn Tad Jesucrist, mèn co' ngòo loo cón che'n Tad Jesucrist. Por cona, ngue niin loo gu': Ndxàal lá' na' ryethe con' co' nac co' ncàb ndxau' yéc na' no ndxau' lezo' na' loo cón che'n Diox. Más huen, naquin li na' xal solndad co'se' ntau' solndad lad solndad con' yi'f par ne'gàcte con' ryes loo solndad, co' nee di's, que tee ban ndac na' loo Crist co' ndli ndyub xnii yéc na' no co' ndli ndyub xnii lezo' na' loo cón che'n Diox. <sup>13</sup> Ndxàal que tee ban li na' con' ndac, co' nee di's, nac con' co' ndxàal li mèn loo xnaa ndxáal ze, con' co' ndli ne'thyonte mèn loo xtàa mèn. Indxàalte que tee ban guy' na'. Indxàalte yòo na' loo thib yalhua co' ndli ndxetoo di's làth mèn. Ne' ne' indxàal que tee ban bix yéc na' par li na' yalburrid. Ne' ne' indxàal yoo na' loo chol con' co' ndryo' ndlyen' lezo' na' no le'n xtùuz na' par tataa mod ne'cue yoo node na' chol mèn co' ndxàc hues no xtàa na' làth na'. Ne' ne' indxàal li na' par yan lezo' na' ñèe na' chol xtàa na'. <sup>14</sup> Ndxle'leque', naquin ante que tee ban na' loo cón che'n yub Jesucrist co' nquenap na' par ne'lide na' chol con' ye'rsin'. No lomisque', lyazen ya ne'tolode tyóo na' par tyac lezo' na' li na' ryethe con' co' ndyub yof lezo' na' li na' co' nac cón che'n xab izlyo' ndxè'.

## 14

*Pab ngue bez: Ne'niide gu' ngòc nguàal con' cón che'n hues xtàa gu' co' nzo loo cón che'n Crist.*

<sup>1</sup> Chele' chó mèn diiz ngòo loo cón che'n Jesucrist, no tarte yila's mènà loo cón che'n Jesucrist co' huen huen xal ndxela's na', fta' gu' lugar tolo yòo mènà làth gu'. Per látha, más huen ne'tyoodi'ste gu' con' mènà no ne'nibdi'ste gu' loo mènà cón che'n xley' che'n Crist co' tarte ta' ndac mènà cuent par ne'gol' di'ste gu' arid con' mènà. <sup>2</sup> Angab na'i, nzo ndxep mèn co' diiz ngola's. Mènà yende chó mport nzo lezo', nden' mènà nzoque mod hua mènà chol con' ndlya's mènà. Per làth xtau'a, nzo taandxep mèn co' nac leque mèn co' diiz ngola's. Mènà be' ndxàc chop loo chop la's loo cón che'n Crist. Be' nde no lezo' mènà loo costumbr co' mque no mènà ndoore' yila's mènà. Cona, ndyac mènà más huen hua mènà con' nayèe co' inacte chol bé' co' ndxuhua mèn. <sup>3</sup> Cona, ngue niin loo gu': Gu' co' ndxuhua chol con' co' nac xít gu' no lua' gu', indxàalte xis no gu' mèn no indxàalte co' too gu' mèn co' indxuhuade chol con' co' nac xít mèn no co' nac lua' mèn thib lad xal nac mod co' ndxuhua gu' chol con' co' nac xít gu' no lua' gu'. No gu' co' indxuhuade chol con' co' nac xít mèn no lua' mèn, indxàalte ñii gu' ngòc nguàal di's cón che'n hues xtàa gu' co' ndxuhua xít no lua' co' nac chol con' co' ndxuhua mèn. Tac yende chó mport nzo lezo' Diox loo con'a. Leque yub Diox nac xa' co' mdyal no co' mda' lugar ngòo mènà loo cón che'n Diox por cón che'n Crist. <sup>4</sup> ¡Aa que naxèn gu' se, mèn ciuda Rom! ¿Chó cón che'n gu' par le'le' gu' ñii ngòc nguàal di's cón che'n mèn co' ndli sirv loo tedib mèn, à'? Nee mènà cón ngue li mènà. ¿Ché' ngue li mènà con' ndac o ché' ngue li mènà con' ye'rsin' loo Diox?, loo Diox co' nee di's, nac xal patrón loo mènà cón che'n co' nac lua' no xít mèn. Con'a nac cón che'n Diox co' nac xal patronpe' mènà. No huenque' gac cón che'n mènà loo Diox co' nac xal patrón mènà tac yub Diox ndxác par tolo li Diox gac con' ndac loo mènà.

<sup>5</sup> Nde niiguè'en tedib con' loo gu', ne, cón che'n co' nac tedib ned mèn co' nzo làth gu': Nzoque' ndxep mèn làth gu' co' mbez másque' huiz roo nac thib huiz co' nac huiz lni

leque taamas huiz. No nzo tedib ned mèn làth gu' co' ndxela's le' ryete huiz lalque' nac. Cona, ngue niin loo gu': Leque mèn ndxàal cuec lezo' mèn li mèn xtùuz xá mod nac cón che'n thib huiz no xá mod nac cón che'n tedib huiz par ñee mènna ;ché' ndxàal li mènna cas huiza o ché' indxàalte li mèn cas huiza? <sup>6</sup> Nde niin con' ndxè' loo gu' ante cón che'n mèn co' ndxela's loo Diox por cón che'n Tad Jesucrist: Mèn co' nquenap mèn thib huiz co' ndlya's mèn, mènna ngue li con' guryath no con' guryèn loo Tad Diox. Lomisque' ne, mèn co' inquenapte mèn thib huiz co' ndlya's mèn, mènna, ne, ngue liguè' con'a par gac con' guryath no con' guryèn loo Diox por inquenapte mèn chol huiz lni xal ndli taamas mèn. Lomisque' ne, mèn co' ndxuhua xít mèn no lua' mèn co' nac chol con' co' ndxuhua mèn, ndxuhua mèn xít mèn no lua' mèn par gac con' guryath no con' guryèn loo Diox tac mbez mènna Diox quix U', Diox, loo Diox co'se' hua mèn. Lomisque' ne, mèn co' ndxàp lezo' mèn par ne'huade mèn xít mèn no hua mèn co' nac chol con' co' ndxuhua mèn, mènna, ne, ngue liguè' con' guryath no con' guryèn loo Diox tac mbez mènna Diox quix U', Diox, loo Diox ndoore' hua mèn.

<sup>7</sup> Tac nec thib na' inzi bante xal neepe' lezo' na'. No nec thib na' yende mod gath xal neepe' lezo' na'. <sup>8</sup> Per chele' na' nzi ban, làth nzi ban na', ante nzi ban na' xal neepe' lezo' Tad Crist. No que naca gath na', gath na' xal neepe' lezo' Tad Crist. Le' sya, lomisque' naca, que naca ban na', o que naca gath na', nacque' na' mèn che'npe' Tad Crist. <sup>9</sup> Por cona, nguth Crist no ngro xban Crist no naban Crist tedib vez par ñibe'pe' Crist loo ryethe mèn yilóa, que naca mèn co' nguth, que naca mèn co' be' naban, que naca mèn co' ngòo loo cón che'n Crist, no que naca mèn co' ne'tyalte' yòo loo cón che'n Crist nalle'.

<sup>10</sup> Per gu', mèn ciuda Rom, yende chó cón che'n gu' par tub rez gu' cón che'n hues xtàa gu' por cón che'n Crist. Lomisque' ne, yende chó cón che'n gu' par xiis no gu' hues xtàa gu' no co' too gu' hues xtàa gu'. Tac gaca le' ryethe na' tyoo loo Crist par tub rez Crist cón che'n thib thib na'. <sup>11</sup> Tac loo libr co' nac xti's Diox ndub di's co' ndxab Tad Diox. Di'sa mbez:

Com le' daa, lìcque', naban, ndxab Tad, gacque' le' ryete mèn co' nziri' dib athu loo izlyo' tyub xib loon. No loo xnaa tyoodi's ryete mèn loo xtàa mèn di's roo di's xèn cón chenen. No gab ryete mèn di's natú' loon, daa co' nac merpe' Diox.

<sup>12</sup> Cona, ngue niin loo gu', par non na': Le' thib thib na' ta' cuent loo Diox no gab na' loo Diox cón che'npe' con' mbli na' no xá mod mque tee ban na' loo izlyo' ndxè' co'se' gac huiza.

*Ne'aselide gu' par angcua'n hues xtàa gu' xtol hues xtàa gu' no xquin hues xtàa gu'.*

<sup>13</sup> Por cona, indxàalte tyoodi's gu' ngòc nguàal con' cón che'n hues xtàa gu'. Ndxè'leque', leque gu' bli par ñibe' gu' loo lezo' gu' par ne'líde gu' ngòc nguàal con' loo mèn co' nac hues xtàa gu' por cón che'n Jesús. Lomisque' ne, ne'líde gu' nec thib con' co' nac ilé'de con' par càba loo hues xtàa gu' yitac lezo' hues xtàa gu' no cua'n hues xtàa gu' xquin hues xtàa gu' no xtol hues xtàa gu'. Thiba con' ndxè'.

<sup>14</sup> Le' tediba na, part cón chenen, daa nanee no ndxàpen yalxla's le' ryethe con' co' ndxuhua mèn nambiique' naca loo Diox. Ndxelazen con' ndxè' tac ndxàpen yalxla's loo Tad Jesucrist no loo cón che'n Tad Jesucrist. Per por part che'n chol mèn co' ndxàc hues xtàa na', mèn co' nzo chol lugar co' ndli cuent inambiide nac ndxep con' hua mèn ndyac mèn, pues inambiide nac con'a ndyac mèn par hua mènna. <sup>15</sup> Chele' chol hues xtàa na' nden' le'n lezo' hues xtàa na' ilé'de nac con' ngue li gu' co'se' hui' hues xtàa gu' loo gu' nzi yuhua gu' xít gu' no lua' gu', co' nee di's, ndyac hues xtàa gu' le' gu' ngue yuhua con' co' indxàalte hua gu', con'a ndli ncàb le' hues xtàa gu' ndyac le' gu' inque'de lezo' ñee gu' hues xtàa gu'. No lomisque' ten' hues xtàa gu' inzi tee ban ndacte gu' xal ndxàala loo hues xtàa gu' loo cón che'n Jesucrist. Cona, ngue niin loo gu': Ne'líde gu' tataa loo mèn hues xtàa gu' par ne'tyoo xà'de lezo' mèn hues xtàa gu' loo cón che'n Crist ante por ndlya's gu' hua gu' con' co' ndubla's gu' hua gu' loo mèn co' ndxàc hues xtàa gu'. Tac por cón che'n mènna nguth Crist, ne. <sup>16</sup> Ne'líde gu' ngòc nguàal con' par li mèn xtùuz no ñii yèe ñii tii mèn cón che'n gu' loo con' co' ndyac gu' nac con' ndac co' ndli gu'. <sup>17</sup> Tac



mod co' ngue ñibe' Diox loo gu' nalle', yende chó mport nzo lezo' Diox loo con' co' nac xít gu' no lua' gu'. Ndxé'leque', con' co' ñibe' Diox loo gu' par li gu' nac: Fque tee ban lì gu' loo Diox no cue ban gu' rye nda gu' no rye ndye'th gu' làth hues xtàa gu', no cue gu' guyith guxìis làth xtàa gu'. Tataa ndxàal li gu' tac Xpii Natú' co' nzo loo gu' ngue lyath no gu' par tataa que tee ban gu'. <sup>18</sup> Mèn co' tataa nzi tee ban loo cón che'n Crist xal ngue niin loo gu' ndxè', mèn ndxòo lezo' Diox ñèe Diox con' ndli mèn. No mèn co' nac hues xtàa mèn ngüii' no nda'que' mèn cuent huenque' nac co' ndli mèn.

<sup>19</sup> Cona, ngue niin loo gu': Tolo fque tee ban ndac gu' loo mèn par tataa mod cue ban gu' rye nda gu' no rye ndye'th gu' làth mèn. Le' sya, chele' gu' tataa ngue li, tataa mod ngue li gu' par ndlyath no gu' thib xtàa gu' no tedib xtàa gu' par tolo té'th mèn no tolo tyubdi's mèn loo Crist. <sup>20</sup> Más huen, ne' huade gu' chol con' co' nac xít gu' no lua' gu' loo mèn co' nac hues xtàa gu' par tyoo xà' lezo' mèn loo cón che'n Diox por ante ñèe mèn ndxuhua gu' con' co' nac xít gu' no lua' gu'. Lìca, ryete con' co' nac xít mèn no lua' mèn co' ndxuhua mèn nambìique' nac con'a par hua mèn. Per part cón che'n mèn co' nac hues xtàa gu' co' ngue hui' loo gu' co'se' ngue yuhua gu' thib con' co' nac xít gu' no lua' gu', loo mèn gac ngòc nguàal con' no axta cua'n mèn xquin mèn no xtol mèn por ñèe mèn ndxuhua gu' con' co' nac xít gu' no lua' gu'a. <sup>21</sup> Huenque' naca chele' gu' ne' huade chol bé', ne' ne' gàal ro gu' vin, no ne' ne' li gu' chol taamas con' co' nac ngòc nguàal con' loo mèn co' nac hues xtàa gu' por cón che'n Jesucrist. Ne' ne' aseli gu' chol con' co' càb loo hues xtàa gu' cua'n hues xtàa gu'a xquin no xtol hues xtàa gu' por cón che'n gu'. Lomisque' ne, ne' aselide gu' tyoo xà' lezo' mèn xal nac mod co' ndxela's mèn loo cón che'n Crist. <sup>22</sup> Le' por part cón che'n gu' na, mod co' ndxela's gu' loo Diox por cón che'n Crist, ante le'n lezo' gu' non gu' xá mod ndxela's gu' loo Diox par tataa mod ne' lu' de gu' loo mèn ndli gu' cuent anze'f ndxác gu' ndyoo naa gu' loo mèn loo cón che'n Diox. Tac huen nda thib mèn co' ndxàp yalxla's loo Diox co'se' leque mèn ngue lu' mèn loo hues xtàa mèn huen nzo lezo' mèn ngue tee ban mèn loo Diox no co'se' inden'te mèn le'n lezo' mèn le' mèn ngue li con' ye'rsin' loo Diox. <sup>23</sup> Per mèn co' ndxuhua chol con' co' nac xít mèn no lua' mèn no ndxàc chop loo chop la's mèn no ngan lezo' mèn, ¿ché' thua mèn o ché' ne' huade mèn?, le' sya, leque con' co' ndli mèn xtúuz le'n lezo' mèn ngue quexù' mèn co'se' hua mèn xít mèn no lua' mèn tac indxuhua mèn con'a dib nzo yéc mèn no dib nzo lezo' mèn. Le' sya, ryete con' ndli mèn co' nzo loo cón che'n Diox por cón che'n Crist, mèn ncu'a'n xquin mèn no xtol mèn tac indlide mèn con' ndli mèn dib nzo yéc mèn no dib nzo lezo' mèn. Ndxé'leque', ndli mèn con'a chop loo chop la's mèn. Thiba con' ndxè'.

## 15

*Pab mbez: Fcua'n gu' mod li gu' co' yòo lezo' xtàa gu'. No ne' cua'nte gu' mod li gu' ante con' co' yòo lezo' gu'.*

<sup>1</sup> Le' tediba na, na' co' más nzi nèe loo con' ndxela's na' loo Crist, ndxàalque' xec na' no lyath no na' mèn co' tatabe' nac mèn chop loo chop la's loo co' ndxela's mèn loo Crist. No ne' lide na' par leque na' li par ante más tyac lezo' na' loo cón che'n co' ndxela's na' loo Crist. <sup>2</sup> Thib thib na' ndxàal cua'n mod li na' con' ndac loo hues xtàa na' por cón che'n Crist par càba con' co', licque', nac con' ndac loo hues xtàa na' par tataa mod tolo té'th no tolo tyubdi's hues xtàa na' loo cón che'n Jesucrist no par tataa mod tolo tyac lezo' hues xtàa na' loo co' ndxela's hues xtàa na'. <sup>3</sup> Tac leque yub Crist ne' ncu'a'nte mod par ngli Crist ndac lezo' Crist por cón che'n Crist. Ndxé'leque', ngòcque' con' loo Crist xalque' ngòc di's co' ndub loo libr co' nac xti's Diox co' gunii Crist loo Tad Diox, co'se' ndxab Crist:

Ndalen par tyactiin por cón che'n mèn co' nac ngolo ngola's che'n U'. Mèn mdèe msuc rloon. No mbli mèn ngòc nguàal con' loon axta plóthe mblya's mèn. Loo con' ngòc loo Crista, ne' nda' de Crist gust lezo' Crist nec thib mod no nec tedib mod par ngo' xyàn lezo' Crist con' mèn. <sup>4</sup> Cona, ngue niin loo gu': Mdubque' di's co' ndub loo

libr co' nac xti's Diox ndoore' co' nac testamentgool nalle'. Di'sa ndub loo libr co' nac xti's Diox par té'th na' no par ta' na' cuent cón che'n Diox. Tataa ndlu' xti's Diox loo na' par ncha'la's na' no par tegán na' lezo' na' loo cón che'n Diox xal ndub di's loo libr co' nac xti's Diox. Tataa mod tolo cue quee lezo' na' loo cón che'n Crist. <sup>5</sup> Ndlyazen le' Diox co' angndli par ncha'la's mèn no Diox co' ndli par ntegán mèn lezo' mèn angli thidte gác lezo' gu' no xtúuz gu' loo thib xtàa gu' no loo tedib xtàa gu' xalque' ngòc mod co' ngòc Crist Jesús loo mèn <sup>6</sup> par tataa mod thidte gác ryete gu' par thidte gab gu' di's natú' no di's roo di's xèn cón che'n Diox loo xtàa gu' cón che'n Diox co' nac xud Tad Jesucrist na'.

*Pab mblo yalbàn loo mèn tith co' inacte mèn nación Israel.*

<sup>7</sup> Cona, ngue niin loo gu': Fta' gu' lugar yòo chol mèn làth gu', mèn co' ndxela's xal mda' Crist lugar ngòc gu' loo cón che'n Crist par tataa mod gác con' roo con' xèn loo Diox por cón che'n gu'. <sup>8</sup> Tac con' co' ngue niin loo gu' ndxè' nac le' Crist mbi'th yáal loo izlyo' par li Crist sirv loo mèn co' nac mèn nación Israel par li la's mèn le' Diox indyè'de no par mdubque' di's xal nac di's co' mcàbgòn Diox loo xudgool na' co' ngo ban pólle'a. Tataa mbli Diox par mblu' Diox loo mèn le' Diox ndlique' co' mcàbgòn Diox li Diox loo mèn. <sup>9</sup> Mbi'th yáal Jesucrist loo izlyo' ndxè', ne, par lyat lezo' Jesucrist ñèe Jesucrist mèn co' inacte mèn nación Israel. Tataa mbli Jesucrist par gàca le' mèn co' inacte mèn nación Israel tlo, ñii mèn di's roo di's xèn cón che'n Diox loo mèn xal ndub di's loo libr co' nac xti's Diox co' mde'th mèn. Di'sa mbez:

Por cona, daa gab con' roo con' xèn cón che'n U', Tad, loo mèn co' inacte mèn nación Israel. No gol ron di's natú' cón che'n lèe U', Tad, loo mèn co' inacte mèn nación Israel par gác con' guryath no con' guryèn loo U'.

<sup>10</sup> Tedib lugar le'n libr co' nac xti's Diox ndub di's co' gunii Moisés, co' mbezguè', ne:

Fxo'f nde' fxo'f ndla' lezo' gu', mèn nación co' nziri' dib athu loo izlyo', con mèn co' nac mèn nacionpe' Diox co' nzo loo cón che'n Diox.

<sup>11</sup> Tedib lugar le'n libr co' nac xti's Diox gunii David co' ngòc rey póla, ne:

Gab mèn co' nac mèn chol nación co' nziri' dib athu loo izlyo' di's guryath no di's guryèn cón che'n Tad Diox. No lomisque', tyoodi's ryethe mèn co' nziri' dib athu loo izlyo' cón che'n con' roo con' xèn co' mbli Tad Diox no co' nac Tad Diox.

<sup>12</sup> Tedib lugar loo libr co' nac xti's Diox ndub di's co' gunii Sayi, ne, di's co' mbez:

Gáal thib mbi' co' nde bin Isaí co' ngòc xud David co' ngòc rey póla. Gáal mbi'a co'se' ihuaxte bin Isaí nzo no co'se' nden' mèn yende cón ntac bin Isaí. Mbi'a gác mbi' co' ñibe' loo mèn nación co' inacte mèn nación Israel. Le' sya, mèn co' inacte mèn nación Israel cue quee lezo' loo mbi' co' nac bin Isaí.

No ngóolque' mbi'a. Mbi'a nac Tad Jesucrist.

<sup>13</sup> Ndlyazen le' Diox, co' ndli toloque' cue quee lezo' mèn loo cón che'n Crist, tolo li par xyo'f nde' xyo'f ndla' lezo' gu' loo con' co' ndxela's gu' loo Crist. No ndlyazen le' Diox li tolo que tee ban gu' rye nda gu' no rye ndye'th gu' làth xtàa gu' loo con' co' ndxela's gu' loo Crist par tataa mod cue quee lezo' gu' axta plóthe loo cón che'n Crist por cón che'n ryethe con' co' nac con' roo no con' xèn co' nzo la's nii Xpii Natú' no co' nzo la's ya' Xpii Natú' co' ndlyath no gu'.

<sup>14</sup> Daa ngobe', mèn huesen por cón che'n Crist, le' gu' mbli nèele' lezo' gu' par li gu' con' ndac thidtene. Lomisque' ne, ndyaquen, huen huen mté'th gu' cón che'n ryethe con' co' nac con' ndac cón che'n Diox. Por cona, ndxác gu' co'x gu' loo thib hues xtàa gu' no loo tedib hues xtàa gu'. <sup>15</sup> Loo cart co' mzin loo gu' ndxè' mblin ryes mque'en ye's loo gu' clarleque' cón che'n ndxep con' co' huen huen non gu' no nanee gu' par te' lezo' gu' co' huen huen cón che'n di's ndac. Ngue niin con' ndxè' loo gu' tac Diox mbli angngòc con' ndac ndxè' loon par xo'f zin'en zin' ndxè' mastale' indxàalte daa par lina, ndyaquen. <sup>16</sup> Tataa mxo'f zin' Diox loon par ga xo'f zin'en loo mèn co' inacte mèn nación Israel, co' nee di's, gon yalbàn cón che'n di's ndac che'n Diox loo mèn par tataa mod ta' mèn cuent xá mod ndlya's Diox lyá' mèn loo con' ryes. Tataa mod gác mèn co' inacte mèn nación Israel mèn che'npe' Diox por cón che'n Xpii Natú'. Ndxòo lezo' Diox

ñèe Diox mèna. No mdyal Diox ngòo mèna loo cón che'n Diox tac ndxela's mèna loo cón che'n Jesucrist, ¿lé'?

<sup>17</sup> Per com le' daa nac thib mbi' co' ndxela's loo Crist Jesús, ¿lé'?, ndyaquen huenque' ndxàca loon ndyac lezon por ngue tee xo'f zin'en thib zin' co' nac cón che'n Diox. <sup>18</sup> Tac daa ndlique' ryes ndyoodizen ante cón che'n con' co' ndli Crist loo mèn co' inacte mèn nación Israel por cón chenen. Tataa ndlin par tyubdi's mèn loo Diox, mèn co' inacte mèn nación Israel. No ndxàcque' con' co' ngue tee lin loo mèna xalte nac di's co' ngon yalbàn no con' co' ndlin. <sup>19</sup> Mèna ngola'sque' loo Crist por cón che'n yalguzye' co' ngòc loo mèn no por cón che'n ryethe con' co' nzo la's nii Xpii Natú' no co' nzo la's ya' Xpii Natú'. Tataa mod mtaan zin' co' mxo'f zin' Diox loon co' nac nque tee gon yalbàn cón che'n di's ndac che'n Crist co' ndlu' xá mod lyá' mèn loo con' ryes por cón che'n Crist. Mtlon, mque tee'en par ned ciuda Jerusalén. No ngua que tee'en le'n rye yèezya' co' nac par ned làaz mèn ilírico. <sup>20</sup> Tataa mod mnibe'en loo lezon no mdoo lezon ngua lon yalbàn cón che'n di's ndac co' ndlu' xá mod lyá' mèn loo con' ryes loo mèn co' tarte gòn cón che'n Crist ryethe lugar tac imblyasten ngon yalbàn loo mèn co'te' ngua lole' tedib mèn yalbàn. <sup>21</sup> Ndxé'leque', ngòca xal ndub di's loo libr co' nac xti's Diox co' gunii Sayi, di's co' mbez:

Loo mèn co' inacte mèn nación Israel co' tarte yath yèn cón che'n di's ndac, co' nac cón che'n Jesucrist, mèna hui' loo Jesucrist. No gòn mèna di's no ta' mèna cuent cón che'n Jesucrist, mèn co' thidtene tarte gòn no co' tarte ta' cuent cón che'n Jesucrist.

*Pab ngue li xtùuz ya too naa Pab mèn co' ndxela's loo cón che'n Tad Jesucrist, mèn co' ngo ban ciuda Rom.*

<sup>22</sup> Por ngua que tee'en huax lugar, yende mod nda'i lugar loon par ngal neen máa gu' par nedrè'. <sup>23</sup> Per nalle' ya ngolole' mxo'f zin'en zin' co' mxo'f zin'en co'te' nzon ndxè'. Ndxàcle' huax lín' ndryo' ndlyen' lezon ndlyazen go non gu' par nedrè'. <sup>24</sup> Por cona, co'se' ryo'en trè', ndan par ned làaz mèn nación Españ, sangriiden par gal neen máa gu' tac ndub quee lezon ñeen máa gu'. Le' sya, co'se' ngolo mdan gust lezon guneen máa gu' par nedrè', sya, ndub quee lezon lyath no gu' daa con ndxep con' co' naquin daa co' nde che loon par ned ga que tee'en. <sup>25</sup> No nalle' ndoo be'le' gan par ciuda Jerusalén. No sanghuen tmi co' mthop mèn yèezya' che'n làaz mèn macedon no mèn yèezya' che'n làaz mèn acay, mèn co' mdoo lezo' lyath no hues xtàa co' nac mèn co' ndxela's co' nde che con' loo, mèn co' nac mèn che'n ciuda Jerusalén. <sup>26</sup> Tac mèn yèezya' che'n làaz mèn macedon no mèn yèezya' che'n làaz mèn acay co' ndxela's mbli xtùuz thib con' ndac par mthop mèna tmi par ta' gòn mèna tmia loo prob mèn co' ndxàc hues xtàa mèna por cón che'n Crist co' ndyac yaltii, mèn co' nzo ban ciuda Jerusalén. <sup>27</sup> Mxac mèn yèezya' che'n làaz mèn macedon no mèn yèezya' che'n làaz mèn acay huenque' nac co' mbli mèna. Tac mèna nden' ndxàalque' lyath no mèna mèn co' nac mèn nación Israel co' ndxela's loo cón che'n Jesucrist, mèn co' nzo ban ciuda Jerusalén. Tataa mden' mèna tac por cón che'n mèn nación Israel co' ndxela's ngòc con' ndac che'n Diox loo mèn co' inacte mèn nación Israel. Tac texal mbli mèn co' ndxela's, mèn co' nac mèn nación Israel, par mblyath no mèna mèn co' inacte mèn nación Israel con cón che'n Diox co' non mèn nación Israel no co' nda' mèn nación Israel cuent, por cona, ndxàalque' lyath no mèn co' inacte mèn nación Israel mèn co' nac mèn nación Israel con con' co' nac che'npe' mèn co' inacte mèn nación Israel co'se' nde che con' loo mèn co' ndxela's, mèn co' nac mèn nación Israel. <sup>28</sup> Por cona, co'se' yilo tan tmia loo mèn nación Israel co' ndxela's, co' nzo ban ciuda Jerusalén, tmi co' mthop mèn yèezya' che'n làaz mèn macedon no mèn yèezya' che'n làaz mèn acay co' ndxela's loo cón che'n Jesucrist, sya, non mèn nación Israela, licque' ngola's gu', ne, gu' co' nac mèn co' inacte mèn nación Israel loo Jesucrist por cón che'n mèn nación Israel. Syare', tenen ned par ñeen máa gu'. Yiloa, tenen ned ndan par ned le'n yèezya' che'n làaz mèn españ. <sup>29</sup> Ngobe'en loo lezon, co'se' gal neen máa gu' par nedrè', anze'f thib con' ndac li Diox loon par gon yalbàn cón che'n di's ndac che'n Crist loo gu'.

<sup>30</sup> Lyazen tedib con', ne, mèn huesen por cón che'n Crist, gu' co' nac mèn gulàaz mèn ciuda Rom, ña'ben loo gu' por lèe che'n Tad Jesucrist, no por mod co' ndli Xpii Natú' par nque' lezo' na' Diox no nque' lezo' na' ñèe na' hues xtàa na', ña'ben loo gu' thidte queltàa no gu' daa loo zin' co' mxo'f zin' no gu' daa, loo zin' co' mxo'f zin' Diox loon loo cón che'n di's ndac che'n Crist, ned nque tee'en par cuez gu' Diox por daa, ne. <sup>31</sup> Bna'b gu' loo Diox le' Diox quenap daa loo mèn co' tarte yila's co' nac mèn naad no mèn nguud, mèn co' nac mèn yèezya' che'n làaz mèn jude. No tolo gurez gu' Diox le' mèn co' ndxela's co' nzo ban ciuda Jerusalén, tyal mènà càaya' mènà tmi co' mtel' mènà loon con huen di's no con huen cuent <sup>32</sup> par tataa mod chele' Diox nee lezo', con huen di's no con huen cuent càaya' mènà tmi. Chele' mèn tataa mcàaya' tmia, le' sya, huen nzo lezon gal neen máa gu' par nedrè', no axta nagàl yo lezon gal neen máa gu'. <sup>33</sup> No ndlyazen le' Diox, co' ntu' no co' ntàl lezo' mèn, no Diox co' ndli par nagàl yo lezo' mèn, Diox li cue ban gu' rye nda gu' no rye ndye'th gu' làth xtàa gu'. Taandxè' gàca loo gu', ey. Thìba con' ndxè'.

## 16

### *Pab nque nii Diox loo mèn loo cart ndxè'.*

<sup>1</sup> Le' tediba na, ngue tel'en di's no ngue tan'en di's loo cart ndxè' loo gu', bli gu' cas no nabe'ste go no gu' xa'got co' lèe Febe co' ndxàc fta'n na' por cón che'n Crist. Tac xa'gota nxo'f zin' zin' le'n templ co' ndub le'n yèez Cencr. <sup>2</sup> Fta' gu' lugar yòo guna' làth gu' no nabe'ste yo no gu' guna' por lèe che'n Tad Crist. Bli gu' con' ndxè' xalque' ndxàal li mèn co' ndxàc hues xtàa por cón che'n Crist. No blyath no gu' guna' loo chol con' co' nde che loo guna'. Tac guna'a nde teele' ndlyath no huax mèn co' nde che con' loo. No ndlyath no guna' yub daa huax vez.

<sup>3</sup> Gunii gu' Diox loo Priscil co' nac sa'l Aquil, no gunii gu' Diox loo Aquil. Ryop sa'l xa'a thidte mxo'f zin' no daa loo zin' che'n Crist Jesús. <sup>4</sup> Ryop sa'l xa' mda' guth yalnaban xa' par gath xa' par mtelá' xa' daa co'se' mblyá' mblyá' nguth mèn daa. Por cona, indxathlasten mbezen Diox quix gu' loo xa'. No iante daa mbez Diox quix gu' loo xa'. Ndxè'leque', ryete mèn hues na' co' ndxela's loo Diox co' inacte mèn nación Israel, ryete liz Diox le'n ryete yèezya' che'n làaz mènà, ne, mbez Diox quix gu' loo xa' por mtelá' ryop sa'l xa' daa loo con' ryes. <sup>5</sup> Ndlyazen ne, gunii gu' Diox loo rye mèn co' ndxàc hues xtàa na' por cón che'n Crist, mèn co' nqueltàa liz ryop sa'l Priscil no Aquil. Gunii gu' Diox loo amiu daa, Epenet, co' anze'f nque' lezon ñèen. Epenet nac thib mbi' co' nerleque' ngola's loo cón che'n Crist co' nac mèn yèezya' che'n làaz mèn acay. <sup>6</sup> Gunii gu' Diox loo Mari co' más ndli nxo'f zin' zin' cón che'n Crist làth gu', ne. <sup>7</sup> Gunii gu' Diox loo Andron no loo Jun co' nac mèn gulàaz daa. Ryop mbi'a thidte mque' lezi'f con daa. Inga'ste ryop mbi'a làth myen' co' mtel' Crist co' ndxe' di's che'n Crist loo mèn. Ryop mbi'a nac xa' co' ngola's loo Crist no loo cón che'n Crist ndoore yilazen loo Crist.

<sup>8</sup> Ndlyazen ne, gunii gu' Diox loo Ampl, co' nac amiu daa, co' anze'f nque' lezon ñèen loo cón che'n Tad Crist. <sup>9</sup> Gunii gu' Diox loo Urban co' ndlyath no nu' loo zin' co' nxo'f zin' nu' loo Crist Jesús. Gunii gu' Diox loo Estac co' nque' lezon ñèen, ne. <sup>10</sup> Gunii gu' Diox loo Apel. Apel nde teele' ndlu' thib mod no tedib mod xal, lìcque', ndxela's Apel loo Crist no loo cón che'n Crist. No ndlyazen gunii gu' Diox loo rye mèn guliz Aristob. <sup>11</sup> Gunii gu' Diox loo Herodión co' nac mèn gulàaz daa. Gunii gu' Diox loo mèn guliz Narcis co' ndxela'sque' loo Tad Crist, ne. <sup>12</sup> Gunii gu' Diox loo Trifen no loo Trifos tac ryop guna'a thidteneque' nxo'f zin' zin' cón che'n Tad Crist. Gunii gu' Diox loo Persid, co' ndxàc fta'n na' por cón che'n Crist, co' anze'f nque' lezon ñèen. Tac guna'a anze'f mbli zin' cón che'n Tad Crist, ne. <sup>13</sup> Gunii gu' Diox loo Ruf co' ndxela's, co' inga'ste loo cón che'n Tad Crist làth mèn no loo xna' Ruf co' ndlin cuent nac xal xnan. <sup>14</sup> Gunii gu' Diox loo Asincret no loo Flegont no loo Herm no loo Patrob no loo Hermes no loo taamas hues xtàa na' por cón che'n Crist co' nzo no rye mènà. <sup>15</sup> Ndlyazen nii gu' Diox, ne, loo Filog no loo thib xa'got co' lèe Jul no loo Nere' no loo fta'n Nere' no loo xa'got co' lèe Olimp no loo ryete taamas mèn co' ndxàc hues na' co' nzo làth mènà, ne.

<sup>16</sup>Gunii gu' Diox loo thib xtàa gu' no loo tedib xtàa gu' xalque' nac mod co' ngue's ncàa gu' yen xtàa gu'. Ryete mèn co' nqueltàa loo cón che'n Crist co'te' nzon ndxè' ngue nii Diox loo gu'.

<sup>17</sup>Na'ben loo gu', mèn huesen por cón che'n Crist, hui' gu' no bla's gu' loo mèn co' ndli par ndxàc chop ned mèn loo hues xtàa mèn. Ndxàc mèna mèn co' nca' no mèn co' ntau' loo xtàa mèn loo cón che'n Crist. Con' co' ndli mèna ntau' no nca' loo di's ndac co' nac co' mté'th gu' co' ndlu' mod co' nzo ban gu'. Más huen, gro' xà' gu' loo mèna. <sup>18</sup>Tac ryete mèna indlide sirv loo Tad Jesucrist na'. Ndxè'leque', ndli mèna sirv ante loo con' ndryo' ndlyen' lezo'pe' mèna. Nado' di's nado' cuent ndli mèna par yòo lezo' mèn co' nac mèn naxèn no mèn nachol' par tataa mod quedii mèna prob mèn co' nac mèn naxèn no mèn nachol'.

<sup>19</sup>Ndxath ndxèn loo ryete mèn xá mod ndyubdi's gu' loo Tad. Por cona, ndyac lezon ñèn gu'. No sate más ndlyazen tyub xnii yéc gu' no tyub xnii lezo' gu' no altant cue gu' par li gu' con' co' nac con' ndac. Ndxè'leque', indlyasten gác gu' mèn co' ndli con' ye'rsin'. <sup>20</sup>Diox co' ntu' ntàl lezo' mèn no co' ndli par nagàl yo lezo' mèn, Diox a tolo ton' rye con' ye'rsin' co' ngue li Mebizya làth gu' par ne'líde Mebizya gan gác gu' chop ned mèn loo con' co' ngue niin loo gu' ndxè'. Lyazen le' Tad Jesucrist na' tolo li anggàc con' ndac loo gu'.

<sup>21</sup>Timote co' anze'f ndlyath no daa loo zin' co' nxo'f zin'en loo Crist ngue nii Diox loo gu'. Lus no Jasón no Sosipat, ne, co' nac mèn gulàaz daa ngue nii Diox loo gu'.

<sup>22</sup>Daa, co' lèe Ters, co' nac secretar loo Pab, co' mque' ye's co' nac cart ndxè' loo gu', daa ngue nii Diox loo gu' loo cón che'n Tad Crist, ne.

<sup>23</sup>Ngue nii mbi' co' lèe Gay Diox loo gu'. Liz Gay nac posad daa nalle'. Liz Gay nqueltàa mèn co' ndxela's co'se' mbez mèn Diox. Erast, co' nac tesorer che'n mèn ciuda Rom, ngue nii Diox loo gu', ne. Mbi' co' lèe Cuart, co' nac hues na' por lèe Tad Crist, ngue nii Diox loo gu', ne.

<sup>24</sup>Lyazen le' Tad Jesucrist tolo li par anggàc con' ndac loo gu'. Taandxè' gàca loo gu', ndèe gu'.

*Pab ngue nii lult di's co' nac di's natú' cón che'n Diox loo mèn.*

<sup>25</sup>Tolo ndlyazen gab na' loo hues xtàa na': Diox roo Diox xèn nac Diox, Diox co' ndli par tolo cue nèe gu' loo cón che'n Crist por cón che'n di's ndac co' ngon yalbàn no cón che'n Crist co' ndlu'en loo gu'. Con' co' nac cón che'n Crist co' ndlu'en loo gu' ndxè' thidte nac no thidte ndyee xalque' mbli Diox par mblo xo'f Diox con' co' ngo casloo loo Diox axta co'se' mtlo mblec Diox no mxèn' Diox izlyo'. <sup>26</sup>Per nalle' ryethe con' mbli Diox póla ndryo xo'f loo mèn por cón che'n libr co' nac xti's Diox co' ngòc libr co' mque' mèn co' mde'th di's co' ndxab Diox ye's. Mque' mèn co' mde'th di's ye's xalque' ngòc di's co' mnibe' Diox, Diox co' nac Diox thidtene. Ryethe con' co' ngo casloo loo Diox póla cón che'n di's ndac, le'i ndryo xo'f loo mèn rye nación dib athu loo izlyo' le'n tiemp ndxè' par yila's mèn cón che'n di's ndac no tyubdi's mèn loo Diox xal mbez di's ndac.

<sup>27</sup>Lyazen le' loo Diox co' nac thidte Diox, no Diox co' ndxácpe' alux con', loo Diox gab mèn le' Diox nac Diox roo Diox xèn thidtene por cón che'n Tad Jesucrist. Taandxè' gàca, ndèe gu'.



## Ner Cart Co' Mque' Pab Ye's Loo Mèn Co' Nqueltàa Loo Cón Che'n Diox Le'n Ciuda Corint

*Trè' ndlu' le' Pab ngue que' ye's loo mèn co' nqueltàa loo cón che'n Diox le'n ciuda Corint.*

<sup>1</sup> Daa, Pab, nac thib mbi' co' mblo lèe Diox no co' mcui Diox par gac daa thib mbi' co' hue' di's che'n Jesucrist. Mtel' Diox daa xal gunee lezo' Diox. Ryop nu' Sost co' ndxác hues na' por cón che'n Crist, nu' ngue nii Diox loo gu' par nedrè' loo ye's co' mzin loo gu' ndxè'. <sup>2</sup> Ngue que'en ye's ndxè' loo gu', gu' co' thidte nqueltàa par mbez gu' Diox, gu' co' nzo ban le'n ciuda Corint. Ngue niin loo gu': Gu' nac mèn co' nac che'npe' Diox por thidte nqueltàa gu' loo Crist Jesús. Por cón che'n Crist, con'a ngurez Diox gu' no mblo lèe Diox gu' le' gu' ante cue ban loo Diox por ngòc gu' mèn co' ngro xà'pe' loo ryethe con' co' nac cón che'n xab izlyo' con ryete mèn co' nzo ban dib athu loo izlyo', mèn co' mbez Diox por lèe che'n Tad Jesucrist na'. Tad Jesucrist nac Tad na'. No nac Tad Jesucrist Tad mèn, ne. <sup>3</sup> Ndlyazen le' Diox xud na' no Tad Jesucrist na' tolo li anggàc con' ndac loo gu'. Ndlyazen, ne, angli Diox no Tad Jesucrist na' le' gu' nagàl yo lezo' loo Diox no cue ban gu' rye nda gu' no rye ndye'th gu' làth xtàa gu'.

*Trè' ndlu' cón che'n con' ndac co' ndxác loo mèn por cón che'n Jesucrist.*

<sup>4</sup> Toloque' mbezen loo Diox: Diox quix U', Diox, por cón che'n gu' tac Diox ndli angndxác con' ndac loo gu'. Con' ndac co' ndxác loo gu'a, ndxàca por cón che'n Crist Jesús. <sup>5</sup> Diox mbli ley' gu' axta plóthe tac thidte nac gu' con Jesucrist par non gu' no nanee gu' con' co' nac con' licpe' no par ndxác gu' lu' gu' loo mèn no ta' gu' cuent cón che'n co' nac licpe' loo mèn. <sup>6</sup> Cona, ngue niin loo gu' loo ye's ndxè': Di's co' nde teele' nda' mèn cuent loo gu' no nde'th mèn di'sa loo gu' cón che'n Jesucrist, ngola's gu' di'sa por mbli gu' cuent licpe' nac di'sa. <sup>7</sup> No por ngola'spe' gu' loo Crist, yende chó con' ndxác falt loo gu' cón che'n con' co' angngro' lezo' Diox angndli Diox loo mèn co' ndxela's láth nzi bed gu' no láth nzi quee lezo' gu' zin huiz no gac huiz co'se' yí'th xi Tad Jesucrist na'. <sup>8</sup> Tad Jesucrist na' tolo li nèe gu' loo cón che'n Tad Jesucrist axta co'se' gac huiz yú' loo Tad Jesucrist na' loo mèn par gaca loo gu' yende chó mèn quexù' que' fals loo gu' huiza. <sup>9</sup> Diox lique' ryethe con' mcàbgòn Diox li Diox loo mèn. Por cona, yub Diox mblo lèe gu' no mcui Diox gu' par thidte gac che'n gu' ryethe co' nac che'n Tad Jesucrist na' co' nac xgan'pe' Diox.

*Mèn co' nqueltàa loo cón che'n Diox ngòc chop ned mèn.*

<sup>10</sup> Per nalle' ña'ben loo gu' no co'xen loo gu', mèn huesen por lèe Tad Jesucrist na': Ndlyazen thidte gac gu', no thidte li gu' xtúuz, no thidte yòo lezo' gu' par ten' gu' cón che'n Tad Jesucrist na'. No indlyasten gac rol gu' loo cón che'n Tad Jesucrist na'. Ndxè'leque', ndlyazen thidte queltàa gu' no thidte gac yéc gu' no thidte gac lezo' gu' par ten' gu' thidte con' le'n lezo' gu' loo cón che'n Tad Jesucrist na'. <sup>11</sup> Taandxè' ngue niin loo gu', mèn huesen, tac mèn co' nac mèn guliz Cloé mda' cuent loon le' gu' ngyoo làth xtàa gu'. <sup>12</sup> Di's co' mda' mèn guliz Cloé cuent loon cón che'n gu' nac le' gu' mbez loo xtàa gu': Thib ned gu' nda' lad che'n Pab, co' nac daa. Tedib ned gu' na, mbez loo xtàa gu' le' gu' nda' lad che'n Apol. Tedib ned gu' na, mbez loo xtàa gu' le' gu' nda' lad che'n Pedr. Tedib ned gu' na, mbez loo xtàa gu' le' gu' nda' lad che'n Crist. <sup>13</sup> ¿Xá mod nac cona? ¿Ché' ngue li gu' cuent le' Crist ñibe' loo ndxèpte gu' no maste, cà'? Yende xaa. Yende mod gaca tataa loo Crist, ey. ¿Ché' ngue li gu' cuent le' daa, co' nac Pab, mquée loo cruz por cón che'n gu', cà'? Yende mod gaca tataa, ne. O ¿ché' ngue li gu' cuent ngòc bautizar gu' por lèe daa, co' nac Pab, cà'? Ne' ne' yen mod gaca tataa, ne. ¡Máa yob yéc gu' na, mèn Corint! <sup>14</sup> Mbezen Diox quix U', Diox, loo Diox le' daa ne'nglide bautizar nec thib gu'. Ante mblin bautizar chopte mèn no maste, co' nac Crisp no Gay. <sup>15</sup> No por cona,

nec thib gu' ñee loon le' gu' ngòc bautizar por daa, co' nac Pab. <sup>16</sup> Ante nte' lezon le' daa mbli bautizar mèn guliz Estef, ne. Per ne'tyede lezon ché' nzore' chó más mèn co' mbli bautizar. <sup>17</sup> Ne'ntel'te Crist daa par mxo'f zin'en zin' par lin bautizar mèn. Ndxé'leque', mtel' Crist daa par gon yalbàn cón che'n di's ndac co' nac che'n Diox par lyá' mèn loo con' ryes thidtene. Per ne'ndaden cuent cón che'n di's ndac xal nac di's co' nde'f di's ndxác tìn' mèn par ne'gabte mèn anxle' nac ryethe con' no yende cón ntac ryethe con' co' ngòc loo Crist co'se' mque' mèn Crist loo cruz.

*Crist ndxàp ryethe con' roo con' xèn co' nac che'npe' yub Diox la's nii Crist no la's ya' Crist. No ndxác Crist ryethe con' co' ndxác Diox.*

<sup>18</sup> Per mèn co' nau' yéc no mèn co' nau' loo co' nac leque mèn co' nzi tee lux loo Diox, co' nee di's, mèn co' tith ryo xà' loo cón che'n Diox par tyactii mèn thidtene yilóa, mèn mbez le' mèn co' ngo yalbàn cón che'n xá mod no cón che'n chonon mque' mèn Crist loo cruz nquée mbii yéc. Per loo mèn co' mblyá'le' loo con' ryes, co' nee di's nac na', loo mèn cón che'n yalbàna nac co' nda' cuent cón che'n con' roo con' xèn co' nzo la's nii Diox no co' nzo la's ya' Diox. <sup>19</sup> Tac di's co' ndub loo libr co' nac xti's Diox mbez:

Daa li le' mèn co' nde'f di's ndxác yende cón ntac co' ndxác mèn. No lin yende cón ntac xtùuz mèn co' ndli mèn xtùuz.

<sup>20</sup> ¿Chó sirv ndli mbez mèn co' ndxác, no mèn co' nac maistr, no mèn co' noo noo ncàa cuent cón che'n chol di's co' nac che'n izlyo' ndxè', à'? Pues, rye co' ndxác mèn che'n izlyo' ndxè', Diox mbli ngòc rye co' ndxác mèn xal con' co' yende chó juis. No mbli Diox ngòc mèn xal mèn co' nquée mbii yéc loo cón che'n Diox. <sup>21</sup> Diox co' thidte ndxác nanee cón ndli Diox, Diox mbli no ne'nda'de Diox lugar le' mèn che'n izlyo' ta' cuent cón che'n Diox ante por con' co' ngo mèn cuent ndxác mèn no mté'th mèn co' nac con' che'npe' izlyo' ndxè'. Más quee lezo' Diox ntelá' Diox mèn co' ngòp yalxla's loo Diox loo con' ryes ante por mbìn mèn cón che'n di's ndac che'n Diox, mastale' mden' mèn co' nde'f di's ndxác cón che'n izlyo' ndxè' le' mèn co' ngo yalbàn cón che'n di's ndac che'n Crist nquée mbii yéc co'se' ngo mèn yalbàn.

<sup>22</sup> Naneeque' na' no nda'que' na' cuent le' mèn nación Israel ndlya's a la fuerz li nu' chol yalguzye' par alithe hui' mèn ndxác yalguzye' loo mèn. No naneeque' na' no nda'que' na' cuent le' mèn nación Grieg na, ndlya'sque' mèn gòn mèn no tolo ñee mèn cón che'n chol con' cub co' nac co' ndli mèn xtùuz par más tolo gác mèn nación Grieg. <sup>23</sup> Per ndxe'leque', nu' ngo yalbàn cón che'n di's ndac cón che'n xá mod no cón che'n chonon mque' mèn Crist loo cruz. No co'se' ndxòn mèn nación Israel cón che'n di's ndac ndxè', ale nden' mèn ngòc nguàal con' nac di'sa ndyac mèn. Le' loo mèn co' inacte mèn nación Israel na, ndyac mèn le' cón che'n Crist co' ndxo yalbàn loo mèn nac xal di's co' ndyoodi's thib mèn co' nquée mbii yéc. <sup>24</sup> Per loo mèn co' mbrez Diox no co' mblec Diox no co' mblo lèe Diox par yila's mèn loo Diox por cón che'n Jesucrist, que nac mèn mèn nación Israel, que nac mèn mèn co' inacte mèn nación Israel, loo mèn Crist nac xa' co' ñibe'pe' loo ryethe con' por cón che'n con' roo con' xèn co' nzo la's nii Diox no co' nzo la's ya' Diox. No mbli Diox thidtene ndxác Crist ryethe con' co' ndxácpe' Diox.

<sup>25</sup> Tac ryethe con' co' mbez mèn nac cón che'n Diox co' mxo'f zin' Diox loo Crist, mèn co' nziri' loo izlyo' ndli cuent yende chó juis con'a. Per ndxe'leque', zin' co' mxo'f zin' Diox loo Crist nac co' ndlu' loo mèn le' Diox axta arid ndxác tìn'. No co'se' ndli zin' Diox thib con' co' ñaade li zin' Diox, ncàba thib con' más con' roo con' xèn leque chol con' co' ndxác chol mèn li mèn. <sup>26</sup> Per hui' gu' nexa, mèn huesen por cón che'n Crist: Fta' gu' cuent co' huenleque' le' Diox ngurez gu' no mblo xà'le' Diox gu' mastale' ndxepete gu' nac mèn co' ndxác xal ndli mèn co' nac che'n izlyo' ndxè' cuent ndxác mèn. Ne' ne' inac gu' mèn co' ndxàp huax con' roo con' xèn la's nii gu' no la's ya' gu'. Ne' ne' inac gu' mèn co' nde bin co' nxyo'f lèe nxyo'f xti's làth gu'. <sup>27</sup> Ndxé'leque', Diox ngue cui mèn co' nac mèn lad yox, co' nac mèn prob, co' nac mèn co' thidtene yende cón mté'th co'se' ngua mèn scuel, par yò mèn loo cón che'n Diox. Le' sya, tataa mod tethon Diox mèn che'n izlyo' co' nde'f di's ndxác. No ngue cui Diox mèn co' ñaade nzo fuerz par tethon Diox

mèn che'n izlyo' co' ndli cuent anze'f ntac mèn tac ndxàp mèn fuerz. <sup>28</sup> Diox ngue cui mèn co' yende cón ntac, mèn co' nau' loo nau' yéc no mèn co' ale leque xtàa mèn mtè'b par xo'f zin' Diox thib zin' loo mèn par li Diox le' mèn co' nau' loo nau' yéca tethon mèn co' nde'f di's ndxác. No gác mèn co' nde'f di's ndxác mèn co' yende cón ntac loo xtàa mèn. <sup>29</sup> Tataa ngue li Diox loo mèn par nec thib mèn ne'tye'ste loo Diox co'se' tub rez Diox cón che'n mèn. <sup>30</sup> Yub Diox mbli thidte ngòc gu' con Crist Jesús. Por con' co' mbli Diox loo Crist Jesús, nac Crist Jesús xa' co' ndlu' loo na' cón che'n co' nac lìcpe' yalndxác che'n Diox. Por con' co' mbli Diox, nac Crist Jesús xa' co' mteli na' no co' mtembi na' par nac na' mèn nali no nac na' mèn nambi loo Diox. No por con' mbli Diox, nac Crist Jesús xa' co' mblo' xà' na' loo cón che'n xab izlyo' par nac na' mèn che'npe' Diox. No mbli Diox nac Crist Jesús xa' co' mdix cón che'n xquin na' no xtol na' par tataa mod mbli Crist Jesús loo na' ne'quexù'de Diox na' por cón che'n xquin na' no xtol na'. <sup>31</sup> Tataa mbli Diox no Tad Jesucrist na' loo na' par ngòca xal ndub di's loo libr co' nac xti's Diox co' mbez:

Chele' chol mèn lya's ta' gust lezo' mèn co'se' tyoodi's mèn cón che'n chol con', más huen xexte gác mèn cón che'npe' mèn. Más huen ta' mèn gust lezo' mèn cón che'n con' roo con' xèn co' mbli no Diox mèn.

## 2

### *Pab ngue go yalbàn cón che'n Crist co' mqueé loo cruz.*

<sup>1</sup> Per ndxe'leque', mèn huesen por cón che'n Crist, co'se' mbalen loo gu' ner vez, no co'se' mdoodiz non gu', no co'se' mblon yalbàn loo gu', no co'se' mdethen cón che'n Diox loo gu', ne'ndoodisten gáp gáp di's loo gu'. Ne' ne' ngòn làth gu' xal mèn co' nde'f di's arid ndxác. <sup>2</sup> Co'se' ngòn làth gu'a, ne'ndooode lezon nglu'en daa loo gu' xal thib mèn co' anze'f ndxác cón che'n chol con'. Ndxé'leque', mdoo lezon mblu'en loo gu' ante cón che'n Jesucrist co' nac di's cón che'n xá mod no cón che'n chonon nguth yub Jesucrist loo cruz. <sup>3</sup> Co'se' ngòn làth gu', nonque' gu' no naneeque' gu' ngòc daa mèn co' ne'ngode valor loo. Ngo no lezon no ale mxi'th daa co'se' mdoon loo gu'. <sup>4</sup> Ne' ne' ndoodizen, ne' ne' ngon yalbàn loo gu' con di's xal ndyoodi's mèn co' ndli cuent axta arid ndxác par mdub yéc gu' no par ngòc yéc gu' loo cón che'n Crist. Ndxé'leque', Diox mblyath no daa par mbuàal Xpii Natú' yéc gu' no lezo' gu' par nguaa'd di'sa loo gu'. No ngola's gu' di's ndac co' mblon yalbàn loo gu'. <sup>5</sup> Tataa mblin par gàca loo gu' le' mod co' ndxela's gu' loo Diox por cón che'n Jesucrist ngòc loo gu' ante por cón che'n con' roo con' xèn che'n Diox. Mod co' ndxela's gu' loo Diox por cón che'n Jesucrist ne'ngàcte loo gu' por cón che'n di's co' mdoodi's mèn co' nde'f di's ndxác loo izlyo' ndxè'.

### *Diox mbli' cón nac cón che'n Diox por cón che'n Xpii Natú' che'n Diox.*

<sup>6</sup> Per mèn co' huen huen ndxòn cón che'n Crist no co' huen huen mté'th cón che'n Crist par ndyubdi'sque' mèn loo cón che'n Crist co' ndxela's mèn, loo mèn ndyoodi's nu' cón che'n Crist xalque' ndlyath no Crist nu' par ndxác nu'. Per inacte con' co' ndxác nu' ndxè' xal nac con' co' ndxác mèn co' alithe naban le'n tiemp ndxè'. Ne' ne' inaca xal nac yalndxác che'n mèn co' ñibe' loo xtàa mèn loo izlyo' ndxè'. Per cón che'n mèn co' ñibe' loo xtàa mèn loo izlyo' ndxè', mèn lyux no lith no mèn loo yalndxác co' ndxác mèn. <sup>7</sup> Ndxé'leque', di's co' ndyoodi's nu' nac cón che'n yalndxác che'n Diox. Con che'n yalndxác co' ndyoodi's nu' ndxè', le'i be' nzo casloo loo huax mèn axta nalle'. Le'i ngo casloo loo rye mèn ndoore' yi'th Tad Jesucrist loo izlyo'. Cón che'n yalndxác che'n Diox ndxè', Diox mxo'f zin'a loo nu' xal mdoo lezo' Diox par gác yalndxác ndxè' thib con' roo no thib con' xèn loo ryete na' co' ndxela's thidtene. <sup>8</sup> Cón che'n yalndxác co' ngo casloo ndxè', casque' nec thib mèn co' ñibe' loo xtàa mèn loo izlyo' tiemp ndxè', yende chó mèn nanee no nda' mèn cuent cón che'n yalndxáca. Tac chele' mèn ngnon no ngnée mèn cón che'n xá mod susque' ndxác Diox, ngobe'en ne'nque'de mèn Tad Crist, co' ñibe' loo alux con' no co' nquée xni' tín', loo cruz. <sup>9</sup> Per ndxe'leque', ndub di's loo libr co' nac xti's Diox co' mbez:

Cón che'n co' ndxab di's ndxè' tarte ryo xo'f loo mèn. Ne' ne' tar gòn mèn cón che'n di's ndxè'. Ne' ne' tar li mèn xtùuz cón che'n di's ndxè'. Per ndxe'leque', con' ndxè' nda' cuent cón che'n ryethe con' roo con' xèn co' mbli nab Diox par gàca loo mèn, mèn co' nque' lezo' Diox.

<sup>10</sup> Per Diox mblo xo'f con' ndxè' loo na' por cón che'n Xpii Natú'. Tac Xpii Natú' ndla's ayéc axàn' loo rye loothe con'. Xpii Natú' nteche ntexyath ryethe con' co' ndli Diox xtùuz le'n lezo' Diox, ne.

<sup>11</sup> Tac ¿chó nac thib mèn co' nzo làth xtàa mèn co' non cón che'n xtùuz co' ndli tedib mèn, à? Yende chó mèn nona, ¿lé? Ndxè'leque', leque mèn co' ngue li xtùuz non cón che'n co' ngue li mèn xtùuz. Lomisque' mod ne, yende chó mèn non cón che'n con' co' ndli Diox xtùuz. Ndxè'leque', ante Xpii Natú' che'npe' Diox non cón che'n con' ndli Diox xtùuz. <sup>12</sup> Co'se' ngola's na' loo Tad Jesucrist, ne'ntolode mnibe' chol xpii che'n izlyo' loo na'. Ndxè'leque', mtlo mnibe' Xpii Natú' co' ngro' loo Diox co' ngulàa loo na' par ta' na' cuent no par non na' cón che'n con' ndac co' angndli Diox loo na'. <sup>13</sup> Cón che'n con' ndac ndxè' co' angmbli Diox loo na' ndyoodi's nu'. Per indyoodi'ste nu' cón che'n con' ndac ndxè' xal mèn co' ñaaleque' loo ndxác. Ndxè'leque', nu' ndlu' loo mèn xalque' nac xley' co' ndlu' Xpii Natú' loo nu', co' nee di's, ndlu' nu' ley' co' nac xley' che'n Crist loo mèn co' ndxònque' cón che'n Crist no mèn co' mté'thque' cón che'n Crist par ndubdi'sque' mèn loo Crist.

<sup>14</sup> Per mèn co' alithe nzi ban loo cón che'n izlyo' ndxè', mèn indxònte cón che'n con' co' ndlu' Xpii Natú' che'n Diox loo mèn. Mèn nden' le' cón che'n Xpii Natú' nac co' ncàb loo mèn nquée mbii yéc mèn. Cón che'n con'a yende mod ta' mèn cuent cón nee di'sa tac ante loo mèn co' ñibe' Xpii Natú' ndryo xo'f cón che'n Xpii Natú'. <sup>15</sup> Per loo mèn co' ñibe'que' Xpii Natú', Xpii Natú' ndli par leque mèn li xtùuz co' huenleque' no tub rez mèn cón che'n ryethe con'. Per ndxe'leque', mèn co' alithe nzi ban loo cón che'n izlyo' ndxè', yende chó cón che'n mèn par ryal no tub rez mèn cón che'n mèn co' ñibe' Xpii Natú' loo. <sup>16</sup> Loo libr co' nac xti's Diox ndub di's co' mbez: ¿Xá ñaa thib mèn co' nzo loo izlyo' co' ta' cuent no co' non xal nac xtùuz co' ndli Diox xtùuz, à? Yende chó mèn nona, ¿lé? Lomisque' ne, ndub di's loo libr co' nac xti's Diox, ne, co' mbez: ¿Xá ñaa thib mèn co' nzo loo izlyo' co' lu' loo Diox cón che'n con' li Diox, à? Yende xàa. Mastale' tataa ndub di's loo libr co' nac xti's Diox, na' nonque' no naneeque' na' le' na' ndli xtùuz xal ndli Crist xtùuz.

### 3

*Pab ngue ta' cuent cón che'n mèn co' ndlyath no Pab loo zin' che'n Diox.*

<sup>1</sup> Per nalle', mèn huesen por cón che'n Crist, daa ne'ngácte ndoodiz non gu' xal loo mèn co' ñibe'pe' Xpii Natú' loo. Ndxè'leque', be' nquin tyoodiz non gu' xal ndyoodiz non mèn co' be' nzi tee ban loo cón che'n xab izlyo'. No ngue tyoodiz non gu' xal co'se' ndyoodiz non myen' bix cón che'n Crist. <sup>2</sup> Daa ndlu'que' gu' rye con' co' nac cón che'n Crist thib mod co' inagànte no ndlina loo gu' xal mèn co' nda' lech ndxu myen' bix. Tac axta nalle' tarte gác gu' gòn gu' no té'th gu' di's co' nac más nagàn cón che'n Crist xal myen' bix co' tarte gác hua ndac lua' no xít xal mèn gox. <sup>3</sup> Taandxè' ngue cuanen mod tyoodiz non gu' tac gu' be' nzi tee ban xalque' mèn co' alithe nzi tee ban loo cón che'n izlyo' xal ndxuhua nee lezo' mèn. Tac, lìcque', làth gu' nzo mèn co' ndxàn lezo' ñèe xtàa. No taamas mèn ngyoo no xtàa. No taamas mèn nque di's. ¿Ché' inacte gu' xal mèn co' alithe nzi tee ban loo cón che'n xab izlyo' co'se' ndli gu' con'a? No ¿ché' inzi tee bante gu' xal chol mèn, cà? Lìcque' be' taaque' nac gu', ¿lé? <sup>4</sup> Tac nzo ndxep gu' làth gu' co' mbez: Le' nu' nac thib ned mèn che'n Pab. No nzo taandxep gu' làth gu' co' mbez: Le' nu' nac tedib ned mèn che'n Apol. ¿Ché' inden'te gu' le' gu' nacque' xal chol mèn co' alithe nzi tee ban loo cón che'n izlyo' ndxè', cà? Lìcque' nac co' ngue niin loo gu' trè', ¿lé?

<sup>5</sup> ¿Cón nac daa, co' lèe Pab, ndyac gu', à'? No ¿cón nac Apol, à'? Yende cón nac nu', ey. Ndxé'leque', nac nu' mèn co' nxo'f zin' zin' cón che'n Diox. Gu' ngola's loo cón che'n di's ndac co' mblo nu' yalbàn. Ryop nu' Apol mxo'f zin' zin' che'n Diox xalque' mnibe' Diox loo thib thib nu' par li nu' zin'a. <sup>6</sup> Loo cón che'n Crist no loo gu', ante nac daa xal thib mbi' co' ngo bin. Loo cón che'n Crist no loo gu', nac Apol xal thib mbi' co' ndó' bin co' mblon. Per ndxe'leque', làth xtau'a, lìcque', Diox nac xa' co' ndli ndxas ndxàl bina, co' nee di's, nac gu' co' ngola's loo cón che'n Diox por cón che'n Crist. <sup>7</sup> Por cona, niin loo gu': Yende cón ntac daa, ndyaquen, daa co' nac xal mbi' co' mblo bin. Ne' ne' yen cón ntac Apol, ndyac Apol, co' nac xal mbi' co' ndó' bina. Ndxé'leque', ante Diox, co' ndli ndxas ndxàl bina, nac xa' co' nac xa' roo xa' xèn. <sup>8</sup> ¿Ché' tarte ta' gu' cuent lalque' nac mèn co' ngo bin con mèn co' ndó' bin? Mastale', ngo Diox ray mèn xal nac zin' co' ndli thib thib mèn. Tataa mod ndxàca loo ryop nu' Apol. <sup>9</sup> Ryop nu' Apol thidte ngóc nu' par nxo'f zin' nu' zin' co' nac rsin' Diox loo Diox. Le' gu' na, nac loo Diox xal thib le' yòo co'te' nzo'f ña'.

No nac gu' loo Diox xal thib yòobé' co' ngue xítte'f Diox. <sup>10</sup> Texal nac con' ndac co' angndli Diox loon, Diox mbli nac daa xal thib maistr albañil co' ndxác tín'. Loo cón che'n Crist ndlin xal maistr albañil co' ngui'x bé' no co' nsè cimient. Per yiloa, loo cón che'n Crist nde tedib maistr co' ntlo xítte'f ftoo loo cimient. Per ndxe'leque', mèn co' ndli zin' loo cón che'n Crista noo noo ndla's mèn loo zin' co' ndli mènà xalque' ndla's maistr albañil loo mèn co' nxítte'f ftoo par gác ndac mènà par li mènà zin' loo cón che'n Crist. <sup>11</sup> Loo cón che'n xá mod lyá' mèn loo con' ryes, Diox mdoo Jesucrist no mtan' Diox Jesucrist par xo'f zin' Jesucrist zin'a. Cona nee di's yub Jesucrist nac xal thib cimient co'te' xítte'f mèn yòo. No yende chó tedib mèn nzo co' ngác ngác xal cimienta par lyá' mèn loo con' ryes por cón che'n mènà xal nacpe' Jesucrist xal mblon yalbàn loo gu'. <sup>12</sup> Chol mèn co' que tee ban loo zin' co' mxo'f zin' Crist, co' nee di's, par lyá' mèn loo con' ryes, leque mènà ñee xá mod que tee ban mènà, ¿ché' que tee ban ndac mènà loo cón che'n Crist xal co'se' xítte'f mèn thib ftoo con or, no con plat, no con quèe co' huen natoxcua' o ché' ingue tee ban ndacte mèn loo cón che'n Crist? Sya, ndxàc loo mènà xalque' co'se' ndli mèn thib zin' cap co' ilé'de nac, co' nee di's, nac xal co'se' xítte'f mèn thib ftoo con material co' ilé'de ngos xal co'se' ncos mèn cement con yuux yòo no con quèe yòo. <sup>13</sup> Tac zin' co' nxo'f zin' thib thib mèn ryo xo'f loo xnaa co'se' gác huiz co' tub rez Diox ryethe con'. Tac huiza lu' Diox loo mèn xá mod mque tee ban mèn loo cón che'n Crist, ¿ché' mque tee ban ndac mènà o ché' nazab mque tee ban mènà loo cón che'n Crist? Huiza gác huiz co'se' tub rez Diox no li Diox preb loo con' mbli mèn par ñee Diox ñeene' ché' huenque' mbli mènà o ché' nazab mbli mènà. Xal co'se' ngo mèn con' loo quii no loo bèel par ñee mènà ñeene' ¿ché' xeca loo quii no loo bèel o ché' tluxa? <sup>14</sup> Chele' con' co' mbli ndxep mèn loo cón che'n Crist nxec co'se' tub rez Diox zin'a loo mènà xal nxec ftoo co' huen natoxcua', le' sya, loo mènà càb con' ndac xal yalndxax cón che'n con' mbli mènà. <sup>15</sup> Per ndxe'leque', chele' con' co' ndli ndxep mèn loo cón che'n Crist ne'ngro' ndacte co'se' tub rez Diox loo con'a xal ndlyux ndxep con' loo quii, sya, ngóc con' co' mbli mènà con' co' yende con' ntac loo Diox. Lìcque', ante mènà lyá' loo con' ryes xal con' co' mbyan' co' ne'ngyolte no xal con' co' mxec loo quii.

<sup>16</sup> ¿Ché' tarte ñee gu' le' gu' co' ndxela's loo Crist, nac gu' loo Diox xal thib templ co'te' nzo ban Diox? No ¿ché' tarte ñee gu' le' Xpii Natú' che'n Diox nzo ban loo gu', à'? Nonque' gu'i, ¿lé'? <sup>17</sup> Chele' chol mèn cua'n xquin no dol par ryo xà' lezo' taamas mèn làth xtàa mèn co' ndxela's, co' nee di's, nac thib templ che'n Diox, Diox tetii mènà axta plóthe. Tac gu' co' ndxela's loo cón che'n Diox por cón che'n Crist, nac gu' templ che'n Diox. No con'a nac thib con' natú' loo Diox.

<sup>18</sup> Ne'ta'de gu' lugar loo gu' quedii leque gu' gu'. Chele' chol gu' co' nzo làth gu' ngue li xtùuz no nden' gu' le' gu' anze'f ndxác xal nac yalndxác che'n mèn izlyo' ndxè', bnibe' gu' loo mènà lá' mènà co' nac yalndxác che'n mèn izlyo' par tataa mod sate más gác mènà no ta' mènà cuent cón che'n co' nac lìcpe' yalndxác. <sup>19</sup> Mèn co' nden' anze'f ndxác



mèn loo izlyo', loo Diox mènà nac xal mèn co' nquée mbii yéc. Tac loo libr co' nac xti's Diox ndub di's co' mbez:

Mèn co' nden' axta arid ndxác mèn loo izlyo' ndxè', ale ndxe'leque', ndxezan Diox ndxegàa mènà loo mod co' nac mod co' ndxàp mènà par mteti Diox mènà.

<sup>20</sup> Tedib lugar ndub di's loo libr co' nac xti's Diox co' mbez:

Tad Diox naneer ryethe xtùuz mèn co' mbez anze'f ndxác mèn. No naneeguè' Tad Diox yende cón ntac co' ndli mènà xtùuz loo Tad Diox.

<sup>21</sup> Cona, ngue niin loo gu': Nec thib mod no nec tedib mod indxàalte tye's gu' par tyoo nque gu' xís nec thib mèn loo izlyo' ndxè'. Fte' lezo' gu' le' ryethe con' co' nzo loo bé' no co' nziri' loo izlyo' ndxè', Diox mbli le' càba con' ndac loo gu' no gàca che'npe' gu' yiloa,

<sup>22</sup> que naca daa, Pab, que naca Apol, que naca Pedr, que naca izlyo' ndxè', que naca cón che'n yalnaban, que naca cón che'n yalguth, que naca cón che'n con' co' nzo nalle', que naca cón che'n con' co' yi'th nque yiloa. Ryethe con'a gàcque' loo gu' par càba con' ndac loo gu' no gàca che'npe' gu' yiloa. <sup>23</sup> Más de cona, no gu' nac che'npe' Crist. Le' Crist na, nac che'npe' Diox.

#### 4

*Trè' ndlu' cón che'n zin' co' nxo'fzin' mèn co' nac mèn co' mtel' Crist, mèn co' ndxe' di's che'n Crist.*

<sup>1</sup> Cona, ngue niin loo gu': Bli gu' cuent nac nu' loo gu' xal thib mèn co' nxo'f zin' cón che'n Crist tac por con'a mblec Diox nu'. No mxo'f zin' Diox loo nu' par lu' nu' no ngo xo'f nu' ryethe con' co' nac cón che'n Diox co' yub Diox mbli ngo casloo loo mèn póla par ta' gu' cuent cón che'n Crist co' huenleque'. <sup>2</sup> Más de cona, gu' nda'que' cuent le' mèn co' nxo'f zin' zin', naquin tyoo mènà altant loo zin'a. Tataa ndxàca loon loo zin' ndxè'.

<sup>3</sup> Cona, ngue niin loo gu': Part cón chenen, yende chó mport nzo lezon chele' gu' lya's tub rez cón che'n xá mod ndyubdizen loo Diox. Ne' ne' indyóon chele' chol mèn nac zin' lya's tub rez cón chenen, ne. Ne' ne' indub rezen cón chenen loo mèn. <sup>4</sup> Part cón chenen, mastale' ndyaquen le' ryethe con' co' nden'en le'n lezon ingue zib quide loon nec thib con', inacte por conade indxàpten dol. Ndxé'leque', Tad Crist nac xa' co' ngue tub rez cón chenen. <sup>5</sup> Por cona, ne'tub rezte gu' cón che'n chol mèn ndoore' co'se' gac huiz co' yi'th tub rez Tad Crist cón che'n mèn. Huiza, co' xo'f Tad Crist ryethe con' ye'rsin' co' mbli thib thib mèn loo xnaa co' nzo casloo le'n tiemp ndxè'. No lu' Tad Crist loo xnaa ryete con' co' ndoo lezo' mèn li mèn. Axta syare', li Diox par tyu' gu' loo mèn.

<sup>6</sup> Di's co' ntetaquen cón che'n ryop nu' Apol loo gu', mèn huesen por cón che'n Crist, nac di's co' ndlu' cón che'n mod co' ndxàp nu' par càba thib con' ndac loo gu'. Tataa mblina loo gu' par gàca le' gu' té'th no non gu' xal ndxàal que tee ban gu', no par ne'té'thte gu' no ne'ta'de gu' lugar tyub nza gu' loo di's co' ndlu' tedib mèn co' inacte xal di's co' ndub loo libr co' nac xti's Diox co' mbez: Ne'tye'ste thib thib gu' par ya thib thib gu' favor che'n thib xtàa gu' no tedib xtàa gu' par gac ndxep gu' thib ned mèn no gac taandxep gu' tedib ned mèn par gàca loo gu' tè'b gu' thib xtàa gu' no tedib xtàa gu' làth gu'. <sup>7</sup> Ne'tyóode gu'. Nde niin thib con' loo gu': ¿Chó mbli nac gu' más mèn ndac no mèn co' más ndyu' loo taamas hues xtàa gu' xal ndli gu' cuent nalle', à? Thiba con' ndxè'.

Le' tediba na, ¿xá ñaa thib con' ndxàp gu' liz gu' co' nac con' co' ne'nglide Diox ndxàp gu' con'a, à? No chele' Diox mbli ndxàp gu' con' liz gu', ¿chonon susque' ndye's gu' no ndli gu' cuent ale leque gu' ngue xèn' con'a par ndxàp gu' liz gu', à?

<sup>8</sup> Nase yixo. Ale ndyac gu' nacle' gu' mèn co' mté'th axta plóthe cón che'n Diox. No ndyac gu' ya inquinte tolo té'th gu' no gòn gu' más con' cón che'n Tad Crist, ¿lé'? No ale ndyac gu' mcàaya'le' gu' ryethe con' cón che'n Crist. No ale, ndyac gu' axta ngue ñibe' gu' loo cón che'n Diox xal ngue ñibe' Crist loo cón che'n Diox, ne, ¿lé'? Mastale' ne'nglu'de nu'i loo gu', ale ndxe'leque', ndyac gu' nac gu' xal chol rey co' yende chó mèn ñibe' loo. No por ngro xà' gu' loo nu' no por mtè'f gu' nu' thib lad, ndli gu' con'a. Oj

ché' co', lïcque', ngue ñibe' nole' gu' Crist, huen. Le' sya, thidte ñibe' no gu' nu' loo cón che'n Crist, ne. <sup>9</sup> Con' co' ngue lin xtùuz no con' co' ndyaquen nac: Le' Diox mblec nu' co' ndxe' di's che'n Crist xal mèn co' nac más be'the co' yende cón ntac loo chol taamas mèn co' mxo'f zin' zin' che'n Diox. Nac nu' mèn co' naba'leque' gathxù' xalque' mèn co' nac mèn ye'rsin'túb. Tac, lïcpe' ba'i, loo mèn nac nu' mèn co' ndli sirv loo mèn xal thìb con' co' nda' xquith lezo' mèn. Tataa ndxàca loo nu' par hui' ryete mèn che'n izlyo' ndxè' loo nu', que naca loo angl co' nzo loo bé', que naca loo chol mèn co' nziri' loo izlyo' par xiis no mèn no xiis no angl nu', ndyaquen. <sup>10</sup> Mèn izlyo' ndli cuent le' nu' nquée mbii yéc tac ngo nu' yalbàn cón che'n Crist. Le' part cón che'n gu' na, leque gu' mbez le' gu' angndxác loo cón che'n Crist, ¿lé'? Naneeque' nu' le' nu' nac xal mèn co' mbuu'sle'. Per por part cón che'n gu', ale ndyac gu' axta arid mbi' tìn' gu'. Rye mèn gulàaz gu' nxo'f lèe nxo'f xti's gu'. No ndli mèn gulàaz gu' con' guryath no con' guryèn loo gu'. Per por part cón che'n nu', ale ndxe'leque', nxiiis no mèn prob nu' no ntè'b mèn nu', ne. <sup>11</sup> Axta huiz co'se' mtlo mxo'f zin' nu' zin' ndxè' no axta huiz nalze nzi tee lan' nu' no nzi tee yath huin nu'. Nzi tee yec lezo' nu', ne. Ale mbiiz mbuu's ro nu'. Nde teele' nzi tee che nu'. Yende xab nu'. Ale ngox mdyal nu' nzi tee nu'. Nde nxon', ndli mèn ngòc nguàal con' loo nu'. Nde'b bit nde'b mingue lad nu'. ¡Prob nu' izlyo'! Axta ne' ne' yen liz nu' par yòo ban nu'. Nzi tee nu' làaz mèn tith xal mbin bé'. Yende liz nu' ned ngue tee nu'. <sup>12</sup> Ndli nu' zin' con ya'pe' nu' axta ndxezan nu' axta plóthe. Nde nxon', nde mèn. Nda' mèn xyàn lezo' nu'. Por part cón che'n nu', nado' di's nado' cuent ncàb nu' loo mèn no mbez nu' loo mèn: Diox quix gu', ndee. Ale ndub ngu's mèn nu', ne. Per nxec yèe nu'i. <sup>13</sup> Ale ñii yèe ñii tii mèn nu'. Per mastale', nado' di's nado' cuent ncàb nu' loo mèn. Ndli mèn cuent nac nu' xal yix co' ndxe' mbii loo mèn no yende cón ntac nu' loo mèn. No nac nu' xal mbe'th co' ndoo lad mèn loo mèn axta huiza no axta huiz nalze.

<sup>14</sup> Ingue que'den ye's loo gu' par tethonen gu', ey. Ndxè'leque', ngue que'en ye's loo gu' co' nac xal xin'en par co'xen loo gu'. <sup>15</sup> Tac mastale' ngòca loo gu' ngue no gu' si' mil mèn co' ngòc xal maistr co' ndlu' gu', yende chó mèn ngòc xal xud gu'. Ndxè'leque', loo cón che'n Crist Jesús nac daa xal xud gu' tac daa mblo yalbàn loo gu' co' ndlu' xá mod lyá' mèn loo con' ryes. No por cón chenen ngola's gu' loo Crist. <sup>16</sup> Por cona, ña'ben loo gu', ey, fque tee ban gu' xalque' nque tee banen.

<sup>17</sup> No por cona, mtel'en Timote loo gu'. Timote nac xal xgan' daa co' anze'f nque' lezon ñèen. Anze'f altant ndoo Timote loo cón che'n Tad Crist. Timote ta' cuent loo gu' xá mod ngue tee banen loo cón che'n Crist. Timote lu' loo gu' xá mod nque tee lu'en mèn rye lugar co'te' nqueltàa mèn liz Diox, ne. <sup>18</sup> Nzo ndxep mèn làth gu' co' ndye's no naxal' ndyoodi's mèn tac nden' mèn peser ne'gal needen máa gu' par nedrè' thidtene. <sup>19</sup> Per chele' Tad nee lezo', chàa, gal neen máa gu' par nedrè' par ñee nu' ñeene' ché', lïcque', anze'f ndxác mèn, mèn co' ndye's làth gu' xal nac mod co' ndyoodi's mèn con di's co' nxyal' mèn. <sup>20</sup> Tac co'te' ñibe' Diox inacte di's co' angndyoodi's mèn. Ndxè'leque', co'te' ñibe' Diox, ñibe' Diox con ryethe con' co' nzo la's nii Diox no con' co' nzo la's ya' Diox loo mèn co' ngòole' loo cón che'n Diox. <sup>21</sup> ¿Xá nee gu'? ¿Ché' más huen yo lezo' gu' le' daa gal loo gu' par gác nayi'en no yoon gu' con gáp di's con gáp cuent, cà', o ché' más huen yo lezo' gu' gal neen máa gu' no nado' di's nado' cuent tyoodi's non gu' xalque' mèn co' anze'f nque' lezo' ñèe gu', cà'?

## 5

*Pab ngue tub rez cón che'n thìb mbi' co' mque no xna' byan' xa' xal sa'lgotpe' mbi'.*

<sup>1</sup> Nde niin tedib con' loo gu', ne: Lïcpe' ba'i, ndxath no ndxèn par ned nzon ndxè' le' thìb gu' co' nzo làth gu' par nedrè', gu' ngue no xna' byan' gu' xal xa'gotpe' gu'. Con' co' ndxath ngue li mbi' làth gu'a, axta ne' ne' indxath ndli mèn con'a làth chol taamas mèn co' inda'de cuent cón che'n Diox por cón che'n Jesucrist. Nac con' co' ndli gu'a con' zab loo Diox. <sup>2</sup> Be taa ngue li gu' con'a làth xtàa gu'. No anze'f ndye's gu', ne. Más huen thyon gu' no xi lezo' gu'. Per lugar de thyon gu' no xi lezo' gu', ale ndyaquen, más ndye's gu'

no nxyal' gu'. No anze'f naxal' ndyoodi's gu' cón che'n mod co' ndxàp gu' làth xtàa gu'. Le' mbi' co' ngue no xna' byan' mbi' xal xa'got'pe' mbi' na, càa mbi'a. Blo' gu' làth gu'.<sup>3</sup> Lìcpe' ba'i, mastale' yende daa làth gu', per ndyóon no nden' lezon cón che'n gu'. Ale ndyaquen, nzoquen làth gu'. Por cona, mdub rezen cón che'n mbi' co' ncu'a'n xquin làth gu'a. Mblasen rye con'a mastale' ndli gu' cuent yende daa làth gu'.<sup>4</sup> Ñibe'en loo gu' por lèe Tad Jesucrist na', thidte queltàa rye gu' no bli gu' cuent le' daa nzo noque' gu'. Tac ndyóon no nden'en le'n lezon le' daa nzo noque' gu', làtha. No bli gu' cuent nzo noque' Tad Jesucrist gu', ne, xalque' nac ryethe con' co' nzo la's nii Tad Jesucrist no la's ya' Tad Jesucrist na'.<sup>5</sup> Le' mbi' co' mbli con' ye'rsin'a na, daa ñibe' loo gu', càa mbi'a. Blo' gu' làth gu', gu' co' ngòo loo cón che'n Diox por cón che'n Crist. Ftan' gu' mbi'a cón che'n Mebizya par gath mbi'. Le' sya, co'se' yi'th Tad Jesucrist tedib vez, sya, lyá' xpíi mbi'a loo con' ryes.

<sup>6</sup> Indxàalte tye's gu' loo xtàa gu' por con' ngue li gu'. ¿Ché' tarte gòn gu' no ché' tarte ta' gu' cuent xal nac di's co' mbez: Con chu'te dii levadur ndli par ndyoo bes huax co'f harin co'se' ntoxcua' mèn pan, cà'? Tataa ndxàca làth gu', ne: Por cón che'n thib mbi' ndxàc perdid rye gu', ¿lé'?<sup>7</sup> Blo' xà' gu' mbi' co' ndli con' ye'rsin'a làth gu', tá, par tataa mod gàca loo gu' xal co'se' ntembii mèn mes no taamas con' ndli zin' mèn co'se' ntoxcua' mèn pan par tataa mod ne'yòode levadur loo co'f co' tyoxcua' pan. Por cón che'n Crist, no loo cón che'n Crist, ngro xà' gu' loo rye loothe con' ye'rsin' xal co'se' ntoxcua' mèn pan co' ingòode mèn co' ndli zin' pan levadur par gac pana pan co', lìcque', indyoo beste. Tac Crist co' mbyan' lugar cón che'n ryethe cón che'n lni pasc che'n mèn nación Israel loo na', mèn mque' Crist loo cruz par mxactii Crist por cón che'n na'. No mdix Crist cón che'n xtol na' loo Diox. Crist mbyan' loo na' xal mbyan' mbacxil' loo mèn loo huiz lni pasc.<sup>8</sup> Por cona, ngue niin loo gu': Que tee ban na' loo cón che'n Crist xal co'se' li mèn thib lni co'te' ndxuhua mèn pan co' indxòode levadur. Tac levadura nee di's nac rye loothe con' ye'rsin' no rye loothe con' zab par na'. Ndxé'leque', que tee ban li na' loo Crist con dib nzo yéc na' no dib nzo lezo' na' tac co' ndli na'a nac thib con' co', lìcque', mnibe' Diox loo na' par li na'i.

<sup>9</sup> Loo ner cart co' mque'en ye's loo gu'a, mtel'en di's loo gu' par ne'queltàa node gu' mèn co' ncu'a'n xin' huan.<sup>10</sup> Ne'nque'den ye's loo cart co' mtel'en loo gu'a par niin loo gu' ne'sál'te gu' rye mèn co' alithe nzi tee ban loo izlyo' ndxè', mèn co' tarte yila's loo Crist, mèn co' ndli yalburrid; no mèn co' ndxath nquii ñèe yalgon' loo izlyo' ndxè'; no mèn co' ncu'a'n mod par li huan' mèn loo xtàa mèn; no mèn co' ndyub xib no nsal' ya' loo chol mdo', no loo chol gunab, no loo chol tatol, no loo chol naxnax. Nacquele' gu' indlyaste queltàa no gu' mèn na, más huen gath gu', ey.<sup>11</sup> Per ndxe'leque', ngue niin loo gu' loo mbryop cart co' ndye'th loo gu' ndxè' par ne'queltàa node gu' mèn co' mbez nac mèn hues xtàa gu' por cón che'n Crist chele' mèn, lìcque', nac mèn co' ncu'a'n xin' huan; chele' mèn nac mèn co' ndxath nquii par tolo que no mèn che'npe' mèn; chele' mèn nac mèn co' ndyub xib no nsal' ya' loo chol mdo', no gunab, no tatol, no naxnax; chele' mèn nac mèn co' ñii yèe ñii tii cón che'n xtàa mèn; chele' mèn nac mèn guy; chele' mèn nac mèn huan'. ¡Anderhuen gu'! Ne'queltàa node gu' rye mèn. Ne' ne' hua no gu' mèn, ne.<sup>12</sup> Yende chó cón chenen par tub rezen cón che'n mèn co' tarte yila's loo Crist. Per ndxe'leque', ¿ché' inacte con' ndxè' cón che'npe' gu' par tub rez gu' loo mèn co' ndxela's co' nzo làth gu', co'se' ñèe gu' nzi tee li mèn con' ye'rsin'a, cà'? Con' ndxè' nacque' cón che'npe' gu', cara.<sup>13</sup> Diox tub rez loo mèn co' ne'tyalte yila's loo Jesucrist. Por cona, beren. Niin loo gu' tedib vez: Blo' xà' gu' mbi' co' ngue li con' ye'rsin'a làth gu', ndee gu'.

## 6

*Pab ngue ta' cuent loo mèn cón che'n mèn co' ngyoo di's loo juez co' indxela'ste loo Diox por cón che'n Tad Jesucrist.*

<sup>1</sup> Le'tre' be' ndyoodizen loo gu' cón che'n con'a loo cart ndxè', lyazen nibdizen thib con' loo gu'. Co'se' ndxác thib yalgyoo làth gu' no nco ñee mèn làth gu', ¿ché' tli gu' ryes li gu' thib con' co' indxàalte li gu' par hue' gu' xtàa gu' co' ndxela's loo Diox por cón che'n Crist loo mèn nac zin' co' indxela'ste par tub rez mèn nac zin' cón che'n di's co' ndxetoo làth gu' co' ndxela's leque hue' gu' xtàa gu'a loo mèn co' ndxela's loo Crist par tub rez mèn co' ndxela's cón che'n di's co' ndxetoo làth xtàa gu'a, cà'? <sup>2</sup> Lomisque' ne, ¿ché' tarte ñee gu' no ché' tarte ta' gu' cuent le' mèn co' ngro xà'le' loo cón che'n xab izlyo' par ngòc mèn che'npe' Diox, co' nee di's nac na', tub rez mèn cón che'n ryethe mèn loo izlyo', cà'? No chele' gu' tub rez cón che'n rye mèn loo izlyo', ¿ché' indxàalte gu' tub rez gu' chol cuent bix co' ndxetoo làth gu', sya, cà'? Ndxàalque' li gu' tataa, ¿lé'? <sup>3</sup> ¿Ché' inda'de gu' cuent no ché' inonte gu' le' na' tub rez axta cón che'n con' ye'rsin' co' mbli angl loo angl, cà'? Chele' na', licque', tub rez cón che'n angl loo angl, ale'que' cón che'n mèn co' nzo loo izlyo' ndxè' ne' tub rez na', ¿lé'?

<sup>4</sup> Anggab na'i, chele' gu' nzi yoo làth gu' por chol con', ¿ché' tqueltàa gu' loo thib hues xtàa gu' co' ndxela's co' nac más be'the par tyub rez xtàa gu'a cón che'n gu', cà'? Yende moda, ¿lé'? <sup>5</sup> Ngue niin con' ndxè' loo gu' par thyon gu' loo co' gue li gu', ey. ¿Ché' yende chó mèn nzo co' ndxác làth gu', cà'? ¿Ché' yende chó mèn nzo làth gu' co' ndxác co' gác tub rez cón che'n gu' co' nac huespe' loo Crist, cà'? <sup>6</sup> Bli gu' xtùuz co' huen huen, ¿ché', licque', ndxàal hue' gu' thib hues gu' co' ndxela's loo mèn nac zin' co' indxela'ste par tub rez gu' cón che'n gu' làth gu'? Ihuyente li gu' con'a, ey.

<sup>7</sup> Lìcpe' ba'i, anze'f thib falt tín' ndxàp gu' tac nzi yoo no gu' hues xtàa gu' co' ndxela's. No ndxe' gu' hues xtàa gu' loo mèn nac zin' co' indxela'ste par tub rez mèn nac zin' cón che'n gu'. ¿Chonon ne'teri'thte gu' no ne'ntecan'te gu' yalgyooa no xec yèe gu' cón che'n con' co' ndxác làth gu'a, à'? Más quee lezo' gu' la' gu' li huan' hues xtàa gu' cón che'n gu' leque yoo gu' por cón che'n con'a. <sup>8</sup> Per ndxe'leque', ale leque gu' gue li co' indxàalte li gu'. Ale, axta con' co' nac che'n huespe' gu' ndyen gu' no ndli huan' gu'.

<sup>9</sup> ¿Ché' tarte ñee gu' no ché' tarte gòn gu' le' mèn co' inacte mèn nalì no mèn nambii, mèn che'n yòode loo cón che'n Diox par ñibe' Diox loo mèn, cà'? Gàcque' con'a, ¿lé'? Ne'quediide gu' leque gu'. Tac Diox ne'tyalte yòo mèn loo cón che'n Diox par ñibe' Diox loo mèn, mèn co' ncu'a'n xin' huan; mèn co' ndyub xib no nsál' ya' loo mdo' no loo gunab; mèn co' nchi'x yéc xin' sa'l mèn par que no mèn xtòo mèn, que naca mèngot o que naca mènbi'; mènbi' co' ndli yalmbi' con leque xtàambi' mèn, no taamas xa'bi' co' nda' lugar loo xtàambi' li leque xtàambi' yalmbi' con leque xtàambi' mbi' xal ndli mbi' yalmbi' con mèngot. <sup>10</sup> Mèn co' ndli huan'; mèn co' ndxath nquii ñèe tmi; mènguy; mèn co' ñii yèe ñii tii xtàa; mèn co' ncu'a'n mod li huan' mèn loo xtàa mèn. Ryete mèn che'n yòode loo cón che'n Diox par ñibe' Diox loo mèn. <sup>11</sup> Tataa ngòc ndxep gu', gu' co' mque tee ban loo cón che'n xab izlyo' póla. Per nalle' mbembii'le' xtùuz gu' no lezo' gu'. No ngro xà'le' gu' loo cón che'n xab izlyo' par ngòc gu' mèn che'npe' Diox. Ngòc gu' mèn nalì no mèn nambii loo Diox por cón che'n Tad Jesucrist. Diox mbli con' ndxè' loo gu' por cón che'n Xpii Natú' che'n Diox.

*Pab gue ta' cuent cón che'n mèn co' ndxàp lezo' no mèn co', por derech, ngro xà' loo cón che'n xab izlyo'.*

<sup>12</sup> Nase ngolo guneen licque' nac di's co' mbez mèn: Yende chó mèn ñii loo mèn par li mèn rye con' ndlya's mèn, con' co' ne'càbte con' ye'rsin' loo mèn loo Tad Diox. Per iryede con' ndlya's mèn li mèn ncàb con' ndac loo mèn. Aa. Lìcque' nac di's co' mbez mèn: Yende chó mèn ñii loo mèn par li yèe mèn chol con' ndlya's taamas mèn li mèn. Per ne'la'de mèn ñibe' nec thib con' ndli mèn loo mèn par más huen tyubdi's mèn loo Diox. <sup>13</sup> Lomisque', licque' nac di's co' mbez mèn, ne: Le' xít mèn no lua' mèn nac co' zye lezo' mèn co'se' ndlyan' mèn. Le' le'n lezo' mèn na, ndxòo co' ndxuhua mèn par ndxey' co' ndxuhua mèn. Per zin thib huiz no zin thib ze co'se' li Diox ya ne'huade mèn no ya ne'gude mèn tac gath mèn. Diox ne'ntoxcua'de bél'yòo co' nac lad mèn par cua'n mèn

xin' huan mèn no par li mèn yalburrid. Ndxé'leque', Diox mtoxcua' bél'yòo co' nac lad mèn par xyo'f lèe xyo'f xti's Crist por cón che'n con' ndac co' ndli bél'yòo lad mèn láth naban mèn. Le' sya, Tad Diox li gác más con' ndac loo bél'yòo co' nac ladpe' mèn loo mèn. <sup>14</sup> Texal leque yub Diox co' mblo xban Tad Jesús làth mèn nguth, leque yub Tad Diox co' xban na' làth mèn nguth, ne, por cón che'n con' roo con' xèn co' nzo la's nii Diox no co' nzo la's ya' Diox.

<sup>15</sup> ¿Ché' inonte gu' no ché' inda'de gu' cuent le' bél'yòo co' nac ladpe' gu' nac thib con' co' nac cón che'n Crist, ne, cà'? ¿Ché' nzo mod gác thib cuen nii Crist no thib cuen ya' Crist, co' nac na', par gác na' xal thib cuen nii no xal thib cuen ya' co' nac lad che'n thib xa'got co' ndli yalburrid, cà'? Yende xaa. Nec thib mod no nec tedib mod ne'gàcta tataa, ¿lé'? <sup>16</sup> No ¿ché' tarte ñee gu' no ché' tarte non gu' le' thib xa'bi' co' ngue li yalburrid con thib xa'got co' ndli yalburrid, thidte ndxàc bél'yòo lad xa'bi'a con bél'yòo lad xa'gota co'se' ndli ryop xa' yalburrid, cà'? Tataaque' naca, ey. Tac di's ndub loo libr co' nac xti's Diox co' mbez: Co'se' nselya' thib ned mèn, thidte ndxàc ryop bél'yòo lad mèn loo Diox. <sup>17</sup> Per ndxe'leque', co'se' ngola'sque' mèn loo Diox par ngòc mèn che'npe' Diox, le' sya, thidte ndxàc xpíi mèn con Diox.

<sup>18</sup> Fxon' gu' no biiche xà' gu' loo mèn co' nchoo gu' par cua'n gu' xin' huan gu' no par chi'x gu' yéc xin' sa'l mèn par gác gu' xtòo mèn, que nac gu' mènbi', que nac gu' mèngot. Chol taamas xquin co' ncu'a'n mèn, con'a indlide par leque mèn teza' mèn. Per ndxe'leque', chol mèn co' ncu'a'n xin' huan no mèn co' nchi'x yéc xin' sa'l mèn par que no mèn xtòo mèn, leque mèn nteza' bél'yòo lad mèn. <sup>19</sup> ¿Ché' inonte gu' no ché' inda'de gu' cuent le' bél'yòo lad gu' nac xal thib templ co'te' nzo ban Xpii Natú' che'n Diox, cà'? Tataaque' naca. Xpii Natú' nque tee noque' gu'. Diox mtel' Xpii Natú'a loo gu' par yòo ban no Xpii Natú' gu'. ¿Ché' indxònte gu' le' Diox ne'nda'de bél'yòo lad, co' nac gu', par ñibe' gu' loo bél'yòo lad gu' xal nee lezo' gu', cà'? <sup>20</sup> Por cón che'n Crist co' anze'f ntac, nac gu' mèn co' mdyu'. Por cona, bli gu' par xyo'f lèe xyo'f xti's Diox no par gác con' roo con' xèn loo Diox por cón che'n bél'yòo lad gu', gu' co' nac xpíi no co' nac bél'yòo lad gu' tac ryop con'a nac che'npe' Diox.

## 7

*Pab ngue co'x loo mèn, que nac mèn mènbi', que nac mèn mèngot, más huen selya' mèn leque que tee thib mèn par ndxè' par ba'.*

<sup>1</sup> Cón che'n di's co' mque' gu' ye's loon co' mnibdi's gu' loon, trè' ngue tel'en ye's loo gu', ne: Huenque' naca loo thib myen'bi' o thib myen'got co' nac myen' thib chele' myen' li xtùuz ne'líde myen' yalmbi' con chol xa'got. <sup>2</sup> Per por part cón chenen, par ne'cua'nte myen'bi' o myen'got xin' huan myen', ndxàalque' selya' myen'bi' no myen'got. No lomisque', ndxàal selya' myen'bi' con myen'got par que no myen'bi' sa'lpe' myen'bi' no par que no myen'got sa'lpe' myen'got, ne. <sup>3</sup> Lomisque', lyazen toodiz non ryete gu' co' mselya'le', gu' co' ndub nole' xin' sa'l gu', loo cart ndxè'. Gu' co' nac sa'lbi', altant gure gu' no gòp gu' mod loo co' nac obligación che'n gu' por nac gu' xin' sa'lpe' xa'got gu'. Lomisque' gu' ne, myen'got co' nac xin' sa'l xa'bi' gu', altant gure gu' no gòp gu' mod no bli gu' co' nac obligación che'n gu' con xin' sa'lpe' gu', ne. <sup>4</sup> Yende chó derech ndxàp xa'got co' mselya' par ñibe' xa' ante co' neete lezo' xa' cón che'n yalmbi' no yalngot. Ne' ne' yen chó derech ndxàp xa'bi' ñibe' xa'bi' ante co' neete lezo' xa'bi' cón che'n yalmbi' no yalngot. Ndxé'leque', natubdó' ryop sa'l xa' par li ryop sa'l xa' ante co' nee lezo' ryop sa'l xa' li xa'. <sup>5</sup> Mèngot, ne'càade gu' gu' co'se' lya's xin' sa'lpe' gu' gàal xin' sa'lpe' gu' gu'. Gu' ne, mènbi', co' nac xin' sa'l xa'got gu', ne'càade gu' gu' co'se' lya's xin' sa'l gu' gàal xin' sa'lpe' gu' gu', ne. Ngue niin loo gu': Ne'gàalte gu' xtàa gu' co'se' ndoo lezo' ryop sa'l gu' cuez gu' Diox ndxep huiz. Le' sya, yiloo ndxàalque' gu' bere gu', gàal gu' xin' sa'lpe' gu' tedib vez. Chele' gu' tataa li, ne'cobya'de Mebizya gu' láth ingàalte gu' xtàa gu' co' nac xin' sa'l gu'. <sup>6</sup> Con' co' ngue niin loo gu' ndxè' inacte co' mnibe' Diox loon par niina loo gu'. Ndxé'leque', ngue niina loo gu' xal ndye'th xtùuz ndxè' yéquen. <sup>7</sup> Tublazen



no tyac lezon chele' ryete mènbi' gáp mod xal daa. Tac daa ne'ndubte yo'f lezon nglin yalmbi' con mèngot, cona ne'nselyaden. Per daa naneequé' le' Diox mda' thib mod loo thib thib mèn. Le' taandxep mèna ndxàp thib mod xal daa co' inden'te nquin selyan. Le' taamas mèn na, ndxàp tedib mod co' naquin selya'. <sup>8</sup> Lomisqué', niin loo myen'bi' thib no loo myen'got thib no loo mèngot viud: Gu' co' ndxela's, huen gàca loo gu' chele' gu' thidteneque' nziri' xal ndxàca loon, co' nee di's, ne'selya'de gu'. <sup>9</sup> Per chele' gu' ne'gàpte lezo' par ne'lide gu' yalmbi' no yalngot, más huen selya' gu' con thidte mbi' no con thidte ngot par tataa mod ne'zyo'de gu' loo yalmbi' no loo yalngot.

<sup>10</sup> Per loo mèn co' mselya'le', ñibe'en con' ndxè' loo mèna: Ne'lá'ya'de sa'lgot sa'lbi'pe' sa'lgota; sa'lgot ne'lá'ya'de sa'lbi' sa'lgotpe' thidtene. Inacte daa co' ñibe' con' ndxè' loo gu' xal nee lezon. Ndxé'leque', Tad Crist mnibe'i loon par niina loo gu'. <sup>11</sup> Per angta' le'i, chele' sa'lgot lá'ya' sa'lbi'pe' sa'lgota, ñibe'en loo xa'gota ne'selya'de sa'lgot con tedib mbi'. Más huen leque ryop sa'l xa'gota tu' tàl loo di's par bere xa', tyub no xa' sa'lbi'pe' xa' tedib vez. Ñibe'en, ne, le' sa'lbi' ne'lá'ya'de sa'lgot thidtene.

<sup>12</sup> No por cón che'n taamas mèn ngue niin con' ndxè' loo gu': Ingue niidena xal con' co' ñibe' Tad Crist loo na'. Ngue niina loo gu' xal ndye'th xtùuz yéquen cón che'na loo gu'. Chele' thib gu' co' ndxàc hues na' por Crist ndyub no thib xa'got co' indxela'ste, no ndyac lezo' xa'gota ndub ban no xa'gota xa'bi' co' ndxàc hues na'a, ne'lá'ya'de xa'bi' co' ndxàc hues na' xa'gota. <sup>13</sup> Lomisqué' ne, chele' thib xa'got co' ndxàc fta'n na' por cón che'n Crist tyub ban no xa' thib sa'lbi' co' indxela'ste, no chele' sa'lbi'a ndyac lezo' ndyub ban no sa'lbi'a sa'lgot co' ndxàc fta'n na' loo Crist, ne'lá'ya'de xa'gota xin' sa'lbi'pe' xa'gota, ne. <sup>14</sup> Lomisqué' ne, chol mbi' co' indxela'ste co' nac sa'lbi' che'n thib xa'got co' ndxela's, por cón che'n xa'got co' ndxela'sa ndxàc loo mbi' par ne'tolode li mbi' con' ye'rsin'. No ndoo xal' ned ndoo xal' yó' par ñee mbi' no non mbi' cón che'n Diox par yila's mbi', ne. Lomisqué' ne, chol xa'got co' indxela'ste co' nac sa'lgot che'n thib xa'bi' co' ndxela's, le' sya, por cón che'n sa'lbi' co' ndxela'sa ndxàc loo xa'gota nca' no ncà thib con' par ne'tolode li xa'gota con' ye'rsin'. No ndoo xal' ned ndoo xal' yó' loo xa'gota par ñee xa'gota no non xa'gota cón che'n Diox par yila's xa'gota, ne. Tataa mod ne, ne'yòode myen' co' gác xin' ryop sa'l xa'a arid loo con' ye'rsin'. Ndxé'leque', té'thghà myen' par ryo xà' myen' loo con' ye'rsin' par gàcguè' myen' che'npe' Diox. <sup>15</sup> Per chele' chol mèn co' nac sa'lbi' o sa'lgot co' nac mèn co' indxela'ste loo Diox por cón che'n Crist, yende cón ndxòn mèna lá' mèna xin' sa'l mèna, pues, bla' gu' lá' mèna xin' sa'l mèna. Chele'i tataa mod nac, másque' huen nziri' thib gu', gu' co' nac hues xtàa por cón che'n Crist, que nac gu' mèngot, que nac gu' mènbi', yende chó cuee ca' gu' par ñibe' gu' loo xtàa gu' xal ndxàca loo thib moz co'se' ñibe' yèe patrón loo moz. Diox indlya'ste gàca tataa loo na'. Diox ndlya's cue ban na' rye nda na' no rye ndye'th na' con hues xtàa na'. <sup>16</sup> Tataa mod la' gu' bii sa'lbi' gu' o sa'lgot gu' tac ¿xá mod naneel, lùu co' nac sa'lgot, ché' tliil gan par lyá' xin' sa'l lùu loo con' ryes chele' lùu li yèe par tolo tyub no xin' sa'l lùu lùu? No ¿xá mod naneel, lùu co' nac sa'lbi', ché' tliil gan par lyá' xin' sa'l lùu loo con' ryes chele' lùu li yèe par tolo tyub no xin' sa'l lùu lùu? Pà non gu' ché' tàca o ché' ne'gàcta, ¿lé'? <sup>17</sup> Per xalque' ngolo niin loo gu' nalle': Naquin que tee ban thib thib gu' xalque' mblec Diox gu' loo mod no loo zin' co' mque no gu' co'se' ngòo gu' loo cón che'n Diox. Ftac lezo' gu' no blec lezo' gu', chele' gu' ndub no xin' sa'l gu'. No ftac lezo' gu' no blec lezo' gu', chele' gu' nac mèn thib, co' nee di's, indub node gu' sa'l gu'. Con' ndxè' mnibe' Diox loon par lu'en loo mèn co' nqueltàa loo Diox no loo cón che'n Diox rye ned ngue tee'en. <sup>18</sup> Chele' Diox ngurez chol gu' par ngòo gu' loo cón che'n Diox, gu' co' ngòcle' circuncidar ndoore' yila's gu' loo cón che'n Jesucrist, taate yan' gu' xalte ngòc circuncidar gu'. Ne'tyóode gu' cón che'n con'a. No gu' co' Diox ngurez par ngòo gu' loo cón che'n Diox, gu' co' tarte gác circuncidar co'se' ngola's gu', taate yan' gu'a, ne. Inquinte gác circuncidar gu'. <sup>19</sup> Part che'n na' co' ngola'sle' loo Diox, ya yende cón ntac par gác circuncidar na'. No yende cón ntaca loo na' par ne'gàcte circuncidar na'. Thib con' no maste más ntac loo na', tyubdi's na' loo con' co' ñibe' Diox loo na' par li na'i xal nee lezo' Diox. <sup>20</sup> Lomisqué', ngue niin loo

gu', ne: Ftolo bli thib thib gu' zin' co' ndli gu' co'se' ngurez Diox gu' no mblec Diox gu' par ngola's gu' loo cón che'n Jesucrist no loo Jesucrist xal ngue niin loo gu' ndxè': <sup>21</sup> Chele' gu' nac xal moz yèe loo patrón co' ñibe' loo gu' co'se' ngurez Diox no mblec Diox gu' loo cón che'n Jesucrist no loo Jesucrist, yende chó mport nzo lezo' gu' con'a. Ne'tyóode gu' por con'a. Per chele' Diox ta' lugar loo gu' par gac gu' mèn co' yende chó ñii loo no mèn co' yende chó mbee nca', bli gu' co' nzote mod li gu' par gaca tataa loo gu'. <sup>22</sup> Per yende chó mport nzo lezo' gu' xal ndxàca loo gu' co'se' ngòo gu' loo cón che'n Diox. Tac mèn co' ngurez Diox par yila's mèna loo Crist, chele' mèna nac moz yèe loo thib patrón, nac mèna loo Diox mèn co' yende chó mbee nca'. No nacquele' mèn co' ngurez Diox mèn co' yende chó mbee nca', ne, lìcque', nac mèna moz che'npe' Diox, ne. <sup>23</sup> Diox mbli par mdix Diox thib con' co' anze'f ntac por cón che'n gu' par ngòc gu' che'npe' Diox, ey. Por cona, ngue niin loo gu': Ne'la'de gu' ñibe' yèe mèn izlyo' ndxè' loo gu' par gac gu' xal moz yèe loo mèna. <sup>24</sup> Cona, ngue niin loo gu': Tolo gure li thib thib gu' zin' co' ndli gu' co'se' ngurez Diox gu' par ngola's gu' par tataa mod que tee ban ndac gu' loo Diox.

<sup>25</sup> Per cón che'n myen'got co' be' nzi tee thib, yende chó con' mnibe' Diox loon par tyoodiz non gu' cón che'n myen'gota. Per niin loo gu' con' co' ndye'th yéquen no co' ndyaquen cón che'n myen'gota, daa co' mblyat lezo' Diox gunèe Diox par ngòc daa mèn co' ndlique' co' ñibe' Diox. <sup>26</sup> Ndyaquen huenque' gaca loo myen'got no loo myen'bi', ne, tolo cue ban thib myen'a por cón che'n yalndyub ngu's co' ndxàc loo na' le'n huiz ndxè'. <sup>27</sup> Per chele' gu' mselya'que', ne'lide gu' xtùuz lá'ya' gu' xin' sa'l gu'. Chele' gu' tarte selya', más huen li gu' xtùuz ne'cua'n te gu' xa'got par selya' no gu' xa'gota le'n huiz ndxè'. <sup>28</sup> Per chele' chol gu' ndlya's selya', inacte con'a co' ngue cua'n gu' xquin gu'. No chele' chol myen'got yèn' ndlya's selya', inacta con'a co' ngue cua'n myen'got xquin myen'got, ne. Per co'se' selya' myen'got, gaca loo myen'gota axta ne' ne' yèe myen' li myen'rsin' myen' liz myen'. Per part cón chenen, oj ne'tyactiide myen' tataa. Huen.

<sup>29</sup> Per con' ndxè' nac co' ngue tan cuent loo gu', mèn huesen, ndoo dóple' tiemp co' be' ndxan' co'se' gac huiz yi'th xi Crist na'. Cón che'n tiemp co' yi'th nquea, gu' co' ngue no xin' sa'l, ne'tyóode gu' ante cón che'n famil gu'. Ndxè'leque', ftyóo gu' cón che'n zin' che'n Diox, ne. <sup>30</sup> Gu' co' nzi nxi lezo', ne'ta'de gu' lugar xi lezo' gu' axta plóthe. Gu' co' alithe nzo'f nde' nzo'f ndla' lezo' loo izlyo' ndxè', ne'que tee bante gu' arid tataa. Co'se' ndi' gu' ndxep con', ne'lide gu' xtùuz thidteneque' que no gu'i. <sup>31</sup> Ne'gath yey'te lezo' gu' ñèe gu' yalgon' che'n izlyo' ndxè' xal ndxath ndxey' lezo' taamas mèn loo yalgon' che'n izlyo' ndxè'. Tac quèe no yaa ndlyux yii den. Ale'que' loo con' co' ndxath nqui mèn ñèe mèn loo izlyo' ndxè' ne' lyux loo izlyo' ndxè'.

<sup>32</sup> Per part cón chenen, lyazen ne'gath lyuxte gu' loo nec thib con'. Le' mbyòobi' co' nac mbyòobi' thib na, más tyóo mbyòo no más li mbyòo xtùuz loo cón che'n Tad Diox par yòo lezo' Diox cón che'n mbyòoa. <sup>33</sup> Per ndxe'leque', thib mbyòo co' mselya'le', mbyòoa más ndyóo cón che'n yalgon' che'n izlyo' ndxè' par tataa mod más tyac lezo' xin' sa'l mbyòoa leque cón li mbyòoa par yoo lezo' Diox cón che'n mbyòoa. <sup>34</sup> No xà' nac mod che'n thib xa'got co' mselya' loo mod che'n thib myen'got yèn' co' tarte selya'. Myen'got yèn' co' tarte selya'a, más ndxath ndlyux myen'gota loo cón che'n Tad Diox par ryo xà' myen'got yèn'a loo rye con' co' nac che'n xab izlyo', que naca cón che'n bél'yòo lad myen'gota, que naca cón che'n con' co' ndli myen'got xtùuz no co' nden' myen'got le'n lezo' myen'gota. Per ndxe'leque', xa'got co' mselya' más ndxath ndlyux xa'gota loo cón che'n izlyo' ndxè' par li xa'gota xtùuz cón li xa'gota par tyac lezo' xin' sa'l xa'gota.

<sup>35</sup> Ingue niiden con' ndxè' loo gu' par tedó'en gu' loo con' co' ñibe'en loo gu'. Ndxè'leque', ante ndlyazen le' con' co' ngue niin loo gu' gac con' ndac loo gu' no par que tee ban li gu' con' ndac no par gac gu' huen mod par gaca loo gu' yende cón ca' loo gu' par tolo li gu' cas loo Diox; no par li gu' sirv loo Diox.

<sup>36</sup> Per chele' chol gu' co' nzo làth gu' co' nac gundan ngue li xtùuz ilé'de nac con' co' ngue li gu' loo rsap gu' co' ndoo ri'th tiemp selya', bli gu' co' nden' gu' nac más con' huen par selya' rsap gu'. Chele' rsap gu' selya', inacte con'a con' co' ngue cua'n

rsap gu' xquin rsap gu'. <sup>37</sup> Per chele' gundan co' ngue no rsap làth gu' mbli nee lezo' gundana le' gundana inquinte li par selya' rsap gundana, no chele' gundana nden' inquinte selya' rsap gundan, le' sya, huenque' nac con' co' ngue li gundana chele' rsap gundana ne'selya'de. Tataa gundana tolo xèn' rsap gundana. <sup>38</sup> Cona, chele' chol gu' ta' lugar loo rsap gu' par selya' rsap gu', huenque' ngue li gu'. No chele' chol gu' ne'ta'de lugar selya' rsap gu' co'se' quinta, más huen ngue li gu' ndxàca tataa loo gu' ndyaquen, ne.

<sup>39</sup> Le' xa'got co' ndub xin' ndub sa'l na, thidteneque' natedó' xa' con sa'l xa' xal ñibe' ley láth be' naban sa'lbi'pe' xa'. Per chele' sa'lbi' xa'gota nguth, yende cón cue yende cón ca' xa'gota par selya' xa'gota con tedib mbi' conse' selya' no xa'gota thib xa'bi' co' ndxela's loo Tad Crist no maste. <sup>40</sup> Per más huen nda xa'gota, ndyaquen, chele' xa'gota thidteneque' ne'selya'de. No ndyaquen le' Xpii Natú' che'n Diox nque tee noque' daa ned nque tee'en. Thiba con' ndxè'.

## 8

*Pab ngue ta' cuent loo mèn ihuente nac hua mèn bél' má' co' mbec mèn loo mdo' xal xít mèn no lua' mèn.*

<sup>1</sup> Le' tediba na, nalle' ndlyazen tyoodiz non gu' cón che'n xít gu' no lua' gu' co' mbec mèn loo mdo' no loo gunab. Lìcque', ryete na' co' ndxela's, nda' na' cuent cón che'n con' ndxè'. Per mèn co' ante ndxòn cón che'n con' ndxè', ale ndye's mèn. Per ndxe'leque', mèn co', lìcque', nque' lezo' ñèe thib xtàa mèn no tedib xtàa mèn, mèn ndlyath no taamas mèn par tolo té'th mèn no tolo ta' mèn cuent cón che'n Diox par tyubdi's ndac mèn loo cón che'n Diox. <sup>2</sup> Chele' chó mèn ndyac anze'f ndxác mèn cón che'n chol con', yende chó con' tar gác mèn xal ndxàal gác mèn. <sup>3</sup> Per chele' chó mèn nzo co', lìcque', nque' lezo' Diox, Diox ngüi' no ñaa Diox loo mèn, no ngo Diox cuent cón che'n mèn. <sup>4</sup> Nde tan cuent loo gu' cón che'n xít mèn no lua' mèn co' mbec mèn loo mdo' no yiloo ndxuhua mèn. Na' naneeque' le' thib mdo' inabante xal naban yub Tad Diox. No yende más Diox loo thidte Tad Diox co' nzo. <sup>5</sup> Nzo huax con' co' ndyac mèn no mbez mèn nac Diox loo izlyo' no loo bé'. Co'se' tataa mbez mèn, nden' mèn anze'f huax Tad co' nac patrón co' ñibe' loo mèn nzo, ne. <sup>6</sup> Per ndxe'leque', part cón che'n na', nanee na' no non na' thidte Diox nac Diox co' nzo. Diox nac xud Tad Jesucrist. Diox co' nac xud Tad Jesucrist mblec no mxèn' alux con' co' nziri' no co' nzi ban par leque na' li yath yèn cón che'n Diox loo mèn no gác con' roo con' xèn loo Diox por cón che'n na'. No lomisque' ne, angoluxte Tad Jesucrist nzo. Por cón che'n Tad Jesucrist mxèn' Diox alux con' no ngue tèn' Tad Jesucrist ryethe con', ne. Por cón che'n Tad Jesucrist nziri' na' no nzi huin na' loo izlyo', ne.

<sup>7</sup> Iryede mèn co' ndxela's non no nanee le' loo Diox yende cón ntac thib mdo'. Tac axta nalle' be' nzo ndxep mèn co' ngòo loo cón che'n Diox por cón che'n Jesucrist co' anze'f mbyen no co' anze'f ngo lezo' loo cón che'n costumbr par ndyub xib mèn loo mdo' no loo gunab. No nden' mèn co'se' mbec mèn xít mèn no lua' mèn loo mdo'. Ndli mèn cuent ngue bec mèn con'a loo Diox. No co'se' hua mèn bél' co' mbec mèn loo mdo', nden' mèn arid ntac con'a par mèn. Tataa ndli mèn xtüuz tac tarte té'th ndac mèn le' Diox yende chó mport nzo lezo' Diox cón che'n con' co' mbec mèn loo mdo'. Por cona, por ihuente nzo lezo' mèn loo cón che'n Diox, ndxàc chop loo chop la's mèn loo cón che'n Crist. <sup>8</sup> Lìcque' nac di's co' ngue niin loo gu' ndxè': Inacta por co' ndxuhua na' li par tyal Diox yòo na' loo cón che'n Diox. No ne' ne' por indxuhuade na' ndli ndyal Diox yòo na' loo cón che'n Diox. Yende chó mport nzo lezo' Diox cón che'n co' mbec mèn loo mdo'. No chele' mèn nden' ilé'de nac hua mèn bél' co' mbec mèn loo mdo', inactive por con'a nac mèn mèn ye'rsin' loo Diox. Lomisque' ne, yende chó mport nzo lezo' Diox chele' mèn hua bél' co' mbec mèn loo mdo'. Inactive por con'a nac na' mèn ndac loo Diox, ne. <sup>9</sup> Per anderhuen gu' nee gu' xá ngue tee gu', gu' co' ya yende chó mbee nca' loo costumbr co' ngue no mèn cón che'n mdo'. Tac ne'stolque' taamas mèn co' be' ndxela's, co' tarte

ta' cuent co' huenleque' cón che'n con' ngue li mèn, no ñèe mèn con' ndli gu'a. Le' sya, le'le' li gu' par yizi'f yiga's mèn loo con' ye'rsin' ante por ñèe mèn con' ndli gu'a. <sup>10</sup> Angab na'i, chele' chol mèn co' ndxela's ñèe gu' co' mbez ndxác no non gu' cón che'n Crist, no nzi yuhua gu' con' co' mbec mèn loo mdo' le'n nyòo liz mdo', sya, mèn co' tarte yila's ndaca li xtùuz no gab mèn le'n lezo' mèn: Jaa. ¿Ché' ndyac gu'i, nzoque' mod hua na' xít na' no lua' na' co' mbec mèn loo mdo', ¿lé'? Le' sya, tataa mod té'th mèn loo gu' par tlo mèn ryo xà' lezo' mèn loo co' ndxela's mèn loo Crist. <sup>11</sup> Por cona, yan' cón che'n co' ndli gu' chele' gu' li le' chol mèn co' indxela's ndacte, tlo mèn hua mèn xít mèn no lua' mèn co' mbec mèn loo mdo' láth be' nden' mèn ilé'de nac con' ngue li mèn. Fte' lezo' gu' le' por cón che'n mèn, ne, nguth Crist. <sup>12</sup> Co'se' ngue li gu' con'a, cona nee di's, ngue cua'n gu' xquin gu' loo mèn co' ndxác hues gu' por Crist. Tataa mod ndli gu' nzye' xtùuz mèn no ncos gu' xtùuz mèn co' nden' mèn le'n lezo' mèn. Per ingue lide gu'i ante loo mèn. Ndxé'leque', ngue cua'n gu' xquin gu' loo Crist, ne. <sup>13</sup> Por cona, niin loo gu': Part cón chenen, co'se' ndxuhuan chol nítyèth co' nac xíten no luan, chele' con' ndxuhuan ndli par nden' mèn co' ndxác huesen por cón che'n Crist ngòc nguàal con' por ndxác mèn chop loo chop la's loo cón che'n Crist, más quee lezon ne'tolode huana thidtene.

## 9

*Pab ngue bez loo mèn: Ndxàpen derech ña'ben con' loo gu' por nac daa thib mbi' co' mtel' Crist loo gu'.*

<sup>1</sup> ¿Ché' inacte daa mbi' co' mtel' Tad Crist par ndxen di's che'n Tad Crist loo mèn, cà'? Nacque' daa mbi'a, ¿lé'? ¿Ché' ndyac gu' nzo ndxep con' co' mbee nca' daa loo zin' co' ndlin, cà'? Yende chó con' nzo co' ncà' loon. ¿Ché' ndyac gu' le' daa tarte ñèe Tad Jesucrist na', cà'? Aa. Gunèelen Tad Jesucrist. ¿Ché' inacte gu' mèn co' ngola's por cón che'n zin' co' mxo'f zin'en cón che'n Tad Crist, cà'? Nacque' gu' mèn, ¿lé'? <sup>2</sup> Peser taamas mèn inden'te nac daa mbi' co' ndxe' di's co' mtel' Tad Crist. Per, licpe' ba'i, gu' nden'que' no nda'que' gu' cuent nacque' daa mbi'a, ¿lé'? Tac por nac gu' mèn co' ndxela's loo Tad, non mèn no nanee mèn le' daa nacque' thib mbi' co' mtel' Tad Crist no ndxen di's che'n Tad Jesucrist loo mèn.

<sup>3</sup> Con'a nac co' nduben razon cón chenen loo chol mèn co' ndryal no cón chenen par ñèe mèn ñèene' ¿ché', licque', nac daa xa' co' ndxe' di's xal mtel' Tad Crist daa? <sup>4</sup> ¿Ché' ndyac gu' le' nu' indxàpte derech hua nu' no gu' nu' chol con', cà'? Ndxàpque' nu' derecha. <sup>5</sup> ¿Ché' ngue li gu' cuent indxàpte nu' derech hue' nu' thib xa'got co' ndxela's co' nac sa'lpe' nu' co'se' tyoo nu' ned par ya nu' viaj xal ndli taamas myen' co' mtel' Tad Crist no myen' co' ndxác huespe' Tad Crist por xna' Tad Crist no xal ndli Pedr, ne, cà'? Ndxàppe' nu' derecha, ey. <sup>6</sup> No ¿ché' ngue li gu' cuent tropte nu' Mbèl' nquin que zin' huiz par li nu' gan thib le' rol lua' nu' par hua nu' leque ya xo'f zin' nu' zin' co' mxo'f zin' Tad loo nu' par li nu'i, cà'? Inquinta. <sup>7</sup> Nibdizen tedib con' loo gu': ¿Ché' nzo chó solndad co' nac solndad co' ne'yaxte càa, cà'? No chó thib mèn nzo co' mdoo lus uv no yiloa ne'huade mèn xlé co' ta' lus uva, cà'? Lomisque' ne, ¿ché' nzo chó thib mbi' co' ngue xèn' thib partid mbacxil' co' ne'gude lech che'n mbacxil'a, ¿cà'? Yende mod gàca tataa, ¿lé'? <sup>8</sup> Con' co' ngue nibdizen loo gu' ndxè', ¿ché' ngue li gu' cuent naca thib di's co' angndyoodi's mèn, cà'? ¿Ché' intaandxè'de mbez cón che'n di's ndxè' loo ley che'n Moisés co' mxo'f Moisés loo mèn nación Israel, cà'? Mbezque' cón che'n di's ndxè' loo ley che'n Moisés, ne, ¿lé'? <sup>9</sup> Tac, licpe' ba'i, loo ley co' mxo'f Moisés loo mèn ndub di's co' mbez:

Ne'code gu' yex ro ngon co' ndloo ndub loo nzob triu.

¿Ché' ndyac gu' ante par quenap Diox ngon gunii Diox con' ndxè', cà'? Yende xàa. <sup>10</sup> Ndxé'leque', Diox gunii di's ndxè' por cón che'n na', ne, par gàc con' ndac loo na'. Por cón che'n na' ndub di's loo libr co' nac xti's Diox tedib lugar, co' mbez taandxè', ne: Thib mbi' co' ngan' yòo con yaarad, mbi'a ndub queeque' lezo' thop mbi' cosech loo zin'

co' ngue li mbi'. Le' mbi' co' ngue guis nzob triu na, ndxàal tyub queque' lezo' mbi' gac che'n mbi' triu co' ngue guis mbi'. <sup>11</sup> Chele' nu' mblu' loo gu' co' nac cón che'n Diox xal ngo mèn thib quèe bin loo yòo, ¿ché' ndyac gu' indxàalte lyath no gu' nu' par ta' gu' con' hua nu' no taamas con' co' nquin nu' co' nde che loo nu', cà'? Ndxàalque' li gu' con'a, ey. <sup>12</sup> Chele' taamas mèn ndxàp derech yax càa mèn loo zin' co' ndli mènna loo gu' cón che'n Tad Crist, más ndxàp nu' derech yax càa nu', ¿lé'? Per mastale' tataa ndxàp nu' derech, ale tarte ñibe' nu' loo gu' quix gu' càa nu'. Ndxé'leque', nxec yèe nu' loo con' co' nde che loo nu' par nec thib mod no nec tedib mod yende cón nca' loo cón che'n di's ndac che'n Crist loo mèn por cón che'n nu'. <sup>13</sup> Non gu' no nanee gu' le' mèn co' nxo'f zin' zin' le'n templ, mènna ndxuhua bé' co' mbec mèn loo còo' co' ndli mèn cuent ncàa Diox. No non gu' no nanee gu' le' mèn co' ndli mandad loo còo', mènna ndxàc che'n con' co' mbec mèn loo còo' co' ndli mèn cuent ncàa Diox, ¿lé'? <sup>14</sup> Lomisque' mod ne, mnibe' Tad Crist le' mèn co' ngo yalbàn cón che'n di's ndac, hua mènna con' li mènna gan cón che'n zin' co' nxo'f zin' mènna. <sup>15</sup> Per hui' gu' nexa. Part cón chenen, tarte ña'ben nec thib con' loo gu' par huan. Ne' ne' ntel'en di's loo ye's co' mtel'en loo gu' par non gu' nquin daa con' par ntel' gu' con' huan. Tac más quee lezon ne'càaden con' ta' gu' càan mastale' gath huin daa, leque ne'taden gust lezon cón che'n zin' co' mxo'f zin' Diox loon co' ngue lin loo gu' anxle'.

<sup>16</sup> Mastale' ngon yalbàn cón che'n di's ndac, indlidena par càba con' ndac loon. Ndxé'leque', naquinque' gon yalbàn. Tac chele' daa ne'lida, ¿prob daa izlyo'!, Diox teti daa axta plóthe. <sup>17</sup> Chele' daa ngo yalbàn xal neete lezon, licpe' ba'i, ndxàal yax càan. Per chele' daa lii tac nquinque' lina, sya, non gu', licque', Diox nac xa' co' mxo'f zin' zin' ndxè' loon par lina. <sup>18</sup> Cona, ngue niin loo gu': Con' co' angngue lin gan por ngon yalbàn co' nac cón che'n di's ndac che'n Crist, co' ndlu' xá mod lyá' mèn loo con' ryes, nac le' daa ndyac lezo' le' daa imbezte quix mèn càan, co' nee di's, yende cón ndxuhuan no yende cón gun por zin' co' nxo'f zin'en por cón che'n di's ndac co' ngon yalbàn.

<sup>19</sup> Mastale' yende chó mèn ndxàp derech par ñibe' yèe mèn loon loo chol con', ndxe'leque', ale ndlin ndxàc daa xal thib moz loo rye mèn par gàca tyal mèn gòn mèn di's co' tan cuent cón che'n Crist par yila's mèn loo Crist. <sup>20</sup> Co'se' ndyoodiz non mèn nación Israel cón che'n Crist, ncuanen mod ndxàc daa xal mèn nación Israel, co' nee di's, mèn co' nzo ban xan' yalnibe' che'n ley co' mxo'f Moisés loo mènna mastale' inzoden xan' yalnibe' che'n leya par be'que' tataa mod gàca tyal mènna gòn mènna di's co' tan cuent cón che'n Crist loo mènna. Thiba con' ndxè'.

<sup>21</sup> Le' tediba na, co'se' ndyoodiz non mèn co' inzode loo cón che'n ley co' mxo'f Moisés loo mèn, co' nee di's, mèn co' inactive mèn nación Israel, ale lalque' ndxàc daa xalque' nac mènna. No ndlu'en daa loo mèn xalque' nac mod che'n mènna par be'que' gàca tyal mènna gòn mènna di's co' tan cuent cón che'n Crist loo mènna. Nacque' daa mèn co' nzo xan' yalnibe' che'n ley che'n Diox tac nzoquen xan' yalnibe' che'n ley che'n Crist. <sup>22</sup> Le' loo mèn co' nac xal mèn yíiz co' ndxàc chop loo chop la's loo cón che'n Crist na, ndxàc daa xalque' mènna par be'que' tataa mod gàca tyal mènna gòn mènna di's co' tan cuent loo mènna no yila's mènna loo Crist, ne. Cona nee di's, ndlin par lalque' ndxàc daa loo rye mèn chol lugar par be'que' lin gan tyal ndxep mènna par yila's mènna loo Crist. <sup>23</sup> Ryete con' ndxè' ndlin por cón che'n di's ndac che'n Crist par sate más gac con' ndac loon por cón che'n di's ndac xal ncàba con' ndac loo taamas mèn por cón che'n di's ndac, ne.

<sup>24</sup> Nonque' gu', ¿lé'?, le' co'te' nac thib loo lue' co'te' nque' mèn carre, mèn nque' thib señ loo lue' par ñee mèn chó mèn ner zin loo señ co'se' nque' thap ga'y mèn carre, tya nque' huax mèn carre no ndli mèn puest. Per co'se' ndxelo nque' rye mèn co' nque' carre carre, thidte mbi' no maste mbli gan. Le' sya, mbi' co' mbli gana, angta'la's mèn thib con' càa mbi' por mque' mbi' carre. Cona, ngue niin loo gu': Gòc gu' xal mèn co' nque' carrea par gac gu' li gu' gan ryethe con' ndac co' angta' Crist loo gu' yiloo par mbli gu' fuerz ndlu' ndac gu' loo mèn cón che'n Crist. <sup>25</sup> Ryete mèn co' nguith loo chol yalguyith par li mèn gan loo xtàa mèn, mènna ndxàp lezo' loo chol con' co' li mal loo mènna. Licpe' ba'i,



mèna tataa ndli par li mèn gan con' co' angta' mèn càa mèna. Per con' co' càa mèna lyux yé' huize. Per ndxe'leque', con' co' càa na' nac thib con' co' ne'yiza'de thidtene, chele' na' tyoo nque loo cón che'n Tad Crist xal ndxàca loo mèn co' nque' carre. <sup>26</sup> Part cón chenen, daa nac xal thib mbi' co' nque' carre par lin thib puest. Tataa nque tee lin loo cón che'n Crist. Inacte daa thib mbi' co' alithe ndxezi'f ndxega's co'se' nque' mbi' carre. Ndxé'leque', nac daa xal thib mbi' co', licque', ngue li gan loo thib yalguyith che'n box, co' nee di's, nque' mèn punyed ro xtàa mèn. Ne'nglidena loo yalguyitha xal thib mbi' co' alithe ngyoo co' angndub ndlää puñed loo mes no loo yòo. Tataaque' ngue tee lin zin' loo cón che'n Diox. <sup>27</sup> No loo cón che'n Tad Crist co' nxo'f zin'en, leque daa nquenap daa no ndxàp lezon no ñibe'en loo ladpe'en xal thib patrón co' ñibe' loo thib moz. Tataa ndlin loo cón che'n Crist par ne'gàcte loon le' co'se' ngolo mblon yalbàn no mtethen loo taamas mèn, chàa, yigaa daa loo Crist xal thib mbi' co' ngogaa co' ngue li con' ye'rsin'. Le' sya, tyuhuanen con' co' angcàayan yiloo.

## 10

*Pab ngue co'x loo mèn ilé'de nac cón ndli mèn co'se' ncòo' mèn yéc mèn no nsál' mèn ya' mèn loo chol mdo' no loo chol gunab.*

<sup>1</sup> Ndlyazen le' gu' non no ñee gu', mèn huesen, le' Diox ngo no xudgool na' le'n xcuaucó' gunaa xal thib pilar. No nguri'th ryete xudgool na' tedib lad ro níttó' co' lèe Níttó' Nanee por cón che'n Diox, ne. <sup>2</sup> Ryete mèn nación Israel thidte mqueltàa con Moisés co'se' thidte ngo no Moisés mèna xan' xcuaucó' gunaa xal thib pilar no co'se' nguri'th no Moisés mèna tedib lad ro níttó'a. Con'a ngòc loo mèna xal co'se' ndxàc bautizar mèn. <sup>3</sup> Látha, ryete mèn co' mqueltàa no Moisés nduhua thib loo xít no thib loo lua' co' mda' Diox loo mèna par hua mèna. <sup>4</sup> Ryete mèn co' nda no Moisés ngu nít co' mda' Diox loo mèna, ne, par gu' mèn nít. Níta mzi'f loo thib quèe co' mblu' Diox loo mèna. Quèe co' mbyú' loo mèna ngòc thib con' bzye', co' nee di's, yub Crist ngòc quèea tiempa. Crist ngo no mèna. <sup>5</sup> Mastale' tataa mbli Diox loo mèna par nduhua mèna lua' mèna no ngu mèna xít mèna, huax mèna ne'ngòode lezo' ngnèe mèna Diox. Por cona, mbeth Diox mèna co'te' nagán.

<sup>6</sup> Loo con' co' mbli Diox loo mèna, té'th na' thib con'. Nec thib mod no nec tedib mod ne'tyubte yo'f lezo' na' par li na' con' ye'rsin' xal mdyub yo'f lezo' mèna mbli mèna con' ye'rsin'. <sup>7</sup> Ne' ne' gac gu' mèn co' ndyub xib loo chol mdo' no nsál' gu' ya' gu' loo chol mdo' no loo chol gunab xal mbli mèna. Tac cón che'n mèna ndub loo libr co' nac xti's Diox, co' mbez: Ryete mèn nación Israel mqueltàa. Mbli nab mèna thib lni. Làth xtau'a, nduhua mèna. Ngu mèna. Ngoloa, mbil' nii mèna loo thib mdo' co' mtocua' mèna. <sup>8</sup> Niin loo gu', ne: Indxàalte li na' yalburrid. Ne' ne' indxàal cua'n na' xin' huan na' xal mbli ndxep mèn nación Israel co'se' mcua'n mèna xin' huan mèna. Leque huiza, mnibe' Diox loo Moisés par guth mèn nación Israel gal bson mil xtàa mèn nación Israel co' mcua'n xin' huana. <sup>9</sup> Ne' ne' aseli na' cua'n na' xquin na' loo Tad Diox par ñee na' ñeene' ché' tetii Tad Diox na' xal mbli mèn nación Israel co'se' asembli mèna mcua'n mèna xquin mèna par ñee mèna ñeene' ché' tetii Diox mèna por cón che'n con' ye'rsin' co' mbli mèna. No ale mbli Diox mtel' Diox huax mbel' par mquele mbel' mèna par nguth huax mèna, ne. <sup>10</sup> Ne' ne' gac gu' mèn co' ñii yèe ñii tii xexte cón che'n Diox xal mbli ndxep mèn nación Israel tiempa. No mbeth Diox mèna co'se' ngua angl, co' mtel' Diox loo mèna, par mbeth angl mèna.

<sup>11</sup> Ryete con'a ngòc loo xudgool na' tiempa, co' nee di's, loo mèn nación Israel ngòc con'a par té'th na' xá mod ndxàal que tee ban na' loo Diox, na' co' nziri' le'n tiemp ndxè', co' nee di's, nde zin' gaxle' lith no izlyo'. <sup>12</sup> Por cona, chele' chol gu' nden' mbli nèele' gu' gu' loo cón che'n Crist thidtene, nee gu' xá ngue tee ban gu' loo cón che'n Crist. Ne'stre'fque' gu', ne, cua'n xquin gu' no xtol gu' loo Crist. <sup>13</sup> Ryethe con' co' ndyactii gu' co' lya's li le' gu' ryo xà' loo cón che'n Crist lalque' nac xal ndyactii taamas mèn. Per na nii loo gu': Más huen gáp gu' yalxla's loo Diox. Diox ne'tolode la' par gac más con' ryes

no más con' naxi loo gu' co' nac co' xec gu' láth gac con'a loo gu'. Ndxé'leque', co'se' gac chol con' ryes no con' co' li xi lezo' gu', Diox lyath no gu' par riid con'a loo gu'; no par ne'xide lezo' gu' arid; no par xec gu' riid con'a loo gu'.

<sup>14</sup> Por cona, ngue niin loo gu', mèn huesen por cón che'n Crist, gu' co' nque' lezon ñèn: Blá' gu' ya ne'tolode tyub xib gu' no sál' gu' ya' gu' loo chol mdo' no loo chol gunab thidtene. <sup>15</sup> Ndyoodiz non gu' xal loo mèn co' nden' di's no mèn co' ndxàa'd di's. Leque yub gu' tub rez cón che'n con' ngue niin loo gu' ndxè' par ñee gu' ñeene' ché' lé' nac di's co' ndyoodiz non gu' o ché' ilé'de nac di's co' ndyoodiz non gu'. <sup>16</sup> Co'se' nqueltàa na' templ par li na' co' nac “Cena Santa”, co'se' ndxuhua thib thib na' thib le' chu'th pan no co'se' ndxu na' chu'th vin no ña'b na' loo Diox li ley' Diox con'a, cop co' ndxòo vin co' nac vin che'n uv, vina no pana nda' cuent loo na' thidte nac thib na' no tedib na' loo Diox no loo cón che'n Diox por cón che'n ren Crist no por cón che'n ladpe' Crist. ¿Ché' indlide na' con'a tac thidte nac na' loo Crist xal bélé'yòo ladpe' leque Crist, cà'? Cona ndli na'i, ¿lé'? <sup>17</sup> Cona nee di's, co'se' ndxuhua thib thib na' thib le' chu'th pana, ndlu'i loo na' cón che'n Crist le' Crist nac xal sate pana. Per mastale' huax mèn nac na', nac na' mèn che'n sate pana, co' nee di's, nac Crist. No co'se' ndxuhua na' thib le' pana, ndlu'i loo na' cón che'n xá mod nac na' che'npe' Crist.

<sup>18</sup> Hui' gu' no bli gu' xtùuz cón che'n mèn nación Israel. Co'se' ndxuhua nguley' che'n mèn nación Israel bélé' co' mbec nguley' loo còo' che'n Diox, ¿ché' indxàta loo nguley'a thidte ndxàc nguley'a con Diox, cà'? Lìcque', ndxàc tataa loo mèn, ¿lé'? <sup>19</sup> ¿Xá nee gu' cón che'n di's co' ngue go ron loo gu' ndxè'? ¿Ché' ndli gu' cuent anze'f ntac con' co' mbec gu' loo mdo', cà'? Yende xàa. No ¿ché' ndli gu' cuent anze'f ntac mdo', cà'? Yende xàa. Ndxé'leque', yende cón ntac mdo', ey. <sup>20</sup> Per ndxe'leque', ngue niin con' ndxè' loo gu': Le' bélé' má' co' ndxuth mèn co' inacte mèn nación Israel, co' mbec mèn loo mdo', ingue becte mèn bélé' má' loo mdo'. No inacte co', lìcque', ngue bec mèn bélé' má'a loo Diox. Ndxé'leque', mbec mèn bélé' má' loo xpíi co' nac che'n meexù'. Cona, ngue niin loo gu': Indlyasten le' gu' thidte gac loo cón che'n meexù'. <sup>21</sup> Yende mod gu' gu' bin co' nac cop che'n “Cena Santa” che'n Tad Crist chele' gu' más ndli cas xal nac costumbr co' mbed no gu' no co' nac mbec gu' con' ndxuhua gu' loo mes loo xpíi che'n meexù'. Ne' ne' yen mod hua gu' thib le' chu'th pan co' nac “Cena Santa” che'n Tad Crist chele' gu' más ndli cas costumbr co' mbed no gu' co'se' mbec gu' con' ndxuhua gu' loo mes loo xpíi meexù'. Cona nee di's, yende mod thidte gac gu' con Crist chele' gu' leque tiemp be' ndli cas loo costumbr co' nguled no gu' co' mbli gu' co' nac cón che'n xpíi che'n meexù'. <sup>22</sup> ¿Ché' iñeede gu' co'se' tataa ndli mèn, ngue cua'n mèn mod par yecloo Diox loo mèn, cà'? ¿Ché' nden' gu' no ché' ndli gu' cuent axta arid mbi' gu' par ne'zyebte gu' co'se' yecloo Diox loo gu', cà'? ¿Pà yilazen con'a!

*Pab ngue ta' cuent loo mèn ya yende chó costumbr cuee no cà' mèn loo cón che'n Crist co'se' nzole' mèn loo cón che'n Crist. No nque' lezo' mèn ñèe mèn xtàa mèn chele' mèn, lìcque', nzo loo cón che'n Crist.*

<sup>23</sup> Lìcpe' ba'i, ryete con' co' ndlya's na' li na', nzoque' mod li na'i conse' gaca con' co' ne'càbte cua'n na' xquin na' loo Tad. Per iryede con'a càb con' ndac loo mèn co' ndxàc hues na' no xtàa na', mèn co' ndxela's par tolo té'th mèn no ta' mèn cuent par tyubdi's ndac mèn loo Tad Crist. <sup>24</sup> Ne'líde gu' xtùuz cua'n gu' mod par càb con' ndac ante loo gu'. Ndxé'leque', fcua'n gu' mod par gac con' ndac loo hues xtàa gu' por cón che'n gu'.

<sup>25</sup> Rye clas bélé' co' ntho' mèn co'te' ndyo' bélé', ne'tyóode gu'. Fxi' gu' bélé'a par hua gu'. Ne'nibdi'ste gu' loo mèn: ¿Ché' nac bélé' ndxè' co' mblec mèn loo mes loo mdo', cà'? Yende chó mport nzo lezo' gu' cón che'n con'a. <sup>26</sup> Tac izlyo' ndxè' no ryethe con' co' nziri' loo izlyo' nac che'npe' Tad Diox.

<sup>27</sup> Chele' chol mèn co' inacte mèn co' ndxela's loo cón che'n Diox por cón che'n Crist li convid gu' co'se' nzo thib yalhua liz mèn, no chele' gu' lya's ya thuhua gu' rye nityèth co' cuec mèn loo gu' no yende chó mport nzo lezo' gu' nibdi's gu' loo mèn: ¿Ché' nac

nítyèth ndxè' co' mblec gu' loo mdo', cà'? par ne'ten'te gu' le'n lezo' gu' no gab gu' loo lezo' gu' ilé'de nac co' ngue li gu'. <sup>28</sup> Per chele' chó mèn co' ndxela's loo cón che'n Diox por cón che'n Crist nzo làtha, no gab mènna loo mèn co' nzi yuhua nítyètha: Bél' co' natoxcua' co' nac nítyèth co' nzi yuhua gu' ba' nac bél' má' co' mblec mèn guliz ndxè' loo mdo', cara, le' sya, más huen ne'huade mènna nítyèth bél' má'a. Por cón che'n di's co' mda' mènna cuent loo gu' no por cón che'n xtúuz co' mbli mènna le'n lezo' mènna por ñèe mènna nzi yuhua gu' nítyètha, más huen ne'huade gu' nítyètha loo mènna par ne'càbte thib yalquii loo mènna. <sup>29</sup> Con' ndxè' ngue niin loo gu' por cón che'n xtúuz mènna no por cón che'n con' nden' mèn co' indxela's ndacte le'n lezo' mènna. Per ndxe'leque', ingue niiden con' ndxè' loo gu' por cón che'n con' co' nden' gu' le'n lezo' gu'.

Peser nzo ndxep mèn co' ngòo loo cón che'n Diox por cón che'n Crist co' gab: ¿Chó nac mèn co' ndxàp derech par tub rez mèn no la's mèn no quexù' mèn daa por cón che'n xtúuz co' nden' daa le'n lezon ante tac tedib mèn nden' le'n lezo' nzoque' mod hua mènna con' o yende mod hua mènna con'. Yende chó cón che'n mènna par tataa li mènna xtúuz, ¿lé'? <sup>30</sup> Cona, ngue niin loo gu': Chele' daa mbez loo Diox: Diox quix U', Diox, co'se' ndxuhuan no co'se' ndxun xíten no luan, ¿chonon le'le' tedib mèn ñii ngòc nguàal con' cón chenen loo con' co' mbezen loo Diox: Diox quix U', Diox, por ndxhuan xíten no lua'en, sya? Yende chó cón che'n mènna con'a, ¿lé'? <sup>31</sup> Por cona, ngue niin loo gu': Que naca ndxuhua gu' lua' gu', que naca ndxu gu' xít gu', o que naca ndli gu' chol con' co' ngue tee li gu', bli gu' con'a par gàc con' roo con' xèn loo Diox, ndee gu'. <sup>32</sup> Ne'lide gu' par cua'n mèn xquin mèn no xtol mèn, que nàca mèn nación Israel, que naca mèn co' inacte mèn nación Israel, o que naca mèn co' nac hues xtàa gu' co' nqueltàa loo cón che'n Diox. <sup>33</sup> Bli gu' xal ncuanen mod huen ndxàc daa con mèn loo ryete con'. Tac ncuanen mod huen ndxàc daa loo ryete mèn. Tac co'se' ncuanen mod par huen ndxàc daa con ryete men, ingue cuanten con' co' càb con' ndac ante loon. Ndxè'leque', ndlina par càba con' ndac loo huax mèn par gàca lyá' mèn loo con' ryes.

## 11

<sup>1</sup> Gure li gu' xal ndlin loo con' mbli Crist no loo con' co' mblu' Crist.

*Pab ngue ta' cuent loo mèn xá mod ndxàal yòo mènngot loo cult o servis.*

<sup>2</sup> Daa ndli le' gu' ndyu' loon, mèn huesen por cón che'n Crist, tac gu' nte'que' lezo' ryethe con' cón chenen, no nzi lique' gu' ryete con' xal mnibe'en loo gu' no xalque' mté'th gu' loon. <sup>3</sup> Lyazen le' gu' gòn no ñee gu' con' ndxè': Le' Diox mdoo lezo' gàc con' ndxè' loo ryethe con': Le' Diox ñibe' loo Crist. Le' Crist na, ñibe' loo rye mènbi'. Le' mènbi' na, ñibe' loo mènngot. <sup>4</sup> Tac chele' thib mbi' ndub sombrel yéc co'se' cues mbi' Diox loo servis co' nac cult no co'se' co' mbi' yalbàn co' ñibe' Diox co' mbi', naca thib con' par thyon mbi' chele' mbi' ndub sombrel yéc látha. <sup>5</sup> Per ndxe'leque', co'se' mbez chol xa'got Diox no co'se' xa'gota nde'th cón che'n Diox loo mèn, chele' xa'gota intau'te yéc, leque xa'gota ngue tethon xa'gota loo con' ngue li xa' por intau'te xa' yéc xa'. Tac chele' xa'gota ne'tau'te yéc xa'gota, cona nee di's, lalque' nac xa'gota xal thib xa'bi' co' nchub yéc. <sup>6</sup> Per chele' mènngota ne'tyalte tau' yéc con lar'bay, más huen leque mènngota ndxàal ñibe' loo xtàa mènngota par cho' mènngota yis yéc mènngota axta ñaaleque' yéc mènngota xal yéc thib mènbi' co'se' ncho' mènbi' yis yec mènbi'. Per chele' con' co' li mènngota li par thyon mènngota, masque' huen tau' mènngota yéc mènngota con lar'bay. <sup>7</sup> Le' por part che'n mènbi' na, indxàalte tub mènbi' sombrel yéc mènbi' co'se' mbez mènbi' Diox no co'se' ngo mènbi' yalbàn tac mènbi' nac xin no xnaa che'n Diox. No nac mènbi' con' roo con' xèn loo Diox. <sup>8</sup> Tac co'se' mtoxcua' Diox nerleque' mèn, mènna nerleque' ngòc thib mbi' co' mtoxcua' Diox. Ngoloa, che'n leque bél' lad mbi'a mbli Diox par mtoxcua' Diox thib xa'got co' ngòc ner xa'got. <sup>9</sup> Lìcpe' ba'i, ner mbi'a ne'ngui'th yáalte por cón che'n thib xa'got. Ndxè'leque', Diox mtoxcua' ner xa'got por cón che'n ner mbi'a. <sup>10</sup> Por cona, ndxàal tau' mènngot yéc mènngot par lu' mènngot le' mènngot ndubdi'sque' loo Diox no ndxàp mènngot mod loo sa'l mènngot. Tataa ndxàal li mènngot, ne, par tyac lezo' angl

ñèe angl ndyubdi'sque' mènqot loo sa'l mènqot. <sup>11</sup>Loo cón che'n Tad Diox, Tad Diox mblo xnee le' thib xa'bi' naquin tyub no xa'bi' thidte xa'got no le' thib xa'got na, naquinque' tyub no thidte xa'bi' co' gac sa'l xa', ne. <sup>12</sup>Xalque' ngocsua' ner xa'got con bél' lad thib mbi' no con sith lad thib mbi', tataa mod, ne, ryete mènbi' ndxáal loo thib xa'got. Per ryete con'a ngóc por cón che'n Diox.

<sup>13</sup>Leque gu' bnibe' no blobe' loo lezo' gu', ¿ché' huen naca le' thib xa'got cuez Diox co'se' intau'te xa'gota yéc xa'gota con lar'bay, cà'? Ihuenta naca tataa, ¿lé'? <sup>14</sup>¿Ché' inden'te gu' leque thib xa'bi' ndlu' nazab ñaa thib xa'bi' co'se' nol' yis yéc xa'bi'a, cà'? <sup>15</sup>Ndxe'leque', chele' yis yéc thib xa'got nol', ndxác con' guryath no con' guryèn loo xa'gota por nol' yis yéc xa'gota. Tac Diox mbli nol' yis yéc xa' par yau' yéc xa'gota xal ntau' thib lar'bay yéc xa'gota. <sup>16</sup>Per cón che'n di's co' ngue tel'en loo gu' ndxè', ndxep mèn lya's cua'n di's cón che'n mod co' ngue niin loo gu' ndxè'. Lyazen non mènna ya yende chó tedib costumbr ngue no mèn co' ndxela's co' nqueltàa chol lugar. Thiba con' ndxè'.

*Pab ngue ta' cuent loo mèn cón che'n co'se' ndxuhua mèn pan no ndxu mèn vin co' nee di's nac "Cena Santa".*

<sup>17</sup>Le' tediba na, ñibe'en loo gu' xá mod ndxáal li gu' co'se' queltàa gu' par thidte hua gu'. Yende mod lin par tyu' nec thib gu' làtha. Tac lugar de gac con' ndac làth gu' co'se' nqueltàa gu', ale ndxe'leque', ndxác con' ye'rsin' làth gu'. <sup>18</sup>Nerleque' con' co' mbinen cón che'n gu' nac: Co'se' nqueltàa gu', ale ndxác rol gu' làth xtàa gu' loo con' co' indxòode lezo' gu'. Thib part ndxelazena. No tedib part na, indxela'sta. <sup>19</sup>Ndyac gu' naquinque' càb gu' di's no tyoodi's gu' par li la's gu' con' no tub rez gu' con' co' li gu' no par yú' ñeene' chó gu' co' nzo làth gu' co', licque', mbli nèeque' gu' gu' loo cón che'n Crist. <sup>20</sup>Cona, ngue niin loo gu': Co'se' thidte nqueltàa gu' par hua gu' co' mbez na' nac "Cena Santa", láth co'se' ndxác rol gu' loo con' co' indxòode lezo' gu'a, cona inacte le' gu', licque', ngue yuhua "Cena Santa". <sup>21</sup>Con' ndxè' ndxác loo gu' co'se' thidte nqueltàa gu' par hua rsè gu' xalque' ndxuhua rsè mèn liz mèn ndoore' queltàa ryete gu' par thidte yòo gu' par li gu' "Cena Santa". Per ndxep gu' co' nzo làtha, ale ndxuhua gu' loo xtàa gu'. No inda'de gu' thib ro con' co' ndxuhua gu'a hua xtàa gu'. Le' taamas gu' na, nzi lan'. No taamas gu' na, ndxuhua no xtàa gu' axta plóthe axta mduuz gu'. <sup>22</sup>¿Cón nac co' ngue li gu'a, à'? ¿Ché' ingue node gu' liz gu' co'te' ya thuhua gu' no gu' gu', cà'? Ngue no gu' liz gu', ¿lé'? Co'se' ngue li gu' con'a, ngue xiis no gu' mèn co' nqueltàa le'n templ che'n Diox. No ngue tethon gu' hues xtàa gu' co' ne'ngui'th node con' hua. ¿Cón lya's gu' tolo niin loo gu', à'? ¿Ché' tlin par tyu' gu' loo mèn, cà'? Ne'liden le' gu' tyu' loo mèn, cara.

*Trè' ndlu' cón che'n di's co' gunii Tad Jesús co'se' nduhua Tad Jesús con myen' xin' mté'th Tad Jesús.*

*(Mt. 26.26-29; Mr. 14.22-25; Lc. 22.14-20)*

<sup>23</sup>Di's co' ngue niin loo gu' ndxè' nac co' mblu' yub Tad Crist loon cón che'n "Cena Santa". Cón che'n con'a mblolen yalbàn loo gu' no mblu'lana loo gu'. Con' ndxè' nac di's co' mblu' Tad Crist loon: Leque yál'a, ndoore' co'se' mda'xù' Jud Iscariot Tad Jesús loo mèn, láth ndub yuhua no rsè Tad Jesús myen' xin' mté'th Tad Jesús loo mes, mxen Tad Jesús pan. <sup>24</sup>Co'se' ngolo ndxab Tad Jesús: Diox quix U', Diox, loo Diox cón che'n pana, mchì'x Tad Jesús pana, no ndxab Tad Jesús loo myen' xin' mté'th Tad Jesús: Fxen gu' thib le' thib le' pan ndxè' no dhua gu' pan ndxè'. Con' ndxè' nac co' ngue lu'en loo gu' cón che'n bél'yòo laden co' tyactii por cón che'n gu'. Taandxè' hua gu' pan ndxè' par te' lezo' gu' cón chenen. <sup>25</sup>Lomisque' mod ne, co'se' ngolo nduhua mènna pan, mxen Tad Jesús thib cop vin. Ngolo ndxab Tad Jesús: Diox quix U', Diox, loo Diox, tolo ndxab Tad Jesús loo myen':

Vin co' nzo le'n cop ndxè' ndlu' cón che'n conveñ cub co' gac nèe co'se' gath daa. Ryete vez co'se' taandxè' gu' gu' vin ndxè', te' lezo' gu' cón chenen.

Ngoloa, ngu thib thib myen'a thib ro thib ro vina.

<sup>26</sup> Tac co'se' cadque' hua gu' pan ndxè' no gu gu' vin ndxè', co' nee di's, nac “Cena Santa”, hora ngue ta' gu' cuent cón che'n xá mod nguth Tad Jesús. No toloque' hua gu' pan ndxè' no gu gu' vin ndxè' xalque' ngue niina loo gu' axta co'se' gác huiz co'se' bere Tad Jesús, yi'th Tad Jesús loo izlyo' tedib vez.

*Pab ngue lu' xá mod ndxàal más huen li mèn rsè co' ngòc rsè co'se' nduhua rsè Tad Jesús pan no co'se' ngu Tad Jesús vin con myen' xin' mté'th Jesús.*

<sup>27</sup> Por cona, ngue niin loo gu' cón che'n co'se' indxàalte li mèn con'a: Mèn co' huaxù' pan no mèn co' guxù' vin co'se' li mèn “Cena Santa”, mèn na ngue cua'n xquin mèn no xtol mèn loo Diox xalque' mèn co' mbeth Crist. Tataa gaca loo mèn co'se' indxàalte hua mèn pana no gu mèn vina co' nac “Cena Santa”. <sup>28</sup> Por cona, lyazen ner teche texyath thib thib gu' xtùuz gu' no lezo' gu' par ñee gu' ñeene' ché' nzo chó xèn chó xyàn nzo lezo' gu' ndoore' li gu' rsè co' nac “Cena Santa”. Chele' gu' yende cón nden' le'n lezo' gu', nzoque' mod hua gu' pan no gu gu' vin co' nac rsè co' nac “Cena Santa”. <sup>29</sup> Tac chele' mèn ndxuhua pan no ndxu mèn vin co' nac “Cena Santa” co'se' indxàalte li mèn con'a, ncàba loo mèn quexù' Diox mèn tac inden'te mèn le' cón che'n “Cena Santa” nac cón che'npe' lad Crist. <sup>30</sup> Tac por ndxuhua ndxep gu' pan no ndxu ndxep gu' vin che'n “Cena Santa” co'se' indxàalte li gu' tataa, por cona, leque gu' ncu'a'n xquíiz gu' no ndxelo a ndxác gu' xal thib mèn yíiz co' mbuu's. No ale axta mcàba yalguth loo huax xtàa gu'. <sup>31</sup> Per chele' na' la's loo leque na' no teche texyath leque na' xtùuz na' no lezo' na' par ñee na' ñeene' ¿ché' nzo chó xyàn nzo le'n lezo' na' ndoore' li na' rsè co' nac “Cena Santa”? más huen ne'yòode na' loo rsè co' nac “Cena Santa”. Le' sya, tataa mod ya inquinte tub rez Diox cón che'n na'. <sup>32</sup> Co'se' ngolo mdub rez Diox cón che'n con' ye'rsin' co' mbli ndxep na'a, que nzo ne' ñee lezo' na', Diox tetiipe' na' par ne'gàcte loo na' quexù' Diox na' xal quexù' Diox taamas mèn loo izlyo'.

<sup>33</sup> Por cona, ngue niin loo gu' mèn huesen: Co'se' thidte queltàa ryete gu' par yòo gu' loo “Cena Santa” le'n templ, cued gu' par tolo queltàa no gu' xtàa gu' xal ndxàala. Le' yiloa na, li gu' “Cena Santa”. <sup>34</sup> Chele' chol gu' nzi lan' tac nzi bed gu', ndxàal ner ya thuhua rsè gu' liz gu' ndoore' yi'th gu' templ par ne'quexù'de Diox gu' por con' ngue li gu' le'n templ. Le' co'se' beren, gal neen máa gu' xá nziri' gu' tedib vez na, tolo ñibe'en cón che'n taamas con' co' tolo li gu', ndee gu'.

## 12

*Pab ngue lu' mèn xal nac thib thib zin' co' ndli Xpii Natú' che'n Diox par nxo'f zin' Xpii Natú' zin'a loo mèn par li mèn zin'a.*

<sup>1</sup> Nalle' lyazen toodiz non gu', mèn huesen por cón che'n Crist, cón che'n xal ndli Xpii Natú' zin' loo thib thib mèn par gác li mèn a sirv no par gác li mèn a zin' thib mod no tedib mod loo mèn co' ndxela's loo Diox por cón che'n Jesucrist. Lyazen le' gu' gòn cón che'n con' ndxè' no ta' gu' cuent cón che'n con' ndxè'.

<sup>2</sup> Gu' naneeque' no nda'que' gu' cuent co'se' tarte gác gu' mèn co' ndxela's loo Diox por cón che'n Crist, gu' mda' lugar loo rye mèn co' ngòc hues xtàa gu' par mzi mchep mèn a gu' par mdub xib gu' loo chol mdo' co' indxácte ndyoodi's. No que nzo ne' ñee lezo' gu', mbli gu'i. <sup>3</sup> Por cona, lyazen le' gu' huen huen ta' cuent yende chó mèn nzo co' nzo Xpii Natú' loo par gab mèn a mbi' ye'rsin'túb nac Jesús. Lomisque' ne, yende chó nzo Xpii Natú' che'n Diox loo co' ne'càbte le' Jesús nac Tad loo ryethe con'. Tabque' mèn a le' Jesús nac Tad no Jef loo ryethe con'.

<sup>4</sup> Nzo huax con' co' angmbli Xpii Natú' loo mèn par ndxác mèn li mèn a sirv loo Diox thib mod tedib mod. Per leque yub Xpii Natú' nac co' ndli le' mèn a gác li sirv loo Diox thib mod tedib mod. <sup>5</sup> Huax loo zin' nzo co' nxo'f zin' mèn cón che'n Diox. Per loo zin'a thidte Diox ñibe' par li mèn zin'a. <sup>6</sup> Anze'f huax mod nzo par xo'f zin' mèn zin' loo xtàa mèn cón che'n Diox. Per leque yub Diox nac xa' co' ndli par ryo' loo zin' co' ndli mèn a. <sup>7</sup> Per leque yub Diox mxo'f zin' thib zin' loo thib thib mèn par ryo' xo'f loo mèn a le' Xpii Natú' nzo no mèn a. Le' yiloa na, càb con' ndac loo rye mèn co' ndxela's por con' co' ndli



Xpii Natú' loo mènà. <sup>8</sup> Tac, lìcque', loo thib ned mèn ndli Xpii Natú' zin' par ndxác mènà lu' mènà loo xtàa mènà cón che'n Diox. Loo tedib ned mèn ndli Xpii Natú' zin' par nane mèn no non mèn cón che'n xti's Diox par lu' mèn cón che'n xti's Diox loo chol mèn co' nac xtàa mèn. Ndxác con'a loo mèn por cón che'n leque yub Xpii Natú'a. <sup>9</sup> Le' loo tedib ned mèn na, ndli Xpii Natú' le' mènà ndxáp yalxla's loo Diox axta plóthe. Le' loo taamas mèn na, Xpii Natú' ndli par ndxác mènà teyac mènà mbíiz. <sup>10</sup> Le' loo taamas mèn na, ndli Xpii Natú' le' mènà ndli chol yalguzye'. Le' loo taamas mèn na, ndli Xpii Natú' le' mènà ndxác co yalbàn no lu' mènà loo xtàa mènà cón che'n Crist. Le' loo taamas mèn na, ndli Xpii Natú' par non mènà, ¿ché' lìcque' nac di's co' ngo mèn yalbàn che'npe' Diox o ché' ilicte nac di'sa? Le' loo taamas mèn na, ndli Xpii Natú' le' mènà gác tyoodi's chol di'stèe co' indxònte nec thib mèn. Le' loo taamas mèn na, ndli Xpii Natú' le' mènà gác coxcan di'stèe che'n mèn co' ndyoodi's chol di'stèe co' indxònte mèn. <sup>11</sup> Ryete zin' ndxè' nxo'f zin' leque yub Xpii Natú' loo mèn. No ndli Xpii Natú' loo mèn thib thib mèn li xà' xà' zin' xal nee lezo' Xpii Natú' li Xpii Natú' loo mèn.

*Pab ngue ta' cuent loo mèn le' ngudloo mèn no nza mèn no ya' mèn no nii mèn nac che'n thidte lad mèn.*

<sup>12</sup> Loo cón che'n Diox nac Crist, con ryete mèn co' ngòo loo cón che'n Crist, thidte con' xal nac bélyòo lad mèn thib con' co' nac thidte con'. Thib lad mèn nac huax part, ¿lé'? Mastale' huax part naca, per ndxe'leque', che'n thidte lad nac rye parta. Lomisque' na' ne, mastale' huax mèn nac na' co' ndxela's loo Crist no loo cón che'n Crist, nac na' che'npe' Crist xal nac rye part che'n lad na' loo na' loo Crist. <sup>13</sup> Tac por cón che'n leque Xpii Natú' ngòo na' loo cón che'n Crist xal ndxàca loo mèn co'se' ndxác bautizar mèn le'n nít par ndxác ryete na' che'n Crist xal nac thib thib part che'n lad mèn loo mèn, que naca nac na' mèn nación Israel, que naca nac na' taamas mèn che'n chol nación, que naca nac na' moz yèe loo patrón, que naca nac na' mèn co' yende chó ñii loo no co' yende chó ñibe' loo. Ngulàa Xpii Natú' loo rye na'. Ngòo Xpii Natú' loo rye na' par ñibe' Xpii Natú' loo na'.

<sup>14</sup> Beren, niin loo gu' tedib vez: Bélyòo lad mèn huax part nac. <sup>15</sup> Angab na'i. Chele' nii mèn gác gab loo mèn: Le' daa inacte ya' lùu, por cona, inacte daa che'n lùu, ¿ché' por cona inacte nii mènà che'n lad mènà, cà'? Yende xàa. Naca, ¿lé'? Thiba con'a.

<sup>16</sup> Le' tediba na, chele' nza mèn gác gab loo mèn: Le' daa inacte ngudlool, por cona, inacte daa che'n lùu, ¿ché' por cona inacte nza mèn che'n lad mèn, cà'? Tyè'. Naca, ¿lé'? <sup>17</sup> Chele' dipte lad mèn nac ngudloo mèn, ¿xá mod gòn mèn con', sya? No chele' dipte lad mèn nac nza mèn, ¿xá mod tub xi mèn con', sya'? Yende mod gàca tataa, ¿lé'? <sup>18</sup> Diox mzi'f thib thib part co' nac lad mèn xalque' mblobe' lezo' Diox mbli Dioxa. <sup>19</sup> Chele' ryete part che'n lad mèn nac thidte part, ¿máa lad mèn, sya? Naquinque' que no mèn rye part co' nac lad mèn co' nzi'f lad mèn. <sup>20</sup> Mastale' huax part nac lad mèn, lìcpe' ba'i, thidte lad mèn nac lad mèn.

<sup>21</sup> Chele' ngudloo mèn gác tyoodi's, yende mod gab ngudloo mèn loo ya' mèn: Inquinte daa lùu, cara. No chele' quèe yéc mèn gác tyoodi's, yende mod gab quèe yéc mèn loo nii mèn: Inquinte daa lùu. <sup>22</sup> Ndxè'leque', más naquin que no mèn part che'n lad mèn co' indlide mèn cuent ntac loo mèn. <sup>23</sup> Part che'n lad mèn co' nden' mèn ndli más nthyon mèn chele'i yú' loo mèn, parta más nabe's ntau' mèn. Chele' part co' nac lad mèn ndxú' loo mèn co' indxàalte yú' loo mèn, part cón che'n mèn más nabe's ntau' mèn lad mèn no nquenap mèn part lad mèn par ne'lú'de mèn part lad mèn loo xtàa mèn, ¿lé'? <sup>24</sup> Ndxè'leque', part che'n lad mèn co' ndxú' loo mèn, parta inquinte tolo quenap mèn nabe'ste. Per yub Diox mzi'f thib thib part co' nac lad mèn. No ndli Diox le' mèn más nquenap part che'n lad mèn co' nden' mèn xhuite ntac loo mèn. <sup>25</sup> Tataa mbli Diox par más ntac part che'n lad mèn co' iñaade ntac par lalque' gác thib thib part lad mèn. Tataa mod mènà li par gàca quenap mèn no tau' mèn thib thib part lad mèn xalque' nquenap no ntau' mèn taamas part lad mèn. <sup>26</sup> Lomisque' mod ne, chele' thib part lad mèn nden' yalnè, le' sya, dib lad mèn ngue's yalnè. No chele' thib part lad che'n thib mbi' nac co'

más ndli mbi' cas ó más ngue lezo' mbi' ñèe mbi', dibte lad mbi' nden' huenque' nzo mbi' por cón che'n con'a.

<sup>27</sup> Lomisque' mod ne, ryete gu' co' nac mèn co' ngòole' loo cón che'n Crist, nac gu', co' nee di's, part che'n lad Crist. No thib thib gu' nac che'npe' Crist xalque' nac thib thib part lad mèn loo mèn. <sup>28</sup> Cona, ngue niin loo gu': Diox mxo'f zin' thib thib zin' loo ndxep mèn par xo'f zin' mèn zin' ndxè' loo mèn co' nqueltàa loo cón che'n Crist chol lugar. Ner mblec Diox ndxep mèn co' mtel' Crist co' ndxe' di's che'n Crist. Le' ngoloa na, mblec Diox tedib cua' mèn co' ngo yalbàn cón che'n Crist. Ngoloa na, mblec Diox tedib cua' mèn co' ndlu' loo mèn cón che'n Crist. Ngoloa na, mblec Diox tedib cua' mèn co' ndxác ndli chol yalguzye'. Ngoloa na, mblec Diox tedib cua' mèn co' ndxác ndli par ndxác mèn yíiz. Ngoloa na, mblec Diox tedib cua' mèn co' ndlyath no xtàa no mèn co' ndyoo ner no co' ndyoo naa loo mèn co' nqueltàa loo cón che'n Jesucrist. No mblec Diox tedib cua' mèn co' gác tyoodi's tedib di'stèe co' yende chó mèn ndxòn. <sup>29</sup> ¿Ché' por cona nac rye mènà mèn co' mtel' Crist, mèn co' ndxe' di's, cà'? ¿Ché' por cona ngo rye mènà yalbàn, cà'? ¿Ché' por cona nac rye mènà maistr co' ndlu' cón che'n Crist loo mèn, cà'? ¿Ché' por cona ndli rye mènà yalguzye', cà'? Yende xàa. <sup>30</sup> ¿Ché' por cona ndxác rye mènà teyac rye mènà xtàa mèn, cà'? ¿Ché' por cona ndxác rye mèn tyoodi's rye mènà chol di'stèe co' indxònte xtàa mèn, cà'? ¿Ché' por cona ndxác rye mènà coxcan mènà di'stèe co' ndyoodi's mèn co' indxònte taamas mèn, cà'? Yende xàa. <sup>31</sup> Fcua'n gu' mod, yey, le' Xpii Natú' angli le' gu' tolo gác par li gu' xal nac ner con' co' ngolo guniin loo gu' co' nac más con' ndac. Per nalle', trè' par delant loo cart ndxè' daa tolo lu' loo gu' xá mod más que tee ban ndac gu' loo Diox loo taamas con' co' guniilen loo gu'.

### 13

*Pab ngue lu' loo mèn xá mod ndxàal que' lezo' mèn ñèe mèn xtàa mèn no xá mod ndxàal gác mèn mèn co' non carida ñèe xtàa mèn.*

<sup>1</sup> Hui' gu' nexa. Chele' daa ndyoodi's huax di'stèe co' ndyoodi's chol mèn no ndyoodizguè'en chol di'stèe co' ndyoodi's angl che'n Diox co' ne'gònte mèn no co' ne'ta'de mèn cuent no làth xtau'a inque'de lezon ñèen chol mèn co' ndxác huesen no xtàan, nac daa xal thib tambor co' alithe ndyez. No nac daa xal thib le' yi'f co' nte's mèn co' alithe ndyez, co' nee di's, anxle' ndyoodizen no yende cón ntac daa loo Diox. <sup>2</sup> Chele' daa nac mèn co' mbli Diox ngo yalbàn cón che'n Crist loo mèn, no chele' Diox mbli par nonen no tan cuent cón che'n ryethe con' co' nzo casloo loo Diox cón che'n co' mblo xnee Diox par li Diox, no chele' Diox mbli pan nonen no tan cuent cón che'n ryethe con', no chele' Diox mbli par ndxàpen yalxla's loo Diox axtaque' lin gan techeen thib yii co'te' ndub yii no làth xtau'a inque'de lezon ñèen mèn huesen no mèn xtàan, yende cón ntac daa loo Diox. <sup>3</sup> Lomisque' ne, chele' daa li'th ryete xyònen no yalgon' co' ngue non par tana càa mèn co' ndyac yaltii no chele' daa gath loo quii no loo bèel por cón che'n di's ndac no làth xtau'a inque'de lezon ñèen huesen no xtàan, yende cón ntac daa loo Diox.

<sup>4</sup> Mèn co', licque', nque' lezo' ñèe hues xtàa, mènà nexec yèe no ncha'la's mènà loo ryethe con' co' ndxác loo mèn. Mèn co', licque', nque' lezo' ñèe hues xtàa, mènà nac mèn nado' loo rye mèn. Mèn co', licque', nque' lezo' ñèe hues xtàa, mènà indxànte lezo' ñèe yalgon' che'n xtàa mèn. Mèn co', licque', nque' lezo' ñèe hues xtàa, mènà indye'ste no inxyal'te loo xtàa mèn. Ne' ne' inac mèn co' nque' lezo' ñèe hues xtàa mèn mèn co' ndxoc xab co' ñaa nít nayèe par hui' taamas mèn loo mènà xal ndryec nxyub mènà. <sup>5</sup> Mèn co', licque', nque' lezo' ñèe hues xtàa, mènà ndxàp mod ñèe hues xtàa. Incua'nte mènà mod ante gác con' ndac loo cón che'npe' mènà. Ne' ne' inda' mènà lugar nzyo yéc mènà setilte. Ne' ne' inac mènà mèn co' ngosua' xyàn le'n lezo' cón che'n chol con' ye'rsin' co' ndli taamas mèn loo mènà. <sup>6</sup> Mèn co', licque', nque' lezo' ñèe hues xtàa, mènà indyacte lezo' ñèe chol mèn co' ndli con' co' inactive con' nalì no con' nambii loo xtàa mèn. Ndxè'leque', mèn co' nque' lezo' ñèe hues xtàa, mènà ante ndyac lezo' co'se' nque' tee ban mèn ante loo co' nac con' licpe'. <sup>7</sup> Mèn co', licque', nque' lezo' ñèe hues

xtàa, mènà ntau' loo cón che'n xtàa mèn par ne'gònte taamas mèn cón che'n xtàa mènà. Mènà ndxàp yalxla's loo hues xtàa mènà. Mènà, ne, nzi quee lezo' par càb ryethe con' ndac loo mènà. Mènà, ne, nxec yèe loo ryethe con' ndxàc loo mènà.

<sup>8</sup> Ne'ryede mèn co' nque' lezo' ñèe hues xtàa. Per zin thib huiz no zin thib ze co'se' ne'tolode te'th mèn di's co' ndxab Diox co' gac. Tac mbyathle' no mbyènle' ryethe con' ndxab Diox. No zin thib huiz no zin thib ze ya ne'tolode tyoodi's mèn chol di'stèe co' yende chó mèn gòn. No zin thib huiz no zin thib ze co'se' ya inquinte lu' mèn loo hues xtàa mèn cón che'n ryethe con' co' nzo casloo loo Diox no co' mblo xnee Diox par li Diox. <sup>9</sup> Láth naban nu', licque', ne'ta'de nu' cuent cón che'n ryethe con'. Lomisque' ne, ante co' ndxácte nu' ngo nu' yalbàn cón che'n Diox. <sup>10</sup> Per ndxe'leque', co'se' ngolo mdyaa ryethe con' co' gac loo nu', axta syare' tolo ta' nu' cuent no más clarleque' non nu' cón che'n ryethe con'.

<sup>11</sup> Co'se' ngòc daa myen' bix, alithe ndyoodizen xal ndyoodi's myen' bix. Alithe mblin xtùuz xal ndli myen' bix xtùuz. Per co'se' ngòcle' daa thib mbi', mblá'en ryethe con' co' nac mod co' alithe ndli myen' bix. <sup>12</sup> Lomisque' mod ne, láth be' naban na', loo ryethe cón che'n Diox ndxos xtùuz na' no ne'ñee'de na' cón ngue li na'. Ndxàca loo na' xal mèn co' nathath ngüi' loo thib spej loo con' co' nac cón che'n Diox nalle'. Per co'se' gac huiz co' tyaa ryethe con' co' gac loo na', syare' clarleque' hui' na' no ten' na' no li la's na' ryethe con' xal thib mbi' co' ndxe'sleque' ngüi' con'. Per nalle' axta ne' ne' indan cuent no ne' ne' ñeen co' huenleque' cón che'n ryethe con'. Per huiza, syase tan cuent no ñeen ryethe con' xalque' non Diox no nanee Diox ryethe con' cón chenen nalle'. <sup>13</sup> Por cona, ngue niin loo gu' nalle': Nzo son con' co' ndxàalque' tolo li mèn thidtene. Con'a nac con' ndxè': Thiba: tolo gáp mèn yalxla's loo Diox thidtene. Le' tediba na, nac: toloque' cue quee lezo' mèn loo con' co' gac loo mèn thidtene. Le' tediba na, nac: tolo que' lezo' mèn Diox, no que' lezo' mèn ñèe mèn hues xtàa mèn thidtene. Per con' co' nac más con' roo con' xèn co' ndxàal li mèn loo yon con' ndxè' nac: que' lezo' mèn Diox, no que' lezo' mèn ñèe mèn hues xtàa mèn thidtene.

## 14

*Pab ngue bez loo mèn cua'n mèn mod par co mèn yalbàn xal ndlyath no Xpii Natú' che'n Diox mèn.*

<sup>1</sup> Cona, ngue niin loo gu': Bli gu' co' nzote mod li gu' par tolo que' lezo' gu' Diox no que' lezo' gu' ñèe gu' hues xtàa gu' axta plóthe. Làth xtau'a, cua'n gu' mod angli Xpii Natú' loo gu' le' gu' gác li gu' ryethe con' co' ñibe' Xpii Natú' li gu' xal guniilena loo gu'. Per más ndlyazen le' gu' cua'n mod angli Xpii Natú' loo gu' le' gu' co yalbàn cón che'n Crist co' ndlya's Xpii Natú' xo'f zin' Xpii Natú' loo gu'. <sup>2</sup> Mèn co' ndyoodi's tedib di'stèe co' nec thib mèn ne'gácte gòn, mènà indyoodi's node xtàa mèn. Ndxè'leque', mènà ndyoodi's no Diox. No di's co' ndyoodi's mènà yende chó mèn gác gòn di's co' ndyoodi's mènà. Mastale', con' co' ndli mènà xtùuz no con' co' nzo le'n lezo' mènà co' ndyoodi's mènà nac di's co' nac che'n Xpii Natú', no nac di'sa thib di's co' yende chó mèn ta' cuent no co' yende chó mèn gác gòn. <sup>3</sup> Per ndxe'leque', mèn co' nde'th no co' ngo yalbàn loo xnaa loo taamas mèn, mènà nde'th no ngo mènà yalbàn par tolo té'th mèn no tolo ta' mèn cuent par tyubdi's ndac mèn loo cón che'n Crist. No nco'x mènà loo mèn. No ntegán mènà lezo' mèn loo cón che'n Crist par tolo ye'th lezo' mèn loo cón che'n Crist. <sup>4</sup> Mèn co' ndyoodi's tedib di'stèe co' yende chó mèn gác gòn, mènà ndli par tolo nté'th leque mènà cón che'n Crist. Per mèn co' nde'th no co' ngo yalbàn cón che'n Diox, mènà ndli par tolo té'th no ta' taamas mèn cuent, mèn co' nqueltàa loo Diox no loo cón che'n Diox.

<sup>5</sup> Ndlyazen le' ryete gu' tyoodi's di'stèe co' yende chó mèn gác tyoodi's. Per más ndlyazen te'th gu' no co gu' yalbàn cón che'n Diox loo mèn. Tac más ntac loo Diox cón che'n mèn co' nde'th no co' ngo yalbàn leque mèn co' ndyoodi's chol di'stèe co' nec thib mèn ne'gácte tyoodi's no co' nec thib mèn ne'gácte ta' cuent cón che'n di'stèe co' ndyoodi's tedib mèn. Huen gàca chele' thib mèn co' nzo làtha gác coxcán di'sa loo mèn.

Le' sya, mèn co' ngoxcan di's ngue li par tolo té'th no ta' mèn cuent cón che'n Diox, mèn co' nqueltàa loo Diox loo cón che'n Diox. <sup>6</sup> Per nalle', mèn huesen por cón che'n Crist, ngue niin con' ndxè' loo gu': Chele' daa gal nee máa gu' par nedrè' no alithe tyoodizen di's co' nac tedib di's co' ne'gácte gu' gòn, ¿chó con' ndac lii loo gu' chele' daa lii tataa, à'? Yende chó con' ndac lii loo gu', ¿lé'? Per chele' daa go xo'f con' loo gu', no chele' daa lu' loo gu' con' co' ndxác daa cón che'n Diox, no chele' daa te'th con' loo gu' co' ñibe' Diox tan cuent loo gu', no chele' daa lu' chol ley' loo gu' co' nac ley' ndac, le' sya, huen càba no huen gàca loo gu', ¿lé'? <sup>7</sup> Hui' gu' nexa. Angab na'i: Chele' chol instrument co' ndxol' myen' musc co' nac xal flaut no arpa co' nac con' co' inabante no co' indyoodi'ste, chele' mènà ne'gol' ndacte dìi co' ndxol' mènà xal nda solf, ¿xá mod gòn mèn dìi co' ndxol' thib thib instrumenta chele' mènà tataa ndxol' instrumenta, sya? Ne'yen ndacte dìi, ¿lé'? <sup>8</sup> Lomisque' mod ne, chele' thib solndad co' nque' toc loo trompet na, incuez ndacte solndada toc loo trompet, ¿xá mod gac nab taamas solndad ya solndad loo xó', sya? Yende moda, ¿lé'? <sup>9</sup> Tataa ndxàca loo gu', ne, tac chele' gu' tyoodi's di's co' yende mod gòn mèn no co' yende mod ten' mèn cón nee di's, ¿xá mod gòn mèn no ten' mèn cón nee di's di's, sya? Yende moda, ¿lé'? Tac di's co' ndyoodi's gu'a nac di's co' alithe ndyoodi's gu' loo mbii. <sup>10</sup> Na' nda'que' cuent no non na' nzo huax di'stèe dib athu loo izlyo'. Thib thib di'stèea xà' xà' ndxèn. Lomisque', ryete mèn co' ndyoodi's di'stèea, thib thib mènà ndxòn no nda' mènà cuent xal nac di'stèepe' co' ndyoodi's mènà. <sup>11</sup> Per chele' daa indxònte cón ngue tyoodi's mènà loon, gac daa loo mènà xal mèn tith co' indxònte cón ngue toodi's mènà loon. No lomisque', gac mènà xal mèn tith loon tac indxònte mènà di's co' ngue toodiz non mènà. <sup>12</sup> Cona, ngue niin loo gu': Ya que ndlya's gu' no sate más ndryo' ndlyen' lezo' gu' le' Xpii Natú' angli par tolo gac gu' li gu' huax con' co' nac mod ndac, bli gu' co' nzote mod gac li gu' loo mèn co' nqueltàa loo Diox par tolo té'th mèn no ta' mèn cuent par tyubdi's ndac mèn loo cón che'n Diox. <sup>13</sup> Por cona, ngue niin loo gu': Chele' chol mèn co' nzo làth gu' ndyoodi's thib di'stèe co' yende chó gu' gac gòn no co' yende chó gu' gac ta' cuent, guuz gu' loo mènà leque mènà cuez Diox par gac mènà coxcan mènà di's loo gu'. <sup>14</sup> Tac chele' daa ngue bez Diox con thib di's che'n tedib di'stèe co' tyoodizen co' yende chó mèn gòn no co' yende chó mèn ta' cuent, sya, le'n lezon ngue bezen Diox. Per axta ne' daa ne'ñeede cón ngue toodizen le'n lezon. Por cona, ngue niin loo gu': Por part cón chenen, yende cón ntac con'a par lina. <sup>15</sup> ¿Cón lin, sya? Ndxep vez mbezen Diox con di'stèe co' yende chó mèn ndxòn. Per más mbezen Diox xal ndlin xtùuz con di'stèepe' daa par gòn mèn cón ndyoodizen no par ten' mèn cón ngue toodizen. Lomisque' ne, ndxol ron ndxep con di'stèe co' indxònte mèn. Per más ndxol ron con di'stèepe' na' par gòn mèn cón ngue yol ron no par ten' mèn cón ngue yol ron. <sup>16</sup> Lomisque' mod ne, chele' gu' ngue bez di's ro di's xèn loo mèn cón che'n Diox no mbez gu' Diox quix U', Diox, loo Diox con di'stèe co' yende chó mèn gac gòn no co' yende chó mèn gac ten', yende mod cuez mèn co' nzo làth gu' Diox, mèn co' tarte té'th ndac cón che'n Crist xal nac di'stèe co' mbez gu' Diox co'se' indxònte mènà di'stèe co' ngue bez gu' Diox, ¿lé'? <sup>17</sup> Lìcque', huenque' nac co' ndli gu' co'se' mbez gu' Diox con di's co' indxònte mèn. Per por part cón che'n mèn co' indxònte di's co' mbez gu', yende mod li gu' par tolo té'th mèn no ta' mèn cuent par tyubdi's ndac mèn loo cón che'n Diox por di'stèe co' mbez gu' co' indxònte mènà. <sup>18</sup> Daa mbez Diox quix U', Diox, loo Diox làth mèn co' ndxela's loo Diox por cón che'n Tad Crist por más ndxác daa ndyoodizen tedib di'stèe co' indxònte mèn leque rye gu'. <sup>19</sup> Per por part cón chenen, co'se' nqueltàa non mèn co' nqueltàa loo cón che'n Diox, más huen naca, ndyaquen, tyoodizen ga'yte di's loo mèn xal ndlin xtùuz par gàca le' con di's co' ryo' ron co' nac di'stèepe' na' na, di'sa li par más té'th tedib mèn leque tyoodizen si' mil di's co' nac tedib di'stèe co' inactive di'stèepe' na' co' yende chó mèn gòn no co' yende chó mèn nda' cuent no co' yende chó mèn ten'.

<sup>20</sup> Mèn huesen por cón che'n Crist, ne'gàcte gu' xal myen' bix loo con' co' ndli gu' xtùuz. Ndxle'leque', gòc gu' xal myen' bix co' tarte té'th li arid co' nac chol con' ye'rsin'.

No bli gu' xtùuz no ftyóo gu' xal mèn co', lïcque', mté'thque' no co' huen huen nda' cuent par tyubdi's ndac gu' loo cón che'n Diox. <sup>21</sup> Gu' nda'que' cuent no nonque' gu' le' loo libr co' nac xti's Diox ndub di's co' mbez: Con xti's che'n mèn tith co' ndyoodi's tedib di'stèe co' nac xà' di'stèe tyoodiz non mèn ndxè'. No ne' por tataa lin ne'tyalte mènà gòn mènà ron, ndxab Tad Diox. <sup>22</sup> Por cona, ngue niin loo gu': Di'stèe co' ngue toodi's mèn co' yende chó mèn ndxòn no co' yende chó mèn ta' cuent nac xal thib xin no thib xnaa co' ndlu' xal thib señ loo mèn co' tarte yila's loo Diox por cón che'n Tad Crist. Ne'nglide Diox par ngàc con'a loo mèn co' ndxela's loo Diox por cón che'n Tad Crist. Ndxé'leque', mbli Diox par ngure mèn co' ngo yalbàn loo mèn co' ngola's loo Diox por cón che'n Tad Crist. Ne'ntel'te Diox mèn co' ngo yalbàn par gàc mènà thib señ loo mèn co' tarte yila's loo Diox por cón che'n Tad Crist. <sup>23</sup> Co'se' ryete mèn co' ndxela's queltàa thidte lugar, no tlo rye mènà tyoodi's mènà thib di'stèe co' yende chó mèn gác gòn no co' yende chó mèn gác ten', no chele' chol mèn co' indxela'ste, mèn co' tarte té'th ndac cón che'n Crist, yòo xi'th gu' co' ndxela's láth ndyoodi's gu' tedib di'stèe, ¿ché' ngue li gu' cuent ne'gabte mènà loo xtàa mènà le' gu' nquée mbii yéc, cà'? Tab mènà tataa, ¿lé'? <sup>24</sup> Per co'se' queltàa ryete gu' thib lugar loo cón che'n Diox, chele' gu' clarleque' te'th no co' gu' yalbàn cón che'n Crist loo mèn hora, no chele' thib mèn co' tarte yila's no co' tarte té'th cón che'n Crist yòo xi'th gu', le' sya, mènà gác nado' no ten' mènà lïcque' nac di's co' ngue te'th gu' no co' ngo gu' yalbàn. Le' sya, leque mènà teche texyath xtùuz mèn no lezo' mèn loo con' ye'rsin' co' mbli mèn. No thyon mèn co'se' gòn mèn di's co' ngue go gu' yalbàn. <sup>25</sup> Le' sya, tataa mod, chàa, te' lezo' mènà cón che'n ryethe con' ye'rsin' co' mbli mènà xtùuz le'n lezo' mènà. Látha ne, chàa, tyub xib mènà no cotloo mènà loo izlyo' loo Diox par ña'b mènà loo Diox ton' Diox xtol mènà. No tlo mènà, li mènà cas loo Diox. No gab mènà: Lïcpe' ba'i, nzo no Diox gu' trè', ndee.

*Pab ngue bez loo mèn: Nabe'ste ftoodi's gu' thib thib con' xalque' nac co' ndlu' di's co' nac xti's Diox loo mèn par li mèn xal ñibe' di's che'n Diox.*

<sup>26</sup> Ya yende cón más tolo niin loo gu' nalle', mèn huesen por cón che'n Crist. Con' ndxè' nac co' ndxàal li gu': Co'se' queltàa ryete gu' thidte lugar loo cón che'n Diox, thib gu' lab thib part loo libr che'n Salmos. Le' tedib gu' na, lu' cón che'n xley' che'n Crist loo mèn. Le' tedib gu' na, lu' cón che'n con' mxo'f loo Diox loo gu'. Le' tedib gu' na, tyoodi's di'stèe co' yende chó mèn gác gòn. Le' tedib gu' na, coxcan di's che'n di'stèe co' indxònte mèn co' ngolo mdoodi's tedib mèn. Ante con' ndxè' ndlyazen gác gu' li gu' par tolo té'th mèn no tolo ta' mèn cuent par tyubdi's ndac mèn loo cón che'n Crist. <sup>27</sup> Chele' ndxep gu' nzo làtha co' ndyoodi's thib di'stèe co' yende chó mèn gác gòn no co' yende chó mèn càb, ante ta' gu' lugar tyoodi's chop o son mènà no maste loo cult. Ne'ta'de gu' lugar tyoodi's rye mènà thidte junt. Ndxé'leque', tyoodi's thib gu'. Yilóa, tyoodi's tedib gu'. Yilóa, tyoodi's tedib gu'. No ñibe' gu' yo thib mèn co' coxcan di'sa, ne, làtha. <sup>28</sup> Per chele' yende chó mèn nzo co' coxcan di'sa làth gu', más huen ne'tyoodi'ste mènà di'stèe co' yende chó gu' gòn no co' yende chó gu' càb làth queltàa mèn loo cón che'n Diox. Bnibe' gu' loo mènà tataa li mènà liz mènà par ndoo lite cuez mènà Diox liz mènà. <sup>29</sup> Lomisque' mod ne, chele' ndxep mèn lya's te'th co' ndxab Diox no co' mènà yalbàn, gu' co' ndyoo ner no co' ndyoo naa loo mènà, bnibe' gu' ner te'th thib mènà no ner co' thib mènà yalbàn. Yilóa, te'th tedib mèn o co' tedib mèn yalbàn. Yilóa, te'th tedib mèn o co' tedib mèn yalbàn. No bnibe' gu' le' taandxep mèn co' ngo yalbàn huen huen tub nza xal ngo mèn co' ngo yalbàn yalbàn par ñee mènà ñeene' ché' clar nte'th mènà no ngo mènà yalbàn xal ndxàala. <sup>30</sup> Per chele' Diox xo'f loo no lu' Diox ndxep con' loo thib xtàa mèn co' nac dyap mènà co' ngue te'th no co' ngue go yalbàna, gab gu' loo ner mbi' co' ngo too nte'th no co' ngo yalbàn, tyub ner mbi' ndxep par te'th mbi' co' nac dyap mbi' con' co' mxo'f loo Diox ndxep con' loo par co' mbi'a yalbàn, ne. <sup>31</sup> Le' sya, tataa mod más nabe'ste co' thib thib gu' yalbàn, gu' co' mblec Diox par co' gu' yalbàn cón che'n Crist. Tataa mod sate más li gu' par té'th ryete gu' cón che'n Crist no gác ye'th lezo' thib xtàa gu' no tedib



xtàa gu' loo cón che'n Crist. <sup>32</sup> Mèn co' nde'th no co' ngo yalbàn cón che'n Crist, mèn naquin gáp lezo' no nado' di's nado' cuent te'th mèn, no co' mèn yalbàn xal guneepe' lezo' Diox. <sup>33</sup> Na' nda'que' cuent le' Diox inacte Diox co' ndli par ndxetoo di's ndxetoo cuent làth mèn. Ndxé'leque', ndli Diox par ndxo nagàl lezo' mèn loo Diox no par cue ban mèn rye nda mèn no rye ndye'th mèn làth xtàa mèn.

Gu' nda'que' cuent xal ñibe'en loo mèn hues na' co' nqueltàa rye lugar co'te' nzo mèn co' ndxela's loo Diox por cón che'n Tad Crist, mèn co' ngro xà' loo cón che'n xab izlyo' par ngòc mèn che'npe' Diox, tataa ngue ñibe'en loo gu' nalle', ne. <sup>34</sup> Ndlyazen ryete mèngot xèe cue làth ryete mèn co' nqueltàa loo cón che'n Diox le'n templ tac Diox ne'nda'de lugar par te'th mèngot no co' mèngot yalbàn. Ndxé'leque', ñibe' Diox tyubdi's mèngot xal ñibe' mèn co' ndyoo naa xal mnibe' ley co' mxo'f Diox loo mèn. <sup>35</sup> Chele' chol mèngot co' thidte mqueltàa no gu' loo cón che'n Diox ndlya's gòn ndxep con', ñibdi's mèngota loo sa'l mèngota co'se' nzo ryop sa'l mèngota liz ryop sa'l mèngota'. Tac ilé'de nac ñibdi's mèngot chol con' làth co'se' nzo mèn loo cult le'n templ.

<sup>36</sup> ¡Jaa! ¿Ché' ndyac gu' por part cón che'n gu' mdyoxcua' di's co' nac xti's Diox no nzo di's co' nac xti's Diox par ngue no mèn di's, cà'? ¡Aa que naxèn gu' se! Yende mod gàca tataa. O ¿ché' ndyac gu' ante loo gu' mzin xti's Diox, cà'? ¿Chó yila's tataa naca? Yende, ¿lé'? <sup>37</sup> Chele' làth gu' nzo ndxep gu' co' non mèn nac gu' mèn co' mciui Diox par te'th gu' di's co' ndxab Diox no nac gu' mèn co' mblu' Xpii Natú' loo par ndxác gu' li gu' ndxep con' xal guniilena loo gu' loo cart ndxè', ften' gu' di's ndxè' no fta' gu' lugar yaa'd di's ndxè' le'n lezo' gu' no co' ro gu' le' di's co' ngue que'en ye's loo gu' ndxè' nac di's co' ñibe' Tad Crist loo gu' par que tee li gu'i xal ñibe' Tad Crist loo gu'. <sup>38</sup> Per chele' chol gu' co' nziri' trè' ne'yila'ste no ne'tyalte gu' yaa'd di's co' ngue tel'en loo gu' loo ye's ndxè' le'n lezo' gu', ne' ne' inda' gu' lugar ndxela's gu' loo Crist.

<sup>39</sup> Por cona, ngue niin loo gu', mèn huesen por cón che'n Crist: Blo yéc gu' par li gu' co' nzote mod gác te'th gu' no co' gu' yalbàn cón che'n Diox. No leque tiempa, ne'ca'de gu' loo mèn co' lya's tyoodi's chol di'stèe co' yende chó gòn no co' yende chó càb làth gu'. <sup>40</sup> Per ndlyazen no ñibe'en loo gu', ryete con' co' ngue ñibe'en co' ndxàal li gu' loo cult co'se' nqueltàa gu' loo cón che'n Diox, nabe'ste bli gu'i no xèe cue gu'.

## 15

*Pab ngue ta' cuent loo mèn xá mod ngro xban Tad Crist.*

<sup>1</sup> Per nalle', mèn huesen por cón che'n Crist, lyazen le' gu' te'que' lezo' cón che'n di's ndac co' mblolen yalbàn no co' mdethlen loo gu'. Cón che'n di's ndac co' mbin gu'a, gu' mdyalque' mbin gu'i no nguaa'd di'sa le'n lezo' gu' no le'n xtùuz gu'. No loo cón che'n di's ndaca, gu' nzi nèeque' thidtene. <sup>2</sup> Por cón che'n di's ndac co' mblon yalbàn loo gu'a, gu' mblyá'le' loo con' ryes. Huen nda gu' chele' gu' tolo li nèe gu' gu' no tolo te' lezo' gu' xal nac di's ndaca xal mblon yalbàn loo gu'. Per chele' gu' ndxác guyith lezo' loo con'a, le' sya, ndxác di's ndac ndxè' xal thib con' anxle' loo gu' tac ne'ngala'ste gu' loo con' co' nac licpe'.

<sup>3</sup> Nerleque' con' co' mblin, mblu'en loo gu' xalque' mblu' Tad Crist loon le' Tad Crist nguth por cón che'n xquin na' no xtol na' xalque' ndub di's loo libr co' nac xti's Diox. <sup>4</sup> Mca's mèn Tad Crist. Ngoloa, ngolo son huiz ngro xban Tad Crist xalque' ndub di's loo libr co' nac xti's Diox, ne. <sup>5</sup> Ngolo ngro xban Tad Crist, mblu' too Tad Crist loo Pedr. Ngoloa, mblu' too Tad Crist loo rye si' fchop myen' co' mtel' Tad Crist co' ndxe' di's ndac che'n Tad Crist. <sup>6</sup> Ngoloa, mblu' too Tad Crist loo masre' ga'y ayo mèn co' ndxác hues na' no xtàa na' por cón che'n Tad Crist. Axta nalle' casque' rye mèn be' naban, mastale' nguth ndxep mèn. <sup>7</sup> Ngoloa, mblu' too Tad Crist loo Cob. Ngoloa, mblu' too Tad Crist loo ryete si' fchop myen' co' mtel' Tad Crist, myen' co' ndxe' di's che'n Tad Crist loo mèn pál nalle'.

<sup>8</sup> Co'se' ngolo mblu' too Tad Crist loo rye mèn, lultleque' mblu' too Tad Crist loon, ne. Ale ngòc daa xal thib mbeto' co' ngóol yèe loo cón che'n Tad Crist co'se' ngolazen loo Tad

Crist. <sup>9</sup> Per mastale' tataa mbli Tad Crist loon, nden'en le'n lezon no ndyaquen le' daa nac thib mbi' co' más intacte loo taamas myen' co' mtel' Tad Crist co' nac mèn co' ndxe' di's che'n Tad Crist loo cón che'n Tad Crist. Tataa ndyaquen no tataa ndlin cuent cón chenen tac daa mque tee mdub ngu's mèn co' ngola's loo Diox por cón che'n Tad Crist. <sup>10</sup> Per nase nac daa thib mbi' co' ndxe' di's cón che'n Tad Crist nalle' por cón che'n con' ndac co' angmbli Diox loon. Ne'ngàcta thib con' anxle' loon. Tac, ndxe'leque', daa más ndxath ndxe' lezo' loo cón che'n zin' co' mxo'f zin' Crist loon leque rye myen'a. Per ingue niiden naca con' angmblin. Ndxle'leque', con' co' ngue lin, ingue lidena ante por cón chenen. Ante ndlina tac Diox indlá'ya'de daa ned ngue tee'en. Diox ndlyath noque' daa. No ndli Diox ndxàc con' ndac loon ned ngue tee'en. <sup>11</sup> Per yende chó mport nzo lezon cona, que naca daa, o que naca myen' co' mtel' Tad Crist co' ndxe' di's che'n Tad Crist co' ngo yalbàn. Por yalbàn co' mblo nu' loo gu', leque yalbàna mbli par ngola's gu', ne.

*Pab ngue ta' cuent loo mèn le' mèn co' ngola's loo Crist no loo cón che'n Crist, mènna ryo xban làth mèn co' nguth.*

<sup>12</sup> No nalle' ndlyazen niin tedib con' loo gu': Chele' nu' ngo yalbàn cón che'n Tad Crist le' Tad Crist ngro xbanle' làth mèn nguth, ¿xá mod mbez ndxep gu' làth gu' ne'ryo xbante mèn co' nguth, sya? <sup>13</sup> Cona, ngue niin loo gu': Chele' mèn nguth ne'ryo xbante, le' sya, ne' Tad Crist co' nac yub Tad Crist ne'ngro xbante, sya, xàa. <sup>14</sup> Lomisque' ne, chele' Tad Crist tarte ryo xban, le' sya, anxle' ngo nu' yalbàn. No lomisque', yende cón ntaca ndxàp gu' yalxla's loo Diox. <sup>15</sup> No chele' Tad Crist, licque', tarte ryo xban làth mèn nguth, le' sya, nu', ne, nac mèn gutyè' tac nu' mde'th cón che'n Diox le' Diox mblo xban Tad Crist làth mèn nguth. Chele' mèn nguth, licque', ne'ryo xbante, le' sya, ne' ne' tar co xban Tad Diox Tad Crist làth mèn nguth, ne, ¿lé'? <sup>16</sup> Tac chele' mèn nguth ne'ryo xbante, ne' ne' tar ryo xban Tad Crist axta nalle', ne, sya, xàa. <sup>17</sup> Lomisque' ne, chele' Tad Crist axta nalle' tarte ryo xban, le' sya, anxle' ndxàp gu' yalxla's loo Diox. Tatabe' ngue cua'n gu' xquin gu' no tatabe' ndxàp gu' xtol gu' loo Diox, ne. <sup>18</sup> Lomisque' mod ne, chele' Tad Crist tarte ryo xban, le' sya, rye mèn co' nguth, mèn co' ngola's loo Diox por cón che'n Tad Crist, mènna thidteneque' tith ngro xà' loo Diox thidtene. <sup>19</sup> Chele' na' ante nzi quee lezo' loo cón che'n Tad Crist par gàc con' ndac loo na' láth nzi ban na' loo izlyo' ndxè' no maste, le' sya, más nalyat no nayón' ndxàca loo na' axta plóthe loo rye mèn no yende cón ndli nzi quee lezo' na' loo Crist loo izlyo' ndxè', sya, xàa.

<sup>20</sup> Per inacta tataa. Ndxle'leque', licpe' ba'i, Tad Crist ngro xbanle' làth mèn nguth. Diox mbli le' Tad Crist ngòc ner mbi' co' ngro xban loo rye mèn co' nguth co' ryo xban yilóa. <sup>21</sup> Tac xalque' ngòca por cón che'n Adán ndxath rye mèn, tataaque' ndxàca nalle', ne, le' por cón che'n Crist ryo xban rye mèn co' nguth. <sup>22</sup> Texal mtlo nguth mèn por cón che'n Adán, tataa càba loo mèn co' nzo loo cón che'n Tad Crist le' mènna cue ban tedib vez por cón che'n Tad Crist, ne. <sup>23</sup> Gàc con' ndxè' loo thib thib mèn co' ndxela's loo Diox por cón che'n Tad Crist co'se' gàc tiemppe' che'n thib thib mèn xalque' ngòca loo Tad Crist co' ngòc nerleque' mbi' co' ngro xban làth mèn nguth. Le' yilóa na, ryo xban mèn co' nac che'npe' Tad Crist co'se' gàc huiz co'se' yi'th xi Tad Crist na'.

<sup>24</sup> Axta syare', gàc lult tiemp co'se' telux Tad Crist ryethe mod co' ñibe' mèn co' ndxàc gobiern, no chol mèn nac zin' yoolau, mèn co' ndli cuent ñibe', no mèn co' ndli cuent ndxàp con' la's nii no la's ya' par li Tad Diox na' ya ne'tolode ñibe' mènna loo izlyo' ndxè', co' nee di's, Tad Crist ta' lugar ñibe' Tad Diox co' nac xudpe' Tad Crist loo ryethe mèn no loo ryethe con' xalque' mnibe' Tad Crist loo ryethe con'. <sup>25</sup> Tac naquinque' ñibe' Tad Crist loo rye mèn axtaque' yilo li Diox le' ryete mèn co' nac ngolo ngola's che'n Tad Crist gàc nado' loo Tad Crist thidtene. <sup>26</sup> Lult con' co' nac con' ye'rsin' co' nquée loo mèn, co' nee di's, nac yalguth, Diox li cued. Ya ne'tolode quée yalguth loo mèn. <sup>27</sup> Diox mbli par gàc nado' rye loothe con' loo Tad Crist. Per co'se' mbez di's co' ndub loo libr co' nac xti's Diox co' ndxab: Rye loothe con' mblile' Diox par ngòc nado' con'a loo Tad Crist, clarleque' nda' di's ndxè' cuent loo na'. Per part cón che'n Diox, ¿lé'?, yende mod li Diox

par tyubdi's Diox loo mèn tac yub Diox mbli par ngòc nado' rye loothe con' loo Tad Crist. <sup>28</sup> No co'se' ngolo mbli Diox ngòc nado' rye loothe con' no mdubdi's ryethe con' loo Tad Crist co' nac xgan'pe' Diox, syare', yub tad Crist ta' lugar le' Diox ñibe' loo alux con' co' ngòc nado' loo Crist. Axta syare', leque yub Crist li ñibe' Diox loo Crist, ne, xal mnibe' Diox no mbli Diox le' Crist mnibe' loo alux con'. Tataa li Crist par gàca le' rye loothe con' gàc che'npe' Diox no gàc con' roo con' xèn loo Diox por cón che'n rye loothe con'. Thiba con' ndxè'.

<sup>29</sup> Le' tediba na, nac con' ndxè'. Gu' naneeque' no nonque' gu' nzo ndxep mèn co' ngue no costumbr ndxàc bautizar mènna por cón che'n mèn co' nguth. Per ¿chonon tataa ndli mènna chele' mèn co' nguth, licque', ne'ryo xbante, à'? ¿Chonon ndxàc bautizar mènna por cón che'n mèn nguth chele' mèn ne'ryo xbante, sya?

<sup>30</sup> No ¿chonon tolo nzi tee li nu' con' par gàc con' ryes loo nu' chele'i, licque', nac ne'ryo xbante mèn nguth, sya? Indxàalte li nu'i chele'i tataa nac, ¿lé'? <sup>31</sup> Cona, ngue niin loo gu', mèn huesen por cón che'n Crist: Atate huiz ncàb con' ryes loon ned nque tee'en. Ndlyá' ndlyá' guth mèn daa. Lìcque' nac co' ndxàc loon, mèn huesen por cón che'n Crist, por cón che'n gu' ndan gust lezon loo cón che'n Tad Crist na' tac ngola'sque' gu' loo Diox por cón che'n Tad Crist. <sup>32</sup> Cona, ngue niin loo gu' taandxè': Por cón che'n zin' co' nxo'f zin'en cón che'n di's ndac che'n Crist ngro yoo non mèn le'n ciuda Efes, mèn co' ngro' nayi' loon xal má' nayi'. Per ¿cón lin gan, sya, chele'i anxle' ngàc loon no chele' mèn co' nguth, lìcque', ne'ryo xbante? Syase, nzoque' mod gab na' xal mbez di's co' mbez mèn: Hua na' no gu' na' tac yé' huize' gath na', co' nee di's, taathe guneei loo mèn, ¿lé'? Pà gàca tataa, yey.

<sup>33</sup> Ne'ta'de gu' lugar quedii chol mèn gu' xal nac di's co' mbez mèn tataa. Tac chele' gu' ta' lugar sál' gu' con chol mèn ye'rsin', mènna teza' gu' loo mod ndac co' nzi tee ban gu' loo Tad Crist. <sup>34</sup> Ftub gu' xnii yéc gu' no ftub gu' xnii lezo' gu' xal ndxàal li gu' par ndxe'sleque' que tee ban lì gu' loo Diox par tataa mod ne'cua'nte gu' xquin gu'. Tac nzo ndxep mèn làth gu' co' inon ndacte no co' inanee ndacte cón che'n Diox, ndyaquen. Con'a, ngue niin con' ndxè' loo gu' par thyon gu' ndxep. Thiba con' ndxè'.

*Pab ndyoodi's loo mèn cón che'n xá mod ryo xban mèn co' ngola's loo Crist làth mèn co' nguth.*

<sup>35</sup> Le' tediba na, ne'stolque' nzo ndxep mèn co' ñibdi's loo gu': ¿Xá mod ryo xban mèn nguth, à'? No ¿xá mod gàc che'npe' mèn ladpe' mèn tedib vez, à'? <sup>36</sup> Aa que tont gu' co'se' tataa ñibdi's gu' loo xtàa gu' no mbez gu': ¿Xá mod ryo xban mèn nguth, yoo? ¿Xá nac lad mèn co' que no mèn tedib vez, ne, yoo?

Ché' tarte ta' gu' cuent co'se' ngo gu' biz bin loo yòo, ner ndxà'b biz bina, ndxelo, ndlyen biz bina, ¿lé'? <sup>37</sup> Co'se' ngo gu' biz bin loo yòo, indoode gu' thib xan' ña'. Ndxle'leque', gu' teyòo thib quèe biz bin no maste, que naca nzob triu, que naca chol tedib loo biz bin. <sup>38</sup> Ndxelo ngo mèn biz bin loo yòo, Diox ndli ndryoo nxyèn biz bina xal ndly'a's Diox. No ndli Diox ndlyen biz bina xalque' nac thib loo thib loo biz bin co' ngo mèn loo yòo. <sup>39</sup> ¿Ché' tarte ñee gu' rye loo bél'yòo co' naban co' nzo loo izlyo', ilalte nac, lé'? Ndxle'leque', nzo thib loo bél' co' nac bél'yòo ladpe' mèn. Le' tedib loo bél' na, nac bél' chol má' huan. Le' tedib loo bél' na, nac che'n chol loo mbin. Le' tedib loo bél' na, nac che'n chol loo mbèel. <sup>40</sup> Loo bé' nzo mbe' no huiz no mbèelhui' no taamas mbyáaz. Per xà' ñaa thib thib con'a. No nzo huax loo con' loo izlyo' ndxè'. No xà' nac thib thib con'a. No xà'que' nac mod co' nque xnii chol con' co' nzo loo bé'. No xà'que' nac mod co' ndxú' loo loo chol con' co' nzo loo izlyo' ndxè'. <sup>41</sup> Lìcque', xà'le' ñaa xnii huiz co' ntenii loo bé' loo izlyo'. No xà'guè' ñaa xnii mbe' loo bé' co' ntenii loo izlyo'. No xà'guè' ñaa xnii mbyáaz. Xà'guè' ñaa xnii co' ntenii thib loo mbyáaz no tedib loo mbyáaz. <sup>42</sup> Tataa gàca loo mèn, mèn co' ngola's loo Diox por cón che'n Tad Crist ndoore' gath mènna, co'se' ryo xban mènna tedib vez, ne. Tac co'se' ndxath mèn co' ndxela's loo Diox por cón che'n Tad Crist, ndxeza' bél'yòo lad mèn. Per co'se' ryo xban mènna làth mèn nguth, que no mènna thib lad cub co' ne'yiza'de thidtene no co' ya ne'quéede yalguth loo thidtene. <sup>43</sup> Co'se'

gath chol mèn, nca's mèn xtàa mèn xal thib con' co' yende cón ntac. Per co'se' ryo xban thebola, bél'yòo lad thebol co' ryo xban quée xnii xal thib con' co' ndxa'x bèel. Lomisque' mod ne, co'se' nax tin liz thib mbíiz naneee' na' ya yende fuerz mbíiz. Nax bed mbíiz ante gath mbíiz. Per co'se' ryo xban mbíiz co' mbuu's co'se' ndoore' gath mbíiz, anze'f thib fuerz gáp mbíiz co'se' ryo xban mbíiz. <sup>44</sup> Co'se' nca's mèn thib thebol co' ngola's loo Tad Crist, nca's mèn thebola xalque' nac bél'yòo ladpe' thebol. Per co'se' ryo xban thebol co' ngola's loo Diox por cón che'n Tad Crista, bél'yòo lad thebola gác che'npe' bé'. Texal nzo bél'yòo lad mèn co' nac che'npe' izlyo' ndxè', tataaguè' nzo bél'yòo lad mèn co' gác che'npe' bé', ne.

<sup>45</sup> Taandxè' ndub di's loo libr co' nac xti's Diox: Ner mbi' co' ngo co' ngro' lèe Adán, loo mbi'a mda' Diox yalnaban. Per Tad Crist co' ne' tedib lèe co' nac Lult Adán, Crista nac Xpii co' nac Diox co' nda' yalnaban loo mèn thidtene. <sup>46</sup> Mèn co' mblec no mxèn' Diox, ne'ngàcte mèn co' ngue no yalnaban xal naban Crist. Ndxè'leque', nac mèn che'npe' izlyo' ndxè'. Yiloa, gàca loo mèn co' ndxela's loo Diox por cón che'n Tad Crist, ban mèn xalque' naban Tad Crist nalle' por cón che'n Diox co' nac Xpii. <sup>47</sup> Ner mbi' co' mxèn' Diox, co' nee di's, nac Adán, Diox mtoxcua' mbi'a con yòo che'n izlyo', co' nee di's, ngòc Adán che'npe' izlyo' ndxè'. Per Tad Crist co' mbi'th yiloa, Crist co' ne' tedib lèe Mbryop Mbi', Tad Crist nac che'npe' bé'. <sup>48</sup> Xalque' ngòc Adán co' ngòc che'npe' izlyo', tataaguè' nac mèn co' nac che'npe' izlyo', ne. No xalque' nac Tad Crist co' nac che'npe' bé', tataaguè' nac mèn co' ndxela's loo Tad Crist, nac mèn che'npe' bé'. <sup>49</sup> Texal nac na' che'npe' izlyo' nalle', tataaguè' gàca loo na' lalque' gác na' xal Crist co' nac che'npe' bé'.

<sup>50</sup> Lyazen niin thib con' loo gu', mèn huesen por cón che'n Crist: Mèn co' nac ante bél' no ren, co' nee di's, nac che'npe' izlyo' ndxè' no maste, mèn yende mod yòo loo cón che'n Diox par ñibe' Diox loo mèn. Niin loo gu', ne: Mèn co' alithe ndxath co' ngòc ante cón che'npe' izlyo' ndxè', yende mod yòo mèn loo cón che'n Diox par ñibe' Diox par ne'gathte mèn más. <sup>51</sup> Hui' gu' nexa. Daa ndlyaz non gu' no ta' gu' cuent cón che'n thib con' co' yende chó mèn tarte ñee: Iryede na' co' ndxela's loo Diox por cón che'n Tad Crist gath. Ndxè'leque', ryete na' chàa, zye' loo. <sup>52</sup> Huiza, chàa, thib atilte gàca loo na' xal co'se' ntu' mèn no nxa' mèn ngudloo mèn. Gàca loo mèn co'se' gác lult vez que' angl toc con trompet. Tac, lïcque', angl que' toc con trompet. Le' sya, mèn co' ngola's loo Diox por cón che'n Tad Crist, mèn co' nguth, ryo xban mèn con thib lad mèn co' thidtene ne'quèede yalguth loo tedib vez. Le' na' co' be' naban hora na, chàa, zye' loo, na' co' ndxela's loo Diox por cón che'n Tad Crist. <sup>53</sup> Tac naquinque' tataa gàca loo na', na' co' ndxela's loo Diox por cón che'n Tad Crist, le' ladpe' na' co' yiza' ndxè' gác thib ladpe' na' co' ne'yiza'de thidtene. Lomisque' ne, naquinque' gác le' ladpe' na' ndxè' co' ndxath gác thib ladpe' na' co' ya ne'quèede yalguth loo tedib vez thidtene. <sup>54</sup> Co'se' bél'yòo ladpe' na' ndxè' co' ndxeza' zye' loo par ya ne'yiza'da thidtene, no co'se' gàca loo bél'yòo ladpe' na' ndxè' co' ndxath zye' loo par ya ne'tolode quée yalguth loo bél'yòo ladpe' na' tedib vez, syare' gàca xal ndub di's loo libr co' nac xti's Diox xal nac di's co' ndxab: Diox mbli gan par ya ne'tolode gath mèn. <sup>55</sup> Axta syare' gab na' loo Diox: Diox quix U', Diox, tac ne'gathte nu' tedib vez par tolo tyactii nu' loo con'a más. No gab na' loo Diox: Diox quix, U', Diox, ya yende chó mèn tolo gath par ca's mèn xtàa mèn panteón. <sup>56</sup> Tac por cón che'n xquin mèn co' mbli' ley co' mxo'f Moisés loo mèn ndyactii mèn co'se' nquée yalguth loo mèn. Leya mquexù' mèn. <sup>57</sup> Per Diox quix Diox gab na' loo Diox le' Diox mbli par ne'lide yalguth gan par ryo xà' na' loo Diox par tith yo na' loo Diox. Tataa mbli Diox ndxàca loo na' por cón che'n Tad Jesucrist na'.

<sup>58</sup> Por cona, mèn huesen por cón che'n Crist, gu' co' nque' lezon ñèen, toloque' gure nèe gu' loo cón che'n Tad Crist. Thidte bli gu' yéc gu' no thidte bli gu' lezo' gu' loo cón che'n Tad Crist, ne. No tolo té'th gu' no ta' gu' cuent par tyubdi's ndac gu' loo cón che'n zin' co' mxo'f zin' Tad Crist loo gu'. Gu' nonque' no naneequè' gu' le' zin' co' ngue xo'f zin' gu' loo Tad Crist, inacte con'a thib zin' anxle', ndee gu'.

## 16

*Pab ngue ta' cuent loo mèn thop mèn centav co' gac ayud par càa mèn co' ndxela's xal mnibe' Pab loo mèn li mèn.*

<sup>1</sup> Le' cón che'n ayud co' thop gu' par lyath no gu' mèn co' ndxela's, co' ngro xà' loo cón che'n xab izlyo' no co' ngòc che'npe' Diox, mèn co' ndyactii ciuda Jerusalén na, ndlyazen li gu'i xal mblu'en no xal mnibe'en loo mèn co' nqueltàa loo cón che'n Diox co' nqueltàa chol lugar par ned le'n yèezya' che'n làaz mèn galas. Tataa lyazen li gu', ne. <sup>2</sup> Ndlyazen co'se' gac ner huiz sman, thib thib gu' tan'que' pla centav xal nda'i lugar loo gu' no xal nzo gu'. Le' sya, co'se' gal neen máa gu' par nedrè', ya inquinte quéé lyàa gu' hora par thop gu' ayud co' naquin na' huiza. <sup>3</sup> No co'se' zin daa loo gu', tel' na plá mèn co' cui gu'. No leque tiempa tel'en cart loo mèn par tan cuent loo cart loo mèn ciuda Jerusalén le' mèn co' nde lá' tmi co' nac ayud co' nac con' ndac co' mbli gu', mèn co' nac mèn co' hue' carta nac mèn co' ndoo lite mtel' gu'. <sup>4</sup> No chele' gu' ndyac naquin gan con mèn ciuda Jerusalén par yilá' nu' tmi, gan, xàa. Yende cón lii. Thiba con' ndxè'.

*Pab mda' cuent loo mèn chópe' yèez ya riid Pab.*

<sup>5</sup> Le' tediba na, tan cuent loo gu', co'se' tenen ned par ga neen máa gu' par nedrè', nerleque' con' lin, ga ri'then par ned le'n yèezya' co' nac ned làaz mèn macedon. Le' yilóa na, zin daa loo gu' le'n ciuda Corint. <sup>6</sup> No thib descuid go non gu' ndxep tiemp. O peser go non gu' par ri'then tiemp xil' le'n ciuda gu'. Le' yilóa, co'se' ri'th tiemp xil', nee gu' xal li gu', ya lyath no gu' daa ned ga que tee'en. <sup>7</sup> Taandxè' ngue niin loo gu' tac indlyasten ante gal ri'then loo gu' par gal neen máa gu' par nedrè' no maste. Ndxè'leque', ndlyazen gal too naan gu' no go non gu' ndxep huiz chele' Tad Diox ta' lugar tataa gaca loon. <sup>8</sup> Lomisque', ngue niin loo gu', ne: Daa be' lyen' ndxep huiz le'n ciuda Efes axta riid lni che'n Pentecostés. <sup>9</sup> Tac nden'en le'n huiz ndxè' Diox mbli par huax mod mxyal' ned mxyal' yó' loon par gon yalbàn par càba thib con' ndac loo mèn co' ndxòn ron. Per mèn co' nac ngolo ngola's, anze'f huax nzo. No ndxecloo mèn ñèè mèn daa.

<sup>10</sup> Chele' Timote zin loo gu', cua'n gu' mod nabe'ste go no gu' Timote par tyac lezo' Timote. Tac Timote nxo'f zin' zin' cón che'n Tad Crist, ne, xalque' nxo'f zin'en zin'. <sup>11</sup> Cona, ngue niin loo gu': Nec thib gu' no nec tedib gu' ne'xiis node gu' Timote. No ne'xyán'te gu' ñèè gu' Timote. Ndxè'leque', ya tee ned gu' Timote co'se' bii Timote par yende cón tyactii Timote ned co'se' yi'th Timote loon. Tac daa ngue bed con mèn co' ndxàc hues na' par zin Timote.

<sup>12</sup> Le' cón che'n hues na' Apol na, tan cuent loo gu'. Huax vez mna'ben loo hues na' Apol con taamas mèn co' ndxàc hues na' par ngui'th nee hues na' Apol máa gu' par nedrè'. Per nec thib mod no nec tedib mod tarte ta' Diox lugar yi'th hues na' Apol loo gu' nalle'. Per yi'th hues na' Apol loo gu' co'se' ta' lugara loo hues na' Apol.

*Trè' ndub lultleque' di's co' gunii Pab Diox loo mèn co' ngòc loo cón che'n Diox, mèn co' ngo ban le'n ciuda Corint.*

<sup>13</sup> Lomisque' ndlyazen, nalas gure gu' loo ryethe con'. No gure nèè gu' loo con' co' ndxela's na' loo Tad Crist. Fque tee ban gu' xalque' mèn co', licque', mté'thque' no co' nda'que' cuent cón che'n Crist par tyubdi's ndac gu' loo cón che'n Crist. Blo gu' valor loo gu'. No ne'zyebte gu' loo con' ndxela's gu' loo Tad Crist. <sup>14</sup> Lomisque' ne, ndlyazen le' ryete con' co' ndli gu' loo hues xtàa gu', bli gu'i dib nzo yéc gu' no dib nzo lezo' gu' xalque' mèn co', licque', nque' lezo' ñèè hues xtàa.

<sup>15</sup> Nalle' ne, mèn huesen por cón che'n Crist, gu' nonque' le' mèn guliz Stef ngòc nerleque' mèn co' ngola's di's ndac cón che'n Tad Crist co' nac ned le'n yèezya' co' nac làaz mèn acay. No non gu' le' mèn mblo yécque' par nxo'f zin' mèn thib zin' par lyath no mèn chol mèn co' ndxela's, mèn co' ngro xà' loo cón che'n xab izlyo' par ngòc mèn che'npe' Diox, loo chol gast no loo chol con' co' nde che loo mèn. <sup>16</sup> Lomisque' ne, ndlyazen le' thib thib gu' lyath no mèn. No ndlyazen lyath no gu' mèn co' nxo'f zin' con nu' no taamas mèn co' nque zin' loo cón che'n Tad Crist. <sup>17</sup> Anze'f ndyac lezon tac



mzinle' Stef no Fortunat no Acaic. Tac mèn ndxè' ndlyath no nu' loo ryethe con' co' nde che loo nu' co' ngòc di's ngàc por cón che'n gu' tac gu' yende co'se' ngòc di's ngli gu'i. <sup>18</sup> Mèn ndxè' mbli le' daa ngo nagàl lezo' no tataa mod mbli mènà par ngo nagàl lezo' gu'. Blu' gu' mèn ndxè' loo hues xtàa gu' co' ndxela's par nedrè' no ta' gu' cuent cón che'n mèn ndxè' loo hues xtàa gu' par nedrè'.

<sup>19</sup> Mèn co' ndxela's co' nqueltàa par ned le'n yèezya' co' nac che'n làaz mèn asia ngue nii Diox loo gu'. Aquil no Priscil, no mèn co' ndxela's co' nqueltàa liz Aquil no Priscil, rye mènà ngue nii Diox loo gu', ne, por lèe Tad Crist. <sup>20</sup> Ryete mèn co' ndxàc hues na' por lèe Tad Crist ngue nii Diox loo gu'. Co'se' nii thib thib gu' Diox loo xtàa gu', bde's gu' yen xtàa gu' xal nac mod co' ndxàp gu' no xal nac mod co' ndli gu'i làth xtàa gu'.

<sup>21</sup> Loo ye's co' mque'en ye's con ya'pe'en loo ye's ndxè', daa Pab ngue nii Diox loo gu'.

<sup>22</sup> Chele' chol mèn nzo co' ne'tyalte que' lezo' Tad Jesucrist, mandit mènà, co' nee di's, mènèè gac mènà too zee too yál' par tetii tín' Diox mènà, yilò. Maranatha, di's co' nee di's, Tad, U' co' nac Tad nu', de U'.

<sup>23</sup> Ndlyazen le' Tad Jesucrist na' tolo li anggac más con' ndac loo gu'. <sup>24</sup> Ndlyazen le' gu' non no nanee gu' le' daa nque'que' lezo' ñèen ryete gu' por cón che'n Tad Crist Jesús na', ndee gu'. Taandxè' gaca.

## Mbryop Cart Co' Mque' Pab Ye's Loo Mèn Co' Nqueltàa Loo Cón Che'n Diox Le'n Ciuda Corint

*Pab mque' ye's loo mèn co' nqueltàa loo cón che'n Diox le'n ciuda Corint.*

<sup>1</sup> Daa, Pab, nac thib mbi' co' mtel' Jesucrist par ndxen di's che'n Jesucrist xal guneer lezo' Diox. Ngue que'en ye's co' nac cart ndxè' loo gu' co' ndxela's loo Diox por cón che'n Crist co' nqueltàa le'n templ le'n ciuda Corint no loo mèn co' ndxela's loo Diox por cón che'n Jesucrist dib anax par ned le'n yèzya' ned làaz mèn acay. Ryete gu' nac che'npe' Diox. Leque tiempa, ryop nu' Timote co' nzo non trè' ngue nii nu' Diox loo ryete gu'. <sup>2</sup> Ndlyazen le' Diox xud na' no Tad Jesucrist na' tolo li anggàc con' ndac loo gu'. No ndlyazen le' Diox xud na' no Tad Jesucrist na' tolo li yo nagàl lezo' gu' loo Diox no loo mèn no cue ban gu' rye nda gu' no rye ndye'th gu' làth hues xtàa gu'.

*Trè' ndlu' xá mod mxactii Pab.*

<sup>3</sup> Por cona, ndlyazen le' na' gab loo mèn: Anze'f ndac no natú' nac Diox no Diox roo Diox xèn nac Diox. Diox co' nac xudpe' Tad Jesucrist na', leque Diox na' nac xud na' co' ndlyat lezo' ñèe mèn axta plóthe. No ntegán Diox lezo' mèn. No ndli Diox par ndyac lezo' mèn axta plóthe. <sup>4</sup> Diox ntegán lezo' na' loo ryethe con' co' ndli par nxi lezo' na', con' co' ndxàc loo na' par leque na', ne, tegán lezo' chol mèn co' nzi yàc yaltii loo xalque' ntegán Diox lezo' na'. <sup>5</sup> Texal ndyactii na' huax con' por cón che'n Crist, lomisque' mod, ntegán Crist lezo' na' axta plóthe, ne, loo ryethe yaltii co' ndxàc loo na'. <sup>6</sup> Por cona, co'se' daa ndyactii chol con', ndxàc yaltii loon par gàca loo gu' le' Diox tegán lezo' gu' no tolo lyath no Diox gu' co'se' ndlyá' ndlyá' guth mèn gu'. No co'se' Diox ntegán lezon, ndxàca loon par tolo tegán Diox lezo' gu' co'se' ndlyá' ndlyá' guth mèn gu'. Co'se' tataa ndxàc loo gu', sya, ngue xec yèe gu' no ncha'la's gu' loo leque yaltii co' ndxàc loona. <sup>7</sup> Leque daa mbli nèn loo co' ndub quee lezon cón che'n gu' tac texal ndyactii no gu' daa, no ngue xec yèe gu' cón che'n yaltii co' ndxàc loo gu', tataa gàca loo gu' le' Diox tegánque' lezo' gu'.

<sup>8</sup> Mèn huesen, ndlyazen le' gu' non no ta' gu' cuent cón che'n huax yaltii co' ngòc loon láth co'se' mque tee'en le'n rye yèzya' co' nac làaz mèn asia. Casque' mblyá' daa loo yalguth tya tant thib con' mbli no mèn daa axta mblin cuent ¿ché' xec daa tolo que tee'en o ché' tya ñeei loon? <sup>9</sup> Lìcpe' ba'i, mden'en le'n lezon no ndxaben loo lezon: Nase guth mèn daa. Ngòc con'a loon par ne'ngàpten yalxla's lyá' daa por cón che'npe'en. Ndxè'leque', ngòca par gàpen yalxla's loo Diox co' ngo xban mèn làth mèn nguth le' Diox lá' daa chele' Diox nee lezo' li Diox con'a loon. <sup>10</sup> Diox mtelá' daa la's ya' mèn co'se' yamerle' nguthxù' mèn daa. No axta nalle' tatabe' ngue lyath no Diox daa par ne'guthte mèn daa co'te' nzon ndxè'. No loo Diox ndxàpen yalxla's le' Diox tolo lá' daa no tolo lyath no Diox daa par ne'guthte mèn daa no ndub queeque' lezon le' Diox telá' daa ned ga que tee'en. <sup>11</sup> Tataaque' gàca loon chele' gu' lyath no daa por mbez gu' Diox por daa par yende cón li no mèn daa. Por cón che'n huax mèn co' cuez no gu' Diox por daa par tolo lyá' daa loo yalguth co' ndlyá's mèn li no mèn daa, huax mèn gab: Diox quix non U', Diox, por con' ndac co' ngòc loo prob Pab.

*Trè' ndlu' chonon mblyen' Pab. Ne'ngagàde Pab ciuda Corint.*

<sup>12</sup> Nzo thib con' co' ndli par ndan gust lezon no par ndyac lezon. Loo con' ndxè', nden'en le'n lezon cón che'n con' ngue lin, ndyaquen, huenque' ngue lin. Tac leque daa ngue ta' cuent no non daa le'n lezon le' daa ngue tee ban ndac loo Diox làth mèn loo izlyo' por mblá'en ryethe con' co' nac cón che'n xab izlyo'. No inquediiden loo hues xtàan. Más de cona, masre' ndlina làth gu'. Ingue tee bante daa làth mèn xal mèn co' nde'f di's ndxàc. Ndxè'leque', Diox ndli le' daa ngue tee ban ndac loo gu' no loo taamas mèn loo izlyo'. <sup>13</sup> Di's co' ngue que'en ye's loo gu' co' nac cart ndxè', ante ntel'en di's

loo gu' co' inagànte nac par lab gu' par gòn gu' no ta' gu' cuent cón nee di's ndxè'. No ndub quee lezon yaa'd di's ndxè' le'n quèe yéc gu', no ten' gu' cón nee di's ndxè' co' huen huen, <sup>14</sup> xal mden' gu' no mda' gu' cuent mase ndxep cón chenen thib mod no tedib mod. Tac co'se' gác huiz co' yi'th Tad Jesús na', anze'f tyac lezo' gu' huiza xal nden'en ndyac lezon por cón che'n gu' nalle.

<sup>15</sup> No por yalxla's co' ndxàpen loo gu' xal mque'en ye's loo cart co' mtel'en loo gu', niin con' ndxè' loo gu': Mblin xtùuz no mnibe'en loo lezon ner galen loo gu' par gal neen máa gu' par nedrè' par tataa mod ndac lezo' gu' mbal neen máa gu' chop vez. <sup>16</sup> Licque', mblin xtùuz gal too naan gu' co'se' mxenen ned nguan par ned yèezya' co' nac làaz mèn macedon. No co'se' biin le'n yèezya' co' nac làaz mèn macedon, mblyazen beren, gal neen máa gu' tedib vez láth ndoon ned par làaz mèn jude. No lomisque', mblyazen ya tee ned gu' daa ndxep co'se' biin loo gu' par ga que tee'en par ned le'n yèezya' che'n làaz mèn jude. Tataa nac co' mblyazen lin mastale' ne'ngàcte gan nglina. <sup>17</sup> Co'se' mnibe'en lezon gal neen máa gu' par nedrè', ¿ché' mbli gu' cuent ante guniina loo gu' no angmblin xtùuz tataa lin, cà'? O ¿ché' ndli gu' xtùuz le' daa ngo xnee con' ndlin xal ngo xnee mèn co' nac mèn co' be' ndli cas loo cón che'n xab izlyo' co'se' mbez mènna li mènna thib con' no yiloa ne'lide mènna con'a, cà'? Yende xàa. <sup>18</sup> Per Diox co' ndlique' co' mcàbgòn Diox li Diox loo mèn, Diox non no nda' Diox cuent, licque', liquen co' mbezen loo gu'. Ne'quediiden mèn. <sup>19</sup> Cón che'n Jesucrist co' nac xgan' Diox mde'th nu' no mblo nu' yalbàn loo gu', co' nee di's, yon nu' co' nac Silvan no Timote no daa, Pab. Thidtene ne'ntoxcua'de Tad Jesucrist yalgutyè'. Ndxè'leque', licpe' ngòc di's co' gunii Tad Jesucrist thidtene. <sup>20</sup> Tac por cón che'n Jesucrist ndxàc ryethe con' co' mcàbgòn Diox li Diox. Por cona, co'se' mbez na' cón che'n Diox loo mèn le' Diox nac thib Diox roo Diox xèn, mbez na' tataaque' gàca por cón che'n Tad Jesucrist. <sup>21</sup> Leque yub Diox nac xa' co' ndli par leque nu' ndli nèe nu' loo cón che'n Crist, no par leque gu' ndli nèe gu', ne, loo cón che'n Crist. No leque yub Diox nac xa' co' ndli le' na' ngro xà' loo cón che'n xab izlyo' par ngòc na' che'npe' Diox. <sup>22</sup> Por cón che'n Xpii Natú' che'n Diox, Diox mblec xà' na' loo cón che'n xab izlyo' xal ndli mèn co'se' nque' mèn thib sell loo thib xque's par gác nèe xque'sa. Tataa mbli Diox loo na' co'se' mblàa Diox Xpii Natú' loo na' par yòo Xpii Natú' loo na' no ñibe' Xpii Natú' loo na'. Xpii Natú' ndlu' loo na' no por cón che'n Xpii Natú' non na', licque', ta' Diox con' co' mcàbgòn Diox ta' Diox loo na' yiloa co' gác che'npe' na'.

<sup>23</sup> Per chele' daa axta nalle' tarte gal nee máa gu' par ned ciuda Corint ndxè' xal mblin xtùuza, mèn ciuda Corint, Diox nonque' no naneeque' Diox leque daa mbli par ne'gal needen máa gu' por cón che'n gu' par ne'ngaclooden loo gu' no par ne'ngàc nayi'den loo gu'. No chele'i ilicte nac, ña'ben loo Diox más huen guth Diox daa. <sup>24</sup> Inacte le' daa ngue nibe' loo gu' xal nac mod co' ndxàal yila's gu' loo Crist. Ndxè'leque', daa ngue xo'f zin' co' mxo'f zin' Diox loon par lyath non gu' par tolo tyac lezo' gu'. Tac, licpe' ba'i, leque gu' ngue li nèe gu' loo con' co' ndxela's gu' loo Diox, ndyaquen.

## 2

<sup>1</sup> Con' ndxè' nac con' co' mnibe'en loo lezon. Mblin xtùuz más huen ya ne'bereden ga neen máa gu' par ne'tolode xi lezo' gu'. <sup>2</sup> Tac chele' daa tolo texi lezo' gu', ¿chó mèn gác li par tyac lezon, sya? Gu', no maste, nac mèn co' ndlin cuent ntegán lezon co'te' nzon ndxè'. No chele' daa texi lezo' gu' arid, ¿ché' nzo mod leque gu' li par tyac lezon sya, cà'? Yende moda, ¿lé'? <sup>3</sup> Cona, tataa mque'en ye's cón che'n con' ndxè' loo gu' loo ner cart co' mtel'en loo gu' tac indlyasten galen loo gu' par ne'xi tín'te lezon por cón che'n gu', gu' co' ndxàal li par tyac tín' lezon. No daa ngobe' no ndxàpen yalxla's loo ryete gu' chele' daa tyac lezo' co'se' gal neen máa gu' par nedrè', gu', ne, tyac lezo' co'se' ñee gu' zin daa loo gu'. <sup>4</sup> Anze'f nden'en co' mblin no anze'f nxi lezon axta mbínen cón che'n ner cart co' mque'en ye's loo gu'a. Per cart co' mque'en ye's loo gu'a, ne'ntel'ten carta loo gu' par mtexin lezo' gu'. Ndxè'leque', mque'en carta loo gu' par non gu' no par ta' gu' cuent le' daa, licque', nque'que' lezo' ñèen ryete gu' axta plóthe.

*Pab ngue ta' cuent loo mèn teri'th tecan' mèn xquin no xtol xtàa mèn co' nac con' ye'rsin' co' ndli mèn loo xtàa mèn.*

<sup>5</sup> Per chele' chó thib gu' co' nzo làth gu' mbli mzyál' di's no mzyál' cuent par ndxàc yalnaxi loon, ingue cua'n te mbi'a di's no cuent par ante daa nxi lezo'. Ndxé'leque', ncu'a'n mbi'a di's no cuent par nxi lezo' gu', ne. Niin le' mbi' mbli par nxi lezo' ndxep gu' par ne'gabten le' gu' inthyonte no inxide lezo' gu' por con' co' mbli mbi'a. Tataa niin par nden' gu' arid le'n lezo' gu' por cón che'n con' co' ndxàc làth gu' no par ne'tetiiden gu' arid cón che'n con' co' ngòc por cón che'n mbi'a làth gu'. <sup>6</sup> Ya ngolole' no ya guneele' con' co' ngòc mod co' mteti gu' mbi'a co'se' mqueltàa gu': No con thidte di's mnibe' gu' gàca loo mbi' par mxacti mbi', mbi' co' ndxàc hues xtàa gu' co' mbli con' ye'rsin'a làth gu'. Na nii loo gu': Ne'tolode tetii gu' mbi'. <sup>7</sup> Per nalle', más huen fteri'th ftecan' gu' con' co' nzo lezo' gu' ñèe gu' mbi' co' nac hues xtàa gu'a. Ndxé'leque', más huen fcua'n gu' mod tegán gu' lezo' mbi'. Tac ne'stolque' ne'tolode xec mbi' loo con' ngue li no gu' mbi', tant nxi yéc mbi' no tant nxi lezo' mbi' loo con' mbli mbi'. No yiloa le'le' tyub yéc mbi' ryo xà' mbi' làth gu' thidtene. <sup>8</sup> Cona, ngue niin loo gu': Bli gu' favor. Ndlyazen bere gu', cua'n gu' mod lu' gu' loo mbi' le' gu', lìcque', nque'que' lezo' ñèe gu' mbi'. <sup>9</sup> Daa mque'le' thib cart loo gu' ndoore' cón che'n co' ndyac gu' ba'. Mque'en ner carta loo gu' par ñeen ñeene' ché', lìcque', tyubdi's gu' loo ryethe con' co' ñibe' Diox loon par lu'en loo gu'. <sup>10</sup> Nalle' loo mèn co' gu' teri'th tecan' xèn xyàn co' nzo lezo' gu' co'se' ñèe gu' mèn por cón che'n chol con' mbli no mèn gu', daa, ne, teri'th tecan' xèn xyàn co' nzo lezon cón che'n con' co' mbli no mèn daa. Tac chele' daa mteri'th mtecanen xèn xyàn co' ngòc lezon co' mbli no mèn daa por ndlyat lezon ñèen gu', mteri'then mtecanen xèn xyàna loo Crist. <sup>11</sup> Tataa li na' par ne'lide Mebizya gan loo na' nec thib mod no nec tedib mod tac na' naneeque' co' huen huen xá nac mañ che'n Mebizya par li Mebizya gan loo mèn.

*Imbe see teede lezo' Pab le'n ciuda Tro.*

<sup>12</sup> Tan cuent loo gu' loo cart ndxè'. Co'se' mzin daa ciuda Tro, ngua tethen no ngua lon yalbàn cón che'n di's ndac che'n Crist. Mxaquen mxal' Diox ned no mxal' Diox yó' loon par ngue lin zin' co' mxo'f zin' Tad loon cón che'n Tad. <sup>13</sup> Per láth co'se' ngon le'n ciuda Tro, ne'mbe see teede lezon no yende chó gust ngon le'n ciuda Tro tac ne'ngzál'ten Tit co' ndxàc hues na' por cón che'n Crist tya. Ale por cona, mbli guniin Diox loo mèn co' ngòc loo cón che'n Diox por cón che'n Crist le'n ciuda Tro. Mxenen ned. Nguan par ned le'n yèzya' che'n làaz mèn macedon.

*Pab ndyoodi's cón che'n mèn co' mbli gan ngro xà' loo cón che'n xab izlyo' par ngòc mèna che'npe' Crist.*

<sup>14</sup> Per Diox quix Diox tac Diox nzo noque' nu'. Ndli nu' gan nxo'f zin' nu' zin' co' nac zin' cón che'n Crist Jesús. No ndli Diox par nda' mèn cuent cón che'n di's ndac co'se' ngo nu' yalbàn axta nden' mèn nac cón che'n di's ndac che'n Diox xal thib xla' co' ndrye's loo mbii co' anze'f nix ndlya'. Tataa ncàba loo cón che'n di's ndac rye lugar co'te' ngo nu' yalbàn cón che'n di's ndac. <sup>15</sup> Co'se' nde'th nu' no ngo nu' yalbàn cón che'n Crist pál ned nzo mèn, ndxòo lezo' Diox cón che'n con' co' ngue li nu' xal thib zen yal' co' ngo Crist loo Diox, que naca tyal mèn gòn mèna di's par lyá' mèna loo con' ryes, que naca ne'tyalte mèna gòn mèna di's par càba loo mèna lyux mèna. <sup>16</sup> Loo ndxep mèn nac nu' mèn co' nda' cuent cón che'n con' co' càb ryo xà' mèn loo Diox thidtene, co' nee di's, lyux mèn, ndyac mèn. Le' loo taamas mèn na, nac nu' mèn co' nda' cuent cón che'n con' co' càb yòo ban no mèn Diox thidtene, ndyac mèn. Yende chó mèn nzo co' gác no co' xec thidte mèna li zin' ndxè'. Ante ndxác nu' tolo li nu' zin' ndxè' co'se' tolo ndlyath no Diox nu'. <sup>17</sup> Ingue lide nu' zin' cón che'n di's ndac co' nac che'n Diox par li nu' gan co' hua nu' xal ndli huax mèn co' nse' loo di's ndac che'n Diox par li mèna gan huax tmi. Ndxé'leque', co'se' ngo nu' yalbàn cón che'n di's ndac che'n Diox loo mèn, dib nzo yéc nu' no dib nzo lezo' nu' ngo nu' yalbàn. Ingode nu' yalbàn xal mèn co' ndoo guyith lezo'. Nden' nu',

licque', mtel' Diox nu' no non nu' le' loo Diox ngo nu' yalbàn loo mèn. No non nu' nac nu' che'npe' Crist. Yende mod li nu' con' co' neete lezo' nu' li nu'.

## 3

*Trè' ndlu' Pab le' di's ndac che'n Diox nac thib conveñ cub.*

<sup>1</sup> Co'se' ndlab gu' di's co' ngue bezen loo gu' loo cart co' mtel'en loo gu' ndxè', ¿ché' nden' gu' no ché' ndyac gu' beren, tlon, tyoodizen no tan cuent con' ndac cón chenen loo gu' tedib vez, cà'? o ¿Ché' ndyac gu' naquin que' tedib mèn ye's co' nac cart par ta' mèna cuent ndac cón chenen loo gu', cà'? o ¿Ché' ndyac gu' ndxàal ña'ben loo gu' que' gu' ye's cón che'n nu' co' hue' nu' loo taamas mèn par tataa mod ta' ndac gu' cuent cón che'n nu' loo mèn xal ndli ndxep mèn, cà'? Yende xàa. <sup>2</sup> Nac yub gu' xal thib cart co' mque' Crist ye's loo mèn co' tan càa mèn. Non mèn cón chenen por cón che'n gu' xal non mèn cón che'n tedib mèn por cón che'n thib cart co' mque' mèn loo xtàa mèn. Inquinte daa chol cart co' ta' cuent cón chenen. Ante, ndyaquen, nquin non mèn cón che'n nu' por cón che'n gu'. Con'a no maste nquin nu'. Lezon no ngudloon nac gu' loon tant ndyac non gu' axta ne' ne' yathlazen cón che'n gu'. Non mèn no nanee mèn cón chenen xal nac daa por cón che'n con' co' ndxàc loo gu' por cón che'n daa tac non mèn le' gu' mzye' mod co' nque tee ban gu' loo Diox thib cua'a. <sup>3</sup> Mèn ciuda Corint co' ndxàc huesen por cón che'n Crist, tetaquen thib di's cón che'n na' no cón che'n Crist loo gu', co' nee di's, gu' nac xal thib cart co' mque' leque yub Crist loo taamas mèn no mda' Crist lugar huen carta loo mèna, co' nee di's, gu' ndlu' xal nac daa no xal nac Crist loo mèn. Cón che'n con' ndxè' inacte xal thib cart co' mque' mèn ye's con tint. Ndxè'leque', gu' mzye' mod co' mque tee ban gu' thib cua'a por cón che'n Xpii Natú' che'n Diox, co' thidtene naban, co' mbli thib zin' loo gu'. Con' ndxè' ndlu' gu' loo mèn xal ndlu' thib cart con' loo mèn. Ne'ngàcte con' ndxè' xal ngòc di's co' mque' Diox loo quèe co' mtoxcua' Moisés póla, co' mcàaya' mèn nación Israel. Ndxè'leque', cón che'n zin' co' mbli Xpii Natú' loo gu'a, ngüaa'd le'n lezo' mèn no ngüaa'd le'n xtùuz mèn, ne, par ta' mèn cuent xá nac cón che'n Diox no xá nac daa por cón che'n gu'.

<sup>4</sup> Por cón che'n Crist, anze'f thib yalxla's ndxàpen loo Diox no ndxelazen loo Diox le' Diox lyath no daa par xo'f zin' ndaquen zin' co' mxo'f zin' Diox loon par lin co' nac cón che'n di's ndac che'n Diox. <sup>5</sup> Inacte por cón che'n yub nu' ndli par ndxác nu' ndli nu' ndxep con' co' ndxácte nu' ndli nu' cón che'n di's ndac co' nac cón che'n Diox. Ndxè'leque', con' co' ndxácte daa ndlin co' nac cón che'n di's ndac che'n Diox, ndlina ante por cón che'npe' Diox no ndlina xalte ndlyath no Diox daa. <sup>6</sup> Yub Diox nac xa' co' mbli loon par xo'f zin' ndaquen thib zin' cón che'n conveñ cub co' mbli Diox loo mèn co' nac cón che'n di's ndac che'n Diox. Ley co' mnibe' Diox loo Moisés par mxo'f Moisés leya loo mèn nación Israel, leya mnibe' le' mèn tyubdi's loo ryethe con' ñibe' leya loo mèn. No mèn co' indyubdi's ndacte loo ryethe con' mnibe' leya loo mèna, loo mèna càb quexù' Diox loo mèna par ryo xà' mèna loo Diox thidtene yiloo. Xpii Natú' nac xa' co' ñibe' loo mèn co' nzo loo conveñ cub co' mbli Diox loo mèn. Mèn co' nzo loo conveñ cub, mèna ban no Diox thidtene yiloo.

<sup>7</sup> Cón che'n di's co' ngòc ley co' mxo'f Moisés loo mèn nación Israel póla, ner mque' leque yub Diox di's co' ngòc nerleque' di's co' ndxab Diox cón che'n leya loo quèe. Láth ngo no Moisés Diox loo yii Sinaí tiempa, mquée xniì che'npe' Diox loo Moisés. Texal ngulàa tùub Moisés loo yii Sinaí loo Diox loo mèn nación Israel, ne'nxecte mèn nación Israel mbui' mèn loo Moisés tant mquée xniì che'npe' Diox loo Moisés. Per mastale' tataa mquée xniì tìn' loo Moisés le'n huiza, xniia xègà xègà mbyu'. No xègà xègà mdyon' xniì co' mquée loo Moisés. No mastale' cón che'n co'se' mtlo mxo'f Moisés leya loo mèn nación Israel ngòc thib con' roo no thib con' xèn axta mquée xniì che'npe' Diox loo Moisés, con' co' ncàb loo mèn co' ne'tyalte tyubdi's ndac loo leya, mzib quì Diox mèna par tyoo xà' mèna loo Diox thidtene yiloo. <sup>8</sup> Ale'que' ne' gac más con' roo con' xèn cón che'n conveñ cub co' nac di's ndac che'n Diox loo mèn co'se' ñibe' Diox loo mèn por



cón che'n Xpii Natú' leque con' roo con' xèn cón che'n ley co' mxo'f Moisés loo mèn póla. Tataa ndxàca, ¿lé'? <sup>9</sup> Cona nee di's, chele' ley co' mxo'f Moisés loo mèn mcàb loo mènna le' Diox mquexù' mèn tac ne'ndalte mèn ndubdi's ndac mèn loo Diox xal ngòc yalnibe' che'n leya, pues chele' leya ngòc thìb con' roo con' xèn loo mènna, ale'que' ne' gàc con' roo con' xèn di's ndac che'n Diox. Tac por cona mbli Diox le' na' co' ndxela's loo Crist nac mèn nali no mèn nambii loo Diox. No mdyal Diox ngòc na' loo cón che'n Diox por cón che'n di's ndac. <sup>10</sup> Mastale' ngòc con' roo con' xèn loo mèn por cón che'n ley co' mxo'f Moisés loo mèn, no ngòc leya thìb con' roo con' xèn tiempa, per nalle' pà ta' cón che'n leya con conveñ cub co' nac mod cub co' ñibe' Diox loo mèn nalle', ¿lé'? <sup>11</sup> Cona, ngue niin loo gu', mèn ciuda Corint: Chele' ley co' mxo'f Moisés loo mèn, co' ngòc thìb ley co' mnibe' loo mèn ndxepte tiemp, ngòc thìb con' roo con' xèn, ale'que' más conveñ cub co' ñibe' loo mèn thidtene ne' gàc más con' roo con' xèn, ¿lé'?

<sup>12</sup> No nalle' con dibaxla's ndyoodiz non mèn cón che'n conveñ cub co' nac di's ndac che'n Diox. Tac ndub quee lezon cón che'n con' roo con' xèn co' gàc loon por cón che'n conveñ cuba. <sup>13</sup> Indxàcta loon xal ngòca loo Moisés co'se' mtau' Moisés loo Moisés con thìb le' vel par ne'hui'de mèn nación Israel loo Moisés. Tataa mbli Moisés tiempa par ne'hui'de mèn nación Israel xá mod xègà mdyon' xnii no mbyu' xnii co' mquée loo Moisés co' ne' ne' nxec mèn nghui' mèn loo Moisés tiempa. <sup>14</sup> Per ngòc mèn nación Israela mèn co' nau' yéc nau' loo. Ne'nda'de mèn nación Israel cuent. No ne'ngaa'dte di'sa le'n lezo' mèn nación Israel tiempa. Tac axta huiza no axta huiz nalze co'se' ndlab mèn nación Israel di's co' ndub loo libr co' nac xti's Diox co' nac testamentgool, tatabe' nau' loo mènna no nau' yéc mènna. Indxònte mènna di'sa. Per co'se' yila's mèn nación Israel loo Crist, axta syare' tyub xnii yéc mènna no tyub xnii lezo' mènna loo cón che'n Diox par ta' mènna cuent cón nee di's, di's co' ndub loo libr co' nac xti's Diox co' nac testamentgool. <sup>15</sup> Axta huiza no axta huiz nalze co'se' ndlab mèn nación Israel co' nac di's che'n ley co' mxo'f Moisés loo mènna, tatabe' nau' loo nau' yéc mènna xal thìb con' co' nau' thìb le' lar' loo par ne'yaa'dte di'sa le'n lezo' mèn co' nac mèn nación Israel. <sup>16</sup> Per co'se' tlo zye' xtùuz che'n chol mèn par yòc mènna loo cón che'n Diox por cón che'n Crist, que nac mènna mèn nación Israel, que nac mènna mèn co' inacte mèn nación Israel, axta syare' tyub xnii yéc mèn no tyub xnii lezo' mèn loo cón che'n Diox par ta' mènna cuent cón che'n xti's Diox no cón che'n Diox. <sup>17</sup> Yub Diox nac Xpii Natú' no loo mèn co'te' nzo Xpii Natú' che'n Diox, loo mènna yende cón cuee no yende cón nca' loo con' co' nac cón che'n Crist. <sup>18</sup> Per ryete na' co' ndxela's loo cón che'n Crist, nduble' xnii yéc na' no nduble' xnii lezo' na' loo cón che'n Diox, co' nee di's, inacte na' xal mèn co' nau' rloo con thìb le' lar'. No ndxàca loo na' co'se' hui' mèn loo na', nden' mènna ngue hui' mèn loo Crist xal ngüi' mèn loo thìb spej. Tataa ndxàca tac ndyac na' ngue hui' na' loo Crist láth ngue lab na' xti's Diox co' ndlu' cón che'n Crist loo na' xal ñaa loo na' co'se' ngüi' na' loo thìb spej. Làth xtau'a, nzye' mod co' nque tee ban na' par xègà xègà que tee ban na' xal nac Crist no tataa mod xègà xègà ndxàc na' xal nac Crist. Con' ndxè' ndxàc loo na' por cón che'n Diox co' nac thìb Xpii.

## 4

<sup>1</sup> Cona, ngue niin loo gu': Thidtene indyoo xà'de lezon loo zin' co' mxo'f Diox loon ndxè'. Tac por anze'f mblyat lezo' Diox gunèe Diox daa, mxo'f zin' Diox zin' ndxè' loon par nxo'f zin'en zin' ndxè' loo Diox. <sup>2</sup> Part cón chenen, mblá'len ryethe con' co' xexte ndli mèn co' ncàb nthyon mèn chele' chol taamas mèn ñèe ngue tee lin con'a. Ne' ne' inquediin chol mèn xal nac mod co' ndxác daa ndlin loo cón che'n Crist. Ne' ne' indlu'en loo mèn cón che'n di's co' ndub loo libr co' nac xti's Diox le' di'sa nac xà'le' di's no xà'guè' cuent co' ndlu' loo libr co' nac xti's Diox. Ndxè'leque', loo Diox ndlu'en ante con' co' nac con' licpe' co' ndub loo libr co' nac xti's Diox cón che'n Diox loo mèn. Tataa mod ta' mèn cuent no ten' mèn le'n lezo' mèn licque' nac con' co' ndlu'en loo mèn cón che'n Diox ned ngue tee'en. <sup>3</sup> Chele' di's co' nac cón che'n di's ndac co' nda' cuent no co' ndlu' cón che'n

Crist, co' ndethen no co' ngon yalbàn loo mèn, indxaa'd ndacte yéc mèn no lezo' mèn, ndxàca tataa loo mènà tac nau' yéc no nau' loo mèn, mèn co' nzi tee huan loo Diox, mèn co' co' too Diox loo Diox yiloo. <sup>4</sup> Per com le' mènà indxela'ste loo Crist, ¿lé'?, Mebizya co' nac xal thib diox che'n mèn loo izlyo' ndxè' le'n ndxep tiemp co' nzi ban mèn loo izlyo' ndxè', Mebizya mtau' loo no mtau' yéc no mtau' Mebizya lezo' mèn co' ne'ndalte ngala's. Tataa mod mbli Mebizya par ne'tyubte xnii yéc mèn no par ne'tyubte xnii lezo' mèn loo cón che'n Diox par ne'gònte mènà no ne'ta'de mènà cuent cón che'n di's ndac co' nac xal xnii co' ntenii yéc mèn no co' ntenii lezo' mèn loo cón che'n Diox par non mèn no ta' mèn cuent cón che'n con' roo con' xèn che'n Crist co' nac xalque' nac Diox, Diox co' indxú'de loo mèn. <sup>5</sup> Co'se' ngo nu' yalbàn, ingode nu' yalbàn cón che'n nu'. Ndxè'leque', ngo nu' yalbàn cón che'npe' Crist Jesús le' Crist Jesús nac Tad co' ñibe' loo ryethe con'. Le' cón che'n nu' na, nac nu' xal thib moz loo gu' tac nu' nac moz che'n Jesús co' anze'f nque' lezo' Jesús ñèe Jesús. <sup>6</sup> Co'se' mblec Diox izlyo' no co'se' mxèn' Diox izlyo', Diox mnibe': Yo xnii co' tenii loo yal'cuau loo izlyo'. No, chàa, ngòca. Tataa ndxàca loo na' nalle', ne. Leque yub Diox nac xa' co' mbli par mdyub xnii yéc na'. No mbli Diox par mdyub xnii lezo' na' loo cón che'n Diox par tataa mod gác na' ta' na' cuent cón che'n con' roo con' xèn che'n Diox xalque' mbli' Jesucrist cón che'n con' roo con' xèn che'n Diox loo na'.

*Trè' ndlu' cón che'n cón nee di's ndxàp mèn yalxla's loo Crist no loo cón che'n Crist.*

<sup>7</sup> Per nalle', tetaquen thib di's loo gu' par ta' gu' cuent no par non gu' cón che'n di's co' nde niin loo gu' ndxè': Con' ndac co' nac cón che'n Diox co' ndxàp na' por cón che'n Crist, le'i nac xal thib tesor co' axta arid náp ntac co' nzosua' le'n thib yàat yòo. Loo cón che'n tesora nac na' xal yàat yòo co'te' ndxòosua' tesor par non mèn con' roo con' xèn co' ndxàc loo na' inacte por cón che'npe' na'. Ndxè'leque', le'i ndxàc loo na' por cón che'n con' roo con' xèn co' nzo la's nii Diox no co' nzo la's ya' Diox. <sup>8</sup> Por cona, ngue niin loo gu': Mastale' rye ned co'te' ngue que tee'en nzoque' con' co' nca' loon loo cón che'n Crist no ndxàc ngòc nguàal con' loon, per inpor cona'de ndxetac lezon. Ndoò xal'que' ned ndoo xal'que' yó' loon. Chop ndxàc lezon huax vez loo con' co' ndxàal lin. Per ndxe'leque', thidtene ne'gabten loo lezon lá'en zin'. Per ndxe'leque', ndub queeque' lezon toloque' que tee xo'f zin'en zin' loo cón che'n Diox. <sup>9</sup> Mastale' ndub ngu's mèn daa, Diox ne'nglá'ya'de daa. Mastale' mtetii mèn daa axta plóthe, mbli mènà cuent nguth daa. Per ne'nguthte mènà daa. <sup>10</sup> Loo zin' co' nxo'f zin'en loo cón che'n Crist, atate huiz ndrithen loo yalguth. No ndyactiin xalque' ngòca loo Jesús co'se' mque' mèn Jesús loo cruz. Co'se' tataa ndxàca loon, ngue lu'en loo mèn le' Jesús ndlyath no daa par ban daa xalque' mque tee ban Jesús làth mèn, ne. <sup>11</sup> Per láth be' ngue tee banen loo izlyo' ndxè', nzoque' ryes loon ryete huiz par guth mèn daa por cón che'n Jesús. Por con' co' nde teele' ndxàc loon, ndxú' loo mèn no nda' mèn cuent le' Crist ngue tee noque' daa por mod co' ngue tee'en loo zin' co' nxo'f zin'en loo cón che'n Crist. <sup>12</sup> Cona, ndyaquen thib mod no tedib mod ne'lyá'de daa loo yalguth por cón che'n zin' co' nxo'f zin'en cón che'n Jesús. Per part cón che'n gu', ndxe'leque', por cón che'n ryete con' ndyactiin ncàba loo gu' le' gu' ngue tee ban xalque' ñibe' Diox loo gu'.

<sup>13</sup> Thidte mod ndxelazen loo Diox xal ngola's mèn co' mque' ye's co' nac libr che'n Salmos co' nac xti's Diox xal mbez di's co' ndub loo libr che'n Salmos:

Por ngolazen, cona ndyoodizen cón che'n Tad.

Daa, ne, ndxelaz loo Tad Diox. Por cona, ndyoodizen cón che'n Tad Jesús. <sup>14</sup> Nonque' na' no naneeque' na' le' Diox co' mblo xban Tad Jesús, Diox co' xban na', ne, par bii no na' Diox co' hue' na' loo Jesús co'te' nzo Jesús. <sup>15</sup> Ryete yaltii co' ndxàc loon, le'i ndxàc loon par càba con' ndac loo gu', co' nee di's, li Diox anggàc con' ndac loo huax mèn co' yila's loo Jesucrist par gab mènà loo Diox: Diox quix U', Tad Diox, por ryethe con' ndac co' ndli no U' nu'. Le' sya, di's co' gab mèn loo Diox li par càba loo Diox xyo'f lèe xyo'f xti's Diox loo taamas mèn.

<sup>16</sup> Por cona, indxetacte lezon loo cón che'n Diox. Mastale' bél'yòo ladpe'en ndoo yàc co' gox par gatha yé' huize', per ndxe'leque', thìb huiz tedib huiz sate más ncàba con' ndac loon le'n lezon no le'n xtùuzen loo con' ndub quee lezon. <sup>17</sup> Tac ryethe yalnaxi co' ndxàc loon nalle' loo izlyo' ndxè', le'i nac co' setilte ndrì'th loon ndxepete tiemp no maste. Per pà ta' con' co' ndxàc loon ndxè' loo con' roo con' xèn tìn' co' thidtene gàc loon yiloa. <sup>18</sup> Part cón chenen, indliden xtùuz no ingüi'den loo con' co' ndxú' loo mèn. Per ndxe'leque', ndlin xtùuz no ndyóon cón che'n con' co' indxú'de loo mèn. Tac con' co' ndxú' loo mèn, co' ngüi' mèn loo, nac con' co' nxec ndxepete tiemp no maste. Per con' co' indxú'de loo mèn, con'a nxec thidtene. No ne'tyon'te no ne'lyuxte con'a thidtene.

## 5

<sup>1</sup> Na' naneeque' chele' bél'yòo lad na' ndxè' co' nac xal thìb yòocal co' ne'xecte nen co'te' nzo ban na' nalle' gath no lyux, Diox toxcu'a no que no Diox thìb ladpe' na' co' gàc xal thìb yòocal cub co'te' yòo ban na' loo bé'. No ladpe' na' co' mbli nable' Diox, ladpe' na' ne'tyoxcu'a'de por mèn che'n izlyo' ndxè'. Ladpe' na' co' mbli nable' Diox co' gàc che'npe' bé'a xec thidtene. <sup>2</sup> Lìcque' naca, láth naban na' loo izlyo' ndxè' ndli na' sient. No nden' na' ryethe yaltii no ryethe yalnè co' ndxàc loo bél'yòo ladpe' na' ndxè' nalle', ¿lé'? Por cona, ndlya's na' gath bél'yòo ladpe' na' ndxè' par que no na' tedib lad cub co' nac che'npe' bé'. <sup>3</sup> No lad cub na', co' que no na'a, gàc xal thìb ned xab cub na' co' goc na' par ne'gàc chede na', co' nee di's, par ne'yòode alm na' no xpìi na' tua'te loo bé'. <sup>4</sup> Cona, ngue niin loo gu: Láth be' naban na' le'n co' nac bél'yòo ladpe' na' ndxè', anze'f nalyat nden' na' con'. No ya ne'xecte na' nden' na' con' co' ndxàc loo na'. Inacta ndlya's na' anggath na' par alithe ryo xpìi na' no alm na' loo ladpe' na' par ne'que node na' thìb ladpe' na'. Ndxè'leque', ndlya's na' gath na' par que no na' tedib ladpe' na' co' gàc thìb lad cub co' ne'gathte thidtene no co' gàc thìb ladpe' na' co' banque' thidtene. <sup>5</sup> Yub Diox nac xa' co' mbli par que no na' thìb lad cubpe' na' co'se' gath bél'yòo ladpe' na' ndxè'. No mblàa Diox Xpìi Natú' loo na' par li la's na' que noque' na' thìb lad cubpe' na' yiloa.

<sup>6</sup> Por cona, ngue niin loo gu: Láth be' naban na' loo izlyo' ndxè', thidteneque' ndxàp na' yalxla's loo Diox le' Diox li con'a loo na'. Naneeque' na', ne, láth be' naban na' le'n bél'yòo ladpe' na' ndxè' loo izlyo' ndxè', be' nzi tee xà' na' loo Diox loo bé'. Tarte yòo ban no na' Diox loo bé'. <sup>7</sup> Láth be' nzi tee ban na' loo izlyo' ndxè', ndxàp na' yalxla's le' Diox li ryethe con' mcàbgòn Diox li Diox loo na'. Imbedte na' no indub queede lezo' na' cón che'n con' co' ndxú' loo na' loo izlyo' ndxè' par gàc con' ndac loo na' por cón che'n izlyo' ndxè'. <sup>8</sup> Con'a ndli sate más ndxàp na' yalxla's loo Diox. No sate más ndlya's na' no nguen lezo' na' gath bél'yòo lad na' par yòo ban no na' Diox. <sup>9</sup> Por cona, que naca inzo node na' Diox, que naca nzo no na' Diox, ngue li na' con' co' nzote mod gác na' li na' par tataa mod más yòo lezo' Diox ñèe Diox na'. <sup>10</sup> Tac ryete na', naquingue' yo na' loo Crist par tyoo na' loo Crist co'te' ndub ñibe' Crist par tub rez Crist cón che'n ryethe con' mbli na' láth mque tee ban na' loo izlyo' ndxè' par càaya' na' cón che'n co' gàc loo na' por con' co' mbli na', que naca mbli na' con' ndac, o que naca mbli na' con' ye'rsin'.

*Di's ndac che'n Diox ndlu' yo nagàl lezo' mèn loo Diox no cue ban mèn rye nda mèn no rye ndye'th mèn loo Diox.*

<sup>11</sup> Pues, com le' na' naneele' no nonque' na' xá mod ndxàal zyeb ryete na' loo Diox, ¿lé'?, tac Diox tub rez cón che'n na', por cona, ngue lin con' co' nzote mod lin par yila's taamas mèn co' ndxela's loo Diox le' di's co' ndethen loo gu' nac lìcpe'. Diox non no naneeque' Diox cón chenen le' daa, lìcque', ngue que tee ban lìcpe' loo Diox. No ndlyazen le' gu', ne, ten' le'n lezo' gu' no mbeden le' gu' ta' cuent le' daa, lìcque', nque tee ban lìcpe' loo Diox. <sup>12</sup> Inacta co' beren, ngue niin di's ndxè' loo gu' tedib vez par li gu' cuent le' daa ngue ta' cuent ndac loo gu' cón chenen tedib vez. Ndxè'leque', ngue toodiz non gu' loo cart ndxè' par ngue tan lugar loo gu' par tyac lezo' gu' ndxep no huen yo lezo' gu' por cón chenen. Tataa mod gàca loo gu' gác gu' càb gu' loo mèn co' ndye's con costumbr no con mod co' ndxú' loo mèn. Leque mènà indlide cas xal nac xtùuz mèn

no lezo' mèn co', licque', ndlu' xá nac mèn loo Diox. <sup>13</sup> Chele' gu' nden' nquée mbii yéquen por asendli guthen zin' loo zin' co' mxo'f zin' Diox loon por anze'f ndyoodizen loo gu', pues nquée mbii yéquen por naca zin' co' mxo'f zin' Diox loon. Per chele' gu' ndli cuent le' daa ndxe'sleque' ngue tee'en loo gu' no inquéede mbii yéquen, tataa ndlina por cón che'n gu' par gác con' ndac loo gu'. <sup>14</sup> Com le' Crist nque' lezo' ñèe Crist mèn, cona sate más, ndyaquen, nquin lin sirv loo Crist no loo mèn. Por cona, ngo ron co'se' nguth angoluxte Crist loo cruz por cón che'n ryete mèn, sya, por part che'n Diox, Diox mbli cuent ryete mèn, ne, nguthle', co' nee di's, part che'n Diox nguth no Crist ryete mèn loo cruz. <sup>15</sup> Licque', nguth Crist por cón che'n ryete mèn. Tataa mbli Crist par gàca nalle' le' part cón che'n Diox, mèn co' nzi ban, co' nee di's, mèn co' ndxela's loo Crist, ne'tolode que tee ban mènna más xal neepe' lezo' mènna no xal ndryo' ndlyen' lezo' mènna li mènna. Ndxle'leque', Diox ndlya's ban mènna par li mènna con' co' neepe' lezo' Crist, Crist co' nguth no co' ngro xban por cón che'n mènna. <sup>16</sup> Por cona, axta huiz nalze par delant indliden cas loo taamas mèn. Ne' ne' indlasen cón che'n taamas mèn xal nac mod che'n mèn xal ndli mèn co' alithe nzi tee ban loo cón che'n xab izlyo'. Mastale' ndoore' co'se' yila'spe'en loo Crist axta daa mblas cón che'n Crist xal ndla's mènna nalle'. No ne'ngliden cas loo Crist tiempa. Per nalle' xà' nac mod co' ndliben Crist no xà' nac mod co' ndlin cas loo Crist. Nalle' indliben Crist xal mbli ben Crist tiempa. <sup>17</sup> Por cona, chele' chol mèn co' yòo loo cón che'n Crist dib nzo yéc mèn no dib nzo lezo' mèn, mènna nac mèn cub xal thib mbeto' co' diz ngóol. Ryete mod co' mque no mèn póla nguri'thle'. Per nalle' mènna ngue tee ban con thib mod cub co' nac thib yalnaban cub.

<sup>18</sup> Diox nac xa' co' ngue li con' co' ndxàc loo na'. No leque yub Diox nac xa' co' mtu' mtàl xèn xyàn co' ngòo lezo' na' gunèe na' Diox. Por cón che'n Crist, mbli Diox ryete con'a par gác na' che'npe' Diox. No mxo'f zin' Diox zin' ndxè' loo na' par gác na' ta' na' cuent co' nzote mod li na' par yu' yàl lezo' mèn loo Diox. <sup>19</sup> Cona nee di's, leque yub Diox mtu' mtàl lezo' mèn loo Diox por cón che'n Crist. No mbli Diox ya ne'tolode cui'f cón che'n xquin mèn no cón che'n xtol mèn la's nii mèn no la's ya' mèn. Le' loo nu' na, mbli Diox par xo'f zin' nu' zin' ndxè' par lu' nu' loo mèn no par ta' nu' cuent cón che'n di's ndac che'n Diox loo mèn par cue nagàl lezo' mèn loo Diox. <sup>20</sup> Cona, ngue tan cuent loo gu' le' nu' nde loo gu' con di's co' nac xti's Crist xal mnibe' Crist loo nu' par ta' nu' cuent cón che'n di's ndac che'n Diox loo gu'. Cona nee di's nde nu' xal yub Diox par na'b nu' loo gu' gòn gu' di's co' ta' nu' cuent loo gu'. Por cona, nalyat ña'b nu' loo gu' por cón che'n Crist: Gure nagàl lezo' gu' loo Diox. <sup>21</sup> Crist ne'ncua'nte xquin Crist no xtol Crist thidtene. Per ndxe'leque', Diox mbli cuent le' Crist mcua'n xquin Crist no xtol Crist par nguth Crist loo cruz por cón che'n na'. Tataa mbli Diox par, co'se' yòo na' loo Crist no loo cón che'n Crist, que no na' thib yalnaban nàl loo Diox xalque' ndlya's Diox que tee ban li na' loo Diox.

## 6

<sup>1</sup> No por ndxàc xtàa na' loo zin' co' mxo'f zin' Diox loo na', por cona, ngue niin loo gu' no ngue na'ben di's ndxè' loo gu': Ne'la'de gu' gác perdid con' ndac co' ngue lu' Diox loo gu' no co' ngue li Diox loo gu'. <sup>2</sup> Tac loo libr co' nac xti's Diox ndub di's co' ndxab Diox loo mèn nación Israel, di's co' mbez:

Co'se' ngòc thib tiemp ndac, mbìnen di's co' ngurez gu' loon. No co'se' ngòc huiz par mblyá' gu' loo con' ryes, daa mblyath no gu'. Ngue niin loo gu', ne, mèn Corint: Hui' gu' nexa. Nalle' nac thib tiemp co' nac thib tiemp ndac par lyàa yéc gu' no lyàa lezo' gu' loo Diox par zye' mod co' ndxàp gu' loo Diox. Le'n huiz ndxè' no le'n tiemp ndxè' nac huiz no tiemp co'se' nzoque' mod lyá' gu' loo con' ryes.

<sup>3</sup> Nec thib mod no nec tedib mod incuanten mod loo mèn par lin ngòc nguàal con' loo mèn par tataa mod ne'ñii yèede no ne'ñii tìide mèn cón che'n zin' co' nxo'f zin'en cón che'n di's ndac. <sup>4</sup> Ndxle'leque', leque daa nquenap daa par lu'en daa loo mèn le' daa, licque', nxo'f zin' cón che'n Diox no ndlin sirv loo Diox. Tataa ndlu'en loo mèn co'se' nxec

yèen par ncha'lazen, no co'se' nxec yèen co'se' ndli mèn ngòc nguàal con' loon, no co'se' nxec yèen co'se' nde che con' loon, no co'se' nxec yèen co'se' ndxàc yaltii loon. <sup>5</sup> Nxec yèen co'se' tin mèn daa. Nxec yèen co'se' nque' mèn daa lezi'f. Nxec yèen co'se' ndxetoo xyàn no ndxetoo di's lezo' mèn cón chenen. Nxec yèen co'se' ndli guthen zin'. Nxec yèen co'se' ngo'en mcal' loon por cón che'n zin' co' nxo'f zin'en. Nxec yèen co'se' xlat daa ngue tee'en. <sup>6</sup> Nque tee ban liquen no nque tee ban nambiiquen. Lìcpe' ba'i, nonquen no naneequen cón nac co' lìcpe'. Nxec yèen no ncha'lazen loo mèn. Ndlyatque' lezon ñèen mèn par lyath non mèn. Ñibe'que' Xpii Natú' loon. Lìcpe' ba'i, nque'que' lezon ñèen rye mèn dib nzo yéquen no dib nzo lezon. <sup>7</sup> Co'se' ndyoodizen, ante ndyoodizen di's co' nac di's lìcpe' loo mèn. No ndxàcque' ryethe con' roo con' xèn co' nzo la's nii Diox no con' co' nzo la's ya' Diox loon. Diox co' nac Diox nalì no Diox nambii ndlyath no daa par que tee ban lì daa par ne'lìde mèn ye'rsin' gan quexù' que' fals mèn ye'rsin' daa loo con' co' inacte con' lìcpe'. <sup>8</sup> Tataaque' ndlin, que naca li mèn cas loon no li mèn con' guryath con' guryèn loon, que naca ne'lìde mèn cas loon no ne'lìde mèn con' guryath no con' guryèn loon, que naca ndxath ndxèn con' ye'rsin' cón chenen làth mèn, que naca ndxath ndxèn con' ndac co' ndlin làth mèn, que naca mbez mèn nac daa mbi' gutyè'. Per mastale' mbez mèn tataa, ndlin con' lìcpe'. <sup>9</sup> Mastale' ayéc axàn' ndlibe' mèn daa, per ndxe'leque', ndli mèn cuent nac daa xal mèn tith. Huax vez mbri'then loo yalguth. Daa ndoo ndxè'. Be' naban daa. ¿Ché' nguth daa ndlya's gu', cà'? Yende xàa. Mtetii mèn daa axta mdyac lezo' mèn. Per ne'nguthte mèn daa. Mzyalque' daai tataa mod mtetii Diox daa tac tataaque' mquin daai. Per ne'ngathte daa. <sup>10</sup> Mastale' nxi yéquen no nxi lezon loo con' ndxàc loon, per ndxe'leque', ale leque daa ndli ndyac lezon thidtene. Mastale' yende chó yalgon' ndxàpen loo izlyo', ndxe'leque', ndlin par gáp taamas mèn huax con' ndac loo cón che'n Crist. Nac daa mèn co' yende chó yalgon' ndxàp. Per mastale', ingüi'den loo chol yalgon' nalle'. Che'npe'en nac ryethe con'.

<sup>11</sup> ¡Aa mèn Corint co' ndxàc huesen por cón che'n Crist! Nase alanleque mblo'en ryethe con' co' nzo le'n lezon loo gu'. Alanleque mdoodiz non gu' ryethe con' co' nac cón che'n Crist loo cart co' ngue tel'en loo gu' ndxè'. <sup>12</sup> Yende cón nden'en le'n lezon cón che'n gu' co' nzosua' le'n lezon par ñeen cón che'n gu' par tataa mod ne'que'de lezon ñèen gu'. Ndxé'leque', nzo con' ñee gu' no con' co' nden' gu' le'n lezo' gu' cón chenen. Por cona, iaridte nque' lezo' gu' ñèe gu' daa, ndyaquen. <sup>13</sup> Hui' gu' nexa. Daa ngue toodiz noque' gu' xal loo myen' co' nac xin'pe'en. Bli gu' co' nzote mod li gu' par tolo gác gu' que' lezo' gu' ñèe gu' daa xalque' nque' lezon ñèen gu', ndee gu'.

*Pab ngue ta' cuent loo mèn le' na' co' ndxela's loo Diox por cón che'n Jesucrist, lìcpe', nac na' templ co'te' nzo ban Diox, Diox co' thidtene naban.*

<sup>14</sup> Ne'ta'de gu' lugar queltaa no gu' mèn no thidte gác gu' con mèn co' indxela'ste loo con' co' nac cón che'n Crist loo chol con'. Tac ¿xá mod tyal mèn yòo mèn co' nac mèn nalì no mèn nambii loo con' ndli mèn co' inacte mèn nalì no mèn nambii, à'? Yende moda, ¿lé'? Lomisque' ne, co'se' ntenii xnii thib lugar co'te' nacua, yende mod cuau lugara leque tiempa, ¿lé'? <sup>15</sup> No ¿ché' ndli gu' cuent nzoque' mod thidte gác Crist con Mebizya, cà'? ¡Yende mod gàca tataa, ey! No ¿xá mod tyal mèn co' ndxela's thidte gác mèna par yòo mèna loo cón che'n mèn co' indxela'ste, ne, à'? ¡Yende mod gàca tataa, ey! <sup>16</sup> No ¿xá mod gàca loo na', na' co' nac xal thib templ co'te' nzo ban Diox par tyal na' no ta' na' lugar li na' cas loo chol mdo', à'? Yende mod gàca tataa loo na', ¿lé'? Tac, lìcpe' ba'i, Diox nzo ban loo na' xal le'n thib templ xal nac di's co' ndxab Diox cón che'n con' ndxè'. Ndxab Diox:

Daa go ban làth mèna. No que tee noquen mèna. No gác daa Dioxpe' mèna. Le' mèna na, gác mènpe' daa.

<sup>17</sup> Por cón che'n ryethe con'a, ndxab Diox, ne:



Ne'queltàa node gu' arid con mèn loo mod co' ndxàp mènna loo cón che'n xab izlyo'. Ne' ne' indlyazen yizi'f yiga's gu' loo chol con' co' nac con' zab co' ndli mènna. Le' sya, tataa mod yòo lezon cón che'n gu'. No ndoo líte gac gu' mènpe' daa.

<sup>18</sup> Le' sya, gac daa xal xudpe' gu'. Le' gu' na, gac xal xgan'pe' daa no xal rsappe' daa. Tataa ndxab Diox, Diox co' ndxàp ryethe con' la's nii Diox no la's ya' Diox. Thiba con' ndxè'.

## 7

<sup>1</sup> Tolo mque' Pab ye's. Ndxab Pab: Le' tediba na, chele' Diox, licque', mcàbgònle' ryethe con' ndxè' loo na', gu' co' nque' lezon ñèen, cona tolo ngue niin loo gu' nalle': Ndxàalque' li na' fuerz par que tee ban xà' na' loo ryethe con' co' nac con' zab co' ndxuhua nee lezo' mèn co' nac che'npe' izlyo' ndxè', no co' ndryo' ndlyen' lezo' mèn li mèn, no cón che'n xtùuz mèn co' ndlipe' mèn le'n lezo' mèn. Ndxè'leque', zye'b na' loo Diox par gac na' mèn co', licque', ngro xà' loo cón che'n xab izlyo' par que tee ban li na' loo Diox.

*Pab ngue lu' le' mèn ciuda Corint co' ndxela's loo Diox por cón che'n Jesucrist ngulàa yéc no ngulàa lezo' loo Diox no mzye' mod co' ngòp mènna loo Diox.*

<sup>2</sup> Por cona, ngue niin loo gu': Fta' gu' lugar yi'th nu' loo gu'. Ne'tolode yitac lezo' gu' ñèe gu' daa. Tac tarte lin nec thib con' ye'rsin' loo nec thib mèn. Tarte té'th nec thib mèn loon par li mènna con' ye'rsin'. Tarte quediin nec thib mèn, ne. <sup>3</sup> Ingue niiden con' ndxè' loo gu' par ngue quexù'en gu'. Gu' nonque' le' daa nque'que' lezo' ñèen gu' xalque' guniilena loo gu'a, que naca ban na', que naca gath na', conse' thidte tyoo lezo' na' ban na' loo thidte con' co' nac cón che'n Crist. <sup>4</sup> Anze'f ndxàpen yalxla's loo cón che'n gu' xal nac mod co' nzi tee ban li gu' loo Diox. Anze'f thib gust ndan lezon co'se' ndyoodizen cón che'n gu' loo taamas mèn axta co'se' mdoodiz non Tit cón che'n gu' leque daa ntegán lezon, ne. No por cón che'n gu' ndyac tín' lezon axta plóthe láth ndli mèn ngòc nguàal con' loon.

<sup>5</sup> Tac anon mzin daa le'n yèezya' che'n laaz mèn macedon, yende mod mbe see tee lezon. No yende mod ngo nagàl lezon por cón che'n zin' co' nxo'f zin'en. Ndxè'leque', thib mod no tedib mod ngòcque' yaltii no yalndyub ngu's loon. Thib mod no tedib mod, ncu'a'n xó'que' mèn cón chenen. No mbli mèn ngòc nguàal con' loon. Ale mzyeb daa no ngo noque' lezon. <sup>6</sup> Per mastale' ngòca tataa loon, Diox co' ntegán lezo' mèn no co' ndli par ye'th lezo' mèn co' nzi tee xi lezo', Diox mtegán lezon por mzin Tit loon. <sup>7</sup> Iante mtegán Diox lezon por mzin Tit loon. Ndxè'leque', masre' mtegán Diox lezon co'se' mda' Tit cuent loon cón che'n xá mod mtegán gu' lezo' Tit co'se' mda' gu' cuent loo Tit le' gu' anze'f nguen lezo' lyath no gu' daa tant mxi lezo' gu' por cón chenen no tant ndyóo gu' cón chenen. Por ryethe con' mbli gu'a, thib mod no tedib mod sate más ndyac lezon.

<sup>8</sup> Tac mastale' mden' lezon anze'f mxi lezo' gu' por di's co' mque'en loo cart co' mzin loo gu'a co'se' mblab gu' di'sa, no ne'needen cón ngulàa yéquen no cón ngulàa lezon ale tataa mtel'en carta loo gu'. Per nase, inxide lezon tac mtel'en carta loo gu'. Tac thib part huenque' mblin, ndyaquen. Tac cart co' mtel'en loo gu'a mbli mxi yéc gu' no mxi lezo' gu' ndxep tiemp par ngulàa yéc gu' no ngulàa lezo' gu' par xà' mse' gu' mod co' ndlu' nque tee ban ndac gu' nalle' loo cón che'n Crist. <sup>9</sup> Per nalle' ndyac lezon. Per indyacte lezon por ante mxi yéc gu' no mxi lezo' gu' por di's co' mtel'en loo gu'a. Ndxè'leque', ndyac lezon tac mxi yéc gu' no mxi lezo' gu' xal nee lezo' Diox. No ndyac lezon tac, mastale' mxactii gu' por cón chenen, nec thib mod no nec tedib mod yende chó yalquii ngòc loo gu' loo cón che'n Crist por part cón chenen. <sup>10</sup> Tac yalnaxi co' ndxàc loo mèn xal nac co' nee lezo' Diox, le'i ndli par lyàa yéc mèn no lyàa lezo' mèn par zye' mod co' ndxàp mèn par lyá' mèn loo con' ryes. Loo cona inquinte xi lezo' mèn por ngulàa yéc mèn no por ngulàa lezo' mèn par lyá' mèn loo con' ryes. Per ndxè'leque', yalnaxi co' ndxàc loo mèn co' alithe nque tee ban loo cón che'n izlyo' ndxè', yalnaxia ncàb ryo xà' mènna loo Diox thidtene yiloa. <sup>11</sup> Per hui' gu' nexa. Loo cón che'n leque con' ndxè', le'i ngòc loo gu' mxi lezo' gu' xal gunee lezo' Diox, ¿lé'? Naplò con' ndac ngòca loo gu' cón che'n con'

co' mxi lezo' gu'a le' gu' mbli nèe leque gu' par tyubdi's gu' loo Diox. Co'se' mxi lezo' gu'a, mden' gu' cón che'n con' ye'rsin' co' mbli mbi'a le'n lezo' gu'. No leque gu' mdub razon cón che'n gu' loo chol mèn. No axta ndlyàa xyàn lezo' gu' co'se' leque gu' ngüi' loo xtàa gu', ¿lé'? No axta mzyeb gu' gunèe gu' daa, ne, ¿lé'? No axta arid mbly'a's gu' thidte gác gu' con daa. Anze'f mdyóo gu' xá mod tyubdi's gu' loon. No axtaque' mbli gu' gan mbli rez gu' loo mbi' co' mbli con' ye'rsin' làth gu'a. Loo ryethe con' mbli gu'a, mblu' gu' loo mèn nac gu' mèn nali no mèn nambii loo Diox. Con' mbli gu' ndlu' yende chó dol ndxàp gu' cón che'n mbi'a. <sup>12</sup> Cona, ndlyazen non gu' no ta' gu' cuent, mastale' tataa mque'en ye's loo gu', ne'nque'den ye's loo gu' loo cart por cón che'n mbi' co' mcua'n xó' loo gu'. Ne' ne' mque'en ye's loo gu' por cón che'n mèn co' ngo sál' yaltii por cón che'n mbi' co' mcua'n xó' làth gu'a, ne. Ndxé'leque', mque'en ye'sa loo gu' par non ryete gu' no ta' ryete gu' cuent susque' altant ngure gu' loo Diox par mblyath no gu' daa por mxo'f zin' gu' thib zin' cón chenen, tant nque' lezo' gu' ñèe gu' daa. <sup>13</sup> Co'se' guneen leque gu' mtegán lezo' gu', ale leque daa mtegán lezon, ne.

No sate más mteganen lezon co'se' guneen ndyac lezo' Tit loo cón che'n gu' xá mod mbli gu' par mbye'th lezo' Tit làth gu'. <sup>14</sup> Tac chele' daa mda' ndxep gust lezon co'se' mdoodiz non Tit cón che'n gu', ne'nthonte daa co'se' mdoodiz non Tit cón che'n gu' tataa. Ndxé'leque', licque' ngóc di's co' mdoodiz non gu'. Lomisque' ne, licpe' nac di's co' mdoodiz non Tit cón che'n gu' le' daa ndxòoque' lezo' cón che'n gu'. <sup>15</sup> No axta gust mbyan' lezo' Tit axta plóthe cón che'n gu' co'se' nte' lezo' Tit xá mod mdubdi's gu' loo di's co' gunii Tit loo gu'. No axta gust mbyan' lezo' Tit cón che'n gu' co'se' mbli gu' cas Tit co'se' mzin Tit loo gu' axta ale mxac Tit mzyeb gu' no mxi'th gu' loo Tit. Por cona, masre' nque' lezo' Tit ñèe Tit gu'. <sup>16</sup> Per nase, ndyac lezon tac sate más tolo gàpen yalxla's loo gu' thidtene, ey. Thiba con' ndxè'.

## 8

*Pab ngue ta' cuent loo mèn ciuda Corint le' mèn yèezya' che'n làaz mèn macedon ngóc mèn co' ndoo xal' lezo' no mèn co' non carida co' nda' gòn dib nzo yéc mèn no dib nzo lezo' mèn.*

<sup>1</sup> Le' tediba na, gu' co' nac mèn huesen por cón che'n Crist, ngue tan cuent loo gu' loo cart ndxè' par non gu' xá mod mbli Diox angngóc con' ndac loo mèn co' nqueltàa loo cón che'n Diox le'n chol yèezya' co' nac che'n làaz mèn macedon. <sup>2</sup> Ndxé'leque', ale ngòca loo mènna láth mxec yèe mènna loo rye yaltii no rye yalndyub ngu's co' ngóc loo mènna, lugar de ten' mènna cón che'n yaltii no yalndyub ngu's co' ngóc loo mènna, no mastale' ngóc mènna mèn prob tìn', ale le'le' ngòca yéc mènna le' mènna ta'la's tmi loo cón che'n Diox. <sup>3</sup> Daa nda' cuent le' mènna angmda'la's tmia co' nzote mod ngóc mènna mda' mènna. Mastale' be'the ndoo ri'th mènna, ale mxen mènna tmi co' nquin mènna par ta'la's mènna tmi loo Diox. <sup>4</sup> Nalyat mna'b mènna loon par tan lugar càayan tmi co' mda' gòn mènna loo cón che'n Diox par tel'en tmia loo mèn co' ngro xà' loo cón che'n xab izlyo' co' ndyac yaltii, mèn co' nzo ban ciuda Jerusalén. <sup>5</sup> Ne'nda'de mènna tmi xal mblin xtùuz ta' mènna. Ale ndxe'leque', ner con' mbli mènna, mnibe' mènna loo lezo' mènna. No mblo ro mènna loo Diox ante li mènna co' neete lezo' Diox li mènna. Le' sya, mbi'th nee mènna loon. Guneen mènna: ¿Xá nee U', Tad Pab? Le' nu' li co' neete lezo' Diox. Blu' U' loo nu' xá mod li nu' thop nu' tmi co' nquin mèn co' ndxàc hues xtàa na' ciuda Jerusalén. <sup>6</sup> Por cona, texal mtlo Tit, mblu' Tit loo gu' xá mod ndxàal lyath no na' xtàa na' co' ndyac yaltii, daa mco'x loo Tit yi'th nee Tit máa gu' par nedrè' tedib vez par lyath no Tit gu' telo gu' zin' ndac ndxè' co' ngue li gu'. <sup>7</sup> Gu' nzi té'thque' no nzi tubdi'sque' gu' loo cón che'n Diox, co' nee di's, ndxàp gu' huax yalxla's loo Diox. No ndxác gu' ndlu' ndac gu' cón che'n di's ndac. No mté'th ndac gu' cón che'n Diox. No mbli nèe gu' leque gu' par tyubdi's gu' loo Diox thidtene. No nque'que' lezo' gu' ñèe gu' daa. No dib nzo lezo' gu' nque' lezo' gu' ñèe gu' xtàa gu'. Bli nèe gu' gu' loo con' ndac co' ngue li gu' ndxè', ne, par tolo lyath no gu' hues xtàa na' co'se' nde che con' loo hues xtàa na'.

<sup>8</sup> Ingue niiden con' ndxè' loo gu' par li gu' co' ngue li gu'a xal thib costumbr co' ngue no mèn. Ante ndlyazen le' mènà ta' cuent no ye'th lezo' mènà par li mènà xtùuz le'n lezo' mènà par ta' mènà cuent co' huenleque' ñeene' ché', lïcque', nque' lezo' gu' ñèe gu' xtàa gu' o ché' inque'de lezo' gu' ñèe gu' xtàa gu'. <sup>9</sup> Gu' nonque' no naneeque' gu' cón che'n con' ndac co' angmbli Tad Jesucrist loo gu'. Mastale' nac Tad Jesucrist xa' ric, ale ndxe'leque', ngòc Tad Jesucrist mèn prob por tant mque' lezo' Tad Jesucrist ñèe Tad Jesucrist gu'. Mbli Tad Jesucrist loo gu' par ngòc gu' mèn ric loo cón che'n Tad Jesucrist.

<sup>10</sup> Cón che'n tmi co' thop gu'a, lyazen niin loo gu' xal ndye'th xtùuz yéquen par tolo gac con' ndac loo gu' cón che'n con'a: Ndyaquen, ale ndxàalque' li gu' con' ndxè': Ftolo thop gu' tmia xalque' mnibe' lezo' gu' mbli gu' par mthop gu' tmi lín' nguri'tha par mèn co' nquina. No ndlyazen xyo'f nde' xyo'f ndla' lezo' gu' co'se' ndli gu' con'a. <sup>11</sup> Pues nalle', tá, ftolo thop gu' tmi xal nibe' gu' loo lezo' gu' li gu' par gaca xalque' mnibe' gu' lezo' gu' thop gu' tmi no tub gu' tmia. Tataa mod xas xas thop gu'i xalque' nzo gu' no xalque' ndxàp gu' che'n gu'. Tataa ta' gu' tmia. <sup>12</sup> Tac chele' thib mèn, lïcque', ndlya's tub tmi no ta' mèn gòn loo cón che'n Diox, Diox ndyal nda' mèn gòn co' nac tmi co' ndub mènà xalque' nzo mèn no xalque' ndxàp mèn che'n mèn. Diox imbezte ta' yèe mèn tmi o tub yèe mèn tmi co'se' indxàpte mèn huax tmi.

<sup>13</sup> Ingue niiden loo gu' por fuerz ta' gu' ayud loo mèn ciuda Jerusalén co' ndyac yaltii par que no mènà tant con' axta ndyac tín' lezo' mènà no part cón che'n gu' na, co'se' li gu' con' ndxè', gaca loo gu' le' gu' ten' ndyactii gu' loo con'a por nde che con' loo gu' tant mda' gu' gòn càa mènà. Yende xàa. Leque gu' nee xá mod li gu' xal nee lezo' gu' cón che'n tmi co' mthop na'. <sup>14</sup> Ndxè'leque', ndlyazen le' tiemp ndxè' lalque' gaca loo na' con mèn hues na' co' ndxela's chol lugar. Con' ndxè' nac co' ngue niin loo gu': Ndlyazen thidte gac gu' con mèn co' ndxàc hues xtàa gu' por cón che'n Crist chol lugar. Nalle' gu' ngue ta' gòn co' naquin mèn. Le' co'se' gac huiz co' naquin gu' con' co' nde tub loo gu' na, lomisque', mènà lyath no gu', ne. Tataa mod thidte ndxàc gu' con mèn co' ndxàc hues xtàa gu' loo cón che'n Diox no loo cón che'n Crist. <sup>15</sup> Le' sya, gaca loo gu' xal mbez di's co' ndub loo libr co' nac xti's Diox co' mbez: Le' mèn co' mque no huax che'n, ne'nque node men che'n mèn, co' nee di's, ne'ngyan xo'fte che'n mèn co' mque no mèn. Le' mèn co' be'the mque no che'n na, ne' ne' nga tub che'n mèn co' mque no mèn.

*Pab ngue ta' cuent cón che'n Tit con mèn co' mblyath no Tit.*

<sup>16</sup> Per Diox quix Diox le' Diox mbli mbye'th lezo' Tit par mxo'f zin' Tit thib zin' cón che'n gu'. No altant mdoo Tit loo gu' xalque' mxo'f zin'en thib zin' loo gu'. <sup>17</sup> Lïcpe' ba'i, mbìn Tit di's co' mna'ben loo Tit par yi'th too naa Tit gu'. Látha, anze'f altant mdoo Tit gunèe Tit gu'. No anze'f mblya's Tit ñèe Tit máa gu'. Por cona, leque Tit mnibe' lezo' Tit yi'th nee Tit máa gu' tac tataa gunee lezo' Tit.

<sup>18</sup> Ngue tel'en Tit con thib mbi' co' ndxàc hues na' por cón che'n Jesucrist. Mbi'a ndxác ngo yalbàn loo mèn co' nqueltàa loo cón che'n Diox axta mxo'f lèe mxo'f xti's mbi' no ndxath no ndxèn cón che'n mbi' loo mèn co' nqueltàa loo cón che'n Diox rye lugar. <sup>19</sup> Iante con' ndxè'de ndxàc loo mbi'. Ndxè'leque', mèn hues na' co' nqueltàa loo cón che'n Diox par ned làaz mèn macedon mcai yub mbi' co' ndxàc hues na' por cón che'n Crist par nque tee no mbi' nu' no lyath no mbi' nu' co' nac thop nu' tmi co' mthop mèn co' nqueltàa loo cón che'n Diox yèezya' che'n làaz mèn macedon par lyath no gu' mèn co' ndyactii ciuda Jerusalén. No nque tee nxo'f zin' nu' zin'a cón che'n zin' ndac ndxè' par tolo non mèn cón che'n con' roo con' xèn che'n Diox no par tataa mod lu' nu' loo taamas mèn le' na' ndye'th lezo' par lyath no na' mèn co' ndxàc hues xtàa na' por cón che'n Jesucrist co' ndyac yaltii chol lugar, co' nde che con' loo, tac nque' lezo' na' ñèe na' mènà. <sup>20</sup> Tataa ngue li nu' par de que yende chó mèn la's loo nu' par quexù' que' fals mènà nu' cón che'n zin' co' ngue xo'f zin' nu' cón che'n tmi co' ngue thop nu' ndxè' par ne'ñii yèede no ne'ñii tiide mèn ngòc nguàal con' loo na' cón che'n tmi co' mthop na' par lyath no na' mèn hues na' por cón che'n Jesucrist co' ndyac yaltii. <sup>21</sup> Ngue cua'n nu'

mod par gac con' ndxè' nabe'ste no par nambii loote gaca. Iante ngue cua'n nu' mod gac con' ndxè' nabe'ste no nambii loote loo Tad Diox. Ndxè'leque', ngue cua'n nu' mod gaca con' nabe'ste loo chol mèn, ne.

<sup>22</sup> Ngue tel' nu' tedib mbi' co' ndxàc hues na' por cón che'n Jesucrist con Tit no con ner mbi' co' nac ner mbi' co' ndxàc hues na' por cón che'n Jesucrist co' nque tee no Tit. Nu' mbla's loo mbi' co' huen huen. No ndyac nu' le' mbi' altantque' ndyoo, thib mod no tedib mod, loo zin' co' mxo'f zin' mbi'. Per nalle', sate más ndye'th yéc mbi' no ndye'th lezo' mbi' altant ndoo mbi' loo cón che'n zin' co' ngue xo'f zin' mbi' tac mbi' ndxàp huax yalxla's loo gu'. <sup>23</sup> Chele' chó mèn ñibdi's loo gu' cón che'n Tit, fta' gu' cuent loo mèn le' Tit ndlyath no daa. No thidte nxo'f zin' ryop nu' Tit zin' co' nac cón che'n Tad Crist par li ryop nu' Tit sirv loo gu'. No chele' chó mèn ñibdi's loo gu' por cón che'n ryop mèn co' nque tee no Tita, fta' gu' cuent loo mèn le' ryop mbi' nde loo gu' por mtel' mèn co' ndxàc hues xtàa na' por cón che'n Jesucrist par xo'f zin' mèn thib zin' loo gu'. No ndli mèn par gac con' roo con' xèn loo Crist. No ndli mèn par xyo'f lèe xyo'f xti's Crist, ne. <sup>24</sup> Cona, ngue niin loo gu': Fcua'n gu' mod blu' gu' gu' loo mèn co' nqueltàa loo cón che'n Diox chol lugar par non mèn, lìcque', nque'que' lezo' gu' ñèe gu' yon mèn, co' nee di's, nac Tit con tachop mèn hues na' por cón che'n Jesucrist co' nde loo gu' nalle'. No blu' gu' gu' loo mèn co' nde loo gu' le' ianxle'de nac co' nda' nu' gust lezo' nu' ñee nu' cón che'n gu'. No ndxòo lezo' nu' cón che'n gu' por ndli gu' con' co' ngue niin loo gu' ndxè'.

## 9

*Mèn yèezya' che'n làaz mèn macedon mdub tmi par mda' gòn mèn tmi loo mèn co' ndxàc hues xtàa mèn por cón che'n Jesucrist.*

<sup>1</sup> Cón che'n zin' co' nxo'f zin' gu' par tub gu' tmi co' ta' gòn gu' loo mèn hues xtàa na' co' ndxela's loo Crist no loo cón che'n Crist, mèn co' mdyal ngro xà' loo cón che'n xab izlyo' par ngòc mèn che'npe' Diox, lìcpe' ba'i, inquinte que'en ye's cón che'n zin'a loo gu', ndyaquen. <sup>2</sup> Neequen no ndaquen cuent le' gu' ndye'thque' lezo' lyath no gu' mèn hues na' por cón che'n Jesucrist co' nde che con' loo. Por cona, axta gust nda' lezon ñeen cón che'n con' mbli gu' loo mèn co' nqueltàa par ned le'n yèezya' che'n làaz mèn macedon. No mdan cuent loo mèn yèezya' che'n làaz mèn macedon le' mèn che'n làaz mèn acay co' nac mèn gulàaz gu', mèn mtlolè' mthop tmia lín' nguri'tha. Con' co' mbli gu' par mthop gu' tmia ngòc thib mustr loo taamas mèn. Tataa mod mbye'th lezo' huax mèn par mthop mèn tmia, ne, xal mbli gu'. <sup>3</sup> Per mastale' nonen no ndaquen cuent ndly'a's gu' lyath no gu' hues xtàa gu' loo cón che'n Crist, ngue tel'en yon hues na'a loo gu' par ne'gacte thib yalgutyè' co' mdan cuent loo taamas mèn cón che'n gu' cón che'n tmia, no par gac loo gu' cón che'n tmi, co'se' ngolole' mthop gu' tmi, ngòc nable' gu' con tmi co'se' nquin mèn tmi. <sup>4</sup> Tac, ne'stolque', gal non ndxep mèn co' nac mèn yèezya' che'n làaz mèn macedon co' ndxàc hues na' por cón che'n Jesucrist loo gu'. No chele' nu' ñee le' gu' tarte yilo thop tmi, thyon nu' por gust co' mda' nu' lezo' nu' loo cón che'n gu'. Le' gu' na, ¿xá lyàai le'n lezo' gu' chele'i tataa gaca loo gu', à'? <sup>5</sup> Por cona, leque daa mbli xtùuz naquinque' co'xen loo mèn hues xtàa na' co' ngue tel'en loo gu'a par yi'th ner mèn loo gu' par chal mèn gu' cón che'n tmi co' mcàbgòn gu' ta' gu' par ngòc nable' tmia ndoore' galen loo gu'. No tmia gac co' angta'la's gu' loo hues xtàa na' co' nde che con' loo. Ndlyazen le' gu' ta' tmia dib nzo yéc gu' no dib nzo lezo' gu' par ne'gacta loo gu' le' gu' li sient cón che'n tmi co' ta' gu' loo mèn.

<sup>6</sup> Per nalle', ndlyazen niin thib di's loo gu', mèn ciuda Corint: Hui' gu' nexa. Le' mèn co' ngo ndxep bin, ndxep cosech thop mèn. Le' mèn co' ngo huax bin na, mèn nthopque' huax cosech ne, ¿lé'? <sup>7</sup> Thib thib gu' ta' tmi xal ñibe' lezo' gu' ta' gu' tmi. Ne'ta'de gu' tmia xal mèn co' ndli sienta co'se' mtuhuan mèn tmi. Ne' ne' ta' yèe gu' tmia. Per ndxe'leque', na' nanee le' Diox anze'f nque' lezo' ñèe mèn co'se' nda' mèn tmi con dib nzo yéc mèn no dib nzo lezo' mèn. <sup>8</sup> Tad Diox ndxàp huax con' la's nii Tad Diox no la's ya' Tad Diox par angli Tad Diox tolo yas yàl huax con' ndac loo gu'. Tataa ndli

Diox par gàca inquinte ya too dó' gu' loo hues xtàa gu' por con' co' nde che loo gu'. Tataa mod Diox lyath no gu' par tolo lyath no gu' taamas mèn co' nde che con' loo. <sup>9</sup> Loo libr co' nac xti's Diox ndub di's co' mbez taandxè':

Le' mèn co' nac mèn nali no mèn co' nac mèn nambii na, mènna mda' gòn dib nzo yéc mèn no dib nzo lezo' mèn co' ndxàp mènna par càa mèn prob. No angmda'la's mènna con' ndxàp mènna loo mèn co' ndyac yaltii. Sya, con' ndac co' mbli mènna nac thib con' ndac co' ne'lyuxte loo mèn thidtene. No te'que' lezo' Diox cón che'n mènna.

<sup>10</sup> Lomisque' ne, Diox co' ndli ndxas ndxàl biz bin co' ngo mèn, Diox ndli le' mèn que no con' hua mèn. No li Diox le' bin co' ngo gu' tolo yas yàl loo gu'. Lomisque' ne, Diox angli le' loo gu' co' nac mèn nali no mèn nambii tolo yas no tolo yàl con' loo gu' par tolo lyath no gu' mèn prob no tolo lyat lezo' gu' ñèe gu' mèn prob co' nquin con' par li gu' con' ndac loo mènna. <sup>11</sup> Angndli Diox con'a loo gu' par tataa mod mbyas mbyàl con' ndac loo gu' no par que no gu' che'npe' gu'. Diox tataa ndli loo gu' par tolo lyath no gu' mèn no lyat lezo' gu' ñèe gu' mèn axta plóthe. Le' sya, chele' gu' li xal ngue niin loo gu' ndxè', sya, huax mèn co' ndxàc hues xtàa na' gab: Diox quix U', Diox, loo Diox tac gu' ngue lyath no mènna con' tmi co' mdub gu' par ta' gu' gòn loo mènna xal mco'x nu' loo gu' par li gu'i. <sup>12</sup> Tac zin' co' ngue xo'f zin' gu' co' nac ngue thop gu' tmi, iante ncàb zin' co' ngue li gu' ndxè' par ngue lyath no gu' taamas mèn co' ngro xà' loo cón che'n xab izlyo' co' ngòc che'npe' Diox loo con' nquin mènna. Ndxè'leque', zin'a ncàb le' huax mèn gab: Diox quix U', Diox, loo Diox por zin' co' ngue xo'f zin' gu' ndxè'. <sup>13</sup> Per co'se' ñèe mèn ciuda Jerusalén cón che'n huax tmi co' tel' gu' par lyath no gu' mènna, mènna gab Diox roo Diox xèn nac Diox co' mbli le' gu' ngue tubdi'sque' loo di's ndac che'n Crist. No gab mèn ciuda Jerusalén con' roo con' xèn nac Diox tac co'se' ngue lyath no gu' mènna no ngue lu' gu' loo mènna thidte nac gu' loo cón che'n Crist con' mènna xal ndlu' gu' con' co' ngue li gu' loo taamas mèn. <sup>14</sup> Más de cona, mèn ngue bez Diox por cón che'n gu' tac Diox angmbli le' gu' mbye'th yéc no mbye'th lezo' gu' par mtel' gu' tmi loo mènna. Làth xtau'a, ndryo' ndlyen' lezo' mèn libe' mèn gu' no tolo cuz mèn Diox por cón che'n gu', tant mblyat lezo' gu' gunèe gu' mènna. <sup>15</sup> Por cona, gab na' loo Diox: Diox quix U', Diox, loo Diox por cón che'n ryethe con' ndac co' ndli Diox anggàc loo na' por cón che'n Crist. No axta ne' ne' gác na' ta' na' cuent no tyoodi's na' cón che'n con' co' angmbli Diox loo na'. Thiba con' ndxè'.

## 10

*Pab ñibe' loo mèn co' nqueltàa loo cón che'n Diox por nac Pab mèn co' Diox mtel' loo mèn por cón che'n di's ndac.*

<sup>1</sup> Le' tediba na, naneeque' gu' no nonque' gu' le' Crist anze'f nado' nac no anze'f ndac nac Crist no anze'f ñee rsi' ñee rso Crist mèn, ¿lé'? Por cona, yub daa co' nac Pab ngue nii con' ndxè' loo gu' xal nac mod co' ndxàp Crist. Naneequen no nonquen ndxath no ndxèn le' ndxep gu' mbez làth hues xtàa gu': Ndxàc Pab xal thib mbi' co' anze'f nado' xal nac mod co' ndxàp Crist co'se' nzo Pab làth na'. Per ale, ndyac na', nayi' Pab loo na' co'se' inzo node Pab na, ¿lé'? <sup>2</sup> Por cona, ña'ben di's loo gu': Bli gu' cuent le' yub Crist nalyat ña'b di's loo gu' loo cart co' ngue que'en ye's loo gu' ndxè'. Tataa bli gu' par gàp gu' mod co'se' zin daa làth gu' par ne'gàcte loo gu' xal mèn co' nteri'th nza par ne'lide gu' cas loo di's co' niin loo gu'. Le' sya, tataa mod ten'en nquin gác nayi' daa loo ndxep gu', gu' co' nque yèe daa, no gu' co' nden' no ndli gu' cuent le' daa ante nxo'f zin' cón che'n Crist xal ndryo' ndlyen' lezon no ñibe'en loo gu' co' neete lezon no maste tac, por derech, ndoo lezon ndlyazen gác nayi'en loo mènna. <sup>3</sup> Lìcque', nac na' mèn che'n izlyo' ndxè'. Per loo cón che'n Crist ingyoo node na' con' mèn loo izlyo' ndxè' xal ngyoo mèn co' be' nac che'n izlyo' con' xtàa mèn loo ixlyo' ndxè'. <sup>4</sup> Hui' gu' nexa. Nac daa xal thib solndad co' ndyee loo xó'. Mod co' ndlin con' par lin gan loo ngolo ngola's co' nca' loo cón che'n Crist inacte xal co'se' ngyoo mèn con' pistol no chol yi'f loo izlyo' ndxè'. Ndxè'leque', por cón che'n Crist, Diox ndlyath no daa par tau'en ro mèn co' ndlu' loo



xtàa mèn chol xtùuz co' nac ngolo ngola's loo cón che'n Crist. No Diox ndlyath no daa par tau'en ro no tau'en xti's chol mèn co' ndlu' chol xtùuz co' nca' loo mèn co' tyal no co' ndlya's yòo loo cón che'n Diox. <sup>5</sup> Per xó' co' ndlin loo mèn co' nac ngolo ngola'sa, le'i nac co' ndlin par yende cón ntac con' co' ndlu' mèn co' ante ndxác cón che'n xab izlyo' loo xtàa mèn. No ndlin le' ryete mèn no ryete con' co' nde'f di's nac con' roo con' xèn co' ndli mèn xtùuz co' nca' loo mèn par ne'yòode mèn loo cón che'n Diox, gác loo con'a xal thib con' co' yende chó mèn li cas. Lomisque' ne, ndlin le' xtùuz chol mèn no con' co' ndoo lezo' mèn càb loo mèn gác nado' mènà par tyubdi's mènà ante loo Crist. <sup>6</sup> Ngue beden par tolo tyubdi's gu' co' huen huen loo ryethe con' co' mnibe'en loo gu' li gu'. Le' sya, làth xtau'a, nalasque' ndoon par tetiin mèn co' ne'tyalte no co' ne'càbte tyubdi's loo cón che'n Crist xal mnibe'en loo mènà.

<sup>7</sup> Hui' gu' co' huenleque' xal nac mod che'n thib mèn no xal nac mod che'n tedib mèn làth gu', ey. Chele' chol mèn co' nzo làth gu' ndxàp yalxla's le'n lezo' mènà no ngobe' mènà nac mènà che'n Crist, leque mènà ndxàal li xtùuz tedib vez le' xalque' ngòo mènà loo cón che'n Crist, daa, ne, tataaguè' ngòon loo cón che'n Crist. <sup>8</sup> Crist mnibe' loon par mnibe'en loo gu' par li gu' co' ngue niin loo gu'. Lìcque', anze'f ngue toodiz non gu' cón che'n con' co' mnibe' Crist loon par niina loo gu'. Peser ndyóo gu' no ngue ta' gu' cuent axta arid ngue toodiz non gu' cón che'n con'a. Nonen no naneequen le' daa ne'thyonte tac daa axta arid mdoodiz no gu' cón che'n con' co' mnibe' Crist loo na' par li na'. Tataa ngue toodiz non gu' par tolo té'th gu' par tyubdi's gu' loo cón che'n Crist. Inacte le' daa ngue lii par yiza' xtùuz gu' par ryo xà' gu' no yitac lezo' gu' loo cón che'n Crist. <sup>9-11</sup> Nzo ndxep gu' co' nzo làth hues xtàa gu' co' ngue xiis no daa, no mbez gu': Lìcpe' ba'i, axta arid nè nac di's co' mque' Pab ye's loo cart ndxè', ndee. Per co'se' ngüi' na' loo Pab, iñaade tyoodi's Pab taandxè'. No co'se' ndyoodi's Pab, ne' ne' inden' na' di's co' ñii Pab, ¿lé'?

Per daa indlyaste le' gu' gab loo lezo' gu' le' daa ngue li par zyebe gu' por cón che'n cart co' mque'en ye's loo gu'. Per ndxàal li mènà xtùuz no ten' mènà le'n lezo' mènà xalque' nac daa co'se' nque'en ye's loo gu', tataaque' gác daa co'se' galen loo gu' par tyoodiz non gu'.

<sup>12</sup> Ne'liden ryes par lalque' gác daa con mènà o lin par thidte gác daa con ndxep mèn co' ndyoodi's anze'f nate's leque cón che'n mènà. Prob mènà ndli con' natont tac leque mènà ndli cuent axta arid huen mènà co'se' leque mènà ngüi' xá nac mènà. No ndli mènà ñeene' ché' ta' mènà con xtàa mènà. Aa. Tataa nac mènà. <sup>13</sup> Per part cón chenen, indxàalte tan gust lezon loo con' co' indxàalte lin co' inacte cón chenen. Ndxè'leque', ndan gust lezon xalte nxo'f zin' Diox zin' loon par lina. Diox mxo'f zin' loon par nxo'f zin'en cón che'n gu'. Por cona, axta gust ndxan' lezon ñèn cón che'n gu', mèn ciuda Corint. <sup>14</sup> Ingue zibten loo zin' co' mxo'f zin' Diox loon par lina xalque' gàca chele' Diox ne'nxo'f zin'te zin'a loon ndoore' par ndyee'en loo gu'. Per ndxè'leque', Diox mxo'fque' zin' co' mxo'f zin'en loo gu'. Pues daa ngòc mèn co' nerleque' mzin loo gu' axta trè', mèn ciuda Corint, par mblon yalbàn loo gu' cón che'n di's ndac cón che'n Crist, ¿lé'?

<sup>15</sup> Indaden gust lezon no indye'ste daa loo zin' co' mxo'f zin' tedib mèn. Ndxè'leque', ndub quee lezon láth tolo té'th gu' no tyubdi's gu' loo cón che'n Diox no tolo gáp gu' más yalxla's loo Diox, leque tiemp tolo yila's gu' loon no tolo tyubdi's gu' loo con' mnibe' Diox loon par ñibe'en loo gu'. <sup>16</sup> Por cona, ndub quee lezon par ga lon yalbàn cón che'n di's ndac, co' ndlu' loo mèn xá mod lyá' mèn loo con' ryes, loo mèn yèzya' che'n làaz mèn co' nziri' más tith loo gu', mèn ciuda Corint. Tataa mod ne'gòoden loo mèn co'te' ngue xo'f zin'le' tedib mèn cón che'n di's ndac par tataa mod ne'taden gust lezon cón che'n zin' co' mxo'f zin' taamas mèn xalque' ndlin zin' ndxè'.

<sup>17</sup> Cona, ngue niin loo gu': Mèn co' lya's ta' gust lezo' loo chol con' no mèn co' lya's tye's loo chol con', bnibe' gu' loo mènà le' mènà ta' gust lezo' mènà no tye's mènà ante loo cón che'n Tad Diox. <sup>18</sup> Tac thib mbi' co' ante nda' gust lezo' cón che'npe' mbi'a, no thib mbi' co' ante ñii con' cón che'npe' mbi'a le' mbi'a nac mbi' ndac no mbi' co' nde'f

di's ndxác, ne'yòode lezo' Diox ñèe Diox mbi'a. Ndxé'leque', loo mbi' co' ñii Diox con' ndac cón che'n mbi'a, loo mbi'a ndxòo lezo' Diox ñèe Diox.

## 11

*Pab ndyoodi's cón che'n Pab no cón che'n mèn gutyè' co' mbez nde'th mèn gutyè'a cón che'n Crist.*

<sup>1</sup> Ña'ben loo gu', mèn huesen por cón che'n Crist, gu' co' naban ciuda Corint, oj ché' co' xec gu' ndxep con daa, mastale' nden'en naquin tan ndxep gust lezon por cón che'npe' daa. Nden'en tont daa no mbiíz daa co'se' lina. Per, licpe' ba'i, fxec gu' con daa taandxep, yey. <sup>2</sup> Loo cón che'n Crist anze'f nazín' daa gu'. Por cona, part cón chenen nac gu' loo Crist, co' nee di's, xal thib mza'yòn co' selya' no Crist. No ndlyazen lu'en gu' loo Crist xal thib mza'yòn, co' nee di's, nac thib mza'yòn nambii co' tarte gàal nec thib mbi'. Tataa ngue lin loo gu', ne, tac loo cón che'n Crist mblin loo gu' xal thib mza'yòn co' mcàbgòn tyub no mza' thib mbyòo no par lu' toon gu' loo Crist xal thib mza'yòn co' be' nac thib mza' nambii co' gac xin' sa'l thidte mbyòo, co' nee di's, gac gu' che'npe' Crist. <sup>3</sup> Per anze'f nde no lezon cón che'n gu' tac ne' yiloa gaca loo gu' xal ngòca loo Ev co'se' mquedii Mebizya Ev con mod ye'rsin' co' ngòp Mebizya co'se' mbix loo Mebizya, no ngòc Mebizya loo Ev xal thib mbel', loo Ev co' ngòc ner xa'got loo izlyo' ndxè'. Le' sya, tataa mod gac zab xtùuz gu' no tyoo xà' lezo' gu' loo mod co' mbli gu' sirv loo Crist dib nzo yéc gu' no dib nzo lezo' gu', no loo mod co' mblu' gu' loo mèn, licque', más mque' lezo' gu' Crist leque que' lezo' gu' chol taamas con'. <sup>4</sup> Per nalle', ndyaquen, licque' ndxác loo gu' nquedii mèn gu' no ndryo xà' gu' loo cón che'n Crist co'se' yi'th tedib mèn loo gu' co' ngo yalbàn cón che'n tedib Jesús co' inacte leque yub Tad Jesucrist co' ngo nu' yalbàn. No ale tyac lezo' gu' yòo mèna làth gu'. No chele' thib xpíi lyàa loo gu' co' inacte Xpíi Natú' co' ngulaa loo gu' co'se' ngola's gu' loo Crist, ale ta' gu' lugar yòo xpíia loo gu'. No ale más tyac lezo' gu', ndyaquen. No chele' tedib mèn, co' nac chol mèn, yi'th lo yalbàn cón che'n tedib di's ndac co' inacte di's ndac cón che'npe' Jesucrist co' ngola's gu' ndoore', ale más li gu' tyub nza gu' di's co' ryo' ro mèna leque tyub nza gu' di's co' ndryo' ron, ndyaquen. ¿Xá nee gu'? ¿Ché' inquediide mèn gu' tataa, ndyac gu', cà'? Yende xàa. Tataaque' mod nquedii mèn gu' tataa, yey. <sup>5</sup> Per led gu' cuante. Ftolo xec gu' con daa tac ndyaquen, licque', masque' ntac tín' daa loo zin' co' nxo'f zin'en loo cón che'n Crist leque zin' co' ngue xo'f zin' mèn co' nzo lath gu' co' mbez gu' nac mer apostl roo apostl xèn. <sup>6</sup> Mastale' inacte daa mèn co' anze'f huen ndxác ndyoodi's loo gu', ndyac gu', per ndxe'leque', loo cón che'n Crist naneequen no ndaquen cuent ndxácque' daa xo'f zin'en zin' ndxè' xal ndxàala. No nonque' gu' no nda'que' gu' cuent cón chenen. No nonque' gu' xal nac mod co' ndxàpen làth gu'. Tac mblu' nu' loo gu' xá nac nu' no mblu' nu' loo gu' xá mod ndli nu' con' loo gu'.

<sup>7</sup> O ¿ché' ndyac gu' nac daa mèn co' mcua'n xquin tac asemblin ngòc daa mèn nado' làth gu', cà'? O ¿ché' ndyac gu' ilé'de nac co' mblin tac mblon yalbàn cón che'n di's ndac che'n Diox loo gu' anxle', cà'? Cona angmblin loo gu' par tolo té'th gu' par tyubdi's ndac gu' loo cón che'n Crist, ey. <sup>8</sup> ¿Ché' ndyac gu' mxenxù'en tmi che'n mèn co' nqueltàa loo cón che'n Diox taamas lugar por mcàayan tmi, co' nee di's, mdix mèn mcàan por mblin gast tmia le'n huiz co' mblin mandad loo gu', cà'? Yende xàa. <sup>9</sup> Gu' naneeque' co'se' ngo non gu'a, mquin daa tmi par gast daa. Per mastale' mquin daa con' naquin daa, ne'ngna'b yèeden tmi loo nec thib gu' par lyath no gu' daa. Ndxé'leque', co'se' ngòc falt tmi loon, mèn co' ndxác hues na' co' mbi'th par ned le'n yèezya' che'n làaz mèn macedon mdub tmi co' nde che loon co'se' mtel' mèna tmi loon. Tataa mod, leque daa mbli par ne'ndoo zin'ten loo gu' par ndub gu' tmi co' nde che loon tiempa. Tataaque' mod, tolo gàpen lezon par ne'tolode li xolen gu' par delant. <sup>10</sup> No com le' daa nanee co' huenleque' le' cón che'n Crist nac con' licpe', ¿lé'? por cona, ngue niin loo gu': Yende chó mèn yèezya' che'n làaz mèn acay tethon daa no li mèna par ne'tyacte lezon cón che'n mod co' anxle' ngon yalbàn cón che'n Crist loo gu'. <sup>11</sup> ¿Ché' ndyac gu' no ché' ngue bez gu' loo hues

xtàa gu': Chonon tatua' mbez Pab loo na', yòo? No ¿chonon ndyóo gu' no mbez gu' loo xtàa gu' le' daa inque'de lezon ñèen gu' tac indaden lugar loo gu' par lyath no gu' daa, à'? Yende xàa. Naneeque' Diox no nonque' Diox le' daa nque'que' lezo' ñèen gu' axta plóthe.

<sup>12</sup> Per mod co' ndxàpen no con' co' ndlin loo gu', co' nee di's, ne'ndaden lugar loo gu' par lyath no gu' daa, con'a toloque' lin làth gu', mèn ciuda Corint, par tau'en loo con' ye'rsin' co' ndli ndxep mèn làth gu' co' ngue cua'n mod tau' mèn loo cón che'n di's ndac che'n Crist co' ngon yalbàn no co' ndethen loo gu'. Tataa lin par ne'tolode ta' mènà gust lezo' mènà más con mod ye'rsin' co' ndxàp mènà no par lu' mènà loo taamas mènà lalque' nac mènà xal daa. <sup>13</sup> Pues, ryete mèn ye'rsin' co' nzo làth gu'a nac mèn co' ndyee te'th di's co' nac di's gutyè' mastale' mbez mènà nac mènà mèn co' ndxe' di's che'n Crist. Nac mènà mèn gutyè'túb loo zin' co' nxo'f zin' mènà. Ale nse' loo mènà par ndxàc mènà mèn co' ndyee te'th di's che'n Crist no xal mèn co' ndxe' di's che'n Crist. Per yalgutyè' nac co' ndlu' mènà. <sup>14</sup> Per part cón che'n na' co' ndxela'spe' loo Crist, con' co' ndlipe' mènà inacte thib con' co' ngüi' mèn no ñaa mèn loo. Tac axta yub Mebizya ndlu' Mebizya loo mèn xal thib xa' ndac tín', no xal thib angl co' nzo loo bé', par tataa mod quedii Mebizya mèn. <sup>15</sup> Chele' Mebizya tataa ndli, ne'gàcta arid nagàn loo mèn co' nac moz che'n Mebizya par se' loo mènà loo mèn le' mènà nac mèn co' ndli con' ndac no co' ndli con' nalì. Per ne'tyóode gu'. Diox tub rezque' cón che'n zin' ye'rsin' co' ndli mènà làth gu' par tyactii mènà cón che'n con' co' ndli mènà.

*Pab ngue ta' cuent cón che'n ryethe yaltii co' mxactii Pab por ndxe' Pab di's cón che'n Crist loo mèn huax lugar.*

<sup>16</sup> Ngue niin loo gu' tedib vez: Yende chó gu' li xtúuz no gab gu' loo lezo' gu' le' daa nquée mbii yéc. Nacquele' gu' ndli cuent nquée mbii yéquen, bla' gu' tolo toodizen taandxepete loo gu'. No ta' gu' lugar loon par toodizen loo gu' xal thib mbi' co' nquée mbii yéc par tye's daa chu'th loo zin' co' ngue xo'f zin'en ndxè'. <sup>17</sup> Con' co' ngue niin loo gu' ndxè', indyoodiztena xal di's co' ñibe' Tad Crist loon par niina loo gu'. Ndxè'leque', ndyoodizena xal thib mbi' co' ndyac gu' nquée mbii yéc. Tataa ndlin par tan gust lezon cón che'n zin' co' nxo'f zin'en loo Crist. <sup>18</sup> Texal nzo huax mèn co' ndye's xalque' nac mod co' ndye's huax mèn loo cón che'n izlyo', tataaque' tan gust lezon cón che'npe' daa, ne. <sup>19</sup> Tac texal ndli gu' cuent anze'f ndxác gu', ¿lé'? , tataaque' fxec gu' con mèn co' nquée mbii yéc, dib nzo yéc gu' no dib nzo lezo' gu'. <sup>20</sup> Tac, ale nxec gu' tataa ndli no mènà gu' par ndli yèe gu' mandad loo mènà. No nda' gu' lugar ngòc mènà jef loo gu' par ñibe' yèe mènà loo gu' loo con' co' inacte che'npe' mènà. No nda' gu' lugar nxiis no mènà gu'. No más de cona, ale nda' gu' lugar nguis mènà rloo gu' co'se' indyubdi's ndacte gu' no co'se' indxònte gu' ro mènà mastale' yende chó derech ndxàp mènà ñibe' yèe mènà loo gu'. <sup>21</sup> Lìcpe' ba'i, axta nthyon daa no nde no lezon niin loo gu' xal ndli no mèn co' nzo làth gu'a gu', mèn co' anze'f ndxàc nayi' loo gu'. Por derech, nzyeb daa lin tataa loo gu' xal ndli mènà loo gu', cara.

Per com le' mènà mbli ryes nda' mènà gust lezo' mènà por cón che'n gu', nalle' daa, ne, li ryes tan gust lezon con gu' xal thib mbi' co' nquée mbii yéc. Por cona, bin gu' di's co' niin loo gu' ndxè': <sup>22</sup> Nac mènà mèn bin mèn hebre, ¿lé'? Daa, ne, nac mèn bin hebre. Nac mènà mèn nación Israel, ne, ¿lé'? Daa, ne, nac mènà nación Israel. Nac mènà bin mbi' co' ngro' lèe Abraham, ¿lé'? ¿Cón ndyac gu', à'? Daa, ne, nac bin Abraham. <sup>23</sup> ¿Ché' nac mèn co' nzo làth gu'a mèn co' nxo'f zin' cón che'n Crist, cà'? Lìcque', tataa mbez mènà, ¿lé'? Hui' gu' nexa. Niin thib con' loo gu' nalle' xal mèn co' nquée mbii yéc: Daa más ngue tee xo'f zin' cón che'n Crist leque mènà. Tac más nde tee' nda' mèn chenen ned ngue tee'en leque mènà. Huax vez nde tee'le' más mque' mèn daa lezi'f por cón che'n Crist leque mènà. No axta ne' ne' tan cuent plá vez mblyá's mèn guth mèn daa por cón che'n Crist. Huax vez mblyá' mblyá' daa loo yalguth. <sup>24</sup> Ga'y vez mda' mèn nación Israel chenen con quart axta mblàa mènà gal psi' byè' ya' quart laden. <sup>25</sup> Son vez mbuaa'd yaa

mèn daa con yaa. Thìb vez mbuaa'd quèe mèn daa. Son vez mdyep yooyaa le'n nítto' co'te' ngon co'se' mdoon loo nítto' par ngua que tee xo'f zin'en cón che'n Tad Jesucrist. Thìb vez, thìb huiz no thìb yál' mque tee xo'fen loo nítto' co'te' nac más tith ro nítto' tac mdyuhuanen loo nítto'. <sup>26</sup> Huax vez mque tee'en làaz mèn tith. Huax vez ngòc con' ryes loon huax mod. Ngòc con' ryes loon co'se' ndri'then yó'be'. Ngòc con' ryes loon co'te' ndryo' huan' loon. Ngòc con' ryes loon làth leque mèn co' nac mèn gulàazen. Ngòc con' ryes loon, ne, co'se' mque tee'en làaz mèn tith. Ngòc con' ryes loon co'se' mque tee'en le'n chol ciuda. Ngòc con' ryes loon huax vez co'se' nguri'then ned huan ned yii den. Ned mque tee'en ngòc con' ryes loon loo yòoyaa loo nítto'. Ned mque tee'en ngòc con' ryes loon làth mèn gutyè' co' mbez ndxàc hues xtàa na' loo cón che'n Crist, mèn co' nse' loo di's co' nac di's ndac. <sup>27</sup> Anze'f nalyat ndxàca loon. No ndxàc ngòc nguàal con' loon. Huax vez ndxàca loon, yende mod gàten. No ndxath nít daa. Huax vez xlat daa. Yende con' huan. Huax vez mbyan' daa ned yó'. Mdin xil daa axta plóthe. Mque tee'en yende xaben. No yende xobisen par capen.

<sup>28</sup> Más de cona, con' co' más ñibe' loon par lin atate huiz nac: Naquin too neren no lasen loo mèn co' ndxela's co' nqueltàa chol lugar. <sup>29</sup> ¿Chó mèn ndoo xà' lezo' no nguu's lezo' mènà loo cón che'n Crist no ne'ten'ten cón che'n mènà, à? ¿Chó mèn hues na' nzo co' ndli mèn ngòc nguàal con' loo, no daa, ché' ngue li gu' cuent ne'nden'ten cón che'n mèn hues na' co' ngozi'f no co' ngoga's ngòc nguàal con' loo, cà'? Nden'que' daai. <sup>30</sup> Chele'i naquin tan gust lezon no chele' daa ndlya's tye's ndxep, le' sya, tye's daa por con' co' ndlu' cón che'n daa xal thìb mbíiz co' yende con' ntac co' mbuu's co' yende fuerz. No tye's daa loo con' cón chenen co' ndyaquen yende con' ntac. <sup>31</sup> Pues Diox co' nac xud Tad Jesucrist na' co' ndxàal gab na' Diox roo Diox xèn no Diox natú' nac Diox le'n lín' co' ntlo, no le'n lín' co' ndxeloo, no le'n lín' co' ne'lith node thidtene, Diox nanee lìcque' nac di's co' ngue niin loo gu'. <sup>32</sup> Co'se' ngon le'n ciuda Damasc, gobernador co' mbli ryethe con' mnibe' Rey Aret, gobernadora mbli mandad mtau' solndad rye lad loon ro ciudaa par tataa mod tyenxù' solndad daa. <sup>33</sup> Per ndxe'leque', mèn ciuda Damasc co' nqueltàa loo cón che'n Diox ne'nglá'de daa. Mblo mènà daa le'n thìb cardor ryal. Mtelàa mènà daa loo yoo ro ftoo ro thìb ventan co' ndub lad ftoo che'n ciudaa. Tataa mod mblyá' daa ya' solndad che'n gobernador.

## 12

*Diox mxo'f loo cón che'n Diox loo Pab no mbli' loo Diox cón che'n Diox loo Pab.*

<sup>1</sup> Yende chó quix càan no yende cón lin gan par leque daa ndyoodi's cón chenen. Más huen tyoodiz non gu' cón che'n con' co' mxyo'f loo loon cón che'n Diox no cón che'n con' co' mbui' loo loon cón che'n Diox co' mbli Diox mbui' loon. <sup>2</sup> Ndxàcle' sida lín' ngòc thìb con' loo thìb mbi' co' ndliben, co' nee di's, nac leque daa. Mbi'a ngòp yalxla's loo Crist. Diox mbli nguáp mbi' loo bé' co'te' nac son cua' bé'. Per ba' se' ne'needen ché' nguáp mbi' loo bé' xal nac mbi' o ché' ante xpíi mbi' ngro' loo mbi' par nguáp xpíi mbi' loo bé'. Ne'needen xá mod ngòca loo mbi'a, cara. Ndan cuent ante Diox nanee con'a. <sup>3</sup> Ndlibe'quen mbi'a, co' nee di's, daa nac mbi' co' ngua loo bé'. Per ba' se' ne'needen ché' nguáp mbi' xal nacpe' mbi' o ché' ante xpíi mbi' nguáp loo son cua' bé'. Ante Diox nanee xá ngua mbi'. <sup>4</sup> Ante ndan cuent nguáp mbi' loo bé' co'te' nac son cua' bé' co' lèe parais. Tya mbìn mbi' di's co' mdoodi's no Diox mbi'. Di's co' mbìn mbi'a, yende chó gác co xo'f co' mda' Diox cuent loo mbi'. No indlya'ste Diox gòn nec thìb mèn cón che'n di'sa. <sup>5</sup> Loo cón che'n con' co' mxyo'f loo loo mbi'a no co' mbui' loo loo mbi'a co' nac daa, cón che'n con'a ndli par tye's daa ndxep. Per cón che'npe' daa, yende mod tye's daa ne' por chu'th. Ndxè'leque', tye's daa cón che'n prob laden co' nac xal lad thìb mbíiz co' mbuu's co' ngulàa fuerz co' yende cón ntac. <sup>6</sup> Por cona, ngue niin: Mastale' leque daa ndlyaz tyoodizen cón chenen par tye's daa ndxep, inacte con'a ndli par gác daa xal mèn natont co' nquée mbii yéc. Tac por part cón chenen, daa ante ndyoodi's di's co' nac lìcpe' cón chenen loo mèn. Ndxè'leque', ndxàp lezon par ne'taden cuent co' nac cón che'npe'en

loo mèn. Tac indlyasten li ndxep mèn xtùuz o gab mènna loo lezo' mènna: Masre' con' ndan cuent cón chenen. Ante ndlyazen li mènna xtùuz cón chenen xal ngue hui' mèn loon no xal ndxòn mèn cón chenen co'se' ndyoodiz non mèn. <sup>7</sup> Con' co' mbli Diox mxyo'f loo loona, mbli ante mbui'en no ante gunaan. Per par ne'gàcte daa mèn co' anze'f tye's por cón che'n con'a, mbli Diox ale, ndxe'leque', mden'en thib yalnè laden xal thib yis co' nguaa'd laden. Diox mbli mden'en yalnèa laden xal thib herramient co' ndli Mebizya us par nden'en yalnèa laden par tetii Mebizya daa. <sup>8</sup> Nde teele' son vez mna'ben loo Tad Diox le' Tad Diox teche yalnè co' nden'en laden ndxè'. <sup>9</sup> Per ale ndxe'leque', taandxè' gunee Tad Diox loon: Fxec, Pab, tac yende cón más nquin li nonl. Tua'the nac con' co' angndlin lool. Ndxè'leque', ante nquin nonl le' daa axta arid nque' lezon ñèenl. Más ndxú' loo mèn ryethe con' roo con' xèn co' nzo la's niin no con' co' nzo' la's yan co'se' ndlyath non mèn co' yende chó fuerz ndxàp no loo mèn co' mbuu's co' yende cón ntac.

Por cona, dib nzo lezon tolo tye's daa no tolo ndan gust lezon, mèn ciuda Corint, cón che'n prob laden por nac daa mèn co' nguu's co' ngulàa fuerz co' yende cón ntac, par tataa mod yú' le' Tad Crist ndli ndxàc con' roo con' xèn loo Tad Crist por cón che'n zin' co' nxo'f zin'en. <sup>10</sup> Por cona, por cón che'n ryethe con' co' ndxàc loon nalle', ale ndyac lezon por cón che'n laden co' nac xal thib mbíiz. Tataa ndlin mastale' ntetii mèn daa no ndxàc loon ndxetub con' nquin daa, no mastale' ndyub ngu's mèn daa, no mastale' ndxàc huax yaltii loon por cón che'n Crist. Tac co'se' ndxàca loon xal thib mbíiz co' nguu's co' ngulàa fuerz, sya, nden'en ale sate más ndxòo fuerz no valor che'n Diox loon.

*Trè' ndlu' le' Pab anze'f ndyóo cón che'n mèn co' nqueltàa loo cón che'n Diox, mèn co' nzo ban ciuda Corint.*

<sup>11</sup> Per nalle', mèn Corint, co'se' ngue que'en ye's co' nac cart ndxè' loo gu' no ndyoodiz non gu' loo cart ndxè', ale leque daa mbli par ngòc daa xal thib mèn co' nquée mbii yéc, ndyaquen. Per bla' gu' con'a tac gu' mzi mchep daa loo con'a. Más huen ngàca chele' gu' ngli par ngdu' daa loo gu', ndyaquen. Tac thib mod tedib mod, lalque' nac daa con taamas mèn co' nzo làth gu', mèn co' mbezpe' gu' nac mèn co' ndxe' di's che'n Crist, mèn co' ndyac gu' nac más mèn roo mèn xèn làth gu', mastale' ndyaquen, no ndyac gu', yende cón ntac daa làth gu', ¿lé'? <sup>12</sup> Más de cona, Diox mblu' no be' ngue lu' Diox daa loo gu' le' daa, licque', nac mèn co' ndxe' di's che'n Crist. Non gu' le' daa ncha'la'sque' loo gu'. No non gu' le' daa mblu' loo gu' cón che'n zin' co' mxo'f zin' Diox loon tac Diox mbli huax señ no huax yalguzye' co' nac con' roo con' xèn loo gu' por cón chenen. <sup>13</sup> ¿Cón ndyac gu' no cón nden' gu' le' ndyac gu' ingoden cuent gu' no indyu'de gu' loon xal ndyu' taamas mèn co' nqueltàa templ taamas lugar, yey? ¿Ché' nden' gu' le' daa ne'nglide cas loo gu' por ne'ngniiden loo gu' nglyath no gu' daa, cà'? Chele' gu' ndli cuent tataa mbli non gu', bli gu' favor, fteri'th ftecan' gu' con' mden' gu' mblin loo gu' ndxè' por ne'ngna'bten ayud loo gu' par lyath no gu' daa.

<sup>14</sup> Hui' gu' nexa. Nalle' mbyon vez ngue li naben daa par gal neen máa gu'. Co'se' galen loo gu', ne'li xolten gu'. Tac ne'gal cuanten cón che'npe' gu' co' ndxàp gu' par gàca chenen. Ndxè'leque', ndlyazen gac gu' mèn co' tyal par ñibe'pe' Diox loo gu'. Tac gu' nonque' le' thib gundan co' nziri' xin', xin' gundana indxàalte co' centav par huàa gundan xin' gundan. Ndxè'leque', gundan huàa xin' gundan. <sup>15</sup> Part cón chenen, dib nzo yèquen no dib nzo lezon tolo lin gast cón chenen par tataa mod càba con' ndac loo gu'. Co'se' ndlu'en loo gu' le' daa nque'que' lezo' ñèen gu', no ale más nazab nac co' ndli no gu' daa, ¿xá nee gu'? ¿Ché' huen nac con' co' ngue li no gu' daa, ndyac gu', cà'? Ale inque'de lezo' gu' ñèe gu' daa, ¿lé'?

<sup>16</sup> Per mastale' tataa ndli gu' cuent, gu' nonque' no naneeque' gu' le' daa thidteneque' ne'ngli xolten gu'. Na naneeque' le' ndxep gu' mbez: ¡Aa que nalas mbi' ba', cara! Ncu'a'n mbi' mod nquedi mbi' na' par yòo na' lad che'n mbi', ¿lé'? <sup>17</sup> ¿Ché' mbli gu' cuent mquediin gu' por mtel'en plá mèn co' mbi'th nee máa gu', cà'? Yende xàa. <sup>18</sup> Daa mna'b loo Tit yi'th nee Tit máa gu' par nedrè'. No thidte junt mtel'en Tit con tedib mbi'



co' ndxàc hues na' par mblyath no mbi' Tit mbi'th Tit. Co'se' mbi'th Tit loo gu', ¿ché' mquedii Tit gu' co'se' mbi'th nee Tit gu' pezea, cà'? ¿Ché' ndli gu' cuent ilicte thidte ndli ryop nu' Tit xtùuz par thidte nxo'f zin' nu' zin' ndxè', cà'? Thidte ndxe' nu' zin' ndxè', ey.

<sup>19</sup> ¿Ché' ngue li gu' cuent axta nalle' be' ngue tuben razon cón chenen loo gu', cà'? Tyè'. Loo Diox nduben razon cón chenen loo gu' tac daa nac thib mbi' co' ndyoodiz no gu' xal ñibe' Crist loon. Tac ryete con' co' ndlin loo gu', gu' co' anze'f nque' lezon ñèen, tataa ndlina loo gu' par tataa mod ryoo xyèn gu' no par tolo ta' gu' cuent no tolo té'th gu' cón che'n Crist. <sup>20</sup> Tac láth ngue que'en ye's co' nac cart ndxè' loo gu', anze'f ndyóon no nden'en le'n lezon, no nda no lezon co'se' gal neen máa gu', ne'yòode lezon loo con' co' ngue li gu'. No ne' ne' yòo lezo' gu' loo mod co' lin con' co'se' gal lina loo gu'. Nden'en le'n lezon thib descuid zyal yalgyoo làth gu' co'se' zin daa làth gu'. Nda no lezon, thib descuid, le'pe' sya, ndxep gu' yàn lezo'. Taandxep gu' na, yecloo ñèe gu' xtàa gu'. Taandxep gu' na, anze'f ndxàc mèn co' nde yath par càb con' ndac loo gu'. Ne'gàpte gu' mod ñèe gu' xtàa gu'. Taandxep gu' na, gàc mèn co' ñii yèe ñii tii cón che'n xtàa gu'. Taandxep gu' na, gàc mèn co' chi'x loo cuent yix no mèn co' nse' loo cuent yix. La's gu' loo thib xtàa gu' no loo tedib xtàa gu'. Taandxep gu' na, gàc mèn co' anze'f ndye's loo xtàa gu'. Taandxep gu' na, gàc mèn co' ndoote li ngòc nguàal con' con xtàa gu'. <sup>21</sup> Lomisque', nde no lezon, thib descuid, co'se' gal neen máa gu' par nedrè', ne'stre'fque' Diox daa li loon thyon daa tedib vez por cón che'n ndxep gu'. Làth xtau'a, lyàa nít ngudloon tant xi lezon cón che'n huax gu', gu' co' ndxàcle' lín' mcua'n xquin no xtol gu'. Más de cona, mcua'n mènà xin' huan mènà. No indxàpte mènà mod. Per ndli mènà chol con' ye'rsin' co' ndryo' ndlyen' lezo' mènà li mènà. No axta nalle' tarte lyàa yéc mènà no tarte lyàa lezo' mènà par zye' mod ye'rsin' co' mque no mènà loo ryethe con' zab co' mbli mènà.

### 13

*Trè' ndlu' le' Pab mtan' di's loo mèn ciuda Corint co' nqueltàa loo cón che'n Diox ne'yathla'ste mèn di's co' ndxab Pab. No ndlu' trè' le' Pab ngue nii Diox lult vez loo mèn.*

<sup>1</sup> Con con' ndxè', mbyon vez nde teele' ndal neen máa gu' par nedrè'. Co'se' gal neen máa gu' nalle' tub rezen cón che'n gu' loo chop mèn o son mèn co' ta' cuent nali cón che'n con' co' ndxàc làth gu'. Le' sya, tataa mod ryo xo'f con' co' ndxàc loo gu' no yumbii loo di's no loo cuent co' ndxetoo làth gu'. <sup>2</sup> Daa guniile' cón che'n con' ndxè' loo gu' co'se' mbryop vez mbal neen máa gu'. No nalle' beren ngue niina loo gu' tedib vez loo cart ndxè' xalque' thib mbi' co' nzo làth gu', mastale' yende daa loo gu' nalle'. Per ndxàc con' ndxè' loo gu' tac inzoden làth gu'. Por cona, ngue que'en ye's loo gu' nalle' co' nac cart ndxè', loo gu' co' ndxàcle' lín' mcua'n xquin gu' no xtol gu', no loo taamas gu', chele' daa bere gal loo gu' tedib vez, syase, ya ne'teri'then no ne'tecan'ten cón che'n con' ye'rsin' co' nzi li gu'. <sup>3</sup> Co'se' ñee gu' tataa lin loo gu', axta syare' ta' gu' cuent co' huenleque', lìcque', nzo no Crist daa no nac Crist xa' co' ndyoodiz no gu'. Per, lìcpe' ba'i, nee gu' no ten' gu' inzode Crist loo gu' xal thib mbíiz co' nguu's co' ngulàa fuerz. Per ndxe'leque', ten' gu' ndxàp Crist ryethe con' la's nii Crist no la's ya' Crist par lyath no Crist gu' chele' gu' tyal ta' gu' di's par lyath no Crist gu' xal naquin gu'. <sup>4</sup> Lìca, co'se' mque' mèn Crist loo cruz, ngòca loo Crist xal loo thib mbíiz co' mbuu's tac tataa mod mnibe' lezo' Diox no tataa mod mnibe' lezo' Crist ngòca loo Crist. Per nalle' naban Crist por cón che'n ryethe con' roo no con' xèn co' nzo la's nii Diox no co' nzo la's ya' Diox. Lomisque' mod ne, Diox indlá'ya'de daa mastale' ñaaleque' daa xal mbíiz co' mbuu's xalque' ngòca loo Crist. Per ndxe'leque', daa lu' loo gu' por cón che'n con' co' ndxàc làth gu'a, lìcque', ndxàpen con' la's niin no la's yan xalque' ndxàp Crist con' la's nii Crist no la's ya' Crist tac ndlyath no Diox daa par tolo lin sirv loo gu'.

<sup>5</sup> Fteche ftexyath gu' xtùuz gu' no lezo' gu' par ñee gu' ñeene' ché', lìcque', ndxela's gu' loo Tad Jesucrist na'. Làth xtau'a ne, leque gu' tub rez cón che'n gu' par ñee gu' ñeene' ché', lìcque', ndxela's gu' loo Jesucrist. ¿Ché' inda'de gu' cuent cón che'npe' gu'

le' Jesucrist nzo noque' gu', cà? Ne'stre'fque', co'se' teche texyath gu' xtùuz gu' no tub rez gu' cón che'n gu' no ryo xo'fa loo gu', lïcque', tarte yila's gu' loo Jesucrist. <sup>6</sup> Per daa ndub queeque' lezo' le' gu' non no ta' gu' cuent le' daa thidteneque' ndxela'sque' loo Crist. <sup>7</sup> Nalyat mbezen loo Diox por cón che'n gu' par ne'lide gu' nec thib con' ye'rsin'. Imbezten Diox cón che'n gu' par tyu' daa loo gu' ne' ne' par yòo lezo' gu' cón chenen. Ndxle'leque', mbezen Diox ante par tolo li gu' con' ndac mastale' nden' gu' indxòode lezo' Diox loo cón chenen. Yende chó mport nzo lezon con'a. <sup>8</sup> Yende mod lin nec thib con' co' ntau' no con' co' ncà loo di's ndac co' nac lïcpe'. Ndxle'leque', ante ndlin xalque' ñibe' di's ndac co' nac lïcpe' loon. <sup>9</sup> Por cona, ndyac lezon co'se' ante ndxú' daa loo gu' xal thib mbíiz co' nguu's no co' ngulàa fuerz. No tyac lezon co'se' gac gu' mèn co' ndxàp valor no fuerz loo cón che'n Crist. No, lïcque', ndlyazen le' gu' tolo ryoo xyèn loo cón che'n Crist par té'th gu' no tyubdi's ndac gu' loo Crist axta plóthe. <sup>10</sup> Por cona, ngue que'en cart ndxè' loo gu' mastale' yende daa làth gu' par gaca, co'se' gal neen máa gu', nec thib mod no nec tedib mod ne'gac nayi'den no ne'yáp di'sten loo gu'. Lïcque', ndxàpen con' la's niin no con' la's yan par lina tataa xal mnibe' Diox loon par lina. Mbli Diox con'a loon ante par lin le' mèn ryoo xyèn loo cón che'n Crist par té'th mèn no tyubdi's ndac mèn loo Diox. Ne'nglide Diox con'a loon par too xà'en lezo' mèn loo cón che'n Crist.

<sup>11</sup> Per nalle', con' ndxè' nac lult di's co' ngue que'en ye's loo cart ndxè' loo gu', mèn huesen por cón che'n Jesucrist. Ndlyazen Diox huen nda gu', ndee gu'. Ndlyazen le' gu' que tee ban lì loo Diox par gac gu' mèn nali no mèn nambii loo Diox. Fcua'n gu' mod tegán gu' lezo' thib xtàa gu' no tedib xtàa gu'. Ndlyazen thidte li gu' xtùuz loo cón che'n Diox. Ndlyazen nagàl yo lezo' gu' loo Diox no thidte cue ban gu' rye nda gu' no rye ndye'th gu' làth xtàa gu'. Chele' gu' tataa li, le' sya, Diox co' ndli par ndxu' ndxàl lezo' mèn loo Diox, no Diox co' nque' lezo' ñee rye mèn, Diox nzo noque' gu' thidtene. <sup>12</sup> Nabe'ste gunii gu' Diox loo thib xtàa gu' no loo tedib xtàa gu' xalque' nac mod ndac co' ndxàp gu' co'se' ñii gu' Diox loo xtàa gu'. <sup>13</sup> Ryete mèn co' ndxàc hues xtàa na' co' ngro xà' loo cón che'n xab izlyo' co' ngòc che'npe' Diox, mèn co' nzo non trè' co' ndxàc hues na' por cón che'n Crist, ngue nii Diox loo gu' loo cart ndxé', ne.

<sup>14</sup> Ndlyazen le' Tad Jesucrist tolo li anggac con' ndac loo gu'. No ndlyazen tolo té'th gu' no non gu' susque' nque' lezo' Diox ñee Diox ryete gu'. No ndlyazen le' Xpii Natú' toloque' lyath no gu' par thidte gac xtùuz gu' no thidte gac lezo' gu' loo cón che'n Crist. Con' ndxè' nac co' ndlyazen gac loo gu', mèn cuida Corint. Taandxè' gaca loo gu', ndee gu'.

## Cart Co' Mque' Pab Ye's Loo Mèn Yèezya' Che'n Làaz Mèn Galas

*Pab ngue que' ye's co' nac cart ndxè' loo mèn co' nqueltàa loo cón che'n Diox, men co' naban le'n yèezya' co' nac yèezya' che'n làaz mèn galas.*

<sup>1</sup> Daa, Pab, nac thib mbi' co' ndxe' di's che'n Tad Jesucrist. Tad Jesucrist mtel' daa loo mèn loo izlyo'. Inacte daa thib mbi' co' mtel' chol mèn che'n izlyo' par ndxen di's che'n Tad Jesucrist loo mèn. Ne' ne' mdoo chol mèn daa no mcui chol mèn daa par ndxen di'sa loo mèn. Ndxè'leque', yub Jesucrist mblo lèe daa nac daa thib mbi' co' ndxe' di's no mcui Jesucrist daa par xo'f zin'en zin'a. No yub Diox xud na' co' mblo xban Jesucrist làth mèn nguth mblo lèe daa nac daa mbi' co' ndxe' di's che'n Jesucrist. No mcui Diox daa par xo'f zin'en zin' ndxè' loo mèn. <sup>2</sup> Daa, Pab, ngue que'en ye's co' nac cart ndxè' loo gu'. Ryete mèn co' ndxàc hues na' por cón che'n Jesucrist co' nzo non trè', ngue nii mèna Diox loo gu' loo cart co' ngue que'en ye's loo gu' ndxè', loo rye gu' co' nqueltàa loo cón che'n Diox le'n chol yèezya' che'n làaz mèn galas. <sup>3</sup> Ndlyazen le' Diox xud na' no Tad Jesucrist na' tolo li anggàc con' ndac loo gu' no tolo li huen gàca loo gu' loo cón che'n Jesucrist. No ndlyazen le' Diox xud na' no Tad Jesucrist tolo li par nagàl yo lezo' gu' loo Diox no cue ban gu' rye nda gu' no rye ndye'th gu' làth hues xtàa gu'. <sup>4</sup> Tad Jesucrist na' yub mda' lugar par mquée yalguth loo Tad Jesucrist por cón che'n xquin na' no xtol na' par tataa mod mblyá' na' loo ryethe con' co' nac con' ye'rsin' co' nac che'n xab izlyo' ye'rsin' ndxè'. Ngòc con'a loo Tad na' xal guneepe' lezo' Diox co' nac xud na'. <sup>5</sup> Por cona, ndlyazen tolo gab na' di's guryath no di's guryèn no di's natú' cón che'n Diox loo mèn no loo Diox le'n lín' co' ntlo, no le'n lín' co' ndxelo, no le'n lín' co' ne'lith node. Tataaque' gàca.

*Di's ndxè' ndlu' thidte di's ndac nzo co' ndlu' loo mèn xá mod lyá' mèn loo con' ryes.*

<sup>6</sup> Ante ngüi'en no ante ñaan loo gu', cara, ale setilte mdoo xà' lezo' gu' loo di's ndac co' nda' cuent no co' ndlu' cón che'n Diox loo gu'. Loo con' co' nac cón che'n Diox, Diox mbli par mbye'th lezo' gu' ngòo gu' loo cón che'n Diox. Tataa mbli Diox loo gu', no loo nu', por anze'f mque'que' lezo' Crist ñèe Crist ryete na'. No nalle', ale ndxe'leque', más ndli gu' par ndyoo nque gu' no nque' nza gu' loo tedib di's co' ndli gu' cuent nac di's ndac che'n Diox, co' ndli gu' cuent telá' gu' loo con' ryes. Per di'sa xà' nac loo cón che'n di's ndacpe' che'n Diox. <sup>7</sup> Ilìcte naca par gab mèn nzo tedib di's co' nac xalpe' nac di's ndac che'npe' Diox co' ndlu' xá mod lyá' mèn loo con' ryes. Ndxè'leque', con' co' ndxàc loo gu' ba' nac: Nzo ndxep mèn co' ngue li xol loo gu'. Ndlya's mèna zye' di's ndac, co' nac di's ndac che'n Crist, par yila's mèn no ten' mèn tedib mod lyá' mèn loo con' ryes. <sup>8</sup> Per chele' chó mèn xà'guè' ngo yalbàn cón che'n di's ndac co' ndlu' xá mod lyá' mèn loo con' ryes xal ngo nu' yalbàn, no xal mda'le' nu' cuent loo gu'a, ¿lé'?, thidteneque' mèndèe mèna loo Diox too ze too yál'. No yende chó mport nzo lezo' Diox chó nac mèna, que naca yub daa, que naca thib angl co' yi'th co' lyàa loo bé' co' co yalbàn no co' te'th cón che'n di's ndac co' inacte leque di's ndac che'npe' Diox xalque' ngue niin loo gu' ndxè', thidteneque' mèndèe mèna loo Diox too ze too yál'. <sup>9</sup> Na guniile' leque di's ndxè' loo gu' ndoore' co'se' ngon làth gu' thib cua'a. No nalle' beren, ngue niin loo gu' tedib vez: Chele' chó mèn xà'guè' co yalbàn cón che'n di's ndac loo gu' xal nac di's co' mbinle' gu', no co' mden'le' gu', no co' ngulàale' le'n lezo' gu' co' mblolè' nu' yalbàn loo gu', thidteneque' mèndèe nac mèna loo Diox too ze too yál'.

<sup>10</sup> No nalle' con' co' ngue niin loo gu' ndxè' ndxàal niin loo gu': ¿Ché' ngue li gu' cuent ngue niin con' ndxè' loo gu' par yòo lezo' taamas mèn cón chenen, cà'? Yende xàa. O ¿ché' ngue niin con' ndxè' loo gu' par yòo lezo' Diox ñèe Diox daa loo con' co' ngue lin, cà'? Aa. Ngue niin con' ndxè' loo gu' ante par yòo lezo' Diox loo con' ngue niin loo gu', ey. O ¿ché' ngue li gu' cuent ngue tan gust lezo' chol mèn par tyac lezo' mèna con daa loo

cón che'n di's ndac che'n Diox, cà'? ¡Máa yob yéc gu', na! Yende xàa. Tac chele' daa be' ngue ta gust lezo' chol mèn cón che'n di's ndac che'n Diox, ya inacte daa mbi' co' nxo'f zin' zin' che'n Crist, sya, xàa.

*Pab ngue ta' cuent loo mèn chó mcui Pab, no chó mtel' Pab, no chó mdoo Pab par ndxe' Pab di's cón che'n Crist loo mèn.*

<sup>11</sup> Gu' co' nac mèn huesen por cón che'n Crist, fta' gu' cuent co' huenleque' cón che'n di's ndac co' nac di's ndac che'npe' Diox co' ndethen no co' ngon yalbàn loo gu' co' ndlu' loo mèn xá mod lyá' mèn loo con' ryes. Inacte di's ndaca thib di's ndac co' mblobe' no co' mtoxcua' chol mèn che'n izlyo' ndxè'. <sup>12</sup> Inacte chol mèn co' mblu' cón che'n di's ndac ndxè' loon. No nec thib mèn co' nac chol mèn mblu' cón che'n di's ndac ndxè' loon. Ndxè'leque', yub Tad Jesucrist mblo xo'f cón che'n di's ndac ndxè' loon.

<sup>13</sup> Gu' mbínque' xá mod ngóc daa póla no xá mod mque tee banen póla co'se' ngóc daa mèn xley'pe' che'n mèn nación Israel. No nonque' gu' no naneeque' gu', ale, ngulàa xyàn lezon no ngóc nayi'en gunèen mèn co' mqueltàa loo cón che'n Diox chol lugar. Ale mque tee que'en xís mèna pál co'te' ngo mèna par guthen mèna no par che'en mèna thidtene. <sup>14</sup> Co'se' ngóc daa mèn xley' che'n mèn nación Israel, más altant mdoon no más mté'then cón che'n xley' daa leque loo rye mèn gulàaz daa co' ngóc mèn co' thidte mxyèn con daa, co' nee di's, mèn co' thidte lín' ndoo xèn non. Más de cona, anze'f ngóc nayi'en loo mèn par mblin le' mèn mbli yèe costumbr co' ngóc costumbr che'n xudgool nu'. <sup>15</sup> Per mastale' tataa ngóc daa, Diox mblo xà'le' daa ndoore' gáal daa par co Diox daa loo zin' ndxè'. No por anze'f nque' lezo' Diox gunèe Diox daa, ale tataaque' mbli Diox ngòca loon par xo'f zin'en cón che'n di's ndac ndxè'. Le' sya, co'se' ngóc tiemp ngóol daa no mbryoo daa, Diox mbli con' mblya's Diox no con' co' gunee lezo' Diox li Diox loon. <sup>16</sup> Mbli Diox par mbliben xgan' Diox par gàca loon yiloa ga tethen no gon yalbàn cón che'n di's ndac loo mèn, mèn co' inacte mèn nación Israel. Co'se' ngolo ngóc con'a loon, yende chó ngabten loo nec thib mèn. Ne' ne' mdoodizen loo nec thib mèn cón che'n con' co' mbli Diox loon no cón che'n con' co' mnibe' Diox loon. <sup>17</sup> Ne' ne' ngan ciuda Jerusalén par nga tan cuenta loo myen' co' ngóc xin' mté'th Jesús, myen' co' ndxe' di's ndxè' ndoore' co'se' mbli Diox con' ndxè' loon. Ndxè'leque', luega mxenen ned. Nguan le'n nación Arab co'te' mbyan' daa nen tiemp. Ngoloa, mberen, ndyalen par ned ciuda Damasc tedib vez.

<sup>18</sup> Ne'ngaden ciuda Jerusalén luega. Axta ngolo son lín', syare' nguan. Ale axta syare' mbliben Pedr. Ngo non Pedr si'n huiz le'n ciuda Jerusalén le'n tiempa. <sup>19</sup> Per ne'ngnèeden taamas myen' xin' mté'th Tad Jesús co' ndxe' di's cón che'n di's ndac ndxè'. Ante Cob co' ndxàc hues Tad Jesús por xna' Tad Jesús gunèen. <sup>20</sup> Cón che'n di's co' ngue que'en ye's loo gu' ndxè', Diox naneeque' inquediiden gu', cara. Lìcpe' nac di's ndxè'.

<sup>21</sup> Ngolo nguri'th con'a, mxenen ned. Nguan par ned le'n yèezya' che'n làaz mèn sir no le'n yèezya' che'n làaz mèn cilis. <sup>22</sup> Le' rye mèn hues na' co' nqueltàa loo cón che'n Crist, mèn co' nzo ban par ned le'n yèezya' che'n làaz mèn jude, mèna tarte libe' daa, co' nee di's, tarte hui' mèna loon tiempa. <sup>23</sup> Ante ndxòn mèna no ndyoodi's mèna cón chenen. Mbez mèna: Mbi' co' mque tee mdub ngu's na' no mblya's mbi' mtelux mbi' na' thib cua'a, mbi'a ngue tee te'th no ngo mbi' yalbàn cón che'n di's ndac par yila's mèn xal ndlu' di's ndac. <sup>24</sup> No gunii mèna di's roo no di's xèn no di's natú' loo xtàa mèn cón che'n Diox por cón chenen.

## 2

*Taamas mèn co' ndxe' di's ndac mblo cuent nac Pab mèn co' ndxe' di's ndac che'n Crist loo mèn.*

<sup>1</sup> No co'se' ngolo nguri'th sida lín' co' ndxàc nguan ciuda Jerusalén nera, mberen nguan par ned le'n ciuda Jerusalén tedib vez con thib mbi' co' lèe Mbèl'. Mbeen Tit par ngua non Tit, ne. <sup>2</sup> Nguan ciuda Jerusalén tac Diox mblo xo'f loon le' daa naquinque' ga par ciuda Jerusalén. Le'n ciuda Jerusalena ngo thib ned mèn co' mdyoo ner no co' mdyoo

naa loo mèn co' nqueltàa loo cón che'n Crist chol lugar. Xexte mdan cuent loo mènà, thib lad, cón che'n di's ndac co' nac che'npe' Diox co' ndlu' loo mèn xá mod lyá' mèn loo con' ryes, co' ndethen no co' ngon yalbàn loo mèn, mèn co' inacte mèn nación Israel. Tataa mbli con'a par de que ne'gàcte con' co' ngue tee lin thib con' anxle' co' yende cón ntac loo mèn. <sup>3</sup> Per mastale' ngua no Tit daa, ne' ne' ngab mènà loo Tit no ne' ne' ngli mènà fuerz Tit par ngàc circuncidar Tit xalque' nac costumbr che'n mènà mastale' inacte Tit mèn nación Israel. <sup>4</sup> No, licpe' ba'i, xexte ngo ndxep mèn gutyè' xi'tha, mèn co' mbez ndxàc hues na' por cón che'n Crist, per illicita. Mènà mblyas' ngàc circuncidar Tit. Per mènà ante ngo làtha par ante mblyas' mènà par ngüi' mènà co' huenleque' xal nac mod cub co' ndxàp na', na' co' nqueltàa loo cón che'n Crist, tac yende chó nzi nchep na' loo costumbr gox. No ale mblyas' mènà bere na', li yèe na' costumbr co' nac costumbr che'n mèn nación Israel tedib vez. <sup>5</sup> Per ne' por chu'th ne'ngla'de nu' ngnibe' mènà loo nu'. Tac mblyas' nu' le' gu' toloque' ta' cuent cón che'n di's ndac co' nac di's ndac che'npe' Diox co' nac licque', di's ndac co' ndlu' xá mod lyá' mèn loo con' ryes.

<sup>6</sup> Mèn co' ndyoo ner no co' ndyoo naa loo chol mèn co' nqueltàa loo cón che'n Crist chol lugar, mènà ne'nglu'de daa no ne'ntan'te mènà nec thib di's cub o cuent cub loon co' ndlu' cón che'n Crist. Mastale' nde'f di's ndxàc mènà, ne'nglu'de mènà loon ndxep con' co' nac cón che'n Crist. Ne' ne' yende chó mport nzo lezon, que nac mènà mèn co' nde'f di's ndxàc, que nac mènà mèn be'the. Gunee mènà cón nac mènà. Diox indubte par tub rez Diox cón che'n mèn loo mèn por mod co' más ndyu' thib mèn leque tedib mèn loo xtàa mèn. <sup>7</sup> Lugar de lu' mènà daa ndxep di's co' nac cón che'n Crist, ndxe'leque', más mda' mènà cuent no mden' lezo' mènà le' Diox mxo'f zin' zin' ndxè' loon par tethen no gon yalbàn cón che'n di's ndac, co' nac di's ndac che'npe' Diox, loo mèn co' inacte mèn nación Israel xalque' mxo'f zin' Diox zin' ndxè' loo Pedr par co' Pedr yalbàn no te'th Pedr cón che'n leque di's ndac che'npe' Diox loo mèn nación Israel. <sup>8</sup> Pues leque yub Diox co' mtel' Pedr par ndxe' Pedr di's ndac che'npe' Diox loo mèn co' nac mèn nación Israel, leque yub Diox mtel' daa, ne, par ndxen di's ndac che'npe' Diox loo mèn co' inacte mèn nación Israel.

<sup>9</sup> Por cona, Cob no Pedr no Juàn co' nac nerleque' myen' co' ndyoo más altant loo cón che'n Crist, myen' mda' cuent co' huenleque' le' Diox mbli mxo'f zin'en zin' ndxè'. No mbli Diox mxyal' ned mxyal' yó' loon par mxo'f zin'en zin' ndxè'. Látha, mxen myen' ya' ryop nu' Mbèl' par mbli myen' cuent thidte ngòc ryop nu' Mbèl' con myen' loo zin' co' ngue xo'f zin' myen' cón che'n Crist no par mbli myen' cuent ndxàc hues no ndxàc xtàa ryop nu' Mbèl' con myen' loo cón che'n Crist. Thidte mdoodi's myen' le' ryop nu' Mbèl' ya xo'f zin' cón che'n Crist làth mèn co' inacte mèn nación Israel làth nda xo'f zin' myen'a leque zin' làth mèn nación Israel. <sup>10</sup> Thidte con' nac co' mbli myen' par xo'f ndeleque' lezo' nu' li nu'. Con'a ngòc di's co' ngòc plá di's gunee myen' loo nu' par más te' lezo' nu' cón che'n prob mèn co' ndxela's par lyath no nu' mènà loo con' nde che loo mènà. Con'a nac thib con' co' más ndlin purad ndli nu' leque tedib con'. Thiba con' ndxè'.

*Pab mbyoo Pedr le'n ciuda Antioqui.*

<sup>11</sup> Le' tediba na, co'se' ngua Pedr ciuda Antioqui, que nzo ne' ñee lezo' Pedr mbyoon Pedr, tac, por derech, ilé'de nac con' ngue tee li Pedr loo mèn ciuda Antioqui tiempa. <sup>12</sup> Co'se' nerleque' mtlo mèn che'n yèezya' che'n làaz mèn ciuda Antioqui, ngola's mènà loo cón che'n Crist, ngòc thib con'. Pedr ndxuhua no mènà, mèn co' inacte mèn nación Israel. Tolo mbli Pedr con'a axtaque' mzin ndxep amiu Cob, mèn co' nqueltàa no Cob le'n ciuda Jerusalén, le'n ciuda Antioqui. Per co'se' gunèe Pedr thib ned mèn co' ngue no costumbr che'n circuncisión, mèn co' ngòc amiu Cob, ale mzyeb Pedr gunèe Pedr mènà. Axta syare', xègà xègà mblá' Pedr. Ya ne'tolode nduhua no Pedr mèn co' nac mèn yèezya' che'n làaz mèn ciuda Antioqui, mèn co' inacte mèn nación Israel. <sup>13</sup> Le' sya, ndxep mèn nación Israel co' ngola's co' nzo làth mènà, mènà, ne, mbli xal mèn co' ne'ñeede làth mtembii Pedr ro Pedr no mtembii Pedr xti's Pedr loo taamas mènà cón che'n con'a. No ale axta no Mbèl' mblyas' par tolo mbli Pedr cón ndlyas' Pedr con mènà.



<sup>14</sup> Per co'se' gunèen tataa mbli Pedr con taamas mèn co' thidte ndxàc con Pedr, mdan cuent ingue tee ban ndacte Pedr xal ñibe' di's ndac co' nac lìcpe' co' ndlu' xá mod lyá' mèn loo con' ryes. Sya, ndxaben loo Pedr loo ryete mèn co' nqueltàa no Pedr: Pedr, lùu co' nac mèn nación Israel, leque lùu ndlu' nque tee banl xal nzi tee ban mèn co' inacte mèn nación Israel. No ¿ndlil xal ndli mèn co' inacte mèn nación Israel, cà'? ¿No nalle' a la fuerz ndlya'sl le' mèn co' inacte mèn nación Israel que tee ban xal nzi que tee ban mèn co' nac mèn nación Israel, cà'? ¡Pà ñee conax!

*Xalque' ndlyá' mèn chol nación co' inacte mèn nación Israel loo con' ryes, tataaque' ndlyá' mèn nación Israel loo con' ryes.*

<sup>15</sup> Hui' nexa, Pedr. Na' nac mèn nacionpe' Israel tac ngóol na' le'n nación Israel, ¿lé'? No ndli mèn nación Israel cuent más ncuá'n mèn co' inacte mèn nación Israel xtol mèn leque na', ¿lé'? Per ilìcta, ¿lé'?, Pedr. <sup>16</sup> Más de cona, na' nda' cuent no nanee na' nec thib mèn ne'ta'de Diox lugar no ne'tyalte Diox yòo mèn loo cón che'n Diox par gàc mènà mèn nalì no mèn nambii loo Diox por mbli mèn preb li mèn xal ñibe' ley co' mxo'f Moisés loo mèn. Ndxé'leque', nda' na' cuent no nanee na' ndyalque' Diox no nda'que' Diox lugar ngòo mèn loo cón che'n Diox par gàc mèn mèn nalì no mèn nambii loo Diox ante por yila's mèn loo Jesucrist. Por cona, na', ne, ngola's loo Jesucrist por mdyal Diox no mda' Diox lugar ngòo na' loo cón che'n Diox par ngòc na' mèn nalì no mèn nambii loo Diox. Ngòca tataa loo na' ante por ngola's na' loo Jesucrist. Na' nanee no nda' na' cuent le' Diox ne'tyalte ta' Diox lugar yòo mèn nación Israel loo cón che'n Diox par gàc mèn nación Israel mèn nalì no mèn nambii loo Diox por mbli mèn nación Israel preb li mèn nación Israel xal ñibe' ley co' mxo'f Moisés loo mèn.

<sup>17</sup> No nalle', nde niin thib con' lool, Pedr: Chele' na' mda' lugar no mdyal na' ngòo na' loo cón che'n Diox par ngòc na' mèn nalì no mèn nambii loo Diox por cón che'n Crist, no nalle' chele' na' ngue li par ngue hui' no ñaa mèn loo na', leque na' ngue cua'n xquin na' no xtol na' por ngue li na' ndxàc na' xal mèn co' inacte mèn nación Israel por cón che'n Jesucrist. Chele' na', lìcque', por cona ngue cua'n na' xquin na' no xtol na', ¿ché' nee di's co' ngue li na'a ncàb le' Crist ngue li par ncuá'n na' xquin na' no ncuá'n na' xtol na', cà', Pedr? Yende xàa. Nec thib mod no nec tedib mod gàca tataa, ¿lé'? <sup>18</sup> Tac chele' na' mbyathla's xal mnibe' ley co' mxo'f Moisés loo mèn no mblá' na' rye mod co' ngòp na' loo leya, no nalle' bere na', te' lezo' na' xal nac di's co' ndub loo ley par li na' preb tyubdi's na' loo leya tedib vez no li na' xal mbli na' póla, leque na' nque dol na' loo Diox, ¿lé'? <sup>19</sup> Per part cón chenen, daa ngòcle' xal mèn co' nguthle' loo con' co' mnibe' loo ley co' mblin, co' nee di's, ne'toloden lin rye con'a, tac mté'then yende mod gàc daa mèn nalì no mèn nambii loo Diox por mblin preb lin con' co' mnibe' ley co' mxo'f Moisés loo na' par li na'. Per nase ndan cuent ante loo cón che'n Diox ndxàal que tee ban daa tac ngro xà'len loo con' co' mnibe' leya loon par mblina ndoore' yilazen loo Diox por cón che'n Crist. <sup>20</sup> Por part cón che'n Diox, Diox mblole' cuent ngòc daa mèn co' nguthle', co' nee di's, Diox mblole' cuent thidte mque'en loo cruz con Crist. Cona, ngue niin lool, Pedr: Ithidte daa nac mèn co' naban co' ndoo lool trè'. Leque yub Crist nac xa' co' nzo ban no daa por cón che'n Xpii Natú'. No láth be' naban daa, daa co' nac bél'yòo, daa ngue tee ban ante por ndxàpen yalxla's no ndxelazen loo Crist co' nac xgan'pe' Diox. Xgan'pe' Diox nque' lezo' ñèe daa. No axta mda' xgan'pe' Diox lugar mquée yalguth loo xgan'pe' Diox por cón chenen. <sup>21</sup> Por cona, Pedr, indlyasten cà dizen no tè'ben con' co' nac ryethe con' ndac che'n Diox co' angmbli Diox loo mèn par ngaben le' Diox tyal yòo mèn loo cón che'n Diox par gàc mèn mèn nalì no gàc mèn mèn nambii loo Diox ante por mbli mèn preb ndubdi's mèn xal mbez di's co' ñibe' ley co' mxo'f Moisés loo mèn. Tac chele' daa tataa gab, le' sya, yende cón ntac nguth Crist por cón che'n mèn, ¿lé'?

Ale tataa mod mbyoo non Pedr tiempa. Thiba con' ndxè'.

## 3

*Pab ngue toodi's no mènà cón che'n ley co' mxo'f Moisés loo mèn nación Israel no cón che'n mod co' ndxàp taamas mèn yalxla's loo Jesús par lyá' mèn loo con' ryes.*

<sup>1</sup>Le' tediba na, gu' co' nac mèn gulàaz che'n làaz mèn galas, susque' tont gu' no susque' naad gu' no nguud gu', ndyaquen. ¿Chó con' mblu' mèn loo gu' par ndoo xà' lezo' gu' par ne'tolode ndubdi's gu' loo di's ndac co' nac di's ndac che'n Diox co' nac lïcque', à'? Co'se' mblon yalbàn loo gu', nambii mdan cuent loo gu' no mblu'en loo gu' cón che'n xá mod yub Jesucrist mquée loo cruz por cón che'n mèn. <sup>2</sup>Ndlyazen niin thib con' loo gu', mèn co' nac mèn gulàaz che'n làaz mèn galas no lyazen càb gu' loon: ¿Ché' ngulàa Xpii Natú' che'n Diox loo gu' por mbli gu' preb li gu' con' xal mnibe' ley co' mxo'f Moisés loo mèn o ché' ngulàa Xpii Natú' loo gu' por ngola's gu' di's co' mdan cuent cón che'n Crist loo gu', cà'? <sup>3</sup>¿Xá mod susque' mbla' gu' ngòc tont gu', yey? Con que gu' ngòole' loo cón che'n Diox por cón che'n con' co' mnibe' Xpii Natú' loo gu', ¿lé'? no nalle', ¿ché' ngue li gu' cuent no ché' nden' gu' huen naca tolo li gu' ryethe con' co' ndlyas Diox li gu', no ché', lïcque', ta' gu' cuent no té'th gu' par ndyubdi's gu' co' huenleque' loo Diox ante por ndxòn gu' ro tedib mèn co' ñibe' loo gu' par gàc circuncidar gu' no li gu' taamas con' co' ñibe' mèn li gu', cà'? Yende xàa. <sup>4</sup>¿Ché' ngue li gu' cuent anxle' ngòc rye con' ryes co' mxactii gu' por cón che'n Crist, cà'? ¿Ché' yende cón mxac gu' mté'th gu' cón che'n Diox par ngòc con' ndac loo gu' lãth mxactii gu', cà'? Oj, ché' co' càb co' mxactii gu'a tolo té'th gu' no tolo tyubdi's gu' loo cón che'n Crist taandxep. Huen. <sup>5</sup>Co'se' mblàa Diox Xpii Natú' che'n Diox loo gu' no mbli Diox huax yalguzye' làth gu', ¿chonon mbli Diox con'a, à'? Ne'nglide Diox con'a loo gu' tac mbli gu' preb mbli gu' con' xal ñibe' di's co' ndub loo ley co' mxo'f Moisés loo mèn póla, ¿lé'? Ndxé'leque', Diox mbli con'a loo gu' tac ngola's gu' loo di's ndac co' mbinle' gu' cón che'n Crist par ngola's gu' loo Crist.

<sup>6</sup>Abraham, co' mbloj msi' bin póla, Abraham ngola'sque' di's co' ndxab Diox li Diox loo Abraham yiloa. Por cona, Diox mteche mtexyath xtùuz Diox no lezo' Diox. No mblo Diox cuent tyalque' Diox no ta'que' Diox lugar yòo Abraham loo cón che'n Diox par gàc Abraham mèn nali no mèn nambii loo Diox ante por ngola's Abraham loo Diox tataa. <sup>7</sup>Por cona, ndxàalque' ta' gu' cuent no nonque' gu' le' mèn co', lïcque', nac binpe' Abraham, mènà nac mèn co' ndxela's loo Crist no loo cón che'n Crist. <sup>8</sup>Lomisque' ne, loo libr co' nac xti's Diox ndub di's co' mblu' loo mèn póla le' Diox tyalque' no ta'que' Diox lugar yòo mèn co' inacte mèn nación Israel loo cón che'n Diox. No gàc mèn co' inacte mèn nación Israel mèn nali no mèn nambii loo Diox ante por yila's mènà loo con' co' ndxab Diox loo mènà. Por cona, mda' Diox cuent loo Abraham cón che'n di's ndac ndxè' ndoore'. Ndxab Diox loo Abraham: Daa li huen ya mèn che'n rye nación por cón che'n lùu, Abraham. <sup>9</sup>Por cona, ngue niin loo gu': Le' ryete mèn co' ndxela's loo Diox por cón che'n Jesucrist le'n tiemp ndxè', loo ryete mènà Diox ndli huen nda mènà no ndxàc con' ndac loo mènà. No lalque' ndxàca loo mènà nalle' xalque' ngòca loo Abraham tac Abraham ngola'sque' di's co' mcàbgòn Diox li Diox loo Abraham.

<sup>10</sup>Ngue niin con' ndxè' loo gu', ne: Mèn co' más ndxàp yalxla's nac mènà mèn nali no mèn nambii loo Diox por ante mbli mènà preb li mènà xal mnibe' ley co' mxo'f Moisés loo mèn, no ne'ngácte mènà ngli mènà no ne'ngdubdi'ste mènà xal ñibe' ley co' mxo'f Moisés loo mèn, ale ndxe'leque', thidteneque' mèndèe mènà loo Diox tac nec thib mod no nec tedib mod yende mod li mèn con'a. Tac loo libr co' nac xti's Diox ndub di's co' mbez taandxè': Ryete mèn co' indlide no co' indubdi'ste loo ryethe con' xal nac rye di's co' ndub loo libr co' nac ley co' mxo'f Moisés loo mèn, thidteneque' mèndèe mènà loo Diox par ryo xa' mènà loo Diox thidtene yiloa. <sup>11</sup>Nda'que' na' cuent no nonque' na' le' Diox ne'ta'de lugar no ne'tyalte Diox yòo mèn loo cón che'n Diox par gàc mèn mèn nali no mèn nambii loo Diox ante por mbli mènà preb li mènà xal nac di's co' ñibe' ley co' mxo'f Moisés loo mèn. Tac loo libr co' nac xti's Diox ndub di's co' mbez: Le' mèn co' tyal Diox no co' ta' Diox lugar yòo mènà loo cón che'n Diox par gàc mènà mèn nali no mèn

nambii loo Diox, mènà ban no Diox thidtene yilòà ante por ngòla's mènà loo cón che'n Jesucrist no loo Jesucrist. <sup>12</sup> Per chele' mèn ndyubdi's di's co' ndlu' ley co' mxo'f Moisés loo mèn, cón che'n leya incàbte le' mèn yilòà's loo Diox. No ne' ne' inac leya co' ndli par ndxàp mèn yalxla's loo Diox. Ndxè'leque', di's co' ndub loo libr co' nac xti's Diox, di'sa mbez: Mèn co' ndli no mèn co' ntaa ryethe con' xal ñibe' di's co' ndub loo ley co' mxo'f Moisés loo mèn, mènà yòò ban no Diox thidtene chele' mèn, lìcque', li con'a. Per ìpà li mèn tataa!

<sup>13</sup> Per nalle', Crist mtelá'le' na' loo ryethe con' ye'rsin' co' ncàb loo mèn por ne'ndubdi'ste mèn loo ryethe con' co' ñibe' di's co' nac leya par li mènà, di's co' ne'gácte mèn li mèn, por derech. Hui' gu' nexa. Ngòcla tataa loo na' tac le'le' mbli Diox ngòc Crist thib mbi'dèe no thib mbi' ye'rsin'túb co'se' nguth Crist loo cruz por cón che'n xquin na' no xtol na'. Tac loo libr co' nac xti's Diox ndub di's co' mbez taandxè': Mbi'dèe no thib mbi' ye'rsin'túb nac chol mbi' co' nquée loo thib yaa co' nac thib cruz co'te' ndxuth mèn xtàa mèn por con' ye'rsin' co' mbli mbi'. <sup>14</sup> Ngòcque' yaltia loo Crist par mdubque' di's ngòc con' ndac co' mcàbgòn Diox angli Diox loo mèn dib athu loo izlyo', mèn co' inacte mèn nación Israel, por cón che'n Abraham co' mbloj msi' bin loo izlyo' póla. Mbli Diox con'a loo mènà por cón che'n Crist Jesús. Ngòc con'a loo Crist, ne, par mdubque' di's co' ndxab Diox le' Diox làa Xpii Natú' loo rye mèn co' gáp yalxla's loo Diox no co' yilòà's loo Diox por cón che'n Crist.

*Cón che'n ley co' mxo'f Moisés loo mèn nación Israel no cón che'n con' co' mcàbgòn Diox loo Abraham li Diox loo Abraham.*

<sup>15</sup> Mèn huesen por cón che'n Crist, nde niin thib con' loo gu' xal ndxàca loo mèn loo izlyo' ndxè': Co'se' ndli thib mbi' thib conveñ o co'se' ndli thib mbi' testar no ngo mbi' firm ye'sa, le' sya, nec thib mod no nec tedib mod yende chó mèn gác ton' di'sa no yende chó mèn gác tolo zi'f taamas di's loo ye'sa. <sup>16</sup> No nalle' tolo niin con' ndxè' loo gu', ne: Ngòcle' no mdyaaale' con' co' mcàbgòn Diox loo Abraham gác loo Abraham no loo bin che'n Abraham co' ngòc thib mbi' co' mbi'th yáal loo izlyo'. Imbezte loo libr co' nac xti's Diox cón che'n ryete mèn co' nac bin che'n Abraham, co' nee di's, co' nac huax bin Abraham. Ndxè'leque', di's mbez loo mèn no ndlu' di's loo mèn cón che'n thidte mbi' co' nac bin Abraham. Pues di's ndxè' nee di's xa' co' nac bin Abrahama nac Crist. <sup>17</sup> Con' co' ngue niin loo gu' nac con' ndxè': Diox mbli thib conveñ con Abraham. No mbli nèe Diox conveña xalque' ndli nèe mèn thib conveñ. Ngolo nguri'th thap ayo nzo gal psi' lín' ngòc con'a, mxo'f Moisés ley loo mèn. Por cona, leya ne'ngácte ngton' cón che'n conveñ co' mbli Diox con Abraham. Ne' ne' ngác ley li ley le' con' co' mcàbgòn Diox loo Abraham li Diox loo Abraham ngàc thib con' co' yende cón ntac. <sup>18</sup> No chele'i ngo mod ngàc le' Diox telá' mèn loo con' ryes ante por cón che'n ley co' mxo'f Moisés loo mèn, co' nee di's, ante por mbli mèn preb li mèn con'a, le' sya, yende mod ngàc le' Diox telá' mèn anxle' loo con' ryes xalque' mcàbgòn Diox li Diox thib con' anxle' loo Abraham. Per Diox, lìcque', ntelá' mèn anxle' loo con' ryes xal mcàbgòn Diox loo Abraham li Diox.

<sup>19</sup> ¿Par cón mbli sirv ley co' mxo'f Moisés loo mèn, sya? Pues mxo'f Moisés leya loo mèn par lu' ley loo mèn no par ta' mèn cuent no par non mèn le' mèn ncu'a'n xquin mèn no ncu'a'n mèn xtol mèn. No maste mnibe' leya loo mèn le'n ndxep tiemp axtaque' mbi'th Crist co' nde bin che'n mbi' co' lèe Abraham co' ngue tan cuent loo gu' ndxè'. Cón che'n Crist ngòc con' co' mcàbgòn Diox loo Abraham li Diox loo Abraham no loo Crist co' ngòc bin Abraham. Pues ley co' mxo'f Moisés loo mèn tiempa, di's co' ndub loo leya ngòc di's co' gunii thib angl loo Moisés. Le' Moisés na, ngòc thib mbi' co' mdoodi's no Diox por cón che'n mèn nación Israel. Mdoodi's no Moisés mèn nación Israel xal gunii Diox loo Moisés, ne. <sup>20</sup> Mèn co' nteri'th di's, nteri'th mèn di'sa loo chop ned mèn xal mbli Moisés loo Diox no loo mèn nación Israel. Per ndxè'leque', co'se' mcàbgòn Diox li Diox thib con' loo Abraham, ne'ncua'nte Diox mèn co' mteri'th di's loo Abraham. Leque yub Diox co' nac thidte Diox, Diox mcàbgòn loo Abraham lique' Diox gác con'a loo Abraham.

*Di's ndxè' ndlu' chonon mtan' Diox di's co' nac ley co' mxo'f Moisés loo mèn par li mènà.*

<sup>21</sup> ¡Aa mèn co' nac mèn gulàaz che'n làaz mèn galas! ¿Ché' ngue li gu' cuent ilalte nac con' co' mblyas Diox ngàc loo mèn por cón che'n ley co' mxo'f Moisés loo mèn no con' co' gac loo mèn ante por ngola's mèn loo con' co' mcàbgòn Diox li Diox loo mèn, cà'? Tyè'. Lalque' naca, yey. Per hui' gu' nexa. Chele Diox mxo'f thib ley loo mèn xal ndli gu' cuent, thib ley co' ndli par yòo ban no mèn Diox thidtene ante por ndubdi's mèn loo ryethe con' co' ñibe' leya loo mèn, sya, chele' mèn ndli con' co' mnibe' ley par ngli mènà ngàc mènà mèn nalì no mèn nambii loo Diox ante por mbli mènà con' co' mnibe' ley loo mènà par li mènà, huen ngàca loo gu', sya, xàa. <sup>22</sup> Per hui' gu' xal ndub di's loo libr co' nac xti's Diox. Di'sa mbez loo na' taandxè':

—Diox mblu' por cón che'n leya le' ryete mèn co' nziri' loo izlyo', mènà natedó' loo con' ye'rsin' por mod no costumbr co' ndxàp mènà co' ncàb ncuà'n mèn xquin mèn no xtol mèn. No mblu' Diox loo mèn por cón che'n leya nac mèn mèn ye'rsin' no nac mèn mèn co' ndxàp xquin no xtol loo Diox par tataa mod gàca le' mèn co' tyal yila's loo Jesucrist no gáp mèn yalxla's loo Jesucrist, gac mènà mèn nalì no mèn nambii loo Diox xal mcàbgòn Diox li Diox loo mèn.

<sup>23</sup> Ndoore' co'se' yi'th Jesucrist par ta' mèn cuent no par non mèn nzoque' mod yòo mèn loo cón che'n Diox ante por yila's mèn no gáp mèn yalxla's loo Jesucrist, tiempa axta arid nèe ngòc con'dèe cón che'n ley co' mxo'f Moisés loo mèn. Tac natedó' na' loo leya tiempa xal thib pres co' yende mod xon' lezi'f. Tiempa, ngure bed na' axta zin tiemp co'se' ryo xo'f xá mod yila's mèn no gáp mèn yalxla's loo Jesucrist par lyá' mèn loo con' ryes por cón che'n Jesucrist par tataa mod yòo mèn loo cón che'n Diox. <sup>24</sup> Por cona, ngue niin loo gu': Leya ngòc xal thib criadgot co' nquenap no co' nqueno myen' bix par gáp myen' mod. Mquenap leya na' xal mquenap criadgot myen' bix par ne'ncua'nte na' xquin na' no xtol na' xal mcua'n na' xquin na' no xtol na' co' ngòc thib mod co' ngòp na' tiempa axta co'se' ngòc tiemp co'se' mbi'th Crist. Crist mbli par mzye' mod che'n na' par ne'ncua'nte na' xquin na' no xtol na' par gàca co'se' be' ngòc na' ngolo ngola's loo Crist, sya, mdyal Diox no mda' Diox lugar yòo mèn loo cón che'n Diox par gac mèn mèn nalì no mèn nambii loo Diox por cón che'n Crist. <sup>25</sup> Per nalle', mzinle' tiempa co'se' tlo mèn yòo mèn loo cón che'n Diox par gac mèn mèn nalì no mèn nambii loo Diox ante por yila's mèn loo Jesucrist. Con'a ndli ya inzode na' xàn' yalnibe' che'n ley co' mxo'f Moisés loo mèn co' ngòc xal myen' bix co' ngue quenap no ngue queno criadgot.

<sup>26</sup> Por thidte ngòc gu' con Crist Jesús nac gu' xin'pe' Diox. Ngòc con'a loo gu' tac ngola'sque' gu' loo Diox por cón che'n Crist. <sup>27</sup> Ryete gu' co' thidte ngòc loo Crist, ngòca loo gu' xal co'se' ndxàc bautizar mèn le'n nít. Con'a nee di's Diox mbli le' gu' nda'que' lugar le' thidte Crist ñibe'pe' loo gu'. No ndli gu' ante co' nee lezo' Crist. <sup>28</sup> No nalle' por cón che'n Crist, yende chó mport nzo lezo' Diox aa guneei chó mèn nación nac gu'. Loo cón che'n Diox ya inacte gu' loo Crist xal mèn nación Israel ó xal mèn chol nación co' inacte mèn nación Israel. Ne' ne' nac gu' xal moz yèe loo thib patrón ó xal mèn co' yende chó ñii loo. Ne' ne' nac gu' xal mènbi' o xal mènngot. Tac mèn co' nqueltàa loo Crist thidte ndxàc ryete mènà loo Crist. <sup>29</sup> No chele' gu', licque', nac mèn co' nqueltàape' loo cón che'n Crist no ngòoque' gu' loo cón che'n Crist, le' sya, Diox ngo cuent le' gu' nacpe' mèn bin Abraham. Tataa mod gac che'n gu' no gac loo gu' ryethe con' ndac por nzo gu' loo cón che'n Crist, co' mcàbgòn Diox loo Abraham no loo bin Abraham li Diox loo Abraham no loo bin Abraham.

## 4

<sup>1</sup> Con' co' mblyazen niin loo gu' con di's co' ngolo guniin loo gu'a nac con' ndxè': Thib mbed co' nac xgan' thib gundan co' ndxàp che'n, mbeda yan' no herens che'n xud mbed, ¿lé'? Per láth ndoo xèn mbed, lalque' nac mbed xal thib moz liz xud mbed. <sup>2</sup> No láth ndoo roo mbed no ndoo xèn mbed, nzo thib criadgot co' nquenap mbed. No ndxan' mbed cón che'n criada axta ryoo mbed axta zin huiz ta' xud mbed herens co' gac che'n mbed càa mbed. <sup>3</sup> Tataa ndxàc con' loo na', ne, dib lal co'se' ngòc na' xal myen' bix, co' nee di's,

ndoore' yila's na' loo Crist. Con' co' ngue niin loo gu' ndxè' nac con' co' mbli na' tiempa: Mbli na' co' nac cón che'n xab izlyo'. No mbli na' xal ngòc mod ye'rsin' che'n mèn. No mbli na' i xalque' mnibe' mèn loo na' par li na' i, tac mbez mèn con' co' ndli na' a nac cón che'n Diox. <sup>4</sup> Per co'se' mdyaa huiz no tiempa, Diox mtel' xgan' Diox loo izlyo'. No co'se' mbi'th xgan' Diox loo izlyo', mbli Diox le' thib mza'yòn mxan xgan' Diox. No ale ngòc xgan' Diox mèn bin che'n mèn nación Israel. Loo mèn mxo'f Moisés ley. No mastale' nac Jesucrist xgan' Diox, mdubdi'sque' Jesucrist xalque' mnibe' ley co' mxo'f Moisés loo mèn nación Israel. <sup>5</sup> Tataa mod mbi'th Crist loo izlyo' par telá' Crist na' loo con' ryes, na' co' ngòc xàn' yalnibe' che'n ley co' mxo'f Moisés loo mèn par tataa mod mdyal Diox no mda' Diox lugar loo na' yòo na' loo cón che'n Diox xal xin' Diox.

<sup>6</sup> Por nac gu', lìcque', xin' Diox, Diox mbli ngulàa Xpii Natú' che'n Diox le'n lezo' gu' no le'n xtùuz gu'. Xpiia ndli mbez gu' loo Diox: Diox, U' co' nac xud nu', co'se' mbez gu' Diox. <sup>7</sup> Por cona, gu' nacpe' xin' Diox. No ya inacte gu' xal moz loo cón che'n xab izlyo' ndxè'. No por nac gu' xin' Diox, Diox ta' lugar no tyal Diox yan' no gu' ryethe con' ndac che'n Diox por cón che'n Crist.

*Pab ndyóo por cón che'n mèn co' ndxela's loo Jesucrist no loo cón che'n Jesucrist.*

<sup>8</sup> Póla, ndoore' co'se' tarte yila's gu' no co'se' tarte ta' gu' cuent cón che'n Diox por cón che'n Crist, ngòc gu' xal moz par mbli gu' sirv loo chol con' co' mbez mèn nac diox. Per inacte con'a merpe', lìcpe' Diox. <sup>9</sup> Per com le' gu' más nda'le' cuent cón che'n Diox nalle', ¿lé'?, no ndlibe' gu' Diox, o más huen niin loo gu' le' Diox ngole' cuent nac gu' mèn co' nzole' loo cón che'n Diox, ¿xá mod ndlya's gu' ale bere gu', li gu' xalque' ngòc mod co' yende cón ntac no co' yende cón li gu' gan? Ale, mbere gu', ngue li gu' con'a. No ale ndxàc gu' xal moz loo con'a. <sup>10</sup> Cona nee di's ale tatabe' nquenap gu' gu' loo huiz co' mbez gu' nac huiz roo co'se' ndxáal lni che'n chol mdo'. Ale nxyo'f ndeque' lezo' gu' ndxe' gu' cuent cón che'n chol huiz, cón che'n mbe', no cón che'n lín', ne. <sup>11</sup> Anze'f nde no lezon tac zin' co' ngue xo'f zin'en loo gu' cón che'n di's ndac che'n Diox, ale ndyaquen anxle' mxo'f zin'en zin'a loo gu'.

<sup>12</sup> Gu' co' nac mèn huesen por cón che'n Jesucrist, ña'ben loo gu': Gòc gu' xal nac daa, yey, co' nee di's, daa indlide cas no ne' ne' indyóon lin chol costumbr, no loo nec thib con' co' nac cón che'n ley co' mxo'f Moisés loo mèn co' ndli ncà daa loo cón che'n Diox. Más de cona, gu' nda'que' cuent xal ngòc daa thib cua'a; xá mod mque tee'en loo mèn gulàaz daa co' ngòc mèn nación Israel, ¿lé'? Per nase mblá'yan ryethe con'a. No ngòc daa xalque' nac gu' co' inacte mèn nación Israel co' indxòode loo chol costumbr nalle'. Lìcque', mden'en le' gu' yende cón mbli loon co'se' mbalen. Ngon làth gu' ndoore'. <sup>13</sup> Gu' nda'que' cuent co' huenleque', co'se' nerleque' vez mblon yalbàn cón che'n di's ndac che'n Diox co' ndlu' xá mod lyá' mèn loo con' ryes loo gu', mblina tac mquin mbyan' daa làth gu' tac nayíiz daa hora. <sup>14</sup> No yíiz co' mque nona ngòc thib preb loo gu' par ñeene' ché' tli gu' cas daa no ñeene' ché' xec gu' con daa. Per ¿ché' por nayíiz daa, ne'nglide gu' cas daa, cà'? Yende xàa. Gu' mblique' cas daa. Ne'ngo' toode gu' daa thib lad. Mblique' gu' cas daa. Más de cona, co'se' mzin daa loo gu', anze'f mdyu' daa loo gu' xalque' thib angl che'n Diox. No ale mden' gu' no mxac gu' casque' ngòc daa xal yub Jesucrist loo gu'. <sup>15</sup> ¿Máa gust co' ngòp gu' con daa nalle', sya? Tac co'se' mbalen loo gu'a, daa mda' cuent cón che'n gu' le' gu' ndxab loo xtàa gu': Ngàc ngudloo na' ¿cón ngàc ngudloo na'? Ta' na' ngudloo na' càa prob mbi' ba', cara. <sup>16</sup> Per nalle', ¿ché' ngue li gu' cuent le' daa ngòc thib ngolo ngola's che'n gu' loo gu' ante por ngue niin con' co' nac con' lìcpe' loo gu' xal nac mod co' nzi tee ban gu' nalle', cà'? Yende xàa.

<sup>17</sup> Mèn co' ngue cua'n mod, co' nac mèn co' ndlya's co' xà' gu' loo cón che'n Jesucrist, mèn ndlu' loo gu' le' mèn ndlya's gac con' ndac loo gu'. Per indlide mèn con'a con thidte yéc mèn no con thidte lezo' mèn par, licque', càba con' ndac loo gu'. Ndxle'leque', con' co' ngue li mèn nac: Ale ndlya's mèn co' xà' mèn gu' loo nu' par más yòo yéc gu' loo cón che'n mèn no yòo gu' lad che'n mèn. <sup>18</sup> Huenque' naca yòo



yéc mèn loo cón che'n tedib mèn. Per, oj, ché' co' càba con' ndac loo thib mèn no loo tedib mèn. No, oj, ché' co' li mèn dib nzo yéc mèn no dib nzo lezo' mèn con xtàa mèn, huen. No ndlyazen tolo li mèn con' ndac loo gu' thidtene, que nzo non gu', que yende daa loo gu'. <sup>19</sup> ¡Aa, mèn gulàaz co' nac che'n làaz mèn galas co' nac xal xin'en! Axta le'n lezon ndlyàa thib yalnè co' nden'en por cón che'n gu' xal co'se' nquée yo'f lezo' thib xa'got co' ndub tan xin'. No nden'en toloque' gác yaltii ndxè' loon por cón che'n gu' axtaque' ñeen huen huen nzi ta' gu' cuent no nzi té'th gu' no nzi ndubdi's gu' loo cón che'n Crist no axtaque' gác gu' mèn co' nac xalque' nac Crist. <sup>20</sup> Oj, ché' co' nzo mod nzo non gu' par nedrè', huen, par gác daa tyoodiz non gu' tedib mod co' inacte mod xal ngue que'en ye's ndxè' loo gu'. Tac axta ne' ne' neen xá mod tolo lin xtùuz cón che'n gu'.

*Pab mbez le' chop xa'got co' lèe Agar no Sar nac xal thib mustr co' ndlu' cón che'n mod xà' co' ndxela's chop ned mèn cón che'n Diox.*

<sup>21</sup> Gu' co' mbere ndlyas li xal ñibe' ley co' mxo'f Moisés loo mèn, ndlyazen ñee gu' loon: ¿Ché' tarte gòn gu' no ten' gu' cón mbez di's co' ndub loo ley co' mxo'f Moisés loo mèn, cà'? Di'sdèe nac co' ñibe' leya loo mèn. ¿Xá mod gác gu' li gu' con'a? ¡Pà gác gu' li gu' con'a! <sup>22</sup> Pues di's co' ndub loo libr co' nac xti's Diox co' nac Testament Gox mbez le' Abraham mque no chop xgan'. Thib mbed ngòc xin' huan Abraham con leque xa'got co' ngòc criad loo Abraham. Le' tedib mbed na, ngòc xin' Abraham por xa'got co' ngòc xin' sa'lpe' Abraham. No ngòc xin' sa'l Abraham thib xa'got co' yende chó mèn ngo co' ngnii loo xa'got Abraham par ñibe' mèn loo xa'got Abraham por ngòc xa' xin' sa'lpe' Abraham tiempa. <sup>23</sup> Le' mbed co' ngòc xin' xa'got co' ngòc criada ngóol xal nac bin co' ndli bél'yòo lad mèn co'se' ndxáal mèn loo izlyo'. Per ndxe'leque', mbed co' ngòc xin' xa'got co' ngòc xin' sa'lpe' Abraham co' ngòc xa'got rnith no co' ngòc xa'got co' yende chó mèn mbee ncà, mbeda ngóol par ngòcque' no mdyaaque' no mdubque' di's co' mcàbgòn Diox li Diox loo ryop xin' sa'l Abraham. <sup>24</sup> Con'a ngòc thib mustr o mod co' ndlu' cón che'n mod co' ndxela's mèn loo Diox. Le' ryop xa'gota na, ndlu' cón che'n chop conveñ. Cón che'n chop conveñ ndxè' nac: Ner conveñ co' mnibe' Diox loo Moisés co' ngòc thib ley co' mxo'f Moisés loo mèn nación Israel. Mèn co' ndlyas li xal ñibe' ley che'n ner conveñ, mèn nquin tyubdi's xal ñibe' ner conveña xal ndyubdi's thib moz loo patrón moz. Xa'got co' ngro' lèe Agar ndlu' cón che'n ner conveñ tac ngòc xa' criad Abraham no mquin tyubdi's yèe Agar loo mèn guliz Abraham. <sup>25</sup> Di's co' nac di's Agar co' nac lèe xa'gota, leque di'sa nac di's co' nac di'stèe che'n mèn grieg. Di'sa nac leque di's co' nac lèe yii Sinaí co' ndub le'n nación Arab. Di's co' nac lèe che'n xa'got co' lèe Agar co' ngue niin loo gu' ndxè' nee di's nac mèn nación Israel nalle'. Tac nalle' ryethe mèn nación Israel nac xal moz co', por fuerz, naquinque' tyubdi's xal ñibe' ley co' mxo'f Moisés loo mèn. <sup>26</sup> Mèn nación Israel mbez le' ciuda Jerusalén nac ciudadape' mèn. Per na' mbez le' loo bé' nac lizpe' na' no làazpe' na' no xnedpe' na', co' nee di's, nac xal tedib ciuda Jerusalén co' nac ciudadape' che'n na'. No inquinte li na' huax con' xal ñibe' ley co' mxo'f Moisés loo mèn nación Israel par li mèn. <sup>27</sup> Loo libr co' nac xti's Diox ndub di's co' mbez:

Fta' gust lezo'l, xa'got rnith, lùu co' ne'ndante xin'. De gust fxiiis yèe, lùu co' thidtene ne'ndante xin'. No ne'nden'tel yalnè par ndan xin'.

Tac xa'got co' mblá'ya' sa'l, xa'gota que no más xin' co'se' bere sa'l xa', queltàa sa'l xa' con xa'gota tedib vez. Más que no xa'gota xin' xa'gota leque xa'got co' thidteneque' ndyub no sa'l.

Con' ndxè' nee di's más yòo mèn nación Israel loo cón che'n Diox por cón che'n Jesucrist leque ngòo mèn co' nac mèn nación Israel loo cón che'n Diox por mbli mèn preb ndubdi's mèn loo di's co' mnibe' ley co' mxo'f Moisés loo mèn par li mèn.

<sup>28</sup> Gu' co' nac mèn huesen por cón che'n Crist, ngue niin loo gu': Na' nac xal Isaac. Nac na' xin' Diox tac ngola's na' loo Crist xalque' ngola's Abraham loo Diox le' Diox lique' con' mcàbgòn Diox li Diox loo Abraham. <sup>29</sup> Xalque' ngòca póla, le' mbed xin' Abraham co' lèe

Ismael, co' ngóol xalque' nac mod co' ndxáal bin mèn co' ndli mèn loo izlyo', mbed mdub ngu's tedib mbed co' lèe Isaac co' ngòc xganpe' Abraham, mbed co' ngóol ante por cón che'n Xpii Natú'. Tataa ndxàca loo na' nalle' le' mèn co' ngue li preb ndubdi's mèna xal ñibe' ley co' mxo'f Moisés loo mèn ngue tub ngu's na', ne. <sup>30</sup> Per mastale' tataa ngòca loo ryop hues xgan' Abraham, ¿cón mbez loo libr co' nac xti's Diox, à'? Le' loo libra mbez:

Blo' criadgot co' ngue nol lizl ba' con xgan' criadgot. Tac mbed co' nac xgan' criadgota, yende mod gac che'n mbed herens con mbed co' nac xgan' meegot co' yende chó mèn ñii loo no co' yende chó mèn mbee ncà.

<sup>31</sup> Por cona, ngue niin loo gu', mèn co' ndxàc huesen por cón che'n Crist: Ya inacte na' xal xgan' meegot co' ngòc criadgot, co' nee di's, nquin li mèn con' co' ñibe' ley co' mxo'f Moisés loo mèn. Ndxé'leque', nac na' xal xgan' meegot co' yende chó mèn ñii loo, no co' yende chó mèn mbee mcà, co' nee di's, inquinte li na' con' co' mnibe' ley co' mxo'f Moisés loo mèn par li mèna par lyá' na' loo con' ryes.

## 5

*Bli nèe gu' gu' loo cón che'n Crist par gaca loo gu' yende chó ñii loo gu' no yende chó cuee cà' loo gu' loo cón che'n Crist.*

<sup>1</sup> Crist mbli par ya yende chó con' cuee no cà' na' par nquin li na' ryethe con' co' ñibe' ley co' mxo'f Moisés loo mèn nación Israel. Bli nèe gu' gu', tá, loo cón che'n Crist. No ya ne'tolode bere gu', gac gu' xal moz co' ñibe' patrón loo loo cón che'n leya par li yèe gu' ryethe con' co' ñibe' ley.

<sup>2</sup> Daa co' lèe Pab, daa ngue nii di's ndxè' loo gu' loo cart ndxè'. Bìn gu' di's co' ngue niin loo gu' ndxè': Chele' gu' yòo loo yalndxela's che'n mèn co' ndli circuncisión, le' sya, ya yende cón ntac Crist par gu' loo cón che'n Diox. <sup>3</sup> Beren niin loo gu' tedib vez: Chol gu' co' nac mènbi' co' ndlya's gac circuncidar, gu' co' ndlya's gac circuncidara, naquinque' li yèe gu' ryethe con' xal ñibe' di's co' ndub loo ley co' mxo'f Moisés loo mèn par lyá' gu' loo con' ryes. <sup>4</sup> Gu' co' ndxela's le' Diox mdyal no mda' Diox lugar yòo gu' loo cón che'n Diox par gac gu' mèn nalì no mèn nambii loo Diox por ngue li gu' xalque' ñibe' di's co' ndub loo ley co' mxo'f Moisés loo mèn, gu'a mblá'ya'le' cón che'n Crist. No ngro xà'le' gu' loo Crist. No inda'de gu' lugar loo Diox telá' Diox gu' loo con' ryes ante por cón che'n Jesucrist. <sup>5</sup> Per por part cón che'n na', por cón che'n Xpii Natú' no por ngola's na' loo Crist, nzi queeque' lezo' na' le' Diox tyal yòo ban no na' Diox loo bé' yiloa. <sup>6</sup> No nalle' chele' na', lìcque', thidte ndxàc con Crist Jesús, yende cón ntac no yende cón lii gac circuncidar na' o ne'gacte circuncidar na'. Thidte con' co' más ntac loo na' nac le' na' ndxela's loo Crist. No cón che'n con' co' ndxela's na' loo Crist ndli le' na' nque' lezo' ñèe na' hues xtàa na'.

<sup>7</sup> Con que gu' huenque' ngureri' loo cón che'n Crist, ndyaquen, ¿còxe mbli ya ne'tolode ndyubdi's gu' cón che'n di's ndac co' nac lìcpe', à', yey? <sup>8</sup> ¿Ché' ngue li gu' cuent le' di's co' mbìn gu' por ro mèn co' mblu' gu' par ngro xà' gu' loo cón che'n Crist nac di's co', lìcque', ngue ñibe' Diox loo gu' par li gu', cà'? Tyè'. Ndxé'leque', di's co' mbìn gu' nac co' mbli ngro' gu' loo cón che'n Diox. Tad Diox nacpe' xa' co' mbrez gu', no co' mblec gu', no co' mblo gu' loo cón che'n Crist. <sup>9</sup> Ne'ta'de gu' lugar quedii mèn gu' ne' por chu'th. ¿Ché' inda'de gu' cuent xal mbez di's co' mbez: Con ndxepte dii levadur ndli ndyoo bes huax co'f harin, cà'? <sup>10</sup> Daa ndxàp yalxla's loo Tad Diox por cón che'n gu', ey, le' gu' ne'tolode li xtùuz tedib mod loo xtùuz co' ngue lin xtùuz loo cón che'n Crist. Per na' ngue nii loo gu': Le' Diox tetii mèn co' ndli par ncàba imbee see teede lezo' gu'. No yende chó mport nzo lezo' Diox aa guneei chó mèn nac mèna.

<sup>11</sup> Le' part cón chenen na, mèn co' nac mèn huesen por cón che'n Crist, chele' daa be' ngue ñibe' loo mèn par gac circuncidar chol mèn, ne'tub ngu'ste mèna daa. Tac chele' daa tataa ñibe' loo mèn, ne'ten'te mèna di's no axta ne' ne' yòo xyàn lezo' mèna ñèe mèna daa par tolo tub ngu's mèna daa. Per ndxe'leque', daa mbez loo mèn naquinque' yila's mèn loo Crist no loo cón che'n Crist par lyá' mèn loo con' ryes. <sup>12</sup> Per nde niin thib

con' loo gu' cón che'n mèn co' ngue li xol loo gu' tac mèn ndlya's gác circuncidar gu': Oj, ché' co' leque yub mèn cho' xlan' mèn thidtene, huen, par thidtene ryo xà' mèn loo cón che'n Diox thidtene.

<sup>13</sup> Per gu', mèn gulàaz che'n làaz mèn galas co' nac mèn huesen por cón che'n Crist, Diox mçui gu' no mblec Diox gu' par yende chó mèn gác cuee cà gu' loo cón che'n Diox. Ante nzo thib con' co' ñibe'en loo gu' par ne'líde gu'i. Indlyasten le' gu' ñibe' yéc gu' no ñibe' gu' lezo' gu' par gab gu' loo lezo' gu' nee gu' cón li gu'. Le' sya, tataa mod tlo gu' li gu' chol con' co' neete lezo' gu' co' ndryo' ndlyen' lezo' gu' par li gu' co' gác con' ye'rsin' loo Diox. Más huen, ndlyazen gác gu' mèn co' que' lezo' ñèe hues xtàa gu' par tataa mod li gu' sirv loo hues xtàa gu' chol mod. <sup>14</sup> Chele' gu' li con' co' ngue niin loo gu' ndxè', sya, ngue li gu' ryethe con' co' ñibe' ley co' mxo'f Moisés loo mèn par li mèn con' ndac. Con'a nac: Fque' lezo' gu' gunèe gu' hues xtàa gu' xalque' ngue lezo' gu' ñèe gu' gu'. <sup>15</sup> Per ndxe'leque', chele' gu' ndxàc yin' no ndxàc gu' ted, co' nee di's, ndxecloo gu' no ndxòo xyàn lezo' gu' ñèe gu' thib xtàa gu' no tedib xtàa gu', anderhuen gu' con xtàa gu', ne' yiloa leque gu' teza' gu' loo cón che'n Crist.

*Pab ngue lu' loo mèn cón che'n con' co' ndryo' ndlyen' lezo' mèn par li mèn con' ye'rsin' no cón che'n mod co' nque tee ban mèn, mèn co' ñibe' Xpii Natú' loo.*

<sup>16</sup> Con' co' niin loo gu' ndxè', mèn huesen por cón che'n Crist, nac con' ndxè': Gure ban gu' xalque' ñibe' Xpii Natú' loo gu'. Le' sya, tataa mod ne'tolode li gu' xal nac rye con' ndyub yo'f lezo' gu' co' ndryo' ndlyen' lezo' gu' par li gu'i. <sup>17</sup> Tac rye con' co' ndli par ndyub yo'f lezo' mèn par li mèn con' ye'rsin', con'a inacte con' co' ñibe' Xpii Natú' che'n Diox loo mèn par li mèn. Lomisque' ne, con' co' ñibe' Xpii Natú' che'n Diox loo mèn par li mèn, inacte con'a con' co' ndli ndyub yo'f lezo' mèn par li mèn co' neete lezo' mèn li mèn. Chele' thib mèn alithe ndli con' ndryo' ndlyen' lezo' mèn par li mèn con' ye'rsin' co' nac co' neete lezo' mèn, le' sya, yende mod li mèn con' co' ñibe' Xpii Natú' che'n Diox loo mèn par li mèn. Per chele' mèn ndyubdi's loo con' ñibe' Xpii Natú' loo mèn, ne'líde mèn con' co' ndryo' ndlyen' lezo' mèn li mèn par tataa mod li mèn co' neete lezo' mèn. Por cona, ngue niin loo gu': Yende mod li gu' chol con' ndlya's gu' li gu' xal co' ndryo' ndlyen' lezo' gu' chele' gu', licque', ndlya's tyubdi's gu' loo Diox. <sup>18</sup> Per chele' Xpii Natú' che'n Diox nac xa' co' nzo no gu' no, chele' Xpii Natú' tyoo ner loo gu' no tyoo naa Xpii Natú' loo gu', le' sya, ya inquinte tolo li gu' con' co' ñibe' di's co' ndub loo ley co' mxo'f Moisés loo mèn.

<sup>19</sup> Inagànte naca par hui' mèn no par ñaa mèn no par non mèn con' co' ndli mèn, mèn co' nzi tee loo rye loothe con' co' nac che'n xab izlyo'. Mèn ndli yalburrid no ncu'a'n mèn xin' huan mèn. No ndli mèn xtùuz con' xin' no con' cap cón che'n con'a axta ale capas mèn ndlya's mèn li mèn rye loothe con' ye'rsin' co' nac huax mod ye'rsin' co' ndli ndyub yo'f lezo' mèn par li mèn con'a. <sup>20</sup> Ndyub xib mèn no nsál' mèn ya' mèn no ncòo' mèn yéc mèn loo chol mdo' co' nac chol gunab. Ndli mèn yalbruj. Ndxòo xyàn lezo' mèn ñèe mèn chol xtàa mèn. Ngyoo mèn con xtàa mèn. No nqueli'th mèn cón che'n xtàa mèn. Ndxep vez thib con' co' iñaade ndli ndxecloo mèn ñèe mèn xtàa mèn. Asendli mèn ndlyath no mèn xtàa mèn ante par ñèe loon mèn que no mèn che'npe' taamas mèn. Más de cona, ndxàc mèn chop son ned loo chol con'. <sup>21</sup> Ndxàn lezo' mèn ñèe mèn xtàa mèn. Nac mèn mènquth mèn. Nac mèn mènqy. Ndxuhuacho' mèn no ndxuhuaxle' mèn axta plóthe cón che'n xtàa mèn co'se' ndxàc chol lni. No ndli mèn taamas con' co' lalque' nac xal con' ndxè'. Ngue co'xen ryete con' ndxè' loo gu' nalle' xalque' mco'xena loo gu' ndoore'. Le' rye mèn co' ndli chol con'a, ne'gácte mèn yòo mèn loo cón che'n Diox par ñibe'pe' Diox loo mèn.

<sup>22</sup> Per ndxe'leque', rye con' co' ndli Xpii Natú' che'n Diox loo mèn par li mèn nac: Que' lezo' mèn ñèe mèn chol xtàa mèn. Con gust cue mèn no xo'f nde' nxo'f ndla' lezo' mèn. No cue ban mèn rye nda mèn no rye ndye'th mèn làth hues xtàa mèn. Nxec mèn con xtàa mèn no ncha'la's mèn con xtàa mèn. Nazi' cue mèn con xtàa mèn. Li mèn con' ndac loo xtàa mèn. Li mèn cumplir con' mbez mèn li mèn loo xtàa mèn no loo Diox. <sup>23</sup> Gác

mèn mèn nado', mèn co' indye'ste. Gàc mèn mèn co' ndxàp lezo', no gac mèn mèn co' ñibe'pe' loo lezo' loo ryethe con' ndli mèn. Ryete gobiern co' ñibe' loo rye nación loo dib athu izlyo' ndxòo lezo' ñèe mèn, mèn co' ndli con' ndac ndxè'. <sup>24</sup> Le' rye mèn co', licque', nzo loo cón che'n Crist, co' ngola'sque' loo Crist, con' co' mbli mèn ndoore' co' ngòc con' ye'rsin' co' mdyub yo'f lezo' mèn mbli mèn xal guneeete lezo' mèn, con' ye'rsin'a ngòc xal thib con' nguth co' ya ne'tolode ñibe' loo mèn. Tataa mod ya ne'tolode li mèn con' ye'rsin'. <sup>25</sup> Texal nzi tee ban na' loo cón che'n Xpii Natú' che'n Diox, lomisque' tataaguè' ndxàal ta' na' lugar le' Xpii Natú'a tyoo ner no tyoo naa loo na' loo ryethe con' ngue tee li na', par ante li na' con' co' neete lezo' Xpii Natú'.

<sup>26</sup> Indxàalte gac na' mèn nate's no mèn naxal'. Tac co'se' ndxàc na' xal mèn, con'a ndli ndxecloo thib xtàa na' no tedib xtàa na' ñèe xtàa na' na'. Ne' ne' gac na' mèn co' ndxàn lezo' par ñèe na' hues xtàa na', ndee gu'.

## 6

### *Pab mnibe' loo mèn lyath no mèn chol hues xtàa mèn.*

<sup>1</sup> Mèn huesen por cón che'n Crist, chele' gu' ñèe chol mèn co' ndxàc hues xtàa na' ngue tee cua'n xquin no xtol, gu' co' más nda'le' cuent no gu' co' más mté'thle' par ndyubdi'sque' gu' loo cón che'n Tad Crist, blyath no gu' mèn no gunii gu' loo mèn par bere mèn, tlo mèn, que tee ban ndac mèn loo cón che'n Tad Crist tedib vez xal ndxàala. Per nado' di's nado' cuent tyoodi's no gu' mèn. No anderhuen gu' chó Diox chó nee gu' guneete gu' xal nzi tee gu'. No bla's gu' loo leque gu' hui' xal nzi tee ban gu' loo cón che'n Diox. Tac thib descuid, chàa, li Mebizya gan loo gu' no tlo gu', li gu' chol con' ye'rsin'. <sup>2</sup> Blyath no gu' thib hues xtàa gu' no tedib hues xtàa gu' par ne'líde hues xtàa gu' con' co' ndyub yo'f lezo' hues xtàa gu' par li hues xtàa gu' con' ye'rsin'. Chele' gu' tataa ndli loo chol hues xtàa gu', le' sya, tataa mod ngue lique' gu' xalque' ñibe' Crist loo gu' par li gu'.

<sup>3</sup> Chele' ndxep gu' co' ndxàc hues por cón che'n Jesucrist ndyac no ndli gu' cuent anze'f mèn roo no mèn xèn nac gu' co'se' yende cón ntac gu', leque con'a ndlu' no tataa mod leque gu' ngue quedii gu' loo con' nac gu'. <sup>4</sup> Thib thib gu' bla's no hui' gu' loo leque gu' xá mod nzi tee ban gu' loo cón che'n Diox par ñèe gu' ñeene' ché' ngue li gu' ndxep con' ye'rsin'. Le' sya, chele' gu' nda' cuent huenque' nzi tee ban gu' no ndyac lezo' gu' loo mod co' nzi tee ban gu' loo cón che'n Diox, le' sya, ndyac lezo' gu' por cón che'npe' gu'. Per ne'tyacte lezo' gu' por más nda' gu' cuent no más nté'th gu' par tyubdi's gu' loo Diox leque taamas hues xtàa gu'. <sup>5</sup> Per nalle' thib thib gu' gunaa loo gu' no bla's gu' loo leque gu' xá nzi tee ban gu' loo cón che'n Diox. Thiba con' ndxè'.

<sup>6</sup> Le' tediba na, niin thib con' loo gu': Mèn co' ngue té'th cón che'n xti's Diox por cón che'n mèn co' nac maistr co' ngue lu' mèn, mèn co' ngue té'tha ndxàalque' lyath no mena maistr co' ngue lu' loo mèn loo con' co' nde che loo mèn co' nac maistr.

<sup>7</sup> Hui' gu' nexa. Ne'ta'de gu' lugar quedii gu' leque gu'. Yende chó mèn nzo co' gac xiis no Diox. Tac Diox tub rezque' cón che'n rye mèn. Gàcpe'i loo gu' xal mbez mèn: Le' bin co' co mèn loo yòo, leque biz bina gac cosech co' thop mèn, co' nee di's, fsuc paráp. Leque lool lyàa rsucl. <sup>8</sup> Chele' chol mèn ndxàp mod co' nac mèn par ndli mèn chol con' ye'rsin' co' ndryo' ndlyen' lezo' mèn, le' sya, leque con' ye'rsin' co' ndli mèn ncàba loo mèn ryo xà' mèn thib lad loo Diox thidtene yilo gath bél'yòo lad mèn. Nacquele' chol mèn gáp thib mod par li mèn con' ndac co' yòo lezo' Xpii Natú', le' sya, Xpii Natú' li par gaca loo mèn ban no mèn Diox thidtene yilo gath bél'yòo lad mèn. <sup>9</sup> Cona, ngue niin loo gu': Indxàalte yizan na' par ne'tolode li na' con' ndac loo hues xtàa na'. Tac chele' na' ne'ta'de lugar yizan na' no yitac lezo' na' loo con' ndac co' ngue li na' loo hues xtàa na', le' sya, por derech, Diox li par gac huax con' ndac loo na' yiloo. <sup>10</sup> Cona, co'se' ta'i lugar loo na' no co'se' nzoque' mod li na'i, li na' con' ndac loo chol mèn. No más ndxàal li na' con' ndac loo mèn co' ndxàc hues xtàa na' por cón che'n Crist.

*Lult di's co' mque' Pab ye's loo mèn loo cart ndxè'.*

<sup>11</sup> Ryete di's co' nac di's co' nde loo gu' loo cart ndxè' nac di's co' ndxaben loo tedib xa' co' ndxàc xtàa daa par mque' xa' ye's co' nac di's loo cart ndxè'. Per nalle' hui' gu' nexa: Napló nambii ñaa letr co' mque' yuben di's co' nac lult di's loo cart ndxè' loo gu' par tolo toodiz non gu'. <sup>12</sup> Mèn co' ndlya's li fuerz par bere gu', li yèe gu' xal nac costumbr che'n circuncisión, mèn ndli tataa ante par ndxan' bien mèn loo chol mèn no par ne'tub ngu'ste chol mèn mèn por cón che'n di's ndac co' ndlu' ante gáp mèn yalxla's loo cón ngòc loo Crist loo cruz. No inquinte li mèn cas loo taamas costumbr gox cón che'n con' ngola's mèn ndoore' par lyá' mèn loo con' ryes. <sup>13</sup> Per fte' lezo' gu', ey, ne' mèn co' ndli costumbr che'n circuncisión, indlide prob mèn ryete con' co' ñibe' ley co' mxo'f Moisés loo mèn. Per mastale' indlide mèn xal ñibe' ley co' mxo'f Moisés loo mèn, ale ndlya's mèn le' gu' gác circuncidar par tataa tye's mèn loo xtàa mèn le' mèn mbli fuerz gu' par mbli gu' mquée fthi'f lad xlan' gu' par ngòc fthi'fa xal thib señ. <sup>14</sup> Per part cón chenen, indliden cuent no ne'yilasten le' chol con' co' nzo loo izlyo' ndxè' o chol xley' li par lyá' daa loo con' ryes. Ndxè'leque', ante ndxàpen yalxla's loo Diox por cón che'n Tad Jesucrist na' co' nguth loo cruz no maste par lyá' daa loo con' ryes. Tac por cón che'n con' co' mxac Tad Crist loo cruz, rye mod co' ngòc cón che'n xab izlyo' mdyon'le' loon no mblyuxla loon loo izlyo' ndxè'. Nalle' nac daa xal mèn co' nguth loo cón che'n xab izlyo'. <sup>15</sup> Tac chele' na' thidte ndxàc con Crist Jesús, le' sya, yende cón ndli gác circuncidar na' o ne'gàcte circuncidar na'. Per thidte con' co' más ntac loo Diox nac le' mèn nacle' mèn cub loo Diox. <sup>16</sup> Ndlyazen le' Diox li le' gu' cue nagàl lezo' loo Diox no loo Jesucrist no cue ban gu' rye nda gu' no rye ndye'th gu' làth xtàa gu'. No ndlyazen le' Diox thidtene lyat lezo' ñèe Diox gu', ryete gu' co' nque tee ban ndac loo cón che'n Crist xal nac di's co' mblyu'en loo gu' loo cart ndxè'. No ndlyazen gàca tataa loo ryete mèn co' nqueltàa loo cón che'n Diox chol lugar, mèn co', licque', ngòc loo cón che'n Crist.

<sup>17</sup> Lomisque', ndlyazen nalle' par delant nec thib mèn indlyasten cua'n xó' daa no ne' li xol mèn loon por cón che'n zin' co' ndlin cón che'n Crist, zin' co' mxo'f zin' Diox cón che'n Crist loon. Tac fthi'f co' ne'en laden ndxè' ndlu' le' daa, licque', nac thib mbi' co' nxo'f zin' che'n Crist.

<sup>18</sup> Lomisque' ndlyazen, mèn huesen por cón che'n Tad Jesucrist, le' Tad Jesucrist angryo' lezo' li Tad Jesucrist anggàc con' ndac loo gu', no li Tad Jesucrist huen nda gu' ned que tee gu'. Taandxè'que' gàca loo gu', ndee gu'.



## Cart Co' Mque' Pab Ye's Loo Mèn Co' Ngo Ban Le'n Ciuda Efes

*Pab nque que' ye's loo mèn co' ngola's loo Crist no loo cón che'n Crist, mèn co' mqueltàa loo cón che'n Diox le'n ciuda Efes.*

<sup>1</sup> Daa, Pab, ndxe' di's che'n Jesucrist xal nee lezo' Diox. Nque que'en ye's loo gu' co' nac mèn ciuda Efes, gu' co' ngro xà' loo cón che'n xab izlyo' par ngòc gu' che'npe' Diox. Ngola's gu' loo Crist Jesús, ne. <sup>2</sup> Ndyazen le' Diox tolo lí anggàc con' ndac loo gu'. No ndyazen le' gu' cue nagàl lezo' loo Diox no loo Jesucrist. No ndyazen cue ban gu' rye nda gu' no rye ndye'th gu' làth xtàa gu'.

*Pab ndyoodi's cón che'n con' ndac co' ndxàc loo mèn por cón che'n Tad Crist.*

<sup>3</sup> Li na' le' mèn gab nac Diox Diox roo no Diox xèn no Diox natú' thidtene, Diox co' nac xud Tad Jesucrist na'. Por thidte ndxàc na' no thidte nqueltàa na' loo cón che'n Crist, Diox anze'f thib con' ndac angmbli loo na' no rye loothe con' co' nac con' ndac. Con' natú' co' nac che'n bé' nac che'npe' na', ne. <sup>4</sup> Diox mcui na' por cón che'n Crist ndoore' cuec Diox izlyo'. Tataa mbli Diox par gàc na' mèn co' ngro xà' loo cón che'n xab izlyo', no mèn co' ngòc che'npe' Diox, no mèn co' ne'tolode cua'n xquin, no mèn co' ne'tolode gáp xtol loo Diox. <sup>5</sup> Mcui Diox na' xalque' mnibe' Diox lezo' Diox no xal gunee lezo' Diox par ngòc na' xin'pe' yub Diox por cón che'n Jesucrist. Tataa mbli Diox tac anze'f nque' lezo' Diox ñèe Diox na'. <sup>6</sup> Por cón che'n con' co' angmbli Diox loo na'a, li na' le' mèn gab di's guryath no di's guryèn cón che'n Diox loo Diox no loo mèn. Diox mbli angngòc con' ndac ndxè' loo na' por thidte nqueltàa na' loo Crist no loo cón che'n Crist, Crist co' nac lezo' no ngudloo Diox. <sup>7</sup> Por tant nque' lezo' Diox ñèe Diox na', mbli Diox par le'le' Crist mtelá' na' loo con' ryes por cón che'n renpe' Crist co'se' mquée yalguth loo Crist, co' nee di's, mton' Diox xtol na' por cón che'n con' co' ngòc loo Crist. <sup>8</sup> Tataa mbli Diox par mblu' Diox le' Diox nque' lezo' ñèe Diox mèn axta plóthe, co' nee di's, co'se' ndli Diox par ndxác mèn no co'se' ndli Diox ndxòn mèn co' huen huen cón che'n Diox. <sup>9</sup> No mbli Diox par mblu' Diox cón che'n con' ndlya's Diox li Diox co' nac con' co' be' nzo casloo loo Diox no co' nac co' mblo xnee Diox lique' Diox yilóa, con' co' gàcque'. <sup>10</sup> No com le' Diox mblobe'le' lezo' lique' Diox par sin falt gàcque' no tyubque' di's co'se' zinpe' huiz li Diox par thidte ñibe' Crist loo ryete con', que naca con' co' nzo loo bé', que naca con' co' nziri' loo izlyo'. <sup>11</sup> No par mbli Diox thidte mqueltàa na' loo cón che'n Diox, mcui Diox na' más póla par càaya' na' con' co' gàc che'npe' na' yilóa, con' co' ta' Diox par càaya' na'. No ryete con' co' li Dioxa thidte nac xalque' mblobe' Diox no mblo xnee Diox lezo' Diox li Diox con'a tac Diox ndli ryete con' xal gunee lezo' Diox li Dioxa. <sup>12</sup> Tataa mbli Diox loo na' par de que, nu' co' nac nerleque' mèn co' ndxàp yalxla's loo Crist, cue ban nu' par li nu' le' lèe Diox gàc thib con' guryath no thib con' guryèn por cón che'n con' roo con' xèn co' nzo la's nii Diox no co' nzo la's ya' Diox. <sup>13</sup> Gu' ne, co'se' mbìn gu' cón che'n di's ndac co' nac licque', di's ndac co' ndlu' xá mod lyá' mèn loo con' ryes, gu' ngola'sque' loo Crist no loo cón che'n Crist. No thidte ngòc gu' loo cón che'n Crist no ngòc gu' che'npe' Diox por ngulàa Xpii Natú' loo gu'. Ngulàa Xpii Natú' loo gu' no mbyan' Xpii Natú' loo gu' xal thib señ co' nda' cuent le' gu' nac che'npe' Diox. <sup>14</sup> Xpii Natú' nac xal thib prend co' nque ten na'. Xpii Natú' ndlu' loo na' nac na' che'npe' Diox axta co'se' zin huiz co'se' gàc che'n na' con' co' angta' Diox càa na' co'se' ngolo gunèe Diox mdyalle' mèn co' mdyal ngòo loo cón che'n Diox, mèn co' gàc che'npe' Diox, par tolo gàc con' guryath no con' guryèn loo Diox por cón che'n con' roo con' xèn co' nzo la's ya' Diox no co' nzo la's nii Diox.

*Pab nque na'b loo Diox par li Diox tolo gác mèn co' ngola's loo Crist no loo cón che'n Crist.*

<sup>15</sup> Por cona, co'se' mbìnlen xá mod ndxela's gu' loo Tad Jesús no xá mod nque' lezo' gu' ñèe gu' ryete mèn co' ngro xà' loo cón che'n xab izlyo', mèn co' ngòc che'npe' Diox,

<sup>16</sup>indxathlasten mbezen Diox quix Diox loo Diox cón che'n gu' co'se' nte' lezon gu' co'se' mbezen Diox. <sup>17</sup>Ña'ben loo Diox le' Diox xud Tad Jesucrist na', Diox co' nquée xnii tín', tolo li le' gu' tolo gác tín' cón che'n Diox. Mbezen Diox le' Diox li par tolo tyub xnii yéc gu' no par tolo tyub xnii lezo' gu' loo cón che'n Diox láth ngue té'th gu' cón che'n Diox. <sup>18</sup>Ña'ben loo Diox le' Diox li par tyub xnii yéc gu' no par tyub xnii lezo' gu' loo cón che'n Diox par ñee gu' no par non gu' cón che'n con' co' yan' no gu' yilóa, co' nac co' nzi quee lezo' gu', tac ndxela's gu' loo Diox xal mblyá's Diox. Ña'ben loo Diox le' gu' ñee no non gu' cón che'n con' roo con' xèn tín' co' mtan' Diox loo mèn co' ngro xà' loo cón che'n xab izlyo', mèn co' ngòc che'npe' Diox. <sup>19</sup>Ña'ben loo Diox le' Diox li le' gu' ñee no non gu' rye loothe con' co' nac con' roo con' xèn co' nzo la's nii Diox no co' nzo la's ya' Diox co' ndli Diox loo ryete na' co' ndxela's. Ryete con' ndxè' nzo la's nii Diox no la's ya' Diox. <sup>20</sup>Co'se' mbli Diox ngro xban Crist làth mèn nguth, mbli Diox mdub Crist cuat Diox loo bé'. <sup>21</sup>Ngolóa, mdoo Diox Crist loo ryethe co' nde'f di's ñibe', que naca leque yub angl, que naca xpíi ye'rsin' co' ñibe' loo izlyo' ndxè', par ñibe' Crist loo angl no loo xpíi ye'rsin'a xal ñibe' chol gobiern loo mèn. Mdoo Diox Crist loo ryete mèn co' ñibe', no loo ryete mèn co' ndxàp con' la's nii no la's ya', no loo mèn co' nac gobiern, no loo ryete mèn guryath no mèn guryèn co' nxo'f zin' zin' roo. Iante loo mèn co' nziri' le'n tiemp ndxè' ñibe' Crist. Ndxè'leque', ñibe' Crist loo mèn le'n tiemp co' nde nque ndxè', ne. <sup>22</sup>Mbli Diox ngòc nado' rye loothe con' loo Crist co'se' mblec Diox rye loothe con' la's nii Crist no la's ya' Crist par ñibe' Crist loo ryethe con'a. Mnibe' Diox loo Jesús par gác Jesús xa' co' ñibe' loo ryethe mèn co' ndxela's loo Jesús, mèn co' nqueltàa loo cón che'n Diox chol lugar. <sup>23</sup>Sya, mèn co' ndxela's loo Crist Jesús co' nac mèn co' nqueltàa loo cón che'n Diox, mèn na nac xal nac bél'yòo lad mèn co' ñibe' yéc mèn, co' nee di's, Crist nac xa' co' ñibe' loo mèn. Mèn co' nac mèn co' ndxela's loo Crist, mèn na ngue li par tolo tyaa no tolo tyubque' di's cón che'n con' roo con' xèn che'n Crist loo Crist. Leque Crist nac xa' co' ñibe' loo ryethe con'.

## 2

*Di's ndxè' ndlu' anze'f nque' lezo' Diox ñèe Diox mèn. Por cona, mbli Diox lyá' mèn loo con' ryes.*

<sup>1</sup>Crist mbli yòo ban no gu' Diox thidtene yilóa, gu' co' ngòc xal mèn nguth loo cón che'n Diox, co' nee di's, ncuá'n gu' xquin gu' no xtol gu' ndoore' yila's gu' loo Crist, <sup>2</sup>co'se' mque tee ban li gu' ryethe con' co' nac mod co' nac che'n mèn loo izlyo'. No mbli gu' con' co' nac co' gunee lezo' Mebizya, co' nac thib xpíi co' naban loo mbii no co' ñibe' loo mèn loo izlyo'. No ndli Mebizya par angndye'th lezo' mèn par ne'tyubdi'ste mèn loo Diox. <sup>3</sup>Làth mèn na mque tee ban ryete na' póla. Mbli na'i xal ngro' mblyen' lezo' na'. Mbli na' con' ye'rsin' xal gunee lezo' na' xal mnibe' xtùuz na' loo na'. Ale ngòc na' xalque' mèn co' ndli cón che'n co' nac xab izlyo'. Por cona, mzyalque' na'i ngocloo Diox loo na' par tetii Diox na' axta plóthe xalque' ndxecloo Diox loo taamas mèn co'se' tub rez Diox cón che'n mèn na yilóa. <sup>4</sup>Anze'f ndlyat tín' lezo' Diox ñèe Diox mèn. Mastale' ngocloo Diox loo na' póla, ale ndxe'leque', nque' lezo' Diox ñèe Diox na' nalle'. <sup>5</sup>Per mastale' ngòc na' mèn co' mque tee ban xal mèn co' nguth loo cón che'n Diox tac mcua'n na' xquin na' no xtol na', Diox mda' yalnaban cub loo na' par ban no na' Crist. Por angmbli Diox con'a loo na', mblyá' na' loo con' ryes. <sup>6</sup>Por cón che'n Crist, Diox mbli le' na' ngue no yalnaban cub xal mda' Diox yalnaban cub loo Crist co'se' ngro xban Crist. Diox ngue li con' guryath no con' guryèn loo na' trè' xal ngue li Diox con' guryath no con' guryèn loo Crist co' ndub loo bé'. <sup>7</sup>Tataa mbli Diox par lu' Diox loo mèn loo tiemp co' nde nque cón che'n con' ndac co' nac anxle' co' li Diox anggàc loo mèn co'se' tolo li Diox con' ndac loo na' por cón che'n Crist Jesús. <sup>8</sup>Diox mtelá' gu' loo con' ryes co'se' ngolóa's gu' loo Crist. Diox mbli angngòc con' ndaca loo gu'. Con'a inacte cón che'npe' gu'. Ndxè'leque', naca con' ndac co' angmbli Diox loo gu'. <sup>9</sup>Ne' ne' ngli gu' ndxep con' ndac par mtelá' Diox gu' loo con' ryes. Tac chele' gu' tataa ngli, nde's gu' no ngxal' gu'. <sup>10</sup>Diox mbli le' na' nacle'

mèn cub por cón che'n Crist Jesús par xo'f zin' na' zin' ndac. Mbli nab Diox zin'a par que tee li na' zin'a.

*Di's ndxè' ndlu' loo mèn xá mod cue nagàl lezo' mèn loo Diox no xá mod cue mèn rye nda mèn no rye ndye'th mèn làth xtàa mèn por cón che'n Tad Crist.*

<sup>11</sup> Por cona, fte' lezo' gu' xá mod mque tee ban gu' ndoore' yila's gu' loo Crist no loo cón che'n Crist. Ne'ngàcte gu' mèn bin mèn nación Israel co' ndli circuncidar xtàa. Por cona, mbez mèn nación Israel nac mèn nación Israel mèn co' ndxela's loo yalndxela's che'n circuncisión. Le' loo gu' na, mbez mèn nación Israel inacte gu' mèn co' ndxela's loo yalndxela's che'n circuncisión xal ndxela's mènna. <sup>12</sup> Thib' cua'a, gu', ne, ne'nque tee bante loo cón che'n Crist. Tith tith mque tee ban gu' loo cón che'n mèn nación Israel. Ngòc gu' mèn co' inda'de cuent cón che'n conveñ che'n Diox co' mblu' Diox loo mèn nación Israel, con' co' mcàbgòn Diox li Diox loo nu'. Ne' ne' ngàc gu' mèn co' mbe quee lezo' loo Diox. Ndxè'leque', mque tee xà' gu' loo Diox loo izlyo'. <sup>13</sup> Per gu' co' tith tith mque tee ban loo cón che'n Diox thib' cua'a, Diox mbli le' gu' nzi tee ban gax loo Diox nalle' por cón che'n renpe' Crist. Nalle' nac na' che'npe' Crist. <sup>14</sup> Crist ndli nagàl yo lezo' na' loo Diox no cue ban na' rye nda na' no rye ndye'th na' làth xtàa na'. Leque Crist mbli par thidte ngòc xtùuz na' no lezo' na', na' co' nac mèn nación Israel no na' co' inacte mèn nación Israel. Xal mteche mèn thib' ftoò co' ntau' loo mèn, Diox mteche ryete con' co' ngòc xèn no xyàn le'n lezo' mèn nación Israel ñèe mèn nación Israel mèn co' inacte mèn nación Israel. Tataa mbli Diox par mbyu' mbyàlle' lezo' ryete mènna loo cón che'n Diox. <sup>15</sup> Co'se' mque' mènna Crist loo cruz, leque hora mton' Crist yalgyoo no ngolo ngola's co' nac che'n ley co' mxo'f Moisés loo mèn co' mnibe' loo mènna no che'n xley' co' mnibe' loo mènna. No mbli Crist thidte ngòc ryop ned mènna, co' nee di's, ngòc mènna xal thib' con' cub loo Crist. Tataa mbli Diox par mbyu' mbyàl lezo' ryop ned mènna. <sup>16</sup> Tataa mod mbyu' mbyàl lezo' ryop ned mènna loo Diox por cón che'n con' co' ngòc loo Crist loo cruz. Tataa mod mbli Diox par ngòp ryop ned mènna thidte xtùuz no thidte lezo', co' nee di's, ngòc mènna thib' nedte mèn xal nac lad mèn thidte con'. <sup>17</sup> Mbi'th lu' Crist di's co' nac di's ndac loo gu' par cue ban gu' rye nda gu' no rye ndye'th gu', gu' co' ngure ban tith loo Diox thib' cua'a no loo mèn nación Israel co' más gax ngure loo cón che'n Diox thib' cua'a. <sup>18</sup> Por cón che'n ryethe con' co' ngòc loo Crist, ngue no thib' na' no tedib na' mod par bii gax na', na' co' ngòc ryop ned mènna, loo Diox xud na' por cón che'n thidte Xpii Natú' che'n xud na' Diox. <sup>19</sup> Tataa mod inacte gu' mèn tith. Ne' ne' inac gu' xal mèn co' nzi tee chol làaz mèn. Ndxè'leque', nac gu' mèn gulàaz con mèn co' ngro xà' loo cón che'n xab izlyo', mèn co' ngòc che'npe' Diox. Nac gu' mèn guliz che'npe' Diox. <sup>20</sup> Nac gu' mèn co' mbryoo mxyèn loo di's ndac che'n Crist co' mblu' myen' xin' mté'th Crist co' mtel' Crist no mèn co' mde'th di's co' ndxab Diox loo gu'. Leque yub Jesucrist nac cón che'n con' ndxè' xal thib' quèe cuadr co' ndyub squin ftoò liz mèn. <sup>21</sup> Por cón che'n Crist co' nac xal quèe squadra, ryete na' co' ndxela's loo Crist, nac na' xal thib' yòocal co' ngue xít té'f ndac mèn, co' nee di's, nac na' xal thib' liz Diox natú' loo Tad Crist. <sup>22</sup> Por cón che'n Crist, gu' nzi roo nzi xèn loo Diox xal thib' yòocal co' ngue xít té'f mèn par gac gu' xal thib' lizpe' Diox co'te' yòo ban Xpii che'n Diox co' nac yub Diox.

### 3

*Pab ngue lu' loo mèn le' Diox mxo'f zin' cón che'n di's ndac loo Pab par lu' Pab no te'th Pab cón che'n di's ndac ndxè' loo alux mèn co' inacte mèn nación Israel.*

<sup>1</sup> Por cón che'n Jesucrist no por cón che'n di's ndac co' ngon yalban loo gu' mèn Efes, gu' co' inacte mèn nación Israel, daa, Pab ngue lezi'f. Mbezen Diox cón che'n gu' par gac con' ndac loo gu'. <sup>2</sup> Naquin le' gu' non le' por nac Diox thib' Diox ndac, mtan' Diox di's loon no mxo'f zin' Diox thib' zin' loon. Pues zin' co' mxo'f zin' Diox loon ndxè' nac le' daa go yalbàn cón che'n di's ndac loo gu'. <sup>3</sup> Hui' gu' nexa. Diox mxo'f loo cón che'n Diox co' nzo casloo loo Diox loon no mblu' Diox cón che'n Diox loon co' nac di's co' xax xax ngue tan cuent loo gu' loo cart ndxè'. <sup>4</sup> Làth ngue lab gu' cart ndxè' co'te' mtlon mque'en

ye's no axta trè', ta' gu' cuent co' huenleque' le' daa naneeque' no ndxác daa ndan cuent cón che'n Crist co' nzo casloo loo mèn. <sup>5</sup> Cón che'n Crist co' ngo casloo póla, ne'nda'de Diox lugar ngro xo'fa loo mèn póla xal mxyo'f looi loo mèn nalle'. Per le'n tiemp ndxè' mxo'f loo Xpii Natú' che'n Diox con'a loo mèn co' ngro xà' loo cón che'n xab izlyo', mèn co' mtel' Diox, mèn co' ndxe' di's cón che'n Crist no mèn co' mde'th di's co' ndxab Diox. <sup>6</sup> Con' ndxè' nac co' mcasloo Diox loo mèn ndoore': Le' mèn co' inacte mèn nación Israel thidte nac con mèn nación Israel loo Crist no loo cón che'n Crist. Càaya'que' mèn co' inacte mèn nación Israel con' co' mcàbgòn Diox ta' la's Diox par càa mèn nación Israel por cón che'n Crist xal ndlu' di's ndac loo na'. <sup>7</sup> Mastale' indxàalte daa ñibe' Diox loon, Diox mdoo daa loo zin' ndxè' par gon yalbàn cón che'n Diox. Por cón che'n thib con' co' mbli Diox co' ngòc con' roo con' xèn co' angmbli Diox ngòc loon co'se' mnibe' Diox loon, lin zin' ndxè'. <sup>8</sup> Daa, Pab, ndyaquen nac daa thib mbi' co' yende cón ntac làth rye mèn co' ngro xà' loo cón che'n xab izlyo', mèn co' ngòc che'npe' Diox. Ale le'le' loon angmbli Diox con' ndxè' par ga lu'en no par ga tethen cón che'n di's ndac loo mèn co' inacte mèn nación Israel. Mnibe' Diox loon ga lu'en loo mèn cón che'n ryethe con' ndac tín' co' ndli Crist loo mèn, co' nee di's, nec thib mod no nec tedib mod ne'ta'de mèn cuent cón che'n ryethe con' ndac co' ndli Crist loo mèn. <sup>9</sup> Diox co' mtocua' ryethe con' co' nzi loo izlyo', Diox mxo'f zin' zin' loon. No ndoo Diox daa loo mèn par lu'en loo ryete mèn ryete con' co' nac cón che'n Crist. Nalle' ngue go xo'f Diox xtùuz co' mbli Diox xtùuz cón che'n ryop ned mèn, mèn co' nac mèn nación Israel no mèn co' inacte mèn nación Israel, cón che'n con' co' ngo casloo loo Diox axta pólle'a. <sup>10</sup> Tataa mbli Diox por cón che'n mèn co' ndxela's par lu' Diox ryethe con' co' ndxác Diox loo angl co' nzo loo bé'. Angla ndxàp con' la's nii angl no la's ya' angl par non angl le' Diox ndxác li rye loothe con'. <sup>11</sup> Diox mbli con' ndxè' loo Crist xalque' mblo xnee Diox no mblobe' lezo' Diox ndoore' cuec Diox chol con' co' mtocua' Diox par ngòca loo Tad Crist Jesús na' xalque' gunee lezo' Diox. <sup>12</sup> Por cón che'n Crist, yende cón cuee ca' loo na'. Con dibaxla's yòo na' loo cón che'n Diox tac ndxela's na' loo Crist. <sup>13</sup> Por cona, ngue niin loo gu' loo cart ndxè' no ña'ben loo gu': Ne'tyoo xà'de lezo' gu' por cón che'n yalndyub ngu's co' ndxác loon. Tac por cón che'n con' co' ndxác loon ndxè', le'i ndxác loon par gác con' guryath no con' guryèn loo gu' par nedrè'.

*Di's ndxè' ngue lu' loo mèn xá mod susque' nque' lezo' Crist ñèe Crist mèn.*

<sup>14</sup> Por cón che'n con' co' ndxác loon ndxè', ndyub xiben loo Diox co' nac xud Tad Jesucrist na' par mbezen Diox. <sup>15</sup> Diox mda' lèe loo ryete nación, no famil, no loo ryethe con' co' nzo loo bé', no loo ryethe con' co' nziri' loo izlyo'. <sup>16</sup> Mbezen Diox por cón che'n ryethe con' roo con' xèn che'n Diox le' Diox li con' loo gu' par gác gu' mèn co' ndxòo valor tín' loo por cón che'n Xpii Natú' che'n Diox. <sup>17</sup> Crist nzo ban le'n lezo' gu' no le'n xtùuz gu' tac ndxela's gu' loo Crist. Por cona, mbezen Diox le' gu' thidtene li nèe lezo' gu' no xtùuz gu' par gác gu' mèn co' anze'f nque' lezo' Diox. <sup>18</sup> Le' sya, gác gu' mèn co' ta' cuent no mèn co' ndxòn con ryete mèn co' ngro xà' loo cón che'n xab izlyo', mèn co' ngòc che'npe' Diox, par ñee gu' no ta' gu' cuent susque' arid nque' lezo' Crist ñèe Crist alux mèn loo izlyo'. <sup>19</sup> Mbezen Diox le' gu' ta' cuent no ñee gu' xal nac mod roo mod xèn co' anze'f nque' lezo' Crist ñèe Crist mèn. Mod co' nque' lezo' Crist ñèe Crist na', axta ne' ne' inda' mèn cuent cón che'n moda. Mbezen Diox tolo gác gu' mèn ndac xalque' nac Diox Diox ndac.

<sup>20</sup> No nalle', gab na' Diox roo Diox xèn nac Diox tac ante Diox ndxàp con' la's nii Diox no la's ya' Diox par li Diox gác ryethe con' co' ña'b na' no co' ndli na' xtùuz. Gàca loo na' por cón che'n con' co' nzo la's nii Diox no la's ya' Diox co' ndli Diox zin' loo na'. <sup>21</sup> Ndlyazen le' loo Tad Diox gác con' roo no con' xèn por cón che'n mèn co' ndxela's, mèn co' nqueltàa loo Diox chol lugar, no por cón che'n Crist Jesús, ne. Gàca le'n lín' co' ntlo, no le'n lín' co' ndxeloo, no le'n lín' co' ne'lith node. Taandxè' gàca.

## 4

*Di's ndxè' ndlu' xá mod thidte ndxàc mèn co' ndxela's loo Crist por cón che'n Xpii Natú'.*

<sup>1</sup> Daa Pab co' ngue lezi'f por cón che'n Tad Crist, ña'ben loo gu': Fque tee ban gu' xal ndxàal li mèn, mèn co' Diox mblec loo cón che'n Diox xalque' mcui Diox gu'. <sup>2</sup> Gòc gu' mèn nado' co' indye'ste. Fque' lezo' gu' gunèe gu' hues xtàa gu'. Gòc gu' mèn co' ncha'la's. No gòp gu' mod con mèn co' nac hues xtàa gu' xalque' mèn co' nque' lezo' ñèe hues xtàa mèn. <sup>3</sup> Bli gu' fuerz par thidte que tee ban gu' xal ñibe' Xpii Natú' che'n Diox loo gu'. Fque tee ban gu' rye nda gu' no rye ndye'th gu' no par thidte gác gu' loo Diox. <sup>4</sup> Tac mèn co' ndxela's loo Crist no loo cón che'n Crist, mènna thidte ngòc loo Diox xal thidte ladpe' Crist. Thidte Xpii Natú' che'npe' Diox nzo. Lomisque' ne, loo thidte con' nzi quee lezo' na', con' co' li Diox loo na', co' nee di's, con' co' mbli nable' Diox gác loo na' yiloo. <sup>5</sup> Thidte Tad Diox nzo. Thidte yalndxela's nzo. Thidte bautism nzo. <sup>6</sup> Lomisque', nzo thidte Diox co' nac xud na' co' ñibe' loo alux con' co' nziri'. Ndli Diox zin' loo ryethe con'a. Nzoque' Diox le'n lezo' ryete na', ne.

<sup>7</sup> Mbli Diox loo thib thib na' ndxác na' li na' con' xal ndlya's Diox gác na' par ta' na' cuent loo xtàa na' cón che'n di's ndac xal mblya's Crist. <sup>8</sup> Por cona, mbez loo libr co' nac xti's Diox cón che'n Crist:

Co'se' mquée Crist gáp loo bé', mbe' Crist thib baan mèn co' ngòc xal pres. No angmda'la's Crist con' ndac loo mènna.

<sup>9</sup> ¿Cón nee di's nguáp Crist loo bé', à'? Con'a nee di's ner ngulàa Crist le'n thib ye'r co' anze'f na's co' nac axta xàn' le'n izlyo'. <sup>10</sup> Crist co' ngulàa le'n izlyo', leque yub Crist nac xa' co' mquée gáp loo bé' yiloo par hui' loo Crist ryethe con' co' ñibe' Crist loo bé'. <sup>11</sup> Leque yub Crist mbli angngòc con' ndac loo mèn. Crist angmbli le' ndxep mèn ngòc mèn co' mtel' Crist, co' ndxe' di's cón che'n Crist. Angmbli Crist le' taamas mèn ngòc mèn co' nde'th di's co' ndxab Diox. Angmbli Crist le' taamas mèn mblo yalbàn che'n di's ndac. Angmbli Crist le' taamas mèn ngòc pastor loo mèn. Angmbli Crist le' taamas mèn ngòc maistr co' ndlu' cón che'n Crist loo mèn. <sup>12</sup> Tataa mod mbli Diox le' mènna lu' loo ryete mèn co' ngro xà' loo cón che'n xab izlyo', mèn co' ngòc che'npe' Diox. Tataa mbli Diox par xo'f zin' mèn co' ngro xà' loo cón che'n xab izlyo', mèn co' ngòc che'npe' Diox, zin' co' nac rsin'pe' Diox. Mènna mxo'f zin' zin'a par tolo té'th mèn par tyubdi's ndac mèn loo Crist, co' nee di's, mèn co' nac loo Crist xal ladpe' Crist. <sup>13</sup> Mènna toloque' lu' loo mèn co' ngro xà' loo cón che'n xab izlyo', mèn co' ngòc che'npe' Diox, axtaque' thidte gác na' loo yalxla's co' ndxàp na' loo Crist no axtaque' ñee na' no non na' ryethe con' cón che'n Crist co' nac xgan'pe' Diox. No tolo té'th na' cón che'n Diox par tyubdi's na' loo cón che'n Crist axtaque' gác na' mèn co' nac xalque' nac Crist. <sup>14</sup> Chele'i taandxè' mod ndxàc loo na', ne'gàcte na' xal myen' bix co' ndli xtùuz chol con'. Ne' ne' gác na' xal yix co' ndxe' mbii pál co'te' nxyo'f mbii loo cón che'n chol xley' mèn. Ndxàc loo ndxep mèn por xquin che'n chol mèn co' mcua'n mod, par nquedi mèn mènna no nabe's ntoxcua' mènna yalgutyè' par quedi mèn mènna. <sup>15</sup> Más huen gàca tyoodi's na' ante con' co' nac lìcpe' láth tolo que' lezo' na' ñèe na' hues xtàa na'. Tolo té'th ndac na' par tolo tyubdi's ndac na' loo ryete con' che'npe' Crist co' ñibe' loo na'. Ñibe'pe' Crist loo na' xal ñibe' yécpe' na' loo na'. <sup>16</sup> Loo cón che'n Crist nac na', co' nee di's, nac na' xal ladpe' Crist. Lada natoxcua'. Nac lada xal thib con' co' huen natedó', co' nee di's, nayal' lada. Tac ryete lugar co'te' nayal' lad mèn nda' fuerz loo lad mèn. No thib thib lugar che'n lada ndli thib zin' co' ndlyath no loo dib lad par li lada zin'. Tataa mod, ne, lyath no na' hues xtàa na' no que' lezo' na' ñèe na' hues xtàa na' par tolo té'th na' par tyubdi's na' loo cón che'n Crist.

*Pab ngue te'th no ngue lu' Pab cón che'n yalnaban cub co' ndxàc loo mèn co' ndxela's loo Crist.*

<sup>17</sup> Con' ndxè' niin loo gu', tá, no tolo ñibe'en loo gu' por lèe che'n Tad: Ya ne'tolode que tee ban gu' xal taamas mèn co' indlibe'de Diox. Tac ngue que tee ban mènna xal nee lezo' mènna loo co' nac xtùuz mèn co' intacte. <sup>18</sup> ¡Prob mènna izlyo'! tac nacua' yéc mènna



no nacua lezo' mènà. No indxàpte mènà yalnaban co' nac yalnaban co' ndli Diox que no mèn tac anze'f naxèn mènà no anze'f nachol' mènà tac naad no nguud lezo' mènà. <sup>19</sup> ¡Prob mènà izlyo! tac leque mènà mbli par mdyuhuan yob yéc mènà por inthyonte mènà. No leque mènà ngulàa loo chol con' ye'rsin' co' ndyub yo'f lezo' mènà li mènà. No axta con gust ndli mènà ryethe con' ye'rsin' no con' zab tac tataa mblyas mènà li mènà. <sup>20</sup> Per ndxe'leque', gu' ne'nté'thte cón che'n Crist tataa, ¿lé? <sup>21</sup> Chele' gu', licque', mbìn di's cón che'n Crist, mté'thque' gu' co' nac cón che'n Crist xal nac Crist licpe' no co' nac con' licpe' co' nzo loo Crist, ¿lé? <sup>22</sup> Le' cón che'n mod ye'rsin' co' ngòc mod co' mque tee ban gu' thib cua'a na, blá' gu' ryete mod gox ye'rsin' co' nac mod cap co' mquedi gu' thib cua'a loo cón che'n xab izlyo'. Loo yalnaban co' mban gu' co' ngòc co' nduhua nee lezo' gu', nac co' angnquedi mèn loo izlyo' ndxè'. <sup>23</sup> Per nalle' naquin gac gu' xal mèn cub loo con' co' ndli gu' xtùuz no loo con' co' nden' gu' le'n lezo' gu'. <sup>24</sup> Gòc gu' xal mèn cub loo mod co' nzi ban gu' nalle' le' gu' nac mèn cub tac Diox mbli nacque' gu' mèn cub. Por cona, fque tee ban lu' gu' loo mèn le' gu', licque', nzi tee ban lique' no namblique' nzi tee ban gu' loo Diox.

<sup>25</sup> Por cona, ngue niin loo gu': Ne'toxcua'de gu' yalgutyè'. Ndxè'leque', ftoodi's thib thib gu' con hues xtàa gu' ante co' nac con' licpe' tac ryete na' thidte nac loo Crist no loo cón che'n Crist xal thidte ladpe' Crist.

<sup>26</sup> Chele' gu' yecloo, ne'ta'de gu' lugar cua'n gu' xtol gu' látha. Ne' ne' co gu' xyàn lezo' gu' nen tiemp ñèe gu' hues xtàa gu'. <sup>27</sup> Ne' ne' ta' gu' lugar cobyas Mebizya gu' thidtene.

<sup>28</sup> Gu' co' mbli huan' thib cua'a, ya ne'tolode li huan' gu'. Ndxè'leque', bli gu' zin' con ya'pe' gu' co' nac zin' ndac par que no gu' con' ta' gu' anxle' loo hues xtàa gu' co' naquin con'.

<sup>29</sup> Ne'tyoodi'ste gu' nec thib di's zab. Ndxè'leque', ftoodi's gu' di's ndac par tataa mod lyath no gu' hues xtàa gu' no par li nèe hues xtàa gu' lezo' hues xtàa gu' loo cón che'n Diox co'se' ndxòn hues xtàa gu' di's co' ndyoodi's gu'. <sup>30</sup> Ne'texide gu' lezo' Xpii Natú' che'n Diox. Xpii Natú' ngue ten gu' par nac gu' xal mèn co' ngue sell lad gu' par ndxàc be' gu' axta zin huiz co' gac huiz co'se', sin falt, telá' Diox na' loo ryethe con' ryes thidtene.

<sup>31</sup> Biiche xà' gu' loo ryethe con' co' nac xèn xyàn, no loo ryethe con' co' nac ayen di's ayen cuent co'se' ngyoo gu', no cón che'n co'se' ndxòo xyàn lezo' mèn, no ryethe con' co' nac con' ye'rsin'. Ryethe con' ndxè' nac co' ndli ndyoo xà' lezo' gu' ñèe gu' hues xtàa gu'. <sup>32</sup> Ndxè'leque', gòc gu' mèn ndac co' ndlyat lezo' ñèe thib hues xtàa gu' no tedib hues xtàa gu'. Fteri'th ftecan' gu' xtol thib hues xtàa gu' no tedib hues xtàa gu' co' mbli hues xtàa gu' loo gu' xal mton' Diox xtol gu' por cón che'n Crist.

## 5

*Di's ndxè' ngue lu' cón che'n xá mod ndxàal que tee ban mèn co' nac xin'pe' Diox.*

<sup>1</sup> Gu' co' nac xin'pe' Diox co' anze'f nque' lezo' Diox ñèe Diox, bli gu' con' ndac loo hues xtàa gu' xal ndli Diox con' ndac loo mèn. <sup>2</sup> Tolo gòc gu' mèn co' nque'que' lezo' ñèe hues xtàa xalque' nque' lezo' Crist ñèe Crist na'. Crist mda' lugar loo mèn par mbeth mèn Crist. Tataa mbli Crist por cón che'n na'. Tataa mod mbli Crist co' mblyas Diox. Mdyac lezo' Diox loo cón che'n Crist co'se' nguth Crist.

<sup>3</sup> Ne'gàcte gu' xal mèn co' ncuana' xin' huan. Ne' ne' gac gu' mèn co' nqueli'th no co' ndxàn lezo' ñèe hues xtàa. Ne' ne' yath yèn con' ye'rsin' ndxè' làth gu'. Ndxè'leque', fque tee ban gu' xalque' ndxàal que tee ban mèn co' ngro xà' loo cón che'n xab izlyo' co' ngòc che'npe' Diox. <sup>4</sup> Ne'tyoodi'ste gu' di's zab. Ne' ne' tyoodi's gu' di's co' ndyoodi's mèn naad. Ne' ne' tyoodi's gu' di's cap co' nac yalguyith co' indxàalte. Ndxè'leque', guuz gu' loo Diox: Diox quix U', Diox. <sup>5</sup> Gu' nanee licpe' nac con' ndxè' tac nec thib mèn co' ncuana' xin' huan, nec thib mèn co' nac mèn xin no mèn cap, nec thib mèn co' nqueli'th cón che'n hues xtàa mèn, co' nee di's, mèn co' lalque' nac xal mèn co' ndyub xib no co' ncòo' yéc no co' nsál' ya' loo mdo' no loo chol gunab, nec thib mènà ne'gac che'n te con' co' ta' Diox loo mèn co'te' ñibe' Crist no Diox. <sup>6</sup> Ne'ta'de gu' lugar quedi chol mèn gu'

con di's co' yende cón ntac tac por cón che'n ryete con' ye'rsin' ndxè' ndxecloo Diox ñèe Diox mèn co' indyubdi'ste loo Diox. <sup>7</sup> Ne'queltàa node gu' mènà par li gu' xal ndli mènà.

<sup>8</sup> Thib' cua'a ngòc gu' mèn co' nau' loo no co' nau' yéc. Per nalle' nac gu' mèn co' nduble' xnii yéc no co' nduble' xnii lezo' loo Tad Crist. Fque tee ban gu' xal mèn co' mbyà'xle' xnii yéc no co' mbyà'xle' xnii lezo', ndee gu'. <sup>9</sup> Tac con' co' ndli Xpii Natú' che'n Diox loo na' ncàb ndxàc con' ndac, no con' nalì, no con' lìcpe' loo na'. <sup>10</sup> Fté'th gu' li gu' ryete con' ndac co' ndxòo lezo' Tad Crist li gu'. <sup>11</sup> Ne' ne' ye'th lezo' gu' li gu' chol con' co' yende cón ntac xal ndli mèn co' alithe nzi que tee ban loo izlyo', mèn co' nau' loo no mèn co' nau' yéc. Ndxè'leque', más huen fta' gu' cuent loo mèn chó con' nac con' anxle' par non mèn cón che'n con'a. <sup>12</sup> Tac ryethe con' co' xexte ndli mènà, co'se' gòn taamas mèn con' ndli mènà, ne'lyàa huente con' ndli mènà lezo' mènà. Ale thyon mènà. <sup>13</sup> Per co'se' mco'xle' mèn loo hues xtàa mèn cón che'n ryete con' ye'rsin' co' ndli mènà, ya ngro xo'fla loo xnaa por mda' mènà lugar mduble' xnii yéc mènà no mduble' xnii lezo' mènà. Tac cón che'n di's ndac ndli ndryo xo'f cón che'n con' ye'rsin' co' ndli mèn loo xnaa. <sup>14</sup> Por cona, mbez mèn póla:

Blo' gu' mcal' loo gu', gu' co' ndxàt. Goo che gu' làth mèn nguth. Crist li par tyub xnii yéc gu' no par tyub xnii lezo' gu' loo cón che'n Diox, ey.

<sup>15</sup> Anderhuen gu'. Leque gu' bla's loo gu', tá, xá mod nzi tee ban gu'. Ne'que tee bante gu' xal mèn naad no xal mèn nguud. Ndxè'leque', fque tee ban gu' xal mèn co' ndxác. <sup>16</sup> Ne'cuedte gu' no ne'lá'de gu' par ne'tolode li gu' con' ndac co' ngue li gu' tac tiemp ndxè' nac tiemp ye'rsin'. <sup>17</sup> Por cona, ne'gàcte gu' arid mèn naxèn. Ndxè'leque', gòc gu' mèn co' nda' cuent no mèn co' non co' nac co' nee lezo' Tad Crist. <sup>18</sup> Ne' ne' que tee tuuz gu' tac loo con'a ndxeza' mèn no ndlyux mèn. Ndxè'leque', gòc gu' mèn co' ta' lugar ante ñibe' Xpii Natú' loo gu' xal nee lezo' Xpii Natú'. <sup>19</sup> Ftodi's gu' loo thib' xtàa gu' no loo tedib' xtàa gu' xal ndlu' di's co' nac xti's Diox co' nac libr che'n salmos no con' himn co' ndxol' ro gu' co' nac cón che'n co' ndlu' Xpii Natú' loo gu'. Gol' ro gu' con' roo no con' xèn no con' guryath no con' guryèn loo mèn cón che'n Tad Diox dib' nzo yéc gu' no dib' nzo lezo' gu'. <sup>20</sup> Por lèe che'n Tad Jesucrist na', tolo gab gu' Diox quix U', Tad Diox, cón che'n ryete con' loo Tad Diox xud na'.

*Di's ndxè' ngue lu' xá mod gáp mèn mod loo mèn guliz mèn, mèn co' ndxela's loo Crist.*

<sup>21</sup> Gòc gu' mèn co' ndyubdi's no mèn co' ndxòn ro thib' hues xtàa gu' no ro tedib' hues xtàa gu' por cón che'n Diox tac gu' ndxònque' ro Diox no ndxàp gu' mod loo Diox.

<sup>22</sup> Mèngot, gu' co' ngue no xin' sa'l, bìn gu' ro xin' sa'lpe' gu' xal ndxòn gu' ro Tad Crist. <sup>23</sup> Tac xin' sa'l gu' nac gundan loo gu' xalque' nac Crist gundan co' ñibe' loo mèn co' ndxela's, mèn co' nqueltàa loo cón che'n Diox. Crist ntelá' mèn co' ndxela's loo cón che'n Diox por cón che'n Crist loo con' ryes. Mènà nac xal ladpe' Crist. <sup>24</sup> Texal naquin ndyubdi's mèn no ndxòn mèn di's che'n Crist, mèn co' ndxela's loo cón che'n Diox por cón che'n Crist, tataaguè' ne, ryete mèngot co' nac xin' sa'l ndxàal tyubdi's loo xin' sa'l co' nac sa'lbi' che'n sa'lgotà loo ryete con' co' ñibe' sa'lbi' loo sa'lgot. Li sa'lgotà xal ñibe' sa'lbi'i.

<sup>25</sup> Lomisque', ngue niin loo gu', ne, gu' co' nac mènbi' co' nac xin' sa'l sa'lgot: Fque' lezo' gu' gunèe gu' xin' sa'lgot gu'. No bli gu' cas xin' sa'l gu' xalque' nque' lezo' Crist ñèe Crist ryete mèn co' ndxela's loo Crist no co' thidte nqueltàa loo cón che'n Crist. Fte' lezo' gu' le' Crist nque'que' lezo' ñèe Crist mèn axta mda' Crist lugar mquée yalguth loo Crist por cón che'n mèn co' ndxela's loo Crist. <sup>26</sup> Co'se' ngolo mbin mèn cón che'n di's ndac no ngola's mèn di's co' nac di's ndaca, co' nee di's, ngola's mènà loo Crist, sya, ngòc bautizar mèn le'n nít. Tataa mod mtebii Crist mènà xal ntech mèn trast zab par co' xà' Crist mèn co' ndxela's co' nqueltàa loo cón che'n Diox loo cón che'n xab izlyo' par gác mènà che'npe' Diox. <sup>27</sup> Con'a mbli Crist par leque yub Crist lu' mèn co' ndxela's loo Diox por cón che'n Crist xal thib' con' co' nquée xnii loo Diox por cón che'n Crist. Lya's Crist le' mèn co' ndxela's, co' ngòo loo cón che'n Diox, ne'gàpte nec thib' con' co' nac con' xin' no con' cap no nec thib' con' co' lal nac xal con' xin' no con' cap. Ndxè'leque', lya's Crist

gàc mèn co' ndxela's loo cón che'n Diox por cón che'n Crist, mèn co', licque', ngro xà' loo cón che'n xab izlyo' co' ngòc che'npe' Diox, mèn co' ngòcque' mèn nambii no mèn nalì loo Diox. <sup>28</sup> Tataaguè' ne, sa'lbi' ndxàal quenap sa'lgotpe' sa'lbi' xalque' ngue lezo' sa'lbi' ñèe sa'lbi' leque ladpe' sa'lbi'. Co'se' nquenap mèn xin' sa'lgot, naca xal co'se' leque mèn ngue lezo' ñèe mèn mèn. <sup>29</sup> Yende chó mèn nzo co' alithe ndxecloo ñèe lad no co' indyóode cón che'n ladpe' mèn, ¿lé'? Ndxè'leque', leque mènà ndli par nquenap mènà leque mèn. No nguàa leque mèn mèn. Crist, ne, nquenap mèn co' ndxela's loo Diox por cón che'n Crist. <sup>30</sup> Nac na' co' ndxela's loo Diox por cón che'n Crist loo cón che'n Crist xal ladpe' Crist, co' nee di's, co' nacpe' bél' ladpe' Crist no sith ladpe' Crist no ren ladpe' Crist. <sup>31</sup> Por cona, ndlá' thib mbyòò xud mbyòò no xna' mbyòò par tyub no mbyòò thib mza'. Le' sya, ryop mbyòò mza'a ngòc thidte xtàa co' mdyoo dó'. <sup>32</sup> Con' ndxè' nac thib con' roo no thib con' xèn co' nzo casloo co' tarte ryo xo'f loo mèn. No cón che'n con' ndxè' nac cón che'n Crist co' ngue toodizen loo gu'. Lomisque' ne, naca cón che'n mèn co' nqueltàa loo cón che'n Crist chol lugar. <sup>33</sup> Per thib thib gu' co' nac xin' sa'lbi', leque gu' quenap xin' sa'lgot gu' xalque' ngue lezo' gu' ñèe gu' gu'. Xin' sa'lgot, gòp gu' mod loo xin' sa'lbi'pe' co' nac sa'l sa'lgota, ne.

## 6

<sup>1</sup> Lomisque', niin loo gu', myen', gu' co' nac xin' xud gu' no xin' xna' gu': Ftubdi's gu' loo xud gu' no loo xna' gu' tac gu' nac myen' co' nzo loo cón che'n Crist. Nalì no nambii nac con' ndxè' loo Diox. <sup>2</sup> Bli gu' con' guryath no con' guryèn loo xud gu' no loo xna' gu'. Tac chele' gu' li con' ndxè' co' nac ner yalnibe' co' mnibe' Moisés loo mèn co' mcàbgòn Diox càba con' ndac loo mèn, cona nee di's, <sup>3</sup> xyal' ned xyal' yó' loo gu' par cua'n gu' co' hua gu' no co' gu' gu' no tyac lezo' gu' láth ban gu' huax lín' loo izlyo' ndxè'. <sup>4</sup> Le' gu' co' nac gundan ted gundan yín' loo xin' gu' na, ne'ta'de gu' xyàn lezo' xin' gu' par yecloo xin' gu' no par tyoo xà' lezo' xin' gu' loo mod co' ndxela's gu' loo Diox. Ndxè'leque', no no ftoodi's no gu' xin' gu' nado' di's no nado' cuent par té'th xin' gu' ñibe' xin' gu' loo lezo' xin' gu' no loo xtùuz xin' gu'. Blu' gu' xin' gu' par tyubdi's xin' gu' loo cón che'n Tad Crist, ne.

<sup>5</sup> Gu' co' nac moz, ne, ftubdi's gu' loo patrón gu' no bìn gu' ro patrón gu' co' ñibe' patrón loo gu' loo izlyo' ndxè'. Bli gu' cas patrón gu'. No gòp gu' mod gunèe gu' patrón gu' dib nzo yéc gu' no dib nzo lezo' gu' xalque' ndyubdi's gu' loo Crist. <sup>6</sup> Ne'gàcte gu' xal moz co' ndli zin' ante co'se' ndoo naa patrón loo moz par tataa mod güin moz loo zin'. Ndxè'leque', gòc gu' xal moz co' nxo'f zin' cón che'n Crist. Bli gu' zin' dib nzo yéc gu' no dib nzo lezo' gu' xal mèn co' ndyé'th lezo' loo co' ñibe' Diox. <sup>7</sup> Gu' co' nac moz, bli gu' zin' dib nzo yéc gu' no dib nzo lezo' gu' xalque' ndli mèn sirv loo Tad Crist. Ne'lide gu' sirv loo xtàa gu' xal ndli chol mèn sirv loo xtàa mèn. <sup>8</sup> Tac gu' naneeque' le' ryete con' ndac co' ndli thib thib na', càaya' na' yalndxax cón che'n con' ndac co' ndli na' co' ta' Tad Crist, que nac na' moz, que nac na' mèn co' yende chó ñibe' loo.

<sup>9</sup> Lomisque', gu' co' nac patrón, ne, tataaque' bli gu' con moz gu'. Ne'tetiixù'de gu' moz gu'. Fte' lezo' gu' le' gu' nonque' le' Tad Diox, co' nzo loo bé', nac patrón che'n ryete na', que nac na' patrón, que nac na' moz. Indlide Tad Diox tyu' thib mèn más leque tedib mèn loo Tad Diox.

*Pab ngue lu' le' xti's Diox co' nac di's natú' nac xal nac chol yi'f co' ntau' solndad lad solndad loo xó' loo mèn co' ndxela's loo Crist.*

<sup>10</sup> Per nalle' con' ndxè' nac lult di's co' ngue niin loo gu', mèn co' nac xal huesen por cón che'n Crist: Leque gu' blo valor loo gu' no bli gu' par ye'th lezo' gu' par tolo queltàa gu' loo Tad Crist no loo cón che'n Tad Crist por cón che'n ryethe con' co' nzo la's nii Tad Crist no la's ya' Tad Crist. <sup>11</sup> Fquenap gu' gu' loo ryethe con' ye'rsin' che'n Mebizya co' ngyoo no mèn. Xal co'se' ntau' solndad lad solndad con thib bloo yi'f loo con' ryes, tataaque' ndlää Diox na' no ntau' Diox na' loo con' ryes no loo con' ye'rsin' co' ndxàc loo na'. <sup>12</sup> Tac ingyooode na' con mèn loo izlyo' ndxè'. Ndxè'leque', na' ngyoo con ryete

xpii ye'rsin' co' nzi tee ban loo mbii. Xpii ye'rsin'a ndxàp con' roo con' xèn la's nii xpïi ye'rsin'a no la's ya' xpïi ye'rsin'a. Ñibe' xpïia loo izlyo' ndxè', co' nee di's, loo mèn co' nac jef roo jef xèn co' ñibe' loo mèn loo izlyo' ndxè'. <sup>13</sup> Por cona, gure nèe gu' no blo gu' valor loo gu' loo cón che'n ryethe con' co' nzo la's nii Diox no con' co' nzo la's ya' Diox xal thib solndad co' ndxoc xab co' nacsua' con yi'f par tau' solndad lad solndad par lyá' solndad loo con' ryes. Tataa bli gu' par ne'tyoo xà'de lezo' gu' no ne'zyebte gu' co'se' cobyá' Mebizya gu' par li Mebizya tyub yo'f lezo' gu' par li gu' con' ye'rsin' le'n huiz co' gác huiz ye'rsin'. Le' co'se' yilo ri'th con' ye'rsin'a loo gu' na, bli gu' par tolo cue nèe gu' loo cón che'n Diox. <sup>14</sup> Tolo bli gu' par cue nèe gu', tá, loo co' nac cón che'n Diox. No que tee ban li gu' con' co' nac licpe'. Tataa gáp gu' fuerz no yòo valor loo gu' co'se' cobyá' Mebizya gu' hora xal ndli thib solndad co'se' ntí' solndad thib cinch le'n solndad par gáp solndad fuerz. Bli nèe gu' gu' loo cón che'n Diox par nalì no nambii que tee ban gu' loo cón che'n Crist par ne'lìde Mebizya gan loo gu' xal co'se' ndxoc thib solndad xab solndad co' nacsua' con yi'f par ne'tehuí'de ngolo ngola's solndad solndad co'se' ndyee solndad loo xó'. <sup>15</sup> Nalas gure gu' no bli nab gu' gu' par ta' gu' cuent no co gu' yalbàn loo mèn cón che'n di's ndac co' li par yo nagàl lezo' mèn que tee ban mèn loo Diox. Tataa bli gu', co' nee di's, nac xal ndli solndad co'se' quej nque' solndad zapat nii solndad par yátbèe solndad ya solndad loo xó'. <sup>16</sup> Más de cona, gola's gu' no gòp gu' yalxla's loo Diox xal ngue niin loo gu' par ne'lìde Mebizya gan loo gu'. Tataa bli gu', co' nee di's, nac xal ndli thib solndad co'se' ntau' solndad lad solndad con thib le' yi'f co' lèe scud láth co'se' ndoo mèn co' nac ngolo ngola's che'n solndad loo solndad con flech, co' ndub quii bèel punt, par lyá' solndad loo con' ryesa. Tataa bli gu' par ne'yizi'fte no ne'yiga'ste con' ye'rsin' loo gu' co' nac con' ndlya's Mebizya gác loo gu'. <sup>17</sup> Bli gu' xtùuz loo ryethe con' cón che'n xá mod mblyá' gu' loo con' ryes par quenap gu' xtùuz gu' xal nquenap solndad yéc solndad con sombrel co' nacsua' con yi'f. Blu' gu' cón che'n xti's Diox loo xtàa gu' xal ndlyath no Xpii Natú' che'n Diox gu'. Tataa mod li gu' gan loo Mebizya xal ndli solndad us thib cuchi par li solndad gan loo mèn co' nac ngolo ngola's che'n solndad. <sup>18</sup> Ftoloque' gurez gu' Diox no bnab gu' ryethe con' naquin gu' loo Diox por cón che'n Xpii Natú'. Ftolo bnab gu' con' loo Diox xal mèn co' nalas nziri' co' nac mèn co' inzode mcal' loo. Ftoloque' gurez gu' Diox por cón che'n ryete mèn co' ngro xà' loo cón che'n xab izlyo' co' ngòc che'npe' Diox. <sup>19</sup> Gurez gu' Diox por daa, ne, par tolo ta' Diox lugar loon par tyoodizen con dibaxla's no lin par yath yèn cón che'n di's ndac co' ngo casloo loo mèn axta póla. <sup>20</sup> Diox mtel' daa par ndalen xal mnibe' Diox loon par tethen cón che'n di's ndac che'n Diox loo mèn. Nalle' por mdethen cón che'n di's ndaca, mque' mèn daa lezi'f. Gurez gu' Diox par daa par yòo valor loon xal ndxàala par gon yalbàn loo mèn con dibaxla's cón che'n di's ndaca.

*Pab ngue nii Diox loo mèn co' ndxela's loo Crist no loo cón che'n Crist.*

<sup>21</sup> Tiquic co' ndxàc hues na' por cón che'n Crist, co' nac mbi' co' anze'f nque' lezo' ñèe na', Tiquic ta' cuent loo gu' par ñee gu' no ta' gu' cuent cón che'n zin' co' mxo'f zin' Diox loon no xal ndxàc ryete con' ndxè' loon. Anze'f altant ndoo Tiquic loo mèn láth nxo'f zin' Tiquic zin' loo mèn cón che'n Tad Crist. <sup>22</sup> Por cón che'n con' ndxè' mtel'en Tiquic loo gu' par ta' Tiquic cuent loo gu' xá nzo nu' par nedrè' no par tegán Tiquic lezo' gu'.

<sup>23</sup> Mbezen Diox no Tad Jesucrist le' Diox li par cue gu' rye nda gu' no rye ndye'th gu'. Gòp gu' yalxla's loo Diox xud na'. Fque' lezo' gu' gunèe gu' xtàa gu' co' nac xal huespe' gu' làth xtàa gu'. <sup>24</sup> Mbezen Diox le' Diox li anggàc con' ndac loo ryete mèn co' nque' lezo' Tad Jesucrist na' con dib nzo yéc mèn no con dib nzo lezo' mèn thidtene. Taandxè' gàca.

## Cart Co' Mque' Pab Ye's Loo Mèn Co' Ngo Ban Le'n Ciuda Filip

*Pab ngue que' ye's loo mèn láth mque' Pab lezi'f, loo mèn co' ndxela's loo Diox por cón che'n Jesucrist, mèn co' ngo ban le'n ciuda Filip.*

<sup>1</sup> Daa, Pab, ngue que' ye's loo gu', mèn che'n ciuda Filip, gu' co' ndxela's loo Diox por cón che'n Tad Crist. Ryop nu' Timote ngue nii Diox loo gu', gu' co' ngro xà' loo cón che'n xab izlyo' par ngòc gu' che'npe' Diox no che'npe' Crist Jesús. Lomisque' tiemp, ngue que'en ye's loo gu' mèn gool, gu' co' ndyoo ner no co' ndyoo naa loo mèn co' ndxela's loo cón che'n Diox. Lomisque', thidte ngue que'en ye's loo gu', gu' co' ndlyath no no co' ndli sirv loo mèn co' ndxela's loo cón che'n Diox por cón che'n Crist Jesús. <sup>2</sup> Ndlyazen le' Diox xud na' no Tad Jesucrist na' tolo li anggàc con' ndac loo gu'. Ndlyazen, ne, le' Diox no Tad Jesucrist na' angli nagàl yo lezo' gu' loo Diox no cue ban gu' rye nda gu' no rye ndye'th gu' làth xtàa gu'.

*Pab ngue na'b loo Diox cón che'n mèn co' ndxela's loo Diox por cón che'n Tad Crist.*

<sup>3</sup> Ryete vez co'se' nte' lezon gu' láth co'se' mbezen Diox, mbezquen Diox quix Diox loo Diox por cón che'n gu'. <sup>4</sup> Ndyac lezon co'se' toloque' mbezen no ña'ben cón che'n ryete gu' loo Diox co'se' mbezen Diox. <sup>5</sup> Naneeque' gu' thidte ngue xo'f zin' na' zin' cón che'n di's ndac. Ndlyath noque' gu' daa axta co'se' ngòc ner huiz co'se' mbin gu' di's co' nac di's ndac. Axta huiza no axta huiz nalze ngue lyath noque' gu' daa. <sup>6</sup> Ndxàpen yalxla's loo Diox le' Diox co' mtlo mxo'f zin' cón che'n zin' ndac ndxè' loo gu', Diox tolo li zin' ndac ndxè' loo gu' axta huiz co'se' gac huiz bere Jesucrist, yi'th xi Jesucrist mèn co' ndxela's loo Jesucrist. Axta syare', ngolo mdyaa zin' ndxè' loo gu'. <sup>7</sup> Ndxàalque' taandxè' lin xtùuz cón che'n ryete gu'. Tac anze'f lezon ngudloon ryete gu'. Diox angngue li con' ndac loo gu' xal ndxàca loon láth ngue'en lezi'f nalle', ne, tac gu' ndlyath no daa loo zin' ndxè'. Que naca ngue'en lezi'f, o que naca toon loo mèn nac zin' co' ñibe', o que naca pàl co'te' nzon, tubquen razon cón che'n di's ndac. No li nèn cón che'n di's ndac ndxè' loo mèn le' cón che'n di's ndac ndxè' nac licpe'. <sup>8</sup> Tac Diox nonque' no naneeque' Diox le' daa nque' lezo' ñèn gu' axta plóthe xalque' nque' lezo' Jesucrist ñèe Jesucrist mèn axta plóthe. <sup>9</sup> Co'se' mbezen Diox, ña'ben cón che'n gu' loo Diox le' gu' tolo que'que' lezo' cón che'n Diox no sate más tolo gac gu' co' nac cón che'n Diox láth ngue té'th gu' cón che'n Diox. Láth ngue té'th gu'a, fteche ftexyath gu' xtùuz gu' cón che'n con' ndac no cón che'n con' ye'rsin'. Làth xtau'a, sate más tolo que' lezo' gu' Diox no que' lezo' gu' ñèe gu' hues xtàa gu'. <sup>10</sup> Mbezen Diox le' gu' tolo gac cui co' nac más con' ndac. Gòc gu' mèn co' dib nzo yéc no mèn co' dib nzo lezo' loo cón che'n Diox. Gòc gu' mèn co' ne'ta'de xyàn lezo' hues xtàa gu' axta co'se' gac huiz co'se' yi'th xi Crist na', na' co' ndxela's loo Crist. <sup>11</sup> Mbezen Diox le' Jesucrist lyath no gu' par que tee ban li gu' par càba yalnaban loo gu' xal thib con' co' ndxas ndxàl loo Diox. Tataa bli gu' par càba xyo'f lèe no xyo'f xti's lèe Diox par gac con' guryath no con' guryèn loo Diox por cón che'n gu'.

*Pab ngue ta' cuent loo mèn ante loo cón che'n Crist ndxòo lezo' Pab naban Pab.*

<sup>12</sup> Gu' co' nac huesen por cón che'n Jesucrist, ndlyasquen le' gu' non no nanee gu' le' cón che'n con' co' ngòc loon, ale ndxe'leque', licque', mcàba más con' ndac loo cón che'n di's ndac par alanleque' tolo yath yèn di's ndaca loo mèn. <sup>13</sup> Ale le'le' más huen ngòca loon par non ryete mèn no mbli la's ryete mèn co' naban palas che'n gobiern no taamas mèn co' naban co'te' nzon ndxè' le' por cón che'n Crist ngue'en lezi'f. <sup>14</sup> Huax mèn co' naban ciuda Rom co'te' ngue'en lezi'f, mèn co' nac hues na' por cón che'n Tad Crist, ale sate más ngò valor loo mèn co'se' mbin mèn le' daa ngue' lezi'f. Ale ne' ne' ngzeb mèn. Alanleque' ngòp mèn yalxla's loo Diox. Ngo mèn yalbàn, ne.



<sup>15</sup> Lìcpe' ba'i, nzo thib ned mèn co' ngo yalbàn con xèn con xyàn. Mèna ndxàn lezo' ñèe mèna daa por cón che'n Crist. Per tedib ned mèn co' nac tedib ned mèn, mèna ngo yalbàn dib nzo yéc mèna no dib nzo lezo' mèna co' nac cón che'n Crist. <sup>16-17</sup> Mbryop ned mèna nde'th cón che'n Crist tac nque' lezo' mèna Diox. Naneeque' mèna no nonque' mèna le' daa ngue' lezi'f tac ncàben loo mèn no nduben razon cón che'n di's ndac. No nalì ndan cuent cón che'n di's ndac loo mèn. Per ndxe'leque', ner ned mèna nde'th cón che'n Crist con xèn con xyàn co' nzo lezo' mèna ñèe mèna daa. Indlide mèna con'a xal mèn co' nambii no nalì ndoo. Ndxè'leque', ndli mèna xtùuz no ncu'a'n mèna mod par tolo tec mèna daa tac ñèe mèna ngue'en lezi'f. <sup>18</sup> Per ¿chó mport nzo lezon cona? Gunee mèna cón tyoodi's mèna cón che'n Crist. Gunee mèna ché' ndyoodi's mèna nalì o ché' ñii yèe ñii tii mèna cón che'n Crist. Conse' ndxath no ndxèn cón che'n Crist làth mèn, ndyac lezon cón che'n mèna.

Toloque' tyac lezon, ne. <sup>19</sup> Tac daa naneeque' no nonque' daa le' con' ndxàc loon ndxè', le'i càb loon le' daa ryo' ndac. Tataa gàca tac gu' mbez Diox cón chenen. Làth xtau'a, Xpii Natú' che'n Jesucrist ngue lyath no daa, ne. <sup>20</sup> Pues con' co' lyazen no con' co' nquee lezon nac: Nec thib mod ne'thyonte daa. Ndxè'leque', lyazen gàca loon le' daa tyoodiz no mèn con dibaxla's cón che'n Crist, que naca càb con' ndac loon, que naca càb con' ryes loon, que naca ban daa, o que naca gath daa, conse' gac con' roo con' xèn loo Crist por cón chenen. <sup>21</sup> Per làth naban daa, ante ndoo lezon nxo'f zin'en cón che'n Crist. Chele' daa gath, ale le'le' más huen gan. <sup>22</sup> Per chele' bél'yòo co' nac laden ndxè' tolo banque' loon, le' sya, toloque' lin zin' cón che'n Crist co' càb loon co' gac con' yas yàl loon. Lìcpe' ba'i, axta ne' ne' ñeen cón ndxàal lin. <sup>23</sup> Per nalle', hui' gu' nexa. Sa niin ndooque' loo gu'. Taasa niin nzole' loo bé'. Thib ndyub yo'f lezon gath bél'yòo laden ndxè' par bii ban non Crist. Cona, gac más con' ndac par daa. <sup>24</sup> Per tediba na, lyazen tolo banque' bél'yòo laden tac ndyaquen naquinque' go non gu' taandxep. <sup>25</sup> No ndxàpen yalxla's loo Diox ndxàalque' yan' non gu'. Por cona, naneequen no nonquen le' daa yan' noque' gu' par tolo té'th gu' no tyub xnii yéc gu' no tyub xnii lezo' gu' loo cón che'n Diox no tyac lezo' gu' loo con' co' ndxela's gu'. <sup>26</sup> Le' sya, co'se' galen loo gu' tedib vez, gab gu' di's roo no di's xèn no di's natú' loo Crist Jesús por cón chenen.

<sup>27</sup> Thib con' no maste ña'ben loo gu': Nabe'ste fque tee ban gu' xal ñibe' xti's Crist loo gu' no xal ndlu' di's ndac che'n Crist loo gu'. Fque tee ban lì gu' par que naca go non gu', que naca tith nzon loo gu', gònquen cón che'n gu' le' gu' thidteneque' mbli nèe lezo' gu' no xtùuz gu' loo thidte co' nac cón che'n Crist. Blo gu' valor loo gu' con thidte xtùuz gu' no con thidte lezo' gu' par li nèe gu' gu' xal ñibe' Diox loo di's ndac co' ndlu' xá mod lyá' mèn loo con' ryes co' ndxela's na'. <sup>28</sup> Ne' ne' la' gu' ze'b chol con' co' nac ngolo ngola's che'n gu' gu'. Tac chele' gu' inzyebte, le'i ndlu' loo mèn co' nac ngolo ngola'sa le' mèna tyuhuan no lyux mèna. Per ndxe'leque', gu' non le'i ndlu' loo na' le' na' mblyá'le' loo con' ryes. Hui' gu' nexa. Diox mbli par ne'zyebte gu'. <sup>29</sup> Por cón che'n Crist, Diox angmbli le' gu' ngola's loo Crist. Non Diox le' co'se' ngola's gu' loo Crist, càba loo gu' le' gu' tyactii por cón che'n Crist, ne. <sup>30</sup> Loo cón che'n Crist nac na' xal solndad co' ndxátbèe par cue yoo no solndad mèn co' nac ngolo ngola's che'n solndad. Cón che'n con'a, nda'que' gu' cuent xá mod mque tee ban daa loo di's ndac xal ndxàca loo solndada. Nalle' gu' nonque' xal ndxàca loon. Ndxàca loon xalque' ndxàca loo solndad co'se' ndxátbèe solndad, nda solndad loo xó'. Tataa ndxàca loon nalle' loo cón che'n di's ndac ndxè'.

## 2

*Di's ndxè' nda' cuent le' Crist ngòc thib mèn be'the no thib mèn nado'. Ngoloa, ngòc con' roo con' xèn loo Crist par ngòp Crist rye loothe con' la's nii Crist no la's ya' Crist.*

<sup>1</sup> Por cón che'n ryete con'a, niin tedib con' loo gu': Chele' Crist ntegánque' lezo' gu' ndxep, no chele' gu' nagálque' nzo lezo' tac non gu' le' Diox nque' lezo' ñee Diox gu', no chele' gu' indlá'ya'de xtàa gu' loo con' co' nde che loo xtàa gu', no nda' gu' ya' gu' loo xtàa gu' loo chol zin' co' ndxòo xtàa gu' tac Xpii Natú' nzo no gu', no chele' gu' nden'que' lezo'

susque' ndlyat lezo' Diox ñèe Diox gu' por cón che'n Crist, <sup>2</sup> tataa bli gu' xal ngue niin loo gu' nalle' par tolo tyac tín' lezon, co' nee di's, thidte ndye'th lezo' na' no thidte ndxác na' co'se' thidte que' lezo' na' ñèe na' hues xtàa na' loo cón che'n Crist. Lomisque', fque' lezo' gu' Diox no fque' lezo' gu' ñèe gu' hues xtàa gu'. Thidte bli gu' yéc gu' no thidte bli gu' lezo' gu'. Thidte ften' gu' cón nac con' ndac làth xtàa gu', ne. <sup>3</sup> Yende cón li gu' par tye's gu' cón che'n gu'. Ne' ne' li gu' chol con' par li gu' gan loo xtàa gu'. Ndxé'leque', gòc gu' mèn nado'. Bli thib thib gu' cas loo hues xtàa gu' axta plóthe xal ndli mèn cas loo thib mbi' co' ndli mèn cuent anze'f ntac. <sup>4</sup> Ne'tyoode lezo' nec thib gu' par quenap gu' ante co' nac che'npe' gu' par gàca con' ndac loo gu'. Ndxé'leque', ftoo lezo' gu' quenap gu' con' co' nac che'n thib hues xtàa gu' no con' co' nac che'n tedib hues xtàa gu' par lyath no gu' hues xtàa gu'a par gàca más con' ndac loo hues xtàa gu'a.

<sup>5</sup> Thidte bli ryete gu' xtùuz xalque' mbli Crist Jesús xtùuz co'se' ndlab gu' xti's Diox no co'se' mbez gu' Diox. Tataaque' bli gu' xtùuz cón che'n thib hues xtàa gu' no cón che'n tedib hues xtàa gu'. <sup>6</sup> Hui' gu' nexa. Por part cón che'n Crist, mastale' dib xoo xá ñaa Diox ñaa Crist, no nac Crist xalque' yub Diox ndoore' mbi'th Crist loo izlyo', no mastale' ngòp Crist con' la's nii Crist no la's ya' Crist par yan' no Crist cón che'npe' Crist loo bé', ne'ngòode lezo' Crist par tolo lalque' ngàc Crist xal yub Diox par ngyan' Crist xal Diox loo bé'. <sup>7</sup> Ale le'le' mblá' Crist con' co' ngòc che'npe' Crist thib lad loo bé'. Ale mbi'th yáal Crist loo izlyo' xal ndxáal chol mbeto' par ngòc Crist xal thib moz co' ndli sirv loo mèn no loo Diox. <sup>8</sup> Co'se' ngòc Crist xal chol mèn co' mbi'th yáal loo izlyo' ndxè', mque tee gue's ya' Crist loo mèn. Ne'nde'ste Crist loo mèn. No por ngòc Crist thib mbi' nado', leque Crist angmbala' par mque' mèn Crist loo cruz mastale' ngòc con'a con' par thyon Crist co'se' nguth Crist loo cruz. <sup>9</sup> Por cona, mbli Diox ngòc más con' guryath no con' guryèn loo Crist. No mbli Diox par mbe' Crist thib lèe, co' nee di's, nac Crist más mbi' roo mbi' xèn leque chol taamas mèn, no angl, no chol con' co' nzo loo bé', no co' nzo loo izlyo'. <sup>10</sup> Tataa mbli Diox par co'se' gòn mèn lèe Crist, tyub xib mèn loo Crist, que naca mèn co' nzo loo bé', que naca angl co' nzo loo bé', que naca mèn co' naban loo izlyo', que naca chol xpíi ye'rsin' co' nzo loo izlyo', que naca xpíi mèn co' nzo ye'rbiil, que naca chol xpíi ye'rsin' co' nzo ye'rbiil. <sup>11</sup> Con'a mbli Diox loo Jesucrist par ta' mèn cuent, no yila's mèn, no gab mèn le' Jesucrist nac yub Tad Diox par tataa mod gàc con' guryath no con' guryèn loo Diox no tolo xyo'f lèe xyo'f xti's Dios co' nac xudpe' Jesucrist loo mèn.

*Di's ndxè' ngue ta' cuent le' ryete mèn co' ndxela's loo Crist nac xal thib xniì co' nteniì loo yál'cuau.*

<sup>12</sup> Por cona, gu' co' nac mèn huesen por cón che'n Jesucrist, gu' co' nque' lezon ñèen, xalque' ndyubdi's gu'a, no iante ndyubdi's gu' loon co'se' ngo non gu'a, per ale ndxe'leque', más ndyubdi's gu' loon nalle' co'se' yende daa loo gu', bli gu' cas loo Diox xal mèn co' nzyeb no xal mèn co' nxi'th lezo' loo Diox. Tolo fxo'f zin' gu' loo cón che'n Diox tac gu' mblyá'le' loo con' ryes. <sup>13</sup> Tac Diox ndli loo gu' le' gu' ndlyasque' li con' ndac xal nee lezo' Diox. Ndlyath no Diox gu' par li gu'i, ne.

<sup>14</sup> Làth ngue li gu' con' ndac co' nee lezo' Diox, ne'co ñeede gu' cón che'n hues xtàa gu' no ne'yoode gu' con' hues xtàa gu'. <sup>15</sup> Ndxé'leque', fque tee ban ndac gu' par ne'quexù'de mèn gu'. Ne'cua'nte gu' xquin gu' làth mèn. Gu' nac xin' Diox. Nonque' gu' le' gu' nzo ban làth bin mèn ye'rsin'. Làth xtau'a, gòc gu' mèn co' nteniì yéc mèn no co' nteniì lezo' mèn xal nteniì huiz no mbe' loo izlyo'. <sup>16</sup> Ndlyazen le' gu' que tee ta' cuent cón che'n di's ndac co' ndlu' loo mèn xá mod lyá' mèn loo con' ryes no gáp mèn yalnaban thidtene. Le' sya, co'se' yi'th xi Crist na', na' co' ndxela's loo Crist, anze'f tyac lezon tac gu' ngure nèe loo cón che'n di's ndac. Sya, mbli lazen ne'nque teeden loo gu' anxle'. Ne' ne' nxo'f zin'en zin' ndxè' loo gu' anxle'. <sup>17</sup> Mastale' gàca loon yi'f yèe daa gath daa, chele' gu' tolo gáp yalxla's loo Diox no tolo li gu' par cue nèe gu' gu' loo cón che'n di's ndac, loo con'a tyac lezon no xyo'f nde' xyo'f ndla' lezon con' ryete gu'. <sup>18</sup> Cona, ndlyazen tyac tín' lezo' gu' par thidte xyo'f nde' no xyo'f ndla' lezo' gu' con' daa. Thiba con' ndxè'.

*Di's ndxè' ngue ta' cuent cón che'n Timote no Epafrodit.*

<sup>19</sup> Le' tediba na, daa ngue bedque' ñeene' xá nac co' nee lezo' Crist cón chenen par, chàa, tel'en Timote loo gu' par ye'th lezon no par tolo tyac lezon co'se' li lazen no non daa máa gu' par nedrè'. <sup>20</sup> Tac yende chó tedib myen' ngue non co' nac xal daa co' nac Timote co' nac thidte lezo' no thidte xtùuz con daa co' ndyóoque' xal daa no co' ndlya'sque' ñee máa gu' par nedrè', xá nzo gu' par nedrè'. <sup>21</sup> Tac taamas mèn co' nqueltàa no daa, ale más ndyóo mèn loo yalgon'pe' mèn leque tyóo mèn loo cón che'n Crist Jesús. <sup>22</sup> Per gu' naneeque' cón che'n Timote, le' Timote anze'f ntaac loon xal thib xgan' gundan co' altant ndyoo loo xud par li xgan' gundan sirv loo gundan. Tataa ngue xo'f zin' Timote con daa loo cón che'n dí's ndac. <sup>23</sup> Por cona, ngue beden xaste tel'en Timote loo gu' co'se' gònen xá nde tee cón chenen par ned nzon ndxè'. <sup>24</sup> Ndxàpen yalxla's loo Crist, chàa, gal neen máa gu' par nedrè', ne.

<sup>25</sup> Per ndyaquen ale, más naquin tel'gàn Epafrodit, co' ndxàc xal hues daa loo cón che'n Crist loo gu'. Epafrodit ndlyath no daa xal thib solndad loo zin' co' ndxàpen. Epafrodit ndxè' nac mbi' co' yub gu' mtel' loon co' ngue li mandad loon le'n lezi'f co'te' nzon. <sup>26</sup> Tac anze'f ndyub yo'f lezo' Epafrodit ñee Epafrodit máa gu'. Anze'f mxi tín' lezo' Epafrodit tac mbin Epafrodit le' gu' mbin le' Epafrodit ngulen liz par ned nzon ndxè'. <sup>27</sup> Lìcpe' ba'i, Epafrodit ngulen lizque' axta yamerle' mtín liz Epafrodit. Per Diox mblyat lezo' gunèe Diox Epafrodit. No iante loo Epafrodit mblyat lezo' Diox gunèe Diox. Ndxè'leque', mblyat lezo' Diox gunèe Diox daa, ne, par ne'tolode ngxi tín' lezon loo cón che'n Epafrodit xal nxi lezon loo taamas con' co' nqueltàa ndxàc loon. <sup>28</sup> Por cona, axta arid nguen lezon tel'en Epafrodit loo gu' par tyac lezo' gu' ñee gu' Epafrodit. Le' sya, xite tyóon cón che'n gu', ne. <sup>29</sup> Bli gu' cas loo Epafrodit co'se' zin Epafrodit loo gu'. Go no gu' Epafrodit con yalguyith yalguxiis loo Tad Crist. Bli gu' cas loo taamas mèn, ne, co' nac xalque' nac Epafrodit. <sup>30</sup> Tac por cón che'n zin' co' mxo'f zin' ryop nu' Epafrodit cón che'n Crist ale yamerle' mcàba yalguth loo Epafrodit. Tac mblo Epafrodit valor loo Epafrodit. Ngòc con' ryes loo Epafrodit par mblyath no Epafrodit daa loo co' mblyat's gu' lyath no gu' daa per ne'nglide gu' gan ngli gu'i loon.

### 3

*Di's ndxè' nda' cuent xá mod ndxàal que tee ban mèn co' ndxela's loo Crist par tataa mod li mèn gan ryethe con' co' angta'la's Crist càa mèn yiloo.*

<sup>1</sup> Per nalle', mèn huesen por cón che'n Crist, lyazen le' gu' tyac lezo' loo cón che'n Tad Crist. Lìcpe' ba'i, inacta arid naxol part cón chenen par daa par que'en lomisque' ye's loo gu' tedib vez co' nac mbryop cart co' ngue que'en ye's loo gu' ndxè'. Di's ndxè' càb gac con' ndac loo gu', ne. <sup>2</sup> Fquenap gu' gu' loo mèn co' ndxàc nayi' xal mbac. Fquenap gu' gu' loo leque mèn tac mèn más ndxòo lezo' ndli con' ye'rsin'. Fquenap gu' gu' loo leque mèn tac mèn ngue no costumbr ale angncho'xù' mèn xlan' mèn no angntehuí' mèn ladpe' mèn. <sup>3</sup> Tac loo na' ngòc co' nac lìcpe' circuncisión, co' nee di's, na' co' ndyub xib no na' co' ncòo' yéc loo Diox xal ndlu' Xpii Natú' che'n Diox loo na'. Anze'f ndyac lezo' na' tac na' nac che'n Crist Jesús. Indxàpte na' yalxla's loo cón che'n xtùuzpe' na' co' ndli na' xtùuz loo cón che'n co' ndxela's na'. <sup>4</sup> Mastale' tataaque' naca, chele' daa ndlyasque' ngàpen yalxla's loo xtùuzpe' daa par lin xal nee lezon, ¿chó ñiii loon, à'? Chele' chó mèn ndli cuent ndxàp mèn yalxla's loo cón che'npe' mèn, ale'que' daa más ne' gáp yalxla's par lin con' co' ndlyazen no con' co' neepe' lezon. <sup>5</sup> Tac co'se' ngolo xon huiz ngóol daa, mbli mèn circuncidar daa. Nac daa bin che'n mèn tèe hebre, co' nee di's, mèn nación Israel nalle'. No nac daa mèn che'n thib cua' mèn co' nac bin thib mbi' co' ngro' lèe mèn co' nac che'n thib ned mèn nación Israel. Loo cón che'n ley co' mxo'f Moisés loo mèn, ngòc daa mèn che'n xley' co' lèe farise, ne. <sup>6</sup> Ale axta arid ngòc daa mènley' axta mdub ngusen mèn loo co' ndxela's mèn loo Diox por cón che'n Jesucrist. Co'se' mblin con'a, mxaquen axta nambii no nali mdoon loo ley che'n Moisés. Mxaquen axta arid nali no nambii mque tee banen loo Diox axta ne' ne' yen mod ñii mèn loon no axta ne' ne' yen

mod quedèe mèn daa cón che'n xley' daa no cón chenen. <sup>7</sup> Ryete con' co' mblin loo xley' daa co' mblin cuent ngòc daa anze'f mèn guryath no mèn guryèn, nalle' ale ndxe'leque', ndlin cuent thidtene yende cón ntac con'a par daa por cón che'n Crist. <sup>8</sup> Lìcpe' ba'i, ryete con' co' ngòc che'npe' daa no con' co' mblin, ne, le'i ngòc loon xal thib con' co' mtè'ben par gòon loo cón che'n Jesucrist. No non daa cón che'n Tad Crist Jesús daa co' nac más con' roo con' xèn leque chol con' loo izlyo' ndxè'. Por cón che'n Crist Jesús, thidtene mblin perdid ryethe con' co' ngòpen, que naca xley' daa, que naca yalgon' daa. Mblin cuent ngòc ryete con'a xal yix, co' nee di's, ale ndxe'leque', mblá'yan ryete con'a par thidtene ante que tee banen loo alux con' co' nac cón che'n Crist par gac daa mèn che'npe' Crist. <sup>9</sup> Tataa mblin par thidte ngòc daa con Crist. Per ne'nglidena par que tee ban lin xal ñibe' ley co' mxo'f Moisés loo na' póla. Ndxè'leque', mque tee ban lina por ngòon loo Diox no loo cón che'n Diox por yalxla's co' ngòpen loo Crist. Cona, ngue niin le' Diox ndyal ngòo mèn loo cón che'n Diox no loo Diox ante por ndxela's mèn loo Crist. <sup>10</sup> Con' co' ndlyazen más tyub yo'f lezon par tolo tan cuent co' huenleque' nac ryethe con' cón che'n co' ngòc loo Crist. Tolo lyasquen tethen no tan cuent cón che'n con' co' nzo la's nii Crist no la's ya' Crist nalle' tac ngro xban Crist làth mèn nguth. Más de cona, ale ndlyasquen tyactii daa por cón che'n di's ndac xal mxactii Crist chele'i naquin. Ndlyazen que tee ban daa xal mque tee ban Crist mastale' càba loon ryete con' co' ngòc loo Crist xal ngòca axta mcàba yalguth loo Crist. <sup>11</sup> Que naca gac con' ndac loon, que naca gac con' ye'rsin' loon, conse' ryo xban daa làth mèn nguth co'se' zin huiz ryo xban mèn làth mèn nguth. Aa. Tataa gaca.

*Trè' ndlu' cón ndxàal li mèn par tataa mod yòo lezo' Diox loo con' co' ngue li mèn.*

<sup>12</sup> Indlyasten niin loo gu' ya ndxàcle' ryete con' ndxè' loon. Axta ne' ne' tar lin gan gac daa thib mèn nali no thib mèn nambii loo Diox, ndyaquen. Per con' ndxè' ngòc loon co'se' alithe mque tee lin co' mblyazen. Làth xtau'a, ale ngogàa daa loo Crist. Por lult ngolazen loo Crist. Mxo'f zin' Crist thib zin' loon. Nalle' dib nzo yéquen no dib nzo lezon ndub yo'f lezon telon zin' co' mxo'f zin' Crist loon ndxè'. <sup>13</sup> Gu' co' nac huesen por cón che'n Jesucrist, indliden cuent ya ngòcle' con' ndxè' loon. Per ndxe'leque', thidte con' ndlin. Lìcpe' ba'i, mbyathlazen ryete con' co' mbri'thle' loon. Nalle', ale ndxe'leque', ndlin xtùuz no ndyóon xá mod lin con' co' ngue li nab Diox par lin no xá mod tolo gaca loon yé' huize', ne. <sup>14</sup> Daa ngue li con' ndxè' xal mèn co' ndli puest. Nac daa xal mèn co' nque' carre par ñeene' chó li gan. Co'se' telon zin' co' mxo'f zin' Diox loon, axta syare' ta' Diox con' co' anze'f ntac loon xal nda' mèn con' loo xtàa mèn co' mbli gan thib puest. Con' co' mxo'f zin' Diox loon ndxè' nac cón che'n Crist Jesús.

<sup>15</sup> Por cona, ngue niin loo gu': Gu' co' huen huen nda' cuent no co' huen huen ndxela's loo cón che'n Crist, ndxàal li gu' xtùuz xal ngue niin loo gu' cón che'n puest co' nac mod co' ndlin xtùuz, ne. Chele' gu' ne'yòode lezo' li gu' xtùuz xal ndlin xtùuz loo con'a per ndli gu' xtùuz tedib mod, leque Diox li par ta' gu' cuent co' huenleque' cón che'n con' co' ndli gu' xtùuz. <sup>16</sup> Per loo cón che'n Crist co' mté'thle' na', thidte gac na' par li nèe na' xtùuz na' no lezo' na' loo cón che'n con'a par thidte que tee ban li na' loo con'a.

<sup>17</sup> Gu' co' nac huesen por cón che'n Jesucrist, bli gu' xalque' ndlin. Bla's gu' no hui' gu' loo mèn co' nzi tee ban xal mté'th mèn loo nu' par té'th gu' que tee ban ndac gu', ne. <sup>18</sup> Tac anze'f huax mèn co' nde teele' ndan cuent loo gu' nzo. No nalle' beren, ngue tan cuent cón che'n mèn loo gu' con nít ngudloon co' ndxónen tac mèn na' ngolo ngola's loo cón che'n Crist. Indlya'ste mèn gòn mèn cón che'n Crist. <sup>19</sup> Por lult, gaca loo mèn ale lyuxxù' mèn. Tac ryete con' co' ndli ndyub yo'f lezo' mèn co' nque' lezo' mèn nac diox mèn. Lugar de thyon mèn loo con' ndyub yo'f lezo' mèn, ale le'le' ndye's nxyal' mèn loo con' ndli mèn. Ale más ndyóo mèn loo cón che'n izlyo' ndxè'. <sup>20</sup> Per ndxe'leque', lizpe' na', no làazpe' na', no xnedpe' na' nac loo bé'. Por cona, nzi quee lezo' na' no nzi bed na' axta co'se' yi'th Crist loo bé' loo mbii. Yi'th xi Crist na', Tad Crist co' mtelá' na' loo con' ryes. <sup>21</sup> Huiza, chàa, se' loo Crist prob bél'yòo lad na' co' nac che'npe'

izlyo' ndxè'. Syare', gàc lad na' xal nac ladpe' Crist co' anze'f ndxá'th bèel. Tataa li Crist loo na' por cón che'n con' roo con' xèn co' nzo la's nii Crist no co' nzo la's ya' Crist. Leque con' roo con' xèn co' nzo la's nii Crist no la's ya' Crist li zin' Crist par ñibe' Crist loo alux con'.

## 4

*Pab ngue ta' cuent loo mèn co' ndxela's loo Tad Crist xá mod tyac lezo' mèn loo Tad Crist.*

<sup>1</sup> Por cona, mèn huesen por cón che'n Crist, gu' co' anze'f nque' lezon ñèen, gu' co' anze'f ndyub yo'f lezon ñèen máa gu' par nedrè', cón che'n gu' ndli anze'f ndyac lezon. Tac loo cón chenen, nac gu' xal thib listón co' mbli thib mbi' gan loo thib yalguyith. Por cona, leque gu' tolo bli par cue nèe gu' loo cón che'n Tad Jesucrist, gu' co' anze'f nque' lezon ñèen.

<sup>2</sup> Ña'ben no ngue tan'en di's ndxè' loo Evodia no loo Síntique. Thidte gàc xtùuz no lezo' ryop xa'gota xalque' mèn co' ndxàc bél por cón che'n Tad Crist. <sup>3</sup> Lomisque', ña'ben di's lool, ne, hues, lòu co' ndlyath no daa, blyath no Evodia no Síntique. Ryop xa'gota ndxàc fta'n na' por cón che'n Crist. Tac ryop xa'a nguth nguey' par mblyath no xa' daa loo zin' co' nac che'n di's ndac co' ndlu' xá mod lyá' mèn loo con' ryes. Thidte mblyath no ryop xa'gota daa con mbi' co' lèe Ment, no con taamas mèn co' nxo'f zin' zin' ndxè' con daa. Lèe rye mèn ndub loo ye's loo libr co'te' ndub lèe taamas mèn co' ndxàp yalnaban thidtene, mèn co' yòo ban no Diox thidtene yiloa.

<sup>4</sup> Ftolo fxo'f nde' fxo'f ndla' lezo' gu' loo Crist thidtene. Beren, niin loo gu' tedib vez: Ftoloque' fxo'f nde' fxo'f ndla' lezo' gu' loo Crist. <sup>5</sup> No oj ché' co' lu' gu' gu' loo mèn, huen, le' gu' nacque' mèn nado' no mèn ndac. Le' Tad Jesucrist ngue tee noque' gu'. Indlá'ya'de Tad Jesucrist gu' ned nzi tee gu'.

<sup>6</sup> Ne'gath lyuxte gu' no ne'tyóode gu' arid cón che'n chol con' co' ingue node gu' co' nac co' naquin gu'. Ndxè'leque', guuz gu' loo Diox cón che'n ryete con' co' naquin gu' láth co'se' mbez gu' Diox. Bna'b gu'i loo Diox no guuz gu: Diox quix U', Diox, loo Diox. <sup>7</sup> Le' sya, tataa mod li Diox par yo nagàl lezo' gu' loo ryete con' axta ne' ne' ñee taamas mèn no axta ne' ne' gòn taamas mèn xá mod ndxàca loo gu'. Chele' gu' li con'a, Diox co' ndli par nagàl yo lezo' gu', Dioxa quenap lezo' gu' no xtùuz gu' por ngòo gu' loo cón che'n Crist Jesús no por thidte nzo no gu' Crist Jesús.

*Pab ngue ñibe' loo mèn co' ndxela's loo Tad Crist ante tyoo lezo' mèn li mèn con' ndac.*

<sup>8</sup> Más de cona, mèn huesen por cón che'n Jesucrist, bli gu' xtùuz loo con' co' nac con' licpe'. Bli gu' xtùuz par gáp gu' mod loo mèn co' ndxàal li gu' cas. Bli gu' xtùuz loo ryete con' co' nac con' nalì no con' nambii. Bli gu' xtùuz loo con' co' inacte che'n co' nac xab izlyo'. Bli gu' xtùuz xá mod lyath no gu' xtàa gu'. Bli gu' xtùuz loo ryete con' ndac co' nxo'f nde' no co' nxo'f ndla' lezo' gu'. Bli gu' xtùuz loo ryete con' ndac co' nac con' guryath no con' guryèn. Chele' chol con' nzo co' ndxàal li mèn con' guryath no con' guryèn no loo co' ndxàal xo'f lèe xo'f xti's mèn, cón che'n ryethe con'a bli gu' xtùuz.

<sup>9</sup> Ryete con' co' mté'then gu', no ryete con' co' mblyu'en loo gu' par li gu'i, no ryete con' co' mbin gu' xal ndyoodiz non gu', no ryete con' co' gunèe gu' mblin, cón che'n con'a bli gu' xtùuz. Diox co' ndli par nagàl yo lezo' gu' loo Diox no par cue gu' rye nda gu' no rye ndye'th gu' loo xtàa gu', Diox nzo noque' gu'.

*Di's ndxè' nda' cuent le' mèn co' ndxela's loo cón che'n Diox por cón che'n Jesucrist mthop gòn co' mquin Pab co'se' mque' Pab lezi'f.*

<sup>10</sup> Anze'f ndyac tín' lezon por cón che'n Tad Crist le' gu' mbere mte'que' lezo' máa daa no mbli gu' xtùuz cón chenen tedib vez par mblyath no gu' daa. Indlyasten niin loo gu' le' gu' mbyathla's daa. Ndxè'leque', naneen no ndan cuent nec thib mod no nec tedib mod ne'nglide gu' gan nglyath no gu' daa ndoore'. <sup>11</sup> Ingue niiden con' ndxè' loo gu' por naquin daa con'. Ndxè'leque', mté'then par ndyac lezon con ndxèpte con' co' ngue non no xalte ndoo riiden thib huiz tedib huiz. <sup>12</sup> Ndaquen cuent xal ndxàca loo



mèn co'se' prob mèn. No ndaquen cuent xal ndxàca loo mèn co'se' nzi re's nzi xo con' hua mèn liz mèn. Ryei mtéthquen par xec yèen xal ndri'then thib huiz tedib huiz. Que naca ndxuhuan axta plóthe ndlyazen, que naca yende cón nac par huan, ndyacqu' lezon mastale' ndxàca tataa loon. <sup>13</sup> Nxec daa ndlin no ndxác daa ndlin ryete con' co' ndxàal lin tac Crist indlá'ya'de daa. Ndlyath noque' Crist daa. <sup>14</sup> Per mastale' nxec daa ndxàc con'a loon, huenque' mbli gu' mblyath no gu' daa láth ndxàc yalndyub ngu's ndxè' loon.

<sup>15</sup> Gu' naneeque' no nonque' gu', mèn ciuda Filip, co'se' nerleque' mtlo mbrye's di's che'n di's ndac co' ndlu' xá mod lyá' mèn loo con' ryes co'se' mxenen ned ngro'en le'n yèezya' che'n làaz mèn macedon, nec thib mèn co' ndxela's loo Crist co' nqueltàa tya ne'ngye'thte lezo' mèn na nglyath no mèn daa mastale' Diox mbli angngòc con' ndac loo mèn. Ndxè'leque', ante gu' no maste mbye'th yéc no mbye'th lezo' mdub gu' tmi co' mtel' gu' loon. <sup>16</sup> Tac co'se' be' nzon le'n ciuda Tesalónica, mtel' gu' centav co' ngòc gòn che'n gu' loon pláre' vez par mxin con' mquin daa co' nde che loon. <sup>17</sup> Inacte ngue que'en ye's ndxè' loo gu' por ndyac lezon mcàayan tmi co' mtel' gu' loon. Ndxè'leque', con' co' más ndlyazen nac le' Diox li tolo yas yàl con' ndxàp gu' loo gu'. No ndlyazen tolo dii con' ndxàp gu' loo Diox. <sup>18</sup> Ryete tmi co' nde teele' ntel' gu' loon, mcàayaquena. No axta por de más nde teele' ntel' gu' tmi loon. Per nalle', tmi co' mtel' gu' loon con Epafròdit, axta por de más ngue non tmi nalle'. Ne'tyóode gu' arid cón chenen, cara. Hui' gu' nexa. Tmi co' mtel' gu' loon ngòc xal thib xla' du'r zen yal' co' ngo mèn loo Diox co' ndxòo lezo' Diox xal ndlya's Diox. <sup>19</sup> Diox co' nac Diox daa tolo li par gáp gu' ryethe con' co' nde che loo gu'. Diox lii loo gu' xalque' nac ryethe con' roo con' xèn co' ndxàp Crist Jesús la's nii Crist Jesús no la's ya' Crist Jesús. <sup>20</sup> Ndlyazen le' mèn tolo xo'f lèe xo'f xti's lèe Diox xud na' no tolo te'th mèn di's roo di's xèn cón che'n Diox xud na' loo mèn le'n lín' co' ntlo, no le'n lín' co' ndxelo, no le'n lín' co' ne'lith node. Tataaque' gàca.

*Di's ndxè' nda' cuent le' Pab ngue nii Diox loo mèn co' ndxela's loo Tad Crist, mèn co' naban le'n ciuda Filip.*

<sup>21</sup> Gunii gu' Diox cón chenen loo ryete mèn co' ngòo loo cón che'n Diox, mèn co' ngòc che'npe' Diox co' nzo no gu'. Lomisque', mèn co' ndxàc hues na' por cón che'n Crist co' nzo no daa, mèn na ngue nii Diox loo gu'. <sup>22</sup> Ryete mèn co' ngro xà' loo cón che'n xab izlyo' co' ngòc mèn che'npe' Diox co' nzo non trè', mèn na ngue nii Diox loo gu', ne. Per más ndyac mèn co' nac mèn guliz che'n rey César, nte' lezo' mèn na ngue nii mèn Diox loo gu'.

<sup>23</sup> Ndlyazen le' Tad Jesucrist na' tolo li anggàc con' ndac loo ryete gu'. Tataaque' gàca.

## Cart Co' Mque' Pab Ye's Loo Mèn Co' Ngo Ban Le'n Ciuda Colos

*Pab ngue que' ye's loo mèn co' ngola's loo cón che'n Jesucrist no loo Jesucrist, mèn co' mqueltàa loo cón che'n Diox, mèn co' ngo ban ciuda Colos.*

<sup>1</sup> Daa, Pab, nac thib mbi' co' ndxe' di's che'n Jesucrist xal gunee lezo' Diox. Jesucrist mtel' daa. Ryop nu' Timote co' nac hues na' por cón che'n Jesucrist <sup>2</sup> ngue nii Diox loo gu' co' nzo ban ciuda Colos. Mèn huesen por cón che'n Jesucrist, gu' ngro xà' loo cón che'n xab izlyo' no ngòc gu' mèn che'npe' Diox. Mbli nèeque' gu' gu' loo cón che'n Crist, ne. Ndiyazen le' Diox xud na' no Tad Jesucrist na' tolo angli le' gu' nagàl yo lezo' loo Diox no cue ban gu' rye nda gu' no rye ndye'th gu' làth xtàa gu'.

*Di's ndxè' nda' cuent xá mod ngurez Pab Diox cón che'n mèn co' ngola's loo Crist, mèn co' ngo ban ciuda Colos.*

<sup>3</sup> Nu' mbez Diox quix Diox loo Diox co' nac xud Tad Jesucrist na' ryete vez co'se' mbez nu' Diox cón che'n gu'. <sup>4</sup> Nu' mbìnle' le' gu' ndxela's loo Crist Jesús. Mbìnle' nu' le' gu' nque' lezo' ñèe gu' ryete mèn co' ngro xà' loo cón che'n xab izlyo' co' ngòc che'npe' Diox. <sup>5</sup> Tolo mbez nu' Diox quix Diox loo Diox por ryethe con' co' nac co' nzi quee lezo' gu' loo cón gac che'npe' gu' yiloo co' ngue gosua' Diox loo bé' par gaca che'n gu' yiloo. Cón che'n con'a nde teele' ndxòn gu' no mté'th gu' por cón che'n di's ndac co' nac di's lìcpe' co' ndlu' xá mod lyá' mèn loo con' ryes. <sup>6</sup> Di's ndac co' ngo nu' yalbàn loo gu', leque di's ndaca ndoo yath no ndoo yèn loo mèn dib athu loo izlyo'. Ncàb cón che'n di's ndac loo mèn le' huax mèn ngòc loo cón che'n Diox por cón che'n Crist xal thib cosech ndac co' nthop mèn. Tataa mod, ne, ndxàca loo gu' cón che'n di's ndac axta huiz co' mbìn gu'i no gunee gu', lìcque', ndli Diox anggac con' ndac loo mèn. <sup>7</sup> Cón che'n con' ndxè' mbli' Epaftr loo gu'. Epaftr anze'f lezon ngudloon. Epaftr thidte ndli zin' co' nac cón che'n di's ndac co' ndlu' cón che'n Crist con nu'. Altant ndyoo Epaftr loo zin' che'n Crist par ndlu' Epaftr zin' xal thib moz ndac che'n gu'. <sup>8</sup> Epaftr mda' cuent loo nu' xá mod ngue lyath no Xpii Natú' gu' par nque' lezo' gu' ñèe gu' xtàa gu' par ndxè', ne.

<sup>9</sup> Por cona, axta huiz co'se' mbìn nu' nabe'ste nziri' gu' loo cón che'n Diox no axta huiz nalze imbedte nu' no indxathla'ste nu' mbez nu' Diox por cón che'n gu'. Ña'b nu' loo Diox le' gu' ñee no ta' gu' cuent ryethe con' co' nee lezo' Diox. Ña'b nu' loo Diox le' Xpii Natú' lyath no gu' par gac gu' no ten' gu' no ta' gu' cuent xá nac xtùuz che'n Diox. <sup>10</sup> Mbez nu' Diox le' gu' que tee ban xalque' ndxàal que tee ban mèn co' nac che'n Tad Crist par que tee li gu' co' yòc lezo' Crist par caba loo gu' tolo lu' gu' ryete con' ndac loo xtàa gu' no par tolo té'th gu' más cón che'n Diox no xá nac Diox. <sup>11</sup> Ña'b nu' loo Diox le' gu' xec yèe por cón che'n rye loothe con' co' nzo la's nii Diox no co' nzo la's ya' Diox xal nac ryethe con' roo con' xèn co' nzo la's nii Diox no la's ya' Diox. Mbez nu' Diox le' gu' cha'la's no xo'f nde' xo'f ndla' lezo' gu' làth xtau'a. <sup>12</sup> Guuz gu': Diox quix U', Diox, loo Diox xud na' tac Diox mblique' ndxàp na' con' la's nii na' no la's ya' na' par yan' no na' no gac che'npe' na' con' co' càaya' na' con mèn co' ngro xà' loo cón che'n xab izlyo' no co' ngòc che'npe' Diox, co' nee di's, <sup>13</sup> Diox mtelá' na' loo ryethe con' co' nzo la's nii Mebizya no la's ya' Mebizya co' ñibe' loo yál'cuau co' nac cón che'n xab izlyo'. Ngoloa, mbli Diox par ñibe' xgan' Diox co' nac lezo' Diox no co' nac ngudloo Diox loo na'. <sup>14</sup> Diox mtecue cón che'n xtol na' lad Crist co'se' mxyo ren Crist loo cruz, co' nee di's, tataa mod mton' Diox xtol na'.

*Di's ndxè' nda' cuent loo mèn le' Diox mtu' mtàl lezo' Diox loo mèn co' ndxela's loo Tad Crist por cón che'n yalguth co' mquée loo Tad Crist co'se' mque' mèn Tad Crist loo cruz.*

<sup>15</sup> Diox co' yende mod yú' loo mèn, Diox mbi'th lu' loo loo mèn co'se' mbi'th Crist Jesús, xgan' Diox, loo izlyo' ndxè'. Crist nac yub Diox co' mbi'th no nzole' Crist ndoore'

cuec Diox alux con' co' mtoxcua' Diox. <sup>16</sup> Diox mnibe' loo Crist toxcua' Crist alux con', sya, mtoxcua' Crist alux con' co' nzo loo bé' no con' co' nziri' loo izlyo', que naca con' co' ndxú', que naca con' co' indxú'de, que naca angl co' ñibe', que naca taamas angl co' ndxàp con' la's nii angl no la's ya' angl, que naca chol xpíi co' ndxàp con' roo no con' xèn la's nii xpíi no la's ya' xpíi. Alux con'a mtoxcua' Crist. Crist ngue tèn con'a no ngue xèn' Crist Jesús con'a. Ngòcsua' alux con'a par li zin' Crist. <sup>17</sup> Nzoque' Crist ndoore' ngureri' chol con'. Crist ngue tèn alux con' co' nziri' par ne'tyon'te no par ne'lith node con'a. <sup>18</sup> Más de cona, Crist ñibe' loo mèn co' ndxela's, mèn co' nqueltàa loo cón che'n Diox por cón che'n Crist xalque' ñibe' yéc mèn loo mèn. Tataa nac Crist tac ndoore' nzole' Crist loo alux con'. Crist ngòc nerleque' mèn co' ngro xban làth mèn nguth, ne. Ngòc con' ndxè' par gàca le' thidte Crist tyoo ner no tyoo naa no ñibe' Crist loo alux con'. <sup>19</sup> Cona, mbli Diox loo Crist tac Diox mblyas' ngòc Crist thib' xooque' xalque' Diox no ngòc Crist lalque' con Diox. Anze'f ngòc lezo' Diox mbyan'que' Crist lugar che'n Diox loo alux con' co' mteyas mteyàl Diox, co' nee di's, loo ryethe con'. <sup>20</sup> Ngòc lezo' Diox, por cón che'n Jesucrist, yu' yàl ryete con' loo Diox tedib vez. Ngue li Diox le' mèn nagàl yo lezo' loo Diox no cue ban mèn rye nda mèn no rye ndye'th mèn loo xtàa mèn por cón che'n renpe' Crist co' mxyo loo cruz. Tataa ngòca loo Crist par yu' yàl ryete con' loo Diox, que naca con' co' nziri' loo izlyo', que naca con' co' nzo loo bé'.

<sup>21</sup> Póla gu', ne, mque tee ban loo cón che'n Crist xal mèn tith. Ngòc gu' mèn ngolo ngola's loo Diox por cón che'n con' ye'rsin' co' ngo le'n lezo' gu' por mbli gu' chol con' ye'rsin'. Ale más mda' gust lezo' gu' mbli gu' chol con' ye'rsin'. Per nalle', mbli Diox ngo nagàl lezo' gu' loo yub Diox. <sup>22</sup> Mbli Crist con' ndxè' co'se' mque' mèn Crist loo cruz par mxactii Crist no nguth Crist. Tataa mbli Crist par lu' too Crist gu' xal mèn co', licque', ngro xà' loo cón che'n xab izlyo' no ngòc gu' mèn che'npe' Diox. Ngòc gu' mèn co' yende chó mèn quexù' loo Diox. <sup>23</sup> Gàc con' ndxè' loo gu' chele' gu', licque', toloque' cue nèe loo co' ndxela's gu', no chele' gu' ne'gàcte chop loo chop la's no ne'yitacte lezo' gu' loo co' nzi quee lezo' gu' cón che'n di's ndac co' ndlu' xá mod lyá' mèn loo con' ryes co' mbìnle' gu'. Cón che'n di's ndac ndxè' nac co' ndxath no co' ndxèn rye ned co' nac dib athu loo izlyo'. Daa, Pab, ngue lyath no mèn co' ngo yalbàn cón che'n di's ndac loo mèn.

*Di's ndxè' nda' cuent loo mèn le' Pab mxo'f zin' cón che'n di's ndac par ya lu' Pab no ya te'th Pab di's ndac loo alux mèn che'n chol nación.*

<sup>24</sup> Per nalle', ale ndxe'leque', ndyac lezon ndxàc yaltii loon por cón che'n gu'. Tac xalque' ndxàc yaltii ndxè' loon, con'a nee di's tolo ngue taan ryete yaltii xal ngòca loo Crist laden co' be' ndxàc falt loo con' co' ndyac no tii daa Crist por cón che'n mèn co' ndxela's loo cón che'n Diox por cón che'n Crist, mèn co' nqueltàa loo cón che'n Diox, co' nee di's, mèn co' thidte nac loo Crist xal ladpe' Crist. <sup>25</sup> Ngue tan cuent loo gu', daa nac thib' mbi' co' nxo'f zin' zin' ndxè' loo gu', gu' co' nqueltàa loo cón che'n Diox. Diox mdoo daa no mtan' Diox di's ndxè' loon par xo'f zin'en zin' par gàc con' ndac loo gu' no par lu'en loo mèn no tethen loo mèn ryethe con' co' nac cón che'n di's ndac loo mèn. <sup>26</sup> Ndalen par lu'en no go xo'fen cón che'n Diox co' ngo casloo axta pólle'a co' nac rye lín' co' nde teele' ndri'th. Per ndxe'leque', nalle' ngue li Diox par ngue ryo xo'f cón che'n di's ndac ndxè' loo xnaa loo mèn co' ngro xà' loo cón che'n xab izlyo', mèn co' ngòc che'npe' Diox. <sup>27</sup> Pues loo mèn co' inactive mèn nación Israel, mblyas' Diox lu' Diox ryethe con' co' nac cón che'n con' roo con' xèn co' nac cón che'n di's ndac co' ngo casloo póla. Cona nee di's, nac Crist co' naban le'n xpíi gu'. Por cón che'n Crist nzi quee lezo' na' cón che'n con' co' gàc loo na' yiloo co' gàc con' roo con' xèn co' li Diox loo na'.

<sup>28</sup> Cón che'n Crist ngo nu' yalbàn. Nco'x nu' loo rye mèn co' ndyal ndxòn cón che'n Crist, ne. Cón che'n Crist ndlu' nu' loo mèn xal mbli Diox ndxác nu' par ten' mèn cón che'n Diox co' huenleque'. Tataa ndli nu' par huen huen té'th mèn, no nali no nambii té'th mèn cón che'n Crist par thidte gàc mèn loo cón che'n Crist. <sup>29</sup> Par gàca tataa loo gu', tolo nxo'f zin'en zin' ndxè' cón che'n di's ndac. Con dib fuerz chenen nxo'f zin'en

zin' ndxè' xalque' ndlyath no Crist daa axta plóthe xal nac con' roo con' xèn co' nzo la's nii Crist no la's ya' Crist.

## 2

<sup>1</sup> Ndlyazen le' gu' ta' cuent no non gu' susque' mxo'f zin'en no ndyóon no mbrezen Diox cón che'n gu' no cón che'n mèn yèez Laodice no cón che'n mèn co' tarte libe' ayéc axàn' daa. <sup>2</sup> Ndlyazen gac loo mèn co' tarte libe' ayéc axàn' daa le' mènna ye'th lezo' loo cón che'n Crist. Lyazen gaca loo gu' tolo té'th gu' par que' lezo' gu' ñèe gu' thib xtaa gu' no tedib xtaa gu'. No ndlyazen tolo té'th gu' cón che'n Diox par huen huen gòn gu' cón che'n Diox no tataa mod gáp gu' yalxla's loo Diox axta plóthe. Chele' gu' tataa li, Diox li par ta' gu' cuent cón che'n con' co' ngo casloo loo Diox ndoore', co' nee di's, nac cón che'n Crist. <sup>3</sup> Loo Crist nzo casloo rye loothe yalndxác roo yalndxác xèn che'npe' Diox. Ndxòn Crist ryethe con' no nda' Crist cuent cón che'n ryethe con'. <sup>4</sup> Ngue niin con' ndxè' loo gu' par yende chó mèn li par yila's gu' di's co' nac di's gutyè'. <sup>5</sup> Mastale' ndyac gu' yende daa loo gu', per ndyaquen nzon loo gu' xalque' nac xtúuz daa co' ndryo' le'n lezon. No axta gust nda' lezon ñèen gu' le' gu' nziri' li nèque' gu' loo cón che'n Crist no thidte ndxác xtúuz gu' no lezo' gu' loo yalxla's co' ndxáp gu' loo Crist.

<sup>6</sup> Por cona, texal mbìn gu' no mté'th gu' no ngola's gu' le' Crist Jesús nac xa' co' ñibe' loo ryethe con', tataaque' tolo fque tee ban gu' loo Crist. <sup>7</sup> Thidtene bli nèe gu' gu' loo cón che'n Crist par que tee ban ndac gu' loo cón che'n Crist, co' nee di's, nac xal thib yaa co' ne'huinte tac na's ndlyàa lox yaaa loo yòo. Gure nèe gu' gu' par thidteneque' cue nèe gu' loo cón che'n Crist Jesús xalque' nac mod co' mté'th gu'. Lomisque' ne, tolo guuz gu' loo Diox: Diox quix U', Diox. Tataaque' ndxàal li gu'.

*Di's ndxè' nda' cuent xá nac yalnaban cub co' ndxác loo mèn co'se' ndxela's mèn loo Tad Crist.*

<sup>8</sup> ¡Anderhuen gu'! Ne'ta'de gu' lugar loo chol mèn quedìi mènna gu'. Mènna mbez ndxác mènna per pà gac mènna. Tac con' co' ndxác mènna nac leque xtúuz co' ndli mènna xtúuz co' nac thib con' co' yende cón ntac. Cona, be' ndyoo nque mènna xís costumbr co' ngue no mènna. Ndli mènna xtúuz toloque' li mènna cón che'n xab izlyo' ndxè'. Per prob mènna, yende cón nanee mènna cón che'n Crist.

<sup>9</sup> Tac thib xoo xalque' ñaa Diox ñaa Crist no xalque' nac Diox nac Crist. <sup>10</sup> No nalle' ryethe con' co' nac cón che'n Diox ndxáp gu' tac thidte nqueltàa gu' loo cón che'n Crist. Crist ñibe' loo ryete con' co' nde'f di's ñibe' no loo ryethe xpíi co' ndxáp con' la's nii no la's ya'. <sup>11</sup> Lomisque' ne, por thidte ngòc gu' loo cón che'n Crist, ngòc circuncidar gu'. Per ne'ngàcte circuncisión co' ngòc loo gu' xal ndxác circuncidar xlan' mèn. Ndxé'leque', circuncisión co' ngòc loo gu' nac ngulàa yéc gu' no ngulàa lezo' gu' par mblyá' gu' loo xtol gu' co' nac alux xab izlyo' co' nduhua nee lezo' gu' mbli gu' ndoore' yila's gu' loo cón che'n Crist. <sup>12</sup> Co'se' ngòc bautizar gu', co' nee di's, ngola's gu' loo Crist, hora loo cón che'n xquin gu' ngòc gu' xal mèn co' mbua's no Crist le'n ye'r lyo'. Hor co'se' ngòc bautizar gu'a, hora Diox mbli ngòp gu' yalnaban cub xal mèn co' ngro xban no Crist. Ngòc con' ndxè' loo gu' tac gu' ngola's le' Diox ndxáp con' roo con' xèn la's nii Diox no la's ya' Diox axtaque' mblo xban Diox Crist làth mèn nguth. <sup>13</sup> Gu' ngòc xal mèn nguth loo cón che'n Diox póla tac mcua'n gu' xquin gu' tiempa no tarte gac circuncidar gu' póla. Per nalle' Diox mbli le' gu' ndxáp leque yalnaban cub co' ndxáp Crist. No lomisque' tiemp, mton' Diox ryete xtol gu'. <sup>14</sup> Lìcpe' ba'i, Diox mton'le' ryete di's co' ndub loo ley co' mnibe' Moisés co' ngòc di's co' mzib quíi na' xalque' mnibe' ley loo na'. Tac leya mbli loo na' ndli na' con' ye'rsin'. Sate más nquexù' leya loo na' tac ne'gácte na' li na' xal ñibe' ley loo na'. Cona, Diox mteche na' loo co' mnibe' ley loo na' co'se' mque' mèn Crist loo cruz. Con'a mbli Diox par ne'tolode li na' cas loo ley co' mxo'f Moisés loo na'. <sup>15</sup> Co'se' nguth Crist loo cruz, tataa mod mbli Crist gan loo chol meexù' no loo chol xpíi ye'rsin' co' ñibe' loo izlyo' ndxè' co' ngòp con' roo no con' xèn la's nii no la's ya'. No loo xnaa mbli Crist par mde's ya' no mde's nii rye xpíi ye'rsin' co' mnibe' Crist loo. Mbli Crist le' rye xpíi no meexù' mdoo ner loo Crist xal co'se' mdyub dó' ya' pres, ya pres lezi'f.

*Trè' ndlu' ndxàal té'th na' cón che'n Crist no cón che'n con' co' nac cón che'n bé'.*

<sup>16</sup> Por cona, chele' chol mèn nzo co' lya's quexù' gu' loo cón che'n xit gu' no lua' gu', no cón che'n chol huiz lni co' mbez mèn yende mod que' mèn zin' no mbez mèn ndxàal quenap mèn mèn huiza, no cón che'n mbe' co'se' ndryo' quée mbe' no cón che'n huiz sabd, ne'lide gu' cas loo rye con'a. Ne' ne' gòn gu' di's co' mbez mèn cón che'n rye con'a. <sup>17</sup> Per cón che'n ryete con' co' nda' trè' cuent co' ngòc con' mbli mènna póla, ryete con'a ngòc thib con' anxle' xal thib xin no xnaa co' yende cón ntac. Per cón che'n mbi' co' nde nquea, co' nee di's, cón che'n Crist nac con' licpe'. <sup>18</sup> Ne'la'de gu' par teche mèn con' co' mbli gu' gan mté'th gu' cón che'n Diox. Mènna asendli par ndxàc mènna mèn nado'. Mènna ale más ndli ndyub xib mèn loo angl, ne. Ale mbez mènna nquin li mèn xtùuz cón che'n con' co' indxú'de loo mèn no loo con' co' yende mod hui' mèn loo. Ale ndoote con' ndli mènna. Asendli mèn ndye's mèn axta plóthe por xtùuz co' ndli mènna co' ndyub yo'f lezo' mèn co' nac cón che'n xab izlyo'. <sup>19</sup> Mènna inacte mèn co' thidte nqueltàa loo Crist ne' ne' loo cón che'n Crist. Crist ñibe' loo mèn co' ndxela's, mèn co' nqueltàa loo cón che'n Diox, xal ñibe' yéc mèn loo mèn. Tataa ndli Crist loo na' par ryoo xyèn na' loo cón che'n Crist xal ñibe' Diox no xal ndlya's Crist. Tataa ndxàca xal ndxàca loo lad mèn le' thib thib part che'n lad mèn nque' zin' par ryoo xyèn lada xal ndxàala.

<sup>20</sup> Fte' lezo' gu' le' gu' nguth nole' Crist, co' nee di's, ngro xà' gu' loo ryete con' co' nac che'n xab izlyo' no ngòc gu' che'npe' Diox xal thib mèn co' nguth co' indyóode cón che'n xal mque tee ban mènna ndoore' co' nac mod co' alithe ndryo' ndlyen' lezo' mèn par li mèn. No ¿nalle', à'? ¿Chonon be' nzi tee ban gu' loo cón che'n xab izlyo' xal mèn co' ndyoo nque loo costumbr co' nac cón che'n xab izlyo', sya? <sup>21</sup> Angab na'i, xal ndli gu' no mbez gu': Ne'gàaltel con' ba'. Ne'huadel con' ba'. Ne' ne' tyenl con' ba' con ya'l. <sup>22</sup> Ryete con' co' ngue li gu' ba' nac mod co' lyux xal ndlyux con' co' ndli mèn zin'. No ryete mod co' ndxàp gu' ba' alithe nac costumbr no mod che'n mèn co' alithe nzi ban loo izlyo' ndxè'. <sup>23</sup> Licpe' ba'i, mènna ndli cuent anze'f ndxàc mènna tac ndli mènna ryete con'a. Ñibe' yèe mènna loo mèn li mèn xalque' nac xley' mèn par gue's nii mèn no gue's ya' mèn loo chol con'. Ñibe' yèe mènna gac mèn mèn nado'. Per, ale ndxe'leque', con' co' ndlu' mènna no mod co' ndlu' mènna loo mèn yalguyith naca no yalgutyè' naca. Ale ntetiixù' mènna leque lad mènna par ndlu' mènna le' mènna nac mènley'. Per yende cón li con' ndli prob mènna par teche mènna mod ye'rsin' co' ndli ndyub yo'f lezo' mènna loo cón che'n xab izlyo' ndxè' par ndli mènna con' ye'rsin'.

### 3

<sup>1</sup> Per nalle' ngue niin loo gu': Chele' gu', licque', ngue no yalnaban cub xal mèn co' ngro xban noque' Crist, fté'th gu' no bli gu' ryete con' co' nac che'npe' bé' co'te' ndub Crist cuat Diox le'n bé' loo bé'. <sup>2</sup> Bli gu' xtùuz cón che'n con' co' nac cón che'npe' bé', ne. Ne'lide gu' xtùuz loo co' nac cón che'n xab izlyo' no cón che'n yalgon' che'n izlyo'. <sup>3</sup> Tac loo cón che'n xab izlyo' nac gu' xal mèn co' nguthle' loo con'a. Yalnaban cub co' ndxàp gu', Crist ngue quenapa loo Diox. <sup>4</sup> Crist mda' lugar no mbli Crist le' gu' yòo ban no Diox thidtene yiloa. Co'se' yú' loo Crist loo mèn tedib vez, sya, loo gu', ne, gac con' guryath no con' guryèn co' gac loo Crist co'se' yú' loo gu' loo bé' con Crist.

*Pab ngue ta' cuent xá nac yalnaban mèn, mèn co' tarte yila's loo Crist, no xal nac yalnaban mèn, mèn co' ndxela's loo Crist.*

<sup>5</sup> Cona, ngue niin loo gu': Ryete con' co' ndyub yo'f lezo' gu' co' nac cón che'n xab izlyo', ya ne'tolode li gu'i. Ndxè'leque', gòc gu' xal mèn nguth loo ryete con'a. Ryete con'a nee di's: Ne'cua'n'te gu' xin' huan gu'. Ne'lide gu' con' co' nac con' xin no con' cap. Ne' ne' tyub yo'f lezo' gu' loo chol con' ye'rsin' co' ngro' mblyen' lezo' gu' mbli gu' póla. Ne' ne' quelith gu' cón nac che'n hues xtàa gu' tac mèn co' nqueli'th cón nac che'n hues xtàa mèn, lalque' nac mènna con mèn co' ndyub xib no co' nsál' ya' loo mdo' no loo gunab. <sup>6</sup> Le' sya, cón che'n ryethe con' ndli mènna ncàb huax con' ye'rsin' loo mèn. Por con' ndli mènna, ndxecloo Diox ñèe Diox ryete mènna tac indyubdi'ste mènna loo Diox. <sup>7</sup> Ryethe con'



ndxè' mque tee ban li gu' ndoore' yila's gu' loo cón che'n Crist no loo Crist. <sup>8</sup> Per nalle', más huen blá' gu' rye con' co' niin loo gu' ndxè' thib lad: Con' co' ndli ndxecloo mèn no ndxòo xyàn lezo' mèn; mod co' ndxàp mèn co'se' asendli mèn par ndli mèn ryete con' ye'rsin'; mod co' ndxàp mèn co' ñii yèe ñii tii xtàa mèn no co' nquedèe mèn xtàa mèn; no mod co' ndxàp mèn co' ndyoodi's chol di's xin no di's cap. <sup>9</sup> Ne'tyè'de gu' loo nec thib xtàa gu'. Tac gu' mblá'ya'le' ryethe mod ye'rsin' co' nac cón che'n xab izlyo' co' mque tee ban mbli gu' póla. Por cona, niin loo gu': Ne'tolode que tee ban li gu' ryete con' ye'rsin'a. <sup>10</sup> Nalle' mse'le' gu' mod co' ngòp gu' póla. Nac gu' mèn co' nque tee ban loo tedib mod cub co' ndxàp gu' nalle'. Mod co' ndxàp gu' nalle' thidte nac xal nac mod co' ndlya's Diox gáp gu' no que tee ban gu' par tataa mod más ta' gu' cuent cón che'n Diox. <sup>11</sup> Loo yalnaban cub co' nac cón che'n Crist, yende chó mèn gab loo xtàa mèn: Daa nac mèn nación Grieg o daa nac mèn nación Israel. Ne' ne' gab mèn: Daa ngòc circuncidar o daa ne'ngàcte circuncidar. Ne' ne' gab mèn loo xtàa mèn: Daa nac mèn tèe o daa nac mèn tith. Ne' ne' gab mèn: Daa nac moz yèe o daa nac mèn co' yende chó cuee ca'. Ndxè'leque', loo Diox ante cón che'n Crist nac co' ntac. Alux con' nac che'npe' Crist, no loo ryethe con' ñibe' Crist, par li zin' Crist alux con' nalle'.

<sup>12</sup> Gu' nac mèn co' Diox mcui. Ngro xà' gu' loo cón che'n xab izlyo' no ngòc gu' che'npe' Diox. Nque' lezo' Diox ñèe Diox gu'. Por cona, fque tee ban li gu' loo co' ngue niin loo gu' ndxè', co' nee di's, gòc gu' mèn co' ndlyat lezo' ñèe hues xtàa. Gòc gu' mèn co' ndli con' ndac loo hues xtàa. Gòc gu' mèn nado' co' ngue's nii ngue's ya' loo chol hues xtàa gu'. Gòc gu' mèn co' ndxàp mod loo hues xtàa. Gòc gu' mèn co' ncha'la's ñèe hues xtàa. <sup>13</sup> Fxec yèe gu' loo thib hues xtàa gu' no loo tedib hues xtàa gu'. Fteri'th ftecan' gu' xtol che'n thib hues xtàa gu' no tedib hues xtàa gu' chele' hues xtàa gu' nco ñee loo gu' cón che'n co' ndxàc loo hues xtàa gu'. Xalque' mton' Crist xtol gu', tataaguè' fteri'th ftecan' gu' xtol thib hues xtàa gu' no xtol tedib hues xtàa gu'. <sup>14</sup> Más de cona, fque' lezo' gu' gunèe gu' hues xtàa gu'. Tac chele' gu' tataa li, le' sya, thidte gác gu' no thidte cue gu' loo cón che'n Crist par tyubdi's ndac gu' loo Crist. <sup>15</sup> Fcua'n gu' mod par cue ban gu' rye nda gu' no rye ndye'th gu' con hues xtàa gu' xal nee lezo' Diox. Le' sya, làth xtau'a, teche txyath gu' xtùuz gu' par thidte li gu' con' xal ñibe' Diox, co' nee di's, gác gu' xal thidte lad mèn loo cón che'n Diox. Tac por con'a mcui Diox gu'. No con'a nac co' guneee lezo' Diox gác loo gu'. Guuz gu' loo Diox: Diox quix U', Diox, láth mbez gu' Diox por ryethe con' co' ndxàc loo gu'.

<sup>16</sup> Bli gu' xtùuz cón che'n di's ndac che'n Crist axtaque' huen huen té'th gu' no axtaque' huen huen yaa'd cón che'n di's ndac che'n Crist yéc gu'. Bli gu' par ye'th lezo' thib xtàa gu' no tedib xtàa gu' loo cón che'n Diox. Blu' gu' loo thib xtàa gu' no loo tedib xtàa gu' cón che'n Crist. Blab gu' di's loo libr che'n Salmos co' nac xti's Diox. Bil' ro gu' himn co' nac labans co' nac di's natú' loo Diox. Ne'yathla'ste gu' guuz gu' loo Diox: Diox quix U', Diox látha. <sup>17</sup> Ryete con' ndli gu', que naca di's co' tyoodi's gu', que naca zin' co' ndli gu', bli gu' ryethe con'a por lèe Tad Jesús loo Diox tac tataa nac co' ñibe' Tad Jesús. Por lèe Tad Jesús guuz gu' Diox quix U', Diox, loo Diox xud na' co'se' mbez gu' Diox, ne.

*Di's ndxè' nda' cuent loo ryete mèn co' ndxela's loo cón che'n Diox por cón che'n Jesucrist xá mod ndxàal que tee ban ndac mèn làth xtàa mèn.*

<sup>18</sup> Mèngot co' nac xin' sa'l, ftubdi's gu' loo xin' sa'lbi'pe' gu' tac tataaque' ndxàal li gu' xal mèn co' ndxela'spe' loo Crist. <sup>19</sup> Mènbi' co' nac xin' sa'l, fque' lezo' gu' gunèe gu' xin' sa'lgotpe' gu'. No ne'tyoo xà'de lezo' gu' con xin' sa'lgotpe' gu' par yitac lezo' gu' con xin' sa'lpe' gu'. <sup>20</sup> Gu', ne, co' nac xin' xud gu' no xin' xna' gu', ftubdi's gu' di's co' mbez xud gu' no xna' gu' loo gu'. Tac con' ndxè' nac co' ndxòo lezo' Tad Crist. <sup>21</sup> Gu' co' nac gundan yín' gundan ted, ne'ta'de gu' xyàn lezo' xin' gu', gu' co' nac mèn co' angndxàc nayi' par ne'tyoo xà'de lezo' myen' gu' loo cón che'n Tad Crist. <sup>22</sup> Gu' co' nac moz, ftubdi's gu' loo patrón gu' loo rye con' ñibe' patrón gu' loo gu'. Ne'lide gu'i xal ndli mèn co' ngüi' ndxè' no ngüi' ba' par ne'yigàade mènna loo patrón mènna. Ndxè'leque', bli gu'i dib nzo

yéc gu' no dib nzo lezo' gu' xal mèn co', licque', ndxàp mod loo Diox. <sup>23</sup> Chol zin' co' ndli gu', bli gu' zin' dib nzo yéc gu' no dib nzo lezo' tac gu' nac mèn co', licque', ngue li sirv loo Crist. Ne'lìde gu' zin' xal ndli mèn sirv loo xtàa mèn loo izlyo' <sup>24</sup> tac gu' naneeque' no nonque' gu' le' gu' càaya' yalndxax co' ta' Tad Crist loo gu' co' nac con' co' yan' no gu' no co' gac che'npe' gu' yiloa tac gu', licque', ngue li sirv loo Tad Crist. <sup>25</sup> Chol mèn co' ndli con' ye'rsin', mèna càaya' yalndxax cón che'n con' ye'rsin' co' ndli mèna. Diox indlide par más tyu' thib mèn leque tedib mèn loo Diox.

## 4

<sup>1</sup> Le' gu' co' nac patrón na, ndxàal gac gu' mèn nali no mèn nambii loo moz gu'. Bli gu' thidte tyu' chol moz gu' loo gu'. Fte' lezo' gu' le' gu', ne, ngue no thib patrón no Tad loo bé'.

<sup>2</sup> Thidteneque' gure rez gu' Diox. Nalas gure gu' loo cón che'n Diox por tyubdi's ndac gu' loo Diox. Guuz gu' loo Diox: Diox quix U', Tad Diox, co'se' mbez gu' Diox por ryethe con'. <sup>3</sup> Gurez gu' Diox por nu', ne, le' Diox xal' ned xal' yó' loo nu' par co nu' yalbàn no tyoodi's nu' cón che'n Crist co' ngo casloo póla. Por cón che'n Crist co' ngo casloo loo mèn póla, por con'a ngue'en lezi'f ned nzon ndxè' nalle'. <sup>4</sup> Tolo gurez gu' Diox le' Diox lyath no daa par lu'en loo mèn cón che'n Crist co' ngo casloo ndoore' no tyoodizen xalque' ndxàala loo mèn.

<sup>5</sup> Fque tee ban ndac gu' loo mèn co' tarte yila's loo Crist. Fcua'n gu' mod toodi's no gu' mèna láth be' nda'i mod loo mèna par ñeene' ne'stolque' yila's mèna loo Crist. <sup>6</sup> Co'se' tyoodi's gu' con chol mèn, nabe'ste ftoodi's no gu' mèna ante con di's co' nac di's ndac par ta' gust lezo' mèn xal ndyoodi's gu'. Más de cona, ndxàal té'th gu' co' huenleque' par ñee gu' no ta' gu' cuent xá mod càb gu' loo mèna cón che'n xal ndxela's gu'.

*Di's ndxè' nda' cuent le' Pab ngue nii Diox loo mèn ciuda Colos, mèn co' ndxela's loo cón che'n Crist.*

<sup>7</sup> Tiquic co' ndxàc hues daa por cón che'n Crist, Tiquic co' anze'f nque' lezon co' indlá'ya'de daa no co' altantleque' ndyoo loo zin' che'n Tad Crist, Tiquic ta' cuent loo gu' cón che'n zin' co' ngue xo'f zin'en par ned nzon ndxè'. <sup>8</sup> Por cona, ngue tel'en Tiquic loo gu' par ñee Tiquic loo gu' xá nzo nu' ned nzo nu' ndxè'. Tegán Tiquic lezo' gu' loo cón che'n nu', ne. <sup>9</sup> Co'se' yi'th Tiquic loo gu', tel'en Ones con Tiquic loo gu'. Ryop myen' ndxàc hues na' por cón che'n Crist. Mbli nèe lezo' myen' loo cón che'n Crist co' nque' lezon. Nac ryop myen' mèn gulàazpe' gu', ne, par nedrè'. Ryete con' co' ndxàc loo nu' par ned nzo nu' ndxè' ryop myen' ta' cuenta loo gu' trè'.

<sup>10</sup> Aristarc co' nzo non le'n lezi'f ngue nii Diox loo gu'. Marc co' ndxàc hues yen' Mbèl' ngue nii Diox loo gu', ne. Gu' nonle' no nda'que' gu' cuent xal mnibe'len loo gu' cón che'n Marc. Chele' Marc yi'th nee máa gu' par nedrè', nabe'ste go no gu' Marc, ndee gu'.

<sup>11</sup> Chuch co' ne' tedib lèe Just ngue nii Diox loo gu', ne. Làth mèn che'n nación Israel co' naban trè', ante ryop myen' ndxè' co' nac Marc no Just, myen' ndxè' ngue lyath no daa loo cón che'n Diox par tolo ñibe'pe' Diox loo mèn. Ante ryop myen' ndxè' ntegán lezon loo zin' ndxè'. <sup>12</sup> Epafr co' nac thib mbi' co' nac mèn gulàaz gu', co' nxo'f zin' cón che'n Crist, ngue nii Diox loo gu'. Epafr ña'bque' loo Diox por cón che'n gu' par thidtene cue gu' nali, no par cue nèe gu' loo cón che'n Crist, no par gac gu' mèn nali no mèn nambii loo Diox par li gu' ryete con' co' nee lezo' Diox li gu'. <sup>13</sup> Tac daa nda cuent co' huenleque' le' Epafr nguen tín' lezo' no anze'f ndyóo Epafr cón che'n gu', no altantleque' ndoo Epafr loo zin' cón che'n gu', no cón che'n mèn co' ndxàc hues na' por cón che'n Crist yèez Laodice, no cón che'n mèn co' ndxàc hues na' por cón che'n Crist yèez Hierápolis. <sup>14</sup> Luc co' nac doctor co' anze'f nque' lezon ñèen ngue nii Diox loo gu'. Dem, ne, ngue nii Diox loo gu'.

<sup>15</sup> Gunii gu' Diox loo mèn co' ndxàc hues na' por cón che'n Crist le'n yèez Laodice. Gunii gu' Diox loo Nimf no loo mèn co' ndxela's loo Crist no loo cón che'n Crist, mèn co' nac mèn co' nqueltàa liz Nimf. <sup>16</sup> Co'se' yilo lab gu' cart ndxè', ftel' gu' cart ndxè' loo

mèn co' nqueltàa loo cón che'n Diox le'n yèez Laodice par lab mènà cart ndxè' tya, ne. Cart co' mtel'en loo mèn co' nqueltàa loo cón che'n Diox le'n yèez Laodice, co'se' yilo lab mèn yèez Laodice cart co' mtel'en loo mènà, ña'b gu' carta par lab gu'i, ne. <sup>17</sup> Guuz gu' loo Arquip: Hui', Arquip, thidtene blo yéc bli zin' cón che'n Diox co' mxo'f zin' Tad Crist lool par lila.

<sup>18</sup> Nalle', yub daa co' nac Pab mque' cart ndxè' loo gu' par ngue niin Diox loo gu'. Fte' lezo' gu' le' daa tatabe' ngue'que' lezi'f. Ndlyazen le' Diox tolo li anggàc con' ndac loo gu' par nedrè', ndee gu'. Taandxè' gàca.

## Ner Cart Co' Mque' Pab Ye's Loo Mèn Ciuda Tesalónica

*Mèn co' mblyath no Pab loo zin' co' mxo'fzin' Pab ngo no Pab co'se' mque' Pab ye's loo mèn co' ndxela's loo Diox por cón che'n Crist, mèn co' nqueltàa loo cón che'n Diox le'n ciuda Tesalónica.*

<sup>1</sup> Daa, co' nac Pab, ngue que'en ye's co' nac ner cart ndxè' loo gu', gu' co' ngòo loo cón che'n Diox por cón che'n Crist, gu' co' nqueltàa loo cón che'n Diox le'n ciuda Tesalónica. Leque tiemp, Silvan no Timote no daa, nu' ngue nii Diox loo gu'. Diox xud na' no Tad Jesucrist na' mcai gu' par nac gu' che'npe' Diox no che'npe' Tad Jesucrist na'. Ndlyazen le' Diox xud na' no Tad Jesucrist na' ryo' lezo' li anggàc con' ndac loo gu'. Ndlyazen le' Diox xud na' no Tad Jesucrist na' tolo li par yo nagàl lezo' gu' loo Diox no cue ban gu' rye nda gu' no rye ndye'th gu' làth xtàa gu'.

*Mèn ciuda Tesalónica co' ngòo loo cón che'n Diox mbly' loo taamas mèn xá mod ngola's mèn ciuda Tesalónica no xá mod ndyubdi's mèn loo Crist.*

<sup>2</sup> Mbezen Diox quix U', Diox, loo Diox por cón che'n ryete gu'. Nte'que' lezon ña'ben cón che'n gu' co'se' mbezen Diox, ne. <sup>3</sup> Thidteneque' indxathlasten mbezen Diox quix U', Diox, loo Diox, por cón che'n gu' co'se' mbezen loo Diox xud na' xá mod mxo'f zin' gu' zin' cón che'n Crist tac ndxela's gu' loo Crist. No mbezen Diox quix U', Diox, loo Diox, cón che'n gu' co'se' mbezen Diox. Tac naneequen xá mod anze'f mbliguth gu' zin' tac nque'que' lezo' gu' Diox no nque'que' lezo' gu' ñèe gu' hues xtàa gu'. Mbezen Diox quix U', Diox, loo Diox por cón che'n gu', ne, tac non daa xá mod ncha'la's gu' tac gu' nzi queeque' lezo' loo con' co' gac loo gu' no con' co' gac che'npe' gu' por cón che'n Tad Jesucrist na'. <sup>4</sup> Gu' co' ndxàc mèn huesen por cón che'n Crist, Diox nque' lezo' ñèe Diox gu'. Daa naneeque' le' Diox mcai gu' par yòo gu' loo cón che'n Diox no par que tee li gu' sirv loo Diox. <sup>5</sup> Tac co'se' mbly'en loo gu' cón che'n di's ndac, ne'nglu'dena loo gu' xal nac mod co' angndyoodi's mèn. Ndxè'leque', Xpii Natú' mblyath no daa co'se' mblon yalbàn loo gu'. Mblyath no Xpii Natú' gu', ne, axtaque' ngòp gu' yalxla's licque' nac di's cón che'n di's ndac ndxè'. Gu' non no naneeque' gu' xá mod mque tee ban daa làth gu' par mcàba con' ndac loo gu'.

<sup>6</sup> Le' por part cón che'n gu' na, gu' mblique' xal mbly' nu' loo gu'. No mblique' gu' xalque' ngòc mod co' mbly' Tad Jesucrist loo gu' par li gu' xal ndyee di's co' mbly' Jesucrist loo mèn. No ndyalque' gu' mbin gu' di's co' nac di's ndac, con gust, xalque' mbly' Xpii Natú' ngòca tataa loo gu' mastale' mxactii gu' axta plóthe. <sup>7</sup> Tataa mod leque gu' mbly' gu' xal thib muestr loo mèn co' ndxela's loo cón che'n Diox por cón che'n Crist par ned le'n rye yèezya' che'n làaz mèn macedon no rye yèezya' che'n làaz mèn acay xá mod mque tee ban ndac gu' par tataa mod que tee ban ndac mèn, ne. <sup>8</sup> Por cona, por cón che'n gu' mbyath mbyèn cón che'n di's ndac che'n Diox loo mèn huax lugar. Ne'ngyathte no ne'ngyènte cón che'n di's ndac ante loo mèn yèezya' che'n làaz mèn macedon no mèn yèezya' che'n làaz mèn acay. Ndxè'leque', mbyath di's ndac ndxè' loo mèn ryete lugar co'te' mbin mèn xal ndxela's gu' loo Diox. Por cona, ya inquinte tolo ta' nu' cuent cón che'n xá mod ndxela'sque' gu' loo Diox no loo cón che'n Diox loo taamas mèn. <sup>9</sup> Ndxè'leque', ale yub mèn nda' cuent no ndyoodi's mèn cón che'n xal mcàba loo gu' co'se' mbi'th too naa nu' gu' no mbly'en cón che'n di's ndac ndxè' loo gu'. Le' gu' na, nabe'ste mbly' gu' lezo' gu' co'se' ngo nu' làth gu'. Nda' mèn cuent cón che'n gu', ne, xá mod mblá' gu', ya ne'tolode ngue li gu' cas loo rye tatol no rye naxnax no rye mdo' no rye gunab co' mbez gu' ngòc diox gu' ndoore' yila's gu' loo cón che'n Crist. Tataa mbly' gu' par ngòo gu' loo cón che'n Diox no par tlo gu', li gu' sirv loo angoluxte Diox co' naban co' nac licpe' Diox co' inquediide mèn. <sup>10</sup> Leque mèn yèezya' che'n làaz mèn macedon no mèn yèezya' che'n làaz mèn acay nda' cuent cón che'n gu' loon xá mod nzi quee lezo' gu' loo con' co' gac loo gu' no co' gac che'npe' gu' axta co'se' gac huiz bere Jesús co' nac

xgan' Diox, yi'th Jesús xgan' Diox loo bé', Jesús co' mbli Diox ngro xban làth mèn nguth. Jesús nac xa' co' mtelá' na' loo con' ryes par ne'tetiide Diox na' no ne'zib quíide Diox na' co'se' gac huiz co' yilo la's Diox loo mèn no co' yilo tub rez Diox cón che'n mèn.

## 2

*Trè' nque lu' cón che'n zin' co' mxo'fzin' Diox loo Pab.*

<sup>1</sup> Pues leque gu' co' nac mèn huesen por cón che'n Crist, gu' nda' cuent co'se' mbal lon yalbàn loo gu', di's co' mblon yalbàn loo gu'a, gu' ngola'sque' di'sa no ndyubdi'sque' gu' di'sa. Ne'ngui'thte nu' anxle' loo gu'. <sup>2</sup> Mastale' mbi'th nu' loo gu' loo mtin mèn cuida Filip nu' axta plóthe mbly'a's mèn cuida Filip, no mxec nu' ngòc ngòc nguàal con' co' mbli no mèn cuida Filip nu', no gu' nda'que' cuent co' mbli no mèn na nu' co' huenleque', per Diox ne'nglá'ya'de nu'. Ndxé'leque', mbli Diox par mbi'th nu', mblo nu' yalbàn loo gu' co' ndlu' xá mod lyá' mèn loo con' ryes. No con dib axla's mbli nu' con'a, mastale' ngòc nayi' mèn gulàaz gu' ñèe mèn gulàaz gu' nu'. <sup>3</sup> Tac co'se' mblo nu' yalbàn loo gu', thib lite nac di's co' mblo nu' yalbàn. Inacte di'sa di's co' alithe ngo nu' yalbàn. Ne' ne' inac di's co' ngo nu' yalbàn di's zab co' ndli par quedì nu' gu'. <sup>4</sup> Ndxé'leque', ner mbli Diox huax con' loon par ñee Diox ñeene' ché' tyubdizen loo Diox. Ngoloa, ngòoque' lezo' Diox ndlin sirv loo Diox. Por cona, mxo'f zin' Diox zin' cón che'n di's ndac ndxè' loon. Por cona, ngon yalbàn loo mèn tac ngòo lezo' Diox gunèe Diox daa. Ndxé'leque', ingoden yalbàn par yòo lezo' mèn di's co' mbezen loo yalbàn co' ngon. Diox ndli con' loo ryete na' par ñee Diox ñeene' ché' too lezo' na' loo cón che'n Diox. <sup>5</sup> Tac gu' naneeque' nec thib vez ne'ngliden par asemblin par mdan gust lezo' gu' no par nda' nu' xquith lezo' gu' par lyath no gu' daa loo con' naquin daa. Ne' ne' ndub rez nu' chol di's loo gu' par tataa mod li nu' gan tmi loo gu'. Con' ndxè' nonque' gu' no naneeque' gu'. Yende cón más niin. Diox ngüi'que' loo con' co' nde teele' ndli nu'. <sup>6</sup> Ne' ne' tar cua'n nu' mod par li nu' le' mèn li con' guryath no con' guryèn loo nu', que naca gu', o que naca tedib cua' mèn co' nac mèn tedib yèez co' nzo loo cón che'n Crist. Mastale', ngácpe' nu' ngli nu' le' gu' ta' cuent cón che'n nu' le' nu' nacque' mèn co' ndxé' di's che'n Crist no ta' gu' cuent, ne, le' Diox mblec nu' par xo'f zin' nu' zin' ndxè' loo mèn. <sup>7</sup> Ndxé'leque', ngòc nu' mèn nado' co' ngòp mod làth gu' xal thib xa'got co' nac gundan co' ñee rsi' ñee rso xin' loo gu'. <sup>8</sup> Anze'f nque' lezo' nu' ñèe nu' gu' axta mbly'a's nu' li nu' con' ndac loo gu' axta mbly'a's nu' ta' nu' cuent cón che'n di's ndac loo gu'. No iante cón che'n di's ndac mbly'a's nu' ta' nu' cuent loo gu'. Ndxé'leque', mbly'a's nu' gac nu' xal mozpe' gu' co' li sirv loo gu' no tyactii nu' por cón che'n gu' axta gath nu' chele'i naquin tac arid nazin' gu' nu'. <sup>9</sup> Nte' lezo' gu', mèn huesen por cón che'n Crist, xá mod nguth ngüi' lezo' nu' par mbli nu' zin' ze no yál' par mbli nu' gan thib le' rol lua' par hua nu'. Mbli nu' zin' par ne'ndoo dó'de nu' loo nec thib gu'. Làth xtau'a, mblon yalbàn cón che'n di's ndac che'n Diox loo gu'.

<sup>10</sup> Gu' nac mèn co' nda' cuent cón che'n nu'. No ndub hui' Diox loo nu', ne, le' nu', lìcque', mque tee ban nalìque' làth gu' co' ngola's no co' nzo loo cón che'n Diox, no nambii mque tee ban nu' làth gu' co' nac mèn co' ndxela's loo Diox por cón che'n Crist. Mod co' mque tee ban nu' làth gu' ne'ndade nu' lugar loo yende chó mèn quexù' que' fals mèn na nu' làth gu', ¿lé'? <sup>11</sup> Lomisque', nanee gu', ne, xá mod mco'x nu' loo gu' no mtegán nu' lezo' thib thib gu' xal ndli thib gundan yín' gundan ted loo xin' gundana, ¿lé'? <sup>12</sup> Mnibe' nu' loo gu' no mtan' nu' di's loo gu', nabe'ste cue ban gu' xalque' ndxàal cue ban mèn co' ngòo loo cón che'n Diox no mèn co' nac che'npe' Diox. Tac Diox ngurez gu' par yòo gu' co'te' ñibe' Diox no co'te' ndxà'x xniì che'n Diox loo ryethe con' par gac che'npe' gu' con' roo con' xèn che'npe' Diox, ne.

<sup>13</sup> Por cona, nu' ne, thidteneque' mbez nu' Diox quix Diox loo Diox tac co'se' mbìn gu' di's cón che'n di's ndac che'n Diox co' mblo nu' yalbàn loo gu', gu' mdyal mbìn cón che'n di's ndac no ngola's gu' cón che'n di's ndac. Tac ne'ngònte gu' di'sa no ne' ne' ngala's gu' di'sa xalque' nac di's co' ndyoodi's chol mèn. Ndxé'leque', ngola's gu' loo cón che'n di's ndac che'n Diox xal nac di's co', lìcque', mtel' Diox loo mèn. Di'sa ndlu' loo



gu' xá mod ndxàal que tee ban gu' no xá mod ndxàal li nèe gu' gu', gu' co' ndxela's loo Crist, loo cón che'n Diox. <sup>14</sup> Gu' co' nac mèn huesen por cón che'n Crist, co'se' mdub ngu's mèn gulàaz gu' gu' no mtetii mèn gulàaz gu' gu' axta plóthe, lalque' mxac gu' xal ngòca loo mèn nación Israel co' ndxela's loo Jesucrist, mèn co' naban le'n yèezya' che'n làaz mèn jude. Tac gu', ne, mxactii lomisque' yalndyub ngu's co' mbli no mèn nación gu' gu' xal mxactii mèn nación Israel co' ndxela's loo Jesucrist cón che'n mèn gulàazpe' mèn nación Israel. <sup>15</sup> Mèn nación Israela mbeth Tad Jesús xalque' mbeth mèn nación Israel mèn gulàazpe' mèn nación Israel, mèn co' mde'th di's co' ndxab Diox cón che'n Tad Jesús. Per iante mbeth mènà Jesús, no mèn co' mde'th di's co' ndxab Diox. Lomisque' ne, mchobla' mènà nu' làaz mènà. Indlide mènà con' co' ndxò lezo' Diox. Ndxle'leque', ale le'le' ndxàc nayi' mènà ñèe mènà chol xtàa mèn. <sup>16</sup> Co'se' ndlya's nu' tyoodi's no nu' mèn co' inacte mèn nación Israel cón che'n di's ndac par bel'que' lyá' mènà loo con' ryes, ne, ale inda'de mèn nación Israel lugar tyoodi's no nu' mènà. Tataa mod, sate más ncu'a'n mènà xquin mènà no xtol mènà. Por lult, ngocloo tín' Diox loo rye mèn dib anax nación Israel par mtetii Diox mènà. Cona, mcàb loo mèn nación Israel le' Diox mzib quii loo mèn nación Israel par mxactii mènà.

*Anze'fnguen lezo' Pab ya too naa Pab mèn co' ngola's loo cón che'n Crist, mèn co' ngo ban le'n ciuda Tesalónica.*

<sup>17</sup> Gu' co' nac mèn huesen por cón che'n Crist, co'se' mbii nu' loo gu' ndxep tiemp, mastale' yende mod hui' nu' loo gu', nte'que' lezo' nu' máa gu' no anze'f ndlya's nu' yi'th nee nu' máa gu' par nedrè'. <sup>18</sup> Anze'f mblya's nu' yi'th nee nu' gu' par nedrè'. Per más mblyazen gal neen gu', daa co' nac yub Pab. Huax vez mblyazen gal neen máa gu'. Per cadque' mblya's nu' yi'th nu', chàa, ndxò Mebizya' xi'tha. Ncà' ya yende mod yi'th nu' par nee nu' máa gu'. <sup>19</sup> Tac ¿xá nee gu'? ¿Cón nac co' nzi quee lezo' nu', à'? No ¿cón nac co' ndli ndyac lezo' nu', ne, à'? No ¿cón nac co' ndli nxyo'f nde' nxyo'f ndla' lezo' nu' co'se' yi'th xi Tad Jesucrist na', à'? Pues, gu' nac co' li tyac lezo' nu' co'se' yi'th Tad Jesucrist na' tedib vez. <sup>20</sup> Aa. Lìcpe' ba'i, gu'que' nac co' li par tyac lezo' nu' co'se' gac huiz yi'th xi Tad Jesucrist na'.

### 3

<sup>1</sup> Por cona, co'se' guneen ya ne'xecte daa tolo que tee xà'en loo gu', mblin xtùuz no mdoo lezon mbyan' ante daa le'n ciuda Aten <sup>2</sup> par tel'en Timote, co' ndxàc huesen por cón che'n Crist, par nee Timote máa gu' par nedrè' tac Timote nac thìb mbi' co' nxo'f zin' zin' co' nac che'n Diox. Timote ndli zin' con daa ned ngue tee gon yalbàn cón che'n di's ndac cón che'n Crist co' ndlu' xá mod lyá' mèn loo con' ryes. Mtel'en Timote loo gu' par yi'th li nèe Timote gu' no par co'x Timote loo gu' no li Timote par ye'th lezo' gu' loo cón che'n con' co' ndxela's gu' loo Crist. <sup>3</sup> Tataa ta' Timote cuent loo gu' par ne'tyoo xà'de lezo' nec thìb gu' loo cón che'n Crist por cón che'n yalndyub ngu's no ngòc nguàal con' co' ndxàc loo gu'. Leque yub gu' nda'le' cuent co' huenleque' le' Diox mdoo na' par càba loo na' tyactii na' por cón che'n Crist. <sup>4</sup> Más de cona, co'se' be' ngo non gu'a, mdan cuent loo gu' le' na' tyactii que'. Tataaque' ndxàca loo na' nalle' xalque' mdan cuenta loo gu'a. <sup>5</sup> Por cona, daa ne, co'se' ne'tolode nxec daa mque tee xà'en loo gu' no inonte daa máa gu', cona mtel'en Timote par li lazen xá mod tolo nque tee ban gu' loo con' co' ndxela's gu' loo Crist. Tac anze'f ndyóon no nda noque' lezon ne'stolque' pá, chàa, mbi'th Mebizya, mbi'th mdoby'a' Mebizya gu'. No thìb descuid càba loo gu' anxe' gac zin' co' mbi'th xo'f zin'en loo gu'.

<sup>6</sup> Per nalle' Timote ndye'thle', ngua Timote loo gu' le'n ciuda Tesalónica. No nabe'ste mda' Timote cuent loo nu' le' gu' huenque' nziri' no toloque' ndxela's gu' loo Crist no loo cón che'n Crist. Mda' Timote cuent, ne, nzi que'que' lezo' gu' ñèe gu' hues xtàa gu'. Mda' Timote cuent loo nu' le' gu' nte'que' lezo' cón che'n nu', ne. No mda' Timote cuent loo nu' anze'f ndlya's gu' ñèe gu' máa nu' xalque' ndlya's nu' ñèe nu' máa gu', ne. <sup>7</sup> Por cona, xalque' mèn co' ndxàc huesen por cón che'n Crist, mastale' ndyactii nu' no ndub

ngu's mèn nu', co'se' mbìn nu' cón che'n cuent co' mda' Timote loo nu' cón che'n gu', ryete nu' mdyac lezo' no mbye'th lezo' nu' axta plóthe. No ndyac lezo' nu' cón che'n gu' tac, lícque', mbli nèe gu' gu' loo con' co' ndxela's gu' loo Diox no loo cón che'n Diox. <sup>8</sup> Con' co' ndxàc loo gu' ba' ndli nden' nu' xal mèn co' ngro xban tac gu' nzi li nèeque' gu' loo cón che'n Tad Crist. <sup>9</sup> Por cona, axta ne' ne' gác gab nu' Diox quix non U', Diox, loo Diox co'se' mbez nu' Diox por cón che'n gu' tant ndyac lezo' nu' por cón che'n gu' co' ndli gu' ndxàc loo nu' loo Diox. <sup>10</sup> Imbedte nu' no indxathlaste nu' mbez nu' Diox ze no yál' par ta' Diox lugar loo nu' yi'th nèe nu' máa gu' no par tolo ta' nu' cuent cón che'n di's ndac co' be' ndxàc falt té'th gu', par tolo li nèe gu' gu' loo con' co' ndxela's gu' loo Crist no loo cón che'n Crist.

<sup>11</sup> Anze'f ndlya's nu' le' yub Diox xud na' no Tad Jesucrist na' xal' ned xal' yó' loo nu' no lyath no Diox no Tad Jesucrist nu' par yi'th nee nu' máa gu' par nedrè'. <sup>12</sup> No ndlya's nu' le' Diox li par tolo té'th gu' cón che'n Diox no tolo que' lezo' gu' ñèe gu' thib xtàa gu' no tedib xtàa gu' no que' lezo' gu' ñèe gu' rye mèn xalque' nque' lezon ñèen gu'. <sup>13</sup> No ndlyazen le' Diox li nèe xtùuz gu' no lezo' gu' loo cón che'n Crist. Ndlyazen le' gu' gác mèn co' thidteneque' ngro xà' loo cón che'n xab izlyo' par gác gu' che'npe' Diox. Le' sya, co'se' gác huiz co' yi'th no Tad Jesús ryethe mèn co' nguth, mèn co' ryo xban ladpe' huiza, mèn co' ngro xà' loo cón che'n xab izlyo' co' ngòc che'npe' Diox, nec thib mod no nec tedib mod ne'gàpte gu' nec thib dol loo Diox.

#### 4

*Trè' nda' cuent xá mod ndxàal que tee ban mèn par tataa mod yòo lezo' Diox loo mod co' nzi tee ban mèn.*

<sup>1</sup> Nalle', mèn huesen por cón che'n Crist, ña'ben loo gu' no tan'en di's loo gu' xalque' ñibe' Tad Jesús no xalque' mbli'en loo gu' xá mod ndxàalque' que tee ban gu' no li gu' co' yòo lezo' Diox, tataaque' tolo bli gu' co' yòo lezo' Diox ñèe Diox gu'.

<sup>2</sup> Gu' non no naneeque' gu' xal nac di's co' mnibe'en loo gu' par li gu'i. Por lèe che'n Jesucrist, ñibe'en loo gu' par li gu'i. <sup>3</sup> Con' co' ndlya's Diox li gu' nac le' gu', lícque', ryo xà' loo cón che'n xab izlyo' par gác gu' mèn che'npe' Diox par ñibe' Diox loo gu'. No gune lezo' Diox ne'líde gu' yalburrid no ne'cua'nte gu' xin' huan gu'. <sup>4</sup> Diox ndlya's le' thib thib gu' té'th no ta' gu' cuent xá mod ndxàal li gu' par tyub ban ndac gu' con thib xin' sa'l gu' par que tee ban li ryop sa'l gu' no par li ryop sa'l gu' con' guryath no con' guryèn loo xin' sa'l gu'. <sup>5</sup> Ne'cue ban node gu' xin' sa'l gu' xal ndli mèn co' ndyub chol con' ye'rsin' lezo' par ndyub yo'f lezo' mèn par li mèn chol con' ye'rsin' xal ndli mèn co' indlibe'de Diox no mèn co' indxònte cón che'n Diox. <sup>6</sup> No ne'líde nec thib gu' ryes par quedii gu' hues xtàa gu' nec thib mod par li gu' yalburrid no cua'n gu' xin' huan gu' làth xtàa gu'. Tac Tad Diox anze'f nè tetii rye mèna xalque' mdalen cuenta loo gu' no xal mco'xen loo gu' cón che'n ryete con' ndxè' ndoore'. <sup>7</sup> Diox mcui na' par cue ban na' xalque' mèn co' ngro xà'pe' loo cón che'n xab izlyo', mèn co' ngòc che'npe' Diox. Indlya'ste Diox cue ban na' loo con' xin' no loo con' cap. <sup>8</sup> Por cona, ngue niin loo gu': Mèn co' ntè'b di's co' ngue lu'en loo mèna, inacte le' mèna ante ngue tè'b di's co' mbez chol mèn loo mèna. Ndxè'leque', ngue tè'b mèna yub Diox co' mblàa Xpii Natú' loo na'.

<sup>9</sup> Per cón che'n xá mod ndxàal que' lezo' gu' ñèe gu' mèn co' ndxàc hues xtàa gu', ya inquinte que'en ye's loo gu' cón che'n con'a. Tac yub Diox mbli' loo gu' xá mod que' lezo' gu' ñèe gu' thib xtàa gu' no tedib xtàa gu'. <sup>10</sup> Tac, lícpe' ba'i, tataaque' nque' lezo' gu' ñèe gu' mèn co' ndxàc mèn hues xtàa na' par ned le'n rye yèezya' che'n làaz mèn macedon. Per daa ña'b loo gu', mèn huesen por cón che'n Crist, sate más toloque' bli gu' par que' tín' lezo' gu' ñèe gu' thib hues xtàa gu' no tedib hues xtàa gu'. <sup>11</sup> Fcua'n gu' mod más nagàl gure ban gu'. Con gust bli gu' zin' co' nac zin' co' ndxác gu' ndli gu' con nít loon loo gu' no con nít loon yéc gu' xalque' mnibe'en loo gu' no xalque' mtan' di's loo gu' par li gu'. <sup>12</sup> Tataa bli gu' par li mèn co' inzode loo cón che'n Crist con' guryath no con' guryèn loo gu' no par ne'gác faltte con' co' naquin gu' loo gu'.

*Trè' ndlu' xá mod yi'th Tad Jesucrist loo bé' loo mbii tedib vez.*

<sup>13</sup> Ndlyazen niin tedib con' loo gu', ne, mèn huesen por cón che'n Crist: Indlyasten le' gu' tua'te cue par ne'ta'de gu' cuent cón che'n mèn co' ngola's loo Crist no loo cón che'n Crist, co' nee di's, mèn co' nguth. Ndxé'leque', ndlyazen le' gu' ta' cuent co' huenleque' cón che'n mèn par ne'xide yéc gu' no ne'xide lezo' gu' arid por cón che'n mèn xal nzi xi yéc mèn no nzi nxi lezo' mèn, mèn co' inzi queede lezo' loo cón che'n Diox. <sup>14</sup> Tac texal ndxela's na' le' Jesús nguth no ngro xban Jesús, tataaguè' ndxela's na' le' Diox li thidte yi'th no Jesús xpíi no alm rye mèn co' nguth, mèn co' ngola'sque' loo Jesús no loo cón che'n Jesús. Gàc con' ndxè' co'se' yi'th xi Jesús mèn co' ndxela's loo cón che'n Diox por cón che'n Jesús.

<sup>15</sup> Por cona, ngue ta' nu' cuent cón che'n con' ndxè' loo gu' xal mblu' Tad Crist loo gu' le' na' co' be' nzi ban co'se' gac huiz yi'th xi Tad Crist mèn co' ndxela's, ne'gàcte na' mèn co' ya sál' ner Tad Jesús mèn co' nguth, mèn co' ngola's loo Tad Crist no loo cón che'n Tad Crist. <sup>16</sup> Tac leque yub Tad Crist Jesús yi'th loo bé' loo mbii. Cabii gab Tad Crist Jesús: ¡Ya' gu' ndyàa na', ey! Le' sya, thib angl co' ñibe' loo taamas angl cabii gab angla: ¡Ya' gu' ndyàa na', ey! Làth xtau'a, thib angl cabii cues trompet che'n Diox. Le' sya, mèn co' nguth, co' nac mèn co' ngola's loo Crist Jesús, nerleque' mèn ryo xban. <sup>17</sup> Le' yiloo na, na' co' be' nabanque', chàa, yáp no na' mèn co' nguth co' ngola'sque' loo Crist Jesús, co' ngro xbanda. Bii no na' mèn loo mbii loo bé' le'n xcuau par ya sál' no na' mèn Tad Crist Jesús loo mbii loo bé'. Tataa mod bii no na' Tad Crist Jesús thidteneque'. <sup>18</sup> Por cona, ngue niin loo gu': Ftegán gu' lezo' thib hues xtàa gu' no lezo' tedib hues xtàa gu' xal ndlu' di's ndxè' loo na'.

## 5

<sup>1</sup> Per cón che'n tiemp, co' nee di's, lín' no mbe' no huiz co' gac co'se' yi'th Tad Crist, inquinte arid par que'en ye's cón che'n lín' no tiemp loo gu', ndyaquen, mèn huesen por cón che'n Crist. <sup>2</sup> Gu' nonque' no nda'que' gu' cuent co' huenleque' cón che'n huiz co'se' yi'th Tad Crist gac huiza thib huiz co' yende chó mèn ta' cuent no co' yende chó mèn mbed. Huiza gac xal co'se' ndlyàa huan' liz mèn thib tiemp co'se' yende chó mèn non yi'th huan'. <sup>3</sup> Tac co'se' gab mèn loo xtàa mèn co' ne'tyalte yila's loo Tad Crist: Nase nagàl nziri' mèn, ¿lé? Yende cón ndyac mèn no yende cón ndli xol loo mèn, ¿lé? Sya, látha, chàa, gac con' ryes loo mèn. Lyux mèn no gac yalnè co' ten' mèn xal co'se', chàa, nde thib yalnè loo thib xa'got co' ndoo nac xin' par gáal mbed. Ne'lyá'de mèn loo yaltii co' gac loo mèn huiz co' tetii Diox no zib quii Diox mèn. <sup>4</sup> Per gu', mèn huesen por cón che'n Crist, inacte gu' mèn co' ncuau loo no co' ncuau yéc par cue cuau lezo' gu' par, chàa, gac huiz co' yi'th Tad Crist loo gu' xal co'se', chàa, ndlyàa huan' liz mèn. <sup>5</sup> Tac ryete gu' nacque' mèn co' ndyub xniì yéc no mèn co' ndyub xniì lezo' loo cón che'n Diox co' nac con' licpe'. Inacte gu' mèn co' ncuau yéc no mèn co' ncuac loo co' nzi tee ban loo yál'cuau. <sup>6</sup> Por cona, ne'gàcte na' mèn co' nzi cuau lezo' xal mèn co' indxela'ste co' nac xal mèn co' nzi yàt, co' nee di's, nzi tee ban mèn loo yál'cuau. Ndxé'leque', nalas cue na' no ndxe'sleque' cue na' tac nde zin' gaxle' tiemp yi'th xi Crist na'. <sup>7</sup> Tac gu' naneque', mèn huesen por cón che'n Crist, licque', mèn ndxàt yál'. No mèn co' nac mèn gu, ndyuuz mèn yál'. <sup>8</sup> Per por part cón che'n na', na' nacque' mèn co' nzi tee banque' loo cón che'n Tad Crist xal mèn co' nzi tee ndxáal ze. No ndxe'sleque' ndxàal cue ban na'. Ne'gàcte na' xal mèn co' ndyuuz yál'. Ndxé'leque', ñibe' na' loo lezo' na' ante que tee ban na' loo con' ndac. Licque', ndxàal gáp na' yalxla's tín' loo Diox no que'que' lezo' na' Diox no que'que' lezo' na' ñèe na' hues xtàa na' par ne'yiza'de na' na' loo cón che'n Diox xal ndli thib solndad co'se' ntau' solndad pech solndad con camis yi'f solndad par ne'yaa'dte cuchi lad solndad no par ne'yidin'te bal lad solndad. Tataa mod, ne, cue quee lezo' na' loo con' ndac co' gac loo na' co'se' yi'th xi Crist na' tac na' yòo ban no Diox thidtene yiloo. Tataa li na' par gaca loo na' loo cón che'n Tad Crist xal ndli thib solndad co'se' ndub solndad thib sombrèl yi'f yéc solndad par tau' sombrèl yéc solndad loo con' ryes. <sup>9</sup> Tac

Diox ne'mbecte na' loo cón che'n Crist par tetii Diox na' co'se' tub rez Diox cón che'n rye mèn. Ndxé'leque', mbli Diox mblyá' na' loo con' ryes por cón che'n Tad Jesucrist na'.<sup>10</sup> Tad Jesucrist nguth por cón che'n na' par gàca loo na' co'se' zin huiza, que naca naban na', que naca nguth na', thidteneque' yòo ban no na' Tad Jesucrist. <sup>11</sup> Por cona, ngue bez nu' loo gu': Toloque' bli gu' par ye'th lezo' thib hues xtàa gu' no tedib hues xtàa gu'. No bli gu' par tolo té'th no tolo tyubdi's thib hues xtàa gu' no tedib hues xtàa gu' loo cón che'n Tad Jesucrist xalque' ndli gu'.

*Pab mco'x loo mèn co' ngola's loo Tad Crist, mèn co' ngòo loo cón che'n Tad Crist.*

<sup>12</sup> Ña'ben loo gu', ne, mèn huesen por cón che'n Crist: Bli gu' cas no gòp gu' mod loo mèn co' ndxàc hues na' co' nco'f zin' cón che'n Tad Crist làth gu', mèn co' ndyoo ner no co' ndyoo naa loo gu', mèn co' nco'x cón che'n Tad Crist loo gu'. <sup>13</sup> Ndlyazen bli gu' cas loo mèn no toloque' que' lezo' gu' ñèe gu' mèn axta plóthe por cón che'n zin' co' ngue xo'f zin' mèn loo gu' co' nac cón che'n Crist. No nabe'ste gure ban ndac gu' làth xtàa gu' no toloque' gure ban gu' rye nda gu' no rye ndye'th gu' làth xtàa gu'.

<sup>14</sup> Lomisque' ne, mèn huesen por cón che'n Crist, ñibe'en no tan'en di's ndxè' loo gu': Fco'x gu' ndxep loo mèn no gunii gu' ndxep loo mèn nado' di's nado' cuent, loo mèn co' nzi tee za'f. Ftegán gu' lezo' mèn no bli gu' par ye'th lezo' mèn co' nzi tee ndoo xà' lezo' loo cón che'n Crist. Blyath no gu' mèn co' nguu's xtùuz no co' nguu's lezo' loo cón che'n Crist. Ale, fxec yèe gu' no fcha'la's gu' gunèe gu' ryete xtàa gu'.

<sup>15</sup> Anderhuen gu' no chó Diox chó nee gu'. Ne'ta'de gu' lugar co xtàa leque gu' con' ye'rsin' co' ndli no xtàa gu' gu' xal ngo xtàa xtàa gu' con' ye'rsin' co' ndli taamas mèn loo xtàa mèn. Ndxé'leque', fcu'a'n gu' mod tolo li gu' con' ndac loo thib xtàa gu' no loo tedib xtàa gu' no loo ryete mèn dib athu loo izlyo'.

<sup>16</sup> Fxo'f nde' fxo'f ndla' lezo' gu' loo ryethe con' co' ndli nxi lezo' gu'. <sup>17</sup> Ne'cuedte gu' no ne'lá'de gu' toloque' gurez gu' Diox cón che'n ryethe con'. <sup>18</sup> Guuz gu': Diox quix U', Diox, loo Diox cón che'n ryethe con' ndxàc loo gu'. Tac con'aque' nac co' nee lezo' Diox no co' ndlya's Diox li gu' tac gu' nac che'npe' Crist Jesús.

<sup>19</sup> Ne'tau'te gu' no ne'càde gu' loo Xpii Natú' no loo con' ndlya's Xpii Natú' li Xpii Natú' loo gu' par ye'th lezo' gu' loo cón che'n Tad Diox. <sup>20</sup> Ne'tè'bte gu' no ne'xiis node gu' di's co' ngo mèn yalbàn xal ñibe' Xpii Natú' che'n Diox loo mèn par co mèn a yalbàn loo gu'. <sup>21</sup> Fteche ftexyath gu' xtùuz gu' no lezo' gu' loo ryethe con'. No bli gu' preb loo ryethe con' par ñee gu' ñeene' ché' huen naca o ché' ihuente naca. Làth xtau'a, fcu'i gu' con' ndac par li gu' con' ndac. <sup>22</sup> Fque tee xà' gu' loo ryethe con' ye'rsin'.

<sup>23</sup> Diox co' ndli le' na' nagàl yo lezo' loo Diox par cue ban na' rye nda na' no rye ndye'th na' loo xtàa na', Diox li le' gu' gac mèn co', lìcque', ngro xà' loo cón che'n xab izlyo', co' ngòc che'npe' Diox. Tataa quenap Diox xpíi gu' no alm gu' no lad gu' par yende chó con' yizi'f no yiga's loo gu' no yende chó quexù' gu' co'se' gac huiz yi'th xi Tad Jesucrist na' na'. <sup>24</sup> Diox co' mcui gu', Diox lique' le' ryete con' ndxè' gacque' loo gu'. Loo Diox ndxàp na' yalxla's no ndxela's na' thidtene.

*Pab ngue toodi's lult di's che'n cart ndxè'. No ngue nii Pab Diox loo mèn.*

<sup>25</sup> Mèn huesen por cón che'n Crist, gurez gu' Diox por cón che'n nu'.

<sup>26</sup> Gunii gu' Diox loo ryete mèn hues na' por cón che'n Crist xalque' nac mod co' nii gu' Diox loo xtàa gu'.

<sup>27</sup> Daa ngue ñibe' con' ndxè' loo gu' xal ñibe' Crist loon par niina loo gu'. Blab gu' cart ndxè' loo taamas mèn co' nac hues na' por cón che'n Crist co'te' nzo gu', ndee gu'.

<sup>28</sup> Ndlyazen le' Tad Jesucrist toloque' li anggàc con' ndac loo gu'. Taandxè' gàca.

## Mbryop Cart Co' Mque' Pab Ye's Loo Mèn Ciuda Tesalónica

*Pab mque' ye's loo mèn co' ngola's loo cón che'n Crist, mèn co' mqueltàa loo cón che'n Diox le'n ciuda Tesalónica.*

<sup>1</sup> Daa, Pab, ngue tel'en tedib cart co' nac mbryop cart loo gu', gu' co' ndxàc mèn hues nu' por cón che'n Crist, gu' co' nqueltàa loo cón che'n Crist le'n ciuda Tesalónica, gu' co' thidte ndxàc loo cón che'n Diox co' nac xud na' no gu' co' thidte ndxàc loo cón che'n Tad Jesucrist. No leque tiemp, ngue nii Silvan no Timote Diox loo gu'. <sup>2</sup> Ndlyazen le' Diox xud na' no Tad Jesucrist na' ryo' lezo' li anggàc con' ndac loo gu'. Ndlyazen le' Diox xud na' no Tad Jesucrist na' li par yo nagàl lezo' gu' loo Diox no par cue ban gu' rye nda gu' no rye ndye'th gu' làth hues xtàa gu'.

*Trè' ngue lu' le' Diox tub rez cón che'n mèn co'se' bere Tad Jesucrist, yi'th Tad Jesucrist loo bé' loo izlyo'.*

<sup>3</sup> Gu' co' nac mèn huesen por cón che'n Tad Crist, ngue niin loo gu': Toloque' gab nu' Diox quix U', Diox, loo Diox, por cón che'n gu' tac nu' ñee no non nu' le' gu' sate más ndxela's loo Diox no loo cón che'n Diox. No ñee nu' no non nu' le' gu' sate más nque' que' lezo' ñee gu' thib xtàa gu' no tedib xtàa gu'. Tataa mbez nu' loo Diox tac ndxàalque' li nu' tataa. <sup>4</sup> Por cona, axta nu' ndyoodi's cón che'n gu' loo mèn co' nqueltàa loo cón che'n Diox. No axta nda' gust lezo' nu' co'se' ndyoodi's nu' cón che'n gu' loo mèn co' ndxela's por ncha'la's gu' no nxec yèe gu', no ndxàp gu' yalxla's loo Diox mastale' ndxàc ryethe con' co' nac ngòc nguàal con' co' ndxàc loo gu' co' ndli nxi lezo' gu', co' nac co' ndub ngu's mèn gu'. <sup>5</sup> Pues con' co' nac ngòc nguàal con' co' ndxàc loo gu'a ndlu' le' Diox nac Diox nalì no Diox nambii por mod co' ndub rez Diox cón che'n gu' par ndxàalque' ngòo gu' loo cón che'n Diox par ñibe'pe' Diox loo gu' por ndyactii gu' huax con' nalle'.

<sup>6</sup> Nalì nac Diox par tetii Diox mèn xalque' ngue tetii mèn gu' nalle'. <sup>7</sup> Nalì nac Diox tac co'se' yi'th Tad Jesús loo bé' loo izlyo' con angl co' lu' cón che'n con' roo con' xèn che'n Jesús loo mèn, sya, li Diox le' gu' co' ndyactii nalle', gu' li descans, ne, xalque' li nu' descans. Huiza lyàa quii bèel che'npe' Diox loo izlyo'. <sup>8</sup> Sya, yi'th Tad Crist par nalì tetii Tad Crist mèn no zib quii Tad Crist mèn por cón che'n ryete con' ye'rsin' co' mbli mènà, mèn co' ne'ndalte ngòn di's cón che'n Diox par ta' mèn cuent cón che'n Diox, mèn co' nac mèn co' ne'ndalte ngòo loo cón che'n Diox, mèn co' ne'ndalte ndubdi's loo di's ndac cón che'n Tad Jesucrist na', di's co' ndlu' xá mod lyá' mèn loo con' ryes. <sup>9</sup> Mènà tyactii no tyuhuan mènà thidtene, co' nee di's, anze'f tith co' xà' Tad Crist mènà loo Tad Crist yiloo, Tad Crist co' ndxàp rye loothe con' roo con' xèn che'n Diox la's nii Tad Crist no la's ya' Tad Crist. <sup>10</sup> Gàc con' ndxè' co'se' gac huiz yi'th Tad Crist par gac con' roo con' xèn loo Tad Crist por cón che'n ryethe mèn co' ngro xà' loo cón che'n xab izlyo' co' ngòc che'npe' Diox, mèn co' ngòo loo cón che'n Diox por cón che'n Tad Crist. Tataaque' gaca loo gu', ne, tac ngola's gu' loo cón che'n Tad Crist por cón che'n di's co' mblon yalbàn loo gu'. Huiza, ryete na' co' ndxela's loo Tad Crist li par xyo'f lèe xyo'f xti's Tad Crist.

<sup>11</sup> Por cón che'n ryete con' ndxè', toloque' mbez nu' Diox por cón che'n gu' le' Diox li le' gu' que tee ban lì xalque' ndxàal que tee ban lì gu' tac Diox mcai gu' par gac gu' che'npe' Diox. No mbez nu' Diox le' Diox li, por cón che'n ryethe con' co' nzo la's nii Diox no co' nzo la's ya' Diox, par gac ryete con' ndac loo gu' co' nee lezo' Diox li Diox loo gu'. No mbez nu' Diox le' Diox lyath no gu' axta plóthe par xo'f zin' gu' zin' cón che'n Crist tac gu' ndxàpque' yalxla's loo Crist. <sup>12</sup> Cona, mbezen Diox par gaca le' loo Tad Jesucrist na' gac más con' roo no con' xèn por cón che'n mod co' ndlu' le' gu' nque tee ban lique' làth xtàa gu'. Làth xtau'a, gac loo gu', ne, más con' roo no con' xèn por thidte ndxàc gu' loo Crist. Gàc con'a loo gu' xalque' nac con' ndac co' angndli Diox na' no Tad Jesucrist na' loo gu'.



## 2

*Trè' nda' cuent cón che'n thib mbi' co' gáp xtol tín', mbi' co' ryo xo'f loo mèn loo izlyo'.*

<sup>1</sup> Per nalle' ngue niin tedib con' loo gu', mèn huesen por cón che'n Tad Jesucrist, cón che'n xá mod yi'th Tad Jesucrist na' no xá mod thidte queltàa na' loo Tad Jesucrist na': <sup>2</sup> Anderhuen gu'. Ña'ben di's loo gu' ne'ta'de gu' lugar ya ye'th lezo' gu' chele' gu' gòn mbi'thle' Tad Crist no mbiile' Tad Crist tedib vez. Lomisque' ne, ne'tyóode gu' no ne'zyebte gu' chele' chol mèn ñee loo gu' le' nu' mda'le' cuent loo mèn le' Diox mdoodi's no nu' cón che'n xá mod mbi'thle' Tad Crist no mbiile' Tad Crist tedib vez. Ne' ne' tyóo gu' chele' chol mèn mbez le' nu' mde'thle' di's cón che'n xá mod mbi'thle' Tad Crist no mbiile' Tac Crist tedib vez loo mèn. Ne' ne' tyóo gu' chele' chol mèn ñee loo gu' le' daa, co' nac Pab, mque' cart cón che'n con' ndxè' loo gu'. <sup>3</sup> Ne'ta'de gu' lugar quedii mèn gu' nec thib mod. Tac ne'gàcte huiza no ne'zinte huiza ndoore' co'se' zin tiemp co'se' tyoo xà' lezo' huax mèn loo Diox. Làth xtau'a, ryo xo'f thib mbi'. Mbi'a aseli cua'n mbi' xquin mbi' no xtol mbi' làth mèn axta plóthe. Diox telux mbi'a thidtene yiloo. <sup>4</sup> Mbi'a ndoote li con' ye'rsin' par leque mbi' xo'f lèe xo'f xti's mbi' no par gáp mbi' ngolo ngola's loo merpe' Diox no loo ryethe con' co' mbez mèn nac Diox xal tatol, no naxnax, no taamas mdo', no gunab loo co' ndyub xib mèn no loo co' nsál' mèn ya' mèn. Sate más tolo li mbi'a con' axtaque' li mbi' gan tyub mbi' le'n templ co' nac che'npe' Diox par gab mbi' loo mèn: Daa nac merpe' Diox.

<sup>5</sup> ¿Ché' ne'tyede lezo' gu' co'se' ngo non gu', mdan cuent cón che'n con' ndxè' loo gu', cà? <sup>6</sup> Per nalle' gu' naneeque' cón nac co' nca' loo mbi'a par ne'yú' loode mbi' loo mèn axta co'se' gáp tiemppe' che'n mbi'a. <sup>7</sup> Per nalle' cón che'n con' roo no con' xèn co' nacasloo cón che'n con' ye'rsin'a, mtlole' ngue xo'f zin' con' ye'rsin' làth mèn. Ante ndxàc falt biiche xa' no ryo' xà' xa' co' ngue tau' loo no co' nca' loo con' zaba par ryo xo'f mbi' ye'rsin'a loo xnaa. <sup>8</sup> Axta syare' ryo xo'f mbi' ye'rsin'a. No loo xnaa que tee ban mbi' ye'rsin'a. Per co'se' yi'th Tad Crist, guth Tad Crist mbi'a ante con' mbii che'n lad Tad Crist co' yidin' lad mbi'a. Telux Tad Crist rye loothe con' co' nzo la's nii mbi'a no la's ya' mbi'a por cón che'n xnii co' nquée lad Tad Crist co'se' yi'th Tad Crist. <sup>9</sup> Co'se' gáp huiz yi'th que tee mbi' ye'rsin'a loo izlyo', yi'th mbi'a loo izlyo' por cón che'n Mebizya. Mebizya lyath no mbi'a por huax con' co' nzo la's nii Mebizya no la's ya' Mebizya. Li mbi' ye'rsin'a huax con' roo no con' xèn co' nac con'xù'. No li mbi' ye'rsin'a huax con'xù' co' ryo xo'fxù' loo mèn par hui' mèn. Per ndxe'leque', ryete con'a nac yalgutyè'túb tín'. <sup>10</sup> Tataa mod li mbi' ye'rsin'a huax con' roo no con' xèn co' nac con' ye'rsin' par quedii mbi' ye'rsin'a ryete mèn co' anglyux yiloo. Gáp con'a loo mèn co' lyuxa tac ne'ndalte mèn ngala's mèn loo di's co' nac licpe' par ngác nglá' mèn loo con' ryes. <sup>11</sup> Por cona, sate más mbli Diox tolo mquedii leque mèn mèn loo co' nac yalgutyè'túba. <sup>12</sup> Tataa mbli Diox loo ryete mèn par tolo zib quii Diox ryete mèn tac thidteneque' ne'ndalte mèn ngala's mèn loo di's co' nac licpe'. Ale ndxe'leque', más mdyac lezo' mèn li mèn con' co' nac con' ye'rsin' loo Diox.

*Di's ndxè' ndlu' xá mod ncui Diox mèn par yoo ban no mèn Diox thidtene yiloo.*

<sup>13</sup> Per part cón chenen, daa thidteneque' mbez: Diox quix U', Diox, loo Diox por cón che'n gu' co' nac mèn huesen por cón che'n Crist, gu' co' anze'f nque' lezon ñeen por cón che'n Tad Crist. Tac Diox mcui gu' ndoore' cuéc Diox izlyo' no xèn' Diox izlyo' par lyá' gu' loo con' ryes. Diox mtelá' gu' loo con' ryes. Por cón che'n Xpii Natú' mbli Diox con'a loo gu' par nzi tee xà' gu' loo cón che'n xab izlyo' par ngóc gu' mèn che'npe' Diox tac gu' ndxela'sque' di's co' nac licpe'. <sup>14</sup> Por cón che'n di's ndac co' ndlu' xá mod lyá' mèn loo con' ryes co' mdan cuent no co' mblon yalbàn loo gu'a, Diox mcui gu' par yan' no gu' con' roo no con' xèn che'n Tad Jesucrist na' no par ya gu' co'te' ñibe' Tad Jesucrist loo ryethe con' yiloo.

<sup>15</sup> Por cona, gu' co' nac mèn huesen por cón che'n Crist, leque gu' tolo bli nèe gu' loo cón che'n Crist. Ne'yathla'ste gu' no ne'lá'ya'de gu' con' co' mblu' nu' loo gu' cón che'n

co' ndxela's gu' cón che'n Diox, que naca por di's co' mdyoodiz non gu', que naca por cart co' mque'en ye's loo gu'. <sup>16</sup> Ndlyasquen, ne, le' yub Tad Jesucrist na' no Diox xud na' co' angngro' lezo' nque' lezo' ñèè Diox na' no co' thidteneque' ntegán lezo' na', angli Tad Jesucrist na' no Diox xud na' par cue quee lezo' na' loo ryete con' ndac co' gác loo na' yiloa. <sup>17</sup> Ndlyazen le' Tad Jesucrist na' no Diox xud na' tolo li par ye'th lezo' gu' par li nèè gu' gu' loo cón che'n Diox thidtene no tolo li Tad Jesucrist no Diox xud na' par tolo tyoodi's gu' no ta' gu' cuent cón che'n di's ndac loo chol mèn no tolo li gu' ryethe con' ndac co' ndxàal li gu'.

### 3

*Pab ngue bez loo mèn ciuda Tesalónica co' ngola's loo cón che'n Diox: Guuz gu' Diox por nu'.*

<sup>1</sup> Per nalle', gu' co' nac mèn huesen por cón che'n Crist, lult con' co' ndlyazen li gu' nac: Gurez gu' Diox por cón che'n nu' le' di's ndac co' ndlu' cón che'n Tad Crist tolo yath no tolo yèn pál co'te' nzo mèn. No gurez gu' Diox dib nzo yéc mèn no dib nzo lezo' mèn tyal mèn par gòn mèn cón che'n di's ndac par yòo lezo' mèn cón che'n di's ndac xalque' ngòca làth gu' par nedrè', ne. <sup>2</sup> Làth ngue bez gu' Diox, bna'b gu' loo Diox par lyá' nu' la's ya' mèn ye'rsin' co' nac mèn nayi' no mèn nalas. Tac iryede mèn nac mèn co' ndxela's loo Crist no loo cón che'n Crist. <sup>3</sup> Lìcpe' ba'i, Diox ndlique' xalque' mcàbgòn Diox li Diox loo na'. Diox li nèè gu' loo cón che'n Crist. No quenap Diox gu' loo ryethe con' ye'rsin'. <sup>4</sup> Ndxàpen yalxla's cón che'n gu' loo Tad Crist le' gu' lique' con' mnibe'en loo gu' no toloque' li gu' co' ñibe'en loo gu'. <sup>5</sup> Ndlyazen le' Tad Crist lyath no gu' par sate más ten' gu' le'n lezo' gu' susque' arid nque' lezo' Diox ñèè Diox mèn par sate más cha'la's gu' ñèè gu' hues xtaa gu' xal mcha'la's Crist ñèè Crist mèn.

*Trè' nda' cuent xá mod ndxàal que tee bàn mèn loo cón che'n di's ndac.*

<sup>6</sup> Per nalle' ngue ñibe'en loo gu', gu' co' nac mèn huesen por cón che'n Tad Jesucrist na': Gro xà' gu' loo mèn co' ndxàc hues na' por cón che'n Crist chele' chol mènà ngue tee za'f no co' indya'ste que' zin', no mèn co' ingue tee ban lide loo di's ndac xal mblu'en loo gu'. <sup>7</sup> Leque gu' hui' xá mod ndxàal que tee ban gu' xalque' ngue tee banen no xalque' nac mod co' ndxàp nu'. Tac gu' neeque' ne'mque tee ban za'fte nu' làth gu'. Nu' mque'que' zin'. <sup>8</sup> Ne' ne' nghua xle' nu' xít no lua' nec thib gu'. Chele' gu' mda' xít gu' no lua' gu' nduhua nu', mdix nu'i mcàa gu'. Ndxè'leque', mblin zin' ze no yál' con nít loon yéquen no con nít loon lechuzen par ne'li xolten nec thib gu' par anxle' nda' gu' con' nduhuan, ¿lé'? <sup>9</sup> Mastale' ngòpen derech ngna'ben con' nghuan loo gu', per ndxe'leque', mblin zin' par hui' gu' xal ndlin par li gu' xalque' ndlin. Le' sya, tataa li gu', ne. <sup>10</sup> Tac co'se' be' ngo no nu' gu', plá di's gunee nu' loo gu' le' chol gu' co' nzo làth gu' co' indya'ste que' zin', ne'ta' xle'de gu' con' hua hues xtàa gu'a. <sup>11</sup> Tac nzo mèn co' nda' cuent loo nu' cón che'n ndxep mèn làth gu' co' alithe nzi tee ban za'f làth gu' xal mèn co' yende cho nesidad nde che loo. Thidtene ngue tee za'f mènà. Ndxè'leque', nac mènà mèn co' ndyoo ndxè' no mèn co' ndyoo ba', no mèn co' alithe ngue que tee la's loo zin' co' ndli taamas mèn co'te' ngue mèn zin'. <sup>12</sup> Cón che'n mèn co' tataa naca, ñibe'en loo mèn no nco'xen loo mèn xalque' ñibe' Tad Jesucrist, li mènà zin' dib nzo yéc mènà no dib nzo lezo' mènà par li mènà gan lua' mènà no xít mènà co' hua mènà. <sup>13</sup> Per gu' co' nac mèn huesen por cón che'n Tad Crist, ftolo li gu' con' ndac. No ne'yitacte lezo' gu' loo con' ndac co' ndli gu', ndee. <sup>14</sup> Lomisque' ne, chele' chó gu' nzo co' nteri'th nza no thib lad nque' gu' di's co' ngue bezen loo gu' loo cart ndxè', huen huen hui' gu' chó gu' nac mènà. Ne'ta'de gu' lugar queltàa no gu' mènà par tataa mod thyon mènà làth gu'. <sup>15</sup> Per mastale' tataa ngue ñibe'en loo gu', indlyasten hui' yac hui' yèè gu' loo mènà. Ndxè'leque', bco'x gu' loo mènà xal mèn co' ndxàc huespe' loo cón che'n Crist, ndee gu'.

*Lult di's co' mque' Pab ye's loo cart ndxè'.*

<sup>16</sup> Ndlyazen leque yub Tad Crist co' ndli le' mèn cue nagàl lezo' loo Diox, no cue ban mèn rye nda mèn no rye ndye'th mèn làth xtàa mèn, tolo li par tolo cue gu' rye nda gu'

no rye ndye'th gu' loo ryethe con'. Thidteneque' ngue tee noque' Tad Crist ryete gu' thidtene, ndee gu'.

<sup>17</sup>Yub daa co' nac Pab, daa mque' pla di's loo cart ndxè' co' nac di's co' ngue niin Diox loo gu' co' mque'en ye's con yape'en. Taandxè' que' ngon firm loo rye cart co' ntel'en loo mèn. Hui' gu' nexa. Taandxè' mod nque'en ye's. <sup>18</sup>Ndlyasquen le' Tad Jesucrist na' tolo li anggàc con' ndac loo ryete gu'. Taandxè' gàca.

## Nerleque' Cart Co' Mque' Pab Ye's Loo Thìb Mybòo Co' Ngro' Lèe Timote

*Pab ngue que' ye's loo Timote.*

<sup>1</sup> Daa, Pab, nac thìb mbi' co' ndxe' di's cón che'n Jesucrist ned ndyeen loo mèn rye ned xalque' mnibe' Diox loon, Diox co' ntelá' mèn loo con' ryes, no xalque' ñibe' Tad Jesucrist loon. Por cón che'n Jesucrist nzi quee lezo' na' cón che'n con' co' gác loo na' yiloo. <sup>2</sup> Ngue que'en ye's ndxè' lool, Timote, lùu co' nac xal xgan'pe' daa loo cón che'n co' ndxela's na' cón che'n Jesucrist. Anze'f ndlyazen le' Diox xud na' no Tad Jesucrist na' li anggác con' ndac lool. Ndlyazen lyat lezo' xud na' Diox no Tad Jesucrist na' ñèe xud na' Diox no Tad Jesucrist na' lùu. No ndlyazen le' Diox xud na' no Tad Jesucrist na' li nagàl yo lezo'l loo ryethe con' no que tee banl rye ndal no rye ndye'thl làth xtàal.

*Trè' ngue lu' Pab cón che'n xley' co' nac xley' gutyè' co' ndlu' ndxep mèn loo xtàa mèn.*

<sup>3</sup> Fte' lezo'l xalque' guniin lool ndoore' co'se' tenen ned gan par ned le'n yèezya' che'n làaz mèn macedon par tolo yan'l le'n ciuda Efes par la'sl no ñibe'l loo ndxep mèn co' ndxela's loo cón che'n Diox por cón che'n Jesucrist, mèn co' nqueltàa tya, par ne'lu'de mèn chol di's co' nac tedib xley' loo taamas mèn tya. Tataa bli xal guniina lool. <sup>4</sup> Ne'ta'del lugar loo mèn tyub nza mèn loo chol cuent co' nac cuentgool no di's co' ndlu' cón che'n mèn nación Israel co' nda' mèn cuent loo xtàa mèn co' nac cón che'n bin mèn co' mban póla póla. Thidtene ne'lá'de mèn no ne'cuedte mèn chele' lùu ne'tau'te loo di's co' ndyoodi's mèn. Cuenta nac thìb cuent co' angndyoodi's mèn no angndxòn mèn. Nec thìb mod ndlyath no di'sa no cuenta mèn loo cón che'n co' ndlu' Diox loo na' cón che'n co' ndxela's na' cón che'n Crist par altantleque' cue mèn loo cón che'n Diox no xal ndxàal tyubdi's na' loo Diox. Cona, beren, ngue ñibe'en lool, Timote: Tolo blu' cón che'n Crist loo mèn.

<sup>5</sup> Tac con' ndxè' nac co' ñibe'pe'en lool le' lùu lu' loo mèn gáp mèn thidte xtùuz no gáp mèn thidte lezo' mèn loo cón che'n Diox co' ndxela's mèn par tolo que' lezo' mèn Diox no Crist, no que' lezo' mèn ñèe mèn xtàa mèn thìb lì yéc mèn no thìb lì lezo' mèn. No ñibe'l le' ryethe xtùuz co' ndyro' lezo' mèn gác thìb xtùuz ndac. No ñibe' loo mèn le' mèn, lìcque', yila's loo cón che'n Crist co' nac lìcpe'. <sup>6</sup> Ngue niin lool, ne, Timote: Nzo ndxep mèn co' ne'ndalte li co' ñibe' Diox. Mèn mdoo xà' lezo' loo cón che'n Tad Crist no ngro xà' mèn loo cón che'n Diox. Mèn mdyuhuan loo cón che'n Diox por nzi tee yòn mèn no nzi tee toodi's mèn ante di's co' yende cón ntac. <sup>7</sup> Mèn ndlya's gác maistr par lu' mèn cón che'n chol xley' loo mèn. Per prob mèn, axta ne' ne' inda' mèn cuent cón ndlu' mèn no cón ndyoodi's mèn. No axta ne' ne' ñèe mèn cón nac co' ngue li nèe mèn loo xtàa mèn con dibaxla's par ñèe mèn ñeene' ché', lìcque', nac con'a no di'sa xal ñibe' Diox loo ley che'n Moisés par lu' mèn loo xtàa mèn.

<sup>8</sup> Per ndxe'leque', na' naneeque' huenque' nac yalnibe' che'n ley co' mxo'f Moisés loo mèn póla chele' mèn tyubdi's loo rye con' no ndlu' mèn loo xtàa mèn, con' co', lìcque', ñibe'pe' ley co' mxo'f Moisés loo mèn xal ndxàal li mèn xal ñibe' Diox. <sup>9</sup> Per naneeque' na' no nonque' na' le' Moisés ne'ntan'te leya par ñibe' leya loo mèn nalì no loo mèn nambìi. Ndxè'leque', leya mxo'f par ñibe' leya loo mèn brut; par ñibe' leya loo mèn naad no loo mèn nguud; par ñibe' leya loo mèn co' indlide cas loo Diox; par ñibe' leya loo mèn co' ndxàp xtol; par ñibe' leya loo mèn ye'rsin'; par ñibe' leya loo mèn co' indlide cas loo cón che'n Diox; par ñibe' leya loo mèn co' ndxuth xud no loo mèn co' ndxuth xna'; par ñibe' leya loo mèn co' ndxuth xtàa; <sup>10</sup> par ñibe' leya loo mèn co' ncua'n xin' huan; par ñibe' leya loo mènbi' co' ndli yalmbi' con xtàabi' mènbi'; par ñibe' leya loo mèn co' ndli huan' myen' bix co' nac xin' chol mèn; par ñibe' leya loo mèn co' ngosua' yalgutyè'; par ñibe' leya loo mèn co' nde'thxù' lèe Diox; par ñibe' leya loo taamas mèn xal nac mèn ndxè' co'

nac ngolo ngola's loo xley' ndac ndxè'. <sup>11</sup> Cón che'n di's ndac co' ngue lu'en lool ndxè', Timote, thidtene ndyeei xalque' ndlu' di's ndac che'n Diox co' ndlu' xá mod lyá' mèn loo con' ryes, Diox co' ndyac lezo' thidtene. Cón che'n di's ndac ndxè' ngòc zin' co' mxo'f zin' Diox loon.

*Pab ngurez: Diox quix U', Diox, tac U' anze'f mblyat lezo' ñèe U' daa.*

<sup>12</sup> Mbezen Diox quix U', Tad, loo Tad Jesucrist na' tac Tad Jesucrist mbli par ngòpèn fuerz xal nquin daai. Tad Jesucrist naneeque' le' daa ndyooque' altant no ndyubdisquen loo ryethe con' co' ñibe' Tad Jesucrist loon. Por cona, mdoo Tad Jesucrist daa par xo'f zin'en zin' ndxè'. <sup>13</sup> Per co'se' ndoore' gàc con' ndxè' loon, ngòc daa mèn co' gunii yèe gunii tii cón che'n Diox. Ngòc daa mèn co' mque tee mdub ngu's mèn co' ngòc loo cón che'n Diox por cón che'n Crist. Ngòc daa mèn nayi' axta plóthe. Per ale mastale' mbli ryethe con'a, ale ndxe'leque', mblyat lezo' Diox gunèe Diox daa tac mbli ryete con'a xal mèn co' nau' loo no xal mèn co' nau' yéc loo cón che'n Diox. Ne'needen cón ngulàa yéquen no cón ngulàa lezon mbli con'a. Mbli na tac tarte yilazen loo Tad Crist. <sup>14</sup> Per mastale' ale tataa ngòc daa, ale le'le' sate más mbli Tad Diox angngòc huax con' ndac loon. Crist mbli le' daa ndxàp yalxla's loo Diox. Le' sya, Crist angmbli loon par nque' lezon Diox. No nque' lezon ñèen mèn co' ndxàc hues xtàa daa, ne, tac ndxàpèn yalxla's loo Diox tataa mbli Diox loon por thidte mqueltàa non Jesucrist nalle'.

<sup>15</sup> Di's co' ngue que'en ye's lool ndxè' nac thib con' licpe', Timote. Ndxàal ta' ryete mèn lugar no yila's ryete mèn cón che'n di's ndac ndxè' co' ndlu' le' Crist Jesús mbi'th loo izlyo' par tí' no làa Crist Jesús mèn co' ndxàp xtol loo con' ryes. No ale ndyaquen, daa nac nerleque' thib mèn làth rye mèn co' ndxàp xtol. <sup>16</sup> Por cón che'n con' mbli láth ngòc daa mèn co' nau' loo no mèn co' nau' yéc co'se' ngòc daa nerleque' mèn ye'rsin'a, ale mblyat lezo' Diox gunèe Diox daa. Tataa mbli Jesucrist par mbli' Jesucrist daa loo mèn por cón che'n con' co' ngòc loon le' Diox anze'f ncha'la's tín' loo mèn. Ryete mèn nanee looque' xal mque tee lin. Por cona, Diox mbli ngòc daa thib mbi' co' mbli' cón che'n xá mod susque' ncha'la's Diox ñèe Diox mèn, mèn co' yila's loo Crist par yòo ban no mèn Diox thidtene yilòo. <sup>17</sup> Por cona, li na' par gàc con' guryath no con' guryèn ante loo Diox co' nac thib rey co' ñibe' thidtene, Diox co' ne'gathte thidtene, Diox co' indxú'de loo mèn, Diox co' angolux co' thidte ndxác. Loo Dioxa ndlyazen gab mèn con' roo no con' xèn le'n lín' co' ntlo, no le'n lín' co' ndxelo, no le'n lín' co' ne'lith node thidtene. Thidtene taandxè' gàca.

<sup>18</sup> Timote, lùu co' nac xal xgan'pe' daa loo cón che'n Diox, ngue ñibe'en lool par lil con' ndxè' xalque' ndyubdi's ndac thib solndad co' ndyee loo xó'. Bli con' ndxè' xal nac con' ndac co' nac xtùuz co' nzo le'n lezo'l co' nac cón che'n co' gunii no co' mde'th mèn co' ngòc hues na' loo cón che'n Diox cón che'n lùu. Mèna gunii cón che'n lùu por lèe Diox. <sup>19</sup> Fquenap xtùuzl par que nol xtùuz ndac no par ne'tyoo xà'de lezo'l loo co' ndxela'sl. Tac nzo ndxep mèn co' inquenapte xtùuz co' ndli mèn. Leque mèna mblá'ya' mèna loo xtùuz ndac mèna. Mèna ngro xà' loo co' ndxela's na'. Leque mèna ngue teza' xtùuz mèna par ne'yila'ste mèna más loo co' ndxela's na'. Mèna mdyuhuan loo con' ngola's mèna loo cón che'n Diox. <sup>20</sup> Làth mèna ngo thib mbi' co' ngro' lèe Himene no tedib mbi' co' ngro' lèe Alejandr. Ryop mbi'a mblàan cón che'n mebizya par li Mebizya loo ryop mbi'a xal nee lezo' Mebizya no par té'th mèna ya ne'tolode ñii yèe ñii tii mèna cón che'n Diox par texi mèna lezo' Diox.

## 2

*Pab ngue lu' xá mod ndxàal cues mèn Diox.*

<sup>1</sup> Nerleque' con' co' más ndlyazen lil, Timote, bnibe' loo mèn co' ndxela's co' nqueltàa loo cón che'n Diox por cón che'n Crist trè', ña'b mèna loo Diox, no cues mèna Diox, no teri'th mèna di's loo Diox, no gab mèna: Diox quix U', Diox, loo Diox por cón che'n ryete mèn. <sup>2</sup> Ndxàal cues mèna Diox por cón che'n ryethe mèn co' ndxàc gobiern chol nación no chol estad par ta' mèna lugar nagàl que tee ban na' no cue na' rye nda na' no rye



ndye'th na' no par li mèn cas loo Diox xal ñibe' Diox loo mèn, no thidte que tee ban ndac mènna loo xtàa mènna. <sup>3</sup> Tac con' co' ngue niin loo gu' par li gu' nac thib con' ndac. No naca thib con' co' ndxòo lezo' Diox, Diox co' nac xa' co' ntelá' na' loo con' ryes. <sup>4</sup> Diox ndlya's ryete mèn lyá' loo con' ryes. No ndlya's Diox ta' mèn cuent no té'th mèn cón che'n di's ndac co' nac licpe'. <sup>5</sup> Tac thidte Diox nzo. No thidte mbi' co' nteri'th di's cón che'n mèn loo Diox nzo. Mbi'a nac Jesucrist co' mbi'th yáal xalque' ndxáal chol mèn loo izlyo'. <sup>6</sup> Leque yub Jesucrist mda' lugar mquée yalguth loo Jesucrist par tataa mod mdix Jesucrist cón che'n xtol mèn loo Diox. Cón che'n xá mod le'le' Jesucrist mdix cón che'n xtol mèn mde'th mèn co' ngòc xin' mté'th Jesucrist co' mtel' Jesucrist co'se' ngolo ngòc yaltii loo Tad Jesucrist. <sup>7</sup> Par gon yalbàn cón che'n ryete con' co' ngòc loo Jesucrist, Diox mdoo daa no mblec Diox daa par gon yalbàn no par huen di's cón che'n di's ndac che'n Jesucrist loo mèn. Lìcque' nac di's co' niin lool ndxè', Timote. Inquediiden lùu. Diox mcai daa par nac daa maistr co' ndlu' loo mèn co' nac mèn chol nación cón che'n xá mod ndxela's na' loo cón che'n Diox por cón che'n di's ndac co' nac licpe'. Ante ndyoodizen con' licpe' ned ngue tee'en tac ndxelasquen loo Crist no loo cón che'n Crist. Indyè'den.

<sup>8</sup> Cona, ndlyazen le' mèn co' ndxela's loo cón che'n Diox, mèn co' nqueltàa ryete lugar, cuez mènna Diox. Ndlyazen le' mènna, licque', gac mèn nambii no mèn nali loo Diox par gòn Diox di's co' cuez mènna loo Diox. Ndlyazen le' mènna ne'gacte mèn nayi'. Ne' ne' gac mènna mèn co' ngyoo no xtàa. <sup>9</sup> Lomisque', ndlyazen ñiil loo mèngot ne'gocte mèngot vestid arid bunch co' nac xab mèngot. Goc mèngot xab mèngot co' be'the. Ne' ne' arid bunch no ne' ne' arid nol'. Nabe'ste goc xab mèngot par gáp mèngot mod loo mèn, co' nee di's, ne'tye'ste mèngot arid. Ne'toxcua'de mèngot arid yéc mèngot. Ne' ne' que' mèngot yi'f or nza mèngot. Ne' ne' co mèngot coral co' anze'f nabe's ñaa yen mèngot. Ne' ne' goc mèngot vestid co' anze'f náp ntac tac ihuente nac con'a par mèngot co' nzo loo cón che'n Tad Jesucrist. <sup>10</sup> Ndxle'leque', lugar de tataa goc mèngot, más huen li mèngota con' co' nac con' ndac, co' nee di's, gac mèngot mèn co' non carida ñèe xtàa xalque' mèn co' ndlu', licpe', ndxela's mèngota loo Diox no ngro xà' mènna loo cón che'n xab izlyo'. <sup>11</sup> Lomisque' ne, ñibe'l co'se' nqueltàa mèn le'n templ, xèe cue mèngota par gòn mèngota co'se' nzi té'th mèngota cón che'n Diox. Nado' gac mèngota co'se' xèe cue mèngota. <sup>12</sup> Tedib con' ñibe'en lool, ne, Timote: Ne'ta'del lugar gac thib mèngot maistr par lu' mèngot loo mènbi' co'se' queltàa mèn le'n templ loo xnaa. Ne' ne' ta'l lugar ñibe' mèngot loo mènbi'. Ndxle'leque', xèe cue mèngota co'se' queltàa mèn le'n templ. Ne'càb rode mèngota loo mènbi'. <sup>13</sup> Tac co'se' mbli Diox ngo ner mbi' loo izlyo', ner Adán ngòcsua'. Ngoloa, mdyoxcua' Ev. <sup>14</sup> Mebizya ne'nquediide Adán. Ndxle'leque', mquedii Mebizya Ev. Por cona, ale ner Ev mcua'n xquin Ev no xtol Ev loo Diox. <sup>15</sup> Per mastale' tataa ngòca loo Ev, myen'got lyá' chele' mèngot, lìcque', ngola'sle' loo Diox. Tataa gaca chele' mèngot tyan xin', no chele' mèngota toloque' que' lezo' ñèe xtàa mèngot, no chele' mèngot tolo ryo xà'que' loo cón che'n xab izlyo' par gac mèngota che'npe' Diox. Tataa gaca chele' mèngota huenque' ñibe' loo xtùuz no lezo' mèngota.

## 3

*Pab ngue lu' xá mod li mèn co' tyoo ner loo mèn co' ndxela's, mèn co' nqueltàa loo cón che'n Diox.*

<sup>1</sup> Di's co' ngue niin lool ndxè' nac licpe', Timote. Chele' chol mèn ndryo' ndlyen' lezo' xo'f zin' mènna zin' par tyoo ner no tyoo naa mènna loo mèn co' ndxela's co'se' queltàa mèn le'n templ, lìcque', con' ndac nac zin' co' ndryo' ndlyen' lezo' mènna li mènna. <sup>2</sup> Por cona, ngue niin lool, Timote: Mèn co' ndyoo ner no co' ndyoo naa loo mèn co' nqueltàa loo cón che'n Diox, mèn co' nxo'f zin' zin' cón che'n Crist loo mèn co' nqueltàa loo cón che'n Diox, ndxàalque' que tee ban mènna thib mod ndac co' yende chó mèn yoo mènna. Gac mènna mèn co' ndyub no thidte xa'got co' nac xin' sa'l. Gac mènna mèn co' nagal yòo lezo' ñèe xtàa. Gac mènna mèn co' altant ndyoo loo zin' co' ndli mènna liz mènna. No ndxe'sleque' li mènna xtùuz co' nac xtùuz co' ndli mènna. Gac mènna mèn co' gáp mod par

gab taamas mèn le' mènà nac mèn guryath no mèn guryèn. No naquinque' tyoo lezo' mènà ta' mèn posad loo chol mèn tith co' nde too naa chop son huiz. Gàc mènà mèn ndac co' nalas nac par lu' mènà loo taamas mèn cón che'n Crist. <sup>3</sup> Ne'gàcte mènà mèn guy co' ndxu chol nítguy. Ne' ne' gác mènà mèn co' yáp di's no mèn co' ncu'a'n di's. Ndxé'leque', gác mènà mèn nado' no mèn co' ne'yòode lezo' yoo di's. Ne' ne' gác mènà mèn co' nde yath ñèe tmi co' ndlixù' mèn gan. Ndxé'leque', naquin gác mènà mèn ndacpe', mèn co' cue no xtàa rye nda mèn no rye ndye'th mèn. Gàc mènà mèn co' ne'gath lyuxte par ñèe mènà tmi. <sup>4</sup> Naquinque' gác mènà thib gundan ndac co' ñibe' ndac loo mèn guliz mènà. No li mènà le' xin' mènà gác myen' nado' no gáp myen' mod loo rye mèn. <sup>5</sup> Tac chele' mèn co' gác mèn co' tyoo ner no co' tyoo naa loo mèn co' nqueltàa loo cón che'n Diox ne'gàcte ñibe' loo mèn gulizpe' mèn, ¿xá mod gác mènà quenap mènà no ñibe' mènà no tyoo ner no tyoo naa mènà loo mèn co' nqueltàa loo cón che'n Diox, sya? Yende mod ñibe' mènà chele' mènà tataa nac, ¿lé? <sup>6</sup> Mèn co' gác mèn co' tyoo ner no co' tyoo naa loo mèn co' nqueltàa loo cón che'n Diox, indxàalte gác mènà mèn co' diz ngola's loo cón che'n Diox no co' diz ngòo loo cón che'n Diox. Tac ne'stolque', làth xtau'a aseli mènà tye's mènà xalque' mdye's Mebizya. No yilóa, quexù' Diox mènà xal mquexù' Diox Mebizya' par tyactii mènà yilóa xalque' tyactii Mebizya yilóa. <sup>7</sup> Lomisque' ne, nquinque' gác le' mèn co' tyoo ner no co' tyoo naa loo mèn co' nqueltàa loo cón che'n Diox gáp mod loo mèn co' tarte yòo loo cón che'n Diox par gáp mèn yalxla's loo Diox par nec thib mod no nec tedib mod yende mod quexù' mèn co' tarte yila's mèn co' tyoo ner no co' tyoo naa loo mèn co' nqueltàa loo cón che'n Diox. Chele' mèn co' tyoo ner no co' tyoo naa li tataa mod, le' sya, caba loo mènà ne'thyonte mènà no ne'yigàde mènà loo Mebizya xal co'se' ndlyàa má' guli quii loo thib tramp.

*Pabl ngue lu' trè' xá mod li mèn co' nquenap templ no mèn co' ndlyath no taamas mèn le'n templ.*

<sup>8</sup> Lomisque' ne, cón che'n mèn co' li sirv loo mèn co' nqueltàa loo cón che'n Diox, mènà ndxàal gác mèn co' ndxàp mod par gab taamas mèn le' mènà nac mèn guryath no mèn guryèn. No ne'gàcte mènà mèn ye'rsin' xal nac mod co' ndyoodi's mèn. Ne'gàcte mènà mèn co' ndyuz. Ne'gàcte mènà mèn co' ndli huan' loo xnaa co'se' ndi' mèn no ntho' mèn, co' nee di's, ngo mèn má' xi'tha par xexte li mèn gan tmi loo xtàa mèn. <sup>9</sup> Ndxàalque' gác mènà mèn co' nda' cuent co' huenleque' cón che'n con' co' indxòn ndacte mèn loo cón che'n Crist co' ndxela's na'. No ndxàal que tee ban ndac mènà thib mod co' yende con' ten' mènà le'n lezo' mènà cón che'n xtùuz co' ngue no mènà cón che'n Crist. <sup>10</sup> Nerleque' naquin gác preb mènà ñeene' xal nac mèn co' li sirv loo mèn co' nqueltàa loo cón che'n Diox, ñeene' ché' nzo chó falt ndxàp mènà. Chele' mènà yende chó falt no mod ndxàp, nzoque' mod xo'f zin' mènà zin' co' nac cón che'n Crist. <sup>11</sup> Lomisque' ne, le' xa'got co' nac sa'l mèn co' li sirv loo mèn co' nqueltàa loo cón che'n Diox, gác xa'gota mèn nado' co' ne'yòode loo cuent yix. Ndxé'leque', gáp mèn gòta mod no li nèe mèn gòta mèn gòta loo cón che'n Crist co' ndxela's na'. No gác mèn gòta mèn ndacpe' co' ndyoo altant loo ryethe con'. <sup>12</sup> Bnibe' loo mèn co' li sirv loo mèn co' nqueltàa loo cón che'n Diox gác mènà mèn co' ndyub no thidte xa'got co' nac xin' sa'l mènà. No gác mènà gundan co' ñibe' ndac loo mèn gulizpe' mènà. <sup>13</sup> Tac mèn co' ndlyath no mèn co' nqueltàa loo cón che'n Diox co' nabe'ste ndyoo naa loo zin' co' ndli mènà, mènà ndli gan ndxàc con' guryath no con' guryèn loo mènà. No sate más con dibaxla's tyoodi's mènà cón che'n xá mod ndxela's mènà loo Crist no loo cón che'n Crist.

*Trè' ngue lu' Pab cón che'n co' ndxela's na', con' co' inonte huax mèn no con' co' inda'de huax mèn cuent.*

<sup>14</sup> Ngue que'en ye's ndxè' lool, Timote, mastale' ndub quee lezon xaste gal neen máal par nedrè'. <sup>15</sup> Tac antale'i, chele' daa lyen' no ne'yilode gal neen máal, cona ngue tel'en cart ndxè' lool par ñeel xá mod ndxàal tyoo naal no tyoo ner! loo mèn co' nac mèn gulizpe' Diox. Fte' lezo'l mènà nac mèn che'n Diox co' licpe' naban. Mèn co' nqueltàa

loo cón che'n Diox chol lugar, mènà ngue ta' fuerz par nda' mènà cuent cón che'n Crist co' nac con' lìcpe' loo taamas mèn co' tarte yila's, co' nee di's, nac mènà xal thìb cimient no thìb pìlar co' nda' fuerz loo thìb yòobé'.

<sup>16</sup> Lìcpe' ba'i, con' roo no con' xèn nac alux con' co' nac cón che'n con' co' be' nacasloo loo huax mèn co' nac xley' co' ndxela's na' loo Diox no loo cón che'n Diox, co' nee di's:

Leque Diox mbly' Diox loo mèn co'se' mbi'th yáal Crist loo izlyo' ndxè' xal ndxáal chol mèn loo izlyo' ndxè'. Diox mblo ro no mbly' Diox loo mèn nalì no nambìi nac Crist tac yub Diox mblo xban Crist. Mbyú' loo Crist loo angl. Mbyath no mbyèn cón che'n Crist loo mèn le'n chol nación dib athu loo izlyo'. Ngola's mèn co' nziri loo izlyo' loo Crist. Ngoloa, nguáp Crist loo bé' co'te' nac yòoba'.

## 4

*Di's ndxè' ndlu' loo na' cón che'n mèn co' ndryo xà' loo cón che'n Crist xal nac mod co' ndxela's na' loo Diox por cón che'n Crist.*

<sup>1</sup> Per nambiite di's no nambiite cuent ndlu' Xpii Natú' loo na' le' le'n lult tiemp co' yi'th nque nzo ndxep mèn co' ryo xà' loo co' ndxela's mèn xal ndxela's na' cón che'n Tad Crist. Mènà más ndxòo lezo' nda' mènà lugar ndxòn mènà ro chol xpìi co' nquedii mèn par quedii xpìia mènà. No yila's mènà loo xley' co' nac xley' meexù'. <sup>2</sup> Más tyub nza mèn gòn mèn ro mèn co' ntembii ro no co' ntembii xti's co' nac mèn gutyè'. Inden'te mènà le'n lezo' mènà cón ngue li mènà xtùuz che'n cón ngue li mènà ché' naca con' huen o ché' naca con' mal. <sup>3</sup> Mèn ye'rsin' co' tataa nac, inda'de mènà lugar loo xtàa mèn co' ndly'a's selya'. No lomisque', inda'de mènà lugar hua mèn chol con' co' nac xít mèn no lua' mèn. Tataa ndli mènà par ne'huade chol mèn béll' mastale' yub Diox mtan' xít mèn no lua' mèn co' ndxuhua mèn, mèn co' ndxela's loo Diox no loo cón che'n Diox, no mèn co' nda' cuent co' nac lìcpe' cón che'n Diox tac co'se' ndxuhua mènà xít mènà no lua' mènà mènà mbez: Diox quix U', Diox, loo Diox. <sup>4</sup> Tac rye loothe con' co' mxèn' Diox no co' mtoxcua' Diox, huenque' naca. Nec thìb con'a indxàalte tè'b mèn loo xtàa mèn chele' mèn lya's huai. No chele' mèn gab: Diox quix U', Diox, loo Diox, yende cón lii. <sup>5</sup> Tac xti's Diox co' ndlab mènà no di's co' mbez mènà Diox co'se' mbez mènà Diox, di'sa ndli loo mèn ryete con' ndxuhua mèn con' ndac naca loo mèn par hua mèn.

*Pab ngue lu' loo Timote xá mod ndxàal que tee ban Timote par tolo gac Timote thìb moz ndac che'n Tad Jesucrist.*

<sup>6</sup> Chele' lu' lùu ryete con' ndxè' loo mèn co' nac hues xtàa na' por cón che'n Crist, Timote, gac lùu thìb moz ndac co' nxo'f zin' zin' cón che'n Jesucrist loo mèn. Sya, tataa mod leque lùu que tee ban loo di's che'n di's ndac co' ndxela's na' co' gac lool xal xítl no lua'l co' li par gál lezo'l, di's co' ndxela'sl loo no co' nac thìb xley' ndac xalque' nac co' nda nquel xís co' nac cón che'n Crist co' mté'thl. <sup>7</sup> Lomisque' ne, niin lool, Timote: Ne'tyub nzadel arid loo chol cuent gox co' nac cuent natont che'n izlyo' ndxè'. Más huen, ñibe' loo lezo'l no ftoo lezo'l par tolo que tee lil cas loo cón che'n Diox xal ndxàala no maste. <sup>8</sup> Per niin thìb con' lool, Timote: Ejercis co' ndli na' par ryo xcuen lad na', ndxepete con' ndac ndlii loo lad na'. Per chele' na' ngue que tee lique' cas loo cón che'n Diox xal thìb myen' co' nguith par tolo xec myen'a loo yalguyith, thìb mod tedib mod ncàba con' ndac loo na', que naca cón che'n yalnaban ndxè', que naca cón che'n yalnaban co' yi'th nquea. <sup>9</sup> Lìcque' nac di's co' ngue niin lool ndxè', Timote: Indyè'de di's co' nac cón che'n di's ndac ndxè'. Ndxàalque' gòn ryete mèn di's ndxè' no yila's ryete mèn cón che'n di's ndac ndxè'. <sup>10</sup> Tac por cona ndli na' zin' no nxec yèe na' loo ngòc nguàal con' co' ndli mèn loo na' axta plóthe. Le'i càb yila's huax mèn loo Crist no loo cón che'n Crist tac na' nzi quee lezo' loo Diox cón che'n con' co' gac loo na' yilóa, Diox co' naban thidtene. Diox ngue xèn' izlyo' no ngue quenap Diox ryete mèn loo izlyo'. Per ale ndxe'leque', loo na' co' ndxela's loo Diox, Diox mtelá' na' loo con' ryes.

<sup>11</sup> Ryete di's co' ngue que'en ye's lool ndxè', Timote, ndlyazen ñibe' loo mèn li mènà no lu'l cón che'n di's ndac loo mèn par nedrè'. <sup>12</sup> Lomisque' ne, leque lùu hui' xá nque

teel. Gòp lezo'l par ne'ta'del lugar xiis no mèn lùu por nacl myen'bi'. Ndxle'leque', tolo bli con' ndac par hui' mèn co' ndxela's lool xá nac mod ndyoodi'sl, no xá nac mod nque tee banl co' nac mod nque' lezo'l ñèel mèn, no xá nac mod co' ndyubdi'sl loo Xpii Natú' co' ñibe' lool, no xá mod nquenap lùu lùu par tolo gàcl thib mbyòo co' nque tee ban lì no co' nque tee ban nambìi loo mèn. <sup>13</sup> Láth be' tarte zin daa par nedrè' loo gu', loo xnaa blab libr co' nac xti's Diox loo mèn co' nqueltàa loo cón che'n Diox. Ftolo co'x loo mèn no blu' loo mèn par ye'th lezo' mèn loo cón che'n Diox. No ftolo lu' loo mèn cón che'n Diox axtaque' galen lool. <sup>14</sup> Ne'lá'ya'del lùu loo con' ndac co' mbli Diox angngòc lool co'se' mxo'f mèngool ya' mèngool co' ndyoo ner no co' ndyoo naa loo mèn co' nqueltàa loo cón che'n Diox ladl. Tac con'a nac con' co' mnibe' lezo' Diox no con' co' angngro' lezo' Diox gàc lool.

<sup>15</sup> Por derech, bli xtùuz cón che'n co' ngue niin lool ndxè'. Fxo'f zin' cón che'n con' ndxè' par lu'la loo ryete mèn le' zin' co' nxo'f zin'l loo cón che'n Crist ndli leque lùu ngue té'th no ngue tyubdi's ndacl loo cón che'n Crist, ne. <sup>16</sup> Anderhuenl. Leque lùu fquenapl loo cón che'n Crist. Bli nèe leque lùu loo xley' co' ndlu'l co' nac xley' che'n Diox. Altant ftoo loo xley' co' ndlu'l. Tac chele' lùu tataaque' ngue li, sya, ryete mèn non, licque', ndxela'sl loo cón che'n Crist no loo Crist. Lomisque' mod, chele' lùu tatua'que' lyath no taamas mèn li mènà xal ndlil, le' sya, ryete mèn gòn rol no yila's mèn xal ndxela'sl, ne.

## 5

*Trè' ngue lu' xá mod ndxàal que tee ban no na' taamas mèn co' ndxela's.*

<sup>1</sup> Timote, ne'yoodel nec thib mèngool. Ndxle'leque', fco'x loo mèngool xal loo xudpe'l. Fco'x loo myen'bi' xal loo huespe'l, ne. <sup>2</sup> Fco'x loo xa'gotgool xal loo xna'pe'l. Fco'x loo myen'got xal loo fta'npe'l. Thib lì yécl thib lì lezo'l bli ryete con' ndxè'.

<sup>3</sup> Blyath no xa'got viud co', licpe', nac xa'got viud par que no xa' con' naquin xa' co' nac con' co' nde che loo xa', xa' co', licque', naquin con'. <sup>4</sup> No chele' chó xa'got viud ngue no xin' o ngue no xa' xot xa', naquin ner lu'l myen' par gáp myen' mod loo mèn co' nac gundan loo myen' li myen' leque mod xal mque' lezo' xud myen' gunèe xud myen' myen'. Tataaguè' que' lezo' myen' ñèe myen' xud myen'. Tac con' co' ndli myen' loo mèn guliz myen'a, naca thib con' ndac no ndxòo lezo' Diox mod co' tataa nque' lezo' mèn ñèe mèn xud mèn no xna' mèn no mèn guliz mèn. <sup>5</sup> Xa'got co', licque', nac xa'got viud no mbyan' thib xa'got, bnibe' loo xa' ante tyub quee lezo' xa'got viuda loo Diox no thidtene cues xa'got viuda Diox ze no yál'. <sup>6</sup> Per xa'got viud co' nzo làth gu' co' ante ndoo lezo' más nda' xa' gust lezo' xa', xa'got viuda nac xal thib xa' co' nguth loo cón che'n Diox. <sup>7</sup> Bnibe' loo mèngot viuda li mèngot viuda ryete con' xal ngue niin lool ndxè', Timote, par yende chó mèn yoo mènà por ne'nglide mèngot viuda con' ndac, ne. <sup>8</sup> Tac chele' chol mèn co' mbez ndxela's mènà loo Diox no ñibe' ndacte mènà loo mèn guliz mènà xal gundanpe', mènà ncà dí's cón che'n co' ndxela's na'. Más nazab ndxàc mènà loo mèn co' indxela'ste cón che'n Diox.

<sup>9</sup> Lomisque' ne, loo list co'te' nzib lèe mèngot viud, ndxàal tyub ante lèe mèngot viud co' nzo masre' ayon lín'. No ante tyub lèe mèngot viud, mèngot co' mque no thidte xa'bi' co' ngòc sa'l mèngota, loo list, ne. <sup>10</sup> Bla's loo xa'got viuda ñeene' ¿ché' ngue ta' mèn cuent le' xa'gota nxo'f zin'que' zin' ndac? Ñeene' ¿ché' mxàn xin' xa'? Ñeene' ¿ché' mda' xa' posad loo mèn tith co' mna'b posad? Ñeene' ¿ché' mbli xa' sirv no ché' mbli xa' cas loo mèn co' ngro xà' loo cón che'n xab izlyo' co' ngòc che'npe' Diox? Ñeene' ¿ché' mda'la's xa' ndxep con' loo mèn co' mxac yaltii? Ñeene' ¿ché' nzore' chó más zin' ndac mbli xa'got viuda loo rye loote zin' ndxè'? Tataa ndxàal gàca ndoore' yòo lèe xa'gota loo list, ndee.

<sup>11</sup> Tedib con' ndlyazen niin lool ne, Timote: Ne'tubtel lèe chol xa'got viud co' be' nzo ndxepete lín'. Tac co'se' tlo tyub yo'f lezo' mèngot viuda loo co' nac cón che'n xab izlyo', sya, tyoo xà' lezo' mèngot viuda loo cón che'n Crist. No yilóa bere mèngot viud, selya' mèngot viuda tedib vez. <sup>12</sup> Le' sya, leque mèngot viud yen'a ngue zib quii mèngot viud

loo cón che'n Crist por con' co' mcàbgòn mèngota li mèngota loo cón che'n Crist no ne'tolode xa' li xa'i. <sup>13</sup> Más de cona, chele' mèngot viuda que tee liz por liz mèn, gac mèngota mèn za'f. No iante gac mèngota mèn za'f. Ndxle'leque', gac mèngota mèn co' ta' cuent yix, ne. No li mèngota ngòc nguàal con'. No tyoodi's mèngota con' co' indxàalte tyoodi's nec thib mèn. <sup>14</sup> Por cona, ndlyazen más huen selya' myen'got viud yèn'a par tyan xin' myen' no gac myen' gundanpe' liz myen' par tataa mod ne'ta'de myen'got viuda arid lugar par yecloo mèn co' nayi' ñèe gu' par ñii yèe ñii tii chol mèn co' nac ngolo ngola's cón che'n mèn co' ndxela's loo cón che'n Diox por cón che'n Crist. <sup>15</sup> Tac nzoque' ndxep xa'got viud co' ngro xà'le' loo cón che'n Crist no nalle' ngue li mèngot viud xal nac co' ndlya's Mebizya.

<sup>16</sup> Lomisque' ne, chele' chó mènbi' o mèngot co' ndxela's ndxàc mèn guliz mèngot viud, ndxàal lyath no mèn guliza mèngot viuda par ne'ña'bte mèn guliza gast loo mèn co' ndxela's co' nqueltàa par lyath no mèn guliza mèngot viuda. Tataa gaca tolo que no mèn co' ndxela's co' nqueltàa gast par lyath no mèn co' nqueltàa mèngot co' nac licpe' viud co' nde che con' loo co' naquin con'.

<sup>17</sup> Le' loo mèngool co' nabe'ste ñibe' no co' nabe'ste ndyoo ner no co' nabe'ste ndyoo naa loo mèn co' nqueltàa loo cón che'n Diox na, sate más li mèn co' nqueltàa loo cón che'n Diox con' guryath no con' guryèn loo mèngoola. Masre' naquin li mèn co' nqueltàa loo cón che'n Diox con' guryath no con' guryèn loo mèn co' ngo yalban no loo mèn co' ndlu' cón che'n Diox loo mèn. <sup>18</sup> Tac loo libr co' nac xti's Diox ndub di's co' mbez: Ne'codel yex ro burr co' ndloo ndub loo bacdo' nzob triu par ga's nzob triu. Con'a nee di's, mèn co' nxo'f zin' zin' co' nac cón che'n Diox naquinque' yo ray mènà por zin' co' nxo'f zin' mènà par hua mènà.

<sup>19</sup> Lomisque' niin lool, ne, Timote: Ne'gòntel chol cuent co' ñii yèe ñii tii mèn cón che'n mèngool. Ndxle'leque', gònl cuenta ante co'se' nzo nol chop o son mèn co' ta' cuent cón che'n mèngoola ñee mènà ñeene' ché' lica o ché' ilicta par ne'queyèexù'de mèn mèngoola. <sup>20</sup> Per loo mèngool co' toloque' ngue tee cua'n xquin no ncua'n xtol na, naquinque' yool mèngoola loo rye mèn co' nqueltàa par tataa mod zyeb taamas mèn co' nqueltàa loo cón che'n Diox, ne. <sup>21</sup> Daa ñibe' lool, Timote, no ngue tan'en di's ndxè' lool loo Diox no loo Tad Jesucrist no loo rye angl co' Diox mcai par li angl thib zin' che'n Diox: Ftolo lique'l xal ngue ñibe'en lool ndxè'. Ne'lidel par más hui'l loo thib mèn làth xtàa mèn. Ne'lidel par más tyu' thib mèn loo xtàa mèn. <sup>22</sup> Ne'xo'f zin'gàdel zin' loo mèn co' nac mèngool co' nqueltàa loo cón che'n Diox par ñibe'l loo mènà par tyoo ner mènà loo mèn co' nqueltàa loo cón che'n Diox ndoore' co'se' ñeel xá mod nque tee ban mènà. Tac ne'stolque' tataa mod le'le' lùu cua'n xquinl no xtoll xal ndli taamas mèn. Ne'ta'del lugar li leque lùu chol con' ye'rsin'. Más huen nambii no nali fque teel loo cón che'n Diox.

<sup>23</sup> Más de cona, com le' lùu ndyac yíiz lezo', ¿lé'?, ne'gudel ante nít dòp co' nac nít yèe. Yende cón lii gul chu'th vin làtha par yac yíiz co' nden' lezo'l.

<sup>24</sup> Lomisque' ne, loo xnaa ndxú' xtol che'n ndxep mèn ndoore' co'se' tub rez Diox cón che'n xtol mèn loo mèn. Le' taamas mèn co' ncua'n xquin no xtol na, xtol mènà indxú'de loo xtàa mèn nalle'. Per yú' xtol mènà axta co'se' zin huiz tub rez Diox cón che'n mèn loo mèn. <sup>25</sup> Lomisque' ne, ryete zin' co' nac zin' ndac co' ndli mèn loo xtàa men, le'i ndxú'que' loo xnaa loo mèn. Per mastale' nzoque' ndxep con' ndac co' ndli mèn loo xtàa co' indxú'de loo mèn, con' ndaca ryo xo'fque' loo xnaa tac Diox li le' con' ndaca ryo xo'fque' loo xnaa co'se' tub rez Diox cón che'n mèn loo mèn.

## 6

<sup>1</sup> Niin tedib con' lool ne, Timote, por part cón che'n mèn co' ndxela's, mèn co' nac moz co' nque zin' huiz loo patrón: Naquin gáp mèn co' nac moz mod loo patrón mèn par tataa mod ne'ñii yèede no ne'ñii tiiide mèn lèe Diox no ne'ñii yèede no ne'ñii tiiide mèn cón che'n xley' na'. <sup>2</sup> Lomisque' ne, chele moz nque zin' con patrón co' ndxela's loo cón che'n Crist, ihuente naca tè'b moz patrona thib lad o gac moz moz za'f loo patrón por



ndxàc hues moz patrón por cón che'n Crist. Ndxè'leque', naquin más altant tyoo moz loo zin' che'n patrón xal ndxàala. Tataa ndxàal li thib moz tac patrón moz ndxela's loo cón che'n Crist no nac xa' mèn co' ndxàc hues co' nque' lezo' ñèe xtàa xa' por cón che'n Crist. Con' ndxè' ndlyazen lu'l loo mèn no col yalbàn cón che'na loo mèn, Timote.

*Pab ngue lu' trè' xá mod yo nagàl lezo' mèn co' ndxela's loo Diox por cón che'n Crist.*

<sup>3</sup> Chele' chol mèn ndlu' tedib con' no ne'yòode lezo' mèn loo di's ndac che'n Tad Jesucrist na', no ne'yòode lezo' mèn cón che'n di's co' nac xley' na' co' ndlu' cón che'n xal ndxàal li mèn cas loo Diox, <sup>4</sup> mèn nac mèn nate's no mèn naxal' co' yende cón ndxác. Nac mèn xal thib mèn yíiz con ryethe co' nac co' ndyub yo'f lezo' mèn. No con' co' ndyub yo'f lezo' mèn ndli par noo noo ndyoodi's mèn cón che'n chol di's no chol xley' che'n mèn loo izlyo'. Mod co' ndxap mèn no xal ndli mèn, con'a ndli ndxàn lezo' mèn ñèe mèn xtàa mèn. Nzyál' di's nzyál' cuent làth xtàa mèn ngyoo mèn con xtàa mèn. Asendli mèn nda' mèn xyàn lezo' taamas mèn. Thidtene indxapte mèn yalxla's loo xtàa mèn. <sup>5</sup> Mod co' ndxàp mèn ndli thidtene ngyoo mèn làth xtàa mèn, mèn co' ngue no xtùuz zab co' nac leque mèn co' ndli nzye' xtùuz mèn no lezo' mèn par gac mèn mèn ye'rsin'. Mèn indlibe'de cón che'n Diox co' nac con' licpe'. No ndli mèn xtùuz le' loo xley' che'n Crist no loo cón che'n Diox nzo mod aseli mèn cua'n mèn mod par alithe gac ric mèn por mod ye'rsin' che'n mèn. Ña'ben lool, Timote, blá' mèn co' tataa nac. Ne'queltàa nodel mèn. <sup>6</sup> Per, licpe' ba'i, anze'f thib con' ndac nac con' co' ndlu' xley' na' loo na', na' co' ndlec lezo' no na' co' ndyac lezo' loo con' co' ngue note na'. <sup>7</sup> Tac co'se' ngóol na' yende cón ngòp na' loo izlyo' ndxè'. Licpe' ba'i, ne' ne' yen cón ye' na' co'se' gath na'. <sup>8</sup> Per chele' na' ngue no con' co' hua na' atate huiz, no chele' na' bete ndoo ri'th no bete nda centav par ndi' na' xab na' co' ndxoc na' xal ndxàala, con conate ndxàal tyac lezo' na' no cuac lezo' na' loo yalnaban na'. <sup>9</sup> Per ndxe'leque', por part cón che'n mèn co' ndlya's gac ric, mèn ne'xecte par gac preb mèn loo ryethe con' ndyub yo'f lezo' mèn. Ale ndxe'leque', yizi'f yiga's mèn loo chol con' ye'rsin' no loo chol mod ye'rsin' co' nac xab izlyo' co' ndyub yo'f lezo' mèn par li mèn huax con' tont co' li gac con' ryes loo mèn no por lult yiza' yalnaban mèn loo mèn no lyux mèn par ryo xà' mèn loo Diox thidtene yiloo. <sup>10</sup> Tac con' co' nac anze'f nde yath mèn ñèe mèn nac tmi no mod co' ndli mèn par que no mèn tmi, con'a nac co' ncàb loo mèn rye loothe con' ye'rsin'. Lica, nzoque' ndxep mèn co' ndxath ndlyux ñèe tmi. Mèn ngro xà'le' loo co' ngola's mèn loo Crist. Por cona, ndxàc loo mèn ndyactii mèn no ngulàa yaltii loo mèn axta plóthe dib naban mèn por mod ye'rsin' co' ndxàp mèn.

*Trè' ngue lu' loo na' co' ndxela's xá mod li na' gan par ryoo xyèn na' loo cón che'n con' co' ndxela's na'.*

<sup>11</sup> Per lùu, Timote, co' nac thib mbi' che'n Diox, ne'lidel ryethe con' ndxè'. Blá' ryethe con' ye'rsin'a. Nali no nambii fque tee banl loo Diox. Thib li yécl no thib li lezo'l bli cas Diox no ftolque' gòp yalxla's loo Diox. Fque'que' lezo' Diox no fque' lezo' ñèel hues xtàal. Gòp yalncha'la's loo mèn no fxec yèe con mèn. Gòc mèn nado' loo mèn, ne, co' nee di's, gòc mèn co' que's ya' loo xtàa. No ne'tye'stel loo mèn. <sup>12</sup> Dib nzo yécl dib nzo lezo'l fxo'f zin' zin' co' mxo'f zin' Diox lool cón che'n con' co' ndxela's na' par lila. Bli nèe xtùuzl loo yalnaban co' nac yalnaban thidtene co' ndxàpl xal thib con' co' quej ndyenl par ne'lá'dela. Loo cona mcuri Diox lùu co'se' mblo rol no mda'l cuent ndac cón che'n xal ndxela'sl loo Crist loo huax mèn co' nda' cuent cón che'n. <sup>13</sup> Loo Diox co' nda' yalnaban loo ryethe con' no loo Jesucrist co' nali mdub razon loo Pons Pilat, ñibe'en lool, Timote: <sup>14</sup> Lyazen le' lùu tyubdi's loo ryete con' xal ngue ñibe'en lool loo cart ndxè'. Ne'se'del loo mod co' ngue ñibe'en lool ndxè' par nec thib mod no nec tedib mod yende cón lii par yoonl le'n dib tiemp axta co'se' gac huiz co'se' yi'th Tad Jesucrist na' loo izlyo' tedib vez. <sup>15</sup> Co'se' gac huizpe' no tiemppe' co' yi'th xi Tad Jesucrist na', Diox lique' par gac ryo xo'f Jesucrist xal ndxàala. Tataa li Diox tac thidte Diox nac Diox. Thidte Diox nac Diox co' ndxàp rye loothe con' la's nii no la's ya'. No nac Diox thidte Diox co' ñibe' loo ryethe

con' no loo ryethe mèn co' nde'f di's ñibe', no mèn co' nac chol jef, no loo rye jef bix co' nde'f di's ñibe'. <sup>16</sup> Dioxa nac angoluxte xa' co' ne'gathte thidtene. No nzo ban Diox loo xnii co' ndxà'x bèel tant axta yende chó mèn li gan bii gax loo xnii co'te' nzo Diox. Nec thib mèn tarte hui' xá ñaa Diox loo izlyo' ndxè'. Ne' ne' gác mèn hui' mèn loo Diox loo izlyo' ndxè'. Ndlyazen gab mèn di's guryath no di's guryèn cón che'n Diox loo xtàa mèn. Dioxa ñibe' loo rye loothe con' le'n lín' co' ntlo no le'n lín' co' ndxelo no le'n lín' co' ne'lith node. Taandxè' gàca.

<sup>17</sup> Bnibe' loo chol mèn ric co' naban le'n tiemp ndxè', Timote, par ne'gàcte mèna arid mèn nate's no mèn naxal'. Ne' ne' cue quee lezo' mèna loo yalgon' co' lyux loo mèna. Ndxè'leque', bnibe' loo mèn ric cue quee lezo' mèna loo Diox co' naban thidtene. Tac Diox nac xa' co' nda' rye loothe con' ndac axta plóthe càa mèn. Diox nda'i loo mèn par tyac lezo' mèn loo con'a no par càba con' ndac loo mèn, ne. <sup>18</sup> Bnibe' loo mèn rica le' mèn ric li con' ndac. Más huen gác mèn rica mèn ric loo con' ndac co' angli mèn rica no angta'la's mèn ric con' càa mèn prob. No qui'th mèn rica che'n mèn rica càa mèn prob. <sup>19</sup> Tataa mod cue nèe mèn rica loo yalnaban ndac co' ndxàal ban mèn par càba con' ndac le'n huiz co' nde nque. Tataa mod gáp mèn rica yalnaban thidtene, chele' mèn rica, licque', tolo li xal ngue niina lool nalle'.

*Trè' ngue ta' cuent cón che'n lult con' co' ngue ñibe' Pab li Timote.*

<sup>20</sup> Anderhuenl, Timote, loo ryete con' co' ngue ñibe'en lool cón che'n zin' co' mxo'f zin' Diox lool ndxè'. Ne'ta'del lugar par arid tub nzal di's co' yende cón ntac co' nac di's co' nac cón che'n xab izlyo'. Ne' ne' gácl mèn co' li cas loo di's co' mbez mèn co' nde'f di's ndxác, per ndxe'leque', pà gác mèna. <sup>21</sup> Pues, lùu nda'que' cuent nzo ndxep mèn co' ndoo nque xís mèn gutyè'a co' nde'f di's ndxác. No por cona, ngro xà' mèna loo cón che'n Crist co' ndxela's na'.

Ndlyazen le' Diox tolo li anggàc con' ndac lool, Timote. Taandxè' gàca, ndee.

## Mbryop Cart Co' Mque' Pab Ye's Loo Timote

### *Pab ngue que' ye's loo Timote.*

<sup>1</sup>Daa, Pab, ndxe' di's che'n Jesucrist xal nee lezo' Diox no xalque' nac con' co' mcàbgòn Diox par yòo ban no mèn Diox thidtene por thidte nqueltàa mèn loo cón che'n Jesucrist. <sup>2</sup>Ngue que'en cart ndxè' lool, Timote, lùu co' nac xal xgan' daa co' nque' lezon ñèen. Ndlyazen le' Diox xud na' no Tad Jesucrist na' tolo li anggàc con' ndac lool. Ndlyazen le' Diox xud na' no Tad Jesucrist na' tolo lyat lezo' ñèel. Ndlyazen le' Diox xud na' no Tad Jesucrist na' li par nagàl yo lezo'l loo Diox no cue banl rye ndal no rye ndye'thl làth mèn co' ndxàc hues xtàal.

### *Pab ngue lu' loo Timote xá mod lu' Timote loo mèn cón che'n Crist.*

<sup>3</sup>Timote, co'se' mbezen Diox ze no yál', siemprque' nte' lezonl mbezen Diox cón che'n'l. No mbezen loo Diox co' ndlin sirv loo xal ndryo yéquen no xal ndryo' lezon co' nac thib xtùuz nambii no thib xtùuz nali tac yende con' nden'en le'n lezon xal mèn co' ndli con' ye'rsin'. Ndlin xalque' ngòc mod co' ngòp xudgool daa póla, ne. <sup>4</sup>Nte'que' lezon xal mbín'l láth nxo'f zin'l cón che'n Jesucrist. No nalle' anze'f nguen lezon ndlyazen ñèen máal par tyac lezon co'se' ñèenl. <sup>5</sup>Nte'que' lezonl le' lùu, lícque', ndxela's loo Crist. Yalndxela's ndxè' nerleque' xot lùu, Loida, ngola's. Ngoloa, ngola's xna'l, Eunis, ne.

<sup>6</sup>Cona, ngue niin lool loo cart ndxè', Timote: Bli par ye'th lezo'l no leque lùu ftegán lezo' lùu loo cón che'n zin' co' mxo'f zin' Diox lool par lil zin' ndxè'. Diox mbli ndxàca lool anze'f lijer luu par lil zin' co' mxo'f zin' Diox lool. Ngòc con'a lool co'se' ngurezen Diox por lùu no co'se' mxo'fen yan lool, ne. <sup>7</sup>Hui', Timote, Diox ne'nglàade thib xpíi loo na' co'se' ngola's na' par nzyeb na' co'se' ndub ngu's mèn na'. Ndxè'leque', Diox mblàa Xpíi Natú' loo na' par lyath no Xpíi Natú' na' par yòo valor loo na' no par gác na' li na' zin' co' mxo'f Diox loo na' par li na' zin'a, no par que' lezo' na' ñèe na' xtàa na', no par gác na' mèn co' tyoo altant loo zin' co' mxo'f zin' Diox loo na' par li na'i, no par gác na' mèn co' ndxàp lezo' thidtene. <sup>8</sup>Por cona, ne'thyontel ta'l cuent cón che'n Tad Crist loo mèn. Ne' ne' thyonl ta'l cuent cón chenen, ne, xal ngue'en lezi'f trè' por cón che'n Tad Crist. Ndxè'leque', ftolo fxec yèe loo yaltii co' ndxàc lool láth ngue ta'l cuent cón che'n di's ndac co' ndlu' cón che'n xá mod lyá' mèn loo con' ryes xalque' ndli Diox ndxàpl fuerz no valor. Tataa lila xal nac ryethe con' co' mblec Diox la's niil no la's ya'l. <sup>9</sup>Diox mtelá' na' loo con' ryes. Mdoo Diox na' par xo'f zin' na' zin' ndxè' co' inacte cón che'n xab izlyo'. Ndxè'leque', nac zin' ndxè' che'npe' Diox. Ne' ne' inaca por nac na' mèn co' nac anze'f mèn ndac por cona mxo'f zin' Diox zin' ndxè' loo na'. Ndxè'leque', mxo'f zin' Diox zin' ndxè' loo na' xal mnibe' Diox lezo' Diox no por tant nque' lezo' Diox ñèe Diox na' por thidte nqueltàa na' loo cón che'n Crist Jesús. Diox nque' lezo' ñèe Diox na' axta ndoore' cuec no xèn' Diox izlyo'. <sup>10</sup>Per nalle' alanleque' ndryo xo'f loo mèn xá mod ndli Diox anggàc con' ndac loo mèn tac mbi'th Tad Jesucrist na' loo izlyo' ndxè', Jesucrist co' ntelá' mèn loo con' ryes. Tad Jesucrist mbli le' co'se' gath mèn, mèn co' ndxela's loo Tad Jesucrist, yende chó con' ye'rsin' gác loo mèn. Más de cona, mblo xo'f Crist yalnaban co' nac yalnaban thidtene loo mèn. Mblu' Crist loo na' por cón che'n di's ndac co' ndlu' xá mod lyá' mèn loo con' ryes, mastale' ndxàc bél'yòo lad mèn xlua' mbey no xlua' yòo, mèn co' ndxela's loo Crist, bél'yòo lad mèn na' yiza'de thidtene. Ndxè'leque', yiche bél'yòo lad mèn na' par yòo ban no mèn na' Diox thidtene. Ne'ryo xà'de mèn loo Diox thidtene.

<sup>11</sup>Por cón che'n di's ndac ndxè', Diox mdoo daa par tan cuent no tethen cón che'n di's ndac, no par huen di's che'n Crist, no par gác daa maistr loo chol mèn co' inacte mèn nación Israel cón che'n di's ndac. <sup>12</sup>No por ngon yalbàn cón che'n di's ndac ndxè' ndxàc yaltii loon. Per mastale' ndxàc yaltii loon, thidtene inthyonte daa. Tac daa naneeque' chó loo ndxelazen. No, por derech, naneequen le' Tad Crist ndxàp con' la's nii Tad Crist

no la's ya' Tad Crist par quenap Tad Crist daa ned ngue tee xo'f zin'en zin' ndxè' axta gac huiz co'se' yi'th xi Jesucrist mèn co' ndxela's loo Jesucrist loo izlyo'.

<sup>13</sup> Fxo'f ndeleque' lezo'l no bli xalque' mblu'en lool loo di's co' nac xley' ndac, Timote. No ftoloque' que tee ban ndac loo cón che'n Crist Jesús co' ndxela'sl. No ftoloque' gòc mèn co' nque' lezo' Diox no fque'que' lezo' ñèel hues xtàal por thidte nqueltàa gu' loo cón che'n Crist. <sup>14</sup> Loo cón che'n di's ndac co' mxo'f zin' Diox lool par lila, leque lùu quenap lùu. No nabe'ste fque tee li xal ñibe' di's ndac ndxè' loo na' no xalque' ndlyath no Xpii Natú' co' nzo loo ryete na' na'.

<sup>15</sup> Lùu naneequé' yende chó mèn co' nac mèn yèzeya' che'n làaz mèn asia nga favor chenen. Ndxé'leque', làth mènà ngo Figel no ngo Hermog co' más ngocloo gunèe daa. <sup>16</sup> Ndlyazen le' Diox lyat lezo' ñèe Diox mèn guliz Onesifr tac huax vez mbi'th tegal Onesifr lezon par ngo nagal lezon. No ne'nthonte Onesifr ngnèe Onesifr mèn por ngue'en lezi'f. <sup>17</sup> Ndxé'leque', co'se' ngo Onesifr ciuda Rom, añenti mcua'n Onesifr daa no mzyal daa loo Onesifr. <sup>18</sup> Timote, lùu nonque' anze'f mblyath no Onesifr na' co'se' ngo na' ciuda Efes. Por cona, ndlyazen lyat lezo' Diox ñèe Diox Onesifr co'se' zin huiz co'se' tub rez Diox cón che'n mèn.

## 2

<sup>1</sup> Per lùu, Timote, co' nac xal xgan'pe' daa loon, ftolo blique' fuerz par tolo té'thl, no ta'l cuent, no tyubdi'sl loo con' co' nac con' ndac co' ngue no na' ante por nzo na' loo Crist Jesús no loo cón che'n Crist Jesús. <sup>2</sup> Ryete con' co' mbìnl cón che'n di's ndac co' mblu'en lool no co' mblu'en loo huax mèn co' nda' cuent cón che'n di's ndaca, blu'l loo taamas mèn, mèn co' mbli nèe lezo' loo cón che'n Tad Crist par tolo lu' mènà cón che'n di'sa loo tedib cua' mèn co' tarte gòn cón che'n di's ndaca.

<sup>3</sup> Cona, ngue niin lool, Timote: Fxec yèe fxo'f zin' zin' ndxè' con daa loo cón che'n di's ndac che'n Jesucrist xal nxec yèe thib solndad co' nac thib solndad ndac co'se' nda solndad loo thib xó'. <sup>4</sup> Nec thib mèn co' ndxàc solndad yende mod que no mèn co' nac solndad tedib zin' xà'. No ne'gácte yòo solndad loo chol zin' co' ndli mèn loo izlyo' ndxè'. Ndxé'leque', solndada naquinque' tyubdi's loo jef solndad co' ñibe' jef solndad loo solndad. <sup>5</sup> Lomisque' ne, myen' co' nac myen' deportist, ne'lìde myen' gan chele' myen' ne'quithte xal ñibe' libr' co' ndlu' cón che'n yalguyith loo mèn. <sup>6</sup> Lomisque' ne, mèn co' ngo bin par thop mèn cosech, mènà nerleque' hua ndèe no yéth co' ta' loo zin' co' mbli mèn loo xyòn mèn. <sup>7</sup> Bìn di's co' ngue niin lool, Timote: Tad Crist xal' xtùuzl no lezo'l par tolo ta'l cuent cón che'n ryete con' co' naquinque' ta'l cuent. <sup>8</sup> Fte' lezo' cón che'n Jesucrist co' ngro xban làth mèn nguth, Jesucrist co' nde bin David co' ngòc rey póla. Cón che'n Jesucrist nac di's co' ngon yalbàn loo mèn par non mèn no ta' mèn cuent xá mod li mèn par lyá' mèn loo con' ryes. <sup>9</sup> No por cón che'n di's ndac ndxè' nxec yèe daa ndxàc yaltii loon axta ndub dó' caden niin xal ndub dó' mèn caden nii thib mbi' co' ndxuth mèn. Per di's ndac co' nac xti's Diox yende chó mèn gac ca'. <sup>10</sup> Cona, ale nxec yèe daa ryete con' co' ndxàc loon por cón che'n mèn co' mcui Diox. Tataa ndlin par gac lyá' mèn loo con' ryes par yòo ban no mèn Diox thidtene co'te' ndxà'x xnii che'n Diox thidtene. Tataa gac loo mèn por thidte nqueltàa mèn loo cón che'n Crist Jesús. <sup>11</sup> No lïcque' nac di's co' ngue niin lool ndxè', Timote:

Chele' na', lïcque', nguth no Crist, co' nee di's, mblá' xà' na' ryethe con' co' nac cón che'n xab izlyo', le' sya, ban noque' na' Crist, ne.

<sup>12</sup> Chele' na' tyactii por cón che'n Crist, le' sya, tataaguè' ñibe' no na' Crist, ne. Per chele' na' cà di's cón che'n Crist, cà di's Crist cón che'n na', ne.

<sup>13</sup> Mastale' ne'tyalte na' li nèe na' na' loo cón che'n Crist par li na' con' co' ñibe' Crist loo na', ndxe'leque', leque Crist li co' mcàbgòn Crist li Crist loo mèn. Per Diox thidtene inquediide. Ne' ne' yen mod gab Diox: Ne'liden con ndxablen lin. Ndxé'leque', Diox lique' con' mcàbgòn Diox li Diox loo mèn.

*Trè' ndlu' loo na' cón che'n chó nac thib xa' co' nque' zin' ndac loo cón che'n Tad Crist.*

<sup>14</sup> Blique' par te' lezo' mèn xal nac di's co' ngue niin lool ndxè'. Bnibe' loo mèn loo Tad Diox ya ne'tolode yoo di's mèn cón che'n con' co' yende cón ntac par mènà par tataa mod tolo yòo yéc mènà loo cón che'n Tad Crist. Tac ale le'le' ndli di'sa no cuenta par ndxos xtùuz mèn no ndyoo xà' lezo' mèn co'se' ndxòn mèn cón che'n di's ndac che'n Crist. <sup>15</sup> Bli co' nzote mod lil par lu'l loo Diox xalque' thib mbi' zin' co' indxetode loo zin' co' ndxác mbi' ndli mbi' co' nac xal thib mbi' co' inthyonte loo zin' co' ndli mbi', co' nee di's, nambiique' no nalique' blo yalbàn no lu' cón che'n di's ndac cón che'n Crist co' nac licpe' loo mèn. Yende chó mport nzo lezo'l ñèel mènà, ndee, Timote. <sup>16</sup> Nee xá ngue teel, Timote. Ne'ta'del lugar tyoodi'sl di's zab no di's cap xal ndyoodi's mèn co' alithe nzi ban loo cón che'n xab izlyo', di's co' yende cón ntac. Tac mèn co' tataa ndyoodi's, mènà ndli xal mèn co' ndxezi'f loo con' ryes par tolo li mènà más con' ye'rsin'. <sup>17</sup> Di's co' ndyoodi's mènà anze'f nazab ndyoodi's mènà par nteza' mènà xtùuz xtàa mènà xal nac thib yó'f co' ndub yas lad mèn. Làth mèn co' tataa ndyoodi's nzo Mene no Filet. <sup>18</sup> Mene ryop Filet mdoo xà' lezo' loo con' co' nac licpe'. Mbez Mene ryop Filet ale nguri'thle' tiemp co' nac tiemp co'se' ryo xban mèn. Tataa mod ntesèn Mene ryop Filet no nteza' Mene no Filet xtùuz ndxep mèn co' ndxela's loo Crist. <sup>19</sup> Per mastale' tataa mbez ryop mbi'a, mèn co' nzo loo cón che'n Diox por cón che'n Crist, mèn co' nqueltàa chol lugar, mènà nzi nèe loo cón che'n Diox xal thib cimient co' mblec Diox co' yende chó cuin no co' yende chó co'. Diox gunii chop di's cón che'n mèn co' ndxela'sa. Di'sa nac xal thib sell co' ndlu' cón che'n mènà. Di'sa nee di's Tad Diox ndlibe'que' mèn co' nac che'npe' Tad Diox. Thiba con' ndxè'.

Le' tediba na', di'sa mbez, ne: Ryete mèn co' mbez lèe Crist no co' nacpe' che'n Crist nquin ryo xà' mènà loo rye loothe con' ye'rsin'. <sup>20</sup> Co'te' nac thib liz roo mèn nzo chop ned trast co' ndli zin' mèn. Thib neda nacsua' con or no con plat. Le' tedib neda na, nacsua' con yaa no con yòo cuan'. Ner ned trast co' nacsua' con or no con plat ndli zin' mèn loo zin' co' nac zin' nambiila's. Le' tedib ned trast co' nacsua' con yaa no con yòo cuan', trasta ndli zin' mènà loo zin' co' nac zin' nazabla's. <sup>21</sup> Di's ndxè' nda' cuent loo mèn chele' chol mèn ryo xà' loo chol mèn ye'rsin'a no loo chol con' ye'rsin', gac mènà loo Crist xal trast co' li zin' gundan co' ñibe' yòo rooa loo con' guryath no loo con' guryèn cón che'n gundana. No gac mènà xal thib trast co' ngro xà' loo chol zin' co' nac zin' nazabla's par ngòc nab mènà loo chol zin' ndac cón che'n Crist.

<sup>22</sup> Ne'sál'tel cón chol myen'bi' co'se' lya's myen'bi'a chòo myen'bi'a lùu par ya nol myen' par li myen' chol con' ye'rsin'. Fque tee ban nalì no nambi. Gòp yalxla's loo Crist. Fque' lezo' loo Diox no fque' lezo' gunèe hues xtàal. Blo nagàl lezo'l con rye mèn co' dib nzo yéc no con rye mèn co' dib nzo lezo' mbez lèe Crist. <sup>23</sup> Ne'queltàadel no ne' ne' gònl cón che'n mèn co' nque di's cón che'n con' co' intacte. Tac lùu nanee le'i ncàb yalgyoo loo mèn. <sup>24</sup> Mèn co' nac mèn co' nxo'f zin' zin' che'n Tad Crist, mènà indxàalte que di's con xtàa mèn. Ndxè'leque', gac mènà mèn nado' loo rye mèn. Gac mènà mèn nalas no gac mènà mèn co' ncha'la's par lu' mènà xtàa mèn. <sup>25</sup> Nado' di's nado' cuent bco'x no gunii loo mèn co' gáple'que' ncàb lool. Ne'stolque', Diox ta' lugar lyàa yéc mènà no lyàa lezo' mènà par libe' mènà co' nac co' licpe' cón che'n Crist. <sup>26</sup> Le' sya, tataa mod ne'stolque' lyá' mènà loo rye loote con' co' nac che'n Mebizya co' nac xal thib las co'te' ndxegàa mèn par ndxe'sleque' que tee mènà. Mènà ngòc mèn co' mdyoo dó' nii no co' mdyoo dó' ya' loo Mebizya par mbli mènà xal gunee lezo' Mebizya.

### 3

*Trè' ndlu' loo na' xá mod gac mèn le'n lult huiz co' nde nque.*

<sup>1</sup> Ndiyazen nonl con' ndxè' ne, Timote, le' le'n tiemp co' gac lult tiemp loo izlyo' ndxè', gac tiemp co' gac con' ryes loo mèn. <sup>2</sup> Tac tiempa ban mèn co' anze'f tye's tín' con mod co' ndxàp mèn. Gac mènà mèn co' nde yath ñèe tmi. Gac mènà mèn nate's. Gac mènà mèn nala's no leque mènà gab nac mènà mèn tín'. Gac mènà mèn co' ñii yèe ñii tii cón che'n Diox loo xtàa mèn. Ne'tyubdi'ste mèn loo xud mèn no loo xna' mèn. Gac mènà



mèn naxin loo xtàa mèn. Gàc mènà mèn co' thidtene ne'lìde cas loo Diox. <sup>3</sup> Gàc mènà mèn co' ne'que'de lezo' ñèe xtàa. Gàc mènà mèn co' thidtene ngue tee nayi' lezo'. Gàc mènà mèn co' yáp di's no mèn co' ncuà'n di's loo xtàa mèn. Gàc mènà mèn co' thidtene indyóode cón che'npe' mèn. Gàc mènà mèn brut thidtene. No gác mènà ngolo ngola's loo ryethe con' co' nac con' ndac. <sup>4</sup> Gàc mènà mèn co' ta'xù' xtàa loo mèn. Gàc mènà mèn co' indyóode loo con' nate's co' ngue li mènà. Gàc mènà mèn co' anze'f ndye's loo xtùuz co' ndli mèn. Más ndxòo yéc mènà ncuà'n mènà co' ndryo' ndlyen' lezo' mènà co' nac yalgon' cón che'n xab izlyo' par tataa mod tyac lezo' mènà leque yòo yéc mènà cua'n mènà con' co' nac cón che'n Diox. <sup>5</sup> Mènà mbez loo taamas mèn le' mènà ndyubdi's loo Diox no nac mènà mèn co' ndli cas loo Diox. Per ale ndxe'leque', indxela'ste mènà loo Diox. Por cona, indlyath node Diox mènà. Ne' ne' indlu' mènà le' mènà, lìcque', nac mèn co' ndxela's loo Diox. Yende chó mport nzo lezo'l ñèel mènà, Timote. <sup>6</sup> Tac làth mènà nzo mèn co' ndxòo liz mèn co'te' nzo myen'got naxèn co' ncuà'n xquin. Thidte ndxác mènà con myen'gota par thidte ncuà'n ryop ned mènà xquin mènà xal ndryo' ndlyen' lezo' mènà li mènà. <sup>7</sup> Myen'gota más ndyub nza loo chol con' cub co' ndlu' chol mèn loo myen'gota par té'th myen'gota chol con' ye'rsin'. No tolo ndxác loo myen'gota thidteneque' ne'gácte myen'gota ta' myen'gota cuent cón nac con' licpe' co' nac cón che'n Diox. <sup>8</sup> Lomisque', xal mbli Janes no Jambres co' mcà di's loo Moisés, tataaque' ndli mènà par cà di's mènà loo ryethe con' co' nac licpe'. Nac mènà mèn co' ngue no xtùuz xin no xtùuz cap. No nac mènà mèn naad no mèn nguud. Yende chó juis mènà loo cón che'n co' ndxela's na' loo Crist. <sup>9</sup> Per ne'yade mènà arid tith loo con' ye'rsin' co' ngue li mènà tac ryete con' naxèn no con' nachol' co' ndli mènà xtùuz, le'i ryo xo'f loo rye mèn xal ngro xo'f ryete con' xin no con' cap co' mbli Janes no co' mbli Jambres.

*Trè' ngue ta' cuent cón che'n lult con' co' ngue ñibe' Pab par li Timote.*

<sup>10</sup> Per ndxe'leque', lùu ngue tee lique' con' ndac co' nac co' mblu'en lool loo xley' daa. No ngue tee ban lùu xal nque tee ban daa. No ndli ryete con' co' ndoo lezon ndlin loo cón che'n Crist. Naneeque'l xal ndxelazen loo Crist. Nxec yèel xal nxec yèen loo zin' co' mxo'f zin' Diox loon par lina. Nque'que' lezo'l Diox no nque'que' lezo'l ñèel mèn xal nque' lezon Diox no xal nque' lezon ñèen mèn, ne. Ncha'la'sl loo mèn no nxecl loo con' ndxác lool xal ncha'lazen no nxec yèen loo con' ndxác loon. <sup>11</sup> Lùu nonque' ryete yalndyub ngu's no ryete yaltii co' ngòc loon le'n yèez Antioqui, no le'n yèez Icon, no le'n yèez Listr. Lùu mbìnle' cón che'n ryethe con' co' mxec yèen huax lugar. Loo ryete con'a mtelá' Tad Crist daa. <sup>12</sup> Lìcque' naca le' ryete mèn co' lya's ryo xà' loo cón che'n xab izlyo' no co' lya's que tee ban li cas loo Crist Jesús no loo cón che'n Crist Jesús, mènà tub ngu'sque' mèn. <sup>13</sup> Per mèn co' nac mèn ye'rsin'túb sate más tolo li mènà con' xin no con' cap. Le'le' quedii mènà taamas mèn. No le'le' quedii taamas mèn mènà.

<sup>14</sup> Per nalle' ngue niin lool, Timote: Leque lùu bli nèe lùu loo con' co' mté'thl no loo con' mdyall ngòpl yalxla's licpe' naca. Lùu naneeque' no nonque'l chó loo mté'thl con' ndxè', ¿lé'? <sup>15</sup> Tac axta chu'thl no axta huiz co'se' mtlo mdoo rool no ndoo xènl mté'thl no ngócl ndlabl libr co' nac xti's Diox. Loo libr co' nac xti's Diox mté'thl no mda'l cuent xá mod lyá' mèn loo con' ryes par gác mènà mèn co' ndxác cón che'n xá mod ndxela's na', co' nee di's, ndlyá' mèn loo con' ye'rsin' co'se' ndxela's mèn loo Crist Jesús. <sup>16</sup> Xpii Natú' ndlyath no mèn co'se' mque' mènà ye's xal mblobe' no mtoxcua' Diox no xal mnibe' Diox loo lezo' Diox par mbyan' libr co' nac xti'spe' Diox. Anze'f ntac libr co' nac xti's Diox ndxè' par lu' na' cón che'n Diox loo mèn, no par yoo Diox mèn loo xti's Diox, no par gàca le' co'se' lab mèn xti's Diox, telì Diox xtùuz mèn no par gàca lu' Diox xá mod que tee ban li mèn loo Diox. <sup>17</sup> Chele' mèn li xal ñibe' xti's Diox, sya, gác mèn mèn co' ndxác tìn'. No li mèn rye con' ndac co' neete lezo' Diox.

#### 4

<sup>1</sup> Loo Diox, no loo Tad Jesucrist na' co' yi'th ñibe' xal rey loo izlyo' loo mèn no co' tub rez loo mèn co' nzi naban, no loo mèn co' nguth co'se' yú' loo Jesucrist loo mèn, tolo

ndlyazen no ñibe'en lool, Timote: <sup>2</sup> Le' lùu ta' cuent no col yalbàn cón che'n di's ndac che'n Diox loo mèn. Altant tyool par col yalbàn loo mèn, que naca ndyaque'l tyal mèn ta' mèn nza mèn par gòn mèn cón che'n di's ndac che'n Diox, que naca ndyaque'l ne'tyalte mèn ta' mèn nza mèn par gòn mèn cón che'n di's ndac che'n Diox. Nado' di's nado' cuent gunii loo mèn xal ñibe' xti's Diox. Fco'x loo mèn xal mbez di's ndac. Fcha'la's loo mèn. Làth xtau'a, fte'th no blu' loo mèn cón che'n Crist xal nac di's ndac che'n Diox. <sup>3</sup> Tac zin thib huiz no zin thib ze co'se', por derech, ne'tyalte mèn gòn mèn no ne'xecte mèn di's co'se' lya's mèn lu' mèn xley' ndac che'n xti's Diox loo mèn. Ndxé'leque', làth xtau'a, con mod ye'rsin' co' nac mèn, tlo mèn, nalas cua'n mèn mèn co' lu' chol xley' cub loo mèn xal ndly'a's mèn gòn mèn. <sup>4</sup> Lìcpe' ba'i, ndxé'leque', tyoo xà' lezo' mèn loo co' nac lìcpe'. Ne'lìde mèn cas loo con' lìcpe'. Sya, bere mèn, más tyub nza mèn loo chol di's co' nac chol cuent co' intacte par yila's mèn cuenta. <sup>5</sup> Per lùu, Timote, ndxé'leque', nalas no ndxé'sleque' fque tee ban loo ryete con'. Fxec yèe co'se' gac chol yaltii lool. Thidteneque' fco'f zin' zin' co' col yalbàn cón che'n di's ndac co' ndlu' xá mod lyá' mèn loo con' ryes. Ftoo altant loo zin' co' mxo'f zin' Diox lool par telo lùu zin' co' mxo'f zin' Diox lool.

<sup>6</sup> Yamerle' zin huiz co'se' xyo ren daa, co' nee di's, yamerle' zin huiz co'se' angndoon guth mèn daa xal nee lezo' Diox. <sup>7</sup> Tac loo zin' co' mxo'f zin' Diox loon par lina, ngòc daa xal thib solndad co' huenleque' mque tee loo xó'. Mtelolen zin' co' mxo'f zin' Diox loon xal thib mbi' co' mbli gan loo carre loo thib puest. Thidteneque' ngòpen yalxla's loo cón che'n Crist. <sup>8</sup> Más de cona, daa ndub queeque' lezo' gòn loo Diox co'te' ta' Diox thib con' ndac loon co' gac che'npe' daa tac daa mque tee ban nalì no nambii loo Diox. Per iante loon ta' Diox con' ndaca huiza. Ndxé'leque', Diox ta' con' ndac loo ryete mèn co' anze'f nguen lezo' yi'th Crist tedib vez loo izlyo' ndxè', ne. Co'se' yi'th Tad Crist, nalì tub rez Tad Crist loo ryete mèn co'se' gac huiza.

*Lult mod co' lyath no Timote Pab.*

<sup>9</sup> Bli purad par setilte yi'th neel máa daa, Timote. <sup>10</sup> Dem thidtene mblá'ya' daa. Más ndxòo lezo' Dem con' co' nac cón che'n xab izlyo' le'n tiemp ndxè' leque cón che'n Crist. No nalle' mxenle' Dem ned, nda Dem par ciuda Tesalónica. Le' Crescent na, mtel'en nda thib mandad par le'n yèezya' che'n làaz mèn galacia. Le' Tit na, mtel'en nda tedib mandad par ned le'n yèezya' che'n làaz mèn dalmacia. <sup>11</sup> Thidte Luc nzo no daa trè'. Fcua'n Marc par yi'th nol Marc co'te' nzon. Marc ndlyath no daa loo zin' co' mxo'f zin' Diox loon. <sup>12</sup> Daa mtel' Tiquic par ciuda Efes. <sup>13</sup> Co'se' yi'thl, lil favor, yi'th nol capot daa co' mtan'en liz Carp yèez Tro. Yi'th nol libr daa, ne. Per con' co' más naquin daa nac ye's co' nac xque'spe' daa. Bli favor, te' lezo'l ye'th nol ye's daa, ndee, Timote.

<sup>14</sup> Alejandr co' nac xa' guzi'f mbli huax con' ye'rsin' loon. Per Diox quix loo Alejandr rye con' mbli no Alejandr daa. <sup>15</sup> Nee nee xá ngue teel loo Alejandr. Tac Alejandr axta arid mcua'n mod par mca' Alejandr loon co'se' ngue tan cuent no ngue toodizen cón che'n di's ndac loo mèn.

<sup>16</sup> Ner vez co'se' mdubén razon daa loo mèn, nalì mdan cuent cón che'n di's ndac loo mèn. No yende chó mèn mblyath no daa tiempa. Ndxé'leque', mblá'ya' ryete mèn daa. ¡Oj ne'que' dolte Diox loo mèn por con' co' mbli no mèn daa, huen! <sup>17</sup> Per ndxé'leque', Crist ndlyath no daa. Mblo Crist valor loon par taan zin' co' mxo'f zin' Diox loon co' mblon yalbàn. No ryete mèn co' inacte mèn nación Israel mbìn cón che'n di's ndac che'n Diox ned mque tee'en. Por cona, naneen no nonen mtelá' Diox daa loo con' ryes làth xtau'a. <sup>18</sup> Naneen no nonen le' Crist telá'que' daa loo ryete con' ryes co' lya's mèn li no mèn daa. Neequen no nonen le' Crist nquenap daa axta zin huiz co'se' tlo Crist, ñibe' Crist loo bé' no loo izlyo'. Loo Crist gac con' roo no con' xèn le'n lín' co' ntlo, no le'n lín' co' ndxelo, no le'n lín' co' ne'lith node thidtene. Taandxè' gaca.

*Lult di's co' mque' Pab ye's loo cart ndxè'.*

<sup>19</sup> Timote, gunii Diox loo Prisc no loo Aquil no loo mèn guliz Onesifr. <sup>20</sup> Erast mtan'en ciuda Corint. Le' Trofim na, mtan'en yèez Milet tac ale ngulen liz Trofim. <sup>21</sup> Bli purad

yi'th neel máa daa ndoore' yòo na' tiemp xìl'. Ebul ngue nii Diox lool. Pudent, no Lin, no xa'got co' lèe Claud, no ryete taamas mèn co' ndxàc hues na' por cón che'n Crist co' nzo trè' co'te' nzon ngue nii Diox lool, ne. <sup>22</sup> Tad Jesucrist nque tee noque'l, Timote. Ndlyazen le' Tad Jesucrist tolo li anggàc con' ndac loo ryete gu' co'te' nzo gu' nedrè'. Taandxè' gàca.

## Cart Co' Mque' Pab Ye's Loo Tit

### *Pab ngue que' ye's loo Tit.*

<sup>1</sup> Daa, Pab, nac thib mbi' co' nxo'f zin' cón che'n Diox par ndxen di's che'n Jesucrist co' ngon yalbàn loo mèn par tolo leque mèn li nèe mèn no tolo té'th mèn cón che'n Jesucrist, mèn co' ndxela's loo cón che'n Diox, mèn co' Diox mcui, co' nee di's, mtel' Diox daa par non mèn no nanee mèn lìcque' nac co' ndxela's na' loo Crist tac na' nzi tee lique' cas loo Diox. <sup>2</sup> Nzi tee lique' na' cas loo Diox tac nzi quee lezo' na' yòo ban no na' Diox loo bé' co' gac loo na'. Cón che'n yalnabana, Diox mcàbgòna loo Jesucrist par ta' Diox yalnabana thidtene loo mèn ndoore' tlo lín' co' ntlo, no lín' co' ndxelo, no lín' co' ne'lith node. Yende mod tyè' Diox cón che'n di's co' gunii Diox. <sup>3</sup> Co'se' ngòc tiemp co' mblobe' no mtocua' Diox par co' xo'f Diox cón che'n di's ndac, mbli Diox par non mèn no nanee mèn cón che'n di's ndaca. Diox co' ntelá' mèn loo con' ryes, Diox mxo'f zin' zin' ndxè' loon par tan cuent no gon yalbàn loo mèn xal mnibe' Diox loon. <sup>4</sup> Daa, Pab, ngue que'en ye's ndxè' lool, Tit, lùu co' nac xal xgan'pe' daa loo co' ndxela's na'. Ndlyazen le' Diox xud na' no Tad Jesucrist na' co' mtelá' na' loo con' ryes li anggac con' ndac lool. Ndlyazen, ne, nagàl yo lezo'l loo Diox no que tee banl rye ndal no rye ndye'thl làth xtàal.

### *Trè' ngue lu' xá mod mxo'f zin' Tit zin' cón che'n Crist loo mèn le'n thib yòo biiz le'n níttó' co' lèe Cret.*

<sup>5</sup> Lùu nda'que' cuent cón che'n con' co' ngue ñibe'en lool ndxè', Tit. Mtan'en lùu le'n yòo biiz co' lèe Cret par lu'l loo mèna xá mod ndxàal li mèna no par cuecl thib ned mèngool loo mèn co' nqueltàa loo cón che'n Diox por cón che'n Crist le'n rye ciuda che'n yòo biiz Cret. <sup>6</sup> Bnibe' le' mèngoola gac mèn co' yende chó mèn quexù'. Gac mèngoola sa'l thidte xa'got. Gac mèngoola mèn co' ngue no xin' co' ndxela's loo Tad Crist, myen' co' nzi tee nali, co' inacte mèn co' indyóode cón che'npe' mèna, no co' inacte mèn naad no mèn nguud. <sup>7</sup> Tac ndxàal gaca le' mèngool co' tyoo ner no co' tyoo naa loo mèn co' nqueltàa loo cón che'n Diox por cón che'n Crist gac mèna mèn co' yende chó mèn quexù' tac mèngoola, lìcque', tyoo ner no tyoo naa loo cón che'npe' Diox. Ne'gàcte mèngoola mèn co' li co' neete lezo' mèna. Ne'gàcte mèngoola mèn co' setilte nso' yéc. Gac mèngoola mèn co' indxòode lezo' arid nítguy. Gac mèngoola mèn co' ne'yáp di'ste no mèn co' ne'ncua'nte di's. Gac mèngoola mèn co' indli huan'te loo xnaa co'se' ndi' mèn no co'se' ntho' mèn, co' nee di's, ngo mèn má' xi'tha par xexte li mèn gan tmi loo xtàa mèn. <sup>8</sup> Ndxè'leque', gac mèngoola mèn co' ta' posad loo chol mèn tith. Gac mèngoola mèn co' que' lezo' ante loo con' ndac. Gac mèngoola mèn co' altant ndyoo loo cón che'n zin' co' ndli mèna. Gac mèna mèn nambii no mèn nali loo Diox. Gac mèna mèn co' yòo lezo' Diox ñèe Diox. Gac mèna mèn co' mté'th co' huenleque' par ante ndoo lezo' mèna li mèna con' ndac. <sup>9</sup> Gac mèngoola mèn co' ndlu' no co' nquenap di's co' nac di's licpe' co' nac xal ñibe' xley' che'n Diox par gac mèngoola co'x mèngoola con di's co' nac xley' ndac che'n Diox. Tataa mod li mèngoola gan loo mèn co' ñii yèe ñii tii cón che'n Diox. <sup>10</sup> Tac huax mèn nzo co' nac mèn naad no mèn nguud co' ñii yèe ñii tii loo cón che'n Diox no mèn co' alithe ndyoodi's chol di's no mèn gutyè' co' nquedi xtàa. Mèna nac mèn co' ngue no yalndxela's che'n circuncisión, co' nee di's, nac mèna mèn nación Israel. <sup>11</sup> Bnibe' loo mèngoola par tau' mèngoola ro mèna no ne'tyoodi'ste mèna más xal nac mod co' ndyoodi's mèna xal niin lool ndxè'. Tac mèn co' ndxela's loo yalndxela's che'n circuncisión ante ngue tee teza' loo mèn huax liz mèn loo co' nac co' ndxela's mèn. Ndlu' mèn che'n yalndxela's che'n circuncisión con' co' indxàalte lu' mèn. Mastale' ndxàal thyon mèna, per ndxè'leque', thidtene inthyonte mèna ngue li mèna gan tmi tataa mod. <sup>12</sup> Tac ndxàca xal ndxab thib mbi' co' nac leque mèn yòo biiz Cret co' mde'th di's cón che'n mèn yòo biiz Cret. Ndxab mbi': Mèn yòo biiz Cret nac mèn gutyè'. Nac mèna mèn

brut xal má'. Ante ndoo lezo' mènà ndxuhuacho' mènà no ndxàc yíizhuach loo mènà, co' nee di's, mèn za'f mènà. <sup>13</sup> Di's co' mde'th mbi' co' nac mèn yòo biiz Cret cón che'n xtàa mbi'a nac lìcpe'. Por cona, negadi's byoo mènà, por derech, par gàc mènà mèn co' nque tee ndac no co' nque tee nali loo con' co' ndxela's na' loo Crist. <sup>14</sup> Tataa bli par ne'tyub nzade mènà loo chol cuentgox che'n mèn co' ncà di's no co' nchep di's loo con' co' nac lìcpe'. <sup>15</sup> Ryete con' nambii no nali nac loo mèn co' nac mèn nali no mèn nambii loo Diox. Per loo mèn zab no loo mèn co' indxela'ste loo cón che'n Diox por cón che'n Crist, yende chó con' nambii nac nambii loo mènà. Ndxè'leque', xtùuz mènà no co' nden' mènà le'n lezo' mènà co'se' ndli mèn xtùuz nac con' zab.

<sup>16</sup> Mbez mènà, lìcque', ndlibe' mènà merpe' Diox. Per ndxe'leque', rye con' zab co' ndli mènà ngue lu' le' mènà ncà di's no chep di's mènà cón che'n Diox. Nac mènà mèn xin no mèn cap, mèn naad no mèn nguud. Yende chó juis mènà par li mènà chol con' ndac.

## 2

*Trè' ndlu' cón che'n xley' ndac.*

<sup>1</sup> Per ndxe'leque', lùu, Tit, blu' no ftoodi's cón che'n xley' ndac co'se' tyoodi's nol mèn. <sup>2</sup> Bnibe' yo nagàl lezo' mènbi'goola loo xtàa mènbi'goola no gáp mènbi'goola mod. Gác mènbi'goola mèn co' quix xnii lezo' no co' tyoo altant loo zin' co' ngue li mènbi'goola. Gác mènbi'goola mèn co', lìcque', ndxela's loo Crist. Gác mènbi'goola mèn co' nque' lezo' Diox no co' nque' lezo' ñèe xtàa mènbi'goola. Gác mènbi'goola mèn co' ncha'la's no mèn co' nxec yèe loo cón che'n xtàa mènbi'goola. <sup>3</sup> Lomisque', bnibe' loo mèngotgool que tee gáp mèngotgoola mod loo xtàa mèngotgool axta gab mèn cón che'n mèngotgoola: Lìcque', ndli mèngotgool ba' cas loo Diox, ndee. Ne'gàcte mèngotgoola mèn co' yáp di's no mèn co' ncu'a'n di's làth chol mèn. Ne'gàcte mèngotgoola arid mènguy loo nítguy. Ndxè'leque', gác mèngotgoola mèngot co' ndlu' ryethe con' co' nac con' ndac loo mèn. <sup>4</sup> Bnibe' le' mèngotgoola lu' mèngotgoola loo xa'got co' ngrolthe ndxàp lin' par gáp xa'gota mod no que' lezo' xa'gota ñèe xa'gota xin' sa'lbi'pe' xa'. No que' lezo' xa'gota ñèe xa'gota xin' xa'gota. <sup>5</sup> Bnibe' le' mèngotgoola lu' loo xa'got co' grolthe ndxàp lin' par gáp xa'gota mod loo rye con' no gác xa'gota mèn co' nambii nac no mèn co' nali nac loo Diox. Bnibe' ñee rsi' ñee rso xa'gota liz xa'gota, ne. Gác xa'gota mèn co' angndxòo lezo' li con' ndac. Gòn xa'gota ro sa'lbi'pe' xa'gota. Tataa ndlyazen li ryop ned xa'gota par yende chó mèn gáp razon ñii yèe ñii tii cón che'n di's che'n di's ndac che'n Diox co' mtan' Diox loo na'.

<sup>6</sup> Lomisque' ne, Tit, fco'x loo myen'bi' par gáp myen'bi' mod no gác myen'bi' amiu ndac loo xtàa myen'bi'a. <sup>7</sup> Loo ryete con', blu' loo mèn no gòc thib muestr cón che'n ryete con' ndac. Ftoo lezo' blu' ante con' co' nac lìcpe' xley' che'npe' Diox. Láth ngue lu'l loo mèn, ne'tyoo yugithte lezo'l loo con' ngue lil no con' co' ngue lu'l. <sup>8</sup> Leque lùu la's lool no nado' di's nado' cuent ftoodi's no mèn par yende chó mèn co' nac ngolo ngola's quexù'l no zib quii mènà lùu, Tit, láth co'se' ndyoodi'sl con' mèn pál co'te' nque teel.

<sup>9</sup> Bnibe' no fco'x le' mèn co' nac moz tyubdi's loo patrón moz. No li moz par tyac lezo' patrón loo rye zin' co' ndli moz. No ne'càb rode moz loo patrón moz. <sup>10</sup> Bnibe' loo moz ne'gàcte moz mèn co' arid naxex ya' par hue' moz che'n patrón moz xexte. Ndxè'leque', li moz con' guryath no con' guryèn loo patrón moz par gàca le', por cón che'n moz, mèn ñii di's natú' cón che'n di's ndac che'n Diox, Diox co' mtelá' na' loo con' ryes.

<sup>11</sup> Diox mbly'le' loo mèn le' Diox ndly'a's li Diox anggàc con' ndac loo mèn tac Diox ndly'a's le' mèn lyá' loo con' ryes. <sup>12</sup> Tataa mod ngue lu' Diox loo na', na' co' ndli cas Diox, par cà di's na' rye con' co' intacte no co' nac con' co' ndryo' ndlyen' lezo' mèn co' nac cón che'n xab izlyo'. Tataa mod ban na' par gáp na' mod no par gác na' amiu ndac loo xtàa na'. Gác na' mèn nali no mèn nambii loo Diox co', lìcque', ndli cas loo cón che'n Diox loo izlyo' ndxè' le'n tiemp ndxè'. <sup>13</sup> Ndlu' con' ndac che'n Diox loo na', ne, par cue ban bed na' axta co'se' yi'th xa' co' nzi quee lezo' na' co'se' tyaa no tyubque' di's no gác con' mcàbgòn Diox par cued na' co'se' gác huiz yi'th Tad Diox co' nac merpe' Diox roo



no Diox xèn co' mtelá' na' loo con' ryes. Diox nac yub Tad Crist Jesús. <sup>14</sup> Leque yub Tad Crist Jesús mda' lugar mquée yalguth loo Tad Crist Jesús loo cruz par tataa mod mdix Crist Jesús cón che'n ryethe xquin na' no xtol na' no cón che'n ryethe con' ye'rsin' co' mbli na'. Tataa mbli Crist Jesús par mtebii Crist Jesús na' no par ngòc na' mèn che'n Crist Jesús no mèn co' ndryo' ndlyen' lezo' ndli con' ndac.

<sup>15</sup> Con' ndxè' nac co' ngue ñibe'en lool, Tit: Blu' loo mèn par ye'th lezo' mèn loo cón che'n Diox. No nado' di's nado' cuent fco'x mèn xal ñii Tad Jesús. No nabe'ste fque tee ban. No nabe'ste gòc par yende chó zib quii lùu par tè'b mèn lùu thib lad.

### 3

*Trè' ndlu' loo mèn cón ndxàal li mèn, mèn co' ndxela's loo cón che'n Crist Jesús no loo Crist Jesús.*

<sup>1</sup> Bnibe' loo mèn co' ndxela's par xyof ndeleque' lezo' mèn que tee ban ndac mèn co'te' nzol ba' par tyubdi's mèn no gòn mèn ro mèn co' ñibe', mèn co' nxof zin' zin' che'n gobiern. Bnibe' nalas cue mèn, mèn co' ndxela's loo cón che'n Diox por cón che'n Crist par li mèn ryethe con' co' nac con' ndac co' ndxàal li mèn. <sup>2</sup> Bnibe' loo mèn ne'ñii yèede no ne'ñii tiide mèn co' ndxela's cón che'n nec thib mèn. Ndxle'leque', gac mèn mèn co' nque tee ban rye nda mèn no rye ndye'th mèn làth xtàa mèn. Gac mèn mèn nado' par, tataa mod, licque', lu' mèn loo rye mèn, por cón che'n con' co' ndli mèn, le' mèn nacque' mèn ndac.

<sup>3</sup> Tac na', ne, ngòc mèn naad no mèn nguud thib cua'a. Ngòc na' mèn co' ne'ndubdi'ste loo Diox, co' nee di's, tith mque tee ban na' loo Diox. Ngòc na' xal moz loo ryethe con' co' mdub yo'f lezo' na' no con' co' mbli mdyac lezo' na'. Ngure ban na' loo ryethe con' co' nac con' ye'rsin'. Ale mbyàn lezo' na' gunèe na' xtàa na'. Ngòc na' mèn co' ngòc xyàn lezo' no ngòc xyàn lezo' na' gunèe na' thib xtàa na' no tedib xtàa na'. <sup>4</sup> Per ndxe'leque', Diox mblo xo'f loo ryete mèn, Diox co' mtelá' mèn loo con' ryes, le' Diox ndlya's li Diox anggac con' ndac loo mèn no, licque', nque' lezo' Diox ñèe Diox mèn. <sup>5</sup> Diox mtelá' na' loo con' ryes. Con'a ne'ngacte por cón che'n chol zin' ndac co' mbli na'. Ndxle'leque', ngòca tac mblyat lezo' Diox gunèe Diox na'. Co'se' ngòc na' mèn cub, co' nee di's, ngola's na' loo Crist, ngòca loo na' le' na' nac mèn nalì no mèn nambii loo Diox xal co'se' ntech mèn trast zab no ndxan' trasta nambiila's. Ngòc na' mèn cub por cón che'n Xpii Natú'. <sup>6</sup> Diox mblàa Xpii Natú' loo na' por cón che'n con' co' nzo la's nii Jesucrist no por con' co' nzo la's ya' Jesucrist par gac huax con' ndac loo na', na' co' mtelá' Jesucrist loo con' ryes. <sup>7</sup> Diox angmbli nac na', na' co' ndxela's loo Crist, mèn nalì no mèn nambii loo Diox. Nac na' mèn co' yan' no con' co' angta' Jesucrist loo na' co'se' yilo yi'th xi Jesucrist na', na' co' nzi quee lezo' loo Jesucrist co' mbli par yòo ban no na' Diox thidtene yiloa.

<sup>8</sup> Licque' nac di's co' nac di's ndac ndxè'. Ndlyazen tolo li nèel cón che'n di's ndac ndxè' loo mèn co'se' ta'l cuent cón che'n di's ndac loo mèn par gaca le' mèn co' ngola's loo Diox, cua'n mèn mod tolo li mèn con' ndac thidtene. Con' ndxè' nac con' ndac co' càb con' ndac loo mèn chele' mèn yòo yéc no yòo lezo' mèn li mèn con' ndac. <sup>9</sup> Per ndxe'leque', ne'sál'tel con mèn co' nac mèn naad co' alithe no no nibdi's con' co' intacte no ne'sál'tel con mèn co' nda' cuent cón che'n bin mèn co' ngure ban póla póla. Ne' ne' sál' con mèn co' nque di's no mèn co' ncu'a'n di's. Ne' ne' sál' con mèn co' ngyoo di's cón che'n ley co' mxof Moisés loo mèn. Tac ryete con' ndli mèn nac con' anxle' co' yende cón ntac.

<sup>10</sup> Chele' ndxep mèn co' asendli par ndyoo xà' lezo' mèn co' ndxela's nzo làth gu', no nteri'th nza mèn di's co' nco'xl loo mèn thib vez no tedib vez, fè'b no blo' chug mèn làth gu' co' ndxela's. <sup>11</sup> Tac lùu naneeque' no nonque'l le' mèn mbos xtùuz no mbixyath xtùuz mèn. Ngue cua'n mèn xquin mèn. Leque mèn nquexù' mèn con xtùuzpe' mèn.

*Trè' ngue lu' Pab loo Tit rye mandad co' li Tit loo Pab.*

<sup>12</sup> Co'se' tel'en Artem o Tiquic lool, bli fuerz yi'th neel máa daa le'n yèz Nicópolis tac tya mblin xtùuz ri'then tiemp xìl'.

<sup>13</sup> Ndlyazen lyath nol Zen co' nac licenciad no lyath nol Apol loo con' naquin mèna par yi'th mèna loon. Bli par yende cón nde che loo mèna no yende cón gac falt loo mèna láth ndoo mèna ned co'se' nde mèna co'te' nzon. <sup>14</sup> Bli par li mèn yòò biiz Cret, co' thidte ndxela's loo cón che'n Diox xalque' ndxela's na' loo cón che'n Diox, par té'th mèna par ñibe' mèna loo lezo' mèna li mèna con' ndac par que no mèna con' co' li zin' mèna co'se' nquin mèna par ne'gàcte loo mèna xal thib yaa xlè co' ingue ta' ndacte xlè.

*Trè' ngue nii mèn Diox loo xtàa mèn. No Pab ngue bez Diox par li Diox anggac con' ndac loo mèn tya.*

<sup>15</sup> Ryete mèn co' nzo non ngue nii Diox lool, Tit. Gunii Diox loo mèn co' naban yòò biiz Cret co' ndxela's loo cón che'n Jesucrist, mèn co' nque' lezo' ñèè na'. Ndlyazen le' Diox tolo li anggac con' ndac loo ryete gu' co' ndxela's, gu' co' nqueltàa loo cón che'n Diox le'n yòò biiz Cret, ndee gu'. Taandxè' gàca.

## Cart Co' Mque' Pab Ye's Loo Thìb Mbi' Co' Ngro' Lèe Filemón

### *Pab ngue que' ye's loo Filemón.*

<sup>1</sup> Filemón, daa Pab co' ngue lezi'f por cón che'n Crist Jesús, daa ngue que' ye's ndxè' lool. No leque tiemp co'se' ngue que'en ye's co' nac cart ndxè' lool, ngo no Timote daa. Filemón, anze'f nque' lezon ñèen lùu, lùu co' ndlyath no daa loo zin' co' nxo'f zin'en loo cón che'n Tad Jesucrist. <sup>2</sup> No leque tiemp ndxè' nque'en ye's ndxè' loo mèn co' nqueltàa loo cón che'n Diox lizl. No ngue que'en ye's ndxè' loo xa'got co' lèe Ap co' ndxàc fta'n na' loo cón che'n Crist, no ngue que'en ye's ndxè' loo Arquip co' mblyath no na' loo zin' co' mxo'f zin' Crist loo na' co' ngote mod mbli na'. <sup>3</sup> Ndlyazen le' Tad Diox xud na' no Tad Jesucrist na' li par anggàc con' ndac loo gu'. No ndlyazen le' Tad Diox no Tad Jesucrist na' li par yo nagàl lezo'l loo Diox no par cue banl rye ndal no rye ndye'thl làth xtàal co'te' nzol par nedrè'.

*Trè' ndlu' le' Diox nque' lezo' ñèe Diox Filemón no nque' lezo' Filemón nèe Filemón mèn hues xtàa Filemón loo cón che'n Jesucrist. No ndlu' trè' le' Filemón ndxàp yalxla's loo Diox.*

<sup>4</sup> Na mbezque' loo Diox: Diox quix U', Diox, co'se' nte' lezon cón che'nl co'se' mbezen Diox, Filemón.

<sup>5</sup> Tac daa ndxònque' le' lùu nque'que' lezo' Diox no ndxela'sque'l no ndxàpl yalxla's loo Tad Jesús. No nque'que' lezo'l ñèel mèn no ndxàpque'l yalxla's ñèel mèn, mèn co' nac che'npe' Diox no mèn co' nzo loo cón che'n Diox. <sup>6</sup> Mbezen Diox no ña'ben loo Diox le' ryete mèn co' ndxela's loo Jesucrist no loo cón che'n Jesucrist par nedrè' ta' cuent co' huenleque' cón che'n ryethe con' ndac co' ndxàc loo na' co' mbli Jesucrist loo na'. Ndlyazen le' mènna ta' cuenta por nda' mènna cuent cón che'n xá mod nque tee ban lùu no xá mod ndlu' lùu no nda' lùu cuent loo mèn cón che'n Jesucrist. <sup>7</sup> Nalle' anze'f ndyac lezon no anze'f ndye'th lezon por nonen no ndan cuent arid nque' lezo'l ñèel mèn co' nac hues xtàal por cón che'n Jesucrist. No non daa le' por cón che'nl ryete mèn co' ndxela's co' nzo par nedrè' ngure nagàl lezo' loo cón che'n Crist Jesús. Thìba con' ndxè'.

### *Pab ngue na'b loo Filemón par li Filemón thìb favor loo Ones co' ngòc mozpe' Filemón.*

<sup>8</sup> Le' tediba na, mastale' ndlil cuent nac daa thìb mbi' co' ndxe' di's che'n Crist, no por cona ndxàpen derech ñibe'en lool con' co' ndxàal lil, Filemón, <sup>9</sup> ndyaquen taandxè' mod nado' di's nado' cuent ña'ben thìb con' lool por cón che'n nque' lezon ñèen lùu no por nque' lezo'l ñèel daa. Daa, Pab co' nacle' thìb mènngool, ngue'en lezi'f nalle' por cón che'n Crist Jesús. <sup>10</sup> Filemón, ña'ben thìb favor lool por cón che'n Ones. Ones ngòc xal thìb xgan' daa tac ngola's Ones loo Jesucrist no loo cón che'n Jesucrist por cón che'n daa láth nzon trè' co'te' nac lezi'f.

<sup>11</sup> Nonquen no ndaquen cuent le' Ones ngòc thìb moz co' yende chó juis lool thìb cua'a. Per nalle' ndyaquen le' Ones nac thìb moz ndac par gac Ones moz lùu tedib vez xalque' ndxàc Ones thìb moz ndac loon co'te' nzon par ndxè'. <sup>12</sup> Na tel' Ones lool tedib vez. Nabe'ste fque no Ones. Fque no Ones xalque' lezo'pe'en no ngudloope'en. <sup>13</sup> Na mblyaz ngyan' Ones trè' con daa par li Ones mandad loon cón che'nl láth ngue'en lezi'f por cón che'n di's ndac che'n Diox. <sup>14</sup> Per indlyasten lin nec thìb con' xal ndlyazen no xal nee lezon. Ndlyazen gònl con' ndxè' ñeene' cón ñeel loon, Filemón. Sya, chele' lùu li favor loon tel'l Ones loon tedib vez, ne'gabtel loo lezo'l le' daa ngue ñibe' yèe lool par lil favor ndxè' loon. Ndxè'leque', lila ante xal nee lezo'l. <sup>15</sup> Peser mblá' Ones lùu plá mbe' par gaca thidtene que nol Ones. <sup>16</sup> Indlyasten que nol Ones xal thìb moz co' ñibe' yèe mèn loo. Ndxè'leque', ndlyazen que nol Ones xal thìb huespe'l co', lìcque', nque' lezo'l ñèel. Lìca, daa anze'f ndyac no Ones. Per ndlyazen le' lùu ndxàal más tyac no Ones. Indlyasten

ante tyac nol Ones xal ndyac no mèn xtàa mèn loo izlyo' ndxè'. Ndxè'leque', ndlyazen tyac nol Ones xal thib huespe'l loo cón che'n Tad Crist.

<sup>17</sup> Cona, ngue niin lool, Filemón: Chele' lùu ndli cuent nac daa mèn co' ndxàc huesl no xtàal loo cón che'n Diox, fque no Ones xal yub daa, ndee. <sup>18</sup> Chele' Ones mteza' chol con' co' nac cón che'nl no chele' Ones ngro' te'b ndxep tmi lool, fta' cuent loon. Bna'ba loon. Na guix co' ntac con'a. Guixen co' nde'b Ones lool, ne. <sup>19</sup> Daa, Pab, ngue que' ye's ndxè' lool, Filemón. Lìcque', na guix co' nde'b Ones lool. No nase ngue gon valor loon. Ndlyazen lil favor ndxè' loon tac neeque'l daa mbli par ngola's lùu loo cón che'n Jesucrist no loo Jesucrist. <sup>20</sup> Bli favor ndxè' loon, hues por cón che'n Jesucrist, xalque' thib mbi' co', lìcque', ndxela's loo Tad Crist. Ftegán lezon xalque' mèn co' ndxàc hues loo cón che'n Crist, ndee. <sup>21</sup> Ngue que'en ye's ndxè' lool tac daa naneeque' le' lùu ndyubdi'sque' co' mbezen lool. No naneeque' le' lùu li masre' con' loon loo favor co' ngue na'ben lool ndxè'. <sup>22</sup> Lomisque' ndlyazen ne, fcu'a'n lugar liz mèn co'te' gòn plá huiz. Tac daa mbed le' Diox li par gàca loon xalque' nac di's co' mbez gu' loo Diox co'se' mbez gu' Diox le' Diox li gàca loo gu' par nedrè' le' daa gal nee máa gu' par nedrè'.

*Pab ngue nii Diox loo Filemón. No lult vez ndxab Pab gac con' ndac loo Filemón.*

<sup>23</sup> Loo cart ndxè' ngue nii Epaf'r co' thidte ngue non lezi'f por cón che'n Crist Jesús, Diox lool, Filemón. <sup>24</sup> Ngue nii Marc no Aristarc no Dem no Luc co' nac myen' co' ndlyath no daa loo zin' cón che'n Crist Diox lool, ne.

<sup>25</sup> Ndlyazen le' Tad Jesucrist na' li anggac con' ndac loo ryete gu' par nedrè', Filemón. Taandxè' gàca, ndee.

## Cart Co' Mcàaya' Mèn Nación Israel, Mèn Co' Ngòc Mèn Co' Mbrye's Pál

*Di's ndxè' ndlu' le' Diox mdoodi'sle' no mda' Diox cuent loo mèn cón che'n Jesucrist, xgan' Diox.*

<sup>1</sup> Diox mdoodi'sle' huax vez thib mod no tedib mod loo mèn co' ngòc xudgool na' póla por ro mèn co' mde'th di's co' ndxab Diox tiempa. <sup>2</sup> Per le'n lult tiemp co' nde nque ndxè' Diox mdoodi'sle' loo na' por ro xgan'pe' Diox co' nac Jesucrist. Diox mdoo xgan'pe' Diox par mbyan' no xgan'pe' Diox alux con'. Por cón che'n leque xgan'pe' Diox, Diox mxèn' no mblec Diox izlyo' no bé' no alux taamas con' co' nziri'. <sup>3</sup> Leque yub xgan'pe' Diox nquée xnii tín' no ndxá'th bèel xgan'pe' Diox lalque' xal nquée xnii tín' Diox no ndxá'th bèel Diox. Nacque' xgan'pe' Diox xalque' nac Diox. Ngue tèn' xgan'pe' Diox ryete con' xalque' nac ryethe con' roo no con' xèn co' nzo la's nii xgan'pe' Diox no co' nzo la's ya' xgan'pe' Diox. Co'se' ngolo mton' xgan'pe' Diox xtol na', syare' mdub Diox xgan'pe' Diox cuat Diox, Diox co' nac Diox roo no Diox xèn tín' co' ndub axta gáp loo bé'. Tataa mbli Diox par ñibe' xgan'pe' Diox loo alux con'.

*Trè' ndlu' le' Jesucrist co' nac xgan' Diox más ñibe' leque rye angl.*

<sup>4</sup> Nac xgan'pe' Diox más mbi' roo no mbi' xèn loo ryethe angl axta mdub lèe Diox Jesús, xgan' Diox, tedib lèe co' nac más lèe roo no lèe xèn leque lèe chol angl. <sup>5</sup> ¿Xá nee gu'? ¿Ché' nzo chó loo angl ndxab Diox:

Lùu nac xgan'pe' daa,

à'? Yende, ¿lé'? No ¿ché' nzo chó loo angl ndxab Diox:

Nalle ngòc daa yub xud lùu, ne,

à'? Yende xàa, ¿lé'? No ¿ché' nzo chó loo angl ndxab Diox:

Gàc daa xud lùu. Le' lùu na, gàc xgan' daa,

à'? Yende xàa, ¿lé'? <sup>6</sup> Tedib vez co'se' mtel' Diox xgan' Diox loo izlyo' par gàc xgan' Diox xal hues ndlyo loo mèn co' yila's loo cón che'n Diox por cón che'n xgan' Diox co' nac Crist yiloo, mnibe' Diox:

Ryete angl che'n Diox li con' guryath no con' guryèn loo xgan' Diox co' nac Crist.

<sup>7</sup> Le' cón che'n angl na, ndxab Diox:

Le' Diox ndli le' angl ndxàc xal mbii. No ndli Diox le' moz Diox co' nac leque angl ndxàc quì bèel.

<sup>8</sup> Per ndxe'leque', Diox gunii cón che'n xgan' Diox taandxè':

Xgan', lùu co' nac Diox xal daa, bnibe' loo alux con' le'n lín' co' ntlo, no le'n lín' co' ndxelo, no le'n lín' co' ne'lith node. Lùu, Xgan', nalì no nambii ñibe'l loo alux con', ndee.

<sup>9</sup> No nque'que' lezo'l ñèel mèn co' ante ndli con' co' nac con' nalì no con' co' nac con' nambii. No ndxòo xyàn lezo'l ñèel mèn co' ndli chol con' ye'rsin'. Por cona, daa co' nac Dioxpe' lùu, angmblin le' lùu sate tolo ndyac lezo' leque taamas xtàal co' nzo.

<sup>10</sup> Tolo ndxab Diox loo xgan' Diox:

Lùu, Tad, co'se' nerleque' mblecl no mxèn'l alux con', mxèn'l izlyo'. Le' bé' na, nac xal thib zin' co' mxo'f zin' lùu.

<sup>11</sup> Ryete con'a lyux per lùu thidteneque' ndxan'. No thidteneque' nzol. Rye loothe con' co' nziri', le'i gà'x xal ndxà'x thib xab mèn.

<sup>12</sup> No cosua'l bé' no izlyo', co' nee di's, rye loothe con' co' mxèn'l no mblecl xal nthùuz mèn thib laris co'se' ngosua' mèn laris. Huiza zye' loo ryethe con'a. Per lùu thidtene ne'zye'de. Ne' ne' lyuxl. Ne' ne' lith nol.

<sup>13</sup> Yende chó loo angl tolo ndxab Diox:

Ftub cuaten axtaque' lin le' ryete mèn co' nac ngolo ngola's che'nl gàc mèn nado' lool.



<sup>14</sup> ¿Ché' inacte rye angl xpíi co' nxo'f zin' no co' ndli mandad loo Diox, à'? Lìca, Diox ntel' angl par lyath no angl mèn co' lyá' loo con' ryes, mèn co' ban no Diox thidtene.

## 2

*Di's ndxè' ndlu' thidteneque' quenap mèn mèn loo cón che'n Diox tac mèn nac mèn co' mblyá'le' loo ryethe con' ryes no con' ye'rsin'.*

<sup>1</sup> Por cona, ndxàalque' li na' cas no tyub nza na' loo con' mbìn na' tac ne'stre'fque' tyoo xà' lezo' na' loo cón che'n di's ndac che'n Diox co' mbìnle' na'. <sup>2</sup> Tac yalbàn co' mblo angl más póla mbli nèeque' cón che'n Diox loo mèn. Le' sya, mèn co' mcua'n xquin no xtol no mèn co' ne'ndubdi'ste dis co' mblo angl yalbàna, nalique' no nambìique' mtetii Diox mènna por cón che'n con' ye'rsin' co' mbli mènna tiempa. Por cona, <sup>3</sup> ¿xá mod lyá' na' loo con' ryes chele' na' ne'lìde cas xá mod ntelá' Diox mèn loo con' ryes co' nac mod roo no mod xèn, sya'? Loo cón che'n con'a ner Tad Crist mtlo mblo yalbàn loo mèn. Mèn co' mbìn di's co' gunii Tad Crist loo mènna, mènna mbli nèe mènna loo cón che'n Crist. Ngoloa, mblo mènna yalbàn cón che'n Tad Crist loo nu'. <sup>4</sup> Tataa mod Diox mblu' loo mèn lìcque' nac di's che'n di's ndac co' mblo mènna yalbàn tac Diox mbli huax señ no yalguzye' no con' co' nac con' roo no con' xèn loo mènna. Làth xtau'a, mblàa Diox Xpii Natú' loo mèn co' ngola's xal gunee lezo' Diox.

*Jesucrist ngòc xal thib hues na', na' co' ndxela's loo Diox por cón che'n Jesucrist.*

<sup>5</sup> Ne'ngnibe'de Diox lezo' Diox too Diox chol angl par ñibe' angl loo izlyo' ndxè' le'n tiemp co' yi'th nque. Cóon che'n tiempa ngue toodi's na'. <sup>6</sup> Póla ngo thib mbi' co' mde'th di's co' ndxab Diox. Ndxab mbi'a:

¿Cón ntac mèn izlyo' par nte' lezo' U' cón che'n mèn izlyo', à', Tad? Yende cón ntac mèn loo U', ¿lé'?, Tad.

No ndxab mbi'a:

¿Cón ntac mèn izlyo' le' U' yi'th too naa mènna, à', Tad? Yende cón ntac mèn izlyo', Tad.

<sup>7</sup> U', Diox, mblec mèn loo izlyo' no mxèn' U' mèn loo izlyo' par gac mènna mèn be'the loo angl. U' mbli ngòc con' guryath no con' guryèn no con' roo no con' xèn loo mèn loo izlyo'.

<sup>8</sup> Mda' U' lugar loo mèn loo izlyo' ñibe' mènna loo ryethe con' co' mblec U' no co' mxèn' U' loo izlyo'. U', Diox, mbli le' ryete con' ndubdi's no ngòc nado' loo mèn loo izlyo'.

Co'se' mbli Diox le' ryete con' ngòc nado' loo mèn loo izlyo', yende chó con' nzo co' ne'ngàcte nado' loo mènna. Per axta nalle' tarte hui' na' le' ryete con' ndxàc nado' loo mèn. <sup>9</sup> Per na' naneeque' no nonque' na' cón che'n Jesús. Jesús ngòc be'the loo rye angl. Diox mbli par ngòc Jesús xa' roo no xa' xèn no ngòc con' guryath no con' guryèn loo Jesús tac mden' Jesús cón che'npe' na' co'se' mden' Jesús yalnè no yaltii por cón che'n yalguth co' mquée loo Jesús. Gunee lezo' Diox mquée yalguth loo Jesús por cón che'n ryete mèn.

<sup>10</sup> Diox mxèn' ryete con' no ngue tèn Diox ryete con'. Diox mbly'a's que no Diox huax xin' Diox loo yòba'. Por cona, mquinque' mxactii Jesús axta nguth Jesús par ngòp Jesús con' la's nii Jesús no la's ya' Jesús par mtelá' Jesús mèn loo con' ryes, mèn co' mdyal yila's loo Jesús. <sup>11</sup> Jesús co' ngo' xà' mèn loo cón che'n xab izlyo' par gac mènna che'npe' Diox, no mèn co' ngro' xà' loo cón che'n xab izlyo' par gac mènna che'npe' Diox, ryop ned Jesús mènna thidte nac loo Diox. Por cona, inthyonte Jesús mbez Jesús cón che'n mèn co' ndyal yila's loo Jesús: Nac mènna huesen. <sup>12</sup> Taandxè' ndub di's loo libr co' nac xti's Diox le' Jesús ndxab loo Diox:

Tethen lèe U' loo mèn co' ndxàc xal huesen. No gol ron labans cón che'n lèe U' loo mèn co' ndxela's loo U'.

<sup>13</sup> Ndub di's loo libr co' nac xti's Diox tedib lugar co' mbez:

Daa ndxàp yalxla's loo Diox.

No ndub di's loo libr co' nac xti's Diox tedib lugar co' mbez:

Hui' nexa. Daa nzo no mèn co' ndxàc xal xin' Diox co' mda' Diox loon.

<sup>14</sup> Myen' bix co' nac xin' thib ned gundan, leque bél' xud myen' no leque bél' xna' myen' no leque ren xud myen' no leque ren xna' myen' nac myen'. Lomisque' ne, Jesús ngòc thib mbi' co' mque no bél' no ren che'n mèn loo izlyo' ndxè' par tataa mod gac quée yalguth loo Jesús. No co'se' ngolo mquée yalguth loo Jesús, tataaguè' mod, por cón che'n yalguth co' mquée loo Jesús telux Jesús Mebizya co' ndxàp cón che'n yalguth la's nii Mebizya no la's ya' Mebizya. <sup>15</sup> Tataa mbli Jesús par telá' Jesús prob mèn loo yalguth co' nzyeb mèn ñèe mèn co'se' quée yalguth loo mèn tac dib naban mèn ndli mèn costumbr xal nee lezo' mèn tac nzyeb mèn gath mèn. <sup>16</sup> Tac, lìcpe' ba'i, ne'ngui'th yáalte Jesús loo izlyo' por cón che'n angl co' mcua'n xquin. Ndxè'leque', mbi'th yáal Jesús làth mèn co' nac bin che'n Abraham par telá' Jesús mèn co' nzi cua'n xquin loo con' ryes. <sup>17</sup> Por cona, nonque' Jesús naquinque' gac Jesús lalque' xal thib hues xtàa mèn loo mèn che'n izlyo' ndxè' par tataa mod gac Jesús xal thib nguley' roo no thib nguley' xèn co' ndlyat lezo' ñèe mèn no co' li xal mcàbgòn Jesús li Jesús par teri'th Jesús di's che'n mèn loo Diox no par quix Jesús cón che'n xquin mèn co'se' mquée yalguth loo Jesús. <sup>18</sup> Leque yub Jesús mxactii por cón che'n chol mèn. No ne'nglide Jesús cas loo Mebizya co'se' mzi mchep Mebizya Jesús loo con' ye'rsin'. Por cona, ndxàp Jesús con' la's nii Jesús no la's ya' Jesús par lyath no Jesús mèn co' nzi nchep Mebizya loo con' ye'rsin'.

### 3

*Trè' ndlu' le' Jesucrist nac más mbi' roo mbi' xèn leque Moisés.*

<sup>1</sup> Mèn huesen, gu' ngro xà'le' loo cón che'n xab izlyo' no ngòc gu' che'npe' Diox. Diox mcui gu' par yòo ban no gu' Diox loo bé'. Por cona, toloque' bli gu' xtùuz cón che'n Jesús co' nac nguley' roo no nguley' xèn che'n na'. Diox mtel' Jesús par mxo'f zin' Diox thib zin' loo Jesús par mton' Jesús cón che'n xquin mèn no cón che'n xtol mèn loo Diox, mèn co' ndxela's loo Jesús. <sup>2</sup> Anze'f altant mdoo Jesús loo zin' co' mxo'f zin' Diox loo Jesús par li Jesús zin'a. Tataa mod mxo'f zin' Jesús zin' xal mdoo Diox Moisés loo mèn co' ngòc che'npe' Diox tiempa. <sup>3</sup> Por cona, más ndxàal li mèn con' guryath no con' guryèn loo Jesús leque loo Moisés xal ndli mèn más con' guryath no más con' guryèn loo thib albañil co' mtocua' thib yòobé' leque ndli mèn con' guryath no con' guryèn loo yòobé'a. <sup>4</sup> Tac ryete yòocal mdyoxcua' por chol mèn según mod co' ndxàp thib thib mèn. Per xa' co' mblec no mxèn' ryethe con' nac Diox. <sup>5</sup> Lìcpe' ba'i, altantque' mdoo Moisés xal thib moz loo mèn co' ngòc che'npe' Diox xal mèn guliz Diox tiempa. Zin' co' mxo'f zin' Moisés loo mèn na ngòc mde'th Moisés cón che'n co' gab Diox loo mèn yiloo. Thiba con' ndxè'.

<sup>6</sup> Le' tediba na, Crist Jesús nac xal thib xin' mèn co' altantleque' ndoo naa par ñibe' Crist loo mèn guliz Crist co' nac mèn guliz Diox. Pues, mèn na nac leque na', chele' na' thidteneque' cue nèe na' loo cón che'n Crist no gáp na' yalxla's axta gath na'. No axta nalle' par delant naquin tyac lezo' na' no toloque' cue quee lezo' gu' loo cón che'n Crist co' nzi quee lezo' gu', ndee gu'.

*Diox nda' lugar par tí' no yàl lezo' mèn, mèn co' nzo loo cón che'n Diox. No axta con gust yòo mèn loo Diox.*

<sup>7</sup> Por cón che'n con' ndxè' nac con' co' gunii Xpii Natú' loo xti's Diox thib lugar co' mbez:

Chele' gu' gòn di's co' ñii Diox nalle',

<sup>8</sup> ne'gàcte gu' mèn naad no mèn nguud xal mbli mèn nación Israel co'se' mbli mèn nación Israel preb loon co'te' nagán par ñee mèn nación Israel ñeene' ché' tetiin mèn na por con' ye'rsin' co' mbli mèn nación Israel loon tiempa.

<sup>9</sup> Tya ngòc xudgool gu' mèn naad no mèn nguud par mbli xudgool gu' con' ye'rsin' par ñee xudgool gu' ñeene' ché', lìcque', tetiin xudgool gu'. Ale tataaque' mbli xudgool gu' le'n cho' lín' mastale' gunèe xudgool gu' con' ndac co' mblin loo xudgool gu' tiempa.

<sup>10</sup> Por cona, mdoo xà' lezon loo xudgool gu'a. Ndxaben loo lezon: Thidteneque' ndoo xà' lezo' mèn ndxè' loon. Ne' ne' inda' mèn ndxè' cuent xá mod ndxàal que tee ban mèna loon.

<sup>11</sup> Por cona, tataa mdethen di's co'se' ngocloon gunèen mèna le' mèna ne'yòode lugar co' mtoxcuan co'te' yòo ban mèna.

<sup>12</sup> Gu' co' nac xal mèn huesen por cón che'n Crist, anderhuen gu', chó Diox chó ñee gu'; ña'ben loo gu': Ne'ta'de gu' lugar yòo xtùuz ye'rsin' le'n lezo' gu' par li gu' xtùuz ryo xà' gu' loo Diox co' naban thidtene par tlo gu', li gu' con' ye'rsin' par ne'tolode yila's gu' loo Diox. <sup>13</sup> Ndxè'leque', huiz con huiz bli gu' par ye'th lezo' thib xtàa gu' no tedib xtàa gu' le'tre' be' nda'i lugar loo gu' le'n huiz ndxè' par ne'ta'de gu' lugar quedii nec thib mèn gu' par ne'yigaade gu' loo xquin chol mèn. Tac ne'stolque' gàca loo gu' ale tyoo xà' lezo' gu' loo Diox. No tataa mod leque gu' tolo ta' lugar gac gu' mèn naad no mèn nguud loo cón che'n Diox. <sup>14</sup> Tac chele' na', lìcque', thidteneque' mbli nèe na' na' loo co' ndxela's na' cón che'n Crist axta bii no na' Crist xal mtlo ngola's na' loo Crist, le' sya, lìcque', nac na' che'npe' Crist.

<sup>15</sup> Nonque' gu' no naneeque' gu' xal ndub di's loo libr co' nac xti's Diox co' ndxab thib mbi' co' mde'th di's co' ndxab Diox. Mbi' ndxab:

Nalle' co'se' gòn gu' di's co' mde'th mèn loo gu' co' ndxab Diox, ne'gàcte gu' mèn naad no mèn nguud xal ngòc xudgool gu' mèn naad no mèn nguud póla co'se' mcua'n xudgool gu' xquin xudgool gu' no xtol xudgool gu' par ñee xudgool gu' ñeene' ché tetii Diox xudgool gu' por mbli xudgool gu' con' ye'rsin' co' mbli xudgool gu', à'.

<sup>16</sup> Tac ¿chó mèn ngòc mèn co' ngro' no Moisés nación Egipt, mèn co' mbin co' ndxab Diox, mèn co' asembli mcua'n mèn xquin mèn no xtol mèn par ñee mèna neene' ché' tetii Diox mèna, à'? Ryete mèn co' ngro' no Moisés nación Egipt ngòc mèna. <sup>17</sup> Tac ¿chó ngòc mèn co' ngocloo Diox gunèe Diox le'n cho' lín'a, à'? ¿Ché' ne'ngòcte mèna mèn co' mcua'n xtol, cà'? No ¿ché' ne'ngòcte mèna mèn co' nguth co'te' nagán, ne, cà'? Tataaque' ngòca, ¿lé'? <sup>18</sup> No ¿chó loo mèn mde'th Diox le' mèna ne'yòode co'te' nzo Diox par li mèna descans, à'? Diox ndxaba loo mèn co' ne'ndalte ngala's loo di's co' ndxab Moisés no ne' ne' ndubdi's mèna loo Moisés. <sup>19</sup> Por cona, non na' no nanee na' le' mèn nación Israela ne'ngòode lugar par li mèna descans co'te' mbli nab Diox por cón che'n xquin che'n mèn nación Israel no xtol che'n mèn nación Israel. Tac ne'ngala'ste mèna no ne'ndubdi'ste mèna loo co' mnibe' Diox loo Moisés par li mèna.

#### 4

<sup>1</sup> Láth be' nzo lugar loo bé' co'te' mcàbgòn Diox loo mèn yòo mèn par yòo ban no mèn Diox, ndxàalque' la's thib thib na' loo leque na' no quenap na' na' no hui' na' xal nzi tee ban na' loo Diox. Tac ne'stre'fque', nzo ndxep na' co' ne'lìde gan yòo ban no na' Diox loo bé'. <sup>2</sup> Tac loo na' mbyathle' di's ndac, ne, xal loo mèna. Per loo mèna ne'ngli huente di'sa no ne'nglää huente di'sa le'n lezo' mèna co'se' mbin mèna di'sa tac mèna ne'ndalte ngala's di's co'se' mbin mèna di'sa. <sup>3</sup> Per na' co' ngola'sle' loo Crist, na' yòo ban no Diox loo bé' co'te' mcàbgòn Diox yòo na' par ban na' tya, xalque' gunii Diox:

Xal mdethen co'se' ngocloon, ne'yòode mèn nación Israel lugar co' mtoxcuan par ban mèna tya.

No, lìcque', ne'ngòode mèn nación Israel co'te' mtoxcua' Diox par ban mèna mastale' mdoo lezo' Diox no mbli nable' Diox lugara axta co'se' mblec Diox izlyo' no mxèn' Diox izlyo'. <sup>4</sup> Tac loo libr co' nac xti's Diox ndub di's co' ndxab Diox cón che'n ngolo xop huiz co' nac co'se' ngolo sman:

Ngolo xop huiz mtelo Diox zin' co' mbli Diox loo ngolo mxèn' Diox izlyo' no mxèn' Dyox ryete con' co' nziri'.

<sup>5</sup> No ndxab Diox tedib vez loo libr co' nac xti's Diox leque di'sa:

Ne'yòode mèn co'te' mtoxcuan par ban mèna con daa no li mèna descans tya.

<sup>6</sup> Por cona, non na' no nanee na' mbyan' ndxep mèn co' yòoque' co'te' mtoxcua' Diox par ban mèna tya. Loo mèn co' nerleque' mbyath cón che'n di's ndaca, mèna ne'ngòode

co'te' ngòc nable' par ban mènà tya tac ne'ndalte mènà ndubdi's mènà. <sup>7</sup> Cona, mbere Diox, mcui Diox thib huiz co' nac tiemp ndxè'. Tac Diox ndyoodi's loo na' xalque' nac xti's Diox co' ndub loo libr co' nac xti's Diox, di's co' ngòc di's co' gunii Diox loo David co' mque' David ye's loo libr co' nac xti's Diox loo nde tee'le' tiemp co' nde tee mbri'th loo gu'. Diox gunii xal mbez di's ndxè':

Chele' gu' gòn di's co' ndxab Diox, ne'gàcte gu' mèn naad no mèn nguud loo cón che'n Diox.

<sup>8</sup> Tac chele' Josué ngda' lugar co'te' yòo ban mèn nación Israel par li mèn nación Israel descans xalque' mcàbgòn Dioxa loo mèn nación Israel, le' sya, ne'berede Diox, ndoodi's Diox cón che'n tedib tiemp loo tiemp co' mtoxcua' Diox tiempa cón che'n co'te' yòo ban mèn thidtene xal ndxàca nalle'. <sup>9</sup> Por cona, ndxan' thib lugar co'te' yòo mèn co' nac che'npe' Diox par ban mènà thidtene loo Diox. <sup>10</sup> Tac mèn co' yòo loo bé' par ban mènà thidtene, mènà ne'tolode li xal mbli mènà ndoore' yòo mènà loo bé' xalque' mtelo Diox zin' co' mbli Diox loo ngolo mxèn' Diox no mblec Diox ryethe con'. <sup>11</sup> Cona, ngue niin loo gu: Ndxàalque' li na' co' nzote mod li na' par yòo ban no na' Diox loo bé' co'te' ban na' thidtene par ne'lide nec thib na' xalque' mbli mèn co' ne'ndalte ngala's loo Diox tiempa.

<sup>12</sup> Anze'f nè nac xti's Diox xal co'se' ñibe' thib patrón loo moz. Ndxaa'd xti's Diox le'n xtùuz mèn no le'n lezo' mèn xal ndxaa'd thib yi'f co' nalen ryop loo lad mèn. Xti's Diox ndli le' mèn nteche ntexyath xtùuz mèn no lezo' mèn axta nden' mèn le'n lezo' mèn cón che'n co' ndli mèn xtùuz no cón che'n co' ndli mèn, que naca con' ndli mèn xtùuz, que naca con' ndli mèn zin', que naca taamas con' co' ndli mèn. No xti's Diox nali ndla's par tub rez xti's Diox cón che'n xtùuz mèn no cón che'n co' ndoo lezo' mèn li mèn. <sup>13</sup> Yende chó con' nzo co' mblec Diox no co' mxèn' Diox co' ne'yú'de loo Diox. Ndxé'leque', ryethe con' co' mxèn' Diox nzi yú' loo xnaa loo Diox. Loo Diox ryethe na' ta' cuent co'se' gac huiz ta' mèn cuent loo Diox xal nac con' mbli mèn loo izlyo' ndxè'.

*Di's ndxè' ndlu' le' Jesucrist nac más nguley' roo nguley' xèn leque chol taamas mèn.*

<sup>14</sup> Por cona, ngue niin con' ndxè' loo gu': Le' na' ngue no thib nguley' roo no thib nguley' xèn nalle' co' ngòole' loo bé'. Nguley'a nac Jesús, xgan'pe' Diox. Por cona, tolo li nèe na' na' loo co' ndxela's na' loo Diox por cón che'n Crist Jesús. <sup>15</sup> Pues Jesucrist co' nac nguley' roo no nguley' xèn che'n na', ndlyatque' lezo' Jesucrist ñèe Jesucrist na' tac non Jesucrist nac na' xal mèn nayíiz loo xtol na' no loo xquin na', co' nee di's, ndxegaa na' loo con' ye'rsin' par li na' con' ye'rsin'. Tac yub Jesucrist co' nac nguley' na' ngòc preb xal gune lezo' Mebizya. Mdooby'a Mebizya Tad Jesús par ngòc preb Tad Jesús. No ngòc preb loo Tad Jesús xalque' ndxàc preb na' loo ryethe con' ryes. Per mastale' mbli Mebizya preb loo Jesucrist no mzi mchep Mebizya Jesucrist loo con' ye'rsin', per thidtene ne'nca'nte Jesucrist xquin Jesucrist no xtol Jesucrist. <sup>16</sup> Por cona, con dibaxla's ndxàal cuez na' Diox, Diox co' angndli con' ndac loo na'. Sya, lyat lezo' Diox ñèe Diox na'. No lyath no Diox na' loo chol con' co' nde che loo na'.

## 5

<sup>1</sup> Ryete nguley' roo nguley' xèn co' nzo làth mèn co' mblec mèn par ngòc mènà nguley', mblec mèn nguley'a par teri'th nguley'a di's che'n mèn loo Diox. Mblec mèn nguley'a par quix nguley' roo nguley' xèn cón che'n xtol mèn loo Diox no par xo nguley' ren chol má' por cón che'n xtol che'n mèn. <sup>2</sup> Nguley'a ante ndlyat lezo' ñèe mèn naxèn no mèn co' ndoote ned ndyen tac nguley'a, ne, nac xal thib mèn yíiz co' nguu's lezo' loo xquin nguley' co' ndxàp nguley'. <sup>3</sup> Por cón che'n con'a, por fuerz naquinque' guth yèe nguley'a chol má' par quix nguley' roo nguley' xèna loo Diox por cón che'n xtol leque nguley' xal ndli nguley'a cón che'n taamas mèn par teri'th tecan' Diox xtol nguley'a, ne.

<sup>4</sup> Tiempa, yende chó ngòc thib nguley' roo nguley' xèn por cón che'n leque mènà par li taamas mèn con' guryath no con' guryèn loo nguley'a. Ndxé'leque', angoluxte thib mbi' co' ngurez Dioxa ngòc nguley' xal ngòca loo Aarón. <sup>5</sup> Tataaque' ne, leque yub Crist ne'nglide par ngàc con' roo con' xèn loo Crist par ngòc Crist nguley' roo nguley' xèn. Per

Diox mxo'f lèe mxo'f xti's cón che'n Crist loo Crist. No mcui Diox Crist par xo'f zin' Crist zin'a. Diox ndxab loo Crist:

Lùu nac xgan' daa. Nalle' daa mbli' loo mèn le' lùu, lìcque', nac xgan'pe' daa.

<sup>6</sup> Tedib lugar ndub di's loo libr co' nac xti's Diox co' ndxab cón che'n leque di's ndxè':

Lùu nac nguley' thidtene xalque' ngòc Melquisedec nguley' thidtene.

<sup>7</sup> Láth mque tee ban Crist loo izlyo' xal chol mèn, cabii ngurez Crist Diox no nalyat mna'b Crist di's loo Diox. Ngrozèe yath Crist no mbín' Crist loo Diox látha, ne, Diox co' ngóc telá' Crist loo yalguth. Mbyèn di's che'n Crist loo Diox. Mbìn Diox co' mna'b Crist no mblyath no Diox Crist loo yalnaze'f co' ngo no lezo' Crist tac Crist mblique' cas loo Diox.

<sup>8</sup> Mastale' nac Crist xgan' Diox, per por cón che'n yaltii co' ngòc loo Crist, mté'th Crist par mdubdi's Crist loo Diox. <sup>9</sup> Per co'se' ngolo nguri'th ryethe yaltii tín' co' mquinque' ngòc loo Crist par tataa mod ngòc Crist thib nguley' roo nguley' xèn co' nac nguley'pe' na', loo Crist mda' Diox lugar telá' Crist alux mèn co' ndxòn roo Crist par ndyubdi's mèn loo Crist. <sup>10</sup> Diox mda' lèe loo Crist no mdoo Diox Crist par ngòc Crist thib nguley' roo nguley' xèn xalque' ngòc Melquisedec nguley'.

*Anze'fryes naca chele' mèn mblá'ya', ya ne'tolode yila's mèn loo cón che'n Diox.*

<sup>11</sup> Per cón che'n yalnguley' co' nac por Jesucrist, huax con' nzo co' ndxàal ta' na' cuent no tyoodi's na' loo mèn. Per anze'f nagàn nac ta' mèn cuent cón che'n Tad Jesús. Más de cona, gu' ne'tyalte yaa'd di's ndxè' le'n lezo' gu'. <sup>12</sup> Gu' co' ya ndxàcle' tiemp ngola's loo Jesucrist no ngòo gu' loo cón che'n Jesucrist, ndxàal gác gu' xal thib maistr par ta' gu' cuent no tyoodi's gu' cón che'n Tad Jesucrist loo taamas mèn. Per ale ndxe'leque', nac gu' xal myen' bix loo cón che'n xti's Diox par tolo naquin ta' mèn cuent co' nac más inagànte co' nac co' té'th gu' cón che'n Diox, ndyaquen. No cón che'n con' nagàn che'n xti's Diox nac gu' xal myen' bix co' yende mod xec gu' hua gu' con' navez co' nac xít gu' no lua' gu'. <sup>13</sup> Ryete mèn co' ndxela's loo Crist, chele' mèn tarte té'th xá mod que tee ban nali no nambii mèn, no xal ndxàal li mèn xtùuz nali cón che'n Crist, mèn nac xal myen' bix co' be' ndxàaz niiz. <sup>14</sup> Per xít mèn no lua' mèn co' nac con' navez, con'a nac par hua mèn co' nacle' myen'bi'gool co' ya ndxácle' ndub rez cón che'n mèn, ¿lé'? Lomisque' mod, mèn co' mté'thle' par mdyubdi's mèn cón che'n Jesucrist, co' nee di's, mèn co' mté'th ndacle' cón che'n Diox co' nac más nagàn, mèn nac mèn co' ndxác ncu con' huen làth con' ye'rsin'.

## 6

<sup>1</sup> Por cón che'n ryethe con' co' ngolo guniin loo gu' ndxè', ndlii ndlá' na' par ne'tolode nque tee ban na' loo con' co' nac ner con' co' mté'thpe' na' loo xley' che'n Crist. Ndxè'leque', ndxàal tolo que tee ban na' loo cón che'n Crist axtaque' huen huen mté'thle' na' cón che'n xley' Crist no axta huen huen ndyubdi's na' loo Crist. Ne'gàcte na' mèn co' ante ndlu' loo mèn par lyàa yéc mèn no lyàa lezo' mèn loo con' mque tee ban mèn ndoore' co' yende cón ntac loo mèn. Ne' ne' iante lu' na' loo mèn par ante gáp mèn yalxla's loo Diox. <sup>2</sup> No iante lu' na' loo mèn xá mod gác bautizar mèn. Ne' ne' iante lu' na' loo mèn ante cón che'n xá mod no chonon nxo'f mèn ya' mèn loo xtàa mèn. Ne' ne' lu' na' loo mèn ante cón che'n xá mod ryo xban mèn nguth. Ne' ne' lu' na' loo mèn ante cón che'n co'se' tub rez Diox loo mèn par tetii Diox mèn thidtene. <sup>3</sup> No, lìcpe' ba'i, tataa tolo li na' xal ndlu' xley' Crist loo na' chele' Diox ta' lugar loo na' par li na'i.

<sup>4</sup> Naquinque' tolo té'th na' cón che'n Crist. Tac nzo ndxep mèn co' thidte vez mdub xnii yéc mèn no mdub xnii lezo' mèn loo cón che'n Diox. No mbli mèn preb cón che'n con' ndac che'n bé' co' angnda'la's Diox loo mèn. No mden' mèn nzoque' Xpii Natú' loo mèn no ndlyath no Xpii Natú' mèn. Ngoloa, ale mbere mèn, mxiiis no mèn cón che'n Diox no Tad Crist. Yende mod lyàa yéc mèn no lyàa lezo' mèn tedib vez par gác mèn mèn cub. <sup>5</sup> No yende mod lyàa yéc mèn no lyàa lezo' mèn tedib vez par gác mèn mèn cub, mèn co' yub mbli preb cón che'n co' nac di's ndac che'n Diox no mbìn mèn no non mèn cón che'n con' roo no con' xèn che'n tiemp co' nde nque ndxè'. <sup>6</sup> Per nalle',



leque yub mènna mbere ngulàa loo con' ye'rsin'. No mbli mènna loo cón che'n Jesús lalque' con' xal mbli mèn co' mque' Jesús xgan'pe' Diox loo cruz. No gunii yèe gunii tii mènna cón che'n Jesús no loo xnaa mxìis no mènna Jesús. <sup>7</sup> Nazabque' ndli mènna xal ndxàca loo izlyo' ndxep vez. Tac izlyo' co' nguèe nít co' ndlyàa loo izlyo' huax vez, loo izlyo'a ndxáal co' hua mèn, mèn co' ndli zin' loo izlyo'a no ncàaya' mèn con' ndac loo Diox. Más ndxàal gác li mènna con' ndac no ne'nglide mènna con'a. <sup>8</sup> Per izlyo' co' ndxáal yis no yaa, izlyo'a intacte no nde zin' gaxle' co'se' quedèe Diox izlyo' no lyux izlyo' co'se' yol izlyo'. Tataa gàca loo mèn no masre' gàca loo mèn co' ndli con' zaba.

*Trè' ndlu' le' ryethe con' ndac, co' nac che'n Diox co' nzi quee lezo' na', ndli par nzi nèe na' na' loo cón che'n Diox xal thib yòo cal co' huen ndub loo cimient.*

<sup>9</sup> Per cón che'n gu', mèn co' nque' lezon ñèen, mastale' tataa guniin con' ndxè' loo gu', ngobe'en no ndxelasquen le' gu' tyoo nque loo con' ndac, co' nee di's, nac con' cón che'n co' gác loo gu' no co' gác che'npe' gu' yiloa tac ngola's gu' loo Crist. <sup>10</sup> Diox nalì no nambii nac. Por cona, indxathla'ste Diox zin' co' mxo'f zin' gu' cón che'n Diox no xal nque' lezo' gu' Diox. Con'a ndxú' loo loo mèn, ne, tac gu' ndlyath noque' mèn, mèn co' ngro xà' loo cón che'n xab izlyo', mèn co' ngòc che'npe' Diox. No tatabe' ndli gu' con'a axta nalle'. <sup>11</sup> Ndlyazen ye'th lezo' thib thib gu' no toloque' lu' gu' gu' cón che'n co' nzi quee lezo' gu' axta co'se' gác huiz co'se' gácpe'i loo gu'. <sup>12</sup> Tataa bli gu' par ne'gàcte gu' loo cón che'n Diox xal mèn co' nzya'f. Per bli gu' xal ndli mèn co' ndxàp yalxla's no xal mèn co' ncha'la's co' gác xal thib mustr loo mèn axtaque' càaya' gu' co' mcàbgòn Diox ta' Diox càa gu'.

<sup>13</sup> Co'se' mcàbgòn Diox di's loo Abraham li Diox thib con' loo Abraham, yende chó mèn más nac mèn roo mèn xèn par te'th Diox lèe mènna cón che'n con'a. Por cona, leque Diox mde'th lèe Diox loo Abraham par li la's Abraham co' mcàbgòn Diox loo Abraham li Diox.

<sup>14</sup> Ndxab Diox loo Abraham:

Lìcpe' ba'i, daa ta' huax con' ndac lool. No daa li yas yàl binl.

<sup>15</sup> Ale mdub quee lezo' Abraham no mcha'la's Abraham axtaque' mcàaya' Abraham con' co' mcàbgòn Diox càa Abraham. <sup>16</sup> Tac, lìcpe' ba'i, co'se' ndly'a's mèn te'th mèn cón che'n thib con' co' nac lìcque', ale nde'th mèn lèe thib mèn co' más ñaare' leque mènna. No co'se' ndly'a's mènna lí nèe mènna di's loo xtàa mènna ngolo ngyoo di's mènna, sya, nde'th mènna lèe Diox loo xtàa mènna par mbyàl loo di's no loo cuent. <sup>17</sup> Por cona, leque Diox mde'th lèe Diox, co' nee di's, Diox mnibe' lezo' Diox no mbli nèe Diox cón che'n con' co' mcàbgòn Diox lí Diox. Tac Diox mbly'a's loo xnaa lu' Diox loo mèn co' càaya' co' mcàbgòn Diox le' Diox mnibe'que' lezo' li Diox con' co' mcàbgòn Diox lí Diox loo mènna. <sup>18</sup> Nzo chop con' co' ne'zye'de loo Diox thidtene. Loo ryop con'a no por cón che'n ryop con'a, lique' Diox co' mcàbgòn Diox lí Diox loo mèn. Por cón che'n con' ndxè' ndxàp na' yalxla's loo Diox no leque na' ndli par ntegán na' lezo' na' tac mna'b na' loo Diox quenap Diox na'. No ndxàp na' yalxla's lí Diox co' mcàbgòn Diox lí Diox loo na'. <sup>19</sup> Con' co' ndub quee lezo' na' co' gác loo na', co' lí Diox loo na' xal mcàbgòn Diox lí Diox loo na', con'a ndli par lí nèe na' na' loo cón che'n Diox por cón che'n Crist. Thidtene ndli nèe na' na' loo cón che'n Diox xal co'se' thib yi'f co' lèe ancl ndyen loo yòo xan' le'n nít par ne'tyeede thib yòoyaa loo nit. Thidtene ndli nèe na' na' loo cón che'n Diox por cón che'n Crist co' ngòo le'n templ co' nzo le'n bé'. Crist ndli par mbe nèe na' loo cón che'n Diox. Tataa ndxela's na' mastale' tarte yú' loo con'a loo na'. <sup>20</sup> Le'n templ co' nac loo bé' co'te' nzo Diox ner ngòo Jesús par lí nab Jesús mod par yòo ban no na' Diox loo bé'. Por cona, ngòc Jesús thib nguley' co' nac más nguley' roo nguley' xèn thidtene xalque' ngòc thib mbi' co' ngro' lèe Melquisedec nguley'. Con' ndxè' ndlu' no ngue ta' cuent xalque' ngòc Melquisedec nguley', tataaguè' nac Jesús nguley' che'npe' na'.

## 7

*Di's ndxè' ndlu' no ngue ta' cuent xalque' ngòc Melquisedec nguley', tataaque' nac Jesús nguley' che'npe' na'.*

<sup>1</sup> Meegool co' ngro' lèe Melquisedeca ngòc rey che'n ciuda Salem. No ngòc Melquisedec nguley' loo Diox co' nac Diox roo Diox xèn co' nac thidte Diox. Melquisedeca ngòc xa' co' ngua càa ned Abraham co'se' mbere Abraham, ngua Abraham loo xó' co'se' mbli Abraham gan loo rey co' mbli xó' con Abraham. Melquisedec ndxab loo Abraham: Diox huen nda U', ndee U'. <sup>2</sup> Abrahama mda' diezm loo leque Melquisedec che'n ryete con' co' ndye'th no Abraham co' mbli Abraham gan loo xó'. Nerleque' lèe co' mbe' Melquisedeca ngòc di's: Rey co' ndli con' nali no con' nambii. Ngoloa, ngro' lèe Melquisedec tedib lèe co' nac: Rey che'n ciuda Salem, co' nee di's, nac rey co' ntu' ntàl loo xèn no loo xyàn par cue ban mèn rye nda mèn no rye ndye'th mèn làth xtàa mèn. <sup>3</sup> Per yende chó mèn nda' cuent cón che'n Melquisedec. Ne' ne' yen thib xque's che'n Melquisedec co' nda' cuent cón che'n chó lín' ngóol Melquisedec, chó bin nde Melquisedec, no plá lín' mban Melquisedec loo izlyo'. Ndxle'leque', ngòc Melquisedec lalque' xal xgan' Diox. No nac Melquisedeca nguley' co' ndxan' thidtene.

<sup>4</sup> Hui' gu' nexa. Quetal mbi' roo mbi' xèn ngòc Melquisedec axta Abraham, co' ngòc thib mbi' co' mbloj msi' bin co' ngòc mèn nación Israel, mda' diezm che'n con' co' mbli Abraham gan loo xó' loo Melquisedec. <sup>5</sup> Lìcpe' ba'i, mèn co' ngòc xin' Leví co' mxo'f zin' yalnguley', ne, mènà ngue no yalnibe' che'n ley co' mxo'f Moisés loo mèn par thop mènà diezm che'n mèn nación Israel xal ñibe' ley, co' nee di's, mthop mènà diezm axta che'n huespe' mènà, mastale' nac ryete mènà bin Abraham. <sup>6</sup> Mastale' ne'ngàcte Melquisedec mèn co' ngòc bin che'n Leví co' ngòc nguley' póla, per ale ndxe'leque', le'le' Melquisedec mthop diezm co' mda' Abraham. No mbli ley' Melquisedec Abraham loo mcàbgòn Diox thib con' loo Abraham. <sup>7</sup> Yende mod cà di's mèn loo di's ndxè' le' mèn co' nac más mèn roo mèn xèn loo xtàa mèn, mènà ña'b loo Diox li Diox con' ndac loo mèn co' nac mèn be'the. <sup>8</sup> Loo izlyo' ndxè' ndxàc le' mèn co' ncàaya' diezm nac mèn co' ndxath. Per por part cón che'n Melquisedec co' mna'b diezm loo Abraham, libr co' nac xti's Diox nda' cuent loo na' le' Melquisedec nac thib mbi' co' thidtene naban. <sup>9</sup> Le' sya, nzoque' mod gab na' le' rye nguley' co' nde bin Leví co' nthop diezm axta nalle', mènà, ne, mda' diezm loo Melquisedec co'se' mda' Abraham diezm loo Melquisedec. <sup>10</sup> Taandxè' nac di's ndxè': Mastale' tarte gáal Leví co' mblec yalnguley' xal mnibe' Diox loo Moisés li Moisés, ya ndxòole' cuent nac Leví bin Abraham co'se' ngòc tiemp co' ngro' Melquisedec, ngua sal' Melquisedec Abraham co'se' ndye'th Abraham, ngua Abraham loo xó'.

<sup>11</sup> Mèn nación Israel mcàaya'le' di's co' nac ley co' mxo'f Moisés loo mèn por cón che'n mèn co' ngòc nguley' co' nde bin che'n thib mbi' co' ngro' lèe Leví. Per chele' mèn ndxè', licque', ngác par tolo ntaa mèn zin' co' nac yalnguley', le' sya, ya inquinte mbere ngòc tedib cua' nguley' xal ngòc Melquisedec co' ne'ngro' loode mxo'f zin' che'n zin' yalnguley' co' mxo'f zin' Aarón, ne, ¿lé'? <sup>12</sup> Per ale ndxe'leque', ne'ngácte mèn bin Aarón par xo'f zin' mènà zin' tataa, tac chele' rsin' co' nac zin' che'n yalnguley' a mzye'le', naquinque' zye' yalnibe' che'n ley, ne. <sup>13</sup> Cón che'n Jesucrist ndlu' di's ndxè'. Le' Jesucrist nde bin tedib bin che'n mèn nación Israel loo bin Aarón. Che'n bin mèn nación Israel co'te' ngro' Jesucrista, yende chó bina nxo'f zin' yalnguley'. <sup>14</sup> Na' nonque' no naneeque' na' le' Tad Crist na' ngóol làth mèn co' nac bin mèn co' ngòc mèn yèezya' che'n làaz mèn jude. Cón che'n bin mèn yèezya' che'n làaz mèn jude ne'ndoodi'ste Moisés le' mènà xo'f zin' cón che'n yalnguley'.

<sup>15</sup> Cón che'n co' ndyoodi's na' ndxè' nac le' thib mbi' ngro' xo'fle' co' mxo'f zin' che'n yalnguley' no nxo'f zin' mbi'a zin' lalque' xal mxo'f zin' Melquisedec yalnguley' tiempa. <sup>16</sup> Ne'nxo'f zin'te Crist cón che'n yalnguley' xal ñibe' ley co' mxo'f Moisés loo mèn par nxo'f zin' mèn zin' cón che'n yalnguley'. Ndxle'leque', mxo'f zin' Crist zin' che'n yalnguley' tac ndxàp Crist con' la's nii Crist no la's ya' Crist tac Crist nabanque' thidtene. <sup>17</sup> Nzo'f di's co' ndlu' cón che'n Jesucrist co' nac xti's Diox co' mbez:

Lùu xo'f zin' yalnguley' thidtene xal mxo'f zin' Melquisedec yalnguley'.

<sup>18</sup> Lìcpe' ba'i, yalñibe' co' ngòc ner, yalnibe'a mdyon'le' loo mèn tac yende cón ncàb ndac yalnibe'a loo mèn. <sup>19</sup> Tataa ngòca tac yende chó mèn ngác ngác mèn nali no mèn nambii

loo Diox xal mnibe' ley co' mxo'f Moisés loo mèn tiempa. Per ndxe'leque', nalle' nzi quee lezo' na' loo co' nac más con' ndac co' gac loo na'. Por cón che'n con' ndac co' nzi quee lezo' na'a, más nzi yòo na' no más nzi li nèe na' na' loo cón che'n Diox por cón che'n Crist le'n tiemp ndxè'.

<sup>20</sup> Co'se' mtlo Jesús mxo'f zin' Jesús zin' yalnguley', leque yub Diox mde'th lèe Diox cón che'n Jesús. <sup>21</sup> Tac co'se' mblec mèn nación Israel mèn co' mxo'f zin' zin' yalnguley', ne'nde'thte mèn lèe Diox cón che'n mèn. Per co'se' mtlo Crist mxo'f zin' Crist zin' yalnguley', leque yub Diox mde'th lèe Diox xal nduba loo libr co' nac xti's Diox co' mbez:

Leque Tad mde'th lèe Tad no ne'lyàade yéc Tad no ne'lyàade lezo' Tad loo con' mde'th Tad.

No ndxab Tad Diox loo Crist xal ndub di's tedib lugar loo libr co' nac xti's Diox co' mbez:

Lùu nac nguley' roo nguley' xèn thidtene.

<sup>22</sup> Por cón che'n Crist nonque' na' no naneeque' na' masque' ntac conveñ cub leque loo yalnibe' che'n ley co' mxo'f Moisés loo mèn. <sup>23</sup> Licpe' ba'i, huax mèn nde tee' ndxác nguley' loo yalnguley' che'n ley co' mxo'f Moisés loo mèn. Per yende mod xo'f zin' mèn yalnguley' thidtene tac mèn ndxathque'. <sup>24</sup> Per Tad Crist ndxè' co' ngue xo'f zin' yalnguley' thidteneque' naban. Por cona, yende tedib mèn nzo co' yan' lugar che'n Crist Jesús par gac mèn nguley' lugar che'n Crist Jesús. <sup>25</sup> Por cona, ndxác Crist telá' Crist alux mèn co' lya's lyá' loo con' ryes thidtene, co' nee di's, loo mèn co' ngòole' loo cón che'n Diox, mèn co' ndxela's loo Crist. No Crist nabanque' thidtene par teri'th Crist di's che'n mèn co' ngòole' loo cón che'n Diox por cón che'n Crist.

<sup>26</sup> Anze'fque' naquin que no na' thib nguley' roo nguley' xèn xal nac yubpe' Crist co' nac thib mbi' natú', thib mbi' co' incua'nte xtol, thib mbi' nalì no nambii, thib mbi' co' mque tee xà' loo mèn co' ngòp xtol. Diox mbli ngòc Crist más mbi' roo mbi' xèn loo ryethe con' co' nzo loo bé', que naca angl, que naca chol xpíi, que naca mèn, que naca taamas con'. <sup>27</sup> Ne'ngàcte Crist xal taamas nguley' roo nguley' xèn co' mxo ren má' loo izlyo' par teri'th tecan' Diox cón che'n xtol mèn loo mèn atate huiz. Tac nguley'a ner tataa ndli con'a por cón che'n xtol leque nguley'a. Yiloa, ndli nguley' leque con'a por cón che'n xtol taamas mèn. Per ndxe'leque', Tad Crist thidte vez mda' lugar mquée yalguth loo Tad Crist no mxyo ren Tad Crist par tataa mod mxactii Tad Crist no mdix Tad Crist cón che'n xtol mèn loo Diox. <sup>28</sup> Ley co' mxo'f Moisés mnibe' cue mèn co' mxo'f zin' yalnguley', per mèn co' ngurea ngòc mèn co' ne'ngàcte mèn nalì no mèn nambii loo yalnguley'. Ngòp mèn xtol mèn, ne. Per ndxe'leque', nguley' co' nac nguley' roo nguley' xèn co' mblo lèe Diox ngolo mbri'th cón che'n ley co' mxo'f Moisés loo mèn, no co'se' leque Diox mde'th lèe Diox, nguley'a ngòc xgan'pe' Diox co' nac Jesucrist. Nac Jesucrist xa' co' ngòc xa' nalì no xa' nambii thidtene.

## 8

*Jesucrist nac nguley' loo conveñ cub co' mbyan' no co' ngòc nèe.*

<sup>1</sup> Pues cón che'n con' co' nac más con' roo con' xèn co' mdoodi'sle' nu' loo gu' nac con' ndxè': Le' na' ngue nole' thib nguley' roo thib nguley' xèn. Nguley'a nduble' cuat Diox co' nac Diox roo Diox xèn loo bé'. <sup>2</sup> Tad Jesucrist co' nac nguley' roo nguley' xèn che'npe' na', nac Jesucrist nguley'pe' na' co' nxo'f zin' che'n yalnguley' co'te' licpe' nac lugar más natú' co' mbli Tad Diox ngocsua' loo bé'. No yende chó mèn izlyo' mbli par ngòcsua' lugar natú'a. <sup>3</sup> Ryete nguley' co' ngòc nguley' roo nguley' xèn tiempa, mèn nación Israel mblec nguley'a par xo'f zin' nguley'a thib zin' co' ngòc mblec nguley' con' co' angnda' mèn loo Diox no má' co' mbeth mèn loo mes loo còo' par teri'th tecan' Diox cón che'n xtol mèn loo mèn. Por cona, naquinque' le' Jesucrist na', ne, que no con' co' cuec Jesucrist loo mes loo còo' xal mbli mèn, co' nee di's, nac leque yub Crist co' mdix loo Diox cón che'n xtol mèn. <sup>4</sup> Tac chele' Jesús be' nzoque' loo izlyo', ne'ngàcte Jesús nguley'. Tac nzo huax nguley' co' mbec con' loo còo', co' nee di's, tataa ndli nguley' par tataa mod nteri'th ntecan' Diox cón che'n xtol mèn xal ñibe' ley co' mxo'f Moisés loo mèn. <sup>5</sup> Zin'

co' mxo'f zin' nguley' tiempa ngòc zin' co' gunèete Moisés ngòc loo bé'. Zin' co' mxo'f zin' nguley'a nac xal thib xin no xal thib xnaa che'n con' co' nac co' licpe' co' nzo loo bé'. Nonque' na' no naneeque' na' le' zin' co' mxo'f zin' nguley' co' ngo tiempa ngòc xal thib xin no xal thib xnaa tac co'se' nde tlo Moisés, nde toxcuá' Moisés yòo mantyad co' ngòc co'te' mqueltàa no mèn Diox tiempa, ndxab Diox: Hui' nexa. Bli ryete con' xal mblu'ena lool loo yii Sinaí. <sup>6</sup> Per nalle' Jesucrist nxo'f zin' thib zin' co' nac yalnguley' co' nac más con' ndac. Nteri'th Jesucrist di's che'n mèn loo Diox por cón che'n thib conveñ cub co' nac más con' ndac. Más con' ndac nac conveñ cuba loo mèn tac Diox mcàbgòn masque' con' ndac gac loo mèn por cón che'n conveñ cuba.

<sup>7</sup> Tac chele' ner conveñgool co' ngòc ner conveñ ngàc thib conveñ co' yende chó falt ngap, licpe' ba'i, ne' ne' inquin ngàc tedib conveñ cub loo ner conveñgoola, sya. <sup>8</sup> Diox mbyoo mèn co' mque no ner conveñ. Ndxab Diox:

Hui' gu' nexa. Nde zin'le' huiz lin thib conveñ cub loo mèn nación Israel, co' nee di's, loo mèn co' nac mèn yèezya' che'n làaz mèn israel no loo mèn co' nac mèn yèezya' che'n làaz mèn jude.

<sup>9</sup> No inacte conveñ cub ndxè' xal conveñgool co' mblin loo xudgool gu' huiz co'se' ngòc huiz co'se' mblo'en xudgool gu' le'n nación Egipt xal co'se' ntetee xud myen' bix myen' bix. Tataa mblyath non xudgool gu' par ngro' xudgool gu' le'n nación Egipt. Xudgool gu' ne'ndubdi'ste thidtene loo ner conveñgool co' mblin loo xudgool gu'. Por cona, ne'nngliden cas loo xudgool gu'. Ale mtè'ben xudgool gu' thib lad, ndxab Tad Diox.

<sup>10</sup> Cona, tolo ndxab Tad Diox: Con' ndxè' nac conveñ cub co' lin loo mèn nación Israel co'se' yilo riid huax huiz. Daa li par yaa'd di's co' ñibe' ley daa yéc mèn no lezo' mèn nación Israel. No lin par ten' mèn nación Israel di's, co' nee di's, cón che'n ley daa le'n lezo' mèn. Le' sya, gac daa Dioxpe' mèn. No mèn gac mèn nacionpe' daa, ndxab Tad Diox.

<sup>11</sup> Ndxab Diox, ne: Yende chó gu' lu' loo thib xtàa gu' no loo tedib xtàa gu' no nec thib gu' lu' loo huespe' gu' par gab gu' na: Blibe' gu' Tad Diox. Tac ryete mèn libe'que' daa axta myen' bix no axta mèn gox.

<sup>12</sup> Tac huiza lyat lezon ñèn mèn co' inzii que teede nalì loon. Le' sya, cón che'n xtol mèn ya ne'tolode te' lezon, ndxab Diox.

<sup>13</sup> Co'se' mdoodi's Diox cón che'n conveñ cub, con'a nee di's, ngoxle' ner conveñgool. No co'se' gunii Diox ngoxle' no ndoo yaxle' ner conveñgoola, con'a nee di's nde zin' gaxle' huiz par tyon' conveñgoola.

## 9

*Trè' ndlu' xal nac mod co' ngòc mèn le'n templ póla no xá nac mod co' ngòc mèn le'n templ co' nac loo bé'.*

<sup>1</sup> Pues, licque', conveñ co' ngòc ner conveñgool tiempa, mque no mèn thib mod par mbli mèn servis le'n tabernáculo co' ngòc thib yòocal co'te' mqueltàa mèn loo Diox loo izlyo' ndxè'. <sup>2</sup> Tac yòocal co' ngro' lèe tabernaculoa ngòc chop le'n. Le'n tabernáculo ngue thib cortin, co' nee di's, ndli rol thib le'n no tedib le'n yòocal. Ner le'n yòocala ngo candiler no mes no pan co' mbec mèn loo Diox. Ner le'n yòocala ngro' lèe Lugar Natú'.

<sup>3</sup> Le' tedib le'n co' ngòc mbryop le'na na, ngòc le'n yòocal co' ngro' lèe Lugar Más Natú' Tín'. <sup>4</sup> No le'n yòocal co'te' ngòc lugar más natú'a, nzosua' thib mes co'te' mtec mèn zen du'r yal'. Mesa nacsua' con or. No nzosua' thib cajón che'n conveñ tya ne, co' nee di's, ngòc archiv che'n conveñ. Archiva ndoo nau' dib lad con or. Le'n archiva ngo thib yàat co' ngocsua' con or. Le'n yàata ngosua' thib loo xít mèn no lua' mèn co' ngro' lèe maná. Le'n archiva ngosua' thib var co' ngòc var co' mbli thib mbi' co' ngro' lèe Aarón us póla. Vara ngòc thib var bzye' co' mzye' loo. No le'n archiva ngosua' thib quèe. Loo quèea mque' di's co' ngòc di's che'n conveñ co' ndxab Diox loo Moisés co' ngòc di's che'n conveñgool. <sup>5</sup> Loo arc co' ngòc cajón archiva ngure chop gunab che'n angl roo angl xèn co' lèe querubin. Cón che'npe' con'a yende mod tolo tyoodizen nalle'.

<sup>6</sup> Co'se' ndxelo ndxàc nab ryete con' co' ndli nguley' loo servis, ndxòo nguley' le'n ner le'n tabernáculo co' ngòc yòo cal co'te' mqueltàa mènna loo Diox par xo'f zin' nguley' zin' cón che'n zin' co' ndli nguley' loo Diox ryete huiz. <sup>7</sup> Per le'n mbryop le'n templ thidte vez ndxòo nguley' co' nac nguley' roo nguley' xèn le'n mbryop le'n templ, sangndxe' nguley' ren má' par cuéc nguley' ren má' loo mes, co' nee di's, loo Diox par tataa mod teri'th tecan' Diox cón che'n xquin nguley' no xtol nguley' no cón che'n xquin mèn nación Israel no xtol mèn nación Israel. <sup>8</sup> Con di's ndxè' Xpii Natú' ngue ta' cuent loo na' no ngue lu' Xpii Natú' loo na' le' láth be' ndli mèn servis cón che'n conveñgool loo Diox, tatabe' ndoo nau' par yòo chol mèn le'n ryop le'n che'n tabernáculo co' nac yòocal co'te' nqueltàa mèn loo Diox tiempa par bii gax mèn loo Diox. <sup>9</sup> Ryete con' co' mbli mèn nación Israel par mbli mèn nación Israel cas loo Diox ngòc mod co' ngòp mènna, co' nee di's, con con' co' ngòc ofrend o gòn no con má' co' mbeth mèn nación Israel par teri'th tecan' Diox cón che'n xquin mèn nación Israel no xtol mèn nación Israel tiempa ngòc xal thib muestr par na' no xal thib xin no xnaa par té'th na' no ta' na' cuent cón che'n xá mod li na' cas loo Diox nalle'. Tac mèn co' tataa mbli servis loo Diox tiempa, leque mènna mden' le'n lezo' mènna iante con'ade nac co' naquín li mènna par gac mènna mèn nali no mèn nambii loo Diox. <sup>10</sup> Per cón che'n xal mnibe' ley co' mxo'f Moisés loo mèn, ante mnibe' ley xá mod hua mèn xít mèn no lua' mèn no xá mod tech mèn con' no tembii mèn con'. Mbli mènna ryete con' xal mnibe' ley co' mxo'f Moisés loo mènna axta mzin huiz mzye' yalnibe' che'n leya loo mèn.

<sup>11</sup> Per com le' Crist mbi'thle', ¿lé'?, nalle' nac Crist nguley' roo nguley' xèn loo co' nac ryethe con' ndac co' ndxàc loo na' nalle'. No le'n templ co'te' ngue xo'f zin' Crist yalnguley' nalle' nac lugar más ndac. No naca lugar más nambii no lugar más nali. Ne'ndoxcua'de templa xal ntoxcua' mèn chol templ loo izlyo' ndxè'. <sup>12</sup> Ngòole' Crist le'n ryop le'n che'n mbryop tabernáculo co'te' nac lugar más natú' tín' por cón che'n ryete mèn. Ne'ngòode Crist con ren chiv no con ren ngon yèn'. Ndxè'leque', ngòo Crist por cón che'n renpe' lad Crist co' mxyo. Por cón che'n renpe' Crist co' mxyo, mbli Crist gan yòo ban no na' Diox thidtene yiloa. <sup>13</sup> Tac chele' ren ngon no ren chiv gutee no dii che'n vac yèn' co' mbryob loo mèn zaba mbli par ngòc mènna xalque' mèn natú' no mèn nali no mèn nambii loo cón che'n xtol mèn tiempa, per máa xtùuz mènna no máa con' co' ngo le'n lezo' mènna, à'? <sup>14</sup> Per nalle', ngue niin loo gu' tedib vez: Chele' con' mbli mènna mbli mbembii mèn no ngòc mènna mèn nali loo Diox tiempa, ale'que' ren che'n Crist ne'li gac más con' ndac loo mèn por cón che'n ren ladpe' Crist co' mxyo, ¿lé'? Tac por cón che'n Xpii Natú' co' thidteneque' nzo, por cón che'n Xpíia leque yub Crist mda' lugar mquée yalguth loo Crist par mxactii Crist no tataa mod mdix Crist cón che'n xquin mèn no xtol mèn loo Diox. Cona, ren che'n Crist ndli par mbembii loo rye na' no co' mden' na' le'n lezo' na' cón che'n con' mbli na' xtùuz co' ne'ngàcte con' ndac loo Diox. Tataa mbli Crist par nac na' mèn co' ndli sirv loo Diox co' nac thidte Diox co' naban.

<sup>15</sup> Por cón che'n ryethe con' co' ngòc loo Jesucrist, nac Crist thib mbi' co' nteri'th di's che'n mèn loo Diox por cón che'n conveñ cub. Tac co'se' ngolo mquée yalguth loo Crist, mton' Crist ryete xtol mèn co' ngo xàn' yalnibe' che'n ner conveñgool. Le' sya, mèn co' Diox mcui, loo mènna Diox mcàbgòn yan' no mènna con' ndac thidtene co' ta' Diox loo mènna yiloa. <sup>16</sup> Co'te' ngòo thib conveñ, naquín gath mbi' co' mbli nèe conveña par tataa mod gac le' conveña ntacque'. <sup>17</sup> Tac co'se' ndyoxcua' ye's co' nac conveñ o xque'sa co' lèe testament, ndyoxcua' xque'sa co'se' yamerle' gath thib mbi' co' mbli conveñ. Per chele' mbi' co' mtoxcua' xque's co' nac conveña be' naban, yende cón ntac conveña par mèn, sya. Ante ntaca co'se' ngolo nguth mbi'. <sup>18</sup> Por cona, ner conveñ co' ngòc conveñgool ngòc nèe por cón che'n ren che'n má'. <sup>19</sup> Tac ngolo mde'th Moisés no mblab Moisés ye's co' nac di's co' mnibe' Diox co' nac ley co' mxo'f Moisés loo mèn nación Israel, ngoloa mnibe' Moisés loo mèn par mbeth mèn ngon no chiv gutee. Ngoloa, mxen Moisés ren ngon, no ren chiv gutee, no nít, no yis lad mbacxil' co' mgo' mèn con color nane, no thib ram yaa co' nxyen bix co' ngro' lèe hisop. Mxob Moisés ren loo libr co' nac



libr che'n ley co' mxo'f Moisés loo mèn no loo mèn nación Israel co' mqueltàa loo Moisés tiempa. <sup>20</sup> Moisés ndxab loo mèn nación Israel: Con' ndxè' nac ren co' ndli nèe conveñ co' mnibe' Diox loo gu' par tyubdi's gu' xal mbez di's che'n conveñ. <sup>21</sup> Lomisque' mod ne, mxob Moisés ren má' le'n tabernáculo no loo rye con' co' ndli zin' mèn loo servis co' mbli mènna loo Diox. <sup>22</sup> Xalque' mnibe' ley che'n Moisés loo mèn tiempa, casque' ryete con' co' mbli zin' mèn le'n templ tiempa mbembii co'se' mxyob ren má'. Tac, lìcpe' ba'i, ante co'se' mxyo ren ndyon' xquin no xtol mèn.

*Di's ndxè' ndlu' thidte vez nguth Crist par mton' Crist xtol mèn loo mèn, mèn co' ndyal ngòo loo cón che'n Diox por cón che'n Crist.*

<sup>23</sup> Cona, ngue niin loo gu': Mquin nguth mèn má' no mquin mxob mèn ren má'a tiemp che'n Moisés par mbembii loo tabernaculogool tiempa no loo yi'f co' mbli zin' mèn le'n tabernáculo tiempa. Con' co' mbli zin' mènna tiemp che'n Moisés ngòc xal thib muestr no xal thib xin no thib xnaa cón che'n xá mod, lìcque', nton' Diox xtol mèn loo mèn. Por cona, mquin nguth Crist no mquin mxyo ren Crist par mbembii loo rye mèn co' ndxòo loo mod cub co' nac che'npe' bé' par lyá' mèn loo con' ryes. Con'a nac thib con' más con' ndac tín'. <sup>24</sup> Ne'ngòode Crist Jesús le'n tabernáculo co' nac más natú' tín' co' mdyoxcua' con ya' mèn. Tac tabernáculo co' mdyoxcua' con ya' mèn tiempa, tabernaculoa ngòc xal thib muestr no xin no xnaa che'n merpe' tabernáculo co' nac lìcpe' co' nzo gáp loo bé' le'n bé'. Ndxè'leque', ngòo Crist Jesús le'n bé' co' nac loo bé' co'te' nac merpe' tabernáculo. Tya mbli' too Jesucrist Jesucrist loo Diox por cón che'n na'. <sup>25</sup> Ne'nda'de Crist lugar par guth mèn Crist thib baan vez xal mbeth mèn má' no mxob mèn ren má' par ngòo no nguley' roo nguley' xèn ren co' inacte renpe' nguley' roo nguley' xèn le'n ryop le'n tabernáculo co'te' nac lugar co' nac lugar más natú' tín' atate lín'. <sup>26</sup> Tac chele'i tataaque' ngàc, naquin tyactii Crist Jesús thib taare' vez axta co'se' mblec Diox izlyo' no axta nalle'. Per nalle', lìcpe' ba'i, le'n tiemp co' nac lult tiemp ndxè', thib líte mbi'th lu' Crist Crist loo mèn thidte vez no maste par ton' Crist cón che'n xquin mèn no xtol mèn loo mèn. Tataa mbli Crist co'se' mquée yalguth loo Crist no mxyo ren Crist par mxactii Crist no mdix Crist cón che'n xtol mèn loo Diox. <sup>27</sup> Lomisque' ne, ndxàca loo mèn xal mnibe' Diox ale ndxath bélyòo lad mèn thidte vez. Le' yiloo na, gàca tub rez Diox cón che'n mèn loo mèn. <sup>28</sup> Cona ne, thidte vez leque Crist Jesús mda' lugar mquée yalguth loo Crist Jesús no mxyo ren Crist Jesús loo izlyo' loo Diox, co' nee di's, co'se' mden' Crist yalnè lad Crist loo cruz, tataa mod mxactii Crist no mton' Crist xquin huax mèn por cón che'n lad Crist. Per ndxe'leque', co'se' yilo ryop vez yi'th Crist Jesús, ne'yi'thte Crist Jesús por cón che'n xquin mèn. Ndxè'leque', yi'th xi Crist Jesús mèn, mèn co' nzi quee lezo' yi'th Crist Jesús par lyá' mènna loo con' ryes thidtene.

## 10

<sup>1</sup> Ley co' mxo'f Moisés loo mèn nación Israel ngòc xal thib xin no xnaa che'n con' ndac co' mbi'th nquele'. Yende mod li ley co' mxo'f Moisés loo mèn con' ndac loo mèn xal li conveñ cub co' nde nquea con' ndac loo mèn. Tac mènna, atate lín' mbeth mènna ngon, mbeth mènna vac, no mbeth mènna chiv par xo mèn ren má' par teri'th tecan' Diox cón che'n xquin mèn no xtol mèn loo mèn tiempa. Per mastale' mbli mènna con'a, yende mod teli con'a no tembii con'a mèn, mèn co' nzi bii gax loo Diox por cón che'n con' ndli mèn xal ñibe' ley co' mxo'f Moisés loo mèn. <sup>2</sup> Chele' cón che'n ley co' mxo'f Moisés loo mèn ngác nteli mèn no ngác tembii mèn co' mbeth ngon no vac no chiv xal mnibe' ley co' mxo'f Moisés loo mèn, sya, ya ne'tolode nguth mènna más ngon no chiv no vac. Tac chele' mènna ngác mèn nambii no mèn nali por cón che'n con' mbli mènna cón che'n ley co' mxo'f Moisés loo mènna, ne'tolode nden' mènna le'n lezo' mènna cón che'n xquin no xtol co' mcua'n mènna no cón che'n xquin no xtol co' mbli mènna. <sup>3</sup> Ndxè'leque', co'se' mbeth mènna ngon no vac no chiv par teri'th tecan' Diox cón che'n xquin mèn no xtol mèn loo Diox atate lín', leque con'a mbli par ale mte' lezo' mènna cón che'n xquin mènna

no xtol mènà co' mcua'n mènà atate lín'. <sup>4</sup> Tac yende mod li ren che'n ngon no ren che'n chiv gutee par tyon' xtol mèn.

<sup>5</sup> Por cona, co'se' mbi'th Crist loo mèn loo izlyo', ndxab Crist loo Diox:

U' ne'ngòde lezo' par tolo guth mèn ngon no chiv no vac par xo mèn ren má'a par teri'th tecan' U' cón che'n xquin mènà no xtol mènà. Per U' mtoxcua' thib bél'yòo co' nac ladpe'en.

<sup>6</sup> Ngon no chiv no vac co' mtec mèn loo izlyo' loo U' no con' co' mblec mèn loo mes, co' nee di's, mblec mèn con' loo U' por cón che'n xtol mènà, ne'ndacte lezo' U' gunèe U' con'a.

<sup>7</sup> Le' sya, mbere Crist. Ndxab Crist loo Diox tedib vez:

Hui' U' nexa. Le'n ye's co' nadùuz co' nac xti's U' ndub di's co' nda' cuent cón chenen le' daa ndal li con' co' nee lezo' U', Tad Diox.

<sup>8</sup> Nerleque' co'te' ntlo di's ndxè' ndxab Crist loo Diox:

Má' co' mbeth mèn no ren che'n má' co' mxo mèn par teri'th tecan' U' cón che'n xtol mènà, no con' co' mblec mènà loo mes, co' nee di's, mblec mènà con' loo U', no má' co' mtec mèn par teri'th tecan' U' cón che'n xquin mènà no xtol mènà, ne'ndubla'ste U'i no ne'ngòde lezo' U'i, ne, mastale' tataa mnibe' ley co' mxo'f Moisés loo mèn li mènà loo U'.

<sup>9</sup> Mbere Crist, ndxab Crist loo Diox tedib vez:

Daa ngro'le' loo U'; nzolen loo izlyo' ndxe' par lin co' nee lezo' U', Tad Diox.

Co'se' ngolo ndxab Crist tataa, mteche Crist conveñgool co' ngòc ley co' mxo'f Moisés loo mèn. Tataa mbli Crist par mbli nèe Crist conveñ cub co' ndlu' con' co' nac co' nee lezo' Diox loo mèn. <sup>10</sup> Ngòca loo na' ngro' xà' na' loo cón che'n xab izlyo' par ngòc na' mèn che'npe' Diox tac tataa nac co' gunee lezo' Diox gac loo na'. Tataa ngòca loo na' tac thidte vez mda' Jesucrist lugar mquée yalguth loo Jesucrist par tataa mod mxactii Jesucrist no mdix Jesucrist por cón che'n xquin ryete mèn no xtol ryete mèn loo Diox.

<sup>11</sup> Ryete nguley' che'n mèn nación Israel atate huiz mbeth má' no mbec nguley' má'a loo mes, co' nee di's, mblec mèn con' loo Diox par tataa mod mteri'th no mtecan' Diox cón che'n xquin mèn no cón che'n xtol mèn tiempa. Per mastale' tataa mbli nguley', thidtene ne'ngácte con' co' mbli nguley'a par nteche con' co' mbli nguley'a xquin mèn no xtol mèn. Thiba con' ndxè'.

<sup>12</sup> Le' tediba na, Crist Jesús co' nac nguley' roo nguley' xèn che'n na', thidte vez mda' Crist Jesús lugar mquée yalguth loo Crist Jesús par mxactii Crist Jesús no mdix Crist Jesús cón che'n xquin mèn no xtol mèn loo Diox. Ngoloa, ndub Crist Jesús cuat Diox loo bé'.

<sup>13</sup> Axta huiza no axta huiz nalze ngue bed Crist Jesús axtaque' gac ryete mèn co' nac ngolo ngola's che'n Crist Jesús mèn nado' loo Jesús. <sup>14</sup> Tac thidte vez no maste mda' Crist Jesús lugar mquée yalguth loo Crist Jesús par tataa mod mxactii Crist Jesús no mdix Crist Jesús loo Diox cón che'n xquin mèn no xtol mèn. Leque hora ryete mèn co' ngro' xà' loo cón che'n xab izlyo', mèn co' ngòc che'npe' Diox, hora Jesucrist mblile' le' mènà ngòc mèn nalì no mèn nambii loo Diox. <sup>15</sup> Xpii Natú nda' cuent no ndlu' Xpii Natú' loo na' cón che'n con'a. Tac gunii Xpii Natú' di's ndxè' thib lugar loo libr co' nac xti's Diox:

<sup>16</sup> Con' ndxè' nac conveñ co' lin loo mènà le'n huiz co' nde nque, ndxab Tad Diox.

Daa li par yaa'd di's co' ñibe' ley daa le'n xtùuz mèn nación Israel. No lin par ten' mèn nación Israel di's cón che'n ley daa le'n lezo' mènà.

<sup>17</sup> Tolo ndxab Xpii Natú' taaplá di's co' nac di's ndxè':

Thidtene ya ne'te'de lezon rye xtol mènà no con' ye'rsin' co' mbli mènà.

<sup>18</sup> Tac co'te' mdyon'le' xtol mèn no xquin mèn, ya inquinte tolo guth mèn má' par ta' mèn che'n izlyo' loo izlyo' loo Diox por cón che'n xtol mèn.

*Trè' ndlu' xá mod ndxàal yòo mèn loo cón che'n Diox.*

<sup>19</sup> Por cona, mèn huesen por cón che'n Jesucrist, nase thib líte yòo na' co'te' nac lugar más natú' tìn' co'te' nzo Diox con dibaxla's por cón che'n ren che'n Jesuscrist co' mxyo.

<sup>20</sup> Nase con más dibaxla's quee tee ban ndac na' loo Diox por mod co' mxal' Jesús ned no

yó' loo na' par yòo mèn loo Diox, co' nee di's, ndxàp na' thib mod cub par yòo ban na' loo Diox. Por cón che'n leque ladpe' Jesús, Jesús mbli ndxàp na' derech bii gax na' loo Diox chol tiemp nalle' xalque' ngòca co'se' nguley' roo nguley' xèn mbri'th xís lar' co' ngòc cortin par yòo nguley' roo nguley' xèn le'n ryop le'n tabernáculu co'te' ngòc lugar más natú' tìn' par teri'th nguley' roo nguley' xèna cón che'n mèn loo Diox. <sup>21</sup> Per nalle' ngue nole' na' thib nguley' roo nguley' xèn co' nxo'f zin' zin' loo mèn co' nac che'npe' Diox, mèn co' nac xal mèn guliz Diox. <sup>22</sup> Por cona, ngue niin loo gu': Tolo bii gax na' loo Diox, co' nee di's, que tee ban ndac na' no que tee ban lì na' loo Diox con dib nzo yéc na' no con dib nzo lezo' na'. No con dibaxla's, tyubdi's na' loo Diox tac ndxàp na' yalxla's loo Diox. Tac xtùuz na' no lezo' na' mbembiile' por cón che'n ren Crist Jesús co' mxyo par ne'tolode ten' na' cón che'n xtol na' le'n lezo' na'. Lomisque', ngòca loo ladpe' na' le' lad na' mbyechle' no mbembiile' con nít nambii, co' nee di's, mbembiile' ladpe' na' loo ryethe con' ye'rsin' co' ngòo le'n lezo' na' por cón che'n Crist Jesús. <sup>23</sup> Thidteneque' li nèe na' na' loo con' co' ndxela's na' co' nzi quee lezo' na' axtaque' gác con' co' nzi quee lezo' na' gác loo na'. Ndxàp na' yalxla's le'i gác loo na' tac Diox lique' co' mcàbgòn Diox li Diox loo na'. <sup>24</sup> No ndlyazen tyóo na' xá mod li na' par tolo ye'th lezo' thib xtàa na' no tedib xtàa na' par tolo gác na' que' lezo' na' Diox no que' lezo' na' ñèe na' rye hues xtàa na' no tolo li na' con' ndac loo rye mèn. <sup>25</sup> Ne'lá'ya'de na' mod co' ngue no na' co' nqueltàa na' loo servis loo Diox xal ndli ndxep mèn co' tith tith ndyee loo servis loo Diox. Ndxé'leque', tolo co'x na' loo thib xtàa na' no loo tedib xtàa na' par ye'th lezo' thib xtàa na' no tedib xtàa na' loo cón che'n Tad Diox tac gu' non no nanee gu' nde zin' gaxle' huiz co'se' yi'th xi Tad Jesucrist na'.

<sup>26</sup> Tac chele' na' tolo cua'n xtol na' xal neepe' lezo' na' co'se' ngolo non na' no gunèe na' no mbli la's na' co' nac con' lìcpe', le' sya, loo na' yende con' ntac con' co' ngòc loo Crist co'se' mxyo ren Crist par tataa mod mxactii Crist par mdix Crist cón che'n xquin na' no xtol na' loo Diox. <sup>27</sup> Ale ndxe'leque', leque mènna ngue queltàa yaltii tìn' loo mènna cón che'n con' ye'rsin' tìn' co' gác loo mèn co'se' tub rez Diox cón che'n mènna loo mènna. Lomisque', yecloo tìn' Diox loo mèn co' nac ngolo ngola's che'n Diox axta telux Diox mènna xal ndlyux chol con' loo quii no loo bèel. <sup>28</sup> Póla co'se' ngo mèn co' ne'ndubdi'ste loo ley co' mxo'f Moisés loo mèn no, làth xtau'a, ngo chop o son mèn co' gunèe con' co' ngue li mènna no ngua ta' mèn co' gunèe mènna part co' mbli mènna loo mèn nac zin'. Co'se' mbìn mèn nac zin' con' ngue li mènna, ale mbeth mèn yòolaua prob mèn co' mcua'n xquina no yende chó mèn nglat lezo' ngnèe prob mènna. <sup>29</sup> Pues chele' mèn nac zin' tataa mbli con mènna póla, ¿xá ngobe' gu'? ¿Ché' imas nède tetii Diox mèn co' ndli ngòc nguàal con' loo cón che'n ren xgan' Diox no nde nxon', nazab ñii yèe ñii tii mènna cón che'n Diox, Diox co' anze'f nque' lezo' ñèe mèn, cà'? Tetii que' Diox mènna axta plóthe. No por cón che'n ren che'n Crista, ndxàc loo mèn ndryo' mèn loo cón che'n xab izlyo' par ndxàc mèn mèn che'npe' Diox. <sup>30</sup> Tac na' nanee le' Tad Diox nac xa' co' ndxab:

Cón chenen ndxan' cón che'n mèn ye'rsin'. Daa tetii mènna. Daa guix càa mènna no go xtàan con' mbli mènna xalque' nac co' mbli mènna.

No lomisque', mbyan' di's co' ndxab Diox:

Daa co' nac Tad loo ryethe con', daa tub rez loo mèn co' nac mènpe' daa. <sup>31</sup> Anze'f nè tìn' gàca loo mèn co'se' tetii Diox mèn làth ndxecloo Diox loo mèn, Diox co' nac thidte Diox co' naban.

<sup>32</sup> Per ndxe'leque', te' lezo' gu' cón che'n tiemp co' ngòc loo gu' thib cua'a co'se' sete mdub xnii yéc gu' no co'se' sete mdub xnii lezo' gu' mden' gu' cón che'n Crist Jesús. Tiempa ale mxec yèe gu' mden' gu' huax yaltii co'se' mdub ngu's mèn gu'. <sup>33</sup> Ngòc gu' mèn co' mxac yaltii co'se' mdub ngu's mèn gu' thib cua'a. Thiba con' ndxè'.

Le' tedib na, thidte mqueltàa gu' con mèn co' mxac yaltii no yalndyub ngu's par lyath no gu' prob mènna. <sup>34</sup> Gu' anze'f mbyat lezo' gunèe gu' mèn co' mque' lezi'f. No iante con'ada. Ndxé'leque', mdyac lezo' gu' co'se' mbli huan' mèn con' mque no gu' tac gu' nonque' no naneeque' gu' le' gu' ngue no más con' co' anze'f ntac loo bé' co' nac con'

ndac co' ne'lith node no con' co' ne'lyuxte. <sup>35</sup> Ne'gàcte gu' mèn co' ndxàc chop loo chop la's loo cón che'n Crist. Mèn co', lìcque', ndxàp yalxla's loo Diox, mènà càaya' que' yalndxax co' ta' Diox loo mènà. <sup>36</sup> Naquinque' tolo cha'la's gu' láth nzi tee ban gu' làth xtàa gu' loo izlyo' ndxè' par tolo li gu' co' nee lezo' Diox. Le' sya, càaya' gu' ryethe con' co' mcàbgòn Diox li Diox loo gu'. <sup>37</sup> Tac loo xti's Diox ndub di's co' mbez:

Le'n taandxep tiemp yi'th xa' co' ndxath yi'thque' no ne'lyen'te xa' par yi'th xa'.

<sup>38</sup> Per nase mèn co' nac mèn nalì no mèn nambii, mènà nzi tee banque' loo con' co' ndxela's mènà loo Diox. Per chele' ndxep mènà que tee xà' loo cón chenen, ne'tyacte lezon ñèen mènà, ndxab Diox.

<sup>39</sup> Per na' inacte xal taamas mèn co' ndyoo xà' lezo' loo cón che'n Tad Crist par bere mèn, que tee li mèn xal mque tee li mèn ndoore' yòo mèn loo cón che'n Tad Crist par mblyux mènà. Ndxè'leque', nac na' mèn co' ndxàp yalxla's loo Diox por cón che'n Jesucrist par que no na' yalnaban thidtene. Ne'ryo' xà'de alm na' loo Diox thidtene.

## 11

*Trè' ndlu' co'se', lìcque', ndxela's mèn loo Diox por cón che'n Crist, ya yende con' más ndxàc falt par yòo ban no mèn Diox.*

<sup>1</sup> Mèn co', lìcque', ndxàp yalxla's loo Diox por cón che'n Crist, mènà ngobe'que' gac con' co' nzi queque' lezo' mènà co' li Diox loo mènà. No mèn co' ndxela's loo Diox por cón che'n Crist, mènà mbìn di's che'n Diox no nque tee ban mènà xal ñibe' Diox tac mènà nonque' le' con' co' gunii Diox cón che'n con' co' indxú'de loo na' nac con' lìcpe'.

<sup>2</sup> Lìcque' nac di's ndxè' tac mèn gox co' ngòc xudgool na' co' ngo ban póla ngòp yalxla's loo Diox. No mbli mènà co' mnibe' Diox axtaque' yub Diox mda' cuent cón che'n mèn gox co' ngòc xudgool na' huenque' mbli mènà no mque tee ban lì mènà loo Diox.

<sup>3</sup> Por yalxla's co' ndxàp na' loo Diox, nonque' na' no naneeque' na' ante gunii Diox no mnibe' Diox ngòcsua' ryethe con' co' nziri'. Cona nee di's, le' ryethe con' co' ngòcsua', por cón che'n con' co' nzo la's nii Diox no la's ya' Diox no maste ngòcsua' con'. Con' co' nzo la's nii Diox no la's ya' Diox indxú'de loo mèn.

<sup>4</sup> Abel co' ngòc xgan' ner mbi' co' ngo ban loo izlyo' co' ngòc Adán, Abel ngòp yalxla's loo Diox. Por cona, más con' ndac ngòc má' co' mbeth Abel par mteri'th mtecan' Diox cón che'n xquin Abel no xtol Abel loo Abel leque con' co' mblec Caín, hues Abel, loo còo' par mdix Caín par mteri'th mtecan' Diox cón che'n xquin Caín no xtol Caín loo Caín. Por cona, mblo ro Diox nalì no nambii ngòc Abel no anze'f ngòo lezo' Diox gunèe Diox má' co' mbeth Abel par mdix Abel par mteri'th mtecan' Diox cón che'n xquin Abel no xtol Abel loo Abel tiempa. Cona, axta nalle' con' co' mbli Abel, por ngòp Abel yalxla's loo Diox tiempa, con'a ndlu' loo na' ndxàal gáp na' yalxla's loo Diox, ne.

<sup>5</sup> Enoc ngola's loo Diox, ne. Por cona, ne'ngathte Enoc. Ne' ne' ngzal Enoc loo mèn tiempa tac Diox mbi'th xi Enoc loo izlyo'. Mbe' Diox Enoc loo bé' co'te' nzo Diox. Ndoore' hue' Diox Enoc, Diox mda' cuent ngòo lezo' Diox Enoc. <sup>6</sup> Per mèn co' indxàpte yalxla's loo Diox, yende mod li mènà con' co' yòo lezo' Diox. Tac mèn co' lya's yòo loo cón che'n Diox, naquinque' yila's mènà le' Diox nzoque', no làth xtau'a, naquinque' gáp mènà yalxla's le' Diox, lìcque', li con' ndac loo mèn co' ngòo loo cón che'n Diox con dib nzo yéc mèn no con dib nzo lezo' mèn.

<sup>7</sup> Noé, ne, ngòp yalxla's loo Diox. Mdubdi's Noé loo Diox. Co'se' ndxab Diox cón che'n con' co' gac loo Noé, mtlo Noé mbli nab Noé thib yòoyaa roo par lyá' ryete mèn guliz Noé loo con' ryes. Tataa mod mzib quì Noé' mèn tiempa tac ne'ngala'ste mènà ro Noé. No ngòcque' di's co' gunii Noé. Tataa mod mblo ro Diox ngòc Noé thib mbi' nalì no thib mbi' nambii loo Diox tac ngòp Noé yalxla's loo Diox no ngola's Noé loo Diox.

<sup>8</sup> Abraham, ne, ngòp yalxla's loo Diox. Co'se' ndxab Diox loo Abraham ryo' Abraham liz Abraham no làaz Abraham par ya Abraham no zin Abraham axta co'te' càaya' Abraham lugar co'te' yòo ban Abraham par gac che'npe' Abraham lugara, pues, mdubdi'sque' Abraham loo Diox. Sya, ale ngro' Abraham axta ne' ne' ñee Abraham pá zin Abraham

no pá ya Abraham. <sup>9</sup> No por ngòp Abraham yalxla's loo Diox, ngo ban Abraham xal mèn tith làaz mèn co'te' mcàbgòn Diox loo Abraham gac che'npe' Abraham yiloa. No ngo ban Abraham làaz mèn le'n thib yòo mantyad no maste. Látha, ngóol Isaac, xgan' Abraham. No ngóol Cob, xgan' Isaac, tya co'te' thidte mban no Abraham ryete myen' xin' Abraham. No látha, mcàbgòn Diox leque con'a loo Isaac no loo Cob xalque' mcàbgòn Diox con' loo Abraham li Diox con' loo Abraham. <sup>10</sup> Abraham mdub quee lezo' axtaque' zin Abraham ciuda co' mblec tee yub Diox no co' mxít té'f yub Diox xal thib maistr albañil, co' nee di's, nac leque loo bé'.

<sup>11</sup> No leque yub Sar ngòp yalxla's loo Diox. Ngòc Sar mèn rnith. Co'se' ngolo nguri'th tiemp ngòc Sar myen'got no ne'ndante xin' Sar axta ngòc Sar thib xa'gotgool, Diox mbli thib yalguzye' loo Sar. Ale tiempa mquéeloo thib xin' Sar loo Sar. No mxan gox Sar thib xgan' Sar. Ngòc con'a loo Sar tac ngola's Sar loo Diox le' Diox lique' co' mcàbgòn Diox li Diox loo Sar. <sup>12</sup> No por cón che'n thidte mbi' co' ngòc Abraham co' yamerle' gath loo yíizgool, bin mbi'a ngos mdyàl xal mbèelbé' co' nzi'f loo bé' no xal yux co' nziri' ro nító', co' nee di's, mque no mbi'a huax bin axta yende chó mèn gac lab mèn co' ngòc bin mbi'a.

<sup>13</sup> Ryete loo mèn co' mcàbgòn Diox tiempa, ryete mèn ngola's axta nguth mèn. Mèn ne'ncàaya'de ryete con' co' mcàbgòn Diox loo mèn tiempa ndoore' gath mèn. Ante ngòca loo mèn tiempa xal thib con' co' tith tith mbyú' loo mèn. No mdyac lezo' mèn tac gunèe mèn cón che'na ndoore' gaca. Por cón che'n cona, mblo ro mèn nac mèn mèn tith làaz chol mèn co'te' ndxòo mèn. Lomisque' mod, mblo ro mèn inacte mèn mèn che'npe' izlyo' ndxè'. <sup>14</sup> Mèn co' ndyoodi's tataa, clarleque' ngo ro mèn le' mèn ngue cua'n thib lugar co'te' cuec mèn nacionpe' mèn. <sup>15</sup> Chele' mèn ngli xtùuz cón che'n co'te' ngro' mèn, licpe' ba'i, ngàcque' mbere mèn, mbii mèn tedib vez co'te' ngro' mèn. <sup>16</sup> Per ale ndxe'leque', mblya's mèn que no mèn thib nación co' gac thib nación más ndac, co' nee di's, gac thib nación gáp loo bé' co'te' nzo Diox. Por cona, Diox inthyonte par ryo' lèe Diox Diox che'npe' mèn. Tac Diox mbli nable' thib ciuda co' gac ciuda che'npe' mèn.

<sup>17</sup> Abraham ngola's loo Diox, ne. Co'se' mbli Diox preb loo Abraham ñeene' ché' tyubdi's Abraham loo Diox, Abraham mdubdi'sque'. Mxen Abraham cuchí no nda no Abraham Isaac co' ngòc thidte xgan' Abraham par yi'f yèe guthxù' Abraham Isaac xalque' mnibe' Diox loo Abraham li Abraham. Tataa mbli Abraham par mblu' Abraham loo Diox le' Abraham ngola'sque' loo Diox mastale' angoluxte Isaac mcàbgòn Diox le' Isaac gac xin' Abraham. <sup>18</sup> Ndxab Diox loo Abraham: Por cón che'n Isaac yas yàl bin co' gac bin lùu. <sup>19</sup> Tataa mod mblo ro no mblu' Abraham le' Diox nac Diox roo Diox xèn co' ndxác ngo xban mèn nguth. Por cona, co'se' ndxab Diox loo Abraham: Ne'guthtel xgan'l, ey, hora mden' Abraham le' Abraham mcàaya' xgan' Abraham co' ngro xban làth mèn nguth.

<sup>20</sup> Isaac co' ngòc xgan' Abraham ngola's loo Diox. Por cona, ndxab Isaac loo Cob no loo Sau co' ngòc ryop xgan' Isaac: Diox huen nda gu'. Gac con' ndac loo gu', ndee gu'. Làth xtau'a, Isaac ngue li xtùuz cón che'n con' co' gac loo bin myen'a yiloa. <sup>21</sup> Cob, ne, co' ngòc xgan' Isaac ngola's loo Diox. Por cona, co'se' ngue tin liz Cob, gunii Cob Diox loo mèn guliz Cob. Ndxab Cob loo xot Cob co' ngòc xin' Chè, ne: Diox huen nda gu'. No láth ngurez Cob Diox, mdoo xo'f daa Cob loo yaagàa co' ndyen Cob. <sup>22</sup> Chè, ne, co' ngòc xgan' Cob, ngola's loo Diox. Por cona, co'se' nax tin liz Chè, gunii Chè cón che'n mèn nación Israel le' mèn nación Israel ryo' le'n nación Egipt par ya ban mèn tedib lugar. No mnibe' Chè loo mèn xá mod li no mèn zith Chè co'se' gac Chè thebol tiempa no co'se' ryo' mèn nación Israel le'n nación Egipt.

<sup>23</sup> Xud Moisés no xna' Moisés ngòp yalxla's loo Diox, ne. Por cona, co'se' ngóol Moisés, mèn guliz Moisés mcasloo Moisés le'n son mbe' tac gunèe mèn anze'f nabe's ñaa Moisés. No ne'ngzebte mèn guliz Moisés loo yalñibe' che'n rey tiempa. <sup>24</sup> Moisés, ne, ngòp yalxla's loo Diox. Co'se' ngolo mbryoo mxyèn Moisés, mcà di's Moisés loo mèn co' mbez le' Moisés nac xgan' rsap Faraón. <sup>25</sup> Ndxè'leque', mdoo lezo' Moisés más huen tyactii Moisés con mèn nación che'npe' Diox leque tyac lezo' Moisés loo cón che'n xtol mèn



co' nda' gust lezo' mèn no co' nac thib gust co' nda' mèn lezo' mèn le'n ndxep huiz no maste. <sup>26</sup> Tac Moisés mbli xtùuz más huen gàca loo Moisés chele' Moisés tyactii ryete yalndyub ngu's cón che'n Crist leque li Moisés gan ryete tesor che'n mèn nación Egipt tac mdyóo Moisés cón che'n con' ndac co' gac loo Moisés yiloa. <sup>27</sup> Por ngola's Moisés loo Diox, ngro' Moisés nación Egipt. Ne'ngzebte Moisés gac nayi' rey Faraón loo Moisés. Moisés mnibe' que' lezo' li Moisés sirv loo Diox xal mèn co' ngue hui' loo Diox, Diox co' yende mod hui' mèn loo.

<sup>28</sup> Por ngòp Moisés yalxla's loo Diox, mnibe' Moisés loo mèn nación Israel li mèn thib lni co' lèe lni pasc, co' nee di's, ngòc huiz co'se' mtà mèn ren che'n mbacxil' lad puert liz mèn xal mnibe' Diox. Tataa mbli mèn tac leque hora Diox mtel' thib angl par ya yuth angl rye myen' ndlyo rye liz mèn nación Egipt co'te' ne'ntàde mèn ren mbacxil' lad puert xal mnibe' Diox li mèn nación Israel. <sup>29</sup> Mèn nación Israel, ne, ngola's loo Diox. Mbri'th mèn nación Israel le'n níttó' co' lèe Níttó' Nane Ren xal loo yòo biiz. Per ale ndxe'leque', co'se' mblya's mèn egipt riid mèn egipt le'n níttó'a, mtau' nít loo mèn nación Egipt no nguáp ryete mèn le'n nít.

<sup>30</sup> Por ngola's mèn nación Israel loo Diox, ngòb che ftoo che'n ciuda Jericó co'se' ngolo gaz huiz mblo mèn nación Israel vuelt xàn' btoo che'n ciuda Jericó. <sup>31</sup> Rahab co' ngòc thib xa'got co' mbli yalburrid ndoore', Rahab ngola's loo Diox. Por cona, mblyá' Rahab co'se' mbeth mèn nación Israel mèn Jericó co' ne'ngala'ste no co' ne'ndubdi'ste loo Diox. Mblyá' Rahab tac mblyath no Rahab mèn nación Israel co' ngua la's loo mèn ciuda Jericó.

<sup>32</sup> ¿Cón más tolo niin loo gu'? Ya yende con' más tolo niin loo gu'. Ya ne'lyathte daa par tolo tyoodizen cón che'n con' ngòc loo thib mbi' co' ngro' lèe Gedeón, no cón che'n tedib mbi' co' ngro' lèe Barac, no cón che'n tedib mbi' co' ngro' lèe Sansón, no cón che'n tedib mbi' co' ngro' lèe Jefté, no cón che'n tedib mbi' co' ngro' lèe David co' ngòc rey póla, no cón che'n tedib mbi' co' ngro' lèe Samuel, no cón che'n rye mèn co' mde'th di's co' ndxab Diox póla. <sup>33</sup> Por ngola's rye mèn loo Diox, mbli mèn gan loo xó' loo chol nación. No mxo'f zin' mèn zin' co' ngòc zin' natú' no zin' nambii. Mblyath no Diox mèn xal mcàbgòn Diox lyath no Diox mèn. Diox mblyath no mèn par mtau' mèn ro mbeestoope'. <sup>34</sup> Por ngola's mèn, mbli mèn gan ne'nso'de no ne'ntecte quiè bèel mèn. Mblyá' mèn loo yalguth co'se' mblya's nguth mèn co' ngòc ngolo ngola's mèn con' cuchí no spad. Diox mda' fuerz loo mèn. Ngòc mèn mbi' tìn' loo xó'. Mbli mèn gan mxon' solndad co' ngòc ngolo ngola's che'n mèn loo mèn, solndad co' ngòc solndad che'n tedib nación. <sup>35</sup> Ngo xa'got co' mcàaya' xin' co' ngro' xban làth mèn nguth. Ngo taandxep mèn mdin yaa mèn no mdin quèe mèn co' ngòc ngolo ngola's mèn axta nguth mèn. Mèn ne'ndalte, no ne'ngzebte, no ne' ne' nglá' mèn loo con' ryes tac mèn ngure queeque' lezo' ryo xban mèn loo thib yalnaban co' nac thib yalnaban más ndac. <sup>36</sup> Taamas mèn mxactii loo yalndyub ngu's co'se' mdin mèn ye'rsin' prob mèn. No axta mdub dó' mèn ye'rsin' ya' prob mèn no mdub dó' mèn ye'rsin' nii prob mèn con' caden no mque' mèn ye'rsin' prob mèn lezi'f. <sup>37</sup> No mbuaa'd quèe mèn ye'rsin' prob mèn. Mbli rol mèn ye'rsin' mèn con' sierr. Mbli mèn preb mèn neene' ché' tlu' mèn mod co' ndxela's mèn loo Diox. Mbeth mèn ye'rsin' prob mèn con' spad. Mque tee prob mèn par nedrè' no par ned ba'. Ngòc xab mèn yid mbacxil' no yid chiv. Mxactii prob mèn axta plóthe. Mxi yéc mèn no mxi lezo' mèn axta plóthe. Mbli mèn ye'rsin' con' ye'rsin' axta plóthe mblya's mèn con' prob mèn. <sup>38</sup> Axta ne' ne' indxàal que tee ban prob mèn làth mèn izlyo' tac axta arid naxin no nayi' nac mèn izlyo'. Mque tee ban ndxep prob mèn le'n yix no le'n huan no co'te' nagán. No ngo ban mèn le'n lyo' no le'n chol ye'r yòo. <sup>39</sup> Loo ryete prob mèn mda' Diox cuent ndac cón che'n prob mèn tac ngola's mèn loo Diox loo ryethe con' mxactii mèn. Per prob mèn ne'ngnèede no ne'ncaaya'de mèn con' no ne'ngàcte con' loo prob mèn co' mcàbgòn Diox li Diox loo mèn yiloa. <sup>40</sup> Tac Diox mnibe' loo lezo' Diox li Diox thib con' más con' ndac loo prob mèn no loo na'. Por cona, Diox mbli par thidte ngòc mèn mèn nali no mèn nambii loo Diox leque mod co' ndxàc na' mèn nali no mèn nambii loo Diox nalle'.

## 12

*Ante loo Jesús no loo cón che'n Jesús hui' mèn no ñaa mèn.*

<sup>1</sup> Tataaque' nonque' na' no naneeque' na' nzo thib baan mèn co' nali no nambii mque tee ban loo Diox. Mèna be' ndlu' no nda' mèna cuent por cón che'n ryethe yaltii, co' ngòc loo mèna axta plóthe por cón che'n Diox, le' mèna, lìcque', ngola's loo Diox no, lìcque', mdubdi's mèna loo Diox. Por cona, lá' na' ryete con' co' nca' no co' ncà loo na' thib lad par que tee ban ndac na' no que tee ban lì na' loo Diox. No lá' na' rye xquin na' no xtol na' co' ndryo' ndlyen' lezo' na' li na' thib lad. No cha'la's na' no xec yèe na' lath nque tee li na' con' co' ñibe' Diox loo na' axta gath na' xal co'se' nque' thib mbi' carre par li mbi' gan thib puest. <sup>2</sup> Thidte gac xtùuz thib thib na' no thidte gac lezo' thib thib na' ante loo cón che'n Jesús no tyóo na' cón che'n xá mod mxactii Jesús. Jesús nac xa' co' mblo xnee, no co' mbli nab, no co' mxo'f zin' ryete con' co' nac cón che'n ryethe con' co' ndxela's na'. No mbli Jesús ryete con' co' ngòcpe' loo Jesús par tataa mod ngola's na' no ndxap na' yalxla's loo Jesús. Ale mxactii Jesús axta plóthe no ne'ngthonte Jesús nguth Jesús loo cruz. Tac Jesús nonque' no naneeque' Jesús co'se' yilo riid yaltia loo Jesús, tyac lezo' Jesús no thidtene xo'f nde' xo'f ndla' lezo' Jesús. Ngolo mxactii Jesús, nguáp Jesús loo bé' par ngua tub Jesús cuat Diox ladli co'te' ndub Diox.

<sup>3</sup> Ftyóo gu' no bli gu' xtùuz co' huenleque' cón che'n Jesús xal mtetii mèn ye'rsin' co' ngòp xtol Jesús axta plóthe. Chele' gu' tataa tyóo no li gu' xtùuz, ne'gàcta loo gu' par yizan gu' no tyoo xà' lezo' gu' no guu's lezo' gu' loo cón che'n Jesús. <sup>4</sup> Tarte gaca loo gu' guth mèn gu', mèn co' gu' mbyoo tac ñee gu' ncu'a'n mèna xquin mèna. No por cona, ndlya's mèna guth mèna gu'. Per tarte guth mèn nec thib gu'. <sup>5</sup> ¿Ché' mblyathla'sle' gu' di's co' mco'x Diox loo gu' por nacle' gu' xin'pe' Diox, cà'? Hui' gu' nexa. Taandxè' mbez loo libr co' nac xti's Diox. Ndxab Diox:

Gu' co' nac xin'pe'en, ne'gabte gu' loo lezo' gu': Susque' ngue tetii Diox nu', co'se' li Diox gac yaltii loo gu'. Ne' ne' tyoo xà' lezo' gu' co'se' nado' di's nado' cuent yoon gu' ndxep.

<sup>6</sup> Tac Tad Diox ñibe' loo mèn xá mod ndxàal que tee ban mèn, mèn co' nque' lezo' Diox ñèe Diox, mèn co' ndxàc loo Diox xal xin' Diox. Diox ntetii mèna ndxep par té'th mèna no te' lezo' mèna xá mod ndxàal que tee ban mèna.

<sup>7</sup> Fxec yèe gu' axta plóthe co'se' tetii Diox gu' ndxep tac Diox ngo cuent nac gu' xin'pe' Diox. ¿Ché' ngue li gu' cuent yende myen' co' nac xin' thib gundan co' ne'ta'de xud che'n, cà'? Yende xàa. Xo'fque' gundan bar lad myen'. <sup>8</sup> Per chele' Diox ne'tetiide gu' xal ndxàca loo ryete mèn co' nque' lezo' Diox ñèe Diox, loo Diox nac gu' xal mèn co' nac xin' huan no inacte gu' xin' thidte xud no xin' thidte xna' xal ñibe' ley co' mxo'f Moisés loo mèn. <sup>9</sup> Más de cona, co'se' ngòc na' myen' bix loo xud na' no loo xna na', xud na' no xna' na' mtinque' na' no mbyooque' xud na' no xnaa na' na'. Lath xtau'a, ngòp na' mod loo xud na' no loo xna' na'. Ale'que' loo Diox co' nac xud na' co' nzo loo bé' más ne' gáp na' mod ñèe na' no ne' ne' tyubdi's na' ro xud na'a par ban no na' xud na' Dioxa yiloa. <sup>10</sup> Per xud na' no xna' na', lìcpe' ba'i, nagabte huiz mda' xa' che'n na' no nagabte huiz mbyoo xa' na' xal nee lezo' xa', ¿lé'? Per Diox ngyoo na' no ntetii Diox na' par càba gac más con' ndac loo na' par gac na' xal nac Diox co' nac Diox natú'. <sup>11</sup> Lìcpe' ba'i, indyubla'ste na' tyactii na' co'se' ndxàc yaltii loo na'. Ndxé'leque', ten' na' ndxàc nè loo na'. Per mastale', co'se' mxactii mèn co' ngòc yaltia, ndxe'leque', más ndxàc con' ndac loo mèn par ndxàc mèn mèn nali no mèn nambii loo Diox. No ncàba rye nda mèn no rye ndye'th mèn lath xtàa mèn, loo mèn co' mté'th chonon tataa mtetii Diox mèna.

*Anze'fryes naca loo mèn chele' mèn tè'b no cà di's mèn loo co' nac xti's Diox.*

<sup>12</sup> Por cona, ngue niin loo gu': Bli gu' par ye'th lezo' gu' no bli gu' par tolo ye'th lezo' xtàa gu' loo cón che'n Crist xal ndxàca co'se' ndxòo fuerz ya' mèn co' nguu's no xal ndxàca loo mèn co' ndyen mbii yéc xib no ndxoo fuerz yéc xib mèna par ndyoo ga'i par tyoo lì mèna. <sup>13</sup> Fque tee ban lì gu' loo cón che'n Crist par tataa mod co'se' ñèe mèn co'

mbuu's xtùuz no mèn co' ndoo xà' lezo' loo cón che'n gu' xal nzi tee ban gu' loo Crist, sya, mènà ye'th lezo' que tee ban mènà tataa, ne, xal co'se' ndxac nii mèn co' mbryal no nii mèn co' mchu'f.

<sup>14</sup> Fcua'n gu' mod par que tee ban gu' rye nda gu' no rye ndye'th gu' làth xtàa gu'. No bli gu' par tolo ryo xà' gu' loo cón che'n xab izlyo' par gàcque' gu' mèn che'npe' Diox. Tac chol mèn co' ne'tyalte ryo xà' loo cón che'n xab izlyo', nec thib mènà ne'hui'de loo Tad Diox. <sup>15</sup> Leque gu' bla's loo gu' par gàca nec thib mèn co' nqueltàa no gu'a, tyoo xà' lezo' no ryo xà' mènà loo con' co' ndly'a's Diox angli Diox loo mèn. No leque gu' bla's loo gu' par ne'gàcte gu' mèn co' ndli ngòc nguàal con' làth mèn tac ne'stolque' con' co' ndli gu'a zyal di's làth xtàa gu' par tyub xèn tyub xyàn lezo' xtàa gu'. Con'a ndli xol loo mènà no sate más ndxòo cua'n mèn làth xtàa mènà par nteza' mèn mèn loo cón che'n Crist. <sup>16</sup> Leque gu' bla's loo gu'. ¡Anderhuen gu'! Nec thib gu' ne'lìde yalburrid. Ne' ne' cua'n gu' xin' huan gu'. Ne' ne' gac gu' mèn co' ñii yèe ñii tii cón che'n Diox xal mbli Sau co'se' mse' Sau ryete con' mcàbgòn Diox no con' co' mdoo lezo' Diox angli Diox loo famil Isaac por cón che'n Sau por thib plat nítyèth co' mda' Cob nduhua Sau. <sup>17</sup> Tac gu' naneeque' no nonque' gu' loo mbli Sau con'a co'se' ale mbly'a's Sau càaya' Sau di's ndac che'n xud Sau, co' nee di's, li ley' Diox famil Isaac por cón che'n Sau, Diox mcà di's no mchep di's Diox loo co' mbly'a's Sau. Mastale' mdub yo'f no mingo'r yen Sau, tant mbín' Sau, tant ngulàa yéc ngulàa lezo' Sau, per ya ne'nglide Sau gan ngàc con' ndac loo Sau por con' ye'rsin' co' mbli Sau.

<sup>18</sup> Tac inacte gu' xal mèn naciòn Israel co' mque tee loo Diox loo yii Sinaí co'te' ngos quì no bèel, co'te' mdoo bèel loo yii axta plòthe, co'te' ngulàa yál'cuau no co'te' mxyo'f mbiidó'. <sup>19</sup> Ne'ngònte gu' thib ruid che'n thib trompet co' mbyèn. Ne' ne' ngòn gu' di's co'se' mdoodi's merpe' Diox con mèn naciòn Israel. Làth xtau'a, mèn naciòn Israel mna'b loo Diox ya ne'tolode tyoodi's no Diox mènà. <sup>20</sup> Mèn naciòn Israela ne'ngxecte par tolo ñii Diox loo mènà cón che'n con' co' mnibe' Diox loo mènà, tant mzyeb mènà. Tac Diox mnibe' loo mènà: Chele' chol má' co' ngue no mènà ya zib loo yii Sinaí, nquin gaa'd quèe mèn naciòn Israel má'a axta guth mèn má'a. <sup>21</sup> Per, lícpe' ba'i, con' co' mbyú' loo loo mèn naciòn Israela ngòc thib con' naze'f tín' axta leque yub Moisés ndxab: ¿Cón co' ba', yòo?, tant mzyeb Moisés no mxi'th Moisés gunèe Moisesa. Thiba con'a.

<sup>22</sup> Le' tediba na, ale ndxe'leque', gu' nzo gaxle' loo yii Sion, co' nee di's, tetac na' le' yii Siona nac ciuda che'npe' Diox, Diox co' nac thidte Diox co' naban. Cona nee di's, ngòo na' loo cón che'npe' Diox. Cón che'n di'sa nac ciuda Jerusalén cub co' nac ciuda che'npe' Diox co' nzo loo bé'. No ryethe angl co' nzo loo bé' co' yende mod lab mèn nac che'npe' na', ne, tac ngòo na' loo cón che'n thidte Diox co' naban. <sup>23</sup> Co'se' ngòo na' loo cón che'n Diox, nqueltàa no na' mèn co' ner ngola's co' nac xal hues ndlyo' na'. Lèe mènà ndub loo libr co' ndub loo bé'. No lícque' naca ngòo na' loo Diox co' tub rez cón che'n ryethe mèn. No ngòo nole' na' rye xpìi mèn nali no mèn nambii co' mtembii Diox no co' mteli Diox. <sup>24</sup> No ngòo na' loo cón che'n Jesús co' nteri'th di's che'n mèn loo Diox por cón che'n conveñ cub. Cón che'n con'a ngòc loo Jesús co'se' mxyo ren Jesús loo cruz. No ndlu' con'a loo na' cón nac más con' ndac leque co'se' mxyo ren che'n Abel.

<sup>25</sup> ¡Anderhuen gu'! Ne'chep di'ste gu' di's che'n Diox co' gunii Diox loo gu'. Tac chele' mèn naciòn Israel co' mchep di's loo Diox ne'nglá'de loo con' ryes co'se' mdoodi's no Diox mèn co'te' ngòc loo yii Sinaí, le' sya, masre' con' tyactii na' par ne'lyá'de na' loo con' ryes chele' na' tè'b no chele' na' chep di's di's che'n Jesús co' nco'x no co' ngue go xo'f di's loo na' loo bé'. <sup>26</sup> Tiemp co'se' mdoodi's Diox loo mèn naciòn Israel loo yii Sinaí, ante mdoodi's Diox, mbuin izlyo'. Per tedib lugar mde'th Diox no mcàbgòn Diox thib con' loo mèn. Ndxab Diox: Tedibte vez cuinen izlyo' no iante izlyo'de cuinen. Ndx'e'leque', cuinen bé', ne. <sup>27</sup> Per co'se' ndxab Diox: Tedibte vez cuinen izlyo' no bé', cona nee di's, mblo ro Diox teche Diox ryete con' co' ngüin, co' nac con' mblec Diox no mxèn' Diox par yan' con' co' nac nèe co' ne'huinte thidtene. <sup>28</sup> Por cona, gab na': Diox quix U', Diox, loo Diox tac ngòole' na' loo con che'n Diox par ñibe' Diox loo na'. Mod co' ñibe' Diox loo na'

ne'huinte no ne'zye'de thidtene. Por cona, ndyac lezo' na'. No li na' sirv loo Diox no li na' cas loo Diox con dib nzo yéc no con dib nzo lezo' na' xal ndxòo lezo' Diox. <sup>29</sup> Tac Diox na', licque', nac thib quìi no bèel co' ntec no co' ntelux con'.

## 13

*Trè' ndlu' xá mod li mèn par li mèn con' co' yòo lezo' Diox.*

<sup>1</sup> Lomisque' niin loo gu', ne: Toloque' fque'que' lezo' gu' ñèe gu' thib hues xtàa gu' no tedib hues xtàa gu' xal thib huespe' gu'. <sup>2</sup> Tedib con', ne: Fte' lezo' gu'. Ne'yathla'ste gu' ta' gu' posad loo mèn tith co' nde na'b posad loo gu' par cued mèn liz gu'. Pues chele' gu' ta' posad loo mèn par cued mèn liz gu', nzoque' mod gàca loo gu' xal ndxàca loo ndxep mèn co' ne'ta'de cuent le' mènà ngue ta' posad loo angl, ne.

<sup>3</sup> Fte' lezo' gu' cón che'n prob mèn co' ngue lezi'f. No bli gu' cuent no gu' nac mèn co' ngue lezi'f con mènà. Bli gu' xtùuz cón che'n ryethe con' co' ndyactii chol mèn por cón che'n Jesucrist no fte' lezo' gu' le' gu', ne, ngue no bél'yòo lad gu' co' tyactii chele' mèn tetii gu'.

<sup>4</sup> Leque gu' bli cas gu' no bnibe' gu' loo taamas mèn le' taamas mèn li cas loo yalnibe' co' ñibe' Diox loo mèn co'se' nselya' mèn. No bnibe' gu' le' mèn co' mselya'a ne'quith node mènà yalnibe' co' mnibe' Diox loo mènà, co' nee di's, ne'chi'xte mènà yéc xin' sa'l tedib mèn par gac mènà xtoo mèn. Tac Diox tub rez loo chol mèn co' nchi'x yéc xin' sa'l tedib mèn par gac mènà xtoo mèn. No tub rez Diox loo chol mèn co' cua'n xin' huan mèn.

<sup>5</sup> Ne'gàcte gu' mèn co' arid ndxath nquìi ñèe tmi. Ndxè'leque', ftac lezo' gu' no blec lezo' gu' loo con' co' ngue note gu' tac yub Diox gunii: Daa ngue tee noque' gu'. No ne'lá'ya'den gu' thidtene. <sup>6</sup> Por cona, gab na' con dibaxla's:

Diox ngue que tee noque' daa. Por cona, inzyebte daa loo con' co' ndlya's mèn li no mèn daa.

<sup>7</sup> Fte' lezo' gu' cón che'n mèn co' ndyoo ner no co' ndyoo naa loo gu', mèn co' mde'th no co' gunii cón che'n xti's Diox loo gu'. Bli gu' xtùuz cón che'n xá mod nque tee ban ndac mènà loo Diox. Fque tee ban gu' xal nque tee ban mènà loo co' ngola's mènà loo Diox.

<sup>8</sup> Jesucrist thidtene ne'zye'de. Xalque' nac Jesucrist póla, tataaguè' nac Jesucrist nalle' no tataaguè' nac Jesucrist le'n tiemp co' nde nque. <sup>9</sup> Ne'ta'de gu' lugar co' xà' mèn xtùuz gu' no lezo' gu' loo cón che'n Crist Jesús por cón che'n xley' co' nac tedib xley' mènà. Tac más huen gàca loo mèn le' lezo' mènà no xtùuz mènà gac nèe loo mèn loo con' co' nac con' ndac co' angndli Crist loo na'. Ne'gàcte con' ndaca por cón che'n costumbr co' ngue no mèn loo con' ndxuhua mèn tac costumbra yende cón ntac loo mèn co' tolo ndyoo nque loo costumbra.

<sup>10</sup> Na' ngue no thib xa' co' xà'le' ngòc yaltii loo xal thib má' co' mbeth mèn loo còo', co' nee di's, nac Crist Jesús. No mèn co' be' ngue no costumbr co' be' ndli sirv loo tabernaculogool, mènà indxàpte permis hua con' co' nzi'f loo còo'a, co' nee di's, yende mod yòo mènà loo cón che'n Crist. <sup>11</sup> Co'se' ngòc tiemp che'n tabernaculogoola, ante ren che'n má' co' ndxuth mèn, ndxòo no nguley' roo nguley' xèn rena le'n ryop le'n tabernáculo par ndlu' nguley' roo nguley' xèna rena loo Diox par teri'th tecan' Diox cón che'n xtol mèn nación Israel. Le' bél' má' co' ndxuth mènà na, nda tec mèn bél'a thib lad co'te' ndub campament co'te' nzo ban mènà. <sup>12</sup> Por cona, lomisque' mod ngòca loo Jesús, ne, mxactii Jesús. Mbe' mèn Jesús thib lad ro ciuda Jerusalén par ngue yuth mèn Jesús par tataa mod mteche Jesús mèn co' ngòc che'npe' Diox loo cón che'n xab izlyo' por cón che'n renpe' Jesús. <sup>13</sup> Na', ne, negadi's yòo na' loo cón che'n Jesús xal ngòca loo Jesús co'se' mbe' mèn Jesús thib lad ro ciuda Jerusalén, co' nee di's, ryo xà' na' loo costumbr co' ngue no xtàa na' par xec yèe na' loo yalnathon no loo yaltii co' ndxàc loo na' por cón che'n Jesús xal ngòca loo Jesús chele' na' tyactii tataa. <sup>14</sup> Tac ingue node na' thib ciuda co'te' yòo na' thidtene trè' loo izlyo' ndxè'. Per nzi quee lezo' na' cón che'n thib ciuda co'te' yòo ban na' thidtene yiloa le'n tiemp co' yi'th nque. <sup>15</sup> Por cona, por

cón che'n Jesús ndxàal lu' na' na' loo Diox xal mbli mèn co' mdix cón che'n xtol loo Diox, co' nee di's, gab na' di's roo di's xèn cón che'n Diox loo Diox no li na' par xyo'f lèe xyo'f xti's Diox. <sup>16</sup> Ne'yathla'ste gu', tá, par tolo li gu' con' ndac loo xtàa gu' no ta' gu' ya' gu' loo xtàa gu' co'se' nquin xtàa gu' gu' no blyath no gu' xtàa gu' co'se' naquin xtàa gu' gu' no co'se' nde che con' loo xtàa gu' tac co'se' ndli gu' rye con'a, anze'f ndxòo lezo' Diox ñèe Diox gu'.

<sup>17</sup> Ftubdi's gu' loo mèn co' ndyoo ner no loo mèn co' ndyoo naa loo gu' no gòc gu' mèn nado' loo mèn. Diox mxo'f zin' loo mèn par lu' mèn loo gu' cón che'n Diox. Nda' mèn cuent loo Diox, ne, xá mod mxo'f zin' mèn con' ngue lu' mèn loo gu'. Bli gu' co' ñibe' mèn par tyac lezo' mèn cón che'n gu'. Tataa mod ne'xide lezo' mèn. Tataa mod gac con' ndac loo gu', ne.

<sup>18</sup> Gurez gu' Diox por nu' tac nu' nden' lezo' le' nu' ndxàp xtùuz ndac no xtùuz nalì loo cón che'n Diox. No ndlya's nu' que tee ban ndac nu' loo ryethe con' ndac. <sup>19</sup> Por cona, por fuerz tolo ña'ben loo gu' tolo cues gu' Diox por daa par gàca loon, chàa, gal neen máa gu' par nedrè' tedib vez.

*Trè' ngue na'b mbi' co' mque' ye's ndxè' loo Diox li Diox gac con' ndac loo mèn. No ngue nii mbi' Diox con taamas mèn co' nzo no mbi' loo mèn.*

<sup>20</sup> Diox ndli par nagàl yo lezo' mèn loo Diox. Diox ndli par cue mèn rye nda mèn no rye ndye'th mèn làth xtàa mèn, ne. Tad Jesucrist nac xa' roo xa' xèn. Nquenap Tad Jesucrist mèn co' nac mèn co' ndxela's loo Tad Jesucrist xal thib mbi' co' nquenap no nqueno mbacxil'. Diox mblo xban Tad Jesucrist na' làth mèn nguth. Por cón che'n ren Tad Jesucrist co' mxyo par mbyan' nèe thib conveñ cub thidtene, <sup>21</sup> ndlyazen le' Diox li' le' gu' gac mèn nalì no mèn nambii par tataa mod li gu' co' nee lezo' Diox. No ndlyazen le' gu' li ryethe con' co' ndxòo lezo' Diox loo Diox por cón che'n Tad Jesucrist. No ndlyazen gac con' roo con' xèn loo Tad Jesucrist le'n lín' co' ntlo, no le'n lín' co' ndxelo, no le'n lín' co' ne'lith node. Tataaque' gàca.

<sup>22</sup> Per daa ña'b loo gu', mèn huesen por cón che'n Crist, le' gu' xec yèe loo di's co' mco'xen loo gu' ndxè' tac ndxepete di's nac di's co' mque'en ye's loo gu', ndyaquen. <sup>23</sup> Trè' ngue tel'en di's cón che'n hues na', Timote, loo gu' le' mèn co' ngòc ngolo ngola's mblá'le' Timote. Chele' Timote, chàa, yi'th nee máa daa, sya, yi'th ryop nu' Timote co'se' gal neen máa gu' par nedrè'.

<sup>24</sup> Gunii gu' Diox loo ryete mèn co' ndyoo ner loo gu' no co' ndyoo naa loo gu'. Gunii gu' Diox loo ryete mèn co' mblo' xà' Diox loo cón che'n xab izlyo' par ngòc mèn mèn che'npe' Diox. Mèn co' nac mèn che'n nación Italia ngue nii Diox loo gu' trè', ne.

<sup>25</sup> Ndlyazen le' Diox li anggac rye loothe con' ndac loo ryete gu' par nedrè'. Taandxè' gàca loo gu', ndee gu'.



## Cart Co' Mque' Santiau Ye's Loo Mèn

*Cart co' mque' Santiau ye's loo mèn co' ngola's loo cón che'n Crist, mèn co' mque tee re's pál.*

<sup>1</sup> Daa co' lèe Santiau, nac daa mbi' co' nxo'f zin' zin' che'n Diox. No nac daa mbi' co' nxo'f zin' zin' cón che'n Tad Jesucrist. Daa ngue nii Diox loo gu' co' nac mèn che'n si' fchop ned mèn co' nac mèn nación Israel co' nzi tee re's dib athu loo izlyo' le'n rye nación.

*Trè' ndlu' ryethe con' ndxác Diox par li Diox anggàc con' ndac loo mèn.*

<sup>2</sup> Gu' co' nac mèn huesen por cón che'n Jesucrist, ndxàal tyac lezo' gu' co'se' ndxác chol yalndyub ngu's no chol yaltii loo gu'. <sup>3</sup> Tac gu' nonque' no naneeque' gu' co'se' ndxela's mèn no ndxàp mèn yalxla's loo Diox no loo cón che'n Diox, látha ndxác chol yaltii loo gu' par ndxác preb gu' par ñee Diox ñeene' ché' tyubdi's gu' loo Diox. Le' sya, tataa mod té'th gu' par gác gu' mèn co' ncha'la's no mèn co' nxec yèe yilo riid ryethe con'a loo gu'. <sup>4</sup> Ne'sode gu' yéc gu' setilte. Ne' ne' ta' gu' lugar lyàa xyàn lezo' gu' setilte. Ndxé'leque', tolo gác gu' mèn co' ncha'la's axta gàca loo gu', lïcque', nac gu' mèn ndac loo Diox co' mté'th, no co' mda' cuent, no co' ndyubdi's ndac loo cón che'n Diox.

<sup>5</sup> Chele' chó gu' nden' ne'gácte gu' li gu' con' ndac loo co' nac cón che'n Diox, gurez gu' Diox no bna'b gu' i loo Diox. Le' sya, Diox li par gác gu' li gu' con' ndac co' ndlya's gu'. No co'se' Diox li par gác gu' li gu' con' ndaca, ne'líde Diox con'a xal mèn co' pente nda' ndxep con' loo xtàa mèn. No ne'líde Diox loo gu' xal mèn co' asendli mbez nguix con' loo xtàa mèn. <sup>6</sup> Per chele' gu' ña'b no cues gu' chol con' loo Diox par gàca loo gu', naquinque' yila's gu' loo Diox no gáp gu' yalxla's loo Diox le' Diox li par gàca loo gu'. No ne'gànte lezo' gu' le' Diox ne'líde nec thib con' co' ña'b gu' loo Diox. Diox lique' par gàca loo gu'. Tac mèn co' ngàn lezo' no co' ndxác chop lezo' loo cón che'n Diox, xtùuz mènà nac xal ol che'n nítto' co' nxít too mbii thib lad tedib lad loo nítto', co' nee di's, indli nèede mèn xtùuz mèn no lezo' mèn loo cón che'n Diox. <sup>7</sup> Mèn co' tataa nac xtùuz loo cón che'n Diox, indxàalte li mènà xtùuz le' Tad Diox li par gác chol con' ndac loo mènà tac Diox ne'líde con'a loo mènà. <sup>8</sup> Tac thib mbi' co' thidtene imbe see teede lezo' no indlecte lezo' mbi' cón li mbi', no axta ne'ñeede mbi' cón li mbi' thib huiz no tedib huiz, mbi'a yende mod li nèe lezo' mbi' no xtùuz mbi' cón che'n con' li mbi' thib huiz no tedib huiz.

<sup>9</sup> Le' mèn hues na' co' nac mèn prob no co' iñaade nac mèn roo mèn xèn, ndxàal tyac lezo' mènà tac Diox ngo cuent nac mènà mèn co' más ntac loo Diox. No nac mènà mèn roo mèn xèn loo Diox por cón che'n Jesucrist. <sup>10</sup> Le' mèn hues na' co' nac mèn ric na, ndxàal ten' mènà ndxàal tyac lezo' mènà tac yende cón ntac mènà loo Diox por nac mènà mèn ric. Tac yalgon' co' ndxàp mèn ric nac xal ye' huan co' ne'xecte nen tiemp. <sup>11</sup> Tac co'se' ndlyen huiz no anze'f ntec nso' huiz loo izlyo', le' sya, tataa mod mbiiz huan. Le' ye' co' nzo'f loo huana na, ndxà'b. Tataa mod ndlyux ye' huan co'se' ndxelo nabe's ñaa ye' huan nxyo'f ye' huan. Tataa ndxàca loo mèn ric, ne, co'se' xèegà xèegà ndlyux rsin' mèn ric co' nac delgens co' ndli mèn ric.

*Trè' ndlu' cón che'n cón li mèn co'se' coby'a' Mebizya mèn.*

<sup>12</sup> Huen nda mèn co' nxec no mèn co' ncha'la's co'se' ndxác yalndyub ngu's no yaltii loo mèn. Diox ndxòo lezo' con' ndac co' ndli mènà. No li Diox thib con' ndac loo mènà xalque' mcàbgòn Diox li Diox loo mènà par yòo ban noque' mènà Diox thidtene, mèn co', lïcque', nque' lezo' Diox. <sup>13</sup> Co'se' chol mèn lya's aseli mèn con' ye'rsin', indxàalte li mènà xtùuz le' Diox asendli par li mènà con' ye'rsin'a. Yende xàa. Tac por part che'n Diox, yende chó thib con' nzo co' ndli par li Diox con' ye'rsin'. Ne' ne' aseli Diox par li chol mèn con' ye'rsin'. <sup>14</sup> Ndxé'leque', co'se' mbee ncà con' ye'rsin' mèn par cua'n mèn xquin mèn no xtol mèn xal ndryo' ndlyen' lezo'pe' mèn no xal ndyub yo'f lezo' mèn par li mèn con' ye'rsin', hora nac hor co'se' li mèn con' ye'rsin'. <sup>15</sup> Le' sya, ryete con' ye'rsin' co' ndryo' ndlyen' le'n lezo' mèn par li mèn, con'a ncàb xquin mèn no xtol mèn co' ndli

mèn. No chele' mèn tolo cua'n xquin mèn no xtol mèn, le' sya, tataa mod càba loo mènà par ndryo xà' mèn thib lad loo Diox thidtene co'se' ndxelo tub rez Diox cón che'n mènà.

<sup>16</sup> Mèn huesen co' nque' lezon ñèen, gu' co' ngòole' loo cón che'n Crist, nee gu' nee gu'. Chele' gu' li xal ndli mènà, sya, tataa mod quedii gu' leque gu'. <sup>17</sup> Gu' naneeque' le' ryethe con' co' nac con' ndac co' angndxàc loo na', Diox ndlii par angndxàca loo na'. Diox co' mbli ngòcsua' huiz no mbe' no mbyáz co' nac xnii bé', Diox thidtene ne'zye'de. Ne' ne' se' Diox mod co' ndli Diox con' loo mèn no mod co' ndxàp Diox loo mèn. <sup>18</sup> Diox mda' lugar yòo ban no na' Diox thidtene por cón che'n xti's Diox co' nac di's ndac co' nac licpe' par gac na' nerleque' mèn co' yòo loo cón che'n Diox, co' gac huax mèn co' yòo ban no Diox thidtene yiloo. Tataa ndxàca tac tataa mblya's Diox no ngro' mblyen' lezo' Diox li Diox con'a.

*Trè' ndlu' cón ndli mèn, mèn co', licque', ndxela's loo cón che'n Jesucrist.*

<sup>19</sup> Por cona, mèn huesen por cón che'n Jesucrist, gu' co' anze'f nque' lezon ñèen, ngue niin loo gu': Nalas gure thib thib gu'. No lijer gure gu' par gòn gu' di's no par ta' gu' cuent co' huenleque' co'se' ndyoodi's no mèn gu'. Per ne'gàcte gu' mèn co' ndli cuent anze'f ndxác. Ne' ne' gac gu' mèn co' ngol' di's. Ne' ne' gac gu' mèn co' setilte nso' yéc par yecloo gu' con mèn cón che'n chol con'. <sup>20</sup> Tac mèn co' setilte ndxác nayi' no mèn co' setilte nso' yéc, mènà thidtene indlide con' co' ndxòo lezo' Diox. <sup>21</sup> Cona, ngue niin loo gu': Thidteneque' ne'tolode li gu' chol con' zab. Ne' ne' li gu' chol con' ye'rsin' co' más ndxòo lezo' mèn li mèn loo izlyo' ndxè'. Ndlyazen nado' di's nado' cuent ta' gu' lugar gòn gu' di's par tyubdi's gu' loo di's co' mbìnle' gu' no co' nguaa'dle' le'n lezo' gu'. Tac di's co' mbìn gu'a, cón che'n di'sa nac co' ndlu' xá mod ndlyá' alm mèn loo con' ryes co'se' ndxela's mèn cón che'n di'sa.

<sup>22</sup> Per ndlyazen bli gu' xal ndlu' dis co' nac di's ndac ndxè'. Indlyasten ante gòn gu' cón che'n di's ndac ndxè'. Tac chele' gu' ante ndxòn cón che'n di's ndac ndxè', no indlide gu' no indyubdi'ste gu' xal mbez di's ndac ndxè', le' sya, leque gu' nquedii gu'. <sup>23</sup> Tac mèn co' ante ndxòn di's ndac no indyubdi'ste mènà xal mbez di'sa, mènà nac xal thib mbi' co' ngüi' loo loo thib spej. <sup>24</sup> Ngüi' mbi'a loo spej xá ñaa mbi'. No ndxelo ngüi' mbi' loo spej xá ñaa mbi', ale setilte ndxathla's mbi' xá ñaa mbi'. <sup>25</sup> Loo libr co' nac xti's Diox ndub di's co' ndlu' le' Diox mnibe' loo mèn par li mèn con' ndac. Con' co' ñibe' Diox loo mèn por cón che'n di's ndac ndli par yende chó cuee ca' loo mèn loo cón che'n Diox. Mèn co' thidtene indxathla'ste con' co' ndxòn mèn cón che'n di's ndac, no mèn co' thidteneque' ndli nèe mèn par li mènà xal ñibe' Diox por cón che'n di's co' nac xti's Diox loo mèn par li mèn, huen nda mènà loo ryethe con' ndli mènà.

<sup>26</sup> Chele' chol mèn ndli xtùuz no nden' mèn ndli mèn cas loo Diox no ne'gàcte mèn tecue'd mèn looz mèn no cued yau' ro mèn co' nque di's mèn con xtàa mèn, le' sya, leque mènà nquedii mènà. Sya, tataa mod ndlu' mènà indlide mènà cas loo Diox. <sup>27</sup> Ngue niin loo gu': Le' mèn co' Diox mbez nac mèn co', licque', ndli cas loo Diox xud na' no co' ndli co' ndxòo lezo' Diox, mènà ndli xal ngue niin loo gu' ndxè': Ndlyath no mèn myen' ftyà'f, no xa'got viud, thib mod tedib mod co'se' nxi lezo' mènà loo chol yaltii co' ndxác loo mènà. No ne'lidle mèn co', licque', ndli cas loo Diox nec thib con' ye'rsin' co' nac cón che'n xab izlyo'.

## 2

*Trè' ndlu' indxàalte más li mèn cas loo thib xtàa mèn leque loo tedib xtàa mèn par más tyu' mèn loo thib xtàa mèn leque tedib xtàa mèn.*

<sup>1</sup> Mèn huesen, gu' co' ndxela's loo Tad Jesucrist na' co' nac Tad roo no Tad xèn, ndlyazen ne'gàcte gu' mèn co' más ndli cas thib mèn no co' más ndli ndyu' thib mèn loo tedib mèn làth gu'. <sup>2</sup> Angab na'i, chele' thib mbi' co' nzo thib ani or cuen ya' no noc xab mbi' lar' huen, yòo mbi' làth gu' co'se' nqueltàa gu' loo servis, no yòo thib mbi' prob ladyox no ladre' mbe'th làth gu' leque tiempa, <sup>3</sup> no más ngue li gu' par ndyu' mbi' co' noc xab lar' huena, no más ngue li gu' cas mbi' no gab gu' loo mbi': Ftub trè' co'te' más huen

nac ndxè'. No ndxe'leque', gab gu' loo prob mbi' ladyoxa: Le' lùu na, huàa too xquin ba'. O tua'te ftub loo yòo. <sup>4</sup> Le' sya, tataa mod leque gu' ndli par más ndyu' thib mèn leque tedib mèn làth gu'. No leque gu' ndlu' ndxàp gu' thib mod ye'rsin' co'se' más ndli gu' ndyu' thib mèn loo tedib mèn làth gu'.

<sup>5</sup> Mèn huesen por cón che'n Jesucrist, gu' co' anze'f nque' lezon ñèen, bìn gu' di's co' nde niin loo gu' ndxè': Diox mcui mèn prob co' nac mèn ladyox loo izlyo' ndxè' par yila's mèna loo cón che'n Diox no par gáp mèna yalxla's loo Diox no loo cón che'n Diox par tataa mod ñibe'pe' Diox loo mèna xal mcàbgòn Diox loo mèn li Diox loo men, mèn co' nque' lezo' Diox no co' ndxàp yalxla's loo Diox. <sup>6</sup> Per ndxe'leque', ale le'le' ntethon gu' mèn prob ladyox. ¿Ché' ndyac gu' inacte mèn rica mèn co' ndxan' bien con gu' no ndli mèna provech gu'; no ndxe' mèn rica gu' loo mèn nac zin' yòolau par tyub rez cón che'n gu' loo mèn nac zin' yòolau, cà'? Yende xàa. Nacque' mèn rica mèn co' ndli tataa, ¿lé'? <sup>7</sup> ¿Ché' ndyac gu' inacte mèn rica mèn co' más ñii yèe ñii tii cón che'n lèe Crist, Crist co' nac xa' roo xa' xèn? No por cón che'n Crist, mdub lèe mèn gu' mèn co' ngòole' loo cón che'n Crist no nac gu' che'npe' Crist.

<sup>8</sup> Chele' gu', lïcque', ndyubdi's loo di's co' nac thib yalnibe' más con' roo con' xèn co' mtan' Tad Diox di's loo na' xal mbez di's co' ndub loo libr co' nac xti's Diox co' mbez: Fque' lezo' gu' gunèe gu' mèn co' ndxàc hues xtàa gu' xalque' ngue lezo' gu' ñèe gu' gu'. Chele' gu' tataa ngue li, ngue li gu' con' ndac. <sup>9</sup> Per chele' gu' más ndli par ndyu' thib mèn loo tedib mèn no chele' gu' más ndli cas loo thib mèn leque tedib mèn, sya, ngue cua'nque' gu' xquin gu' no ndxàp gu' dol loo Tad Diox co' mtan' di's loo mèn par li mèn xal mnibe' Diox loo mèn. <sup>10</sup> Chele' chol gu' nzo co' mbez ndyubdi's gu' loo ryethe con' mnibe' Tad Diox loo na' par li na' no indlide gu' thib con' co' mnibe' Tad Diox loo na' par li na'i, ncàba loo gu' le' Diox ngo cuent indyubdi'ste gu' loo nec thib con' mnibe' Tad Diox loo na' par li na'i. <sup>11</sup> Tac leque yub Diox co' mnibe' loo mèn: Ne'lìde gu' yalburrid, leque yub Diox mnibe' loo mèn, ne: Ne'guthte gu' mèn. No por cona, chele' mèn indlide yalburrid per ndxuth mèn xtàa mèn, Diox ngo cuent le' mèna ya indyubdi'ste loo nec thib con' co' mnibe' Diox loo mèn par li mèn. <sup>12</sup> Ndxàal nabe'ste tyoodi's gu' no nabe'ste gòp gu' mod par que tee ban ndac gu' loo izlyo'. Fte' lezo' gu' le' Diox tub rez cón che'n na' xalque' mnibe' Diox loo na' par tyubdi's na' loo Diox. Con' co' mnibe' Diox loo na' par li na' ncàb loo na' yende chó cuee cà' na' loo cón che'n Diox. <sup>13</sup> Mèn co' indlyatte lezo' ñèe hues xtàa mèn, lomisque' ne, Diox ne'lyatte lezo' ñèe Diox mèna co'se' tub rez Diox cón che'n mèna. Per mèn co' ndlyatque' lezo' ñèe hues xtàa mèn, mèna yan' bien no gác con' ndac loo mèna co'se' gác hor tub rez Diox cón che'n mèn loo mèna.

*Trè' ndlu' cón che'n chop ned mèn. Thib ned mèn alithe mbez ndxela's mèn loo Diox per indyubdi'ste mèn no indlide mèn con' co' ñibe' Diox loo mèn li mèn. Tedib ned mèn imbezte ndxela's mèna arid loo Diox per ndlique' mèna xalque' ñibe' Diox loo mèn par li mèn.*

<sup>14</sup> Mèn co' nac mèn huesen por cón che'n Tad Jesucrist, nde niin thib con' loo gu': ¿Ché' ndli gu' cuent con' ndac ngue li mèn loo Diox chele' mèna mbez ndxela's mèna loo Diox no yende chó con' ndac ngue li mèna loo hues xtàa mèna, cà'? Yende xàa. Ingode Diox cuent con' ndac nac co' ngue li mèna tataa. ¿Xá nee gu'? ¿Ché' ndyac gu' ante por mbez mèna ndxela's mèna no indlide mèna con' ndac loo hues xtàa mèna lyá' mèna loo con' ryes, cà'? Yende xàa. Pà gàca tataa. <sup>15</sup> Angab na'i, chele' thib xa'bi' o thib xa'got co' ndxàc hues xtàa na' ndyac yende xab xa' par goc xa', no lomisque', ndyac xa' yende con' hua xa' no yende con' naquin xa' co'se' nac huiz co' naquinpe' xa' con'a, <sup>16</sup> no chele' thib gu' gab loo mèna: Fxen ned. Byàa, ndee. Diox lyath nol ned ndal par zyal co' hual no zyal thib le' lar' par tau'l ladl. Chele' gu' tataa li no ne'ta'de gu' con' nquin mèna, ¿ché' ndyac gu' ngue li gu' con' ndac, cà'? Yende xàa. Diox ingode cuent ngue li gu' con' ndac co'se' ngue li gu' tataa. <sup>17</sup> Tataa ndxàca loo mèn co' alithe mbez ndxela's mèna loo Diox. Diox ingode cuent, lïcque', ndxela's mèn loo Diox co'se' alithe mbez mèn ndxela's mèn loo Diox no indlide mèna con' ndac loo hues xtàa mèn co' naquin con'.

<sup>18</sup> Per peser nzo ndxep mèn co' gab loo xtàa: Lùu mbez le' lùu ndxela's loo Diox. Per nalle' ndlyazen blu' loon xá mod non taamas mèn le' lùu ndxela's loo Diox co'se' yende chó con' ndac ndlil loo mèn co' ndxàc hues xtàal. Yende mod lila, ¿lé'? Part cón chenen, ndyaquen le' daa, ne, ndxela's loo Diox. Per ndxe'leque', daa lu' lool le' daa, licque', ndxela's loo Diox por con' ndac co' ndlin loo mèn co' ndxàc hues xtàa daa co' naquin con'. <sup>19</sup> Mbezl ndxela'sl nzo thidte Diox no maste. No huenque' ndlil co'se' tataa mbezl. Per ¿ché' ndyacl por ante mbezl ndxela'sque'l, lyá'l loo con' ryes, cà'? Yende xàa. Tac meexù' ndxela's nzo thidte Diox, ne. No axta nxi'th meexù' tant nzyeb meexù' cón gac loo meexù' co'se' tub rez Diox cón che'n meexù' yiloo. <sup>20</sup> ¿Aa mèn naxèn! ¿Ché' inda'de gu' cuent no ché' tarte ñee gu' co'se' mbez mèn ndxela's mèn loo Diox no ingue lu'de mènna ngue li mènna con' ndac loo hues xtàa mèn, sya, mod co' ndxela's mènna loo Diox ingode Diox cuent le' mènna ndxela's loo Diox? <sup>21</sup> ¿Ché' inda'de gu' cuent, ne, leque yub Diox mblo ro no mda' Diox cuent le' Abraham ngola's loo con' co' ndxab Diox loo Abraham? Por cona, mbe' Abraham Isaac co' ngòc xgan' Abraham par ya yuth Abraham Isaac xal co'se' ndxuth mèn thib má' loo Diox tiempa, cà'? <sup>22</sup> Gu' nonque' no nda'que' gu' cuent cón che'n con' nda li Abraham, tataa mod mblu' Abraham le' Abraham ngola'sque' di's co' ndxab Diox loo Abraham li Diox loo Abraham. No tataa mod Abraham mbli nèe lezo' Abraham loo Diox xal ngòc di's co' ndxab Diox loo Abraham par li Abraham con' mnibe' Diox loo Abraham li Abraham. <sup>23</sup> No por con' co' mbli Abrahama, ngòcque' no mdyaaque' no mdubque' di's co' ndub loo libr co' nac xti's Diox co' mbez: Abraham ngola's di's co' ndxab Diox loo Abraham li Diox. Le' Diox na, mbloque' cuent con' co' mbli Abrahama mblu' le' Abraham ngola'sque' loo Diox. Tataa mod mdyal Diox ngòc Abraham loo cón che'n Diox. Ngoloa, leque yub Diox mblo ro ngòc Abraham amiu che'n Diox.

<sup>24</sup> Cona, ngue niin loo gu': Diox ngoque' cuent no ndyalque' Diox yòo mèn loo cón che'n Diox por cón che'n con' co' ndlu' le' mènna ndxela'sque' loo Diox. Ingode Diox cuent, licque', ndxela's mèn loo Diox por ante mbez mèn ndxela's mèn loo Diox. <sup>25</sup> Lomisque', ngòc loo thib xa'got co' ngro' lèe Rahab co' ngòc thib xa'got burrid ndoore'. Por mda' Rahab posad loo mèn co' mtel' Josué, co' ngua ciuda co' ngòc làaz Rahab, no mblyath no Rahab mènna par ngro' mènna ciudaa tedib ned, Diox mdyal ngòc Rahab loo cón che'n Diox, ne, tac Rahab ngola's le' mènna mbi'th mandad che'npe' Diox. <sup>26</sup> Por cona, ngue niin loo gu': Co'se' ñèe gu' nax thib thebol non gu' por ngro xpìi thebol loo thebol, con'a nguth thebol. Lomisque' ne, mèn co' alithe mbez ndxela's mèn loo Diox no indlu'de mèn con' ndac co' ndli mèn loo hues xtàa mèn, inacte mènna mèn co', licque', ndxela's loo Diox.

### 3

#### *Trè' ndlu' cón che'n mod co' ndyoodi's mèn.*

<sup>1</sup> Mèn co' nac mèn huesen por cón che'n Jesucrist, indxàalte yo arid mèn co' mbez gu' nac maistr làth gu'. Tac gu' nanee no nda'que' gu' cuent le' na' co' ndlu' loo xtàa na' cón che'n Diox, más nayi' gac Diox loo na' co'se' tub rez Diox cón che'n na' loo na'. <sup>2</sup> Ryete na' ndxàp falt no ndxàp na' thib mod ye'rsin' loo huax con'. Chele' thib na' indxàpte falt no indxàpte na' mod ye'rsin' xal ndyoodi's na', le' sya, tataa ndlu' na' nac na' mèn nali no mèn nambii loo Diox. No na' co' tataa ndlia, ndxàp lezo' na' loo ryethe con' ndli na'. <sup>3</sup> Gu' nda'que' cuent co'se' ngòc na' fren ro thib huay, ngòc na' fren ro huay par tataa mod ndxàc nado' huay par sere seyeth mèn huay ned ndlya's mèn ya no mèn huay co'se' ndyub mèn huay. <sup>4</sup> Lomisque' ne, gu' nonque' no nda'que' gu' cuent xal ndli mèn zin' loo thib yòoyaa. Mastale' naroo yòoyaaa, le' mbii co' nxyo'f loo níttó' na, ntetee yòoyaa con fuerz co' ndxàp mbii. Lomisque' ne, ne' yòoyaa thib le' yaa co' lèe timón. Con yaaa no maste ntec pilot yòoyaa par ntetee pilot yòoyaa ned ndlya's pilot loo nít. <sup>5</sup> Tataa ndxàca loo mèn con thib le' bél' co' nac looz mèn. Gu' nonque' looz na' nac thib le' bél' lad na' co' iñaade arid naroo. Per nden' na', licque', anze'f con' roo no con' tín' ndxàc loo na'

por cón che'n looz na' co'se' ndyoodi's na' no co'se' nque di's na'. Nde niin thib con' loo gu': Gu' nda'que' cuent con thib le' quì co' nac thib yéc cerri chu'th no maste nxyon' bèel le'n yii le'n den ndxep vez.

<sup>6</sup> Mod co' ndyoodi's mèn ndlu' loo mèn le' xtùuz mèn no lezo' mèn nac xal thib quì no thib bèel co' ndli yalquì loo mèn. Por mod co' ndryo' ndlyen' lezo' mèn no xtùuz mèn ndyoodi's mèn ngòc nguàal con' par ndxàc huax yalquì loo mèn co', por derech, nteza' loo mèn. Tataa mod ndlu' mèn ñaaleque' loo mèn no ndxàca loo mèn le' ryethe con' co' nac con' ye'rsin' che'n ye'rbiil ngue ñibe' loo mèn co'se' ndyoodi's mèn ngòc nguàal di'sa. No co'se' tataa ndli mèn, ndoo lite ndxeza' mèn no ndlyux yalnaban mèn loo izlyo' ndxè'. <sup>7</sup> Ndxác mèn ndli mèn gan par ndxàc nado' rye loo má' xal mbee's, no xal mbin, mbel', no rye loo má' co' naban le'n nító'. Ndli mèn gan ndxàc nado' má'a loo mèn. <sup>8</sup> Per yende chó mèn co' thidte mènà gác li gan par gác nado' mèn loo mod co' ndyoodi's mèn loo xtàa mèn. No yende mod gáp lezo' mèn loo mod co' ndyoodi's mèn no loo mod co' nac mèn. Mod co' ndxàp mèn no mod co' ndryo' ndlyen' le'n lezo' mèn ndlu' loo mèn por mod co' ndyoodi's mèn yende mod leque mèn gáp lezo' mèn loo con' ndli mèn xtùuz par gác nado' mèn no par zye' mod co' ndxàp mèn. No con' co' ndryo' ndlyen' le'n lezo' mèn no le'n xtùuz mèn co' ndyoodi's mèn ndli par ndxeza' mèn no ndlyux mèn xal co'se' ndxuhua thib má' cuan' par gath má'. <sup>9</sup> Con looz na' co' tataa ndli ndyoodi's na', mbez na' le' Diox xud na' nac thib Diox roo no thib Diox xèn. No mbez na' le' Diox nac Diox natú'. No con leque looz na'a ñii yè ñii tii na'. No nquedèe na' mèn co' nac hues xtàa na', mèn co' nac xin no xnaa Diox co' yub Diox mtoxcua' xal nac Diox. <sup>10</sup> Ngue niin loo gu': Lìcque', con leque looz mèn co' mbez mèn le' Diox nac Diox roo Diox xèn no Diox natú', con leque looz mènà ñii yè ñii tii mèn no nquedèe mèn hues xtàa mèn. Mèn huesen por cón che'n Crist, por derech, indxàalte gàca tataa làth na'. <sup>11</sup> ¿Xá nee gu'? ¿Ché' nzo mod leque co'te' ndub zib nít co' ndxu mèn, leque tya lyen nít nala, ne, à'? Yende xàa. <sup>12</sup> Mèn huesen por cón che'n Crist, niin loo gu' tedib vez, ne: ¿Ché' nzo mod leque yaa ngudyuug co' nda' ngudyuug ta' yaa ngudyuug xlè co' lèe aceitun? Lomisque' ne, ¿ché' nzo mod ta' thib xan' lus uv co' nda' xlè uv xlè yaa ngudyuug, à'? Yende moda, ¿lé'? Lomisque' ne, ngue niin loo gu': Yende mod zib nít nazii co'te' ndub zib nít co' ndxu mèn, ¿lé'? Cona nee di's, mèn ye'rsin' ndli con' ye'rsin'. No mèn co' nac che'npe' Diox ndli con' ndac loo hues xtàa mèn.

*Trè' ndlu' co' nac lìcpe' co' ndxác mèn.*

<sup>13</sup> Chele' làth gu' nzo ndxep mèn co' ndli gu' cuent ndxác no co' ndli gu' cuent ndxaa'd di's, ndxàal lu' mènà con' co' ndxác mènà por mod co' nque tee ban ndac mènà no por mod co' nac mènà mèn nado' loo hues xtàa mèn. <sup>14</sup> Per chele' ndxep gu' ndxòo xyàn lezo' no ndxàn lezo' gu' ñèe gu' xtàa gu' no ndoo lezo' gu' li gu' con' par ante ñèe loon gu' que no gu' con', le' sya, chele' gu' tataa ngue li, indxàalte tye's gu' loo con' ndxác gu'. Tac con' ndxác gu'a, le'i ndli par leque gu' nquedi gu' no ncà gu' loo con' co' nac con' lìcpe'. <sup>15</sup> Tac con' co' ndli gu' cuent ndxác gu', inacte con' ngue lyath no Diox gu' par ndxác gu' li gu' tataa. Ndxè'leque', con' co' ndli gu' cuent ndxác gu'a nac con' co' alithe ndye'th xtùuz yéc mèn loo izlyo' ndxè'. No naca con' ndli yub Mebizya loo gu' par li gu' cuent ndxác gu'. <sup>16</sup> Tac co'te' nzo mèn co' ndxàn lezo' ñèe xtàa no co'te' nzo mèn co' ante ñèe loon que no mèn che'n mèn, tya mbe yoo mèn no ndxác rye loothe con' ye'rsin' làth mèn. <sup>17</sup> Men co' ndlyath no Diox par ndxác mènà, mènà indxòode lezo' loo chol con' ye'rsin' co' nac cón che'n xab izlyo'. Nac mènà mèn nado' co' mbe ban rye nda mèn no rye ndye'th mèn làth xtàa mèn. No ndoo lezo' mènà li mènà ante con' ndac. Mènà nac mèn co' indlide par más ndyu' thib xtàa mèn loo tedib xtàa mèn. Nac mènà mèn co' intembìide ro no co' intembìide xti's loo mèn. <sup>18</sup> Le' mèn co' ncu'a'n mod par tu' tàl mènà lezo' taamas mèn loo chol con' ye'rsin' na, gàca loo mènà nambii no nali que tee ban mènà loo Diox.



## 4

*Trè' ndlu' cón che'n mèn co' anze'f ndxò lezo' que tee ban loo cón che'n xab izlyo'.*

<sup>1</sup> Nde niin thib con' loo gu': ¿Pá ned nde di's no cuent no yalgyoo co' ndxàc làth gu' ba', à'? Na nii loo gu': Le'i nde no le'i ndxàc loo gu' por ryethe con' ye'rsin' co' ndryo' ndlyen' le'n lezo' gu' co' toloque' ndli nzi yoo gu' làth xtàa gu'. <sup>2</sup> Gu' ndlya's que no gu' ndxep con'. No co'se' yende mod que no gu'i, ndxàn lezo' gu' ñèe gu' xtàa gu' axta ndxuth gu' xtàa gu'. Ndxàn lezo' gu' ñèe gu' xtàa gu' por cón che'n con' co' ññaade arid ntac co' ngue no xtàa gu'. No co'se' yende mod que no gu'i, sya, ntlo gu', ncua'n gu' xó' no ngyoo gu' con xtàa gu'. Yende mod que no gu' co' ndlya's gu' que no gu' tac imbezte gu'i no ñña'bte gu'i loo Diox co'se' mbez gu' Diox. <sup>3</sup> Per mastale' ña'b gu'i loo Diox, Diox ne'lìde par que no gu'i. Tac co'se' ña'b gu' con' loo Diox, Diox nonle' xal nac xtùuz ye'rsin' co' ngue li gu' cón che'n con' ngue na'b gu' loo Diox. Ale ña'b gu' con' loo Diox ante par ta' gu' gust lezo' gu' no maste. <sup>4</sup> ¿Aa mèn co' ndlya's yòo loo cón che'n Diox no co' ndlya's que tee loo cón che'n xab izlyo' loo izlyo' leque tiemp! ¿Ché' ne'ta'de gu' cuent no ché' inonte gu' le' mèn co' más ndxò lezo' ndli co' nac cón che'n xab izlyo', mèn nac ngolo ngola's loo cón che'n Diox no loo Diox, à'? Aa. Tataaque' naca. Chol mèn co' más ndxò lezo' ndli con' co' nac cón che'n xab izlyo', licque', mèn ndxàc ngolo ngola's loo cón che'n Diox no loo Diox. <sup>5</sup> ¿Ché' ndyac gu' no ché' ndli gu' cuent angndub di's loo libr co' nac xti's Diox co' mbez:

Le' Xpii Natú' che'n Diox co' Diox mtel' par yòo Xpii Natú' loo na' par ban no Xpii Natú' na' por tant nque' lezo' Xpii Natú' na', indlá'de Xpii Natú' na' par li na' con' ye'rsin' par cua'n na' xquin na' no xtol na' loo Diox, cà'?

Tyè'. Inacte di'sa di's co' angndub loo libr co' nac xti's Diox. Lìcque' nac di'sa.

<sup>6</sup> Per ndxe'leque', Diox ndlyath no na' con con' ndac co' ndli Diox anggàc loo na'. Loo libr co' nac xti's Diox ndub di's co' mbez:

Le' Diox ndxecloo no ndxàc Diox ngolo ngola's loo mèn co' ndye's. Per ndlyath no Diox mèn co' nac mèn nado' con con' ndac co' nac che'n Diox co' ndli Diox angndxàc loo mèn.

<sup>7</sup> Fta' gu' lugar, tá, ftubdi's gu' loo ryethe con' co' ñibe' Diox loo gu' par li gu'i. Ne'ta'de gu' lugar ñibe' Mebizya loo gu' nec thib mod no nec tedib mod loo co' nac cón che'n Mebizya. Le' sya, tataa mod ne'bii gaxte Mebizya loo gu'. Lá' Mebizya gu' co'te' nziri' gu' loo Diox. <sup>8</sup> Ftolo gòo gu' loo cón che'n Diox par tolo ta' gu' cuent cón nac cón che'n Diox no par tolo li nèe gu' gu' loo cón che'n Diox. Chele' gu' tataa li, Diox altant tyoo par tolo li Diox anggàc más con' ndac loo gu'. Mèn co' ndxàp xtol, gòc gu' mèn co' lyàa yéc no co' lyàa lezo' loo Diox par yumbii xtùuz gu' no par yumbii lezo' gu' loo cón che'n Diox xal co'se' tech mèn ya' mèn par nambii yan' ya' mèn. Le' gu' co' nac chop loo chop la's co' lya's que' lezo' Diox no co' ndlya's leque tiemp li co' nac cón che'n xab izlyo' na, blàa yéc gu' no blàa lezo' gu' loo Diox par zye' mod co' ndxàp gu' ba' par thib líte yéc gu' no thib líte lezo' gu' yòo gu' loo cón che'n Diox. <sup>9</sup> Lomisque', ngue niin loo gu', ne, mèn co' ndxàp xtol no mèn co' nac chop loo chop la's loo cón che'n Diox: Fxi yéc gu' no fxi lezo' gu'. Bín' gu' no grozèe yath gu'. No ne'tolode ta' gu' gust lezo' gu' loo ryethe con' ye'rsin' co' ndli gu'. Lugar de xìis gu', más quee lezo' gu' bín' gu'. No lugar de nzo'f nde' nzo'f ndla' lezo' gu', más quee lezo' gu' bín' gu'. <sup>10</sup> Gòc gu' mèn co', licque', ngòc mèn nado' loo Diox. Le' Diox na, li gàc gu' mèn roo mèn xèn loo Diox yiloo.

*Mèn co' ndub rez cón che'n hues xtàa mèn.*

<sup>11</sup> Mèn huesen por cón che'n Jesucrist, ne'ñii yèede gu' no ne'ñii tìide gu' cón che'n thib hues xtàa gu' no cón che'n tedib hues xtàa gu'. Tac mèn co' ñii yèe ñii tìi cón che'n thib mèn co' ndxàc hues mèn por cón che'n Crist, o chele' mèn nii ngòc nguàal con' cón che'n mèn co' ndxàc hues xtàa mèn, mèn nxiis no di's co' nac yalnibe' co' nac más con' roo con' xèn co' mnibe' Tad loo na' par li na'. Le' sya, tataa mod ndub rez mèn cón che'n con' co' mnibe' Tad loo na' li na' par ñee mèn inquinte tyubdi's mèn xal mnibe' Tad loo mèn li mèn. No chele' gu' ndub rez cón che'n co' mnibe' Tad loo na' li na', le' sya, lugar

de tyubdi's gu' loo con' mnibe' Diox loo na' li na', ale ndxàc gu' mèn co' ndub rez cón che'n con' co' mnibe' Diox loo na' li na'. <sup>12</sup> Per nalle' ngue niin loo gu': Thidte xa' co' nac Diox nac xa' co' nzo co' ñibe' loo mèn loo izlyo' ndxè' par li mèn con' co' ñibe' thidte Diox. No lomisque' ne, leque yub xa' co' nac Diox co' ñibe' loo mèn, nac xa' co' ndub rez cón che'n mèn loo mèn. No leque Diox nac xa' co' ntelá' mèn loo con' ryes. No nac Diox xa' co' co' xà' mèn loo Diox thidtene yilo gath mèn. ¿Per gu', à'? ¿Cón nac gu' par ñii yèe gu' no ñii tii gu' ngòc nguàal con' cón che'n hues xtàa gu', à'? Yende cón nac gu' par li gu' tataa, ¿lé'?

*Yende chó mèn non cón gac loo mèn thib huiz no tedib huiz.*

<sup>13</sup> Nalle', bìn gu' tedib con' ngue niin loo gu': Gu' co' mbez: Yé' o huize' nda li na' delgens na' loo thib ciuda o chó cuida. Más huen ya na' no yo na' tya thib lín' par li na' delgens no li na' gan huax tmi. <sup>14</sup> No ne'ñeede gu' cón gac thib huiz tedib huiz. ¿Xá nee gu'? ¿Cón nac yalnaban mèn? Yalnaban mèn nac xal thib beu co' setilte ndxetoo. No yiloo, setilte ndyon' beu. <sup>15</sup> Con' co' más huen ndxàal gab gu' nac di's ndxè': Chele' Tad Diox ndlya's no chele' Tad Diox nee lezo', tolo ban na' taandxep tiemp. Sya, li na' thib con' no li na' tedib con' xal nee lezo' Tad Diox. <sup>16</sup> Per nalle', ale ndxe'leque', ale más ndyac lezo' gu' por gust co' nda' gu' lezo' gu', ndyoodi's gu' di's naxal' no di's nate's. No rye mod co' ndyoodi's gu'a nac con' ye'rsin'túb. <sup>17</sup> Mèn co' nanee no ndxác mèn li mèn con' ndac no indlide mèn con' ndaca, mèn ncu'a'n xquin mèn no ncu'a'n mèn xtól mèn loo Diox.

## 5

*Trè' ndlu' loo mèn ric xá mod ndxàal que tee ban mèn ric loo izlyo' ndxè'.*

<sup>1</sup> Bìn gu' di's co' nde niin loo gu' ndxè', mèn ric: Más quee lezo' gu' bín' gu' no grozèe yath gu' por yaltii no nesida co' gac loo gu' yiloo. <sup>2</sup> Ryete yalgon' co' ndxàp gu', le'i nzi yà'ble'. No ryete xab gu' co' ndxàp gu', le'i ngue yuhuale' mbèd. <sup>3</sup> Lomisque' ne, tmi or no tmi plat co' ndxàp gu', le'i ndoo quée beule'. No ngue yuhuale' yòoi. Lomisque' ne, xalque' nzi yiza' tmi or no tmi plat co' ndxàp gu', le'i ndlu' loo gu' co' gac loo gu'. No tiempa ten' gu' huax yalnè tìn' no anze'f xi lezo' gu' xal co'se' ntec nso' quìi bèel lad mèn. Tataa gaca loo gu' tac gu' mque no thib bàan yalgon' le'n tiemp co' nac lult tiemp ndxè'. <sup>4</sup> Centav co' mdix gu' loo mèn co' mque zin' co' mthop cosech gu', centav co' ne'nguixte gu' complet loo mèn, por centava no maste càba loo gu' le' Diox li tyactii gu' co'se' tub rez Diox cón che'n gu'. Lomisque' ne, Tad Diox, co' ñibe' loo ryethe angl co' nac solndad loo Tad Diox, mbìnque' di's co' mco ñee mèn co' mque rsin' gu' co' ne'nguixte gu' complet mcàa mèn co' mque rsin' gu'. <sup>5</sup> Loo izlyo' ndxè' anze'f mque tee ta' gu' gust lezo' gu' loo ryethe con' co' mque tee li gu'. Alithe mque tee yuhua gu' axtaque' mcha' gu' xal thib laa ngon co' ndoosua' par guth mèn ngon yiloo. <sup>6</sup> Mquexù' mque' fals gu' mèn no mbeth gu' mèn co' yende chó xquin ngòp mastale' mbral mèn par nglá' mèn la's ya' gu'. Per ne'ngacte ngli mèn gan nglá' mèn la's ya' gu'.

*Di's co' ndlu' cón che'n mèn co' ncha'la's loo mèn co' mbez Diox.*

<sup>7</sup> Cona, ngue niin loo gu' co' nac mèn huesen por cón che'n Crist: Fxec gu' no fcha'la's gu' axta co'se' zin huiz no zin ze co'se' yi'th Tad Jesucrist loo izlyo' tedib vez. Gu' nonque' le' mèn co' nque zin' loo xyòn mèn, mèn nxec no mbed no ncha'la's mèn no nzi quee lezo' mèn axta co'se' lyàa yuu ndlyo. No mbed mèn axta ri'th tiemp yuu co' nac yuu bluz par tlo thop mèn cosech co' anze'f ntac co' nac co' mbli mèn zin' loo xyòn mèn. <sup>8</sup> Ngue niin loo gu', ne: Fcha'la's gu' no ne'tyoo xà'de lezo' gu' por con' co' ndxàc loo gu' por cón che'n Diox tac huiz, co' gac huiz co'se' yi'th Tad Jesus loo izlyo' ndxè' tedib vez, nde zin' gaxle'. <sup>9</sup> Gu' co' nac mèn huesen por cón che'n Jesucrist, ne'co ñeede gu' cón che'n hues xtàa gu' par ne'tub rezte Diox cón che'n gu'. Jesucrist co' tub rez cón che'n ryethe mèn loo mèn, yamerle' yi'th Tad Jesucrist loo izlyo' ndxè' tedib vez. <sup>10</sup> Mèn huesen por cón che'n Jesucrist, gòc gu' xal mèn co' mxec no co' mxactii no co' mcha'la's, mèn co' mde'th

di's co' ndxab Diox xal mnibe' Diox li mèn tiempa. <sup>11</sup> Nu' nden' no ndyac nu' huen nda mèn no ndyac lezo' mèn, mèn co' nxec no co' ncha'la's co'se' ndyactii mèn por cón che'n Tad Jesús. Gu' mbìnque' no nda'que' gu' cuent quetal mxec Job no mcha'la's Job co'se' mxactii Job no co'se' ngòc yaltii no yalquii loo Job. Nonque' gu' no nda'que' gu' cuent xá mod mblyath no Tad Diox Job co'se' ngolo mxactii Job par mblo xtàa Tad Diox ryethe con' co' mblyux loo Job. No ngoloa, masre' con' mque no Job. Cona, non na' axta arid ndlyat lezo' Diox ñèe Diox mèn.

<sup>12</sup> Per thib con' más ndlyazen niin loo gu', mèn huesen por cón che'n Crist: Co'se' lya's gu' li nèe gu' di's co' gab gu', ne' por chu'th ne'te'thte gu' lèe bé'. Ne' ne' te'th gu' lèe izlyo'. Ne' ne' te'th gu' lèe tedib con'. Más huen gab gu': Aa, tataa gàca, xàa. No más huen gab gu': Ne'ñeeda. Ne'ñeeda, xàa, par tataa mod ne'zib quide Diox gu'.

<sup>13</sup> Chele' chol hues xtàa gu' co' nzi xi lezo' por ndxàc yaltii loo hues xtàa gu'a, ndxàal cuez hues xtàa gu'a loo Diox por cón che'n co' ndxàc loo hues xtàa gu'a. Lomisque' ne, chele' chol hues xtàa gu' ndyac lezo' por ndxàc con' ndac loo hues xtàa gu'a, ndxàal gol ro hues xtàa gu' himn loo Diox xal ndye'th di's co' nzo mod gab hues xtàa gu' loo Diox por con' roo con' xèn co' ndli Diox loo hues xtàa gu'. <sup>14</sup> Lomisque', ngue niin loo gu', ne: Chele' chol hues xtàa gu' ndyac nen, ndxàal cuez hues xtàa gu'a rye mènngool co' nqueltàa loo cón che'n Diox par cuez mènngoola lèe Diox por cón che'n mèn yíiza. No ndxàal tà mènngoola aceit lad mèn yíiza por lèe Tad Jesús. <sup>15</sup> No co'se' mbez mèn Diox no ndxela's mèn dib nzo yéc mèn no dib nzo lezo' mèn, mènna yiche no yite'f loo yíiza. No mènna yac no yiche no yite'f mènna tac Diox teyac mènna. No lomisque', chele' mèn yíiza mcua'n xtol, xtol mèn yíiza mdyon' leque hora chele' mèn yíiza mna'b loo Diox ton' Diox xtol mèn yíiza. <sup>16</sup> Por cona, ngue niin loo gu': Xop dol gu' cón che'n xtol gu' loo Diox láth mbez gu' Diox con hues xtàa gu'. Lomisque', ndlyazen gurez gu' Diox thib gu' no tedib gu', gu' co' nac hues xtàa, par tataa mod teyac Diox mèn yíiz co' ndyac nen làth gu'. No yiche no yite'f mènna làth gu'. No co'se' mbez mèn Diox co'se', licque', nac mèn mèn ndac loo Diox, Diox ndxòn di's co' mbez mènna loo Diox no tataa mod li Diox cas di's co' mbez mènna loo Diox. <sup>17</sup> Gu' nda'que' cuent le' Lii co' ngòc mbi' co' mde'th di's co' ndxab Diox, Lii ngòc thib mbi' lalque' xal na'. Co'se' mbrez Lii Diox no mna'b Lii loo Diox co'te' ngo Lii tiempa par ne'lyàade yuu, mbìn Diox ro Lii no ne'nglàade yuu le'n son lin' narol tya. <sup>18</sup> Ngoloa, co'se' mbere Lii, mbrez Lii Diox no mna'b Lii loo Diox tedib vez par lyàa yuu, mbere yuu, ngulàa yuu tedib vez co'te' ngo Liia. No mèn co' ngo ban tya mthop cosech. <sup>19</sup> Gu' co' nac mèn huesen por cón che'n Jesucrist, chele' chol gu' ndyoo xà' lezo' loo cón che'n Diox co' nac licpe' no ngo tac lezo' gu' loo cón che'n Diox, no làth xtau'a nzo thib mèn co' ndyoodi's no gu' no co' nco'x loo gu' par bere gu', yòo gu' loo cón che'n Diox tedib vez, bìn gu' ro mènna. <sup>20</sup> Ndlyazen ta' gu' cuent co' huenleque', le' chol mèn co' ndyoodi's no mèn no co' nco'x loo mèn co' mcua'n xtol no co' nzi tee thib ned co' nac ned ye'rsin' par bere mèn co' mcua'n xtola, yòo mèn co' mcua'n xtola loo cón che'n Diox tedib vez, mènna li par lyá' alm mèn no xpíi mèn co' ngòp xtola loo quii no loo bèel co'te' tyactii mèn yiloa. No lomisque', li mènna le' rye xtol co' mcua'n mèn co' ngro xà' loo cón che'n Diox tyon' co'se' bere mènna, yòo mènna loo cón che'n Diox tedib vez.

## Ner Cart Co' Mque' Pedr Ye's Loo Mèn

*Pedr mque' ye's loo mèn co' ngola'sle' loo cón che'n Diox por cón che'n Jesucrist, mèn co' mque tee re's pál.*

<sup>1</sup> Daa, Pedr, nac thib mbi' co' ndxe' di's cón che'n Jesucrist loo mèn, co' nee di's, leque yub Jesucrist mtel' daa loo mèn. Ngue que'en ye's ndxè' loo rye gu', gu' co' ngola'sle' loo Jesús no loo cón che'n Jesús, gu' co' ngro' nacionpe' gu', gu' co' nzo ban yèzya' che'n làaz mèn ponto, gu' co' nzo ban yèzya' che'n làaz mèn galacia, gu' co' nzo ban yèzya' che'n làaz mèn capadocia, gu' co' nzo ban yèzya' che'n làaz mèn asia, no gu' co' nzo ban yèzya' che'n làaz mèn bitañ. <sup>2</sup> Diox xud na' mcai gu' xalque' mnibe' Diox loo lezo' Diox li Diox xal nac co' gune lezo' Diox li Diox axta más pólle'a. Por cón che'n Xpii Natú' che'n Diox, Diox mblo' xà' gu' loo ryethe con' ye'rsin' co' nac cón che'n xab izlyo' par ante tyubdi's gu' loo Diox no par gac gu' mèn nalì no mèn nambìi loo Diox por cón che'n renpe' Jesucrist. Ndlyazen le' Diox li anggac huax con' ndac loo gu'. No ndlyazen yo nagal lezo' gu' loo Diox no cue ban gu' rye nda gu' no rye ndye'th gu' làth xtàa gu'.

*Yalnaban cub ndxè' nac thib yalnaban co' ngure quee lezo' mèn gac loo mèn póla.*

<sup>3</sup> Ndlyazen gab na' le' Diox co' nac xud Tad Jesucrist na' nac Diox roo no Diox xèn. Por anze'f mblyat lezo' Diox gunèe Diox na', mbli Diox ngòc na' mèn co' ngue no tedib yalnaban cub xal co'se' ndxàca loo thib mbeto' co' ndxáal loo izlyo'. Tataa ngòc loo na' por mbli Diox le' Jesucrist ngro xban làth mèn nguth. No por ngro xban Jesucrist làth mèn nguth, ndxàca loo na' le' na' nzi quee lezo' gac loo na' tedib yalnaban co' gac thib yalnaban más ndac yiloa. <sup>4</sup> No li Diox le' gu' gac che'n no yan' no gu' con' co' nac xal thib herens co' ngue quenap Diox loo bé' co' gac che'npe' gu' yiloa. No con' co' gac che'n gu'a no con' co' yan' no gu'a ne'lyuxte thidtene. No ne' ne' yen mod gac con'a con' zab. No ne' ne' yen mod gac con'a xal con' ngol' xal ndxol' chol laa nayèe co' ngol'. <sup>5</sup> No com le' gu' ndxela'sque' loo Diox, ¿lé'?, Diox nquenap gu' por cón che'n con' roo no con' xèn co' ndxàp Diox la's nii Diox no la's ya' Diox axta co'se' gac huiz yòo gu' loo bé' par ban no gu' Diox thidtene tya. No lu' Diox con' co' yan' no gu' no co' gac che'npe' gu' le'n huiz co' gac lult tiemp loo izlyo' ndxè'.

<sup>6</sup> No por cón che'n ryethe con'a, nden'en no naneen ndyac lezo' gu' mastale' nquin gac huax yaltii loo gu' no ten' gu' huax yaltii ndxep tiemp. <sup>7</sup> Axta arid ntaca loo Diox le' gu' ndxela's loo Diox no ndxàp gu' yalxla's loo Diox. Diox non nquin gac loo gu' tyactii gu' par ñee Diox ñeene' ché' xec gu' que tee ban gu' loo cón che'n Diox. Co'se' ndxàc con'a loo gu', naca xal co'se' nsun' mèn or con' quii par ta' mèn cuent ñeene' ché' nac ora orpe'. Co'se' nxec mèn ndxàc chol yaltii co' ndxàc loo mèn, le' sya, cón che'n mèn axta arid ntac loo Diox más leque or co' ndxeza' no co' ndlyux. Por cona, ngue niin loo gu': Chele' gu', licque', tolo gáp yalxla's loo Diox no tolo yila's gu' loo Diox láth ndxàc chol yaltii loo gu', syase co' Diox cuent nac gu' mèn ndac. No li Diox gac con' roo no con' xèn loo gu'. No li Diox gac gu' mèn guryath no mèn guryèn loo taamas mèn co'se' yi'th Jesucrist loo izlyo' ndxè' tedib vez.

<sup>8</sup> Nonquen le' gu' anze'f nque' lezo' Jesucrist mastale' tarte ñee gu' xá ñaa Jesucrist. No por ndxàp gu' yalxla's loo Jesucrist, mastale' tarte ñee gu' xá ñaa Jesucrist, ndyac tín' lezo' gu' no thidtene nxo'f nde' nxo'f ndla' lezo' gu'. No por anze'f ndyac lezo' gu'a, nonquen naca thib con' roo no thib con' xèn loo gu' no axta ne' ne' gac gu' ta' gu' cuent co' ndxàc loo gu' loo cón che'n Jesucrist loo mèn. <sup>9</sup> No por mbli gu' no mxec yèe gu' ngola's gu' loo cón che'n Jesucrist, mblyá' alm gu' no xpii gu' loo ryethe con' ryes tac ngola's gu' loo Jesucrist par mblyá' gu' loo ryethe con' ryes.

<sup>10</sup> No axta más póla mèn co' mde'th di's co' ndxab Diox huen huen mbral no mdub rez mènà loo libr co' nac xti's Diox co' nac testament gox no mdoodi's mènà cón che'n xá

mod lyá' mèn loo ryethe con' ryes. No con'a nac con' ndac co' mbli nèe Diox angli Diox loo gu' le'n tiemp ndxè'. <sup>11</sup> Leque yub Xpii che'n Crist co' nac Xpii Natú' mbli par ngro xo'f loo mèn co' mde'th di's. No mda' mènna cuent con' co' tyactii Crist no xá mod gac ryethe con' roo no ryethe con' xèn loo Crist co' gac loo Crist yiloa. Mènna mbly'a's ngo xo'f chó nac mbi' co' gac Crist no pól gac tiemp co'se' yi'th Crist loo izlyo' ndxè' xal mblo xo'f Xpii Natú'i loo mènna, Xpii Natú' co' ngo no mènna. <sup>12</sup> Per leque yub Diox mbli ngro xo'f cón che'n con' co' mbli mènna xtúuz no con' co' mdoodi's mènna inacte con'a con' co' gac loo leque yub mènna. Ndxè'leque', Diox mbli' loo mènna le' cón che'n con'a nac co' ndxàc loo na' nalle'. No nalle' leque cón che'n con' co' mbli mèn xtúuz pólle'a nac leque con' co' ndxath no co' ndxèn loo gu'. No ndxath no ndxèn con' ndxè' loo gu' por cón che'n mèn co' ngo yalbàn cón che'n xá mod lyá' mèn loo con' ryes. Ngo mènna yalbàn por cón che'n con' roo no con' xèn co' ndli Xpii Natú' loo na'. Xpii Natú' co' mtel' Diox co' ngro' loo bé' loo na'. No leque cón che'n con' ndxè' nac con' co' mbli angl xtúuz par ñee angl no ta' angl cuent cón con'a no xá mod gac con'a.

*Diox mblec na' no mcui Diox na' par ryo xà' na' loo ryethe con' ye'rsin' co' nac cón che'n xab izlyo' par que tee ban ndac na' loo Diox.*

<sup>13</sup> Cona, ndlyazen huen huen li gu' xtúuz cón che'n con' co' ndli gu'. No ndlyazen nabe'ste que tee ban gu' no ne'zi'fte gu' arid con' ye'rsin' la's nii gu' no la's ya' gu' ned nzi tee gu'. Ante bli gu' xtúuz loo ryethe con' ndac co' li Diox loo gu' no co' ta' Diox loo gu' co' nzi quee lezo' gu' gac loo gu' co'se' yú' loo Jesucrist loo mèn loo izlyo' ndxè' tedib vez. <sup>14</sup> Fque tee ban gu' làth xtàa gu' xal myen' bix co' ndyubdi'sque' loo xud myen'. Ne'que tee bante gu' xal ngòc yalnaban co' mque tee ban gu' póla ndoore' co'se' tarte ta' gu' cuent cón che'n Diox no co'se' tarte libe' gu' Diox por cón che'n Jesucrist. <sup>15</sup> Ndxè'leque', fque tee banque' gu' loo cón che'n Diox xal mèn co' thidteneque' ngro xà' loo ryethe con' ye'rsin' co' nac cón che'n xab izlyo'. Tataa mod bli gu' tac Diox co' mblec gu' no Diox co' mcui gu' par ngòc gu' loo cón che'n Diox, Diox nac thib Diox nali no thib Diox nambii no thib Diox natú'. <sup>16</sup> Loo libr co' nac xti's Diox ndub di's co' mbez taandxè':

Gòc gu' mèn co' ngro xà'que' loo ryethe con' ye'rsin' co' nac cón che'n xab izlyo' tac daa nac thib Diox nali no thib Diox nambii no thib Diox natú'.

<sup>17</sup> Yende chó mèn nzo co' más ndyu' loo Diox leque taamas mèn. Chele' gu' mbez: —Pay— loo Diox, Diox co' ndla's loo thib thib mèn xá mod nzi tee ban mèn par tub rez Diox cón che'n mèn yiloa, ndxàal zye'b gu' ñee gu' Diox le'n ryethe huiz co' naban gu'. <sup>18</sup> Diox mbli par mblyá' gu' loo thib yalnaban co' yende cón ntac co' ngòc thib yalnaban co' mque tee ban gu' póla, co' ngòc co' mté'th gu' loo xudgool gu'. No gu' nda'que' cuent co' huenleque' le' co'se' mtelá' Diox gu' loo con' ryes por mdyon' xtol gu' co' angngòc loo gu' nalle', cón che'n con' co' angmbli Diox loo gu' ne'ndi'de gu' con'a por cón che'n con' co' ndlyux no con' co' ndxeza' xal ndxeza' or no plat. <sup>19</sup> Ndxè'leque', mtelá' Diox gu' loo con' ryes por cón che'n ren che'n ladpe' Crist, ren co' anze'f ntac loo Diox. Leque yub Crist mda' yalnaban Crist loo yalguth por cón che'n xtol mèn xal co'se' ndxuth mèn thib mbacxil' yen' co' be' nac thib mbacxil' nambii no co' tarte gac nec thib con' zab no nec thib yalquii loo par guth mèn mbacxil'a par xo mèn rena loo Diox loo izlyo'. <sup>20</sup> Diox mdoo Crist no mnibe' Diox loo Crist par gac con' co' ngòcle' loo Crist. Tataa mbli Diox loo Crist ndoore' cuec Diox no mxèn' Diox izlyo'. Per ne'ngàcte con'a loo Crist póla. Ndxè'leque', ngòca loo Crist le'n lult tiemp co' nac tiemp ndxè' ale mbyú' Crist loo mèn no mbi'th Crist loo mèn loo izlyo' ndxè' par ngòc con' ndac loo gu' nalle'. <sup>21</sup> No por cón che'n Crist gu' ngola'sque' loo Diox, Diox co' mblo xban Crist làth mèn nguth. No mbli Diox ngòc con' guryath no con' guryèn loo Crist. No por cón che'n con' co' mbli Diox loo Crist, thidtene mbli nèe gu' gu' le' gu' ndxela'sque' no nzi queeque' lezo' gu' loo cón che'n Diox. <sup>22</sup> No nalle' por mdubdi'sque' gu' loo di's ndac co' mbìn gu' co' nac lìcpe' cón che'n Diox xalque' mblyath no Xpii Natú' gu' par mbìn gu' di's cón che'n di's ndaca, mbli gu' par ngòc gu' mèn nali no mèn nambii loo Diox par tataa mod, lìcque', nque' lezo' gu' ñee gu' hues xtàa gu' co' ngòc loo cón che'n Diox. No ndxàal tataaque' tolo que' lezo'



gu' ñèe gu' thib xtàa gu' no tedib xtàa gu' dib nzo yéc gu' no dib nzo lezo' gu'. <sup>23</sup> Xalque' niin loo gu', gu' ngòcle' mèn cub xal thib mbeto' co' ndxáal loo izlyo'. Per ne'ngàcte con' ndxè' loo gu' xal co'se' ndxáal mèn por ren che'n xud mèn no ren che'n xna' mèn co' ndxath no co' ndlyux. Ndxè'leque', ngòca loo gu' ante por cón che'n xti's Diox. Nè nac di's che'n xti's Diox tac ndli xti's Diox nden' mèn di's xá nac mod co' nque tee ban mèn co'se' ndlab mèn xti's Diox o co'se' ndxòn mèn xti's Diox. <sup>24</sup> Tac loo libr co' nac xti's Diox ndub di's co' mbez taandxè':

Rye bin mèn co' naban loo izlyo' ndxè' nac xal huan nayèe. No ryethe con' roo no con' xèn co' mbez mèn nac mèn no co' ndli mèn nac xal nac ye' huan co' nxec thib huiz no thib ze no maste. Huana mbiiz. Le' ye' co' nxyo'f loo huana ndxàb loo izlyo'.

<sup>25</sup> Per ndxe'leque', di's co' nac xti's Tad Diox thidteneque' nzo. Ne'lyuxte xti's Diox. Tyubque' di'sa xal mbez di's loo libr co' nac xti's Diox.

Pues di's co' nac xti's Diox ndxè' nac di's co' ngo mèn yalbàn loo gu' co' ndlu' xá mod lyá' mèn loo con' ryes.

## 2

<sup>1</sup> Por cona, ngue niin loo gu': Blá' gu' ryethe con' co' nac con' ye'rsin' thib lad, co' nac ryethe mod co' nquedii mèn xtàa mèn, no co' nac mod co' ntembii mèn ro mèn no ntembii mèn xti's mèn loo xtàa mèn, no co' nac mod co' ndxàn lezo' mèn ñèe mèn xtàa mèn, no co' nac ryethe mod co' nda' mèn cuentyix loo xtàa mèn, no co' nac mod co' nteri'th mèn cuentyix loo xtàa mèn. <sup>2</sup> Neeque' gu' xal ndxàca loo myen' bix co' diz ngóol co' ndxàaz niiz co' nac xiiz xna' myen', ¿lé? Lomisque', cua'n gu' mod loo cón che'n xti's Diox par tolo té'th gu' no ta' gu' cuent cón che'n Diox no tyubdi's gu' loo Diox por cón che'n xti's Diox xalque' ndryoo no nxyèn myen' bix co' ndàaz xiiz xna'. Chele' gu' tataa li, le' sya, tataa mod tolo té'th gu' no ta' gu' cuent loo cón che'n Diox par tyubdi'sque' gu' loo Diox no, lìcque', lyá' gu' loo con' ryes thidtene. <sup>3</sup> Tataa gápce'i loo gu' chele' gu', lìcque', mbli la's le' Tad Crist nac thib Tad ndac.

*Trè' ndlu' le' Crist co' naban thidtene nac xal thib quèe co' yub ngóol co' yende chó cuin.*

<sup>4</sup> Cona, niin loo gu': Ftolo gòc gu' mèn nado'. Ftolo té'th gu' no fta' gu' cuent no ftubdi's gu' cón che'n Tad Crist co' thidtene naban. Tad Crist nac loo Diox xal thib quèe co' ndli mèn us par gác quèea quèe scuadr che'n liz mèn. Mèn mtè'b Tad Crist no mchobla' mèn Tad Crist. Per loo Diox axta arid ntac Crist. Por cona, mcai Diox Tad Crist par gác Tad Crist xal thib quèe scuadr co' tyub squin yòo, co' nee di's, nac thib con' co' naban co' ngue toxcua' Diox. <sup>5</sup> Gu', ne, nac xal quèe co' nxyo'f o co' ndub albañil loo quèe scuadr co' nac quèe cimient. Fta' gu' lugar loo Diox par li zin' Diox gu' par thidte gác gu' loo Diox, co' nee di's, nac xal thib temp' co'te' nzo ban Diox. No fta' gu' lugar loo Diox li zin' Diox gu' par gác ryete gu' co' ndxela's loo Jesucrist xal nguley' co' ngro xà' loo ryethe con' ye'rsin' co' nac xab izlyo' par ante li gu' sirv loo Diox. No ante por cón che'n Jesucrist ngue li gu' con' co' nac con' ndac no co' nac con' co' yòo lezo' Diox. <sup>6</sup> Por cona, ndub di's loo libr co' nac xti's Diox co' mbez taandxè', ne:

Daa mdoo thib mbi' loo mèn ciuda Jerusalén. Mbi'a nac xal ner quèe co' mxen albañil co' mdub albañil squin yòo liz mèn. Mcauin mbi'a xal thib quèea. No anze'f ntac mbi'a par daa. Le' mèn co' yila's loo mbi'a na, mèn ne'tyoo xà'de lezo' no ne'yitacte lezo' mèn loo cón chenen por cón che'n mbi'a. <sup>7</sup> Por part cón che'n gu' co' ndxela'sle' loo Diox por cón che'n mbi' co' nac Crist co' nac xal quèe scuadr, arid ntac Crist co' nac xal quèea loo gu', ne. Per part cón che'n mèn co' ne'tyalte yila's loo Crist, loo mèn tyaaque' di's no tyubque' di's co' ndub loo libr co' nac xti's Diox co' mbez taandxè':

Le' quèe co' mtè'b mèn co' nac xal maistr albañil, quèea ngòc ner quèe scuadr co' ndyub squin yòo.

<sup>8</sup> Lomisque', tyaaque' di's no tyubque' di'sa no gácque' di's xal mbez di's ndxè', ne:

Crist ngòc xal thib quèe co' ndxezi'f no co' ndxega's nii mèn, co' nee di's, co'se' nque quèe nii mèn no axta ndxexud mèn loo quèea.

Pues part cón che'n mènà, mènà ngozi'fque' no ngoga'sque' mènà loo cón che'n Crist co' nac xal quèea por ne'nglide mènà cas no ne'ndub nzade mènà di's co' ndlu' cón che'n Crist. Tac Diox mnibe' lezo' no mdoo lezo' Diox le' ryete mèn co' ne'lide cas no co' ne'ndub nzade loo di's co' ndlu' cón che'n Jesucrist, mènà ryo xà' loo mod co' mnibe' Diox loo mèn par li mèn par yòo ban no mèn Diox loo bé'. No tataa mod tyactii mènà yiloo por con' mbli mènà.

*Trè' ndlu' cón che'n mèn co' nzo loo cón che'n Diox no co' nac che'npe' Diox.*

<sup>9</sup> Per part cón che'n gu' co' ngola'sle' loo Crist, gu' nac thib bin mèn co' mcui Diox par gac gu' che'npe' Diox. No nac gu' thib ned mèn co' nac xal nguley' co' ante li sirv loo Diox co' ñibe'pe' loo ryethe con'. No nac gu' loo Diox xal thib nación mèn co' ngro xà' loo ryethe con' ye'rsin' co' nac xab izlyo' par ante li gu' sirv loo Diox. No nac gu' mèn co' nac che'npe' Diox. Tataa mbli Diox ngòca loo gu' par ya te'th gu' no lu' gu' loo mèn cón che'n zin' roo no zin' xèn co' mbli Diox loo mèn. Yub Diox mblec gu' no mcui Diox gu' par ryo' gu' loo ryethe con' co' ndli ntecuau yéc mèn no co' ndli ntecuau lezo' mèn loo cón che'n Diox. Tataa mbli Diox par mdyub xnii yéc gu' no par mdyub xnii lezo' gu' loo cón che'n Diox co' nac thib con' roo no thib con' xèn cón che'n Diox par non gu' no ta' gu' cuent cón che'n Diox. <sup>10</sup> Gu' thidteneque' ne'ngàcte mèn co' ngòc mèn nacionpe' Diox ndoore' yila's gu' loo Crist. Per nalle', nac gu' mèn che'npe' Diox. Thib cua'a yende chó nglat lezo' gunèe gu'. Per nalle' Diox ndlyatque' lezo' ñèe Diox gu'.

*Guree ban gu' ante par li gu' sirv loo Diox.*

<sup>11</sup> Gu' co' nac mèn huesen por cón che'n Crist, gu' co' anze'f nque' lezon ñèen, ña'ben loo gu' xal loo mèn tith co' ngro' liz no co' ngro' làaz, co' nzi tee tith co'te' nac liz no co'te' nac làaz, ne'ta'de gu' lugar tyub chol yo'f ye'rsin' co' ndryo' ndlyen' lezo' gu' par li gu'i. Tac ryethe con'a nac con' co' ndli thib part ndoo lezo' mèn li mèn con' ndac. No tedib part ndoo lezo' mèn par li mèn con' ye'rsin'. Con'a nac xal thib xó' co' ndli con' ye'rsin' loo xpìi mèn no loo alm mèn. <sup>12</sup> Nabe'ste fque tee ban ndac gu' làth mèn co' tarte libe' Diox no co' tarte ta' cuent cón che'n Diox. Tataa mod, mastale' nalle' ñii yèe ñii tii mènà cón che'n gu' axta mbez mèn nac gu' mèn ye'rsin'túb, per yiloo mènà hui' xal nac con' ndac co' ndli gu'. No tataa mod mènà gab quetal naroo xèn nac Diox co' mbli nzi tee ban ndac gu' nalle'. Tataa gab mènà co'se' gac huiz co'se' ta' mèn cuent loo Diox cón che'npe' mèn.

<sup>13</sup> No por cón che'n Tad Crist, ftub nza gu' no ftubdi's gu' con' co' ñibe' ley co' mxo'f gobiern loo mèn, que naca con' co' ñibe' thib president por nac president thib xa' co' más ñibe', <sup>14</sup> que naca con' co' ñibe' mèn co' nac gobernador co' nac mèn co' mtel' thib president par tetii mèn co' nac gobernador mèn co' ndli con' ye'rsin' no par li mèn co' nac gobernador con' co' nac con' guryath no con' guryèn loo mèn co' ndli con' ndac. <sup>15</sup> Tac Diox, ne, ndlya's le' gu' thidteneque' li con' ndac par tataa mod li gu' par yau' ro mèn naxèn no ro mèn tont par ne'tolode tyoodi's mènà cón che'n gu'.

<sup>16</sup> Fque tee ban ndac gu' làth chol mèn xal mèn co' yende chó mbee nca' par li gu' chol con' ye'rsin' co' nac cón che'n xab izlyo'. Per mastale' ndli gu' cuent yende chó mbee nca' gu' par li gu' con' ye'rsin' por nzo gu' loo cón che'n Diox, ne'lide gu' xtùuz por nzo gu' loo cón che'n Diox nzoque' mod li gu' chol con' ye'rsin'. Yende xàa, ey. Más huen fque tee ban gu' xalque' mèn co', licque', nac mèn co' nxo'f zin' zin' che'n Diox. <sup>17</sup> Gòp gu' mod co' nac thib mod ndac loo rye mèn xal ndxàalpe' li gu'i. Fque' lezo' gu' gunèe gu' mèn co' nac hues xtàa gu' por cón che'n Jesucrist. Bzeb gu' loo Diox no bli gu' con' guryath no con' guryèn loo Diox. Gòp gu' mod loo mèn co' nac gobiern co' ñibe' loo gu'.

*Trè' ndlu' xá mod mxactii Crist par tataa mod té'th mèn xá mod ndxàal que tee ban mèn.*

<sup>18</sup> Nalle' gu' co' nac moz, ftubdi's gu' no gòp gu' mod gunèe gu' mèn co' nac patrón gu'. Iante tyubdi's gu' no gáp gu' mod loo mèn co' nac patrón ndac no co' nac patrón nado'. Ndxle'leque', ftubdi's gu' no gòp gu' mod loo mèn co' nac patrón nayi', ne. <sup>19</sup> Co'se' nxec yèe gu' no co'se' ncha'la's gu' co'se' ndxecloo patrón gu' loo gu' por thib con' co'

indxàalte li patrón gu' loo gu' no nxec gu' tac gu' nda'que' cuent no non gu' tataa ndlya's Diox li gu' loo patrón gu', ndxò lezo' Diox con' ndli gu'a no nac con' co' ndli gu'a thib con' ndac loo Diox chele' gu' tataa ndli. <sup>20</sup> Per chele' gu' li ndxep con' ye'rsin' co' ilé'de nac, no cona'te ndli tetii patrón gu, ¿ché' ndyac gu' naca thib con' roo loo Diox chele' gu' nquin xec yèe chele' patrón tetii gu' por con' mbli gu' co' ilé'de nac, cà'? Yende xàa. Per ndxe'leque', chele' patrón gu' ndxecloo loo gu' por ndxep con' ndac co' mbli gu' no ncha'la's gu' no nxec yèe gu' par nabe'ste ngue li gu' zin' loo patrón gu', con'a nac con' ndac loo Diox no con' co' ndxò lezo' Diox. <sup>21</sup> Por mxec yèe gu' no por ngòp gu' mod, Diox mcui gu' no mdoo Diox gu' no mblec Diox gu' loo cón che'n Diox. Más de cona, gu' nonque' no nda'que' gu' cuent por cona mxactii Crist por cón che'n gu' par tataa mod mbli' Crist loo gu' xá mod ndxàal que tee ban gu' xal mque tee ban Crist loo izlyo' ndxè'. <sup>22</sup> Co'se' mque tee Crist loo izlyo' ndxè' nec thib mod no nec tedib mod ne'ncua'nte Crist xquin Crist no xtol Crist no ne' ne' nquedii Crist nec thib mèn. <sup>23</sup> Co'se' gunii yèe gunii tii mèn cón che'n Crist, ne'ncàbte Crist nec thib di's, co' nee di's, ngàc nayi' Crist. Co'se' asembli mèn mtetii mèn Crist, ne'ngabte Crist sere Crist ya' Crist par ntin Crist mèn yiloo. Ndxé'leque', mtan' Crist ryethe con' mbli no mèn Crist part che'n Diox par li Diox co' nee lezo' Diox loo mèn, Diox co' nali no nambii ndub rez no ngo xtàa cón che'n con' co' ndli mèn loo xtàa mèn. <sup>24</sup> Yub Crist mxactii no mden' Crist yalnè lad Crist por cón che'n xtol mèn co'se' mque' mèn Crist loo cruz. Tataa mod ngòca loo Crist par gac na' mèn co' thidtene yathla's no ryo' yéc na' no ryo' lezo' na' loo ryethe con' co' nac xtol na' no leque tiempa que tee ban ndac na' co' nac thib yalnaban nali no thib yalnaban nambii loo Diox. Crist mxactii ryethe con'a par gaca loo gu' ne'tyactiide gu' por cón che'n xquin gu' no por cón che'n xtol gu'. <sup>25</sup> Gu' nda'que' cuent no nonque' gu' le' gu' mque tee huan loo Diox póla loo ryethe con' co' nac xtol gu' xal thib partid mbacxil' co' mdyuhuan. Per nalle', gu' ngòc loo cón che'n Crist, Crist co' nquenap gu' xal nquenap thib pastor mbacxil'. No nquenap Crist alm gu' no xpíi gu'.

### 3

*Trè' ndlu' xá mod ndxàal cue ban mèn, mèn co' mselya'.*

<sup>1</sup> Gu' ne, mèngot co' ngue no xin' sa'l, ftubdi's gu' di's co' ñee xin' sa'l gu' loo gu' no co' ñibe' xin' sa'lpe' gu' loo gu' no con' ndlya's xin' sa'l gu' li gu'. Tataa mod chele' ndxep xin' sa'lpe' gu' tarte yila's xal ndlu' di's ndac, nzoque' mod yila's xin' sa'l gu' no li la's xin' sal' gu' lïcque' nac cón che'n Tad Jesucrist por ngüi' xin' sa'l gu' mod co' nque tee ban no gu' xin' sa'l gu'. Tataa mod inquinte tyoodi's no gu' xin' sa'l gu' cón che'n di's ndac no cón che'n Jesucrist. <sup>2</sup> Le' sya, tataa mod li la's no yila's xin' sa'lpe' gu' loo cón che'n Jesucrist co'se' hui' xin' sa'lpe' gu' loo mod co' nac thib mod ndacpe' co' ndxàp gu' loo xin' sa'lpe' gu'. <sup>3</sup> Lomisque' ne, gu' co' nac mèngot, indlyasten le' gu' arid tyoxcua' gu' par nabe'ste ñaa gu' no par nít nayèe ñaa gu' co'se' ndxoc xab gu'. Angab na'i, co'se' ante nít nayèe ñaa yéc gu' ndee gu' bèu yéc gu' no co'se' ndxò corral or yen gu' no nque yi'f or nza gu' co' arid ntac no co'se' ndxoc xab gu' lar' co' anze'f nabe's ñaa no co' arid náp ntaca. <sup>4</sup> Ndxé'leque', ndlyazen lu' gu' mod ndac co', lïcpe', ndxàp gu' le'n lezo' gu' no le'n xtùuz gu'. Moda ne'lyuxte loo mèn. Thidtene ndxò lezo' mèn moda. Thidteneque' nazi' nziri' mèn con xtàa mèn. No nagàl nziri' mèn no rye nda rye ndye'th nziri' mèn làth xtàa mèn. Con' co' ndli gu'a no mod co' cue ban gu'a anze'f ntac loo Diox, ey. <sup>5</sup> Póla, tataa mdyoxcua' mèngot, mèngot co', lïcque', ngro xà' loo ryethe con' ye'rsin' co' nac cón che'n xab izlyo' no co' ngòc che'npe' Diox. Ngòp mèngota yalxla's loo Diox no mdubdi's mèngota di's co' mnibe' xin' sa'l mèngota loo mèngota no mdub nza mèngota loo con' gunee xin' sa'l mèngota loo mèngota. <sup>6</sup> Tataa mbli Sar, ne. Mdubdi's Sar loo Abraham. Gu', ne, gac xal ngòc Sar chele' gu' toloque li con' ndac no chele' gu' ne'tolode zye'b loo nec thib con'.

<sup>7</sup> Gu', ne, mènbi' co' nac xin' sa'l mèngot gu', gòc gu' mèn co' huen huen mté'th xá mod ban no gu' xa'got gu' no xá mod quenap gu' xa'got gu'. Bli gu' con' guryath no con'

guryèn co' ndxàal li gu' loo xa'got gu'. Iante por nac mèngot mèn delicad li gu' con'a. Ndxé'leque', bli gu' con' guryath no con' guryèn loo mèngot co' nac xin' sa'l gu' tac mèngota, ne, ngue no leque yalnaban co' mda' Diox loo mèngota xalque' nac yalnaban co' mda' Diox ngue no gu' nalle'. Tataaque' bli gu' loo mèngotpe' gu' par de que yende cón nca' no yende cón nca' loo gu' par thidte cues no gu' xa'got gu' Diox.

*Trè' ndlu' cón che'n mèn co' ndyactii ante por mbli mèn con' ndac.*

<sup>8</sup> Por lult, ndlyazen thidte cue ban gu'. Thidte gac xtùuz gu' no thidte gac lezo' gu'. No thidte lyat lezo' gu' ñèe gu' thib xtàa gu' no tedib xtàa gu'. Ndlyazen que' lezo' gu' ñèe gu' hues xtàa gu' por cón che'n Jesucrist xalque' mèn co' ndxàc hues. Gòc gu' mèn co' ndyac no xtàa. Gòc gu' mèn co' indlu'de ndye's. <sup>9</sup> Ne'co xtàade gu' loo nec thib mèn leque con' ye'rsin' co' ndli mèn loo gu'. Ne' ne' li gu' par ta' gu' xyàn lezo' mèn xal nda' mèn xyàn lezo' gu'. Ndxé'leque', más huen bli gu' con' ndac loo mèn co' mbli con' ye'rsin' loo gu. Tac Diox ngurez gu' no mblec Diox gu' par angli Diox con' ndac loo gu'. <sup>10</sup> Tac loo libr co' nac xti's Diox ndub di's co' mbez:

Le' mèn co' lya's ban nen tiemp no co' lya's gac con' ndac loo loo izlyo', ndxàal gáp lezo' mèn par ne'tyoodi'ste mèn chol di's ye'rsin'. Ne' ne' gac mèn mèn gutyè'.

<sup>11</sup> Ne'ta'de gu' lugar tyoo nii gu' no tyoo ya' gu' xal ndli mèn co' ndli con' ye'rsin'. Ndxé'leque', bli gu' con' ndac loo hues xtàa gu'. Ftú' ftàl gu' co' nac xèn xyàn co' ndxàc loo gu'. Bli gu' co' nzote mod li gu' par yo nagàl lezo' gu' no gure ban gu' rye nda gu' no rye ndye'th gu' làth xtàa gu'. <sup>12</sup> Tac Tad Diox nquenap no indlá'ya'de Tad Diox mèn co' nac mèn nali no mèn nambii. No ndxòn Tad Diox ro mèn co'se' mbez mèn Diox par li Diox con' co' ña'b mèn. Per ndxe'leque', Diox thidtene ingüi'de loo mèn co' ndli con' ye'rsin'. No ndxezan Diox ndxegaa mèn loo con' ye'rsin' co' ndli mèn.

<sup>13</sup> ¿Chó mèn li con' ye'rsin' loo gu' chele' gu' thidteneque' mbli nèe gu' par li gu' con' ndac, à'? Yende chò mèn gac li con' ye'rsin' loo gu' tataa, ¿lé'? <sup>14</sup> Per mastale' ndxàc yaltii loo gu' por nzi tee ban lì gu' no por nzi tee ban ndac gu', huen ndxàca loo gu' no huen nda gu' loo cón che'n Diox. Ne'zyebte gu' loo nec thib con'. No ne' ne' ya ye'th lezo' gu' nec thib mod no nec tedib mod par tyoo xà' lezo' gu' loo cón che'n Crist. <sup>15</sup> Ndxé'leque', bli gu' par gac con' guryath no con' guryèn loo Crist xalque' Tad gu' le'n xtùuz gu' no le'n lezo' gu'. No bli gu' cas loo Crist. Nalas gure gu' par gac gu' càb gu' loo chol mèn, mèn co' ña'b thib razon o thib consej loo gu' co' nac cón che'n co' ndxela's gu' loo Diox no co' nzi quee lezo' gu' loo Diox. Bli gu'i xal mèn co' indye'ste. Nado' di's no nado' cuent bli gu' cas loo mèn no gòp gu' mod loo mèn co'se' ña'b mèn loo gu' par tyoodi's no gu' mèn. <sup>16</sup> Nabe'ste fque tee ban ndac gu' no nabe'ste fque tee ban lì gu' par ne'ten'te gu' le'n lezo' gu' le' gu' ngue li con' ye'rsin'. Le' sya, mèn co' nazab ndyoodi's cón che'n xá mod nque tee ban gu' mastale' nabe'ste nque tee ban ndac gu' xal mèn co' ndxela's loo Crist, ndxe'leque', mèn ten' le'n lezo' mèn no thyon mèn cón che'n xti'spe' mèn co'se' ndyoodi's mèn cón che'n gu'. <sup>17</sup> Más huen gac yaltii loo mèn por ndli mèn con' ndac, chele' Diox ndlya's tataa gaca loo mèn, leque gac yaltii loo mèn por ndli mèn con' ye'rsin'. <sup>18</sup> Tac yub Crist mden' yalnè no mxactii Crist axta nguth Crist por cón che'n xquin na' no xtol na'. Thidte vez ngòca loo Crist por cón che'n xquin no xtol che'n ryete mèn. Crist ngòc thib mbi' ndac. Per ndxe'leque', le'le' Crist mxactii por na', na' co' nac mèn ye'rsin', par tataa mod yòo na' loo cón che'n Diox por cón che'n Crist. Bèl'yòo lad Crist nguth per xpíi Crist no alm Crist ne'ngathte. Ndxé'leque', nzo ban Crist por cón che'n con' roo con' xèn co' nzo la's nii no co' nzo la's ya' Xpii Natú' che'n Diox. <sup>19</sup> Láth nzo ga's bél'yòo lad Crist co' ngòc thebol le'n ye'r quèe co' ngòc bá' co'te' mca's mèn Crist le'n izlyo', ngua lu' xpíi Crist no alm Crist loo taamas alm no taamas xpíi co' nzo gòo le'n thib lugar co' ngòc xal thib lezi'f le' Crist na, mbli gan loo con' ye'rsin' co' nac cón che'n Mebizya. <sup>20</sup> Almaa no xpíia ne'ndubdi'ste loo Diox co'se' ngòc tiemp pólle'a pólle'a le'n huiz no le'n tiemp co'se' mque tee ban thib mbi' co' ngro' lèe Noé. Le'n tiempa Diox mdub bed no mcha'la's Diox con' mèn láth mdyoxcua' yòoyaa co' mtoxgua' Noé. Le'n

yòoyaaa nagabte mèn ngòc co' ngòc le'n yòoyaaa, co' nee di's, xon mèn. Mèna ngòc mèn co' mblyá' loo nít no loo yuuloo co' ngulàa tiempa. <sup>21</sup> Nít che'n yuuloo co' ngure loo izlyo' tiempa ndlu' loo na' no nda' cuent loo na' cón che'n bautism co' ngòc loo na'. No por cón che'n bautisma nanee na' le' na' mblyá'le' loo con' ryes nalle'. Per bautism co' ngòc loo na' inacte bautisma par gab na' mtembii bautism lad na' no maste. Ndxé'leque', naca le' por cón che'n bautism co' ngòc loo na' mna'b na' loo Diox li Diox par ne'tolode ten' na' le'n lezo' na' cón che'n xquin na' no xtol na' co' mton' Diox loo na'. Más de cona, bautism co' ngòc loo na' ndlu' loo na' mblyá' na' loo con' ryes por cón che'n co'se' ngro xban Jesucrist làth mèn nguth. <sup>22</sup> Ngoloa, nguáp Jesucrist loo bé'. Ndub Jesucrist cuat Diox loo bé'. No ryete angl, no ryete xa' co' ñibe', no ryete xa' co' ndxàp con' la's nii no la's ya', ryete xa'a mde's nii no mde's ya' loo Jesucrist par ñibe' Jesucrist loo ryethe con'.

## 4

*Trè' ndlu' xá mod ndxàal li mèn sirv thib mod no tedib mod co' gác mèn loo Diox.*

<sup>1</sup> Cona, ngue niin loo gu': Texal mxactii Crist no mden' Crist yalnè lad Crist, gu', ne, ndxàal cuec lezo' par tyactii gu' chele'i nquin gác loo gu'. Gu' nda'que' cuent le' chol mèn co' mxactiile' lad por cón che'n Crist, mèna ndlu', licque', ya intolode cua'n mèna xquin mèna no xtol mèna loo Diox. <sup>2</sup> Tataa mbli mèna par ban mèna taandxep tiemp loo izlyo' ndxè' ante xal nee lezo' Diox. No làtha, ya ne'tyubte yo'f lezo' mèn loo ryethe con' co' ndxuhua nèe lezo' mèn co' nac cón che'n xab izlyo' ndxè'. <sup>3</sup> Ya mbyaale' mda' gu' gust lezo' gu' loo huax con' co'se' tarte yila's gu' loo Diox tiemp co' ngòc póla xal ndli mèn co' indlibe'de Diox. Tiempa, gu' mque tee ban loo chol con' ye'rsin' co' mdub yo'f lezo' gu' par li gu'. Angab na'i, ngòc gu' mènguy. Mque tee yuhua xle' gu' co'se' ndli gu' chol lni. Mque tee yu xle' gu' che'n mèn hor co' ndlya's gu' axta plóthe. Ayen yii ayen den ndxèn mbez yèe gu'. Mque tee tuuz gu' axta plóthe, ne. Mbli gu' chol lni loo chol mdo' no loo chol gunab co' ndxab Diox indxàalte còo' mèn yéc mèn loo no indxàalte tyub xib mèn loo. <sup>4</sup> Nalle' mèna mbez loo xtàa mèn no loo lezo' mèn chonon inqueltàade gu' con mèna loo ryethe con' ye'rsin' co' ndub yo'f lezo' mèna loo mod co' nque tee ban mèna. No por cona, nazab ñii yèe ñii tii mèna no mbez mèna ngòc nguàal con' cón che'n gu'. <sup>5</sup> Per prob mèna naquinque' ta' cuent loo xa' co' ngòc nable' par tub rez xa' cón che'n mèn loo mèn co' be' naban no loo mèn co' nguthle'. <sup>6</sup> Por cona, ngue niin loo gu': Loo mèn co' nguthle' nalle', mblo mèn yalbàn no mde'th mèn cón che'n xá mod lyá' mèn loo con' ryes láth be' ngure ban mèna par gác loo mèna co'se' gath bél'yòo lad mèna, yòo ban no xpíi mèna no alm mèna Diox xalque' naban Diox. Tataa ngòca loo mèna mastale' yub Diox gunee lezo' cón che'n mèna nquin gath bél'yòo lad mèna xalque' ndxath rye mèn.

<sup>7</sup> Nase ya nde zin' gaxle' tiemp co'se' tlo lyux tiemp ye'rsin' co' naban na' loo izlyo' ndxè'. Cona, ngue niin loo gu': Ndxé'sleque' fque tee ban gu' no nalas fque tee ban gu' loo izlyo' ndxè'. No ne'yathla'ste gu' par tolo cuez gu' Diox ze no yál'. <sup>8</sup> Más de cona, loo ryethe con' co' ngue niin loo gu' ndxè', ndlyazen que' lezo' gu' gunèe gu' hues xtàa gu' axta plóthe. Tac mèn co', licque', nque' lezo' ñèe hues xtàa mèn axta plóthe, mèna ingòode xyàn lezo' ñèe mèna hues xtàa mèna arid. Luega nteri'th ntecan' mèna xyen xyàn co' ndxòo lezo' mèn ñèe mèn hues xtàa mèn. <sup>9</sup> Fta' gu' liz gu' cued mèn co' ña'b loo gu' par cued mèn liz gu'. Per ne'cuez nguixte gu'i loo mèn por mda' gu' liz gu' nguled mèn. <sup>10</sup> Lomisque' ne, li thib thib gu' sirv loo chol xtàa gu' par lyath no gu' xtàa gu' xal nzote mod co' nac co' mda' Diox lugar gác gu' li gu' sirv loo mèn. Tataa bli gu' xal mèn co' nxo'f zin' ndac co' nac thib zin' co' angmbli Diox loo gu' par li gu' sirv loo mèn. <sup>11</sup> Mèn co' mda' Diox lugar gác mèna par tyoodi's no mèna mèn cón che'n Diox, tyoodi's no mèna mèn xalque' ndyoodi's no Diox mèn. No chele' chol gu' lya's ta' thib huiz zin' anxle' loo xtàa gu', ne'cua'nte gu' mod guth gu' má' xi'tha. Bli gu' zin'a xal ndxàal li gu' zin' xal mda' Diox fuerz loo gu' par li gu'i. Bli gu' le' ryete con' co' li gu'a càba gab mèn con' roo no con' xèn cón che'n Diox no gab mèn natú' nac Diox, ne, por cón che'n



Jesucrist. Ndlyazen gàc con' roo no con' xèn loo Jesucrist no ndlyazen yan' ryethe con' roo no ryethe con' xèn la's nii Jesucrist no la's ya' Jesucrist le'n lín' co' ntlo, no le'n lín' co' ndxelo, no le'n lín' co' ne'lith node. Taandxè' gàca.

*Trè' ndlu' xal ndxàal que tee ban mèn co'se' ndxàc yaltii loo mèn, mèn co' ndxela's loo cón che'n Diox.*

<sup>12</sup> Mèn huesen por cón che'n Crist, gu' co' anze'f nque' lezon ñèen, ne'gàcte gu' mèn co' arid ne'ñeede cón, chàa, gàc loo gu' co'se' ndxàc chol yaltii tìn' loo gu'. Ne'ten'te gu' le'n lezo' gu' con' co' ndxàc loo gu' nac thib con' co' tarte ñèe mèn gàc loo izlyo' ndxè'. <sup>13</sup> Ndxè'leque', ftac lezo' gu' co'se' gàca loo gu' le' gu' tyactii no Crist ndxep par gàca loo gu' tyac tìn' lezo' gu' co'se' ñèe gu' gàc con' roo no con' xèn loo Crist co'se' yi'th Crist loo izlyo' ndxè' tedib vez. <sup>14</sup> Chele' mèn ñii ngòc nguàal con' loo gu' por cón che'n Crist, huen gàca loo gu' no huen nda gu' loo cón che'n Crist. Co'se' gàca tataa loo gu', ñee gu' no ta' gu' cuent le' Xpii che'n Diox, Xpii co' nac Xpii roo no Xpii xèn, nzo loo gu'. Mèna ñii yèe ñii tii cón che'n Crist. Per ndxe'leque', gu' ndli ndxàc con' guryath no con' guryèn loo Crist. <sup>15</sup> Thib descuid nquin tyactii gu' ndxep. Chele' gu' nquin tyactii ndxep, bla's gu' no huen huen quenap gu' gu' par ne'tyactiide gu' por mbeth gu' mèn; por mbli huan' gu'; o por mbli gu' con' ye'rsin'; o por mbla's ro' gu' di's cón che'n tedib mèn co' inacte cón che'n gu'. <sup>16</sup> Ndxè'leque', chele' chol gu' ndyactii ndxep ante por nzo gu' loo cón che'n Crist no maste, inquite thyon gu'. Ndxè'leque', ndxàal gab gu' le' Diox nac Diox roo no Diox xèn por mda' Diox lugar loo gu' ne' gu' lèe mèn co' nac che'n Crist por nac gu' mèn co' nzo loo cón che'n Crist.

<sup>17</sup> Nase mzinle' huiz no mzinle' tiemp co'se' tlo tub rez Diox cón che'n con' co' ndli mèn co' nac mèn guliz Diox, co' nee di's, na' co' ndxela's loo Diox por cón che'n Jesucrist. Chele' Diox ya tataale' mtlo ngue tub rez cón che'n na' par tetii Diox na', ¿xá nee gu'? ale'que' ne' gàc más con' ye'rsin' tìn' loo mèn co', por derech, ne'ndubdi'ste loo di's ndac che'n Diox co' ndlu' xá mod ndlyá' mèn loo con' ryes, ¿lé'? <sup>18</sup> Lomisque' ne, chele' mèn co' nac mèn ndac no mèn nalì loo Diox añenti mdyal par ngulàa yéc mèn no ngulàa lezo' mèn par mblyá' mèna loo con' ryes, ale'que' loo mèn ye'rsin' co' ndxàp xtol, pà yila's mèn lyá' mèna loo con' ryes, ¿lé'? Yende xàa. <sup>19</sup> Por cona, ngue niin loo gu': Mèn co' ndxela's loo Diox no co' ndyactii xal nac co' gunee lezo' Diox, mèna ndxàalque' tolo li con' ndac loo hues xtàa mèna. No ndxàalque' toloque' na'b mèna quenap Diox alm mèna no xpìi mèna la's ya' Diox no leque tiempa gáp mèna yalxla's loo Diox le' Diox lii loo mèna. Yub Diox nac Diox co' mbli par nzo na'. No yub Diox ndlique' co' mcàbgòn Diox li Diox loo mèn.

## 5

*Pedr ngue co'x loo mèn co' ndxela's loo Diox.*

<sup>1</sup> Daa, Pedr nac thib xa' gox nalle' co' lalque' ngox xal ngox ndxep mènool co' nzo làth gu' co' nqueltàa no gu'. Gunèn co'se' mxactii Crist. No ndan cuent cón che'na loo mèn no ndlu'en loo mèn xá mod mxactii Crist. Thidte gàc con' roo no con' xèn loo ryete na', yiloo. Por cona, ngue co'xen loo mènool nalle'. <sup>2</sup> Ndlyazen le' mènool quenap mèn co' ngòo loo cón che'n Diox co'te' nqueltàa gu' par nedrè', mèn, co' nee di's, nac xal mbacxil'pe' Diox. Ndlyazen li mènool con' co' ngue co'xen loo mènool loo di's ndxè' dib nzo yéc mènool no dib nzo lezo' mènool xal mèn co' huen nzo lezo' xal neete lezo' Diox. Indlyasten a la fuerz li mènool con' co' ngue co'xen loo mènool ndxè'. Ne' ne' indlyazen li mènool xal mèn co' ante nde yath ñèe tmi. <sup>3</sup> Ne' ne indlyazen xo'f zin' gu' zin' ndxè', mènool, xal mèn co' ndxàc che'n thib con' no xal mèn co' ñibe' loo xtàa mèn, loo mèn co' ndyoo ner gu' loo no mèn co' ndyoo naa gu' loo. Ndxè'leque', cua'n gu' mod blu' gu' gu' loo mèn co' nac xal mbacxil' le' gu', lìcque', nque tee ban ndac no nque tee ban li gu' loo cón che'n Diox. <sup>4</sup> Tataa lyazen li gu'. Le' sya, co'se' yú'loo Tad Jesucrist co' nac merpe' pastor co' ndyoo ner no co' ndyoo naa loo mèn co' nzo loo cón che'n Diox,

xal nquenap thib pastor mbacxil', huiza gu' gac che'n no yan' no gu' thib con' roo no thib con' xèn co' inacte xal thib coron co' natoxcua' con laa nayè co' lueg ngol'.

<sup>5</sup> Lomisque' lyazen ne, gu' co' nac myen'bi' no gu' co' nac myen'got, ftubdi's gu' loo con' ñibe' mènool loo gu'. Lomisque', ndlyazen le' ryete gu' gac nado' loo thib gu' no loo tedib gu' no gòc gu' mèn co' ncu'a'n mod gac con' ndac loo hues xtàa gu' por cón che'n gu'. No ne'gàcte gu' mèn nayi'.

Tac Diox ndxecloo no ndxàc Diox ngolo ngola's loo mèn co' ndye's no loo mèn co' nxyal'. Per ndxe'leque', Diox ndlyath no mèn nado' co' indye'ste no mèn co' inxyal'te loo ryethe con' ndac cón che'n Diox.

<sup>6</sup> Cona, ngue niin loo gu': Gòc gu' mèn nado' loo ryethe mod co' ndxàp gu' tac Diox ndxàp rye loothe con' la's nii Diox no la's ya' Diox. Chele' gu' tataa li, le' sya, Diox li par gac gu' mèn roo mèn xèn co'se' gacpe' huiz co' nanee Diox ndxàal gac gu' mèn roo mèn xèn. <sup>7</sup> Yende chó mport nzo lezo' Diox por ndxath ndlyux gu' loo cón che'n gu'. Más huen gurez gu' Diox por cón che'n ryethe con' co' nde che loo gu' no con' co' nden' gu' no con' co' ndli nxi lezo' gu'. Tac ndxe'leque', le'le' loo Diox ndxàca thib zin' cón che'n gu'. <sup>8</sup> Lomisque', ndlyazen gòc gu' mèn nalas no mèn lijer xal mèn co' nquenap liz thib mèn co' ndxàp che'n. Tac Mebizya co' nac ngolo ngola's che'n gu' ngue tee cua'n mod par telux Mebizya gu' xal thib mbee's co' mbez yèe co'se' ngue tee lan' mbee's, ncu'a'n mbee's co' hua mbee's. <sup>9</sup> Gòp lezo' gu' par nec thib mod no nec tedib mod ne'lide gu' nec thib con' co' nee lezo' Mebizya li gu'. Más huen bli nèe gu' gu' loo cón che'n Crist co' ndxela's gu'. Tac gu' naneeque' no nda'que' gu' cuent le' ryete mèn co' ndxàc hues gu' por cón che'n Crist co' nzo dib athu loo izlyo' nzi tac leque yaltii co' ndyac gu' par nedrè'. <sup>10</sup> Per co'se' riid yaltiaa loo gu' co' ndxàc ndxep tiemp loo gu', Diox li par gac gu' mèn co', licque', mtéth no mèn co' nda'que' cuent no mèn co' ndyubdi'sque' loo cón che'n Diox. No Diox li par leque gu' li nèe gu' loo cón che'n Crist. No li Diox par ne'tolode gac gu' mèn co' nac chop loo chop la's loo cón che'n Diox. Leque yub Diox angndli ndxàc rye loothe con' ndac loo na'. No leque yub Diox nac Diox co' ngurez na' no mblec Diox na' par gac che'n na' no par yan' no na' rye loothe co' nac con' roo con' xèn che'npe' Diox tac thidte ndxàc na' con Crist no ngòo na' loo cón che'n Crist thidtene. <sup>11</sup> Ndlyazen tolo gac con' roo no con' xèn loo Crist no ndlyazen yan' ryethe con' roo no ryethe con' xèn la's nii Jesucrist no la's ya' Jesucrist le'n lín' co' ntlo, no le'n lín' co' ndxelo, no le'n lín' co' ne'lith node. Taandxè' gàca.

*Con' ndxè' nac lult di's co' mque' Pedr ye's loo mèn.*

<sup>12</sup> Mtel'en cart ndxè' loo gu' con Silvan co' ndlin cuent nac thib hues na' co' altant ndoo loo cón che'n Crist. Loo cart ndxè' mco'xen loo gu' no mblin le' gu' nda' cuent co' huenleque' le' ryethe yalndac co' angndli Diox loo gu' ndlu' loo gu' le' Diox, licque', nque' lezo' ñèe Diox gu'. Por cona, ftolo gure nèe gu' loo cón che'n Diox. <sup>13</sup> Mèn co' nqueltàa loo cón che'n Diox yèez Babiloñ, mèn co' Diox mcui xalque' mcui Diox gu', mènna ngue nii Diox loo gu' loo cart ndxè'. Ngue nii Marc, co' nac xal xgan' daa, Diox loo gu', ne. <sup>14</sup> Co'se' ngue nii gu' Diox loo hues xtàa gu' loo cón che'n Crist, fxen gu' ya' xtàa gu' xalque' nac mod co' ndxàp gu', gu' co' nqueltàa loo cón che'n Diox.

No ndlyazen yo nagàl lezo' ryete gu' loo Diox no cue ban gu' rye nda gu' no rye ndye'th gu' con xtàa gu', gu' co' nac che'npe' Jesucrist. Taandxè' gàca loo gu', ndee gu'.

## Mbryop Cart Co' Mque' Pedr Ye's Loo Mèn

*Pedr ngue que' ye's co' nac cart ndxè' loo mèn co' ndxela's loo cón che'n Crist.*

<sup>1</sup> Yub daa co' nac Mon Pedr, daa nac thib mbi' co' nxo'f zin' zin' cón che'n Jesucrist. No nac daa thib mbi' co' ndxe' di's cón che'n Jesucrist, co' nee di's, nac daa mbi' co' mtel' yub Jesucrist loo mèn. Ngue que'en ye's co' nac cart ndxè' loo gu', gu' co' nac mèn co' mté'th no co' ngola'sle' loo cón che'n Diox xalque' ndxela's nu'. No mod co' ndxela's na' ndxè' anze'f ntac loo gu' xalque' ntaca loo nu'. Naca thib con' roo no thib con' xèn le' Diox mda' lugar yila's na' loo Diox, ne. Mbli Diox ngola's na' loo cón che'n Jesucrist tac Diox na' no Tad Jesucrist na' co' mtelá' na' loo con' ryes nac Diox nali no Diox nambii. <sup>2</sup> Ndyazen tolo li Diox anggàc huax con' ndac loo gu' axta plóthe. No ndlyazen yo nagàl lezo' gu' loo Diox no cue ban gu' rye nda gu' no rye ndye'th gu' làth xtàa gu' por mda' gu' cuent no por mdyub xniì yéc gu' no por mdyub xniì lezo' gu' loo cón che'n Diox no loo cón che'n Jesús co' nac Tad na'.

*Trè' ndlu' cón che'n mèn co' ngòole' loo cón che'n Crist le' mènà ndxàal tolo té'th no ta' mèn cuent no tyubdi's mèn loo cón che'n Crist.*

<sup>3</sup> Diox mbli ngue no na' ryethe con' co' nquin na' par que tee ban ndac na' loo cón che'n Jesucrist no par li na' cas loo Diox dib nzo yéc na' no dib nzo lezo' na'. Tataa mbli Diox por cón che'n ryethe con' roo no con' xèn co' nzo la's nii Diox no co' nzo la's ya' Diox. Tataa mbli Diox co'se' mbli Diox mblibe' na' Tad Jesucrist. Tad Jesucrist mcai na' no mblec Tad Jesucrist na' loo cón che'n Tad Jesucrist por cón che'n con' roo no con' xèn co' ndxàp Tad Jesucrist la's nii Tad Jesucrist no la's ya' Tad Jesucrist no por cón che'n ryethe con' roo con' xèn co' ngòc thib zin' co' mxo'f zin' Tad Jesucrist loo mèn. <sup>4</sup> No por ryethe con' roo no con' xèn co' ngòc thib zin' co' mxo'f zin' Tad Jesucrist loo mènà, mcàbgòn Tad Jesucrist gác huax con' roo con' xèn loo na'. Con' co' mcàbgòn Tad Jesucrist loo na'a, anze'f ntac loo na'. Por cón che'n con' co' mcàbgòn Tad Jesucrist loo na'a, ndxàa loo gu' nac gu' mase ndxep xal nac Diox. Le' sya, tataa mod lyá' gu' loo ryethe con' zab co' ndli ndyub yo'f lezo' mèn co' alithe naban loo cón che'n xab izlyo' loo izlyo' ndxè'. <sup>5</sup> Por cona, ngue niin loo gu': Ndxàal li gu' co' nzote mod li gu' par que tee ban ndac gu' loo con' co' ndxela's gu' loo cón che'n Diox. Más de cona, ndxàal tolo té'th gu' cón che'n Diox láth nque tee ban ndac gu' loo con' ndxela's gu' loo cón che'n Diox. <sup>6</sup> Lomisque' ne, ndxàal tolo té'th gu' par ñibe' gu' loo lezo' gu' no par gáp gu' lezo' gu' láth ngue té'th gu' cón che'n Diox. Lomisque' ne, lyazen gác gu' mèn co' ncha'la's loo ryethe con' co' ndxàc loo gu' láth ngue té'th gu' par ñibe' gu' loo lezo' gu' no par gáp gu' lezo' gu'. No ndlyazen le' gu' thib lì yéc gu' no thib lì lezo' gu' li gu' cas loo Diox láth ncha'la's gu' loo ryethe con' co' ndxàc loo gu'. <sup>7</sup> Más de cona, ndlyazen le' gu' gác mèn co' anze'f nazin' ñèe hues xtàa gu' láth thib lì yéc gu' no thib lì lezo' gu' ngue li gu' cas loo Diox. Por lult, loo ryethe con' ndxè', ndlyazen gác gu' mèn co', por derech, mté'th par que' lezo' gu' ñèe gu' chol mèn láth nac gu' mèn co' anze'f nazin' ñèe hues xtàa gu'.

<sup>8</sup> Chele' gu', lìcque', li ryethe con' co' ngue niin loo gu' ndxè' no ndxàcpe'i loo gu', le' sya, axta arid ntac mod co' nque tee ban gu' loo Diox. No ndxàc loo gu' inactive thib con' anxle' ndlibe' gu' Tad Jesucrist na' por nda' gu' cuent co' huenleque' cón che'n Tad Jesucrist na'. <sup>9</sup> Per mèn co' indlide cas loo cón che'n Diox no cón che'n Jesucrist xal nac ryethe con' co' ngue niin loo gu' ndxè', mènà nac xal thib mbi' sieu o nac mènà xal thib mbi' co' nathath ngüi'. Tataa ndxàa loo mènà por ndxathla's mènà le' Diox mton' ryethe xtol mènà co' mcua'n mènà, póla. <sup>10</sup> Por cona, gu' co' nac mèn huesen por cón che'n Crist, ryete gu' bli co' nzote mod li gu' no blu' ryete gu' co' nzote mod gác té'th gu' no non gu' no bli nèe gu' le', lìcque', Diox mblec gu' no mcai Diox gu' loo cón che'n Crist. Le' sya, chele' gu' ngue li xal ngue niina loo gu' ndxè', ne'ryo xà'de gu' no ne'yitacte lezo'

gu' loo cón che'n Crist axta gath gu'. <sup>11</sup> Le' sya, tataa li Diox par thib líte yòo gu' loo bé' co'te' nzo Tad Jesucrist na' co' mtelá' na' loo con' ryes. Ñibe' Tad Jesucrist na' loo ryethe con' thidtene.

<sup>12</sup> Cona, nxyo'f ndeleque' lezon par ndlin le' gu' te'que' lezo' con' ndxè' mastale' huen huen non gu' no nda' gu' cuent cón che'na, no mastale' ndli gu' par nzi li nèe gu' gu' loo con' ndxè' co' nac licpe' nalle'. <sup>13</sup> Ndyaquen huen nac co' ngue lin ndxè' no nalì naca par tolo lu'en loo gu' cón che'n con' ndxè', no co'xen loo gu' par te' lezo' gu' no par tolo ye'th lezo' gu' cón che'n con' ndxè' láth be' naban daa. <sup>14</sup> Tac Tad Jesucrist na' mblu'le' loon nde zin' gaxle' huiz co' gath daa. <sup>15</sup> Per nalle' láth be' naban daa, tolo lin co' nzote mod lin no tolo co'xen loo gu' par gàca loo gu' co'se' ngolo nguth daa, tolo te' lezo' gu' ryethe cón che'n con' co' mco'xen loo gu' ndxè'.

*Trè' ndlu' cón che'n mèn co' gunèe con' roo con' xèn che'npe' Crist láth mque tee no mèn Crist loo izlyo' ndxè'.*

<sup>16</sup> Mblu' nu' ryethe con' loo gu' cón che'n Tad Jesucrist na' le' Tad Jesucrist na' nac xa' roo no xa' xèn no le' Jesucrist bere yi'th loo izlyo' tedib vez. Co'se' mdoodizen cón che'n con'a loo gu', ne'ndoodistena loo gu' xal mèn co' ne'ñeede cuent cón ngue toodi's mènna. Ne' ne' mzi'fen loo di's par mquediin gu'. Yende xàa. Nu' gunèepe' Tad Jesucrist con' ngudloope' nu' co'se' ngòc con' roo no con' xèn loo Jesucrist no co'se' mzye' loo loo Tad Jesucrist. <sup>17</sup> Gunèe nu' co'se' Diox xud na' mbli ngòc con' guryath no con' guryèn no con' roo con' xèn loo Jesús no co'se' mquée xnii lad Jesús no mbyà'x bèel lad Jesús. No mbìn nu' di's co'se' gunii Diox di's co' ngòc di's roo no di's xèn co' ndxab Diox: Mbi' ndxè' nac xgan'pe' daa. Anze'f nque' lezon mbi' no anze'f ngudloon no lezon mbi'. No anze'f ndyac lezon loo con' co' ngue li mbi' ndxè'. <sup>18</sup> Yub nu' mbìn di's co' mbyèn loo bé'a. No thidte ngure no nu' Tad Jesús loo yii co' ngòc yii natú' loo Diox co'se' ngòca.

<sup>19</sup> Per nalle' ngue no na' tedib con' co' más ngo xo'f di's loo na' cón che'n Jesucrist, co' nee di's, nac ye's co' mque' mèn co' mde'th di's co' ndxab Diox. Huenque' ndli gu' chele' gu' ngue lique' cas cón che'n di's co' mque' mènna ye's. No tataa mod ndxàca loo gu' xal thib con' co' nquée xnii yéc gu' no co' nquée xnii lezo' gu' cón che'n Crist xal co'se' ntenii thib lampr loo mèn ned nque tee mèn. Tataa ngue ta' gu' cuent no huen huen ngue té'th gu' nde zin' gaxle' tiemp co'se' bere yi'th Jesucrist loo izlyo' ndxè' tedib vez. Le' sya, huen huen quée xnii yéc gu' no quée xnii lezo' gu' xal co'se' nde quée mbèelhui' ndxáal coyor xtil' par nda' mèn cuent nde yinii izlyo' tedib huiz. <sup>20</sup> Per ner fte' lezo' gu' no ta' gu' cuent co' huenleque' cón che'n con' ndxè': Nec thib di's co' ngòc di's co' mque' mèn co' mde'th di's co' ndxab Diox ye's ngòc di's co' alithe mbye'th xtùuz mènna par mque' mènna ye's. <sup>21</sup> Na' nda'que' cuent no nonque' na' le' mèn co' mde'th di's co' ndxab Diox póla, ne'ndoodi'ste mènna di's no ne'nde'thte mènna di's co' ngòc di's co' angndye'th yéc mèn par ndyoodi's mèn di's co' ngòc di's co' angmbye'th yéc mènna. Ne' ne' ngàc di'sa di's co' angmdub yo'f lezo' mèn par ngde'th mènna di'sa. Ndxè'leque', mèn co' mde'th di's co' ndxab Diox, mènna ngòc mèn co', licque', ngro xà' loo cón che'n xab izlyo' par ngòc mènna mèn co' mde'th di'sa xal mblyath no Xpii Natú' mènna. Di's co' mde'th mènna ngòc di's co', licque', mnibe' Diox loo mènna par te'th mènna di's.

## 2

*Pedr ndlu' cón che'n mèn co' ndyè'.*  
(Judás 4-13)

<sup>1</sup> Fte' lezo' gu' póla ngo mèn co' mbez mde'th mènna di's co' ndxab Diox làth mèn nación Israel. Per mènna ngòc mèn gutyè'. No lomisque' ne, tataa mod yòo mèn co' ñee nac maistr co' ndlu' cón che'n Diox làth gu'. Per mènna gac maistr gutyè' loo gu'. Mènna xexte lu' mod co' nac mod fals co' ncàb yalquii. No lu' mènna loo gu' cón che'n thib ley' co' nac ley' gutyè'. Co'se' lu' mènna loo gu' tataa mod, ale negadi's cà di's mènna cón che'n yub Tad Jesucrist co' mtelá' mènna loo con' ryes. Per con' co' li mènna li par setilte càb loo leque

mèna lyux mèna. <sup>2</sup> No anze'f thib mèn yòo loo cón che'n mèna no queltàa huax mèn con mèna par li mèn con' ye'rsin' xal ndli mèna. No por cón che'n mèna anze'f thib mèn ñii yèe ñii tii cón che'n di's ndac che'n Diox co' ndlu' xá mod thib lite ndxòo mèn loo Diox. <sup>3</sup> Por mod co' ndxath nquii mèna ñèe mèna tmi, asendli mèna ndli mèna provech gu' axta plóthe con mod gutyè' co' ndlu' mèna gu' con xley' fals mèn co' ndlu' mèna loo gu'. Per nzyalque' prob mèna tyactii mèna co'se' zin huiz ryo xà' mèna loo Diox thidtene. Thidtene ya yende mod lyá' mèna hora. Thidtene guneei loo mèna. Tac ndxàcle' tiemp mzi'f quii Diox loo mèna le' chol mèn gutyè' co' nac xal mèna thidtene ndyub quii ndyub bèel lezo' mèna par càb yaltìia loo mèna.

<sup>4</sup> Diox ne'nton'te xtol angl no xquin angl co' mcua'n angl loo Diox póla. Ndxé'leque', mbli Diox le' angla thib lite ngulàa le'n ye'rbiil. No sangmbli Diox mbyan' angla tya xal thib mèn co' natedó' con caden co'te' nac thib lugar nacuaau thidtene axta gac huiz co' tub rez Diox cón che'n angla par tetii Diox angla yiloo. <sup>5</sup> Ne' ne' nton' Diox xtol mèn no xquin mèn co' mcua'n mèn loo Diox, mèn co' ngure ban más pólle'a. Ndxé'leque', mbli Diox ngulàa thib yuuloo tìn' rloo mèn ye'rsin'a. No ante mbli Diox mblyá' thib mbi' co' ngro' lèe Noé con gaz mèn co' ngòc famil Noé por mblo Noé yalbàn cón che'n xá mod ndxàal que tee ban lì mèn loo Diox tiempa. <sup>6</sup> Mbli Diox, ne, par mblyux mèn ciuda Sodom no mèn ciuda Gomor. Ante dii mbyan' co'te' ngure ciuda Sodom no ciuda Gomor. Tataa mbli Diox con'a loo mèna par hui' no ñaa taamas mèn ye'rsin' co' ngo ban chol lugar loo mblyux ryop ciudaa. <sup>7</sup> Per mbli Diox mblyá' thib mbi' co' ngro' lèe Lot ndoore' telux Diox ryop ciudaa. Lot ngòc thib mbi' ndac. No anze'f nxi lezo' Lot por ñèe Lot mod ye'rsin' co' mque tee ban mèn ye'rsin' che'n ciuda Sodom no ciuda Gomor. <sup>8</sup> Lot ngo ban le'n ryop ciudaa. No mxec yèe Lot no mxi tìn' lezo' Lot, co' ngòc mbi' nalì no mbi' nambii, axta plóthe co'se' ñèe Lot xal ndli mèna con' ye'rsin'túb no co'se' ndxòn Lot cón che'n con' ye'rsin' co' ndli mèna. <sup>9</sup> Por cona, non na' no nda'que' na' cuent le' Tad Diox ndxác par telá' Tad Diox mèn, mèn co' ante nque tee ban loo cón che'n Diox. Lomisque' ne, ndxác Diox li Diox par tolo ndyub quii ndyub bèel lezo' mèn ye'rsin' axta zin huiz tub rez Diox cón che'n mèna par tetii Diox mèna thidtene.

<sup>10</sup> Más tetii Diox ryethe mèn co' más ndli ryete yo'f co' ndyub lezo' mèn co' nac con' zab no con' ye'rsin'. No ndxe'leque', ale le'le' nxiiis no mèna con' co' ñibe' Diox li mèna loo Diox. Mèna indyóode cón ngue li mèna. No anze'f naxin nac mèna. No axta ne' ne' inzyeb mèna ñii yèe ñii tii mèna cón che'n chol angl roo angl xèn co' ñibe' loo bé'. <sup>11</sup> Per ne' angl co' nac angl roo no angl xèn ne'lìde ryes par ñii yèe ñii tii angl cón che'n angl co' nzo ye'rbiil loo Diox xal ñii yèe ñii tii mèn ye'rsin' cón che'n angl roo angl xèn co' ñibe' loo bé'. <sup>12</sup> Per ryete mèn ye'rsin'a thidtene indxònte di's no indxaa'dte mèn di's. Axta arid má' mèna loo Diox. Gu' naneeque' le' má' nac má' por nac thib thib má' xal nac má', ¿lé'? Ne'ñeede má' cón ndli má'. Tataa nac mèn ye'rsin'a, ne. Tac alithe ndyoodi's mèna thib con' ye'rsin' no tedib con' ye'rsin' co' ne'ta'de mèn cuent cón ndyoodi's mèn. No leque mod ye'rsin' co' nac mèna càb loo mèna par lyux mèna. <sup>13</sup> Masre' tyactii mèna xal nac con' ye'rsin' co' mbli mèna láth naban mèna. Alithe nque tee ban mèn ye'rsin'a par ndli mèna ante con' co' ndyub yo'f lezo' mèn li mèn. No con' ye'rsin' co' ndli mèna le'le' ncàb ndyac lezo' mèna thib huiz no tedib huiz. Mèna nac mèn xin no mèn cap co' ntezab gu' co'se' ndxòo mèna làth gu' par hua no mèna gu'. Láth ndxòo no mèna gu' ndlu' mèna nac mèna xal mèn huen no mèn ndac. Per ne'nda'de gu' cuent, por derech, ngue quedii mèna gu'. Ale le'le', ndxan' bien mèna con gu'. No leque tiempa, ndyac lezo' mèna por cón che'n chol con' ye'rsin' co' ngue li mèna xal ndyub yo'f lezo' mèna par li mèna. <sup>14</sup> Co'se' ngüi' mèna loo chol xa'got, luega ndyub yo'f lezo' mèna no ndlyàa nít yen mèna capas ndyac mèna ngue li mèna yalmbi' con xa'gota. Thidtene incua'nte mèna mod par ne'tolode cua'n mèna xtol mèna. No nac mèna mèn ye'rsin'a co' ncu'a'n chol myen'got co' indxàpte lezo' no co' luega nda' di's co' ndly'a's mèn ye'rsin'a. Nac mèna mèn co' anze'f nde yath ñèe tmi. Thidtene mèn ye'rsin' mèna too ze too yál'. <sup>15</sup> Por derech, nzi tee huan mèna loo cón che'n Diox tac mblá' mèna con' co' ndxab Diox li mèna par thib



lìte yòo mènà loo bé'. Ale más ndli mènà xalque' mbli thib mbi' co' ngro' lèe Balaam co' ngòc thib mbi' co' mde'th di's co' ndxab Diox, póla. Balaam ngòc xgan' thib mbi' co' ngro' lèe Beor. Balaama mbly'a's li gan huax tmi por mbli Balaam con' ye'rsin'. <sup>16</sup> No mzin thib huiz no mzin thib ze ale mbli Diox gunii thib burrgol loo Balaam par mbyoo burr Balaam. Tataa mod más quee lezo' Balaam mblá' Balaam con' ye'rsin' co' mbly'a's Balaam li Balaam hora.

<sup>17</sup> Ryete mèn ye'rsin'a nac xal thib tó' biiz co' yende nít. No nac mènà xal thib xcuau biiz co' alithe ndxe' mbii, co' nee di's, yende cón ntac mènà. Mbli Diox tolo ndyub qui ndyub bèel lezo' mènà par ryo xà' mènà loo Diox yilo gath mènà par lyàa mènà ye'rbiil no sangyan' mènà tya co'te' nac thib lugar co' más nacauu thidtene. <sup>18</sup> Tataa gàca loo mènà tac co'se' ndyoodi's mènà, ndyoodi's mènà antub di's nate's no antub di's naxal', di's co' yende cón ntac. Asendli mènà nquedii mènà mèn co' ngro xà'le' loo cón che'n xab izlyo' con mod ye'rsin' co' ndyub yo'f lezo' mènà par bere mèn co' ngro xà'le' loo cón che'n xab izlyo', tlo mènà, li mènà con' ye'rsin' tedib vez. <sup>19</sup> Asendli mènà. Mbez mèn ye'rsin'a loo mèn co' ngro xà'le' loo cón che'n xab izlyo' chele' mènà que tee no mèn ye'rsin'a, le' sya, càba que no mènà thib yalnaban co' yende chó mèn cuee cà. Per yalgutyè'túb nac co' mbez mènà. Tac leque mèn ye'rsin'a nac xal thib moz co' ndli yèe con' ye'rsin' co' ndli mbee ncà mènà. No ndli mènà anab con' zab. Tac thib thib mèn ye'rsin'a ndxàc moz loo con' zab co' ndyub yo'f lezo' mènà par li mènà con' zab. <sup>20</sup> Per, licpe' ba'i, nde niin thib con' loo gu' cón che'n ryete mèn co' ngòole' loo cón che'n Tad Jesucrist co' mtelá' na' loo con' ryes, mèn co' mté'thle' cón che'n Tad Jesucrist: Nonque' gu' le' por mda' mènà cuent cón che'n Tad Jesucrist ngro xà'le' mènà loo con' zab co' nac cón che'n xab izlyo'. Chele' mènà bere bix yéc par yòo mènà loo ryethe con' ye'rsin'a tedib vez, no chele' mènà mda' lugar ñibe' con' ye'rsin' loo mènà tedib vez, ale más nazab tín' gàca no càba loo mènà yiloo. <sup>21</sup> Per nalle', por cón che'n con' ye'rsin' co' gac loo mènà co'se' tyactii mènà, más huen ngàca loo mènà thidteneque' ne'ngòode mènà loo cón che'n Tad Jesucrist par non mèn no ta' mèn cuent xá mod thib lìte yòo mèn loo bé' leque gàca loo mèn co'se' ya nonle' mèn no nda'le' mèn cuent xá nac cón che'n Jesucrist no ale bere mènà, lá' mènà par ne'lìde mènà con' co' mnibe' Diox loo mènà li mènà co' nac con' natú' co' mnibe' Diox par li mèn. <sup>22</sup> Per nase ndxàcle' no mdyaale' loo mènà xal nac di's co' nac thib di's licpe' co' mbez mèn: Ale mbere mbac, nduhua mbac con' co' mberepe' lezo' mbac. Le' nguch co' diiz ngood co' lilleque' mbembii, ale mbere ngood le'n ben ya's tedib vez, ne. Licque' nac di'sa, ¿lé'?

### 3

#### *Pedr ndlu' trè' xá mod gac co'se' yi'th Tad Jesucrist.*

<sup>1</sup> Mèn huesen por cón che'n Tad Jesucrist, gu' co' anze'f nque' lezon ñèen, con cart ndxè' nac mbryop cart co' mque'en ye's loo gu'. Loo ryop cart co' mtel'en loo gu' ndlyazen li gu' xtùuz dib nzo yéc gu' no dib nzo lezo' gu' par ta' gu' cuent cón che'n di's co' ngòc di's co' mco'xen loo gu'. <sup>2</sup> Fte' lezo' gu' cón che'n di's co' mde'th mèn, mèn co' ngro xà' loo con' ye'rsin' co' nac cón che'n xab izlyo', mèn co' mde'th di's co' ndxab Diox póla. No fte' lezo' gu' cón che'n di's co' mtan' Tad Jesucrist di's par tyubdi's na' di'sa, Tad Jesucrist co' mtelá' na' loo con' ryes. Di'sa ngòc di's co' mblu' mèn co' ndxe' di's che'n Tad Jesucrist loo gu'.

<sup>3</sup> Con' ndxè' nac co' ndlyazen xo'f ndeleque' lezo' gu' par tolo ta' gu' cuent cón che'n di'sa. Ndlyazen le' gu' nonque' le' le'n lult huiz no lult tiemp ndoore' lith no izlyo' ndxè' ryo xo'f mèn no tlo yo mèn co' tè'b no mèn co' xiis no cón che'n con' co' nac che'n Diox. No alithe que tee ban mènà xal nac mod co' ndryo' ndlyen' lezo' mèn no con' co' ndyub yo'f lezo' mèn co' nac con' ye'rsin' co' ndli mènà. <sup>4</sup> Ale, angnzi tee mènà nibdi's mènà. Gab mènà: ¿Máa cón che'n Jesucrist co' mcàbgòn Jesucrist le' Jesucrist yi'th, yoo? Tolo ñii mènà, ne: Anon nguth xudgool na' co' mban pólle'a, lomisque' ndxàca xal mtlo ngòca desde co'se' mblec Diox izlyo'. <sup>5</sup> Mènà tataa mbez tac indly'a'ste mènà ta' mènà cuent co'

huenleque' no indlya'ste mènà li mènà xtùuz le' desde tiemp más póla mdyoxcua'le' bé' no nziri'le' izlyo' co' mnibe' Diox ngòc yòo biiz co'se' mnibe' Diox dyoppe' nít co' ngure dib athu loo izlyo'. Diox ngue tèn izlyo' no ngue xèn' Diox izlyo' por cón che'n yuu co' ndli Diox ndlyàa loo izlyo' no por nít co' nzo loo izlyo'. <sup>6</sup>No ne' ne' indlya's mènà li mènà xtùuz no ta' mènà cuent le' izlyo' co' ngòc izlyo' gox tiempa, no ryethe con' co' ngure loo izlyo' mblyuxle' co'se' ngulàa yuuloo loo izlyo' tiempa co' ngòc tiemp che'n diluv. <sup>7</sup>Per bé' no izlyo' co' nziri' nalle', le'i nziri' par yeca no yola con quìi no con bèel co'se' ñibe' Diox yeca. Quìia no bèela tec izlyo' no bé' leque huiz no leque tiemp co'se' Diox tub rez cón che'n rye mèn ye'rsin' co' lyux leque tiempa.

<sup>8</sup>Diox indlabte huiz no mbe' no lín' xal ndli na' co'se' noo noo ndli na' xtùuz cón che'n huiz no tiemp co' ndrith loo na'. Por part che'n Diox, thib huiz nac xal thib mil lín'. No thib mil lín' nac xal thib huiz loo Diox. <sup>9</sup>Inacte le' Tad Jesucrist anze'f ndlyen' par yi'th Tad Jesucrist loo izlyo' tedib vez par gac co' mcàbgòn Jesucrist li Jesucrist loo na' xal ndli ndxep mèn xtùuz. Ndxle'leque', ncha'la's Tad Jesucrist ñèe Tad Jesucrist mèn par ñèe Tad Jesucrist ñeene' ché' nzore' ndxep mèn co' tyal yòo loo cón che'n Tad Jesucrist ndoore' yi'th Tad Jesucrist loo izlyo' tedib vez. Tad Jesucrist indlya'ste nec thib mèn ryo xà' loo Diox co'se' ngolo nguth bé'l'yòo lad mèn. Ndxle'leque', lya's Tad Jesucrist lyàa yéc rye mèn loo Diox no lyàa lezo' rye mèn par tataa mod zye' mod ye'rsin' co' ndxàp mèn loo Diox no lyá' mèn loo con' ryes.

<sup>10</sup>Per co'se' gac huiz co'se' yi'th Tad Jesucrist, huiza gac huiz co'se' indyóode mènà cón che'n huiza no co'se' inzi bedte mènà yi'th Tad Jesucrist no co'se' inzi queede lezo' mènà yi'th Tad Jesucrist loo izlyo' ndxè' tedib vez. Tad Jesucrist yi'th no ryo xo'f Tad Jesucrist loo mèn xal co'se' ndlyàa huan' liz mèn ndxáal yál' co'se' ne'ten'te mèn ndlyàa huan'. Tiempa, ryethe con' co' nzi'f loo bé' lyux no lith no. No leque tiempa yèn thib ruid tín'. No ryethe con' co' nziri' loo izlyo' yol con quìi no con bèel par lyuxa. No tataa mod lyux no lith no rye loothe con' co' nzi'f loo bé' no co' nziri' loo izlyo'.

<sup>11</sup>Chele' ryethe con'a, lìcque', tataa lyux no lith no, xalte mod ne' que tee ban ndac na' loo Diox xal mèn co', lìcque', ngro xà'le' loo cón che'n xab izlyo' no xal mèn co', lìcque', ndlique' cas loo cón che'n Diox. Naquinque' tataa que tee ban na', ¿lé'? <sup>12</sup>Gure bed gu' huiz co' gac huiz co'se' li Diox ryethe con'a. Gurez gu' Diox par gac ryethe con' co' nquin gac ndoore' yi'th Jesucrist par yi'th gèa Jesucrist loo izlyo' tedib vez. Huiza bé' lyux con quìi no con bèel. No ryethe con' co' nziri' loo izlyo' lyux no lith no no zyun' con quìi no con bèel. <sup>13</sup>Per part cón che'n na', na' nzi quee lezo' cue tedib bé' cub no tedib izlyo' cub co' mcàbgòn Diox loo na' li Diox par ban na' loo bé' cub no loo izlyo' cub. Loo bé' cuba no loo izlyo' cuba ryethe con' gac nali no nambìi no gac ryethe con' con' ndac huiza. <sup>14</sup>Cona, ngue niin loo gu', mèn huesen por cón che'n Tad Jesucrist, gu' co' anze'f nque' lezon ñèen: Láth nzi bed gu' gac ryethe con'a, gure li gu' co' nzote mod li gu' par hui' Diox loo gu' le' gu' nziri' nagàl lezo' loo Diox no nac gu' mèn co' nzi ban rye nda gu' no rye ndye'th gu' làth xtàa gu'. No gac gu' mèn nambìi no mèn nali co' indxàpte nec thib xtol loo Diox. <sup>15</sup>Gòp gu' cuent no fte' lezo' gu' le' por ncha'la's Tad Crist na' loo mèn, con'a ndli par tolo lyá' taamas mèn loo con' ryes. Xalque' ngue niin loo gu' ndxè', taandxè' mque' Pab co' ndxàc hues na' co' anze'f nque' lezo' na' ñèe na' ye's loo gu' cón che'n con' ndxè'. Mque' Pab ye's loo gu' xal nac mod co' mbli Diox ngóc Pab no co' mblu' Diox loo Pab. <sup>16</sup>Loo ryethe cart co' nde teele' mtel' Pab loo gu', leque cón che'n con' ndxè' mque' Pab ye's loo gu' mastale' ndyac gu' no nden' gu' nagàn nac cart co' mque' Pab loo gu' par ta' gu' cuent cón ngue toodi's Pab loo gu'. Per mèn naxèn no mèn co' nau' loo no co' nau' yéc co' pente ndxela's, mènà xà'le' mod no tedib mod nden' no nda' mènà cuent cón che'n cart co' mque' Pab ye's loo mèn. Por cona, mbez mènà le' cart co' mque' Pab loo mènà, tedib mod mque' Pab ye's loo mènà. Tataaguè' ngue li mènà con taamas ye's co' nac xti's Diox. Ale, tataa ndli mènà par leque mènà telux mènà loo Diox thidtene.

<sup>17</sup>Por cona, ngue niin loo gu', mèn huesen por cón che'n Tad Jesucrist, gu' co' nque' lezon ñèen: Com le' gu' nonle' con' ndxè' nalle'que', ¿lé'?, leque gu' fquenap gu' par

ne'cuee càde mèn gu' par quedii mèn gu', mèn co' nac mèn ye'rsin', no tataa mod tyoo xà' lezo' gu' loo cón che'n Diox co' mbli nèe gu' gu'. <sup>18</sup> Más huen ndlyazen le' gu' tolo té'th no tolo ta' gu' cuent cón che'n Tad Jesucrist co' mtelá' na' loo con' ryes. No tolo thidte gac gu' par tolo que' lezo' gu' Tad Jesucrist. Ndlyazen tolo gac con' roo no con' xèn loo Tad Jesucrist nalle' no thidteneque'. Taandxè' gaca, ndee gu'.

## Ner Cart Co' Mque' Juàn Ye's Loo Mèn

*Trè' ndlu' cón che'n xá mod yòo ban no mèn Diox thidtene.*

<sup>1</sup> Ngue que'en ye's ndxè' loo gu' co' nac cón che'n di's ndac co' ndlu' loo mèn cón che'n xá mod li mèn par yòo ban no mèn Diox thidtene. Cón che'n di's ndacpe' ndxè' nac yub Jesucrist co' nzole' ndoore' co'se' mbli Diox ngure ryethe con' co' nziri' nalle'. Mbìnpe' nu' ryethe con' gunii Jesucrist loo mèn. Gunèepe' nu' con ngudloope' nu' con' co' mbli Jesucrist, ne. Huen huen mbui' nu' loo Jesucrist axta mbuàal nu' lad Jesucrist con ya'pe' nu'. Por cona, nda' nu' cuent loo gu' le' Jesucrist nac angoluxte xa' co' ndlu' loo mèn cón che'n xá mod li mèn par yòo ban no mèn Diox thidtene. <sup>2</sup> Diox mbli par gunèe loope' nu' Jesucrist co' mbli' loo nu' cón che'n xá mod yòo ban no mèn Diox thidtene. No nda' que' nu' cuent loo mèn cón che'n xá mod yòo ban no mèn Diox thidtene. No cona, ngue te'th nu' no ngue lu' nu' loo gu' co' nac cón che'n xá mod yòo ban no mèn Diox thidtene. Póla, ante Diox non xá mod li Diox par yòo ban no mèn Diox thidtene. Per nalle', mbli' Diox cón che'n xá mod yòo ban no mèn Diox, mod co' ndxàc loo mèn por cón che'n Jesucrist. <sup>3</sup> Cona, ngue ta' nu' cuent no ngue go xo'f nu' loo gu' co' gunèele' nu' no co' mbìnle' nu' cón che'n Jesucrist par thidte gác gu' con nu' nalle' loo cón che'n Diox xal, lìcque', thidte ndxàc nu' con Diox co' nac xud na' no con Jesucrist co' nac xgan' Diox. <sup>4</sup> Cona, taandxè' ngue que' nu' ye's ndxè' loo gu' par thidteneque' tyac lezo' gu' por thidte ndxàc gu' con Crist.

*Juàn ngue ta' cuent cón che'n Diox le' Diox nac xal thib xniì, co' nee di's, co' ndlu' nac Diox Diox ndacpe'.*

<sup>5</sup> Con' ndxè' nac cón che'n di's co' mbli' Jesucrist loo nu' no ngue lu' nu'i no ngue te'th nu'i loo gu', ne, le' Diox nquée xniì, co' nee di's, nac Diox Diox ndacpe' no nec thib con' xin no con' cap no co' nac rye loothe con' ye'rsin' gác yòo loo Diox. <sup>6</sup> Chele' na' mbez thidte ndxàc na' loo Diox por cón che'n Jesucrist no, làth xtau'a, nzi tee li na' con' ye'rsin', le' sya, leque na' ngue gosua' yalgutyè' cón che'n co' ndxàc na' loo Diox no cón che'n con' co' nzi tee ban li na' loo cón che'n Diox. <sup>7</sup> Per chele' na' que tee ban loo con' co' nac con' ndac xalque' nac Diox thib Diox co' ndli ante con' ndacpe', sya, lìcque', thidte ndxàc na' con thib xtàa na' no con tedib xtàa na'. No tataa mod rye xquin na' no xtol na' co' nde teele' ncu'a'n na', Diox nton'a loo na' por cón che'n ren Tad Jesucrist co' mxyo.

<sup>8</sup> Chele' na' gab indxàpte na' xquin na' no xtol na', leque na' ngue li par nquedi na' na'. Le' sya, leque na' ndli ndxàc na' mèn co' indlide con' co' nac con' lìcpe'. <sup>9</sup> Per chele' na' xop dol cón che'n xtol na' loo Diox, nzoque' mod gáp na' yalxla's loo Diox le' Diox li con' co' nac con' nalì no con' nambii loo na' co' nac ton' Diox xtol na' no li Diox gác na' mèn nambii no mèn nalì loo Diox por mbembii na' loo ryethe con' ye'rsin' co' mbli na'. <sup>10</sup> Per chele' na' gab thidtene tarte cua'n na' xquin na' par gáp na' xtol na', sya, tataa mod ndlu' na' no mbez na' le' Diox ndyè'. Le' sya, chele' na' tataa ndli, lìcpe' ba'i, inacte na' mèn co' mdyalle' no co' ngola'sle' cón che'n di's ndac co' nac lìcpe'.

## 2

*Juàn ngue lu' loo mèn le' Crist nac xa' co' nteri'th cón che'n xti's na' loo Diox.*

<sup>1</sup> Gu' co' nac xal xgan' bix daa loon, ngue que'en ye's co' nac cart ndxè' loo gu' par ne'cua'n te gu' xquin gu' no xtol gu'. Chele' chol gu' ndoote ncu'a'n ndxep xquin gu' thib mod o tedib mod, nzoque' thib mbi' co' nzo loo xud na' Diox co' nteri'th cón che'n xti's na' loo Diox. Mbi'a nac Jesucrist. Nac Jesucrist thib mbi' nalì no thib mbi' nambii. <sup>2</sup> Jesucrist nac xa' co' yub mda' yalnaban loo yalguth loo cruz par tataa mod mbli Diox mxactii Jesucrist por cón che'n xquin na' no xtol na' par tataa mod mton' Diox xtol na' loo na'. Iante por cón che'n xquin na' no xtol na' nguth Jesucrist. Ndxè'leque', nguth

Jesucrist por cón che'n xquin no xtol che'n ryete mèn dib athu izlyo', mèn co' tyal yila's loo Jesucrist no loo cón che'n Jesucrist.

<sup>3</sup> Chele' na' ndyubdi'sque' xal nac di's co' mnibe' Diox loo na' par li na', sya, nanee na' no non na' le' na' nda'que' cuent cón che'n Diox. <sup>4</sup> Per chele' chó na' mbez nda'que' na' cuent cón che'n Diox no indyubdi'ste na' di's co' mnibe' Diox loo na' par tyubdi's na' di's, ndyè' na' no ndli na' ndxàc na' mèn co' indlide con' co' nac con' licpe'. <sup>5</sup> Per ndxe'leque', mèn co' ndlipe' con' co' ñibe' Diox loo mèn par li mènà, mènà, por derech, nque' lezo' Diox. Le' sya, chele' na' ngue lique' xal ngolo guniin ndxè', nanee na' thidte ndxàc na' con Diox. <sup>6</sup> Mèn co' mbez thidte ndxàc mèn con Diox, no mèn co' mbez thidtene ne'ryo xà'de mèn loo cón che'n Diox, mènà ndxàalque' tolo que tee ban li xal mque tee ban li Jesucrist.

*Con' ndxè' nac tedib di's cub co' mnibe' Diox loo na' par li na'.*

<sup>7</sup> Gu' co' nac huesen por cón che'n Jesucrist, ingue que'den di's co' nac thib yalnibe' cub loo gu' loo cart ndxè'. Di's co' ngue que'en loo cart ndxè' nac di's co' mnibe' Tad Jesucrist loo gu' par li gu' co'se' nerleque' ngòo gu' loo cón che'n Tad Jesucrist. Pues leque di's co' nac yalnibe'goola, leque di'sa nac di's co' ngue tan'en loo gu' loo cart ndxè' xalque' mbìn gu' di's ndxè' thib cua'a. <sup>8</sup> Mastale' nac di's co' ngue que'en loo gu' loo cart ndxè' leque di's che'n yalñibe'goola, per ngue que'en di's ndxè' loo gu' nalle' xal thib di's co' nac yalñibe' cub par tyubdi's gu' di's co' ñibe' Crist. Crist mbi'th que' lezo' ñèe Crist mèn loo izlyo'. No leque moda mblu' Crist loo nu' que' lezo' nu' ñèe nu' hues xtàa nu'. Ndxàca loo gu' nque' lezo' gu' ñèe gu' hues xtàa gu', ne. Nzi que' lezo' na' ñèe na' hues xtàa na' tac ryethe con' co' ndli ntau' yéc mèn no co' ndli ntau' lezo' mèn loo cón che'n Diox xèegà xèegà ndoo ton'le' loo mèn. No nalle' di's co' ndlu' co' nac licpe' cón che'n Diox ndoo tlole' ndxaa'd nza mèn no ndli di'sa par ndyub xnii yéc mèn no par ndyub xnii lezo' mèn loo cón che'n Diox.

<sup>9</sup> Chele' chó gu' mbez, licque', nzi tee ban ndac gu' loo Diox no mbez gu' yende chó con' ye'rsin' nzi li gu', no leque tiemp ndxecloo gu' no ndxòo xyàn lezo' gu' ñèe gu' hues xtàa gu', le' sya, con' ndli gu'a ndlu' be' nzi tee lique' gu' con' ye'rsin' no tarte yila's gu' co' licpe' loo Crist no loo cón che'n Crist. <sup>10</sup> Mèn co' nque'pe' lezo' ñèe mèn hues xtàa mèn, mènà, licque', nzi tee ban ndacque' loo cón che'n Diox no mdyub xnii yéc mènà no mdyub xnii lezo' mènà loo cón che'n Diox. No yende cón ndli par cua'n mènà xtol mènà. <sup>11</sup> Per mèn co' ndxecloo no co' ndxòo xyàn lezo' ñèe hues xtàa mèn, mènà ngue tee ban lipe' con' ye'rsin' no ncuau yéc mènà no ncuau lezo' mènà loo con' che'n Diox. Ne' ne' inda' mènà cuent cón gac loo mènà tac ndxàca loo mènà nac mènà xal mèn sieu loo cón che'n Diox por ngue tee ban mènà loo con' ye'rsin'.

<sup>12</sup> Gu' co' nac xal xgan' bix daa loon, ngue que'en cart ndxè' loo gu' tac Diox mton'le' xtol gu' no xquin gu' por cón che'n Jesucrist. <sup>13</sup> Gu' co' nac mèngool co' ndxàcle' tiemp ngòole' loo cón che'n Jesucrist, ngue que'en cart ndxè' loo gu', ne, tac gu' huen huen nda'que' cuent cón che'n Jesucrist co' nzole' ndoore' cuec Diox ryethe con' co' nziri' nalle'. Ngue que'en di's co' nac cart ndxè' loo gu', gu' co' nac xal myen'bi' bix no xal myen'got bix co' ngola's per co' pente ngue té'th cón che'n Jesucrist tac gu' mblile' gan par ngro xà' gu' loo ryethe con' ye'rsin' co' nac cón che'n Mebizya'.

Ngolo mque'en ye's loo gu' loo cart ndxè', gu' co' nac xal xgan' bix daa loon, tac gu' mté'thque' no nda'que' gu' cuent co' huen huen cón che'n Diox co' nac xud na'. <sup>14</sup> Mèngool co' ndxàcle' tiemp ngòole' loo cón che'n Jesucrist, ngolo mque'en ye's loo gu', ne, loo cart ndxè'. Tataa mblin tac gu' huen huen nda'que' cuent cón che'n Jesucrist co' nzole' ndoore' co'se' cuec Diox ryethe con' co' nziri' nalle'. No mque'len ye's loo gu', gu' co' nac xal myen'bi' no xal myen'got co' ngola's, gu' co' pente ngue té'th cón che'n Jesucrist. Tataa mblin loo gu' tac gu' mbli nèe gu' loo cón che'n Jesucrist no inacte gu' mèn co' nac chop loo chop la's loo cón che'n Jesucrist. No mda'que' gu' lugar ndxòn gu' cón che'n di's ndac che'n Diox. No ndxaa'd di'sa le'n lezo' gu'. Mque'len cart ndxè' loo gu' tac mbli gu' gan ngro xà'le' gu' loo cón che'n Mebizya, ne.



<sup>15</sup> Ne'ta'de gu' lugar arid tyub yo'f lezo' gu' loo cón che'n chol con' ye'rsin' co' nac che'n xab izlyo'. No ne'gàcte gu' mèn co' arid nde yath nde lux ñèe con' co' nziri' no con' co' nzo loo izlyo'. Tac chele' gu' anze'f ndyac loo cón che'n co' nac xab izlyo' no co' be' nde yath nde lux gu' ñèe gu' con' co' nziri' no con' co' nzo loo izlyo', gu' por derech, inque'de lezo' Diox co' nac xud na'. <sup>16</sup> Con' ye'rsin' co' ndyub yo'f lezo' mèn par li mèn, con'a nac con' ndxè': Mèn co' alithe nque tee ban loo izlyo' ndxè' nda' lugar par ndyub yo'f lezo' mèn loo ryethe con' co' nac cón che'n xab izlyo' co' ñibe' loo mèn par li mèn con' ye'rsin'; con' co' ngüi' mèn par ndyub yo'f lezo' mèn que no mèn con'a; no con' co' ndxàp mèn co' ncàb loo mèn ndye's mèn loo xtàa mèn. Ryethe con' ye'rsin' ndxè' nac cón che'n xab izlyo' co' ndli ndyub yo'f lezo' mèn par ndli mèn con' ye'rsin'a. Indlide Diox nec thib con' co' ndli ncàb ndli mèn chol con' ye'rsin. Ndxè'leque', Diox ndli par ndli mèn con' ndac. <sup>17</sup> No zin thib huiz no zin thib ze co'se' lyux no lith no rye mod ye'rsin' co' ndxàp mèn, mod ye'rsin' co' inactive che'n Diox. No lyux no lith no ryethe con' ye'rsin' co' ndyub yo'f lezo' mèn par li mèn con' ye'rsin'a. Per mèn co' nzi tee ban xal neepe' lezo' Diox, mèn yòo ban noque' Diox thidtene.

*Trè' ndlu' cón che'n co' nac con' licpe' no cón che'n co' nac yalgutyè'.*

<sup>18</sup> Gu' co' nac xal xgan' bix daa loon, ya mzinle' tiemp co' nac lult tiemp loo izlyo' ndxè'. Gu' mbìnle' yi'th thib mbi' co' gac merpe' ngolo ngola's che'n Crist. Nzo huax mèn co' nac ngolo ngola's che'n Crist loo izlyo' nalle'. Cona, nanee na' no nda' na' cuent nzole' na' le'n tiemp co' nac lult tiemp loo izlyo' ndxè'. <sup>19</sup> Mèn co' nac ngolo ngola's che'n Crista ngro' làth na'. Per, licpe' ba'i, inactive mèn mèn co' ngola'spe' loo cón che'n Crist xal na'. Tac chele' mèn ngala's xal na', thidteneque' ngyan' mèn con na'. Per tataa ngòca loo mèn par gunèe mèn le' mèn inactive mèn co' ngola'spe' loo cón che'n Crist xal na'.

<sup>20</sup> Per por part cón che'n gu', Crist mbli par ngulàa Xpii Natú' loo gu' par sangmbyan' Xpii Natú' loo gu'. No por cón che'n Xpii Natú'a, ryete na' non no nda'que' na' cuent cón che'n Diox. <sup>21</sup> Cona, ngue que'en ye's ndxè' loo gu' tac gu' naneeque' cón che'n con' co' nac licpe'. Ne'nque'den ye's ndxè' loo gu' por nac gu' mèn co' inda'de cuent cón che'n co' nac licpe'. Gu' naneeque' le' mèn co', licque', nque tee ban loo cón che'n co' nac licpe', mèn indyè'de.

<sup>22</sup> ¿Chó nac mèn co', licque', ndyè', à? Mèn nac mèn co' mbez le' Jesús inactive Crist. Leque mèn nac merpe' mèn co' nac ngolo ngola's che'n Crist tac mèn ncà no ntè'b mèn cón che'n Diox thib lad xalque' ncà mèn no ntè'b mèn cón che'n Crist thib lad. <sup>23</sup> Ryete mèn co' ncà no co' ntè'b cón che'n xgan' Diox, mèn inzode loo cón che'n Diox xud na'. Per mèn co' nda' lad che'n Crist, mèn nzoque' loo cón che'n Diox xud na'. Por cona, thidteneque' nzo no xud na' Diox mèn.

<sup>24</sup> Cona, ngue niin loo gu': Ftubdi's gu' loo di's no ften' gu' di's le'n lezo' gu', di's co' nac di's ndac che'n Diox co' mbìnle' gu' anon mtlo ngola's gu' loo Jesucrist no loo cón che'n Jesucrist. No chele' di's co' mbìn gu' anon ngola's gu' ndxaa'dque' le'n lezo' gu' no nte' lezo' gu' cón che'n di'sa, le' sya, thidte gac gu' con Crist co' nac xgan' Diox no thidte gac gu' con Diox xud na'. <sup>25</sup> Más de cona, Crist mcàbgònque' li Crist par yòo ban noque' na' Diox thidtene.

<sup>26</sup> Ngue que'en ye's loo cart ndxè' cón che'n mèn co' nzo làth gu' co' ndlya's quedii gu'. <sup>27</sup> Per loo gu' nzoque' Xpii Natú' co' mbli Jesucrist ngulàa loo gu'. No por cona, inquinte gu' tolo lu' mèn gu' cón che'n Diox. Tac leque yub Xpii Natú' ndli nda' gu' cuent no non gu' ryethe con' co' nzote mod non na' cón che'n Diox. No con' co' ndlu' Xpii Natú' loo na' nac con' licpe'. Indyè'de Xpii Natú' loo na'. Ne' ne' nquedii Xpii Natú' na'. Por cona, ngue niin loo gu': Thidteneque' bli nèe gu' gu' loo cón che'n Crist xalque' ndlu' Xpii Natú' cón che'n Crist loo gu'.

<sup>28</sup> Beren, niin loo gu': Bli nèe gu' gu' loo cón che'n Crist par tolo gáp gu' más yalxla's no gáp gu' más fuerz par ne'zyebte gu' no ne'thyonte gu' loo Crist co'se' yi'th Crist loo izlyo' ndxè' tedib vez. <sup>29</sup> Gu' co' naneele' co' huen huen le' Jesucrist nac thib mbi' nali

no thib mbi' nambii, ndxàal ta' gu' cuent no non gu' le' ryete mèn co' nzi tee ban li no co' nzi tee ban nambii, mènà nac xin' Diox.

## 3

*Trè' ndlu' cón che'n mèn co' ngo Diox cuent nac xin'pe' Diox.*

<sup>1</sup> Bli gu' xtùuz co' huenleque' supe' nque' lezo' Diox xud na' ñèe Diox xud na' na'. Por cona, ngo Diox xud na' cuent nac na' xin' Diox. No nacpe' na' xin' Diox. Por cona, mèn co' alithe nzi tee ban loo izlyo' ndxè', mènà inonte xá mod nac mod co' nzi tee ban na' loo cón che'n Diox. Tataa ndxàca loo mènà tac tarte nee mènà no tarte ta' mènà cuent cón che'n Diox. <sup>2</sup> Mèn co' nac huesen por cón che'n Jesucrist, ya nacle' na' xin' Diox. No tarte ñee na' chó con' ndac gac loo na' co'se' yòo ban no na' Diox thidtene. Per nanee na' no non na' le' co'se' yi'th Jesucrist loo izlyo' ndxè' tedib vez no ryo xo'f Jesucrist tedib vez, gac na' xalque' nac Jesucrist nalle' tac huiza hui' na' xal ñàa Jesucrist. <sup>3</sup> No ryete mèn co' nzi quee lezo' no co' nzi bed yi'th Jesucrist no co' nzi quee lezo' no co' nzi bed hui' mèn loo Jesucrist no gac mènà xal nac Jesucrist, leque mènà ndli par ndxàc mènà mèn nambii no mèn nali xalque' nac Jesucrist thib mbi' nambii no thib mbi' nali. Thiba con' ndxè'.

<sup>4</sup> Le' tediba na, part cón che'n rye mèn co' asendli ncua'n xtol, tataa ndli mènà tac indlide mènà xal ñibe' Diox par li mènà. Tac mèn co' ncua'n xquin no co' ncua'n xtol, mènà nac mèn co' indlide xal ñibe' Diox loo mènà par li mènà. <sup>5</sup> Gu' naneeque' le' Jesucrist mbi'thle' loo izlyo' ndxè' par mton' Jesucrist xtol na'. No naneeque' gu' le' Jesucrist thidteneque' ne'ncua'nte xquin no xtol. <sup>6</sup> Cona, ngue niin loo gu': Rye mèn co' thidte ndxàc con' Jesucrist loo cón che'n Diox, mènà inzi tee cua'nte xquin no xtol. Per ryete mèn co' asendli nzi tee cua'n xquin no xtol, mènà tar hui' loo Jesucrist. No ne' ne' tar ta' mènà cuent cón che'n Jesucrist. <sup>7</sup> Gu' co' nac xal xgan' bix daa loon, nec thib mod no nec tedib mod ne'ta'de gu' lugar loo chol mèn quedii mènà gu'. Mèn co' ndli con' nali no co' ndli con' nambii, mènà nac mèn nali no mèn nambii xalque' nac Crist xa' nali no xa' nambii. <sup>8</sup> Per mèn co' asendli ncua'n xquin no xtol, mènà nac mèn che'npe' Mebizya tac Mebizya nac xa' co' nerleque' mcua'n xquin no xtol. Sandante mcua'n Mebizya xquin Mebizya no xtol Mebizya axta huiza no axta huiz nalze. No por cona, mbi'thle' xgan' Diox loo izlyo' par telux xgan' Diox ryethe con' co' mblile' Mebizya.

<sup>9</sup> Nec thib mèn co' nac xin' Diox incua'nte mod par asendli mènà ncua'n mènà xquin no xtol tac mènà ngue nole' yalnaban co' Diox mda'le' loo mènà. No yende mod tolo aseli mènà cua'n mènà xquin mènà no xtol mènà tac mènà nacpe' xin' Diox. <sup>10</sup> Ndxàc be' mènà no ndxú'que' chó mèn nacpe' xin' Diox no ndxàc bé' no ndxú'que' chó mèn nacpe' che'n Mebizya. Tac chol mèn co' indlide con' co' nac con' nali no con' nambii no chele' chol mèn inque'de lezo' ñèe hues xtàa mèn, mènà inacte mèn co' nac che'npe' Diox. Ndxè'leque', nac mènà che'npe' Mebizya.

*Trè' ndlu' le' Diox ndlya's que' lezo' na' ñèe na' hues xtàa na'.*

<sup>11</sup> Di's co' mbinle' gu' anon ngola's gu' loo Crist no loo cón che'n Crist nac co' taandxè' ndlu' loo na': Diox ndlya's que' lezo' na' ñèe na' hues xtàa na'. <sup>12</sup> No indxàalte gac na' xal Caín. Ne' ne' indxàal li na' xal mbli Caín. Caín ngòcque' che'n Mebizya no ale mbeth Caín hues Caín. ¿Cón mbli hues Caín? ¿Chonon mbeth Caín hues Caín, à'? Caín mbeth hues Caín tac con' co' mbli Caín ngòc con' ye'rsin' no con' co' mbli hues Caín ngòc con' nali no con' nambii loo Diox. Con'a mbli mbeth Caín hues Caín.

<sup>13</sup> Gu' co' nac mèn huesen por cón che'n Jesucrist, ne'gacte gu' xal mèn co' ne'ñeede cón ndxàc loo mènà chele' mènà ndxecloo no ndxòo xyàn lezo' mènà ñèe mènà na', mèn co' nque tee loo cón che'n xab izlyo', yey. <sup>14</sup> Ne'ryò xà'de na' loo Diox co'se' gath bél'yòo ladpe' na'. Ndxè'leque', yòo ban noque' na' Diox thidtene. No nanee na'i tac nque' lezo' na' ñèe na' hues xtàa na'. Mèn co' inque'de lezo' ñèe hues xtàa, mènà nac xal mèn nguth loo Diox no loo cón che'n Diox. <sup>15</sup> Ryete mèn co' ndxecloo no co' ndxòo xyàn lezo' ñèe hues xtàa, ngòo Diox cuent nac mènà thib mèn co' ndxuth mèn. Nda'que' gu' cuent, ne,

nec thib mèn co' ndxuth xtàa nac mèn co' yòo ban no Diox thidtene yilò. <sup>16</sup> Nanee na' no nonque' na' xal nac co' ngòc loo Jesucrist por tant nque' lezo' Jesucrist ñèe Jesucrist na'. Ale leque Jesucrist mda' yalnaban Jesucrist par mquée yalguth loo Jesucrist por cón che'n na'. No por cona, na', ne, ndxàalque' ta' na' yalnaban na' par gath na' por cón che'n hues xtàa na' chele'i nquin tataa gàca loo na'. <sup>17</sup> Lomisque' ne, chele' chó na' nzo co' ndxàp che'n no ñèe na'a ndyac tedib hues xtàa na' yaltii nde che con' loo hues xtàa na', no ne'lyatte lezo' na' ñèe na' hues xtàa na'a, ¿xá mod lu' na' na' loo mèn le' na', lìcque', nque' lezo' Diox dib nzo yéc na' no dib nzo lezo' na', sya? Pà nque' lezo' na' Diox chele' na' tataa ndli, ¿lé'? <sup>18</sup> Gu' co' nac xal xgan' bix daa loon, ndlyazen iante gab gu' le' gu', lìcque', nque' lezo' ñèe gu' hues xtàa gu'. Más hues gàca loo gu', lìcque', ngue lyath no gu' hues xtàa gu' loo con' nde che loo hues xtàa gu'.

*Trè' ndlu' xá mod gáp mèn yalxla's loo Diox no ne'zyebte mèn loo Diox.*

<sup>19</sup> No chele' na' tataaque' ndli, sya, naneeque' na' no nonque' na' nac na' mèn co', lìcque', ndli co' nac lìcpe'. No lomisque' mod, nec thib mod no nec tedib mod ne'zyebte na' loo Diox. <sup>20</sup> Tac chele' xtùuz na' no lezo' na' ndli par nteche ntexyath na' loo lezo' na' por ndxep con' ye'rsin' co' nden' na' mbli na', nanee na' le' Diox nac más Diox roo Diox xèn leque na' par ñèe Diox no ndla's Diox cón che'n ryethe con' mbli na'a. Diox non nque' lezo' na' Diox mastale' nden' lezo' na' ndxep vez inacte con' huen con' co' ngue li na'. <sup>21</sup> Cona, ngue niin loo gu', mèn huesen: Chele' na' nden' le'n lezo' na' ingue lide na' chol con' ye'rsin', más gáp na' yalxla's no ne'tolode zyebe na' loo Diox co' ngüi' loo na' thidtene. <sup>22</sup> Le' sya, Diox li par que no na' ryete con' ña'b na' loo Diox por ndyubdi's na' no ndli na' co' ñibe' Diox loo na' par li na'. No ndli na' con' co' ndxòo lezo' Diox. <sup>23</sup> No con' co' ñibe' Diox loo na' par li na' no par tyubdi's na' nac le' na' yila's no gáp na' yalxla's loo xgan' Diox co' nac Jesucrist no que' lezo' na' ñèe na' thib hues xtàa no tedib hues xtàa na' xalque' mnibe' Diox loo na' par que' lezo' na' ñèe na' hues xtàa na'. <sup>24</sup> Mèn co' ndyubdi's di's co' ñibe' Diox li mèn, mèn nzo ban noque' Diox no nzo ban noque' Diox mèn. Na' nanee le' Diox nzo banque' loo na' por cón che'n Xpii Natú' co' mbli Diox nzo loo na'.

#### 4

*Trè' ndlu' xá mod non mèn cón che'n Xpii Natú' che'n Diox no xá mod non mèn cón che'n xpü ye'rsin' co' ndli ndxàc mèn ngolo ngola's che'n Crist.*

<sup>1</sup> Mèn huesen por cón che'n Jesucrist, gu' co' anze'f nque' lezon ñèen, ne'yila'ste gu' di's co' ndyoodi's chol mèn, mèn co' mbez le' Diox mtel' mèn par nde lu' mèn mèn co' mbez mèn nac cón che'n Diox. Ndxè'leque', huen huen bla's gu' no noo noo ftoodi's no gu' mèn par ñèe gu' no ta' gu' cuent co' huenleque' ñeene' ché', lìcque', nde mèn loo gu' par ndyoodi's mèn cón che'npe Diox o ché' ndyoodi's mèn cón che'npe mèn no maste. Tac loo izlyo' ndxè' ampurte mèn gutyè' nzo co' mbez no co' ndyoodi's le' mèn nac che'npe' Diox no ndyoodi's mèn cón che'npe' Diox. Per yalgutyè'túb nac co' ndyoodi's mèn no co' mbez mèn. <sup>2</sup> Per led gu' cuante. Nare' tan cuent loo gu' no lu'en loo gu' xá mod más ta' gu' cuent no xá mod más libe' gu' mèn co', lìcque', nzo Xpii Natú' che'n Diox loo. Mod ndxè' non gu'i no ta' gu' cuent cón che'n mèn. Ryete mèn co' nda' cuent no mèn co' ngo ro loo taamas mèn le' Jesucrist mbi'th yáal loo izlyo' xalque' ndxáal chol mèn, co' nee di's, ngòc Jesucrist thib mbi' xal na', loo mèn nzo Xpii Natú' che'n Diox, ne. <sup>3</sup> Per mèn co' indxela'ste le' Jesús ngòc thib mbi' xalque' na' no mbez mèn loo taamas mèn le' Jesús ne'ngàcte thib mbi' xalque' na', loo mèn inzode Xpii Natú' che'n Diox. Ndxè'leque', loo mèn nzo thib xpü ye'rsin' co' ndli ndxàc mèn ngolo ngola's che'n Crist. No mbìnque' gu' le' xpü ye'rsin' co' ndli ndxàc mèn ngolo ngola's che'n Crist yi'th loo izlyo'. No nalle' nzole' xpü ye'rsin'a loo mèn loo izlyo'.

<sup>4</sup> Gu' co' nac xal xgan' bix daa loon, gu' nac che'npe' Diox. No ne'nda'de gu' lugar li mèn gan loo gu' par nquedii mèn gu' loo con' co' ndxela's gu' cón che'n Diox. Tac Diox co' nzo no gu', más Diox roo Diox xèn nac Diox leque xpü ye'rsin' co' nzo loo mèn

co' alithe nzi tee ban loo izlyo'. <sup>5</sup> Mèna nac mèn che'npe' izlyo' ndxè' no maste. Por cona, alithe ndyoodi's mèna cón che'n co' nac cón che'n izlyo' ndxè'. Cona, mèn co' nac che'npe' izlyo' ndxè' más ndyub nza di's co' ndyoodi's mèna. <sup>6</sup> Per na' nacque' che'npe' Diox, ey. Mèn co' nanee cón che'n Diox, mèna ndxòn no ndyub nza mèna di's co' ndyoodi's na' loo mèna. Per mèn co' tarte non cón che'n Diox, mèna inda'de lugar par gòn mèn no tyub nza mèn di's co' mbez na' loo mèna. Cona, ngue niin loo gu': Tataa mod ndxàc bé' mèn chó mèn, licque', nzo Xpii Natú' loo, Xpii Natú' co' ndlu' con' co' nac licpe' loo mèn, no chó mèn nzo xpii ye'rsin' loo co' ndli par nquedii mèn loo xtàa mèn.

*Trè' ndlu' le' Diox nac thib Diox co' anze'f nque' lezo' ñèe mèn.*

<sup>7</sup> Mèn huesen por cón che'n Jesucrist, gu' co' anze'f nque' lezon ñèen, ndxàalque' que' lezo' na' thib xtàa na' no tedib xtàa na' tac yub Diox ndli nque' lezo' mèn ñèe mèn hues xtàa mèn. Ryete mèn co', licque', ndxàp mod par nque' lezo' mèn ñèe mèn hues xtàa mèn, mèna nac xin' Diox no nda' mèna cuent cón che'n Diox. <sup>8</sup> Per mèn co' indxàpte mod par que' lezo' mèn ñèe mèn hues xtàa mèn, mèna tarte ta' cuent cón che'n Diox. Tac Diox nac thib Diox co' nque'que' lezo' ñèe mèn. <sup>9</sup> Diox mblu' xá mod susque' nque' lezo' Diox ñèe Diox na' co'se' mtel' Diox angoluxte xgan' Diox loo izlyo' ndxè' par gàca loo na' yòo ban no na' Diox thidtene por cón che'n Jesucrist, xgan' Diox. <sup>10</sup> Yende mod gab na', licque', axta arid nque' lezo' na' Diox tac ndlu' na' inque'de lezo' na' arid ñèe na' hues xtàa na'. Per Diox mblu'pe' loo na' xá mod, licque', nque' lezo' Diox ñèe Diox na' no ndyac no Diox na'. Non na', licque', nque' lezo' Diox ñèe Diox na' tac axta Jesucrist co' nac xgan' Diox mtel' Diox par leque yub Jesucrist mda' yalnaban Jesucrist par nguth Jesucrist loo cruz por cón che'n xquin na' no xtol na'. Tataa mbli Diox mxactii Jesucrist par tataa mod mton' Diox xquin na' no xtol na'.

<sup>11</sup> Cona, ngue niin loo gu' co' nac mèn huesen por cón che'n Jesucrist, gu' co' anze'f nque' lezon nèn: Chele' Diox mblu' loo na' tataa mod anze'f nque' lezo' Diox ñèe Diox na' no ndyac no Diox na', no non na' tataa mbli Diox, le' sya, na', ne, ndxàalque' que' lezo' na' ñèe na' thib xtàa na' no tedib xtàa na'. <sup>12</sup> Yende chó mèn thidteneque' tarte ñèe xá ñaa Diox. Per chele' na' nque'que' lezo' ñèe na' thib xtàa na' no tedib xtàa na', Diox nzo ban no na'. No tataa mod nanee na' nque'que' lezo' na' ñèe na' thib xtàa na' no tedib xtàa na' xalque' nque' lezo' Diox ñèe Diox na'. <sup>13</sup> Con' co' ndlu' loo na' le' Diox nzo loo na' no nzo na' loo Diox nac le' Diox mbli ngulàa Xpii Natú' loo na' par thidtene yan' no Xpii Natú' na' par ñibe' Xpii Natú' loo na'. <sup>14</sup> Nu' co' nac mèn co' ndxe' di's che'n Jesucrist, yub nu' mbui'pe' loo Tad Jesucrist. No nda' nu' cuent no ndyoodi's nu' loo gu' le' Diox xud na' mtel' Jesucrist co' nac xgan' Diox par mbi'th telá' xgan' Diox mèn loo izlyo' loo con' ryes, mèn co' ndyal yila's loo Jesucrist. <sup>15</sup> Chol mèn co' nda' cuent no co' nde'th le' Jesús nac xgan' Diox, mèna nzo ban no Diox no nzo ban no Diox mèna.

<sup>16</sup> Cona, non na' no nanee na' no ndxela's na' le' Diox nque'que' lezo' ñèe Diox na'. Diox nque'que' lezo' ñèe Diox mèn. Mèn co' nque' lezo' ñèe thib xtàa no tedib xtàa, mèna nzo ban no Diox no nzo ban no Diox mèna. <sup>17</sup> Con' co' nac lult con' co' gàc loo na' por nque' lezo' na' ñèe na' Diox loo izlyo' ndxè' nac le' na' gáp yalxla's loo Diox no ne'zyebte na' co'se' tyoo na' loo Diox par tub rez Diox cón che'n na'. Tac na' non no nanee na' xal nque' lezo' Jesucrist ñèe Jesucrist mèn, tataaque' tolo que' lezo' na' ñèe na' hues xtàa na' láth naban na' loo izlyo' ndxè'. <sup>18</sup> Lomisque' ne, mèn co', licque', nque' lezo' Diox, yende por cón zyeb mèna loo Diox par gab mèna loo lezo' mèna tetii Diox mèna por thib con' co' iñaade li mèn. Ndxè'leque', mèn co' nali no nambii nque' lezo' Diox, nec thib mod no nec tedib mod ne'zyebte mèna loo Diox. Tac mèn co' nzyeb ñèe chol con', leque mèna ncu'a'n mod ndxàc yalquii loo mèna. Cona, mèn co' nzyeb ñèe chol con', mèna yende mod thib lite que' lezo' mèna Diox.

<sup>19</sup> Nque' lezo' na' Diox tac Diox ner mque' lezo' gunèe Diox na'. <sup>20</sup> Per chele' chol mèn mbez nque' lezo' mèn ñèe mèna Diox, no leque làth xtau'a, ndxecloo mèna no ndxòo xyàn lezo' mèna ñèe mèna xtàa mèna, mèna nac mèn gutyè'. Tac chele' chol mèn inque'de lezo' ñèe mèn hues xtàa mèn co' nzi ban no mèn, ne' ne' inque' lezo' mèn

Diox co' indxú'de loo mèn. <sup>21</sup> Diox mtan' di's loo na' no mnibe' Diox loo na' li na' xal ngue niin loo gu' ndxè' le' mèn co' mbez nque' lezo' mèn Diox, mèn ndxàalque' que' lezo' ñèe hues xtàa mèn.

## 5

*Trè' ndlu' xá mod leque mèn li par ya ne'tolode li mèn ryethe con' ndyub yo'flezo' mèn li mèn, con' co' nac cón che'n xab izlyo'.*

<sup>1</sup> Ryete mèn co' ndxela'spe' le' Jesús nac Crist, mèn nac xin' Diox. No chele' mèn, lìcque', nque' lezo' Diox co' nac xud na', que' lezo' mèn ñèe mèn hues xtàa mèn co' nac xin' Diox, ne. <sup>2</sup> Co'se' nque' lezo' na' Diox no ndli na' con' co' ñibe' Diox loo na' li na', sya, nda' na' cuent le' na' nque'que' lezo' ñèe na' hues xtàa na' co' nac xin' Diox, ne. <sup>3</sup> Co'se' nque' lezo' mèn Diox, ndyubdi's mèn loo con' ñibe' Diox loo mèn li mèn. No con' co' ñibe' Diox loo mèn li mèn inacta arid nè no ne' ne' inaca con' arid nagàn. <sup>4</sup> Tac ryete mèn co' nzope' loo cón che'n Diox no co', lìcque', nac xin' Diox, leque mèn inda'de lugar par ñibe' con' co' nac cón che'n xab izlyo' par li mèn con' ye'rsin'. No por ndxàp mèn yalxla's no ndxela's mèn loo Diox con'a ndli inda'de mèn lugar par ñibe' con' co' nac cón che'n xab izlyo' par li mèn con' ye'rsin'. <sup>5</sup> Mèn co' inda'de lugar par ñibe' con' co' nac cón che'n xab izlyo' par li mèn con' ye'rsin', mèn nac angoluxte mèn co' ndxela'spe' le' Jesús nacpe' xgan' Diox.

*Trè' ndlu' cón che'n co' ndlu' no co' nda' cuent cón che'n Jesucrist.*

<sup>6</sup> Con' co' ndlu' le' Jesucrist nac xgan'pe' Diox co' ngro' loo bé' no mbi'th Jesucrist loo izlyo', con'a nac co' ngòc bautizar Jesucrist le'n nít no co' nac nguth Jesucrist loo cruz. Iante naca co' ndlu' ngòc bautizar Jesucrist le'n nít no maste. Ndxè'leque', ngòc bautizar Jesucrist le'n nít no nguth Jesucrist loo cruz. Leque yub Xpii Natú' ndlu' cón che'n co' ngòc loo Jesucrist loo na'. Inquediide Xpii Natú' mèn co' nac cón che'n con' co' ndlu' Xpii Natú' loo mèn. <sup>7</sup> Nzo son xa' co' nda' cuent loo bé' no co' ndlu' loo na' cón che'n con' ndxè', ne: Diox xud na', leque yub Jesucrist co' nzole', no Xpii Natú'. No loo yon xa' ndxè', thidte ndlu' xa' cón che'n con' ndxè'. <sup>8</sup> No lomisque', nzo son con' loo izlyo' ndxè' co' ndlu' cón che'n Jesucrist. Son con'a nac Xpii Natú', no co' nac ngòc bautizar Jesucrist le'n nít, no co' nac nguth Jesucrist loo cruz. No thidte ndlu' yon con' ndxè' le' Jesucrist nac xgan' Diox. <sup>9</sup> Chele' na' ndxela's di's no cuent co' ndlu' no co' nde'th mèn loo izlyo' ndxè', más ndxàal yila's na' di's co' ndlu' no co' nde'th Diox tac masre' ntac di's co' mbez Diox. No leque yub Diox nac xa' co' mblu' no co' mde'th cón che'n xgan'pe' Diox. <sup>10</sup> Mèn co' ndxela's loo xgan' Diox no loo cón che'n xgan' Diox, mèn non no nte'que' lezo' mèn no ndxela'sque' mèn le' Jesucrist nac xgan'pe' Diox. Per mèn co' indxela'ste loo Diox no loo cón che'n Diox, mèn ndli ndxàc Diox Diox gutyè' tac ne'ngala'ste mèn di's co' gunii Diox cón che'n xgan' Diox. <sup>11</sup> Con' co' gunii Diox loo na' cón che'n Jesucrist nac co' ndlu' Diox loo na' le' na' yò ban no Diox thidtene por cón che'n Jesucrist. <sup>12</sup> Mèn co' nzo loo xgan' Diox no co' ndxela's loo xgan' Diox, mèn yò ban noque' Diox thidtene. Per mèn co' inzode loo cón che'n xgan' Diox no mèn co' indxela'ste loo xgan' Diox, mèn ne'yò ban node Diox thidtene.

*Juàn tolo ndyoodi's loo cart ndxè' co' nac lult di's co' ngue co'x Juàn loo mèn.*

<sup>13</sup> Ngue que'en ye's co' nac cart ndxè' loo gu', gu' co' ndxela's loo xgan' Diox no loo cón che'n xgan' Diox, par non gu' no par ta' gu' cuent le' gu' yò ban noque' Diox thidtene yiloa.

<sup>14</sup> Ndxàp na' yalxla's loo Diox no ndxela's na' loo Diox tac na' nanee chele' na' ña'b ndxep con' loo Diox, con' co' nac co' neepe' lezo' Diox, Diox ndxònque' co' mbez na'.

<sup>15</sup> Texal nanee na' le' Diox ndxònque' co' mbez na' loo Diox, nanee na', ne, le' Diox ndlique' par que no na' con' no gac che'npe' na' con' co' ña'b na' loo Diox.

<sup>16</sup> Chele' gu' ñèe chol hues gu' o thib amiu gu' ngue cua'n xquin no ngue cua'n xtol co' inacte co' ncàb ryo xà' hues gu'a loo Diox thidtene co'se' gath hues gu'a o amiu gu',



ndxàal cuez gu' Diox por hues gu' o amiu gu' par ta' Diox lugar yòo ban no hues o amiu gu'a Diox thidtene, chele' hues gu' o amiu gu', lìcque', incua'nte xquin no xtol co' ncàb ryo xà' hues gu' loo Diox thidtene co'se' gath hues gu'. Nzoque' mèn co' ncua'n xquin no xtol par ncàba loo mèn ryo xà' mèn loo Diox thidtene co'se' gath mèn. Per ingue bezten loo gu' cuez gu' Diox por cón che'n mèn co' tataa ngue cua'n xquin no co' tataa ngue cua'n xtol. Nee mèn cón che'n mèn. <sup>17</sup> Ryethe con' ye'rsin' co' ncua'n mèn loo Diox ncàb xtol mèn no xquin mèn. Per nzoque' xquin mèn no xtol mèn co' ndli mèn co' incàbte ryo xà' mèn loo Diox thidtene co'se' gath mèn par tyacti mèn yiloo.

<sup>18</sup> Nanee na' le' mèn co' ngo cuent Diox nac xud mèn, mèn iasendlide par ncua'n mèn xtol no ncua'n mèn xquin mèn tac xgan' Diox nquenap mèn par ne'gaàlto no ne'cobyade Mebizya mèn arid.

<sup>19</sup> Nanee na' le' na' nac che'npe' Diox. No nanee na' le' mèn dib athu loo izlyo' ndli co' ndlya's Mebizya no ndli mèn co' nee lezo' Mebizya.

<sup>20</sup> Nanee na', ne, le' xgan' Diox mbi'thle' loo izlyo' ndxè'. No mbli xgan' Diox ndxác na' no nda' na' cuent cón che'n Diox co' nac lìcpe'. No thidte nzo ban no na' Jesucrist co' nac xgan' Diox. Jesucrist inquediide mèn no indyè'de Jesucrist. Jesucrist nac merpe' Diox. No ndli Jesucrist ngue no na' yalnaban, co' nee di's, yòo ban no na' Diox thidtene.

<sup>21</sup> Gu' co' nac xal xgan' bix daa loon, ey, blá' gu'. Ya ne'tolode li gu' cas chol mdo' bix co' inactive Diox, co' yende cón ntac, ndee gu'. Taandxè' gàca loo gu'.

## Mbryop Cart Co' Mque' Juàn Ye's Loo Mèn

*Juàn ndlu' con' co' nac licpe' no xá mod ndxàal que' lezo' mèn ñèè mèn hues xtàa mèn.*

<sup>1</sup> Daa, Juàn, co' ndyoo ner no co' ndyoo naa loo mèn loo cón che'n Diox, daa ngue que' ye's co' nac cart ndxè' loo U', ftanen, U' co' Diox mcui. No ngue que'en cart ndxè' loo myen' co' nac xin' U' co', licque', nque' lezon ñèen. No iante daade nque' lezo' ñèen U' con xin' U'. Ndxè'leque', ryete mèn co' nda' cuent no co' non cón che'n co' nac licpe' nque' lezo' ñèè U' con xin' U'. <sup>2</sup> Nque' lezon ñèen gu' por cón che'n con' co' nac licpe' co' nden'en le'n lezon no co' thidteneque' nte'que' lezon no co' thidteneque' ne'yathlasten. <sup>3</sup> Ndlyazen le' Diox co' nac xud na' no Tad Jesucrist na', co' nac xgan' Diox, li gac ryete con' ndac loo gu' no lyat lezo' Diox no Tad Jesucrist ñèè Diox no Tad Jesucrist gu'. No ndlyazen yo nagàl lezo' gu' loo Diox no cue ban gu' rye nda gu' no rye ndye'th gu' làth xtàa gu'. Tataa gaca loo gu' chele' gu', licque', nque' lezo' ñèè gu' mèn co' nac hues xtàa gu' no chele' gu' ante nzi tee ban loo co' nac con' licpe'.

<sup>4</sup> Anze'f thib gust mda' lezon co'se' gunèen ndxep myen' co' nac xin' U' pezea. Le' myen' nzi tee banque' loo co' nac con' licpe' xalque' nac co' mnibe' Diox loo ryete na' par li na'. <sup>5</sup> No nalle' ña'ben loo U', guna' co' nac xal ftanen, fque' lezo' gu' gunèe gu' thib xtàa gu' no tedib xtàa gu'. Per di's co' ngue tel'en loo gu' ndxè' nalle' inacta tedib di's co' nac tedib yalnibe' cub. Ndxè'leque', naca leque di's co' ngòc di's co' mnibe' Diox loo ryete na' axta co'se' mtlo mbìn gu' no ngola's gu' cón che'n Jesucrist. <sup>6</sup> Tac mèn co', licque', nque' lezo' Diox, mèn ndyubdi's co' ñibe' Diox loo mèn par li mèn. No di's co' mnibe' Diox co' nac leque di's co' mbìn gu' axta co'se' mtlo mbìn gu' no ngola's gu' cón che'n Jesucrist nac con' ndxè': Fque' lezo' gu' gunèe gu' hues xtàa gu'. Thiba con' ndxè'.

*Trè' ndlu' Juàn cón che'n mèn gutyè' co' ndly'a's quedii mèn co' ndxela's loo cón che'n Diox.*

<sup>7</sup> Le' tediba na, ngue que'en ye's ndxè' loo gu' par non gu' nzi teele' huax mèn gutyè' loo izlyo'. Mèn nca's no ingo xo'fte mèn le' Jesucrist mbi'th yáal loo izlyo' ndxè' xalque' ndxáal chol mèn loo izlyo'. Mèn co' tataa nca's no nzi tee quedii mèn mèn, mèn nac mèn gutyè'pe' no nacpe' mèn ngolo ngola's che'n Crist. <sup>8</sup> Guna', anderhuen gu', chó Diox chó nee gu', fquenap gu' gu' no leque gu' bla's loo gu' par ne'gacte zin' co' ngue li gu' par nedrè' thib zin' co' anxle' ngue li gu'. Ndxè'leque', chó Diox chó nee gu', fquenap gu' gu' no bla's gu' loo gu' par ne'gacte loo gu' le' Diox ne'ta'de con' ndac loo gu' par gac che'n gu' con' ndaca yiloa por mbìn gu' di's che'n mèn gutyè'a.

<sup>9</sup> Tac chol mèn co' ndlu' co' nac cón che'n xley' che'n Crist tedib mod no co' nac tedib yalnibe' loo yalnibe' co' mnibe' Crist loo na' par li na', no co' mblá'ya' no co' mque' cón che'n Crist thib lad co' inacte co' mblu' Crist co' ndli na', mèn inzode loo cón che'n Diox. Per mèn co' nzoque' loo cón che'n Crist no ante loo con' co' mblu' Crist co' nac co' ndli na', mèn nzoque' loo cón che'n xud na' Diox. No nzoque' mèn loo cón che'n Jesucrist, xgan' Diox. <sup>10</sup> Chele' chó mèn yith liz gu' no ndlu' mèn cón che'n Diox tedib mod co' nac xà'le' yalnibe' xal ngue niin loo gu' ndxè', ne'ta'de gu' lugar yò mèn liz gu' no ne' ne' càb gu' loo mèn co'se' yò mèn liz gu'. <sup>11</sup> Tac chol mèn co' nda' lugar ncàb loo mèn par cued mèn mase ndxep liz mèn, le' sya, mèn ngue ta' lad che'n mèn ye'rsin'a.

*Juàn ngue yab loo mèn: Con' ndxè' nac lult di's co' ngue que'en loo gu'.*

<sup>12</sup> Anze'f huax con' ndlyazen niin loo gu'. Per indlyasten niina loo gu' xal co'se' nque'en ye's co' nac cart loo gu'. Tac daa ndlyasque' gal neen máa gu' par nedrè'. No ndlyazen tyoodiz non gu', co' nee di's, hui'en loo gu' no hui' gu' loon par tataa mod tyacpe' lezo' gu' con daa.

<sup>13</sup> Myen' xin' xa' co' nac bél U', co' Diox mcui, ne, co' nac che'n Diox, myen' ngue nii Diox loo gu' loo cart ndxè' ne. Taandxè' gaca loo gu', ndee gu'.

## Cart Co' Mque' Juàn Ye's Loo Thib Mbi' Co' Ngro' Lèe Gay

*Mèn mda' cuent loo Juàn le' mbi' co' lèe Gay, huen nac mbi' no huen nque tee ban mbi' loo cón che'n Tad Diox.*

<sup>1</sup> Daa, Juàn, co' ndyoo ner no co' ndyoo naa loo mèn loo cón che'n Diox, daa ngue que' ye's co' nac cart ndxè' lool, Gay, lùu co' ndxàc amiu daa co', licque', nque' lezon ñèen.

<sup>2</sup> Gay, lùu co' nque' lezon ñèen, co'se' mbezen Diox ña'ben loo Diox anze'f con' ndac gac lool no yende chó yíiz tyacl par nedrè'. No ña'ben loo Diox par li Diox gac con' ndac loo lùu loo izlyo' ndxè' xalque' huen nzo lezo'l no ndyac lezo'l loo co' nac cón che'n Diox, ndee. <sup>3</sup> Anze'f thib gust mbyan' lezon co'se' mbi'th ndxep mèn hues na' loo cón che'n Crist par nedrè'. Mèna mda' cuent cón che'n lùu loon. Co'se' mbere mèna ndye'th mèna, mda' mèna cuent loon le' lùu altantque' ndyoo loo cón che'n Diox. No mda' mèna cuent loon le' lùu thidteneque' ngue tee ban loo con' co' nac con' licpe'. <sup>4</sup> Gay, yende tedib con' co' mbli co' nda' más gust lezon xal co'se' ndxònen le' lùu co' nac xal xin' bix daa loon ngue tee, licque', xalque' nac co' nac con' licpe'.

<sup>5</sup> Gay, lùu co' nque' lezon ñèen, altantque' ndool loo zin' co' ngue xo'f zin'l cón che'n Diox loo mèn co' nac mèn hues xtàa na'. Más de cona, nxo'f zin'l zin'a loo mèn co' nac mèn tith co' nde lool par nedrè', ne. <sup>6</sup> Mèna mda' cuent loo rye mèn co' nqueltàa loo cón che'n Diox làaz mèn xá mod nque'que' lezo'l ñèel mèna. Bli favor, ftolo ta' con' nquin mèna par que no mèna con' naquin mèna co'se' tyen mèna ned bii mèna loo gu'. No maste blii loo mèna xal ndxòo lezo' Diox, ndee. <sup>7</sup> Tac mèna mxenle' ned, nde mèn par nedrè' par tolo xo'f zin' mèna cón che'n Jesucrist. No axta nalle' yende valor loo mèna ña'b mèna ayud loo mèn co' tarte yila's loo cón che'n Jesucrist no cón che'n Diox. <sup>8</sup> Por cona, ngue niin lool, Gay: Ndxàalque' xyo'f yéc na' cón che'n mèna par tataa mod lyath no na' mèna por nda lo mèna yalbàn co' nac licpe' che'n Diox loo mèn.

*Juàn mque' ye's loo mèn le' Diotr inque tee ban ndacte loo cón che'n Diox.*

<sup>9</sup> Daa mque' thib cart loo mèn co' nqueltàa loo cón che'n Diox par nedrè' pezea, Gay. Per co'se' mque'en cart loo mèna, daa mbìn le' mbi' co' lèe Diotr ne'ndalte li xal ndxaben no xal mnibe'en loo carta. Tataa mbli Diotr tac más mdyubla's Diotr ñibe' Diotr làth gu' co' nqueltàa par nedrè'. <sup>10</sup> Por cona, chele' daa gal nee máa gu' par nedrè', cuanen mod gaben loo Diotr loo xnaa loo rye mèn co' nqueltàa par nedrè' chonon ngue tee nii Diotr no ngue tee ta' Diotr cuentyix co' nac con' gutyè' cón chenen. No iante con'ade nac co' ngue li Diotr. Ndxè'leque', ne'ndubdi'ste no ne'nglide Diotr cas di's co' mtel'en loo cart par ta' mèna lugar yòo mèn co' mtel'en loo gu' làth gu'. No más de cona, mcà Diotr loo gu'. Inda'de Diotr lugar par ta' gu' lugar yòo mèna làth gu', ne. Ale ndli Diotr par ngo' gu' mèn co' mtel'ena làth gu'.

<sup>11</sup> Gay, lùu co' nque' lezon ñèen, ne'lidel con' ye'rsin'. Más huen, bli con' ndac. Tac mèn co' ndli con' ndac, mèna nac che'npe' Diox. Per mèn co' ndli con' ye'rsin', mèna thidteneque' tarte ta' cuent cón che'n Diox.

*Juàn ngue ta' cuent loo mèn loo cart ndxè' cón che'n mod ndac co' ngòp thib mbi' co' lèe Demetr.*

<sup>12</sup> Tan cuent lool, Gay, ryete mèn nabe'ste ndyoodi's cón che'n Demetr. No con' co' nde teele' ndli Demetr, leque con'a ndlu' le' Demetr nacque' thib mbi' ndac no nque tee ban ndac Demetr loo con' co' nac licpe'. Nu', ne, nda' cuent cón che'n Demetr le' Demetr nac thib mbi' ndac. Gu' neequè' le' nu' ndyoodi'sque' ante co' nac con' licpe'.

*Con' ndxè' nac lult di's co' ndyoodi's Juàn loo Gay.*

<sup>13</sup> Anze'f huax di's mque non par mblyazen ndan cuent lool, Gay, per ne'ngòode lezon mtel'en di'sa lool loo cart ndxè'. <sup>14</sup> Tac daa mbedque', chàa, gal neenl par nedrè', co' nee di's, hui'en lool no hui'l loon par tataa mod tyoodi's yub na'.

<sup>15</sup> Ndlyazen yo nagàl lezo'l loo Diox no que tee banl rye ndal no rye ndye'thl con mèn co' nac mèn hues xtàal. Lomisque' ne, mèn co' ndxàc amiu na' par ned nzon ndxè' ngue nii Diox lool loo cart ndxè'. Bli favor, gunii Diox loo thib thib mèn co' ndxàc amiu na' par nedrè', ndee. Fte' lezo'la no maste. Taandxè' gàca.

## Cart Co' Mque' Jud Ye's Loo Mèn

*Jud mque' ye's co' nac cart ndxè' loo mèn co' Diox mcui no mèn co' Diox mblec loo cón che'n Diox.*

<sup>1</sup> Daa, Jud co' nac thib mbi' co' nxo'f zin' cón che'n Jesucrist, daa ndxàc hues Cob. Ngue que'en cart ndxè' loo gu', gu' co' Diox mblec loo cón che'n Jesucrist, Diox co' nac xud na'. Diox mblo' xà' gu' loo con' co' nac cón che'n xab izlyo' par ngòc gu' mèn che'npe' Diox. Gu' nac mèn co' Diox nquenap por thidte ndxàc gu' con Jesucrist. <sup>2</sup> Ndlyazen lyat lezo' Diox ñèe Diox gu'. No ndlyazen yo nagàl lezo' gu' loo Diox no cue ban gu' rye nda gu' no rye ndye'th gu' làth xtàa gu'. No ndlyazen tolo lu' Diox loo gu' le' Diox nque'que' lezo' ñèe Diox gu'.

*Trè' ndlu' cón che'n mèn gutyè'.*  
(2 Pedro 2.1-17)

<sup>3</sup> Mèn huesen por cón che'n Jesucrist, gu' co' anze'f nque' lezon, anze'f nden'en le'n lezon no ndlyazen que'en thib ye's co' nac cart ndxè' loo gu' co' ndlu' cón che'n xá mod lyá' mèn loo con' ryes tac ryete na' mblyá'le' loo con' ryes no loo con' ye'rsin'. Per nalle', nden' lezon nquin que'en ye's loo gu' par co'xen loo gu' no ña'ben loo gu' nalas gure gu' loo cón che'n Crist co' ndxela's gu' par gác gu' càb ndac gu' loo mèn ye'rsin' co' nzote mod gác càb gu' par gàca loo mèn làth gu' ne'tyoo xà'de lezo' mèn loo cón che'n Diox. Ndxè'leque', tolo té'th mèn no tyubdi's mèn loo cón che'n Diox. No mbli Diox thidte vez ngòc thib con' loo Jesucrist par gàca le' ryete mèn co' ndlya's no co' ndyal yila's loo cón che'n Jesucrist, mèna lyá' loo con' ryes. No ndxàc con'a loo rye mèn co' nac che'npe' Diox. <sup>4</sup> Tac ndxep mèn ngòc làth gu' con mod gutyè' co' ndxàp mèna. Cón che'n mèna ndlu' loo libr co' nac xti's Diox le' Diox mblye'le' más pólle'a cón che'n mèna le' mèna tyactii thib con' co' nquin li Diox loo mèna. Nac con'a thib con' co' nzyalque' mèna gàca loo mèna. Mèna nac mèn ye'rsin'túb. Mèna indlide cas loo con' co' nac cón che'n Diox. Ndi mèna cuent le' con' co' nac cón che'n Diox nac par gác cón che'n Diox loo mèn no le' Diox alithe nda' lugar li mèn con' ye'rsin' par que tee ban mèn xalque' ndlya's mèn. Ale ncà mèna cón che'n Diox, Diox co' nac thidte Diox co' ñibe' loo na'. No ncà mèna loo cón che'n Tad Jesucrist na'.

<sup>5</sup> Mastale' nonle' gu' cón che'n con' ndxè', ndlyazen te' lezo' gu' co' huenleque' con' mbli Tad Diox. Mastale' mbli Tad thib con', co' nee di's, mbli Tad Diox ngro' mèn co' ngòc mèn co' ngua lec nación Israel le'n nación Egipt, ngoloa, mtelux Diox mèn co' ngo làtha, mèn co' ne'ngala'ste loo Diox. <sup>6</sup> Tataaguè' mbli Tad Diox con angl co' ne'ngxecte nquenap loo con' ndxàal ngli angl loo Tad Diox. Ndxè'leque', ngro' angl loo bé' co'te' ngòc liz angl no làaz angl co'te' mxo'f zin' angl cón che'n Diox loo Diox. Nalle' Diox mbli nzo angl pres par tyub rez cón che'n angl co'se' gác lult huiz co' gác huiz yaad huiz lyen co'se' tub rez Diox cón che'n ryethe con'. Nzo angla thib lugar co'te' nacuai xal mèn co' natedó' con caden thidtene. <sup>7</sup> No fte' lezo' gu' cón che'n con' co' mbli Tad Diox loo mèn ciuda Sodom no loo mèn ciuda Gomor no loo taamas mèn co' ngureri' gax par neda. Xalque' mbli angla chol con' ye'rsin' par tetii Diox angla, tataa mod mbli mèn ciuda Sodom no mèn ciuda Gomor rye loothe con' ye'rsin' axta mbli mèna yalmbi' con xtàabi' mènbi'a. No thib mod tedib mod mbli mèna rye loothe con' ye'rsin' co' indxàalte li mèna. Por cona, Diox mtelux mèna thib mod co' ndlu' loo taamas mèn loo izlyo' le' mèn co' ne'tyalte li cas loo cón che'n Diox no ne'tyalte mèn yòc mèn loo cón che'n Diox, mèna tyactii thidtene loo quii no loo bèel xal mxactii mèn ciudaa loo quii no loo bèel.

<sup>8</sup> Per mastale' tataa ngòca loo mèn ciuda Sodom no loo mèn ciuda Gomor, ale lomisque' mod, ne, tataaguè' mbli mèn ye'rsin' co' nac cón che'n mèn co' ngue que'en ye's loo gu' ndxè'. Nsa' lezo' mèna cón che'n con' ye'rsin' co' tolo ndlya's mèna li mèna. Ale leque mèna nte zab mèna. Ale thib lad nque' mèna yalñibe' che'n Diox par xiis no mèna Diox.



No nazab mbez mènà cón che'n angl co' ñibe' Diox loo loo bé'. <sup>9</sup>Fte' lezo' gu', ne, xal nac con' co' ngòc loo thebol Moisés co'se' ngure mcà angl co' lèe Miguel bél'yòo lad thebol Moisés loo Mebizya. No mbree mcà Mebizya bél'yòo lad thebol Moisés loo Miguel co' nac angl co' ñaare' más no co' ñibe' tachu'th más loo rye taamas angl. Ne'nglide Miguel ryes quexù' no queyèe Miguel Mebizya no ne'ngniide Miguel ngòc nguàal con' loo Mebizya co'se' ngue toodi's no Miguel Mebizya cón che'n bél'yòo lad thebol Moisés. Ndxé'leque', nado' di's nado' cuent ndxab Miguel loo Mebizya: Yende con' niin lool. Yan' cón che'n con' ngue lil cón che'n Diox. Yub Diox yool. <sup>10</sup>Per ngue niin loo gu' tedib vez cón che'n mèn ye'rsin' ndxè': Mènà ñii yèe ñii tii cón che'n con' co' ne'ñeede mèn no co' ne'ta'de mèn cuent. Neeque' na' le' chol má' ndli xalque' mbli Diox par ndli má', ¿lé'? Per mèn ye'rsin' masre' con' ndli leque má' tac, mastale' non mèn ye'rsin'a xá mod ndxàal li mèn loo costumbr co' nac con' ndac co' ndli mèn loo izlyo' ndxè', per ndxe'leque', le'le' ndli mènà par nte zab mènà mènà por mod ye'rsin' co' ngue no mènà loo costumbr co' ndli mèn'. No tataa mod nte zab mènà leque mènà por con' ye'rsin' co' ndli mènà. No tataa mod ncàb loo mènà lyux mènà.

<sup>11</sup> Prob mèn ye'rsin'a izlyo'. Tac ngue lique' mènà xalque' ngòc co' mbli Caín. Mènà ndxath nquii ñèe tmi no nzi tee huanpe' mènà loo cón che'n Diox xalque' ngòca loo Balaam. No gac yaltii loo mènà no lyux mènà xalque' ngòca loo mbi' co' ngro' lèe Coré co' mblyux por mbli mbi' ngòc nguàal con' loo Moisés. Tataa gac loo mèn ye'rsin'a, ne. <sup>12</sup>Mènà ndxàp thib mod ye'rsin'. Co'se' ndli gu' thib lni chu'th par nqueltàa gu' par hua gu' sa lua' gu' con xtàa gu' co' ndxela's loo Tad Diox tac nque' lezo' gu' ñèe gu' hues xtàa gu', negadi's ndxòo mènà làth gu' par hua xle' mènà con gu'. No con' co' ndli mènà ndli nthyon taamas mèn. Ndxòo mènà xi'th gu'. Ndyac lezo' mènà axta plóthe co'se' ndxuhua mèn no ndxu mèn. No axta ne' ne' indxàp mènà mod loo co' ndli mènà làth gu'. No nac mènà xal myen' bix co' nqueno má' no co' nquenap má' co' ndlá'ya' má' por nguith myen', no por nazin' myen', no por ndli myen' ante co' neete lezo' myen'. Nac mènà xal xcuaui biiz co' alithe ndri'th loo bé' co' ndxe' mbii, co' yende cón ntac tac indlàade xcuaui yuu. Nac mènà xal yaa xlè co' inda'de xlè co'se' nac tiemp che'n xlè. Le'le' mbiiz yaa xlèa. No ale ngu'b yaa xlèa. No ale mquib mèn yaaa por tataa ngòca loo yaaa. Tataa gaca loo mèn ye'rsin'a, ne. <sup>13</sup>Nac mènà xal ol co' alithe ndxetoo loo níttó'. Nac con' co' ndli mènà xal fsin' co' ngo' ol níttó' ro níttó'. Fsin'a nac con' zab. No lomisque', tataaguè' nac co' ndli mènà tac con' ndli mènà nac con' zab. No nac con' co' ndli mènà par nthyon taamas mèn. Nac mènà xal mbèel cuet co' ndryo xyo'f thib ned tedib ned loo bé' co' alithe nque tee huan. Diox thidtene mbli ndyub quii ndyub bèel lezo' mènà par yòo ban mènà thidtene lugar co'te' nacuaui tìn' par tyactii mènà thidtene.

<sup>14</sup> Enoc co' ngòc gaz bin co' nde nque xís Adán, Enoc, ne, gunii no mde'th Enoc xal mnibe' Diox loo Enoc cón che'n mèn ye'rsin' co' ngue niin loo gu' ndxè' co'se' ndxab Enoc: Gunèn co'se' nde Tad Diox con anze'f thib mènley' co' nac angl natú' che'n Tad. <sup>15</sup>Nde Tad Diox par tub rez Tad Diox cón che'n rye mèn no par tetii Diox ryete mèn ye'rsin'túba thidtene por cón che'n ryethe con' ye'rsin' co' ngòc con' ye'rsin' co' mbli mèn ye'rsin'a. Tetii Diox mèn ye'rsin'a no zib quii Diox cón che'n mèn ye'rsin'a por cón che'n di's nazab co' gunii yèe gunii tii mèn ye'rsin' co' ngòp xtol cón che'n Tad Diox. <sup>16</sup>Mèn ye'rsin'a nco ñèe cón che'n chol con' co' iñaade loo xtàa mèn. No anze'f ndxòo lezo' mènà xexte ndyoodi's mènà cón che'n tedib mèn. Ante nque tee cua'n mènà mod par tyac lezo' mènà loo mod co' ndyub yo'f lezo' mènà co' ndlya's mènà li mènà co' nac co' neete lezo' mènà. Ndxòo lezo' mènà tyoodi's mèn antúb di's naxal' no di's nate's. No ndyubla's mènà tyoodó' mènà loo mèn par tolo gaa'd ya' mènà mèn no par que' mènà quèe yéc mèn par gac che'n mènà con' co' nac che'n taamas mèn.

*Trè' ndlu' le' Jud ngue co'x mèn co' ndxela's loo cón che'n Jesucrist.*

<sup>17</sup> Per part cón che'n gu', mèn huesen co' nzo loo cón che'n Jesucrist, gu' co' anze'f nque' lezon ñèen: Fte' lezo' gu' le' myen' co' ngòc mèn co' mbe' di's che'n Jesucrist más

pólle'a, <sup>18</sup> mènna mda' cuent ndxè' loo gu': Co'se' gac huiz co' nac lult tiemp ndoore' lith no izlyo', yo huax mèn co' tè'b no co' xis no con' co' nac cón che'n Diox. No que tee ban li mèn ante xal nac mod co' ndyub yo'f lezo' mèn li mèn co' nac thib mod xin no thib mod cap. <sup>19</sup> No tolo niin loo gu' le' mènna li par tyoo xà' lezo' mèn loo cón che'n Diox. No li mènna par gac mèn co' ngòole' loo cón che'n Diox chop ned mèn. Mènna nac mèn co' nzi tee ban li ante co' nac cón che'n xab izlyo'. Inzode Xpii Natú' che'n Diox loo mènna.

<sup>20</sup> Per part cón che'n gu', mèn huesen por cón che'n Jesucrist, gu' co' anze'f nque' lezon ñèen, más bli nèe gu' gu' loo co' nac co' ndxela's gu' tac con' co' ndxela's gu'a nac thib con' más natú' loo Diox. Co'se' cuez gu' Diox, gurez gu' Diox xal nzote mod ndxác gu' par cuez gu' Diox xal ndlyath no Xpii Natú' gu'. <sup>21</sup> Leque gu' hui' xal nzi tee ban li gu' par tataa mod tolo que' lezo' Diox ñèe Diox gu'. Nonque' gu' le' Tad Jesucrist ndlyat lezo' ñèe Tad Jesucrist gu'. Por cona, dib nzo yéc gu' no dib nzo lezo' gu' nzi quee lezo' gu' co'se' zin huiz li Tad Jesucrist yòo ban noque' na' Diox thidtene.

<sup>22</sup> Nado' di's nado' cuent ftoodi's no gu' mèn cón che'n Diox, mèn co' be' ndxác chop loo chop la's par bel'que' ten' mènna le'n lezo' mènna lìcque' nac cón che'n Tad Jesucrist co' mbez gu' no, bel'que', tataa mod li nèe mènna mènna loo cón che'n Tad Jesucrist. <sup>23</sup> Ndlyazen le' gu' li co' nzote mod gac gu' li gu' par lyá' ndxep mèn loo con' ryes, mèn co' nzi tee huan loo Diox, mèn co' alithe nzi ban axta gath mèn co'se' li Diox par yòo mènna ye'rbìil par tyactii mènna thidtene. Tac mènna nac xal thib bro yaa co' nax bed co' co mèn le'n gor yey' yiloo. No ndlyazen lyatque' lezo' gu' ñèe gu' taamas mèn par lyath no gu' mèn par lyá' mènna loo con' ryes. Per nee gu' nee gu' xal ndyoodi's no gu' mènna par ne'gàcte loo gu' tlo gu' li gu' ndxep con' zab no ndxep con' ye'rsin' xal ndli mènna láth ndyoodi's no gu' mènna. Tac ne' yiloo li gu' con' zab xal nzi tee ban li mènna, ne.

*Trè' ndlu' lult di's co' gunii Jud loo cart cón che'n con' roo con' xèn che'n Diox.*

<sup>24-25</sup> Diox co' nac thidte Diox co' ndxácpe' no co' nanee ryethe con', Diox co' nac Diox co' mtelá' na' loo con' ryes, thidte Diox nac co' ndxáp con' roo no con' xèn la's ya' Diox no la's nii Diox par quenap Diox gu' par ne'tyoo xà'de lezo' gu' loo cón che'n Diox no par ne'yitacte lezo' gu' loo cón che'n Diox. No ndxác Diox li Diox par co'se' gac huiz co' tyoo gu' loo Diox gac gu' mèn nambii no mèn nali co' inacte mèn zab loo Diox. No li Diox par xyo'f nde' xyo'f ndla' lezo' gu' co'se' gac huiz co' tyoo gu' loo Diox. Ndlyazen le' loo thidte Diox gac con' roo con' xèn. No ndlyazen le' ryethe mèn no ryethe angl gac nado' no tyubdi's angl loo Diox por cón che'n Tad Jesucrist. No ndlyazen tataa gaca xal ngòca pólle'a no tolo gaca le'n lín' co' ntlo, no le'n lín' co' ndxelo, no le'n lín' co' ne'lith node. Taandxè' gaca, ndee gu'.

## Di's Co' Mblo Xo'f Jesucrist Loo Juàn Co' Mque' Juàn Ye's Loo Mèn

*Trè' ndlu' cón che'n con' co' mblo xo'f Jesucrist loo Juàn.*

<sup>1</sup> Libr ndxè' ndlu' cón che'n co' mblo xo'f Diox loo Jesucrist par ta' Jesucrist cuent cón che'n con'a loo mèn co' mxo'f zin' cón che'n Jesucrist cón che'n con' co' gac loo izlyo' yiloo. Jesucrist mbli par ngro xo'f con' ndxè' loon, daa co' nac Juàn co' mxo'f zin' thib zin' che'n Jesucrist, por angl che'n Jesucrist co' mtel' Jesucrist mbi'th loon. <sup>2</sup> Loo libr ndxè' ndan cuent cón che'n co', licpe', gunèen. Nac daa mbi' co' nda' cuent no co' ndyoodi's cón che'n Diox. Ndan cuent no ndyoodizen cón che'n con' co' mblo xo'f Jesucrist loon, ne.

<sup>3</sup> Huen nda mèn co' ndlab di's ndxè'. No huen nda mèn co' ndyal ndxòn di's ndxè' co'se' ndlab mèn di's ndxè', di's co' mbli' Diox loon par tan cuent loo mèn. No huen nda mèn co' ndli cas no co' ndyubdi's xal mbez di's co' ndub loo libr ndxè'. Tac nde zin' gaxle' tiemp gaca xal mblo xo'f Jesucrist cón che'n con' co' gac loo izlyo' yiloo loon.

*Juàn ngue que' ye's loo mèn co' nqueltàa loo cón che'n Diox, mèn co' nzo ban le'n gaz yèezya' che'n làaz mèn asia.*

<sup>4</sup> Daa co' nac yub Juàn ngue que'en ye's loo gu' co' nqueltàa loo cón che'n Diox, gu' co' nzo ban le'n yèezya' che'n làaz mèn asia. Ndlyazen le' Diox co' thidteneque' nzo, no Xpii Natú' che'n Diox co' nzo loo Diox co'te' ndub Diox loo bé', no Tad Jesucrist, li loo gu' anggac huax con' ndac loo gu' par nedrè'. No ndlyazen le' por cón che'n Diox, no por cón che'n Xpii Natú' che'n Diox, no por cón che'n Tad Jesucrist, gac loo gu' nagal yo lezo' gu' loo Diox no cue ban gu' rye nda gu' no rye ndye'th gu' làth xtàa gu'. <sup>5</sup> Jesucrist mda' cuent cón che'n Diox loo mèn. No altant mdoo Jesucrist loo zin' co' mxo'f zin' Diox loo Jesucrist li Jesucrist loo mèn. Jesucrist ngòc ner mbi' co' ngro xban làth mèn nguth. No nac Jesucrist xa' co' ñibe' que' loo mèn dib athu loo izlyo' yiloo. Más de cona, Crist nque' que' lezo' ñèe Crist na'. No mton' Crist xquin na' no xtol na' co'se' nguth Crist loo cruz par ngòc na' mèn nalì no mèn nambii loo Diox. <sup>6</sup> Mbli Crist par gaca le' ryethe mèn co' nzo loo cón che'n Crist, mèn co' ndxela's loo Crist le'n rye nación co' nziri' dib athu loo izlyo', thidte queltàa mèn no thidte gac mèn loo cón che'n Crist no loo Crist par ñibe' Crist loo mèn. No mbli Crist ngòc na' mèn no nac na' mèn co' mbez con' roo no con' xèn no con' natú' loo mèn cón che'n Diox no co' mbez con' roo no con' xèn no con' natú' loo Diox, ne. Tataa mod ndli na' sirv loo Diox co' nac xud na'. Ndlyazen thidteneque' gac con' roo no con' xèn loo Crist. No ndlyazen gac rye loothe con' roo no con' xèn la's nii Crist no la's ya' Crist thidtene. Taandxè' gaca.

<sup>7</sup> Hui' gu' nexa. Co'se' yi'th Crist, Crist yi'th le'n xcuau. Huiza ryete mèn hui' loo Crist axta mèn co' ngòc leque mèn co' mtehuí' Crist, mèn hui' loo Crist huiza. No ryete mèn co' nzi ban dib athu loo izlyo' gón' co'se' hui' mèn loo Crist huiza. Aa. Tataaque' gaca.

<sup>8</sup> Gunee Diox di's ndxè' loon, ne:

—Daa nzole' ndoore' cue alux con'. No nzoquen co'se' yilo lyux alux con'. Cona nee di's, nac daa xal letr “a” co' nac letr co' ntlo loo alfabet. No nac daa xal letr “z” co' nac lult letr loo alfabet.

Tataa gunee Tad Diox loon, Tad Diox co' ndxàp rye loothe con' roo no con' xèn la's nii Tad Diox no la's ya' Tad Diox, Tad Diox co' nzoque' thidtene.

*Tad Crist co' nac Tad roo no Tad xèn mxyo'f loo loo Juàn.*

<sup>9</sup> Daa co' nac Juàn co' ngue que' ye's loo gu' trè', daa nac hues gu', ne, por cón che'n Crist. Thidte ndyactii na' loo cón che'n Crist. No thidte ngòc na' loo cón che'n Diox par ñibe' pe' Diox loo na'. No thidte ncha' la's na' no nxec yèe na' xalque' ndlyath no Crist na'. Per nalle' láth nzon trè' le'n thib yòo biiz le'n níttó' co' lèe Patmos co'te' mque' mèn daa xal pres por mblon yalbàn cón che'n di's ndac che'n Diox no por mdoodizen loo mèn

cón che'n Jesucrist, nde tan cuent loo gu'. <sup>10</sup> Ngòc thib con' loon thib huiz doming láth ngue ñibe' Xpii Natú' loon. Mden'en le' Xpii Natú' che'n Diox mbli ngòc thib con' loon hora. Mxaquen cabii gunii thib mbi' par ned xísen xal ruid che'n thib trompet co'se' ncuez mèn trompet. <sup>11</sup> Mxaquen gunee mbi' loon:

—Juàn, daa nzole' ndoore' cue alux con'. No nzoquen co'se' yilo lyux alux con'. Cona nee di's, nac daa xal letr “a” co' nac letr co' ntlo loo alfabet. No nac daa xal letr “z” co' nac lult letr loo alfabet. Ndlyazen que'l ye's loo thib libr cón che'n con' co' ñeel no con' co' ngue hui'l. Yiloo, ftel' libr loo mèn co' nqueltàa loo cón che'n Diox co' nzo ban le'n gaz yèez co' nac yèezya' che'n làaz mèn asia. Rye gaz yèeza lèe taandxè': Efes, Smirn, Perg, Tiatir, Sard, Filadelf, no Laodice.

<sup>12</sup> Ngoloo, mberen par ned xísen par hui'en chó ngue nii loon. No co'se' mberen, gunèen nziri' gaz candiler or loon. <sup>13</sup> No xtau'the gaz candilera, gunèen ndoo thib mbi' co' dib xoo ñaa xal ñaa Jesucrist co' mbi'th yáal loo izlyo' xalque' ndxáal chol mèn loo izlyo' ndxè'. No noc xab Jesucrist thib xab Jesucrist co' nac dib andoo co' nol' axta nii Jesucrist. No nabix thib cint or xal nde ro pech Jesucrist. <sup>14</sup> Le' yis yéc Jesucrist na, ante nagus bèelleque' ñaa xal ñaa xil' mbacxil' co' ndxech. No ante nagus bèelleque' ñaa yis yéc Jesucrist xal ye' co' ante nagus bèelleque' ñaa. Nde ngudloo Jesucrist na, gunaa xal xnii bèel co' ndxetoo. <sup>15</sup> Lomisque', nquée xnii nii Jesucrist xal thib le' yi'f co' ntembii mèn co' nsun' mèn le'n gorn. Lomisque', co'se' ndxèn di's co' ndyoodi's Jesucrist, ndxèn di's xal co'se' ndxà'x no nquebii nxyo'f nít thib yó'be'. <sup>16</sup> Lomisque' ne, mxaquen, nden Jesucrist gaz con' co' ñaa xal mbèelhui' ya' Jesucrist co' nac ladli. No ñèen ndryo' thib spad co' nalen ryop loo ro Jesucrist. Nde nxon', nquée xnii loo Jesucrist xal co'se' nde yáal rol huiz co'se' ne'xecte ngudloo mèn hui' mèn loo huiz.

<sup>17</sup> Co'se' gunèen loo Jesucrist, ale ngulàan xàn' nii Jesucrist. Ngulàa yál' lezon no mcuau daa xal thib mèn co' nguth. Sya, mxo'f Jesucrist ya' Jesucrist co' nac ladli laden. No gunee Jesucrist loon:

—Ne'zyebtel, Juàn. Daa nzole' ndoore' cue alux con'. No nzoquen co'se' yilo lyux alux con'. <sup>18</sup> Nabanque' daa, Juàn. Lìcque', nguth daa. Per nalle' naban daa thidtene. Nac daa xa' co' ndli nquée yalguth loo mèn. No nac daa xa' co' ndli par ryo xban mèn làth mèn nguth yiloo. <sup>19</sup> Cona, ngue niin lool, Juàn: Fque' ye's co' gac xal thib thib libr cón che'n con' co' gunèelel, no cón che'n con' co' ndxàc nalle', no cón che'n con' co' gac yiloo. <sup>20</sup> Trè' lu'en lool cón che'n cón nee di's gaz con' co' ñaa xal ñaa mbèelhui' co' ñeel ndenen con yan ladli. Lomisque' ne, lu'en lool cón che'n cón nee di's gaz candiler or. Pues cón che'n con' co' ñaa xal gaz mbèelhui' ndlu' cón che'n gaz mèn co' ndyoo ner no co' ndyoo naa loo mèn co' nqueltàa loon le'n gaz yèez co' nac yèezya' che'n làaz mèn asia. Le' cón che'n gaz candiler na, nac co' ndlu' cón che'n mèn co' nqueltàa loo cón chenen le'n gaz yèez co' nacguè' yèezya' che'n làaz mèn asia.

## 2

*Di's co' mnibe' Crist loo Juàn par que' Juàn ye's loo mèn co' nqueltàa loo cón che'n Crist le'n gaz yèeza: Mtel' Juàn ye's co' nac ner cart loo mèn co' nqueltàa loo cón che'n Diox le'n ciuda Efes.*

<sup>1</sup> Gunee Jesucrist loon, ne: Fque' ye's cón che'n con' ndxè' loo mbi' co' ndyoo ner no co' ndyoo naa loo mèn co' nqueltàa loon le'n ciuda Efes par lab mbi'a cart ndxè' loo mèn co' nqueltàa loon le'n ciuda Efes. Guuz no blu' loo mèn loo ye's ndxè': Taandxè' gunee Jesucrist loon, Jesucrist co' nden gaz con' co' ñaa xal mbèelhui' con ya' Jesucrist co' nac ladli. Gunèen ngue tee Jesucrist xtau' gaz candiler or, ne. Gunee Jesucrist loon:

<sup>2</sup> —Naneequen xal nzi tee ban gu'. No nanéen axta arid nagàn ndxàca loo gu' no nxec yèe gu' no ncha'la's gu' co'se' ndxàc chol yaltii loo gu'. No nanéen le' gu' ne'nda' de lugar ngòc mèn ye'rsin' làth gu'. No nanéen huen huen mbla's gu' no mbli la's gu' ñeene' ché', lìcque', nac mèn co' mbez nde xo'f zin' mèn xal mèn co' ndxe' di's che'n Jesucrist. No mté'th gu' no mda' gu' cuent le' mèn na nac mèn gutyè'. <sup>3</sup> Nanéen le' gu' ncha'la'sque' no nanéen le' gu' ndyactiique' no anze'f ngue xo'f zin' gu' cón chenen. No axta nalle'

tarte tyoo xà' lezo' gu' no tarte yitac lezo' gu' loo cón chenen. <sup>4</sup> Per nzo thib con' co' indyublasten no co' indxòode lezon ngue li gu' làth gu' co' nac le' gu' ya inque'de lezo' ñèe gu' hues xtàa gu' xal mque' lezo' gu' ñèe gu' hues xtàa gu' co'se' mtlo gu', mqueltàa gu' loo cón chenen. <sup>5</sup> Cona, ngue niin loo gu': Fte' yéc gu' no fte' lezo' gu' xá mod mque'que' lezo' gu' gunèe gu' mèn co' ndxac hues xtàa gu' loo cón che'n Jesucrist co' mtlo mbli gu' co'se' mtlo gu' ngòo gu' loo cón chenen. Per nalle' blàa yéc gu' no blàa lezo' gu' no fse' gu' mod co' ndxàp gu' loo Diox. Gure li gu' xalque' nac co' mtlo mbli gu' loo cón chenen co'se' mtlo gu', ngòo gu' loo cón chenen. Tac ne' yiloo, chàa, galen no gacloon ñèen gu' par techeen candiler, co' nee di's, nac gu' loon par, por derech, techeen gu' par más huen ne'tolode yila's mèn loon le'n ciuda Efes. Tataa li non gu' chele' gu' ne'se'de mod ye'rsin' co' ndxàp gu' loo Diox nalle' xal ngue niin loo gu' ndxè'. <sup>6</sup> Per mastale' tataa ngue li gu', nzo thib con' co' ngue li gu' co' nzo favor che'n gu' no co' ndli par ndxòo lezon cón che'n gu'. Con'a nac le' gu' ndxeclooque' ñèe mèn co' nqueltàa con gu' co' ne' lèe nicolait. Na, ne, ndxecloo ñèen mèn. <sup>7</sup> Gu' co' nqueltàa loo cón che'n Diox co' ndub nza no co' ndxaa'd di's, bìn gu' di's co' ndlu' Xpii Natú' che'n Diox loo mèn co' nqueltàa loon chol lugar. Mblu' Xpii Natú' che'n Diox loo mèn taandxè':

—Ryete gu' co' li gan ryo xà' loo cón che'n xab izlyo', loo gu'a tan lugar par yòo ban no gu' daa thidtene co'te' nzo non Diox.

*Di's co' mnibe' Jesucrist loo Juàn par que' Juàn ye's loo mèn co' nqueltàa loo cón che'n Diox le'n yèez Smirn.*

<sup>8</sup> Tolo gunee Jesucrist loon, ne: Juàn, fque' ye's loo mbi' co' ndyoo ner no co' ndyoo naa loo mèn co' nqueltàa loo cón chenen le'n yèez Smirn par lab mbi' cart ndxè' loo mèn co' nqueltàa loon le'n yèez Smirn. Guuz no blu' loo mèn loo ye's co' que'l loo mèn taandxè': Taandxè' gunee Jesucrist loon par tan cuent loo gu' loo ye's ndxè'. Jesucrist gunee loon nzole' Jesucrist ndoore' cue alux con' no nzoque' Jesucrist co'se' yilo lyux alux con', Jesucrist co' nguthque' no mbere Jesucrist, ngro xban Jesucrist tedib vez. <sup>9</sup> No gunee Jesucrist loon: Daa naneeque' xal nzi tee ban gu'. Naneen co' huen huen le' gu' ngue xecpe' loo cón chenen no nzi tyactii gu'. No nonen nague's ya' gu' no nague's nii gu' nzi tee gu' loo izlyo' ndxè'. Per naneen ndxàp gu' huax con' ndac loo bé'. Naneen le' mèn co' mbez nac mèn bin mèn nación Israel, ñii yèe ñii tii mèn cón che'n gu'. Per indlu'de mèn nac mèn mèn nación Israel por con' ye'rsin' co' ndli mèn. Ndxè'leque', naneequen nacpe' mèn mèn co' ndli con' ndlya's Mebizya. <sup>10</sup> Ne'zyebte gu' loo con' co' tyactii gu' le'n tiemp ndxè'. Tac Mebizya li par co' mèn ndxep gu' lezi'f par ñee Mebizya ñeene' ché' tli Mebizya gan par lá' gu' cón che'n Crist no par bixyath gu' par gac gu' mèn ye'rsin' tedib vez. Gac con'a loo gu' nagabte huiz. Per gu' co' toloque' cue nèe loo cón che'n Diox no co' ne'yitacte lezo' loo cón che'n Diox axta gath gu', loo gu'a daa ta' lugar yòo ban no gu' Diox co' gac loo gu' xal thib con' ndac co' mbli gu' gan. <sup>11</sup> Gu' co' nqueltàa loo cón che'n Diox, gu' co' ndub nza no co' ndxaa'd di's, bìn gu' di's co' ndlu' Xpii Natú' loo mèn co' nqueltàa loon chol lugar. Mblu' Xpii Natú' che'n Diox loo mèn taandxè':

—Ryete gu' co' li gan ryo xà' loo cón che'n xab izlyo', loo gu'a yende chó yalquii gac par ryo xà' gu' loo Diox thidtene par tyactii gu' co'se' gath gu'.

*Di's co' mnibe' Crist loo Juàn par que' Juàn ye's loo mèn co' nqueltàa loo cón che'n Diox le'n yèez Perg.*

<sup>12</sup> Tolo gunee Crist loon, ne: Juàn, fque' ye's loo mbi' co' ndyoo ner no co' ndyoo naa loo mèn co' nqueltàa loo cón chenen le'n yèez Perg. Guuz loo mèn loo ye's co' que'l xal ngue niin lool ndxè':

—Taandxè' gunee Jesucrist co' ngue no thib spad co' nalen loo ryop lad par que'en ye's ndxè' loo gu'. <sup>13</sup> Gunee Jesucrist loon: Daa naneeque' xal nzi tee ban gu'. Naneen le' gu' naban le'n thib yèez co'te' thidteneque' ndli mèn con' co' ndlya's Mebizya no con' co' nee lezo' Mebizya. Per mastale' tataa ndli mèn, gu' ndli nèeque' gu' loo cón chenen. No thidteneque' ndxela's gu' no ndxàp gu' yalxla's loon. Ne' ne' ngyathla's gu'



cón chenen no ne' ne' nglá' gu' cón chenen co'se' ngòc huiz co'se' mbeth mèn Antip co' altant ndyoo nxo'f zin' cón chenen co' mda' cuent cón chenen. Mèn mbeth Antip làth gu' par nedrè' le'n yèez Perg co'te' ndli Mebizya co' ndlya's Mebizya loo mèn. <sup>14</sup> Per nzoque' ndxep con' co' indxòode lezon ngue li gu' par nedrè'. Daa nanee le' gu' nqueltàa no ndxep mèn co' nac mèn xley' Balaam le'n yèez Perg. No indlya'ste mèna lá' mèna xley' Balaam. Balaam mquil' thib mbi' co' ngro' lèe Balac póla par aseli Balac le' mèn nación Israel angcua' cua'n xtol co'se' hua mèna xít mèn no lua' mèn co' mbec mèn xal thib gòn o ofrend loo chol mdo'. No làth xtau'a, asembli Balac par li mèn nación Israel yalburrid no cua'n mèna xin' huan mèna. <sup>15</sup> Lomisque' ne, naneen le' gu' nqueltàa no mèn co' ne'yilode lá' xley' che'n mèn xley' nicolait. Xley' mèna anze'f ndxecloon ñèen. <sup>16</sup> Por cona, ngue niin loo gu': Fse' gu' mod co' ndxàp gu'. Blàa yéc gu' no blàa lezo' gu' loo con' ye'rsin' co' nzi tee li gu'. Tac ne' yilóa, chàa, gal neen máa gu' par nedrè' no yoon con mèn xley' Balaam no con mèn xley' nicolait par ten' mèna co' lin loo mèna xal co'se' nden' mèn yalnè co'se' ndxaa'd spad lad mèn. <sup>17</sup> Gu' co' nqueltàa loo cón chenen, gu' co' ndub nza no co' ndxaa'd di's, bìn gu' di's co' ndlu' Xpii Natú' loo mèn co' nqueltàa loon chol lugar. Mbez Xpii Natú':

—Ryete gu' co' li gan ryo xà' loo cón che'n xab izlyo', na li par que no gu' ryethe con' ndac loo bé' par yende cón gac co' nde che loo gu' loo bé'. No lin par que no mèn co' ryo xà' loo cón che'n xab izlyo' thib con' co' angtan co' ante daa nanee cóna par que no mèna. Tataa lin loo mèna xal co'se' nda' mèn thib quèe nagus bèelleque' loo thib mèn. Loo quèea ndub thib lèe mbi' co' yende chó non. Ante mèn co' càaya' quèea non chó mbi' nac che'n lèe co' ndub loo quèea.

*Di's co' mnibe' Jesucrist loo Juàn par que' Juàn ye's loo mèn co' nqueltàa loo cón che'n Diox le'n yèez Tiatir.*

<sup>18</sup> Tolo gunees Jesucrist loon, ne: Juàn, fque' ye's loo mbi' co' ndyoo ner no co' ndyoo naa loo mèn co' nqueltàa loo cón chenen le'n yèez Tiatir par lab mèn cart co' que'l loo mèn co' nqueltàa loon le'n yèez Tiatir. Guuz loo mèn loo ye's ndxè' co' que'l loo mèn xal ngue niin lool ndxè':

—Taandxè' gunees Xgan' Diox loon, Xgan' Diox co' ñaa ngudloo xal bèel co' ndxetoo no co' nquée xnii nii xal nquée xnii yi'f co' mtembii mèn. <sup>19</sup> Daa naneeque' xal nzi tee ban gu'. Naneen xá mod nque'que' lezo' gu' ñèe gu' hues xtàa gu' par nedrè' no xá mod ndxàp gu' yalxla's no ndxela's gu' loo cón chenen. No naneen xá mod nxo'f zin' gu' zin' cón chenen loo mèn no xá mod ncha'la's gu' loo yaltii co' ndyactii gu' por cón chenen. No naneen más ndxòo yéc gu' nalle' par ndli gu' ryethe con' ndxè' leque co'se' mtlo ngòo gu' loo cón chenen. <sup>20</sup> Per nzo thib con' co' indxòode lezon ngue li gu' por nda' gu' lugar nzo thib xa'got làth gu', mastale' non gu' no nanee gu' ilé'de nac con' ngue li xa'gota làth gu'. Lalque' nac xa'gota xal thib xa'got co' ngro' lèe Jezabel co' angngo ban póla. Xa'got co' ngo ban póla ngòc thib xa'got ye'rsin'túb xalque' nac xa'got co' nzo làth gu' nalle'. Tac xa'got co' nzo làth gu' ndxè' mbez le' xa' nde'th cón che'n Diox. Per nquedii xa' mèn co' nxo'f zin' zin' cón chenen por cón che'n xley' co' ndlu' xa'. No ndli xa' par mtlo mbix yéc mèn par li mèn yalburrid no cua'n mèn xin' huan mèn por cón che'n xa'gota. No ndlu' xa' loo mèn hua mèn xít mèn no lua' mèn co' mbec mèn xal thib ofrend o gòn loo chol mdo'. No tataa mod ncua'n mèn xquin mèn no xtol mèn. <sup>21</sup> Daa mda lugar loo xa'gota par bel'que' lyàa yéc xa' no bel'que' lyàa lezo' xa' no se' xa' mod ye'rsin' co' ndxàp xa'. Per indlya'ste xa' lyàa yéc xa' no lyàa lezo' xa' par se' xa' mod co' ndxàp xa'. Ne' ne' indlya's xa' lá' xa' par ne'tolode li xa' con' zab co' ndli xa'. <sup>22</sup> Per nalle' lin par lyen thib yíiz loo xa'gota par gaasua' xa' loo lún'. No lomisque', lin par tyactii mèn co' mbli yalburrid con xa'gota chele' mèna ne'lyàade yéc no chele' mèna ne'lyàade lezo' loo con' ye'rsin' co' ndli mèna no chele' mèna ne'cuedte li xal ndli xa'gota. <sup>23</sup> No guthen rye mèn co' mda' lugar thib lite ngòo mèna loo xley' che'n xa'gota par tataa mod ryete mèn co' nqueltàa loo cón chenen, ta' mèna cuent le' daa nanee no nonen con' co' ndli mèna

xtùuz le'n lezo' mèn. No lin par tetiin rye gu' co' ngue li con' ye'rsin'. No lin par tolo gac con' ndac loo gu', gu' co' ngue li con' ndac. <sup>24</sup> Per loo tedib ned gu' co' nqueltàa loon co' nzo yèez Tiatir, co' indyoo nquede loo xley' xa'gota no co' tarte ta' cuent no co' tarte ñee cón che'n co' mbez mèn co' ngòo loo cón che'n xa'gota co' nac cón che'npe' Mebizya co' be' nacasloo loo chol mèn, gro' xà' gu' loo xa'gota con mèn co' ngòo loo cón che'n xley' xa'gota làth gu'. Cona'te no más ñibe'en loo gu' par li gu'. <sup>25</sup> No maste ndlyazen leque gu' fquenap gu' loo con' co' nzi li gu'. No leque gu' fquenap gu' loo mod co' nzi tee ban gu' loo cón chenen axta co'se' gac huiz co'se' gal xin gu'. <sup>26</sup> Ryete gu' co' li gan ryo xà' loo cón che'n xab izlyo' no gu' co' ngue lique' con' co' ndxòo lezon no co' ñibe'en loo gu' axta gath gu', na ñibe' le' gu' ñibe' loo mèn chol nación huiza <sup>27</sup> xalque' mnibe' xuden Diox loon par ñibe'en loo mèn chol nación dib athu loo izlyo'. Tataa ñibe'en loo gu' par ñibe' gu' loo mèn chol nación dib athu loo izlyo'. No ñibe'en loo gu' ñibe' yèepe' gu' loo mèn chol nación dib athu loo izlyo' par gaca co'se' mèn ne'tyalte tyubdi's loo gu', telux gu' mèn xal co'se' ndlé' mèn thib yàt co'se' ndlàa mèn thib ro var yi'f lad yàt. <sup>28</sup> No lin par gac con' roo con' xèn loo mèn. No lin quée xnii mèn xal nquée xnii mbèelhui' co' ndlyen ndxáal xtil' huiza co'se' gal xin mèn. <sup>29</sup> Gu' co' nqueltàa loo cón che'n Diox, co' ndub nza no co' ndxaa'd di's, bìn gu' di's co' ndlu' Xpii Natú' che'n Diox loo mèn co' nqueltàa loon chol lugar.

### 3

*Di's co' mnibe' Jesucrist loo Juàn par que' Juàn ye's loo mèn co' nqueltàa loo cón che'n Diox le'n yèez Sard.*

<sup>1</sup> Tolo gunee Jesucrist loon, ne: Juàn, fque' ye's loo mbi' co' ndyoo ner no co' ndyoo naa loo mèn co' nqueltàa loo cón chenen le'n yèez Sard par gab mbi' loo mèn xal ngue niin lool ndxè':

—Taandxè' gunee Jesucrist co' nzo Xpii Natú' loo no co' nden gaz con' co' ñaa xal mbèelhui'. Daa naneeque' xal nzi tee ban gu'. Daa nanee le' gu' pente ndxela's loon no pente non gu' no nda' gu' cuent cón chenen mastale' mbez gu', no mbez taamas mèn, altant nzi gu' loo cón chenen. <sup>2</sup> Nalas gure gu' no bdi'x xnii yéc gu' no bdi'x xnii lezo' gu'. No bli nèe gu' gu' loo con' co' be' ndxela's gu' loon. Tac casque' mblá'le' gu' no mbyathla'sle' gu' xal mtlo mbli gu' co'se' mtlo gu', ngola's gu' loon. Ñeen le' con' co' ngue li gu' inacte con' nali no con' nambii loo Diox co' nac Diox daa. <sup>3</sup> Fte' lezo' gu' xal nac co' mté'th gu' no co' mblu'en loo gu'. Ftolo que tee li gu' con'a. No bli gu' par lyàa yéc gu' no lyàa lezo' gu' par se' gu' mod co' ndxàp gu'. Chele' gu' ne'gàcte mèn co' yà'x xnii yéc no co' yà'x xnii lezo' par gac gu' mèn nalas loon no loo cón chenen, nee gu' nee gu'. Tac ne' yiloo, chàa, gal neen máa gu' par nedrè' xal co'se' ne'ta'de mèn cuent ndlyàa huan' no xal co'se' ne'ñeede mèn coyor lyàa huan' liz mèn. Sya, ñee gu' xá ñaa cón gac loo gu'. <sup>4</sup> Mastale' tataa ndxàca loo gu', nzoque' ndxep mèn le'n yèez Sard co' nqueltàa no gu'. Mèn incua'nte xquin no xtol par gac mèn xal thib con' xin no thib con' cap loo Diox. Mèn que tee con daa loo bé' por nac mèn mèn nali no mèn mambii loon no loo Diox tac tataaque' ndxàal gaca loo mèn. <sup>5</sup> Mèn co' li gan ryo xà' loo cón che'n xab izlyo', mèn thidtene gacque' mèn nali no mèn nambii loo bé'. No ne'ton'ten lèe mèn loo libr co'te' ndub lèe mèn, mèn co' yòo ban no Diox thidtene. Ndxé'leque', daa ta' cuent loo Diox no loo angl che'n Diox le' mèn nac mèn che'npe' daa. <sup>6</sup> Gu' co' nqueltàa loo cón che'n Diox, gu' co' ndub nza no co' ndxaa'd di's, bìn gu' di's co' ndlu' Xpii Natú' loo mèn co' nqueltàa loo cón che'n Diox chol lugar.

*Di's co' mnibe' Jesucrist loo Juàn par que' Juàn ye's loo mèn co' nqueltàa loo cón che'n Diox le'n yèez Filadelf.*

<sup>7</sup> Tolo gunee Jesucrist loon: Juàn, fque' ye's loo mbi' co' ndyoo ner no co' ndyoo naa loo mèn co' nqueltàa loo cón chenen le'n yèez Filadelf par lab mbi' cart ndxè' loo mèn co' nqueltàa loon le'n yèez Filadelf. Guuz loo mèn xal ngue niin lool ndxè':

—Taandxè' gunee Jesucrist loon, Jesucrist co' nac xa' natú' no co' nac licpe' Jesucrist co' ndxàp rye loothe con' roo no con' xèn la's nii Jesucrist no la's ya' Jesucrist par ñibe' Jesucrist loo ryethe con' loo bé' no loo izlyo', Jesucrist co' nac thidte xa' co' ñibe' loo mèn par thib líte yòo mèn loo bé' loo Diox no co' ñibe' loo taamas mèn par ne'yòo ban node mènà Diox loo bé': <sup>8</sup> Daa naneeque' xal nzi tee ban gu'. Daa mbli mxyal' ned mxyal' yó' loo gu' par ya lo gu' yalbàn no te'th gu' loo taamas mèn cón chenen. No mblin par yende chó mèn tau' ned tau' yó' loo gu' par ca' mènà loo gu' par ne'tolode co gu' yalbàn cón chenen. Mastale' be'te' ndxàp gu' fuerz no be'te' ndxác gu' co gu' yalbàn no te'th gu' loo mèn cón chenen, naneen le' gu' ndlique' cas di's ndac co' mtan'en di's loo gu' no ne' ne' tar cà' di's gu' lèen, co' nac daa. <sup>9</sup> Por cona, lin thib con'. Lin le' mèn co' nqueltàa loo cón che'n Mebizya, co' nac mèn gutyè', co' mbez le' mènà nac mèn nación Israel per ilicte nac mènà mèn nación Israel, loo mènà na li le' mènà tyub xib loo gu' par ñee mènà no ta' mènà cuent le' daa nque'que' lezo' ñèen gu'. <sup>10</sup> Gu' mcha'la's no mxec yèe gu' loo chol yalquii xal mnibe'en loo gu'. Por cona, daa ne'lá'ya'de gu'. Quenapen gu' co'se' gác tiemp li Diox con' ryes loo mèn no tetii Diox mèn axta plóthe, mèn co' naban dib athu loo izlyo', mèn co' ne'ngala'ste loo Diox no loo cón che'n Diox. <sup>11</sup> Hui' gu' nexa. Daa ne'lyen'te par gal xin gu'. Ftolo que tee ban ndac gu' loo cón chenen xal mté'th gu' no xal non gu' cón chenen par gaca loo gu' yende chó mèn cuee cà' gu' par li mènà gan ne'yòo ban node gu' Diox thidtene co'se' gath gu'. <sup>12</sup> Mèn co' li gan ryo xà' loo cón che'n xab izlyo', na li le' mènà yòo loo Diox loo bé' par thidtene yo no mènà Diox. No lin le' mènà yan' loo Diox xal thib pilar o nac mènà xal nii arc che'n thib yòobé' co' yende chó cuin no co' yende chó cobii. No lin par tyub lèe mènà le' mènà nac mèn che'npe' Diox. No lin le' mènà gác mènpe' ciuda Jerusalén co' cue yiloo co' li Diox ryo' loo bé' par lyàa ciudaa loo izlyo'. No lin le' mènà yo no daa thidtene par thidteneque' gác con' roo con' xèn loon con mènà. <sup>13</sup> Gu' co' nqueltàa loo cón che'n Diox, gu' co' ndub nza no co' ndxaa'd di's, bin gu' di's co' ndlu' Xpii Natú' loo mèn co' nqueltàa loon chol lugar.

*Di's co' mtel' Jesucrist loo mèn co' nqueltàa loo cón che'n Diox le'n yèez Laodice.*

<sup>14</sup> Tolo gunee Jesucrist loon, ne: Juàn, fque' ye's loo mbi' co' ndyoo ner no co' ndyoo naa loo mèn co' nqueltàa loo cón chenen le'n yèez Laodice par lab mbi' cart ndxè' loo mèn co' nqueltàa loon le'n yèez Laodice. Guuz loo mènà cón che'n di's ndxè' xal ngue niina lool ndxè':

—Taandxè' gunee Jesucrist loon, Jesucrist co' nac mbi' nali no mbi' nambii co' inquediide. Jesucrist nacpe' thib xa' co' nali nda' cuent. No di's co' nda' Jesucrist cuenta nac di's licpe'. Por cón che'n Jesucrist mblec Diox no mtocua' Diox ryethe con' co' nzo loo bé' no ryethe con' co' nziri' loo izlyo'. <sup>15</sup> Daa naneeque' xal nzi tee ban gu'. Naneen le' gu' indxela's ndacte loon co' huenleque'. No naneen imbede gu' altant loo cón chenen par lu' gu' cón chenen loo mèn. Alithe nziri' gu' loo cón chenen. Indyóode gu' cón chenen. ¡Oj, ché' co' gác gu' mèn co' altant cue loo cón chenen, huen! O más huen ndoo líte ryo' gu' loo cón chenen thidtene. Nee teeca. <sup>16</sup> Per com le' gu' alithe nziri' loo cón chenen, no indlide gu' cas loo cón chenen, ne' ne' inac gu' mèn co' gab thidtene lá' gu' cón chenen, no ne' ne' inac gu' mèn co' gab altant tyoo gu' loo cón chenen, leque daa li thidtene go'en gu' làth mèn co' nzo loo cón chenen xal co'se' ndli mal con' nduhua mèn lezo' mèn no mbere lezo' mèn con' nduhua mèn. Tataa lin par go'en gu' loo cón chenen thidtene. <sup>17</sup> Gu' mbez anze'f ndxác gu' non gu' cón chenen. No mbez gu' huen huen mté'th gu' cón chenen. No mbez gu' anze'f huen nziri' gu' loo cón chenen. No mbez gu' yende chó loo con' ndxetoo gu' loo cón chenen. Per ne'ta'de gu' cuent le' loo cón chenen nac gu' xal mèn co' nzi tee yilo yilux, no xal mèn co' nalyat ñaa co' ndyac yaltii, no xal mèn sieu, no xal mèn co' nquée mbii yéc co' nzi tee che. <sup>18</sup> Por cona, ngue co'xen loo gu' thib líte yòo gu' loo cón chenen par huen té'th gu'. No tyubdi's gu' co' niin loo gu' par gác gu' mèn nali no mèn nambii loon xal mèn co' ndxoc xab lar' nagus bèelleque' par ne'cuede gu' loon xal mèn co' nzi tee che par tataa mod lu' gu' nthyonque' gu' ñee gu'

daa. No bna'b gu' loon par lin par tyub xnii yéc gu' no tyub xnii lezo' gu' loo cón chenen. <sup>19</sup> Daa ngyoo mèn no nco'xen mèn, mèn co' nque' lezon ñèen. Cóna, ndlyazen ndxàal gác gu' mèn co' tyoo altant loo cón chenen no mèn co' ten' cón chenen no mèn co' ta' cuent cón chenen. No ndlyazen, por derech, blàa yéc gu' no blàa lezo' gu' par zye' mod ye'rsin' co' ndxàp gu' loo cón chenen par ned nzo gu' ndxè'. <sup>20</sup> Hui' gu' nexa. Daa nac xal mèn co' ngue bez mèn ro puert liz mèn. Ngue beden par gòn gu' ron par tataa mod xal' gu' lezo' gu' no xal' gu' xtùuz gu' par tyal gu' ñibe'en loo gu' xal ndxàal gàca. No chele' gu' ndxòn di's co' ngue niin loo gu' ndxè', le' sya, thidte gác na' loo cón chenen. <sup>21</sup> Mèn co' li gan ryo xà' loo cón che'n xab izlyo', daa li gác loo mènna thidte yo no mènna daa co'se' gác huiz ñibe'en loo alux con'. Ndlyazen tataa gàca loo mènna xalque' co'se' ngolo mblin gan loo Mebizya co'se' mque tee'en loo izlyo'. Por cona, nalle' thidte nac daa con xuden Diox loo alux con' co' ñibe' xuden Diox. <sup>22</sup> Gu' co' nqueltàa loon co' ndxòn di's no co' ndxaa'd di's, bìn gu' di's co' ñii Xpii Natú' che'n Diox loo gu'.

## 4

*Juàn ngue lu' le' alux mèn co' nzo loo bé' loo Diox, mènna ndyub xib loo Diox no ncò' mènna yéc mènna loo Diox.*

<sup>1</sup> Ngolo mblu' Jesucrist loon par mque'en ye's loo mènna, ale mxaquen mdoo xal' thib puert loon loo bé' par mbui'en le'n bé'. No, chàa, mbinen thib di's co' mxaquen mbyèn xal co'se' cabii ncuez mèn thib trompet. Mbinen gunee thib mbi' loon co' ngòc leque mbi' co' nerleque' gunii loon. Gunee mbi' loon:

—Fquée trè', Juàn, par lu'en ryethe con' co' gác loo mèn loo izlyo' le'n tiemp co' yi'th nque.

<sup>2</sup> Leque hora, mbli Xpii Natú' che'n Diox par, chàa, nguan le'n loo bé'. No mbli Xpii Natú' che'n Diox mbui'en thib asient co'te' ndyub Diox co'te' ñibe' Diox le'n loo bé'. No gunèn ndub thib mbi' loo asienta. <sup>3</sup> Mbi' co' ndub loo asienta, ante ndxaa'd xnii mbi'a no ndxaa'd bèel mbi'a xal ndxaa'd xnii no ndxaa'd bèel thib loo quèe co' lèe quèe jasp no xal tedib loo quèe co' nquégue' xnii co' lèe quèe cornalin. Dib vult loo asient co'te' ndub Diox gunèn ndoo thib arc mbèel qui'th. Arc co' nac mbèel qui'tha ndxaa'd xnii no ndxaa'd bèel xal ndxaa'd bèel no xal ndxaa'd xnii loo thib loo quèe co' lèe quèe esmerald.

<sup>4</sup> Gunèn nziri' taagal fthap asient dib vult loo asient co'te' ndub Diox. Loo asienta ndub thib thib mènngool co' ngòc gal fthap mènngool. Mènngoola noc xab ampurte lar' nagus bèelleque'. No gunèn nzi'f anabte coron or yéc rye mènngoola. <sup>5</sup> No gunèn ndxà'x bèel gundi co'te' ndub mbi' loo asient co' ndoo xtau' taamas asient. Mbinen ngulàa gundi no ndxas ndlya'b gundii. No gunèn nzi'f yol gaz manoj ye'rbèel loo asient co' ndoo xtau' taamas asient. Gaz manoj ye'rbèel co' nzi'f yola ndlu' cón che'n Xpii Natú' che'n Diox. <sup>6</sup> Gunèn, ne, co'te' ndoo asienta nziri' thib con' co' ñaa xal ñaa níttó' co' xèe nziri' co' ndri'th xnii par xís xal vidr.

Xtau'the con' co' ñaa xal ñaa níttó'a no dib vult co'te' ndoo asient co' mbui'en nera mxaquen nziri' thap con' co' ñaa xal thap loo má' co' naban. Má'a nzib ngudloo ned loo má' no ned xís má'. Dib lad má'a nzib ngudloo má'. <sup>7</sup> Ner má' ñaa loo xal ñaa thib mbee's co' ndoo yis lox yen. Le' mbryop má' na, ñaa loo xal ñaa thib laa ngon. Le' mbyon má' na, ñaa loo xal ñaa loo thib mbi'. Le' dyap má' na, ñaa loo xal ñaa thib mtii co' nxobii. <sup>8</sup> Dyap loo con' co' ñaa xal má' co' nabana, thib thib má'a mque no xop xíl'. Par le'n xíl' má' no par xís xíl' má' gunèn nzib ngudloo má'. No ze no yál' thidtene mbez má':

Anze'f natú' nac U', Tad Diox, U' co' ndxàp rye loothe con' roo no con' xèn la's nii U' no la's ya' U', U' co' thidteneque' nzo.

<sup>9</sup> No cadque' co'se' mbez dyap má' co' nabana, mbez má': Con' roo con' xèn nac U', Tad. No be' taaguè' mbez má':

Ante loo U' tolo gác con' guryath no con' guryèn.

Mbez má', ne:

Diox quix non U'

loo Diox co' ndub loo asient co' ndoo xtau' loo rye asient, Diox co' thidteneque' naban. <sup>10</sup>Lomisque' tiemp, ne, ryete gal fthap mènqool co' ndub loo gal fthap asient co' ndoo dib vuelte loo asient co' ndoo xtau'a, ndyub xib loo Diox co' ndub loo asient co' ndoo xtau'a, Diox co' thidtene naban. No mbec mènqoola coron co' ndub yéc mènqoola xàn' nii Diox co' ndub loo asienta. No mbez mènqoola loo Diox:

<sup>11</sup>Tad, U' co' nac Diox nu', thidte U' nac Diox co' ndxàal ñee mèn loo le' U' nac Diox roo no Diox xèn. No loo U' ndxàal ñee mèn di's co' nac di's guryath no di's guryèn. No thidte U' nac Diox co' ndxàalpe' ñibe' loo alux con' co' mblec U' xalque' ndli U'. Tac U' mbli par mblec U' no mxèn' U' izlyo' no ryethe con' co' nziri' loo izlyo' no co' ndxú' loo bé'. No mbli U' ryethe con' co' nac izlyo' no ryethe con' co' nac bé' xal gunee lezo' U'.

## 5

*Juàn ngue ta' cuent mxyo'f loo thib libr no mxyo'f loo thib mbacxil' yen' loo Juàn.*

<sup>1</sup>Lomisque' mxaquen ne, ale mxyo'f loo loon le' mbi' co' mdub loo asienta nzo thib roll ye's co' nadùuz ya' mbi' co' nac ladli. Loo ye'sa ndub di's par xís ye's no ndub di's par le'n ye's. No natedó' ye's co' nadùuza con gaz le' cint co' lèe flej. <sup>2</sup>No gunèn thib angl co' nac thib angl roo angl xèn. Angla mnibdi's loo rye mèn co' nzi tya. Cabii mnibdi's angl:

—¿Chó thib gu' ndxàal xac cint co' natedó' lad ye's co' nadùuz co' nzo ya' xa' co' ndub loo asient ba', yey?

<sup>3</sup>Per ne' loo bé', no ne' loo izlyo', no ne' le'n ye'rbiiil ne'ngode mèn co' ngác nxac cint co' natedó' lad ye's co' nadùuza. No ne' ne' ngác mèn hui' mèn loo ye'sa, ne, tant mzyeb mèn cón che'n con'a. <sup>4</sup>Le' daa na, ne' tí' yéquen no ne' tí' lezon mbínen tac yende chó ngác nxac cint lad ye's co' nadùuza. Ne' ne' yen chó gác lab ye'sa. Ne' ne' yen chó gác hui' loo ye'sa. <sup>5</sup>Sya, thib mènqool co' nzo làtha gunee loon:

—Ne'tolode gón'l, Juàn. Mbi' co' ne' tedib lèe xal lèe Mbee's, mbi' co' nac bin che'n thib mbi' co' ngro' lèe Judá co' mbloj msi' bin co' nac thib ned mèn co' nac che'n mèn nación Israel, mbi'a nac bin che'n thib mbi' co' ngro' lèe David co' ngòc rey póla. No nac mbi' thib mbi' roo no thib mbi' xèn. Mbi'a mbli' gan par mbli Diox ndxàp mbi' con' la's nii mbi' no la's ya' mbi' par gác mbi' cho' mbi' gaz le' cint co' lèe flej co' natedó' ye's co' nadùuz ba'. No yiloo xal' mbi' loo ye's ba' par tlo li mbi' gac yaltii loo mèn loo izlyo'.

<sup>6</sup>Látha, mxaquen gunèn ndoo thib mbacxil' yen' loo asient co' ndoo xtau'the loo rye mènqoola no loo dyap má' co' nabana. Mbacxil'a nee di's nac Jesucrist. Mxaquen ale ñaa mbacxil'a xal ñaa mbacxil' co' mbeth mèn no co' ngro xban tedib vez. Mxaquen le' yéc mbacxil'a ndub gaz cach. No mxaquen nzi'f gaz ngudloo mbacxil' lad yéc mbacxil'. Per rye gaz ngudloo mbacxil'a, co' nac Jesucrist co' mbyú' loo loon, nee di's ndlu' cón che'n Xpii Natú' che'n Diox co' mtel' Diox loo izlyo'. <sup>7</sup>Gunèn ngo che mbacxil' co' nac yub Jesucrist. Ngua mbacxil', co' nac Jesucrist, co'te' ndub Diox co' ndub loo asient co' ndoo xtau'the loo rye mèn. Mxen Jesucrist ye's co' nadùuz co' nzo ya' Diox ladli. <sup>8</sup>Co'se' ngolo mxen Jesucrist ye's co' nadùuza, dyap má' co' naban co' nziri'a no ryete gal fthap mènqool co' nziri'a mdub xib loo Jesucrist. Nde nxon', thib thib mènqool nden arp. No ngue no thib thib mènqoola thib loo cop or ya' mènqoola. Le'n cop ora mzyè du'r yal', co' nee di's, nac di's co' mbez mèn loo Diox co'se' mbez mèn Diox, mèn co' nzo loo cón che'n Diox. <sup>9</sup>No mbil' ro rye mèn thib himn cub co' nac di's ndxè':

Thidte U' co' nac Tad Jesucrist nac xa' co' ndxàal tyen ye's co' nadùuz ndxè' no xac U' rye gaz le' cint co' natedó' ye'sa. Tac mèn mbeth U'. No con ren ladpe' U' co' mxyo co'se' mbeth mèn U', con rena mxi' U' nu' loo con' ryes no mblá' U' nu' par ngòc nu' mèn co' ngòole' loo cón che'n Diox, nu' co' nac mèn chol bin, no co' nac mèn co' ndyoodi's chol di'stèe, no co' nac mèn chol nación.

<sup>10</sup>Mbli U' par nac nu' mèn nacionpe' U' par ñibe' U' loo nu'. No mbli U' nac nu' mèn co' mbez con' roo no con' xèn no con' natú' nac Diox loo mèn. Nac nu' mèn co' mbez



con' roo no con' xèn no con' natú' loo Diox, ne. Tataa mod nxo'f zin' nu' zin' co' mxo'f zin' U' loo nu'. Ndli nu' sirv loo U', Tad. No ñibe' no nu' U' loo izlyo' yiloo.

<sup>11</sup> Ngoloa, chàa, gunèen huax angl. No mbìnen di's co' gunii rye angla. Angla ngureri' gax co'te' ndoo ner asient co'te' ndub Diox, co' nee di's, dib vuilt ned xís rye gal fthap mènngool co' nzi ndub no ned xís dyap má' co' nabana. Angl co' ngureri'a ngòc anglléy' co' yende chó mèn ngác ndlab. <sup>12</sup> Cabii mbez rye angla, ne:

Loo Jesucrist co' ngòc xal mbacxil' co' mbeth mèn, loo Jesucrist ndxàal ñibe' Diox par ñibe' Jesucrist loo alux con'. No ndxàal gác che'npe' Jesucrist ryethe con' co' nziri'. No ndxàal gác che'npe' Jesucrist ryethe con' co' ndxác Diox no ryethe con' co' ndxác Diox ndli Diox. No loo mbacxil' co' nac Jesucrist ndxàal li ryethe mèn, no ryethe angl, no ryethe taamas con' co' nzo loo bé' no co' nziri' loo izlyo' par gác con' guryath no con' guryèn loo Jesucrist. No ndxàal gác le' ryethe mèn, no ryethe angl, no taamas con' tolo li par gác Jesucrist xa' roo no xa' xèn loo ryethe con'. No ndxàal gab mèn, no angl, no taamas con' con' roo no con' xèn cón che'n Jesucrist loo taamas mèn.

<sup>13</sup> No mbìnen gunii ryethe con' co' mxèn' Diox no co' mblec Diox, que naca con' co' nzo loo bé', que naca con' co' nziri' loo izlyo', que naca con' co' nzo xàn' le'n izlyo', co' nee di's, ye'rbìil, que naca con' co' nzo loo nító' no le'n nító' loo Diox co' ndub loo asient no loo Jesucrist co' ndoo loo Diox. Mbez ryethe con'a:

Diox roo no Diox xèn nac Diox no con' roo no con' xèn mbli Diox. Diox guryath no Diox guryèn nac Diox. Gác con' roo no con' xèn loo Diox thidtene. No ta' na' lugar gác nado' na' loo Diox thidtene, loo Diox co' ndub loo asient. No loo Jesucrist co' ndoo loo Diox mbez na' rye con'a. Ndlya's na' gác con'a loo Diox no loo Jesucrist thidtene.

<sup>14</sup> Le' dyap má' co' naban co' nziri'a mbez taandxè', ne:

—Aa. Tataaque' gàca.

Lomisque' ne, ryete gal fthap mènngool mdub xib loo Diox co' ndub loo asient. No mcòo' mènngoola yéc mènngoola loo Diox, Diox co' naban thidtene.

## 6

*Trè' ndlu' cón che'n gaz cint co' nac flej.*

<sup>1</sup> Láth be' ndyaquen be' ndoon loo bé', mxaquen gunèen le' mbacxil' co' ngòc Jesucrist mcho' ner cint co' nac gaz cint co' nac flej. Ngoloa, mbìnen gunii thib má' co' nac dyap má' co' naban con thib bii co' mbyèn xal co'se' ndlyàa gundii. Gunee má' loon:

—Que de par ndxè', Juàn, sya, hui'l cón gác.

<sup>2</sup> Sya, nguan co'te' nzi má'. Gunèen ndoo thib huay color nagus tya. Ndub thib mbi' huay. No nzo thib huad ya' mbi'. No mxaquen gunèen mdub thib xa' thib coron yéc mbi' tac mbli mbi' gan loo huax xó' loo mèn loo izlyo'. Ngoloa, nda mbi' tedib vez par tolo li mbi' gan huax xó' loo mèn loo izlyo'.

<sup>3</sup> Co'se' mcho' Jesucrist mbryop cint co' nac flej, mbìnen gunee mbryop má' co' naban loon:

—Que de par ndxè', Juàn, sya, hui'l cón gác.

<sup>4</sup> Sya, nguan co'te' nzi má'a. Mberen, mxaquen gunèen ndoo tedib huay color nane. Le' mbi' co' ndub huay na, loo mbi'a mbli Diox par gáp mbi' huax con' la's nii mbi' no la's ya' mbi' par gác mbi' yis yaa loo mèn loo izlyo'. No li mbi' le' mèn guth thib xtàa mèn no tedib xtàa mèn. No mda' thib mbi' thib spad roo mcàa mbi' par li mbi' con' co' li mbi'.

<sup>5</sup> Co'se' mcho' Crist mbyon cint co' nac flej, mbìnen gunii mbyon má' co' naban. Gunee má' loon:

—Que de par ndxè', Juàn, sya, hui'l cón gác.

Sya, nguan co'te' nzi má'a. Mberen, mxaquen gunèen ndoo thib huay color nagat. Le' mbi' co' ndub huay na, nzo thib balans ya'. <sup>6</sup> Mbìnen, ne, mbyèn thib di's làth dyap má' co' nabana co' mbez:

—Ante dyo' thib kil triu por xop pes co' ndli mèn gan thib huiz zin'. No dyo' son kil nzob triu, co' lèe sabad, por xop pes co' ndli mèn gan thib huiz zin'. Per indlyasten teluxl aceit ya guy no vin.

<sup>7</sup> Co'se' mcho' Jesucrist dyap cint co' nac flej, mbinen gunii dyap má' co' naban. Guneé má'a loon:

—Que de par ndxè', Juàn, sya, hui'l cón gac.

<sup>8</sup> Nguan co'te' nzi má'a. Sya, mxaquen mbui'en ndoo thib huay color guu's loo má'a. Le' mbi' co' ndub huay na, lèe yalguth. Xís mbi' tolo nde nque taamas con' co' tolo tyactii mèn. No leque yub Diox mda' lugar par ngòp mbi' con' la's nii mbi' no con' la's ya' mbi' par li mbi' gath thib part mèn co' nac thap part mèn co' nzo dib athu loo izlyo'. Li mbi' par gath mèn loo xó'. Li mbi' par gath huin mèn. Li mbi' par gath mèn loo yilíiz. Li mbi' par guth má' huan co' nzo yii den loo izlyo' mèn. No gunèen ngue dó' ye'rbiil par ned xís huay, co' nee di's, le'n ye'rbiil lyàa rye mèn ye'rsin' ndxè' co' li mbi' gath.

<sup>9</sup> Co'se' mcho' Crist ga'y cint co' nac flej, gunèen alm no xpíi mèn co' nguth por cón che'n di's ndac che'n Diox no por ngo mèn yalbàn no mda' mèn cuent cón che'n Diox loo xtàa mèn no maste. Alma no xpíia nzo xàn' mes, co' nee di's, nac loo còo' loo Diox.

<sup>10</sup> Cabii mbez alma no xpíia loo Diox:

—Tad, U' co' nac Tad natú' no U' co' nac licpe' Tad co' ndlique' xal ncàbgòn U' li U' loo mèn, ¿axta pól tub rez U' no co' xtàa U' loo mèn xalque' mbli no mèn nu' co'se' mbeth mèn nu' loo izlyo', à', Tad?

<sup>11</sup> Leque sya, gunèen mdoc thib thib alma no xpíia xab alm no xpíi co' nac lar' nagus. No mbinen di's co' gunii Diox loo alma no loo xpíia:

—Bli gu' descans taandxepete tiemp axta tyaa tant mèn co' gath xal nguth gu' por mxo'f zin' mèna cón che'n Jesucrist. Mèna gac mèn hues xtàa gu' por cón che'n Jesucrist co' guth yèe mèn loo izlyo'.

<sup>12</sup> Co'se' mcho' Crist xop cint co' nac flej co' nde nque, láth ndoo hui'en loo con'a, chàa, mbuin thib xòo brut. Nde nxon', ale mcau loo huiz. Gunaa loo huiz xal ñaa thib le' lar' nagat, co' nee di's, thidtene mcau xin no mcau yat loo izlyo'. Lomisque' ne, dib loo mbe' gunaa xal ñaa ren. <sup>13</sup> No gunèen ngòb huax mbèelhui' co' nzi'f loo bé' loo izlyo'. Ngòb mbèela loo izlyo' xal co'se' ngol' mbii yaa ngud yaa ngue's no ndxàb anglyo rye nguud yen' loo yòo. <sup>14</sup> Nde nxon', chàa, mdyon' loo bé'. Mxaquen mdyùuz loo bé' xal co'se' nthùuz mèn thib le' ye's. Le' rye yii no rye den na, mbuin no mzye' yii den co'te' mdub yii den. Lomisque' ne, mbuin rye yòo biiz co' ngureri' le'n níttó'. No mzye' yòo biiz co'te' nziri' yòo biiz le'n níttó'. <sup>15</sup> Le' rye mèn co' mnibe' dib athu loo izlyo' na, mèn co' ngòc rey, mèn co' ngòc gobiern, mèn co' ngòc mèn nac zin', ryete mèna mcasloo le'n ye'r quèe co' ndub le'n yii no co' ndub le'n den. Thidte mcasloo mèna con rye mèn roo no rye mèn xèn, con rye mèn ric, con rye mèn co' ñibe' loo solndad, con rye mèn co' ngòp con' la's nii no la's ya', no con rye mèn co' ngòc moz yèe, no con rye mèn co' ngòc mèn co' yende chó mèn ñii loo co' yende chó mèn nguree ncà, ne. <sup>16</sup> Ryete mèna ngure rez loo yii no loo quèe rhue':

—Ngac gu' cón ngac gu'. Huen gulàa gu' loo nu'. No casloo gu' nu' loo Diox co' ndub loo asient par lyá' nu' loo yaltii tén' co' li Mbacxil' co' nac Jesucrist loo nu' yiloo.

<sup>17</sup> ¡Ay, Dio's!, nase mzinle' huiz co'se' tetii U' nu', por derech, no ¿chó nu' xec loo yaltii co' li U' loo nu'? Yende mod xec nu', yey.

## 7

*Trè' ndlu' cón che'n mèn co' nac si' fchop bin mèn nación Israel.*

<sup>1</sup> Co'se' ngolo gunèen ryethe con'a, mxaquen gunèen thap angl co' ndoo dyap lad ro izlyo'. Angla ngue tau' loo mbii dyap lad ro izlyo' par ne'xyo'fte mbii thidtene chol lugar loo izlyo' no ne'xyo'fte mbii loo níttó', ne. No ngure xee mbii axta nec thib laa ne'ngüinte loo yaa loo izlyo' no axta nec thib le' yix ne'ngüinte loo izlyo'. <sup>2</sup> No gunèen tedib angl co' nde par ned ndlyen huiz. Angla ngo thib sell che'n Diox ya', Diox co' naban thidtene.

Angla cabii ngrozèe loo dyap angl co' nziri' dyap lad ro izlyo' co' mbli Diox par ngòp angl con' la's nii angl no con' la's ya' angl par li angl yalquii loo izlyo' no loo níttó'. Ndxab angla loo dyap angl:

<sup>3</sup>—Ne'lide gu' yalquii loo izlyo', ne' loo níttó', ne' loo chol yaa nayèe co'se' tarte que' nu' sell lechuz mèn co' nxo'f zin' zin' cón che'n Diox na'.

<sup>4</sup>Ngoloa, mbinen plópe' mèn ngòc mèn co' mquée sell lechuz tiempa. Loo rye mèn ngòc thib ayo nzo cho' fthap mil mèn, mèn co' nac ante bin mèn co' nac si' fchop ned mèn co' nac mèn nación Israel. <sup>5</sup>Mquée sell lechuz si' fchop mil mèn co' ngòc bin che'n thib mbi' co' ngro' lèe Judá. Mquée sell lechuz taasi' fchop mil mèn co' ngòc bin che'n thib mbi' co' ngro' lèe Rubén. <sup>6</sup>Mquée sell lechuz taasi' fchop mil mèn co' ngòc bin che'n thib mbi' co' ngro' lèe Gad. Mquée sell lechuz taasi' fchop mil mèn co' ngòc bin che'n thib mbi' co' ngro' lèe Aser. Mquée sell lechuz taasi' fchop mil mèn co' ngòc bin che'n thib mbi' co' ngro' lèe Neftalí. Mquée sell lechuz taasi' fchop mil mèn co' ngòc bin che'n thib mbi' co' ngro' lèe Manasés. <sup>7</sup>Mquée sell lechuz taasi' fchop mil mèn co' ngòc bin che'n thib mbi' co' ngro' lèe Simeón. Mquée sell lechuz taasi' fchop mil mèn co' ngòc bin che'n thib mbi' co' ngro' lèe Leví. Mquée sell lechuz taasi' fchop mil mèn co' ngòc bin thib mbi' co' ngro' lèe Isacar. <sup>8</sup>Mquée sell lechuz taasi' fchop mil mèn co' ngòc bin che'n thib mbi' co' ngro' lèe Zabulón. Mquée sell lechuz taasi' fchop mil mèn co' ngòc bin che'n thib mbi' co' ngro' lèe José. No mquée sell lechuz taasi' fchop mil mèn co' ngòc bin che'n thib mbi' co' ngro' lèe Benjamín.

*Trè' ndlu' le' Juàn gunèe mènley' co' noc xab anabte lar' nagus.*

<sup>9</sup>Ngolo gunèen mquée sell lechuz rye mèn, chà, mxaquen gunèen nziri' huax mèn co' nac che'n ryethe nación no co' nac che'n ryethe bin mèn co' ndyoodi's chol di'stèe, co' nee di's, nac mèn dib athu loo izlyo'. Nziri' mèn. Nzi ndoo ga' mèn dib vuelt loo Diox no loo Mbackxil' co' nac leque Jesucrist co'te' ndub Diox loo asient. No nec thib mèn ne'ngácte ndlab mèn tant thib mèn nziri'. No noc xab mèn anabte lar' nagus. No ryete mèn nzo thib thib yin ya'. <sup>10</sup>Ryete mèn cabii mbez yèe. Mbez mèn:

Diox na' co' ndub ñibe' loo asient nac xa' co' mtelá' na' loo con' ryes. Diox mbli con'a loo na' por cón che'n mbackxil' co' nac leque Jesucrist.

<sup>11</sup>Nde nxon', ryete angl nzi ndoo ga' dib vuelt loo Diox co' ndub loo asient no dib vuelt loo rye mènngool no loo thap má' co' ñèn naban. Co'se' ngolo tataa ngurez ryete mèn, ryete angla mcotloo loo yòo loo Diox co' ndub loo asient. No mcò' angl yéc angl loo Diox. <sup>12</sup>Mbez angl:

Tatua' gàca. Gab na' di's roo no di's xèn no di's natú' cón che'n Diox loo mèn. No lomisque', ndlya's na' ante loo Diox tolo gac con' roo no con' xèn thidtene. Lomisque' ne, gab na' ante Diox nac xa' co' ndxác alux con'. No ante loo Diox gab na': Diox quix non U', Tad Diox, por ryethe con' ndac co' mbli U' loo nu'. Ante loo U' gac ryethe con' guryath no con' guryèn por cón che'n ryethe con' roo no con' xèn co' ndxàp U' la's ya' U' no co' ndxàp U' la's nii U', Tad Diox. Loo U' co' nac Diox nu' gac ryethe con' ndxè' le'n rye lín' co' ntlo, no le'n rye lín' co' ndxelo, no le'n rye lín' co' ne'lith node. Taandxè' gàca.

<sup>13</sup>Ngoloa, asempli thib mènngool co' nziri'a, mnibdi's mènngool loon:

—Juàn, ¿chó mèn nac mèn co' noc anabte lar' nagus no ché' yende pá ñeel pá ned nde mèn, ne, à'?

<sup>14</sup>Daa ndxab loo mènngoola:

—Tad, U' non cón che'n mèn. Per daa yende cón naneen cón che'n mèn ba'.

Sya, gunee mènngoola loon:

—Mèn nac mèn co' anze'f thib con' mxactii por cón che'n yaltii tín' co' ngòc loo mèn por ngòo mèn loo cón che'n Diox. Mèn ngòc mèn nambii no mèn nalì loo Diox por cón che'n ren Jesucrist co'se' nguth Jesucrist loo cruz. <sup>15</sup>Por cona, nzo mèn loo Diox thidtene co'te' ndub Diox loo asient che'n Diox par ndli mèn mandad loo Diox co' ndub ñibe' loo asient ze no yál'. Le' Diox na, Diox yo ban no mèn par quenap Diox mèn loo

Diox. <sup>16</sup> Mèna ya ne'gath huinte no ya ne'gath nítte. Ne' ne' so' bé' mèna. Ne' ne' guin rso' che'n huiz mèna tya. <sup>17</sup> Tataa gàca loo mèna tac Mbackxil' co' nac leque Jesucrist co' ndoo loo Diox co'te' nzo Diox, Jesucrist thidtene nzo no mèna par li Jesucrist con' ndac loo mèna xal ndli thib pastor con' ndac loo mbackxil' pastor. No li Jesucrist par thidtene gac thib yalnaban ndac tín' loo bé' loo mèna. No leque hora, li Diox ya ne'tolode gón mèna thidtene.

## 8

*Trè' ndlu' le' Crist mcho' lult cint co' nac flej no cón che'n thib incensar co' nacsua' ampurte or.*

<sup>1</sup> Co'se' mcho' Crist lult cint co' nac flej co' natedó' lad ye's co' nadùuza, xèe nguled ruid loo bé' le'n med hor. <sup>2</sup> Chàa, mberen, mxaquen gunèen nzi ndoo gaz angl loo Diox. Loo gaz angla mda' Diox thib thib trompet. <sup>3</sup> Ngoloa, chàa, mxaquen gunèen nde tedib angl co' nzo thib incensar co' nacsua' con ampurte or ya' angl. Mdoe angla loo mes, co' nee di's, nac loo còo' loo Diox. No mda' Crist huax du'r yal' loo angl par co angl huax du'r yal' loo incensar par yitoo huax zen yal' co'te' nzo Diox loo asienta. Leque tiempa, mxaquen mbìn Diox di's co' mbez mèn Diox, mèn co' ngòc che'npe' Diox láth naban mèna loo izlyo'. <sup>4</sup> Sya, mbli angla par mquée zen yal' loo Diox. No leque tiempa, mbli angl le' zen yal'a ndlu' cón che'n di's co' ngurez mèn co' ndxela's loo Crist loo Diox, mèn co' mbez Diox láth nzi ban mèna loo izlyo'. <sup>5</sup> Ngoloa, mbe' angla incensar. Ngua lo angl quii loo incensar loo mes co' nac còo' co'te' nzo Diox. Ngoloa, mblobii angl quia loo izlyo'. No co'se' ngulàa quia loo izlyo', ngos mblyab gundii. Mbyèn huax ruid. Mtlo ngulàa bèel gundii loo izlyo'. No mbuin thib xòo brut loo izlyo'.

*Trè' ndlu' cón che'n trompet co' mda' Diox loo angl.*

<sup>6</sup> Ngoloa, ryete gaz angl co' mcàaya' gaz trompet, mtlo angl, mbli nab angl angl par cuez angl trompet.

<sup>7</sup> Ner angl mcuez trompet angl. Leque hora, mbli Diox ngulàa thib loo yuu quèe brut loo izlyo'. No ngulàa quii co' nos con ren leque hora loo izlyo'. Mbyec thib tant con' loo izlyo', co' nee di's, nac son tant con' loo izlyo'. No axta mbyec thib tant yaa nayèe no thib tant huan co' nac son tant yaa no huan loo izlyo'.

<sup>8</sup> Mbryop angl co' nde nque mcuez trompet. Leque hora, Diox mbli ngulàa thib con' co' gunaa xal thib gundith loo nítto'. Con'a gunaa xal thib yii roo co' ndub yol. Le' sya, thib part co' nac son part nítto' ngòc nít ren. <sup>9</sup> No nguth thib part rye con' co' naban le'n nítto' co' nac son part con' co' nzo naban le'n nítto'. No mtelux Diox thib part yòoyaa co' nac son part yòoyaa co' nzo loo nítto' por cón che'n con'a, ne.

<sup>10</sup> Tedib angl co' nac mbyon angl co' nde nque, mcuez trompet. Leque hora, mbli Diox ngulàa thib mbèelhui' co' ndoo yol loo bé' loo izlyo'. Naa mbèelhui'a xal thib quèe roo no xal thib yii roo co' ndoo yol. Ngulàa mbèelhui'a loo thib part yó'be' co' nac son part yó'be' co' nzo dib athu loo izlyo'. No ngulàa mbèelhui'a loo thib part xlen nít co'te' ndub len nít co' nac son part co'te' ndub len nít dib athu loo izlyo'. <sup>11</sup> Mbèelhui'a ngro' lèe Ajenj co' lalque' nalà xal cuan' co' mbez mèn lèe tilà co' anze'f nalà. No ngòc nalà tín' thib part nít co' nzib len no thib part yó'be' co' nac son part co'te' nzib len nít no co' nac son part yó'be' dib athu loo izlyo'. No tataa mod anze'f thib mèn nguth por ngu mèn nít co' ngòc nít nalà.

<sup>12</sup> Be taa be taa mcuez angl co' nac thap angl co' nde nque trompet angl. Mxaquen mcuau loo izlyo' co' nac thib part che'n son part che'n thib thib huiz co' nac thib huiz. No mcuau loo mbe' no loo mbyáz. Ne'nteniide mbe' no mbyáz thib part che'n son part che'n thib thib yál' co' nac thib part che'n thib thib yál' par tataa mod mbli Diox mcuau thib part che'n thib thib huiz no thib part che'n thib thib yál'. Tataa mbli Diox le'n rye huiza par mtetii Diox mèn axta mtlo Diox, mtetii Diox mèn tedib mod yiloo.

<sup>13</sup> Ngoloa, chàa, mbyú' loo loon no mxaquen gunèen no mbìnen ngue tee xobii thib angl xtau'the loo bé'. No be taa cabii mbez angl:

—Ay, prob mèn co' naban loo izlyo' co'se' yèn cuez taason angl trompet angl.

## 9

<sup>1</sup>Ngoloa, mcuez angl co' nac ga'y angl co' nde nque trompet angl. Leque hora gunèn ngulaa thib mbèelhui' loo bé' loo izlyo'. Ngòc mbèelhui'a thib angl. Mda' Crist lyab che'n puert ye'rbiil loo angl par xal' angl puert ye'rbiil. <sup>2</sup>Mxal' angl puert ye'rbiil. No ngo too thib zen brut más leque xal co'se' mbe zendó' co' ndxetoo no co' mbe loo izlyo' le'n mbe' marz no le'n mbe' abril. Zen che'n ye'rbiila mbli mbyau' loo huiz par mcuau loo huiz no axta yende mod hui' ndxè' hui' ba' mèn loo izlyo'. <sup>3</sup>Le'n zena Diox mbli ngos mdyàl mbiistó'léy'. Mbiistó'a mque tee xobii dib athu loo izlyo'. No mbli Diox par ngòc nayi' mbiistó'a xal nayi' mbacxub co' nzo loo izlyo'. <sup>4</sup>Mbli Diox par ne'nglide mbiistó' yalquii loo nec thib huan nayèe no loo nec thib yaa nayèe. Ndxè'leque', mbli Diox mbli mbiistó' yalquii loo mèn co' inguede señ lechuz co' nac señ che'n Diox. <sup>5</sup>Per ne'nda'de Diox lugar nguth mbiistó' mèn. Ndxè'leque', mbli Diox par mbli mbiistó' yalquii loo mèn par mden' mèn yalnè le'n ga'y mbe'. Yalnè co' mden' mèn ngòc xal yalnè co' nden' mèn co'se' nquele mbacxub mèn. <sup>6</sup>Co'se' gac huiz co' ngue niin loo gu' ndxè', mèn aseli par leque mèn guth mèn. Per Diox ne'ta'de lugar guth leque mèn mèn. Mastale' lya's mèn gath mèn, ne'ta'de Diox lugar gath mèn le'n rye huiz co'se' gac con'a loo mèn.

<sup>7</sup>Le' mbiistó'a na, gunaa xal thib huay co' ngolole' ngo xab par tyub solndad huay par ya huay loo xó'. Mxaquen ndub thib con' co' ñaa xal thib coron or yéc mbiistó'. Le' loo mbiistó' na, ñaa xal ñaa loo thib mbi'. <sup>8</sup>Ale, mxaquen ndoo yis yéc mbiistó' co' lalque' nol' xal nol' yis co' ndoo yéc thib xa'got. Mxaquen ñaa quele mbiistó' xal quele thib mbee's co' ndoo yis lox yen. <sup>9</sup>Le' loo lad mbiistó' na, mzo'f thib fcho co' ñaa xal conch co' navez xal yi'f. Le' ruid co' ndxèn co'se' nxobii mbiistó' na, ndxèn xal ruid che'n huax carret co' ngobxax huay co'se' nque' huay carre con carret loo xó'. <sup>10</sup>Mque no mbiistó'a xuan' mbiistó' xalque' mque no mbacxub xuan' mbacxub. Con xuan' mbiistó'a mbli mbiistó' yalquii loo mèn le'n ga'y mbe'. <sup>11</sup>Mbiistó'a mque no thib xa' co' ngòc jef co' mnibe' loo mbiistó'. Xa'a nac thib angl co' nquenap ye'rbiil. Angla ngro' lèe di'stèe che'n mèn hebre Abadón. Le' di'stèe mèn grieg na, ngro' lèe angla Apolión, co' nee di's, nac xa' co' ntelux con'.

<sup>12</sup>Cóna ngòc ner yalquii no ner yaltii co' nguri'thle' loo mèn. Per tatabe' ndxàc falt riid taachop yaltii no yalnè loo mèn.

<sup>13</sup>Ngoloa, angl co' nac xop angl co' nde nque, angl mcuez trompet angl. Leque hora, mxaquen mbinen thib di's co' ngro' le'n thap con' co' ñaa xal ñaa cach ngon co' nzi'f dyap squin che'n loo còo' co' nacsua' con or co'te' nzo Diox. <sup>14</sup>Di'sa gunii loo angl co' nac xop angl co' nde nque co' nzo trompet ya':

—Ftelá' thap angl co' nzi quedó' gax ro yó'be' Euftrat co' nac thib yó'be' roo.

<sup>15</sup>Tataa mod mblyá' dyap angla par mbli angl nguth thib part mèn co' nac son part mèn co' naban dib athu loo izlyo'. Angla thidtene mquedó' tee tya par mbli angl nguth mèn hor co'se' mnibe' Diox loo angl li angl con'a. Hora ngòc huiz no ngòc tiemp co' ndxab Diox gac con'a loo mèn. <sup>16</sup>No mbinen napló tant nac solndad co' nac solndad che'n dyap angla. Solndad ngòc anab solndad co' ndub huay. No por loo rye solndada, ngòc solndada chop ayo millón mèn.

<sup>17</sup>Tataa mod mdan cuent no gunèn cón che'n solndad co' ndub huay co' mxyo'f loo loon. Le' rye solndad co' ndub huaya na, ryete solndada ne' thib le' yi'f co' ntau' pech solndad. Yi'fa, mxaquen, ale nanee ren gunaa no ale azul gunaa no ale guus gunaa. Nde nxon', mxaquen gunèn le' huaya mque no yéc xal yéc thib mbee's co' ndoo yis lox yen. No gunèn ndryo' quii no zen no xla' asufr ro huay. <sup>18</sup>Tataa mod nguth thib part mèn co' nac son part mèn co' naban loo izlyo' con yon loo con' co' ngro' ro huay co' ngòc quii no zen no xla' asufr. <sup>19</sup>Tac Diox mbli le' huaya li yalquii loo mèn con ro huay no con xuan' huay tac xuan' huay ngòc xal mbel'. No con xuan' huay co' ngòc xal mbel' mbli huay yalquii loo mèn.



<sup>20</sup> Per rye mèn co' be' mbyan' loo izlyo', mèn co' ne'ngàcte yalquìia loo, ne' por gunèe mènà ngòc yalquìi loo mèn co' ngòc yalquìi ne'nglàade yéc mènà no ne'nglàade lezo' mènà par bel'que' tataa mod nse' mènà mod co' ndxàp mènà loo izlyo' par nglá' mènà loo con' ye'rsin' co' ngue li mènà. Ne' ne' nglá' mènà par ne'tlode li mènà cas loo rye xpìi ye'rsin', no rye gunab no rye mdo' co' nacsua' con or, no co' nacsua' con plat, no co' nacsua' con brons, no co' nacsua' con chol loo yaa. Mdo'a yende mod hui'. Ne' ne' indxòn mdo'a co'se' ndyoodi's no mèn mdo'a. No ne' ne' indyee mdo'a. <sup>21</sup> Ne' ne' nse' mènà mod co' ndxàp mènà par ya ne'tolode guth mènà xtàa mènà. Ne'nglà' de mènà mod co' ngòp mènà par ne'tolode li mènà yalbruj. Ne'nglà' de mènà mod co' ndxàp mènà par ya ne'tolode li mènà yalburrid no par ne'tolode ncu'a'n mènà xin' huan mènà. Lomisque' ne, ne'nglà' de mènà mod co' ngòp mènà par ya ne'tolode li huan' mènà che'n xtàa mènà.

## 10

### *Thìb angl nzo thìb libr chu'th ya'.*

<sup>1</sup> Be taa be taa mxaquen mbyú' loo loon. Gunèen tedib angl. Loo angla mbli Diox ngòp angl huax con' la's nii angl no huax con' la's ya' angl. Angla nde làa loo bé' le'n xcuau. No mxaquen ne' angl thìb mbèel qui'th yéc angl. Rloo angl ante nquée xnii xal co'se' nguìn huiz. Le' nii angl na, gunaa xal bèel co' ndxetoo. <sup>2</sup> Gunèen nzo thìb libr chu'th ya' angl. Ndoò xal' loo libr. No gunèen ndoo sa nii angl co' nac ladlì loo nítto'. Le' taasa nii angl co' nac ladrebes na, ndoo loo yòò biiz. <sup>3</sup> Ngoloa, cabii ngrozèe angl xal co'se' mbez yèe yii mbez yèe den thìb mbee's. No co'se' ngrozèe angl, leque tiempa ngos mblyab gundii gaz vez. Mbyèn bii gundiia axta plóthe. <sup>4</sup> Co'se' ngolo ngos mblyab gundii gaz vez no mbyèn bii gundii axta plóthe, daa co' nac Juàn mblyazen ntlon, nque'en ye's cón che'n con' mbinen. Per látha, mbinen thìb di's co' mbyèn loo bé' co' gunee loon:

—Juàn, ante le'n lezo'l blosua' cón nee di's gundii co' ngos mblyab gaz veza. No indlyasten que'l ye's cón che'na.

<sup>5</sup> Ngoloa, chàa, gunèen angl co' mdoo nii loo nítto' no loo yòò biiz. Mde'f angl ya' angl co' nac ladlì loo bé'. <sup>6</sup> Mde'th angl lèe Diox, Diox co' nabanque' thidtene, Diox co' mblec no co' mxèn' bé' no izlyo' no nítto' no ryethe taamas con' co' mblec Diox no co' mxèn' Diox. Ndxab angl:

—Nase, por lèe Diox niin loo gu': Mzinle' hor co'se' li Diox con' co' mnibe' Diox loo lezo' Diox li Diox loo mèn. Ya ne'lyen'te Diox más. <sup>7</sup> Tac co'se' gal hor cuez angl co' nac gaz angl co' nde nque trompet angl, ya mdyaaale' tiemp co' ngòcle' tiemp co'se' li Diox ryethe con' co' mnibe' Diox loo lezo' Diox li Diox loo mèn loo izlyo' ndxè' ndoore' lith no izlyo' ndxè' xalque' mblu' Diox loo mèn co' ngo ban póla, mèn co' mde'th di's co' ndxab Diox, mèn co' mxo'f zin' zin' che'n Diox. Con'a nac con' co' mbli Diox co' ngo casloo loo mèn le'n dib lal tiempa axta nalle'.

<sup>8</sup> Di's co' mbinen gunii loon loo bé', guniii loon tedib vez. Gunee di's loon:

—Juàn, huàa co'te' ndoo angl ba'. No fxen libr chu'th co' ndoo xal' co' nzo ya' angl, angl co' ndoo sa nii loo nítto' no co' ndoo taasa nii loo yòò biiz.

<sup>9</sup> Sya, nguan co'te' ndoo angl. No mna'ben loo angl ta' angl libr chu'tha càan. Angl gunee loon:

—Aa libr ndxè'. Dhua libr. Co'se' ngue yuhual libr ndxè' ten'l nazi' nac libr xal mzin le'n ro'l. Per co'se' ngolo nduhual libr, ten'l nalà ngòc libr le'n lezo'l.

<sup>10</sup> Sya, mxenen libr chu'th co' nzo ya' angla. No ale nduhuan libr. No, licque', mxaquen ale nazi' ngòc libr chu'tha xal mzin le'n ro'en co'se' ngue yuhuan libr. Per co'se' ngolo nduhuan libr, mden'en ngòc nalà libr le'n lezon. <sup>11</sup> Luega gunee angl loon:

—Lùu nquin bere tyoodi's no ta'l cuent xal ñibe' Diox lool loo mèn huax yèez, no loo mèn huax nación, no loo mèn co' ndyoodi's chol di'stèe, no loo mèn co' ñibe' loo chol nación, ndee.

## 11

*Trè' ndlu' cón che'n chop mbi' co' mda' cuent cón che'n Diox.*

<sup>1</sup> Ngoloa, mxaquen mda' Jesucrist thib bro yí loon. Yíia ñaa xal thib bro var co' ndli mèn us par nchi'x mèn con'. Gunee Jesucrist loon:

—Juàn, huàa chi'x templ che'n Diox. No fchi'x mes co' nac loo còo' co' ndoo le'n templ. No blab mèn co' ndyub xib no co' ncòo' yéc loon le'n templ. <sup>2</sup> Per ne'chi'x tel loo lue' co' nac xís templ no co' nac loo templ. Tac loo lue'a ngòcle' che'n mèn tith. Mèn tith yì'th ñibe' yèe no cobé' no toxcua' mèn tith no gac che'npe' mèn tith ciuda natú' le'n son lín' narol. Pues, mchi'xen templ no loo còo' xal mnibe' Jesucrist loon. <sup>3</sup> Tolo gunee Jesucrist loon, ne:

—Na tel' chop mbi' co' ta' cuent cón chenen loo mèn co' naban le'n ciuda natú'. Ryop mbi'a ta' cuent cón chenen le'n son lín' narol. Ryop mbi'a goc xab lar' nagat, co' nee di's, ndlu' nxi tín' lezo' ryop mbi'.

<sup>4</sup> Ngolo mdoodi's no Jesucrist daa con'a, gunèen ndoo chop yaa oliv. No gunèen ndoo chop candiler co' nziri' loo Diox ba', Diox co' ñibe' loo izlyo'. Chop yaa oliv no chop candiler co' nzo loo Diox nee di's ngòc ryop mbi' co' mtel'en loo mèn ciuda natú'. <sup>5</sup> Chele' chol mèn mbly'a's li yalquii loo ryop mbi'a, Diox mbli ngro' quii ro ryop mbi'a. Quia, por derech, mtec mèn co' ngòc ngolo ngola's che'n ryop mbi'. Tataa mod mbli Diox par nguth chol mèn co' mbly'a's ngli yalquii loo ryop mbi'a. <sup>6</sup> Ryop mbi' co' mda' cuent cón che'n Crist, mbli Diox ngòp ryop mbi'a con' roo no con' xèn la's nii mbi' no la's ya' mbi' par mbli ryop mbi' par ne'nglàade yuu le'n dib lal huiz co' mdoodi's ryop mbi' cón che'n Diox. Lomisque' mbli Jesucrist ne, ngòp ryop mbi'a con' roo no con' xèn la's nii mbi' no la's ya' mbi' par mse' loo mbi' nít dib athu loo izlyo' par ngòc nít ren dib athu loo izlyo'. No mbli ryop mbi'a mden' mèn yalnè con' rye loothe yíiz no rye loothe con' ryes loo mèn dib athu loo izlyo'. Mbli ryop mbi'a con'a huax vez xal gunee lezo' ryop mbi'. <sup>7</sup> Per co'se' ngolo mtelo ryop mbi' zin' co' mxo'f zin' ryop mbi'a, sya, ngro xo'f thib mbi' má' thidtene. Ngro' mbi' le'n ye'rbuil. Mbi'a, Diox mda' lugar loo mbi' má'a mcua'n xó' mbi' con' ryop mbi' co' mda' cuent cón chenen axta mbli mbi' gan mbeth mbi' má'a ryop mbi'a. No mbethque' mbi' má'a ryop mbi'. <sup>8</sup> No co'se' ngolo mbeth mbi' má'a ryop mbi'a, tyate mbyan' nax ryop thebola ned co' nac ned le'n ciuda Jerusalén co'te' mque' mèn Tad Jesucrist loo cruz. No ne' ciuda Jerusalén tedib lèe co' nac lèe ciuda Sodom, co' nee di's, por ngòc mèn ciuda Jerusalén mèn ye'rsin'túb xalque' ngòc mèn ciuda Sodom mèn ye'rsin' no xal ngòc mèn nación Egipt mèn ye'rsin', ne. <sup>9</sup> No le'n son huiz co' nax nde'f ryop thebola loo ned le'n ciuda Jerusalén, rye mèn rye nación mbui' loo thebola no ne'ngla'de mèn ya ca's mèn thebola. <sup>10</sup> Rye mèn co' naban dib athu loo izlyo', rye mèn mdyac lezo' por nguth ryop mbi'a. No axta huen mbyan' lezo' mèn co' naban dib athu loo izlyo' axta mtel' mèn con' loo xtàa mèn par ya too naa mèn xtàa mèn, tant mdyac lezo' mèn nguth ryop mbi'a. Tataa mbli mèn tac ryop mbi' co' gunii cón che'n Diox, ndyac mèn le' ryop mbi'a ngòc thib yis thib yaa loo mèn. <sup>11</sup> Per co'se' ngolo nguri'th son huiz narol, Diox mbli par ngro xban ryop mbi'a. No mbere ryop mbi'a, ngo che ryop mbi'a tedib vez. Le' rye mèn co' gunèe ryop mbi'a na, mzyeb mèn axta plóthe. <sup>12</sup> Ngoloa, ryop mbi' co' ngro xbanda mbìn thib di's co' mbyèn loo bé' co' ndxab loo ryop mbi':

—Quée gu' gáp trè', ey.

Sya, mxaquen mquée ryop mbi'a loo bé' le'n thib le' xcua. Le' rye mèn co' ngòc ngolo ngola's che'n ryop mbi'a na, gunèe xal nda quée ryop mbi'a loo bé'. <sup>13</sup> Leque hora ne, mxaquen mbuin thib xòo brut. No ngulàare' thib part co' nac si' part che'n ryethe con' co' nac ciuda Jerusalén. No leque tiempa, nguth gaz mil mèn por xòo brut co' mbuina. Le' mèn co' be' mbyan'a na, anze'f mzyeb. Mbez mèn:

—¡Ay, Dio's! ¿Cón con' ndxè', Tad Diox? Con' roo con' xèn ngue li U', U' co' nzo loo bé'.

<sup>14</sup> Con' ryethe con' ryes co' ngòca, mbryop yalnaze'f no yalnaxi co' nde teele' ndri'th.

*Trè' ndlu' cón che'n lult angl co' nac gaz angl co' mcuez trompet.*

<sup>15</sup> Sya, mcuez angl co' nac gaz angl trompet angl. Látha, be' mxaquen cabii mbyèn di's loo bé' co' mbez huax mèn:

Nase mzinle' hor le' ryethe mèn co' ñibe' loo izlyo' ndxè', mènà gác nado' loo Diox par ñibe'pe' Diox no Tad Crist loo ryethe nación dib athu loo izlyo'. No ñibe' Diox loo alux con' le'n lín' co' ntlo, no le'n lín' co' ndxelo, no le'n lín' co' ne'lith node.

<sup>16</sup> Sya, ryete gal fthap mêngool co' ndub loo asient co'te' nzo Diox, rye mènà mcotloo loo izlyo'. No msal' mènà ya' mènà loo Diox. <sup>17</sup> No mbez mêngoola:

Diox quix U', Tad Diox, U' co' ndxàp ryethe con' roo no con' xèn la's nii U' no la's ya' U'. Nac U' Diox co' thidtene nzo. Nase leque U' mbli mnibe' yéc U' no mnibe' lezo' U' par tlo ñibe' U' loo alux con' por cón che'n con' roo no con' xèn co' nzo la's nii U' no co' nzo la's ya' U'.

<sup>18</sup> Mèn rye nación ngòc nayi' por mtetii U' mènà. Per ni mod tac nase mzinle' huiz co' gác huiz co' tetii U' mèn, por derech. No lomisque', mzinle' huiz co'se' tub rez U' cón che'n mèn nguth co' ne'ndalte ngala's loo U' no loo Crist. Le' loo mèn co' mxo'f zin' zin' cón che'n U' na, mèn co' mdoodi's cón che'n U', U' ta' con' gác che'n mènà. No ta' U' con' gác che'npe' mèn, mèn co' ngro xà'le' loo con' ye'rsin' co' nac cón che'n xab izlyo'. No ta' U' con' gác che'npe' mèn, mèn co' ndli ndxàc con' guryath no con' guryèn cón che'n lèe U', que nac mènà mèn co' nde'f di's nac mèn roo no mèn xèn, que nac mènà mèn co' nde'f di's nac mèn be'the. No lomisque', mzinle' hor co'se' telux U' mèn co' nteza' no co' nteزاب loo mèn no loo con' co' nzo loo izlyo'.

<sup>19</sup> Be taa be taa mxaquen gunèen mxyal' puert che'n templ che'n Diox co' ndub loo bé'. Látha, gunèen nax caj co'te' nzo ye's co' nac conveñ le'n templa. No lomisque', leque hora mxaquen ngulàa bèel gundii. Mbyèn huax ruid. Ngos mblya'b gundii. Mbuin thib xòo brut. No ngulàa thib yuu quèe brut loo izlyo'.

## 12

*Trè' ndlu' cón che'n thib xa'got no cón che'n thib má' co' lèe dragón.*

<sup>1</sup> Láth rye con' ngòc ndxè', mxaquen mbyú' thib señ roo no thib señ xèn co' mbli Diox loon loo bé'. Gunèen thib xa'got co' noc xab. Per lar' co' ngòc xab xa'gota anze'f nquée xnii xal nquée xnii huiz. No mxaquen nax mbe' co' ntenii loo bé' xàn' nii xa'gota xal thib banc. No mxaquen mdub thib coron yéc xa'gota. Lad corona gunèen mquée si' fchop mbèelhui'. <sup>2</sup> Xa'gota mdoo nac xin'. No mbez yèe yii mbez yèe den xa'got. Mquée yalnè xa' par tyan xin' xa'. <sup>3</sup> Leque hora, chàa, mxaquen gunèen ngòc tedib señ loo bé'. Ale ngro' too thib má' co' lèe dragón, co' nee di's, nac Mebizya. Má'a gunaa xal ñaa thib cocodril co' anze'f naroo tìn'. Ale mxaquen nane gunaa dragón no, nde nxon', nzi'f gaz yéc dragón. Mxaquen nzi'f si' cach dragón, ne. No gunèen ndub thib thib coron yéc dragón. <sup>4</sup> Mxaquen ne, con xuan' dragón nguree dragón thib part mbèel co' nac son part mbèel co' nzi'f loo bé'. No mbli dragón par ngòb che rye mbèela loo izlyo'. Ngoloa, xèe mdoo dragón loo xa'got co' tyan xin'a par hua dragón mbeto' co'se' yilo gáal mbeto'. <sup>5</sup> Xa'gota mxan thib mbedbi'. Mbed ngòc mbi' co' ñibe' no co' toxcu' loo rye nación dib athu loo izlyo'. No nayi' gác mbed co'se' ñibe' yèe mbed co'se' gác mbed mbi' loo mèn nación dib athu loo izlyo'. Texal ngolo ngóol mbedà, mbli Diox par ndyàa mbed loo bé' co'te' nzo Diox. <sup>6</sup> Le' xa'gota na, luega mxon'. Ndyàa xa' thib lugar co'te' nagán co'te' mbli nab Diox thib lugar par yòo xa'. Tya mda' mèn co' nduhua xa'gota le'n thib mil nzo chop ayo nzo ayon huiz.

<sup>7</sup> Co'se' ngolo mbli Diox par mcasloo xa'gota, mxaquen ngòc thib xó' brut loo bé'. Láth xó'a, ngo thib angl co' lèe Miguel, co' más mnibe' loo angl loo be' xal ñibe' thib general loo huax solndad, con huax taamas angl co' ngòc solndad Miguel par ngro yoo Miguel con Mebizya. Sya, ngro yoo Mebizya no angl co' nac solndad che'n Mebizya con Miguel no angl che'n Miguel. <sup>8</sup> Per ne'nglide Mebizya gan con angl co' nac solndad che'n Mebizya

loo Miguel con angl co' ngòc solndad che'n Miguel. Ngoloa, ya ne'ntolode ngla' Miguel ngo Mebizya loo bé' con angl che'n Mebizya.

<sup>9</sup>Tataa mod sandante mblo' Diox Mebizya no angl che'n Mebizya loo bé', Mebizya co' ne' tedib lèe co' nac Dragón Tín', no co' ne' tedib lèe co' nac Mbel' Gox. Di's co' nac Mbel'a, por derech, nac tedib lèe che'n Mebizya. No ne' Mbel'a tedib lèe co' lèe Satanás. Mebizya nac xa' co' ndli zin' loo mèn par nquedi Mebizya mèn dib athu loo izlyo. Per ngoloa, mbli Diox par ngulàa Mebizya no angl che'n Mebizya loo izlyo'.

<sup>10</sup>Ngolo ngòc ryethe con'a, cabii mbyèn thib di's loo bé' co' ndxab:

—Nase mzinle' huiz co'se' lyá' mèn loo con' ryes thidtene. No mzinle' huiz co'se' ñibe'pe' Diox loo alux con' por cón che'n con' roo no con' xèn co' nzo la's nii Diox no co' nzo la's ya' Diox. No mzinle' huiz co'se' ndxàp Crist rye loothe con' la's nii Crist no la's ya' Crist. Tataa gàca tac mbli Diox no Crist gan par ngro' Mebizya loo bé' thidtene, Mebizya co' ngòc xa' co' ntecxù' mèn co' nac hues xtàa na' por cón che'n Crist loo Diox ze no yál'.

<sup>11</sup>Lomisque' ne, mèn co' ngòc loo cón che'n Diox, co' ngòc mèn co' nguth por cón che'n Diox no por cón che'n Jesucrist, mèn mbli gan ngro' xa' loo cón che'n Mebizya por cón che'n ren che'n Jesucrist co'se' nguth Jesucrist loo cruz no por cón che'n cuent co' mda' mèn cón che'n Jesucrist. Mèn ne'ngzebte gath por cón che'n Jesucrist. Ndxle'leque', mdoo lezo' mèn gath mèn por cón che'n Jesucrist. <sup>12</sup>Per nalle', ryete gu' co' nzo loo bé', fxo'f nde' fxo'f ndla' lezo' gu' tac ngòcle' gan mblo' Diox Mebizya loo bé' thidtene. Per jay prob gu' izlyo!, mèn co' nzi ban loo izlyo', no mèn co' nzi ban loo yò biiz le'n nítto', no mèn co' nzi ban loo nítto' tac Mebizya ngro' loo bé' par ngulàa Mebizya loo gu'. Anze'f nayi' ngro' Mebizya loo bé' no ndxecloo tín' Mebizya tac non Mebizya taandxepte tiemp nac tiemp co' que tee Mebizya loo izlyo' ndoore' cobii Diox Mebizya le'n ye'rbii thidtene.

<sup>13</sup>Daa, Juàn, mxyo'f loo loon no mxaquen con' ndxè', ne: Co'se' gunee Mebizya no mden' Mebizya le' Mebizya ngro'le' loo bé', no ngulàa Mebizya loo izlyo' par yan' Mebizya ante loo izlyo' thidtene, ngocloo tín' Mebizya axta plóthe. No mdub ngu's Mebizya xa'got co' mxañle' xin'a. <sup>14</sup>Per Diox mbli mdub chop xíl' xa'gota lad xa'gota no ngòc xíl' xa'gota xal xíl' mtii par ngòc mxobii xa'gota co'te' nac thib lugar nagán co'te' tith yò ban xa' loo mbel' co' nac Mebizya. No mbli Diox par ta' mèn con' hua xa'gota tya le'n son lín' narol. <sup>15</sup>Per Mebizya ndoole' mbli xtùuz li Mebizya thib con'. Ale mbli Mebizya ngro' nít ro Mebizya par ngòc níta thib yó'be' co' riid co'te' nzo xa'gota par tataa mod lyau xa'gota le'n yó'be'a. <sup>16</sup>Per Diox mbli thib con', ne. Mbli Diox le' izlyo' mblyath no xa'gota. Ale ngos mbryed loo izlyo' par mdèe nít loo izlyo' leque ngàc nít co' ngro' ro Mebizya thib yó'be'. <sup>17</sup>Per co'se' gunèe Mebizya ne'ngro' loode co' mbli Mebizya loo xa'gota, sate más ngocloo Mebizya gunèe Mebizya xa'gota. Sya, mxen Mebizya ned, ngua cua'n Mebizya xó' con mèn co' be' mbyan', mèn co' ngòc bin xa'gota. Mèn ngòc mèn co' mdubdi's loo con' co' mnibe' Diox. No ngòc mèn mèn co' altantque' ngure loo cón che'n di's ndac co' ngòc che'npe' Jesucrist.

## 13

*Trè' ndlu' cón che'n chop má' tín' co' lèe monstru.*

<sup>1</sup>Ngoloa, chàa, mxaquen mdoon ro play ro nítto' loo izlyo' ndxè'. Látha, gunèen ngro xo'f thib má' tín' loo nítto'. Ale mxaquen mque no má' gaz yéc má' no mque no má' si' cach yéc má'. Mxaquen mdub thib coron loo thib thib cach má'. Le' loo ryete gaz yéc má' na, gunèen mdub thib di's co' nazab mbez cón che'n Diox. <sup>2</sup>Má' tín' co' gunèena ñaa xal thib mbee's yèe. No ngue no má'a nii má' xal nii os. Le' ro má'a na, ñaa xal ñaa ro mbee's co' ndoo yis lox yen. Le' Mebizya na, ndoole' mbli par ngòp má' huax con' la's nii má' no la's ya' má'. <sup>3</sup>No mxaquen le' thib yéc má' co' ngòc rye gaz yéc má' gunaa xal thib con' co' mbuí' co' li par gath má'. Per ndxe'leque', yéc má' co' tataa gunaa nahuí'a no co' li par gath má', ale mbyac yéc má'. Co'se' gunèe mèn dib athu loo izlyo' con'a, ante mbui' mèn no ante gunaa mèn mbui' mèn con'a. No mdyac lezo' mèn dib athu loo izlyo' cón

che'n má' no ngòdo mènna loo cón che'n má'. <sup>4</sup> No ryete mèn dib athu loo izlyo' mcòdo' yéc loo Mebizya no mdub xib mèn loo Mebizya tac non mèn le' Mebizya mbli ngòp má'a con' roo no con' xèn la's nii má' no la's ya' má'. No ale mcòdo' mèn yéc mèn no mdub xib mèn loo má'. No ale ndxab mèn:

—¿Xá ñaa thib mbi' co' ta' par má' ndxè'? No ¿chó mèn gác cua'n xó' par li mèn xó' con má'? Yende chó mèn nzo co' li tataa, ¿lé'?

<sup>5</sup> Per leque Diox mda' lugar loo má'a par gunii yèe gunii tii má' ngòc nguàal di's zab cón che'n Diox. No mda' Diox lugar ñibe' má' loo mèn dib athu loo izlyo' le'n cho' fchop mbe'. <sup>6</sup> No tataaque' mbli má'. Gunii má' ngòc nguàal di's contra Diox. No nazab gunii yèe gunii tii má' cón che'n lèe Diox no cón che'n templ che'n Diox co' nac lugar natú' co'te' nzo Diox. No nazab gunii yèe gunii tii má' cón che'n mèn co' nzo loo bé'. <sup>7</sup> No mda' Diox lugar loo má' par li má' xó' contra mèn co' nac mèn che'npe' Diox axtaque' li má' gan guth má' huax mèn. No mda' Diox lugar loo má' ñibe' má' loo ryethe bin mèn no loo ryethe nación dib athu loo izlyo'. <sup>8</sup> Loo má'a mcòdo' yéc ryete mèn. No mdub xib ryete mèn co' naban loo izlyo' loo má'. Mènna nac mèn co' indubte lèe loo libr co'te' ndub lèe mèn co' yòdo ban no Diox thidtene. Libra ngue nole' Crist anon mblec Diox izlyo' no mxèn' Diox izlyo', Crist co' ngòc xal thib mbacxil' co' nguth loo cruz.

<sup>9</sup> Gu' co' ndub nza no co' ndxaa'd di's, bìn gu' di's ndxè' no ften' gu' cón nee di's co' ngue niin loo gu' ndxè': <sup>10</sup> Mèn co' ndxe' xtaa mèn xal thib pres, leque mènna gác pres yiloo. Le' mèn co' ndxuth xtàa con cuchi na, mènna gath loo cuchi, ne. Por cona, ngue niin le' mèn co' nzo loo cón che'n Diox co' nac che'npe' Diox, mènna nquin xec loo yaltii no loo yalquii co' ndxàc loo mèn. No nquin tolo yila's mèn loo Diox no tolo gáp mèn yalxla's loo Diox láth ndxàc con'a loo mèn.

<sup>11</sup> Ngolo gunèen ngòc con'a, mberen, gunèen tedib má' co' ngro' le'n thib ye'r yòdo loo izlyo' co' xà'que' ñaa. Má'a mque no chop cach má' co' ñaa xal cach co' nzi'f yéc mbacxil'. No ndlu' má'a loo mèn nac má' xal thib mbacxil' co' nac má' nado'. Per co'se' ndyoodi's má', ndyoodi's má' xal thib dragón, co' nee di's, nac yub Mebizya. <sup>12</sup> No lomisque', mda' Diox lugar ñibe' má' xalque' mnibe' ner má' par lyath no mbryop má'a ner má'. No mbli mbryop má' ndxè' le' ryete mèn co' naban dib athu loo izlyo' mcòdo' yéc no mdub xib mèn loo ner má' co' mbyac yéc co' nahuí'. <sup>13</sup> Mbli mbryop má'a huax yalguzye' axta mbli má' ngulàa quii no bèel loo bé' loo izlyo' loo mèn par mbui' mèn yalguzye' co' mbli má'. <sup>14</sup> No por yalguzye' co' mda' Diox lugar mbli mbryop má'a, mbli má' yalguzye' loo ner má'. Látha, mbli mbryop má' huax yalguzye' par mquedi mbryop má' huax mèn co' naban loo izlyo'. No mnibe' má' loo mèn toxcu'a mèn thib gunab che'n ner má' co' mbuí' par gath má', per ngoloa, ale le'le' mbyac yéc má' co' mxaquen mbuí'a. Ya ne'ngathte má'. <sup>15</sup> Lomisque', mda' Mebizya lugar mque no má' co' nac mbryop má' con' la's nii má' no la's ya' má' par li mbryop má' ryo too ban gunab, gunab co' nac gunab che'n ner má' co' nahuí' yéc par gác tyoodi's gunaba no par gác li gunaba par gath rye mèn co' ne'tyub xibte no co' ne'còdo' de yéc loo gunab. <sup>16</sup> Más de cona, mbli mbryop má' le' rye myen' bix, no rye mènngool, no rye mèn ric, no rye mèn prob, no rye mèn co' yende chó mèn gác ñii loo no co' yende chó mèn mbee ncà, no rye mèn co' nac moz, par mquée thib señ ya' rye mènna co' nac ladli o mquée señ lechuz mèn. <sup>17</sup> Tataa mod mbli má' par yende chó mèn co' inguede señ lad ne'ti' de mènna loo xtàa mèn no ne'tho' de mènna loo xtàa mèn. Señ nac lèe ner má' o naca numbr che'n lèe ner má'. <sup>18</sup> No cón che'n di's co' ngue niin loo gu' ndxè', naquin gác mèn co' huenleque' par tataa mod gác ta' mèn cuent no cobé' mèn axta chó numbr nac numbr che'n má' tín'a. Numbra nac numbr co' ndlu' cón che'n thib mbi'. Numbra nac numbr xop ayo nzo ayon xop.

## 14

*Thib tant mènley' mbil' ro thib himn.*

<sup>1</sup> Ngolo nguri'th ryethe con'a, be taa be taa mberen, mxaquen mbui'en le' Mbacxil' co' nac leque Jesucrist mdoo loo yii co'te' nziri' ciuda Jerusalén. Ngure no Jesucrist thib



ayo nzo cho' fthap mil mèn. Mèna ngòc mèn co' mquéele' lèe Jesucrist no lèe che'n Diox xud Jesucrist lechuz. <sup>2</sup> Látha, chàa, mbìnen thib bii co' mbyèn loo bé'. Biia mbyèn xal thib ruid co' ndli huax yó'be'. No mbyèn biia xal co'se' aguin izlyo' ndlyàa gundii. Lomis, mbyèn biia xal co'se' ndxol' huax mèn arp. <sup>3</sup> No mbìnen ndxol' ro mèna thib himn cub loo Diox co'te' nzo Diox no co'te' nzo rye dyap má' co' naban no co'te' nzo rye mènool co' nziri' co'te' nzo Diox. Nec thib mèn ne'ngácte nté'th himna. Ndxé'leque', ante mèn co' nac thib ayo nzo cho' fthap mil mèn co' mblyá' loo con' ryes loo izlyo', mèna ngóc mbil' ro himna. <sup>4</sup> Rye mèna ngóc mèn co' ne'ngàalte mènogot thidtene, co' nee di's, ne'nglide mèna yalmbi' no yalngot. Mèna ngóc mèn nambii no mèn nali loo Diox. Thidteneque' ngòc mèna loo cón che'n Mbackxil' co' nac leque yub Jesucrist. No thidteneque' ngo no mèna Jesucrist pál co'te' mque tee Jesucrist. Ryete mènlyé'a mblyá' loo ryethe con' ryes par mxo'f zin' mèna thib zin' ndac cón che'n Diox no cón che'n Mbackxil' co' nac leque yub Jesucrist. <sup>5</sup> Thidteneque' ne'ngro'de nec thib di's gutyè' ro mèna. Ngóc mèna mèn nali no mèn nambii thidtene loo Diox co'te' nzo Diox.

*Son angl mbly' cón che'n di's ndac che'n Diox loo mèn.*

<sup>6</sup> Látha, chàa, gunèen tedib angl co' ngue xobii loo bé'. Ngóc nable' angla par te'th angl no co angl yalbàn cón che'n di's ndac che'n Diox co' ndlu' xá mod lyá' mèn loo con' ryes thidtene. Angl mde'th no mblo angl yalbàn loo mèn rye nación co'te' naban mèn dib athu loo izlyo', mèn co' nac chol bin no mèn co' ndyoodi's chol di'stèe. <sup>7</sup> Cabii mbez angl loo mèn dib athu loo izlyo':

—Fzeb gu' gunèe gu' Diox. No fzeb gu' loo con' ngue li Diox. No guuz gu' loo xtàa gu' cón che'n con' roo no con' xèn co' ngue li Diox no co' nac Diox tac mzinle' tiemp co'se' tub rez Diox cón che'n mèn. Ftub xib gu' no fcòd' gu' yéc gu' loo Diox, Diox co' mblec bé', no co' mblec izlyo', no co' mblec nító', no co' mblec rye co'te' ndub len nít.

<sup>8</sup> Gunèen mdoo nque tedib angl xís angla. Mbryop angla ndxab:

—Nase ngozanle' Diox no ya mzinle' tiemp co'se' li Diox lyux mèn co' nac mèn ciuda, co' nac ciuda más naroo, co' nac ciuda co' ne' tedib lèe co' nac lèe ciuda Babiloñ. Diox mbli tataa ngro' lèe ciudaa tac mèn dib athu loo izlyo' mblique' no mté'thque' ryethe con' co' nac con' ye'rsin'túb par mbli mèn ryethe con'a, co' nac co' mbly' mèn ciudaa loo mèn loo izlyo', no axta ngóc loc mèn izlyo' xal mènuguy por con' ye'rsin'túb co' mbli mèna.

<sup>9</sup> Gunèen mdoo nque tedib angl co' ngóc mbyon angl xís angla. Mbyon angla cabii mbez loo mèn loo izlyo', ne:

—Chele' chol gu' còo' yéc gu' no tyub xib gu' loo má' co' nac má' tìn' no loo gunab má'a, no la' gu' que' mèn señ che'n má' no che'n gunab má' lechuz gu' o la's ya' gu', <sup>10</sup> le' sya, ryete gu' tyactii tìn' co' nac ryethe con' co' li Diox par tetii Diox gu', co' nac thib con' co' mblobe' lezo' Diox li Diox loo gu' por ndxecloo tìn' Diox ñèe Diox gu'. No tyactii gu' axta plóthe. No ten' gu' yalnè axta plóthe con' co' nac quii, no bèel, no asufr co' li Diox yol. Gàc con'a loo gu' loo angl che'n Diox no loo Mbackxil' che'n Diox co' nac leque yub Jesucrist, co' nee di's, loo yub Jesucrist gac con'a loo gu'. <sup>11</sup> Zen co' yitoo, co' nac zen che'n quii no bèel co' nac co' li Diox par tetii Diox mèn, yitoo zena thidtene. Le'n dib tiempa, yende mod tí' lezo' mèna ze no yál', ne' por chu'th, mèn co' nac mèn co' tyub xib no co' còo' yéc loo má' no loo gunab má', o que naca la' mèna quée señ che'n lèe má' no gunab má' lechuz mèn o la's ya' mèn. <sup>12</sup> Cona, ngue niin con' ndxè' loo gu': Le' mèn co' nzo loo cón che'n Diox, no nac mèna mèn che'npe' Diox, no ndyubdi's mèna di's co' mbez Diox, no altant nziri' mèna loo cón che'n Jesús, mèna naquin xec no cha'la's mèna cón che'n ryethe con' ryes co' gac loo mèna.

<sup>13</sup> Ngolo nguri'th ryethe con'a, mbìnen thib di's co' mbyèn loo bé'. Gunee di'sa loon:

—Juàn, fque' ye's cón che'n di's co' nde niin lool ndxè'. Desde nalle' par delant, huen nda mèn co' gath, mèn co' ndxela's loo Tad Jesucrist. Lomisque' ndxab Xpii Natú' che'n Diox: Aa. Tataaque' gaca loo mèn tac mèn li descans loo zin' co' mxo'f zin' Diox loo mèn

cón che'n Diox. No làth xtau'a, yo mèn co' ta' cuent loo mèn co' nzo loo bé' cón che'n zin' co' mxo'f zin' mèn, mèn co' gath por cón che'n Tad Jesucrist.

*Juàn ngue tetac cón che'n xá mod tetii Diox mèn.*

<sup>14</sup> Le' sya, be taa be taa mxaquen gunèen thib le' xcuau nagus loo bé'. Loo xcuaua mxaquen mdub thib mbi' co' ñaa xal ñaa Crist co' mbi'th yáal loo izlyo' ndxè' xalque' ndxáal chol mèn. Mxaquen mdub thib coron co' nacsua' con or yéc mbi'. No nzo thib hoz co' anze'f nalen ya' mbi'. <sup>15</sup> No leque hora, gunèen ngro' tedib angl le'n templ che'n Diox co' nzo loo bé'. Angla cabii mbez yèe loo mbi' co' ndub loo xcuau. Ndxab angl loo mbi':

—Ftlo cho' yix co' nac cosech tac ya mzinle' hor cho' yix co' nac cosech tac mtlole' ndoo yas yix co' nac cosech co' dyop loo izlyo', co' nee di's, nac mèn co' tetii Diox loo izlyo'.

<sup>16</sup> Ngoloa, xaste mtlo mbi' co' ndub loo xcuaua. Xax xax mcho' mbi' yix co' nac cosech loo izlyo'. No mthop mbi' cosech co' nziri' loo izlyo' thidte lugar, co' nee di's, nac mèn co' tetii Diox.

<sup>17</sup> Mbere tedib angl, ngro' tedib angl le'n templ che'n Diox co' nzo loo bé'. Mxaquen ne' angla thib hoz co' anze'f nalen ya' angl. <sup>18</sup> No mbere tedib angl. Ngro' tedib angl co' nden hoz co' anze'f nalen, co' nde nque xís angla, le'n templ. Angla mbli Diox par mque no angl con' roo no con' xèn la's nii angl no la's ya' angl par ñibe' angl gac con' ryes loo mèn con quì. Látha, cabii ngurez angla angl co' ngro' ner, co' nzo hoz ya' co' anze'f nalen. Ndxab mbryop angla loo ner angl:

—Fcho' racim uv con hoz co' nzo ya'l ba' tac mzinle' tiemp dyop cosech uv co' nac cosech co' nzo loo izlyo' tac uv nguy'le' par dyop uv.

<sup>19</sup> Le' sya, xax xax mcho' angl racim uv co' nac cosech uv co' nzo loo izlyo' con hoz co' nzo ya' angl. Ngoloa, mthop taa angl uva thidte lugar. Mblo angl uva le'n thib tanc par loo tub mèn loo uv con thib maz yaa par ryo' nít uv. Con' co' mbli angl loo uva nee di's tataa mod tetii Diox mèn axta plóthe. <sup>20</sup> Loo uva mblo mdub mèn con thib maz le'n tanc thib lad ro ciuda co' ne' tedib lèe co' nac lèe ciuda Babiloñ. Con' ndxè' nee di's le'n tanca ngro' ren che'n rye mèn, co' nee di's, uv nda' cuent cón che'n mèn. Nguáp rena loo izlyo' axta xal nde ro huay co' ndxòo fren. Cona nee di's, tataa gaca loo mèn co'se' tetii Diox mèn no co'se' xyo ren mèn loo izlyo'.

## 15

*Trè ndlu' le' angl ne' gaz loo con' co' nac con' ye'rsin', co' nee di's, nac gaz mod co' tetii Diox mèn loo izlyo'.*

<sup>1</sup> Be taa be taa gunèen ngòc tedib señ loo bé' co' ngòc thib señ roo no thib señ xèn co' ngòc gaz angl. Thib thib angla ne' thib cop. Le'n copa ngo gaz loo con' co' nac lult con' co' li Diox làa angl loo izlyo' loo mèn. Con'a ngòc lult con' no lult yaltii co' li Diox loo mèn por ndxecloo Diox ñèe Diox mèn.

<sup>2</sup> Leque hora ne, mxaquen gunèen thib con' loo bé' co' gunaa xal ñaa thib lagun nít. Mxaquen ndxetoo bèel loo con' co' ñaa xal ñaa lagun. No ñaa laguna xal thib vidr co' nax co' ndxetoo bèel loo. Le' mèn co' ne'nglide cas, no co' ne'ncò'de yéc no co' ne'ndub xibte loo má' tín'a no loo gunab má', no ne'ndalte mèn par mque' mèn señ che'n má' no numbr che'n má'a lechuz mèn o la's ya' mèn, mèn nziri' loo con' co' ñaa xal ñaa thib lagun no co' ñaa xal vidr. Nzo arp co' mda' Diox loo mèn ya' mèn. <sup>3</sup> No mbil' ro mèn xal mbil' ro Moisés co' mxo'f zin' cón che'n Diox. No mbil' ro mèn xal mbil' ro Mbackil' che'n Diox co' nac leque yub Jesucrist. Mbez mèn:

Con' roo no con' xèn ngüi' mèn no ñaa mèn loo con' ndli U', Tad Diox, U' co' ndxàp rye loothe con' roo no con' xèn la's nii U' no la's ya' U'. Nali no nambii no lìcpe' nac co' ndlu' U' no co' ndli U', Tad Diox, U' co' nac rey co' ñibe'pe' loo ryethe nación.

<sup>4</sup> ¿Chó mèn nac mèn co' nziri' loo izlyo' co' ne'zyebte ñèe U'? No ¿chó mèn nac mèn co' nziri' loo izlyo' co' ne'gabte loo xtàa le' U' nac Diox roo no Diox xèn, Tad? Ryete

mèn nzyeb ñèe mènà U', ¿lé'? No ryete mèn gab le' U' nac Diox roo no Diox xèn, ne, ¿lé'?, Tad. Tataa gàca. Tad, angoluxte U' nac Diox natú'. Ndxé'leque', rye mèn co' nac mèn rye nación còo' yéc loo U' no tyub xib mèn loo U'. Tac mèn mbui'que' no gunaaque' mèn ryethe con' mbli U' ngòc con' nali no con' nambii.

<sup>5</sup>Ngolo ngòc ryete con'a, mxaquen gunèn mxyal' loo bé'. No mxyal' ner puert che'n templ co' ndub loo bé'. No mxyal' puert co' nau' co'te' nac más natú' le'n templ co'te' nzosua' quèe tabl co' ngòc quèe co' mtan' Diox di's co' ngòc ley co' mxo'f Moisés loo mèn nación Israel. <sup>6</sup>Nerleque' con' gunèn. Rye gaz angl ngro' le'n templ co'te' nac lugar más natú' par hue' angl gaz loo con' co' nac gaz yaltii par tetii angl mèn xal mnibe' Diox loo angl. No gunèn noc xab thib thib angl thib loo lar' co' lèe lin co' ante nambii gunaa no co' ante mquée xnii. No natedó' thib cint or xal nde ro pech thib thib angl. <sup>7</sup>Ngoloa, xaste mda' thib má' co' nac dyap má' co' naban thib thib cop co' nacsua' con or loo thib thib angl co' nac rye gaz angla. Le'n copa nzo gaz loo con' co' ngòc gaz yaltii ye'rsin' co' nac mod co' tetii Diox mèn tant ndxecloo Diox con mèn, Diox co' thidtene nzo. <sup>8</sup>Le' le'n templ co' nac más natú' na, ale ngo too zen co' ngòc por con' roo no con' xèn che'n Diox no co' ngòc por cón che'n con' roo no con' xèn co' nzo la's nii Diox no co' nzo la's ya' Diox. No yende chó mèn ngác ngòo le'n templa axta ngolo nguri'th no axta ngolo ngòc rye gaz loo yaltii co' ngòc con' ye'rsin' co' mbli Diox, co' ngòc co' gunèn, co' ngro' no angl par tetii Diox mèn.

## 16

*Trè' ndlu' cón che'n gaz loo con' co' ndlu' mod co' tetii Diox mèn.*

<sup>1</sup>Be taa be taa mxaquen mbinen mbyèn thib di's co' mbyèn le'n templ co'te' nac más natú'. Di'sa ndxab loo rye gaz angl:

—Huaa lath gu' gaz loo con' co' nzo le'n cop gu' co' nac con' co' li Diox par tetii Diox mèn.

<sup>2</sup>Sya, ngua angl co' nac ner angl. Ngua lath angl con' co' ngòc ner loo yaltii co' ngòc con' ye'rsin' loo izlyo'. Le' sya, ryete mèn co' mque no señ che'n má' tín' no mèn co' mcòo' yéc no co' mdub xib loo gunab che'n má', ale ngro' thib loo yé's ye'rsin' no thib loo yé's zab lad mèn co' mbli par mden' mèn yalnè tín'.

<sup>3</sup>Ngua lath tedib angl co' nac mbryop angl co' nde nque tedib loo yaltii co' ngòc con' ye'rsin' co' ngo le'n cop angl loo nítto'. Le' sya, nítto'a ngòc ren xal ren che'n thib mèn nguth. No mbli nít co' ngòc rena par nguth rye loothe má' co' naban le'n nítto'.

<sup>4</sup>Ngoloa, ngua lath angl co' nac mbyon angl co' nde nque tedib loo yaltii co' ngòc con' ye'rsin' co' ngo le'n cop angl loo rye yó'be' no loo rye lugar co'te' ndub len nít. No ngòc nít yó'be' ren no ngòc nít co'te' ndub len nít ren. <sup>5</sup>Látha, chàa, mbinen gunii angl co' ñibe' loo nít dib athu loo izlyo'. Ndxab angl loo Diox:

—Tad Diox, U' nac Diox nali no Diox nambii por tataa mbli U' no mdub rez U' cón che'n mèn ba', U' co' nac Diox natú' co' thidteneque' nzo. <sup>6</sup>Tataa mbli U' loo mènà tac mènà mbeth mèn co' ngòc mèn co' ngro xà' loo cón che'n xab izlyo' par ngòc mènà che'npe' U'. No lomisque', mbeth mènà mèn co' mde'th di's co' ndxab U' no mèn co' mblo yalbàn cón che'n U' loo mèn loo izlyo'. No nalle', U' mnibe' yèe loo mènà par gu mènà nít ren chele' mèn ndlya's gu nít. Aa. Nzyalque' mènà, tataa gàca loo mènà.

<sup>7</sup>Mbinen, ne, gunii thib xa' axta loo còo' co' ndoo gaxte co'te' ndub Diox. Mbez xa':

—Lìca, Tad Diox, U' co' ndxàp rye loothe con' roo no con' xèn la's nii U' no la's ya' U', nalique' nac U' no nambii'que' nac U'. No nalicpe' nac co' ndub rez U' cón che'n mènà.

<sup>8</sup>Ngoloa, ngua lath tedib angl co' nac dyap angl co' nde nque tedib loo yaltii co' ngòc con' ye'rsin' co' ngo le'n cop angl loo huiz. No mbli Diox par ngòc con' roo no con' xèn loo huiz par mtec mso' huiz mèn loo izlyo'. <sup>9</sup>No ryete mènà mbyec mzyo' axta plóthe. Per ne' por ngòc con'a loo mènà ne'nglàade yéc mènà no ne'nglàade lezo' mènà par nse' mènà mod co' ngòp mènà loo Diox. Ne' ne' ngab mènà loo xtàa mènà le' Diox nac Diox roo no Diox xèn. Ndxé'leque', nazab gunii yèe gunii tii mènà cón che'n Diox, Diox co'

ndxàp rye loothe con' roo no con' xèn la's nii Diox no la's ya' Diox par ñibe' Diox gac yaltii loo mèn axta plóthe.

<sup>10</sup> Ngoloa, ngua lath angl co' nac ga'y angl co' nde nque tedib loo yaltii co' ngòc con' ye'rsin' co' ngo le'n cop angl loo asient co'te' ndub má' tín'a. No ryete lugar co'te' mnibe' má' tín'a ngulàa yál'cuau loo mèn loo izlyo' loo ryete con', que naca loo má', que naca loo mèn. Nde nxon', mènà ndxuhua loz ndxuhua tin por ya ne'nxecte mèn ngòc yaltii no yalnèa loo mèn. <sup>11</sup> Per ne' por ndxàc con'a loo mènà ne'nglàade yéc mènà no ne'nglàade lezo' mènà par nse' mènà mod co' ndxàp mènà loo Diox. Ndxè'leque', nazab gunii mènà cón che'n Diox, Diox co' nzo loo bé', por mbli Diox ndxàc yalnèa loo mènà no por mbli Diox ngro xo'f ye's ye'rsin'a lad mèn.

<sup>12</sup> Ngoloa, ngua lath angl co' nac xop angl co' nde nquea tedib loo yaltii co' ngòc con' ye'rsin' co' ngo le'n cop angl loo yó'be' co' nac más yó'be' roo, co' lèe yó' Euftrat. Sya, nít co' nzo'f yó'be'a ale mbiiz nít par tataa mod mxyal' thib ned co'te' ndri'th yó'be'a par mbri'th mèn co' nac rey con solndad rey co' nac mèn co' ñibe' nación par ned ndlyen huiz.

<sup>13</sup> Be taa be taa gunèn ngro' thib xpíi ye'rsin' ro dragón, no ngro' thib xpíi ye'rsin' ro má' co' ngòc má' tín', no ngro' thib xpíi ye'rsin' ro xa' co' mbez mde'th cón che'n Diox per nde'th xa' di's co' inacte con' licpe'. Xpii ye'rsin'a ñaa xal ñaa mbich. <sup>14</sup> Mbich co' ngro' ro yon xa'a, mbicha ngòc xpíi meexù'. Xpiia mbli ngòc huax yalguzye' co' nac yalguzye' roo no yalguzye' xèn. Ngro xpiia loo izlyo' par mbli xpiia mqueltàa rye rey co' nzo dib athu loo izlyo' con solndad rey par thidte mqueltàa rye rey con solndad rey par li rye rey xó' con solndad rey loo Diox co'se' gac huiz co'se' tub rez Diox cón che'n rye mèn ye'rsin' par telux Diox rye mèn ye'rsin'a co'se' li Diox xó' con mènà huiza, Diox co' ndxàp rye loothe con' roo no con' xèn la's nii Diox no la's ya' Diox. <sup>15-16</sup> Sya, mqueltàa xpíi ye'rsin'a rye rey con mèn co' nac solndad rey thib lugar co' lèe Armagedón co' nac lèe thib la's co' nziri' loo xyòn mèn nación Israel. Láth ngue hui'en con'a, mbìnen di's co' gunee Jesucrist loon. Gunee Jesucrist loon:

—Juàn, hui' nexa. Na gal thib huiz co' yende chó mèn ngue bed daa no thib huiz co' yende chó mèn nzi quee lezo' galen. Galen loo izlyo' xal co'se' ndlyàa huan' liz mèn. Huen gaca loo mèn, mèn co' nzi quee lezo', no mèn co' altant nzi loo cón chenen, no mèn co' nalì no nambii nzi que tee ban lì loo cón chenen. Mènà yende chó tethon no yende chó co' too mènà thib lad loo mèn co' nzo loo cón chenen par ta' mèn gust lezo' mèn con mènà co'se' gac huiz co' galen.

<sup>17</sup> Ngoloa, ngua lath angl co' nac gaz angl co' nde nquea tedib loo yaltii co' ngòc con' ye'rsin' co' ngo le'n cop angl loo mbii loo izlyo'. Sya, cabii mbyèn thib di's axta co'te' nac le'n templ co'te' nac lugar más natú' loo bé' co'te' nzo Diox. Di'sa mbez:

—Nase guneela. Con' ndxè' nac lult con' co' lin par tataa mod tetiin mèn loo izlyo'.

<sup>18</sup> Sya, ngulàa bèel gundii. Mbyèn huax ruid. Ngos mblyab gundii. No mbuin thib xòc brut más fuert co' tarte huin dib lal nziri' mèn loo izlyo'. <sup>19</sup> Lomisque' ne, mxaquen ale ngulàa bes son part ciuda Jerusalén co' nac ciuda roo ciuda xèn. Le' rye liz mèn co' nac chol ciuda co' nziri' loo izlyo' na, ngulàare' no ngulàateri' ciuda loo izlyo'. Làth xtau'a, Diox mte' lezo' cón che'n ciuda co' ne' tedib lèe ciuda Babiloñ par li Diox gac más yaltii no yalnè loo mèn ciudaa por tant ndxecloo Diox ñèe Diox mènà por mod ye'rsin' co' ngòp mènà loo Diox. <sup>20</sup> Lomisque' ne, rye yòc biiz co' nziri' le'n nítto' chol lugar no rye yii den mdyep le'n nítto' no mdyon' rye yii den. <sup>21</sup> Lomisque' ne, ngulàa yuu quèe brut co' né' axta cho' kil rloo mèn loo izlyo'. Per mastale' ngulàa yuu quèea rloo mèn co' nziri' loo izlyo', ale le'le' gunii yèeque' no gunii tique' mènà cón che'n Diox por yuu quèe co' ngulàa rloo mènà tac yuu quèea mbli ngòc thib yaltii tín' loo mèn.

<sup>1</sup> Ngolo nguri'th con'a, mbi'th thib angl co' ngòc gaz angl co' mque no tedib loo yaltii co' ngòc con' ye'rsin' le'n cop co' ngòc gaz cop. Gunee angla loon:

—Juàn, que de ndxè' par lu'en lool cón che'n yaltii co' tyactii thib xa'got co' nac xa'got roo xa'got xèn co' ndli yalburrid. Xa'gota ñibe' loo mèn dib athu loo izlyo' par yòo mèn loo mod ye'rsin' co' nac xa'gota. <sup>2</sup> Ryethe mèn co' ngòc rey co' mnibe' loo mèn loo izlyo', mèn na ngure ban lique' xalque' ngòc mod ye'rsin'túb co' ngòp xa'gota. Lomisque' ne, mxaquen le' rye mèn co' ngure ban dib athu loo izlyo', ale angngureri' mèn, mbli mèn ngòc nguàal con' co' ngòc con' ye'rsin'. Ngòc mèn xal mènguy por mbli mèn ryethe con' ye'rsin' co' ngòc lomisque' mod ye'rsin' co' ngòp xa'gota.

<sup>3</sup> Leque hora, Xpii Natú' mbli par mxaquen gunèen le' angl mbe' daa thib lugar co'te' nagán. Tya, gunèen thib xa'got co' ndub thib má' tín'. Má'a gunaa nane ren. No dib lad má'a ndub di's co' ngòc di's zab co' ñii yèe ñii tii má' cón che'n Diox. No mxaquen le' má'a mque no gaz yéc. No lomisque' ne, mxaquen ndub si' cach yéc má'. <sup>4</sup> Xa'got co' ndub má'a noc xab lar' morad no lar' nane ren. No nabe'ste natoxcua' xa' con anab corral or no con anab yi'f or. No natoxcua' xa' con thib loo quèe co' anze'f náp ntac no con thib loo perl co' anze'f náp ntac. Mxaquen nzo thib cop co' nacsua' con anab or ya' xa'gota. Le'n copa ngo ampurte con' zab co' anze'f naxin ndlya' co' nacpe' con' xin no con' cap, co' nee di's, nac mod co' ndxàp xa'gota. <sup>5</sup> Nde nixon', mdub di's lechuz xa'gota. Di'sa yende chó mèn ta' cuent cón nee di's di'sa. Di'sa mbez taandxè': Ciuda roo no ciuda xèn co' lèe Babilón nac xna' chol xa'got co' ndli yalburrid tín'. No nac ciuda Babilón xal xna' rye mèn co' nzi ban dib athu loo izlyo', mèn co' ndli con' xin no con' cap xalque' ngòc mod co' ngòp xa'gota. <sup>6</sup> Látha, chàa, mdub xni lezon. Mdan cuent no mden'en le' xa'gota mquée mbii yéc no ngòc xa'gota xal thib xa'guy por cón che'n ren co' ngòc ren che'n mèn co' mxyo, mèn co' ngòole' loo cón che'n Diox co' ngòc che'npe' Diox no mèn co' nguthxù' por mda' mèn na cuent cón che'n Tad Jesús loo mèn. No co'se' gunèen con'a, ante mbyu' mbyàl daa no ante mbui'en no ante gunaan loo con' gunèena. <sup>7</sup> Láth ndxàc con'a loon, gunee angl loon:

—Juàn, ¿chonon susque' ngüi' ñaal loo con' ndxàc ba', à'? Ne'hui'del no ne'ñaadel loo con' ndxàc ba'. Na lu' lool cón nee di's cón che'n xa'got ba' tac cón che'n xa'got ba' no cón che'n má' co' ndub xa'got ba' co' nac má' co' ngue no gaz yéc no co' nac leque má' co' ndub si' cach yéc, yende chó mèn gác ta' cuent cón che'n má' ba' lool. <sup>8</sup> Má' tín' co' gunèela, má'a nac thib mbi' co' nzo banle' ndoore'. Per mastale' ngo ban mbi', nalle' nguthle' mbi'. No mastale' nguthle' mbi', per ale bere mbi', ryo' mbi' le'n ye'rbiil par ban mbi' tedib vez ndoore' gath mbi' thidtene yiloo. Lomisque' ne, mèn co' nzi ban loo izlyo', mèn na nac mèn co' indubte lèe loo libr co'te' ndub lèe mèn co' yòo ban no Diox thidtene. Libr co' ngue no Diox, libra ngue nole' Diox axta co'se' anon mblec Diox izlyo'. No más de cona, ante hui' mèn na ante ñaa mèn co'se' ñèe mèn ryo xban má' tín' co' nac mbi' co' ngo ban no ngoloa nguth mbi'. Per nalle', ale mbere mbi', ngro xban mbi' tedib vez. Por cona, hui' mèn no ñaa mèn loo mbi' tedib vez.

<sup>9</sup> Trè' ngue niin plá di's ndxè' lool, Juàn, par que'l di's ndxè' loo ye's par li mèn co' ndxàc xtúuz cón che'n di's ndxè' no ta' mèn cuent cón che'n di's ndxè' cón nee di's ndxè'. Pues gaz yéc má' co' gunèel ndlu' nac no nee di's nac gaz yii co' nac yii co'te' ndub xa'gota. <sup>10</sup> Lomisque' ne, gaz yéc má' co' gunèela ndlu' cón che'n gaz mbi' co' ngòcle' rey. Per de loo gaz mbi' co' ngòcle' reya, ngolole' gunee cón che'n ga'y mbi'. Per be' mbyan' taachop mbi'. Thib mbi' nac gobiern co' ñibe' nalle'. Per tedib mbi' tarte yi'th, co' nee di's, tarte tlo mbi', ñibe' mbi'. Per co'se' yi'th mbi' co' nac lult mbi' co' ñibe'a, ne'tyub ñibe'de mbi' arid nen, co' nee di's, huax lín'. Luega ñeei loo mbi'. <sup>11</sup> Per leque thib má' tín' co' ngòc mbi' co' thidte ngòc rey con rye gaz rey ndoore' no ngoloa nguth mbi', leque mbi'a bere ryo xban par gác mbi' rey co' ñibe' co' gác xon rey co' ñibe'. Co'se' ñibe' rey co' gác xon rey ndxep tiemp co' gác leque mbi'a, syare', ñeei loo mbi' thidtene, co' nee di's, Diox li par lyàa mbi' thib líte le'n ye'rbiil thidtene.



<sup>12</sup> Le' ryete si' cach co' gunèel mdub yéc má'a na, si' cach má'a nee di's nac si' rey co' tarte tlo ñibe'. Diox ta' lugar gáp reya con' la's nii reya no con' la's ya' reya par ñibe' reya ndxepete tiemp co' gác leque tiemp co' ñibe' má' tén' co' nac thib mbi' loo izlyo'. <sup>13</sup> Ryete si' reya thidte di's que no. No ta' ryete reya lugar par ñibe' má' tén' co' nac mbi'a loo reya. <sup>14</sup> Le'n ndxep tiempa, cua'n xó' ryete si' reya con' má' tén' co' nac mbi'a con solndad rey no solndad mbi'a contra Mbackxil' co' nac leque yub Jesucrist. Per Mbackxil' co' nac leque yub Jesucrist li gan loo rye reya no loo má' co' nac mbi'a tac Jesucrist nac Tad co' ñibe' loo chol mèn, co' nee di's, nac Tad loo izlyo'. No nac Tad Jesucrist rey che'n mèn, co' nee di's, nac rey co' ñibe' loo mèn loo izlyo'. Le' rye mèn co' mqueltàa con Tad Jesucrist na, mènà nac mèn co' Diox mcui no co' mblec Diox loo cón che'n Diox. No thidteneque' altant nzi mènà loo cón che'n Diox.

<sup>15</sup> Tolo gunee angl loon:

—Juàn, níttó' co' mxacl gunèel co'te' ndub xa'got co' ndli yalburrid, níttó'a nee di's nac mèn rye nación co' nziri' dib athu loo izlyo' no nac níttó'a mèn rye nación co' ndyoodi's chol di'stèe. <sup>16</sup> Le' si' cach co' gunèel ndub yéc má' tén'a na, con'a nee di's le' mèn co' nziri' loo izlyo' yòo xyàn lezo' mèn ñèe mèn xa'gota. No lá'ya' mèn cón che'n xa'gota. No li mèn gác loo xa'gota xal thib mèn co' yende xab co' ngue tee che. Ale tlate hua mènà bé' lad xa'gota. No tec mèn xa'gota loo quii no loo bèel. <sup>17</sup> Yub Diox mbli par mbli mèn co' ngòc reya xal mblya's Diox par thidte ngòc mènà no par thidte mdoodi's mènà par mbli mènà ngòc má' tén'a xa' co' ñibe' dib athu loo izlyo' xal thib rey axta zin huiz no tyaa huiz co' ndxab Diox cued, ya ne'tolode ban má' tén'a loo izlyo'. <sup>18</sup> Le' xa'got co' gunèela na, xa'gota nac ciuda roo no ciuda xèn co' ñibe' no co' li gác nado' rye mèn co' ñibe' loo mèn dib athu loo izlyo' par ñibe'pe' ciudaa loo mèn dib athu loo izlyo'.

## 18

### *Ciuda co' ne' lèe ciuda Babiloñ lyux thidtene.*

<sup>1</sup> Ngolo ngòc ryethe con'a, mxaquen gunèen tedib angl co' nde làa loo bé' loo izlyo'. Angla ndxàp con' roo no con' xèn la's nii angl no la's ya' angl. Le' loo izlyo' na, mbyà'x xnii co' nquée lad angl. <sup>2</sup> Mbìnen ngrozèe angl cabii. Mbez angl loo mèn loo izlyo':

—Nase ya mblyuxle' ciuda roo no ciuda xèn co' ne' lèe ciuda Babiloñ. No ngòc ciuda roo ciuda xèna liz no làaz che'n chol xpìi ye'rsin'. Lomisque' ne, ngòc ciudaa ciuda co'te' ngos ngóol chol mbin co' indxòode lezo' mèn hui' mèn no chol mbin co' ndxòo xyàn lezo' mèn ñèe mèn. <sup>3</sup> Tataaque' gàca loo mèn ciuda roo ciuda xèna tac mèn ryete nación co' nziri' dib athu loo izlyo' nzi li xalque' nac mod co' ndxàp mèn ciuda roo ciuda xèna. Tac mod co' ndxàp mèn ciudaa ndli inthyonte mèn loo chol con' ye'rsin' co' ndli mèn. Nac mènà xal mèn'guy co' nquée mbii yéc co'se' ndli mèn'guy chol con' ye'rsin'. No axta rye mèn co' nac rey, co' nee di's, chol mèn co' ñibe' loo xtàa mèn nzi ban li mènà chol con' ye'rsin' xalque' nac mod co' ndli mèn ciudaa. Lomisque' ne, rye mèn co' nac comerciant loo izlyo' ndxè' ndxàc ric por mod co' ndxàp mèn ciudaa por ntho' comerciant ryethe con' co' ndyoxcua' mèn ciudaa co' nac thib mod ye'rsin'túb co' ndxàp mèn ciudaa.

<sup>4</sup> Leque hora, mbìnen tedib di's co' mbyèn loo bé'. Di'sa mbez:

—Gro' gu' le'n ciuda ba', gu' co' nzo loo cón chenen no gu' co' nac chenen, par ne'gàcte gu' thidte con' mèn co' ndxàp xtol ba' no par ne'cua'nte gu' xquin gu' xal ncu'a'n mènà ba' xquin mènà ba', no par ne'yidin'te yaltii co' nac con' ye'rsin' co' ndxàc loo mèn ba' loo gu', ne. <sup>5</sup> Tac mèn ba' anze'f thib xtol mcua'n loo Diox. Por cona, indxathla'ste Diox ryethe con' ye'rsin' co' mbli mèn ba'. <sup>6</sup> Le' sya, leque hora mnibe' angl loo taamas angl co' mtel' Diox par tetii angl mèn che'n ciuda co' ne' lèe ciuda Babiloñ. Ndxab angla loo taamas angl:

—Bli gu' lomisque' con' loo mèn ciuda ba' xal mbli mèn ciuda ba' loo chol mèn. Lomisque' ne, blo xtàa gu' chop vez loo mèn ciuda ba' xalque' mbli mèn ba' loo chol mèn. Fcua'n gu' mod tetii gu' mèn ba' chop vez por ryethe con' ye'rsin' co' nde tee'le' ndli mèn ba' loo taamas mèn. <sup>7</sup> Bli gu' par tyactii mèn ciuda ba' axta plóthe no par ten' mènà yalnè

axta plóthe xalque' co'se' mque tee te's mèn, no mque tee xal' mèn, no mdyoxcua' mèn con ampurte con' huen axta plóthe. Tataa bli gu' tac mèn ciuda ba' mbez loo lezo' mèn: Trè' nduben. Yende chó ñibe' loon no yende chó ñii loon. Nac daa xal thib xa'got co' nac rein. Inacte daa xal thib xa'got viud. No dib lal naban daa yende chó mèn gác li par texi mèn lezon. Anze'f huen nzon. No huen ndan par delant.

<sup>8</sup> Por cona, thidte huiz gác ryethe con' ye'rsin' ndxè' loo mèn ciudaa: Gath mèn. Xi lezo' mèn por yaltii co' gác loo mèn. Lyàa huin loo mèn. Lyàa quii no bèel loo mèn par yec mèn. Tataa li Diox loo mèn tac Diox nac Diox co' ndxàp rye loothe con' roo no con' xèn la's nii Diox no la's ya' Diox. No nac Diox Tad co' mquexù' mèn par tataa gàca loo mèn.

<sup>9</sup> Le' rye mèn co' ngòc rey no co' ngòc mèn nac zin' co' mnibe' loo xtàa dib athu loo izlyo', mèn co' mque tee li xal nac mod ye'rsin' che'n mèn ciudaa no mèn co' mbli xal ndyoxcua' mèn ciudaa, mèn gón' no cozèe yath mèn co'se' ñèe mèn yitoo zen ndxec ciuda roo ciuda xèn, ne. <sup>10</sup> Mèn co' ngüi' xal ndxetoo zen ndxec ciudaa, mèn nziri' tith por mzyeb mèn ndxàc yaltii loo mèn ciudaa. Mèn mbez loo mbii loo mèn ciuda roo ciuda xèn:

—¡Ay, prob gu' izlyo', mèn ciuda Babiloñ, gu' co' ngòc mèn ciuda roo ciuda xèn. Ale setilte ngòc con' tín' ba' loo gu', yoo, par tatua' mod mtetii Diox gu'. Mzyalque' gu'.

<sup>11</sup> Lomisque' ne, ale mbín' mèn co' ngòc comerciant co' mbli delgens dib athu loo izlyo' por cón che'n mèn ciudaa co' ngòc yaltii looa tac ya yende chó mèn tolo ndi' ryethe con' co' ndyee tho' mèn loo mèn ciudaa. <sup>12</sup> Ryethe con' co' nac co' ndyee tho' mèn co' ndli delgens par neda nac chol con' co' nacsua' con or, no con' co' nacsua' con plat, no co' nacsua' con chol loo quèe co' anze'f ntac. Ntho' mèn chol loo perl, lar' fin co' anze'f náp ntac, no lar' sed co' nac color morad no co' nac color nane ren. No ntho' mèn rye loo yaa huen co' nix ndlya'. No ntho' mèn huax loo con' co' nacsua' con thib loo quèe co' lèe marfil. Ntho' mèn thib loo yaa huen co' anze'f náp ntac. Ntho' mèn yi'f co' lèe brons no chol taamas yi'f. No ntho' mèn quèe co' lèe marm. <sup>13</sup> Ntho' mèn canel no rye loothe taamas con' co' nix ndlya' xal du'r yal' no tedib loo con' co' lèe mirr no nít perfum co' anze'f nix ndlya'. Ntho' mèn mbacxil', huay, carret co' ngo'f huay, no axta ndxe' mèn mèn co' ntho' mèn par ndxàc mèn moz co' ndyo' par ñibe' yèe mèn loo prob mèn co' ndxàc moz. <sup>14</sup> Per co'se' ñèe mèn co' ntho'a tataa ndxàc loo mèn ciuda co' nac ciuda roo ciuda xèn co' ne' tedib lèe ciuda Babiloñ, mèn ndxab loo mèn ciudaa:

—Nase mblyux rye loothe con' ndac co' ngòp gu'. No axta arid mda' gu' gust lezo' gu' con con' co' ngòp gu'a. No, por derech, mblyux ryethe con' ndac, no yalgon', no ryethe mod co' nabe's mdyoxcua' gu'.

<sup>15</sup> Ryete mèn co' ntho' co' ndli delgens loo ryethe con' ntho' mèn no ryethe mèn co' ngòc ric por con' co' mtho' mèn loo mèn ciudaa, rye mèn ngure tith loo ciuda roo ciuda xèn co' mdoo yol no co' mdoo lux por tant mzyeb mèn ngüi' mèn xal ndxàc yaltii loo ciudaa. Ndxón' mèn no mbez yèe mèn. <sup>16</sup> No ndxab mèn loo mbii loo mèn ciudaa:

—¡Ay, prob mèn ciuda roo ciuda xèn ba'! Mèn ciuda ba' ngòc xal thib xa'got co' nabe's gunaa co'se' ndxoc xa' lar' co' nac lar' fin, no co'se' ndxoc xa' lar' co' nac lar' color morad no lar' color nane ren, no co'se' ndyoxcua' xa'gota con anabte or no con anabte quèe co' anze'f náp ntac no con perl.

<sup>17</sup> Lomisque', mbez mèn loo mèn ciudaa:

—Ale setilte mblyux gu' no mblyux yalgon' co' ngòp gu'.

Lomisque' ne, ryete mèn co' ngòc capitán co' ñibe' loo mèn co' ndli zin' loo yòoyaa, no rye mèn co' nzo le'n yòoyaa, no rye mèn co' ntetee yòoyaa, no ryete mèn co' ndli zin' loo nítto', rye mèn ngure tith par ngüi' mèn xal ndxol ciudaa no par hui' mèn xal ndlyux ciudaa. <sup>18</sup> No co'se' ñèe mèn ndxetoo zen ndxol ciudaa, ngrozèe yii no ngrozèe den mèn. Mbez mèn loo mbii:

—¿Chó mèn ciuda lalque' gác xal ngòc mèn ciuda roo ciuda xèn ba', yey? Yende chó mèn ciuda co' lalque' gác xal ngòc mèn ciuda ba', ¿lé'?, cara.

<sup>19</sup> Látha, ndyen mènà yòò. Nxob mènà yòò yéc mènà tant nxi tín' lezo' mènà. Ndxón' mènà no mdub mingò'r yen mènà. No mbez yèe yath mènà. No mbez mènà loo mbii loo mèn ciudaa:

—¡Ay, prob mèn ciuda roo mèn ciuda xèn ba'! Con yalgon' co' ngòp mèn ba' ngòc ric rye mèn co' mque no barc loo níttó'. No nalle' ale setilte mblyux yalgon' mèn ba'. No mblyux mèn ba'.

<sup>20</sup> Mberen, mbìnen di's co' mbyèn loo bé' tedib vez co' mbez:

—Ndxé'leque', ftac lezo' gu' no fxo'f nde' fxo'f ndla' lezo' gu' cón che'n con' co' ngòc loo ciuda ba', ryete gu' co' nzo loo bé', no ryete gu' co' nac apostl co' mtel' Jesucrist par ndxe' gu' di's ndac loo mèn, no ryete gu' co' mde'th di's co' ndxab Diox, no ryete gu' co' nzo loo cón che'n Diox no co' nac che'npe' Diox. Tac texal ngolo mquexù' Diox mèn ba' par mtetii Diox mèn ba', tatua' mod mbli Diox mblo xtàa Diox loo mèn ba' por cón che'n gu'. No mbli Diox con' nali no con' nambii loo gu' por cón che'n mèn ba'.

<sup>21</sup> No co'se' ngolo mbìnen di'sa, chàa, gunèn mblít thib angl thib quèe roo co' né' xal thib quèe yees. Mxen angl quèea. Mblobii angl quèea le'n níttó'. Ndxab angl loo mbii:

—Texal mblobiin quèe ndxè' le'n níttó', tatua' lyux mèn co' nac mèn ciuda roo ciuda xèn co' ne' lèe ciuda Babiloñ. No thidtene ya ne'berede mèn, hui' mèn ciuda roo ciuda xèn co' ne' lèe Babiloñ tedib vez.

<sup>22</sup> Ndxab angl cón che'n mènà, ne:

—Thidtene ya ne'gònte mèn gol' mèn musc ned co' nac ned gu', musc co' nac arp, no co' nac flaut, no co' nac trompet. Ne' ne' yòò mèn co' ndxác ndli chol zin'. Ne' ne' yèn tyez molin co'se' ndli molin zin' le'n ciudaa. <sup>23</sup> Ya ne'yú'de loo mèn co' nac chol xni lampr co' tenii ciudaa thidtene. No thidtene ya ne'yènte gác ruid le'n ciuda co'se' selya' mèn le'n ciudaa. Tataa gàca loo mèn ciudaa mastale' ngòc mèn co' ntho' chol con' loo mèn ciudaa mèn co' ngòc mèn más mèn roo no mèn xèn loo taamas mèn dib athu loo izlyo'. Lomisque' ne, tataa gàca loo mèn ciudaa tac mquedi mèn ciudaa mèn chol nación dib athu loo izlyo' con mod ye'rsin' co' ngòp mènà co' nac ngòc mènà mèn bruj.

<sup>24</sup> Tolo ndxab angl:

—Tataa mod mtetii Diox mèn ciuda roo ciuda xèna axta plóthe tac le'n ciudaa mbeth mènà mèn co' mde'th di's co' ndxab Diox. No mbeth mènà mèn co' ngòc loo cón che'n Diox, mèn co' ngòc che'npe' Diox. No mbeth mèn ciudaa huax mèn co' ngo ban dib athu loo izlyo'.

## 19

<sup>1</sup> Ngolo mbìnen gunii angl rye co' ngòca, mbìnen mbyèn di's che'n huax mèn loo bé' co' mbez cabii:

¡Ay, Dio's! Gab na' le' Diox nac Diox roo no Diox xèn, Diox na' co' mbli par ndlyá' mèn loo con' ryes. Nac Diox na' Diox roo no Diox xèn loo ryethe con'. No ndxàp Diox na' rye loothe con' roo con' xèn la's nii Diox no la's ya' Diox.

<sup>2</sup> Diox roo no Diox xèn nac Diox tac nali no nambii ndub rez Diox con mod co' ndxàp Diox co' nac mod lìcpe'. Mquexù'le' Diox xa'got co' nac xa'got roo xa'got xèn co' nacguè' xa'got burrid co' mbli le' mèn co' ngo ban dib athu loo izlyo' mbli ngòc nguàal con' zab co' nac con' ye'rsin' co' nac mod co' ndxàp xa'gota. Por cona, mblo xtàa Diox con' ye'rsin' co' mbli xa'gota co'se' mbli xa'gota mbeth mèn prob mèn co' mxo'f zin' cón che'n Diox.

<sup>3</sup> Mberè mènà, ndxab mènà tedib vez:

—¡Ay, Dio's! Gab na' Diox roo no Diox xèn nac Diox tac Diox mbli ndxetoo zen le'n ciuda mèn ba'. Thidteneque' yitoo zen ze no yál'. No ne'yú'de quii co' ndli ndxetoo zen ba' thidtene.

<sup>4</sup> Le' ryete gal fthap mèn gool no dyap má' co' nabana na, mdub xib no mcòo' mèn goola no má' co' nabana yéc má' no mèn goola loo Diox co' ndub loo asient co' nzo loo bé'. Mbez mèn goola no dyap má' co' nabana:

—Tataaque' ndxàal ngòca. No nalle' gab na' Diox roo no Diox xèn nac Diox co' mbli ngòc con'a.

<sup>5</sup> Mberen, mbìnen tedib di's co' mbyèn loo bé' co'te' ndub Diox loo asient. Di'sa mbez:

—Bli gu' no fte'th gu' cón che'n con' roo no con' xèn co' mbli Diox, ryete gu' co' nxo'f zin' che'n Diox no ryete gu' co' nzyeb ñèe Diox, que nac gu' mèn co' nac mèn be'the, no que nac gu' mèn co' nde'f di's nac mèn roo no mèn xèn.

*Trè' ndlu' cón che'n Mbacxil' co' nac Crist no cón che'n mèn co' nzole' loo cón che'n Crist co' queltàa no Crist loo bé'.*

<sup>6</sup> Daa, Juàn mberen, mbìnen ruid co' mbyèn co' nac di's co' mbez huax mèn. Ruida mbyèn xal co'se' nxyo'f nít huax yó'be'. No mbyèn ruida xal co'se' ndxas ndlya'b gundii. Mxaquen mbez mèna:

Gab na' con' roo no con' xèn ndli Diox tac nalle', por derech, tlo Diox, ñibe' Diox loo ryethe con' thidtene, Tad Diox na' co' ndxàp rye loothe con' roo no con' xèn la's nii Diox no la's ya' Diox.

<sup>7</sup> Leque na' li par tyac lezo' na' axta plóthe. No leque na' li par xyo'f nde' xyo'f ndla' lezo' na' axta plóthe. No gab na' con' roo no con' xèn cón che'n con' mbli Diox loo mèn tac nase mzinle' tiemp no mzinle' hor co'se' queltàa no na' Mbacxil' che'n Diox co' nac leque yub Jesucrist par yo no na' Jesucrist thidtene xal co'se' ndxàc nab thib mza' par selya' mza' con' thib mbyòo co' gac sa'l mza' par tyub no mza' mbyòo thidtene.

<sup>8</sup> Lomisque' ne, gàca loo na' xal co'se' ndyoxcua' mza' co' selya' co'se' ndxoc xab mza' lar' huen co' ante nagus bèelleque' ñaa no co' nquée xnii.

Lomisque' ne, mbìnen ndxab mèna le' lar' huen, co' nee di's, xab mza' co' goc mza' par selya' mza, lar' huena nee di's nac mod nalì no mod nambii che'n na' tac na' mblu'que' xá mod mque tee ban nalì na' no xá mod mque tee ban nambii na' loo Diox, na' co' ngòc loo cón che'n Diox, na' co' ngòc che'npe' Diox.

<sup>9</sup> Sya, gunee angl loon:

—Juàn, taandxè' fque' di's loo ye's xal niina lool nalle': Huen nda mèn co' ngòc convid par ya mèn loo yalhua co' gac che'n Mbacxil' co' nac leque yub Jesucrist.

Gunee angl loon, ne:

—Di's co' ngue niin lool ndxè' nac di's co' nac licpe' che'n Diox co' gunee Diox loon par niina lool.

<sup>10</sup> Láth ndyoodi's angl loon, mdub xiben loo angl no mcò'en yéquen loo angl. Per ale ndxe'leque, gunee angl loon:

—Ne'lidel tatua' loon, ey. Tac daa nxo'f zin' cón che'n Diox xalque' nxo'f zin'l cón che'n Diox no xalque' nxo'f zin' mèn co' ndxàc hues lùu por cón che'n Jesucrist, mèn co' altant ndyoo par ngo mèn yalbàn cón che'n Tad Jesús. Más huen ftub xibl no fcòo' yécl loo Diox.

Rye mèn co' nde'th di's co' ndxab Diox, mèna nac mèn co' ngo xo'f no co' nda' cuent cón che'n Jesús.

*Trè' ndlu' cón che'n thib mbi' co' mdub huay nagus.*

<sup>11</sup> Be taa be taa ndoon ale gunèen mxaquen mxyal' loo bé'. No mxaquen ale, chàa, ngro' too thib huay nagus. No mdub thib mbi' huay. Mbi' co' ndub huaya lèe, xal ndxòn mèn di's, Anze'f Altant. No lèe mbi', xal ndxòn mèn di's, Licpe'. Tataa lèe mbi' tac co'se' ñibe' mbi', nalì no nambii ñibe' mbi' loo mèn. No li mbi' xó' xal ndxàalpe'i loo mèn loo izlyo' par co xtàa mbi' ryethe con' ye'rsin' co' mbli mèn ye'rsin' loo chol mèn. <sup>12</sup> Mxaquen ndxaa'd bèel ngudloo mbi' xal co'se' ndxetoo bèel. No mxaquen ndub huax coron yécl mbi'. No ndub thib di's co' nac tedib lèe mbi' lechuz mbi'. No ante mbi' nanee no non mbi' cón nee di's di's co' nacguè' lèea. <sup>13</sup> Noc xab mbi' thib ned xab mbi' co' nago' con renpe' mèn. No lèeguè' mbi', xal ndxòn mèn di's, nac Xti's che'n Diox. <sup>14</sup> No ndoo nque huax angl co' nac solndad co' nzo loo bé' xís mbi'. Angla gunèen noc xab anabte lar' nagus bèelleque' co' ngòc lar' co' anze'f nambii, co' ngòcque' thib lar' huen co' lèe lin. No ndub angla anabte huay nagus. <sup>15</sup> No mxaquen ndryo' thib spad co' nalen tín' ryop

loo ro mbi'. Spada làa mbi' rloo mèn co' nac mèn rye nación dib athu loo izlyo'. No ñibe' yèe mbi' loo mèn rye nación dib athu loo izlyo'. No noo noo tub rez mbi' cón che'n rye mèn dib athu loo izlyo' xalque' ndxàal gàca loo mèn. Ne'lyatte lezo' mbi' ñèe mbi' mèn huiza. Ale ndxe'leque', tetii tìn' mbi' mèn dib athu loo izlyo' axta plóthe por ndxecloo Diox ñèe Diox mèn, Diox co' ndxàp rye loothe con' roo no con' xèn la's nii Diox no la's ya' Diox. <sup>16</sup>No ne' mbi' di's co' mbez taandxè': Rey co' ñibe' loo rye rey loo izlyo', no loo mèn nac zin' co' ñibe' loo xtàa loo izlyo', no loo Tad co' ñibe' loo mèn co' nde'f di's nac Tad loo izlyo'. Di'sa ndub lad xab mbi' co'te' nac pech mbi' no co'te' nac bé' fcha' cor' mbi'.

<sup>17</sup>Chàa, ngua loon gunèen thib angl co' ndoo loo huiz xal co'se' ndyoo mèn loo thib banc. Angla cabii ngrozèe loo rye mbin co' nxobii loo mbii. Ndxab angl loo mbin:

—Que de gu', no thidte queltàa gu' par hua rsè gu' thib rsè co' mbli nab Diox hua gu'.

<sup>18</sup>Gu' hua bé' co' nac bé' mèn co' ngòc rey. No hua gu' bé' che'n mèn co' ngòc mèn nac zin' co' mnibe' loo xtàa mèn dib athu loo izlyo'. No hua gu' bé' mèn co' ñibe' loo solndad. No hua gu' bé' mèn co' ndli cuent anze'f mbi'. No hua gu' bé' huay. No hua gu' bé' mèn co' ndyub huay. No hua gu' bé' ryethe mèn, que nac mènà mèn co' yende chó taamas mèn ñii loo co' nacguè' mèn co' yende chó mèn mbee nca', que nac mènà moz co' nac moz yèe loo patrón, que nac mènà mèn be'the, que nac mènà mèn co' nde'f di's nac mèn roo no mèn xèn. Hua gu' bé' mènà.

<sup>19</sup>Sya, gunèen má' tìn'a, no rye mèn co' ngòc rey co' nac mèn nac zin' co' ñibe' loo xtàa mèn dib athu loo izlyo' con rye solndad mènà. Ryete mènà mqueltàa par li mènà xó' con mbi' co' ndub huay nagus no con solndad mbi'. <sup>20</sup>Per solndad mbi' thidte mxen má' tìn'a xal thib pres con mbi' co' mbez nde'th di's co' ndxab Diox. Per di's co' nde'th mbi'a nac di's gutyè'túb, mbi' co' mbli huax yalguzye' loo má' tìn'. No por mbli mbi'a huax yalguzye' co' nac yalguzye' gutyè' loo mèn, mbli mbi' par mquedi mbi' huax mèn par mbla' mèn mquée señ che'n má' tìn'a lechuz o la's ya' mèn. No mbli mbi'a par mdub xib rye mènà loo gunab che'n má' tìn'a. Leque hora, mblo mbi' co' mdub huay nagus má' tìn' no mbi' co' mde'th di's gutyè', ndoo lì ndoo ga' má', ndoo lì ndoo ga' mbi', ngulàa mbi' le'n ye'rbiiil co'te' ndxetoo bèel co' ndxol con asufr. <sup>21</sup>Le' taamas solndad che'n má'a no mèn co' ngòc rey co' ngòc mèn co' mnibe' loo xtàa dib athu loo izlyo'a na, nguth con spad co' mdub ro mbi' co' mdub huay nagus. No leque hora nduhua mbin bé' bé' rye mènà axta plóthe.

## 20

### *Mebizya gac xal thib pres le'n ye'rbiiil le'n thib mil lín'.*

<sup>1</sup>Ngolo nguri'th ryethe con'a, gunèen thib angl co' nde làa loo bé' loo izlyo'. Ne' angl lyab che'n puert ye'rbiiil. No ne' angl thib caden fcha' ya' angl. <sup>2</sup>Angla mxen má' co' lèe Dragón, má' co' ne' tedib lèe Mbel' Gox, má' co' nac merpe' Mebizya, má' co' ne' tedib lèe co' nac lèe Satanás. Mquedó' angla Mebizya. <sup>3</sup>Ngoloa, mblobii angl Mebizya le'n ye'rbiiil. Tya, mtegòo angl Mebizya no mque' angl thib señ loo puert par tataa mod ya ne'ryo'de Mebizya par tolo quedii Mebizya mèn rye nación co' naban dib athu loo izlyo'. Per co'se' ngolo thib mil lín' co' nzo má' le'n ye'rbiiil, Diox mnibe' par ngro' Mebizya le'n ye'rbiiil le'n ndxep tiemp xal non Diox naquin gàca.

<sup>4</sup>No gunèen nzi bel' plá asient thib lugar loo izlyo'. Loo asienta nzi ndub mèn co' mbli Diox par ngòp mènà con' la's nii mènà no la's ya' mènà par tub rez mènà cón che'n taamas mèn. Lomisque' ne, gunèen alm no xpìi mèn co' mcho' mèn yéc por mda' mènà cuent cón che'n Jesús loo mèn no por cón che'n di's ndac che'n Diox co' mblo mènà yalbàn loo mèn. Mènà ngòc mèn co' ne'ndub xibte no co' ne'ncòo'de yéc loo má' tìn' no loo gunab má' tìn'. No ne' ne' ngla' mènà nquée señ che'n má' tìn' no che'n gunab má' tìn' lechuz o la's ya' mènà. Gunèen, ne, le' mènà ngro xban. No mnibe' no mènà Crist le'n thib mil lín'. <sup>5</sup>Per taamas mèn co' nguth co' ne'ndalte ngala's loo Jesucrist no loo cón che'n Jesucrist, ne'ngro xbante mènà hora. Mènà ryo xban axta co'se' tyaa thib mil



lín'. Co'se' ngro xban mèn co' mnibe' no Crist thib mil lín'a, leque hora, ngòc tiemp co' nerleque' ngro xban mèn co' ngro xban làth mèn nguth, mèn co' ngola's loo Jesucrist. <sup>6</sup> Huen nda mèn, no ndyac lezo' mèn, no ngòc mèna mèn co' ngro xà'le' loo ryethe con' ye'rsin' par ngòc mèna che'npe' Diox, mèn co' ngro xban leque tiemp co'se' ngro xban mèn co' mnibe' no Crist thib mil lín'. Mèna ne'co' xà'de Diox loo Diox co'te' nzo Diox par tetii Diox mèna thidtene. Ndxé'leque', gac mèna mèn co' mbez no co' gab con' roo no con' xèn no con' natú' loo mèn cón che'n Diox. No gab mèna con' roo no con' xèn no con' natú' loo Diox. Tataa mod li mèna sirv loo Diox no loo Jesucrist. No ñibe' no mèna Crist thib mil lín'.

<sup>7</sup> Co'se' ngolo nguri'th thib mil lín'a, Diox mnibe' par ngro' Mebizya le'n ye'rbiiil co'te' ngòc lezi'f co'te' ngòc Mebizya. <sup>8</sup> Mebizya ngro' le'n ye'rbiiil par mquedi Mebizya mèn rye nación co' nzi ban dib athu loo izlyo'. No mquedi Mebizya mbi' co' lèe Gog. No mquedi Mebizya mèn che'n nación Magog co'te' ñibe' mbi' co' lèe Gog. No mbli Mebizya par queltàa rye solndad che'n nación Magog. Solndad che'n nación Magoga axta ne' ne' ñee mèn plá solndad tac nac solndada mènley' xal yux co' nziri' ro nító'. <sup>9</sup> Ryete solndada queltàa co'te' nac ciuda Jerusalén par tau' solndad dib vuelt ro ciuda Jerusalén co' nac ciuda co' anze'f nque' lezo' Diox. No tau' solndad loo mèn co' mblá' cón che'n xab izlyo', mèn co' nzo loo cón che'n Diox, mèn co' mqueltàa thib lad gaxte ro ciuda Jerusalén par li solndad xó' con rye mèna. Per ndoore' li solndad xó' loo mèna, Diox mbli ngulàa quii loo bé' par thidtene mbyec solndada. <sup>10</sup> Le' Mebizya co' mquedi solndada na, thib líte mbli Diox par ngulàa Mebizya le'n thib lugar roo tín' co' ñaa xal thib lagun co'te' ndxetoo bèel co' ndxol con asufr, no co'te' ngulàa má' co' ngòc má' tín' no co'te' ngulàa mbi' gutyè' co' mbez nde'th di's co' ndxab Diox. Mèna tyactii tya thidtene ze no yál'.

*Diox tub rez cón che'n ryethe mèn co'te' ndub Diox loo thib asient nagus.*

<sup>11</sup> Ngoloa, chàa, mberen, mxaquen gunèen ndoo thib asient nagus co' anze'f naroo. Nde nixon', gunèen ndub Diox loo asient. Be taa ndoon, chàa, setilte mdyon' bé' no izlyo' loo Diox. Ya yende pá mbyan' be' no izlyo' thidtene. <sup>12</sup> No gunèen ryete mèn co' nguthle', co' mbli Diox ngro xban hora ante par cue mèna loo Diox cuante, mèn co' nde'f di's nac mèn roo no mèn xèn, no mèn co' nac mèn be'the. Thidte ngure rye mèna loo Diox. Gunèen mxyal' loo huax libr. No gunèen mxyal' loo thib libr co' nac tedib libr xà'. No loo libr co' nac thidte libr, loo libra ndub lèe ryete mèn co' yòo ban no Diox thidtene. Le' mèn nguth co' mbli Diox ngro xban na, Diox mdub rez cón che'n mèna xalque' nac co' mbli mèn xal ndub cón che'n thib thib mèn loo libr co'te' ndub lèe mèn. <sup>13</sup> Leque hora mxaquen ryete mèn co' nguth le'n nító', mèna ngro xban loo nító'. Lomisque' ne, mxaquen ryete mèn co' nguth co' ngòc le'n ye'rbiiil ngro' che le'n ye'rbiiil. Ryethe mèna ngro' che le'n ye'rbiiil. Ngure be mèna loo Diox par mdub rez Diox cón che'n mèna xalte nac co' mbli mèna loo izlyo' no xalte ngòc mod co' ngòp mèna loo izlyo'. <sup>14</sup> Ngoloa, mxaquen gunèen mbli Diox thib con' loo con' co' ndxòn mèn lèe yalguth co' ndli par ntin liz mèn. No mxaquen mbli Diox ngulàa con' co' ndxòn mèn ngro' lèe ye'rbiiil le'n quii no bèel co' nac thib lugar co' nziri' xal thib lagun brut co'te' ndxetoo bèel co' ndxol con thib loo dii co' lèe asufr. Loo quii no loo bèel co' ñaa xal thib lagun brut nac co'te' bii ryethe mèn, mèn co' co' xà' Diox loo Diox par tyactii mèn tya thidtene par thidtene yilo cuent che'n mèn. <sup>15</sup> Loo quii co'te' ñaa xal ñaa lagun brut, tya ñibe' Diox lyàa mèn, mèn co' indubte lèe loo libr co'te' ndub lèe mèn co' yòo ban no Diox thidtene. Aa. Tataaque' mbyú' loo con'a loon, daa co' lèe Juàn.

## 21

*Trè' ndlu' cón che'n tedib bé' cub co' cue no cón che'n tedib izlyo' cub co' cue yiloo. No ya ne'tolode cue nító'.*

<sup>1</sup> Ngoloa, gunèen thib bé' cub co' cue yiloo. Gunèen thib izlyo' cub co' cue yiloo, ne. Tac ner bé' co' nziri' no ner izlyo' co' nziri' mdyon' no mblith no. No ya ne'tolode cue nító'. <sup>2</sup> Daa co' nac Juàn co' mque' ye's ndxè' loo gu', daa gunèe thib ciuda natú' co'

nac tedib ciuda cub co' ne' leque lèe ciuda Jerusalén. Ciudaa nde làa loo bé' loo Diox. Ante nabe's natoxcua' ciudaa xal co'se' ndyoxcua' thib mza' co'se' ndxoc xab mza' par selya' mza' con mbyòo co' gac sa'l mza'. <sup>3</sup> Lomisque' ne, mbìnen di's co' mbyèn loo bé' co' mbez:

—Juàn, hui' nexa. Thidteneque' yo ban no mènà Diox le'n ciuda ba'. Gac mènà che'npe' Diox, ne. No yub Diox yo ban no mènà le'n ciuda ba' par gac Diox Diox che'npe' mènà thidtene. <sup>4</sup> No li Diox ya ne'gònte mènà thidtene. No li Diox ya ne'quéede yalguth loo mèn. No li Diox ya ne'cozèe yathte mèn. No li Diox ya ne'ten'te mèn yalnè no yalnaxi. Tac ryete mod co' ngòc mod co' mque tee ban mèn loo izlyo' co' ngòc ner izlyo' co' ngurea mdyon'le' no mblith nole'.

<sup>5</sup> Mbìnen gunee xa' co' ndub loo asienta loon, ne:

—Juàn, hui' nexa. Na li gac cub ryethe con'.

Mbìnen gunee xa' loon, ne:

—Fque' ye's cón che'n con' ngue niin lool ndxè', Juàn. Tac di's co' ngue niin lool nalle' nac lìpe'. No nzoque' mod yila's mèn no gáp mèn yalxla's cón che'n di's co' ngue niin ndxè'.

<sup>6</sup> Ngoloa, gunee xa' loon:

—Ya ngolole' mblin ryethe con' co' mcàbgònen lin loo mèn. Daa nzoque' thidtene. Nac daa xal letr “a” co' ntlo loo alfabet. No nac daa xal letr “z” co' nac lult letr loo alfabet. Mèn co' lya's yòo ban no daa thidtene, na ta yalnaban loo mènà par yòo ban no mènà daa thidtene xal co'se' axta ngal lezo' mèn ndxu mèn thib xi nít co'se' ndxec lezo' mèn co'te' ndub len nít. No yalnaban co' tan loo mèn ne'ti'de mèn yalnabana con nec thib centav. <sup>7</sup> Cona, ngue niin lool, Juàn: Mèn co' thidteneque' ngro xà' loo cón che'n xab izlyo' par ne'ta'de mèn lugar li Mebizya gan loo mèn, mènà gac che'n co' nac chenen. No gac daa Diox che'npe' mènà. Le' mènà na, gac xin'en loon. <sup>8</sup> Per por part cón che'n mèn co' nzyeb par li mèn ryes yòo mèn loo cón chenen, no mèn co' ne'tyalte yila's loon, no mèn co' ndxòo xyàn lezo' ñèe mèn daa, no mèn co' ndxuth xtàa, no mèn co' ndxòo lezo' ndli yalburrid, no mèn co' ndli yalbruj co' ndxòo lezo' tetii xtàa, no mèn co' ndyub xib no ncòo' mèn yéc mèn loo chol mdo' no loo chol gunab, no chol mèn co' nac mèn gutyè', ryete mènà go' cheen loon par go' xà'en mènà loon par yòo mènà co'te' nac thib lugar roo co' ñaa xal thib lagun roo co'te' ndxetoo bèel co' ndxol con asufr. Tya, ndoo li ndoo ga' mènà, ya rye mènà par tyactii mènà thidtene.

*Juàn gunèe xal ñaa ciuda Jerusalén cub co' cuec Diox yiloo.*

<sup>9</sup> Ngoloa, mbi'th thib angl co' ngòc che'n rye gaz angl co' mque no thib thib cop co' ngòo gaz loo yaltii co' ngòc con' ye'rsin' co' ngòc lult con' co' mbli Diox loo mèn par mtetii Diox mèn. Gunee angla loon:

—Juàn, que de ndxè'. Daa lu' lool cón che'n ciuda cub ba'. Ciuda ba' hue' leque lèe ciuda Jerusalén. Ciuda ba' nac loo Jesucrist xal thib mza' co' ndyoxcua' par selya' mza' con thib mbyòo.

<sup>10</sup> No láth mxyo'f loo con' co' mxo'f loo Xpii Natú' loona, mxaquen mbe' angl daa loo thib yii roo co' ndub axta arid gáp. Tya mblu' angl ciuda roo ciuda xèn loon, ciuda natú' co' ne' leque lèe ciuda Jerusalén. Ciudaa nde làa loo bé' loo Diox loo izlyo'. <sup>11</sup> Ciudaa mquée xnii con xnii co' nac xnii che'npe' Diox. Xnii co' mquée lad ciudaa ngòc xal xnii co' nquée loo thib loo quèe co' anze'f náp ntac xalque' nquée xnii loo tedib loo quèe co' lèe jasp co' ngüi' mèn par xís xal ngüi' mèn loo vidr cristal. <sup>12</sup> Dib vuelt xís ciuda ngure thib ftooo. Ftooa ngòc thib ftooo roo. No anze'f gáp nde'f ftooa. Nzi'f si' fchop puert lad ftooa. No ndoo angl thib thib ro puerta. No ndub lèe thib thib mèn, mèn co' nac che'n rye si' fchop mèn co' ngòc mèn co' mbløj msi' bin che'n mèn nación Israel loo thib thib puerta. <sup>13</sup> No gunèen ndub son puert lad ftooa par ned lad ndlyen huiz. No ndub taason puert lad ftooa par ned lad nort. No ndub taason puert lad ftooa par ned lad sur. No ndub taason puert lad ftooa par ned lad mbix huiz. <sup>14</sup> No quèe co' ngòc nii ftooo, co' nee di's, nac cimient che'n ciudaa ngòc si' fchop quèe. Co'se' gunèen nde làa dib zyaa ciudaa loo

bé' loo izlyo', gunèen mdub lèe ryete si' fchop myen' co' ngòc xin' mté'th Jesucrist co' mtel' Jesucrist loo mèn par mbe' myen' di's che'n Jesucrist loo mèn loo izlyo' lad quèea, Jesucrist co' ne' tedib lèe Mbackxil' che'n Diox.

<sup>15</sup> Le' angl co' mdoodi's nona na, gunèen nzo thib bro yaa co' ñaa xal yí co' ñaa xal or ya' angl co' nac par chi'x angl ciuda no par chi'x angl puert che'n ciuda no par chi'x angl ftoo che'n ciuda. <sup>16</sup> Ciudaa thidte nac dyap lad. Thidte nol'a. Thidte naxèna. Angla mchi'x ciudaa con bro yaa co' ñaa xal yí co' ñaa xal or co' mque no angl. Co'se' ngolo mchi'x angl ciudaa, mbix ciudaa chop mil nzo chop ayo kilometros de nol' ciuda, no de gáp, no de naxèn ciuda. Thidte bé' ó thidte medid ne' yon lad ciuda. <sup>17</sup> Ngoloa, sangmchi'x angl ftoo co' nziri' xís ciudaa con metr. Co'se' ngolo mchi'x angl ftooa con metr co' nac leque metr co' nchi'x mèn loo izlyo', naxèn loo ftooa ayon fthap metr.

<sup>18</sup> Le' ftoo co' nziri' par xís ciudaa na, natoxcua' con thib loo quèe co' anze'f náp ntac co' lèe jasp. Le' dib lad ciuda na, natoxcua' con ampurte or co' ñaa xal vidr co' anze'f nambii ñaa loo. <sup>19</sup> Le' si' fchop quèe co' nac quèe nii ciuda co' nac quèe cimient natoxcua' con rye loo quèe co' anze'f náp ntac. Ner quèea natoxcua' con thib loo quèe co' lèe jasp. Le' mbryop quèe na, natoxcua' con thib loo quèe co' lèe zafir. Le' mbyon quèe na, natoxcua' con thib loo quèe co' lèe agat. Le' dyap quèe na, natoxcua' con thib loo quèe co' lèe esmerald. <sup>20</sup> Le' quèe co' nac ga'y quèea na, natoxcua' con thib loo quèe co' lèe onis. Le' quèe co' nac xop quèea na, natoxcua' con thib loo quèe co' lèe cornalin. Le' quèe co' nac gaz quèea na, natoxcua' con thib loo quèe co' lèe crisolit. Le' quèe co' nac xon quèea na, natoxcua' con thib loo quèe co' lèe beril. Le' quèe co' nac yè' quèea na, natoxcua' con thib loo quèe co' lèe topas. Le' quèe co' nac si' quèea na, natoxcua' con thib loo quèe co' lèe crisopras. Le' quèe co' nac si' fthib quèea na, natoxcua' con thib loo quèe co' lèe jacint. Le' quèe co' nac si' fchop quèea na, natoxcua' con thib loo quèe co' lèe amatist. <sup>21</sup> Ryete si' fchop puerta ngòc si' fchop quèe perl. Thib thib puerta natoxcua' con thib loo quèe co' lèe quèe perl. Le' ned co' nac más ned roo che'n ciudaa na, natoxcua' con ampurte or co' ñaa xal vidr co' ngüi' mèn par xís, no par loo, co' nee di's, ndxú' mèn par le'n no par fuer.

<sup>22</sup> Ne'nghui'den nec thib templ le'n ciudaa. Tac yub Tad Diox co' ndxàp rye loothe con' la's nii Tad Diox no co' ndxàp rye loothe con' la's ya' Tad Diox, no yub Tad Jesucrist co' ne' tedib lèe co' lèe Mbackxil' che'npe' Diox, nac templ che'n ciudaa. <sup>23</sup> Ciudaa ya inquinte tenii huiz. Ne' ne' inquin tenii mbe' le'n ciudaa. Tac leque xnii co' nquée xnii Diox tenii le'n ciudaa. No leque bèel co' ndxa'x lad Jesucrist nac xnii co' ntenii le'n ciudaa. <sup>24</sup> Le' mèn rye nación co' nziri' dib athu loo izlyo' co' mblyá'le' loo con' ryes na, mènna quée lyàa no que tee mènna loo xnii co' ndxà'x le'n ciudaa. Le' rye mèn co' ngòc rey co' ñibe' loo xtàa loo izlyo' ndxè' tiempa, mènna li con' roo no con' xèn loo Diox le'n ciudaa. Li mènna con' guryath no con' guryèn loo Diox le'n ciudaa, ne. <sup>25</sup> Puert che'n ciudaa thidtene ne'yau'te ryete huiz. Co'se' gac tiempa, ne'lyàade yál' izlyo'. <sup>26</sup> Co'se' gac tiempa mèn che'n ryete nación dib athu loo izlyo', mènna li par gac con' roo no con' xèn loo Diox no li mènna par gac con' guryath no con' guryèn loo Diox. <sup>27</sup> Co'se' cue ciudaa, nec thib con' zab no nec thib mèn zab ne'yòode le'n ciudaa. No nec thib mèn co' ndxòo xyàn lezo' ñèe hues xtàa no nec thib mèn co' nquedii xtàa ne'yòode le'n ciudaa. Mèn co' yòo le'n ciudaa, mènna gac mèn co' ndub lèe loo libr co'te' ndub lèe mèn co' yòo ban no Diox thidtene. Libra ngue no mbi' co' lèe Mbackxil' co' nac leque yub Tad Jesucrist.

## 22

<sup>1</sup> Be taa be taa ndoon, chàa, mxaquen mblu' angl thib yó'be' co'te' nzo'f nít co' nda' yalnaban loo mèn. Níta ante nambii ñaa. Ñaa níta xal vidr cristal. Mxaquen le' co'te' ndub Diox loo asient no co'te' ndub Mbackxil' co' nac leque yub Jesucrist ngro' yó'be'a, ndyaquen. <sup>2</sup> Yó'be'a nguri'th xtau'the ned co' nac más ned roo le'n ciudaa. Lomisque' ne, ryop lad ro yó'be'a mbryoo mxyèn thib loo yaa nayèe co' nac yaa co' nda' yalnaban loo mèn. Yaaa nda' xlè si' fchop vez le'n lín'. Cad mbe' nda' yaaa xlè. Le' laa che'n yaa

nayèea na, ndli sirv par nteyac mèn che'n rye nación co' ndyac len le'n rye nación. <sup>3</sup> No nec thib con' co' yo le'n ciudaa gac con' ye'rsin'túb loo Diox. Huiza no tiempa, asient co'te' tyub Diox no co'te' tyub mbi' co' lèe Mbacxil' che'n Diox co' nac leque Jesucrist tyoo le'n ciudaa. Le' ryete mèn co' mxo'f zin' zin' cón che'n Diox loo Diox na, ryete mènà còo' yéc loo Diox no tyub xib mènà loo Diox. <sup>4</sup> Huiza no tiempa hui' mènà loo Diox xal ñaa Diox. No hue' mènà lèe Diox lechuz mènà. <sup>5</sup> Le'n ciudaa ya ne'lyàade yál' izlyo' thidtene. Le' mèn co' nzo ban le'n ciudaa na, ne' ne' inquin mènà xnii che'n nec thib lampr. Ne' ne' inquin mènà xnii huiz. Tac yub Tad Diox tenii loo mènà. Huiza ryete mènà ñibe' no Diox thidtene loo con' ñibe' Diox.

*Trè' ndlu' le' tiemp co' gac tiemp co'se' yi'th xi Jesucrist na' nde zin' gaxle'.*

<sup>6</sup> Tolo gunee angla loon:

—Di's co' ngue niin lool ndxè' nac licpe', Juàn. Nzoque' mod gáp mèn yalxla's xal nac di's co' ngue niin ndxe' no yila's mèn di's ndxè'. Yub Tad co' nac Tad Diox ndli par non mèn co' nde'th di's co' ndxab Diox cón che'n co' ndxab Diox. Diox mtel' angl che'n Diox loo mènà par mblu' angl loo mèn co' mde'th di's co' ndxab Diox no par mda' angl cuent loo mèn cón che'n Diox par ta' mènà cuent loo mèn cón che'n co' li Diox gac loo mèn yiloo.

<sup>7</sup> Gunee Tad Jesucrist loon le' ya ne'lyen'te Tad Jesucrist. Chàa, yi'th Tad Jesucrist. No gunee Tad Jesucrist loon:

—Huen nda mèn co' ndub nza no co' ndli cas cón che'n con' co' ndxab Diox li Diox loo mèn xal nac di's co' ndub loo libr ndxè'.

<sup>8</sup> Yub daa co' nac Juàn mbìn rye di'sa. No gunèen ngòc ryethe con'a. Per co'se' ngolo mbìnèen di'sa no ngolo gunèen ngòc ryethe con'a, mdub xiben xàn' nii angl co' mblu' rye con'a loon par còo'en yéquen loo angl. <sup>9</sup> Per le'le' gunee angl loon:

—Ne'lidel tatua' loon, Juàn. Daa, ne, nac mèn co' nxo'f zin' co' nac zin' cón che'n Diox xalque' nxo'f zin' lùu cón che'n Diox con mèn co' ndxàc huesl por cón che'n Jesucrist, gu' co' nac mèn co' nde'th con' co' ndxab Diox, no gu' co' nac ryete mèn co' ndub nza no co' ndli cas di's co' ndub loo libr ndxè'. Más huen ftub xib loo Diox no fcòo' yécl loo Diox, ndee.

<sup>10</sup> Gunee angla loon, ne:

—Ne'ca'stel cón che'n co' ndlu' di's co' nac di's co' ndxab Diox xal nac di's co' ndub loo libr ndxè'. Ndxè'leque', fta' cuent cón che'n di's ndac ndxè' loo mèn loo xnaa. Tac nde zin'le' tiemp no nde zin'le' huiz co'se' gac con' xal nac di's co' ndlu' loo libr ndxè'.

<sup>11</sup> Gunee angla loon, ne:

—La'a tolo li mèn ye'rsin' con' co' nac con' ye'rsin' co' más ndxòo lezo' mèn ye'rsin' li mèn ye'rsin'. No la'a tolo li mèn zab con' co' nac con' zab co' más ndxòo lezo' mèn zab li mèn zab. Le' por part cón che'n mèn ndac na, la'a tolo li mèn ndac con' co' nac más con' ndac. Lomisque' ne, mèn co' ngro xà' loo cón che'n xab izlyo' par li mènà con' ndac loo Diox, la'a tolo li mènà con' ndac loo Diox no tyoo mènà más altant loo cón che'n Diox.

<sup>12</sup> Látha, ndyaquen mbìnèen gunee Tad Jesús loon:

—Aa. Ne'lyen'te daa, Juàn. Chàa, galen. No lin par gac con' loo mèn xalque' nac con' co' mbli thib thib mèn. <sup>13</sup> Daa nzoque' thidtene. No nzolen ndoore' co'se' mblequen izlyo' no ngue xèn'en izlyo'. Nac daa xal letr “a” co' ntlo loo letr alfabet. No nac daa xal letr “z” co' nac lult letr loo alfabet.

<sup>14</sup> Huen gaca loo rye mèn, mèn co' ndli par mbiiche mèn loo ryethe co' nac xab izlyo' co' nac con' xin no con' cap co' ndli ncu'a'n mèn xtol mèn par gac mènà mèn nali no mèn nambii loo Diox por cón che'n Jesucrist. Tataa mod thib lite yòo mèn le'n ciuda co'te' ndoo yaa nayèe par ta' Diox xlè che'n yaaa par hua mèn par ban no mèn Diox thidtene. Le' sya, tataa mod ta' Diox lugar quée no lyàa mènà no yòo mènà no ryo' mènà ciudaa.

<sup>15</sup> Per ryete mèn co' ne'ndalte ngala's loon, no ryete mèn co' ndli yalbruj co' ndxòo lezo' ntetii xtàa, no ryete mèn co' ndxòo lezo' ndli yalburrid, no ryete mèn co' ndxuth xtàa, no ryete mèn co' ndyub xib loo chol mdo' no loo chol gunab, no ryete mèn co' anze'f

ndxòo lezo' ncu'a'n mod par nquediì mèn hues xtàa mèn, ryete mènà thidtene yan' par fuer no cue mènà par fuer co'te' nziri' ciudaa.

<sup>16</sup> Gunee Jesús loon, ne:

—Daa co' nac Jesús, daa mtel' angl daa loo mèn co' nzo loo cón chenen, mèn co' nqueltàa rye lugar par gab angl no ta' angl cuent loo mènà cón che'n ryethe con' ndxè'. Daa co' nac yub Jesús, daa nac bin che'n David co' ngòc rey póla. Daa li par ne'lyuxte bin David. No daa li par bere bin David, cue bin David no yar' bin David loo izlyo' tedib vez. Daa co' nac Jesús, yub daa nac mbi', co' nee di's, nac xal mbèelhui' co' lèe mbèel za'f co' ndlyen coyor yál' co'se' nde yiniì izlyo' tedib vez. Tataa mod ndlu'en loo gu' nde zin' gaxle' tiemp co' cue yiloo.

<sup>17</sup> Xpii Natú' no mèn co' nzo loo cón che'n Mbackxil' co' nac leque yub Jesucrist, mèn co' thidte ndxàc con Crist xal thib xin' sa'l, Xpii Natú'a no mènà mbez:

—De U', Tad Jesús.

No ryete gu' co' mbìn cón che'n di's co' ndub loo libr ndxè', guuz gu' loo Tad Jesús:

—De U', Tad Jesús.

No leque daa, Juàn, mbez loo chol mèn co' tyal gòn ron:

—Mèn co' ndly'a's no co' nguen lezo' par yòo mèn loo cón che'n Tad Jesús no ndxàc loo mènà xal co'se' ndxec lezo' mèn no capas ndly'a's mèn gu mèn nít, chele' mèn, lìcque', ly'a's yòo mèn loo cón che'n Tad Jesucrist, yòo mèn loo cón che'n Tad Jesucrist par ban no mèn Diox thidtene xal co'se' ndxu mèn nít. Yalnabana ne'ti'de mèn con nec thib centav.

<sup>18</sup> Lomisque' ne, ryete mèn co' ndxòn di's co' nac di's co' ndxab Diox co' ndub loo libr ndxè', ndlyazen xyo'f ndeleque' lezo' mèn te' lezo' mèn xal nac di's co' ndub loo libr ndxè' co' nac di's ndxè': Chele' chol mèn nzi'f di's co' ndub loo libr ndxè', Diox ne zi'f co' nac con' ye'rsin' la's nii mènà no la's ya' mènà xalque' nac di's co' ndlu' loo libr' ndxè'.

<sup>19</sup> No lomisque' ne, chele' chol mèn teche o ton' mèn ndxep di's co' nac di's co' ndxab Diox co' ndub loo libr ndxè', Diox, ne, ton' lèe mèn co' ndub loo libr co'te' ndub lèe mèn co' yòo ban no Diox thidtene. No ne'ta'de Diox lugar yòo mènà le'n ciuda co' nac ciuda natú' che'n Diox. Cón che'n mènà nac di's co' ndlu' loo libr ndxè'.

<sup>20</sup> Daa co' nac Jesucrist co' ngue ta cuent ndxè' lool, Juàn, daa, ne, mbez:

—Aa, ne'lyen'te daa. Chàa, galen loo izlyo' ndxè'.

Sya, chàa, mcàben. Ndxaben loo Tad Jesucrist:

—Aa, Tad Jesús, tataa gàca. De U' loo izlyo' ndxè'.

<sup>21</sup> Daa, Juàn, ndlyazen le' Tad Jesucrist li anggàc con' ndac loo rye gu' par nedrè'. Taandxè' gàca.